


Eta Táurinaquene máechajiruvahi ema Viya eta  
viyehe, ticaijare puito Eta Nuevo Testamento



New Testament in Ignaciano (BL:ign:Ignaciano)

# **Eta Táurinaquene máechajiriruvahi ema Viya eta viyehe, ticaijare puito Eta Nuevo Testamento New Testament in Ignaciano (BL:ign:Ignaciano)**

copyright © 2012 Wycliffe Bible Translators, Inc.

Language: Ignaciano

Translation by: Wycliffe Bible Translators, Inc.

## **Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible. You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

## **The New Testament**

in Ignaciano

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source files dated 29 Jan 2022

332465cd-916c-5bfc-8721-b0114be92360

## Contents

San Mateo . . . . .	1
San Marcos . . . . .	110
San Lucas . . . . .	180
San Juan . . . . .	298
Hechos . . . . .	379
Romanos . . . . .	483
1 Corintios . . . . .	527
2 Corintios . . . . .	572
Gálatas . . . . .	599
Efesios . . . . .	616
Filipenses . . . . .	632
Colosenses . . . . .	643
1 Tesalonicenses . . . . .	654
2 Tesalonicenses . . . . .	663
1 Timoteo . . . . .	668
2 Timoteo . . . . .	681
Tito . . . . .	690
Filemón . . . . .	696
Hebreos . . . . .	699
Santiago . . . . .	733
1 Pedro . . . . .	744
2 Pedro . . . . .	756
1 Juan . . . . .	764
2 Juan . . . . .	775
3 Juan . . . . .	777
Judas . . . . .	779
Apocalipsis . . . . .	783

# **Ema Apóstole Mateo májuequenehahi eta máichararacavahi ema Jesucristo, ticaijare puiti eta**

## **EANGELIO SEGÚN SAN MATEO**

*Ena achaneana máchucáequeneanaini ema Jesús eta acane  
(Lc 3.23-38)*

<sup>1</sup> Nuvaraha numetacaheya mayehe ema Jesucristo. Éma, vijaneanahi israelítahi, taicha eta mámariéquenérahi ema viáchucaíni Abraham. Énerichuvare, ema Jesús rey-yarehi taicha eta mámariéquenérahi ema víyarahaini rey David. Eta juca eta nalista ena máchucaequeñeanaini ema Jesús.

<sup>2</sup> Ema víyarahaini Abraham, macachichapa ema Isaac. Ema Isaac macachichapa ema Jacob. Ema Jacob macachichapa ema Judá énapa ena apamuriana maparapenaveana.

<sup>3</sup> Ema Judá macachichapa ema Fares émapa ema Zara. (Esu naena ticaijaru Tamar.) Ema Fares macachichapa ema Esrom. Ema Esrom macachichapa ema Aram.

<sup>4</sup> Ema Aram macachichapa ema Aminadab. Ema Aminadab macachichapa ema Naasón. Ema Naasón macachichapa ema Salmón.

<sup>5</sup> Ema Salmón macachichapa ema Booz. (Esu maena ticaijaru Rahab.) Ema Booz macachichapa ema Obed. (Esu maena ticaijaru Rut.) Ema Obed macachichapa ema Isaí.

<sup>6</sup> Ema Isaí macachichapa ema rey David. Ema rey David macachichapa ema Salomón. (Esu máenaini ticaijaru Betseba, esu mayenainihi ema Urías.)

<sup>7</sup> Ema Salomón macachichapa ema Roboam. Ema Roboam macachichapa ema Abías. Ema Abías macachichapa ema Asa.

<sup>8</sup> Ema Asa macachichapa ema Josafat. Ema Josafat macachichapa ema Joram. Ema Joram macachichapa ema Uzías.

<sup>9</sup> Ema Uzías macachichapa ema Jotam. Ema Jotam macachichapa ema Acaz. Ema Acaz macachichapa ema Ezequías.

<sup>10</sup> Ema Ezequías macachichapa ema Manasés. Ema Manasés macachichapa ema Amón. Ema Amón macachichapa ema Josías.

<sup>11</sup> Ema Josías macachichapa ema Jeconías énapa ena maparapenaveana, ena nacarataruanahi námaqueneanahi ena apavasana ticavasanahi te Babilonia.

<sup>12</sup> Te táequenepa eta juca, ema Jeconías macachichapa ema Salatiel. Ema Salatiel macachichapa ema Zorobabel.

<sup>13</sup> Ema Zorobabel macachichapa ema Abiud. Ema Abiud macachichapa ema Eliaquim. Ema Eliaquim macachichapa ema Azor.

<sup>14</sup> Ema Azor macachichapa ema Sadoc. Ema Sadoc macachichapa ema Aquim. Ema Aquim macachichapa ema Eliud.

<sup>15</sup> Ema Eliud macachichapa ema Eleazar. Ema Eleazar macachichapa ema Matán. Ema Matán macachichapa ema Jacob.

<sup>16</sup> Ema Jacob macachichapa ema José, ema suí mahi esu María, máenahi ema Jesús, ema ticaijare Cristo, ema vicucha-paquenehi.

<sup>17</sup> Tacahe, catorcemuriana ena mámariéquéqueneanainihi ema Abraham. Ema rey David, émapa náichecuinehi eta natupa. Tacahe, ema rey David, catorcemurianavare ena mámariequeneanainihi. Ena nacarataruanahi námaqueneanahi ena apavasanana te Babilonia, énapa náichecuinehi eta natupa. Ema Jeconías, catorcemuriana ena mámariéquéqueneanainihi. Ema Jesucristo, émapa náichecuinehi eta natupa.

*Eta máuchusira ema Jesús*

(Lc 2:1-7)

<sup>18</sup> Ani tacahehi eta máuchusirahi ema Jesucristo. Esu maena María, trá turipahi eta suítauchirayarehi ema José. Vuíchahasera nacachanecacahini. Ticajaripahisera ésu, mávajuechirahi ema Espíritu Santo.

<sup>19</sup> Ema José, téavicavahi eta máuriva. Eta tacahe, vahi tisemaimahi. Váhivare mavarahahini máimicatsiri acahini esu María. Mavarahahisera macaepaha eta matratune suyehe ésu. Váhisera mávarahahini náechahini ena achaneana eta tacayemaquenehi.

<sup>20</sup> Ema Viya máimararacahi eta mapanereruhi. Eta tacahe, tiúcupaicapa ema ángele mametapanahi te mavapure ema José. Ánipa máicha\*:

—Tata José, tímitecanuhi numetapanavi eta juca: Vahi picueñamava eta pítauchirayare esu María. Tájina píchavaimahi. Taicha ticajaripahi ésu, mávajuechirahi ema Espíritu Santo.

<sup>21</sup> Tacahe, te máuchucapa ema suchichayare, enacayare eta máijareyare JESÚS. Éma ticatiuchayare ena achaneana tayehe eta naviurevanayarehini taicha eta napecaturana —máichapa ema ángele.

---

\* **1:20** Ema ángele, eta máechajisirahi ema José, manacahi eta nayeherepi náechajisira ena israelítana. Ani macahehi: “Piti José, machicha ema David”.

<sup>22</sup> (Títauchavapahi tamutu eta juca máechajiruvanahi ema Viya mayehe ema víyarahaini profeta Isaías.

<sup>23</sup> Ani tacahehi: “Sutiarihiyare esu amaperu esena témunahiricavaya ticajari. Ema suchichayare, yátupiqueneyare eta émaira Viya, tiúcupauchahaviyare ticatiuchahavipanayare” tacahepa.)

<sup>24</sup> Tacahe, te téjamiuchavapa ema José eta macavapureirahi, ichaperinehi eta masuapirohi eta máechajiruvanahi ema ángele mavaneruhi ema Viya, eta máitauchirayarehi esu María.

<sup>25</sup> Váhisera nánecacahini te jena cájeanahi eta sucajarirahi. Tacahe, suínacapa ema suárachichahi. Nanacapa eta máijarehi JESÚS.

## 2

### *Náejirapana ema amuya ena reye mágoana*

<sup>1</sup> Eta máuchusinehi ema Jesús te avasare ticaijare Belén tayehe eta departamento Judea. Te jena año, ema Aluresi ema tayehehi rey eta Judea. Tásiha, títecapanapa te Jerusalén ena reye mágoana tiásihanahi te tayerehiquene avasare tinapaica te táuchusine eta sache.

<sup>2</sup> Nacayasesererupaipahi, ánipa nacahe:

—Víti, tímitecahavi eta vitanusirahi ema amuya máuchurehi rey-yarehi eyehe eti israelítana. Taicha vímahahi eta arairu jarairiqui, vémetearuhi máicutiarahi ema Viya eta máuchusinehi ema amuya rey-yare. Titupihapa eta te juca eyehe. Puiti vivaralahi véjirapanayare éma. ¿Távihapuca mávihahi ema amuya? —nacahepa.

<sup>3</sup> Te masamairiricapa ema Aluresi, ichaperinehi eta mapaneréqueneháirahi. Vaipa máurisamurehíni. Ena achaneana te tajuhe eta avasare, énerichuvare napaneréquenehahi éna apanavare eta juca téchacarehi.

<sup>4</sup> Tacahe, ema Aluresi máimichuhavacapa namutu ena tuparairucana énapa ena tituruequenehana eta Sagrada Escritura. Mayaserecavacapa:

—¿Távihapuca máuchusihayarehi ema vicuchapaquenehi ticaijareyare Cristo? —macahepa.

<sup>5</sup> Éna najicapapa:

—Te Belén te tachacaya eta juca viávasa Jerusalén. Taicha tacahehi eta májurehi ema víyarahaini profetaini Isaías. Máechajicahi éma eta avasare tímicutijiricavahi eta achanénahini. Ánipa macahe:

<sup>6</sup> “Piti avasare Belén, tachichavihi eta Judea, picunachaca-repánayare píti. Taicha eta máuchusihayarehi piyeho ema

ichapequeneyarehi eta maháquenucávayare. Éma, téchapajirimurihayare namutu ena vijaneanana israelítana".

<sup>7</sup> Tacahé, te masamapa ema Aluresi, máichuhavacapa ena mágoana. Mañajichamuripa, taicha mavaraha máechaya tájamuhupuca te tépanavainapa náimahapa eta jarairiqui.

<sup>8</sup> Te máechapa, mavanecavacapa éna te Belén. Máichapa:

—Eyana etanuca ema amuya te Belén. Te étupiacapuca, echava emetacanuyare, apaesa nuyana núti apanavare néjirapanayare —máichavacapa.

<sup>9</sup> Tacahé, ena mágoana, eta nasamirahi, tiyananavarepa. Tásicha, náimahavarepa eta jarairiqui náehirupahi. Tiyanapa te namirahu. Étapa te Belén eta tatupihaiyahi, te tainahu eta mávihahi ema amuya.

<sup>10</sup> Tétavicava eta náurisamurevahi ena mágoana eta náimairahi eta tatupihairaripa.

<sup>11</sup> Títecapánavanepa eta te peti mávihahi ema amuya. Náimahapa éma, ésupa esu maena María. Tásicha, tépuycanapa natsiucapa ema amuya. Navecuhapa eta námavahuanapahi. Náijaracasichapa eta oro, eta incienso étapa eta táijiyequene perfume.

<sup>12</sup> Te taequenepa eta néjirairahi ema amuya, tichavanyarepa te návasa. Apanapasera eta achene eta nayanihapahi, taicha ticametacasianapa te navapure vaipa nacuetavajica te mávihahi ema Aluresi.

*Ema José ésupa esu María náimijunapa ema amuya te Egipto*

<sup>13</sup> Tacahé, te taequenepa eta nayanirahi ena mágoana, tiúcupaicapa ema émana ángele mavaneruhi ema Viya, mametapanayarehi ema José te mavapure. Ánipa máicha:

—Péchepuca, José. Piyana piáma ema amuya ésupa esu María tayehe eta Egipto. Pinasiyare ánaqui. Tiámainucava te numetacavivare eta pichavirainapa, taicha ema Aluresi títecayare matanucayare ema amuya, mavairahi macapacayare —máichapa ema ángel.

<sup>14</sup> Tacahesera ema José téchepucapa. Tétupirícavanavanepa te jena yati. Tiyananapa námapa ema amuya tayehe eta Egipto.

<sup>15</sup> Nanasipa ánaqui. Tiámainucava te tépenapa ema Aluresi, ticavanahianavarepa mayehe ema ángele eta nachavirayare. Tamutu eta juca títauchavahi eta juca mametarapi ema Viya eta te Sagrada Escritura, ani macahehi: "Te Egipto nímijnaiyahí ema nuchicha. Te taequenepa, níchuhayarepa éma".

*Ema Aluresi máimicapapajicapa ena amuyanaini te avasare Belén*

**16** Tacahe, ema Aluresi te masamairiricapa eta nánucuiraripa ena mágoana, tisemarinehi eta navayuasirahi. Máimivanerecapa nacapapajicapaná namutu ena amuyana ajairana tiávihanahi te Belén énapa ena tiávihanahi te tachacayarahana, ena ticayeheanaripa apina año énapa ena náuchusirávana. Máepanaequenehapa eta táuchusihahi eta jarairiquí náimahaquenehí ena mágoana.

**17** Tacahe, te Belén eta táitauchiravahí eta májuchaquenehí ema víyarahaini profetaini Jeremías. Ani tacahehi:

**18** “Tétavicavahí eta najapanuiravahí ena esenana. Ichape eta náiyairahi taicha ena suntaruana nacapapajisirahi ena nachichanaveana. Nájina naratahahini nacamatinacahini taicha eta najapanuiravahí ichape” tacahepa.

**19** Tacahe, te jácani año te taequenepa eta máepenirahi ema Aluresi, tiápechavavarepa ema ángele máechajicahi ema José te mavapure ánaqui te Egipto. Ánipa maicha:

**20** —Péchepuca, José. Piveha ema amuya ésupa esu maena. Piyana pichava te piávasa Israel taicha vaipa taeñamavacare. Tépenaipahi ema tipanereuchainihi ticapacayarehini ema amuya —máichapa ema ángele.

**21** Jéhesare, ema José téchepucapa. Tétupiricavapa, ésupa esu maena ema amuya. Tiyananapa tichavanahí tayehe eta návasa.

**22** Tacahe, eta napaisirapahi eta nachavirapa tayehe eta návasa, masamairiricapa ema José eta maviravaipahi aque-nuca ema Arquelao, machicha ema Aluresini. Tipicapa ema José machavahini tayehe eta Belén. Tásiha, ema ángele mápechavarepa máechajicahi te mavapure eta matupiru-rayarepa te Nazaret te tinapaica Galilea.

**23** Te títecapanapa, ánaqui étapa náejasihahi. Tacahehi eta táitauchiravahí eta taechajiruvanahí eta Sagrada Escritura nájureanahí ena profetanaini eta macaijarerayarehi Nazareno ema Jesús.

### 3

*Ema Juan Tícachasiricarahi tépanavapa ticametarairu eta máechajiruva ema Viya nayehe ena vámahicuruuhana*

*(Mr 1.1-8; Lc 3.1-9, 15-17; Jn 1.19-28)*

**1** Tacahe, te jácani treinta añohi, matiarihihivare ema achane ticaijare Juan. Éma, máichuhaquehí ema Viya eta macametarairuirayare, máetupiricavacayare ena achaneana. Tacahe, masuapahi eta matuparahahi. Tiyanapa vámahicuruuhapa. Váipa avasarecuruhainahini. Ticametarairupaipa nayehe ena macutiqueneanahí

vámahicuruhana, ticavasanahi te tachausi eta Jordán te tinapaicahi eta Judea.

<sup>2</sup> Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, taicha márajapainapa ema aquenucayare mavaneruhi ema Viya —máichavacapa.

<sup>3</sup> Ánaquiaparipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanesirayare ema Machicha te juca apaquehe, ticatiurahiyarehi eta tímitecayarehi. Énerichuvare matiarihiyareva ema apuna achane máichuhaqueñeyarehi ema Viya. Macametarriruyarehi, máetupiricavacayare ena achaneana, náinajisirayarehi eta napanereruana tamauriqueneana, apaesa táuri eta najacapirayare ema Machicha ema Viya. Émaripa ema Juan, ema máechajisihaquenehi ema Viya, máetupiricavacayare ena achaneana.

<sup>4</sup> Ema Juan, vanairucahi me Viya, profetahi éma. Eta mamuirihahi eta náitsameru tajiyaha eta náitátiquene ticajare camello. Eta máitijuhe, vácapi jayumepi. Eta maniriji manicasare eta tsacara. Eta matítivera eta mápama.

<sup>5</sup> Tiyananavare nacapayaca ena achaneana ticavasana te Jerusalén, navarairahali nasamararaca eta máechajisihaquene; énapa ena ticavasana te Judea, énapa ena tiávihanahi tayehe eta cajacure Jordán.

<sup>6</sup> Tacahe, eta nametauresiravaipa, navarairahivare náinajica eta napecaturana, ema Juan máicachasicavacapaipa te cajacure Jordán.

<sup>7</sup> Énaripa ena fariséoana énapa ena saducéoana nayanauchahivare ema Juan. Vahi náeneuchavahini, navarahahisera ticaicachasiana. Tacahe, ema Juan máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táñehiqueneyare ecuñaraqui. Evarahahipuca iúchucuhayare.

<sup>8</sup> Tiuri puiti, te evarahapuca eta iúchucuha, yátupina tátupiruva eta epanereruana. Ímerecava eta ínajisiraya eta epecaturana.

<sup>9</sup> Váhivare ecucajamurava eta mámariéqueneháirahehi ema viáchucaíni Abraham. Taicha tayanapane mámarihepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mávarahapuca, vahi máejecarachaimahi máepiyaca achaneanaina eta juca mari, mavarairainahi yátupina ena mámariequeñeanaina ema Abraham.

<sup>10</sup> Ecauneuchava, taicha tiánehipa eta táitecapauchirahavyare eta ecuñaraqui nayehe ena achaneana máitucaranahahí téneuchavana, válivare náitsivachahini eta napane-reruana. Tímicutijirícavaipa te máechucayarepa ema achane eta yucuqui máhireana. Ticaechuyarehi tamutu eta tapareana. Tíjuyarehi.

<sup>11</sup> Yátupi núti nícacachasicahehi te une, te éneuchava mayehe ema Viya. Ávanepaipahisera mácani ema yátupiquene Cristo. Te yátupina ecasiñava mayehe, tícachasicaheyareva; tíjara-caheyareva ema Espíritu Santo. Téhesera vahi ecucasiñavapuca mayehe, tícuñacaheyare tayehe eta táijurequene yugu. Éma, ichapequenehi nuyehe núti. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami.

<sup>12</sup> Puiti éma márajapainapa tinerejiricainapa nácani yátupiqueneana téhicana. Máunacainapa éna. Ticutinapa mácani achane te tiácatayajirica eta arusu. Máunacainapa. Tásiha, máquijicapa eta tapiraquiji. Máijuchayarepa te yugu. Eta nacaheyare ena máurirahanahí, tíjuanáinapa te yugu, máitavacayarehi eta namuruira —máichavacapa ema Juan.

*Eta macaicachasirahi ema Jesús  
(Mr 1.9-11; Lc 3.21-22)*

<sup>13</sup> Tacahe, títecapavarepa ema Jesús te cajacure Jordán te mávihahi ema Juan. Éma, másihapahí te tinapaica eta Galilea. Mavarahahi ticaicachasiyare mayehe ema Juan.

<sup>14</sup> Émasera ema Juan, vahi mávarahahini máicachasicahini. Ánipa macahe:

—Tata Jesús, nútira táuricahi nútivaina pícacachasicanu. Nusapi-hapa núti picaijuhenuhi eta nícacachasicaviya —máichapa.

<sup>15</sup> Émasera ema Jesús majicapapa:

—Tájinachucha táichava. Ticamunucarehi nítouchayare eta mavarahaquenehi ema Nucaiyaquene —máichapa.

Tásiha, ema Juan tísapavapa.

<sup>16</sup> Te tamutupa eta macaicachasirahi ema Jesús, tiúcupaicapa tayehe eta une. Tásiha, tíjahúchavapa téjiaca eta anuma. Máimahapa ema Espíritu Santo tiúcupaicapaipahi, mavasimahipaipa eta paloma. Tavenesicapa ema Jesús.

<sup>17</sup> Tacahe, tiáramicarepa eta mahu ema Viya tásihaquenehi te anuma, ánipa macahe:

—Ema maca ema yátupiquenehi nuchicha némunaruquenehi. Tétavicavahi eta núrisamurevahi máicha —macahepa.

**4**

*Ema Váinaraji Satanás mavaraha macaitsamaraji ema Jesús  
(Mr 1.12-13; Lc 4.1-13)*

<sup>1</sup> Tacahe, ema Espíritu Santo enurujipa máimitucaipahi ema Jesús eta mayaniraya te mávapahi apaquehe. Ánaqui macuchapayarehi eta máitsamarajiyare ema Váinaraji.

<sup>2</sup> Tájina manicahini ema Jesús te jena cuarentaquenehi sache, cuarentavare yati eta mayerevahi. Ichapepa eta máecuavahi.

<sup>3</sup> Tásiha, ema Váinaraji témeñahavapa mayehe. Mavarahapa macaetemayarehi. Ánipa máicha:

—¿Pécuhapa pítí? Tacahe, pivaneca eta juca mari táepiyacava pan, taicha pítí machichavihi ema Viya, ¿masí? —máichapa.

<sup>4</sup> Ema Jesús majicapapa:

—Váhipuca pecha eta táchajiruvahi eta Sagrada Escritura, ani tacahehi: “Vahi tacarichuimahi eta tñicacare ticaitarecayare ena achaneana. Tacachaneyarehi eta máechajiruvana ema Viya. Jéhevare, éta ticaitarecarahiyare” macahepa.

<sup>5</sup> Tásiha, ema Váinaraji mámavarepa tayehe eta tacapica-huquene avasare Jerusalén. Máimiapanapa te táinahu eta Templo.

<sup>6</sup> Tásiha, máichapa:

—Te yátupina machichavina ema Viya, písapavayare pémirica te apaquehe. Tájina píchavaimahi eta pémirisirayare. Pécharichuhi eta táchajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajircaviana. Tiámavianayare te navahuana, apaesa vahi picucayutetu eta mariana eta te pipaisirayare” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

<sup>7</sup> Tacahe, ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamaramajimahi ema Viya, taicha Piáquenuhi éma” —máichapa.

<sup>8</sup> Tacahe, ema Váinaraji mámavarepa te táinahu eta anuquehe mari cerro. Máimechapa tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji. Máimechavarepa eta ichapequeneana náimahaqueneana ena achaneana.

<sup>9</sup> Tacahe, máichapa:

—Núti níjaracaviyare tamutu eta juca avasareana. Pítina náquenuvina ena távacuanahi eta avasareana. Pépuyucanumasera te numirahu. Pitsiucanu apaesa níjaracavisarepa tamutu —máichapa ema Vainaraji.

<sup>10</sup> Émasera ema Jesús majicapapa:

—Pévuishatataji piti Satanás te juca numirahu. Váhipuca pecha eta táchajiriruvahí eta Sagrada Escritura. Ani tacahéhi: “Macarichu ema Viya vépuyumirauchayare. Macarichuvare vicaematanacayare” tacahépa. Váhiqene taurica nucaematanacavihini —máichapa ema Jesús.

<sup>11</sup> Tacahé, ema Vainaraji térajicavapa. Majunijicapa ema Jesús. Tásiha, tiúcupaicanapa ena ángeleana, náechapajiricapa ema Jesús.

*Ema Jesús tépanavapa ticametarairu*

(*Mr 1.14-15; Lc 4.14-15*)

<sup>12</sup> Tacahé, te jena sácheana, nacaratacapa ema Juan. Námapa te jácani tayererehiquene. Tacahé, ema Jesús, eta masamairisirapa eta macaeratairahi te cárcel ema macheji Juan, tiyanapa tichava te mávasa Nazaret te Galilea.

<sup>13-17</sup> Váipasera máñasihini te majurusinehi. Tiyanapa tayehe eta avasare Caperaum. Étapa máejasihahi. Eta juca avasare távhahi te tachausi eta cáquiure Galilea. Eta macametarairuirahi, tamutuhi mapaica eta tinapaica eta provincia Galilea\*

—Éneuchava mayehe ema Viya. Ítsivacha eta epaneruana, taicha tiánehi eta sácheyare tímerecavaya eyehe ema ticatiuchahayare. Aquenucayare mavaneruhi ema Viya, téchaheyare éma —máichavacapa.

Eta juca títauchavahí eta májureanahi ema víyarahaini profeta Isaías, ani tacahéhi: “Tiúricacareanainapa ena achaneana cávasanahi te tachausi eta cáquiure Galilea tayehe eta provincia Zabalón étapa eta Neftalí, namutu támairiaca ena ticavasana te apachara eta Jordán. Éna, tiyerehi eta nacatajivairanahi, tacuti eta tavayureva eta tamapicuva. Puítisera máitecapau-chavacaripahi ema timícauchamurihi. Ticatiuchavacayarehi tayehe eta nacatajivairahi. Éma, tétumechavacahivare eta mamícauchiravacahi” tacahépa.

*Ema Jesús máichuha ena cuátroqueneana ténicarahiana, máimitureanayare*

(*Mr 1.16-20; Lc 5.1-11*)

---

\* **4:13-17** Ema profeta Isaías, ánivare macahéhi eta máechajisihairahi: “...étaripa eta provincia táviha náitecapihahi ena apavasanana”. (Acane eta juca apaquehe, apina eta apana táijareanaini: eta Zabalón étapa Neftalí.) Eta máimitusiravacahi ena achaneana, ánipa maicha ema Jesús:

<sup>18</sup> Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema ticaijarehi Simón Pedro émapa ema maparape Andrés. Eta náematanerepi ena nani, ténicarahianahi. Náquijierecahi eta nayehe tarrafa.

<sup>19</sup> Tacahe, ema Jesús máichuhavacapa:

—Yare, éhicanu. Núti njáracahaheyare eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranayare ema Viya — máichuhavacapa.

<sup>20</sup> Enevanepa náinajicapa éna eta náenisirahi. Tiyananapa náehicapa ema Jesús.

<sup>21</sup> Ánaquipanavarepa máimahavarepa ema Jesús ena apinana ticaparapecácanavare: ema Jacobo émapa ema Juan. Téjacanahi te napacure. Matiarihihivare ema naiya Zebedeo. Náitijiricahi eta nayehe tarrafa. Ema Jesús máichuhavarepa.

<sup>22</sup> Enurujipa náehicavare. Nanaquicavarepa eta napacure, émapa ema naiya. Najunijicavarepa.

*Ema Jesús máimitucavacapa ena camuriqueneana achaneana  
(Lc 6.17-19)*

<sup>23</sup> Eta mapaisirahi ema Jesús tayehe eta avasareana te Galilea, máimitucavacapahi ena achaneana te sávarumuahuana tayehe eta náurujisirarevana. Mavanecapa eta náeneuchiravaina taicha tiánehipa eta sácheyare tímerecavayare ema ticatiuchayare, ema aquenucayare mavaneruhi ema Viya. Énerichuvare ema Jesús macanaracapahivare tamutu eta apanapanequeneanahi jumareana eta najumanapahi ena achaneana.

<sup>24</sup> Tacahe, nasamairiricapa ena achaneana ticavasanahi eta tasimutuqueneana avasareana te tinapaica eta Siria. Tásicha, námavacapaipa ena nacajumaqueneana, apanapanenejiquenehi eta najumana, nacatiruhavanahi. Énaripa ena návaháruanahi ena éreanana, ena tirapapasiana, énapa ena muracaquihana. Namutu ena nani, macanaracavacapahi ema Jesús.

<sup>25</sup> Tacahe, camuriana ena achaneana téhicanahi éma. Éna, tiásihana te Galilea, te Judea, te Jerusalén, te avasareana tinapaica eta Decápolis, étapa te apachara eta Jordán.

## 5

*Ema Jesús máimitucahi nayehe ena ticunachacareanahi me Viya  
(Lc 6.20-23)*

<sup>1</sup> Tacahe, eta máimairavacahi ema Jesús ena camuri-queneana achaneana, tiápanapa tayehe eta anuquehepahi apaquehe taicha tiúripanahi eta nasamararasirayarehi ena achaneana. Téjacaripa éma, énapa ena máimitureana nachaya-caipahi.

<sup>2</sup> Ani tacahehi eta máimiturapihanahi:

<sup>3</sup> —Ena náimatihí eta tacamunuqueneanahi eta náchanevana, téavicavahi eta náuricacarevaya taicha máejerare eta najaca-pirayare eta máechajiriruva ema Viya, machaneranayarehi.

<sup>4</sup> Ena nani tijapanujircavanahi, téavicavahi eta náurica-careva taicha émaripa ema Viya macurisamurechavacayare.

<sup>5</sup> Ena nani tisuapajirahianahi me Viya, mánsuanahi mayehe, téavicavahi eta náuricacareva taicha máijararuuanayare eta arairu apaquehe náicuchihi me Viya.

<sup>6</sup> Ena nani, ichape eta najamurachirahi eta náitaresirahi eta matapiravacare te mamirahu ema Viya, téavicavahi eta náuricacarevaya taicha máijaracayare éma eta navarahauquenehi.

<sup>7</sup> Ena nani tijapanurahianahi nayehe ena apamuriana achaneana, téavicava eta náuricacarevaya; taicha ema Viya, éma apanava majapanuvacayare éna.

<sup>8</sup> Ena nani vahi náisapajirícavahíni tahapapicahini eta náehisirahi ema Viya, téavicavahi eta náuricacarevaya; taicha éna, títecapanainapa te mamirahu ema Viya, náimarara-cainapa éma.

<sup>9</sup> Ena nani ticonsejarahianahi nayeheana ena achaneana, nacaepahairahi eta semanereana, téavicava eta náuricacarevaya éna; taicha máimereuchainapa ema Viya eta machichairavacahi éma.

<sup>10</sup> Ena nani ticatajivanahi eta nacatianacasivahi nayehe ena achaneana te juca apaquehe táichavenehi eta táurivahi eta náitaresirahi, téavicavahi eta náuricacarevaya; taicha éna aquenucarananaya majupahanayare ema Viya.

<sup>11-12</sup> Eti nuchaneranahi, járajapainapa eta sache eta nacatianasiraheya ena achaneana táichavenehi eta éhisiranuhi. Tipanararachaheanainapa, tépiyaequeneha-heanainavarepa. Váhisera ecuarami eta juca. Ene nacahehi eta nacatajivairahi ena profetanaini, ena náinapureanahi machaneranahi ema Viya. Eta tacahe, te nacatianacahepuca, jecurisamurechavachucha, evapinavachucha! ¡Téavicavahi eta iúricacareva taicha ejacapayare eta ícuchiyyare te anuma, taicha ichape eta macunachirahehi ema Viya!

*Ema Jesús tímítucahavi eta vicamunucareravayarehi tacutihu etá tacamunucarevahí etá icheve, étapa etá tijarahí*

*(Mr 9.50; Lc 14.34-35)*

<sup>13</sup> Eti ímyianavayare eta ecamunucareravahi nayehe ena achaneana, tacutihí eta tacamunucarevahí eta icheve. Vahi tacuepaha eta ecamunucareva. Vahi ecucuti eta tajachira eta icheve, taicha tájina eta táichevevainahíni. Tásicha, nájinapa ticamunuimahi. Náepuruinapa namutu.

<sup>14</sup> Tacutiquene éti ecutihi eta tijarahi. Éti, namicahuyarehi namutu ena achaneana eta ímitusiravacaya, apaesa náinajica eta náehisirahi eta tamauriqueneana. Ímereuchayarehivare eta iúriva, ecutiya eta avasare tiávihahi te tajirumane eta anuquehe mari.

<sup>15</sup> Tacutiquene, vahi ecucuti nácani súnsuana tiyustacanahi jácani lámpara, tásicha nanacapapucaini te tajuhe eta cajune, nayumurusihahini. Nanacayarehisera te anuquehe apaesa náimairiricasarepa namutu ena tiávihanahi te peti, tamicau-reanayarehi.

<sup>16</sup> Ene ecaheyare éti, ímerecayare eta ejaraivayare nayehe ena achaneana apaesa eta náimairainahi eta táuriqueneana íchaqueneanayare; tásicha nacunachainapa ema Tata Vicaiyaquene tiávihahi te anuma.

*Ema Jesús tímitucahavi tayehe eta tasuapacarevahí eta Sagrada Escritura*

<sup>17</sup> Vahi étaina tímitecanuhi nútí nucaepahahini eta mavanairipiana ema víyarahaini Moisés, étaripa eta náimiturapianaini ena profetanaini. Eta tímitecanuhi nútí, níminecapaequene-haheyare eta nájureanahi.

<sup>18</sup> Nutupiruva numetacahe: Títauchavaya tamutu eta máechajiruvana ema Tata. Tímiyanava eta tasuapacareirahi nayehe ena achaneana tamutu eta Sagrada Escritura. Tájina ticaepahaimahi, tayanapané tátavapuca eta anuma étapuca eta apaquehe.

<sup>19</sup> Eta tacahe, nácani tépuruanayare eta tavanairipianahi eta Sagrada Escritura, jácani ánichichaquenehi, vahi tisiapanaimahi te anuma. Tavetijipa te náimitucapuca ena apamuriana ema náepuruiraya. Nácanisera tisuapanayarehi, tímiture-canahivare eta juca nayehe ena apamuriana achaneana ema náehisiraina; éna, ichapeyare eta nacunachacarevayare eta nasiapiraipa te anuma.

<sup>20</sup> Táicha te evaraha ítujicava esiapa te anuma, tacamunuhi tiápajucavaya eta táurivahi eta eyeherepiana éti, ecachuricayare eta nayeherepianahi ena escribánoana, énapa ema fariséoana.

*Ema Jesús tímitucahavi vahi tacunasi te visamure eta vise-maneva*

*(Lc 12.57-59)*

<sup>21</sup> Eti écharichucha eta nayeherepiana ena iáchucanaveanaini ani tacahe: “Vahi ecucapaca mácani piparaepiya; taicha mácani ticaparecahi, ticaicuñayarehi”.

<sup>22</sup> Nútisera numetacahe eta apaña: Mácani tisemahi mayehe ema maparape, énerichuvare ticaicuñayare. Mácani tiúmehahi ema maparape, ticayaserehiyare te namirahu nácani tuparairucanahí tayehe eta avasare. Tacutiquene mácani ticaecahihi ema maparape, mávacuhaipahi eta ecuñaraqui tayehe eta infierno.

<sup>23</sup> Eta tacahe, te piámapahi eta piámavahu te mamirahu ema Viya, tásicha, péchapanainapapuca eta pitapiravahi mayehe ema piparape.

<sup>24</sup> Vuíchaha picuiyaracuha eta piámavahu. Tativanumayare piyaseapanaya eta perdón ema piparape. Pétupiricanumayare tativa eta píchavaqueneyahi mayehe éma. Táuricasarepa pichava píyarakuhapanainapa eta piámavahu te mamirahu ema Viya.

<sup>25</sup> Tacutiquene te matiarihiyarepuca mavaraha mametauchavi te namirahu ena tuparairucana, vahi picucuchapa mametauchavi. Tativayare pétupirica eta píchavaqueneyahi mayehe, mapurare vuíchaha picaeratahini mayehe ema juez tayehe eta cárcel.

<sup>26</sup> Taicha te náimisiapavipa tayehe eta cárcel, ticajeraeque-nénapa eta piúchusiraya.

*Ema Jesús tímitucahavi vicuneuchavaya eta jácani táimiaquipaica havi tayehe eta pecatu*

<sup>27</sup> Énerichuvare écharichuhi éti eta náimiturapihi ena iáchucanaveanaini: “Vahi ecuveha esu apaña esena”.

<sup>28</sup> Puítisera núti numetacahe eta apaña: Mácani majamurachahi esu apaña esena, ticapecaturaipahi te masamure taicha eta majamurachirahi.

<sup>29</sup> Eta tacahe, eta iúquiha váure, te tavarahapuca tímiaquipaicahe tayehe eta pecatu, tavarairahi táimahayare eta tamauriqueneana tájiparacana, tiúripana evecuhauquichava iáquijicaya. Taicha tiúripanahí taejiacava ánichichaina te iáquehe, váhisera tacuimicuñacahe eta te yucu infierno, tamutupahi eta iáquehe.

<sup>30</sup> Étaripa eta evahu váure, te tavarahapuca tímiaquipaicaheyare tayehe eta pecatu, tapamisirahénapapuca íchayare eta tamauriqueneana, tiúripana eyuchatica iáquijica. Taicha tiúripanahí taejiacava eta evahu, váhisera tacuimicasiapahé támamu eti iáquehe tayehe eta yucu infierno.

*Ema Jesús manacahi eta máimiturapi nayehe ena tínajicacana (Mt 19.9; Mr 10.11-12; Lc 16.18)*

<sup>31</sup> Énerichuvare ena viáchucanaveanaini náisapahi eta maejerare eta máinajisira mácani achane esu mayena. Ani nacahehi: “Mácani tínajicahi esu mayena, máemepiyarecahi eta ajumeruca taechajisihayarehi eta máinajisiraya esu mayena”.

<sup>32</sup> Nútisera numetacahe eta apana: Mácani achane, te máinajicapuca esu mayena, ticapecaturaipahi me Viya. (Váhinénipuca sucaecahihini mayehe ema apana achane.) Énerichuvare te tiápechavahipuca ticaima ésu, tamuriacahi ésu eta maviurevahí ema suima. Tásiha, mácani arairuhi suima, émapa tamuriacahi eta máejecapiravahí taicha eta mavirahí esu esena sucaimaquenehi.

*Ema Jesús tímitucahavi eta vahi vijurachaimahi*

<sup>33</sup> Énerichuvare esamairiricavare eta náimitucasivahi ena iáchucanaveanaini: “Machu vahi ecuitaucha jácani ejurachirahipuca. Yátupinasera eta ítauchiraina tamutu eta íjarasiravahí me Viáquenu” nacahepa.

<sup>34</sup> Nútisera numetacahe éti: Vahi táuricahini íchahini eta juramento. Vaipa échajisihahini eta anuma taicha éta, mávacurehi ema Viya.

<sup>35</sup> Váipavare échajisihahini eta apaquehe taicha éta, macaematanéyahí éma. Váipavare échajisihahini eta Jerusalén, taicha éta, mávacureyarehi ema yátupiquenehi Rey, mavaneruyare ema Viya.

<sup>36</sup> Váipavare échajisihahini eta ejurachirahi te echuti, taicha vahi áratahaimahi ehapamaichahini, ítsivachirahini eta taimahi, tijapupuca, tiquisapuca.

<sup>37</sup> Numetacahe: Te tatiarihipuca eta íjarasiravayare, átupiruva ácahe: “Tiuri”. Te váhipuca evarahahi, átupiruva: “Vahi” ácahe. Te émunahacavapuca ejuracha, ema Váinaraji titurucaheripa.

*Ema Jesús tímitucahavi eta vahi vicusema ne nácani ticaetemajiricahaviana*

*(Lc 6.29-30)*

<sup>38</sup> Énerichuvare esamairiricahi eta acane: “Mácani achane téhararecahi mapuchuquichahí ema apana achane, énerichuvare éma napuchuquichayareva ena tuparairucana. Te macavetuquiahechahipuca, énerichuvare nacavetuquiahechayareva ena tuparairucana”.

<sup>39</sup> Nútisera numetacahe: Vahi ecujicapa te masema mácani achane váinarajiji. Tiúripana, te náehahepuca nácani te emira, íjaracayare eta apachacaya eta emira.

<sup>40</sup> Tacutiquene, te natiahihipuca ena timetauchaheana, navaraha naverejicahe eta ecamisa, vahi ecusema. Váhivare ecujicapairihi. Íjaracavare eta apana eta epacuha.

<sup>41</sup> Ísapayare te nácani navanecahepuca eta enaracureca eta tijitacare. Te navaraha iámina étanaina kilómetro, evapinava eta eservichiravacaina. Vahi ecobrachavacaimahi.

<sup>42</sup> Mácaniripa tájahapuca mayaseacahe, íjaracayare. Vahi ecueñamiha mácani ticapucahe eta ecayehequeneana.

*Ema Jesús tímitucahavi eta vémunasirayare nácani tictatianacahaviana*

(Lc 6.27-28, 32-36)

<sup>43</sup> Énerichuvare esamairiricahi eta acane eta náimitucasivahi ena iáchucanaveanaini: “Émunasirahi nácani témunacaheanahi. Tásicha, ecatichayarepa nácani tictatianacahéanahi”.

<sup>44</sup> Nútisera numetacahe: Émunacayareva nácani tictatianacahéanahi. Eyaseaca ema Viya eta nayujarahuina nácani téchajicanahi eyehe. Ímereca eta iúriva nayehe nácani tictatianacahéanahi. Eyujaraucha nácani tiúmehaheanahi ticaetemajiri-caheanahi.

<sup>45</sup> Te ítaucha eta juca, éta tímereuchaheyare eta machichahéirahi ema Vicaiyaquene te anuma. Taicha éma nájina manerejiruina, namutu máemunacavaca: ena achaneana váinarajiana, énapa ena tiúriana. Éma, tíjaracahavi vimutu eta sache vimícahuhi, étapa eta tiquiva.

<sup>46</sup> Éti, tájina ecunachacarevaina eta me Viya, te nacarichuhi émunaca nácani témunacaheanahi éti. Apanasica ena tisipecaturarahiana náichahi eta juca.

<sup>47</sup> Tacutiquene, tájinavare ecunachacarevaina eta me Viya, te iúrivyare nacarichuhi ena eparapenaveanahi. Apanasica ena máimatirahanahi ema Viya tiúrianahi eta nayehe ena naparapenaveana. Étisera tatuparacahe ecachuricayare eta iúriva.

<sup>48</sup> Tétavicavasareya eta iúriva nayehe namutu. Vahi enerejicaimahi ena achaneana. Váhivare eyavanaimahi eta iúriva. Ecutiyare ema Vicaiyaquene te anuma eta máurivahi.

## 6

*Ema Jesús tímitucahavi eta vahi vicusiñavavaicapa eta víchira eta táuriqueneana*

<sup>1</sup> Eta ecajirayare ena páureana, échapavayare. Ema Tata Vicaiyaquene, tájina ticunachahemahi te evarahapuca náimaha ena achaneana eta ecajirahi, evarairahi ticunachaheanayare. Tájinavare máitsirijicavahini éma eta eyehe.

<sup>2</sup> Eta tacahe, te ímicatacayarepuca nácani ticamunuwanahi, vahi ecumetajirica. Vahi ecucuti ena apimirana timetajiricanapa te viúrujisirarevana, téhepa te anecapahiana. Eta juca náichahi, navarairahi ticunachacareanayarehi nayehe ena achaneana. Nútisera numetacahe: Ena nani ticaheanahi, tájina nacunachacarevaimahi me Viya.

<sup>3</sup> Te jácani píjaraca nácani ticamunuwanahi piyehé, vahi picumetajirica. Váhivare picumetaca nácani pémunacasareana.

<sup>4</sup> Piñajichayare eta píjarasirayare nácani píjaracasiruyare. Tacahe, ema Tata Vicaiyaquene te anuma máimaranaracahi tamutu. Jácani píchaqueneana tayumururevana, éma títsirijiequenehayare, tíjaracaviyare eta píuchihi.

*Ema Jesús tímitucahavi eta viyujarasirayare  
(Lc 11.2-4)*

<sup>5</sup> Te eyujaracahi, vahi ecucuti ena apimirana tiyujaracana te viúrujisirarevana, téhepuca te anecapahiana. Titupihanahi éna eta nayujarasirahi, navarairahi náimaranacayarehi ena achaneana. Nútisera numetacahe: Tájinachucha nacunachacarevaimahi me Viya.

<sup>6</sup> Étisera ani tacahheyare te eyujaraca. Esiapayare te eyehe cuarto, ératacayare eta tapaja. Eñajichavayare eta échajisirayare ema Tata Vicaiyaquene. Éma, tímararacahavihi; masamayarehi eta piyujaracasa.

<sup>7</sup> Tacutiquene, váhivare ecuapepirica eta ecayemaqueneanayare. Vaipa tágamesahini eápepiricahini eta eyujarasirahi. Vahi ecucuti ena máimatirahanahi ema Viya. Tiúpiemanapa eta nayujarasirahi, náimijachaipa tisamacareanahi mayehe ema Viya.

<sup>8</sup> Vahi ecucuti éna, taicha ema Viya máimatiripahi éma jácani vivarahaquenehi viyaseaca.

<sup>9</sup> Éti, ani tacaheya eta eyujarauchiravaina: Tata Vicaiyaquene, piti piáviha te anuma, vipicauchahi yátupi eta píjare.

<sup>10</sup> Vivaraha ichapeina eta tasuapacarevaina eta pivanaíripiana nayehe namutu ena achaneana ani te apauehe, tacuti eta nasuapiravihi ena ángeleana te anuma.

<sup>11</sup> Pájapanuhavi píjaracahavi puiti jena sache eta vicamu-nuirava eta vinicaqueneana.

<sup>12</sup> Pájapanuhavi piperdonachahavi eta viviurevana piyehé, tacuti eta viperdonachira víti ena ticaviurevana viyehé.

<sup>13</sup> Vahi picuisapahavi eta vicha eta tamauriquene. Picatiuchahavivare mayehe ema Váinara. Taicha píti yátupique-

nevihi Viáquenuvihí. Nájina pácuti eta pítupajijasiravahí. Máihecuaraquíre eta pijaraivahí. Amén.

<sup>14</sup> Taicha te yátupihi eta eperdonachirahi nácani ticaviurevanahí eyehe, ema Tata Vicaiyaquene te anuma tiperdonachaheyare éti apanava.

<sup>15</sup> Téhesera te vahi eperdonachahí ena ticaviurevanahí eyehe, ema Tata Vicaiyaquene váhivare tiperdonachahémahí eta éjecapiravanahí éti.

*Ema Jesús tímitucahavi tayehe eta ayuna*

<sup>16</sup> Tacutiquene, te ayunahepuca, vahi ecajapanuramiraimahi te namirahu ena achaneana. Vahi ecucuti ena apimirana ena tímicaecherachavanahí eta ayunairanahí. Núti numetacahe: Tájinachucha nacunachacarevaimahi me Viya. Éma, váhivare títsirijicavaimahi eta nayehe.

<sup>17</sup> Étisera, te ayunahepuca, ímiyanava eta esipauquichiravaya, etatasicavavare, apaesa nacuija nacuimatiacahe eta ayunairahéhi.

<sup>18</sup> Ema Tata Vicaiyaquene tímararacahehi tamutu eta esamureana. Tisamacareyarehi eta eyasearuhi.

*Ema Jesús tímitucahavi eta vahi vicuisapava vicasamure eta vímahaqueneanahí*

(Lc 12.33-34; 11.34-36)

<sup>19</sup> Váhivare tacuavasamurerecahe eta ímahaqueneana te juca apaquehe. Eta juca ticamitiequenehacareana taicha eta tajararesira eta cachusíri, étapa eta táichasivayare. Natiarihivare ena tiámeyechaheanayare.

<sup>20</sup> Epanerechasera eta ecaimahaqueneraya te anuma. Ánaqui jararihi eta táitsivayare eta íchirahi eta táuriqueneana te juca apaquehe. Ánaqui, tájina cachusirina, nájinavare tiámerahina tayehe. Tájina témitiacaimahi.

<sup>21</sup> Éti, te ecasamurepuca eta ímahaqueneanahí te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

<sup>22-23</sup> Tacutiquene, ecuneuchava, machu tacuetaviuchava eta ejamurachira eta ímahaqueneana. Ecaratacava, vahi ecuisapa tahapasamurechahe eta ecaimahaquenerahi. Taicha te tahapasamureruhepapuca eta ímahaquene, téavicavahí eta tamapicuvahí eta te iáchanevana. Téhesera esuapa eta nímiturapiana, téavicavahí eta tamicauchiraya eta iáchanevana, tímijunijicayare eta emaurivahí, étapa eta ejamurachiravahí eta ímahaqueneana. Eta tacahe, machu

ísapava tayanariana eta timapicu eta te iáchanevanasami. ¡Páurehesami éti te ísapavapuca tanasipa!

<sup>24</sup> Tacutiquene éti, eta ítaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivare; tásicha ema apana, apaesarineya eta émunasiraya, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurechahe eta plata, machu tahapapirica eta émunasirahi ema Viya, étapa eta ecaemataneasirahi éma.

*Ema Jesús tímitucahavi eta majaneasirahavíhi ema Viya viti machichanaveana  
(Lc 12.22-31)*

<sup>25-26</sup> Étasera nuvaraha yátupina eta ecasiñavairaina mayehe ema Tata Vicaiyaquene. Vahi ecucaeñamaracavaicha tayehe eta enicaquenerepi étapa eta emuiriharapi puiti juca ítaresiraichaha. Eta enicaquenerepi, étapa eta emuiriharapi, tájina taeñamavacarevahini. Ímararacarichuhi eta cáyureana. Vahi taevacahini, váhivare taechatijiricahini, táunacahipucaini eta tanicaqueneyare. Émasera ema Tata Vicaiyaquene máechapajiricahi, máijarasirahi tamutu eta tanicaquenerepiana. Evetijipa éti, iápajupanavahi eta éñamacarévahí me Viya tayehe eta cáyureana.

<sup>27</sup> Tájina táuricahíni eta éñamiravahi eta júcana. Éti, nájina tiratahaimahi étijivainahini ecajurucavahini, tayanapane tahapasamurechahehipuca.

<sup>28</sup> Tacahe, ¿tájaha tacayema tihapasamurerecahehi eta emuiriharapi? Ímararacarichuhi eta tajurusirahi eta flúreana, vahi tacaeñamaracavahini tacaematanehini, tájururecahipucaini.

<sup>29</sup> Táitsivahisera, te tépunehana, téavicavahi táurinavahi eta taflurene. Nájina tacuti eta nacamuirihaira eta táurinava, émaripa ema víyarahaini rey Salomón eta tajanunusira eta macamuirihairahi.

<sup>30</sup> Apanasicahi, ema Viya máijaracahi eta táurinavahi, ánipirichuhinéni eta tátaresirahi. Evetijipa éti eta máechapajirisrahehi, máijarasiraheyarehi eta emuiriharapi eti achaneana. ¿Tájaha tacayema vahi ácasiñavahíni eta mayehe?

<sup>31</sup> Eta tacahe, vahi ecucaeñamaracavaicha tayehe eta enicaquenerepiana étaripa te echuririacapuca eta une érayare, váhivare eta emuiriharapi.

<sup>32</sup> Ena achaneana vahi náimatihini ema Viya, ichapemurihi eta tacaeñamarasiravacahi eta júcana. Vahi nácasíñavahini mayehe ema Viya, nacuchapahipucahini eta máijararuyarehi

éma. Étisera, écharine eta mararihirahi ema Ecaiyauquene te anuma. Máimatihi éma tamutu eta ecamunuqueneanahi.

<sup>33</sup> Tásihasera éti, tativayare íjaracava ecaematacaya ema Viya, ecasamureirahi eta ítauchirayare tamutu eta mavara-haqueaneanahi. Tihapasamurechaheyarehivare eta tátupiruvairaya eta ítaresira, ecurisamurechirayare éma. Máimaharinenepa éma. Tíjaracaheyare tamutu eta juca ecamunuqueñeanana.

<sup>34</sup> Eta tacahe, ácasiñava mayehe éma. Vahi tacuimipanerechahe eta íchararacavayare achichu. Puiti ecuchapaipa eta máimicatasiraheyare. Ímiyanava eta ecuchapirayare eta máimicatasiraheya.

## 7

*Ema Jesús tímitucahavi eta vahi vicunemahi eta náejecapiravana ena apamuriana achaneana; vicuneuchavasera víti*

(Lc 6.37-38, 41-42)

<sup>1</sup> Vahi ecunemahi eta náejecapiravana ena apamuriana achaneana, váhivare ecucaecahivaca, machu étaina táimicuñahe me Viya.

<sup>2</sup> Te ecunerahipuca nayehe ena apamuriana achaneana, ecaheyare éti eta macunerahénapa ema Viya tayehe tamutu eta éjecapirávanahi éti.

<sup>3</sup> Piti ajaira, pítipa piti esena, vahi táurica eta picunerahi eta ánichichaqueneana náejecapiravanahí éna. Tituparacavi pítijivaina picuneuchava eta táichapeva eta péjecapirava.

<sup>4-5</sup> Vahi tatuparacavimahi pétupirica eta jácani náejecapiravahí ichipichuana ena piparaepiyana. Tájina piviyahini eta piconsejachihaimahi. Ichapesera eta tatuparasiravihi pétupirica eta péjecapiravanahí píti. Tapaenumava pétupirica eta píchavaquenévanahí, táuricapaini piconsejacha ema piparaepiya tayehe eta máichavaquenévahí.

*Ena ticaecahirahiana, vahi vicuijaraca jácani téñamacareana*

<sup>6</sup> Vahi ecuimituca eta máechajiriruvana ema Viya nácani achaneana ticaecahirahiana, taicha váiparinehi náuricaimahi. Machu étaina táemehahe. Váhivare ecuijaraca jácani téñamacareana, machu nácatayayajica.

*Vahi vicuyacuji eta viyaseasiraina ema Tata Vicaiyaquene*  
(Lc 11.9-13; 6.31)

<sup>7-8</sup> Ánivare tacahe eta máechajiriruva ema Jesús:

—Numetacahe: Échajica ema Tata Vicaiyaquene. Eyaseacayare eta ecamunuqueneanana. Éma, tijapanurahi. Tisamahayare, tíjaracaheyareva. Vahi ecuyacuji eta eyaseasiraina. Énerichuvare, te tatiarihinapapuca eta jácani íchiraya ichapehi

eta tacajeravayarehi, eyaseacayare máijaracahehini eta ítupajijiasiravaya. Éma, tíjaracaheyare. Te jararihipuca eta táichejimiráuchahe, éma macaevuisinaheyarehi.

<sup>9</sup> Eta juca tímicutijiricavahi te natarihipuca ena echichanaveanahí éti, te tiyaseacaheanapuca eta pan nanicayare, váiparinehi táuricaimahi íjaracahini éti eta márijahi. Tímicutijiricava evijaruinahini ena echichanaveana.

<sup>10</sup> Étaripa te tiyaseacaheanapuca eta jima, váhivare táuricaimahi íjaracaimahi eta quichare.

<sup>11</sup> Etiarihi éti vahi ecajirahihini nayehe ena achaneana. Iúrihisera nayehe ena echichanaveana. Mavetijicha ema Tata Ecaiyaqueña tiávihahi te anuma. Éma, vahi ticavijaruhemahi eta eyaseserepi. Tíjaracaheyarehi tamutu eta táuriqueneana eyasearuanayarehi.

<sup>12</sup> Evaraha eta náurivaina ena achaneana eta eyehe, ¿masi? Tásicha, táuricahi eta íchiraya eta iúriva nayehe. Taicha eta tacahehi eta náimicuapiana eti Sagrada Escritura eta eyehe.

### *Jararihi eta apina achene*

(Lc 13.24)

<sup>13-14</sup> Esamanuchaha. Jararihi eta apina achene. Eta ichape achene, vahi táchajéra eta náehisira ena achaneana. Camurianapana ena téhicana eta ticaijuhe tayehe eta ecuñaraqui. Étasera eta achene ánicuchicharichu, ticaijuhe tayehe eta vítaresirayare, tájina ecuñaraquina. Váhisera camurianaina ena téhicana éta. Éti epamicava esiapa tayehe eta achene ánicuchicharichu.

*Ema Jesús máimicuapiana ena achaneana tépiyahirahiana, nacuti eti yucuqui máurinisiráha eti tahi*

(Lc 6.43-44)

<sup>15</sup> Échapavayare tayehe eta náimicuapiana ena tépiyahirahiana tímijachavana machanerana ema Viya. Tépiyacavánapahi tiúriana tacutihí eti tamansuva eta uvesa. Téhesera te nasamureana, tétavicavahi eti navainarajiva, nacutihi eti ichini.

<sup>16</sup> Ímatiacavacahisera éna táchavene eti náichaqueña. Nacutihi eti yucuquiana. Eta yucuqui, tímaticarehi eti tahi. Étaripa eti sitavere, váiparinehi tiúchucaimahi eti tacahihini narasahinahipucaini. Tásicha, eti ijicaqui váiparinehivare tacahimahi eti tahi cachicheruhinahipucaini.

<sup>17</sup> Tacutiquene, tímaticarehi eti tahi eti yucuqui tiúrinisi. Tímaticarevare eti tahi eti máurinisiráhana.

<sup>18</sup> Eta yucuqui tiúrinisihi eti tahi, vahi témunahiricavaimahi vahi tacurinisihi eti tahi. Étaripa eti máurinisiráhana, váhivare témunahiricavaimahi táurinisihi eti tahi.

<sup>19</sup> Tamutu eta yucuquiana máurinisiráhana ticaechuyarehi, tíjuyarepa te yucu.

<sup>20</sup> Eta tacache, ímativacayare ena tépiyahirahiana táichavene eta náichaqueneana tamauriqueneana.

*Vahi námutuimahi titujicavana tisiapanaimahi te anuma  
(Lc 13.25-27)*

<sup>21</sup> Nararihinapa ena achaneana tépiyacavana nuchanera-ana. Váhisera titujicavanaimahi tisiapaná tayehe eta mávasa ema Viya. Tayanapane náchanuinapapuca “Tata Viáquenu”, vahi tisiapanaimahi. Taicha vahi yátupinahini eta nacaemataneasirahi ema Tata Nucaiyaquene te anuma.

<sup>22</sup> Te táitecapapa eta juicio, camurianayare ena tíchanuanayare: “Tata Viáquenu, víti véchajisihaparacahi eta píjare. Vipiaracavihi te píjare eta viáquijsirahi ena váinarajiana, téhevare te píjare vímerecahi eta tiáramicareana” náchanuinapapuca.

<sup>23</sup> Nútisera nujicapainapa: “Éti vahi nuchanerahéna. Nímatisera núti eta íchaqueneanahi tamauriqueneana. Évuisiha te numirahu” níchainapa éna.

*Ema Jesús máimicuticha ena tisuapajirahiana énapa ena masuapajirairahana*

*(Lc 6.47-49; Mr 1.22)*

<sup>24</sup> Nácani tisuapanuanahi náitauchahivare eta juca nuvanairipianahi, téchemarahianahi táicha. Nacutiyarehi mácani titucahi tépiyareca peti, manacayarehi eta túmeana yucuqui emuruquia.

<sup>25</sup> Jéhesare, te járajapapa eta muraca técaticava, tiámaquiha tiquiva, tisiama pa eta une, váipasera tacayayacahini eta peti, taicha tiúsiapiravacahi.

<sup>26</sup> Nararihivare ena tépiyacavanahi tisuapanuana, váhisera náitauchahini eta juca nuvanairipiana. Éna nacutihi ema máitucaraha tépiyareca peti. Vahi manacaimahi eta túmeana yucuqui, váhivare táusiapiravacahini máicha.

<sup>27</sup> Te járajapapa eta muraca técaticava, tiámaquiha tiquiva, tisiama pa eta une, tacajimuyapaicapa eta apaquehe. Tiáquipaicavapa eta peti, tamutusamipa témitiequeneha – máichavacapa ema Jesús.

<sup>28</sup> Te titapiricapa ema Jesús eta máimitusiravacahi ena achaneana, ichaperinehi eta náramirahi eta máimiturapiana.

<sup>29</sup> Vahi nasamasarénahini, Tétavicavahi eta máitusirahi mayunapaicahi tamutu. Tétavicavahivare eta tasuapacarevahí etá máimiturapiana.

**8**

*Ema Jesús macanaraca ema émana achane leproso  
(Mr 1.40-45; Lc 5.12-16)*

<sup>1</sup> Te tiúcupaicapa ema Jesús tayehe eta cerro te mávinehi, camuriana éna achaneana téhicanapahi.

<sup>2</sup> Tacahe, macahepaipa ema émana achane leproso. Témeñahavapa mayehe ema Jesús. Tépuyucapa te mamirahu. Tásiha, máichapa:

—Tata, nucasiñavahi eta piyeho, picanaracanupaini.

<sup>3</sup> Tacahe, ema Jesús majicapapa:

—Nuvaraha nucanaracavi. Tájinapa píchiravaina puiti —máichapa.

Máemamahacapa. Tásiha, enevanepa tinaracahi ema macajumaquenénihí eta máechajisirahi ema Jesús.

<sup>4</sup> Tásiha, ema Jesús máichapa:

—Pímaha, nacuija picumetaca eta nútirahi nucanaracavihi. Piyanavanesera pímerecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

*Ema Jesús macanaraca ema manusura ema capitán romano*

*(Lc 7.1-10)*

<sup>5</sup> Tacahe, ema Jesús títecipapa tayehe eta Capernaúm. Matiarihihi ema achane apavasana. Comandantehi éma nayehe ena suntaruana romanoana. Capitán eta mávacure. Tiyanapa mapauchapapa ema Jesús.

<sup>6</sup> Mayaserecapa, ánipa máicha:

—Tata, mararihi puiti te nupena ema amaperu numusura ticajumahi eta áire. Tétavicavahi tacativa masama. Pájapanupaini, picanarasinanupanaini éma —máichapa.

<sup>7</sup> Ema Jesús, majicapapa:

—Tiuri, nuyanayare nucanarapanayare —máichapa.

<sup>8</sup> Tásiha, ema capitán majicapapa:

—Tata, vahi picucaeñamacava eta pítesiraina eta nuyehe, taicha vahi táuricahini pisiapahini te nupenasami. Németeaca taratarichu picavanairipi eta picanarasiraya ema numusura.

<sup>9</sup> Taicha núti nusuapahi te tivanecanuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahí. Te nuvanecapuca ema nuvaneru, enurujipa tisuapanuvane —máichapa.

<sup>10</sup> Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Nutupiruva numetacahe: Nájina nímaha émanaina vi-janeana israelíta mácutihini ema maca achane apavasana eta macasiñavairahi eta nuyehe.

<sup>11</sup> Numetacahe puiti: Járabajapainapa eta sache, náitecapiraya ena camuriqueneana achaneana apavasanana tiásihanayare te tamutu avasareana te juca apaquehe. Tisiapanayare eta mávasa ema Tata, te mávhahí ema viáchucaini Abraham, ema Isaac, émapa ema Jacob. Tétavicavainapa eta náurisamu-revaya.

<sup>12</sup> Tacahe, tamapuruji eta náimatiéquenehairahi ena vi-janeanana israelítana eta máechajiriruva ema Tata, váhisera nácasíñavahini eta nuyehe. Eta tiviuchavacayarehi tayehe eta nacaicuñaiyaya eta te tamapicuquene te távhahí eta táijure-quenehi yucu. Ticapitiquiahechavanainapa eta tacativayare nasama. Tíyahananainapa —máichapa.

<sup>13</sup> Tásicha, ema Jesús máichapa ema capitán:

—Piyana pichava te pipena. Tinarcaripa ema pimusura, taicha eta picasiñavairahi eta nuyehe —máichapa.

Tacahe, ema amaperu ticajumahi tinarcaripahi te jena hora eta náechajirisiravahí éna.

*Ema Jesús macanaraca esu máimase ema Pedro  
(Mr 1.29-31; Lc 4.38-39)*

<sup>14</sup> Ema Jesús tiyanavarepa te mapena ema Pedro. Máimahapa esu máimase ema Pedro, ticajumahi eta muraca fiebre. Mapauchapa tayehe eta suívesihahi.

<sup>15</sup> Máemamahacapa, enevanepa táetaviacahi eta fiebre. Tinarcapapa. Enurujipa téchepuca. Tásicha, tépanavapa ésu eta suútatirahi ema Jesús.

*Camuriana ena macanararuanapahi ema Jesús  
(Mr 1.32-34; Lc 4.40-41)*

<sup>16</sup> Te yátipa, títecaparácanapaichucha ena achaneana. Námavacapaipa ena nacajumaqueneana, énapa ena návaháruana ena éreanana. Tacarichu te máechajiriruvachucha ema Jesús, macuchuchujicavacapaipa ena éreanana tiávahá-canahi ena nacajumaqueneanahi. Macanaracavacapa ena apamuriana tisamanahi eta apana jumareana.

<sup>17</sup> Eta juca títauchavapahi eta táechajisihairahi eta májurehi ema víyarahaini profeta Isaías, ani tacahehi: “Masaminahavivare eta vijumana eta macanarasirahavihi”.

*Tituparacahavi vahi véñamavaimahi eta víjarasiravahi véhica ema Jesús  
(Lc 9.57-62)*

<sup>18</sup> Te máimahapa ema Jesús ena camuriqueneana achaneana nachayacahi, macavanairipipa ena máimitureana natsecava eta náquesirayarehi te apachara cáquiure.

<sup>19</sup> Tacuhe, ema émana escribáno témeñahavapa mayehe ema Jesús. Máichapa:

—Tata máestro, nuti apana nuvaraha néhicavi te jácani pivarahaqueneyare piámianu —máichapa.

<sup>20</sup> Ema Jesús, ánipa tacahehi eta majicapirohi:

—Tamutu eta sárareana ticapenavaca. Énerichuvare eta cáyureana tamacajipachuvar. Nútisera nuti Manerejirunuhi ema Viya, tájina nuviya nusiapihahini —máichapa.

<sup>21</sup> Te apanavarepa sache, ema émana máimiture máichavarepa:

—Tata, nuyaseacavi písapanuhini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásicha, nucapayacavipa néhicaviya —macahepa.

<sup>22</sup> Ema Jesús majicapapa:

—Péhicanuchucha. Pésamirica náecaracacaicha ema máecharaireana. Tájina táijaracavimahi eta juca tihasamurerecavihi —máichapa.

*Ema Jesús macaesamirica eta táepacusirahi eta une étapa eta técaticava*

*(Mr 4.35-41; Lc 8.22-25)*

<sup>23</sup> Te titapiricapa ema Jesús, tiávacuhapa te pacure. Énapa ena máimitureana, náehicapaipa éma.

<sup>24</sup> Te itupierecanapa, járajapapa eta muraca técaticava. Ichapevaca eta táepacuruhana. Tisiapapaipahi eta une tayehe eta pacure. Ema Jesús, tímacapaichucha éma.

<sup>25</sup> Tacuhe, ena máimitureana tipiararecanapa eta napisirahi. Nacajamicapa éma. Ánipa náicha:

—Tata maestro, picatiuchahavi. Véricainapa —náichapa.

<sup>26</sup> Ema majicapavacapa:

—¿Tájaha tacayema epica? ¿Vahi ácasiñavapahini eta nutiarihirapahi eta eyehe? —macahepa.

Tásicha, téchepucapa. Macamatinacapa eta técaticava étapa eta une. Enevanepa tésamiricavahi eta táepacusirahi. Tájinapa táichiravainahini.

<sup>27</sup> Ena máimitureana ichaperinehi nárami. Ánipa nacahe:

—¡Tétavicavahi eta máitupajijiasiravahi! ¡Jéhesare, yátupiquene eta émairahi machichahi ema Viya! ¡Taicha tamutu

tasuapahi, macamatinacahi eta técaticava étapa eta une eta táepacusirahi! —nacahepa.

*Ena apinana ajairana návaháruana ena ichapemurique-neana éreanana*

(*Mr 5.1-20; Lc 8.26-39*)

<sup>28</sup> Te títecapapa ema Jesús te apachara eta cáquiure te apaquehe Gadara, tiúchujicanapa te ecari ena apinana ajairana, návaháruuanahi ena éreanana. Tétavicava eta náiñehivavacahi. Náehayarehi nácani tiánucuhanapahi. Tacahe, napauchapa ema Jesús.

<sup>29</sup> Tipiararecanapa, ánipa nacahe:

—¿Tájaha picha píteca pipauchahavi piti Jesús, Machichaquenevihi ema Viya? ¿Pivarahapa picaetemajiricahaviyare víti? ¡Pájapanuhavi, vuíchaha picuvanecahavi tayehe eta vicaicuñaiyayare! —nacahepa.

<sup>30</sup> Tásiha, tatiarihihivare nacachacayahi eta camuri-queneana cúcchiana tinihicanahi.

<sup>31</sup> Ena éreanana nayaseacapa ema Jesús. Ánipa náicha:

—Te piáquijicahaviyarepuca, picatajicahavi. Písapahavi visiaphahacavaca eta jena cúcchiana —náichapa.

<sup>32</sup> Tacahe, ema Jesús másapapa:

—Tiuri, eyana esiaphahacavaca —máichapa.

Tacahe, tiúchucanapa ena éreanana nayehe ena návaháruanainihi. Tiáramemurihanainehi eta cúcchiana. Tijunaparacanapa témiririjicanapa te tachausi eta cáquiure. Téririjicanapa.

<sup>33</sup> Ena tijanearecanainihi eta cúcchiana tiyananapa tijunana tayehe eta avasare. Timetajiricanapa eta náimairahi, étapa eta nanarasirahi ena návaháruuanahi ena éreanana.

<sup>34</sup> Tacahe, tiyananapa ena achaneana te mávihahi ema Jesús, náimahapanahi. Te náimahapa éma, nayaseacapa vahi macuitecapahini te návasa, machavahini te másinehi.

## 9

*Ema Jesús macanaraca ema émana achane macajumaquene eta muracaquiha*

(*Mr 2.1-12; Lc 5.17-26*)

<sup>1</sup> Tacahe, ema Jesús tichavapa tiávacuhavarepa te pacure. Tichavapa tayehe te mávasahi Capernaum.

<sup>2</sup> Ánaqui náimipauchavarepa ema achane macajumaquene eta muracaquiha. Ema tívecahi te mayehe camilla. Te máimahapa ema Jesús eta nacasiñavairahi eta mayehe, máechajicapa ema macajumaquene. Ánipa máicha:

—¡Pétumechava, nuchicha! Nucaeapahainavipa eta pipecatuaraini —máichapa.

<sup>3</sup> Natiarihi ena escribánoana. Eta nasamirahi ema Jesús, ánipa nacahe te nasamure: “Ema maca tépiyacava tímijachavahi Viya eta macaepahairahiji eta pecatuana. ¡Tétavicava eta matapirava!”

<sup>4</sup> Émasera ema Jesús máimatihi eta napanereruanahi. Máichavacapa:

—Tájaha tacayema eta ejecapirava nuyehe te epanereruanahi? Núti tájina nutapiravaina eta níchirahi eta juca.

<sup>5</sup> Núti, eta nucaepahairahi eta mapecaturana ema maca, tacutihi eta máejerererahí eta nucanarasirahi eta máquehe.

<sup>6</sup> Tiúrisera puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatuana te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa.

<sup>7</sup> Enevanerinehi téchepuca ema macajumaquenéni. Tiyanapa te mapena.

<sup>8</sup> Ichaperinehi eta náramirahi namutu ena achaneana natiarihiqueneanahi. Tétavicavarinehi eta nacunachirahi ema Viya taicha eta máitupajijiasirava ema Jesús eta máijarasirahi ema Maiya.

*Ema Jesús máichuha ema achane ticajare Mateo, mayeheyare apóstole*

(Mr 2.13-17; Lc 5.27-32)

<sup>9</sup> Te apanapa sache, nuti Mateo néjacahi eta te nucobrare-sirare eta impuesto. Tacahe, tiánucuhapaipa ema Jesús. Te tímahanupa, tíchuhanupa.

—Yare, péhicanu —máichanupa.

Enevanepa, néchepucahi. Néhicapa éma.

<sup>10</sup> Tacahe, námapa éma te nupena, énapa ena máimitureana. Níchuhavacapa ena nuchamuriana ticobrarecarahianahi eta impuesto énapa ena apamuriana tisipecaturana. Nénicavacyarehi éna. Macachanemurihivare ema Jesús eta vinisirahi.

<sup>11</sup> Títecapanavarepa ena fariséoana. Eta náimairahi namutu ena némunaruqueneana, eta vicachanerahí ema Jesús, ticaecahirecanapa. Ánipa nacahe nayehe ena máimitureana ema Jesús:

—¿Tájaha tacayema tísapava ema eyehe maestro macachanevaca eta manisirahi ena nánitatajiana ticobrarecarahiana eta impuesto? ¡Ticapecaturarahiana éna! —nacahepa.

<sup>12</sup> Te masamairiricapa ema Jesús eta náechajiriruvana, máichavacapa:

—Ena majumareanahi vahi nácamunuimahi ema médico. Nacarichu ena ticajumanahi nacamunuyarehi ema médico.

<sup>13</sup> Nútiripa vahi étaina tímitecanuhi nutanucayarehi nácani matapiravareanahi. Nutanucapahi núti ena tisipecaturana, apaesa náeneuchava, náinajica eta napecaturana. Tásicha éti, eyana ecaravahu eta máechajiriruvanahi ema Viya. Ánipa macahe: “Núti nuvaraha yátupinaini eta ejapanuraivainahini. Taicha te vahi, tamapurujiyare eta ecamavahuirahi eta nuyehe” macahepa ema Viya.

*Nayaserecapa ema Jesús tayehe eta ayuna  
(Mr 2.18-22; Lc 5.33-39)*

<sup>14</sup> Títecapanapa ena máimitureana ema Juan Tícachasiricarahi, nayaserecapa ema Jesús tayehe eta ayuna. Ánipa naicha:

—¿Tájaha tacayema vahi nahayunacha ena pímitureana, vahi nácutihavíhini viti máimitureana ema Juan, énapa ena fariséoana?

<sup>15</sup> Ema Jesús majicapavacapa:

—Nímicutichinahe puiti. Vahi táuricaimahi ticatisamurevana nácani ticaichuhacasianahi tinicanahi nayehe ena araimana. Tiúrisamureanayarehi taicha matiarihihi ema arayena. Téhesera te tépenapuca éma, jéhesare ticatisamurevanayarehi. Tacutiquene, vuíchaha táuricaimahi eta ayunanainahini ena nímitureana. Járabajapainapasera eta sácheyare, ticaverejicasianayare taicha ticaratacanuanainapa ena ticapacanuanaya núti.

<sup>16-17</sup> Esamanuchaha. Eta juca eta nímiturapiana, amairiha arairu. Mavaraha ema Viya arairuyare eta eyeherepianayare eti achaneana. Vahi ticuticacaimahi eta nayehe repiana ena achaneana. Eta ítusira éti eta nímiturapiana, tavaraha ínajica eta ichasi eyeherepiana tamauriqueneanahi —máichavacapa ema Jesús.

*Ema Jesús macanaraca esu machicha ema Jairo, ésupa esu apana esena sucajumaquenehivare*

*(Mr 5.21-43; Lc 8.40-56)*

<sup>18</sup> Téchajiricavaichahahi ema Jesús nayehe ena achaneana, títecapanechavare ema émana achane ticaijare Jairo. Tuparirucahi éma. Matupirupa tépuyucapa te mamirahu ema Jesús. Ánipa macahe:

—Tátachicha, surarihi esu nuchicha. Puítirichaha tépenahi. Téhesera te piyana, pinacaini eta pivahu, suchavahini suítarecahini —máichapa.

<sup>19</sup> Tásicha masuapapa ema Jesús. Tiyanapa te mapena ema Jairo, vimutupaichu viti máimitureana.

<sup>20</sup> Tásicha, sutiarilihivare esu ésuna esena sucajumaquene. Doce áñoripahi eta sucatajivairahi, táichirahi eta suítine.

Témeñahavapa te maquecu ema Jesús. Suémamacapa eta tacheyarapi tamatsianahi eta mamuiriha.

<sup>21</sup> Taicha te supanereru ésu, sucahehi: “Taratarichu jácani te némmamacata etá ñimuirihai, éta ticanaracanuyare” sucahepa.

<sup>22</sup> Émasera ema Jesús masamarichucha eta suémamajaisirahi, macaicutiarahi eta macanararesirahi. Téquerucavapa. Máimahapa eta supisirahi esu esena. Tásiha, máichapa:

—Vaipa picupica, nuchicha. Pinaracapa puiti táichavenehi eta picasiñairanuhi —máichapa.

Tacahe, tinaracapa esu esena. Vaipa tápechahini eta suju-mainihi.

<sup>23</sup> Tiyanavarepa ema Jesús. Títecacapa tayehe eta mapena ema Jairo. Máimahainehi ena músicoana. Tiúrianaipahi eta námirayarehi te ecari esu suépenaquéne. Énapa ena achaneana, tijajamurianaripahi eta náiyairahi.

<sup>24</sup> Tásiha, ema Jesús máichavacapa:

—Iúchucachaha te aneca. Váhinéni suépenahini esu suca amaperu. Tímacarichucha ésu —máichavacapa.

Énasera nacaecahirichucha éma, técavanapa.

<sup>25</sup> Te tiúchucanapa ena achaneana, tisiapapa ema Jesús te suávihahi esu suépenaquéne. Macaratavauchapa ésu. Macaecheputacapa. Tichavapa titarecahi ésu.

<sup>26</sup> Te nasamairiricapa ena ticavasanahi eta te Capernaum, náraminehi namutu. Nacatsatsaicapa timetajiricanapa.

### *Ema Jesús macanaraca ena apinana púchuquiana*

<sup>27</sup> Tiuri, tichavayarepa ema Jesús te mapena. Eta mapaisirahi te calle, náehicapaipa ena apinana púchuquiana. Tipiaracanapaipahi te máequene.

—¡Tátachicha Jesús, pájapanuhavi picanaracahavi. Vicasíñavi piti yátupiquenévihi Cristo! —náichapa.

<sup>28</sup> Váhisera masuapavanehini éma. Te tisiapapa ema Jesús te mapena, ena púchuquiana tisiapanavarepa. Témeñahavanapa eta mayehe. Tásiha, éma mayaserecavacapa. Ánipa máichavaca:

—¿Yátupipuca ecasiñanuhi eta nucanarasiraheyare? —macahepa.

Ena najicapapa:

—Yátupi, tata.

<sup>29</sup> Tacahe, ema Jesús máemamacapa eta náuquihana. Tásiha, máichavacapa:

—Tiúri, eta ecasiñairanuhi, enaracayare —máichavacapa.

<sup>30</sup> Jéhesare, enevanepa tinaracanahi. Tímairiricanapa. Tásiha, muracapa eta matuparasira vahi nacumetajirica eta macanarasiravacahi éma.

<sup>31</sup> Váhisera nácahehini éna. Étarichuhi te tiúchucanapa, timetajiricanapa eta macanarasiravacahi. Tásicha, náechapa namutu te tachacayarahahanahi eta avasare eta juca máichaquenehi ema Jesús.

*Ema Jesús macanaraca ema achane upa, macaechajicahi*

<sup>32</sup> Te viúchucavarepa, nacahepaipavare ena achaneana. Námapahi ema achane. Úpahi éma, taicha mávaháruhi ema éreana.

<sup>33</sup> Tacache, ema Jesús máquijicapa ema éreana, ema tiávahá-cainihi. Tásicha, ema achane tinaracapa. Téchajicapa. Ichaperinehivare eta náramirahi ena achaneana eta náimairahi. Ánipa nacahe:

—¡Tétavicava eta máitupajijiasirava ema Jesús! Te viávasa Israel, nájina tiratahaina tíchaina táchutihini eta juca vímaha-quenehi —nacahepa.

<sup>34</sup> Nararihivare ena fariséoana. Ánipa nacahehi:

—Ema maca Jesús, vémeteaca majupahahi ema Satanás, ema náquenumurihi ena éreanana. Máijararuhi jácani eta máitupajijiasiravahí eta macuchusiravacahi éna —nacahepa.

*Ema Jesús majapanuvaca ena achaneana*

<sup>35</sup> Ema Jesús tamutuhi mapaica eta avasareana étapa eta ánicchichaqueneana avasarechichana. Tímiturecapahí tayehe te jácani máitecapihapahí te náurujisirarevana. Ticametarai-rupahi eta máechajiriruva ema Viya eta náuchucuirayare ena ticasiñanahi éma, machaneranayarehi éna. Ticanararecapahivare ena ticatajivanahi ticacatiruhanahi.

<sup>36</sup> Camuriana ena achaneana tínanajirícavanahí. Taicha ticatajivanahi éna, nájina nácasiflahini. Nacutihi eta uvesa te nájina tijaneacaina. Eta máimairavacahi ema Jesús, ichape eta majapanuiravacahi.

<sup>37</sup> Tacache, ema Jesús máichahavipa viti máimitureana:

—Tétavicavapa eta vicamunuirava ena tímicatacavahianaya tayehe eta juca vématanerepihi.

<sup>38</sup> Eyaseacayaresera ema Tata Vicaiyaquene, máijaracahavi ena tímicatacavahianayare. Eta juca tímicutijiricavahí mácani achane eta macamunuiravahí ena tímicatacacanaya te máechatijicaya eta maharusura —máichahavipa.

## 10

*Ena dócequeneana apostóleana manerejiruanahi ema Jesús  
(Mr 3.13-19; Lc 6.12-16)*

<sup>1</sup> Tacache, ema Jesús tíchuhahavipa viti dócequeneana, mayeheanayare apóstole. Tíjaracahavipa eta vítupajijiasiravayare viratahairayarehi vicuchucavaca ena éreanana,

vicanarasirayareva ena nacajumaqueneana étapa eta nacatiruhavana.

<sup>2-4</sup> Eta juca víjareana viti apóstoleana\*: Ema tínapuca ema Simón Pedro, émapa ema maparapeichu Andrés, ema Jacobo ema maparapeichu Juan, ema Felipe, ema Bartolomé, ema Tomás, nútipa Mateo, ema apána Jacobo, ema Lebeo, ema apána Simón, émapa ema Júlasi Iscariote (ema tijararecahi ema Jesús).

*Ema Jesús mavanecavacapa ena dócequeneana apóstoleana napacayare tamutu avasareana, ticametarairuanayarepahi*

(Mr 6.7-13; Lc 9.1-6)

<sup>5</sup> Tacahé, ema Jesús tévatacahavipa viti dócequeneana apóstoleana vicametarairuyarehi. Ánipa máichahavi:

—Vahi ecuyana tayehe eta návasana ena apavasajuecuana. Váhivare ecuyana nayehe ena samaritánoana.

<sup>6</sup> Eyanayaresera tayehe eta avasareana návasanahi ena vijaneanana israelítana. Taicha éna nacutihi eta uvesana máquenureana.

<sup>7</sup> Eyana ecametarairuyare nayehe. Emetacayare eta nútijapairainapa nuti Náquenuyare, nuti nucuchucuhavacayare éna, taicha mavanerunuhi nútí ema Viya.

<sup>8</sup> Ecanaracavacayarepahi ena leprósoana énapa nácani ticatajivanahi taicha eta apána jumare. Ecaechepucayareva ena náepenaqueneana. Ecuchucayareva ena éreanana. Éti, vahi evachareruinahi eta juca ítupajijiasiravahi, váhivare ecobrachaimahi nácani ecanararuanayare.

<sup>9</sup> Váhivare iámaimahi eta oro, eta plata, eta reale. Tacuija iama eta enirurucuha te alforja.

<sup>10</sup> Étanarichuvare emuiriha, éta iámayare. Étapa eta éparupeva, étaripa eta eyupairiquiana. Ema ticaematanerahí, tatuparacahi náenicayarepahi te jácani macaemataneiyapahi. Ene ecaheya éti, titátitheanayare ena tijacapanaya eta ecametarairuirayarepahi.

<sup>11</sup> Te ítecapaucha jácani avasare, etanucayare ema achane tiuri, témunarahi. Enasiyare mayehe. Tiámainucava te táitecapa eta iúchusirayareva tayehe eta avasare, epaenumavaya ejunjijica eta ítecapihahi.

---

\* **10:2-4** Ena nani apinana ajairana ema Jacobo émapa ema Juan, naparapecacahi, machichanaveanahi ema Zebedeo. Ema Mateo, eta máematanerepiníhi, tico-brareca eta impuesto. Ema apána Jacobo, machichahi ema Alfeo. Ema Lebeo, mapapihi eta máijare. Ticaijarehvare Tadeo étapa eta Judas. (Te pivaraha pecha, pitanaucá te Marcos 3.16-19 étapa te Lucas 6.14-16.) Ema apána Simón, tímaticarehi éma, nachamurinihi ena revolucionároana ticaijareanahi “cananístana”. Navaraha náquijica ena extranjeroana romanoana.

<sup>12</sup> Te esiapayarepa tayehe eta peti, eyaseacayare ema Viya eta náuricacarevaina ena achaneana ticapenana eta peti.

<sup>13</sup> Te tiúrianahi ena achaneana ticapenana eta peti, ímisanava eyaseuchayare eta náuricacarevaina. Téhesera te vahi nacuri, váhi eyaseuchaimahi.

<sup>14</sup> Étaripa te váhipuca nacujacapahe te jácani avasare, étapa te jácani peti ítecapihayare, váhivare nacuvvaraha nacusamahe, iúchucavaneyareva. Étatapevachavanúmayareséra eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehini.

<sup>15</sup> Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñai-rayare ena achaneana váinarajiqueneana ticavasanaini te Sodoma étapa eta Gomorra.

*Nacatianacainapa ena téhicanapahi ema Jesús*

(Lc 12.2-7)

<sup>16</sup> Esamanuchaha. Núti nuvanecahehi éti eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare táíñehiqueneánahi. Étisera ecutiyare eta uvesa eta tamansuvahí. Ítucayare eta ecaiche-paisirayare eta navainarajivana. Váhisera ecujicapauchava te návarahapuca náehahe.

<sup>17</sup> Échapava, taicha nararihiyare ena achaneana ticati-nacaheanayare táichavenehi eta éhisiranuhi. Ticaratacahe-nainapa, écayaserehinapa nayehe ena juéseana. Téstacahe-nainavarepa eta te náurujisirarevana.

<sup>18</sup> Tásiba, etiarihiyare éti tiámaheanaya te namirahu ena aquenucana, téhevar te namirahu ena Presidenteana gobier-noanahi, ecaviurevayare táichavenehi eta éhisiranuhi. Esapi-hasera éti, ecamapuravainapa échajisianuyare te namirahu éna, apaesa náimatiyare namutu ena achaneana te avasareana eta nímiturapiana.

<sup>19</sup> Tacache, te jácani námahepapuca te namirahu ena aquenucana, vahi ecueñamava tayehe eta jácani échajiuchiravayare, ecatiuchiravayare. Échajicayare eta échajiriruvana máijararuheyare ema Espíritu Santo te jena sache.

<sup>20</sup> Taicha máimahaheinepa, tímitucaheyare eta échajisiraya. Vahi étijivaimahi eta échajisiraya.

<sup>21</sup> Natarihiyareva nácani achaneana tijararecanaya ena naparapequeneana, navarairahi náimicapaca táichavenénahi eta náehisiranuhi nútí. Natarihiyareva ena nácani náiyana, navarahayareva náijarareca ena nachichanaveana táichavenehi eta náehisiranuhi nútí. Natarihiyareva

nácani nachichanaveana nacanarainapa ena náiyana, náimicac Cainapa táichavenehi eta náehisiranuhi núti.

<sup>22</sup> Namutuyaréni ena achaneana ticticianacaheanayare táichavenénahi eta éhisiranuhi núti. Téhesera ecamicháhi tamutu, ímiyanavahi eta éhisiranuhi te táitavapa tamutu, nucuchucuhahayare núti.

<sup>23</sup> Te napanajicahepuca te jácani avasare iávihahi, táichavenehi eta ecametarairuirahi, ejunayare tayehe eta apána avasare. Jéhesare, nuti Manerejirunuhi ema Viya, nútijapavanénapa. Vuíchaha ecuitahi epaica eta avasareana ne vijaneanana israelítana.

<sup>24</sup> Éti nímitureana, ticticianacaheanaya ena achaneana. Vahi epicauchacaréimahi nayehe, táichavenehi éhisiranuhi núti. Ticticianacaheyaresera tacuti eta nacatianasiranuhi núti.

<sup>25</sup> Tíjarechaheanayare váinarajihe, máurishihepuca, tacuti eta náumehairanuhi núti. Étisera, evapinavaya eta ecutiranuyare eta nacatianasiranuhi nuti iáquenu, núti eyehenuhi maestro.

<sup>26</sup> Váhisera ecupicavaca ena ticticianacaheana. Ema Viya tímararacaheya. Ticunachaheya eta ecamichirahi, evehainapa eta ícuchihi.

<sup>27</sup> Tásicha, étumechava eta ecametarairiraya tamutu eta nímiturapiana te tamutu avasareana. Jácani néchajiriruvanahi te timapicu, éti ecuchujicayarehi te tijarahi, emicau-chiravacaya ena achaneana. Étaripa eta nujajairuhehi te vicarichuhi, epiaracainapa te calle.

<sup>28</sup> Vahi ecupica nácani nacapacapuca eta iáquehe, tacarichuchucha náiteturuequenehayare. Váhisera naratahaimahi nacamitiequeneha eta iáchaneva. Macarichu ema Viya epicayare, taicha éma maituruequenehahi tamutu. Maratahahi macamitiequeneha eta iáchanevana tayehe eta táiñehiquene infierno, te ecainajiruva táichavenehi eta episirapuca eta nacapasiraheyare.

<sup>29</sup> Nímicutichinahe eta cayurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta tátaresirahi, étapa eta táepenirahi.

<sup>30</sup> Evetijipa éti, éñamacarepanahi me Viya. Éma, tímatipa eta tatupa eta echutimacana. Téchahehivare éma tamutu eta ítaresirana.

<sup>31</sup> Eta tacahe, vahi ecueñamavahi éti tayehe eta ítaresirana, taicha téavicavahi eta emunavahi mayehe.

*Vímereuchavayare eta véhisira ema Jesús  
(Lc 12.8-9)*

<sup>32</sup> Tímiyanava ema Jesús tímitucahavi. Ánivare macahe:

—Namutu ena tímereuchavanahi eta náehisiranuhi te nami-ruhu ena achaneana, nútí apanavare nímereuchavaya eta nuchanerairavacahi éna mayehe ema Tata Nucaiyaquene, ema tiávihahi te anuma.

<sup>33</sup> Nácanisera vahi návarahahini tímereuchavanahi eta náehisiranuhi, nútí apanava nímereuchaya eta vahi nuchaneranainahini éna, te mamirahu ema Tata Nucaiyaquene.

*Ena achaneana náepuruvacainapa nácani téhicanayare ema Jesús  
(Lc 12.51-53; 14.26-27)*

<sup>34</sup> Éti ímijachaipapuca eta nítésirahi te juca apaquehe, tájina tacayemacarémahi, tiúricacareyarehi nícha. Váhisera ene tac-ahe. Níchaveneya nútí, ena achaneana tépuruheanaya térajicavanaya eyehe. Eta tacahe, nuvaraha échapirica yátupina eta juca éhisiranuhi.

<sup>35</sup> Taicha puiti juca vicaijuheyare, mácani achane, te natiarihi ena machichanaveana, nacatichayarehi ema naiya táichaveneyarehi eta máehisiranuhi éma. Ésuripa esu naena, nacatianacayareva. Ésupa esu chinenaca, sucatianacayareva esu suímase taicha eta suéhisiranuhivare esu apana.

<sup>36</sup> Ene nacaheya, nararihiyare ena tachichanaveana eta peti tictorianacana ena náiyana te peti níchavenehi nútí.

<sup>37</sup> Nácanisera tínajicavana eta náehisiranuhi táichavenehi eta nacatianasira ena nachichanaveana, váipa tatuparacahini nuchaneranainahini. Énaripa nácani tínajicavana eta náehisiranuhi táichavenehi eta nacatianasira ena náiyana, énerichuvare vaipa tatuparacahini nuchaneranainahini.

<sup>38</sup> Énerichuvare nácani apaesarichu eta navarairahi téhicanuanahí, váhivare náijaracavahini táimicapacahini eta náehisiranuhi, vaipa tátuparacahini nuchaneranainahini.

<sup>39</sup> Taicha nácani téñamavanahi eta náitaresira, tiávamirahuana eta náehisiranuhi, énajivayare ticamitiequenehavanaya. Énasera nácani yátupi tíjararecavanahi téhicanuana, táimicaparuayanarepuca eta náehisiranuhi, éna tiúchucuhayare eta náitaresirayare.

*Jararihi eta vícuchihi te anuma  
(Mr 9.41)*

<sup>40</sup> Ema Viya máitsivachayare nácani tiúriana ena najacapirohahareyare nasamahe éti. Taicha eta najacapirohahéhi, ticaecheranahi eta najacapiranuhivare nútí; énerichuvare najacaphivare ema Tata Nucaiyaquene.

<sup>41</sup> Énerichuvare nácani tijacapanahí ema profeta nuvaneruhi, énapa ena achaneana tiuri eta náehisiranuhi, máitsivachayare ema Tata, máijarasiravacayare eta náicuchi.

<sup>42</sup> Énaripa ena témunarahianahi nayehe ena nani ánichicha-queneana téhicanuanahi, nacumpiracha eta une táichavene eta náehisiranuhi; énerichuvare jararihi eta náicuchiquene — máichahavipa ema Jesús.

## 11

*Ema Juan Tícacásiricarahi mavanecavacapa ena máimitureana (Lc 7.18-35)*

<sup>1</sup> Te tamutupa eta máimitusirahavihi ema Jesús viti dócequeneana mayeheana apóstole, tiyanavarepa eta te avasareana tayehé eta Galilea. Taicha mavarahahi máimitucayare ena achaneana eta máechajiriruvana ema Viya.

<sup>2</sup> Tiuri puiti, ema Juan Tícacásiricarahi, mávinehi te cárcel. Ánaqui masamairiricapa eta máichaqueneanahi ema Jesús. Tacahe, máevatacapa ena apinana máimitureana, nayaserepanayarehi ema Jesús.

<sup>3</sup> Te náitecapauchapa, náichapa:

—Ema viáquenu Juan tivanecahavihi viyaserepanaviyare te yátupihipuca pítiripahipuca Cristo ema vicuchapaquenehi, ¿téheserapuca vímiyanavayarepuca vicuchapa? —náichapa.

<sup>4-5</sup> Ema Jesús majicapavacapa:

—Nuvaraha íamararacaya eta níchaqueneana puiti. Nucaimairiricavacaipa ena púchuquiana. Nímpaisiraipa ena masariana. Nucanaracavacaipa ena leprósoana, énapa ena túhuquíana. Nucaechepusiravacaipavare ena náepenaqueaneanaini. Énerichuvare níchuhahi ena páureana náeneuchavaya apaesa náuchucuha. Tásiha, eyana emetaca ema Juan tamutu.

<sup>6</sup> Vaipa macueñamava ema Juan eta nuyehe. Tétavicavahi eta máuricacarevahi éma, te ticasíñavahi eta nuyehe — máichavacapa.

<sup>7</sup> Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacrahini éma, te eyanapa te mávapahi apaquehe te mávihahi, ¿tájaha eta epaneruruana tayehé eta macametarai-ruirahi? Éti ímijachaipapuca mamapachichijiriruvaichucha eta máechajisirahi tacutihí te vímararaca ta taflurena eta acutena te tacayamuririjica eta técaticava.

<sup>8</sup> Ímijachaipavarepuca tavayuaruhi éma tiúrinanáca-vayarehi eta macamuirihairahi. Écharichuhi éti mácani tiúrinanacavahi, píncanillahi eta máitaresira, váiparinehi

tiúchuaimahi te sache, váhivare tiyanaimahi te mávapahiana apaquehe. Manasiqueneyarehi te jácani tiúrina peti.

<sup>9</sup> Nuyaserecahe: ¿Tájaha eta ímijachirahi eta mayehe? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana.

<sup>10</sup> Ema maca Juan émara máechajisihaquenehi ema Viya eta te Sagrada Escritura, ánipa macahehi: "Nuvanecayare ema tínapumirauchaviyarepahi ema ticametarairuyarepahi, apaesa natsecavapaipa ena achaneana eta najacapiraviyare" tacahepa eta Sagrada Escritura.

<sup>11</sup> Núti nutupiruva numetacahe: Ema maca Juan, nájina mácuti nayehe ena achaneana. Tétavicavahi eta macunachacarevahi. Tiápajupanavahisera eta nacunachacarevahi nácani nuchaneranaya, apaesachichapucaini eta nacaicutiarairahi eta mapanereruana ema Tata.

<sup>12</sup> Ema Juan tépanavapa eta máimitusirahi ena achaneana tacamunuirahi eta náeneuchirava me Viya. Nararihisera ena vahi náuricahini nasamararacahini. Étapa tímicatichahi témecatajívachahi éma. Puíticha tanasihi ticatichanuana núti apanava, témecatajivachuanayanare.

<sup>13</sup> Ema víyarahaini Moisés téchajisihanuhi eta te májurehi. Énaripa ena víyarahananini profetana náechajisihahi eta nítesirayarehi nuti Manerejirunuhi ema Viya.

<sup>14</sup> Puiti numetacahe: Ema Juan émaripahi ema profeta máiteruyarehi mavasiyarehi ema víyarahaini Elías, eta máinapumirauchiranuyare.

<sup>15</sup> Te evarahapuca ecaicutiara, tavaraha eta epanerechianava.

<sup>16-17</sup> Etiarihihisera eti achaneana puiti juca sácheana, eta emasuapajiraivahi, nímicutichahesa ena amaperuana tiútseruanahi. Apapipijichucha eta nacayemaqueneanapahi. Ema apana macahepapuca: "Vépiyacaya eta piéstachicha". Énasera ena apamuriana vahi náisapavahini. Tásiba, ema apana macahepuca: "Vépiyacaya eta ecari". Váhivaresera náisapavahini.

<sup>18</sup> Ema Juan, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihisera te emuri ena tépiyaequenehanahi éma. Náimijachahi mávaháruhi ema éreana.

<sup>19</sup> Nuti Manerejirunuhi ema Viya, eta nítecapauchirahepa, nucachanehepaipa eti achaneana eta enisirahi. Etiarihihivre eti épiyaequenehanuhi: "Ímaha ema maca, cánisiu-

quitataji, cávahárasí. Macachanevacapaipa ena achaneana tisipecaturarahianahi” ecahehi. Eti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahí taicha eta emasuapajiraivahí. Te yátupihihini échemarahi, ímatinuhini eta nucavanahirahí eta me Tata —máichapa ema Jesús.

*Eta táicuñayare eta návasana ena achaneana masuapajirairahana*  
(Lc 10.13-15)

<sup>20</sup> Ema Jesús tépanavapa máechajisiha eta táicuñayarehi eta avasareana máichinehi eta tiáramicareana. Ticaicuñanayarehi ena tachichanaveanahi táichavenehi eta namasuapa-jiraivahí. Váhivare náeneuchavahini, náinajicahipucaini eta napecaturana. Máechajicapa ena achaneana tímicutijiricavahí natariarihinhini te mamirahu. Ánipa macahe:

<sup>21</sup> —¡Páurehesami eti nujaneanana ecavasanahí te avasare Corazín! ¡Páurehesamihivare eti apamuriana nujaneanana ecavasanahivare te avasare Betsaida! Ichape eta ícuñayare taicha éti ímaharipa tamutu eta tiáramicareana níchaqueneanahí te emirahu, váhisera ávarahahini éneuchavahíni. Ena nani achaneana ticavasanahí te Siria, apavasanahaninéni, tétavicavahinéni eta namarivahí, németeacasera nútì nasapi-hahipucaini téneuchavana te náimahahini eta níchaqueneanapahí. Enévanenahíni náimerecavahini yátupi eta náeneuchiravainahini.

<sup>22</sup> Numetacahevanesera: Te jena sácheyare, muracapanayare eta ícuñayare éti, taicha eta emavarairahí éneuchavahini. Tacachuricayare eta nacaicuñairaya ena achaneana apavasanana ticavasanahí te Siria.

<sup>23</sup> Étiripa eti ecavasanahí te avasare Capernaum, tamapurujihi eta nímitusirahehi étapa eta ímairahi eta tiáramicareana níchaqueneana. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épjuquichavayare eta te yucu taicha vahi éneuchavaimahi éti. Taicha te nímerecahini eta tiáramicareana tayehe eta avasaréni váinarajiquenehi Sodoma, táchutihini eta ímairahi éti, ichapehipucaini eta náeneuchiravainahini, váipapuca macuicuñacahini ema Viya.

<sup>24</sup> Numetacahevanesera: Ichape eta ícuñayare te táitecapapa eta juícioyer. Tacachuricayare eta náicuñayare ena ticavasanaini te avasare Sodoma —macahepa ema Jesús.

*Ema Jesús tiúrisamuréinehi mayehe ema Maiya*  
(Lc 10.21-22)

<sup>25</sup> Étarichuhi te jena hórahi, ema Jesús ánipa macahe:

—Tata Nuaiyaquene, tétavicava eta nucunachiravi. Jéhevare píti táquenuvihí eta anuma étapa te juca apaquehe. Títauchavaipa eta pipanereruhi. Vahi písapahini náitucahini eta júcana ena tímijachavanahí téchemarahiana. Énapasera píjaracahi ena nani téhicanuanahí, tájinahinéni náechemaraivainahini. Puiti nasapiharipahi nacachuricahi ena titupajijiacavanahí.

<sup>26</sup> Tétavicavahi eta táurivahi eta pipanereruhi píti, Tata Nuaiyaquene.

*Ema Jesús máichuhavaca ena navitajiruana, mavaraha macanaracavaca*

<sup>27</sup> Tacahé, ema Jesús máichavacapa ena achaneana:

—Ema Tata Nuaiyaquene, ema tíjaracanuhi eta nútiraya néchaya tamutu. Nájina énajivainahini náimatihi ema Tata. Nucarichu núti néchinavahi ena nímimatiruanayare éma. Taicha núti yátupihi eta nímatirahi ema Tata Nuaiyaquene; tacutiquenehi eta yátupirahivare eta máimatiranuhi éma.

<sup>28</sup> Yare, ecasiñanu emutu eti evitajiruanahí te iáchanevana eti éyarecarahiana eta éjecapiravana. Núti nucanaracaheyare.

<sup>29</sup> Ísapava nunacasicahe eta nuyehe yugo. Nucachanehe apaesca ecaravahu nuyehe, taicha núti mánsunu, tétavicava eta núriva eta nusamure. Éti tétavicavaya eta iúricacarevaya te iáchanevana te ejacapa eta nímiturapiana.

<sup>30</sup> Taicha eta nuyehe yugo vahi tácajera. Tipevejiyare esama —máichavacapa ema Jesús.

## 12

*Ena fariséoana náimipicauchahi eta nayeherepiana tayehe eta sávarumuahuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare.*

(Mr 2.23-28; Lc 6.1-5)

<sup>1</sup> Eta jena sávaru, ema Jesús tiyanapa tipaica. Tiámahavipa viti máimitureana. Témehicavanapa ena fariséoana. Vétavivijicapaipahi eta isanitiana. Tacahé, eta vipaisirapahi, vécuhpipa viti máimitureana. Tásicha, vivechuquihapaipahi étajavapahi eta trigo. Vivepiraquihapaipa, vépurajacachavapipaipahi. Vinicapaipa, taicha tísapacareichucha.

<sup>2</sup> Énasera ena fariséoana eta náimararasirapahi, tisemamajuheanapa. Ánipa naicha ema Jesús:

—Pímaha ena pímitureana. Ticaematananapaichucha eta navepiraquihapaipahi eta trigo puiti juca sache tétavicavahi eta tacapicahuirahi. Vahi tísapacaremahi eta juca nacaemata-nérahi puiti —náichapa.

<sup>3</sup> Tásicha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenovahí ema víyarahaini David eta mapaisirapahi técuhapaipa, énerichuva ena téhicanapahi.

<sup>4</sup> Écharichuhi éti te masiapapa eta mapena ema Viya, tiyase-serecapa eta manicayarehi. Náijaracapa eta pan tacapica-huquenehi nanacasarehi te mamirahu ema Viya. Nanicasarehi ena tiyujaracarahaniana, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

<sup>5</sup> Váhipuca échajicuha éti eta te Sagrada Escritura eta manvanairipi ema víyarahaini Moisés eta nayehe ena tiyujaracarahaniana téchapajiricanahi eta Templo. Éna, tájina natapiravainahini eta nacaematanerahi te sávarumuhuana.

<sup>6</sup> Tavetijichapuca puiti nutiarihipahi nútì. Ichápequenénu-pánahí tayehe eta Templo.

<sup>7</sup> Éti váhivare ecaicutiara eta juca máechajiriruvana ema Viya: “Núti nuvaraha yátupinaini eta ejapanuraivainaini. Taicha te vahi, tamapurujiyare eta ecamavahuirahi eta nuyehe” macahepa. Te ecaicutiarahini, váhiyarehini ecaechivaca ena nímitureana, taicha éna tájina natapiravainapahi.

<sup>8</sup> Tiuri puiti, numetacaheyare: Núti Manerejirunuhi ema Viya, nútirichu néchahi eta sache nanarasiraya ena achaneana —máichapa.

*Ema Jesús macanaraca ema achane tépenavahu*

*(Mr 3.1-6; Lc 6.6-11)*

<sup>9</sup> Te apanavarepa sávaru, tiyanavare ema Jesús tisiapahi tayehe eta náurujisirareva.

<sup>10</sup> Ánaqui matiarihi ema achane vaipa tayamuricahini eta mavahu, tépenavahuipa. Natarihihivare ena fariséoana, natanujiricahi eta ticaviurevayarehi ema Jesús. Nayase-recapa éma:

—¿Táuricapuca vicanaracavaca ena nacajumaqueneana te sávarumuhuana tacapicahuquenehi? —náichapa.

<sup>11</sup> Ema Jesús majicapavacapa:

—Nímicutichinahe puiti. Németeaca májina émanaina achane vahi macujapanuhini eta máitatiquene uvesa, te téchipacavapuca te pusu te jena sache tacapicahuquenehi. Eta máeñamirahi, tipatsicava mavecuha eta paure sárare.

<sup>12</sup> Núti numetacahe: Ema maca achane tiápajucavahi eta téñamacare tayehe eta uvesa. Tacalhe, tísapacaréchucha víchayare eta táuriqueneana te sávarumuhuana —máichavacapa.

<sup>13</sup> Tásicha, ema Jesús máichuhapa ema achane ticajuma-vahuhi:

—Nímaha. Picajaruvauchava, pímereca eta pivahu —máichapa.

Tacahe, ema achane eta macajaruvauchiravahi, enevanerinehi tinaraca eta mavahu. Tiúrivarepa tichava, tacutipa eta mavahu sapa.

<sup>14</sup> Tisemanarinehi ena fariséoana eta náimairahi eta máichaquenehi ema Jesús. Tiyananapa. Tinacuchavanapa eta napanerechirahi eta nacapasirayarehi ema Jesús.

### *Ema Jesús tiyanavarepa tipaicahi*

<sup>15</sup> Tacahe, ema Jesús, te máechapa eta napanereruhi ena fariséoana, navarairahi nacapaca, tiyanavarepa tipaicahi. Náehicapa ena camuriqueneana achaneana. Énerichuvare, náitecapauchapaipa ena nacajumaqueneana. Macanaracavacapaipa namutu.

<sup>16</sup> Mavanecapaipasera ena macanararuanapahi vahi nacumetajirica eta émairahi ticanaraca.

<sup>17</sup> Eta juca títauchavapahi eta máechajiriruvahi ema Viya tayehe eta májurehi ema víyarahaini profetaini Isaías.

<sup>18</sup> Ánipa tacahehi: “Nuvaraha ímatiya ema vanairucahi nuyehe, nunerejiruhi núti. Tétavicavahi eta néminasirahi, núrisamurehivare máicha. Ímatiyare éma taicha mávaháruhi ema Espíritu Santo máijararuhi éma. Ema nuvanara, tímítucavacayare ena achaneana te tamutu avasareana eta nuvanariopianahi.

<sup>19</sup> Éma, tájina máitucaimahi téhacaca. Váhivare tipiararecaimahi, macunachiravahi te cálleana tayehe eta máichaquenahai.

<sup>20</sup> Mánsuhí éma taicha ticayehéhi paciencia. Macamichavacahi namutu. Váhivare macajachaimahi nácani vahi túmeanaina. Tiámainucava te máejacapa tayehe eta mávacureyare, muracainapa eta mávacureyare.

<sup>21</sup> Tásihasera, namutu ena achaneana te avasareana ticuneyanayare eta mayehe, navarairayare máurichayare éma” macahepa ema Viya.

*Ena fariséoana téjecapavanahi eta náimijachirahi ema Jesús mávaháruhi ema Váinaraji Satanás*

*(Mr 3.19-30; Lc 11.14-23; 12.10)*

<sup>22</sup> Tacahe, ena achaneana námapaipa ema achane púchuqui, úpavare, taicha mávaháruhi ema éreana. Navarahahi macanaraca ema Jesús. Jéhesarehisera ema Jesús macanaracahi. Tiúripa téchejica, tímairiricavarepa.

<sup>23</sup> Ichaperinehi nárami ena achaneana. Tásiba, ánipa nacahé:

—Ema maca Jesús, émapachupuca ema Cristo, ema vicuchapaquenehi mámariequene ema víyarahaini David —nacahepa.

<sup>24</sup> Énasera ena fariséoana napanerechahi náepiyaequenehayarehi. Ánipa nacahe:

—Ema maca Jesús, eta macuchusiravacahi ena éreanana, vémeteaca máijararuhi eta máitupajijiasiravahí mayehe ema Satanás, ema náquenumurihi ena éreanana —nacahepa.

<sup>25</sup> Ema Jesús máimatihi eta napanereruhi éna. Tacahe, máichavacapa:

—Nímicutichinahe puiti ena machanerana ema gobierno. Éna vahi típutsimurihacacanaimahi apinainahipucaini partido. Te típutsimuriacacanapa, énajicacaipapucaini tiáquipacacana. Énaripa ena achaneana te avasare, vahi táurica náíputsimuriavahini. Émaripa mácani achane, te camurianahi ena machichanaveana, váiparinehivare típutsimuriavanaimahi náehajiricacahini, énajiricacahini náquipairicacahini.

<sup>26</sup> Ene macahehi ema Váinaraji Satanás, váiparinehi másapahini típutscacana ena machamuriana, taicha mavarahahi tisimutuanayarehi éna, tímiyanavanayarehi eta nacaetemajirisrahaviyarehi.

<sup>27</sup> Éti ímijachaipa nútirichu machamuri ema Satanás, táichavenehi eta nuratahairahí nucuchucavaca ena éreanana. Tájina vahi étupicavahini éti eta juca epanereruana. Te émahipuca tímicatacanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma.

<sup>28</sup> Émaquenehisera ema Espíritu Santo, tíjaracanuhi eta juca nuratahairahí nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare nécha tamutu. Nútiripara nuti ecuchapaquenehi.

<sup>29</sup> Nájina tisiapaimahi eta námerecahini te jácani peti matiarihihi ema túmequenehi. Tacamunuhi nacaratacanumayare, náitiacanumayarehi éma. Jéhesare, náituruyechasareyarepa eta máimahaqueneana. Ene nucahehi nuti, túmepananuhi mayehe ema maca Satanás.

<sup>30</sup> Te vahi éhicanu, ecaemataneasiranuya, machamurihehi éti ema ticatianacanuhi. Masapiha ímicatacahi éma eta macaetemajirisiranuhi.

<sup>31-32</sup> Nutupiruva numetacahe: Eperdonachacareana eti achaneana eta epecaturana, tamutu jácani échajisihaira eta táñemahiqueneana. Jácani te ecaecahinuhipuca nuti Manerejirunuhi ema Viya. Jararihisera eta epecatura vahi tiperdonachacaremahi. Éti ímijachahi ema Satanás

ema tiávahácanuhi. Ichape eta éjecapiravahi, taicha ema tiávahácanuhi núti, émaquenehi ema Espíritu Santo. Éti epanararacaripa éma. Tásiha, tájina eperdonachacareimahi puiti juca ítaresiraichaha, evetijipa te apana ítaresira — máichavacapa.

*Ema Jesús máimicuticha eta táhi eta yucuqui  
(Lc 6.43-45)*

<sup>33</sup> Tímaticare eta yucuqui te tiúrinisihi eta tacahira. Tímaticarehivare eta apana yucuqui, máuriraha eta tacahira. ¡Epanerecha! Núti níchahi eta táuriqueneana nayehe ena achaneana ticatajivanahi. Éta tímereuchanuhi eta mávahásiranuhi ema Espíritu Santo. Téhesera nucaetemarecahini, níchahini eta máematanerepiana ema Váinaraji, jéhevareserapucaini eta tímereuchanuhini eta mávahásiranuinahini éma.

<sup>34</sup> ¡Étisera machichanaveanatataji ema Váinaraji! Váiparinehi ítucaimahi échajisiha eta táurinaqueneana, taicha éti tamaverasiavahi eta evainarajivana. Eta échajiriruvanahi ticaecherahi eta evainarajiva te esamureana.

<sup>35</sup> Nácani tiúriana achaneana, tatupiruvahi eta náechajirisrava taicha tiúrihi eta nasamure. Nácanisera achaneana váinarajiana, vahi tiúrimahi eta náechajirisrava. Tíñemahipi vacahi taicha tavayuchahi eta tavainarajiva eta nasamure.

<sup>36</sup> Nutupiruva numetacahe: Te táitecapapa eta sache táitecapirayare eta juicio, emutu ecayaserehiyare eta échajisihairana eta tamaeperajiqueneana.

<sup>37</sup> Étaripa eta tiviuchaheyare. Téhesera tiúrihipuca eta échajisihairahí, vahi ecaicuñaimahi. Tájina tiviuchahémahi — máichavacapa.

*Ema Jesús macajachavaca ena fariséoana taicha eta namsuapajiraivahi*

*(Mr 8.12; Lc 11.29-32)*

<sup>38</sup> Tacahé, nayaseacapa ema Jesús ena fariséoana énapa ena escribánoana. Ánipa náicha:

—Tata maestro, vivaraha picuchucaini eta tiáramicare, te yátupipuca mavaneruvihí ema Viya —náichapa.

<sup>39</sup> Ema Jesús majicapavacapa:

—¡Eti achaneana váinarajiqueneana! Núti nímatihe. Vahi esuapanuimahi, te nímerecapucaini eta tiáramicare. Tásiha, váhinéni étina tatuparaca ímahahini eta tiáramicareana. Ímayaharesera eta tiáramicare tacutiyare eta máichavaquenevahí ema víyarahaini profetaini Jonás.

<sup>40</sup> Taicha ema Jonás masiapajuechahi eta ichapequene jima, mapana sache eta mayerevahí, mapanavare yati. Ene

nuchaheyare, nútí Manerejirunuhi ema Viya, mapanayare sache, mapanavare yati, eta nuchaheyare eta nucaecarasi-rayare.

<sup>41</sup> Eta jena sácheyare téchepucanayare namutu, tiúchchuhanayare ena achaneana ticavasanáinihi acane te Nínive. Tisipe-caturarahianahinéni éna. Natupiruvahisera nasuapa eta mame tarairu ema Jonás. Téneuchavanavanehi. Tásiha, te jena sácheyare, nacahenapa eyehe éti: “Táuricapa nacaicuñaini ena nani maparajuruana ema Cristo, táichavenehi eta namasua-pirahi éma. Taicha éma, máuriquenepanahi mayehe ema Jonás” nacahénapa.

<sup>42</sup> Tacutiquene esu reina Seba eta acane, te susamairi-ricapa eta máitupajijiasiravahi yátupi ema Salomón. Ésu, tayérehiquenehinéni eta suávasa, tiyanahisera sucapayaca ema Salomón taicha suvarahahi susamayarehi éma. Tacahe te téchepucanapa namutu, ésu suyaseacainapa eta ecaicuña éti máetupicushianahi puiti. Sucahenapapuca: “Táuricapa nacaicuñahini ena nani máetupicushiana, tájina náetseraruina nasamaripa ema Cristo, ema titupajijiápanavahí mayehe ema Salomón, tásiha vuíchahacaruva nasuapa” sucahénapapuca jácani.

*Ema Jesús máimicutichinahi ena masuapajirairahana mayehe (Lc 11.24-26)*

<sup>43</sup> Tímiyanava eta máechajisiravahi ema Jesús, ánipa mac-ahe: —Énerichuvare éti ecuti mácani achane máinajiruhi ema émana éreana. Ema éreana tiyana matanucainapa eta jácani masiapihayarehi. Eta mamaichimavira eta mavarahaquene, mapanerechayarehi tichava.

<sup>44</sup> Macahénapapuca: “Nuyanayare nuchava, nusiapayareva mayehe ema návaháruinihi”. Te títecápapa ema éreana mayehe ema achane mávaháruinihi, máimahapa ema achane máinajicaripa eta mapecaturana, vuíchahasera máehicahini ema Viya.

<sup>45</sup> Tásiha, tiúrisamurepa ema éreana. Tásiha, tíchuarecapa ena siétequeneana machamuriana. Váinajaripanana éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane. Ene ecaheyare éti, taicha eta emasuapiranuhi —máichavacapa ema Jesús.

*Suítcapauchapa esu maena ema Jesús énapa ena maparape-naveana*

*(Mr 3.31-35; Lc 8.19-21)*

<sup>46</sup> Tímiturecarichaha ema Jesús nayehe ena achaneana, títecapanechá esu maena énapa ena maparapenaveana. Nanasihisera te aneca. Navarahahi náechajicayarehi éma.

<sup>47</sup> Natarihihi ena timetapananahi ema Jesús. Ánipa nacahe:

—Esu pémunaruquenehi pena énapa ena piparapenaveana, nararihi ani te aneca. Navarahahi téchajicaviana —náichapa.

**48 Émasera majicapapa:**

—Yátupi némunacavacahi esu meme, énapa ena nuparapenaveana. Nararihisa ani te juca nuchacaya ena némunaruahnahivare, nuparapenaveanahi.

**49 Tásicha, tisuvechahavipa viti mayeheana apóstoleana.**  
Tásicha, macahepa:

—Numetacahe, ena nani ena némunaruahnahivare.

**50 Taicha namutu nácani ticaematacaneacanahi me Tata tiávihahi te anuma, énahi ena némunaruahnahivare —máichavacapa.**

## 13

*Ema Jesús máimicutichinavaca ena achaneana eta evaraqui tacaevaquenehi te apanapanenejiquene máteji*

(*Mr 4.1-9; Lc 8.4-8*)

**1** Te jena sache, tiyanavarepa ema Jesús, macaijuhe te tachausi eta cáquiure. Téjacavarepa eta ánaqui eta máimitur-sirayarehi.

**2** Tásicha, camurianapahivare ena achaneana títecápau-chanahi éma. Eta navayuchiraripa ena achaneana, tiyanapa ema Jesús tiávacuhapa tayehe eta pacure. Ena achaneana nanasipa te tachausi tiájipahi.

**3** Tásicha, camurihi eta máimicutichaqueneanahi eta máimitusiravacahi. Ánipa macahe:

—Matiarihi ema émana achane. Tévapanahí te máesane.

**4** Eta mapaisirapahi, témiricapaipa eta evaraqui te achene. Táimahapa eta cágure, tanicapa.

**5** Eta mayeherepi éma eta máevasira, máevajajapaica eta apaquehe. Tásicha, eta apamuri evaraqui témiricapa te váhirichu tamitutuhini eta máteji taicha máripahi eta apaquehe. Tímarucavanepañeni táicha.

**6** Téhesera te tíjurepa eta sache, tacapajicapa; taicha váhirichu táuparevacahíni.

**7** Tacuhe, eta apama evaraqui témiricapaipa te tataracu eta itapepare. Tiúrinahinéni eta táimarusirahi, étasera eta itape tacachuricapa eta tajurusirahi. Táemuriachapa eta sucureca.

**8** Tacuhe, eta apamuri evaraqui témiricapaipa te tiúrina máteji. Tiúrinapanahí eta tajurusira. Eta étana, ticahipa tétipicavapanapa. Eta apanavare, ticahipa ánimiríchu. Eta apanavare, ticahivare apaesasajiruichu.

**9** Esamararacanu emutu éti. Te evarahapuca ecaicutiara, tavaraha eta epanerechinavayare.

*Ema Jesús máitametacaquenevacapa ena apóstoleana eta juca máimiturapihi*

*(Mr 4.10-20; Lc 8.9-15)*

<sup>10</sup> Tacahe, viti mayeheana apostóleana vémeñahavapa eta mayehe ema Jesús. Viyaserecapa tájahapuca tacayemahi eta máimicutiarachiravacaichucha eta máimitusiravacahi ena achaneana.

<sup>11</sup> Tásiha, ema Jesús tijicapahavipa:

—Ema Tata tituparacanuhi nítametacaheyare éti eta juca tálezquereruana mapanereruana. Mavaraha ímatiequenehaya éti. Énasera ena apamuriana achaneana vahi nítametacavacaimahi, náimainavainepe éna.

<sup>12</sup> Éti, te esuapa yátupihi eta nímiturapiana, ema Espíritu Santo tímitucaheya tamutu eta tacayemaqueneanahi. Énasera nácani vahi návarahahini nasuapa, énajivayare táchavana ticaverejicasianaya eta nasamaqueneanahi.

<sup>13</sup> Eta tacahehi eta nímitusiravacahi, nímicutiarachinava-caichucha. Te apaesarichu eta navarairahi náituca, vahi nacaicutiarahini eta juca nímechaqueneanahi. Nasamahi eta néchajiriruvana, vahisera nacaicutiarahini eta nímitusirahi.

<sup>14</sup> Puiti ena nani achaneana nacuti ena achaneana acane, vahi nasuapahini ema víyarahaini profeta Isaías. Ánipa macahe: “Nímatihe éti. Esamayarenénipuca, vahisera ecaicutiaraimahi. Ímahayarehinénipuca, vahivaresera ímatiequenehaimahi.

<sup>15</sup> Taicha eta esamureana eti achaneana, téavicavahi eta tamuracava. Vahi evaraha esama. Épiyacavahivare púchuquihe, emavarairahi esuapahini te esamureana. Tájinapa táichahíni vicuchapahini eta éneuchiravainahíni, evarairapucaini ecasiñavahini me Viya, apaesa macanaracahehini” macahepa ema víyarahaini Isaías.

<sup>16</sup> Étisera eti nímitureana, téavicavahi eta iúricacarevahi, taicha esuapahi eta juca ímahaqueneanahi étapa eta esamaqueneanahi.

<sup>17</sup> Nutupiruva numetacahe: Acane ichapemuriana ena achaneana tiúriana énapa ena víyarahananini profetana, téavicavahi eta navarairahi tímatinuana, náimahavare eta juca níchaqueneanahi ímahaqueneanahi. Navarahavarepa nasama eta nímituresirahi. Váipasera nacapayacahini.

<sup>18</sup> Ácaicutiaraicha eta juca nímicutiarachaquenehi mayehe ema tévacarahi.

<sup>19</sup> Núti níchuhavaca ena achaneana, machaneranayare ema Viya ena téhicanuanayare. Tásiha, natarihi ena achaneana nasamaripahinéni eta nímiturapianahi, émasera ema Váinaraji vahi másapahini tánasihini te nasamureana. Enevanehi

macamitisicavaca eta náimitucasivanainihi. Éna nacutihi eta máteji muracapahiquenehi te achene.

<sup>20</sup> Natarihivare ena apamuriana achaneana, nacutihi eta máteji máripahi. Te nasamararaca eta nímiturapiana, natupiruvanehi nasuapa, tiúrisamureanainehi.

<sup>21</sup> Váhisera náratahahini nacaravahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi, taicha vahi nacamichahini jácani nacatajivairanahí. Váhivare túmesamureanainahíni te tatiarihipa eta jácani nacatichaira ena achaneana táichavenehi eta náehisiranuhi.

<sup>22</sup> Natarihivare ena apamuriana achaneana nacuti eta máteji te távihahi eta itapequijiana. Énerichuvare nasamararacahinéni eta nímiturapiana. Napaneréquenrehahinéni, tahapapiricavacahisera eta jácani táichararacavayarehi eta náitaresira. Tavayuacavacavare eta tájiparacana, étapa eta navarairahi tirrnochavana. Tamutu eta juca támétavíahi eta navarairahi téhicanuana. Tamapuruiyyarehi eta najacapirahi eta nímiturapiana.

<sup>23</sup> Natarihisera ena apamuriana achaneana nacutihi eta tiúrina máteji. Éna, tisamanuanahi. Náunacahi yátupi eta nímiturapiana, náimatiéquenehairahi. Tájinavare náichiravainahíni eta náehisiranuhi. Ichape eta nacaematanasirahi ema Viya. Nararihi ena apesarichu eta nacaematanasirahi. Nararihivare ena apamuriana, nativarerehapanapa eta nacaematanasirahi. Tásiba, ena apamuriana, ichapemuripanapa eta nacaematanasirahi ema Viya –macahepa ema Jesús.

*Ema Jesús máimicutiarachina eta sucureca trigo étapa eta ejare*

<sup>24</sup> Ema Jesús máimicutiarachavare ena achaneana eta máimitusiravacahi:

—Puiti nuvaraha nímitucae tatarihiyare eta sácheyare te táitecapapa eta nacayeserehiraya me Viya ena achaneana. Tacutihi eta máichavaqueneva mácani achane tévacarahi eta tiúrina evaraqui tayehe eta tiúrina máteji.

<sup>25</sup> Étasera te tímacapa ema ticayehe eta sucureca, macahepapipa ema macatianaru. Máimisiriquichinapa eta táñemahiqeneana ejare. Tásiba, tiyanapa.

<sup>26</sup> Tacahe, te tímårucainipa eta evaraqui trigo, tiúchuvarepa eta ejare, tacachanepaipa eta evaraqui.

<sup>27</sup> Náraminehi ena machaneranahi ema achane tévacarahi. Tiyananapa nametapana ema náejaháruhi. Ánipa náicha: “Tata, eta jena pévaraquihi, tájina tacasiriquihini eta táñemahiqeneana ejare. Puítisera tiúchucapa tacachanepaipahi eta pévaraquihi” náichapa.

<sup>28</sup> Ema náejaháruhi majicapapa: “Matiarihi mácani ticatianacanuhi. Éma tíchahi eta juca, tímisiriquichinanuhi”. Tásicha, ema machanerana náichapa: “¿Pivarahapuca, tata, viyana víti vivepuriha eta jena ejareana?”

<sup>29</sup> Éma majicapapa: “Vahi tiúririne, taicha machu táimivepurica eta névaraqui trigo.

<sup>30</sup> Tácuticacarichaha eta tajurusirayare. Tiámainucava te tacaechatijipa, nuvanecahénapa éti nuchanerana tativayare evepurica eta ejarejiana, ítijicainapa eta tacaijuirayare. Tásicha, evehainasarepa eta trigo, ticaunainapa te tacau-nairare”.

*Ema Jesús máimicuticha eta taqui eta mostaza*

(*Mr 4.30-32; Lc 13.18-19*)

<sup>31-32</sup> Ema Jesús máimicutiarachavare eta taqui eta mostaza eta máimituresirahi. Ánipa macahe:

—Puiti nuvaraha nímitucaheyta apana tayehe eta evaraqui ánichichaquene, étasera te tijurucapa, tíñejiyarehi. Tacaheyare eta tajurusirayare eta nímiturapiana nayehe nácani tijacapanayare. Ímatichuhi éti eta taqui eta mostaza, eta ánichichapanahai tayehe eta apamuriana evaraquiiana. Tásihasera te tímarucapa, tiúnayarehi eta táenaqui, tacutiyarehi eta yucuqui eta táichapeva. Tacachuricayarehi eta apamuriana evaraquiiana. Járajapainapa eta cágureana. Táepiyacainapa eta tamacajiana te tatavavajiana. Ene tacaheyare eta tajurusirayare eta nímiturapiana nútí Manerejirunuhi ema Viya.

*Ema Jesús máimicuticha eta levadura*

(*Lc 13.20-21*)

<sup>33</sup> Énerichuvare máimicutichina eta juca apana máimituresirahi. Ánipa macahe:

—Tacutiquene, eta juca nímiturapiana tímicutijiricavahi eta levadura. Esu súcani esena tiúrihi eta tasisijisira eta suyehe levadura te tamutu eta suépiyaruhí masa, tayanapane apinapucaini arroba eta suyehe jarina, tasihajicahisera. Jéhesare, tiápucayarehi tiuri.

*Camuri eta máimicutichaqueneana*

(*Mr 4.33-34*)

<sup>34</sup> Ema Jesús tamutu máimicutiarachinapahi eta máimituresirahi. Tájina étahena te tímitureca, vahi macunacahini eta máimicutichinaqueneana.

<sup>35</sup> Títauchavahi eta juca máechajiriruvanahí ema émana profeta. Ani macahehi: “Tamutu eta nímiturapianayare

nímicutichinayarepahi. Nímicaecherachainapa eta táeñaurevaquenehi te tépanavainapa máepiyacainapa ema Viya eta apauehe" macahepa.

*Ema Jesús máimicaecherachapa eta máimicutichaqueneanahi tayehe eta trigo étapa eta ejare*

<sup>36</sup> Tacahe, ema Jesús mavanecavacapa ena achaneana nayanapa te napenana. Éma apanava tiyanavarepa tichava te mapena, vítipa viti mayeheanahi apóstoleana. Tacahe, te véjacapa vimutu, viyaserecapa máimicaecherachahini eta máimiturapihi máimicutichaquenehi eta ejare tacachanequenehi eta trigo.

<sup>37</sup> Tacahe, ema Jesús máichahavipa:

—Nuti Manerejirunuhi ema Viya nucutihi ema achane tévacahi eta tiúrina evaraqui.

<sup>38</sup> Eta apauehe tacaevaiyahi eta trigo, énahi ena achaneana te juca apauehe. Eta tiúrina evaraqui, étihi eti nuchaneranahi nútì. Tásiha, eta ejare énahi ena machaneranahi ema Váinaraji.

<sup>39</sup> Taicha ema tictorianacanuhi, manacahi eta ejare, mavarairahi máepacuchayarehi eta névaruhi nútì. Eta tacaechatijirapa eta trigo, étahi eta táitavirayare eta apauehe. Nárajapayarepa ena ángeleana, ticurujircanayarehi.

<sup>40-42</sup> Tásiha, te jena sácheyare, nuti Manerejirunuhi ema Viya nuvanecainapa ena nuyeheana ángeleana nacavehasi ena tíchanahi eta máeperajiqueneana énapa ena tímiaquipaicana ena apamuriana achaneana. Tásiha, náquijicavacainapa eta te táijurequenehi yucu. Ticapitiquiahechavanainapa eta tacativayare nasama. Tíyahanaínapa.

<sup>43</sup> Tásiha, nácani títauchanahi eta mavanairipianahi ema Viya, tétavicavayare eta najaraivayare tacutiyare eta tajaraiva eta sache. Téjacanainapa tayehe eta macatuparaphaiyahi ema Vicaiyaquene. Te evarahapuca ecaicutiara, tavaraha eta epanerechinavaya.

*Ema Jesús máimicuticha eta entierro*

<sup>44</sup> Eta nímiturapiana nuti násiquenehi te anuma tacuti eta tayumururevaquenehi entierro. Te máichimavahi mácani achane eta entierro, tiúrisamureyarehi. Tásiha, máimichavayarehi mayumuruca tayehe eta apauehe távihahi. Mavacharecayarepa eta apauehe, mavarairayarehi eta entierro. Tayanapane táimijararecayarepa tamutu eta macayehequeneainaihi.

*Máimicutichavare eta perla tasivachaquenehi*

<sup>45</sup> Énerichuvare eta najacapirahi ena achaneana eta nímiturapiana nuti násiquenehi te anuma tacuti eta macaematernerahi mácani achane comerciantepahi. Matanucapahi eta tasivachaqueanahí perla.

<sup>46</sup> Te máichimavapa eta perla matanurepahi, tétavicavahi eta tasivachavahi. Mavarahasera mavachareca eta perla, tayanapane táimijararecayarehi tamutu eta macayehequenainihi.

*Máimicutichavare eta ichape nayutahe*

<sup>47</sup> Énerichuvare nuvaraha nímitucae tayehe eta sácheyare eta táitecapirayarehi eta ecuñaraqui. Tacutihí eta ichape nayutahe. Te náechipaeca te cáquiure, tamutu tavehayarehi eta tasimutuqueneana jímana.

<sup>48</sup> Te náimahapa tónica eta nayutahe, navehayarepa nachurupaicapa te tiájipahi tachausi. Nanerejicayarepa eta jímana tiúrinana. Nanacacuhayarepa te ichape maha. Tásiha, náquijicayarepa eta apamuri máurirahanahí.

<sup>49</sup> Ene tacaheyare eta táitavirayare eta apaquehe. Nárajapayare ena ángeleana, nanerejicainapa ena achaneana tíchanahí eta tamauriqueanahí.

<sup>50</sup> Náijuchainapa te yucu, táetaviuchahi eta táijureva. Ticapi-tiquiahechavanainapa eta tacativayare nasama. Tíyahainapa –macahepa ema Jesús.

*Ema Jesús mayaserecavaca te nacaicutiarahipuca eta máimiturapianahi*

<sup>51</sup> Tacahe, ema Jesús tiyaserecahavipa. Ánipa macahe:

—¿Ecaicutiarapuca éti tamutu eta juca nímiturapianahi? —máichahavipa.

Tásiha, víti vijicapapa:

—Vicaicutiara, tata —vicahepa.

<sup>52</sup> Tácahe, máichahavipa:

—Eta yátupirapa eta ímatiequenehairapa eta nímiturapiana, éti apanavare máestrohénapa. Puiti nutuparacahe ímituvacaya ena achaneana. Tétavicavaya eta ítamuturusirayare eta ímituresirayare eta mapanereruana ema Viya —máichapa.

*Tichavapa ema Jesús te mávasa Nazaret*

(Mr 6.1-6; Lc 4.16-30)

<sup>53</sup> Te tamutupa eta máimicutichirahi ema Jesús eta juca máimiturapiana, viyanapa.

<sup>54-57</sup> Vichavapa tayehe eta mávasa. Te sávarumuquenepa, viyanavarepa tayehe eta nárujisirareva eta nayujarau-chirahi ena achaneana. Tímiturecaba ema Jesús. Ichape eta tahapasamurechiravacahi ena achaneana. Váhisera návarahahini nasuapahini. Náepurichucha éma. Ánipa nacahe:

—Témunahiricava eta máitupajijiasiravapahi ema maca. ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta jácani máichaque-neanahiji visamaiririruanahi. Taicha vímatihi ema maca. Carpintérohi éma. Vímativare ema máiyaini, ésupa esu maena María, énapa ena maparapenaveana ema Jacobo\*, ema José, ema Simón, émapa ema Judas. Vímativare ena esenana maparapenaveanahivare, ticavasanahи eta ani. ¿Távihasica máitusiavahi eta juca máitucaqueneanahicacha? —nacahepa.

Émasera máichavacapa:

—Tatuparaca epicauchahaviya vimutu viti mavaneruana ema Viya. Étisera éti nujaneananahи ecavasanahи eta te juca viávasa, étipa eti nuparapenaveana, vahi epicauchanuimahi —máichavacapa.

<sup>58</sup> Tásicha, tájina máimerecahichaini eta tiáramicareana táchavenehi eta namasuapajiraivanahi, váhivre nacasiñavahini eta mayehe.

## 14

*Ema Herodes masamairicapa eta máichaqueneanahи ema Jesús*

(*Mr 6.14-29; Lc 9.7-9*)

<sup>1</sup> Tacahe, ema Herodes ema aquenuahi tayehe eta Galilea masamairiricavarepa eta máichaqueneanahи ema Jesús.

<sup>2</sup> Tacahe, ema Herodes máimijachahi ema tichavahi téchepuca ema Juan. Tásicha, máichavacapa ena máevanachanahи:

—Ema mácara, émaripa ema Juan Tícachasiricarahi, ema nímicaparuhi. Tichavaripa téchepuca te máecari. Táitusiava máiturucahi macuchuca eta tiáramicareana —macahepa.

<sup>3-4</sup> Taicha ema Herodes mavehahi esu Herodías, esu machinenahи, mayenahи ema maparape Felipe. Máiminajicapa ema suima. Tacahe, ema Juan macajachavacaripa éna eta naviracacairahi. Étapa tímicatichahi ema Juan, sucatichapa esu Herodías. Tásicha, ema Herodes máeratacapa te cárcel ema Juan, macavanaripipa náitiaca te cadena.

<sup>5</sup> Taicha supamicahi ésu eta máimicapasirayarehi. Tipicasisera éma nasemahini ena achaneana. Taicha ema Juan, téavicavahi eta náemunasirahi ena achaneana. Náimatihи éma, eta vanairucairahi me Viya.

<sup>6</sup> Tásihasera, títecápapa eta sache máijaremuhу ema Herodes, sutiarahihi esu amaperu, suchicha esu Herodías. Tiúchucapa

---

\* **13:54-57** Ema maca achane, ticaijarehi Jacobo te náechajiriruva ena israelítana. Te véchajiriruva, ticaijarehi Santiago. Mapaenumavahи máehica ema Jesús te taequenepa eta máechepeusirahi te máecari ema Viáquenu.

tírimaica te mamirahu ema Herodes, énapa ena machimaranahi. Ema Herodes máuricainehi ichape.

<sup>7</sup> Tacahe, máichapa ésu:

—Nujuracha te pimirahu, eta níjarasiraviya jácani piyasea-runuyare —máichapa.

<sup>8</sup> Tásicha, esu amaperu suyaserecapa esu suena tájahahipuca eta suyasearuyarehi. Esu suena suímitucapa: Piyaseacayare ani píchaya: “Píjaracanu eta ñichuti eñi Juan te curuja” píchayare.

<sup>9</sup> Tásicha, eta masamirahi eta juca suyasearuhi, ema rey Herodes ichaperinehi eta mapanereresirahi. Tájinapasera máicharacavahini taicha máechajiruvaipahi majurachaipahi te namirahu ena machimaranahi eta máijarasirayare eta suyasearuyarehi ésu.

<sup>10</sup> Tacahe, macavanairipipa nayuchatipiquenuhapana ema Juan.

<sup>11</sup> Tacahe, námapaipa te curuja eta machutini, náijaracapa esu amaperu. Tásicha, ésu sujacapapa, suíjaracapa esu suena.

<sup>12</sup> Títecapananecha ena máimitureanahi ema Juan. Navehapa eta máquehe, náecarapanapa. Tásicha, tiyananapa nametapanahi ema Jesús.

*Ema Jesús máitaparahavaca máenicavaca ena camuriqeneana achaneana*

(*Mr 6.30-44; Lc 9.10-17; Jn 6.1-14*)

<sup>13</sup> Te masamairiricapa ema Jesús eta nacapasirahi ema Juan, viyanapa viávacuhapa tayehe eta pacure. Vicaijuhepa tayehe eta apaquehe mávapahi. Énasera ena achaneana náecharichucha eta viyanirahi. Tiyananapa náehicahi tipacanapahi.

<sup>14</sup> Te tiúcupaicapa ema Jesús tayehe eta pacure, máimahapa ena camuriqeneana achaneana. Majapanuvacarinehi eta máimairavacahi. Macanaracavacapa ena nacajumaque-neanahi námaqueneanapahi.

<sup>15</sup> Tacahe, viti mayeheana apóstoleana vímahapa eta cáperehíchicharínehi. Vimetacapa éma máevatamurihahini ena achaneana natarihiqeneanahi. Víchapa éma:

—Cáperehipa jena sache. Tiyerehivacahi eta pétiana. Táuricapa pivanecavaca ena achaneana nayanapa, navachareca eta nanica; taicha ani tájina naviyavaimahi eta te juca —víchapa.

<sup>16</sup> Ema Jesús tijicapahavipa:

—Vahi nuvaraha nuvaneca nayana. Tájina naviyava eta nácaijuhehini. Íjaraca étina eta nanica.

<sup>17</sup> Tásicha, viti víchapa:

—Tájina vácyehé eta tinicacare. Jucarihisera cíncochichahi eta pan, apina eta jima.

<sup>18</sup> Ema Jesús máichahavipa:

—Íáma ani.

<sup>19</sup> Tacache, macavanairipipa náejahahapaica ena achaneana te táinahu eta muíjipahi. Mavehapa eta cíncouene pan étapa eta apina jima. Máesenicapa eta anuma. Mahasulupayachapa ema Viya. Mayuvetucavacapa eta pan, tásicha, tíjaracahavipa víti. Víti víjaracavacapa ena achaneana.

<sup>20</sup> Vinicapa vimutu, visatuhevacapa. Tásicha, vicaemacharichahavare doce saye ichapehiana táinicachaichahava eta vémacharajiana.

<sup>21</sup> Ena tinicanahi eta juca, cinco mil ena ajairana eta náichapemurívahi, énerichuvare ena esenana énapa ena amapérmana.

*Ema Jesús mapaicaeca eta une*

(*Mr 6.45-52; Jn 6.16-21*)

<sup>22</sup> Tiuri, ema Jesús tivanecahavipa víti mayeheana apóstoleana viávacuhayare eta te pacure. Vínapucayarehi viánueca te apachara eta cáquiure. Émasera manasiyarehi máevatamuríhanumayarehi ena achaneana nachava te napenana.

<sup>23</sup> Te tamutupa eta macametavairahi ema Jesús nayehe ena achaneana, tiyanapa tiápanahi tayehe eta cerro. Tiyujaracayarehi tayehe. Étapa tavinehi eta yati, manasipa macarichuhi eta te cerro.

<sup>24</sup> Tacache, víti te túpiererahaviripahi, tichimaracahavipa eta muraca técaticava, viácapaquihapsipahi.

<sup>25</sup> Te tijararahichichapa, vímahapa ema Jesús mapaicaecapahi eta une eta macapayasirahaviya.

<sup>26</sup> Eta vímairahi éma, vipicarinehi. Vímijachapa cunare. Vipiararecapa eta vipsirahi.

<sup>27</sup> Émasera ema Jesús téchajicahavipa:

—Vahi ecupica. Nútichucha. Étumechava —máichahavipa.

<sup>28</sup> Tásicha, ema Pedro majicapapa:

—Te yátupipuca pítiquenehi, piti Tata, pivanecanu núti apanavare nupaicaeca eta une. Nuvaraha nupauchavi —máichapa.

<sup>29</sup> Ema Jesús majicapapa:

—Yare, pipauchanu.

Enevanepta tiúcupaicahi te pacure ema Pedro. Tiyanapa mapaicaecapa eta une, macapayacayarehi ema Jesús.

<sup>30</sup> Étasera eta máramesirahi taicha eta muraca técaticava, timutserahavapaipa téricapaipa. Tásicha, tipiararecapa:

—¡Picatajicanu, Tata! ¡Néricainapa!

<sup>31</sup> Enevanepasera macaratavauchapa ema Jesús eta macuchucuirayarehi. Tásicha, máichapa:

—¿Ticamitisicavipapuca eta pipisirahi eta picasiñanuirahi?

<sup>32</sup> Te tiávacuhapa ema Jesús émapa ema Pedro tayehe eta pacure, enevanepa téSAMIRICAVAHİ eta téCATICAVA. Tíchecapa eta táepacucairahi.

<sup>33</sup> Tacahe, viti apamuriana vicunachainehi ema Jesús eta vímairahi. Vépuyumurihapa te mamirahu. Tásicha, víchapa:

—Jéhevare piti Tata, Machichaquenévihi ema Viya! — víchapa.

*Ema Jesús macanaraca ena nacajumaqueneana te avasare Genesaret*

(Mr 6.53-56)

<sup>34</sup> Tacahe, te apanapa sache, viápechavavarepa viánueca eta cáquiure. Vítécapapa eta te apaquehe ticaijare Genesaret.

<sup>35</sup> Tásicha, ena achaneana ticavasanahi tayehe náimativanéhi eta émairahi ema Jesús. Timetajiricacanapa náechapa namutu ena achaneana ticavasanahi te avasareana. Tiyananapa mayehe ema Jesús, námavacapaipahi namutu ena nacajumaqueneana.

<sup>36</sup> Nayaseacapa éma eta másapirainahíni náemamajiaca eta tacheyarapi eta mamuiriha. Tacahe, nácani témamajiaca-napahi, enevanepaipa tinaracanapahi.

## 15

*Ema Jesús mameTACA ena achaneana eta timaeperajicarahi*  
(Mr 7.1-23)

<sup>1</sup> Tacahe, títecapanapa ena apamuriana fariséoana tiásihanahi tayehe eta Jerusalén, énapa ena escribánoana. Témeñahavanapa eta mayehe ema Jesús. Ánipa naicha:

<sup>2</sup> —Pímaha, ena pímitureana vahi náitauchahini eta viyeherepiana. Namaeperajicapa eta náchanevana eta nanisirahi taicha vahi nacaspavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? —náichapa.

<sup>3</sup> Tásicha, ema Jesús majicapavacapa:

—¿Tájaha tacayema éti apanavare, vahi ítauchahini eta mavanairipiana ema Viya, tasapihapa epicauchahi eta eyherepiana nanaquiruhi ena iáchucanaveanaini?

<sup>4</sup> Ema Viya ani macahehi eta macavanairipirahi eta viyehe: “Pipicauchaya pémunacayareva ema piya ésupa esu pena”. Jucarihi eta apana vanairipi: “Ecapacayarehi mácani tíñemahi eta nacayemaquene mayehe ema máiya, ésupa esu maena”.

<sup>5-6</sup> Étisera vahi epicauchahini eta júcana mavanairipiana ema Viya. Taicha te mararihi mácani achane ticamava-hupuca me Viya eta máimahaqueneanahi, eta ímitucasivahi

éti: "Vaipa tatuparaca ema achane eta máimicatasiraya ema maiya ésupa esu maena". Tasapihapa, ichape ticapicahuhi eyehe eta eyeherepiana. Étasera eta mavanairipi ema Viya, vaipa epicauchahini.

<sup>7</sup> ¡Éti ecaijarehi apimirana! Tatupiruvahi eta máechajiruvahi ema Viya, téchajisiahehi éti eta te Sagrada Escritura\*.

<sup>8-9</sup> Ánipa macahe: "Ena nani achaneana, tétserajicanuanahí te najaca; váhisera táetupicavahíni te nasamureana. Téneuchavanahí eta nuyehe, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherepiana táuchurechucha te napanneruana ena náchucanaveánaini" macahepa ema Viya.

<sup>10</sup> Tásiha, máichuhavacapa ema Jesús ena achaneana. Ánipa máicha:

—Nuvaraha esamanu yátupina, apaesa ácaicutiara.

<sup>11</sup> Tájina máeperajina eta viáchanevana te vinicapuca eta vimacasipavahuiranumahini. Jácani tasiapaquenehi te vijaca, tájina tamaeperajicahavihini. Vahi étaparacaina. Étasera eta evainarajivana táuchureanapuca te ejaca, étapa eta evainarajipanereruanahí, jéhevare éta timaeperajicahehi —máichapa.

<sup>12</sup> Tacache, viti mayeheana apóstoleana vémeñahavapa eta mayehe. Vimetacapa:

—Ena nani fariséoana tisemanahí taicha eta juca píchirvacahi —víchapa.

<sup>13</sup> Émasera máichahavipa:

—Ena nani nacutihi eta ejare, vaipa émaimahi máechahini ema Tata Nucaiyauquene. Ticavepuricasianayaresera éna.

<sup>14</sup> Ésamiricachucha. Vahi ecuimisiapava nayehe, taicha éna, púchuquianahí tayehe eta juca nímiturapiana. Ena púchuquiana, te tichurucacanapuca, tiáquipacacanayarehi táicha vahi náimahahini eta nayanihayarehi —máichapa.

<sup>15</sup> Tásiha, ema Pedro mayaserecapa:

—Picatajicahavi pímitucahavi apaesa vímatiequeneha eta juca pímicutiarachirahi eta táuchureanahí te vijaca —máichapa.

<sup>16</sup> Ema Jesús máichahavivarepa:

—¿Énerichuvare éti mapanererurehehi?

<sup>17</sup> ¿Váhipuca ácaicutiarahíni eta juca? Tamutu eta juca tasiapaqueneanahí te vijaca vinicasareanahí, tatupiru te viami. Tásiha, te tiúchucapa, apanapa eta táuchusihahi. Vahi timaeperajicahavimahi.

---

\* **15:7** Májurehi ema víyarahaini profeta Isaías eta juca máechajiruvana ema Viya.

<sup>18</sup> Étasera jácani táuchurehi te vijaca tásihaqueñehi te amahé eta visamure. Eta tamaurivahi eta náechajisirana ena achaneana, étara timaeperajicavacahi éna.

<sup>19</sup> Táicha jácani táoñemahiqueñeanahi panererucana, eta tásihaqueñeanahi te nasamureana. Ema achane mapane-rechahi maveha esu apana esena mayena ema apana achane. Esu esena supanerechahi suveha ema apana achane suima esu apana esena. Ena amaperuana napanerechahi eta natuhusivaya. Nácanivare, tipanerechanahi eta ticaparecana, tiámerecana, tivayuarecana, téchajihiana.

<sup>20</sup> Tamutu eta juca panererucana tamauriqueneana, te náichahi ena achaneana, éta timaeperajicahi éna. Étasera jácani nanicaqueñeanana, tayanapanepuca vahi náichahi eta nayeherepi eta nasipavauchirava, vahi tamaepejicaimahi –máichahavipa.

*Esu ésuna esena apavasana sucasiña ema Jesús  
(Mr 7.24-30)*

<sup>21</sup> Tacache, tiámahavivarepa ema Jesús te apana avasareana táunavahi eta departamento Siria, návasa ena apaechajiruvana.

<sup>22</sup> Ánaqui, ticapayacahavipa esu esena. Supiaracapaipa eta supauchirahi ema Jesús. Ánipa sucahe:

—Pájapanunu, tata. Píti yátupiquenevihi Cristo, ñivaneruvihi eñi Viya, vicuchapaquenevihi. Esu nuchicha ñávahácahi eñi éreana, tétavicavahi eta sucatajivairahi. Picatajicanu, tata, eta picanarasinanuini ésu nuchicha —suíchapa.

<sup>23</sup> Émasera ema Jesús vahi majicapahini. Tipaicapaichucha. Vipauchapa viti mayeheana apóstoleana, vimetacapa éma:

—Tata, pévataca suyana esu suna esena apavasana tipiara-recapahi te véquene —vicahepa.

<sup>24</sup> Tásicha, ema Jesús máichahavipa:

—Jéhevare eta epanereruhi. Ema Tata tivanecanuhi nacarichu néchapajiricayare ena vijaneanana israelítana. Nacutihi éna eta uvesana máquenureana, taicha ticamununuuanahi eta nujaneasiraya —máichahavipa.

<sup>25</sup> Ésusera esu esena tépuyucapa te mamirahu. Suíchapa:

—¡Tátachicha, picatajicanupaini, pímicatacanu! ¡Picanarasinanuini esu nuchichasami! —suíchapa.

<sup>26</sup> Ema Jesús majicapapa:

—Nativa néchapajiricavacaya ena nujaneanana. Taicha vahi táuricahini ásapihahíni néchapajiricahehíni éti apavasanana émetavicahíni ena nujaneanana —máichapa.

<sup>27</sup> Esu esena sujicapapa:

—Énehinehi tacahehi, tátachicha. Yátupihi vahi pijaneanuvinahini. Pájapanunusera, picatajicanuchuchaini. Víti apanava vácasiñavahi eta piyehe eta vítátijivairaina —suichapa.

<sup>28</sup>Ema Jesús majicapavarepa:

—Páurevi piti nuchicha, ichape eta picasiñavairahi eta nuyehe. Puiti títauchavayare eta piyasearapihi nuyehe. Nucanarasinaviyare esu pichicha —máichapa.

Jéhesare enevanepa tinaracahi esu amaperu.

*Camurianahi ena nacajumaqueneana macanararuuanahi ema Jesús*

<sup>29</sup>Tacahe, tiyanavarepa ema Jesús. Véhicavarepa víti apanava. Vichavavarepa te Galilea. Tásicha, vijuchechausichapaipahi eta cáquiure, vicaijuheya eta te mávapahi apaquehe anuquerehi, te távhahi eta cérrona. Vinasipanapa eta jena sácheana eta ánaqui.

<sup>30</sup>Tacahe, nacahepaipavare ena camuriqueneana achaneana te viávihahi víti. Námaquenepanepahi ena nacajumaqueneana: ena masariana, énapa ena púchuquiana, énapa ena úpana, énapa ena túpupáiqueana.

<sup>31</sup>Namutu ena nani nacajumaqueneana macanaracavaca-paipahi éma. Ichaperinehi eta náramirahi ena achaneana eta náechajisiraipa ena úpana, énapa ena túpupáiqueana tinaracanapaipa, tiúripaipa eta napaisira ena masariana. Tímairiricanapaipa ena púchuquiana. Eta náurisamurevapahi, nacunchapaipa ema Viya.

*Ema Jesús máenica ena cuatro mílqueneana achaneana  
(Mr 8.1-10)*

<sup>32</sup>Tásicha, ema Jesús táchuhavipa viti mayeheana apóstoleana. Máichahavipa:

—Nujapanuvaca ena nani achaneana natarihiqueneanahi ani, taicha mapanaripahi sache puiti eta nacahehi eta viyehe. Tájinahivare naviyahini nanica. Nujapanuvacaicha névatacavahini, machu náquipaicava te achene taicha eta náecuavana. Vájapanu eta náecuava, vénicavaca —máichahavipa.

<sup>33</sup>Tásicha, viti vijicapapa:

—¿Távihapucaini vítusiavahini eta tinicacare eta te juca mávapahi vámahi? ¡Váhivare vítaparahaimahi vénicavaca ena nani camuriqueneana achaneana! —víchapa.

<sup>34</sup>Tacahe, ema Jesús tiyaserecavipa:

—¿Áyanachaha eta pan eta iámaqueneanapahi?

Viti vijicapapa:

—Jucarihi siéterine. Ánimurichicharinehivare eta jímachicha —vicahepa.

<sup>35</sup> Tásicha, macavanairipipa eta náejahapaimurihahíni namutu te apaquehe.

<sup>36</sup> Mavehapa eta siétequene pan, étapa eta jímana. Mahasulupayachapa ema Viya. Tásicha, mayuvetucavacapa, tíjaraca-havipa víti. Tásicha, víti víjaracavacapa ena camuriqueneana achaneana.

<sup>37</sup> Tacache, vimutu vinicahi, visatuhevacapa. Vicaemacharichahavare. Siétehi eta sáyeana táinicaruhi eta vémachrajiana.

<sup>38</sup> Eta nasimutuvahi ena achaneana, cuatro mílqueneana ena ajairana. Natiarihihivare ena esenana énapa ena amaperuana.

<sup>39</sup> Te tamutupa eta juca, mavanecavacapa ema Jesús ena achaneana nayanapa nachava te napenana. Tásicha, éma tiávacuhavarepa te pacure. Viyanavarepa. Vicaijuhe eta te avasare Magdalena.

## 16

*Ema Jesús mápechavare mayunacavaca eta namasuapajiraiyahí ena fariséoana*

(*Mr 8.11-13; Lc 12.54-56*)

<sup>1</sup> Tacache, ena apamuriana fariséoana énapa ena saducéoana napauchapa ema Jesús. Eta navarairahi náemejecapavacha éma, nayaseacapa máimerecahini eta tiáramicareana, máimerecavahini te yátupihipuca vanairucahi me Viya.

<sup>2</sup> Émasera majicapapa:

—Te cáperéhichicha, te ímahahi eta tátsirahi eta úcaji, éti ímijacha tímianavayare eta tiúriyare eta sácheana.

<sup>3</sup> Te yáticarahi, te ímaha eta timapicurume, títsitsimehi, ímijachahi tiquivayare. Éti, ímijachavahi ímatiequeneha eta tapaisira eta anuma. ¡Tétavicavahisera eta emasuapajiraiyahí! Taicha éti ímijachavahi religíosohe, ímijachavavare ímatiequeneha eta mavarahaqueneanahí ema Viya, váhisera ávarahahini ímatiequeneha eta máimeruhehi ema Viya, te juca sácheana nucachanerahehi.

<sup>4</sup> ¡Eti achaneana vánarajiqueneana! Núti nímatihe. Vahi esuapanuimahi, te nímerecapucaini eta tiáramicare. Tásicha, vähira étina tatuparaca ímahahini eta tiáramicareana. Ímahaya-resera eta tiáramicare tacutiyare eta máichavaquenevahi ema víyarahaini profetaini Jonás —máichavacapa.

Tásicha, majunijicavacapa, tiyanapa.

*Ema Jesús máimicuticha eta levadura eta náimiturapiana ena fariséoana*

(*Mr 8.14-21*)

<sup>5</sup> Tacahe, eta viánuesiravarepa eta cáquiure, vipanerechapaipahi eta vémitisisirapa eta pan.

<sup>6</sup> Ema Jesús máichahavipa:

—Tímaticarehi eyehe eta levadura eta tapareasirahi eta masa. Tacutirichu eta tapareasirahi eta apimirairavacahi ena fariséoana énapa ena saducéoana. Échapavaicha tayehe, vahi ecuehica éna —macahepa.

<sup>7</sup> Vítisera viti apóstoleana, eta véñamavairahi, víchacacapa:

—Tímicajachahavihi eta vémitisisirahi eta pan. Eta tacahe, macahehi tayehe eta levadura —víchapa.

<sup>8</sup> Éma tímatiacahavihi. Tásiha, máichahavipa:

—¿Tájaha tacayema ecahechajiruvahí eta vahi iámapahini eta pan? ¿Váhipuca ácasiñavahí eta nuyehe?

<sup>9</sup> ¿Vuíchahacaru ácaicutiaraini? ¿Vuíchahahipuca ímatinu? ¿Váhivare échaini eta nucaejasirahi eta cincoquene pan nanicaquenehi ena cinco mílqueneana achaneana étapa eta náemacharajiana?

<sup>10</sup> ¿Váhivarepuca écha eta siétequene pan naniruhi ena cuatro mílqueneana achaneana étapa eta náemacharajiana?

<sup>11</sup> Nímijachapa ecaicutiarayarehi eta níchirahehi eta échapiravainahini eta nayehe levadura ena fariséoana énapa ena saducéoana. Váhira étainahini néchajisihahíni eta levadura tayehe eta pan —máichahavipa.

<sup>12</sup> Vipaenumavahí véchahi eta máichirahavihi éma eta véchapuravainahini vahi vicucti ena fariséoana énapa ena saducéoana eta apimiriranahi.

*Ema Pedro maimereucha ema Jesús eta émairahi ema Cristo  
(Mr 8.27-30; Lc 9.18-21)*

<sup>13</sup> Tacahe, te apanapa sache, viyanavarepa vipaica. Vicaijuhe eta te Cesarea máepiyaruhi ema rey Felipe. Te viánehipa, ema Jesús tiyaserecahavipa:

—¿Tájaha nacayema ena achaneana eta nuyehe nuti Manerejirunuhi ema Viya? ¿Nájahapuca náimijachanuhi éna? —máichahavipa.

<sup>14</sup> Vijicapapa víti:

—Ena apamuriana náimijachavihi ema Juan, tichavahi téchepucahi. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema víyarahaini profeta Jeremías; émapuca ema apana profetaini antívuini, téchepucahi —vicahepa.

<sup>15</sup> Ema Jesús tiápechahavivare tiyaserecahavi:

—Étiyapa ¿nájaha ímijachanuhi nútí?

<sup>16</sup> Ema Pedro majicapapa:

—Pítira yátupiquenevihi Cristo, machichaquenevihi ema yátupiquenehi Viya.

<sup>17</sup>Ema Jesús majicapapa:

—Piti Pedro\*, téavicavahi eta pétpisiravahi taicha manacasamureruvihi ema Tata Nucaiyaque tiávhahi te anuma. Vahi étainahini eta máimiturapinahíni piyehe mácani achane.

<sup>18</sup>Núti apanavare nutupiruva numetacavi. Píti picajarehi Pedro. Píti picutiyare eta mari, téavicavayare eta pitumevaya. Namutu ena picutiqueneana eta pisuapiroanuhi nútirahi yátupiquenehi Cristo, énara nuchaneranayare. Éna apanavare nacutiyareva eta mari eta natumevayare eta náehisiranuhi. Tájina vahi máratahaimahi macaetemavaca ema Váinaraji.

<sup>19</sup>Píti picatuparahayare eta llave tayehe eta anuma, apaesa nasiapa nácani pijacapaqueneanayare píti —máichapa.

<sup>20</sup>Tacahe, tituparacahavipa muraca ema Jesús nacuija vicumetaca eta émairahi ema Cristo.

*Ema Jesús máimereucha eta máepenirayarehi*

*(Mr 8.31-9.1; Lc 9.22-27)*

<sup>21</sup>Tacahe, ema Jesús tépanavapa timetacahavihi eta táicharcavayare eta máepenirayare. Máichahavipa:

—Nuti nucatuparahahi eta nuyanirayarehi te Jerusalén. Ánaqui nucatajivayarehi ichape naicha ena tuparairucana, énapa ena aquenucarahaná, énapa ena escribánoana. Éna, tímicapacanuanayareva. Mapanayareichuhisera sache nucaheyare eta népenirayare. Tásicha, nuchavayarehi néchepuca —máichahavipa.

<sup>22</sup>Tásicha, máiputsicapa mámahi ema Pedro ema Jesús. Ánaqui macajachapa, máijarasiravahi eta mapanereruhi:

—Núti vahi návarahahini táitauchavahini nacapacavihini.

<sup>23</sup>Tacahe, ema Jesús máichapa ema Pedro:

—Piti téjecapavahi eta pipanereruhi. Pínajica eta juca tamauriqueneanahi. Pivarahapuca pihapapicayare eta mapanereruhi ema Viya. Eta juca pipanereruhi tacuti eta mapanereruanahi ema Satanás, énapa ena machanerana —máichapa.

<sup>24</sup>Tásicha, máichahavivarepa víti:

—Nácani navaraha náehicanu, tacamunu náinajicava tamutu eta tihapapiricavaca eta náehisiranuhi. Nacaravahuyareva eta nímiturapiana. Náijaracavavare eta táimicapasiraina eta náehisiranuhi.

---

\* **16:17** Ema Jesús téchjicahi te máechajiruva hebreo, máimijarechahi ema Pedro: "Simón, machicha ema Jonás".

25 Nácanisera téñamanahi eta náitaresira, tiávamirahuanaya eta náehisiranu, énajivayare ticamatiequenehavanaya eta náitaresira. Énasera nácani yátupiquenehi tíjaracavana téhicanuana, tayanapane táimicapacainepuca eta náehisiranuhi, éna titujicavanayare tiúchucuhanayare eta náitaresiranaya.

26 Énerichuvare nácani tacañamararuuanahi eta nacaimahaquenéiraya te juca apaquehe, tájina náimaequenehaimahi, taicha eta tacaeñamarasiravacahi tahapapiricavacahi tayehe eta náuchucuirayarehini. Taicha vahi máratahaimahi mácani achane mavachachahini eta máuricacarevaya te apava vítaresira.

27 Taicha nuti Manerejirunuhi ema Viya nuchavayarehi. Námainapaipa eta majaraiva ema Tata, nucachanénapapavare ena ángeleana. Te jena sácheyare, níjaracavacainapa eta náicuchianahi ena nuchanerana te tiúrihi eta nacaematanearanuhi, te jácani náemataneanapachuhi.

28 Nutupiruva numetacahe: Puítiripa éti, etiarihi enerejicavayare vahi épenavanémahi, ímahanumaya eta nucatuparahaíraya aquenucanuirayare nuti Manerejirunuhi ema Viya –macahepa.

## 17

*Ema Jesús tihapamaichava eta máimahi  
(Mr 9.2-13; Lc 9.28-36)*

1 Tiuri, sáisipa sache eta vinasirahi ánaqui. Tacahe, tinaquicahavipa ema Jesús. Nacarinehi máma ema Pedro, ema Jacobo émapa ema Juan. Tiyananapa eta te étana cerro anuquehepana.

2 Eta ánaqui, náimahapa tihapamaichavahi eta máimahi ema Jesús te namirahu éna. Eta mamira, téavicava eta tajararasira tacuti eta sache. Eta mamuiriha, téavicava eta tajanunumsirahi, étapa eta tajapuvahi.

3 Tásiha, tiáramicareanavarepa tímerecavana ena apinana ajairana: ema víyarahaini Moisés émapa ema víyarahaini profetaini Elías. Téchajircavanaripahi mayehe ema Jesús.

4 Tásiha, ema Pedro tímisiapavapa téchajicapa. Ánipa macahe:  
—Tata Náquenu, téavicavapa eta viúricacareva eta viávihairahi eta áni. Tiúrihipucaini vépiyarecahini eta epenuhuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías –macahepa.

5 Tacahe, téchejicaichaha ema Pedro, tiáramicarepa eta úcaji táepacumurihahi éna. Tétavicavahisera eta tajanunusirahi eta

úcaji. Nasamavarepa eta mahu ema Viya tayehe eta úcaji. Ánipa macahe:

—Ema maca, éma yátupiquenehi nuchicha némunarquenehi. Tétavicavahi eta núrisamurevahí máicha. Éma esuapayti, mapenainarichuhivarare —macahepa.

<sup>6</sup> Eta nasamirahi ena vichamuriana, tipicanarinehi. Tépuyucanapa titsiucapairicanapa.

<sup>7</sup> Tásiba, ema Jesús témeñahavapa eta nayehe. Máemamasicavacapa. Máichavacapa:

—Échepuca, nuchichanaveana. Vahi ecupica —máichapa.

<sup>8</sup> Tacache, te téchepukanapa éna, nájinaripahi éna apinana náimahaqueneanahi. Macarinehi ema Jesús.

<sup>9</sup> Te tichavanapa tayehe eta cerro, ema Jesús mametacavaca vahi nacumetajiricahini eta juca náimahaquenehi. Tiámainucava te máechepucapaini te máecari éma.

<sup>10</sup> Tacache, nayaserecapa ema Jesús:

—Ena escribánoana eta náimiturapihi, náechajisihahi eta machavirayare titareca ema víyarahaini Elías, tínapucayarehi eta máimeresiravayare piyehe piti Cristo. ¿Énapuca téjecapavanahi ena escribánoana? —náichapa.

<sup>11</sup> Ema Jesús majicapavacapa:

—Yátupi ema víyarahaini Elías títecapayarehi, máetupiripanayarehi tamutu.

<sup>12</sup> Nútisera nutupiruva numetacahe: Títecaripahi ema Elías, váhisera náimatihini ena escribánoana. Váhivare najacapahini éma ena tuparairucana. Nacatianacahi nacapacahi éma. Ene nucaheyare nuti Manerejirunuhi ema Viya, ticatianacanuanayarehiva, éneyaréichuvare ticapacanuanayare —máichapa.

<sup>13</sup> Tásiba, ena vichamuriana náechapa eta máechajisihairahi ema Jesús ema Juan Tícachasiricarahihi.

*Ema Jesús macanaraca ema amaperu mávaháruhi ema éreana (Mr 9.14-29; Lc 9.37-43)*

<sup>14</sup> Tacache, te tichavanapa éna tayehe eta viávhahi víti énapa ena achaneana, témeñahavapa ema émana achane mayehe ema Jesús. Tépuyucapa te mamirahu. Máichapa:

<sup>15</sup> —Picatajicanu, tata, pímicatacanu. Picanarasinanuini ema maca nuchicha. Tétavicavahi eta macatajivairahi. Tacaecharipairica te tanahaca eta majuma. Tatarihi te táquipaica te une, téhepuca yucu.

<sup>16</sup> Námaripahinéni nayehe ena pímitureana, váhisera náratahahini nacanaracahini éna —máichapa.

<sup>17</sup> Ema Jesús máichahavipa:

—¡Tétavicava emasuapajiraivavaca eti achaneana! ¡Cúvera-recachasicáini eta nucamichirahenahini! Iáma ani ema amaperu —máichapa.

<sup>18</sup> Tacahe, ema Jesús, muraca eta máevatasirahi ema éreana, máinajiacapa ema amaperu. Enevanepa tinaracavanehi éma.

<sup>19</sup> Tásicha, te táequenepa, víti víputsiacavapa ema Jesús, viyase-recapa:

—¿Tájahapuca tacayemahi eta vahi váratahahini vicuchuca ema éreana mayehe ema amaperu? —víchapa.

<sup>20</sup> Ema Jesús tijicaphahavipa:

—Eta tíchahi éti vuíchaha yátupinahini ácasiñavahini me Viya. Nutupiruva numetacahe: Te yátupiquenenahini ácasiñavahini mayehe éma, eratahayarehini. Váhinéni táchamesahini ichapenahini eta ecasiñavairahi. Tayanapanepuca ánichichainaichu eta ecasiñairavahi, tacutihipucaini eta táquichicha eta mostaza, tamuturihini erataha. Étaripa eta jácani cerro ávarahahini ecayejeca, eratahayarehi. Te íchapuca: “Pijejecava eta te juca. Piyana ánaquipana”. Tásicha, tiyejecavahini éta. Jéhesare, tájina tacucajerarajihini eyehe.

<sup>21</sup> Étasera eta juca, muracapanahi ema éreana ema tiávahácahi ema maca amaperu. Eta vicuchusira, tavaraha víchanumayare eta ayuna étapa eta viyujaraca —máichahavipa.

*Tiápechavavare ema Jesús máimereucha eta máepenirayarehi  
(Mr 9.30-32; Lc 9.43-45)*

<sup>22</sup> Tacahe, eta vipaisirapahi tayehe eta avasareana eta te táunavahi eta Galilea, tiápechahavivarepa timetacahavi ema Jesús eta máepenirayarehi. Ánipa macahe:

—Nuti Manerejirunuhi ema Viya, járajapainapa eta sächeyare tíjararecanuyare mácani achane nayehe ena tictatianacanuanahi. Ticaratacanuanayare éna.

<sup>23</sup> Ticapacanuanayareva. Néchepucayaresera te mapana-quenenapa sache —máichahavipa.

Tacahe, eta visamirahi, ichaperinehi eta véñamiravahi víti.

*Ticavacha eta impuesto tayehe eta Templo*

<sup>24</sup> Tacahe, te vítecápapa tayehe eta viávasa Capernaúm, natiarihihi ena ticobrarecarahiana eta impuesto tayehe eta Templo. Nárajapapa náechajipanahi ema Pedro. Nayase-recapa:

—¿Mavachachapuca ema eyehe máestro éti eta impuesto tayehe eta Templo? —náichapa.

<sup>25</sup> Ema Pedro majicapapa:

—Mavachacha —macahepa.

Te visiapayarepa te peti, ema Jesús máechajicanumapa ema Pedro. Ánipa macahe:

—¿Tájaha picayema, piti Pedro, nájahasica tatuparacahi navachachayare eta impuesto mavarahaquene ema mácani rey? ¿Énapuca ena machichaqueneana, énapuca ena machanerana? —máichapa.

<sup>26</sup> Ema Pedro majicapapa:

—Ena machanerana.

Tásicha, ema Jesús macahépa:

—Tiuri, viti machichahavíhi ema Viya. Vahi tatuparacahini vivachachahini víti eta juca impuesto.

<sup>27</sup> Vinaquicasera eta impuesto apaesa tacuija tacucaye-macare nayehe ena achaneana. Piyanayare pénica eta jima te cáquiure. Te piáquijiecapa eta pénirave, eta tínapuca jima tacaratacaya eta pénirave, tatiarihiyare eta plata te tajaca. Pivehainapa eta reale, tásicha taratahayare tavachacha eta nuyehe parte núti, étapa eta piyehe píti —máichapa.

## 18

*¿Nájahapuca ema apóstole ticapicahupana?*

(*Mr 9.33-37; Lc 9.46-48*)

<sup>1</sup> Tacahe, te jena sácheinahí, viyaserecapa ema Jesús:

—¿Nájahapuca ema ticapicahupanaya viyehe víti te táitecapapa eta sache aquenucaviraya? —vicanaquicasera eta impuesto apaehépa.

<sup>2</sup> Tacahe, máichuhapa ema Jesús ema émana amaperuchicha, macatupihapa te vimirahu.

<sup>3</sup> Máichahavipa:

—Nutupiruva numetacahe: Ínajicayare eta ecasiñava-vaisira. Echávayare ecutiyare ema maca amaperu, apaesa ítujicava esiapa echanenayare tayehé etá néjasihayare.

<sup>4</sup> Nácani navarahahí ticapicahupananayare te jena néjasihayare nútí, tacamunu mánsuanayare. Vahi máitucaimahi tiácapauchava.

<sup>5</sup> Tacutiquene nácani tijacapanayare ena amaperuana níchavenénahí nútí, ena nani yátupihi náimereca eta náemunaisranuhi nútí, taicha tímicutijíricavahí nútinahini najacapa.

*Ichape eta máicuñayare mácani tímiaquipaica te pecatu ena amaperuana*

(*Mr 9.42-48; Lc 17.1-2*)

<sup>6</sup> Tacutiquene mácani tiáquipaicaya ema émana amaperu téhicanuhi, tiúripanahipucaini máepenahini mativainahini éma. Váhirichupucaini macucaicuñahini, taicha vahi macuaquipaicahini ema amaperu tayehé etá pecatu.

<sup>7</sup> Taicha muracayare etá náicuñayare nácani tímiaquipaicayare ena achaneana. Yátupi vahi téjiacavaimahi etá tímiaquipaicaya ena achaneana tayehé etá pecatu. Ichapesera

eta náicuñayare nácani ticatapiravanahi eta náimiaquipaisirahi ena achaneana tayehe eta pecatu.

<sup>8</sup> Eta tacahe, te táimipecaturachahepuca eta evahu, étapuca eta ívapeana, tiúripana eyuchatica, iáquijica; apaesa vahi tacuimiaquipaicahe tayehe eta pecatu. Tiúripana taejiacava eta iáquehe eta esiapistayare te anuma, váhisera tacumutuhi tasiapa te yucu eta iáquehe.

<sup>9</sup> Étaripavare eta iúquiha, te taimiaquipaicahepuca tayehe eta pecatu, tavarairahi taimahayare eta tamauriqueneana tájiparacana, tiúripana evecuhauquichava iáquijicaya. Taicha tiúripana eta ejacapacarehi éti eta esiapistayara te anuma tayanapane taejiacavapuca eta iúquiha. Páurehesamisera éti, te náepujuquichahépuca te yucu infierno, tamutuyare eta iáquehe.

*Ema Jesús máimicutiarachinahi te témitiaca étana uvesa*

*(Lc 15.3-7)*

<sup>10</sup> Vahi ecuepuru ena amaperuana. Numetacahevane: Nararihi ena ángeleana tijaneacavacahi éna. Títupajijiacavanhahi eta nacatiuchiravacahi ena amaperuana, máicha ema Viya.

<sup>11</sup> Nuti Manerejirunuhi ema Viya, eta tímitecanuhi nucuchucuhayare nácani tiávacuhanahi tainehiquene eta náitaresira.

<sup>12</sup> Esamanuchaha. Nímicutichinaheyare puiti. Matarihi ema émana achane. Ticayehe eta cien uvesana. Te témitiyechapuca eta étana, ema achane tiyanayarehi matanuca eta taeemitiaruhi. Eta máeñamiravahi, manaqicayarepa eta apamuriana noventa y nueve te majanearesihahi.

<sup>13</sup> Te máichimavapa, tichavapa. Tétavicava eta máurisamurevapaipahi eta mámirapaipahi eta taejiaruvhahi.

<sup>14</sup> Ene macahe ema Tata Ecayaquene éti, ema tiávihahi te anuma. Vahi mávarahahini náemitiacahini ena nani amaperuana.

*Tatuparaca viperdonacha ena téjecapavana eta viyehe*

*(Lc 17.3)*

<sup>15</sup> Te tatiarihipuca eta máejecapiravahi ema piparape eta piyehe, tituparacavi piperdonachayare. Tásiha, piconsejachayare éma, píputsiacayare éma eta pimetasira eta máejecapiravahi. Te tisuapavihi éma, tájinapa íchiravaimahi. Tiúrinapa eta ítaresirana.

<sup>16</sup> Téhesera te vahi macusuapavi, pitanucayare apinanaina ena piyeheanayare testigo apaesa tasuapacarepa eta piconsejarapiyare.

<sup>17</sup> Te vuíchaha macusuapavi, pimetacapa namutu ena pichamurianahi picatupihapa te namirahu. Téhesera te

váhiquenechapuca macusuapahe, tímaticaréinapa éma eta mamasuapajiraivahi me Viya. Vaipa ecuimisiapava mayehe, taicha eta mamasuapajiraivahi.

<sup>18</sup> Nutupiruva numetacahe: Te ecurujicacahi, te ímahahi eta mamasuapajiraivahi, emetacayare éma vahi táepahahini eta mapecatura. Tanasirichuhi. Émaripa ema Viya, máimara-racahi eta evarairahi etupirica éma. Téhesera te máeneuchavapuca, emetacayare éma eta táepahairariпа eta mapecatura. Ema Viya, tiúriripa eta máimaira.

<sup>19-20</sup> Énerichuvare te etiarihipuca éti te juca apaquehe apinahehi, mapanahehipuca ecurujicacahi te njare nuti, nutiarihiyarechuhivare nuti te emuri. Tásicha, te étanaichuhi eta epanereruhi, ticuticacahi eta eyaseserepi te mayehe ema Tata, éma tíjaracaheyare –máichahavipa.

<sup>21</sup> Tásicha, ema Pedro mapauchapa, mayaserecayarehi ema Jesús. Ánipa macahe:

—Tata, ¿áyahepuca tatuparaca nuperdonachaya ema nuparape, te máejecapava eta nuyehe? ¿Táuricapuca siéteheyare eta nuperdonachirayare? —macahepa.

<sup>22</sup> Ema Jesús majicapapa:

—Vahi tácarichuimahi siétehénarichuyare eta piperdonachirayare. Tímiyanavayarechucha eta piperdonachiranayare. Vahi pitupachaimahi –máichapa.

*Ema Jesús máimicutiarachina ema achane máuriraha vahi máitucaimahi maperdonacha ema maparape*

<sup>23</sup> Nuti Manerejirunuhi ema Viya nucuti mácani rey rícoquenehi te mavarahahi máechayare eta nanteveana ena mamusurana.

<sup>24</sup> Tásicha, námapaipahi ema tétavicavahi eta manteve. Tisintevepanahi éma.

<sup>25</sup> Tásicha, ema achane musu, tájina maviyahini mavachachihahini ema máquenuhi. Tacache, ema rey macavanairipipa macaijararecasí, namutu esu mayena énapa ena machichanaveana, étapa eta macayehequeneanaini te mapena, apaesa mavachachahini apaesachichainarinehini eta mantevehi.

<sup>26</sup> Tásicha, ema achane musu tépuyucapa te mamirahu ema máquenu. Ánipa máicha: “Tátachicha, picatajicanuhini. Picuchapanuini. Te nítucavapaini, nuvachachapaini tamutu eta nunteve piyehe” macahepa.

<sup>27</sup> Jéhesare, ema máquenu majapanupa. Maperdonachapa tamutu eta mantevenihi. Macaiticapa.

28 Vuíchahasera tágerehini eta máuchusirahi, mácapajicapa ema apana achane ticantevehi eta mayehe. Macompañeroi-nihivare. Váhinéni camurinahini eta mantevehi. Macarata-cahisera, macobrachapa. Masemaracapa macapitinucapa. “Pivachachanu puítirichu” máichapa.

29 Ema achane ticantevehi tépuyucapa te mamirahu. Mayaseacapa: “Picatajicanu, picuchapanuchaha. Te nítucavapa, nuvachachavipa”.

30 Váhiquenesera maperdonachahini. Máimicasiapapa te cárcel, mavarairahi mavachachavaneyarehini eta mantevehi.

31 Tacahe, te náimahapa ena apamuriana machamurianahi, ticatirinehi te nasamure eta náimairahi ema nachamuri présuiraiipahi. Tiyananapa nametacahi ema náquenu tamutu eta máichavaquenévahí ema nachamuri.

32-34 Tacahe, ema máquenuhi máimichuhapa ema tipresure-cainihi. Ichape eta masemaneyahi. Ánipa maicha: “¡Piti máeperajitataji musu! Váiparinehi péchavahini eta nuperdonachiravihi eta pinteve ichapequenehi. Taicha eta piyaseasiranuhi, nuperdonachavahi. Piúrihánehi pájapanuhini píti apanavare ema pichamusuvahi, táchutihini eta nuperdonachiravihi nútí” máichapa ema rey. Tásiba, macavanairipipa náicuñaca, étapa mavachachayarehi tamutu eta mantevehi.

35 Tacahe, ema Jesús te titapiricapa eta juca máimiturapiana, ánipa macahe:

—Ene máichaheyare ema Tata Nucaiyaquene éti apanavare, te vahi ecuituca eperdonacha nácani eparapenaveana náejecaparuvanahi eta eyehe —máichahavipa.

## 19

*Ema Jesús tímiturecahi máechajishahí mácani achane tínajicahi esu mayena*

(*Mr 10.1-12; Lc 16.18*)

1 Te tamutupa eta juca máimiturapiana ema Jesús, viúchucapa te Galilea. Viyanapa tayehe eta Judea. Viánuecapa eta cajacure Jordán te tinapaicahi te táuchusine eta sache.

2 Camuriana ena achaneana tiúrujicavanahi. Ánaqui macanaracapaipavare ema Jesús ena nacajumaqueneana.

3 Tásiba, titecapanapa ena apamuriana fariséoana. Napauchapa ema Jesús. Natanucahi eta tiviuchayarehi éma. Ánipa naicha:

—Vivaraha pimetacahavi ¿te táuricapuca mánajica ema achane esu mayena taicha jácani tájiparacana? —náichapa.

4 Ema Jesús majicapavacapa:

—Németeaca vahi ácaicutiarahi eta échajicuira eta Sagrada Escritura. Te tépanavainapa acane, ema Viya máijaracahi ema achane ésunayareichuhi esu mayenayare. Esu esena émanayareichuvare ema suímayare.

<sup>5</sup> Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa titatícacanayare. Eta navehacacairahi, tímicutijiricavaipa étanarinehi eta náqueheana” macahepa ema Viya.

<sup>6</sup> Tacahe, tímicutijiricavainapa émanainarichuhini te peti. Étanarichu eta napaneruana. Vaipa táisapacarehini náinajicahini. Eta tacahe, mácani máinajicahi ema mayena, éma máepuruhi eta juca mavanairipi ema Viya —máichavacapa.

<sup>7</sup> Tásicha, ánivare nacahe:

—¿Tájahasica tacayema eta mavanairipihi ema víyarahaini Moisés ticaepiyayarehi eta ajureca suyehe esu esena eta máinajisirayarehi ema suima? —náichapa.

<sup>8</sup> Ema Jesús majicapavarepa:

—Ena iáchucanaveanaini, te jácani eta nasemirahi, náinajicapa ena nayenana. Ema víyarahaini Moisés másapahi tínajicacana táichavenehi eta tájinairahi eta náimitucacarevainahini, táetaviuchirahi eta namuracasamureva. Váhisera máuricahini ema Viya eta náinajicacahini.

<sup>9</sup> Puiti nuvaraha numetacahe: Te máinajicapuca esu mayena mácani achane, te tájinapuca suíchiravainahini; tásicha, mavehana ema suima, ticapecaturaipahi me Viya. Tacutiquene, mácani mavehahipuca súcani esena máinajiruhi ema suima, ticapecaturaipavare éma, taicha ésu, matiarihichahahí ema suímaquenehi —máichavacapa.

<sup>10</sup> Tacahe, te víputsiacavavarepa, viti mayeheana apóstole viyaserecapa ema Jesús:

—Te énehipuca tacahehi eta juca, eta vivira viti ajairana esu esena, tiúripanaichuhipuca vahi vicutanuca esu esena —víchapa.

<sup>11</sup> Ema Jesús máichahavivarepa:

—Vahi ámutu árataha ímatiequeneha eta juca. Nararihisera tinerejicavanayarehi náimatiéquenehayare máicha ema Viya.

<sup>12</sup> Nararihi ena ajairana vahi natanucaimahi esu esena nayenainahini, taicha eta náquehe vahi táichuhahini esu esena. Nararihivare ena ticavecuhianahi, navetijipa éna vaipa náesenicaimahi esu esena. Nararihivare ena apamuriána tinerejicavanahi vahi natanucahini esu nayenainahini,

navarairahi tacuija jácani tahapapicahini eta nacaemata-neasiraya ema Viya. Ticunachacarepanayare ena tiratahanayare eta juca náijarasirava yátupiquene nacaemataneacaya ema Viya —máichahavipa.

*Ema Jesús mayujaraucha ena amuyana*

(*Mr 10.13-16; Lc 18.15-17*)

<sup>13</sup> Tacahe, ena achaneana námavacapaipa ena amuyana eta mayehe ema Jesús. Navarahahi máemamahacavacayarehi éna, mayujarauchahivaréni. Vítisera viti mayeheana apóstoleana vahi vísapahini. Vicaichepaicapa ena tiámanapahi ena amuyana.

<sup>14</sup> Ema Jesús máichahavipa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna —máichahavipa.

<sup>15</sup> Tásicha, máemamahacavacapa ena amuyana, mayujarau-chavacapa. Te tamutupa, viyanavarepa te apana avasare.

*Ema achane rico téchajiricava mayehe ema Jesús*

(*Mr 10.17-31; Lc 18.18-30*)

<sup>16</sup> Matiarihi ema achane amaperu rico. Mapauchapa ema Jesús. Mayaserecapa:

—Tata maestro, piti piúriquene. ¿Tájahapucaini eta nícharacavahíni eta nítujisiravaina me Viya máichecuaraquirénahini eta nítaresira? —máichapa.

<sup>17</sup> Ema Jesús majicapapa:

—¿Tájaha tacayema pímijarechanu “Piti piúriquene”? Mararihi ema Viya. Jéhevare éma, tétavicavahi eta máurivahi. Téhesera te pivarahapuca pécha te apana vítaresira, pisuapayare eta vanairipiana —máichapa.

<sup>18</sup> Mayaserecavarepa ema achane:

—¿Tájahasica eta vanairipianahi eta nusuapaqueneya?

Majicapavare ema Jesús:

—Eta juca eta mavanairipiana ema Viya: Vahi picupareca. Vahi picuveha esu esena apayena. Vahi picuamereca. Nacuija pépiyéqueneruina.

<sup>19</sup> Pipicauchayare ena ticachichaviana. Pémunacayareva ema piparaepiyahi, tácuti eta pémunasiravahi píti —máichapa.

<sup>20</sup> Tacahe, ema achane majicapapa:

—Tamutu eta juca nusuapahi nítauchahi. ¿Tájahaserapuca eta jácani néjequeruichahahi? —macahepa.

<sup>21</sup> Ema Jesús majicapavare:

—Te pivaraha pítaucha tamutu, piyana píjararecaya tamutu eta pímháqueneana. Tásicha, píjaracavacapa ena páureana.

Jéhevare éta, pijacapayare eta pímahaqueneyare te anuma táitsivayare. Te tamutupa eta juca, pítecavanepa péhicanu — máichapa.

<sup>22</sup> Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyanapa tipanererecapaipa.

<sup>23</sup> Tacahe, ema Jesús máichahavipa viti mayeheana apóstole:

—Nutupiruva numetacahe: Yátupiquenehi máitujihí eta náijarasiravainahini eta náehisiranuinahini ena rícoana eta nasiapirainahini te anuma.

<sup>24</sup> Esamanuchaha. Eta juca tímicutijiricavahi eta vipera camello, máitujihí tánucuhahini te támiciejehe eta parirapa. Ene nacaehehi ena rícoana —macahepa.

<sup>25</sup> Eta visamirahi viti, viáraminehi. Víchacacapa:

—¡Tétavicavahi eta tamáitujicacarevahi! ¡Nájina titujicavaimahi náuchucuhahini!

<sup>26</sup> Ema Jesús tímararacahavipa. Tásicha, máichahavipa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaquenénahini ema Viya. Tamutu marataha —máichapa.

<sup>27</sup> Ema Pedro máichavarepa:

—Vítisera, Tata, vinaquicahi tamutu eta vicayeheque-neanahí, vivarairahi véhicavi. ¿Tájahasica eta vímahaquenéya? —máichapa.

<sup>28</sup> Ema Jesús majicapavarepa:

—Nutupiruva numetacahe: Járabajayare eta sáchevayare, tacaitsvairayare tamutu arairuya. Tásicha, nuti Manerejirunuhi ema Tata néjacainapa te tajarahiquenehi trono. Tásicha, eti éhicanuanahi ejacainavarepa tayehe eta dócequene trono. Ecavanairipinapa nayehe ena dócemuriquenueana vi-janeananana israelítana.

<sup>29</sup> Tásicha, emutu eti enaquicanahí eta epenana, ejunijicahivare ena ticachichaheana\*, ena eparapenaveana, ena echichanaveana, eta eyehe apaquehe, táichavenehi eta éhisiranuhi puiti, tiápajucavainapa camuripanayare ena ejaneananayare étapa eta ímahaqueneanaya. Énerichuvare táurivayare eta ítaresira máichecuaraquirenapa.

---

\* **19:29** Te jácani apanana versióneana, tatiahi te juca lista eta táchajiriruva “ena nayenana”. Tájinaserá nalistanahini te libro antivupanahi. Eta tacahehi, vímatiequeneha vahi manacahini ema Mateo. Mácani apana achane mave-juchahipuca te Lucas 18.29.

30 Maverahesera eti etiarihiqueneanahi puiti, vahirichuhi ecapicahuuhini. Te jena sácheyare, ichapepanainapa eta ecapi-cahuiraya. Ena puiti ticapicahuanahi, te táitauchavapa te jena sácheyare, énapavainapa téquenehanayare.

## 20

*Ema Jesús máimicutichahi ema achane rico tiuri eta mavachachira ena ticaemataneyechana*

<sup>1</sup> Te jena sácheyare te níjaracahénapa eta ícuchiyyare eti nuchanerana, tacuti eta mavachachirahí ema émana achane ticayehe eta ichape quinta úvaquiji nayehe ena ticaematanearahiana. Ema maca mayatiruhi tipaica matanuca ena achaneana ticaemataneanayarehi mayehe. Tírerecanayarehi eta uva.

<sup>2</sup> Te titucavapa ena ajairana, mamevacavacapa eta mavachachirayarehi étana reale te sache. Tiúrihi eta mavachachiravacahi. Mavanecavacapa tiyanana tayehe eta náireresihayarehi.

<sup>3</sup> Tásicha, macamunuichahava ena apamuriana achane. Te las nuévepa sache, tiyanavarepa te plaza. Máimahainevare ena apamuriana ajairana máematanereanahi.

<sup>4</sup> Máechajiacavarepa eta náireresirayarehi. Mamevacavacavarepa eta táurivayarehi eta mavachachirayarehi. Tiyanaganavarepa éna, tirerecanahi.

<sup>5</sup> Te las dócepa sache, tiyanavarepa matanuca ena apamuriana. Titucavavare, máevatamurihavare tirerecanayare. Te las trespa sache, tiápechavavare tiyana titucavavare ena apamuriana, énerichuvare tirerecanayarehi.

<sup>6</sup> Te las cíncopa sache, tiyanavare tiúchucahi tayehe eta plaza. Titucavavare ena apamuriana ajairana máematanereanahi. Tásicha, máichavacapa: “¿Tájaha tacayema tájina ématanenahini puiti jena sache?”

<sup>7</sup> Éna najicapapa: “Nájina náechejiacahavihini”. Tásicha, ema máichavacapa: “Éyana éti apanava írereca ánaqui te nuyehe quinta úvaquiji”. Mametacavarepa eta táurivayarehi eta mavachachiraya.

<sup>8</sup> Tacahé, te yátipa, mamecapa ema mayehe empleado máichuhavacapa namutu, mavachachavacayarepa. Mavarahahi náinapuca nacavacha ena náequenereruanahi ticaematananeana. Nasapihapa téquenehanahi ticavachana ena náinapureanahi.

<sup>9</sup> Tásicha, ena nasiapaqueneanahi te las cíncopa sache, mavachachavacapa ema achane eta étapecavacahi eta reale, tacutirichuhi eta navachahi ena ticaemataneanahi tamutu

sache. Énapa ena nasiapaqueneanahi te las trespa sache, énerichuvare eta étapevaca reale eta navachahi.

<sup>10</sup> Tacache, te ticavachanapa ena náinapureanahi tisiapan, náimahapa éna tacutirichuhi eta navachanahi ena náequenere-ruqueneanahi.

<sup>11</sup> Tásiha, tisemanapa mayehe ema náquenuhi.

<sup>12</sup> Ánipa nacahe: “Ena nani náequenereruanahi títecapan, vicutivachavacaichuhi eta navachahi, étanainehinéni hora eta nacaematanerahí. Tacutirichuhisera eta vivachahi viti vínapureanahi. Váhiquene táuricaimahi eta juca, taicha ichape-murihi eta vicamichirahi víti eta táijureva muracaquene eta sache. Táurica vicachuricavacayarehini éna eta navachahi” nacahepa.

<sup>13</sup> Émasera ema náquenu majicapavacapa: “Váhira nucaete-mahémahi éti. Énaripa ena náequenereruanahi, váhivare nucaetemavacaimahi. Tínunahi eta nuvachachirahehi étapecacaheta reale níjaracahe. Vahi ecusema.

<sup>14</sup> Ésamiricavachucha. Evehachucha eta juca evachahi.

<sup>15</sup> Núti néchinava taicha nuyehlerichuhi eta plata. Nuvaraha ácuticacahini eta evachana emutu. ¿Éti ecapinarunupapuca eta núrivahi nayehe ena nani?” máichavacapa.

<sup>16</sup> Ema Jesús macahevarepa:

—Ene nacaheyare te jena sácheyare, nácani náequenere-ruanahi téhicanuana, éna nasapihayare tínapucana. Tásiha, nácani náinapureanahi, nasapihayare téquenehanayare\* —macahepa.

*Ema Jesús tiápechavavare máechajisiha eta máepenirayare  
(Mr 10.32-34; Lc 18.31-34)*

<sup>17</sup> Tacache, eta vipaisirapahi te achene te vicaijuhepa eta Jerusalén, típutsiacahavipa ema Jesús viti dócequeneana apóstoleana. Máichahavipa:

<sup>18</sup> —Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratacanuanainapa ena tuparairucana.

<sup>19</sup> Tímicapanuanayare taicha tijararecanuanainapa nayehe ena suntaruana romanoana. Éna, nájina najapanuquenéna. Ticaecahinuanainapa. Téstacanuanayareva. Tétatacanuanayareva te crusu. Tásihasera, te mapanaquenenapa sache, néchepucainapa te nécari —máichahavipa.

\* **20:16** Te jácani apanana versióneana, tatarihi eta juca táchajiriruvana “porque muchos son llamados, pero pocos son escogidos”. Tájinaserá eta juca táchajiriruvanahí te libro antivupanahí. Eta tacache, vímatiequeneha vahi manacahini ema Mateo. Mácani apana achane mavejuchahi eta juca te Mateo 22.14.

*Esu naena ema Jacobo émapa ema Juan suyaseaca ema Jesús eta macajupahavahini ena suchichanaveana  
(Mr 10.35-45)*

<sup>20</sup> Tásicha, témeñahavapa esu naena ena vichamuriana ema Jacobo émapa ema Juan, suámavacapaipahi éna. Tépuyucapa ésu te mamirahu ema Jesús, suyaseacayarehi énainahini majupahanainahini ena suchichanaveanahi.

<sup>21</sup> Éma mayaserecapa:

—¿Tájahasica ecamunu, nuchicha?

Ésu suíchapa:

—Nuvaraha pá cachanéni ena nuchichanaveana tayehe eta péjasihayare picavacureraya. Náejacahini te pichacaya, eñi éñina te pivaure, eñi apana te sapa —suíchapa.

<sup>22</sup> Ema Jesús majicapavacapa éna:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenévayare ecatajivairayare, ecutinuyarepuca eta nucamichirayare nútí? —máichapa.

Éna najicapapa:

—Virataha vicamicha —nacahepa.

<sup>23</sup> Tásicha, máichapa:

—Yátupi ichape eta ecatajivairaya, vicuticacaya eta nacapsirahaviyare. Étapasera eta éjasirayare eta te nuchacaya, vaipa nútina necha nucaejacahehini. Ema Tata Nucaiyaquene, émahi tinerejicayarehi ena nujupahanayare —máichapa.

<sup>24</sup> Tacache, eta visamirahi viti diésqueneana mayeheana apóstole, visemapa nayehe ena apinana.

<sup>25</sup> Émasera ema Jesús máichahavipa. Ánipa macahe:

—Écharichuhi éti ena aquenucana tayehe eta avasare, muraca eta nacavanairipira. Énaripa ena tuparairucana, tétavicavahi tisuapacareanahi eta nacavacurerahi.

<sup>26</sup> Váhisera ecucahehi éti nayehe ena echamuriana. Mácani tímerecavahi ticapicahupana, tacamuñuhi máitativacayare ena apamuriana.

<sup>27</sup> Te etiarihivarepuca eti evarahahi ínapuca, tacamuñuhi ímerecavaya navanaraheyarehi ena echamuriana.

<sup>28</sup> Ecudinuyare nuti Manerejirunuhi ema Viya. Vahi étina tímitecanu nucaitaticasihini. Nútiyarehi nítatihe. Énerichuvare níjaracavayarehi nímicapacava íchavenequeneanainahí éti camuriqueneanaya nucuchucureanaya —máichahavipa.

*Ema Jesús macaimairiricavaca ena apinana púchuquiana  
(Mr 10.46-52; Lc 18.35-43)*

<sup>29</sup> Tacahe, te vijunijicavarepa eta avasare Jericó, camurianahivare ena achaneana ticavasanahi tayehe, téhica havianahi.

<sup>30</sup> Natarihi ena apinana ajairana púchuquiana. Téjacanahi te achenechacaya. Te nasamapa ema Jesús eta mánucuirapahi, tipiararecanapa. Ánipa nacahe:

—¡Tátachicha! ¡Pítiqueneripa yátupiquenévihi Cristo! ¡Picatajicahavipaini pájapanuhavi!

<sup>31</sup> Natarihisera ena achaneana vahi náuricahini eta napiarasirahi ena púchuquiana. Navarahapa nacamatinaca. Énasera napiaracaichucha:

—¡Tátachicha! ¡Pítiqueneripa yátupiquenévi Cristo! ¡Picatajicahavipaini pájapanuhavi! —nacahepa.

<sup>32</sup> Tacahe, ema Jesús eta masamiravacahi, titupihapa. Máichuhavacapa ena púchuquiana. Mayaserecapa tájahahipuca navarahahi.

<sup>33</sup> Éna najicapapa:

—Tátachicha, vivaraha pípuhauquichahavini apaesa vímairi-ricapaini —nacahepa.

<sup>34</sup> Tacahe, ema Jesús majapanuvacainehi. Máemamahau-quichavacapa. Enevanerinehi tímairiricana. Tásicha, téhica havianapa.

## 21

*Títotecapapa ema Jesús eta te Jerusalén  
(Mr 11.1-11; Lc 19.28-40; Jn 12.12-19)*

<sup>1</sup> Tacahe, te apanapa semana, viyanapa vicaijuhe te Jerusalén. Vétavajicapa tayehe eta avasarechicha Betfagé te tachacaya eta cerro ticaijarehi Olivoquiji. Ánaqui ema Jesús mavanecapa ena apinana vichamuriana.

<sup>2</sup> Ánipa maicha:

—Eyanayare tayehe eta te jena avasarechicha Betfagé. Ánaqui ímahayare ticaitihahi eta esena burrico, étapa eta tachicha te tachacaya. Evejapuacayare iáminanuyare eta áni.

<sup>3</sup> Te natarihinapuca náeñama, emetacayare eta nucamunuirahi núti. Vahi táyeréimahi vímichavavaneyare —máichavacapa.

<sup>4</sup> Eta juca tamutuhi títauchavapahi eta májucha quenehi ema mácani víyarahaini profeta.

<sup>5</sup> Ani tacahehi: “Emétaca ena achaneana ticavasanahi te Jerusalén, apaesa natsecava eta najacapirayare ema nayeheyare Rey. Emétacayare vahi nacupica, taicha téavicavapahi eta mamansuvapahi, étapa eta máurivahi. Mámipahi eta iúrita-resirayare. Tímaticareyarepahi ema, taicha ticaperayare eta burricuchicha” tacahehi eta Sagrada Escritura.

**6** Tacahe, ena vanairucanahi náitauchahi eta navanahi mayehe ema Jesús.

**7** Námapaipahi eta burricochicha étapa eta tachicha. Nanacamaequechapa eta náepacuhana. Tásicha, ticaperapa ema Jesús.

**8** Camuriana ena achaneana tiácapanahi náepacapaicapaipa eta namuirihana. Ena apamuriana navehapa eta tapacaji eta cáchipaca. Nanacavare te mayanihayarehi éma.

**9** Ena apamuriana tínapumirauchanapahi énapa ena téquenehanapahi tipiaracanapaipa:

—Yare, Tata. Pítí yátupiquenevihi Cristo réyvihi viyehe viti israelítana. Ichape eta vicunachiravihi pítí. ¡Vanairucaque-nevihi me Viya! ¡Asulupaya me Viya te anuma! ¡Viva ema Viáquenu! ¡Viva! —nacahepa.

**10** Tiúchuchujicanapa ena achaneana te Jerusalén. Ichape eta náramirahi ema Jesús eta máitecapirahi. Tiyaserejiricacanapaipa:

—¿Nájaha ema maca achane?

**11** Ena apamuriana najicapapa:

—Émara ema profeta ticajare Jesús, ticavasa te Nazaret te tinapaica te Galilea —nacahepa.

*Ema Jesús macuchuchujicavaca ena tíjararecanahi eta sárareana, cágureana te tajuhe eta Templo*

*(Mr 11.15-19; Lc 19.45-48; Jn 2.13-22)*

**12-13** Tacahe, te apanapa sache, tiyanapa tisiapa ema Jesús tayehe eta te Templo. Máimaharinehi ena achaneana tíjararecanahi eta sárareana, cágureana. Ena apamuriana ena tivacharecanahi. Natiarihivare ena títsiriperecarahiana eta naplataneana ena apavasanana. Máichavacapa:

—Ema Tata Nuaiyaquene, ani macahehi eta máechajiruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étisera eti tiámerahiana, ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichavacapa.

Tásicha, macuchuchujicavacapa namutu. Máequhepuichinavacapa eta namesarana étapa eta nasiyana.

**14** Eta mávihirahi te Templo ema Jesús, napauchapa ena púchuquiana énapa ena masariana. Tásicha, éma macanaracacapapahi.

**15** Tacahe, ena amaperuana tipiararecanahi eta nacunachirahi éma, ánipa nacahe: “Pítiquenehi yátupiquenevihi Cristo manerejiruvihí ema Viya” nacahepa. Énasera ena tuparirucana énapa ena escribánoana vaipa náuricahini eta náimairahi tamutu eta juca. Tisemanapa.

<sup>16</sup> Náurujiacapa. Navarahapa nacaichepaica eta máichaque-neanahi. Tásicha, náichapa éma:

—¿Tájaha tacayema písapa tipiararecana ena nani amaperuana? ¿Váhiyapa picamatinacavacapaini? —náichapa.

Ema Jesús majicapavacapa:

—¿Tájahasica táichavahi eta juca najirairahi? ¿Váhipuca échajicuha eta Sagrada Escritura eta táechajisihairahi eta juca najirasahi ena nani amaperuana? Ani tacahehi: “Piti, Tata, pinacasamurechavacahi ena amaperuana eta máejerarera-yarehi naicha eta najirairayare eta táurinaquene alabanza” —máichavacapa.

<sup>17</sup> Te titapiricapa eta majicapiravacahi, majunijicavacapa. Tiyanapa eta te avasarechicha Betania, étapa máimasinehi. Véhicapaichuhisera víti.

*Ema Jesús májiquiha eta higo taicha máhiriquirehi*

(*Mr 11.12-14, 20-26*)

<sup>18</sup> Te apanapa sache, te yáticarahichicha, tiyanavarepa ema Jesús tayehe eta Jerusalén. Véhicapaichuhivare víti apanava. Eta vipaisirapahi, técuhasamurepa éma.

<sup>19</sup> Maimahapa eta yucuqui ticaijare higo te achenechacaya. Tiyanapa mapauchahi. Tájinaserá táchinahini. Tapacajianachucha. Tásicha, máichapa ema Jesús eta higo:

—¡Pépiyainapa píti eta máhiriquereviyare! —máichapa.

Eta macaherahi, enevanepa tijiyujipa eta tapacajiana.

<sup>20</sup> Eta vímairahi víti, viáraminehi ichape. Viyaserecapa ema Jesús:

—¿Tájaha táichararacavahi eta táijahúchiravahi tiájiqui eta higo? —vicahepa.

<sup>21</sup> Ema Jesús tijicaphahipá:

—Jéhesare nusamacarehi me Tata. Éti apana esamacare-yareva, te yátupina eta ecasiñavairahi me Viya. Tájina émaitu-caimahi. Eratahayare ícha, ecutinuya eta níchaquenehi. Erata-hayareva ecayejeca eta cerro te apachacaya.

<sup>22</sup> Tamutu jácani eyaseserepiyare eta mayehe ema Viya te eyujarasirana, ecaijaracasiyare te yátupina eta ecasiñavairahi me Viya —máichahavipa.

*Nayaserecapa ema Jesús nájahahipuca tituparacahi éma*

(*Mr 11.27-33; Lc 20.1-8*)

<sup>23</sup> Tacahe, visiapavarepa tayehe eta te Templo. Ema Jesús, tímiturecavarepa nayehe ena achaneana. Tacahe, napauchapa ena tuparairucanahi. Natiarihihivare ena tinerejicavanahi ena aquenucarahaná. Ánipa nacahe:

—Píti, vahi vitupararuvinahini víti eta píchira eta júcana. ¿Nájahasica tímitucavihi? ¿Nájaha tituparacavihi eta juca píchaqueneana? —náichapa.

<sup>24</sup>Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana.

<sup>25</sup>¿Nájahapuca tivanecahi ema Juan eta máitesirahi máicachasirisirahi? ¿Émapuca ema Viya tivanecahi, émajivapuca eta máitesirahi? —máichavacapa.

<sup>26</sup>Váhisera náituruquetenehahini eta najicapirayarehi. Tiácapaemajiricacanapa. Ánipa nacahe:

—¿Tájahasica vicayemayare eta vijicapirayare ema maca? Te vémunahacava vícha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?” Téhesera vácahepuca: “Émajivaichucha eta máitesirahi”, ticauyayacareripa titupisicahaviana eta te márijahiana ena achaneana, taicha namutuhi náimijachahi ema Juan profetaquenehi yátupiquene, mavaneruhi ema Viya —téchajiricacanapa.

<sup>27</sup>Tásiha, náichapa ema Jesús:

—Vahi vecha víti —nacahepa.

Tacahe, máichavacapa éma:

—Énerichuvare núti, vahi numetacahémahi nájahapuca ema tituparacanuhi.

<sup>28</sup>Nuvarahasera nímicutiarachinaheyare. Nararihi ena apinana ticaparapecacana. Ticavanahipa ema émana mayehe ema naiya. Ánipa máicha: “Nuchicha, piyana picaematane puiti jena sache. Pírerecaya eta uva” máichapa.

<sup>29</sup>Ema machicha majicapapa: “Vahi nuvaraha nucae-matane puiti juca sache”. Te tiyerepa, tiyanapanéni ticaematanehi.

<sup>30</sup>Tásiha, ema naiya mavanecavarepa ema émana machicha, mayanahini macaematanehini éma apanavare. Tásiha, ema amaperu majicapapa: “Tiuri, nuyanayare” macahepa. Váhinéni mayanahini.

<sup>31</sup>Puiti nuyaserecaheyare: ¿Nájaha ema tisuapajirahihi mayehe ema maiya? —máichavacapa ema Jesús.

Éna najicapapa:

—Ema tínapuca, éma tisuapajirahihi.

Tásiha, ema Jesús máichavacapa:

—Nutupiruva numetacahe puiti. Nasapihayare ticachuricaheanayare tisiapaná te anuma ena túhusianainihi énapa ena tisipecaturarahianainihi. Éti vahi esiapaimahi.

<sup>32</sup> Taicha vahi esuapahini eta máimiturapiana ema Juan Tícachasiricarahini, váhivare ávarahahini étupiricavahini eta ítaresirana. Nararihisera ena tisipecaturarahiana, ichape eta nasuapirohi. Étisera, tétavicava eta emasuapajiraiva, tayana-pana ímahahi masuapacarevahi éma —máichavacapa.

*Ema Jesús máimicutichina ena pártilárioana máurirahana  
(Mr 12.1-12; Lc 20.9-19)*

<sup>33</sup> Ema Jesús máichavarepa:

—Esamanu eta juca apuna nímiturapiya. Nímicutichinahayare. Matiarihi ema achane. Ticaevaruhi camuri eta uva te máesane. Manaruchapa eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásicha, máijaracapa ena achaneana, pártilárioanayarehi. Tásicha, tiyanapa ema achane te apuna avasare.

<sup>34</sup> Tacalhe, te títecapapa eta caje tayairahi eta uva, máimivanerecapa ena mamusurana nayaseapanavacayarehi ena pártilárioanahi eta tatucachaqueneyarehi éma.

<sup>35</sup> Énasera ena pártilárioanahi tisemauchavanarichucha. Nacaratacavacapa, náehapa ena vanairucana. Nacapacapa ema émana. Ema apuna nayucaracapa te márijahiana.

<sup>36</sup> Tásicha, ema achane máimivanerecapa ena apamuriana. Camuripananapa. Váhiquenesera náijaracahini, náehavacarepa. Nacapacavacapa ena apamuriana.

<sup>37</sup> Tacalhe, émajacaruvapa máevataca ema machicha. Máimijachaipa ema apapucaini napicauchahini.

<sup>38</sup> Te náimahapa ema machicha ema ticayehe eta úvaquiji, ánipa nacahe: “Émainapapuca ticayeheyare ema maca. Yare, vicapaca apaesa tánasipa viyehe tamutu. Tájina máicharacahavimahi ema achanénavaji”.

<sup>39</sup> Tacalhe, nacaratacaba ema machicha, nacuchucapa eta tayeha eta isaniti, nacapacapa.

<sup>40</sup> Puiti, nuyaserecaheyare: ¿Tájahapuca máicharacavayare ema ticayehe eta úvaquiji ena pártilárioanahi máurirahana? —macahepa ema Jesús.

<sup>41</sup> Éna najicapapa:

—Éma tisemainapa. Vaipa májapanuvacaimahi. Macapapanavacayarepa ena pártilárioanainihi. Máijaracainapa ena apamuriana pártilárioanayareva, nácani tipicaurahianahi, náijaracahini eta mayehe parte —náichapa.

<sup>42</sup> Tásicha, ema Jesús máichavacapa:

—Jehe tiúrihi eta ejicapiranuhi. Nuvarahasera epanerechinavapaini eta tacayemahi eta Sagrada Escritura, apaesa

ácaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mari táguchihi tatumearayare eta peti, taicha vahi náimatihini. Émasera ema Viya macaitecapahi eta te táguchihi eta tatuparahahi. Tacapicahuquenehi puiti. Táitusiava, tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya.

<sup>43</sup> Puiti numetacahe: Tágichavenehi eta emasuapajiraivahi, vaipa étiparacaimahi tayehe eta mavanairipi ema Viya. Ena tisuapajirahianahi, éna ticavacureanayare te jena sácheyare. Énainapa téchanayare eta vanairipiana.

<sup>44</sup> Puiti, nútí nucutihi eta ichape mari náepuruquenehi. Eti épurunuuanahi, iáquipaicavayare évetutujicayare. Tichimara-cahenapa eta muraca ecuñaraqui taicha eta emavarahairahi éhicanu —máichavacapa.

<sup>45</sup> Étasera eta nasamirahi ena tuparairucana énapa ena fariséoana, tisemanarinehi taicha tímaticacavanapa eta énairahi tayunacavaca eta máimicutichiravacahi ema Jesús.

<sup>46</sup> Navarahapa nacaratacayarehíni. Tipicacavanachuchasera nayehe ena achaneana taicha namutu nacunachahi ema Jesús eta émairahi vanairuca me Viya.

## 22

*Ema Jesús tímicutichava mácani rey te máichuhavacapa ena machimaranaya, máichayarehi eta ichape fiesta*

<sup>1</sup> Ema Jesús máimitucavare ena achaneana eta apapa máimicutichaquéne. Ánipa macahe:

<sup>2</sup> —Ema Viya, macutihi mácani rey te máimiyenachayare ema machicha, máichayarehi eta ichape fiesta.

<sup>3</sup> Mavanecapa ena mavanarana náichuhapanavaca ena machimaranaya. Váhisera návarahahini nayanahini éna.

<sup>4</sup> Tásiba, ema rey máevatacavare ena apamuriana mavanarana. Ánipa máichavaca: “Eyanavare étipava ímitatiricavaca ena níchuhaqueneanahi, náitecavanepa. Nucaparecaripahi eta vaca nirureyare nésinaruanahí. Tiúrinapa tamutu eta juca tinicacare. Énanecha nucuchapahi náitecavanepa” macahepa.

<sup>5</sup> Énasera ena máichuhaqueñeanahí vahi nasuapahini. Nájina nayanahini. Ema émana tiyanapa te máesane. Ema apapa máimahapana eta mayehe tienda.

<sup>6</sup> Ena apamuriana nacaratacaca ena vanairucanainihi, náehavacapa, nacapacavacapa.

<sup>7</sup> Tacahe, te máechapa ema rey, tisemapa. Mavanecapa ena masuntaruana nacapapanavaca ena ticapahianahi. Nájuchavare eta tamutu eta napenanaini.

<sup>8</sup> Tásicha, máichavacavarepa ena apamuriana mavaranahi: “Tiúripa tamutu eta juca tinicacareana. Váipasera nuvaraha náiteca ena náinapureanahi níchuhaqueneanainihi.

<sup>9</sup> Eyana te tamutu cálleana. Íchuhavacayare namutu nácani ecainunaqueneanayare” máichavacapa.

<sup>10</sup> Tacache, ena mavanaranahi tiyananapa, náchehupanevacapa. Nacurujicavacapa namutu nácani nacainunaqueneanapahi: nácani achaneana tiúriana énapa ena súnsusurujuana. Camurianahi. Tínicanarinehi eta te távihayarehi eta piesta.

<sup>11</sup> Tacache, ema rey tisiapapa, máimahayarehi ena machimaranahi. Máimahapa ema émana achane ema matiarihiquenehi vahi manacahini eta namuirihasa te ticaichuhasiana.

<sup>12</sup> Tacache, máichapa: “Ajaira, ¿tájaha tacayema vahi pinacahini eta müiriare níjararuheanahi tayeheyarehi puiti juca piéstayarehi?” Émasera ema achane vahi majicaphahini.

<sup>13</sup> Tacache, ema rey mavanecavacapa ena mavanarana: “Eveha ema maca. Ítijivaucha, ítiápechavare. Íyaracuhapana te timapicu tayehe eta máiyauchiavayare macapitiquiahechia-vayare” macahepa ema rey.

<sup>14</sup> Ema Jesús máichavarepa:

—Numetacahe puiti: Camurianahi ena níchuhaqueneanapapihi. Ánimurianarichusera ena titaurahianayare —macahepa ema Jesús.

*Navaraha náemejecapavacha ema Jesús tayehe eta impuesto  
(Mr 12.13-17; Lc 20.20-26)*

<sup>15</sup> Tacache, eta nasamirahi ena fariséoana, tisemanarinehi. Tiyananapa ticurujicacanapa, navarahaipa náemejecapavachayarehi apaesa étainahipucaini taviuchahini ema Jesús.

<sup>16</sup> Tacache, navanecapa ena nachamuriana énapa ena políticoana. Nayaserepanahi ema Jesús. Te náitecapauchapa, ánipa nacahe:

—Tata maestro, vímatihi eta tatupiruvairahi táurivahi eta juca pímiturapianahi. Yátupihi eta pímitusiravacahi eta táurinaquene achene ticaijuhe me Viya. Váhivare pipicacaracavahini eta péchajisihairahi eta náichavaquenévanahi nácani achaneana, tayanapanehi aquenucahi.

<sup>17</sup> Vivarahahisera viyaserecaviyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

<sup>18</sup> Émasera ema Jesús máimatiacavacapa eta tamaurivapahi eta napanereruana. Tacache, máichavacapa:

—¡Apimirahetataji! ¿Tájaha tacayema evaraha ímiaquipaicanu?

19 Nímhahaseji, iáminanu étapena eta reale —máichavacapa.

20 Eta náijarasirapa, éma máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

21 Éna najicapapa:

—Mayehe ema Presidente Emperador —náichapa.

Tacahe, éma máichavacapa:

—Tiuri, táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máichavacapa.

22 Te nasamapa ema Jesús eta majicapiravacahi, ichaperinehi titsirihacavanahi. Náramipa eta máitupajijasiravahi. Tiyananapa tichavanahi.

*Nayasereca ema Jesús náicharacavayarepuca ena náepenaqueneana eta náechepusirayare*

(*Mr 12.18-27; Lc 20.27-40*)

23 Étarichu te jena sache, nacahepaipahi ena saducéoana. Ena nani saducéoana, apanahivare eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Natanucahi eta tátetseruvayarehi náicha. Ánipa nacahe:

24 —Tata maestro, ema víyarahaini Moisés, manaqueicahi eta máechajiriruvahi eta viyehe: “Te máepenaequenehahipuca ema achane esu mayena, tásiha nájinahipuca manaqueque-neruvainahini machichainahini; te matiarihihipuca mácani maparapehi, mavehayare esu machinenaequenéni, apaesa émainapuca macachicha eta suyehe, máitsivainahi ema maparapéni”.

25 Tacutiquene te juca vitaracu, natiarihinihi ena siétequeneana ticaparapejíricacana. Tacahe, ema náechavimuri títauchavapa. Máepenaequenehapasera esu mayena. Nájinahi machichainahini.

26 Tacahe, ema maparape máitauchavare esu machinenaini. Énerichuvaresera máepenaequenehavare, nájinavare machichainahini. Ema émana maparape máitauchavare ésu. Énerichuvare máepenaequenehavare. Namutupa ena siétequeneana navehahi ésu, tásihasera náepenaequenehapaipa, nájina émanainahini macachichahini eta suyehe.

27 Te taequenepa, tépenapa esu esenaini.

28 Tacahe puiti, te apanapapuca eta náitaresirayare ena nani, ¿nájahapuca ena siétequeneana ema yátupiquenéhi suímaquenehi esu esena, taicha ena siétequeneana namutuhi suímanarihi? —náichapa.

29 Tásiha, ema Jesús majicapavacapa:

—Éjecapava éti. ¿Tájaha tacayema vahi ácaicutiarahini eta táimiturapi eta Sagrada Escritura? ¡Váhivare evarahahini esuapahini eta tamutuirahi marataha ema Viya!

30 Ánaqui te apaña náitaresiraya, vaipa nácamunuimahi esu esena. Énaripa ena esenana, váipavare nácamunuimahi ema ajaira. Nacutinapa ena ángeleana tiávihanahi te anuma eta namaepenacacairahi.

31 Éti váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiruva ema Viya. Ani macahehi éma:

32 “Nútira yátupiquenenuhi Viya, macasiñaquenehi ema Abraham, ema Isaac émapa ema Jacobo” macahepa ema Viya. Nutupiruvahi numetacahe: Ema Viya, éma téchahi eta náitaresirana ena téhicanahi, tayanapané tépenanaripa. Eta náchanevana, tímiyanavarichucha titareca te mamirahu. Éti, ichape eta ejecapiravahi —máichavacapa ema Jesús.

33 Tacahe, eta nasamirahi ema Jesús, ichaperinehi eta náramirahi ena achaneana eta máimiturapihi.

*Eta tisuapacarepanahi te mavanairipiana ema Viya  
(Mr 12.28-34)*

34 Tacahe, ena fariséoana eta náimairahi macamatinasirvacahi ema Jesús ena saducéoana, ticurujicacanapa éna.

35 Tásicha, tiyananapa náemejecapavachayarehi ema Jesús. Ema émana ticainapucavapa, máestrohi éma tayehe eta nayeherepiana. Mayaserecapa éma:

36 —Tata maestro, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

37-38 Ema Jesús majicapapa:

—Eta máechajiruva ema Viya te Sagrada Escritura, ani tacahehi: “Yátupina eta émunasiranuina nuti Iáquenu. Iúnaca te esamureana. Yátupina eta ecachanevairanuina núti. Epanerecha eta nímiturapiana tamutu sácheana, yátiana”. Étara eta juca eta vanairipi tisuapacarepanahi. Éta tativayare ítauchayare, tínapuca tayehe eta apamuri vanairipiana.

39 Eta apaña táehiruhi eta juca, ánivare tacahe: “Pémunacayare ema piparaepiyahi, tacuti eta pémunasiravahi píti”.

40 Eta juca apinaquene vanairipi, éta máehicahi ema víyarahaini Moisés tayehe eta apamuriana mavanairipianahi éma. Énaripa ena apamuriana profetana, étarichuvare náehicahivare éna tayehe eta náimiturapiana.

*Yátupi ema Cristo mámariéquenénihi ema rey David, Víyahivare éma  
(Mr 12.35-37; Lc 20.41-44)*

<sup>41</sup> Tacahe, eta náurujiasiraichaha ena fariséoana te machacaya ema Jesús,

<sup>42</sup> máichavacapa:

—Puiti, nuvaraha nuyaserecahe eti: ¿Tájaha tacayema eta epanereruana éti mayehe ema Cristo ema ecuchapaquenehi? ¿Tájaha eta ícutiarayare eta ímatirayarehi éma te máimerecavapa? —máichavacapa.

Éna najicapapa:

—Vímatinapa éma taicha tiúchucayare mámariequeneyare ema víyaraháini rey David —nacahepa.

<sup>43</sup> Majicapavarepa:

—Yátupihi ema Cristo achanequenehi eta máimahi taicha mámariequeneyarehi ema víyaraháini David. Nuvarahasera epanerechaya eta juca máechajiruvahí ema David te májurehi Salmo, ani macahehi:

<sup>44</sup> “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena tictorianacavianahi” macahepa.

<sup>45</sup> Ema David, eta máimijarechirahi ema Cristo “Tata Náquenu”, ¿tájahapuca eta macayemaquequenehi? Núti németeaca Víyahivare ema Cristo. ¿Tájaha íchahi éti? —máichavacapa.

<sup>46</sup> Eta nasamirahi eta juca, nájina náijaracavahini najicaphini. Eta tacahe, nájinapa napatsicavahini nápechahini nayaserecahini.

## 23

*Ema Jesús máimereuchavaca eta náejecapiravana ena fariséoana énapa ena escribánoana*

(*Mr 12.38-40; Lc 11.37-54; 20.45, 46*)

<sup>1</sup> Tacahe, ema Jesús máichavacapa ena achaneana viti pámitureana. Ánipa máichahavi:

<sup>2</sup> —Ena escribánoana énapa ena fariséoana tímijachavana catuparahana eta navepaisirayarehi eta mavanairipiana ema Moisés.

<sup>3</sup> Tacahe, éna esuapayare. Ítauchayare eta navanairipiana. Váhisera ecuehica eta nayeherepiana taicha ena apapipi-jichucha eta napaneruana.

<sup>4</sup> Tacutiquene tipamicaheana ítauchaya eta camuri-queneana nayeherepiana. Éti, tájina eta ejapanucarehíni nayehe. Nájinapa tiratahaimahi títaucha. Apanasica éna, vahi náratahahini náitauchahini tamutu.

<sup>5</sup> Tímijachavanahí tamutu náitaucha, navarairahi ticunachacareanayarehi nayehe ena achaneana. Tisiñavavaicanahí eta nápjusiravahí religíosoana. Nanacahi te nanahuana eta ajureca navejurehi eta te

Sagrada Escritura. Tacutiquene eta nacamuirihaira tísapepeacavanahi píncanillanahi. Ticamatsivacahi eta nacamuirihaira.

<sup>6</sup> Ena nani, te ticaichuhasiana eta nanisiraya, éna tinerejisi-navanahi eta tiúrinapanána eta náejasihaya. Navarahahivare ichape eta napicauchiraya ena achaneana te náurujisirarevanahi.

<sup>7</sup> Tétavicavahi eta navarairahi ticapicahuana. Navarahahivare ticacajamicasianayarehi te jácani nácapajisiha ena náimitureana téhepahi calle.

<sup>8</sup> Étisera vahi ecujamuracha eta nacajamisirahenahini ena achaneana, étainapapucaini nacunachirahenahini. Taicha éti eparapejiricacahi, ecuticacahi te mamirahu ema Viya. Nucarichu nútí yátupiquenénuhi eyehenuhi Maestro, nuti Cristo.

<sup>9</sup> Váhivare “Tata Nucaiyaque” ecuquicha nácani achaneana te juca apaquehe. Taicha mararihi ema yátupiquene Ecaiyaque, ema tiávihahi te anuma.

<sup>10</sup> Váhivare tísapacarémahi eta náimijarechahe, “Tata nuyehe jefe”, taicha nucarichuhi nútí yátupiquenénuhi jéfenuhi eyehe.

<sup>11</sup> Nuvarahasera ítátijiricacayare. Nácani titátirahiana, éna ticunachacarepananayarehi eta eyehe.

<sup>12</sup> Énerichuvare nácani mánsuanahi, éna ticunachacarepananayare me Viya. Nácanisera ticasíñavavaicanahi ticunachavananpuca, tímitsiriávanayare me Viya –macahepa.

*Ema Jesús mayunacavaca eta náejecapiravanahi ena escribánoana énapa ena fariséoana*

<sup>13</sup> Tacache, títecapanapa ena escribánoana énapa ena fariséoana. Tásicha, ema Jesús máechajicavacapa éna, mayunacavacahi. Ánipa macahe:

—¡Éti escribánoana étipa eti fariséoana! ¡Muracayare eta ícuñayare taicha eta apimirairahehi! ¿Tájaha tacayema ímijachavahi éti echa eta tapaja eta anuma? Vahi ísapa nasiapahini ena achaneana, nácani tivarahana tisiapan. ¡Étiripa vahi ítujicavaimahi esiapa!

<sup>14</sup> Jucarihi eta apana tiviuchahehi. Tatuparacahi ejapnuyare ena tépenaimana te váhipuca narataha navachachahini eta nantéve. Étisera everejicavacahi tamutu eta nacayehequeneana. ¡Apimirairahehi! Épiyacavahi religíosohehi, íchahi iúpiemahi eta eyujarasira te namirahu ena achaneana, evarairahi vahi tacuimicaecherachava eta emaurivanahi. Ichapeyare eta ícuñayare táicha.

<sup>15</sup> ¡Jucarihvare eta apana tiviuchahehi, éti escribánoana étipa eti fariséoana! ¡Muracayare eta ícuñayare taicha eta apimirairahehi! Éti, tétavicavahi eta éñamavairahi eta íturuca ena

téhicana eta ímiturapiana, eyanirahi te avasareana tiyerehiana. Tasapihahi ímitucavacahi eta nacutiherya eta evainarajivahi. Tiápajucava eta namaurivahi ícha. Eta tacache, ecatchanevacayare éna te yugu infierno.

<sup>16</sup> Jéhevare éti ecaijare páurehe. Ichape eta ícuñayare taicha eta ímiaquipaisiravacahi ena ecutiqueneana púchuquiana. Éjecapavahi tayehe eta juca ímiturapihi. Ímituca eta tájinahi eta taviuchaimahi nácani najurachahi eta Templo. Étasera te najuracha tayehe eta oro eta tiávihahi eta te Templo, ticaviurevanainapa ícha éti.

<sup>17</sup> ¡Tétavicavahi eta emaecharaireva eti púchuquiana! Eta Templo, étara tipicauchacarepanahí tayehe eta oro tiávihahi tayehe.

<sup>18</sup> Iápechavavare eta ejecapiravahi tayehe eta apuna ímiturapi. Éti íchavare: “Te náichapuca nácani eta promesa, najurachapuca tayehe eta náijuchirare eta sárareana, tájinaipavare ticaviurémahi. Téhesera najurachahi tayehe eta nanaquiruvahi te tainahu eta náijuchirarehi, étasera ticaviurevanaripa” íchahi éti.

<sup>19</sup> ¡Tétavicavahi eta emaecharaireva eti púchuquiana! Eta náijuchirarehi eta sárareana, étara tipicauchacarepanahí tayehe eta enaquiruvanahí. Éta tímpicauchahi eta enaquiruvanahí.

<sup>20</sup> Taicha nácani tijurachanahí tayehe eta náijuchirarehi, vahi tácarichuhini napicauchayare éta, napicauchayarehiva tamutu eta námavahuana tiávihanahí te náijuchirarehi.

<sup>21</sup> Tacutiquene nácani tijurachanahí tayehe eta Templo, vahi tácarichuhini náichahini eta juramento tayehe eta Templo. Najurachahivare mayehe ema Viya tiávihahi tayehe.

<sup>22</sup> Énaripa ena tijurachanahí tayehe eta anuma, najurachahivare mayehe ema Viya, taicha eta anuma étahi eta mávasa, étaipa eta máejasihahi ema téchahi tamutu.

<sup>23-24</sup> ¡Jucarihivare eta apuna tiviuchahehi eta tamuracavaya eta ícuñayare, éti apimirana! Éti ímijachavahi íminecapaequeneha ena ecutiqueneana púchuquiana tayehe eta titucacareana. Ímijachavahi yátupiquenehi eta religiósohéirahi eta epamisiravahi eta ítauchira eta vanairipi eta ecamavahuira me Viya eta diésmuri tayehe eta sucurecana. Ecunachacarehi taicha éta. Váhisera epamicavahini eta táuriqueneana ticunachacarepanahí me Viya. Tatuparacahe emutu ájapanurahi; ecatiuchavacayarehi ena macatiuchavarahanahí; yátupina eta ítauchiraya tamutu eta íjarasiravahi; yátupina eta ecasíñavairaina me Viya. Tatuparacahehivare ecamavahu eta me Viya eta diésmuri. Éti éñamavahi eta ítauchirahi eta ánichichana,

étasera eta tisuapacarepanaqueñeanahi táuriqueneana, tasapi-hahi vahi esuapahini\*.

<sup>25</sup> ¡Tétavicavahi eta apimirairahehi! Éti ímijachavahi yátupi-quenehi religiósohehi, ecaeñamaracavahi eta ímiyaniravaya ítaucha eta eyeherepiana. Étasera eta esamureana, tétavicavahi eta tachipejivavacahi taicha eta ecaetemaraivana étapa eta íjarasiravahi icha tamutu eta ejamuraraivana.

<sup>26</sup> ¡Tétavicavahi eta epuchuquiva eti fariséoana! Tamapurujihi eta religiósohéirahi. Tacamunuhi tativa esipaca eta esamureana, apaesa yátupinasarepa eta iúrvayare, tipachinainapa eta ítaresiraya.

<sup>27</sup> ¡Tétavicavahi eta ecatajivairaya, táichavenehi eta apimirairahehi, eti escribánoana étipa eti fariséoana! Éti ecuti eta covacha. Tiúrinahi te tainahu, téhesera te amahe távihahi eta máeperejiqueneana.

<sup>28</sup> Tacahéhi eta ítaresirahi éti. Ticutimahinehi iúrihi te nami-rahu ena achaneana. Étasera te esamureana tárujisiavahi eta evainarajivana, tacutiquene eta apimirairahehi.

<sup>29</sup> ¡Páurehesamichapucaini eti escribánoana étipa eti fariséoana! ¡Ichapemuriquene eta eviurevanahi! Eti, ímijachavaipahi puiti ecunachacarehi eta evarairahi échapajirica eyeheheacahi eta náecariana ena profetanaini matapiravarequeneanahi, nacparuanahi ena iáchucanaveanaini éti. Épiyacavahi yátupiquenénahini eta iúrivahi.

<sup>30</sup> Tásicha, ánivare ecahe: “Te vitiarihinaripahini víti eta acane te ticaparecanapa ena viáchucanaveanaini, vahi vicuimicasiapavahini tayehe éta” ecahepa.

<sup>31-32</sup> Étijivapa ímereuchavahi eta apimirairahehi, taicha puiti éti epanerechahi ecapacanuya, tacutihi eta napanerueranahi ena iáchucanaveanaini. Tásicha, ecuticacayare eta naviurevahi ena iáchucanaveanaini.

<sup>33</sup> ¡Éti tachichanaveanatataji eta quichare, tétavicavahi eta evainarajivahi! ¡Váhiqene ticaiticahémahi eta ícuñaya te infierno!

<sup>34</sup> Nímicaecherachayare eta evainarajivahi. Nuvanecayare napauchahe ena nuchanerana. Éna, timetacaheanayare eta mapaneruerana ema Tata. Tímitucaheanayareva tamutu eta nímiturapiana. Nasapihayare vahi esuapaimahi éna. Éna, yátupihi náituca. Émepururecayaresera éti eta náitupajijiasi-ravahi éna. Esapihainapa, éti ecapacavacainapa éna; ena apamuriana émetatacayare te crusu. Tásicha, ena apamuriana

\* **23:23-24** Ani tacahe eta mayeherepi ema Jesús te máechajiriruva: “Eti ecatijica eta chupi; ejricasera eta camello”.

éstacavacainapa te iúrujisirarevana. Éhicarairicavacainapa te jácani avasareana najunaiyayarepahi.

<sup>35</sup> Tásicha, eta ecapasiravacainapa ena nuvaneruanahi, étinapa tamuriacayare eta naviurevanahi namutu ena ticapacanahi ena achaneana matapiravarequeneanahi. Ema Abel máinapuiruhi nacaparuhi, máetaviuchainihi eta máuriva. Émapa ema máequenereruhi Zacarías (machichainihi ema Berequías), ema nacaparuhi te tamirahu eta Templo. Camurianahisera ena apamuriana náumurivanainihi.

<sup>36</sup> Nutupiruva numetacahe puiti: Étinapa tamuriacayare tamutu eta náepeniranahi. Títecapainapa eta ícuñayare eti achaneana ítareruanahi puiti —macahepa ema Jesús.

*Ema Jesús ticatisamurevahi táichavenehi eta namasuapajiraiyah ena achaneana ticavasanahi te Jerusalén*

(Lc 13.34-35)

<sup>37</sup> Tacache, ema Jesús tiápechavava máechajicavacapa ena achaneana. Ánipa macahe, taicha eta macatisamureravahi:

—¡Tétavicavahi nucatisamureravahi ícha étisami eti tachichanaveanahi te juca viávasa Jerusalén! Ena iáchucanaveanaini, éna ticapapajicanahi ena profetana mavaneruanahi ema Tata. Puiti étipavapa evaraha ecutiya ena iáchucanaveanaini. Ichapemurihinéhi eta níchuirahéhi éti, iúrujiacanuhini, tácuthihini eta varayu te tacurujimuriha eta tachichanaveana eta te tapava. Váhisera ávarahahíni.

<sup>38</sup> Ímahainapasera puiti eta íchararacavayare. Ticaquipaicasiyare tamutu eta epenana, étiripa ticuchucaheanainapa.

<sup>39</sup> Numetacahevane puiti vaipa iápechavaimahi ímahanu, tiámainucavainapa te ítsivachapa eta epanereruana, evarai-rayare ejacapanu. Ecahénapa: “Ichape eta vicunachiravihi píti vanairucaquenévihi me Viya” ecahénapa.

## 24

*Ema Jesús máimereucharipa eta táquipaisiravaya eta Templo*

(Mr 13.1-2; Lc 21.5-6)

<sup>1</sup> Tacache, ema Jesús tiúchucapa tayehe eta Templo, tiyanaya-repaini. Vítisera viti máimitureana vémeñahavapa eta mayehe. Eta viáramirahi, vímechapa eta táurinaqueneana mari tayehe eta anuquehe peti te Témplosami.

<sup>2</sup> Émasera ema Jesús tijicapahavipa:

—Tamapuruijyare eta juca táurinava eta pétisami ímaha-quenehi puiti. Nutupiruva numetacahe: Járabajayare eta sácheyare ticaquipaicasiyare tamutu eta juca Templo. Téjane-repaicainapa tamutu eta juca táurinaqueneanahi ímahaque-neanahi puíti —máichahavipa.

*Tatiarihiyare eta ecutiarareanaya te tánehipaicha eta táchecuiraya*

*(Mr 13.3-23; Lc 21.7-24; 17.22-24)*

<sup>3</sup> Tásicha, viyanapa tayehe eta cerro Olivoquiji, víputscavapa. Te vítecapapa, téjacapa ema Jesús. Tásicha, víti máimitureana viyaserecapa:

—Vivaraha pimetacahavi. ¿Tájamuhupuca eta náimiaquipaisirayare eta Témplosami? ¿Jararihiyarepuca eta ecutiarareyare eta piápechiravayare pítega, étapa eta táitauchirayare eta taequenereruhi mapanereru ema Viya? —víchapa.

<sup>4</sup> Tásicha, ema Jesús máichahavipa:

—Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanayare nuyehe.

<sup>5</sup> Nacaheyarepahi éna: “Nútiripa Cristo”. Nasapiha navayuacayare ena camuriana achaneana.

<sup>6-7</sup> Énerichuvare esamairiricayare eta táchacacairayare eta ichapequeneana avasareana. Ticanarajiricacanainapa eta te avasareana tayerehiqueneana, énerichuvare ticauyayacrenapa guierraina eyehe éti. Váhisera ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táchecuirayare. Énerichuvare tatiarihiyareva eta ichape ecuhamuhuyareva te avasareana. Tatiarihiyareva eta ichape tayamurisiranaya eta apaquehe te jácani távihanapahi táetupiaruyare.

<sup>8</sup> Tamutu eta juca ecutiarareanayare eta táepaniravayare eta nátajivanayare ena achaneana.

<sup>9</sup> Tásicha, eti nuchaneranahi, ticticianacaheanainapa ena achaneana, táichaveneyare eta éhisiranuhi. Tipanajiricaheanainapa te tamutu avasareana. Ticaratacaheanayareva. Ticapacaheanayareva.

<sup>10</sup> Tásicha, nararihinapa camurianaya ena tínajicavanayare eta náehisiranuhi. Tásicha, ticticianacaheanainapa éti yátupiquene eta éhisiranuya. Tíjararecaheanainapa éti.

<sup>11</sup> Natarihinavarepa nácani tépiyacavanayare mavaneruana ema Tata. Tamutusera eta náimiturapiana náepiyahirivayarechucha, camurianayare ena navayuaruanayare.

<sup>12</sup> Énaripa ena arajuruana, téavicavainapa eta namasuapa-jiraivaya, vaipa napicauchaimahi ema Viya. Camurianayare éna vaipa témunarahianáimahi.

<sup>13</sup> Étisera nuchaneranahi, te ecamichahi tamutu, ímiyanavahivare eta éhisiranuhi te táitavapa tamutu, nucuchucuhahheyare núti.

<sup>14</sup> Énerichuvare, eti nuchanerana ecametarairuyare te tamutu avasareana, taicha nuvaraha náecha namutu ena

achaneana. Ímitucavacayarehi eta najacapacarevahi me Tata namutu ena téneuchavanahi, étapa eta apamuriana nímiturapiana. Te ítecapapa te tamutu eta avasareana, nápechavayare nuchava.

<sup>15</sup> Numetacahevanevare eta apana. Járabajapayare eta sache táïñehiqueneyare. Tímerecavaya ema achane váinarajiquene, máechajisihaquenehi ema víyarahaini profeta Daniel. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamuñuhi ticaravahuanayare eta májurehi ema víyarahaini Daniel.)

<sup>16</sup> Tásicha, te ímahapa eta juca, esamaiririccapuca, táuricapa etatajipa ejunavane, éti etiarihiqueneanahí te Judea. Ecaijúheyare eta te cérrroana, étina eyumurusiavaina.

<sup>17</sup> Nácani tiávihanahi te nayehe canchón te nasamairiricapa eta juca téchacarehi, táuricapa najunavanepa. Vaipa táuricahini nasiapanumahini te napenana, navehahini jácani náeñamaqueneanainihi.

<sup>18</sup> Nácani tachimaruuanayare te vámahi eta téchacarehi, táuricapa vaipa nacuchava tayehe eta avasare, tayanapane náeñamahi eta nayereruvana.

<sup>19</sup> ¡Páureanasami nácani esenana tachimaruuanayare, nácani ticajarianahipuca, nácani esenana ticachichanahi eta amuya tiájicachaha!

<sup>20</sup> Eta tacache, eyaseacayare ema Viya tacuija táchicicahe\*; vahivare tacuchimaracahe eta ichape tiquiva te achene te eyanapapuca ejuna.

<sup>21</sup> Te jena sácheinayare, tétavicavayare eta nacatajivairyarehi ena achaneana. Tájina tácumahí eta táïñehivayare eta nacatajivairayare, te táepaniravahi eta náitaresirahi ena achaneana te juca apauehe. Te taequenénapa eta tíñehi, tájinainapa tácumahí.

<sup>22</sup> Nájina tacaitiruimahi eta nacatajivairayarehi ichape. Macaichecavaneyaresera ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuquenéanahivare. Taicha te vahi macuacicheca ema Viya, máitamurihahipucaini macapapajicavaca namutu ena achaneana ema maca achane.

<sup>23-24</sup> Énerichuvare te tânehipaicha eta juca, natiarihinapa ena tivayuarahiana tépiyacavanayare Cristo tímivasichava-

---

\* **24:20** Ema Jesús máechajisihahi eta ticasarahimuhu, tiquivamuhuhivare te jena mávasa Judea. Máechajisihahivare eta nayeherepi ena israelítana eta váhiqene náisapavahini tiyanana tipaicana te jácani sávarumuahuana.

nainapa núti. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: "Yare, éhicayare ema Cristo. Matiarihipahi te juca vitaracu". Ena apamuriana ánivare nacaheya: "Náepiyahiraivahi éna. Ema Cristo mávihahi te viávasa víti". Étisera vahi ecusuapavaca. Eta navarairahi tivayuacaheanaya eti machanerana ema Tata, náiteturuequenehayare naicha eta ichapequeneana tiáramicareana ecutiarareanayare. Camurianasamiyare ena navayuaruanayare.

<sup>25</sup> Étisera vahi tivayuacaheanaimahi taicha numetacahevanehi puiti.

<sup>26</sup> Te náichahepuca: "Ímaha máenahi ema Cristo ánaqui te mávapahi apaquehe", vahi ecuyana. Étaripa te náichahepuca: "Mararihipa jácani tayumururevaquenehi cuarto. Vicarichu viti vímatihi eta mávihahi", váhiquenevare ecusuapavaca.

<sup>27</sup> Taicha te yátupinapa eta nítesirayare núti, nucutiyare eta tájiahúchirava títecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerejirunuhi ema Viya.

<sup>28</sup> Vahi ecueñamava távihapuca nítecapihaya. Núti nítecapauchaheya te jácani iávihahi éti†.

*Eta machavirayare ema Manerejiruhi ema Viya*

(*Mr 13.24-27; Lc 21.25-33; 17.26-30, 34-36*)

<sup>29</sup> Tacahe, te táitavapa eta juca nacatajivairaya ena achaneana, enévanénapa témahainapa eta sache. Étaripa eta caje, témahainavarepa. Témiricanainapa eta jarairiquiana. Étaripa eta tiávihanahi te anuma vímaimahaqueneanahi énerichuvare tiyamuricanainapa, tiyejecavananainapa.

<sup>30</sup> Tásiha, náimahainapa te anuma eta nícutiara núti Manerejirunuhi ema Viya. Tíyahainainapa eta napisira namutu ena achaneana távacuanahi eta avasareana te apaquehe. Tásiha, tímahanuanainapa núti. Tiámanuinapaipa eta úcaji eta núcupsirayare. Tétavicavayare eta nujaraivayarepahi, níñehinapaipa.

<sup>31</sup> Nuvanecaya ema Arcángel, muracayare eta macachujairayapahi, apaesa ena ángelleana nacurujicainapa namutu ena nuchanerana nunerejiruanahi, tiásihanayare te tamutu eta juca apaquehe.

<sup>32</sup> Tiuri puiti, nuvaraha nímicutichinahe eta jácani yuquui. Eta tátsivachiravavacapa eta tapacajiana, te ímahapa

---

† **24:28** Te máechajiruvahí ema Jesú, áni macahehi: "Te jácani mávihahi ema máepenaquene, eta távihayare eta sipuquiana". Eta juca mayehehi proverbio, tatarihi eta tacayemaquenehi tayumurevahí.

eta tajimuyairapa eta tatavaqui, tiúchucayarepa eta tapacajianaya arairu, tímaticarehi tiánehiripa eta únemuhuirayarépa.

<sup>33</sup> Ene tacahehi, te ímahayarepa tacaecherapa eta júcana ecutiarareana, ímatiacainapa eta tánehirainapa eta nuchavira.

<sup>34</sup> Numetacahevanecha: Vuíchaha titavanaimahi ena achaneana náitareruanaichaha te táitecapapa eta júcana ecutiarareanayare.

<sup>35</sup> Títavainapa eta anuma étapa eta apaquehe. Tativaya-resera títauchava tamutu eta numetaruheanahi.

<sup>36</sup> Eta juca tiáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahipucáini néchahini. Macarichu ema Tata, ema téchahi.

<sup>37-38</sup> Tacutiyare eta acane eta náijahúchiravahí tépenana ena achaneana machamurianaini ema Noé. Ena nani tinicairihianarinecha, náematanerinecha téraná, tímarrerecanahi ena nachichanaveana. Vahi téñamavanaimahi eta náimairahi ema Noé eta masiapirohi tayehe eta ichapequene pacure.

<sup>39</sup> Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sácheyare. Vahi natsecavahini tayehe eta nuchaviraya.

<sup>40</sup> Te jena sácheanayare, natiarihiyare ena apinana ajairana ticaemataneanahi te isaniti, ema émana tiáramicareyare tiára. Ema apuna manasinapa.

<sup>41</sup> Tacutiquene, apinanahipuca ena esenana cáemata-neanahi tiyuvarecanahipuca. Énerichuvare esu ésuna tiáramicareya tiára. Esu apuna sunasinapa.

<sup>42</sup> Eta tacahe, etsecavahí ecauneuchava éti machu vahi ecunecapauchava eta nítesirayarehi nuti Iáquenu.

<sup>43</sup> Nuvaraha ácaicutiaraquenéna. Machu ácutiriana mácani achane námeyeruhi ena tiámerahiana. Tájina máechapiavahini tájahapuca hórvayarehi eta náitecapauchiraya te mapena. Te máechapucaini, ticauneuchavaipahini éma, váipasare nacuameyechahini.

<sup>44</sup> Eta tacahe, éti ecuneuchavayare tamutu sácheana, taicha vahi échahini tájamuhuyarepuca eta nuchavirayare nuti Manerejirunuhi ema Viya, machu iáramecariana.

*Nararihi ena mísúana tiúriana. Nararihivare ena mísúana máurirahana.*

*(Lc 12.41-48)*

<sup>45</sup> Tiuri, nuvaraha nímicutichinaheyare eta apuna. Macañárihipuca ema empleado máetaviuchahi eta máitupajijiasi-ravahí. Tisuapajirahivare éma. Ema máquenu tiyanayarehi

te apava avasare. Táitusiava ema máquenu matuparacahi ema empleado eta máijarasiraya eta tinicacareana ena apamuriana machamusuvanahi.

<sup>46</sup> Tétavicava eta máuricacarevaya ema maca ticatuparahahi, te tamutuhi máitauchahai jácani machimapirana ema máquenu.

<sup>47</sup> Németeaca, eta tamutuirahi tiuri eta machimapirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tiúrihi eta máitauraivahi.

<sup>48</sup> Téhesera váhipuca tiuri eta mapanereruana ema mácani empleado, máimijachaichucha tiyereyarehi eta máitecapiryarehi ema máquenu.

<sup>49</sup> Tásicha, macaetemajircavacapapuca ena machamusuvanahi. Máichapapuca eta fiesta, tinahacavapa téra macachanevacahi ena macutiqueneana térrarahiana, téniricapa.

<sup>50</sup> Tásicha, vaipa manecapauchavahabini te títecápapa ema máquenu. Machimaracapa ema empleado eta mamapachichjisiraipa eta máimahaqueneana.

<sup>51</sup> Eta tacahe, ema máquenu macavanairipinapa náestacayare muraca. Tájina najapanuhini, tayanapane máiyahainepuca, macapitiquiahechavaineppuca éma. Tásicha, machu ácutihini ema maca empleado máurirahahi, machu ecaquipaicasisami eta te yucu infierno.

## 25

*Ema Jesús máimicutichina ena diésqueneana amaperuana ese-nachichana*

<sup>1</sup> Puiti nuvaraha nímicutichinaheyare nayehe ena tiúchuchuhanaya ticachanenuanayare eta néjasihaya eta návacureya, énapa ena vahi ticachanenuanaimahi. Ena nani nacutihi ena diésqueneana esenachichana amaperuana. Ticuchapanahi ena araimanayare, nácapirayare te nasamapa eta náitecapiraya. Tiámauchavavacapaipa eta namicahuana lámparinana.

<sup>2-4</sup> Ena cincoqueneana, téchemarahianahi. Tiámauchavavacaphi eta nabotellana eta aceite natseruvapahi. Ena apamuriana cincoqueneanahivare máechemarairahana mapanrerureana. Vahi námauchavapahina eta nahaceiteyarehi. Tásicha, tájinapa naviyahini.

<sup>5</sup> Tacahe, vahi náitecapavanehini ena araimana. Navarahaipahi tímamacana éna. Tavehapa eta ichapu, tímamacanapa.

<sup>6</sup> Tacahe, te enumuhupa yati nasamapa ema tipiaracahi. Ánipa macahe: “¡Nárajapa ena araimanayare! ¡Yare iácapa!” nacahepa.

<sup>7</sup> Téchepucanapa namutu ena esenachichana. Náetupiricapa eta namicahuana.

<sup>8</sup> Tásicha, ena cíncoganavare tiájicuvacaipahi eta namicahuana. Tiyaseserecanapa eta aceite. Ánipa nacahe: “Ecatajicahavi ecajihavi eta eyehe aceite, taicha tiájicuvacaipahi eta juca vimícahuana, vémahaequenehaipa” nacahepa.

<sup>9</sup> Énasera ena cíncogueneana najicapapa: “Vahi víjaraca-hémahi machu véchuriaca víti apanava. Vahi várataimahi. Tiúripana eyana evachareca eta ehaceitena” nacahepa.

<sup>10</sup> Tásicha, tiyananapa tivacharepananayarehi eta aceite. Eta nayerevapahi, títecapananecha ena araimanayare. Tisiapanapa te tajuhe te távihayarehi eta fiesta. Náehicapa ena cíncogana natseruvanahi te távihayarehi eta fiesta. Tacahe, ticaeratapa eta tapaja.

<sup>11</sup> Te tiyerepa, títecapanapa ena apamuriana esenachichana. Náehahamecapa eta tapaja. Ánipa nacahe: “Tata, tata, pivejieuquenehahavi. Vivaraha visiapa” nacahepa.

<sup>12</sup> Émasera ema arayenayare majicapapa: “Eti, ¿nájahahéhipuca? Vahi nímatihe. Németeaca vahi étina tavanaranaina eta peti” máichavacapa ema arayenayarehi.

<sup>13</sup> Tacahe, ema Jesús máichahavipa:

—Éti, vahi ecucuti ena máechemarairahana. Ecuyaresera ena téchemarahiana. Ecuneuchavaicha éti, machu vahi ecunecapauchava eta jácani sácheyare eta nuchavirayare núti Manerejirunuhi ema Viya.

*Ema Jesús máimicutichinavaca ena achaneana ticaijarcasianahi eta maplatane ema achane rico*

<sup>14</sup> Puiti nuvaraha nímicutichinahe tayehe eta níjarasiraheya eti nuchanerana eta evacurecana taicha eta táurirahi eta ecaematanasiranuhi. Matiarihi ema achane rico. Tiyanyarehi te apana avasare. Máichuhavacapa ena mapanana mamusurana. Máijaracapa eta maplatane.

<sup>15</sup> Ema achane máimativacahi eta náechemaraivahi ena mamusurana. Ema émana máijaracapa cinco millone. Ema apana máijaracapa apina millone. Ema apana máijaracapa étana millone. Nacaejapacayare eta plata. Tásicha, ema rico tiyanapa te macaijuheyarehi te apana avasare.

<sup>16</sup> Tacahe, ema tijacapahi eta cinco millone, macaemata-neacapa eta plata. Macaejapacapa eta plata. Diez millonepa maicha eta maplatane eta macaejapasirahi.

<sup>17</sup> Ema apana, ema tijacapahi eta apina millone, énerichuvarepa macaejapacapa eta plata. Títucavavare éma eta cuatro millone eta plata.

18 Émasera ema tijacapahi eta étanaichu millone, vaipa macaejapacahini eta plata. Máecarapa eta plata, mapisirahi eta macaetehahini.

19 Tiyere eta mapairirisirahi ema náejaharu. Téhesera te tichavapa, mayaserecavacapa eta plata máijararuanahi éma.

20 Tacache, tínapucapa ema tijacapahi eta cinco millone. Máijaracapa ema máquenu eta máiturevahi. Ánipa macahe: "Tata, píti piújaracanuhi cinco millone eta plata. Júcahisera cinco millonevare eta táejapasirahi".

21 Ema máejaharu majicapapa: "Tiuri, nuchicha. Tájina táichava. Tétavicava eta piúriva. Pítouchahi eta picaemataneasirahi eta nuplatane. Puiti vahi támapurujimahi eta piúrivahi tayehe eta juca ánimurichichahi níjararuvih. Nutuparacavínapa eta camuriquene. Puiti pisiapainapa eta nuyehe. Piúrisamurereacaváinapa".

22 Tásicha, títecapavarepa ema apuna ema tijacapahi eta apina millone eta plata. Máichavarepa: "Tata, júcahi eta apina millone eta plata piújararunuhi. Júcahivare eta apinavare millone eta táejapasirahi".

23 Ema máejaharu majicapavarepa: "Tiuri, nuchicha. Tétavicava eta piúriva píti apuna. Puiti, váhivare támapurujimahi eta piúrivahi tayehe eta juca ánimurichichahi níjararuvih. Nutuparacavínapa eta camuripanaquene. Puiti pisiapainapa eta nuyehe. Piúrisamurereacaváinapa".

24 Tásicha, títecapavarepa ema tijacapahi eta étana millone. Máichapa ema máejaharu: "Tata, núti nímativihi eta pimajapanuraivahi. Piverejicanuyarehi eta táejapasirayarehi eta piplatane. Pítahacanuyarehiva eta nématanevachahi.

25 Eta nupisirahi nácaetehahini eta piplatane, nécarapa. Puiti, júcahi nímichava tamutu eta piplatane".

26 Ema máejaharu majicapapa: "Tétavicava eta pisunsuva, piti plújutataji. Te pímatinuhipuca eta numajapanuraivahi, nítaharahi eta apaematanevacha, téhevare pímijachahi nuverejicaviyare eta táejapasirayarehi eta níjararuvih nuplatane;

27 váhiyapa pinacapaini te banco eta nuplatane. Puiti váequeneipahini puiti eta táejahacaripahini eta nuchavirai-pahí".

28 Tásicha, máichavacapa ena apamuriana manusurana natarihiqueneanahi: "Everejica ema mácatataji eta plata. Íjaraca ema ticayehehi eta diez millone.

29 Taicha, mácani máituruequenehahini eta macaemataneasirava, tatuparacahi eta nímicatasiraya. Ticayeheyare camuripana. Énasera nácani vahi náiturequenehahini eta nacaemataneasirava, ticaverejicasianayarehi eta náijaracasanahi.

30 Émechareca muraca ema maca musu máurirahatataji. Vahi ecujapanu, tayanapane máiyahainepuca, macapitiquia-hechavainepepuca. Tásicha, iáquijica eta te cuarto tamapicujuhe-quenepanahi” macahepa ema achane rico.

*Ena achaneana, te jena sácheyare ticayaseserehianainapa, étapa tiámavacaya eta náitátilrihi ena apamuriana, ticaevatanainapa tayehe eta návihayare*

31-33 Te nuchava nuti Manerejirunuhi ema Viya, néjacainapa eta te nuyehe trono tacapicahuquene, Réynuinapa. Tásicha, névatacaya ena nuyeheana ángeleana nacurujicavacaya te numirahu namutu ena achaneana te avasareana. Tásicha, núti nunerejicavacainapa ena yátupiqueneanahi nuchanerana. Nunacainapa te nuvaure. Tásicha, ena vahi nuchaneranai-nahini nunacainapa te sapa.

34 Tásicha, nuti Rey ánipa níchayare ena nuchanerana tiávihayarehi te nuvaure: “Yare, eti iúricacareanahi manerejiruanahi ema Tata. Níjaracahénapa eta etuparahayare, ícuchihi mayehe ema Tata acane te tépanavainapa eta apaquehe.

35 Taicha te ímahanuhi eta nécuavahi, éti énicanuhi. Nu-maunepahi, éti íjaracanuhi néra eta une. Tájina nítcapihahini te nupaisihapahi, éti íjaracanuhi eta nítcapihayare.

36 Tájina numuirihainapahini, éti emuriachanuhi. Nuca-jumahí, éti ípuchapananuhi. Nucaeratahi te cárcel, éti ejirapanuhivare”.

37 Tásicha, ena níchuhaqueneanahi tijicapanuanainapa: “Tata, ¿tájamuhu vímahavihi pécuhapahi, tásicha vénicavipa? ¿Tájamuhuvare vímahavihi pimaunepahi, tásicha víti vésichavipa eta une?

38 ¿Tájamuhuvare vímahavihi te pipaisirana tájina pítécapi-hahini, tásicha, víti víjaracavipa eta pítécapihahi? Váhivare vímahavihini mamuriarevinahini, tásicha víti vimuriachavipa.

39 ¿Tájamuhuvarehipuca picajumahi, tásicha víti vípuchapanavipa? ¿Tájamuhuvarehipuca picaeratahi, tásicha víti véjirapanavipa?” náichanupa.

40 Tásicha, nuti Rey nujicapainavarepa: “Nutupiruva numetacahe: Nútira íjaracanuhi tamutu eta ejapanuraivahi, ímicatasiravacahi ena echamuriana nuchaneranahivare, ena nani namaesachaqueneanahi najacapahini ena apamuriana ena achaneana” níchavacapa.

41 Tásicha, ena tiávihanahi te sapa, níchavacainapa: “Étisera évuisiha te numirahu, eti masuapajirairahana ecaviurevanahi. Eyana tayehe eta yucu, acanevacahéna eta ecaicuñaira eta emuruiraya, máicuchihi ema iáquenuhi ema Váinaraji énapa ena majupahana ángeleanainihi.

<sup>42</sup> Taicha te nécuhapahi, éti vahi íjaracanuhini eta nunica. Numaunepahi, váhivare ésichanuhini une.

<sup>43</sup> Étaripa te nupaisiranapahi, váhivare íjaracanuhini eta nítecapihahini. Néchurihavare eta numuiriha, váhivare íjaracanuhini numuirihainahini. Nucajumahivare, nucaeratavre, váhivare éjirapananuhini” níchavacainapa éna.

<sup>44</sup> Tacache, éna náichanupa: “Tátachicha, ¿táchamuhi vímahavihi pécuhapahi, pimaunepahi, pipairiricaphi, mamuriarevihi, picajumapahi, picaeratahi, eta jácani vimáimicatasirávihipuca?”

<sup>45</sup> Nuti Rey nujicapainavarepa: “Nutupiruva numetacahe: Éti, vahi ejapanunuhini, taicha vahi ájapanuvacahini apaesinahini ena nani nuchanerana emaesachaqueneanahi”.

<sup>46</sup> Emutu éti eyanayare tayehe eta ecaicuñaiyayare máitavacayare. Énasera ena nunerejiruana, matapiravareanahi. Námavacainapa tayehe eta táurivayare eta náitaresira, máitavacayareva.

## 26

*Napanerechaipahi ena tuparairucana eta nacaratasirayare ema Jesús*

(*Mr 14.1-2; Lc 22.1-2; Jn 11.45-53*)

<sup>1</sup> Te titapiricapa eta juca máimiturapianahi, máichahavipa viti máimitureana:

<sup>2</sup> —Écharichuhi éti eta apinarine sache eta Pascuáiraya. Tásiha, nútì Manerejirunuhi ema Viya, ticaratacanuanainapa témetatarecanuanainapa —máichahavipa.

<sup>3</sup> Tiuri, ena tuparairucana énapa ena aquenucarohana, énapa ena escribánoana ticurujicacanaripahi te tajuhe eta mayehe palacio ema Caifás, ema corregidor.

<sup>4</sup> Tacache, náechajisihaipahi eta nacaratasirayare ema Jesús. Navaraha éna navayuacayarehi eta nacaratasirayare, nacapasirayarehi.

<sup>5</sup> Tipicacavanarichuchasera. Ánipa nacahehi eta náechajiruvahi:

—Vuíchaha vicucarataca éma achichu juca piéstairaya. Taicha camurianayarehi ena achaneana, machu tájahapuca náicharacahavi taicha navarahayarehi nacatiucha éma. Vicuchapasera nayana —nacahepa.

*Esu esena tiámasichahi ema Jesús te tájiyequene perfume*

(*Mr 14.3-9; Jn 12.1-8*)

<sup>6</sup> Tacache, ema Jesús, tiyanapa tichava eta te avasarechicha Betania. Náichuhasivahi eta manisiraya te mapena ema achane ticaijare Simón ema leprosoinihi.

7 Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Táetaviuchahi eta tasivachavahi. Supauchapa éma. Sujucusicapa te machuti eta táetaviurehi eta táijiyeva.

8 Eta náimairahi ena nuchamuriana máimitureana ema Jesús, váiparinehi náuricahini eta suémepruresirahi eta tasivachaquene perfume sujucusisirahi ema Jesús. Ánipa nacahehi:

—¿Tájaha tacayema suémeprureca eta juca tasivachaqueñehi perfume?

9 Tiúripanahipucani víjararecahini eta juca táijiyeamaquenehi. Vivehahini eta camuriquene plata; tásicha, vímicatasihahini ena páureana —nacahepa.

10 Émasera ema Jesús máimatihi eta napanereruana. Tacahe, máichahavipa: Ésamirica esu suca esena. Tétavicavahi eta táuriva eta suíchiranuhi.

11 Ena páureanasami, tamutuchucha sácheana eta ecahaneravacayare éna. Ímicatacayarehi te jácani ecaimahaquenérana. Nútisera vahi nánasiquenémahi eta eyehe.

12 Eta juca sujucusisiranuhi eta perfume, sucainapucahi esu eta suíjiyechirahi eta náquehe tayeheyarehi eta nucaebrasirayare.

13 Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

*Eta máijararesirahi ema Júlasi ema Jesús*

*(Mr 14.10-11; Lc 22.3-6)*

14 Ema Júlasi, émarichu vichamurinihi éma vidocenénihi apóstole mayehe ema Jesús. Tiyanapa téchajiripanavahi nayehe ena tuparairucana.

15 Ánipa máichavacahi:

—Te yátupihipuca evarahahi ecarataca ema Jesús, núti nímechaheyare. Nucamunuhisera néchayare ¿áyanayarepuca eta evachachanuyare eta nímechiraheyare eta mávirare? —máichavacapa.

Tacahe, éna náijaracapa eta treinta reale.

16 Jéhevarepasera ema Júlasi matanucaipa eta máicharacayarehi eta máijararesirayarehi ema Jesús.

*Ema Jesús máenimurihana ena máimitureana*

*(Mr 14.12-25; Lc 22.7-23; Jn 13.21-30)*

17 Tacahe, títecápapa eta piesta Pascua, étaripa eta tínapuca sache eta semana vinicahi eta pan mayehere levadura. Viti máimitureana viyaserecapa ema Jesús:

—¿Távihapuca pivarahahi vácajuhe eta vétupirisiasiavahini eta vinisirayare eta uvesachicha eta viyeherepi? —nacahepa.

**18** Éma tivanecahavipa:

—Eyana tayehe eta Jerusalén, te mapena ema nímaticasare. Ani íchayare: “Ema maestro tivanecahavihi eta piyehe. Ani macahehi: Tiánehipa eta nítavirayare eta nématanehi. Te pipena eta nunisihayare eta uvesachicha eta viyeherepi, nénisihayare ena nímitureana” íchayare.

**19** Tacahe, tiyananapa ena máimitureana. Étapaichuhi náichahi eta máimiturapianahi. Tinahacavanapa náetupiricahi eta naniruyare tayehe eta Pascua.

**20** Tacahe, te jena yátiquenehi ema Jesús, ténicahavipa viti dócequeneana máimitureana.

**21** Te vinicaripahi, máichahavipa éma:

—Jéhesareinehi, te etaracu éti, mararihi ema émana tíjararecanuyare —máichahavipa.

**22** Tacahe, víti ichaperinehi eta máimipanereresirahavihi eta juca máichirahavihi. Vimutu viyaserecapa éma:

—¿Nútichupuca, Tata, jácani? —víchavacapahi víti éma.

**23** Tásicha, éma máichahavipa:

—Mácani néniruyare eta pan néchipaejiruhi te juca nuplatura, émara ema tíjararecanuyare.

**24** Tacahe, núti Manerejirunuhi ema Viya, étapaichuhi eta nacapasiranuyarehi, táitauchiravayarehi eta nuyehe eta táchajiriruvahi eta Sagrada Escritura. ¡Páuresamisera ema tíjararecanuyare! Tiúripanaichuhipucani vahi macuchucahini te sujuhe esu maena —máichahavipa.

**25** Tacahe, téchajicapa ema Júlasi:

—Maestro, ¿nútiguca jácani níjararecaviyare?

Tásicha, ema Jesús majicapapa:

—Pítisami —máichapa.

*Ema Jesús tímechahavi eta macaejasiraya eta matratune arairu mayehe ema Maiya*

*(1 Co 11.23-26)*

**26** Tásicha, eta vinisirahi, mavehapa eta pan ema Jesús. Mahasulupayachapa ema Viya. Mayuvetucapa, tíjaracahavivacapa viti máimitureana. Tásicha, máichahavipa:

—Eta juca neche. Enica —macahepa.

**27** Tacahe, mavehavarepa eta vasu vérirare, mahasulupayachavarepa ema Viya. Tásicha, tíjaracahavivare. Máichahavipa:

—Era eta juca ámutu éti.

<sup>28</sup> Taicha eta juca eta nítine, táepusiruvayare eta nucaepha-rayare eta epecaturana emutu eti achaneana, esimutu-queneyarehi. Étarichuvare táicutiarayare eta nufirmachirayare eta arairu matratune ema Vicaiyaquene, nucaejasirayava eta matratune apaesa ámutu ejacapacare mayehe.

<sup>29</sup> Nutupiruva numetacahe: Vaipa nápechavaimahi nérahi-varéni eta juca tachi eta uva. Tiámainucava te táitauchavapa eta nusiapiraya eta nucavacuréraya, nucajupahairaya ema Tata Nucaiyaquene. Te jena sache, níjaracaheya vérainapa eta aramaruama. Vicajupahainapa ema Tata.

*Ema Jesús máimereucha ema Pedro tépiyacavayare vahi máimati ema Jesús*

(*Mr 14.26-31; Lc 22.31-34; Jn 13.36-38*)

<sup>30</sup> Tásicha, eta vítanesirapa, vijirapa eta jirasare eta vihasulupayachirahi ema Viya. Te vítapiricapa, viyanapa vicaijuhe eta te huerta Getsemaní távihahi eta táemiripaisinehi eta cerro ticaijare Olivoquiji.

<sup>31</sup> Eta vipaisirapahi, ema Jesús máichahavipa:

—Puiti juca yati ejunijicanuyare emutu éti. Ejunaracayare. Tásicha, títauchavayarehi eta máechajiruvahi ema Tata eta te Sagrada Escritura: “Nísapayare nacarataca ema Pastor, nacapasirasamiyare. Tásicha, tijunaracanainapa eta uvesana macurujiruanainihi” macahepa.

<sup>32</sup> Téhesera te néchepucapa te nécarí, nínapucainapa te Galilea. Ánaqui nucuchapiaheyare éti —máichahavipa ema Jesús.

<sup>33</sup> Tásicha, ema Pedro majicapapa:

—Tayanapanepuca, Tata, najunaracapuca ena apamuriana, nútisera vahi nujunaimahi —máichapa.

<sup>34</sup> Ema Jesús máichavarepa:

—Nutupiruva numetacavi piti Pedrosami: Puiti juca yati, te tamirahuinapaichaha eta táechajisirayare eta varayu, mapape eta pépiyasiravayare vahi pímatinu —máichapa.

<sup>35</sup> Ema Pedro macahevarepa:

—Tayanapanepuca pímicapacanu, váhiquenesera népiyacavaimahi vahi nucuimativihini, váhivare nínajiacavimahi —máichapa.

Viti apamuriana étarichuvare tacahehi eta véchajiruvahi.

*Ema Jesús tiyujaraca te Getsemani*

(*Mr 14.32-42; Lc 22.39-46*)

<sup>36</sup> Te vítecapapa víti tayehe eta huerta Getsemani, máichahavipa ema Jesús:

—Éjacachaha eta ani te juca. Ecuchapanuchaha. Núti nuyanayare ánaquipana, nuyujaracayare —macahepa.

<sup>37</sup> Mapananaichu ena mámaqueneanahi: ema Pedro, ema Juan émapa ema Jacobo. Ema Jesús, ichape eta máeñamiravahi te masamure, ticatisamurevapa.

<sup>38</sup> Tásicha, máichavacapa:

—Tétavicava eta táeñamirava muraca eta nusamure. Tavaraha ticapacanu. Ácahéchaha ani te juca. Váhisera ecuimaca. Ecauneuchanuhi —máichavacapa.

<sup>39</sup> Tásicha, tipapanapa ánaquipanachíchahi. Tiáquipaicavapa máetipaisinapa, macaitecapa eta mamira te apaquehe. Eta mayujarasirahi, ánipa macahe:

—Tátachicha Nucaiyaquene, picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera núti eta nítouchiraya eta pivarahaquenehi píti —macahepa.

<sup>40</sup> Tásicha, téchepucapa. Tichavapa eta te návihahi ena mapanaqueneana máimitureana. Máimaharinehi éna, tímacanaripa. Macajamicapa ema Pedro. Tásicha, máichapa:

—Váiparinehi ímicatacanuhini ejaneacavahini étanainahipucaini hora ácahehini.

<sup>41</sup> Éjamiuchava. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

<sup>42</sup> Tásicha, tiápechavavarepa tiyanavarepa ema Jesús. Apichepa eta mayujarasirahi. Ánipa macahe:

—Tátachicha Nucaiyaquene, váhini tacuitauchavaini eta níchavaquenevayare. Tásihasera, níjaracava núti eta nítouchiraya eta pivarahaquenehi puiti. Nísapava nacapacanu —macahepa.

<sup>43</sup> Tásicha, tichavavare eta viyehe viti máimitureana. Tíma-hahavipa víti vímamurihaipa taicha taveharipa eta ichapu eta viúquihana.

<sup>44</sup> Tacache, mapahequenepa tichavapa tiyujarapana. Étarichuhi eta máechajiriruvananahi.

<sup>45</sup> Te tichavapa, téchajicahavipa:

—¿lápêchavapa ímaca? ¿Vuíchahapuca enaracahini? Jéhesare, puiti títecápapa eta nutuparahahi nacaratasiranuyare ena ticatianacanuanahi.

<sup>46</sup> Ávane ema tíjararecanuyare. Échepuca. Viyana viácapavaca —máichahavipa.

*Nacaratacapa ema Jesús  
(Mr 14.43-50; Lc 22.47-53; Jn 18.2-11)*

<sup>47</sup> Téchajiricavaichaha ema Jesús, macahepainecha ema Júlasi, ema vichamurinihi. Mámamurihaipaipahi ena camuri-queneana achaneana suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena aquenucarahana.

<sup>48</sup> Ema Júlasi, tatiarihihi eta máicutiarayarehi eta náimatirayarehi ena suntaruana ema Jesús. Ani macahehi eta máechajiriruvahí ema Júlasi:

—Ecunenuyare. Ema nétsrereruyare, éma ecaratacaya —macahepa.

<sup>49</sup> Tacahe, ema Júlasi témeñahavapa mayehe ema Jesús. Máichapa:

—Yátiheipa, tata Maestro —máichapa.

<sup>50</sup> Tásicha, mágétserarecpa. Ema Jesús majicapapa:

—Piti nímiturevihi, ¿tájaha tímitecavi? —máichapa.

Tásicha, ena suntaruana enevanepa nacaratacahi, napresuchapa.

<sup>51</sup> Ema émana vichamuri mavehapa eta mayehe espada. Mayuchatipaisinapa eta machaca ema mamusura ema aque-nuca Caifás.

<sup>52</sup> Tásihasera ema Jesús macatiuchaichucha. Ánipa maicha:

—Pinaca te tatumaramuhi eta piyehe espada. Taicha namutu nácani ticaparecanahi tayehe eta espada, énerichuvare nacaheyare, espada eta ticapacayare.

<sup>53</sup> Váhipuca pecha te návarahahini nútì nuyaseacahini ema Tata, puítinaichuhini macucupaicahini ena 80,000queneana ángeleana.

<sup>54</sup> Váhisera nuvaraha nuyaseaca. Tatuparacahi títauchavayarehi eta táechajiriruvanahi eta Sagrada Escritura eta níchavaquenevayarehi —tásicha, máichavacapa ena suntaruana—.

<sup>55</sup> ¿Tájaha tacayema ecasiña eta espada, ecaepuchiriquipai-pahivare eta ecaratasiranuyare, tímicutijiricavapa námerahihini? Étayapasica cape juca tamutuhi sácheana nucachanehehi nímitungahehi tayehe eta Templo. Váhivare epatsicavahini ecaratacanuhini.

<sup>56</sup> Títauchavahisera tamutu eta juca taicha tacahehi eta náechajiriruvahí ena profetanaini, tayehe eta Escritura táechajisihairanuhi —macahepa.

Tacahe, viti máimitureana vimutu vijunaracapa, vinaquicapa ema Jesús.

*Nacatupihapa ema Jesús te namirahu ena tuparairucana  
(Mr 14.53-65; Lc 22.54-55, 63-71; Jn 18.12-14, 19-24)*

<sup>57</sup> Ena ticaratacanahi ema Jesús námapa te mamirahu ema Caifás, ema corregidorhi te jena áñohi. Natiarihivare ena escribánoana énapa ena aquenucarahana.

<sup>58</sup> Ema Pedro, máehiequenehapahi, mayerehipahisera. Te náimisiapapa, tisiapavarepa éma te tajuhe eta canchón mayehe ema Caifás. Téjacaipahi macachanevacaipahi ena suntaruana, mavarairahi máimahayarehi tájahapuca eta náicharacayarehi ema Jesús.

<sup>59</sup> Tacache, ena tuparairucana énapa ena aquenucarahana natanucaipahi ena tépiyaequenehanayarehi ema Jesús, navarairahi tatiarihiyarehi eta tiviuchayarehi eta máepenirayare.

<sup>60</sup> Váhisera náichimavahini, camurianahinéni ena tépiyaequenehanahí. Tisiapananechasera ena apinana tépiyaequenehanayarehi.

<sup>61</sup> Ánipa nacahe:

—Ema maca achane visamahi víti eta mavarairahi máquipaica eta Templo mayehe ema Viya tacapicahuquenehi. Tásiha, máimichavayarehiji macaechepuca te mapanaquenenaji sache —nacahepa.

<sup>62</sup> Tacache, ema corregidor téchepurucainehi. Mayase-recapa ema Jesús. Ánipa maicha:

—¿Tájaha tacayema vahi pijicapavaca ena nani eta pépiyaequenehi? ¿Yátupipuca eta nacayemaquenehi? Taicha vímahavi vahi picatiuchavahini —máichapa.

<sup>63</sup> Émasera ema Jesús vahi majicapavacahini. Tásiha, mápechavare mayasereca ema corregidor:

—Pímaha puiti, nuyaserecavyare. Vahi nuvaraha pépiyahirahi. Némechavi máimahavihi ema Viya. Pátupiruva pimeta-cahavi te yátupihipuca pítiquenehi Cristo, Machichaquenevihi ema Viya —máichapa.

<sup>64</sup> Tacache ema Jesús majicapapa:

—Yátupi núti Cristonuhi. Nuti Manerejirunuhi ema Viya. Tásiha, numetacaheyare eta apana. Járajapaya eta sácheyare ímahanuyare eta néjasirayare te mavaure ema Viya máitupajijiáruvaquenehi. Ímahanuyareva núti eta núcupsirayareva násihairayare te anuma, támiranuyarepahi eta úcaji —macahepa.

<sup>65</sup> Tacache, ema corregidor eta masamirahi, tisemarinehi ichape. Tivetsayujiacavapa eta mamuiriha eta masemanevahi. Tásiha, macahepa:

—¡Tétavicavaipa eta maviurevahi ema maca taicha macaechahihi ema Viya! ¡Puiti émaquenepa visama éma tépiyacavahi Machicha ema Viya! ¡Váipa tácamesa vitanucahini ena

testígoanainahini! ¡Puiti esamaripa éti eta juca macayemaqueñehi!

<sup>66</sup> ¿Tájaha vícharacayare puiti ema maca? —macahepa.

Tásicha, najicapapa éna:

—¡Ticaviurevapa! ¡Étaina táimicapaca! —nacahepa.

<sup>67</sup> Tacache, náehavacapa ema Jesús. Nátutuquichapa.

Náehamirahavare.

<sup>68</sup> Tásicha, náichapa:

—Vímahasejicacha, te yátupihipuca pítihí Cristo. Te pijarauquipuca, pímatihaviyare nájahahipuca ema téhamirahavíhi —nacahepa.

*Ema Pedro tépiyacavapa vahi máimati ema Jesús*

(*Mr 14.66-72; Lc 22.56-62; Jn 18.15-18, 25-27*)

<sup>69</sup> Tiuri, ema Pedro, matiarihichahahi eta te canchón. Téjacaipahi tiásacavahi. Tacache, sucahepaipahi esu mavanara ema corregidor. Suímahapa éma. Tásicha, suíchapa:

—Németeaca pítirichu ñímiture eñi Jesús eñi ticavasahi te Galilea —suíchapa.

<sup>70</sup> Émasera majicapapa:

—Vahi nímati ema péchajisihaquenehi. ¿Távihapuca pímati-nenuhi pítí? —máichapa.

<sup>71</sup> Tásicha, mavarahapa tiúchucavaneyarehini. Suímahavare esu apana vanaraca. Suíchavacapa ena natiarihiqueneanahi:

—Eñi ñica achane éñirichu ñichamuri eñi Jesús Nazareno. Nímahahi ñicachanepahi —suíchavacapa.

<sup>72</sup> Tiápechavavarepa ema Pedro téchajica, ánipa macahe:

—Nujuracha te emirahu. Váhiquene nímati ema píchaquenehi —macahepa.

<sup>73</sup> Te tiyererehachichavarepa, náimahavarepa ena apamuriana. Náichavarepa:

—Yátupiquene pítirichu machamuri ema maena Jesús, taicha eta péchajisira éta tímereuchavihi —náichapa.

<sup>74</sup> Tásicha, macahevarepa:

—Máicuñacanuine ema Viya te vahi nucucaehe yátupina. Váhiquenesera nímati ema achane échajisihaquenehi —macahepa.

Tásicha, enurujipa téchajicanecha eta varayu.

<sup>75</sup> Te masamapa eta varayu, enevanepa máechahi ema Pedro eta máichirahi ema Jesús: “Te tamirahuinapaichaha eta taechajisirayare eta varayu, píti mapahayare eta pépiyacavayare vahi pímatinu”. Tásicha, tiúchucavanepa ema Pedro. Tíyahavanepa taicha máimativanepa eta táichapevahí etá máejecapiravahí.

**27**

*Námapa ema Jesús te mamirahu ema Pilato  
(Mr 15.1; Lc 23.1-2; Jn 18.28-32)*

<sup>1</sup> Te tijararahipa, tiúrujicavanapa namutuyaréni ena tuparairucana énapa ena aquenucarahaná. Ticaechacasipa eta náimicapasirayarehi ema Jesús.

<sup>2</sup> Nacuchucapa ticaitihapaipa eta námirapahi te mamirahu ema Poncio Pilato, ema aquenucahi prefectohiquene.

*Eta macapasiravahí ema Júlasi*

<sup>3</sup> Tacalhe, ema Júlasi eta máimairahi eta táichapevahí eta macatajivairahi ema Jesús étapa eta nacapasirayarehi, ichaperinehi ticatisamurevahí taicha eta máejecapiravarihi. Tiyanapa máimichavapanahí eta treinta reale eta plata mavachahí nayehe éna.

<sup>4</sup> Tásiha, máichavacapa:

—Néjcapavahí ichape eta níjararesirahi ema maca achane matapiravarequene. Nuvaraha nímichavaya eta nuvachainihi —máichavacapa éna.

Énasera najicapapa:

—Jéhepuca, vahi vecha víti. Péchaquenevaichuhí píti —náichapa.

<sup>5</sup> Émasera ema Júlasi máquijimirauchavacapa eta te tajuhe eta Templo návhahí éna. Tásiha, tiúchucapa. Tiyanapa. Táichavenehi eta macatisamurevairahi, tichumucavapa.

<sup>6</sup> Ena tuparairucana navehapa eta plata. Tásiha, nacahepa:

—Vahi táuricahini víyaracuhahini eta juca plata tayehé eta caja vinaquisirareva taicha mavachaequeneyá eta máepenirayarehi ema maca achane —nacahepa.

<sup>7</sup> Tásiha, eta plata máimichavaquenehi ema Júlasi, napane-rechaipa eta navacharesirayarehi eta apaquehe nacaecarasirareyare ena apavasanana. Eta juca apaquehe naseresirarehi ena típua recarahaná eta yupi.

<sup>8</sup> Puiti éta ticaijarehi “Apaquehe máitinevacha ema Jesús”.

<sup>9-10</sup> Tacalhehi eta táitauchiravahí eta májurehi ema víyarahá profetaini Jeremías. Ani tacalhehi: “Navehapa eta treinta reale eta plata. Ena tuparairucana navacharecapa eta apaquehe nayehe ena típua recarahaná. Tacalhe eta juca mame tasiranuhi ema Viya eta náichirayarehi eta juca” machepea ema víyarahaini Jeremías.

*Ema Pilato mayaserecapa ema Jesús*

*(Mr 15.2-5; Lc 23.3-5; Jn 18.33-38)*

<sup>11</sup> Ema Jesús ticayaserehipa te mamirahu ema aquenucahi Pilato. Ánipa macahe eta mayaseresirahi:

—¿Jéhesareji réyvihi píti nayehe ena pijaneanana israelítana?  
—máichapa.

Ema Jesús majicapapa:

—Pitupiruvahi eta juca piyaseresiranuhi. Yátupihi eta nurreyvahí —máichapa.

<sup>12</sup> Tásihasera, te nametauchaipa ena tuparairucana, vahi majicapavacahini ema Jesús.

<sup>13</sup> Tacahe, ema Pilato máichapa:

—Vahi péchajichava eta juca nametauchiravihi? Camurihi eta pivirevana eta nayehe —máichapa.

<sup>14</sup> Émasera ema Jesús váhiquene majicapahini. Tásiha, ema Pilato máramipa eta mamajicapirohi. Váipa máitucacarehini.

*Ema Pilato macavanairipipa eta náetatasiraya ema Jesús  
(Mr 15.6-15; Lc 23.13-25; Jn 18.38-19.16)*

<sup>15</sup> Tiuri puiti, tatiarihi eta mayeherepi ema Pilato, te Pásquamuahuana, macaiticayarehi ema émana preso, mácani nayasearuyarehi ena achaneana.

<sup>16</sup> Tiuri, matiarihi ema achane ticaijare Barrabás, ichape eta maviurevahí.

<sup>17</sup> Eta náurujisiravahí ena achaneana, mayaserecavacapa ema Pilato:

—¿Nájahapuca ema eyasesereruyare ema nucaituruya?  
¿Émapuca ema Barrabás, téhesera émapuca evaraha nucaitica ema Jesús, ema ticaijare Cristo —máichavacapa.

<sup>18</sup> (Taicha máimaticaripahi eta nametauchahí ema Jesús ena tuparairucana taicha nacapinaruhi éma.)

<sup>19</sup> Eta máejasirahi ema Pilato tayehe eta mávacure, suímitemarecaba esu mayena: “Vahi picuimisiapava ñiyehe eñi ñira achane matapiravare taicha yati tametasiranuhi eta nuvapure eta ñíchararacavayare éñi” sucahepa.

<sup>20</sup> Énasera ena tuparairucana énapa ena aquenucarohana náimitumurihana ena achaneana nayaseserecahi ema Barrabás, émainahini máuchucuha. Tásiha, nayaseserecaba máepenahini ema Jesús.

<sup>21</sup> Máechajimurihavarepa ema Pilato, mayaserecavacapa:

—¿Nájahasica ema evarahaquenehi nucaitica? —macahepa.

Éna najicapapa:

—¡Émaina máuchucuha ema Barrabás! —nacahepa.

<sup>22</sup> Ema Pilato mayaserecavarepa:

—¿Tájahasica nícharacaini ema Jesús ticaijare Cristo?

Éna najicapapa:

—¡Pémetatareca te crusu! —nacahepa.

<sup>23</sup> Ema Pilato máichavacavarepa:

—¿Tájaha tacayemahi eyaseacahi eta németatasiraya ema maca? ¿Tájahasica eta maviurevahí? —máichavacapa.

Énasera tipiararemurihanavare muracapana:

—¡Pémetatareca te crusu! —nacahepa.

<sup>24</sup> Tacahe, máimahaha ema Pilato eta vahi máiturucahini macatiuchahini, taicha ena achaneana tivayuchava-paichucha eta nasemanevanahi. Tacahe, máemepanapa eta une, ticasipavahupa te namirahu ena achaneana. Tásicha, máichavacapa:

—Nuvaraha nímerecava te emirahu vahi nútiparacaina eta máepeñiraya ema maca achane matapiravarehi. Éti échinava-yarehi —máichavacapa.

<sup>25</sup> Tásicha, najicapapa namutu ena achaneana:

—Vítinarine vicatapirava, énapa ena vichichanaveana. Vítinarine taeha eta máepeñiraya ema maca achane —nacahepa.

<sup>26</sup> Tacahe, ema Pilato macavanairipipa nacaitica ema Barrabás. Tásicha, macavanairipipa náestaca ema Jesús; tásicha náetatacayarevare te crusu.

*Nacavayuemarajipa ena suntaruana ema Jesús  
(Mr 15.16-20; Jn 19.1-3)*

<sup>27</sup> Tásicha, ena suntaruana námapa ema Jesús tayehe eta náestasihayarehi te távirarehi eta guardia. Nachayacapa ena camuriqueneana suntaruana náumurivana.

<sup>28</sup> Navejamuhiacapa eta mamuiriha. Namuriachapa eta muíriare títsime.

<sup>29</sup> Náitsamemacapa eta itapepi eta majorapiyarehi náicha. Nanacavarepa te machuti. Náimicaratacavarepa eta curina te mavahu vaure, matsucurúpayarehiji. Eta nacavayuemarajirahi, náepuyumirauchapajicacha. Ánipa nacahe:

—Tata, ¡pítitataji nayehevihíji Rey ena israelítana! —náichapa.

<sup>30</sup> Tásicha, nátutuquichapa. Náetetuvauchapa eta matsucrupahí, náepuchisicapa tayehe.

<sup>31</sup> Te tamutupa eta nacaecahijirisirahi, navejamuhiacavarepa eta mamuiriha títsime. Namuriachapa eta mamuirihaichu. Tásicha, námapa tayehe eta macaetataiyayarehi.

*Náetatacapa ema Jesús te crusu  
(Mr 15.21-32; Lc 23.26-43; Jn 19.17-27)*

<sup>32</sup> Eta napaisirapahi te calle, nácapajicapa ema achane ticaijare Simón ticavasahi te Cirene. Napamicapa éma manaracuha eta macurusura ema Jesús.

<sup>33</sup> Tacahe, nacaitecapapa tayehe eta masihi nacaetatairare ticaijare Gólgota.

<sup>34</sup> Ánaquipa náesichinehi ema Jesús eta vino tisucareama ticasiriquiamá etá ipuruji. Te masamaecapa ema Jesús, vaipa mávarahahini máerahini.

<sup>35</sup> Te náitauchapa eta náetatasirahi ema Jesús, ena suntaruana nasuertehachapa eta mamuiriha etá náijarajirisracacahi. Tacahehi etá táitauchiravahi etá májurehi ema víyarahaini profetaini David. Ánipa tacahe: “Tíjarajiricacanapa etá numuirihaini. Nasuertehachapa etá náijarasircacairahi”.

<sup>36</sup> Tásicha, najaneacapa ema Jesús ena suntaruana.

<sup>37</sup> Te tápusi etá macurusura, tatiarihihi etá ajureca táchajisihihi etá tiviuchahi. Ani tacahehi etá ajureca: “Ema Jesús, Rey nayehe ena israelítana”.

<sup>38</sup> Natarihihivare ena apinana tiámerahiana. Ticaetatanahivare te machacaya, ema émana te mavaure, ema apana te masapa.

<sup>39</sup> Tásicha, ena tiánucumirauchanapahi, tépiupiusicavanaughpaipa etá nacaecahirapaipahi éma.

<sup>40</sup> Ánipa nacahe:

—¡Pítitataji! Picahechajiriruvahi etá piáquipaisirayarehíji etá Templo, pirátahahivaréji pímichava picatupiha etá arairu Templo te mapanayarerichuhíji sache. Puiti vivaraha vímaha etá pítupajijiasiravahi, te yátupipuca Machichavi ema Viya. Piúcupaica te jara crusu. ¡Picatiuchava pítijivaina! —náichapa.

<sup>41</sup> Énerichuvare ena tuparairucana nacaecahijiricavare, énapa ena escribánoana énapa ena fariséoana, énapa ena apamuriana aquenucarahaná. Náichajiricacapa:

<sup>42</sup> —Ema mácacacha, macahehi etá máechajiriruvahi etá marátahairahíji macatiuchavaca ena apamuriana achaneana. Tásicha, puiti váhivare marátahairahini émajivahníni macatiuchavahini etá te jara mávihahi. Te yátupinahíni Réyinaíni viyehe viti israelítana, macatiuchavaipahini, ¿masi? Máucupaicaripahini te jara crusu, ¿masi? Visuapasarepaini etá vímairainahini.

<sup>43</sup> Téhevare te yátupihipuca ticasíñavahi me Viya, vivaraha vímaha macuchucuha éma puítinaríchu, te yátupihipuca máemunacahi éma. Taicha macahehi etá máechajiriruvahi etá machichairahi ema Viya —nacahepa.

<sup>44</sup> Ena tiámerahiana ticaetatanahivare te machacaya, énerichuvare nacaecahivare éna apanavare.

*Eta máepenirahi ema Jesús*

*(Mr 15.33-41; Lc 23.44-49; Jn 19.28-30)*

<sup>45</sup> Tacahe, te las dócequenepa, témahapa etá sache. Timapicupa tamutu etá apaquehe. Mapana hora etá tamapicuirahi.

46 Tásicha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaque! ¡Tata Nucaiyaque! ¡Vahi picujuni-jicanu!”

47 Tacahe, ena natarihiqueneanahi ena tisamanahi, ánívarepa nacahe:

—Esama ema maca achane mapiaracahi ema víyarahaini profeta Elías —nacahepa.

48 Ema apava tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca ema Jesús, machuchujicayarehi.

49 Énasera ena apamuriana, ánívarepa nacahe:

—Ésamiricachucha. Vímahayare te títecipayarepuca macatiuchapana ema Elías —nacahepa.

50 Tásicha, tiápechavavarepa tipiaraca muraca ema Jesús. Tásicha, tépenapa.

51 Tásicha, tíjahúchavapa tétsayumecapa eta cortina tayehe eta Templo. Tépanava te anuquehe, tichecuha te apaquehe. Tiyayacarepa eta apaquehe. Étaripa eta ichapepuhiqueneana mari téjepuichavacavare.

52 Étaripa eta ecariana téjiacavacapa. Téchepucanavarepa ena náepenaqueneana ena tisuapajirahianahi mayehe ema Viya.

53 Tásicha, te mapanaquenepa sache, téhevare te táequenepa eta máechepusirahi ema Jesús te máecari, éna apanavare tiúchucanapa tayehe eta náecariana. Tásicha, tisiapanapa tayehe eta avasare Jerusalén. Tichavanapa te napenana. Ichapemurianahi ena achaneana tímahanahi éna.

54 Tacahe, ena tijanearecanahi, émapa ema nacapitara, te náimahapa eta tayayacarevahí eta apaquehe, étapa eta apamuriana tiáramicareanahi, ichaperinehi eta napisirahi. Tásicha, nacahepa:

—Yátupiquenerichuyapa Machicha ema Viya ema maca —nacahepa.

55 Natarihihivare ena camuriana esenana. Tímararacanahi te tiyerehi. Ena nani esenana, éna téhicanahi ema Jesús. Téchapajiricanapahi ema Jesús eta mapaisirapahi te másihapa te Galilea.

56 Nacarichusera ticajuanahi eta náijaruana esu María Magdalena, ésupa esu apava María, maena ema José émapa ema Jacobo. Sutiarihivare esu mayena ema Zebedeo, náena ena nuchamurianahi ema Juan émapa ema Jacobo, apóstoleanahi.

*Nacucupaicapa te crusu ema Jesús, náecarayarepa  
(Mr 15.42-47; Lc 23.50-56; Jn 19.38-42)*

<sup>57</sup> Matiarihivare ema achane rico ticaijare José. Ticavasahi te avasare Arimatea. Émarichuhi téhicahi ema Jesús.

<sup>58</sup> Te capererehipa, eta máimairahi máepeniraipahi ema Jesús, tiyanapa mayehe ema Pilato. Mayaseapanahi eta máquehe ema Jesús, mavarairahi máecarayare. Tacahe, ema Pilato macavanairipipa náisapahini eta náecarairaya.

<sup>59</sup> Nacucupaicasarepa eta máquehe ema Jesús tayehe eta crusu. Náyuruacapa tayehe eta tijapuquene sávana.

<sup>60</sup> Nanacapa tayehe eta máecari máemepiyareruhi máecariyahini ema José. Eta juca ecari, nasecajueruhi eta mari. Nájihachapa tayehe eta tajitacarequene márime. Te náitauchapa, tiyananapa.

<sup>61</sup> Esu María Magdalena, ésupa esu apana María, téjacanahi éna, náimrararacaipahi eta ecari.

*Ticavanahianapa ena suntaruana najaneaca eta ecari*

<sup>62</sup> Tásicha, te apanapa sache tiyananavarepa ena tuparairucana mayehe ema Pilato.

<sup>63</sup> Náechajicapa ema Pilato. Ánipa nacahe:

—Tímitecahavihi, tata, vimetapanavi eta máechajiriruvahi ema Jesús te achancerichaha eta máechepusirayarehiji te máecari te mapanaquenénapaji sache.

<sup>64</sup> Puiti, vivarahahi picavanairipihini náeratahini muraca eta tapaja eta máecari, mapanainavare sache eta najaneasirayare ena suntaruana. Machu nayana te yati námechapana eta máquehe ena máimitureana. Machu nácaheriana “Téchepucaripa te máecari”. Tásicha, ena achaneana nasuapainapapuca, náimijachainapa yátupi. Tisuapacarepanainapapuca tayehe eta máichaqueñeanahi te achancerichaha —náichapa.

<sup>65</sup> Ema Pilato máichavacapa:

—Tiuri, níjaracahé ena nusuntarurana. Eyana iama. Evaneca najaneacaquenéna. Nachujichaquenéna muraca eta máecari —máichavacapa.

<sup>66</sup> Tacahe, tiyananapa nachujichapa muraca eta ecari. Nanacapa eta táicutiaranayarehi. Tásicha, najaneacahi ena suntaruana.

## 28

*Eta máechepusira ema Jesús te máecari  
(Mr 16.1-8; Lc 24.1-12; Jn 20.1-10)*

<sup>1</sup> Te apanapa sache te tijararahichichapa eta lumíncuquenehi, tiyanapa esu María Magdalena, sucachanehi esu apana María, náimahapanayarehi eta ecari.

<sup>2</sup> Tíjahúchavapa tiyayacarehi eta apaquehe. Émahi ema ángele eta máucaupaisirahi te anuma. Te máitecapauchapa eta ecari, máequehepuichapa eta mari tajihainihi eta máecari. Máejahamecasa eta mari.

<sup>3</sup> Tétavicava eta majaraivahi, tivayuhauquirahi. Eta mamiriha, tétavicavavare eta tajapuva.

<sup>4</sup> Eta náimairahi ena suntaruana, tiáquipapaicavanapa, tiyayacareanapa eta napisirahi. Tiánehini tépenaracana.

<sup>5</sup> Tásicha, ema ángele máechajicavacapa ena esenana. Ánipa macahe:

—Vahi ecupicanu. Núti néchahi eta etanusirapahi ema Jesús ema macaetataquenénihi.

<sup>6</sup> MÁjinaipahi eta te tajuhe eta máecari. Téchepucaripahi taicha tacachehi eta máechajiriruvahi. Yare, ímaha eta juca mávinénihi.

<sup>7</sup> Eyana púitinarichu, emetapanavaca ena echamurianahi máimitureana eta máechepusiraipahi tayehi eta máecari. Énerichuvare emetacavaca tiyanayare ema Jesús eta te Galilea. Ánaqui macuchapiaheyare emutu éti. Eta tímitecanuhi núti numetapanahayarehi —máichavacapa.

<sup>8</sup> Tacahe, ena esenana tiyananapa tichavanahí tijunaparacanapaipa eta nametasirayarehi ena nachamuriana. Tipicanapaipa, tásihasera tacachanepahi eta náurisamurevapahi ichape.

<sup>9</sup> Eta najunapirapahi, tíjahúchavapa tímerecava ema Jesús eta nayehe. Máechajicavacapa. Témeñahavanapa éna eta mayehe. Tépuyucanapa natsiucapevachapa.

<sup>10</sup> Éma máichavacapa:

—Vahi ecupicanu. Eyana emetapanavaca ena apamuriana echamuriana nímitureanahi. Eyanayare emutu te Galilea. Ánaqui nucuchapiaheyare —máichavacapa.

### *Eta nametarapihanahi ena suntaruana*

<sup>11</sup> Eta najunapirapahi ena esenana, ena suntaruana tijanearecanainihi tiyananapa éna, nametapanavacayarehi ena tuparairucana tamutu eta náimahaqueneanahi.

<sup>12</sup> Tacahe, ema corregidor ticurujiricapa namutu ena apamuriana aquenucarahana, mavarairahi téchajiricavana napanerechayare eta náicharacavayarehi. Jéhesare, navachachavacapa eta camuriqene plata ena suntaruana.

<sup>13</sup> Tásicha, náimitucavacapa, ánipa náicha:

—Te natarihinapuca nayaserecahe, ecaheyare: “Tiyananahí ena máimitureana ema Jesús te yátimuhu; námechapanahi eta máquehe. Ticamapuravanahi eta vímasirahi víti” ecaheyare.

<sup>14</sup> Émaripa ema aquenuca te máechapuca, vímaharinepa víti. Vitanucayare eta vivayuarasirayare, apaesa tacuija eviurevaina éti –náichapa.

<sup>15</sup> Tacahe, ena suntaruana najacapapa eta plata navachahi. Tiyananapa. Jéhesare, étapaichuhí náechajisihapahí eta náimitucasivahí. Puíticha, ena israelítana, tanasirichuhí tacahehi eta nametarapi, te natarihi ena tiyaserecana.

*Ema Jesús mavanemurihapa ena máimitureana eta náimituresihaya te tamutu avasareana*

*(Mr 16.14-18; Lc 24.36-49; Jn 20.19-23)*

<sup>16</sup> Ene tacahehi eta viyanirahi víti óncequeneana apóstoleana tayehe eta Galilea te cerro taicha tacahehi eta mametarapihi éma Jesús.

<sup>17</sup> Tacahe, te vímahapa ema Jesús, vépuyumurihavanepa. Vimutu vitsiucapa. Natarihisera ena vuúchaha nasuapapajicahini.

<sup>18</sup> Tásiha, ema Jesús témeñahavapa eta viyehe. Máichahavipa:

—Ema Tata te anuma tituparacanuhi núti néchayare tamutu te anuma étapa te juca apaquehe.

<sup>19</sup> Eta tacahe, eyanayare puiti epaicayare tamutu eta avasareana. Ímitucayare ena achaneana, nuchaneranaina éna apanavare. Ícachasicavacayarepahi te máijare ema Tata, nútipa nuti Machicha émapa ema Espíritu Santo.

<sup>20</sup> Ímitucayareva eta nasuapiroaina éna apanavare tamutu eta nímiturapianahi eta eyehe. Núti, tayanapané nuyerehehi, nímicatacaheyaresera. Níjaracahénapaipa eta nítupajijiásirava. Tamutu sácheana nucachanehevacayarehi. Váhiqene nujunijiacahéimahi —máichahavipa.

Tamutupa eta juca nájuchaquenehi eta nímhahuquenehi nuti Mateo.

## **Ema San Marcos májuequenehahi eta máichararacavahi ema Jesucristo, ticaijare puiti eta**

### **EVANGELIO SEGÚN SAN MARCOS**

1-3 Nuparapenaveana, puiti nuvaraha numetacahe eta máitaresirahi ema Jesucristo, Machicha ema Viya, te títecapauchahavipa te vitaracu. Ichaperinehi eta viúricacarevahi puiti taicha eta mametasirahavihi eta táurinaquenehi máechajiruvana ema Viya.

Ánaquiaparipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanesirayare ema Machicha te juca apaquehe. Éma, tímitecahi ticatiurahiyarehi. Énerichuvare matiarihiyyareva ema apaña achane máichuhaqueñeyarehi ema Viya. Macametarairuyarehi, máetupiricavacayare ena achaneana, náinajisirayarehi eta tamauriqueneana napanereruana apaesá táuri eta najacapirayare ema Machicha ema Viya.

*Ema Juan Tícachasiricarahi tépanavapa ticametarairu eta máechajiriruva ema Viya nayehe ena vámahicuruuhana*

*(Mt 3.1-12; Lc 3.1-9, 15-17; Jn 1.19-28)*

4 Tiuri, te táequenepa eta juca, camuriquenehi áñoana, tiúchucapa ema achane ticaijare Juan. Éma, máichuhaqueñeyarehi ema Viya eta macametarairuirayare, máetupiricavacayare ena achaneana. Tacache, masuapahi eta matuparahahi. Tiyanapa vámahicuruuhapa. Vaipa avasarecuruhainaini. Ticametarairupaipa nayehe ena macutiqueneana vámahicuruuhana. Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, apaesá maperdonachahe eta epecaturana. Te éneuchavapa, nútí nícacahasicahénapa, apaesá etsecavaipa eta ejacapirayare ema Cristo —máichavacapa ema Juan.

5 Tacache, nárajapapa napaucha ena achaneana ticavasana eta te ichape avasare Jerusalén étapa eta apamuriana avasareana te táunavahi eta provincia Judea. Eta nametauresiravaipa ena achaneana, navarairaipa náinajica eta napecaturana, ema Juan máicachasicavacapaipa tayehe eta cajacure Jordán.

6 Ema Juan, vanairucahi me Viya, profetahi éma. Eta macamuirihirahahi eta náitsameru tajiyaha eta náitatiqune

ticaijare camello. Eta máitijuhe, vácapi jayumepi. Eta manicasareanahi eta tsacara. Eta máitiverahi eta mápama.

**7** Ánivare macahe eta macametarairuраhi:

—Ávanepaipahisera mácani yátupiquene Cristo. Éma, tiápajupanavahi nuyehe nútì eta mapicauchacarévahí. Váiparinehi nácutisamimahi eta máitupajijiasiravahí. Váiparinehivare nácaemuñavaimahi macamusuranuhini nútì páuresami.

**8** Yátupi nútì nícacachasicahéhi te une, te éneuchavapa mayehe ema Viya. Émainapa, tícachasicahénavarepa eti ecasiñavanahí mayehe éma, tíjaracahénasarepa ema Espíritu Santo —macahepa ema Juan.

*Eta macaicachasirahi ema Jesús*

(Mt 3.13-17; Lc 3.21-22)

**9** Te jena sácheana eta mávihairarichaha ema Juan te cajure Jordán, títecapapa ema Jesús. Másihapahí te avasare Nazaret te tinapaica eta Galilea. Tásiha, ema Juan máicachasicapa ema Jesús.

**10** Te tamutupa, te tiúcupaicapa eta te une ema Jesús, tíjahúchavapa máimaha téjiacahi eta anuma. Máimahavarepa ema Espíritu Santo ticutipahi eta paluma. Máucupauchapa ema Jesús, mávahácpa éma.

**11** Tacahe, nasamapa eta mahu ema Viya tásihaquenehi te anuma. Ani macahehi eta nasamirahi:

—Pítira nuchicha némunaruquene. Núrisamurecha piyeho —macahepa.

*Ema Váinaraji Satanás mavarahapa macaitsamaraji ema Jesús*

(Mt 4.1-11; Lc 4.1-13)

**12** Tacahe, ema Espíritu Santo eta mávahásamurechirahi, enurujipa máimitucaipahi ema Jesús eta mayaniraya te mávapahí apaquehe.

**13** Eta mayerevahí ema Jesús cuarenta sácheana. Tásiha, ema Satanás macaitsamarajipa, mavaraha macaetema ema Jesús. Váhisera måratahahini. Tatarihivare eta sárareana eta te mávihahí ema Jesús. Te tamutupa, ena ángeleana náechapajiricahi éma.

*Ema Jesús tépanavapa ticametarairu*

(Mt 4.12-17; Lc 4.14-15)

**14** Tacahe, te jena sácheana, nacaratacapa ema Juan. Námapa te tiyerehi. Tacahe, tiyanapa tichavahí ema Jesús eta te provincia Galilea. Tépanavapa ticametarairu. Máichuhavacapa ena achaneana náehicayarhi ema Viya.

**15** Ánipa tacahehi eta mametarapi:

—Éneuchava mayehe ema Viya. Ítsivacha eta epanereruana. Taicha puiti tíchuhahénapa ema Viya. Tiánehipa eta sácheyare títecapauchahénapa eyehe ema ticatiuchaheyare. Aquenucayare mavaneruhi ema Viya, éma téchaheyare. Ichape eta iúricacarevaya te esuapa eta nímiturapiana —macahepa.

*Ema Jesús máichuhavaca ena cuátroqueneana ténicarahiana, máimitureanayarehi*

(Mt 4.18-22; Lc 5.1-11)

<sup>16</sup> Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema émana ticaijarehi Simón Pedro émapa ema maparape Andrés. Eta náematanerepi ena nani, ténicarahianahi. Náquijierecahi eta nayutahe.

<sup>17</sup> Tacahe, ema Jesús máichavacapa éna:

—Yare, éhicanu. Núti níjaracaheya eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranayare ema Viya —máichavacapa.

<sup>18</sup> Enevanepa náinajicahi éna eta náenisirahi. Tiyananapa náehicapa ema Jesús.

<sup>19</sup> Ánaquipanavarepa máimahavarepa ena apinana ticaparapecacanavare ema Jacobo émapa ema Juan. Téjacanahi te napacure. Matiarihihivare ema naiya Zebedeo. Náititijiricahi eta nayutaheana.

<sup>20</sup> Ema Jesús máichuhavarepa ena apinana. Tásiha, náehicavarepa. Najunijicapa ema naiya Zebedeo. Manasipa éma te pacure, macachanehi ena manusurana.

*Ema Jesús máimijunapa ema éreana tiávahácainihi ema achane (Lc 4.31-37)*

<sup>21</sup> Tacahe, títecapanapa tayehe eta avasare ticaijare Capernum. Eta juca sache sávarumuuhuhi, tiyanapa ema Jesús eta te naúrujisirareva ticaijarehi sinagoga. Máimitucavacapa ena tiúrujicavanahi.

<sup>22</sup> Ichape náramihi ena achaneana eta máimiturapianahi táicha vahi nasamasarénahini. Tétavicavahi eta máitusirahi mayunapaicahi tamutu. Tétavicavahi eta tasuapacarevahi eta máimiturapiana.

<sup>23</sup> Te nataracu ena náurujuruvanahi, matiarihihi ema émana achane mávaháruhi ema éreana. Tipiararecapa, ánipa macahe:

<sup>24</sup> —Núti nímativi. Pítira Sántoquenevihi. Machichaquenevihi ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca pijararecahaviyare —macahepa ema achane.

<sup>25</sup> Tacahe, ema Jesús macajachapa ema éreana. Ánipa maicha:

—¡Pámatina! Piyana pijunijica ema maca achane —máichapa.

<sup>26</sup> Tacahe, ema achane tíjahúchavapa tiáquipaicava, tiyaya-carepa. Tipiararecapa muraca maicha ema éreana eta majunijisirayarehi ema achane.

<sup>27</sup> Tásicha, náraminehi ichape ena natarihiqueneanahi. Tiyaserejiricacanapa, ánipa nacaehe:

—¿Tájahasica tacayema eta juca? Ema maca Jesús, tétavicava eta máitupajijiásiravahi, maratahahi máquijica ena éreanana. Tásicha, ichape eta napisirahi ema. Vahi nácapaemachahini. Tamutupa arairu eta máimiturapianahi ema maca —nacahepa.

<sup>28</sup> Tacahe, nasamairiricapa namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te táunavahi eta Galilea.

*Ema Jesús macanaraca esu máimase ema Pedro  
(Mt 8.14-15; Lc 4.38-39)*

<sup>29</sup> Tacahe, te tiúchucanapa tayehe eta náurujisirareva, tiyanapa ema Jesús te napena ema Pedro ema Andrés. Náehicavarepa ena apinana ema Jacobo émapa ema Juan.

<sup>30</sup> Sutiarihihi esu máimase ema Pedro. Sunasiqueneipahi tívecahi, ticajumahi ésu eta muraca fiebre. Nametacapa ema Jesús eta sucajumairahi esu esena.

<sup>31</sup> Tásicha, mapauchapa. Macaratavauchapa, macaeche-pucapa ésu. Táetaviacavaneinehi eta fiebre. Tacahe, suéchapajíricapa ema Jesús, énapa ena máimitureana.

*Camuriana ena macanararuapanahí ema Jesús  
(Mt 8.16-17; Lc 4.40-41)*

<sup>32</sup> Te jena cáperéhiquénehi, te téricapa eta sache, ena achaneana námavacapaipa eta mayehe ema Jesús namutu ena nacajumaqueneana énapa ena návaháruanahi ena éreanana.

<sup>33</sup> Jéhesaréinehi, namutu ena achaneana ticavasanahi tayehe eta avasare tiúrujicavanapa te tapaja eta peti.

<sup>34</sup> Camuriana ena macanararuana tayehe eta apanapane jumareana. Maveranavare ena váinarajiana máquijiruanahí te náqueheana ena achaneana. Váhisera másapahini náechajicahini ena éreanana, taicha náimatihi éna eta émairahi ema Cristo.

*Tamutu avasareana te Galilea mapaica ema Jesús  
(Lc 4.42-44)*

<sup>35</sup> Tacahe, te tijararahipa, téchepucavanepa ena Jesús. Tiyanapa eta te mayujarasirare.

36 Te téjamicapa ema Pedro, májinaripa ema Jesús. Tásiha, tiyananapa nacapayacapa éma eta te mayujarasirare eta te mávapahi apaquehe.

37 Te náitecapauchapa, náichapa:

—Namutu ena achaneana titanucavianahí —náichapa.

38 Tásiha, máichavacapa ema Jesús:

—¡Páureanasami! Nuvarahapaserá viyanayare tayehe eta apana avasareana apaesa nucametarairu taicha nutupara-casivaichuhí níchuhavacaya namutu ena achaneana náehica ema Viya —máichapa.

39 Tacahe, ema Jesús tiyanapa tipaica tayehe eta avasareana te Galilea. Ticametarairupaipa eta te náurujisirarevana. Énerichuvare nayanauchapaipa ena achaneana návaháruanahí ena éreanana, máquijicavacapaipa ena éreanana.

*Ema Jesús macanaraca ema émana achane leproso  
(Mt 8.1-4; Lc 5.12-16)*

40 Tacahe, te apanapa sache, títecapapa ema émana achane macajumaquene eta lepra. Mapauchapa te mamirahu ema Jesús, máepuyumirauchapa. Tásiha, máichapa:

—Tata, nucasiñavahi eta piyehe, picanaracanupaini —máichapa.

41 Tacahe, ema Jesús tijimuyainehi majapanuinehi. Man-acapa eta mavahu. Máichapa:

—Nuvaraha nucanaracavi. Tájinapa píchiravaina puiti —máichapa.

42 Enevanepa tinaraca. Vaipa leprósoinahíni.

43 Tacahe, ema Jesús máevatacapa ema achane. Matuparacapa ichape vahi macumetajirica. Ánipa máicha:

44 —Pímaha, piyanayaresera pímerecava nayehe ena tuparai-rucana, apaesa náimamacavi. Énainapa timetajiricanayare eta yátupirahi pinaraca, pipachihapa. Nacuijasera picume-tacavaca eta nútirahi nucanaracavi. Tásiha, piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

45 Tacahe, tiyanapa ema achane. Timetajiricapaipasera, mamecapa namutu ena achaneana eta máichavaque-nevahi. Eta tacahe, ema Jesús vaipa máimerecavahini te avasareana taicha enevaneyarehi náurujiacá ena achaneana tímarahijiana. Tacarine tiyanahí tayehe eta nájinaricha achanelahichaini. Énasera ena achaneana tiyananaichucha napauchahi. Tiásihana tayehe tamutu avasareana.

## 2

*Ema Jesús macanaraca ema émana achane macajumaquene eta muracaquiha*

(Mt 9.1-8; Lc 5.17-26)

<sup>1</sup> Tacahe, te apanavarepa sache, tichavapa ema Jesús eta te Capernaum. Eta nasamairirisirahi eta matiarihiraripa éma, títecapanapaipa ena achaneana, camuriqueneana.

<sup>2</sup> Tiyututucavanapa eta te peti mávihahi éma. Tájinapa távira-vainahini eta te tapajachacaya. Ema Jesús máimitucavacaipa eta nacaijuheraya me Viya.

<sup>3</sup> Tacahe, títecapanavarepa ena apamuriana, námapahi te áchuji ema achane muracaha. Cuátroana ena tíamanapahi.

<sup>4</sup> Váhisera náitecapauchahini eta te mávihahi ema Jesús, taicha eta nayututusiravahi ena achaneana. Tacahe, naveta-tamaequechapa eta peti eta te máinahu te manapaicahi ema Jesús. Te náitauchapa navetataca, nacajuchuchucapa ema macajumaquene eta te áchuji te mamirahu ema Jesús.

<sup>5</sup> Te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi nucaepahainavipa —máichapa.

<sup>6</sup> Tacahe, énerichuvare natarihihivare téjacanahi ena escribánoana. Napanerequenehapa eta macayemaquenehi ema Jesús. Tásiba, tisemanarinehi.

<sup>7</sup> Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! Taicha macarichu ema Viya marataha macaepaha eta pecatuana. Nájina apanaina tiratahaina ticaepahaina eta pecatuana” tacahehi eta napaneruana.

<sup>8</sup> Enurujipa ema Jesús máimararacavacahi eta nasamureana étapa eta napaneruanahi éna. Tacahe, máichavacapa:

—¿Tájaha tacayema téjecapava eta epaneruana?

<sup>9</sup> Tájina taejeravaina eta níchirahi ema maca: “Nucaepahainavipa eta pipecaturanahi”. Máejerarepánapuca níchahini: “Nucanaracavipa. Péchepuca, piveha eta pímacaraji, piyana pipaica”.

<sup>10-11</sup> Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apauehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa ema Jesús.

<sup>12</sup> Enevannerinehi téchepuca ema macajumaquenéni. Mavehapa eta mayereruva. Tipaicapa te namirahu ena achaneana. Tiyanapa tiúchucapa. Eta náimairahi,

ichape eta náramirahi namutu ena natarihiqueneanahi. Tétavicavainehi eta nacunachirahi ema Viya. Ánipa nacahe:  
—¡Tétavicava táramicareva eta máichaquevaneana ema Viya!  
¡Asulupaya, Tata! ¡Vahi vímahasarénahini! —nacahepa.

*Ema Jesús máichuha ema achane ticaijare Mateo, mayeheyare apóstole*

(Mt 9.9-13; Lc 5.27-32)

<sup>13</sup> Tiuri, te apanapa sache, tiyanavarepa ema Jesús te tachausi eta cáquire. Náitecapauchavarepa namutu ena achaneana eta mayehe. Tásiba, máimitucavacapa.

<sup>14</sup> Tacahe, te tiápechavapa tipaica ema Jesús, máimahapa ema Mateo, machicha ema Alfeo. (Ema Mateo ticaijarehivare Leví.) Téjacahi eta te macatuparahaíyahi eta macobrarezirahi eta impuesto.

—Yare, péhicanu —máichapa ema Jesús.

Tacahe, ema Mateo enevanepa tiyana máehica ema Jesús.

<sup>15</sup> Te jena sácheana, ema Mateo téñiricapa eta te mapena. Mámapa ema Jesús énapa ena máimitureana. Camuriqueneana ena téhicanahi ema Jesús. Natarihivare maverana ena macutiqueneana ema Mateo ticobrarecarahiana tayehe eta impuesto. Maveranahivare ena apamuriana máemunacsareana ema Mateo. Tiúrisamureeanahi eta nanisirahi.

<sup>16</sup> Títecapanavarepa ena apanamuri achaneana: ena escribánoana énapa ena fariséoana. Eta náimairahi eta macachanérahi ema Jesús ena máichuhaqueneana ema Mateo, nacaecahipa. Ánipa nacahe nayehe ena máimitureana:

—¿Tájaha tacayema tísapava ema eyehe maestro macachanevaca eta manisirahi ena nánitájiana ticobrarecarahiana eta impuesto? ¡Tétavicavahi eta nacapecaturaraivahi! —nacahepa.

<sup>17</sup> Te masamapa ema Jesús eta náechajiriruvanahi, máichavacapa:

—Ena ticajumanahi, tétavicavahi eta nacamunuirahi ema médico. Énasera ena majumareeanahi vahi nácamunuimahi ema médico. Puítisera, eta tímitecanuhi núti nutanucayare namutu ena tisipecaturana apaesa náeneuchavahini, náinajica eta napecaturana. Nácani matapiravareeanahi vahi nasamavahini nácamununuhini —máichavacapa.

*Nayaserecapa ema Jesús tayehe eta ayuna*

(Mt 9.14-17; Lc 5.33-39)

<sup>18</sup> Tacahe, te apahevarepa, ayunanahi ena máimitureana ema Juan. Ayunanahivare ena fariséoana. Náitecapauchapa ema Jesús ena apamuriana achaneana témejecapavarahiana. Nayaserecapa:

—¿Tájaha tacayema vahi naháyunachahini ena pímitureana?  
 ¿Tájaha tacayema vahi nácutihíni ena máimitureana ema Juan  
 énapa ena fariséoana? —náichapa.

<sup>19</sup> Majicapapa ema Jesús:

—Nímicutichinahe puiti. Vahi táuricaimahi ayúnanáinahíni  
 nácani ticaichuhacasianahi tinicanaya nayehe ena araimana.  
 Tiúrisamureanayarehi taicha matiarihihi ema arayena. Vahi  
 táuricahini ayúnanáinahíni. Téhesera te tépenapuca éma, jéhesare  
 ticatisamurevanayare. Tacutiquene, vuíchaha táuricaimahi  
 ayunanainahini ena nímitureana.

<sup>20</sup> Járabajapainapasera eta sácheyare, ticaverejicasianayare,  
 taicha ticaratacanuanainapa ena ticapacanuanayare núti.  
 Jéhevarepa ayunanainapa.

<sup>21-22</sup> Esamanuchaha. Eta juca eta nímiturapihanahi, amairiha  
 arairu. Mavaraha ema Viya arairuyare eta eyeherepianayare  
 eti nuchanerana. Vaipa tacuticacaimahi eta  
 nayeherepiana ena apamuriana achaneana. Eta ítusirahi éti  
 eta nímiturapihanahi, tavaraha ínajica eta ichasi eyeherepiana  
 tamauriqueneanahí —máichavacapa ema Jesús.

*Ena fariséona náimipicauchahi eta nayeherepiana tayehe eta  
 sávarumuhuana. Émasera ema Jesús máimereuchahi émarichu téchahi  
 eta nayeherepiana ena achaneana eta sache nanarasirayare  
 (Mt 12.1-8; Lc 6.1-5)*

<sup>23</sup> Eta jena sávarumuhu, tiyanapa tipaica ema Jesús.  
 Máمامurihana ena máimitureana. Témehicavanapa ena  
 fariséoana. Náetavivijicapaipahi eta isanitiana. Tacáhe,  
 eta napaisirapahi, ena máimitureana navechuquihapaipahi  
 étajavapahi eta trigo. Navepiraquihapaipa, tépurajacacha-  
 vanapaipahi. Tinicanapaipa. Tísapacareichucha éta, taicha  
 técuhanapahi.

<sup>24</sup> Énasera ena fariséoana eta náimararasirapahi, tisema-  
 napaipa. Ánipa naicha ema Jesús:

—Pímaha ena pímitureana. Ticaemataneanapaichucha eta  
 navepiraquirapahi eta trigo puiti juca sache téavicavahi eta  
 tacapicahuquenehi. Vahi tísapacarémahi eta juca nacaemata-  
 nerahi puiti —náichapa.

<sup>25</sup> Tacáhe, majicapavacapa ema Jesús:

—Németeaca éti vahi ecaicutiara eta tacayemaquene eta  
 Sagrada Escritura, eta máichavaquenevahi ema víyarahaini  
 David eta mapaisirapahi técuhapaipa énerichuva ena téhica-  
 napahi.

<sup>26</sup> Te émarichaha ema Abiatar náquenumurihi ena tiyujara-  
 carahiana, ema David tisiapapa eta te mapena ema Viya.

Tiyaseseracapa eta manicayarehi. Náijaracapa eta pan tacapi-cahuquenehi nanacasarehi te mamirahu ema Viya. Nanicasarehi ena tiyujaracarahaniana, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

<sup>27</sup> Tímiyanava eta mame tasirahi éna:

—Ema Viya máepiyacahi nativa ena achaneana. Te táequenepa, máimijarechinapa eta sache nanarasiraya ena achaneana, tiúrichayarehi éna. Vahi étainahini téme piyaca eta tihapapiricavacayare éna.

<sup>28</sup> Tiuri puiti, numetacaheyare: Núti Manerejirunuhi ema Viya, nútirichu néchahi eta sache nanarasiraya ena achaneana —máichavacapa.

### 3

*Ema Jesús macanaraca ema achane tépenavahu  
(Mt 12.9-14; Lc 6.6-11)*

<sup>1</sup> Tacahe, te apanavarepa sávarumuhi, tiyanavare ema Jesús, tisiapahi eta te náurujisirareva. Matiarihihivare ema émana achane vaipa tayamuricahini eta mavahu, tépenavahuipa.

<sup>2</sup> Natiarilihivare ena fariséoana, ena ticanarajiricanahi ema Jesús. Náimara racapa éma te macanaracayarepuca ema achane eta te jena sache tacapicahuquenehi. Natanunuiricahi eta tiviuchayarehi ema Jesús.

<sup>3</sup> Tacahe, máichapa ema Jesús ema achane:

—Yare, pitupihayare ani te namirahu ena achaneana —máichapa.

<sup>4</sup> Tacahe, máichapa ema achaneana:

—Núti nuvaraha epanerechaya. Puiti juca sache sávarumuhi, ¿tájahapuca taurica eta víchayare? ¿Tísapacarepuca vicha eta taurique neana? ¿Étapuca víchayare eta tamaurique neana? ¿Tauricapuca vípuchavaca ena achaneana? ¿Vicaparecapuca? —máichavacapa.

Énasera tímatinamurianarinehi.

<sup>5</sup> Tacahe, ticatisamurevarine ema Jesús eta muracairahi eta nasamureana. Tacahe, tisemamajuhepa eta máesenimurairahi éna. Máichapa ema achane macajumaquene:

—Nimaha. Picajaruvauchava, pímechanu eta pivahu —máichapa.

Eta máimeresirahi eta mavahu ema achane, enevanepa tinaravauchavanepa.

<sup>6</sup> Énasera ena fariséoana, tisemanarinehi eta náimairahi eta juca máicha quenehi ema Jesús. Tiyananapa tisamacacana

nayehe ena políticoana, machanerana ema Herodes, taicha navaraha nacapacaya ema Jesús.

*Títetapanapa ena camuriqueneana achaneana*

<sup>7</sup> Émasera ema Jesús tiyanapa térajicavapa eta te mávapahi apaquehe eta te tachausi eta cáquiure. Mámapa ena máimitureana. Náehicavare ena ichapemuriqueneana achaneana ticavasanahi eta te provincia Galilea.

<sup>8</sup> Jéhesare, te nasamairiricapa eta máichaqueneanahi ema Jesús, titetapanapa ena ichapemuriqueneana achaneana. Tiásihanahi eta te avasare Jerusalén, eta te provincia Judea, eta provincia Idumea, eta provincia Siria, étapa eta avasareana te apachara eta cajacure Jordán.

<sup>9</sup> Tásiha, ema Jesús mavanecapa ena máimitureana natsesinahini étasina pacure apaesa vahi nacutupiaraca ena ichapemuriqueneana achaneana.

<sup>10</sup> Taicha camuriana ena macanararuanapahi. Namutu ena nacajumaqueneana témeñahavanapahi tiyumususujicavanapahi eta náemeñahairavaya, taicha navarahahi náemamacayare.

<sup>11</sup> Jéhesare, ena éreanana tiávhácanahi ena achaneana, te náimahapa ema Jesús, tíaquipaicavanapa te mamirahu éma. Tipiararecanapa:

—¡Pítira Machicha ema Viya! —náichapa.

<sup>12</sup> Mavanecapasera máecatihavacapa nacuija nacumetaruina taicha vuíchaha mávarahahini náimatihíni ena achaneana eta émaquenérahi Machicha ema Viya.

*Ema Jesús manerejica ena dócequeneana apóstoleana  
(Mt 10.1-4; Lc 6.12-16)*

<sup>13</sup> Tacache, tiyanapa ema Jesús eta te mávapahi apaquehe máripahi. Mámamurihapa ena ánimuriana máimitureana.

<sup>14</sup> Tacache, ánaqui manerejicavacapa te nataracu ena dócequeneana mayeheanayarehi apóstoleana. Vaipa najunijiacaimahi éma, macachaneyarehi tamutu sácheana. Matuparacavacapa eta nacemetarairuirayare.

<sup>15</sup> Máijaracavacapa ena dóceana eta naratahairayarehi ticanararecana ena nacajumaqueneana, náimijunairayareva ena éreanana tiávhácanahi ena achaneana.

**16-19** Eta juca náijareana ena manerejiruanahi\*: Ema Pedro (éma ticaijarevare Simón), ema Jacobo, ema maparape Juan, ema Andrés, ema Felipe, ema Bartolomé, ema Mateo, ema Tomás, ema apaña Jacobo, ema Tadeo, ema apaña Simón, émapa ema Júlasi Iscariote (ema tíjararecahi ema Jesús).

*Ena escribánoana téjecapavanahi eta náimijachirahi ema Jesús mávaháruhi ema Váinaraji Satanás*

(Mt 12.22-32; Lc 11.14-23; 12.10)

**20** Tacahe, tichavapa ema Jesús, énapa ena mayeheana apóstoleana te napena. Tiápechavanavarepa tiúrujicavana ena achaneana. Tásicha, vaipa náitujicavahini tinicana taicha téavicavahi eta nasimutuvahí ena achaneana.

**21** Énasera ena maparapenaveana ema Jesús, te nasamairicapa, tiyananapa náepanayarehini éma, taicha náimijachaipahi máurishi éma.

**22** Énerichuvare natarihipa ena escribánoana, tiásihanahi te Jerusalén. Náepiyaequenehapa ema Jesús, ánipa nacahepa:

—Ema maca Jesús, vémeteaca majupaha ema náquenumurihi ena éreanana, émaripa ema Satanás. Táitusiava máijaracahi eta máitupajijiasiravahí eta macuchusirahi ena éreanana —nacahepa.

**23** Tacahe, ema Jesús máichuhavacapa ena ticaecahirhianahi. Eta máimitusiravacahi, máimicutichinapa. Ánipa máichavaca:

—Éti, téjecapavahí eta epanereruana ímijachanuhi majupahanuhi ema Satanás. Ímijachapuca ticatianacacanahi ena éreanana. Váhisera énená tácahe.

**24** Tacutihí ena machanerana ema gobierno. Éna, vahi típutsimuriavanimahi apinainahipucaini partido. Te típutsimuriavanapa, énajicacaini tiáquipaicacana.

**25** Émaripa mácani achane te camurianahi ena machichanaveana, váiparinehivare típutsimuriavanimahi, náehajiricacahini, énajicacahini náquipaicacahini.

\* **3:16-19** Ena nani apinana ajairana ema Jacobo émapa ema Juan, naparapecacahi, machichanaveanahi ema Zebedeo. Émasera ema Viáquenu Jesucristo máimarracahi eta náchanevana, máimativacahi éna. Manacapa eta náchucarapianahi “Boanerges”. (Eta táechajiruvahí eta juca, Tijuricati eta náechajisira, téyayarasianavare.) Matiarihvare ema apaña achane ticaijarehivare Jacobo. Ema maiya ticaijarehi Alfeo. Matiarihvare ema apaña ticaijarehivare Tadeo. Eta tápine etá máijare Lebeo, étapa Judas. Tacahe, mapana etá máijare. (Pitanuca te Lucas 6.16 étapa te Mateo 10.2.) Ema apaña Simón, tímaticarehi ema, náumurivainihi ena revolucionároana ticaijareanahi “cananístana”. Navaraha náquijica ena extranjeroana romanoana.

<sup>26</sup>Ene macahehi ema Váinaraji Satanás, váiparine másapahini típutsicacana ena machanerana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi.

<sup>27</sup>Macutihi ema mácani achane tume. Te macaratacahi eta mataquiriqui eta majaneasirahi jácani macayehequeneana, nájina tiámeyechaimahi. Tacamunuhi nacaratacanumayare, náitiacanumayarehi ema túmequenehi achane. Jéhesare, náituruuyechasareyarepa eta máimahaqueneana. Ene nucahehi nútí, túmepananuhi mayehe ema maca Satanás.

<sup>28</sup>Puiti nutupiruva numetacahe: Tiperdonachacarea-nayare ena achaneana eta napecaturana, tamutu jácani náechajisihaira eta táñemahiqueneana.

<sup>29</sup>Jararhiserá eta epecatura vahi tiperdonachacaremáhi. Eti ímijachahi ema Satanás ema tiávahácanuhi. Ichape eta ejecapiravahi, taicha ema tiávahácanuhi nutí, émaquenehi ema Espíritu Santo. Éti epanararacaripa éma. Tásiha, máitavacaca eta etapiravanaya —máichavacapa ema Jesús.

<sup>30</sup>Tacahehi eta máechajiriruvahi taicha eta nacahechajiri-ruvairahi: “Ema maca Jesús, majupaha ema Satanás”.

*Suítcapauchapa esu maena ema Jesús énapa ena maparapenaveana*

(Mt 12.46-50; Lc 8.19-21)

<sup>31-32</sup>Tacahe, te apanapa sache, tiúrujicavanavarepa ena camuriqueuneana achaneana te tajuhe eta peti. Téjacanapa te machacaya ema Jesús. Títecapanecha esu maena énapa ena maparapenaveana. Nanasipasera te aneca taicha tiyututucavanahi ena achaneana. Navarahahi náechajicayarehi éma. Tásiha, nametacapa ena apamuriana ema Jesús, ánipa naicha:

—Esu pémunaruquenehi pena, énapa ena piparapenaveana nararihi ani te aneca. Navarahahi téchajicaviana —náichapa.

<sup>33</sup>Majicapapa éma:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruannahivare, nuparapenaveanahi.

<sup>34</sup>Tacahe, masesenimuríhapa ena máimitureana ena téjacanahi te machacaya. Tásiha, macahepa:

—Ena nani ena némunaruuanahivare.

<sup>35</sup>Taicha namutu nácani ticaemataneacanahi ema Tata, énahi ena némunaruqueneanahi —máichavacapa.

## 4

*Eta máimicutichinaquenehi evaraqui tacaevaquenehi te apapanenéji máteji te apaquehe*

(Mt 13.1-9; Lc 8.4-8)

<sup>1</sup> Tacahe, te apanapa sache, tiápechavavare tímitureca ema Jesús te tachausi eta cáquiure. Tásicha, camurianapahivare ena achaneana títecapauchanahi éma. Eta navayuchiravaripa ena achaneana, ema Jesús tíavacuhapa tayehe eta pacure, tiápajuecavapa apaesahi. Téjacapa eta máimituresirahi. Ena achaneana nanasipa tayehe eta te tachausi.

<sup>2</sup> Camuri eta máimicutichaqueneanahi eta máimitusirvacahí. Ánipa macahe:

<sup>3</sup> —Esamararacanuchaha. Matiarihihi ema émana achane. Tévacahi te máesane.

<sup>4</sup> Eta mapaisirapahi, témiricapaipa eta evaraqui te achene. Táimahapa eta cágure, tanicapa.

<sup>5</sup> Eta mayeherepi éma eta máevasira, máevajajapaicapaica eta apauehe. Tásicha, eta apamuri evaraqui témiricapa te váhirichu tamitutuhini eta máteji taicha máripahi eta apauehe. Tímarucavanepanéni táicha.

<sup>6</sup> Téhesera te tíjurepa eta sache, tacapajicapa; taicha vaipa táuparevacahíni.

<sup>7</sup> Tacahe, eta apana evaraqui témiricapaipa te tapare eta itapequiji. Tiúrinahinéni eta táimarusira, étasera eta itape tacachuricapa eta tajurusirahi. Táemuriachapa eta sucureca. Tanasipa, vaipa tacahihini.

<sup>8</sup> Tacahe, eta apamuri evaraqui témiricapaipa te tiúrina máteji. Tijurucarahihi eta táimarusira. Ichapemurihi eta tahi. Eta étana, ticahipa apaesasajiruichucha. Eta apana, ticahipa tativarerehapanapa. Eta apanavare, ticahivare tétupicavapanapa.

<sup>9</sup> Esamararacanu emutu éti. Te evarahapuca ecaicutiara, tavaraha eta epanerechinavaya —macahepa ema Jesús.

*Ema Jesús máitametacavaca ena máimitureana eta juca máimiturapi*

*(Mt 13.10-23; Lc 8.9-15)*

<sup>10</sup> Tacahe, te najunijicapa ena apamuriana achaneana, témeñahavanapa eta mayehe ema Jesús ena dócequeneana apóstoleana énapa ena apamuriana máimitureana. Nayaserecapa tájahapuca tacayemahi eta máimicutiarachiravacaichucha eta máimitusiravacahi ena achaneana.

<sup>11</sup> Tacahe, majicapapa éma:

—Ema Tata tituparacanuhi nítametacaheyare éti eta juca mapanereruana táchiqueneruana tayehe eta macuchucuiraheyare eti achaneana. Mavarahahi ímatiequenehaya éti.

<sup>12</sup> Énasera ena apamuriana achaneana nímicutiarachinavacaichucha, apaesa vahi máejerarémahi eta nacaicutiarairaya eta nasamaquenehi. Tavaraha napanerechinavaya.

Eta nacaicutiarairaya, náitsivachahini eta náitaresira, apaesa naperdonachacarepaini –máichavacapa ema Jesús.

<sup>13</sup> Énerichuvare máichavarepa:

—Éti, ¿vuíchaha íturuequeneha eta juca nímicutichaquenehi? Tavaraha eta epanerechinavaya éti apanava apaesa íturuequeneha eta apamuriana nímicutichaqueneanahi. Tiuri, numetacahe:

<sup>14</sup> Eta evaraqui eta maevaruhi ema achane tacutihi eta nímiturapiana.

<sup>15</sup> Natiarihi ena achaneana nacuti eta apaquehe muracapahi te achene, te táemirisihahi eta evaraqui. Ena nani nasamararacahi eta nímiturapiana. Émasera ema Satanás macamitisicavanepa eta nasamaquenehi.

<sup>16</sup> Natiarihivre ena apamuriana achaneana, nacutihi eta máteji máripahi. Te nasamararaca eta nímiturapiana, natupiruvanehinéni nasuapa, tiúrisamureanainehi.

<sup>17</sup> Váhisera náratahahini nacaravahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi, taicha vahi nacamichahini jácani nacatajivairanahí. Váhivre túmesamureanainahini te tatiarihipa eta jácani nacatichaira ena achaneana táichavenehi eta náehisiranuhi.

<sup>18</sup> Natiarihivre ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana.

<sup>19</sup> Napaneréquenehahinéni, tahapapiricavacahisera eta jácani táicharacavayare eta náitaresira. Tavayuacavacavare eta tájiparacana, najamurachahi tamutu. Tahapapiricavare eta navarairahi tirricuchavana. Tamutu eta juca táemetavicahi eta navarairahi téhicanuana. Tamapurujíhi eta najacapirahi eta nímiturapiana.

<sup>20</sup> Natiarihisera ena apamuriana achaneana nacuti eta tiúrina máteji. Éna, nasamararacahi náunacahi yátupi eta nímiturapiana. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararihivre ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya –máichapa ema Jesús.

*Ema Jesús tímitureca eta apamuriana yátupiqueneana  
(Lc 8.16-18)*

<sup>21</sup> Tímiyanava eta máimituresirahi, ánipa macahe:

—Te viyustaca eta vimícahu, váiparinehi tauricaimahi vijihapaicahini, vinacahivarepuucaini te tápecu eta vétsatsame vímasirarehi. Tacamuñuhi vinacayarehi te anuquehe.

<sup>22</sup> Jéhesare, tayanapanepuca nacayumuruqui, tamutuyare-hisera ticaechera jácani tayumururevanahi. Tájina tépacu-chaimahi jácani najajairuvanahi. Tamutuyarehi téchacareya.

<sup>23</sup> Te evarahapuca ecaicutiara, tavaraha eta epanerechinavaya.

<sup>24-25</sup> Máichavarepa:

—Tacamunuvare epanerecha yátupina eta esama-queneana. Te apaesarichuhi eta epanerechirahi, apaesarichuvare eta ecaicutiarairaya. Te esuapa yátupina eta nímiturapiana, ema Espíritu Santo tímitucaheyam tamutu eta tacayemaquenehi. Jéhevare, tímitucaheyare éma eta apamuriana yátupiqueneanahi. Énasera nácani vahi návarahahini napanerecha, váhivare nasuapa, énajivayare tíchavana ticaverejicasianaya eta nasamaqueneanahi.

*Ema Jesús máimicutiarachava eta táimarusira eta evaraquiana*

<sup>26</sup> Máichavacavarepa:

—Nuvaraha nímicutichinahe eta nímiturapiana nuti Manerejirunuhi ema Viya. Te yátupihi eta nasuapirohi eta nímiturapiana ena achaneana, náitsivachainapa arairuinapa eta napanereruana étapa eta nayeherepiánaya eta náitaresira. Tacutihi eta máevaraqui mácani achane. Tévacahi te máesane. Tásiha, tinaracapa, macuchapayarepa eta tacahirayare eta máevaraqui.

<sup>27</sup> Tímarucapa eta evaraquiana. Tijurucavare. Ema achane, tájina macaicutiarahini eta táimarusirahi. Váhivare macaicutiarahini eta tajurusirahi.

<sup>28</sup> Taicha eta apaquehe, éta ticaimarucahi. Tacuchuchihi tativa eta tapacaji, táehicapa eta tanaqui. Te ticahipa, tiúchucapa eta tapiraqui.

<sup>29</sup> Te tiyahapa eta tahi, ticaechatijipa te tumare, taicha étainapa eta tacavehasiraya —macahepa ema Jesús.

*Ema Jesús máimicuticha eta taqui eta mostaza*

*(Mt 13.31-32; Lc 13.18-19)*

<sup>30</sup> Ánivare macahe:

—Puiti nuti Manerejirunuhi ema Viya, nímicutichinahe eta ichapemurivaya eti íjaracavanahi éhicanu.

<sup>31</sup> Ecutiya eta ánichichaquene taqui eta sucureca ticaijare mostaza. Éta juca, áníquititavacapana eta taqui te tamutu eta evaraquiana tatarihiqueneanahi tayehe eta juca apaquehe.

<sup>32</sup> Téhesera te ticaevapa, tijurucapa eta tiápajucavahi ichapepana tayehe eta apamuriana sucurecana. Tatarihi eta ichapetavavaca. Tásiha, tacapenajicapa eta cárureana —macahepa ema Jesús.

*Camuri eta máimicutichaqueneana  
(Mt 13.34-35)*

<sup>33</sup> Ani tacahe tamutu eta máimitusiravacahi ena achaneana. Camuriana eta máimicutichaqueneanahi. Tamutuhi ticacutiaracarevaca nayehe ena tivarahanahi náituruqueneha.

<sup>34</sup> Tájina étahena te tímitureca, vahi macunacahini eta máimicutichira. Téhesera te macarichupa ema Jesús énapa ena máimitureana, máimicaecherachapa tamutu eta máimicutichinaqueneanahi.

*Ema Jesús macaesamirica eta une eta táepacusirahi étapa eta técaticava*

*(Mt 8.23-27; Lc 8.22-25)*

<sup>35-36</sup> Tacahe, te jena sache, eta máejasirahi ema Jesús te pacure, tímiturecahi. Te cáperrehichichapa, máichapa ema Jesús ena máimitureana:

—Viyanaya viánueca te apachara —máichavacapa.

Tacahe, ticametavanapa nayehe ena achaneana. Tásiha, námapa ema Jesús eta te pacure. Náehicapa ena apamuriana te pacure eta napaisirapahi.

<sup>37</sup> Te ítupierecanapa, tachimaracapa eta muraca técaticava. Tépacucapa ichape eta cáquuire. Tisiapapaipahi eta une tayehé etá pacure. Tiánehipaipahi tacaericavaca.

<sup>38</sup> Émasera ema Jesús, tímacapaichucha te tahivu etá pacure te machunusi. Tásiha, nacajamicapa éma. Ánipa náicha:

—¡Tata maestro! ¡Picatiuchahavi, vérícinapa! ¿Váhipuca péñamava etá viyehe? —náichapa.

<sup>39</sup> Tásiha, enurujipa téchepuca éma. Titupihapa. Mavanecapa etá técaticava étapa etá une. Ánipa macahe:

—¡Pámatina, pésamiricava! —máichapa.

Tacahe, tíchecapa etá técaticava. Tésamiricavapa etá une. Tésamiriecavapa tamutu.

<sup>40</sup> Tacahe, máichavacapa ena máimitureana:

—¿Tájaha tacayema epica? ¿Váhipuca ecasiñavahini etá nutiarihirapahi etá eyehe? —máichavacapa.

<sup>41</sup> Ena máimitureana, tétavicavainehi etá náramirahi. Tiyase-recacanapa, ánipa nacahe:

—¡Tétavicavapa etá máitupajijiasiravahi ema maca vimaeastro! ¡Jéhesare, yátupiquene etá émairahi machichahi ema Viya! ¡Taicha tamutu tasuapahi, macamatinacahi etá técaticava étapa etá une etá táepacusirahi! —nacahepa.

## 5

*Ema achane návaháruhi ena ichapemuriqueneana éreanana  
(Mt 8.28-34; Lc 8.26-39)*

<sup>1</sup> Títecapanapa te apachara eta cáquiure eta te apaquehe ticaijare Gadara.

<sup>2</sup> Ánaqui tatiarihi eta ecariana. Tacahe, te tiúcupaicapa ema Jesús eta te pacure, tiúchujicavanepa ema émana achane návaháruhi ena éreanana.

<sup>3</sup> Éma másihapahi eta te ecarí, taicha macapenajuechavacahi eta covachana. Nájina náratahahini náiticahini éma. Étaripa eta ichapepi cadena, vahi tártatahahini.

<sup>4</sup> Taicha máejeharipa nacarataca. Náitijivauchahi te cadena. Nanacavare eta grillo te mapiqui. Émasera mavenarurujica eta cadena, mavenarucavare eta mayehe grillo. Jéhesare, nájina naratahahini namansuchahini ema maca achane.

<sup>5</sup> Eta máitaresirahi, eta mávirarehi tayehé eta ecarí étapa eta mávapahi te anuqueheana mari. Tamutu sácheana, yátiana, tipiararerecahi éma. Tijarachava te márijahiana.

<sup>6</sup> Tacahe, tiyerehipaichaha máimahapa ema Jesús, tijunapapa mapauchapá. Máepuyumirauchapa.

<sup>7-8</sup> Ema Jesús, eta máimairahi ema achane, máichapa:

—¡Pijunijica ema maca achane, piti éreana! —máichapa.

Tipiararecapa muraca eta majicapirahi ema achane. Ánipa macahe:

—¿Tájaha picha pítega pipauchanu, piti Jesús, Machichaquenevihi ema Viya? ¡Pájapanunu, vuíchaha picuvanecanu ánaqui te nucaicuñaiyare! —macahepa.

<sup>9</sup> Tacahe, ema Jesús mayaserecapa ema éreana. Ánipa maicha:

—¿Tájaha píjare pítí?

Majicapapa éma:

—Núti nucaijare “Nacapenaharu ena ichapemuriqueneana éreanana”. Jéhesarehi, ichapemurihavihi víti.

<sup>10</sup> ¡Pájapanuhavisera! Te piáquijicahaviyarepuca, ¡vahi picuevatacahavi viyanaya te tiyerehi! —nacahepa ema éreanana tiávahácanahi ema achane.

<sup>11</sup> Tiuri puiti, tatiarihihivare eta camuriqueneanahi cúciana. Tinihicanahi ánaqui te táemiripaisine eta masihi.

<sup>12</sup> Tacahe, ena éreanana tiyaseuchavanapa mayehe ema Jesús. Ánipa nacahe:

—¡Picatajicahavi! Pévatacahavi eta te távihahi eta jena cúciana. Písapahavi visiapahacavaca eta jénana —náichapa.

<sup>13</sup> Tacahe, ema Jesús macuchuchujicavacapa eta te máquehe ema achane, másapapa nasiapahacavaca eta cúciana. Tatarihi cútima hi apina mil eta cúciana. Tacahe, te tasamapa eta cúciana eta nasiapahasiravacahi ena éreanana, tijunaparacanapa témiririjicanapa te tachausi eta cáquiure. Téririji-canapa tamutu.

<sup>14</sup> Natarihihisera ena tijaneacanainihi eta cúciana. Te náimahapa, tiáramecanarinehi. Tiyananapa tijunapanapaipa, timetajiricanapaipa nácani nácapajiruvanapahi, étapa te avasare namutuvare nametaca. Tiáramicaréinehi nayehe ena achaneana. Tiyananapa náimahapana tájahapuca eta táchavaquenevahí eta cúciana.

<sup>15</sup> Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema Jesús. Tájinaripahi máichiravainahini. Ticamuirihaiipahivare. Tásihasera, tipicanarinehi ena achaneana.

<sup>16</sup> Tavetijipa te náitametacapa ena tímahanahi eta táchavaquenevahí eta cúciana te macuchuchujicavacapa ena éreanana ema Jesús.

<sup>17</sup> Tacahe, nayaseacapa ema Jesús váhini macuitecapaucha vacaini tayehe eta návasahi éna, machavavanehini te másinehi.

<sup>18</sup> Tacahe, te tiávacuhayarepa ema Jesús, ema achane manararuhi tiyaseserecapa eta mavarairapa máehica ema Jesús.

<sup>19</sup> Émasera, vahi másapahini. Ánipa maicha:

—Piyanachucha pichava nayehe ena pijaneanana te piávasa. Pimetacaya eta macanarasiravihi ema Viya taicha eta majapanuiravihi —máichapa ema Jesús.

<sup>20</sup> Tacahe, tiyanapa tichava ema achane. Timetajiricapaipasera mametacavacapaipa eta máichaquenehi ema Jesús mayehe. Náraminehi namutu ena ticavasanahi eta te provincia ticaijare Decápolis.

*Ema Jesús macanaraca esu machicha ema Jairo, ésupa esu apana esena sucajumaquenehivare*

(Mt 9.18-26; Lc 8.40-56)

<sup>21</sup> Tiuri, tichavavarepa tiánueca ema Jesús te apachara. Te títecapanapa, náurujiacavanepa ena ichapemuriqueneana achaneana te mávinehi te tachausi eta cáquiure.

<sup>22</sup> Tacahe, títecapanapa ema émana achane ticaijare Jairo. Ema maca achane, tétavicavahi eta mapicauchacarevahi. Tuparairucahi tayehe eta nárujisirareva. Te máitecapauchapa, tépuyucapa te mamirahu ema Jesús.

<sup>23</sup> Mayaseacapa, ánipa máichapa:

—Tátachicha, surarihi esu nuchichasami, ticajumahi. Puiti ténamajiricavaipa ésu. Picatajicanupaini, tata. Pinasinanu eta pivahuana suyehe apaesa sunaraca —máichapa.

<sup>24</sup> Tacahe, masuapapa ema Jesús. Tiyanapa máehicahi ema achane. Náehicavarepa ena camuriqueneana achaneana. Náevatajiricanecha éma.

<sup>25</sup> Tásicha, te nataracu sutarihipahivare esu esena sucajumaquenehi. Doce áñoripahi eta sucajumairahi táichirahi eta suítine.

<sup>26</sup> Ichaperipa eta sucatajivairahi taicha camurianaripa ena típuchanahi médicoana. Títaharipa eta suímaqueneanainihi. Tájinaserá vahi suátivarehini. Suáviraparasiavaichuhi suvayuhapaichucha eta sujuma.

<sup>27</sup> Ésu, sutanucapaipahi ema Jesús, susamairiricahi eta tiáramicareana máichaqueneanahi. Supauchapa suéhiquecu-chapaipahi te maquecu.

<sup>28</sup> Taicha tacahehi eta supanereruhi: “Taratachuchaini nébamajiacahini eta ñimuiriha, németeaca nunaracapapucaini”, sucahesamurepa.

<sup>29</sup> Tacahe, suémamajiacapa eta tacheyarapi eta mamuiriha. Jéhesaréinehi, enurujipta tícheca eta suítine. Tisamavapa ésu eta sunarasiraipahi tayehe eta sujumainihi.

<sup>30</sup> Émasera ema Jesús macaicutiaravanepa eta sutiarihirahi esu tacanararuhi eta máitupajijiasiravahi. Enurujipta téviurucavahi te namuri ena ichapemuriqueneana achaneana. Ánipa macahe:

—¿Nájaha tébamajiacanuanahi?

<sup>31</sup> Tacahe, ena máimitureana náichapa:

—Tata, téñatuhejiricacanahi namutu eta achaneana taicha ichape eta nasimutuvahi. Piyaserecahavirichahava nájahapuca ena tébamajiacavianahi —náichapa.

<sup>32</sup> Émasera ema Jesús máesenimurihana, matanucapa nájahapuca ena tébamajiacanahi.

<sup>33</sup> Tásicha, supauchapa esu esena. Tiyayacarepaipa taicha tipicaripahi. Taichasuéchahi eta suíchaquenehi ésu. Suépuyumirauchavanepa te mamirahu. Sumetacapa tamutu.

<sup>34</sup> Tásicha, máichapa ema Jesús:

—Tiuri, nuchicha. Pinaracapa puiti táichavenehi eta picasiñairanuhi. Vaipa picueñamava eta pichaviraya te pipena. Vaipa tichavaimahi eta pijumainihi —máichapa.

<sup>35</sup> Téchajiricavaichahahi ema Jesús eta suyehe esu esena, títecapananecha ena tiásahanahi te mapena ema Jairo. Nametacavanepa:

—Esu pichicha tépenasamipahi. Vaipa picucamesa ema Maestro —náichapa.

<sup>36</sup> Émasera ema Jesús vahi masuapahini eta nametasirahi. Mavarahaichucha tiyana. Tacahe, máichapa:

—Vahi picueñamava, piti Jairo. Pácasiñavachucha eta nuyehe —máichapa.

<sup>37</sup> Tacahe, ema Jesús vaipa másapahini náehica ena apamuriana achaneana. Nacarinepa ema Pedro, ema Jacobo, émapa ema Juan.

38 Te títecapanapa te mapena ema Jairo, máimahapa ema Jesús ena achaneana vaipa náitucacarahañíni, tijajamurianariaphi eta náiyairahi. Tipiararecanariaphi muraca.

39 Émasera ema Jesús eta masiapirahi, máichavacapa:

—¿Tájaha tacayema eta iúrujiricavahi eta ani, íyaharcavapa? Vahi ecuiyaha. Esu suca amaperu, váhinéni suépenahini. Tímacarichucha ésu —máichavacapa.

40 Énasera ena achaneana nacaecahirichucha éma, técavanapa. Tacahe, ema Jesús macuchucavacapa te aneca namutu. Tacahe, tisiapapa te suávhahi esu amaperu, émapa ema suiya, ésupa esu suena, énapa ena mapanana máimitureana.

41 Tacahe, macaratavauchapa ésu. Máichapa:

—Nuchicha, néchajicavi. Péjamica, péchepuca —máichapa.

42-43 Enurujipa esu amaperu téjamicapa, téchepuca. Tipaicapa te namirahu. Ichaperinehi eta náramirahi ena tímahanahi. Tásiha, ema Jesús mavanecavacapa náijaraca eta sunica esu amaperu. Matuparacavarepa muraca eta vahi nacuechajisiha eta náimahaquenehi. Esu amaperu, dóceripahi eta suñañora.

Tacahe, tiyanapa ema Jesús. Tichavapa te mapena.

## 6

*Tichavapa ema Jesús te móvase Nazaret*

*(Mt 13.53-58; Lc 4.16-30)*

1 Tacahe, te apanapa sache, tiyanavarepa tipaica. Tichavapa tayeha eta móvase Nazaret, mámamurihapaipa ena máimitureana.

2-3 Tacahe, te jena sache sávarumuquene, tiyanapa tayeha eta náurujisirareva nayujarasirare ena achaneana. Tímiturecapa. Camuriana ena tisamararacanahi. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—¿Távihapuca mavínehi eta júcana máimiturapihanicacha ema máca? ¡Témunahiricavapa titupajijiacavaipahíjcacha! ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta máichaquenahíji visamaiririruanahi. Taicha vímatihi ema maca. Carpintérochucha éma. Vímatihivare esu maena María. Vímatihivare ema maparape Jacobo\*, émapa ema José, émapa ema Judas, émapa ema Simón. Vímatihivare ena esenana maparapenaveanahi, ticavasanahi ani —náichacacapa.

\* **6:2-3** Ema maca achane, ticaijarehi Jacobo te náechajiriruva ena israelítana. Te véchajiriruva, ticaijarehi Santiago. Mapaenumavahi máehica ema Jesús te taequenepa eta máechepusirahi te máecari ema Viáquenu.

<sup>4</sup> Ema Jesús máimatihi eta napanerueruanahi. Tásicha, máichavacapa:

—Tatuparaca epicauchahaviya vimutu viti mavaneruana ema Viya. Étisera eti nujaneananahi ecavasanahi eta te juca viávasa, étipa eti nuparapenaveana, vahi epicauchanuhini —máichavacapa.

<sup>5-6</sup> Éma, ichape eta máramirahi eta namasuapajiraivahi éna. Eta tacahe, tájina máimerecahichaini eta tiárami careana. Tacarichu eta macanarasirahi ena nacajumaqueneana eta máemamamahásiravacahi te mavahuana. Vahi camurianai-nahíni ena macanararuana.

*Ema Jesús mavanecavacapa ena dócequeneana apóstoleana na-paicayare tamutu avasareana, ticametarairuanayare*

(Mt 10.5-15; Lc 9.1-6)

Tacahe, ema Jesús tiyanapa mapaicahi eta avasareana máimitucavacapaipa ena achaneana.

<sup>7</sup> Étana sache, macurujimurihana ena dócequeneana mayeheana apóstoleana. Tacahe, máijaracavacapa eta náitupajijiasiravayare naratahairayare náquijica ena éreanana. Tacahe, mavanecapa tiyanana eta te apanapaneana avasareana, apinanayarepahi eta napaisirayarepahi.

<sup>8</sup> Matuparacapa, ánipa máichavaca:

—Tájina iámaimahi eta eyereruvana eta epaisiraya. Váhivare ecuama eta enirurucuha te alforja, étapa eta plata.

<sup>9</sup> Étanarichuvare iámayare eta emuiriha. Tacarichu iámaya eta eyupairiqui. Ecaeparuvevayaresera.

<sup>10</sup> Te ítecapapa tayehe eta jácani peti ítecapihaya te jácani avasare, ánasi tayehe. Te iúchucayarepa eta te jena avasare, epaenumava ejunijica eta ítecapihahi.

<sup>11</sup> Te váhipuca nacujacapahe te jácani avasare, váhivare nacuvaraha nacusamahe, iúchucavaneyare. Étatapevachavvanumayaresera eta máteji te ívapeana. Táicutiarayare eta máicuñasiravacayare ema Viya taicha eta namavarairahi najacapahehini. Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinara jiqueneana ticavasanaini te Sodoma étapa eta Gomorra —máichavacapa ema Jesús.

<sup>12</sup> Tacahe, tiyananapa ena dóceana. Ticametarairuana eta tacamunuirayarehi eta náeneuchiravaya ena achaneana, náinajica eta napecaturana.

<sup>13</sup> Náimijunavacapaipa ena éreanana tiávahácanahi ena achaneana. Camurianahivare ena nacanararuana tayehe eta najumanaini, nacapajasisirapahi te nachuti eta aceite.

*Ema Herodes masamairiricapa eta máichaqueneanahi ema Jesús*

(Mt 14.1-2; Lc 9.7-9)

<sup>14</sup> Tacahe, ema Herodes ema aquenucahi tayehe eta Galilea masamairiricavarepa eta máichaqueneanahi ema Jesús, taicha náechajisihahi namutu ena achaneana. Nararihi ena téjecapavanahí eta napanereruana, ánipa nacahe:

—Ema maca Jesús, ¿váhipuca émaina ema Juan Tícachasirícarahíni macaparuhi ema Herodes? Tichavahichupuca titareca. Étapuca tacahehi puiti maratahahi maicha eta tiáramicareana —nacahepa.

<sup>15</sup> Nararihisera ena apamuriana nacahepa:

—Émapuca ema víyarahaini profeta Elías, téchepucahi.

Ena apamuriana nacahepa:

—Émarichuhi profeta, macutiquenehi ena náinapureanáini antivuanaini. Váhisera téchepucaimahi éma —nacahepa.

<sup>16</sup> Émasera ema Herodes, eta masamairirisirahi, macahepa:

—Németeacahi ema maca émaripa ema Juan, ema nímiyuchatípiquenurehi, téchepucahipuca te máecari —macahepa.

*Eta táichararacavahi eta máepenirahi ema Juan*

(Mt 14.3-12)

<sup>17-18</sup> Eta macapasirahi ema Herodes ema Juan, ani tacahe eta táichararacavahi: Te jena año, ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacahe, ema Juan macajachavaca éna eta naviracacairahi. Étapa tímicatichahi ema Juan, sucatichapa esu Herodías. Tásicha, ema Herodes máeratacapa te cárcel ema Juan, macavanairipipa náitiaca te carenapi.

<sup>19</sup> Esu Herodías, téavicava eta sucatichirahi ema Juan. Suvarahahi sucapaca éma.

<sup>20</sup> Váhisera suratahahini, taicha matsirihacahi mapicauchahí ema Herodes ema Juan, taicha máechahí téavicava eta máurivahí ema Juan. Máimatihibare eta mavaneruhí ema Viya. Eta tacahehi, macatiuchahí éma apaesa tacuija suícharaca ésu. Táitusiava, ema Herodes máuricapa masamararacahi eta máimiturapiana ema Juan; váhisera máituruequenehahini tájahapuca máichararacavayarehi.

<sup>21</sup> Tacahe, eta te jena yati ticaijaremuhupa ema Herodes, sucamapurapa esu Herodías eta máepiyasirahi eta ichape piesta ema Herodes. Máichuhapa ena máevanachana énapa ena oficiáleana, énapa ena ticaimahaqueneana ticavasanahi tayehe eta Galilea.

<sup>22</sup> Te tinicanapa téranapa, esu suchicha esu Herodías tisia-papa eta te návihahi ena achaneana. Esenachicharipa ésu. Tírimaicapa te namirahu. Ema Herodes máuricainehi íchape, énapa ena machimarana.

<sup>23</sup> Tacahe, ema Herodes máichapa ésu:

—Nujuracha te pimirahu. Piyaseacanu tájahapuca eta pivarahaquenéna. Núti níjaracaviyare jácani piyasearu-nuyare, tayanapane váciticaca eta nímahaqueneana —máichapa ésu.

<sup>24</sup> Tacahe, tiyanapa tiúchucapa esu amaperu. Suyasere-panapa esu suena, ánipa suícha:

—¿Tájahapuca eta tuyaseacaini eñi ñina Herodes? —sucuhepa.

Tásicha, suíchapa esu suena:

—Piyaseacaya eta ñichuti eñi Juan, puítinarichu ñíjaracavi —suíchapa.

<sup>25</sup> Enurujipa tichava tisiapa esu amaperu eta te mávihahi ema aquenuca Herodes. Suyaseacapa éma, ánipa suicha:

—Nuvaraha píjaracanu puítinarichu eta ñichuti eñi Juan eñi tícachasiricarahi. Píjaracanu te curuja —suíchapa.

<sup>26</sup> Tásicha, eta masamirahi eta juca suyasearuhi ema rey Herodes, ichaperinehi eta mapanereresirahi. Váhisera mávarahahini mavayuacahini ésu táicha nasamaripahi ena machimarana eta máijarasirayarehi eta suyasearuyarehi ésu.

<sup>27-28</sup> Tacahe, enurujipa mavaneca ema suntaru eta te cárcel. Mayuchatipiquenuhapana ema Juan. Tacahe, mámapaipahi eta machutini te curuja. Máijaracapa esu esena amaperu. Tásicha, suíjarapanapa esu suena.

<sup>29</sup> Te nasamairircapa ena máimitureana ema Juan, tiyananapa náepanapa eta máquehéni, náecarapanapa.

*Ema Jesús máitaparahavacahi máenicavaca ena camurique-neana achaneana*

(Mt 14.13-21; Lc 9.10-17; Jn 6.1-14)

<sup>30</sup> Tacahe, tichavanapa tiúrujicavana ena apóstoleana mayehe ema Jesús. Nametacapa tamutu eta náichaque-neanapahi étapa eta najacapirahi ena achaneana etá náimiturapianahi.

<sup>31</sup> Tacahe, máichavacapa ema Jesús:

—Tiuri. Tájina táichava. Puiti viyana vácarichu eta te mávapahi apaesa vinaraca ánipina —máichavacapa.

Taicha vahi téjiacavana ena achaneana. Tévachajirica-canahi tiyanana. Vahi náitujicavahini nanicanumahini ena apóstoleana émapa ema Jesús.

<sup>32</sup> Tacahe, tiyananapa te pacure, tiávacuhanapa. Nacai-juhepa te mávapahi apauehe.

<sup>33</sup> Énasera ena achaneana nanecapaichucha eta nayanirahi. Camurianahi ena tímatañanahi. Tacahe, tiyananapa tijunapanapaipa, nametapanayarehi ena apamuriana achaneana. Tásiha, tiúrujicavanapa ena tiásihana te tamutu avasareana.

<sup>34</sup> Te tiúcupaicapa ema Jesús, máimahapa ena camuriqueneana achaneana natarihiripahi. Tétavicavainehi eta majapanuiravacahi, taicha nacutihu eta uvesana nájina tijaneacaina. Tacahe, máimitumuriharipa. Camuri eta máimiturapiana. Tiuna eta máimitusiravacahi.

<sup>35</sup> Te cáperéhipa, ena máimitureana napauchapa éma. Náichapa:

—Cáperéhipa juca sache. Tiyerehivacahi eta pétiana.

<sup>36</sup> Tacahe, táuricapa pimetacavaca ena achaneana nayanapa, navachareca eta nanica te jácani isanitiana, avasarechichananapuca te vichacayarahahanahi. Taicha ani, tájina naviyaimahi eta nanicahini —náichapa.

<sup>37</sup> Majicapapasera éma:

—Íjaraca étina eta nanica.

Éna náichavare:

—¿Pivarahapuca viyana vivachareca eta pan? Tacamunuhi vácayeheshini eta camuri plata apaesa námutupaini vítarahahini vénicahini apaesainahini návaminahini. ¡Vahi taratahahini eta dies mil páneana! —nacahepa.

<sup>38</sup> Tacahe, mayaserecapa ema Jesús:

—¿Áyana eta pan ecayehe puiti? Eyana ímaha.

Te náechapa, nametacapa:

—Cíncochichaichu eta pan, apiquipa eta jima jitaruca —nacahepa.

<sup>39</sup> Tacahe, macavanairipipa náejahahacapaicahini namutu te muíjipahi, náijamuripaichuhu.

<sup>40</sup> Tacahe, téjahapaicanapa ena achaneana. Náijamuripaichuhu eta náejasirahi. Cincuentanapahi, ciéntoanapahi.

<sup>41</sup> Tacahe, ema Jesús mavehapa eta cincoquene pan étapa eta apiqui jima. Máesenicapa eta te anuma. Mahasulupayachapa ema Viya. Mayuvetutujicapa eta pan, tásiha máijaracapa ena apóstoleana. Éna, náijaracapa ena achaneana. Énerichuvare mayuvetutuhesinavare eta apiqui jima. Tisimurivacapaipa eta náijaraca.

<sup>42</sup> Tacahe, námutu tinicana, tisatueanapa.

<sup>43</sup> Tásiha, nacaemacharichahavare eta doce saye ichapehiana táinicachavacaichahava eta náemacharajiana eta pan étapa eta jima.

<sup>44</sup> Camuriana ena máeniruanahi. Te nataracu, natarihihi ena cinco mílqueneana ajairana.

*Ema Jesús mapaicaeca eta une  
(Mt 14.22-27; Jn 6.16-21)*

45 Te tamutupa, enevanepa mavanecahi ema Jesús tiávacuhana eta te pacure ena máimitureana. Tínapucanayarehi tiánuecana te apachara eta te avasare Betsaida. Émasera ema Jesús manasiyarehi máevatamurihanumayarehi ena achaneana.

Tásicha, tiyananapa ena máimitureana.

46 Tacahe, te tamutupa eta macametavairahi ema Jesús nayehe ena achaneana, tiyanapa tiápanahi tayehe eta anuquehe mari. Tiyujaracayarehi tayehe.

47 Tacahe, te tiúyatipa jena yati, ema Jesús manasirichaha macarichuhi eta te anuquehe mari. Ena máimitureana itupierecanaipa tayehe eta cáquiure.

48 Tásicha, tachimaracavacapa eta muraca técaticava, nácapaquihapaipahi. Te tijararahipa, ema Jesús máimahapa eta nanausirapahi muraca. Tacahe, tiyanapa macapayamuriha. Mapaicaecapaipa eta une. Máetavicavacapaipasera.

49 Éna máimitureana tipicanarinehi eta náimairahi eta mapaicaesirapahi eta une, náimijachaipahi cunare.

50 Tipiararecanapa namutu eta náimairahi. Máechajicavanepasera éma. Ánipa maicha:

—Vahi ecupica. Nútichucha. Étumechava —máichavacapa.

51 Tacahe, mapauchapa éna. Tiávacuhapa nayehe. Tacahe, tíjahúchavapa tíchecapa eta técaticava. Náramirinehi ichape ena máimitureana.

52 Taicha vuíchaha nacaicutiarahini eta tacayemaquenehi eta macaejapasirahi eta pan, eta táimereuchirahi éma eta vanairucairahi me Viya. Muracasamuremurianarichaha.

*Ema Jesús macanaraca ena nacajumaqueneana ticavasana te Genesaret  
(Mt 14.34-36)*

53 Tacahe, te apanapa sache, tiápechavanavarepa tiánuecana eta cáquiure. Títecapanapa eta te avasare ticaijare Genesaret.

54 Te tiúcupaicanapa, nátiacapa eta napacure. Ena natarihi-queneanahi náimativanepa ema Jesús.

55 Tásicha, tiyananapa tijunapana timetajiricanayarehi tayehe tamutu eta avasarechichana tachacayarahahanahi. Tacahe, tiúrujicavanapahi ena achaneana te jácani máitecapihapahi ema Jesús. Námavacapaipahi eta te áchuji ena nacajumaqueneana.

56 Énerichuvare, te jácani mayanihapahi te acheneana téhepuca cállleana, nanaquipaicapahi ena nacajumaqueneana. Tacahe, nayaseacapahi éma másapirainahíni náemamajiaca

eta tacheyarapi eta mamuiriha. Tacahe, nácani témamajiacanapahi, enevanepaipa tinaracanapahi.

## 7

*Ema Jesús mame taca ena achaneana eta timae perajicarahi  
(Mt 15.1-20)*

<sup>1</sup> Tiuri, te apanapa sache, náitecapauchapa ena apamuriana fariséoana énapa ena escribánoana, tiásihanahi tayehe eta Jerusalén. Témeñahavanapa eta mayehe ema Jesús.

<sup>2</sup> Te nataracu ena máimitureana ema Jesús, nararihi éna vahi nacasipavahunumahini eta nanisirahi. Tacahe, ena fariséoana, eta náimairahi eta namaitauchirahi eta nayeherepihi, ichaperinehi eta nasemanevahi, taicha náimijarechahi “máeperaji” eta juca.

<sup>3</sup> Taicha namutu ena israelítana, napicauchahi eta nayeherepiana ena náchucanaveanaini, navetijipa ena fariséoana. Te vahi ticasipavahumanahi, váhivare náisapaimahi tincana. Taicha éna vahi návaraha tánasihíni eta tachipejihini ánicchichainahini, taicha tipicanahi tamaeperajicahini eta náchanevana.

<sup>4</sup> Étaripa násihapahipuca te mercado, te plázapuca, te títecapanapa te napena, ticasipavahuanayarehi. Mavera eta apamuri nayeherepiana hi tipicauchacareanahi nayehe, étaripa eta nasipasiraparaca eta náereresiana, étapa eta jarra, étapa eta návacuruuhiana étapa eta catre náimasirare.

<sup>5</sup> Tacahe, nacajachapa ema Jesús ena fariséoana énapa ena escribánoana. Ánipa náicha:

—Pímaha. Ena pímitureana vahi náitauchahini eta viyeherepi. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? —náichapa.

<sup>6</sup> Tacahe, majicapapa ema Jesús, ánipa maicha:

—¡Éti ecaijarehi apimirahe! Tatupiruvahi eta máechajiruvahi ema Viya, téchajisiahehi éti eta te Sagrada Escritura. Ánipa macahe: “Ena nani achaneana, tétsérójicanuanahi te najaca; váhisera táetupicavahini te nasamureana.

<sup>7</sup> Téneuchavanahí eta nuyehé, tamapurujihisera eta náeneuchiravahi. Nacaerajicahivare eta nuvanairipiána; tasapihapa náimicapicauchahi eta nayeherepiána táuchurechucha te napanereruana ena náchucanaveánaini” macahepa ema Viya.

<sup>8-9</sup> Ichape eta éjecapiravahi éti, taicha tasapihapa epi-cauchahi eta eyeherepiána. Étasera eta mavanairipi ema

Viya, vaipa epicauchahini. Tasapihapa épuruhi eta mavanairipiana taicha tivayuacahehi ichape eta ítauchirahi eta eyeheripiana.

<sup>10</sup> Émarichuhi ema víyarahaini Moisés tiájuchahi eta mavanairipi ema Viya eta viyehe: “Pipicauchaya pémunacayareva ema piya ésupa esu pena”. Jucarihi eta apana vanairipi: “Mácani tiúmehahi ema maiya ésupa esu maena, vahi tijapanucarémahi nacapacayarehi”.

<sup>11-12</sup> Étisera vahi epicaucha eta júcana vanairipiana mayehe ema Viya. Taicha te mararihipuca mácani achane ticamavahupuca me Viya eta máimahaqueneanahi, eta ímiturapi éti “Vaipa tatuparacaimahi ema achane eta máimicatasiraya ema maiya ésupa esu maena”.

<sup>13</sup> Ani tacahehi eta ecaepahaira eta tasuapacarevahi eta mavanairipiana ema Viya. Tasapihapa, ímicapicáuchahi eta eyeherepianachucha. Jararihivare eta apamuriana eta ejecapiravanahi tavasiqueneanahi –máichavacapa ema Jesús.

<sup>14</sup> Tacahe, máichuhapa ena achaneana, náurujicava eta máimitusiravacayare. Tásiha, máichavacapa:

—Nuvaraha esamanu yátupina, apaesa ácaicutiara.

<sup>15-16</sup> Tájina timaeperajicaina eta viáchanevana te vahi vicasipavahunumahi te vinicayare. Vahi étaparacaina eta vinicaqueneana. Étasera eta jácani evainarajivana táuchureanapuca te ejaca, étapa eta evainarajipanereruana; jéhevare éta timaeperajicahehi –máichavacapa.

<sup>17</sup> Tacahe, te tiyanaracanapa ena achaneana, macarinepa ema Jesús énapa ena máimitureana, nayaserecapa máitametacavacahini eta máimiturapi.

<sup>18</sup> Tacahe, máichavacapa:

—¿Énerichuvare éti mapanererurehe? ¿Váhipuca ácaicutiarahini eta juca? Tamutu eta juca tasiapaqueneanahi te vijaca vinicasareanahi, vahi timaeperajicahavimahi, taicha vahi tasiapa te visamure.

<sup>19</sup> Tatupiruhi te vijuhe. Tásiha, te tiúchucapa eta, apanapa eta táuchusihahi –máichavacapa ema Jesús. (Eta máichiravacahi eta juca, máimicaecherachapa eta táurivahi tamutu eta tinicacareana.)

<sup>20</sup> Macahevarepa:

—Étasera jácani panererucana tamauriqueneana, te náisapavapuca ena achaneana, étara timaeperajicavacahi éna.

<sup>21-22</sup> Taicha te amuhe eta nasamureana napanerechahi eta tamauriqueneanahi. Ema achane mapanerechahi maveha esu apuna esena mayena ema apuna achane. Esu esena supanerechahivare suveha ema apuna achane suima esu

apano esena. Éna amaperuana napanerechahi eta natuhusivaya. Nácani tipanerechanahi eta ticaparecana, tiámerecana, tivayuarecana, téchajihihana. Te nasamureana, najamuracha eta apayeheana, ticapinarurahiana, tétsesarajicavana eta nasiñavairahi. Mapicaurairahana, camuriqueneana eta napanereruana máecharaireana.

<sup>23</sup> Tamutu eta juca panererucana tamauriqueneana tiásihahi te nasamureana. Jéhesare, eta júcana eta timaeperajicahi eta náchanevana ena achaneana — máichavacapa ema Jesú.

*Esu ésuna esena apavasana sucasiña ema Jesú  
(Mt 15.21-28)*

<sup>24</sup> Tacahe, tiyanavarepa tipaica ema Jesú, énapa ena máimitureana. Nacaijuheyarehi eta avasareana táunavanahia eti provincia Siria. Tásicha, títecapanapa te jácani peti. Váhisera mávarahahini náechahini ena apamuriana achaneana eti matiarihirahia. Tásihasera náecharichucha éna.

<sup>25</sup> Tacahe, susamairiricapa esu ésuna esena. Ésu, apavasanahi, sirofeníciana. Eta suéchejiriruva eta griego. Esu suchicha mávaháruhi ema émana éreana.

<sup>26</sup> Títecavanepa esu, suépuymirauchapa te mamirahu ema Jesú. Tiyaseuchavapa mayehe ema Jesú eti máimijunijicahini ema éreana suyehe esu suchicha.

<sup>27</sup> Tacahe, máichapa esu:

—Nativaya néchapajiricavaca ena nujaneanana. Taicha vahi táuricahini ásapihahíni néchapajiricahehini éti apavasanana, émétavicahini ena nujaneanana —máichapa.

<sup>28</sup> Esu esena sujicapapa:

—Énehineni tacahehi, tátachicha. Yátupihi vahi pijaneana-nuinahini. Pájapanunusera, picatajicanuchuchaini. Vítí apanava vácasíñavahini eti piyehe eti vítátijivairaina —suíchapa.

<sup>29</sup> Tacahe, máichapa ésu:

—Tiuri eti péchajiriruva. Piyanapa pichava te pipena. Táichavene eti picasiñairanuhi, nímijunijicaripa ema éreana suyehe esu pichicha —máichapa.

<sup>30</sup> Tacahe, tichavapa ésu te supena. Suchimapapa tívecahi esu suchicha te sucamane. Jéhesaréinehi, májinariipa ema éreana, majunijiacaripa ésu.

*Ema Jesú macanaraca ema túhuquiña upa*

<sup>31</sup> Tacahe, tiyananavarepa tipaicana najunijicapa eti provincia Siria. Nánucuhapa eti provincia ticaijare Decápolis. Tacahe, títecapanapa eti te tachausi eti cáquiure Galilea, te tinapaica te táuchusine sache.

<sup>32</sup> Tacahe, ena achaneana námapa ema émana achane mayehe ema Jesús. Túhuquiña, úpavare ema achane. Náechajiuchapa eta manaca eta mavahu mayehe ema achane, macanarasirayarehi.

<sup>33</sup> Tacahe, ema Jesús mañajichapa ema achane nayehe ena achaneana. Manacapa eta masuveraqui te maquiñana. Tacahe, tiátutuquivauchavapa. Tásiha, máemamacapa eta manene ema achane.

<sup>34</sup> Tacahe, máesenicapa te anuma. Tiúmitipa. Tacahe, máichapa:

—¡Téchujihapa eta piquiñana!

<sup>35</sup> Enurujipa tisamarahipa ema achane. Tijimuyapa eta manene, tiúripa téchejica.

<sup>36</sup> Tacahe, máimichavapa ema achane nayehe ena majeanaana. Matuparacapa éna eta nacuija nametaca. Énasera timetajiricanaichucha.

<sup>37</sup> Tétavicava eta náramirahi ena nametaruuanahi. Ánipa nacuhe:

—Tétavicava táuricacareva tamutu eta máichaqueñeanahi ema Jesús. Téchajicanapahi ena úpana, tisamarahianavarepa máicha ena túhuquiñana —nacahepa.

## 8

*Ema Jesús tiápechava máenica ena achaneana  
(Mt 15.32-39)*

<sup>1</sup> Tacahe, eta juca sácheanahi tiúrujicavanapa ena ichapemu-riqueneana achaneana te mávihahi ema Jesús. Mapanaripa sache nacahehi ena achaneana, tájinaipa nanicahini. Tacahe, máichuhavacapa ema Jesús ena máimitureana. Máichapa:

<sup>2</sup> —Nujapanuvaca ena nani achaneana, taicha mapanaripahi sache puiti eta nacahehi eta viyehe. Tájinaipavare naviyahini nanica. Téchurihanaripa eta nanicaquene.

<sup>3</sup> Te névatacavaca nayana te napenana, machu náquipaicava te achene taicha vaipa túmevacaimahi eta náecuavahi. Taicha natarihi ena tiásihanahi te tiyerehiana. Vénicavacayare —máichapa.

<sup>4</sup> Tacahe, najicapapa ena máimitureanahi. Ánipa naicha:

—¿Távihapucaini viviyahini eta vénishayarehi ena nani camuriqueneana achaneana? Eta te juca mávapahi vámahi, tájina vítusiáváimahi eta tinicacareana —nacahepa.

<sup>5</sup> Tacahe, mayaserecapa éna. Ánipa máicha:

—¿Áyanachaha eta pan eta iámaqueneanapahi?

—Jucarihi siéterine —náichapa.

<sup>6</sup> Tacahe, macavanairipipa eta náejahapaimurihahini nmutu ena achaneana. Tacahe, mavehapa eta siétequene pan,

mahasulupayachapa ema Viya te anuma. Tásiha, mayuvetu-cavacapa, máijaracapa ena máimitureana. Éna, náijaracavacapa ena achaneana.

<sup>7</sup> Tatiarihihivare eta ánimurichicha eta jímachichana. Mahasulupayachavare ema Viya tayehe eta jima. Tacache, mavanecavarepa eta náijarasiravacayare ena achaneana.

<sup>8</sup> Tacache, tinicanapa namutu, tisatuheanapa. Tacache, nacurujicapa eta náemacharájiana. Siete sáyerichahahivare eta náemachana.

<sup>9</sup> Eta nasimutuvahi ena tinicanahi táetavica eta cuatro mil achaneana. Tacache, te tamutupa eta juca, máevatamurí-hasarepa ema Jesús ena achaneana nayanaya nachava te napenána.

<sup>10</sup> Enurujipa tiávacuhanapa te pacure ema Jesús énapa ena máimitureana. Tiyananavarepa. Tiánuecana nacaijuhepa eta te avasare ticajare Dalmanuta.

*Ema Jesús macajachavaca eta namasuapajiraivahi ena fariséoana*

(Mt 16.1-4; Lc 12.54-56)

<sup>11</sup> Tacache, títecapanapa ena apamuriana fariséoana. Tépanavanapa nacanarajirica ema Jesús. Eta navarairahi náimiaquipaicayarehi, nayaseacapa máimerecahini eta tiáramicareana, máimerecavahini te yátupihipuca vanairucahi me Viya.

<sup>12</sup> Tásiha éma, tichuruamichavarine muraca. Tacache, máichavacapa:

—¿Tájaha tacayema eti achaneana eyaseacanu nímereca eta tiáramicareana? Núti nímatihe. Vahi esuapanuimahi te nímerecapucaini eta tiáramicare. Tásiha, váiparine étina tatu-paraca ímahahini eta tiáramicareana —máichavacapa.

<sup>13</sup> Tacache, majunijicavacapa éna. Tiyanavarepa tiávacuha te pacure. Tiyananapa tiánuecana te apachara eta cáquiere.

*Ema Jesús máimicuticha eta levadura eta apimirairanahi ena fariséoana*

(Mt 16.5-12)

<sup>14</sup> Tiuri puiti, náemitisicahi ena máimitureana eta nanirrucuha. Tatiarihihisera eta étanahi pan eta te pacure.

<sup>15</sup> Eta nayanirahi, máimitumurihapa ema Jesús éna. Máichavacapa:

—Tímaticarehi eyehe eta levadura eta tasisijisira tamutu eta masa. Tacutirichu eta taparesasirahi eta apimirairavacahi ena fariséoana étapa eta tacaeñamarasira eta ecaimahaquerayare. Vahi ecucuti ena políticoana. Échapaváicha tayehe, machu éhica éna —máichavacapa.

<sup>16</sup> Tacache, náichacacapa ena máimitureana. Ánipa nacaehe:

—Tímicajachahavihi eta vémitisisirahi eta pan. Eta tacahe, macahehi tayehe eta levadura.

<sup>17</sup> Éma máimatiacavacapa. Tásicha, máichavacapa:

—¿Tájaha tacayema ecahechajiruvahi eta émitisisirahi eta pan? ¿Vuíchahacaru ácaicutiarahini? ¿Tájinacaruichaha epane-reruina éti? ¿Muracachuticherichaha?

<sup>18</sup> Tamapurujichuchapuca eta ímairahi eta níchaqueneana. ¿Vuíchahacaru ácaicutiarahini? Tamapurujipuca eta esami-rahi eta nímiturapiana.

<sup>19</sup> ¿Váhivare échahini eta nucaejasirahi eta cíncinquene pan, naniruhi ena cinco mílqueneana achaneana? ¿Áyanahi sáyeana eta náemacharajiana evehaqueneanahi? —máichavacapa.

Tacahe, najicapapa:

—Doce sáyeana.

<sup>20</sup> —Étapa eta siétequene pan naniruhi ena cuatro mílqueneana achaneana, ¿áyanahivare sáye eta náemacha-rajianahi evehaqueneanahi? —máichavacapa.

Najicapavare:

—Siete sáye —náichapa.

<sup>21</sup> Tacahe, máichavacapa:

—¿Vuíchahacaruva ácaicutiara? —máichapa.

*Ema Jesús macanaraca ema émana achane púchuqui eta te avasare Betsaida*

<sup>22</sup> Tiuri, títecapanapa eta te avasare Betsaida. Ánaqui, námapa ema achane púchuqui. Náechajiuchapa éma eta macana-rasiraya ema Jesús.

<sup>23</sup> Tacahe, ema Jesús macaratavauchapa ema púchuqui, mámapa te tachachacu eta avasare. Tacahe, mayajihau-quichapa eta mótature eta te máuquihana. Tásicha, manacapa eta mavahuana eta te machuti. Tásicha, mayaserecapa:

—¿Pímairiricapa? —máichapa.

<sup>24</sup> Tacahe, téseninicapa ema púchuqui. Macahepa:

—Nímairiricapa apaesa. Eta nímairahi ena achaneana, ticutimahichuchasera yucuquiana, tiyamuricanahisera —máichapa ema púchuqui.

<sup>25</sup> Tacahe, ema Jesús mápechavare manaca eta mavahuana eta te máuquihana ema púchuqui. Te mavehapa eta mavahuana, yátupipa tijarahipa eta máimairirisirahi. Tamutupa máimaha.

<sup>26</sup> Tacahe, ema Jesús máevatacapa ema púchuquinihi, mayanapa te mapena. Máichapa:

—Piyanapa pitupiru te pipena. Váhisera picusiapa eta te jena avasare eta piyanihaya —máichapa.

*Ema Pedro máimereucha ema Jesús émairahi ema Cristo  
(Mt 16.13-20; Lc 9.18-21)*

<sup>27</sup> Te táequenepa eta juca, tiyanavarepa tipaica ema Jesús, énapa ena máimitureana. Nacaijuhepa eta te avasarechichana tachacaya eta ichape avasare ticajare Cesarea, máepiyaruhi ema rey Felipe. Eta napaisirapahi, mayaserecapa ena máimitureana. Ánipa maicha:

—¿Tájaha nacayema ena achaneana eta nuyehe? ¿Nájahanuhipuca náimijachanuhi núti? —máichavacapa.

<sup>28</sup> Tacahe, najicapapa:

—Ena apamuriana náimijachavihi téchepuca ema Juan Tícachasircarrahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema mácani apana profetaini antívuini, téchepucahi —náichapa ena máimitureana.

<sup>29</sup> Tacahe, tiápechavavare mayaserecavaca:

—Étiyapa, ¿nájaha ímijachanuhi núti?

Majicapavanepa ema Pedro:

—Pítira yátupiquenévihi Cristo —macahepa.

<sup>30</sup> Tacahe, matuparacapa muraca éna, nacuija nacumetaca eta émairahi ema Cristo.

*Ema Jesús tímereuchava eta máepenirayare  
(Mt 16.21-28; Lc 9.22-27)*

<sup>31</sup> Tacahe, tépanavapa máimitucavacahi eta táichararacavare eta máepenirayare. Ánipa maicha:

—Nuti Manerejirunuhi ema Viya, nutuparahaichuhi ichapemuri eta nucatajivairayare. Tépurunuanayare ena tuparairucana énapa ena aquenucarohana. Éna, tímicapacanuanayareva. Mapanayareichuhisera sache eta nucaheyare eta népenirayare. Tásiba, nuchavayarehi néchepuca —macahepa.

<sup>32</sup> Máimicaecherachapa eta macayemaquenehi. Tacahe, ema Pedro máiputsiacapa ema Jesús. Ánaqui macajachapa, máijarasiravahi eta mapanereruhi.

<sup>33</sup> Tacahe, téviurucavapa ema Jesús. Máesenicapa ena apamuriana máimitureana. Tásiba, macajachavarepa émapava ema Pedro. Máichapa:

—Píti, téjecapavahi eta pipanereruhi. ¡Pínajica eta juca tamauriquenehi! Pivarahapa pihapapica eta mapanereruhi ema Viya. Eta juca pipanereruhi tacutihi eta mapanerueruanahi ema Satanás, énapa ena machanerana —máichapa.

<sup>34</sup> Tacahe, máichuhavacapa ena máimitureana énapa ena apamuriana achaneana. Máichavacapa éna:

—Nácani navaraha náehicanu, tacamunu náinajica tamutu eta tihapapirica eta náehisiranuhi. Nacaravahuyareva eta nímiturapiana.

<sup>35</sup> Nácanisera téñamanahi eta náitaresira, tiávamirahuayanaya eta náehisiranu, énajivayare ticamitiequenehavanaya eta náitaresira. Énasera nácani yátupi tíjaracavana téhicana eta náehisiranuhi, étapa eta námirahi eta tíurina échajirirucava, tayanapane táimicacavacapuca, éna titujicavanayare tiúchucuhayare eta náitaresiranaya.

<sup>36</sup> Énerichuvare nácani tacaeñamararuanahi eta nacaíma-haqueñiraya te juca apaquehe, tíñehiyare eta náitaresira taicha eta tacaeñamarasiravacahi tahapapiricavacahi tayehe eta náuchucuirayarehini. Tiyananainapa eta te yugu nacaicu-ñaiyayare.

<sup>37</sup> Taicha vahi máratahaimahi mácani achane mavacha-chahini eta máurivaya te apana vítaresira.

<sup>38</sup> Énaripa nácani titsirihanapuca téhicanuana, náimitsiri-hapuca eta nímiturapiana te namirahuana ena achaneana mapicauruirahana pecatumareana, núti apanava nutsirihayareva nayehe ena nani. Nucaerajicainapa ena nani, nuti Manerejirunuhi ema Viya, te táitecapapa eta sácheyare nuchavirayare aquenucanuinapaipa. Te jena sácheyare, námainapaipa núti eta majaraiva ema Tata, nucachanénapaipa ena sántoqueneana ángeleana.

## 9

<sup>1</sup> Énerichuvare máichavacapa:

—Nutupiruva numetacahe: Puítiripa te etaracu éti etiarihi éti vahi épenavanémahi, ímahanunumaya eta táepaniraya eta nítupajijiasiravahi eta nucatuparahairahi aquenucanuya me Viya —máichavacapa.

*Ema Jesús tihapamaichava eta máimahi*

*(Mt 17.1-13; Lc 9.28-36)*

<sup>2</sup> Tiuri, sáisipa sache eta nanasirahi ánaqui. Tacahe, ema Jesús manaquicavacapa ena máimitureana. Nacarinehi máma ema Pedro, ema Jacobo, émapa ema Juan. Tiyananapa eta te étana mari anuquehepana. Nacarichu éna. Eta ánaqui, náimahapa tihapamaichavahi eta máimahi ema Jesús te nami-ruhu éna. Tétavicavapa eta tajapuvahi tajararasirahi tamutu eta máquehe.

<sup>3</sup> Eta mamuiriha, táetaviucha eta tajanunumesirahi. Nájina tiratahaina tépachinacha tajanunumecahini náicha eta muíriare.

<sup>4</sup> Tacahe, tiáramicareanavarepa tímerecavana ena apina ajairana: ema víyarahaini profeta Elías émapa ema víyarahaini Moisés. Téchajiricavanaripahi mayehe ema Jesús.

<sup>5</sup> Tásicha, ema Pedro timisiapavapa, téchajicapa ema Jesús. Ánipa macahe:

—Tata Náquenu, tétavicavapa táuricacareva eta viávihairahi eta ani. Tiúripanahipucaini vépiyacahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —máichapa.

<sup>6</sup> Váhinéni máimatiquenehaini ema Pedro tájahahipuca eta mavarahaquenehi macayema. Namutu tíñacavana ichape ena mapanana máimitureana.

<sup>7</sup> Tacahe, tiáramicarevarepa eta úcaji táepacúmurihahi éna. Nasamavarepa eta mahu ema Viya tayehe eta úcaji. Ánipa macahe:

—Ema maca, ema yátupiquenehi nuchicha némunaruquenehi. Éma esuapayare —macahepa.

<sup>8</sup> Tíjahúchavavarepa, te náesenicavarepa, macarinehi ema Jesús. Nájinaripa ena apinana náimahaqueneanahi.

<sup>9</sup> Tacahe, te tichavanapa tiúcupaicanavarepa, ema Jesús matuparacavacapa éna. Ánipa maicha:

—Vuíchaha ecumetajirica eta juca ímahaquenehi puiti. Tiámainucava te néchepuca te nécarí núti —macahepa.

<sup>10</sup> Tásicha, nasuapa eta matupararuhi. Napanerequenehahisera eta macayemaquenehi. Tiyaserejiricacanapa:

—¿Tájahapuca tacayemarihi eta máechepusirayare te máecari? —nacahepa.

<sup>11</sup> Te tichavanapa tayehe eta anuquehe mari, nayaserecapa éma, ánipa naicha:

—Ena escribánoana tímítucanahi eta machavirayare tiápechavaya titareca ema víyarahaini Elías, tínapucayarehi eta pímeresiravayarehi piti Cristo. ¿Énapuca téjecapavanahi ena escribánoana? —náichapa.

<sup>12-13</sup> Majicapapa ema Jesús:

—Yátupi, ema víyarahaini Elías títecipayarehi, máetupiripanayarehi tamutu. Nútisera numetacahe: Títecaripahi ema Elías, váhisera náimatihini ena escribánoana. Váhivare najacapahini ena tuparairucana éma. Nacatianacahisera nacapacahi éma, tacuti eta táchajisihaqueneanahi eta Sagrada Escritura eta máichavaqueneyavarehi éma. Ene nucaheyare núti Manerejirunuhi ema Viya. Ticatianacanuanya-yarehivare, tépurunuuanayarehi. Ichape eta náemecatajichi-ranuyare eta náimicapasiranuya, tacutíhi eta táchajisihaquenehi eta Sagrada Escritura eta nuyehe —máichapa ema Jesús.

*Ema Jesús macanaraca ema amaperu mávaháruhi ema éreana  
(Mt 17.14-21; Lc 9.37-43)*

<sup>14</sup> Tacahe, te tichavanapa éna te návhahi ena apamuriana máimitureana, natarihihi ena camuriqueneana achaneana te nachacaya. Natarihihivare ena apamuriana escribánoana, nacanarajircavacahi ena máimitureana.

<sup>15</sup> Eta náimairahi ema Jesús, náraminehi ena achaneana. Tijunaparacanapa namutu náechajipanaya.

<sup>16</sup> Te títecapanapa te návhahi ena máimitureana, ema Jesús mayaseremurihapa éna. Ánipa maicha:

—¿Tájaha eta ecanarajircavacahi ena nani escribánoana? —máichapa.

<sup>17</sup> Tacahe, tiúchujicávanepa ema émana achane. Majicappa, ánipa maicha:

—Tata maestro, picatajicanu. Námapahi piyeho ema maca nuchichasami. Éma, vahi téchajica maicha ema éreana.

<sup>18</sup> Mavarahapa jácani ema éreana, máijahúchava máquipaicahi ema nuchicha. Tásiba, ema amaperu ticarisasajacapa, tinirataquiahechavapa muraca. Tivirajipa máicha ema éreana, muracaquihavarepa. Nuyaseacahi ena pímitureana eta náimijunairayarehini ema éreana. Váhisera náratahahini —máichapa ema achane.

<sup>19</sup> Tacahe, máichapa ema Jesús:

—¡Tétavicava emasuapajiraivavaca eti achaneana! ¡Cúvera-recachasicaini eta nucamichirahénahini! Iáma ani ema amaperu —máichapa.

<sup>20</sup> Tacahe, náepanapa ema amaperu. Te máimahapa ema éreana ema Jesús, enurujipa macaeñamacá ema amaperu. Tacahe, tiáquipaicavapa te apauehe. Téchariripáicavapa ticarisasajacapa.

<sup>21</sup> Tacahe, mayaserecapa ema Jesús ema maiya ema amaperu. Macahepa:

—¿Tiyereripahipuca eta juca máichavaquenevahi? —macahepa.

Majicappa ema achane:

<sup>22</sup> —Te amuyarichaha. Máejeharipa máquipaica ema mara éreana te yucu téhevare une, taicha mavaraha macapaca éma nuchicha. Pítisera, te piratahapuaini, pájapanuhavini picatijicahavisamíni —macahepa ema achane.

<sup>23</sup> Majicappa ema Jesús:

—¿Tájaha picayemaquene eta píchanuhi eta te nuratahahipucaini nútí? ¡Pítinapucaini, te pirataha! ¡Pácasíñanu! ¡Tamu tu titujicacare te ecasíñia eti achaneana! —máichapa ema Jesús.

<sup>24</sup> Enurujipa majicappa ema achane. Tijaranu eta majicapirohi, ánipa macahe:

—¡Nucasiñavi, tata! ¡Pímicatacanu eta néchuriasirahi eta nucasiñairavaina piyehe! —macahepa.

<sup>25</sup> Tacahe, máimahapa ema Jesús ena achaneana tiúrujicavanaripa mayehe. Tásiha, macajachapa ema éreana, ánipa maicha:

—¡Piti váinaraji, piti péтуhuquiñarahi, úpahi pícha éma! Núti nuvanecavi: ¡Pijunijicayare ema maca amaperu! ¡Vaipa picuchavaucha ema maca! —máichapa ema Jesús.

<sup>26</sup> Tacahe, tipiararecapa ema éreana. Mavayuyujicapa tiyayacare ema amaperu máicha. Tacahe, majunijiacapa ema amaperu. Ema amaperu ticutipa máepenaquene. Tacahe, nacahepa ena achaneana:

—Tépenasamipa —nacahepa.

<sup>27</sup> Tacahe, ema Jesús macaratavauchapa, macaechepucapa ema amaperu. Tacahe, titupihapa ema amaperu, tiúripa. Tájina máichava.

<sup>28</sup> Tacahe, te táequenepa, náiputsiacapa ema Jesús ena máimitureana. Nayaserecapa:

—¿Tájaha tacayemahi eta vahi váratahahini vicuchucahini ema éreana mayehe ema amaperu? —náichapa.

<sup>29</sup> Tacahe, majicapapa éma:

—Ema maca éreana, muracapanahi éma. Eta ecuchusiraina ena nani macutiqueneanahи tavaraha íchanumayare eta eyujarasiraina étapa eta íchiraya eta ayuna —máichapa.

*Tiápechavavare ema Jesús tímereuchava eta máepenirayarehi  
(Mt 17.22-23; Lc 9.43-45)*

<sup>30</sup> Tacahe, tiyananavarepa tipaicana. Nánucuhapa eta provincia Galilea. Vahi mávarahahini ema Jesús eta nasamairicahini ena achaneana eta nánucuirahi éna, machu nahapapricapucaini eta máimitusiravacahi ena máimitureana.

<sup>31</sup> Eta máimitusiravacahi, ánipa macahe:

—Nuti Manerejirunuhi ema Viya, járajapainapa eta sácheyare eta máijarasiránuya mácani achane nayehe ena tictorianacanuanahи. Ticaratacanuanayare, ticapacanuanayareva. Téhesera te mapanaquenénapa sache eta népeniraya, néchepucayare —macahepa.

<sup>32</sup> Énasera ena máimitureana váhiquene nacaicutiarahini eta macayemaquenehi. Natsirihacapasera nayaserecahini.

*¿Nájahapuca ema apóstole ticapicahupana?  
(Mt 18.1-5; Lc 9.46-48)*

<sup>33</sup> Tacahe, títecapanapa eta te avasare Capernaúm. Te peti náitecapihahi, mayaserecavacapa ena máimitureana. Ánipa macahe:

—¿Tájahapuca eta ejicapaemaracacahi eta epaisirapahi te achene? —macahepa.

<sup>34</sup> Tásicha, vahi najicapahini, taicha vahi návarahahini náimereuchavahini eta najicapaemajiricacairapahi eta nájahairayarepuca mácani ticapicahupanahí.

<sup>35</sup> Tásicha, téjacapa ema Jesús. Máichuhumuripa ena dócequeneana eta napauchirayare náejaca eta te machacaya. Tacahe, máichavacapa:

—Nácani navarahahí ticapicahupananayare te etaracu, tavaraha náechapajiricavaca namutu ena nachamuriana. Nacachuricayare eta náemunaraivahi nayehe ena apamuriana —máichavacapa.

<sup>36</sup> Tacahe, máichuhapa ema émana amaperuchicha. Majupacapa te namirahu éna. Tacahe, máichavacapa:

<sup>37</sup> —Nácani tijacapanayare ena amaperuana níchavenénahi núti, ena nani yátupi náimerecaya eta náemunasiranuhi núti taicha tímicutijiricavahi nútinhini najacapa. Taicha nácani tijacapanuanahí núti, énerichuyareva tacahehi eta najacapirahi ema Ticachichanu, ema tivanecanuhi —máichapa.

*Tímicatacahavianahí nácani vahi ticatianacahaviana  
(Lc 9.49-50; Mt 10.42)*

<sup>38</sup> Tacahe, ema Juan mamecapa, ánipa máicha:

—Tata maestro, vímahahi ema émana achane máquijicavahi ena éreanana te píjare ticutirinehi pítinahini píjaraca eta máitupajijiasiravahi. Tásihasera vicavacahi éma, taicha vahi viúmurivainahini —máichapa ema Juan.

<sup>39</sup> Émasera ema Jesús máichapa:

—Vahi ecucavaca éma. Taicha te máichahipuca ema mácani eta tiáramicare, mámapicahi eta níjare, vahi macaeca hinuhini.

<sup>40</sup> Tímicatacahavianahí nácani vahi ticatianacahavianahí.

<sup>41</sup> Jéhesare, nácani ticumpirachaheana eta une éti étaripa táchavenera eta étirahi nuchaneranairahehi nuti Cristo, vahi námapurujimahi. Yátupihi ticavachaequeneanayarehi éna —macahepa.

*Ichape eta máicuñayare mácani tímiquipaica te pecatu ena amaperuana*

<sup>42</sup> Tímiyanava eta máimituresirahi ema Jesús, ánipa macahe:

—Tacutiquene mácani tímiáquipaicaya nácani ena téhicanuanahí mánsuqueneanahí. Tiúripanahipucaini táijahúchavahini máepenahini mativainahini éma. Váhirichupucaini macucaicuñahini, taicha vahi macuimiaquipaicahini ena téhicanuanahí —macahepa.

*Ecunevaicha ichape, machu náepujuquichahé eta te yucu máemahacacaquene*

*(Mt 18.6-9; Lc 17.1-2)*

<sup>43-48</sup> Énerichuvare máichavacapa:

—Jéhevare, te tavarahapuca táimipecaturachaheyare eta evahu, tapamisirahénapapuca íchayare eta tamauriqueneana, tiúripana eyuchatica, apaesa vahi tacuímáquipaicahe tayehe eta pecatu. Étaripa eta ívape, te tavarahapuca támame íchayare eta tamauriqueneana, tiúripana eyuchaticavare, apaesa vahi tacuímáquipaicahe tayehe eta pecatu. Étaripavare eta iúquiha, te táimiaquipaicahepuca tayehe eta pecatu, tavarairahi táimahayare eta tamauriqueneana tájiparacana, tiúripana evecuhauquichava. Taicha tiúripana eta ejacapacarehi éti eta esiapiraina eta te mávasa ema Viya, tayanapane taejiacavapuca eta iáquehe. Páurehesamisera éti, te náepujuquichahepuca eta te yucu infierno, tayanapanéni tamutuchahahini eta iáquehe. Taicha ánaqui máemahacacaquenéhi eta yucu. Maitavacaca eta ecatajivairanayare.

<sup>49</sup> Tacuti eta vépurarajica eta icheve eta viniru, ene nacaheyare ena tiyana te yucu, ticaepuraracasianayare tayehe eta yucu.

*Vahi ecuisapa táepaha eta ecamunucarevahi*

*(Mt 5.13; Lc 14.34-35)*

<sup>50</sup> Eta icheve, téavicavahi eta táurivahi, taicha ticamunucarehi. Ene ecaheyare éti eta ecamunucarevahi eta nayehe ena achaneana. Váhi tacuepaha eta ecamunucareva. Vahi ecucuti eta tajachira eta icheve, taicha tójina eta táchavevainahini. Tacuijavare tahapapicahe eta iúrivahi —máichapa ema Jesús.

## 10

*Ema Jesús tímiturecahi, máechajisihahi mácani achane tínajicahi esu mayena*

*(Mt 19.1-12; Lc 16.18)*

<sup>1</sup> Tacahe, tiyananavarepa tipaicana te tinapaica te vana. Nánucuhapa eta provincia Judea. Tásicha tiánuecanapa eta te apachara eta cajacure Jordán. Ánaqui tiápechavanavare tiúrujimuriavana ena ichapemuriana achaneana te jácani máitecapihapahi ema Jesús. Tásicha, tímiturecavare éma, taicha tacahehi eta mayeherepihi.

<sup>2</sup> Tacahe, náitecapauchapa ena apamuriana fariséoana. Natanucahi eta ticaviureyarehi ema Jesús. Ánipa náicha:

—Vivaraha pimetacahavi ¿te táuricapuca máinajica ema achane esu mayena?

<sup>3</sup> Tásicha, ema Jesús mayaserecavarepa ema apana:

—¿Tájahasica eta tacayema eta mavanairipi ema víyarahaini Moisés? —máichapa.

<sup>4</sup> Najicapapa éna:

—Ema víyarahaini Moisés másapahi ema suima máejerare eta máinajisira esu mayena. Macavanairipiser májucha eta ajureca tayehe eta náinajicacaira. Tásicha, eta máijarasirahi ésu eta juca ajureca, máinajica ésu. Tásicha, vaipa mayenainahini —nacahepa ena fariséoana.

<sup>5</sup> Tacahe, ema Jesús máichavacapa éna:

—Ena iáchucanaveanaini, te jácani eta nasemairahi, náinajica ena nayenana. Ema víyarahaini Moisés másapahi tínajicacana táichavenehi eta namuracasamurevanahi éna, vahi náimitucacarehini táicha.

<sup>6</sup> Váhisera máuricahini ema Viya eta náinajicacahini. Taicha te tépanavainapa acane, ema Viya máijaracahi ema achane ésunayareichuhi esu mayenayare. Esu esena émanayareichuvare ema suímayarehi.

<sup>7-8</sup> Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavahi típutsicavanayarehi eta napenana ena ticachichana. Énajivainapa titáticacanayare. Eta navehacacairahi, tímicutijiricavaipa étanarinehi eta náqueheana” tacahepa. Éna, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini eta náinajicacairahini.

<sup>9</sup> Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

<sup>10</sup> Te taequenepa, nacarichuipahivare ena tayehe eta peti náitecapihahi, ena máimitureana nayaserecapa ema Jesús tayehe eta juca máechajiruvananahi.

<sup>11</sup> Tacahe, máichavacapa éna:

—Te máinajicapuca esu mayena mácani achane, eta maviraya esu apana esena, ticapecaturaipa éma me Viya. Ichapevare eta máejecapiravahi suyehe.

<sup>12</sup> Tacutiquene súcani esena, te suínajicapuca ema suima, eta suviraya ema apana achane, ticapecaturaipavare ichape ésu —máichavacapa.

*Ema Jesús mayujaraucha ena amuyana  
(Mt 19.13-15; Lc 18.15-17)*

<sup>13</sup> Tacahe, ena achaneana námavacapaipahi ena amuyana eta mayehe ema Jesús. Navarahahi máemamahacavacayarehi éna, mayujarauchavacahivaréni. Énasera ena máimitureana vahi náisapahini. Nacaichepaicapa ena tiámanapahi ena amuyana.

<sup>14</sup> Te máimahapa ema Jesús eta nacaichepaisirahi, tisemapa. Tásicha, máichavacapa ena máimitureana:

—Ésamiricachucha ena amuyana, náitecaichaha eta nuyehe. Vahi ecuacichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna.

<sup>15</sup> Nutupiruva numetacahe: Nácani vahi nácutihini ena amuyana eta nasuapajiraiva, vahi nuchaneranaimahi —macahepa.

<sup>16</sup> Tacache, majupacavacapa ena amuyana. Máemamasica-varepa, mayujarauchavacapa.

*Ema achane rico téchajiricava mayehe ema Jesús  
(Mt 19.16-30; Lc 18.18-30)*

<sup>17</sup> Tiuri, te apanapa sache, tiyananavarepa. Eta napaisirapahi, macahepaipa ema émana achane. Tijunapaipahi. Matupiru máepuyumiraucha te mamirahu ema Jesús. Mayaserecapa, ánipa maicha:

—Tata maestro, piti piúriquene ¿Tájahapucaini eta nícharacavahini eta nítujisiravaina me Viya máichecuaraquirénahini eta nítaresira? —máichapa.

<sup>18</sup> Ema Jesús majicapapa:

—¿Tájaha tacayema pímijarechanu “Piti piúriquene”? Mararíhi ema Viya. Jéhevare éma, tétavicavahi eta máurivahi.

<sup>19</sup> Téhesera te pivarahapuca pecha eta apaza vítaresira, pisuapayarehi eta mavanairipiana ema Viya. Píti pímatipa eta júcana: “Vahi picucapareca. Váhivare picuveha esu esena apayena. Váhivare picuamereca. Nacuija pépiyáequeneruina. Váhivare picuvayuareca. Pipicauchayareva ena ticachichaviana” —máichapa.

<sup>20</sup> Tacache, majicapapa ema achane:

—Tata, tamutu eta juca vanairipiana nusuapahi nítouchahi eta námaperuvahi, puíticha juca ajairairanuipa —macahepa.

<sup>21</sup> Tacache, ema Jesús máimaranacapa ema achane, máemunacainehi. Tásicha, máichapa:

—Jucarihichaha eta pítauchaqueneyare. Piyana, píjararecaya tamutu eta pímaqueneana. Tásicha, píjaracavacapa ena páureana. Jéhevare eta, pijacapayare eta pímaqueneyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

<sup>22</sup> Tásicha, témahasamurerinehi ema achane taicha eta macayemaquenehi ema Jesús. Ichaperinehi eta mapanereresirahi, taicha mavayuchahi eta macaimahaquenerahi. Macatiqueneharinehi tamutu. Tiyanachucha.

<sup>23</sup> Tacache, máesenicapa ema Jesús ena máimitureana natiarihiqueneanahi te machacaya. Tacache, máichavacapa:

—Yátupiquenehi máitujiana eta náijarasiravainahini eta náehisiranuinahini ena rícoana eta nasiapirainahini te anuma —máichapa.

<sup>24</sup> Ena máimitureana náramine eta nasamirahi eta máechajiruvana. Tásicha, mápechavacapa máicha:

—Nuchichanaveana, esamanu. ¡Máitujiquenehi eta náijarasiravainahíni téhicanuana ena ticasíñanahi eta nacaimahaquerah!

<sup>25</sup> Eta juca tímicutijiricavahi eta vipera camello, máitujihitánucuhahini te támicuejehe eta parirapa. Ene nacahehi ena rícoana —macahepa.

<sup>26</sup> Tásicha, náramine ena máimitureana, eta nasamirahi eta juca. Náichapa:

—¡Tétavicavahi eta tamaitujicacarevahi! ¡Nájina titujicavaimahi náuchuchuhahini!

<sup>27</sup> Tacache, máimaranaracavacapa ena máimitureana. Tásicha, máichavacapa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaquenénahini ema Viya, tamutu marataha —máichapa.

<sup>28</sup> Tacache, máichapa ema Pedro:

—Vítisera, Tata, vinaquicahi tamutu eta vicayehequeneana, vivarairahi véhicavi —máichapa.

<sup>29</sup> Ema Jesús majicapavarepa:

—Nutupiruva numetacahe: Namutu nácani nanaquicahi eta napena, najunijicahivare ena ticachichana\*, ena naparapenaveana, ena nachichanaveana; étapa eta nayehe apaquehe, te nanaquicahi táichavenehi eta náehisiranuhi, étapa eta námirayare eta tiúrina echajirirucava;

<sup>30</sup> tiápajucavainapa camuripanayare ena naparapenaveanayare ajairana, esenana, énapa ena náenanaveanayare, énapa ena nachichanaveanayare. Camuripanayareva eta náitsiriji-siravayare. Ticatichacareanayaresera nayehe ena apamuriana achaneana. Énerichuvare níjaracavacaya eta nápechiravayare titarecana. Máichecuaraquirenapa eta náuricacarevanayare.

<sup>31</sup> Maverahesera eti etiarihiqueneanahi puiti, váhirichuhi ecapicahuuhini. Te jena sácheyare, ichapepanainapa eta ecapi-cahuiraya. Éna puiti ticapicahuanahi, te táitauchavapa te jena sácheyare, énapavainapa téquenehanayare —máichavacapa ema Jesús.

*Ema Jesús tiápechavavare máechajisiha eta máepenirayarehi  
(Mt 20.17-19; Lc 18.31-34)*

---

\* **10:29** Te jácani apanana versióneana, tatiahi te juca lista eta táechajiruva: “ena nayenana”. Tájinaserá nalistanahini te libro antivupanahi. Eta tacachehi, vímatiequeneha vahi manacahini ema Marcos. Mácani apana achane mave-juchahipuca te Lucas 18.29.

<sup>32</sup> Te apanavarepa sache, tiyananavarepa tipaicana. Nacaijuhepa eta te Jerusalén. Tínapucapaipa ema Jesús te nami-ruhu ena máimitureana. Náramipaipahi éna. Natarihihare ena tipicanapaipahi. Tacahe, ema Jesús mañajichamuripa macaetavajimurihavarepa ena dóceana apóstoleana. Mameta-cavacapa eta jácani máichararacavayarehi éma.

<sup>33</sup> Máichapa:

—Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratacanuanayare ena tuparairucana. Tímicapanacanuanayarehi, taicha tíjararecanuanayare nayehe ena suntaruana romanoana. Éna, nájina najapanuquenéna.

<sup>34</sup> Ticaecahinuanayare. Tiátutuquichanuanayareva. Téstacanuanayareva. Tásicha, ticapacanuanainapa. Tásihasera, te mapanaquenénapa sache néchepucainapa te nécari — máichavacapa.

*Ema Jacobo émapa ema Juan nayaseacapa ema Jesús eta macájupahávacahini éna*

(Mt 20.20-28)

<sup>35</sup> Tacahe, te apanapa sache, témeñahavanapa ema Jesús ena apinana ticaparapecacana ema Jacobo émapa ema Juan. Náichapa:

—Tata maestro, vivaraha picatajicahavihini eta viyasearu-viyare —nacahepa.

<sup>36</sup> —¿Tájaha ecamunu? —máichapa ema Jesús.

<sup>37</sup> Najicapapa éna:

—Te jena sácheyare te péjacapa te piávacureyare aquenucavirayare, vivaraha picaejacahavihivarení te pichacaya, pijupahahavinahini, véjacaini te pivaure, ema émana te sapa — náichapa.

<sup>38</sup> Tacahe, majicapapa ema Jesús:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenevayare ecatajivairayare, te ecutinuyarepuca eta nucamichirayare núti? ¿Váhivarepuca epicayare ticapacaheana tacuti eta nacapasiránuyare núti? —máichapa.

<sup>39</sup> Ena najicapapa:

—Viratahayare vicamicha. Váhivare vipicaimahi.

Tásicha, máichavacapa:

—Yátupi ichape eta ecatajivairaya, vicuticacaya eta nacapasirahaviyare.

<sup>40</sup> Étapasera eta nucaejasiraya ena nujupahanayare, vaipa nútimaхи necha. Ema Tata Nucaiyaque, émahi tinerejicayarehi éna nujupahanayare —máichapa.

<sup>41</sup> Tacahe, te náechapa ena apamuriana apóstoleana, tisemajahuheanapa nayehe ena apinana.

<sup>42</sup> Tásicha, máichuhumuripa namutu. Máichavacapa:

—Écharichuhi éti ena aquenucana tayeha eta avasare, muraca eta nacavanairipira. Énaripa ena tuparairucana, tétavicavahi tisuapacareanahi eta nacavacurerahi.

<sup>43</sup> Váhisera ecuache éti nayehe ena echamuriana. Mácani tímerecavahi ticapicahupana, tacamunuhi máitátivacayare ena apamuriana.

<sup>44</sup> Te etiarihivarepuca éti evarahahi ínapuca, tacamunuhi ímerecavayare navanaraheyare ena echamuriana.

<sup>45</sup> Ecuitinuyare nuti Manerejirunuhi ema Viya. Vahi étina tímitecanu nucaitaticasihini. Nútiyarehi nítatihe éti. Énerichuvare níjaracavayarehi nímicapacava íchaveneyarehi éti camuriqueneanaya nucuchucureanayare —máichavacapa.

*Ema Jesús macaimairirica ema púchuqui ticaijare Bartimeo  
(Mt 20.29-34; Lc 18.35-43)*

<sup>46</sup> Tiuri, títecapanapa eta te avasare Jericó. Te apanapa sache tiyananayarepa. Náehicapaipa ena camuriqueneana achaneana. Te achenechacaya, matiarihihi ema achane púchuqui. Ticaijare Bartimeo, machicha ema Timoteo. Téjacahi tiyaseserecahi limosna.

<sup>47</sup> Te masamapa eta mánucuirapahi ema Jesús Nazareno, tipiaracapa. Ánipa macahe:

—¡Tátachicha Jesús! ¡Pítiqueneripa yátupiquenévi Cristo!  
¡Picatajicanupaini pájapanunuíni!

<sup>48</sup> Tacahe, nacavacapa camuriana ena natiahiqeenanahi. Náichapa:

—Pámatina. Vaipa picupiaraca —náichapa.

Émasera tipiaracaichucha:

—¡Tátachicha Jesús! ¡Pítiqueneripa yátupiquenévi Cristo!  
¡Picatajicanupaini pájapanunuini! —macahepa.

<sup>49</sup> Tacahe, tícheapaicapa titupihapa ema Jesús. Máichapa:

—Íchuha ema mara.

Tacahe, náichuhapa ema púchuqui. Náichapa:

—¡Pétumechava! Péchepuca, taicha tíchuhavipa ema Jesús —náichapa.

<sup>50</sup> Eta mananesirahi ema púchuqui, macamiricapa eta máepacuha. Téchepucapa, tiyanapa mapaukahahi ema Jesús.

<sup>51</sup> Tacahe, mayaserecapa ema Jesús ema púchuqui. Ánipa máicha:

—¿Tájaha picamunu nuyehe?

Majicapapa éma:

—Tátachicha, nuvaraha picaimairiricanupaini —macahepa ema púchuqui.

<sup>52</sup> Tacahe, máichapa ema Jesús:

—Tiuri, nuchicha. Táichavenehi eta picasiñairanuhi, pinaracapa puiti. Tiúrinapa eta piyaniraya pipaisiraya —máichapa.

Enurujirinehi tímairirica. Tacahe, máehicapa macacha-nepaipa ema Jesús eta mapaisirapahi te achene.

## 11

*Títecapapa ema Jesús eta te Jerusalén  
(Mt 21.1-11; Lc 19.28-40; Jn 12.12-19)*

<sup>1</sup> Tacahe, te apanapa semana tiyananavarepa. Tétavajicancanaya tayehe eta avasarechichana ticaijare Betfagé étapa eta Betania, te tachacaya eta cerro ticaijarehi Olivoquiji. Tiánehianapa eta te Jerusalén. Ánaqui, ema Jesús mavanecapa ena apinana máimitureana.

<sup>2</sup> Ánipa máicha:

—Eyanayare eta te jena avasarechicha Betfagé. Te ítecapapa ánaqui, ímahayare ticaitihahi eta burrico. Eta jena sárare mávaequehchéhaha. Nájinaichaha ticaperainahi. Evejapuacayare, iáminanuyare eta ani.

<sup>3</sup> Te natarihinapuca náeñama, emetacayare eta nucamunuirahi núti. Vahi táyeréimahi vímichavavaneyare —máichavacapa.

<sup>4</sup> Tacahe, tiyananapa ena vanairucanahi. Jéhesare, nachimapapa eta burrico. Ticaitihahi eta te calle te tapajachacaya eta peti. Tacahe, navejapuacapa.

<sup>5</sup> Náichapasera ena ticayeheana:

—¿Tájaha tacayema iámayare eta viyehe burrico?

<sup>6</sup> Tacahe, najicapapa éna, nametacapa eta máimiturapihi ema Jesús. Tásiba, náisapapa eta námirahi eta burrico.

<sup>7</sup> Tacahe, te títecapanapa te mávihahi ema Jesús, náepacamaequechapa eta náepacuhana. Tásiba, ticaperapa ema Jesús.

<sup>8</sup> Tacahe, tiúrujicavanapaipa ena achaneana. Camuriana éna tiácapanahi, náepacapaicapaipa eta namuirihana eta te mayanihayarepahi éma. Ena apamuriana navehapa eta cáchipaca. Nanacavare te achene.

<sup>9</sup> Ena tínapumirauchanapaipahi énapa ena téquenehanapahi, namutu tipiaracanapaipa. Ánipa nacahe:

<sup>10</sup> —¡Yare, Tata! ¡Píti yátupiquenévihi Cristo, réyvihi viyehe! ¡Asulupaya! ¡Vanairucaquenévihi píti me Viya! ¡Ichape eta vicunachiravi píti! ¡Asulupaya me Viya te anuma! ¡Viva ema Viáquenu! ¡Viva! —nacahepa.

<sup>11</sup> Tacahéhi eta máitecapirahi ema Jesús eta te Jerusalén. Matupirupa tiyanahi te Templo. Te tamutupa máimahahi, tiyanapa tichava te Betania, namutupaichu ena dóceana apóstoleana, taicha cápererehichicharipa.

*Ema Jesús májiquiha eta yucuqui ticaijare higo taicha máhiriquirehi*

(Mt 21.18-19)

<sup>12</sup> Te apanavarepa sache, te yáticarahi, tichavanavare te Jerusalén. Eta najunijisirahi eta Betania, técuhaipahi ema Jesús.

<sup>13</sup> Eta máimairahi tiyerehi eta étana yucuqui ticaijare higo. Ticainapucavahi ticápácaji. Tacahé, ema Jesús tiyanapa máimahapana te ticahihipuca. Téhesera te máitecapauchapa, máimahinehi tájina táhinahini. Tacarichuhi eta tapacajiana, taicha vúichaha tacahirainahini.

<sup>14</sup> Tacahé, máichapa ema Jesús eta higo:

—¡Piti pépiyainapa eta máhiriquireviyare! —macahepa.

Nasamararacahi ena máimitureana.

*Ema Jesús macuchuchujicavaca ena tíjararecanahi eta sárareana, cágureana te tajuhe eta Templo*

(Mt 21.12-17; Lc 19.45-48; Jn 2.13-22)

<sup>15</sup> Tacahé, te títecapanapa te Jerusalén, tiyananavarepa eta te Templo. Máimaharinehi ema Jesús ena achaneana tíjararecanahi eta sárareana, cágureana. Ena apamuriana tivacharecanahi. Natiarihivare ena títsiriperecarahiana eta taplataneana eta apanapane avasareana. Tásicha, macuchuchujicapa namutu. Máequhepuichinavacapaipa eta namesarana étapa eta nasiyana.

<sup>16</sup> Nájinavare másapaquenénahini eta nánucuhahini eta canchón tayehe eta Templo, námapahini jácani eta náijarareruanahi.

<sup>17</sup> Tásicha, máimitucavacapa ena natiarihiqueneanahi. Ánipa máicha:

—Ema Tata Nuaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana tiásihana te tamutu avasareana” macahepa. Étisera eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichapa.

<sup>18</sup> Ena tictorianacanahi ema Jesús, te nasamairicapa eta juca máechajiriruvanahi, tisemanapa. Tásicha, natanucapa eta jácani náicharasirayare eta náimicapasirayarehi éma. Taicha napicarinehi éma, taicha náimahahi tétavicavahi eta masuapacarevahi eta nayehe ena achaneana.

<sup>19</sup> Tacahe, te cáperehichicharinehi, tiyanavarepa ema Jesús, tiúchuca eta te Jerusalén.

*Tiájiriquipa eta yucuqui higo  
(Mt 21.20-22)*

<sup>20</sup> Tacahe, te yáticarahipa, eta nachaviravarepa eta te Jerusalén, náetavicapaipahivare eta yucuqui higo. Náimahainehi tiájiriquipahi éta.

<sup>21</sup> Tacahe, téchavapa ema Pedro eta máechajiruvanahi ema Jesús cape sache. Tásicha, máichapa:

—¡Píma, tata! ¡Tiájiriquipa eta higo eta pévajiriaruhi!

<sup>22</sup> Majicapapa ema Jesús:

—Ácasiñava yátupina eta me Viya.

<sup>23</sup> Jéhesare, éti apana esamacareyareva, te yátupina eta écasiñavairaina eta me Viya. Tájina émaítucaimahi. Eratahayareva ecayejeca eta cerro te apachacaya, tájina iávamirahuimahi te esamureana.

<sup>24</sup> Tacahe, numetacahe eta juca: Te eyaseacapuca ema Viya eta jácani, ecasiñava mayehe. Vahi ecueñamava eta ejacapirayare. Tásicha, tíjaracahéna éma tamutu eta eyasearuanaya.

<sup>25</sup> Énerichuvare, eta eyujarasiraina, eperdonacha éti nácani náejecapavaquenehi eta eyehe. Eperdonachavaca apaesa maperdonachahevare eta éjecapiravana ema Tata Ecaiyaqueñe te anuma.

<sup>26</sup> Téhesera vahi eperdonachahi, váhivare tiperdonachahemahi eta éjecapiravana ema Tata Ecaiyaqueñe te anuma —macahepa ema Jesús.

*Nayasereca ema Jesús nájahahipuca tituparacahi éma  
(Mt 21.23-27; Lc 20.1-8)*

<sup>27</sup> Tiuri, títecapanavarepa eta te Jerusalén. Natupiruvarepa tiyanana te Templo. Te mapairirijuecharipa ema Jesús eta Templo, napauchapa ena tictorianacanahi éma.

<sup>28</sup> Nayaserecapa éma, ánipa naicha:

—Píti, vahi vitupararuvinahini víti eta píchirahi eta júcana. ¿Nájahasica tímitucavihi? ¿Nájaha tituparacavianahi eta juca píchaqueneanahi? —náichapa.

<sup>29</sup> Tacahe, majicapapa éma:

—Núti apanava nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana.

<sup>30</sup> ¿Nájahapuca tivanecahi ema Juan eta máitesirahi máicachasirisirayare? ¿Émapuca ema Viya tivanecahi, émajivahipuca eta máitesirahi? Ejicapanu —máichavacapa.

<sup>31</sup> Váhisera náiteturuequenehahini eta najicapirayarehi. Tiácapaemajiricacanapa, ánipa nacahe:

—¿Tájahasica vicayemayare eta vijicapiroayare ema maca? Te vémunahacava vicha: “Mavaneruhi ema Viya”, ema macahénapapuca: “Tásicha, ¿váhiyapa esuapahini éma?”

32 Váhivare taurica víchahini: “Émajivaichucha eta máitesirahi”. ¿Tájahapuca vicayemayare eta vijicapiroayare? —náechajiricacapa.

Nacahehi éna, taicha napicaracahi eta jácani náicharasirahipuca ena apamuriana achaneana, taicha namutuhi náimijachahi ema Juan profetaquenehi yátupiquene mavaneruhi ema Viya.

33 Tacahe, najicapapa ema Jesús:

—Vahi vecha víti —nacahepa.

Ema Jesús máichavarepa:

—Énerichuvare nuti, vahi numetacahemahi nájahapuca ema tituparacanuhi —máichavacapa.

## 12

*Ema Jesús máimicutichina ena pártilárioana máurirahana  
(Mt 21.33-46; Lc 20.9-19)*

1 Tacahe, tépanavavarepa tímitureca eta juca máimicuticha-quenehi. Ánipa macahe:

—Matiarihi ema achane. Camuri eta máevaru uva te máesane, manaruacahivare eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásicha, máijaracapa ena achaneana, pártilárioanayarehi. Taicha tiyanayarehi ema achane te apana avasare.

2 Tacahe, te tiyahapa eta uva, máimivanerecapa ema manusura mayaseapanavacayarehi ena pártilárioanahi eta taticachaqueneyarehi éma.

3 Énasera ena pártilárioana tisemauchavanarichucha. Nacaratacapa náehapa ema vanairucahi. Tichavapa éma, tájina náijaracahini.

4 Tacahe, tiápechavavare mavaneca ema apava manusura. Váhivare nasuapahini éma. Natupisicapa eta te márijahiana, najarasicapa. Náumehavarepa éma vanairucahi.

5 Tacahe, ema achane mavanecavarepa ema apava manusura. Tásicha, ena pártilárioana nacapacapa éma. Vuíchasera masemahini ema achane. Ticayehehi paciencia. Máimivanerecapa ena apamuriana, camurianapa. Énerichuvare, tiápechavanapa náehavacavarepa. Nacapacavacapa ena apamuriana.

6 Tacahe, matiarihichahasera ema apava mavaneruyare. Émajacaruvapa máevataca ema machicha máemunaruquenehi. Máimijachaipahi émainahipucaini napicauchahini.

<sup>7</sup> Énasera ena pártilrioana, te náimahapa ema machicha ema achane, ánipa nacahe: “Émainapapuca ticayeheyare ema maca. Yare, vicapaca éma apanavare, apaesa tánasipa viyehe tamutu. Tájina máicharacahavimahi ema achanenavaji” nacahepa.

<sup>8</sup> Tacahe, nacaratacapa ema machicha. Nacapacapa éma, náquijicapavarepa eta máquehe te aneca tayehe eta úvaquiji.

<sup>9</sup> Puiti, nuyaserecaheyare: ¿Tájahapuca máicharacavacayare ema achane ticayehe eta úvaquiji? Jéhesare, vaipa macaye-hehini paciencia. Títecavanénapa macapapanavacayarepa ena pártilrioanahi máurirahanahi. Tásicha, máijaracaina-varepa eta úvaquiji ena apamuriana pártilrioanayareva.

<sup>10-11</sup> Nuvaraha epanerechapaini eta tacayemahi eta Sagrada Escritura, apaesa ácaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapa eta te táicuchihi eta tatuparahahi. Tacapicahuquenehi puiti. Táitusiava tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya —máichavacapa ema Jesús.

<sup>12</sup> Tacahe, ena tictianacanahi ema Jesús, eta nasamirahi, tisemanarinehi taicha tímatiacavanapa eta énairahi tayunacavaca eta máimicutichiravacahi. Eta nasamirahi, tisemanarinehi. Navarahapa nacaratacayarehíni. Tipicacavanachuchasera nayehe ena achaneana, nacatiuchahini ema Jesús. Tacahe, najunijiacapa éma, tiyananapa natanuca eta táicharcavaya eta nacaratasisirayare éma.

*Navaraha náemejecapavacha ema Jesús tayehe eta impuesto  
(Mt 22.15-22; Lc 20.20-26)*

<sup>13</sup> Tacahe, ena tictianacanahi ema Jesús navanecapa ena témejecapacachanayare apaesa étainahipucaini taviuchahini ema Jesús. Natiarahi ena tinerejicavanahi ena fariséoana. Natarihivare ena políticoana.

<sup>14</sup> Te náitecapauchapa, ánipa nacahe:

—Tata maestro, vímatihi eta tatupiruvairahi tiuri eta juca pímiturapianahi. Vahi pipicacaracavahini eta péchajisi-hairahi eta náichavaquenevahi nácani achaneana, tayana-panepuca aquenucahi. Taicha pivara ema náehicahini namutu eta táurinaquene achene ticaijuhe me Viya. Vivarahisera viyaserecavyare eta pipanereruhi: ¿Táuricahipuca viachacha eta viyasehana impuesto mayehe ema Presidente Emperador romano? Taicha víti, machanerahávihi ema Viya, ¿masi? —nacahepa.

<sup>15</sup> Máimativanehisera ema Jesús eta apimirairavacahi éna, navarairahi ticaviureyarehi éma. Tásicha, ema máichavacapa:

—¿Tájaha tacayema evaraha ímiaquipaicanu? Nímahaseji, iáminanu étapena eta reale —macahepa.

<sup>16</sup> Éna náijaracapa eta reale. Tásicha, máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador —nacahepa.

<sup>17</sup> Tacahe, máichavarepa:

—Tiuri. Táuricahi íjaraca ema Presidente Emperador eta juca mayeherichuhi éma. Tásicha, íjaracavare ema Viya eta mayeherichuhivare éma —máichavacapa.

Te nasamapa ema Jesús eta majicapiravacahi, náramipa eta máitupajijiasiravahi.

*Nayasereca ema Jesús náichararacavayarepuca ena náepenaqueneana eta náechepusirayare*

*(Mt 22.23-33; Lc 20.27-40)*

<sup>18</sup> Nacahepaipavare ena apamuriana achaneana. Saducéoanahi. Ena nani saducéoana, apanahi eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Ánipa nacahe:

<sup>19</sup> —Tata maestro, ema víyarahaini Moisés manaqueicahi eta ajureca máechajiriruvahi eta viyehe: “Te máepenaequenehahipuca ema achane esu mayena, tásicha, nájinahipuca manaquequeneruvainahini machichainahini, te matiarihipuca mácani maparapehi, mavehayare esu machinenaequenéni, apaesa émainapuca macachicha eta suyehe, máitsivahnini ema maparapeni”.

<sup>20</sup> Tacutiquene te natiarihipuca ena siétequeneana ticaparapejiricacana, te títauchavapa ema náechavimuri. Máepenaequenahapaser emu mayena. Nájinahi machichainahini.

<sup>21</sup> Tacahe, ema maparape máitauchavare esu machinena. Énerichuvaresera máepenaequenehavare, nájinavare machichainahini. Ema émana maparape máitauchavare ésu. Énerichuvare máepenaequenehavare.

<sup>22</sup> Namutu ena siétequeneana navehahi ésu, tásihasera náepenaequenehapaichucha, nájinaquene émanainahini mácachichahini eta suyehe. Te táequenepa, tépenapa esu esenaini.

<sup>23</sup> Tacahe puiti, te apanapapuca eta náitaresirayare ena nani, ¿nájahapuca ena siétequeneana éma yátupiquenehi

suímaquenehi esu esena, taicha ena siétequeneana namutuhi suímanarihi? —náichapa.

**24** Tásicha, ema Jesús majicapavacapa:

—Éjecapava éti. ¿Tájaha tacayema vahi evaraha ácaicutiara hini eta táimiturapi eta Sagrada Escritura? Váhivare evarahini esuapahini eta tamutuirahi marataha ema Viya.

**25** Ánaqui te apuna náitaresiraya, vaipa nácamunuimahi esu esena. Énaripa ena esenana váipavare nácamunuimahi ema ajaira. Nacutinapa ena ángeleana tiávihanahi te anuma eta vahi náitauchacacahini.

**26** Éti, váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiruvana ema Viya májuchaqueneanahi ema víyarahaini Moisés. Te juca Sagrada Escritura, eta te libro ticaijare Éxodo, téchajicapa ema Viya. Ánipa macahe: “Nútira yátupiquenenenuhi Viya, macasiñaquenehi ema Abraham, ema Isaác émapa ema Jacobo” macahepa ema Viya.

**27** Nutupiruvahí numetacahe: Ema Viya, éma téchahi eta náitaresirana ena téhicanahi, tayanapané tépenanaripapuca. Eta náchanevana, tímiyanavanarichucha titareca te mamirahu éma. Éti, ichape eta éjecapiravahí —máichavacapa ema Jesús.

*Eta tisuaparepanahi te mavanairipiana ema Viya  
(Mt 22.34-40)*

**28** Tacahé, matiarihihivare ema émana escribáno. Masamaracahi eta nacanarajirisiracacahi. Máimativanepa eta táurivahí eta majicapirova ema Jesús. Tásihasera, tíjaracavahí mayasereca ema Jesús, ánipa maicha:

—Tata, nuvaraha pimetacanuini ¿tájahapuca eta vanairipi tisuaparepanahi tayehe eta mavanairipiana ema Viya? —macahepa.

**29** Majicapapa ema Jesús:

—Eta máechajiruva ema Viya te Sagrada Escritura, ani macahehi: “Esama, emutu eti achaneana israelítana. Nuti Viya, nucarichuhi nuti Iáquenu. Nacuija apanaina iáquenuina esiñarajina.

**30** Tásicha, yátupina eta émunasiranuina nuti Iáquenu, táunirasirina te esamureana. Yátupina eta ecachanevairanuina nútì. Epanerecha eta nímiturapiana tamutu sácheana, yátiana. Yátupina eta ecaemataneasiranu te tamutu eta ítupajijiasiravana”.

**31** Jararihivare eta apuna táehiruhi eta juca, ánívare tacahe: “Pémunacayare ema piparaepiyahi, tacuti eta pémunasiravahí

píti". Eta juca apinaquene vanairipi, tacachurica eta tasuapacareva tamutu eta apamuriana vanairipiana —macahépa ema Jesús.

<sup>32</sup> Tacahe, máichapa ema escribáno:

—Yátupiquene, tata maestro, tétupicavahi eta péchajiriruva. Yátupihi eta macarichuirahi ema Viáquenu, eta nájinairahi apanainahini Viáquenuinahini.

<sup>33</sup> Yátupihivare tavaraha eta vémunasiraina ema Viáquenu, étapa eta viúnasirayare te visamure, étapa eta vipanerechiraina eta máimiturapiana tamutu sácheana, étapa eta vicaemataneasiraina éma te tamutu eta vítpajijiasiravana, étapa eta vémunasiraina ema viparaepiyahi. Jéhesare, eta táuriva eta vémunasirahi táetavicali etá táuriva etá víjarcasichira eta sárareana etá víjuchaqueneana etá me Viya. Táetavicalivare tayehe etá táuriva tamutu etá apamuriana viámavahuana etá me Viya —máichapa ema escribáno.

<sup>34</sup> Ema Jesús máimatiéquenehapa etá táuriva etá majicapira ema achane. Tásicha, máichapa:

—Píti piánehi etá píjarasiravaina etá péhisirayare ema Viya —máichapa.

Tacahe, nájinapa náijaracavahini nayaserecahini ema Jesús etá náemejecapavachirayarehi éma.

*Ema Cristo, yátupihi mámariéquenénihi ema rey David, Víyahivare éma*

*(Mt 22.41-46; Lc 20.41-44)*

<sup>35</sup> Tacahe, ema Jesús tímiyanava tímiturecahi, etá máejasirahi etá te Templo. Ánipa macahe:

—Ena escribánoana, ani tacahehi etá náimiturapiana: “Tiúchucayare ema Cristo, mámariequeneyare ema víyarahaini rey David” nacahehi.

<sup>36</sup> Yátupihi ema Cristo achanequenehi etá máimahi taicha mámariéquenénihi ema víyarahaini David. Nuvarahasera epanerechaya etá juca máechajiriruvahi ema David te májurehi Salmo, ani macahehi: “Ema Viya máichapa ema Tata Náquenu Cristo: Yare péjaca te nuvaure, etá picuchapihayare etá nucaeppusiraya te pimirahu ena tictianacavianahi” macahepa.

<sup>37</sup> Ema David, etá máimijarechirahi ema Cristo, “Tata Náquenu”, ¿tájahapuca etá macayemaquenehi? Núti németeaca Víyahivare ema Cristo. ¿Tájaha íchahi éti? —máichavacapa.

Ena camuriqueneana achaneana náuricahi etá nasamararaca etá máimiturapiana ema Jesús.

*Ema Jesús máimereuchavaca eta náejecapiravana ena escribánoana  
(Mt 23.1-36; Lc 11.37-54; 20.45-47)*

38 Tímiyanavahi eta máimituresirahi ema Jesús, ánipa macahe:

—Échapavayare éti, machu éhica eta nayeherepiana ena escribánoana taicha tétavicavahi eta apimiranairahi éna. Tétavicavahi eta náurisirahi éna tiúmajihána, navarairahi ticunachacareanayarehi nayehe ena achaneana eta nareligiósovanahi. Navarahavare ticapicahuanayarehi eta náechajisiraya ena achaneana te jácani nácapajisihapahi éna.

39 Tacutiquene tinerejiurucavana eta táurinaqueneana téjasihacareana, te tiyanana te viúrujisirarevana. Étaripa te nanisirana, ticaejacavanavare te jácani tiávihanahi eta tiúrinisipana tinicacare.

40 Tacutiquene naverejicavare eta nacayehequeneana ena tépenaimana, nájina najapanuquenéna. Tásicha, tépiyacavanapa religiósoanahi, tiúpiemána eta nayujarasira, namavarairahi tácaecherahini eta náichiraqueneanahí etá tamauriqueneana. Énasera tiápajucavanahí etá náicuñayayare muraca —macahepa ema Jesús.

*Eta sunaquiruva esu máimaru tacachuricahi eta nanaquiruvana ena apamuriana achaneana*

*(Lc 21.1-4)*

41 Eta máejasihahi ema Jesús, mávihahi te tamirahu eta chapamana etá nanacacuirarehi etá plata námavahuana ena achaneana. Máimaranara ena camuriqueneana etá nanacacuira etá námavahuana. Natiarihihi ena rícoana, tinaquicavanapahi etá ichapemuripanavaca.

42 Tacahe, títecapapa esu esena suépenaimaquene, páurehi ésu. Sunaquitcahi etá apipecchichahi etá suplatane, vahirichu tasivachahini.

43 Tásicha, ema Jesús, etá máimairahi etá juca, máichuhamuripa ena máimitureana. Ánipa maicha:

—Ímaha esu suca esena páurechicha. Ácuneucha etá suémunasirahi ema Viya. Jéhesare ésu, tímepanávahi etá sunaquiruva, sucachuricavacahi namutu ena apamuriana achaneana. Ichaperinehi etá sucunachacarevahí me Viya.

44 Taicha namutu éna, tacarichu nanaquitcahi etá náemacharajiana naplataneana. Ésusera esu suca páurehinéni, sunaquitcahisera tamutu etá sucayehequenehi. Suítahi etá sunícavachayarehíni —máichapa.

# 13

*Ema Jesús máimereucharipa eta táquipaisiravaya eta Templo  
(Mt 24.1-2; Lc 21.5-6)*

<sup>1</sup> Tacahe, tiyanayarehini ema Jesús, énapa ena máimitureana. Eta náuchusiraya tayehe eta Templo, máichapa ema émana máimiture:

— ¡Tata maestro! ¡Píamaha eta juca máriana! ¡Tétavicava eta táichapeval! ¡Tétavicava táurinava eta juca peti! —macahepa.

<sup>2</sup> Ema Jesús majicapapa:

— Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járajapayare eta sácheyare ticaquipaicasiyare tamutu eta juca Témposami. Téjanerepaicainapa tamutu eta juca táurinaqueneanahi ímahaqueneanahi puiti —máichapa.

*Tatiarihiyare eta ecutiarareanaya te tánehipaicha eta táichecuiraya*

*(Mt 24.3-28; Lc 21.7-24; 17.22-24)*

<sup>3</sup> Tacahe, tiyananapa eta te cerro ticaijare Olivoquiji, távhahi te apacharahi eta te tatavarapihi te tamirahuhi eta Templo. Te téjacanapa nacarichuhi eta te jena quinta, nayase-recapa eta macayemaquenehi. Matiarihi ema Pedro, émapa ema Jacobo, émapa ema Juan, émapa ema Andrés. Ánipa náicha:

<sup>4</sup> — Vivaraha pimetacahavi. ¿Tájamuhupuca eta náimiaquipaisirayare eta Témposami? ¿Jararihiyarepuca eta ecutiarareyare te tánehipaicha eta táitauchiravayare eta apana péchajisihaqueneana? —náichapa.

<sup>5</sup> Tacahe, majicapapa ema Jesús:

— Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanayare nuyehe.

<sup>6</sup> Nacaheyarepahi éna: “Nútiripa Cristo”. Nasapiha, navayuacayare ena camuriana achaneana.

<sup>7-8</sup> Énerichuvare esamairiricayare eta táehacacairayare eta ichapequeneana avasareana. Ticanarajiricacanainapa eta te avasareana tayerehiqueneana, énerichuvare ticauyayacarenapa guerraina eyehe éti. Váhisera ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecuirayare. Énerichuvare tatiarihiyareva eta ichape tayamurisiranaya eta apaquehe te jácani távihanaya tátupiaruanayare. Tatiarihiyareva eta ichape ecuhamuhuyareva te jácani avasareana. Ichape eta nacatajivairayare ena achaneana. Tamutu eta juca ecutiarareanayare eta táepaniravayare eta nátajivayare ena achaneana.

<sup>9</sup> Tásihasera eti nuchaneranahi, ecuneuchavayare, étumechavayare. Taicha natarihiyare ena tictorianacaheanayare táichavenehi eta éhisiranuhi. Ticaratacaheanainapa, ecayase-serehinapa nayehe ena juéseana. Téstacaheanainapava eta te náurujisirarevana. Tásiba, etiarihiyare éti tiámaheanaya te namirahu ena aquenucana, téhevare te namirahu ena Presidenteana gabinetoanahí, ecaviurevayare táichavenehi eta éhisiranuhi. Esapihasera éti, ecamapuravainapa échajisia-nuyare.

<sup>10</sup> Énerichuvare, éti nuchanerana ecametarairuyareva eta tiúrina echajirirucava nayehe ena achaneana tayehe tamutu avasareana te juca apauehe. Te ítecapapa te tamutu, tépanavayarehi eta táichecuirayare.

<sup>11</sup> Tacache, te jácani nacaratacahepapuca, námahe te namirahu ena aquenucana, vahi ecueñamava tayehe eta jácani échajiu chiravayare, ecatiuchiravaya. Échajisihaya eta échajirirucavana máijararuheyare ema Espíritu Santo te jena sache. Taicha máimahaheinepá. Tíjaracaheyare eta ítusirayare échajica. Vahi étijivaimahi eta échajisiraya.

<sup>12</sup> Natarihiyareva nácani achaneana tíjararecanaya ena naparapequeneana, navarairahi náimicapaca táichavenénahí eta náehisiranuhi nútí. Natarihiyareva ena nácani náiyana, navarahayareva náijarareca ena nachichanaveana táichevenehi eta náehisiranuhi nútí. Natarihiyareva nácani nachichanaveana nacanarainapa ena náiyana, náimicacainapa táichavenehi eta náehisiranuhi nútí.

<sup>13</sup> Namutuyaréni ena achaneana tictorianacaheanayare táichavenénahí eta éhisiranuhi. Téhesera ecamichahi tamutu, ímiyanavahi eta éhisiranuhi te táitavapa tamutu, nútí nucuchucuhaheyare.

<sup>14</sup> Numetacahevanevare eta apaña. Járabajayare eta sache táíñehiqueneyare. Tímerecavayare ema achane váinara-jiquene. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuyare eta májurehi ema víyarahaini profetaini Daniel.) Tásiba te ímahapa eta juca, esamairicapuca, táuricapa etátajipa ejunavane, eti etiarihiquenueanahí te Judea. Ecaijuheyare eta te cérroana, étaina eyumurusiavaina.

<sup>15</sup> Nácani tiávihanahi te nayehe canchón te nasamairicapuca eta juca téchacarehi, táuricapa najunavane. Vaipa táuricahini nasiapanumahi te napenana, navehahini jácani náeñamaque-neanainihi.

<sup>16</sup> Nácani tachimaruaruanayare te vámahi eta téchacarehi, táuricapa vaipa nacuchava tayehe eta avasare, tayanapane

náeñamahi eta nayereruvana.

<sup>17</sup> ¡Páureanasami nácani esenana tachimaranuanayare nácani ticajarianahipuca, nácani esenana ticachichanahi eta amuya tiájicachaha!

<sup>18</sup> Eta tacahe, eyaseacayare ema Viya tacuija táchichejicahe; váhivare tacuchimaracahe eta ichape tiquiva te achene te eyanapapuca ejuna\*.

<sup>19</sup> Te jena sácheinayare, téavicavayare eta nacatajivairayarehi ena achaneana. Tájina táchutimahi eta táñehivayare eta nacatajivairayare, te táepaniravahi eta máepiyasirahi ema Viya eta juca apaquehe. Te taequenenapa eta tíñehiyare, tájinainapa táchutimahi.

<sup>20</sup> Nájina tacaitiruimahi eta nacatajivairayarehi ichape. Macaichecavaneyare ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuqueneanahivare. Taicha te vahi macucaicheca ema Viya, máitamurihahipucaini macapapajicavaca namutu ena achaneana ema maca achane.

<sup>21-22</sup> Énerichuvare te tanehipaicha eta juca, natiarihinapa ena tivayuarahiana tépiyacavanayare Cristo tímivasichavainapa núti. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: "Yare, éhicayare ema Cristo. Matiarihipahi te juca vitaracu". Ena apamuriana ánivare nacahey: "Náepiyahiraivahi éna. Ema Cristo mávihahi te viávasa víti". Étisera vahi ecusuapavaca. Eta navarairahi tivayuacaheanaya eti machanerana ema Tata, náiteturuequenehayare naicha eta ichapequeneana tiáramicareana ecutiarareanayare. Camurianasamiyare ena navayuaruanayare.

<sup>23</sup> Tásicha, ecuneuchavaya nayehe. Numetacahevanehi puiti apaesa écharipa —máichapa.

*Eta machavirayare ema Manerejiruhi ema Viya  
(Mt 24.29-35, 42-44; Lc 21.25-36)*

<sup>24</sup> Máichavarepa ema Jesús:

—Te jena sácheinayare te taequenénapa eta jena nacatajivairayare ichape ena achaneana, eta sache témahainapa, étaripa eta caje váipavare tijarahimahi.

<sup>25</sup> Témiricanainavarepa eta jarairiquiana. Étaripa eta tiávihanahi te anuma vimaimahaqueneanahi, énerichuvare tiyamuricanainapa, tiyejejecavanainapa.

---

\* **13:18** Ema Jesús máechajisihahi eta ticasarahimuhu, tiquivamuhuhivare te jena mávasa Judea taicha ticajeraequenehi eta napaisirahi.

<sup>26</sup> Nupaenumavainapa níteca nuchava nútí Manerejiru-nuhi ema Viya. Namutu tímahanuanayare eta núcupaisi-rayare. Tiámanuinapaipa eta úcaji. Tétavicavayare eta nujarai-vayarepahi, níñehinapaipa.

<sup>27</sup> Tacahe, nuvanecainapa ena ángeleana nacurujicayare namutu ena nuchanerana nunerejiruanahi, tiásihanayare te tamutu eta juca apaquehe te jácani návihahi.

<sup>28</sup> Tiuri puiti, nuvaraha nímicutichinahe eta jácani yu-cuqui. Eta táitsivachiravavacapa eta tapacajiana, te ímahapa eta tajimuyairapa eta tatavaqui, tiúchucayarepa eta tapacajianaya arairu, tímaticarehi tiánehiripa eta únemuuirayarepa.

<sup>29</sup> Ene tacahehi, te ímahayarepa tacaecherapa eta júcana ecutiarareana, ímahayarepa eta tánehirainapa eta nuchavira.

<sup>30</sup> Numetacahevanecha: Vuíchaha titavanaimahi ena achaneana náitareruanaichaha te táitecapapa eta júcana ecutiarareanayare.

<sup>31</sup> Títavainapa eta anuma étapa eta apaquehe. Tativaya-resera títauchaya tamutu eta numetaruheanahi.

<sup>32</sup> Eta juca tiáramicareyarechucha. Nájina téchaimahi tájamuhuyarepuca eta títauchiravayare, énaripa ena ángeleana vahi náechahini. Nútivanerécahipucaini néchahini. Macarichu ema Tata, éma téchahi.

<sup>33</sup> Eta tacahe, etsecavahi ecaunehivare éti, eyujarauchavayareva. Taicha vahi echa eta tájamuhuyarepuca eta nítésirayarepa.

<sup>34-36</sup> Tamutu eta juca nímicutichinahe eta máichaquenehi ema mácani achane eta te tiyanayare tipairirica. Te tiyanayarépa, máijaracavaca namutu ena mamusurana eta náemataneana, matuparacavacapa eta najaneasirayarehi tamutu. Tacahe, matuparacavarepa ema tijanearecarahi eta tapaja, macuneyarehi eta jácani hora machavira ema máquenu, téhepuca timapicucuhipa, téhepuca enumuhu yati, téhepuca tijararahiyarepa, téhepuca yáticarahi. Ene ecaheyare éti. Ecauneya machu níjahúchava nítecapauchahe, machu nuchimaracahe ímacacaruhi. Taicha vahi échaimahi tájamuhupuca nítecapayare nuti Iáquenu.

<sup>37</sup> Eta juca numetaruheanahi puiti, nuvaraha emetacayarevare ena echamuriana, apaesa ecauneyare emutu – máichapa ema Jesús.

## 14

*Napanerechaipahi ena tuparairucana eta nacaratasirayare ema Jesús*

*(Mt 26.1-5; Lc 22.1-2; Jn 11.45-53)*

<sup>1</sup> Tacahe, apinarinecha sache eta piesta ticaijare Pascua, eta náepanavaira eta semana eta nanisirahi étachucha pan

mayehere levadura. Tacahe, ena tuparairucana énapa ena escribánoana navarahaipaicha náimicapaca ema Jesús. Tásiha natanucahi eta táicharacavaya eta nacaratasirayare. Váhisera navaraha eta nanecapahini ena achaneana.

<sup>2</sup> Ánipa nacahe:

—Vuíchaha vicucarataca éma achichu juca piéstairaya. Taicha camurianayarehi ena achaneana, machu tájahapuca náicharacahavi taicha navarahayarehi nacatiucha éma. Vicuchapa nayananuma —nacahepa.

*Esu esena tiámasichahi ema Jesús te tájiyeamaquene perfume  
(Mt 26.6-13; Jn 12.1-8)*

<sup>3</sup> Tacahe, ema Jesús tiyanapa tichava eta te avasarechicha Betania. Máichuhauquenehi eta mananisiraya mayehe ema achane ticaijare Simón ema leprosoinihi. Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Ticaijare nardo eta juca tíjiyeama amairiama. Táetaviuchahi eta tasivachavahi. Supauchapa ema Jesús. Suvechujihana etá bótechicha, tásiha, suépusasicapa eta tájiyeamaquene perfume.

<sup>4</sup> Natiarihisera ena váhiquene náuricahini eta suémepuru-resirahi eta tasivachaquene perfume, suámasichirahi ema Jesús. Ánipa nacahe:

<sup>5</sup> —¿Tájaha tacayema suémepurureca eta juca tasivachaquenehi perfume? Tiúripanahini víjararecahini eta juca tájiyeamaquenehi. Vivehahini eta camuriquene plata, tásiha, vínicatasihahini ena páureana. ¡Máechemarairahahi esu suca esena! —nacahepa.

<sup>6</sup> Émasera ema Jesús máuricapa eta suíchaquenehi. Ánipa máicha:

—Ésamirica esu suca esena. ¿Tájaha tacayema ecaecahihi éti esu suca? Tétavicava eta táuriva eta suíchiranuhi.

<sup>7</sup> Ena páureanasami, támputuchucha sácheana eta ecachaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi eta eyehe.

<sup>8</sup> Esu suca suíchahi eta suímirataharuvahi. Eta juca suépusahasiranuhi eta juca perfume. Sucainapucahi ésu eta suiíyechirahi eta náquehe tayeheyarehi eta nucaecharasirayare.

<sup>9</sup> Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

*Eta máijararesirahi ema Júlasi ema Jesús  
(Mt 26.14-16; Lc 22.3-6)*

**10** Tacahe, tiyanapa ema Júlasi, émarichuhi nachamuri ena dócequeneana apóstoleana. Mapauchapa ena tuparairucana, téchajiripanava eta máijararesirayare ema Jesús eta nayehe.

**11** Tacahe, tiúrisamureanarine ichape eta nasamirahi eta mavarairahi máijararecayare ema Jesús. Tásiha, nametacapa eta náijarasirayarehi eta plata. Tásiha, jéhevarepa ema Júlasi matanucaipa eta máicharacayarehi eta máimicaratasirayarehi ema Jesús.

*Ema Jesús máenimurihapa ena máimitureana  
(Mt 26.17-29; Lc 22.7-13; Jn 13.21-30)*

**12** Tacahe, títecapapa eta piesta Pascua, te tépanavahi eta semanahi nanicahi eta pan mayehere levadura. Étarichuhi eta sáche nacapashihai eta uvesachicha naniruyarehi te yátipa. Ena máimitureana nayaserecapa ema Jesús:

—¿Táviha pivarahahi vácajuhe eta vétupirisiava eta vinisirayare eta uvesachicha eta viyeherepi? —nacahepa.

**13** Tacahe, mavanecapa ena apinana máimitureana. Máichavacapa:

—Eyana tayehe eta Jerusalén. Te ítecapayarepa tayehe, iácapajicayare ema émana achane tiámapahi eta une te yupi. Éhicayare éma.

**14** Eta te peti masiapihayare, éti apana esiapayareva. Tásiha, emetacayare ema ticayehe eta peti, ani íchayare: “Ema viyeho Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare.

**15** Tásiha, éma tímechahénapa eta ichape cuarto te anuquehe piso. Táuriquenéipahi eta jácara téjasihacareana, tacaetupirihiquneripa. Tásiha, étupiricapa eta viniruyare eta ánaqui —máichapa ema Jesús.

**16** Tacahe, tiyananapa nacaijuhe te Jerusalén ena apinana vanairucana. Jéhesareinehi náimahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayehe eta Pascua.

**17** Tacahe, te yátipa títecapapa ema Jesús macachanepaipa ena apamuriana apóstoleana.

**18** Eta náejasiraripahi tinicanaripa, máichamuripa éna ema Jesús:

—Jéhesareinehi, te etaracu éti, mararihi ema émana tíjararecanuyare, émarichuhi tinicahi nucachanehi —máichapa.

**19** Tacahe, ichaperinehi eta máimipanereresiravacahi éna eta juca máichiravacahi. Nayaserecapa ena émanapachu, ánipa náicha:

—¿Nútichupuca jácani? —macahepa ema émana.

—¿Nútichupuca? —macahevarepa ema apana.

**20 Tacahe, majicapapa ema Jesús:**

—Ema émana te etaracu eti dócequeneana. Mácani néniruyare eta pan néchipaejiruhi te juca nucuruja, émara ema tíjararecanuyare.

**21 Nuti Manerejirunuhi ema Viya, étapaichuhi eta nacapasi-ranuyarehi, títauchavayarehi eta nuyehe eta táechajiriruvahi eta Sagrada Escritura. ¡Páuresamisera ema tíjararecanuyare! ¡Muracayare eta máicuñayare! ¡Tiúripanaichuhini te vahi macuchucahini te sujuhe esu máena!** —macahepa.

*Ema Jesús máimereuchahi eta macaejasiraya eta arairu matratune ema Maiya*

(Mt 26.26-29; Lc 22.14-20; 1 Co 11.23-26)

**22 Tacahe, eta nanisirahi, mavehapa eta pan ema Jesús. Mahasulupayachapa ema Viya. Mayuvetucapa máijaracavaca ema máimitureana. Tacahe, máichavacapa:**

—Eta juca néche. Enica —macahepa.

**23 Tacahe, mavehavarepa eta vasu náerirare, mahasulupayachavarepa ema Viya. Tásicha, máijaracavarepa ema máimitureana.**

**24 Te náerapaipahi, máichavacapa:**

—Eta juca eta nítine. Éta táepusairuvayare étarichuvare táchicuarayare eta nufirmachiraheyare eta arairu matratune ema Vicaiyaquene, nucaejasirayareva eta matratune apaesa ejacapacare mayehe, ichapemurivayarepahi éti.

**25 Jéhesaréinehisera, numetacahe: Vaipa nápechaváimahi nérahivaréni eta juca tachi eta uva, tiámainucava te títauchavapa eta nusiapiraya eta nucavacureiraya, nucajupahairaya ema Tata Nucaiyaquene. Te jena sache, níjaracaheya vérainapa eta aramaruama —máichapa.**

*Ema Jesús máimereucha ema Pedro tépiyacavayare vahi máimati ema Jesús*

(Mt 26.30-35; Lc 22.31-34; Jn 13.36-38)

**26 Eta náitanesirapa, tijiranapa eta jirasare eta nahasulupayachirahi ema Viya. Te titapiricanapa, tiúchucanapa, nacaijuhepa eta te huerta Getsemaní tiávihahi eta táemiripaisinehi eta cerro ticaijare Olivoquiji.**

**27 Eta napaisirapahi, máichavacapa ema Jesús:**

—Puiti juca yati ejunijicanuyare emutu éti, taicha epicayare eta náicharasiranuyarehi. Tásicha, títauchavayarehi eta máechajiriruvahi ema Tata eta te Sagrada Escritura: “Nísapayare nacarataca ema Pastor, nacapasirayaresami. Tásicha, tijunaracanainapa eta uvesana macurujiruinaninihi” macahepa.

<sup>28</sup> Téhesera te néchepucapa te nécari, nínapucainapa nuyanainapa te Galilea. Ánaqui nucuchapiaheyare éti – máichapa ema Jesús.

<sup>29</sup> Émasera ema Pedro máichapa:

—Tayanapane, Tata, najunijicavipuca ena apamuriana, nútisera vahi nujunijicavimahi –máichapa.

<sup>30</sup> Ema Jesús máichavarepa:

—Nutupiruva numetacavi pítisami Pedro: Puiti juca yati, te apihénapa eta táechajisirayare eta varayu, mapahé eta pépiyásiravayare vahi pímatinu –máichapa.

<sup>31</sup> Ema Pedro tijaranurusí eta majicapirohi. Ánipa macahe:

—Tayanapanepuca pímicapacanu, váhiquenesera népiyacavaimahi vahi nímativi, váhivare nínajiacavimahi –máichapa.

Étarichuhivare tacahehi eta náechajiruvahí ena apamuriana máimitureana.

*Ema Jesús tiyujaraca te Getsemaní*

(Mt 26.36-46; Lc 22.39-46)

<sup>32</sup> Tacahe, títecapanapa eta te quinta Getsemaní. Tacahe, máichamuripa ena máimitureana:

—Éjacaichaha eta ani te juca. Ecuchapanuchaha. Núti nuyujarapanayare –máichapa.

<sup>33</sup> Tacahe, mámapa ánaquipana ema Pedro, émapa ema Jacobo, émapa ema Juan. Tépanavapa téñamava eta masamure, taicha muraca eta máichavaquenévayarehi.

<sup>34</sup> Tacahe, máichavacapa éna:

—Tétavicava eta táeñamirava muraca eta nusamure. Tavaraha ticapacanu. Ánasichaha ani te juca. Váhisera ecuimaca. Ecuneuchanuhi –máichavacapa.

<sup>35-36</sup> Tacahe, tipaipanapa ánaquipanachichahi éma. Tiáquipaicavapa eta te apauehe. Eta mayujarasirahi, ánipa macahe:

—Tátachicha Nuaiyaquene, píti pirataha tamutu. Picatajicanupaini. Váhini tacuitauchavaini eta níchavaqueneyavare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti –macahepa.

<sup>37</sup> Tásiba, téchepucapa. Tichavapa eta te návihahi ena máimitureana. Máimaharinehi éna, tímacanarichucha. Máichapa ema Pedro:

—Piti Simón, ¿pímacarichucha? ¿Tájaha tacayema pímacahi? Váiparinehi pímicatacanuhini pijaneacanuhini étanainahipucaini hora pácahehini.

<sup>38</sup> Éjamiuchava. Eyujarauchava apaesaina. Eyaseaca ema Viya eta etumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava.

Étasera eta éche máteji, vahi taratahaimahi ticaratacava —máichapa.

<sup>39</sup> Tacahe, tiápechavavarepa tiyana tiyujaraca. Eta mayujarasirahi, étarichuva eta máechajiruvanahí.

<sup>40</sup> Tásicha, tichavavanepa eta te návihahi ena máimitureana. Máimahavarepa tímacanaripavare, taicha muracaripa eta náechapune. Tájinavare nacayemahini táichavenehi eta natsirirahi. Tacahe, tiyanavarepa tiyujarapana.

<sup>41</sup> Te mapahequenepa eta mayujarasirahi, tichavapa. Máichavacapa:

—¿Jápechavaipava ímaca? ¿Vuíchahapuca enarahacaquenénahini? ¡Taratapa! Jéhesare, puiti títecápapa eta nutuparahahi nacaratasiranuyare ena tictatianacanuanahí.

<sup>42</sup> Ávane ema tíjararecanuyare. Échepuca. Viyana viácapavaca —máichavacapa.

### *Nacaratacapa ema Jesús*

(Mt 26.47-56; Lc 22.47-53; Jn 18.2-11)

<sup>43</sup> Téchajiricavaichaha ema Jesús, macahepainecha ema Júlasi. Mámamurihaipahi ena camuriqueneana suntaruana. Ticaepuchiriquianapaipahi, étapa eta nayeheana espada. Éna, vanairucanahí nayehe ena tictatianacanahí ema Jesús.

<sup>44</sup> Ema Júlasi, tatiarihihi eta máicutiarayarehi eta náimatirayarehi ena suntaruana ema Jesús. Ani tacahehi eta máechajiruvahí ema Júlasi:

—Ecunenuyare. Ema nétsrereruyare, éma ecaratacaya. Machu ecaitica, muraca eta ecaratasiraina —máichavacapa.

<sup>45</sup> Te títecapanapa, mapauchapa ema Júlasi ema Jesús. Máichapa:

—Yátihipa, tata Maestro —máichapa.

<sup>46</sup> Tásicha, mágétserarecapa. Tacahe, ena suntaruana enevanepa nacaratacahi.

<sup>47</sup> Tacahe, ema émana apóstole, eta máimaira nacaratasirahi ema Jesús, mavehapa eta mayehe espada. Máquijica eta machaca ema manusura ema aquenuca Caifás.

<sup>48</sup> Émasera ema Jesús máichavacapa ena suntaruana:

—¿Tájaha tacayema ecasiña eta espada, ecaepuchiriquipai-pahivare eta ecaratasiranuyare, tímicutijiricavapa námerahihini nútí?

<sup>49</sup> Étayapasica cape juca tamutuhi sácheana nucachanehehi nímitucahehi tayehé eta Templo. Váhivare epatsicavahini ecaratacanuhini. Tacahehisera éta, títauchavayarehi tamutu eta téchajiruvana eta Sagrada Escritura —máichavacapa.

**50** Tacahe, tijunaracanapa namutu ena apóstoleana nanaquicapa ema Jesús.

**51** Matiarihivare ema émana amaperu achane. Téhicapahi. Ticaepacuhapahi eta te savana. Tacahe, nacaratacavarepa éma apana.

**52** Tijunahisera manaquicapa eta máepacuhainihi savana. Tiyanaapa mamuriarepaipa.

*Nacatupihapa ema Jesús te namirahu ena aquenucarhana  
(Mt 26.57-68; Lc 22.54-55, 63-71; Jn 18.12-14, 19-24)*

**53-55** Tacahe, nacaitecapapa ema Jesús te mapena ema corregidor. Ema Pedro, máehiequenehapahi éna, mayererehiphisera. Títujicavapa tisiapa eta te canchón tayehe eta mapena ema corregidor. Tásiha, téjacapa macachanemuripa ena suntaruana, tiásacavahi eta te yucu. Váhisera náimatihihi éma. Tacahe, tiúrujicavanapa namutuyaréni ena apamuriana tuparirucana énapa ena aquenucarhana énapa ena escribánoana. Napanerechaipa, natanunuicaripa eta ticaviureyarehi ema Jesús. Náichuhapa ena tépiyaequenehanayarehi eta matapiravayarehi náicha, navarairahi náimicapacayarehi éma. Váhisera náichimavahini eta maviurevainahini.

**56** Camurianahinéni ena tépiyaequenehanahí éma, váhisera tacuticacahini eta nacayemaqueneanahí.

**57** Titupihanavarepa ena apamuriana tépiyahirahianayarehi. Ánipa macahe ema émana etá máepiyahiraivahi:

**58** —Núti nusamahi ani macahehi ema maca: “Núti nuvetaicayare eta juca Templo náepiyaruhi ena achaneana. Tásiha, te mapánaquenénapa sache, nímichavayare nucatupiha etá apana Templo. Váipasera tacutimahi etá náepiyaruhi ena achaneana”. Eta juca nusamaquenehi etá máechajiriruvanahí ema Jesús —macahepa ema tépiyahirahí.

**59** Váiquenesera tacuticacahini etá máechajiriruvanahí nayehe ena apamuriana.

**60** Tacahe, ema corregidor téchepucapa etá mayaseresirayarehi ema Jesús. Ánipa maicha:

—¿Tájaha tacayema vahi pijicapavaca ena nani etá pimetauchacasivahi? ¿Yátupipuca etá nacayemaquenehi? Taicha vímahavi etá vahi picatiuchiravainahini —máichapa.

**61** Émasera ema Jesús vahi majicapavacahini. Timatinachucha. Tásiha, mápechavare mayasereca ema corregidor:

—Nuvaraha pimetacanu. ¿Píti pímijachavahíjicacha pítihi Cristo ema vicuchapaquenehi, Machicha ema Viya? —máichapa.

**62** Tacahe, ema Jesús majicapapa:

—Yátupi nuti Cristonu. Nuti Manerejirunuhi ema Viya. Tásiha, numetacaheyare etá apana. Járajapaya etá sácheyare

ímahanuyare eta néjasirayare te mavaure ema Viya máitupa-jijihaquenehi. Ímahanuyareva núti eta núcupaisirayareva, násihayare te anuma, támiranuyarepahi eta úcaji —máichapa.

<sup>63-64</sup> Tacahe, ema corregidor eta masamirahi, tisemarinehi ichape. Tivetsayujiacavapa eta mamuiriha eta masemanevahi. Tásicha, macahepa:

—¡Émaquenepa visama ema maca tépiyacavahi Machicha ema Viya! Tétavicavaipa eta maviureva taicha macaecaahihi ema Viya. Vaipa tacamesa vitanucahini ena testigoanayare. Puiti esamaripa éti eta juca macayemaquenehi. ¿Tájaha vícharacayare puiti ema maca? —macahepa.

Tacahe, namutupa najicapa:

—¡Ticaviurevaipa! ¡Étaina táimicapacal! —nacahepa.

<sup>65</sup> Tacahe, nátutuáca éma. Náepacauquichavarepa, tásicha, náehamirahavarepa te mamira. Tásicha, náichapa:

—Te yátupihipuca pítihí Cristo, pímatinuyare nájahanupuca nuti néhavihi. ¡Pimetacahavi! —náichapa.

Énapa ena suntaruana, te námapaipahi, náehavarepa. Ichape eta náichirahi.

*Ema Pedro tépiyacavapa vahi máimati ema Jesús*

*(Mt 26.69-75; Lc 22.56-62; Jn 18.15-18, 25-29)*

<sup>66</sup> Tiuri, ema Pedro, matiarihichahahi eta te canchón. Tacahe, sucahepaipahi esu mavanara ema corregidor.

<sup>67</sup> Suímahapa ema Pedro, tiásacavahi. Suímararacapa eta mamira. Tásicha, suíchapa:

—Németeaca pítirichu ñichamuri eñi ñica Jesús, eñi nazareno —suíchapa.

<sup>68</sup> Émasera majicapapa:

—Vahi nímati ema péchajisihaquenehi. ¿Távihapuca pímatinenuhi pítí? —máichapa.

Tacahe, tiyanapa éma eta te portón. Téchajicavanepa eta varayu.

<sup>69</sup> Suímahavarepa tiápechava esu esena. Sumetacavacapa ena natarihiqueneanahi, suíchapa:

—Eñi ñica eñi nachamuri ena téhicanahi eñi Jesús —suíchapa.

<sup>70</sup> Tiápechavavarepa ema Pedro tépiyacava vahi máimatihini ema Jesús. Tacahe, te tiyererehachichavare, ena natarihi-quenehi náichapa ema Pedro:

—Yátupiquene pítirichu machamuri ema maena Jesús, taicha eta péchajisira, tímaticarehi eta piásihairahi te Galilea —náichapa.

<sup>71</sup> Tacahe, majicapapa:

—Máicuñacanuine ema Viya, te vahi nucucahe yátupina. Váhiquenesera nímati ema achane échajisihaquenehi —macahepa.

<sup>72</sup> Enurujipa tiápechava téchajica eta varayu. Tíjahúchavapa téchava ema Pedro eta macayemaquenehi ema Jesús: “Te tamirahuinapaichaha eta apíhequenéna téchajica eta varayu, píti mapahenaripa eta pépiyacavayare vahi pímatinu”. Eta máechavairahi ema Pedro, tépanavapa tíyaha.

## 15

*Námapa ema Jesús te mamirahu ema Pilato*

(Mt 27.1-2, 11-14; Lc 23.1-5; Jn 18.28-38)

<sup>1</sup> Te tijarahipa, tiápechavanavarepa tiúrujicavana namutuyaréni ena aquenucarahaná, taicha náichuhaqueaneanahi ena tuparairucana, éna escribánoana. Tiyaserejiricacanapa tájahapuca eta náichararacayarehi ema Jesús. Tacahe, nacuchucapa ticaitihapaipa eta námirapahi te mamirahu ema Prefecto Poncio Pilato. Eta máimairahi ema Pilato ema Jesús, mavarahapa máimatiyarehi éma.

<sup>2</sup> Tacahe, mayaserecapa:

—¿Yátupisareji réyvihi píti nayehe ena pijaneanana israelítana? —máichapa.

Ema Jesús majicapapa:

—Pétupicavahi eta juca piyaseresiranuhi. Yátupihi eta nurreyvahí —máichapa.

<sup>3</sup> Tásicha, ena tuparairucana nametauchaipa ema Jesús, camuri eta maviurevahí náicha.

<sup>4</sup> Tacahe, mápechavare mayasereca ema Pilato. Máichapa:

—¿Vahi péchajichava eta juca nametauchiravihi? Camuri eta piviurevahí náicha —máichapa.

<sup>5</sup> Émasera ema Jesús váhiquene majicapahini. Tásicha, máramipa ema Pilato.

*Ema Pilato macavanairipipa eta náetatasiraya ema Jesús*

(Mt 27.15-26; Lc 23.13-25; Jn 18.38-19.16)

<sup>6</sup> Tiuri puiti, tatiarihi eta mayeherepihi ema Pilato te Páscuamuhuana. Macaiticayarehi ema émana preso mácani nayasearuyarehi ena achaneana.

<sup>7</sup> Tacahe, natarihihi eta te cárcel ena ajairana ticaeratanahí. Ichape eta naviurevahí ena téhajiricacarahaná te revolución, nacapasirapahi ena achaneana. Te namuri, matarihihi ema achane ticaijare Barrabás.

<sup>8</sup> Tásicha, ena achaneana nayaseacapa ema Pilato máichahini eta mayeherepi. Ánipa náicha:

—Vivaraha pitcha eta piyeherepi te Páscuamuhuana —náichapa.

**9** Tacahe, mayaseremurihana ema Pilato:

—¿Evarahapuca nucaitica ema eyehe Rey, iáquenumuri eti israelítana? —macahepa ema Pilato.

**10** (Taicha ema Pilato máimatiacaripahi eta nametauchirahi ema Jesús ena tuparairucana taicha nacapinaruhi éma.)

**11** Énasera ena tuparairucana náimitumuriharipa ena achaneana, eta nayaseasirayarehi émaina máuchucuha ema Barrabás.

**12** Tacahe, ema Pilato mayaseremurihavare. Máichapa:

—¿Tájahasica nícharacayare ema Jesús ema ijarechaquenehi Rey iáquenumuri eti israelítana? —máichamuripa.

**13** Éna, tipiaracanapa eta najicapirohi:

—¡Pémetatareca te crusu! —nacahepa.

**14** Tásiha, mápechavarepa mayaseremuriha, ánipa máicha:

—¿Tájaha tacayemahi eyaseacahi eta németataresiraya ema maca? ¿Tájahasica eta maviurevahi? —máichapa.

Énasera tipiaracanavare muracapanapa:

—¡Pémetatareca te crusu! —nacahepa.

**15** Ema Pilato mavarahahi tiúriyarehi nayehe ena achaneana. Tacahe, mavanecapa ena suntaruana, ánipa maicha:

—Ecaiticaya ema Barrabás. Émasera ema maca Jesús, iámayare, éstacayare. Étatacayareva te crusu —máichavacapa.

*Nacaecahijiricava ema Jesús ena suntaruana*

*(Mt 27.27-31; Jn 19.1-3)*

**16** Tacahe, ena suntaruana námapa ema Jesús tayehe eta náestasihayarehi te távirarehi eta guardia. Náimichuhavarepa namutu ena apamuriana suntaruana náumurivana.

**17** Te náitauchapa eta náestasirahi éma, namuriachapa eta muíriare mularume. Náitsamemacapa eta itapepi eta majarapiyarehi. Nanacapa te machuti.

**18-19** Nacavayuemarajipa. Náepuyumirauchavarepa, ánipa náicha:

—Tata, ¡pítitatagi nayehevihíji Rey ena israelítana! —nacahepa.

Náepuchisicapa eta te machuti tayehe eta curinaqui. Nátutuácavarepa.

**20** Tacahe, te titavanapa eta nacaetemajirisirahi, navejamuhiacapa eta mularume. Nanacavarepa eta mamuirihaichu. Tásiha, námapa tayehe eta macaetataiyayarehi te crusu. Náetatacapa ema Jesús te crusu

*(Mt 27.32-44; Lc 23.26-43; Jn 19.17-27)*

**21** Eta napaisirapahi te calle, nácapajicapa ema achane ticaijare Simón. Éma, másihapahi te máesane. Napamicapa

éma manaracuha eta macurusura ema Jesús. (Ema maca Simón, máuchusinehi te jena avasare Cirene. Éma, máiyahi ema Alejandro émapa ema Rufo.)

<sup>22</sup> Tacahe, nacaitecapapa tayehe eta masihi nacaetatairare ticaijare Gólgota.

<sup>23</sup> Ánaquipa náesichinehi ema Jesús eta vino ticasiriquiama eta ipuruji tisucareama ticaijare mirra. Váhisera máerahini.

<sup>24</sup> Tacahe, náetatacapa éma te crusu. Ena suntaruana, nasuertehachapa eta mamuirihaini eta náijarajirisiracacayare.

<sup>25</sup> Te náetatacapa éma, las nuéveripa eta yáticarahi.

<sup>26</sup> Te tápusi eta macurusura, tatiarihihivare eta ajureca táechajisihahi eta tiviuchahi eta máepenirayarehi. Ani tacahehi eta ajureca: “Ema Rey nayehe ena israelítana”.

<sup>27</sup> Natarihihivare ena apinana tiámerahiana. Ticaetatanahivare te machacaya, ema émana te mavaure, ema apana te sapa.

<sup>28</sup> Tacahe, tamutu títauchavahi eta táechajiruvana eta Sagrada Escritura, ani tacahe: “Náimijachahi ema nachamurihi ena namauriqueneana”.

<sup>29</sup> Tacahe, ena tiánucumirauchanapahi, tépiupiusicavanaughpaipa eta nacaecahirapaipahi ema Jesús. Ánipa nacahe:

—¡Pítitataji! Picahechajiruvahí eta piáquipaisirayarehíji eta Templo, piratahahivaréji pímichava picatupiha eta arairu Templo te mapanayarerichuhíji sache. Puiti vivaraha vímaha eta pítupajijiasiravahí.

<sup>30</sup> Piúcupaica te jara crusu. ¡Picatiuchava pítijivaina! —náichapa.

<sup>31</sup> Énerichuvare ena tuparairucana nacaecahijiricavare, énapa ena escribánoana. Náichajircácapa:

—Ema mácacacha, macahehi eta máechajiruvahí eta maratahairahíji macatiuchavaca ena apamuriana achaneana. Tásicha, puiti váhivare máratahahini émajivainahini macatiuchavahini eta te jara mávihahi.

<sup>32</sup> Te yátupinahini Cristo, Reynahini viyehe viti israelítana, macatiuchavaipahini, ¿masi? Máucupaicaripahini te jara crusu, ¿masi? Visuapasarerepaini eta vímairainahini —nacahepa.

Ena tiámerahiana ticaetatanahivare te machacaya, énerichuvare nacaecahihivare éna apanavare.

*Eta máepenirahí ema Jesús*

*(Mt 27.45-56; Lc 23.44-49; Jn 19.28-30)*

<sup>33</sup> Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi.

<sup>34</sup>Tásicha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaque! ¡Tata Nucaiyaque! ¡Vahi picujuni-jicanu!”

<sup>35</sup>Tacahe, ena natiahiqueneanahi ena tisamanahi, ánivarepa nacahe:

—Esama. Ema maca achane mapiaracahi ema víyarahaini profeta Elías —nacahepa.

<sup>36</sup>Ema apaza tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca, machuchujicayarehi. Tacahe, máichapa:

—Ésamiricachucha. Vímahayare te títecipayarepuca macatiuchapana ema Elías —máichapa.

<sup>37</sup>Tacahe, tiápechavavarepa tipiaraca muraca ema Jesús. Tépenapa.

<sup>38</sup>Tásicha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apauehe.

<sup>39</sup>Tásicha, ema nacapitara ena suntruana romanoana, eta matupihairahi máimararasirahi te mamirahu ema Jesús, masamirahi eta mapiarasirahi, ánipa macahehi:

—Yátupiquenerichuyapa Machicha ema Viya ema maca —macahepa.

<sup>40</sup>Tacahe, natiahihihivre ena esenana. Náimararacahi, nayererehilihisa. Te nataracu, sutiahihi esu María Magdalena, esu Salomé, ésupa esu apaza María. (Esu suca María, máenahi ema Jacobochicha émapa ema José.)

<sup>41</sup>Ena nani esenana ena náumurivana ena téhicarairicanapahi téchapajiricanapahi ema Jesús eta mapaisirapahi te másihapa te Galilea. Natiahihivre ena camuriana apamuriana esenana náitecapaquénehi te Jerusalén, téhicanapahi éma.

*Nacucupaicapa te crusu ema Jesús, náecarayarepa  
(Mt 27.57-61; Lc 23.50-56; Jn 19.38-42)*

<sup>42-43</sup>Matiarihihivre ema achane ticaijare José\*. Ticavasahi te Arimatea te Judea. Éma, tétabicavahi eta mapicauchacarevahi. Masuapahi ema Jesús eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarahaná. Tacahe, te cáperehipa eta

\* **15:42-43** Ema maca José, vahi émaina ema maparape ema Jacobo ema táchajisihaquénehi te versículo 40. Váhivre émaina ema José ema suima esu María, máenahi ema Viáqueno Jesucristo. Ema maca José, tatiarihi eta mávacure tayehe eta Cabildo te Jerusalén. Émasera vahi máimicasiapavahini nayehe ena tictianacanahi ema Jesús. (Pitanuca te libro Lucas 23.51.)

jena sáchequenehi, tétumechavapa ema José tiyanapa eta me Pilato, mayaseapanahi eta máquehe ema Jesús, mavarairahi máecarayare. Tacahe, tiyayauchavapa taicha téricayarepahi eta sache. Vahi táisapacarehíni náecararecahini te yátimuhu, váhivare táisapacarehini máejamiacahini te jena sávarumuhi.

<sup>44</sup> Máraminehi ema Pilato eta máijahúchiravahi tépenavane ema Jesús. Tásicha, máimichuhapa ema nacapitara. Te títecapapa ema nacapitara, mayaserecapa te yátupihipuca tépenaripa ema Jesús.

<sup>45</sup> Tásicha, eta mametasirahi ema nacapitara eta máepeniraipahi ema Jesús, másapapa ema Pilato eta máquehe ema Jesús.

<sup>46</sup> Tacahe, tiyanapa ema José. Mámapa eta tiúrina sávana mavachareruhi. Tásicha, macucupaicapa eta máquehe ema Jesús. Náyuruácpa tayehé eta sávana. Náiyaracuhapa tayehé eta máecari eta te mari nasecajueruhi. Tásicha, najihachapa te tapaja eta máecari eta ticheyarame mari tajitacarequene.

<sup>47</sup> Sutiarihihivare esu María Magdalena ésupa esu apana María<sup>†</sup>. Náimaranacahi, náimatipa eta nanasihahi eta máquehe ema Jesús.

## 16

*Eta máecheprusira ema Jesús eta te máecari*

*(Mt 28.1-10; Lc 24.1-12; Jn 20.1-10)*

<sup>1</sup> Tacahe, te jena sache sávaruquenehi, téricaipa eta sache, tiyanapa esu María Magdalena, ésupa esu Salomé, ésupa esu apana María. Tivacharecanapa eta tíjiyequene perfume nayariashayare eta máquehe ema Jesús.

<sup>2</sup> Tásicha, te apanapa sache, lumíncuquenehi, nayatirupa tiyanana eta te máecari. Te tiúchucapa eta sache, títecapanapaipa éna eta te máecari.

<sup>3</sup> Eta napaisirapahi, tiyaserejiricacanapaipa. Ánipa nacahe:  
—¿Nájahapapucaini náequhehepuichinahavini eta tajiba eta  
nécari eñi Viáquenu eta mari tajitacarequene? —nacahepa.

<sup>4</sup> Te títecapanapa, náimahapa eta márime tájinaripahi te tapajcura eta máecari.

<sup>5</sup> Tásicha, tisiapanapa. Ánaqui náimahapa ema émana amaperu achane, mávihahi te vaure. Eta mamuriha, tétavicava eta tajapuva. Tiáramecanarinehi ena esenana.

<sup>6</sup> Ema amaperu achane máechajicavacapa:

—Vahi ecupica. Éti etanucapahi ema Jesús Nazareno, ema macaetataquenenih. Májinarihpahi, taicha ticaechepecasiripa. Yare, ímaha. Júcahi eta mávinehi.

<sup>†</sup> **15:47** Esu suca María, esu táchajisihaquenehi te versículo 40. (Te pivaraha pecha pitanuca Juan 19.25.)

<sup>7</sup> Tiuri puiti, eyana emetaca ema Pedro, tásiha, namutu ena apamuriana echamuriana. Emetacavaca tiyanayare ema Jesús eta te Galilea. Ánaqui macuchapiaheyare emutu éti. Échavarichuhipuca eta macayemaqueneanahi te achane-richaha —máichavacapa ema ángele.

<sup>8</sup> Tacahe, tiúchucanapa eta te máecari. Tiyananapa tijunapanapaipa. Tiyayacareanapaipa taicha eta náramirahi. Eta nayanirahi, nájina nametaruinahini taicha eta napisirahi.

*Tímerecavapa ema Jesús suyehe esu María Magdalena  
(Jn 20.11-18)*

<sup>9</sup> Tiuri, eta máechepusirahi ema Jesús te máecari te jena lumíncuquenehi te yáticarahichicha, sutivapa máimeresiavahi suyehe esu María Magdalena. (Esu suca María, esu máepachiaruhi ena siétequeneana éreanana te suáquehe.)

<sup>10</sup> Tacahe, tiyanapa ésu, sumetapana ena suchamurianahi. Éna, téavicavahi eta napanereresirahi, tíyahanahi eta nacatisamurevairahi.

<sup>11</sup> Váhisera nasuapahini eta sumetarapihi esu María eta máechepusiraipa, machaviraipahi titareca, étapa eta máimeresiravahi eta suyehe.

*Tímerecavapa ema Jesús nayehe ena apinana máimitureana  
(Lc 24.13-35)*

<sup>12</sup> Te taequenepa eta juca, tímerecavavarepa ema Jesús nayehe ena apinana máimitureana eta napaisirapahi, nacaijuheirahi eta avasarechicha te tachacaya eta Jerusalén. Tiápamaichavahisera eta mamira. Vahi náimatívanehini éma.

<sup>13</sup> Téhesera náimatipa éma, majunijiacavacapa. Tacahe, tichavavaneanapa nametapana ena apamuriana nachamuriana. Váhiqunevaresera nasuapahini ena apinana, eta nametasirahi.

*Tímerecava ema Jesús nayehe ena mayeheana apóstoleana  
(Lc 24.36; Jn 20.19-21)*

<sup>14</sup> Tiuri, te taequenepa, tiúrujicavanahi eta nanisirahi ena óncequeneana apóstoleana. Tacahe, tíjahúchavapa tímerecava ema Jesús eta nayehe. Macajachamurivarepa eta namasua-pirahi eta nametarapianahi ena tímahanahi éma eta máechepusiraipahi.

*Matuparaca ema Jesús ena apóstoleana  
(Mt 28.16-20; Lc 24.37-49; Jn 20.22-23)*

<sup>15</sup> Tacahe, máichavarepa:

—Eyana epaica te tamutu eta avasareana eta te juca apaquehe. Ecmetarairuyare eta tiúrina echajirirucava nayehe namutu ena achaneana.

<sup>16</sup> Nucuchucuhavacayare namutu ena tisuapajirahianaya, ena ticaicachasianaya. Énasera éna vahi tisuapanaya, ticaicuñanayare taicha tanasirichuhi eta napecaturana.

<sup>17</sup> Ena tisuapajirahiana náimerecayare eta juca tiáramicareana: Náimijunijicayare ena éreanana nayehe ena achaneana, taicha námapicayare eta níjare. Náitucayare téchajicana tayehe eta apanana échajirirucavana namaitucaqueneanainihi.

<sup>18</sup> Te nacaratacahipuca eta quichareana, tájina táicharamaihi. Te téranahipuca eta venéno, tájinavare náichavaimahi. Nanacayare eta navahuana nayehe ena nácani nacajumaqueneana, tásicha, tinaracanayare éna —macahepa.

*Eta mayapirohi ema Jesús te anuma*

*(Lc 24.50-53)*

<sup>19</sup> Tacahe, te titavapa tamutu eta mametarapianahi ema Viáquenu Jesús, tiyanapa tiyapa te anuma. Ema Viya macajapa ema Machicha te mavaure.

<sup>20</sup> Tacahe, tiyananapa eta te tamutu avasareana ena máimitureana. Ticametarairuanapaipa eta tiúrina echajirirucavana. Ichape eta máimicatasiravacapahi ema Viáquenu. Tétavicavahi tajacapacarevahí máicha, eta námiturapianapahi. Taicha máijaracavacapahi eta náimeresirapahi eta tiáramicareana ticunachacareanahi.

Tamu tupa.

## **Ema San Lucas májuequenehahi eta máichararacavahi ema Jesucristo, ticaijare puiti eta EVANGELIO SEGÚN SAN LUCAS**

<sup>1-3</sup> Némunaruquene nuparape Teófilo, nucajurevi puiti apaesa pecha píti apanavare eta juca néchaqueneanahí nútì. Ichapemurianahí ena vichamuriana tiájuequenehanahí tayehe eta máicharacavahi ema Viáquenu Jesucristo. Tásicha puiti, nútì apanavare nájuequenehavare. Nucaejarusinahí tamutu eta nájuequenehairahi, taicha tamutuhi nucayasesereru nayehe ena tinecapaequenehanahí, tímahanahí eta apaicape eta táepaniravahi eta máitaresirahi ema Viáquenu.

<sup>4</sup> Nútì nuvaraha nímimatichavi apaesa yátupina pecha tamutu eta juca piáravahuanahí.

*Ema ángele macametarapi eta máuchusirayare ema Juan  
Tícachasiricarahiyyare*

<sup>5</sup> Cape juca viásinequenehi te émarichaha ema Aluresi aque-nucahi, réyhi tayehe eta jena provincia Judea, matiarihi-hivare ema émana achane, ticaijare Zacarías. Éma, náumuri-vanahí ena ticaijareana Abías. Eta náematanerepi éna, náechapajirica eta námavahuasana ena achaneana tayehe eta Templo. Esu mayena ema Zacarías ticaijaruhi Elisabet, mámariequenenihí ésu ema víyarahaini Aarón.

<sup>6</sup> Ema maca Zacarías ésupa esu mayena, tájina náichiravainahini te mamirahu ema Viya. Tamutuhi náitaucha eta mavanairipiana ema Viáquenu. Tacahe, tájina náechajisiequenénahini nayehe ena achaneana.

<sup>7</sup> Nájinaserá nachichainahini, macheruhí esu Elisabet eta suítaresira. Váipavare ticachichanaimahi taicha ichavicanaripahi.

<sup>8-10</sup> Te jena sache, náichuhapa ema Zacarías eta masiapi-rayare tayehe eta Templo te Jerusalén, taicha áñopahi eta masiapi-rayare. Tacahe, ticátuparácasipa éma. Émapa táetupiacahi eta máematanerepiyarehi máijuchayarehi eta incienso te tainahu eta mesa náijuchirarehi, taicha tacahehi eta nayeherepini ena israelítana. Tacahe, ema Zacarías tisiapapa te tajuhe eta cuarto tacapicahuquenehi, máijuchapa eta incienso. Macarichusera tísapacarehi tisiapa. Ena apamuriana achaneana nanasipa te aneca, tiyujaracanaripa éna.

<sup>11</sup> Tiáramicarepa tímerecava ema émana ángele te mamirahu ema Zácarías. Mavaneruhi ema Viáquenu. Titupiharipa ema ángele te vaure tayehe eta mesa náijuchirarehi eta incienso.

<sup>12</sup> Tiáramecarine ema Zácarías eta máimairahi ema ángele.

<sup>13</sup> Émasera ema ángele máechajicapa:

—Vahi picupica, Zácarías —máichapa—. Ema Viya masamahi eta piyaseserepihi píti eta mayehe. Puiti esu piyena Elisabet ticachichayare. Juan eta máijareyare ema echichayare.

<sup>14</sup> Ichapeyare eta piúrisamurevayare te máuchucapa ema echichayare. Énaripa ena achaneana, ichapeyareva eta náurisamurévaya taicha eta máuchusirayare.

<sup>15</sup> Numetacavi: Ema pichichayare, ichapeyare eta macunachacarevayare mayehe ema Viya. Píti, vahi písapaimahi tera eta vino, étaripa eta apamuriana téracareana muracaqueneana. Taicha éma, eta máuchusirayare, mávaháruyaraphi ema Espíritu Santo.

<sup>16</sup> Éma pichichayare, éma tétupiricayare eta táurivayare eta napanereruana ena pijaneanana israelítana, tachavirayare eta nasuapirayare ema Viya.

<sup>17</sup> Ema maca pichichayare, éma tínapumirauchayarepahi ema Viáquenu. Macutiyare eta máitupajijiasiravaini ema víyarahaini profeta Elías. Ichapeyare eta máitusirayare eta macajimuyasirayare eta nasamureana ena achaneana apaesa tachava eta nasuapiraina ema Viya, táchuti eta nasuapajiraivainihi ena náchucanaveanainihi. Énaripa ena váinarajipanereruana, tisuapajirahianayareva máicha. Mametacavacayare ena achaneana natsecavaipa eta najacapirayare ema Viáquenu —máichapa ema ángele.

<sup>18</sup> Tásicha, ema Zácarías majicapapa. Ánipa macahehi:

—Páurenusami, vaipa numaitacavaimahi nucachichahini, ésuripa esu nuyena. Ichavicahavipa víti. Váhicha nusuapajica eta juca vicachichairayarepuca —máichapa.

<sup>19</sup> Émasera ema ángele máichavarepa:

—Núti nucaijare Gabriel. Núti mavanerunuhi ema Viya. Nutuparacasivaichuhi eta numetasiraviyare eta juca ecachichairayare. Piúriháine ichapenahini eta piúrisamurevainahini.

<sup>20</sup> Puítisera úpaviyare. Eta ecutiarareyare piyeho taicha eta pimasuapiranuhi. Tiámáinucava te táitauchavapa eta juca numetaruvihi, péchajicainavarepa —máichapa ema ángele.

<sup>21</sup> Tacalhe, ena achaneana nanasiqueneanahi te aneca nacuchaparairicaipaicha ema Zácarías, náramipa eta mayerevaipahicha te tajuhe.

22 Jéhesareinehi, te tiúchucapa ema Zacarías, vaipa máechajicahini. Náimatiacapasera éna, eta máechajisirahi ema Viya te tajuhe. Tisuverevercapaipahi éma eta mavarairahi máimicutiarrachavaca ena achaneana eta yátupirahi masamaquenehi. Úpapaipahi éma.

23 Tacahe, te títauchavapa tamutu eta jena sácheanahi eta matuparacasivahi, tiyanapa ema Zacarías tayehe eta mapena. Nueve caje eta mayerevayarehi eta mamaechajisirayarehi.

24 Tásicha, esu mayena Elisabet, ticajaripa ésu. Váipasera súchuchurecahini te supena. Váhivare sumetajiricahini. Tiámainucavapa te títauchavayarepa eta cincoquenehi caje eta sucajarirahi.

25 Tétavicavahi eta súrisamurevahi eta susamiravahi ésu. Ánipa sucahe:

—Ichape eta ñijapanuiranuhi eñi Viya, tíjaracanuhi eñi nuchichayare. Váipasare nayunacaimahi ena achaneana eta numacheruvahi —sucuhepa.

*Ema ángele macametarapi eta máuchusirayare ema Jesús*

26 Tacahe, te sáisiquenepa caje, ema Viya mápechavare mavaneca ema ángele Gabriel tiúcupaica tayehe eta avasare Nazaret, tayehehi provincia eta Galilea.

27 Máucupauchapa esu amaperu esena ticaijaro María. Ésu, tájina suímatiyahini ema ajaira. Matiarihipasera ema suímayarehi, ema ticaijare José. Téjacaripahi eta natratune. Ésu, mámariéquenéinihi ema víyarahaini rey David.

28 Tacahe, ema ángele máucupauchapa ésu tayehe eta suávhahi. Máichapá ésu:

—Pícharacava, María. Piti manerejiruvihi ema Viya. Tétavicavahi eta piúricacarevayare taicha ichape eta majapanuiravihi éma Viya. Picachuricahi namutu ena apamuriana esenana —máichapá.

29 Ésusera tiáramecainehi eta máechajisirahi ema ángele. Supanerequenehainehi tájahahipuca tacayemahi eta máechajisirahi ema ángele.

30 Émasera ema ángele máichavarepa:

—Vahi picupica, María. Piti manerejiruvihi ema Viya.

31 Numetapanavihi puiti eta picajarirayare. Ajairayare ema pichichayare. Jesús eta máijareyare.

32 Tétavicavaya eta napicauchirayare ena achaneana taicha Machichayarehi ema Viya. Ichapequeneyare eta aquenucairayare éma taicha ema Viya manacayareva eta mávacureyare aquenucayare. Macutiyarehi eta aquenucairahi ema máchucaíni David.

<sup>33</sup> Éma téchayarehi namutu ena pijaneanana israelítana. Máepenacacayare eta aquenucairayare —máichapa ema ángele.

<sup>34</sup> Tásicha, esu María, sujicapapa:

—¿Tájahasica táicharacavayare eta juca? Taicha nútí nájinaichaha nímainahini —suíchapa.

<sup>35</sup> Émasera ema ángele máichavarepa:

—Picachichayare taicha eta máitupajijiasiravahi ema Viya. Timicauchaviyare eta majaraiva, tásicha, tisiapahacavinapa ema Espíritu Santo. Eta tacahe, ema amuya pínaruyare, sántoyare éma, taicha machichayarehi ema Viya. Náimatiyare namutu eta machichairahi ema Viya.

<sup>36</sup> Picutiyare esu pijaneana Elisabet, énerichuvare ticajariaphi ésu. Tayanapanehi ichavicachicharipahinéni ésu, macheruinihinéni. Sáisiripasera caje eta sucajarirahi puiti.

<sup>37</sup> Taicha ema Viya, tájinaquene máemáituca éma —máichapa ema ángele.

<sup>38</sup> Tacahe, esu María sujicapapa:

—Núti ñivanaranuichuhi eñi Viya. Nutiarihi puiti. Nímaharuinepa éñi, eta ñícharacanuyare te ñivanairipiana —suíchapa ema ángele.

Tacahe, eta masamirahi ema ángele, tiyanapa tichavahi.

*Esu María suéjirapanapa esu sujaneana Elisabet*

<sup>39</sup> Tacahe, te jena sácheana titátajipa esu María tiyana tayehe eta avasarechicha te tataracucujianahi eta márijuecu tayehe eta provincia Judea, suávasahi esu sujaneana Elisabet émapa ema Zacarías.

<sup>40</sup> Te títecápapa esu María tayehe eta napenahi, suéchajicapa esu Elisabet.

<sup>41</sup> Te susamapa esu Elisabet eta suahu esu María suéchajisirahi, tiyamuricainehi eta amuya te sujuhe esu Elisabet, enevanepa mávaháahi ésu ema Espíritu Santo.

<sup>42</sup> Tacahe, téchajicapa muraca esu Elisabet, suíchapa:

—Píti, téavicavahi eta piúricacarevahi ñicha eñi Viya. Picachuricahavihi vimutu viti esenana. Éñiripa eñi pichichayare, téavicavahivare eta ñicunachacarevaya.

<sup>43</sup> Nusapihasamipa nútí péjirapananuhi pití ñénnaviyarehi eñi Náquenu.

<sup>44</sup> Te nusamapa eta piahu eta péchajisiranuhi, tiyamuricainehi te nujuhe eñi nuchicha, taicha eta tiúrisamuréinehi eñi.

<sup>45</sup> Téavicava eta piúricacarevaya píti taicha eta pisuapajiraiyahvi ñe Viya. Títauchavainapa tamutu eta ñimetarapihi eñi Viáquenu eta piyehe —sucalhepa esu Elisabet.

<sup>46</sup> Tacahe, esu María sujicapapa:

—Ichapemurihi te náchaneva eta nucunachirahi eñi Viáquenu.

<sup>47</sup> Taicha tétavicavapa eta táurisamureva eta nusamure ñicha eñi Viya Ticatiurahiquene eta nuyeye.

<sup>48</sup> Taicha eñi, vahi ñépurunuhini páurenuhinéni nútisami. Tétavicavahisera eta ñijapanuiranuhi nuti ñivanarahi. Nútipa ñinerejicanuhi, tásicha, ichapenapapuca eta nacapinaru-nuiraya namutu ena achaneana natiarihiquenehi puiti, énapa ena arajuruanayare. “Tétavicavapa eta súricacarevahi esu María” nacáhénapapuca.

<sup>49</sup> Tétavicavapa eta ñítupajijiasiravahi eñi Viya, tíjaracanuhi eta nûrivayarehi ñicha. Jéhevare eñi, Sántoquenehi eta ñijare.

<sup>50</sup> Eta tacaheyare eta ñijapanuirahaviyare puiti, énapa namutu ena arajuruanayare, nácani tipicauchanayare eñi.

<sup>51</sup> Eñi Viya, ñíjaracayare eñi nuchichaya eta ñítupajijiasi-ravaya ichape. Tásicha, ñicaerajicavacaya ena ticasíñavanavai-ricana, énapa ena váinarajipanerueruanahivare.

<sup>52</sup> Nácani aquenucana nacatianacainapapuca, ñicapaque-chavacayarehisera eñi. Nasapihana ena páureanasamijihi, ñinerejiruanaya éna, ñijupahanayare.

<sup>53</sup> Yátupiya eta ñíjarasiravacayare eta táetaviuchiraya eta náuricacarevaya namutu ena ticasíñavanayare ñiyehe. Énasera ena tímijachavanahí tájinahini nácamunuhi, ñicaerajicavacaya namutu.

<sup>54-55</sup> Eñi Viya acane tíjaracavahi ñiyehe eñi viáchucaini Abraham énapa ena ñiámariéqueneana, eta ñíjarasiravacainapa eta táetaviuchiraya eta náuricacarevanaya. Vahi ñémítisi-caimahi eñi Viya eta ñéchajiriruvahi ñíjararuvahi. Puiti, eñi nuchichaya tiámayarepahi tamutu eta viúricacarevanaya viti israelítana. Maitavacacayarehi éta —sucuhepa esu María.

<sup>56</sup> Tásicha, sunasipanapa esu María te supena esu Elisabet. Mapana caje eta suyerevahi. Te taequenepa, tichavavarepa te supena.

### *Eta máuchusira ema Juan*

<sup>57</sup> Tacalhe, títauchavapa eta sucajera esu Elisabet. Suínacapa ema suchicha.

<sup>58</sup> Tiyananapa ena sujaneanana énapa ena suchacayape-nanahí, náejirapana ésu. Táicha eta nasamairirisirahi eta súrivahi maicha ema Viya eta majapanuirahi ésu. Tiúrisamu-reanarinehi namutu.

<sup>59</sup> Tacalhe, te óchoquenepa sache eta máuchusirahi ema amuya, nayanauchapa ena najaneanana, namarcachapa-nayarehi ema amuya; taicha tacalhehi eta nayeherepihi. Tásicha, navarahapa nanacayarehi eta máijareyarehi Zacarías, mámapicayarehi eta máijare ema máiya.

60 Ésusera esu maena ema amuya vahi suvarahahini. Suíchavacapa:

—Juan eta ñíjareyare.

61 Tásiha, éna nacahepa:

—¿Tájaha tacayema? Namutu ena pijaneanana, nájina ticai-jarena eta Juan —nacahepa.

62 Tásiha, éna náimicutiarachinapa eta nayaseresirahi ema Zacarías tájahapuca eta máijareyarehi maicha éma.

63 Tacahe, ema Zacarías tiyaseserecapa eta táblamechicha, májuchihayarehi eta máijareyarehi ema machicha. Eta ajureca, ani tacahehi: “Juan eta máijareyare”. Tésenijiricacanarinehi éna taicha eta máijareyarehi ema amuya.

64 Tásiha, tíjhúchavapa tichavapa eta máechajisira ema Zacarías. Macunachapa ema Viya eta máurisamurevahí.

65 Ichape eta tiáramicarehi nayehe ena natarihiqüe-neanahí. Nasamairiricavanepa namutu ena távacuanahí eta avasarechichana tayehe eta provincia Judea. Náechajisihapa eta juca nasamaiririruanahí.

66 Namutupa napanerequenehahi. Nácani tisamairiricanapahi, tiyaserejiricacanaripa. Ánipa nacahe:

—¿Cañarihi tacayemaquenehi eta juca máuchusirahi ema amuya? —nacahepa.

Tásiha, ema amuya, téavicavahi eta majaneasirahi ema Viya eta majurusirapaipahi.

### *Eta majirarapi ema Zacarías*

67 Tacahe, eta jena sáchequenehi eta macamarcairahi ema amuya, étaripa eta nanasirahi eta máijareyarehi, téchajicapa ema Zacarías. Macunachaipa ema Viya, taicha mávahácaripa ema Espíritu Santo. Ánipa macahehi:

68 —Téavicavapa eta macunachacareva ema Tata Vicaiyaquene, ema véhiruhi vimutu viti israelítana. Taicha tijapanuhavihi vimutu viti machaneranahí, ticuchucuhahaviyarehi.

69 Tíjaracahaviyarehi puiti ema yátupiqueneyare eta macatiuraivaya, ema manerejiruhi te namuri ena mámariequeneanainihi ema David, ema mavanarainihivare ema Viya.

70 Títauchavaipahi eta náechajiriruvanahí ena santo profetanaini acane, eta nametasasivanahí me Viya.

71-73 Taicha tacahehi eta matratunehi ema Viya mayehe ema viáchucaini Abraham. Ema Viya tíjaracahavi eta majapanuiravacayarehi ena viáchucanaveanaini, énapa ena ticachichahaviana, vítipa puiti. Énerichuvare tíjaracavahi eta

mamaemitisisisiraya eta macatiuchirahaviyare nayehe ena ticiatianacahavianahi.

<sup>74</sup> Ema Cristo manerejiruhi ema Viya, ticiatuchahaviyarehi taicha mamavarairahi vipicahini, nacuijahivaréni ena nahapapicahavihini eta vicaemataneasirayarehi éma.

<sup>75</sup> Eta mavarahaquenehi tiúriyare eta vítaresirayarehi tamutu sácheana, tájina víchiravaimahi te mamirahu éma.

<sup>76</sup> Pítiripa, piti nuchicha, píchuarecasivaichuhi mayehevivare profeta ema Tata Vicaiyaquene taicha píti pínapumirauchayarepahi ema Viáquenu Cristo.

<sup>77</sup> Pétupiricayarehi eta nasamureana ena achaneana, yátupinapa machaneranayarehi éna. Pímitucayareva nácaicutiaraya eta mavarairahi ema Viya macatiuchavacayare, macaepahairayarehivre eta napecaturana.

<sup>78-79</sup> Puítiripa, eta máemunasirahavihi ema Viya, macucupaisinahavihi te anuma ema Machicha. Éma, tímimaticahavinapa eta majaraiva ema Tata Vicaiyaquene étapa eta táuriquene achene ticaijuhe mayehe. Máetucarácavacayare eta nasamureana ena ticasamureanahi, nácani tépenanayarehíni –macahepa ema Zacarías.

<sup>80</sup> Tacahe, ema amuya eta majurusirahi, tiámvapahi eta masuapajiraivahi mayehe ema Viya. Váhivare étainahini te tajuhe eta avasare eta majurusinehi. Vámahicuruuhahi eta majurusirahi. Tiámainucava te ajairapa, tímerecavapa nayehe ena majaneanana israelítana, tépanavapasera ticametarairu.

## 2

*Eta máuchusira ema Jesús*

(Mt 1.18-25)

<sup>1-3</sup> Tacahe, te jena áñoanahi cape juca viásinequenehi te émarichaha aquenucahi ema Emperador Augusto, matiarihivare ema apuna achane ticaijare Cirenio, majupahahi ema Augusto. Prefectohi éma, tayehe eta avasareana. Ticaijare Siria eta mávihahi\*. Tacahe, te jena sácheana, ema Augusto macavanairipipa nacuchuca eta vantu eta nacatupairayare namutu ena achaneana te avasareana. Tacahe, tiyananapa ena achaneana te návasanapachu te náuchusineana eta nacatupairayarehi. Nasuapayarehi eta vanairipi. Táinapuiruhi censo maicha ema Emperador Augusto.

<sup>4-5</sup> Tacahe, tiyanapa ema José. Mámapa esu mayena María. Ticajaripaipa ésu. Tacahe, tiúchucanapa éna tayehe eta avasare ticaijare Nazaret te Galilea. Nacaijuhepa eta avasare ticaijare Belén te Judea, eta mávasainihi ema aquenucaini rey David.

\* **2:1-3** Te jena año, matiarihivare ema ichapequenehi aquenuca ticaijarehi Aluresi. Éma, reyhi tayehe eta departamento Judea.

Étarichuvare mávasahi ema José, taicha ema José mámariequenehi ema David. Tiyananapa ticatupanayarehi.

<sup>6-7</sup> Tacahe, títecapanapa te Belén. Tájinaipasera táviravainahini eta te pétiana eta náitecapihahini taicha camurique-neanahi ena achaneana náitecapa queneanahi. Tacahe, tisiapanapa eta te peti tapena eta sárareana. Tacahe, esu María tiyuriticavaipa eta sucajera eta suínasirayarehi. Tacahe, tínacapa jena yati. Suínacapa ema amuya ema suárachichahi. Tacahe, suáyuruacapa eta te mámaratataji pañal. Sucaivecapa ema amuya alauchu.

*Ena pástulérhana ticametacasanapa nayehe ena ángeleana*

<sup>8</sup> Te vámahi te tachacaya eta avasare Belén, natarihihi ena pástulérhana. Éna, najaneacahi eta nayeheana uvesana te jena yátiquenehi.

<sup>9</sup> Tiáramicarepa tímerecava ema ángele mavaneruhi ema Viya. Jéhesare, tamicauchamurinehi ena pástulérhana eta majaivahi éma. Tiáramecanarine éna.

<sup>10</sup> Tásihasera, ema ángele máichavacapa:

—Vahi ecupica. Yare, jucarihi eta tímitecanuhi núti numetapanaheyare. Tétávicava táurisamurécarevaya nayehe namutu ena achaneana.

<sup>11</sup> Puiti te jena avasare Belén, mávasaini ema rey David, tiúchucaipa ema Ticatiurahiyare eyehe emutu éti. Éma, ticajare Cristo Viáquenu.

<sup>12</sup> Eta tacahe, nímicucutiarachinaheyare eta ímairaya: Echimapayare ema amuya ticayuruuhahi te mámaratataji pañal. Tívecahi eta te tajuhe eta peti tapena eta sárareana —máichavacapa ema ángele.

<sup>13</sup> Tásicha, tíjahúchavapa tímerecavana ena camurique-neana ángeleana eta te mávihahi ema émana ángele. Najirahi eta alabanza eta nacunachirahi ema Viya te anuma. Ánipa nacahe:

<sup>14</sup> ¡Tétávicavapa eta vicunachirahi ema Viya vimutu viti viávihanahi te anuma! ¡Jéhevare puiti, tiúricavanainapa ena achaneana te juca apaquehe, ena manerejiruanahi macatajiruanahi ema Viya! ¡Tájinainapa náichiravaimahi! —nacahepa.

<sup>15</sup> Tacahe, tiyananapa ena ángeleana, tichavana te anuma. Tásicha, náichacacapa ena pástulérhana:

—Yare, viyana te Belén. Viyana vímahapana eta juca mametaruuhavihi ema ángele mavaneruhi ema Viya Viáquenu —náichacacapa.

<sup>16</sup> Tacahe, titátájianapaipahi tiyanana. Jéhesareinahi, te títecapanapa, nachimapainehi esu María émapa ema José.

Matiarihisaréipahi ema amuya. Tívecahi éma eta te tajuhe eta peti tapena eta sárateana.

<sup>17</sup> Te náimahapa tamutu, tépanavanapa náemechapa. Amairipahipá naecha eta mamecarapianahí ema ángele eta máuchusiraipahi ema amuya.

<sup>18</sup> Tacahe, náraminehi namutu ena achaneana eta nametrapianahí ena pástulérana.

<sup>19</sup> Tásihasera, esu María supanerequenehainehí te susamur tamutu eta juca susamaqueneanahí.

<sup>20</sup> Tacahe, ena pástulérana tichavanapa tayehe eta te najanearesihahi eta uvesana. Nacunachainehi ema Viya te anuma táchavene eta máechajiriruvahi ema ángele, táchavenevare eta náimairahivare ema amuya alauchu. Étapaichuhi tacahehi eta macayemaquenehi ema ángele.

*Námapa ema amuya Jesús te Jerusalén, náimerepana tayehe eta Templo*

<sup>21</sup> Te óchoquenepa sache eta máuchusirahí ema amuya, namarcachapa éma taicha tacahehi eta nayeherépi ena israelítana. Tacahe, nanacapa eta máijareyare Jesú. Eta máijare máimijarechaquenehi ema ángele te sucajariyarepa esu maena María.

<sup>22-24</sup> Tacahe, te cuarentaqueñepa sache eta suínasirahí esu María, tiyananapa te Jerusalén. Eta tímiyanavacahi éna, náimerepanayarehi ema amuya mayehe ema Viya Viáquenu. Taicha ema Viya macavanairipihi eta te Sagrada Escritura eta májurehi ema víyarahaini Moiséini, ánipa tacahehi: “Te ajairapuca ema mácani suárachicha esu esena, ímerekayare nuyehe; íjaracanuyare taicha nícuichichuhi ema”. Énerichuvare náitauchayarehi eta juca apana vanairipi tayehe eta napachihairaina ena esenana eta te taequenerapa eta náinasira. Ánipa macahe: “Esu súcani esena arainacahi, suijaracasichanupana eta apihina paluma símarrune; te váhipuca, apina paluma suítatiqueneana, amairuhichichanasera”.

<sup>25</sup> Tiuri, matiarihihi te Jerusalén ema émana achane ticajare Simeón. Tétavicavahi eta máuriva. Tipicaurahi éma. Émarichu mávaháruhi ema Espíritu Santo. Ticuchapavapahicha ticaimairuvaipaicha éma eta máimatinraya ema Cristo, éma ticaurisamurerahi nayehe ena achaneana majaneanana israelítana.

<sup>26</sup> Taicha ema Espíritu Santo mamecaripahi ema Simeón eta vuíchaha tépenavanemahi éma, táicha máimatinumayarehi ema Cristo mavaneruyarehi ema Viya.

<sup>27</sup> Tiuri, te jena sache, ema Espíritu mavanecapa ema achane Simeón mayana eta te Templo. Tacahe, títecapanapa ena ticachichana ema Jesú. Námapaipa ema amuya.

Náitauchayarehi eta vanairipiana taicha eta máuchusirahi ema suárachichahí.

<sup>28</sup> Tacahe, te máimahapa ema Simeón ema amuya, mavehapa, majupacapa. Tásicha, macunacharinehi ema Viya te anuma. Macahepa ema Simeón:

<sup>29-30</sup> —Tiuri puiti, Tata Náquenu te anuma, nuvarahapa nunaraca te juca apaquehe, nuti pivanarahi. Taicha núrisamurepa eta nímairaipa ema Cristo. Étapaichuhí eta pimeta-runuhi. Nímatipa ema Ticatiurahiqueneyarehi, ema pivaneruhí pitupararuhi.

<sup>31</sup> Éma, tímaticareya picha nayehe ena achaneana ticavasanahí eta te tamutu avasareana.

<sup>32</sup> Ticunachavanarinehi ena pinerejiruana israelítana. Tíjarahinevare te nasamure eta nacunachirahí. Éma, timicauchavacaya ena apamuriana achaneana apavasanana apaesa náimatiyare ema Viya —macahepa ema Simeón.

<sup>33</sup> Náraminehi ena ticachichhana eta máechajiruvanahí ema Simeón mayehe ema amuya.

<sup>34</sup> Tacahe, ema Simeón mayaseacapa ema Viya eta náurivaina éna. Tacahe, máichapa esu María esu maena ema amuya Jesús:

—Pímaha. Ema maca amuya, matuparacasivaichuhí me Viya eta máimituresirayare eta máechajiruvana ema Viya. Natiarihiyaresera camuriana ena vijaneanana israelítana énajivayare tíchavanayare, taicha náepuruyare ema pichicha, nacatianacayareva. Tásicha, natarihiyarevaresera ena apamuriana vijaneanana tinaracanayare tiúricavanayare taicha eta nacasiñairaya éma.

<sup>35</sup> Étainapa tacaecheraiyaya eta napanereruanapachu te nasamureana. Énerichuvare, numetacavi piti María: Ichape eta picatisamurevayare, taicha pímahayare eta táíñehiqueneyare máichararacavayare ema pichicha. Tímicutijiricavayare tayuvaracahini eta pisamure eta tumare —máichapa ema Simeón.

<sup>36</sup> Tiuri, sutiarihihivare esu ésuna esena ichavicachicha. Ticametarairurahi ésu. Ticaijaruhi Ana. Ema suýaini ticaijaréni Fanuel. Ésu, mámariequenehi ema víyarahaini Aser. Eta suámaperuvahi ésu, siete año eta sucachanerahí ema suímaini.

<sup>37</sup> Tásicha, ochenta y cuatro áñoripahi eta suépenaimavahi. Sunasiquenehi sucabenahí ésu eta te Templo. Tamutuhi sácheana, yátiana, tiyujaracahi ésu. Suhayunachahivare.

<sup>38</sup> Tacahe, ema Simeón téchajiricavainirichaha, titecapanecha esu Ana. Eta suímaírahi ema amuya Jesús, sucunacharinehivare ésu apanahivare, suhasulupayachapa ema Viya máichavene ema amuya. Tásicha, sucametarairupa

mayehe ema amuya. Suéchajisihahi éma nayehe ena tisuapajirairahana ticuchapanahi eta máitecapirayare te Jerusalén ema Cristo.

*Tichavanapa eta te návasa Nazaret*

<sup>39</sup> Tiuri, náitauchapa tamutu eta mavanairipiana ema Viya eta te Sagrada Escritura. Tacahe, tichavanapa eta te Nazaret te Galilea, te návasaichuhi éna.

<sup>40</sup> Tacahe, ema amuya Jesús tiúrijuruhi. Túmehi. Téchemarahihi, tamutu maecha, taicha mamunavahi me Viya.

*Ema Jesús téchajiricava nayehe ena máestroana*

<sup>41</sup> Tiuri, tamutu áñoana te Páschuamuhuana, eta nayeherepi ena ticachichana ema amaperu Jesús, tiyananayarehi tayehe eta avasare Jerusalén.

<sup>42</sup> Tacahe, ema Jesús, te macayehepa doce año, tatuparacaripahi ena ticachichana náimerepanayarehi éma, námayarehi tayehe eta Jerusalén, náimimatichayarehi eta piesta ticajare Pascua.

<sup>43</sup> Tiuri, te jena táequenerapa eta piesta, tichavanapa te napena. Tíminasichavapasera ema amaperu Jesús eta te Jerusalén. Eta napaisirapahi te achene, vahi náejiacavanehini ena ticachichana,

<sup>44</sup> taicha náimijachahi matiarihipahi éma te namuri ena achaneana nacachanequeneanapahi. Étanaripahi sache eta napaisirahi, napaenumavapa náejiacahi éma. Te jena cáperehiquenepa, natanucapa te namuri ena najaneanana nacachanequeneanapahi.

<sup>45</sup> Májinaserá náichimavahini. Tacahe, tichavanavarepa te Jerusalén, natanupanayarehi éma.

<sup>46</sup> Tacahe, te jena mapanaquenepa sache eta natanusirahi, napaenumavapa náetupiacahi ema Jesús tayehe eta Templo. Macachanemurihi, téjacahi te namuri ena máestroana. Masamararacavacahi, mayaseremurihavacahivare émaapanavare.

<sup>47</sup> Ichaperinehi eta náraminehi namutu eta náimairahi eta máechemaraivahi, taicha táurivapahi eta majicapiravacapahi éna, taicha eta máechemaraivahi.

<sup>48</sup> Tacahe, tiáramivanarinehi ichape ena ticachichana te náetupiacapa. Tásicha, suíchapa esu maena:

—Nuchicha, ¿tájaha tacayema píchahavihi? Ichapemuri eta vicañamarasiravahi pícha. Vitanujirircavihi, núti éñipa eñi piya —suíchapa esu maena.

<sup>49</sup> Tacahe, ema Jesús majicapapa:

—¿Tájaha tacayema, meme, eta etanujiricanuhi? ¿Váhipuca échahini éti eta návihairahi eta ani? Níchayare eta máemataneana ema Tata —macahepa ema Jesús.

**50** Énasera vahi nacaicutiarahini eta macayemaqueneanahi ema nachicha Jesús.

**51** Tacahe, tiyananapasera tichavana te návasahi Nazaret. Ema Jesús, tisuapajirahihi nayehe ena ticachichana. Esu maena María tamutuhi supanerequenehahi te susamure eta juca susamaqueneanahi.

**52** Tacahe, ema Jesús tijurucapaipa, tijuruhacapaipavare eta máquehe, tacachanepahisera eta máitupajijasiravahi. Máimicatacahi ema Viya. Tétavicavahivare eta náemunasirahi éma, ena achaneana.

### 3

*Ema Juan Tícacashiricarahi tépanavapa ticametarairu eta máechajiriruva ema Viya nayehe ena vámahicuruuhana*

(Mt 3.1-12; Mr 1.1-8; Jn 1.19-28)

**1** Tacahe, eta máepeniraipahi ema aquenucaini Augusto, tisiapapa ema Tiberio máitsivaquenehi. Émapa Emperadorhi. Quince áñoripahi eta macatuparahairahi. Ema Poncio Pilato, émaripa prefectohi tayehe eta departamento Judea. Tásicha, ema Herodes Antipas, machicha ema Aluresini, prefectohivare tayehe eta departamento Galilea. Ema maparape Felipe, prefectohivare éma, tayehe eta departamento Iturea étapa eta Traconite. Ema Lisanías, prefectohivare tayehe eta departamento Abilina.

**2** Te Jerusalén, ema Caifás, corregidorhi. Énerichuvare tipicauchacarehi ema Anás, pasado corregidor, máimachuca ema Caifás.

Tacahe, te jena sácheinahi, ema Juan machicha ema víyarahaini Zacarías, ajairaripa. Manasirichahahisera tayehe eta mávapahi majurusinehi. Tásicha, ticametacasipa ema Juan eta mayehe ema Viya eta macametarairuirayarepa eta máechajiriruvana.

**3** Tacahe, tiyanapa tipaicahi ema Juan tayehe eta avasarechichana tiávihanahi te tachausi eta cajacure Jordán. Mametacavapipa ena achaneana. Ánipa maicha:

—Ítsivacha eta epanereruana. Éneuchava mayehe ema Viya apaesa maperdonachahe eta epecaturana. Te éneuchavapuca, nútì nícacasicahénapa —máichapa.

**4-6** Ema maca Juan, émaripa ema máechajisihaquenehi ema Viya eta te Sagrada Escritura, taicha ánaquiaparipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanesirayare ema Machicha

te juca apaquehe. Eta tímitecahi ticatiurahiyarehi. Énerichuvare matiarihiyareva ema apana achane máichuhaqueneyarehi ema Viya. Macametarairuyarehi, máetupiricavacayare ena achaneana, náinajisirayarehi eta napaneruana tamauriqueneana, apaesa táuri eta najacapirayare ema Machicha ema Viya. Tacamunuhivare yátupina eta nacasiñairavayarehi mayehe, náinajicayarehivare eta nacasiñavavaisirahi, étapa eta navayuaraivahi. Nasapihahi tijapanurahianainapa éna. Tásicha, te máitecapapa ema ticatiurahiyarehi, éma máimimaticchainapa namutu eta najacapacarevaya me Viya namutu ena ticasíñavana mayehe.

<sup>7</sup> Tacuhe, ena achaneana tiyananapaipa napauchapaipa ema Juan, navarahapa ticaicachasianayare eta mayehe. Tásicha, éma máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táïñehiqueneyare ecuñaraqui. Evarahahipuca iúchucuhayare.

<sup>8</sup> Tiuri puiti, te evarahapuca eta iúchucuha, yátupina tátupiruva eta epaneruana. Ímerecava eta ínajisiraya eta epecaturana. Váhivare ecucajamurava eta mámariéquenérahehi ema viáchucaini Abraham. Taicha tayanapane mámarihepuca éma, váhisera iúchucuhaimahi te vahi ecuitsivacha eta epaneruana. Ema Viya, tájina máemaitucaimahi éma. Te mavarahapuca, vahi máejecarachaimahi máepiyaca achaneanaina eta juca mari, mavarairainahi yátupina ena mámariequeneanaina ema Abraham.

<sup>9</sup> Ecauneuchava, taicha tiánehipa títecapauchaheyare eta ecuñaraqui nayehe ena achaneana máitucaranahanahí téneuchavana, váhivare náitsivachahini eta napaneruana. Tímicutijiricavaipa te máechucayarepa ema achane eta yucuqui máhireana; tásicha, máijuchainapa tamutu. Ene nacaheyare ena máeneuchavarahana —máichavacapa ema Juan.

<sup>10</sup> Tásicha, ena achaneana nayaserecapa:

—¿Tájahasica eta vícharacavayare eta viúrivaina?

<sup>11</sup> Ema Juan majicapapa:

—Ecajirahiyare. Mácani tatarihi apina eta macamisa, máijaracasichayarehi eta étana mácani tájina macamisaina. Énaripa nácani ticaniruanahi, nacajiyareva nácani tájina naviyahini eta nanicaquene —máichavacapa.

<sup>12</sup> Te jena sácheana, náitecapauchavare ema Juan ena ticobrarecarahiana eta impuesto. Navarahapa ticaicachasianayarehi. Nayaserecapa ema Juan, náichapa:

—Maestro, ¿tájahapuca vícharacavaini eta viúrivainaini víti apanavare? —náichapa.

<sup>13</sup> Majicapapa ema Juan:

—Vaipa ecuapecchava ecuvayuyujica eta ecobraresira, tátupiruva jácani tavanairipihi eta ley —máichapa.

<sup>14</sup> Énerichuvare náitecapaucha ena suntaruana. Nayaserecavare ema Juan, náichapa:

—Víti apanavare, ¿tájahapucaini vícharacavayare eta viúrivaya? —nacahepa.

Máichavacapa éma:

—Vaipa ecuvorejica eta náimahaqueneana ena achaneana. Váipavare ecuipicarareca. Nacuijapa ecuepiyequeneha. Tarataripa tacurisamurechahe eta evachasana — máichavacapa.

<sup>15</sup> Ena achaneana ticunevanaripaicha eta mayehe ema Juan, náimijachaipahi émaripa ema Cristo nacuchapaquenehi, cátiturahiyarehi. Váhisera námutuimahi.

<sup>16</sup> Tásihasera ema Juan máichavacapa:

—Yátupi núti níccachasichehi te une. Ávanepaipahisera mácani yátupiquene Cristo. Éma, tiápajupanavahi nuyehe núti, eta mapicauchacarevahi. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini nuti páuresami. Te yátupina ecasiñava mayehe, tícachasicheheyareva; tíjaracaheyareva ema Espíritu Santo. Téhesera vahi ecucasiñavapuca mayehe, tícuñacaheyare tayehe eta táijurequene yucu.

<sup>17</sup> Puiti éma márajapainapa tinerejircainapaipa nácani yátupiqueneanahi téhicanayare. Máunacainapa éna. Ticutinapa mácani achane te tiácatayajiricahi eta arusu. Máunacainapa. Tásicha, máquijicapa eta tapiraquiji, máijuchayarepa te yucu. Eta nacaheyare ena máurirahanahi, tíjuanánapa te yucu, máitavacacayarehi eta tamuruira — máichavacapa ema Juan.

<sup>18</sup> Tacahéhi eta juca máechajisiravacahi ema Juan. Ichape eta maconsejachiravacahi ena achaneana, máimitusiravacahi eta máechajiriruva ema Viya.

<sup>19</sup> Émaripa ema Herodes Antipas ema aquenucahi, maconsejachahivare vahi macuimiyana macuveha esu Herodías, mayenahi ema maparape Felipe. Váhivare macuimiyana macuquicha eta apamuriana táñemahiqueneana máichaqueneana.

<sup>20</sup> Émasera ema Herodes vahi masuapahini. Masapiharichucha tisemahi, máimicaratacapa ema Juan, macasiapayarehi te cárcel.

*Eta macaicachasirahi ema Jesús**(Mt 3.13-17; Mr 1.9-11)*

<sup>21</sup> Tiuri, te tamirahupaichaha eta macaeratairaya ema Juan, tímyanavaichahahi máicachasicavacahi ena achaneana. Étana sache, máitecapauchapa ema Jesús, mavarairahi ticaicachasi éma apanavare. Tacahe, te tamutupa eta macaicachasirahi, mayujarasirahi. Tíjahúchavapa téjaca eta anuma.

<sup>22</sup> Tiúcupaicapa ema Espíritu Santo, mavarairahapetá paluma eta máimahi. Matupiruruchapa te mápusi ema Jesús. Tásiha, nasamapa eta mahu ema Viya te anuquehe. Ánipa macahehi:

—Pítira nuchicha némunaruquene. Núrisamurecha piyehe —macahepa.

*Ena achaneana máchucaequeanaini ema Jesús eta acane**(Mt 1.1-17)*

<sup>23</sup> Tiuri, ema Jesús, macayeheripahi treinta año te tinacu-chavapa tímiturecahi nayehe ena achaneana. Éma, náimijachaquenehi machicha ema José.

Ema máiyainihi ema José, ema Elí.

<sup>24</sup> Ema máiyainihivare ema Elí, ema Matat.

Ema máiyainihivare ema Matat, ema Leví.

Ema máiyainihivare ema Leví, ema Melqui.

Ema máiyainihivare ema Melqui, ema Jana.

Ema máiyainihivare ema Jana, ema José.

<sup>25</sup> Ema máiyainihivare ema José, ema Matatías.

Ema máiyainihivare ema Matatías, ema Amós.

Ema máiyainihivare ema Amós, ema Nahum.

Ema máiyainihivare ema Nahum, ema Esli.

Ema máiyainihivare ema Esli, ema Nagai.

<sup>26</sup> Ema máiyainihivare ema Nagai, ema Maat.

Ema máiyainihivare ema Maat, ema Matatías.

Ema máiyainihivare ema Matatías, ema Semei.

Ema máiyainihivare ema Semei, ema José.

Ema máiyainihivare ema José, ema Judá.

<sup>27</sup> Ema máiyainihivare ema Judá, ema Joana.

Ema máiyainihivare ema Joana, ema Resa.

Ema máiyainihivare ema Resa, ema Zorobabel.

Ema máiyainihivare ema Zorobabel, ema Salatiel.

Ema máiyainihivare ema Salatiel, ema Neri.

<sup>28</sup> Ema máiyainihivare ema Neri, ema Melqui.

Ema máiyainihivare ema Melqui, ema Adi.

Ema máiyainihivare ema Adi, ema Cosam.

Ema máiyainihivare ema Cosam, ema Elmodam.

Ema máiyainihivare ema Elmodam, ema Er.

29 Ema máiyainihivare ema Er, ema Josué.  
 Ema máiyainihivare ema Josué, ema Eliezer.  
 Ema máiyainihivare ema Eliezer, ema Jorim.  
 Ema máiyainihivare ema Jorim, ema Matat.  
 30 Ema máiyainihivare ema Matat, ema Leví.  
 Ema máiyainihivare ema Leví, ema Simeón.  
 Ema máiyainihivare ema Simeón, ema Judá.  
 Ema máiyainihivare ema Judá, ema José.  
 Ema máiyainihivare ema José, ema Jonán.  
 Ema máiyainihivare ema Jonán, ema Eliaquim.  
 31 Ema máiyainihivare ema Eliaquim, ema Melea.  
 Ema máiyainihivare ema Melea, ema Mainán.  
 Ema máiyainihivare ema Mainán, ema Matata.  
 Ema máiyainihivare ema Matata, ema Natán.  
 32 Ema máiyainihivare ema Natán, ema David.  
 Ema máiyainihivare ema David, ema Isaí.  
 Ema máiyainihivare ema Isaí, ema Obed.  
 Ema máiyainihivare ema Obed, ema Booz.  
 Ema máiyainihivare ema Booz, ema Salmón.  
 Ema máiyainihivare ema Salmón, ema Naasón.  
 33 Ema máiyainihivare ema Naasón, ema Aminadab.  
 Ema máiyainihivare ema Aminadab, ema Aram.  
 Ema máiyainihivare ema Aram, ema Esrom.  
 Ema máiyainihivare ema Esrom, ema Fares.  
 Ema máiyainihivare ema Fares, ema Judá.  
 34 Ema máiyainihivare ema Judá, ema Jacob.  
 Ema máiyainihivare ema Jacob, ema Isaac.  
 Ema máiyainihivare ema Isaac, ema Abraham.  
 Ema máiyainihivare ema Abraham, ema Taré.  
 Ema máiyainihivare ema Taré, ema Nacor.  
 35 Ema máiyainihivare ema Nacor, ema Serug.  
 Ema máiyainihivare ema Serug, ema Ragau.  
 Ema máiyainihivare ema Ragau, ema Peleg.  
 Ema máiyainihivare ema Peleg, ema Heber.  
 Ema máiyainihivare ema Heber, ema Sala.  
 36 Ema máiyainihivare ema Sala, ema Cainán.  
 Ema máiyainihivare ema Cainán, ema Arfaxad.  
 Ema máiyainihivare ema Arfaxad, ema Sem.  
 Ema máiyainihivare ema Sem, ema Noé.  
 Ema máiyainihivare ema Noé, ema Lamec.  
 37 Ema máiyainihivare ema Lamec, ema Matusalén.  
 Ema máiyainihivare ema Matusalén, ema Enoc.  
 Ema máiyainihivare ema Enoc, ema Jared.  
 Ema máiyainihivare ema Jared, ema Mahalaleel.  
 Ema máiyainihivare ema Mahalaleel, ema Cainán.

38 Ema máiyainihivare ema Cainán, ema Enós.  
 Ema máiyainihivare ema Enós, ema Set.  
 Ema máiyainihivare ema Set, ema Adán.  
 Ema Adán macaepiyaquenepa me Viya.

## 4

*Ema Váinaraji Satanás mavaraha macaitsamaraji ema Jesús  
 (Mt 4.1-11; Mr 1.12-13)*

<sup>1</sup> Tacahe, ema Jesús, mávahácaripa ema Espíritu Santo. Tásiha, ema Espíritu Santo eta mávasamurechirahi, máimitu-caipahi eta mayanirayarehi te mávapahi apaquehe. Majuni-jicayarehi eta cajacure Jordán.

<sup>2</sup> Cuarenta sache macahehi tayehe. Tájinavare manicahini eta jena sácheinahai. Técuhasamurepa.

<sup>3</sup> Tacahe, ema Váinaraji témeñahavapa mayehe. Mavaraha macaetemayarehi. Ánipa maicha:

—¿Pécuhapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

<sup>4</sup> Ema Jesús majicapapa:

—Váhipuca pecha eta táechajiruvahi eta Sagrada Escritura, ani tacahehi: “Vahi tácarichuimahi eta tinicacare ticaitarcayare ena achaneana. Tacachaneyarehi eta máechajiruvu ema Viya. Jéhevare, éta ticaitarecarahiyare” —macahepa.

<sup>5</sup> Tacahe, ema Váinaraji mámavarepa te tainahu eta anuquehe mari. Tíjahúchavapa máimecha tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji.

<sup>6</sup> Tásiha, máichavarepa ema Váinaraji:

—Núti níjaracavyare tamutu eta juca avasareana. Ichape eta napicauchiraviyare, nacunachiraviyareva ena achaneana. Pítina náquenuvina ena távacuanahi eta avasareana. Taicha núti néchavacahi éna. Nútivare nécha mácani nuvarahaqueneyare níjaraca.

<sup>7</sup> Pépuyucanumaserá te numirahu pitsiucanu apaesa níjarcavisarepa tamutu —máichapa.

<sup>8</sup> Émasera ema Jesús majicapapa:

—Pévuishatataji piti Satanás te juca numirahu. Váhipuca pecha eta táechajiruvahi eta Sagrada Escritura. Ani tacahehi: “Macarichu ema Viya vépuyumirauchaya. Macarichuvare vicaemataneacayare” tacahepa. Váhiqene táurica nucaemataneacavihini —máichapa ema Jesús.

<sup>9</sup> Tacahe, vahi máevuishahini ema Váinaraji. Mámavare te avasare Jerusalén. Máimiapanapa te tainahu eta Templo. Tásiha, máichavarepa:

—Te yátupina machichavina ema Viya, písapavayare pémirica te anuquehe. Tájina píchavaimahi eta pémirisirayare.

<sup>10</sup> Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajircavianayare, énevaneyarehi tijaneacaviana.

<sup>11</sup> Tiámavianayare te navahuana, apaesa vahi picucayutetu eta máriana eta te pipaisirana” tacahepa. Tásicha, németeaca tijaneacavianayare puiti, vahi náisapaimahi pica-jara te pémirica —máichapa ema Váinaraji.

<sup>12</sup> Tacahe ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya taicha éma Piáquenu” — máichapa.

<sup>13</sup> Tacahe, tiyanapa ema Váinaraji. Majunijicapa ema Jesús taicha tímahavaipahi vahi máiturucahini macaetema. Mavarahahisera tichavayarehi tiápechavayarehi macaete-mapana.

### *Ema Jesús tépanavapa ticametarairu*

(Mt 4.12-17; Mr 1.14-15)

<sup>14-15</sup> Tacahe, tépanavapa ema Jesús mapaica eta avasareana tayehe eta provincia Galilea. Ichape eta máitupajijiasiravahi taicha mávahácapahi ema Espíritu Santo. Tímiturecapaipa tayehe eta nárujisirarevana te avasareana. Ichapemuri eta nacunachirahi namutu ena tisamararacanapahi. Nasamairiricavarepa ena apamuriana achaneana ticavasanahi te tachacaya eta avasareana.

### *Tichavapa ema Jesús te mávasa Nazaret*

(Mt 13.53-58; Mr 6.1-6)

<sup>16</sup> Tásicha, tiyanavarepa te avasare Nazaret te majurusinehi. Te jena sache sávaru, tiyanapa tayehe eta nárujisirareva nayujarauchirare ena achaneana, taicha tacahehi eta mayeherepihi. Titupihapa ema Jesús, táicutiarahi eta mavarairahi téchajicureca eta Sagrada Escritura.

<sup>17</sup> Náichuhasarepa eta máechajicuresiraya. Náijaracapa eta libro májurehi ema profetaini Isaías. Te mavejiacapa eta libro, matanucapa eta máechajicureyarehi. Ani tacahehi eta táechajiruvanahi:

<sup>18</sup> “Tiávahácanuhi ema Espíritu Santo. Taicha manerejirunuichuhi nútì ema Viya Viáquenu eta numetasiravacayare ena páureana eta juca máemunasiravacahi éma, máimicatasirayareva. Eta tímitecanuhi nucanaracayare ena ticatisamurevanahi. Nucaititijicayareva ena máerataruanahi ema tivayuarahi Satanás. Nucaimairiricayareva ena

púchuquiana. Nucuchucuhayareva ena ticatajivanahi, níjaracaya eta náuricacarevaya.

19 Numetacayareva járajapainapa eta sácheyare tamutuiraya máetupirica ema Viya, tamutuinapa tiúrisamurécarepa máicha" tacahehi eta Sagrada Escritura eta máechajicurehi.

20 Te tamutupa eta máechajicuresirahi ema Jesús, máeratacapa eta libro. Máiinchavapa mayehe ema tijanearecarahi eta libroana. Téjacavarepa ema Jesús. Náimaranaracaripa ena achaneana natarihiqueneanahi.

21 Tacahe, tépanavapa téchajica ema Jesús:

—Nútiripa ema táechajisihaquenehi eta juca libro. Tímitecanuhi numetacahe eta máemunasirahehi ema Viya —macahepa.

22 Tacahe, náramipa namutu ena achaneana. Ánipa náichacaca:

—¡Tétavicavahi tapachinava eta máechajiriruvanahi ema maca! Émachuchasera ema machicha ema Joséini ema carpintéroini. ¿Tájahasica eta juca? —nacahepa.

23 Émasera ema Jesús máichavacapa:

—Németeaca éti váhirichuhi esuapapajicanuhini. Tásiba, evaraharinepuca íchanuyare: “Te yátupina píturuequeneha, pípuchavaca ena ticajumanahi te juca. Vímahaséji piápechavare picuchuca te juca piávasaichu tacuti eta pímereruhi te avasare Capernaum” íchanuyare.

24 Nutupiruvasera numetacahe: Tatuparaca eta epicau-chirahaviya vimutu viti mavaneruana ema Viya. Étisera eti nujaneananahi ecavasanahi eta te juca viávasa, vahi epicau-chanuhini, váhivare ejacapanuini. Ecuti ena achaneana acane eta náepuruirahi ena apamuriana profetana mavane-ruanahi ema Viya.

25 Eta tacahe, eta máimairahi ema Viya eta náepuruirvacahi, tivanecavaca ena profetana nayana napauchayare ena apavasanana. Acane, te matiarihichaha ema profetaini Elías, mapana año y medio vahi taquivahini, tásiba, ichape-vare eta ecuha. Németeaca núti camurianahi nácani ena tépenaimana israelítana.

26 Váhisera étainahini macavanahiyahini me Viya ema Elías eta nayehe ena majaneananahi. Ánaqui te avasare Sarepta tachacayahi eta avasare Sidón, étapa macavanahiyahí máitecapihayare suyehe esu ésunahi esena apavasana tépenaimahi. Ésupa máimicataruhi táichavenehi eta susuapajiraivahi me Viya.

27 Énaripa ena israelítana nacajumaqueneana eta lepra te jena sácheinahí te matiarihichaha ema profetaini Eliseo. Váhivare énainahini macanaracahini ena majaneanana. Masapihapa macanaracahi ema apavasanaquenehi ticajare Naamán, ticavasahi te Siria. Ema Naamán, tinaracaripa eta majuma, táichavenehi eta masuapajiraivahi —máichavacapa ema Jesús.

28 Tacache, eta juca máichiravacahi ema Jesús, tisemanapa ena natarihiqueneanahi.

29 Tásicha téchepumurihanapa éna. Nacuchucapa ema Jesús te tachachacu eta avasare, te tachaui eta táupenaquene, navarahapa nacamiricayarehi éma.

30 Émasera tichavapa mánucumurihapaipa éna. Tiyanapa, majunijicavacapa.

*Ema Jesús máimijuna ema éreana tiávahácainihi ema achane  
(Mr 1.21-28)*

31 Tacache, títecapapa ema Jesús tayehe eta avasare Caper-naúm te Galilea. Tamutu sávaruana tiyanapa tayehe eta nárujisirareva ena achaneana, tímiturepanaya.

32 Ichape náramihi ena achaneana eta máimiturapianahi taicha téavicavahi eta máitusirahi mayunapaicahi tamutu. Téavicavahivare eta tasuapacarevahi eta máimiturapiana.

33 Étana sávaru, matiarihihi te namuri ema émana achane mávaháruhi ema éreana. Tipiararecahi, ánipa macahe:

34 —Núti nímativi. Pítira Sántoquenevihi. Machichaquenevihi ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca picajanerepaicahaviyare —macahepa ema achane.

35 Tacache ema Jesús macajachapa ema éreana. Ánipa maicha:

—¡Pámatina! ¡Piyana pijunijica ema maca achane! —máichapa.

Tásicha, tíjahúchava tiáquipaicavapa te apaquehe ema achane. Tásicha majunijiacapa ema éreana. Tájinaserá máichavahini ema achane.

36 Náraminehi ichape namutu ena achaneana eta náimairahi. Tiyaserejiricacanapa:

—¿Tájahasica tacayema eta juca? Ema maca Jesús, téavicava eta máitupajijiásiravahi, maratahahi máquijica nácani éreanana. Tásicha, ichape eta napisirahi éma. Vahi najicapaemachahini. Tamutupa arairu eta máimiturapianahi ema maca —nacahepa.

37 Enevanevarepa naecha namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te provincia Galilea.

*Ema Jesús macanaraca esu máimase ema Pedro  
(Mt 8.14-15; Mr 1.29-31)*

<sup>38</sup> Te tiúchucapa ema Jesús tayehe eta náurujisirareva, tiyanapa te mapena ema Simón Pedro. Te tisiapapa, náechajiacapa ema Jesús máimaharine esu máimase ema Pedro. Ticajumahi ésu eta muraca fiebre.

<sup>39</sup> Tásicha, mapauchapa ema Jesús. Máquijisinapa eta muraca fiebre. Tinaracavanepa ésu, téchepucavanepa. Suéchapajiricapa éma, énapa ena máimitureana.

*Camuriana ena macanararuapanahí ema Jesús  
(Mt 8.16-17; Mr 1.32-34)*

<sup>40</sup> Te jena cáperehiquenehi, te téricapa eta sache, ena achaneana námavacapaipa namutu ena nacajumaqueneana eta mayehe ema Jesús. Apanapaneneji eta najumanapahi éna. Manacapaipa eta mavahu te náinahuana, macanaraca-paipahi.

<sup>41</sup> Maveranavare ena éreanana máquijiruanapahi te náqueheana ena nacajumaqueneana. Tipiararecanapaipa eta náuchusirapahi. Ánipa nacahe:

—Pítira Machichaquenevi ema Viya.

Émasera ema Jesús vaipa másapahini náimiyanaxahini napi-araca éma, taicha náimatihí éna eta émairahi ema Cristo.

*Tamutu avasareana te Galilea mapaica ema Jesús  
(Mr 1.35-39)*

<sup>42</sup> Te apanapa sache, te tijararahipa, tiyanapa ema Jesús te mágapahi. Natanucapasera ena achaneana. Náetupiasirapa éma tayehe eta mágihahi. Navarahapa náiminachayarehini. Vaipa náisapahini mayanahini.

<sup>43</sup> Émasera ema Jesús máichavacapa:

—Nutuparacasivaichuhi eta nuyanirayare tayehe eta apana avasareana taicha nuvanahirichuhi eta níchuiravacaya ena achaneana náehisiraina ema Viya apaesa macuchucuhavaca —máichavacapa.

<sup>44</sup> Tacahe, tiyanapa tipaica ticametarairupaipa te náurujisirarevana tayehe eta avasareana te Galilea.

## 5

*Tiáramicarepa eta náitusiravahi eta jima  
(Mt 4.18-22; Mr 1.16-20)*

<sup>1</sup> Te jena sácheanahi, ema Jesús máginehi te tachausi eta cáquiure ticaijare Galilea. Títecapanapa ena camuriqueneana achaneana. Váipanecha náratavahini, tipamihejiricacanapa eta navarairahi nasama eta macametarairuirahi ema Jesús eta máechajiruvana ema Viya.

<sup>2</sup> Máimahapa ema Jesús eta apisi pacure te tachausi. Ena ticayeheana eta pacureana, tisipajiricanahi eta ichapequeneana nayutaheana.

<sup>3</sup> Tacahe, ema Jesús tiávacuhapa tayehe eta mapacurehi ema Simón Pedro. Mavanecapa máevataeca apaesachicha eta pacure. Téjacapa ema Jesús eta te pacure, tépanavapa máimitucavacapa ena achaneana.

<sup>4</sup> Te titapiricapa eta máimitusiravacahi, máichapa ema Pedro:

—Tata, iama eta juca epacure tayehe eta táupenamaiya. Iáquijieca eta jara eyutahe —máichapa.

<sup>5</sup> Ema Pedro majicapapa:

—Maestro, tamutu yati vinajuiricahi, tájinaserá vítuca-vahini. Tavetijipa puiti eta tajarahíraripa. Nusuapavisera eta juca pivanesiranuhi, náquijiecaya eta nuyutahe —máichapa.

<sup>6</sup> Jéhesaréinehi, te nachurucapa eta yutahe, tiyututuca-vai-pahi eta jímana. Vaipa táratavahini ténarujicapa eta ichape yutahe taicha eta tajitacareva eta jima.

<sup>7-10</sup> Natarihihisera te apana pacure ena nachamuriana: ema Jacobo émapa ema Juan. Tacahe, náevehauquichapa tímicatacanayarehi. Te títecapanapa, náinicachapa eta apisiquene pacure. Tiánehirichahavare vahi táratavayarehini taicha eta tajitacarevahí, téricayarepaini eta pacure. Ichape eta náramesirahi namutu taicha eta náimairahi eta camuriquene jímana. Tásiba, ema Pedro máepuyumirauchapa ema Jesús. Máichapa:

—Tata, pítiyara yátupiquenévihi Viáquenuvi. Váhicha nímiuriacava nutupihamirauchavi nútí. Nucapecaturara-hiquenehi —máichapa.

Matiarihihi ema Jacobo émapa ema Juan, machichanaveana ema Zebedeo. Machamurianahi ema Pedro. Énerichuvare tiáramecanarinehi éna, énapa ena apamuriana natarihiqueneanahi. Émasera ema Jesús máichapa:

—Vahi picupica, Simón. Pínajicainapa puiti eta juca pématanerepini. Nútí níjaracaviya eta apana pématanerepiyare. Pitanucainapa ena achaneana nuchaneranaya —máichapa.

<sup>11</sup> Tacahe, te nachurupaicapa eta napacureana te tiájipahi, étapa nanaquisinehi. Tiyananapa náehicapa ema Jesús.

*Ema Jesús macanaraca ema émana achane leproso*

*(Mt 8.1-4; Mr 1.40-45)*

<sup>12</sup> Tacahe, eta mánucuirapaipahi ema Jesús eta avasarechicha, mácapajicapa ema émana achane macajumaquenehi eta lepra, tamutu eta máquehe. Eta náimairahi ema Jesús, máitecapauchapa. Tépuyucapa te mamirahu. Máichapa:

—Tata, nucasiñavahi eta piyeho, picanaracanupaini.

<sup>13</sup> Majicapapa ema Jesús:

—Nuvaraha nucanaracavi. Tájinapa píchiravaina puiti —máichapa.

Manacapa eta mavahu. Énevanerinehi témitiacahi eta majumainihi.

<sup>14</sup> Matuparacapasera ema Jesús. Ánipa máicha:

—Pímaha, nacuija picumetaca eta nútirahi nucanaracavihi. Piyanavaresera pímerecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

<sup>15</sup> Tásihasera, náechapa namutu ena achaneana te avasareana eta máitupajijiasiravahi ema Jesús. Nayanauchapaipa ena camuriqueneana achaneana, navaraírahi nasamararcayarehi, macanarasiravacayarehiva tayehe eta najumana.

<sup>16</sup> Émasera ema Jesús, majunijimurihachucha. Tiyanapa tayehe eta mávapahianahi apaquehe. Ánaqui mayujarasihayarehi.

*Ema Jesús macanaraca ema émana achane macajumaquene eta muracaquiha*

(Mt 9.1-8; Mr 2.1-12)

<sup>17</sup> Étana sache ema Jesús tímiturecahi te tajuhe eta peti, camuriana ena achaneana. Natariihihivare ena fariséoana tépiyacavana religísoana, énapa ena escribánoana, tímatiana eta nayeherepiana ena israelítana. Éna, tiásihanahi te Jerusalén, ena apamuriana tiásihanahivare te avasarechichana tayehe eta Galilea, étapa te Judea. Ema Viya máimicatacahi ema Jesús eta macanarasiravacayarepahi ena nacajumaqueneana.

<sup>18</sup> Títecapanavarepa ena apamuriana, námapahi te áchuji ema achane muracaha. Navarahainipa nacasiapa te tajuhe te mávihahi ema Jesús.

<sup>19</sup> Étasera eta nayututusiravahi ena achaneana, vahi náitujicavahini nasiapahini. Tímpañerechavanapasera náimiapanapa te tamaequehe eta peti. Navetatamaequechapa eta peti te manapaicahi ema Jesús, nacajuchuchucapa ema macajumaquene.

<sup>20</sup> Tacahé, te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi, nucaepehainavipa.

<sup>21</sup> Ena escribánoana énapa ena fariséoana, eta napanerequenehairahi eta macayemaquenehi ema Jesús, tisemarainehi. Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! ¡Taicha macarichu ema Viya marataha macaepaha eta pecatuana!” tacahehi eta napanneruana.

<sup>22</sup> Émasera ema Jesús máimatihi eta napanneruanahi. Máichavacapa:

—¿Tájaha tacayema téjecapavahi eta epanereruana?

<sup>23</sup> Tájina taejeravaina eta níchirahi ema maca: “Nucaepha-hainavipa eta pipecaturanaini”. Máejerarepánapuca eta níchahini: “Péchepuca, piyana pipaica”.

<sup>24</sup> Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti nuchicha, nuvanecavi péchepuca. Piveha eta jara piyereruva. Piyana te pipena —máichapa ema Jesús.

<sup>25</sup> Enevanerinehi téchepuruca ema macajumaquenéni. Mavehapa eta mayereruva. Tipaicapa te namirahu ena achaneana. Tiyanapa te mapena. Ichaperinehi eta macunachirapahi ema Viya.

<sup>26</sup> Ichaperinehivare eta náramirahi namutu ena natarihi-queneanahi. Tétavicavarinehi eta nacunachirahi ema Viya, napicaucharinehivare. Ánipa nacahe:

—Tétavicavapa táramicareva eta juca vímahaquenehi puiti —nacahepa.

*Ema Jesús máichuha ema Mateo, mayeheyare apóstole  
(Mt 9.9-13; Mr 2.13-17)*

<sup>27</sup> Te taequenepa eta júcana, ema Jesús tiúchucapa. Eta mapaisirapahi, máimahapa ema achane ticaijare Mateo. (Ticaijarehivare Leví.) Téjacahi éma eta te macatuparahaiyahi eta macobraresirahi eta impuesto.

—Yare, péhicanu —máichapa ema Jesús.

<sup>28</sup> Enurujipa téchepucahi ema Mateo. Manaquicapa tamutu eta matuparahainihi. Tiyanapa máehicahi ema Jesús.

<sup>29</sup> Tacahe, te jena sácheinahi, tépiyarecapa eta piesta ema Mateo te mapena. Máichuhapa ema Jesús eta máenirisirayarehi, énapa ena camuriqueneana macutiqueneanahi ticobrarecarahiana impuesto, énapa ena apamuriana máemunacasareana ema Mateo.

<sup>30</sup> Natarihihivare ena máimitureana ema Jesús. Tásicha títecapanavarepa ena fariséoana énapa ena escribánoana. Eta

tímiyanavacahi, ticaecahirecanayarehi. Ánipa náichavaca ena máimitureana:

—¿Tájaha tacayema ecachanemuri eta enisirahi ena nánitajiana ticobrarecarahiana eta impuesto? ¡Tétavicavahi eta nacapecaturaraivahi! —nacahepa.

<sup>31</sup> Émasera ema Jesús, te masamairiricapa eta náechajiruvanahi, máichavacapa:

—Ena majumareanahi vahi nácamunuimahi ema médico.

<sup>32</sup> Núti, vahi étaina tímitecanu nutanupanavacayare nácani matapiravareanahi. Eta tímitecanuhi núti nutanupanavacayare ena tisipecaturanapanahí apaesa náitsivacha eta napanereruana, náeneuchavapa me Viya —máichapa ema Jesús.

*Nayaserecapa ema Jesús tayehe eta ayuna*

(Mt 9.14-17; Mr 2.18-22)

<sup>33</sup> Tiuri, nayaserecavare ena achaneana ema Jesús:

—¿Tájahapuca tacayema vahi ayúnanainahíni ena pímitureana? Énayapasica ena máimitureana ema Juan náichahi eta muraca ayuna eta nayujarasirana. Énaripa ena fariséoana, énerichuvare. Tásicha, ena pímitureana píti tinicanahi, téranahivare —náichapa.

<sup>34</sup> Majicapapa ema Jesús:

—Nímicutichinahe puiti. Vahi táuricaimahi ayúnanainahíni icha ena íchuhaqueneanahi tinicanayare nayehe ena araimana. Tiúrisamureanayarehi taicha matiarihihi ema arayena. Tájina táuricahini ayúnanainahíni. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaimahi ayúnanainahíni ena nímitureana.

<sup>35</sup> Járajapainapasera eta sácheyare, ticaverejicasianayare, taicha ticaratacanuanainapa ena ticapacanuanayare núti. Jéhevarepa ayunanaínapa.

<sup>36-38</sup> Esamanuchaha. Eta juca eta nímiturapiána ema, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácoticacaimahi eta nayeherepiana ena apamuriana achaneana. Eta ítusirahi éti eti nímiturapiána, tavaraha ínajica eta ichasi eyeherepiana tamauriqueneanahi.

<sup>39</sup> Ticajerasera eta náinajisirahi ena achaneana eta nayeherepiana tamauriqueneana. Apaesachicharichu eta navarairahi naicha eta juca arairu nayeherepianayare. Namutuyaréni navaraha náimiyana ena nayeherepiana tásichaqueneanahi eta napanereruana ena náchucanaveanaini —máichavacapa ema Jesús.

**6**

*Ena fariséoana náimipicauchahi eta nayeherepiana tayehe eta sávarumuuhuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare (Mt 12.1-8; Mr 2.23-28)*

<sup>1</sup> Eta jena sache sávaruquenehi, tiyanapa tipaica ema Jesús. Mámamurihana ena máimitureana. Témehicavanapa ena fariséoana. Náetavivijicapaipahi eta isanitiana. Tacahe, eta napaisirapahi, ena máimitureana navechuquihapaipahi étajavapahi eta trigo. Navepiraquihipaipa, tépurajacachavanapaipa. Tinicanapaipa. Tísapacareichucha eta nanisira, taicha técuhanahi.

<sup>2</sup> Tacahe, eta náimarasirapahi ena fariséoana, tisemanaipaipa. Ánipa naicha:

—¿Tájaha tacayema vahi epicaucha éti eta juca sache tacapicahuquenehi? Écharichuhi éti vahi tísapacarémahi eta vicaematanerahí puiti. Eta juca evepiraquihipahi eta trigo, ticaijare ecaematanehi —náichapa.

<sup>3</sup> Tásicha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahí ema víyarahainí David eta mapaisirapahi técuhipaipa, énerichuvare ena téhicanapahi.

<sup>4</sup> Écharichuhi éti te masiapapa eta mapena ema Viya, tiyaseserécapa eta manicayarehi. Náijaracapa eta pan tacapicahuquenehi nanacasarehi te namiráhu ema Viya. Nanicasarehi ena tiyujaracarähiana émasera ema David vahi tátuparacahini manicahini. Étasera eta máecuavahí, manicapa eta pan, énapa ena macachanequeneanapahi.

<sup>5</sup> Tiuri puiti, numetacaheyare: Nuti Manerejirunuhi ema Viya, nútirichu néchahi eta sache nanarasirayare ena achaneana —máichapa.

*Ema Jesús macanaraca ema achane tépenavahu*

*(Mt 12.9-14; Mr 3.1-6)*

<sup>6</sup> Tiuri, te apanapa sávaru, tiyanavarepa ema Jesús tayehe eta náurujisirareva. Tímiturecavarepa. Tásicha, matiaríhihi ema émana achane, ticajumahi eta mavahu váure. Vaipa tayamuricahini, tépenavahuhi.

<sup>7</sup> Natiaríhihiware ena escribánoana, énapa ena fariséoana. Náimaharipahi ema Jesús te macanaracayarehipuca ema macajumaquene eta jena sache tacapicahuquenehi. Natanunuiricahí eta tiviuchayarehi éma.

<sup>8</sup> Émasera ema Jesús máimatihi eta napanereruana éna. Tacahe, máechajicapa ema achane ticajumavahuhi. Máichapa:

—Yare, pitupihayare ani te namirahu ena achaneana — máichapa.

Tásiha, titupihapa ema achane te namirahu.

<sup>9</sup> Tásiha, máichavacapa ema Jesús:

—Nuvaraha epanerechaya. Puiti juca sache sávarumuuhuhi, táuricahi víchaya eta táuriqueneana, ¿masi? Táuricahi vípuchayare ena nacajumaqueneanahi, ¿masi? ¿Ímijachapuca tiúriyare eta víchirayare eta tamauriqueneana, vicaparecapuca ena achaneana? ¿Tájahasica eta epanerechahi? —máichavacapa.

<sup>10</sup> Tacalhe, ema Jesús máesenimurihapa ena achaneana. Tásiha, máichapa ema achane macajumaquene:

—Nímaha, picajaruvauhava pímereca eta pivahu — máichapa.

Eta máimeresirahi eta mavahu ema achane, enevanepa tinaravauchavanepa.

<sup>11</sup> Tacalhe, tisemanarinehi ena fariséoana eta náimairahi. Tásiha, tiyaserejiricacanapa:

—¿Tájahapuca vícharacaini ema mácatataji eta táimica-viúchaini? —nacahepa.

*Ema Jesús manerejica ena dócequeneana apóstoleanayarehi*

*(Mt 10.1-4; Mr 3.13-19)*

<sup>12</sup> Te jena sácheanahi, tiyanapa ema Jesús tayehe eta tápusi eta márijuecu. Tamutu eta jena yati tiyujaracahi me Viya.

<sup>13</sup> Te tijarahipa, máichuhavacapa namutu ena máimitureana. Manerejicapa ena dócequeneana mayeheanayarehi apóstole.

<sup>14-16</sup> Ena nani ena manerejiruanahi: ema Pedro (éma ticaijarevare Simón), émapa ema maparapeichuhi ticaijare Andrés; émapa ema Jacobo\* émapa ema maparape Juan; émapa ema Felipe; émapa ema Bartolomé; émapa ema Mateo; émapa ema Tomás; émapa ema apaña Jacobo; émapa ema apanavare Simón; émapa ema Judas; émapa ema Júlasi Iscariote (ema tíjararecahi ema Jesús).

*Ema Jesús máimitucavaca ena camuriqueneana achaneana*

*(Mt 4.23-25)*

<sup>17</sup> Tacalhe, tichavapa ema Jesús, énapa ena máimitureana. Te tachachacu eta mari táinunapahinepa, étapa nacainunainehi ena camuriqueneana achaneana. Ena nani tiásahanahi eta te

\* **6:14-16** Ema apaña Jacobo machichahi ema Alfeo. Ema apaña Simón, tímaticarehi éma, náumurivainihi ena revolucionárioana ticaijareanahi “cananística”. Navaraha náquijica ena extranjeroana romanoana, énaripa nacapaquerecavachi ena israelítana. Eta májuchirahi ema Lucas, ani macahehi: “...ema Judas mayehe ema Jacobo...”. Váipasera vecha te machichahipuca ema Jacobo, téhevare maparapehipuca. Véchahisera eta mapapirahí etá májare ema Judas. Ticaijarehi Lebeo étapa etá Tadeo. (Te pivaraha pécha, pitanuca te Mateo 10.3 étapa te Marcos 3.16-19.)

avasare Jerusalén, eta te provincia Judea, étapa eta provincia Siria. Eta tímitecanahi éna, navarahahi nasama ema Jesús eta máimiturapiana, navarahavare macanaracavacahini tayehe eta najumana.

<sup>18</sup> Ena ticatajivanahi návaháruuanahi ena éreanana, macanaracavacapasera ema Jesús.

<sup>19</sup> Namutu ena achaneana navarahahi náemamahaca ema Jesús taicha náechahi tinaracanayarehi eta najumana eta náemamahasirayare taicha tíupajijiacavahi éma.

*Ema Jesús máimitucahi nayehe ena ticunachacareanahi me Viya*

(Mt 5.1-12)

<sup>20</sup> Tacache, máesenimurihana ema Jesús ena máimitureana. Máichavacapa:

—Éti ímatihí eta tacamunuqueneanahi eta iáchanvana, tétavicavahi eta iúricacarevayarehi taicha maejerare eta ejacapirayare eta maechajiriruva ema Viya, machanerahérayarehi.

<sup>21</sup> Eti ejamurachahi puiti eta ítaresirahi eta matapiravarrecare te mamirahu ema Viya, tétavicavahi eta iúricacarevayarehi taicha tíjaracaheyare éma eta evarahaquenehi.

Eti íyauchavanahi puiti taicha eta epecaturana, tétavicavahi eta iúricacarevayarehi. Títecapainapa eta evapinavairaya, écavainapa, taicha eperdonachacareya me Viya.

<sup>22-23</sup> Eti nuchaneranahi, járajapainapa eta sache ticatianacaheanainapa ena achaneana, navarahainapa tiáquijicaheana. Tipanararachaheanainapa. Nacatianapicainapa eta íjareana. Eta juca náichiraheyarehi, táichavenehi eta éhisiranuhi nuti Manerejirunuhi ema Viya. Váhisera ecuarami eta juca. Ene nacahehi eta nacatajivairahi ena profetanaini. Te ticatianacaheanahi, jecurisamurechavachucha, evapinavavare! ¡Tétavicava eta iúricacarevaya taicha ejacapainapa eta ícuchirichuhi te anuma!

*Ema Jesús máimitucahi nayehe ena tavayuaruanahi eta tájiparacana*

<sup>24</sup> Tacache, ema Jesús maechajicapa ena apamuriana achaneana, tímicutijiricavahi natarihihi te mamirahu, tiyerehianahisera éna. Ánipa máicha:

—Eti evapinavapa eta ecaimahaquenerahi, páurehesamiyare éti. Tíchechuhaninapa eta evapinairavainihi.

<sup>25</sup> Páurehesami eti esatuhehererecanahi, taicha ichapenapa eta écuhairaya.

Páurehesami eti ecasamureana eta piesta, écarairicavahi, taicha ichapeyare íyairaya, ecatisamurevainapa.

<sup>26</sup> Páurehesami eti namunaneanahi ena achaneana. Eta tacahehi eta nacunachiravacahi ena profetana tépiyacavanahi tímijachavana mavanaranahi ema Viya, tivayuarahiahisera.

*Vémunacayare ena ticatianacahaviana  
(Mt 5.38-48; 7.12)*

<sup>27</sup> Puítiripa eti esamanuanahi, numetacahe: Émunacayare ena ticatianacaheana. Ímereca eta iúriva nayehe ena ticatichaheanahi.

<sup>28</sup> Eyaseaca ema Viya eta nayujarahuina nácani téchajicanahi eyehe. Eyujaraucha ena tiúmehaheanahi.

<sup>29</sup> Te máehahepuca mácani achane te emira, vahi ecujicapa. Íjaracasera eta étachacaya eta emira. Te naverejicahepuca eta esacu, ísapayare. Te naverejicahevare eta ecámisa, énerichuvare ísapayare.

<sup>30</sup> Énaripa nácani tiyaseacaheanahi eta ecajirayare, íjaracaya. Te naverejicahepuca eta ímahaqueneana, vahi ecucamesa eta náimichaviraina.

<sup>31</sup> Numetacahe eta apava: Te evaraha eta náuriraya ena achaneana eta eyehe, tituparacahe iúriyare éti eta nayehe.

<sup>32</sup> Éti, tájina ecunachacarevaimahi eta me Viya, te nacarichuhi émunaca nácani témunacaheanahi éti. Apanasica témunarahiana ena máimatirahanahi ema Viya.

<sup>33</sup> Tacutiquene, tájinavare ecunachacarevaimahi me Viya, te tacarichuhi icha eta táuriqueneana nayehe ena tiúrianahi eyehe. Apanasica títsirijicavanahi ena máimatirahanahi ema Viya. Tituparacahe ecachuricavacayare eta iúriva.

<sup>34</sup> Téhevare nacarichupuca íjaraca nácani títsirijicavanahi te ticapucaheana, tájinavare tacunachacarevaina eta me Viya. Apanasica ena máimatirahanahi ema Viya tíjaracana ena títsirijicavanahi te ticapurecana.

<sup>35</sup> Étisera émunacayare ena ticatianacaheana. Íchayareva eta táuriqueneana nayehe namutu. Íjaracavare nácani ticapucaheana. Vahi ecucuchapa eta náitsirijirápiyare. Máimaharine ema Viya. Éma tíjaracaheyare eta táitsivayarehi eta iúrivanahi. Eta tacahehi eta ímerekiráva eta machichaheira ema Tata Vicaiyaquene. Taicha éma, tétavicavahi eta máuriva nayehe namutu ena váinajarajiqueneana énaripa ena máechavarahanahi eta máemunasiravacahi éna.

<sup>36</sup> Ejapanurahiyareva, ecutiyare eta majapanuirahavihi ema Tata Vicaiyaquene.

*Ema Jesús tímítucahavi eta vahi vicucune eta náejecapiravana ena apamuriana achaneana; vítinasera vicuneuchava  
(Mt 7.1-5)*

<sup>37</sup> Vahi ecunemahi eta náejecapiravana ena apamuriana achaneana, váhivare ecucaecahivaca, machu étina táimicuñacahe me Viya. Te máejecapavapuca mácani achane, vahi ecuvaraha macaicuñavane, apaesa vahi macuicuñacahe éti ema Viya. Eperdonacha ena téjecapavana eyehe apaesa maperdonachahe ema Viya.

<sup>38</sup> Ecajirahiya nayehe ena achaneana. Ema Viya títsirijicavayare eyehe. Tímepanávainapa eta máijararuheyare éma. Te iúrihi éti nayehe ena achaneana, ema Viya, tétavicavayarehi eta máurivaya eta eyehe éti.

<sup>39</sup> Tacahe ema Jesús, ánipa tacahe eta máimiturapi, máimicutichirahi:

—Váiparinehi tichurucacanaimahi ena apinana púchuquiana, taicha tiáquipaicavanayarehi te pusu.

<sup>40</sup> Émaripa mácani amaperu te escuelahipuca, váiparinehi macachuricaimahi mácani mayehe maestro. Tapaenumava te móitucapa, macutisarepa ema mayehe maestro.

<sup>41</sup> Vahi táurica eta ecunerahi eta ánicichachaqueneana náejecapiravana ena apamuriana achaneana. Tituparacahe ecuneuchava eta táchapeva eta ejecapirava étijiva.

<sup>42</sup> Vahi tituparacahemahi étupirica eta jácani ánicichachaquenehi máejecapiravahi ema eparaepiya. Tájina eviyahini eta econsejarapinahini. Ichapesera eta tatuparasirahehi étupirica eta ejecapiravanahi éti. Tapaenumava eta étupirisirapa eta íchavaquenévanahí, táuricapaini econsejacha ema eparaepiya tayehe eta máichavaquenévahí.

*Ema Jesús máimicuticha nayehe ena achaneana eta tacahirahi eta yucuquiana*

(Mt 7.17-20; 12.34-35)

<sup>43</sup> Tacutiquene tímaticarehivare eta táhiana eta yucuquiana. Jararihi eta tinicacareana. Jararihivare eta vahi tánicacare.

<sup>44</sup> Énerichuvare eta yucuqui tímaticarehi eta táurinisiva eta táhi. Étaripa eta sitavere, váiparinehi tiúchucaimahi eta táhinhini narasahinahipucaini. Tásicha, eta ijicaqui váiparinehivare tacahimahi eta tahi cachicheruhinahini.

<sup>45</sup> Ene nacahe nácani tiúriana achaneana tatupiruvahí eta náechajirisirava taicha tiúrihi eta nasamure. Nácanisera achaneana váinarajipaneruerana, vahi tiúrimahi eta náechajirisirava. Tíñemahipivacahi taicha eta tavayuchahi eta tavainarajiva eta nasamure.

*Ema Jesús máimicuticha ena tisuapajirahiana énapa ena masuapajirairahana*

(Mt 7.24-27)

<sup>46</sup> ¿Tájaha tacayema eta échajicanu éti, “Tata náquenu” ecahepa; tásicha vahi esuapahini eta nuvanairipiana?

<sup>47</sup> Nácani tisuapanuanahi náitauchahivare eta nuvanairipianahi, téchemarahianahi táicha. Nuvaraha nímicutichinahe éna.

<sup>48</sup> Nacutiyarehi mácani títuca ticatupiareca peti, manacayarehi eta túmeana yucuqui emuruquiana. Tiúpenavacahi máicha eta masucuqueruana. Jéhesare te járajapapa eta muraca técaticava, tiámaquia etá tiquiva, tisiamapa etá une, váipasera tacaeyayacahini etá peti, taicha máetupiricahi etá máepiyasirahi.

<sup>49</sup> Nararihivare ena tépiyacavana tisuapanuana, vahisera náitauchahini etá nuvanairipiana. Éna nacutihi ema máitucaraha tépiyareca peti. Vahi manacaimahi etá túmeana yucuqui, vahivare táusiapirahini máicha. Te járajapapa etá muraca técaticava, tisiamavarepa etá une, tacajimuyapaicapa etá apaquehe. Tíjahúchavapa tiáquipaicava etá peti, témitiequenepa tamutu —máichavacapa ema Jesús.

## 7

*Ema Jesús macanaraca ema manusura ema capitán romano*

(Mt 8.5-13)

<sup>1</sup> Tiuri, te titapiricapa ema Jesús etá máimitusiravacahi ena achaneana, tichavapa etá te avasare Capernaúm.

<sup>2</sup> Matiarihihi ema achane apavasana. Comandante éma nayehe ena suntaruana romanoana. Capitán etá mávacure. Ticajumahi ema manusura. Tiánehiripahi tépena. Ichaperinehi etá máeñamiravahi taicha máemunaruquenehi ema manusurahi.

<sup>3</sup> Tacahe, te masamairiricapa ema capitán etá matiarihihi ema Jesús, máevatacavacapa ena náiyamurianahi ena israelítana náichuhapanayarehi ema Jesús, macanarasinapanahini ema manusura.

<sup>4-5</sup> Tacahe, te náitecapauchapa ema Jesús ena vanairucanahi, nayaseacapa, ánipa naicha:

—Mararihi ema capitán te viávasahi. Ichapemuri etá máimicasirahavihi. Máemepiyarecahivare etá ichape peti etá viúrujisirareva etá viyujarasirarehi. Tásicha puiti, tivane-cahavihi víchuapanávi picatajicahini picanarasinapanahini ema manusura. Tatuparacahi pímicatacaini ema maena —náichapa.

<sup>6</sup> Tacahe, ema Jesús tísapavapa tiyana, máehicavacapa éna. Étasera te tiánehianapa etá mapena, mavanecavacapa ema capitán ena máimaticasareana, nametapana ema Jesús. Ánipa naicha:

—Tata Jesús, eta juca máechajiruvahi ema capitán: “Tata, vahi picucaeñamacava eta pítesiraina eta nuyehe, taicha vahi táuricahini pisiapauchanusamihini te nupena.

7-8 Eta tacahe, vahi nupatsicavahini nútijacarúvainahini níchuhapanávi. Németeaca tarataharichu picavanairipi eta picanarasiraya ema numusura. Taicha núti nusuapahi te tivanecanuana ena anuquehepanananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipa tisuapanuvane” macahepa.

9 Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Numetacahe: Nájina nímaha émanaina vijaneana israelíta mácutini ema maca achane apavasana eta macasiñavairahi eta nuyehe —máichavacapa.

10 Tacahe, nacarinepa tichavanahи ena vanairucana. Te títecapanapa, náimaharinehi ema macajumaquenehini, tinaracaripa.

*Ema Jesús macaecheperu ema amaperu máepenaquenehi, suchicha esu esena suépenaimaquene*

11 Te taequenepa eta juca, tiyanavarepa ema Jesús tayehe eta avasare ticaijare Naín. Náehicapahivare ena máimitureana, énapa ena camuriqueneana achaneana.

12 Te títecapanayarepa te avasare nácapajicavacapa ena achaneana tiámanapahi ema máepenaquene, náecarayarehi. Camurianapahivare ena achaneana téhicanapahi. Éma máepenaquenehi, macarichuhi suchichahi esu esena suépenaimaquenehi.

13 Eta máimairahi ema Viáquenu, majapanurinehi esu esena. Tásiha, máichapa:

—Vahi picuiyaha —macahepa.

14 Tásiha, mapauchapa ena tiámanapahi ema máepenaquene. Titupihanapa éna. Máemamahicapa eta macajone. Tásiha, macahepa:

—Nuchicha, núti nuvanecavi, péchepuca —macahepa.

15 Enevanerinehi téchepucapa ema amaperu máepenaquenéhi. Téchajicapa ema amaperu. Tásiha, ema Jesús máijaracapa esu maena.

16 Tacahe, ichaperinehi tiáramicarehi eta juca nayehe ena camuriqueneana achaneana. Ánipa nacahe:

—Tétávicava eta macunachacareva ema Viya. Jéhevare ema maca achane yátupiquene profeta, mavaneruhi ema Viya.

Tétávicavapa táurisamurecareva eta máuchusirahi te vimuri – nacahepa.

Ena apamuriana ánívare nacahe:

—Ema Viya tiúcupauchahavihi tímicatapanahávihi viti machaneranahi –nacahepa.

<sup>17</sup> Eta juca máichaquenehi ema Jesús, téchacarevanepa tamutu avasareana te návasanahi ena israelítana. Títecavarepa te týyerehiqueneana avasareana.

*Ema Juan Tícachasiricarahi mavanecavacapa ena máimitureana (Mt 11.2-19)*

<sup>18</sup> Énerichuvare ema Juan, te mávhahi te cárcel, masamairiricapa eta juca taicha nametacapa ena máimitureana.

<sup>19</sup> Tacahé, máevatacapa ena apinana, nayaserepanayarehi ema Jesús te yátupihipuca émaripahi ema Cristo ema macuchapaguenehi.

<sup>20</sup> Tacahé, ena vanairucanahi me Juan náitecapauchapa ema Jesús. Nayaserecapa, ánipa náichahi:

—Ema viáquenu Juan tivanecahavihi viyaserepanavyare te yátupihipuca pítiripahipuca Cristo ema vicuchapaguenehi. ¿Téheserapuca vímiyanavayarepuca vicuchapa? –náichapa.

<sup>21</sup> Eta náitecapauchirahi ema Jesús, éma ticanrarerecaichahahi ena nacajumaqueneana, énapa ena nacajaraqueneana. Máquijicavare ena éreanana tiávahácanahi nácani achaneana. Macaimairiricavare ena maveraqueneana púchuquiana.

<sup>22</sup> Tacahé, ema Jesús majicapavacapa ena vanairucanahi me Juan. Máichavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiana. Nímpaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacaipavare ena náepenaqueneanaini. Énerichuvare níchuhahi ena páureana náeneuchava apaesa náuchucuha. Tásiba, eyana emetaca ema Juan tamutu eta níchaqueneanahi.

<sup>23</sup> Vaipa macueñamava ema Juan eta nuyehe. Tétavicavapa eta máuricacarevahí éma, te ticasíñavahí eta nuyehe – máichavacapa ema Jesús.

<sup>24</sup> Tacahé, tichavanapa ena vanairucanahi me Juan. Tásiba, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacahini éma, te eyanapa te mávapahi apaquehe te mávhahi, ¿tájaha eta epanereruana tayehe eta macametarairuirahi? Éti ímijachavaipapuca

mamapachichijiruvaichucha eta máechajisirahi tacutihu te vímararaca eta taflurena eta acutena te tacayamuririjicahi eta técaticava.

<sup>25</sup> Ímijachaipavarepuca tavayuaruhi ema tiúrinanácavayarehi eta macamuirihairahi. Écharichuhi éti mácani tiúrinanacavahi, píncanillahi eta máitaresira, váiparinehi tiúchucaimahi te sache, váhivare tiyanaimahi te mávapahiana apauehe. Manasiqueneyarehi te jácani tiúrina peti.

<sup>26</sup> Nuyaserecahe: ¿Nájahapuca ímijachahi éma? ¿Ímatihipuca eta profetairahi éma? Núti numetacahe: Matupiruvahí eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana.

<sup>27</sup> Ema maca Juan émara máechajisihaquenehi ema Viya eta te Sagrada Escritura, ánipa macahehi: "Nuvanecayare ema tínapumirauchaviyarepahi ema ticametarairuyarepahi, apaesa natsecavapaipa ena achaneana eta najacapiraviyare" tacahepa eta Sagrada Escritura.

<sup>28</sup> Núti nutupiruva numetacahe: Ema maca Juan, nájina mácuti nayehe ena achaneana. Tétavicava eta macunachacarevahí. Iápjupanavahisera eta ecunachacarevahí eti nuchaneranahi, apaesachicharipa eta ecaicutiarairahi eta mapanereruanahí ema Tata.

<sup>29</sup> Ena achaneana, énaripa ena tisipecaturarahianaini, náimatiacahi ema Juan eta mavanecasivahí me Viya. Nasuapahivare eta mametarairuana ema Juan. Eta tacahe, ticaicachasianapa mayehe.

<sup>30</sup> Énasera ena fariséoana énapa ena máestroana, éna másapavarahanahí nacaicachasihini mayehe ema Juan. Témeprurecavanaripa eta náurivayarehini maicha ema Viya.

<sup>31-32</sup> Etiarihihi eti achaneana puiti juca sácheana, eta emasuapajiraivahí, nímicutichinahesa ena amaperuana tiútseruanahí. Apapipijichucha eta nacayemaqueneanapahi. Ema apaña macahepapuca: "Vépiyacapa eta piéstachicha". Énasera ena apamuriana vahi náisapavahini. Tásiba, ema apaña macahepapuca: "Vépiyacapa eta ecari". Váhivaresera náisapavahini.

<sup>33</sup> Ema Juan Tícachasiricarahí, te tímerecavapa, muraca eta máimiturapianahí. Eta manicasareana, vahi táchutihini eta nanicasareana ena achaneana. Nararihisera te emuri ena tépiyaequenehanahí éma. Náimijachahi mávaháruhi ema éreana.

<sup>34</sup> Núti Manerejirunuhi ema Viya, eta nítcapauchirahépa, nucachaneheripa eti achaneana eta enisirahí. Etiarihihivaresera eti épiyaequenehanuhí: "Ímaha ema maca, cánisiuquitataji, cávahárasí. Macachanevacapaipa ena cóbrareca-

rahianatataji énapa ena apamuriana nasipecaturarahique-neanahi".

<sup>35</sup> Éti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihipucaini échemarahihini, ímatinuhini eta nucavanahirahi eta me Tata\*.

*Ema Jesús ticaichuhacasih te mapena ema fariseo ticaijarehivre Simón*

<sup>36</sup> Matiarihihi ema achane ticaijarehi Simón, fariséohi éma. Macumpirachapa ema Jesús, manipana te mapena. Masuapahisera ema Jesús. Tiyanapa. Te tiúripa eta tinicacare, téjacapa te mesa.

<sup>37</sup> Susamairircapa esu ésuna esena tisipecaturarahinihi eta matiarihirahi ema Jesús te mapena ema fariseo. Tásiha, tiyanapa supauchahi ema Jesús. Suámapaipa eta bótechicha. Tínicapahi eta táijiyequene perfume tasivachaquenehi.

<sup>38</sup> Tépuycapa te máivapeana ema Jesús. Tíyahacavapa, táetsipapapevachapa eta sutsera. Suájahapa te suchutimaca. Tásiha, suépusapevachavare eta suámaquenepahi perfume, sutsiucapevachavare.

<sup>39</sup> Tacahe, eta máimairahi ema fariseo eta juca, mapane-requenehapa. Téchajicapa te masamure: "Te yátupinahini profetainahini ema maca, máimatiacaripahini esu suca esena eta susipecaturaraivatatajihi. Vahi táuricahini suémamacahini" macahesamurepa.

<sup>40</sup> Émasera ema Jesús masamahi eta mapanereruhi ema fariseo. Máichapa:

—Simón, jucarihi nuvaraha numetacaviya.

Ema fariseo majicapapa:

—Nímahaseji, pimetacanu, maestro —máichapa.

<sup>41</sup> Tacahe, ema Jesús máimicutiarachinapa, máichapa:

—Natarihi ena apinana ajairana ticanteveanahi mayehe ema rico. Ema émana ticantevehi quiniento; ema apana ticantevehi cincuenta.

<sup>42</sup> Tacahe, vahi náratahahini navachachahini eta nanteveana. Tásiha, maperdonachavacapa ema rico ena apinana. Tiuri puiti, nuyaserecavyare. Ena nani apinana, ¿nájahapuca ema témunacapanahi ema rico? —máichapa.

<sup>43</sup> Majicapapa ema Simón:

—Ticutimahi ema tisintevepanahi.

Tacahe, máichapa ema Jesús:

—Pímaipajira.

---

\* **7:35** Eta juca mayeherepi proverbio ema Jesús te máechajiruva, ani tacahe: "Eta téhemarahicare, éta nacunachihayare namutu ena tachichanaveana". Tatiarihi eta tacayemaquenehi tayumurevahi.

<sup>44</sup> Tacahe, ema Jesús máimaranaracaripahi esu esena. Tásiha, máichapa:

—Pipanereaca esu suca esena. Puítihi, te nusiapapa te pipena, vahi pímisipacahini eta nívape. Ésusera esu suca esena tisipapevachanuhí te sutsera, tiájapevachanupa te suchutimaca.

<sup>45</sup> Pítí vahi pitsiucanuhini eta pijacapiranuhi. Ésusera, ichapemurihi eta sutsiucapevachiranuhi.

<sup>46</sup> Váhivare piámasichanuhini eta aceite eta pijacapiranuhi. Ésusera esu suca esena tisipapevachanuhí eta te táijiyequene perfume.

<sup>47</sup> Yátupi tisipecaturainihi esu suca. Numetacaviyaresera, nuperdonacharipahi ésu tamutu eta supecaturanaini. Eta tacahe, ichape eta suímeresirahi eta yátupirahi eta suémunasiranuhi. Nácanisera apaesarichuhi eta napecaturanaini, apaesarichuhivare eta náemunaraiva, taicha apaesarichuhivare eta najacapirahi eta nayehe perdón.

<sup>48</sup> Tacahe, ema Jesús máichapa esu esena:

—Vahi picueñamava, nuperdonacharipa tamutu eta pipecaturanainihi.

<sup>49</sup> Tacahe, ena natarihiqueneanahi chimaracanahi náejaruhanahi te mesa nacahepa te nasamureana: “¿Nájahapuca ema maca ticaemuñavahi marataha maperdonacha eta pecatuana?” —nacahepa.

<sup>50</sup> Émasera ema Jesús máichapa esu esena:

—Táuricapa piyana. Yátupi eta piúchucuhairaya táichavenehi eta picasiñairanuhi.

## 8

*Natiarihihivare ena esenana titátianapahi ema Jesús te mapaisihapahi tayehe eta avasareana*

<sup>1</sup> Te taequenepa eta juca, tiyanavarepa ema Jesús, tipaicahi tayehe eta tasimutuqueneana avasarechichana. Ticametarrirupahi eta máechajiriruva ema Viya eta náuchucuirayare ena ticasíñavanahi mayehe, machaneranayarehi. Náehicaphivare ena dócequeneana apóstoleana.

<sup>2</sup> Énerichuvare náehicaphahi ena esenana máepachiaruanahi nayehe ena éreanana tiávahácanainihi. Sutiarihipahi esu María Magdalena, máepachiaruhi nayehe ena siétequeneana éreanana tiávahácanainihi ésu. Natiarihihivare ena apamuriana esenana macanararuanahi tayehe eta apanapaneneji-queneanahi najumanainihi.

<sup>3</sup> Sutiarihipahi esu Susana, ésupa esu Juana, mayena ema Chuza. (Ema Chuza, mayehehi empleado ema Herodes,

téchahi tamutu eta máimahaqueneana ema Herodes.) Maveranahivare ena apamuriana esenana, tiámauchavanapahi eta nirure, náitátirapahi ema Jesús, énapa ena apóstoleana.

*Eta máimicutichaquenehi evaraqui tacaevaquenehi te apanapaneneji máteji te apaquehe*

(Mt 13.1-9; Mr 4.1-3)

<sup>4</sup> Te jena sácheinahi, camuriana ena achaneana tiyananapaipa napaucha ema Jesús. Tiásihanapahi te avasareana. Te máimahapa éma ena camuriqueuneana, máechajicavacapa; máimicutiarachinapa eta máimitusiravacahi. Ánipa máicha:

<sup>5</sup> —Matiarihi ema émana achane. Tévapanahi te máesane. Tásihasera, eta mapaisirapahi témiricapaipapuca eta evaraqui te achene. Eta nanucuiraparacahi ena achaneana, nácataya-capipa eta evaraqui táemiriruanapahi. Táimahapa eta cayure, tanicapa.

<sup>6</sup> Tásiha, eta apana evaraqui témiricapa te máripahi apauehe. Tímarucainipa, tásihasera tájijicapa eta sache taicha muracapahihí eta apauehe.

<sup>7</sup> Eta apana evaraqui témiricapa te taparereji eta itapequiji. Tiúrinainihi eta táimarusira, étasera eta itape tacachuricapa eta tajurusirahi, táemuriachapa.

<sup>8</sup> Eta apana evaraqui témiricapa te tiúrina máteji. Tijurucarahihi eta táimarusira. Tiúrinahivare eta tahi. Táijaracahi ichapemuri eta tahi —macahepa.

Te titapiricapa ema Jesús eta máechajirisiravacahi, máichavacapa:

—Te evarahapuca ecaicutiara, tavaraha eta epanerechinavaya —macahepa.

*Ema Jesús máitametacavaca ena máimitureana eta juca máimiturapihi*

(Mt 13.10-23; Mr 4.10-20)

<sup>9</sup> Tacahe, ena máimitureana nayaserecapa ema Jesús tájahapuca tacayemahi eta máimicutichaquenehi mayehe ema tévacarahi.

<sup>10</sup> Émasera máichavacapa:

—Ema Tata tituparacanu nítametacaheyare éti eta juca mapanereruana tâequeneruana. Mavarahahi ímatiequenehaya éti. Énasera ena apamuriana achaneana nímicutiarachinavacahi, apaesa vahí máejerarémahi eta nacaicutiarairaya eta nasamaquenehi. Tavaraha napanerechinavaya. Te vahí yátupina eta navaraira nasuapa, vâhivare nacaicutiaraimahi eta nímiturapiana.

<sup>11</sup> Étara eta juca tacayemaquenehi: Eta evaraqui tímicutijiricavahi eta máechajiriruva ema Viya eta nímiturapianahi.

<sup>12</sup> Natarihi ena achaneana nasamaripahinéni eta nímiturapianahi, émasera ema Váinaraji vahi másapahini tánasihini te nasamureana. Enevanehi macamitisicavaca eta nasamaquenehi, mamavarairahi nacasiñanuhini apaesa nucuchucuhavacayarehini. Éna, nacutihu eta máteji muracapahi te achene.

<sup>13</sup> Natarihivare ena apamuriana achaneana, nacutihu eta máteji máripahi. Te nasamararaca eta nímiturapiana, nasuapa, tiúrisamureanarinehi. Váhisera naratahahini nacaravahuhini yátupinahíni. Vahi nácutihíni eta evaraqui tiúparehi. Ániperichu eta náehisirahi. Tínajicavanávane taicha eta náimairavahi eta nacatajivairahi.

<sup>14</sup> Natarihivare ena apamuriana achaneana nacuti eta máteji te távhahi eta itapequiji. Énerichuvare nasamararacahinéni eta nímiturapiana. Napaneréquenrehahinéni, tahapapiricavacahisera eta jácani táicharacavayare eta náitaresira. Váhivare náinajicahíni eta tacaeñamarasiravaca eta tájiparacana, étapa eta navarairahi tirricochedava. Váhivare náinajicahini eta náichirahi eta tamauriqueneana. Tamutu eta juca táemetavicahi eta navarairahi téhicanuana. Tamapurujíhi eta najacapirahi eta nímiturapiana. Tájina vahi nacaematanecahini ema Viya.

<sup>15</sup> Natarihisera ena apamuriana achaneana nacutihu eta tiúrina máteji. Éna, nasamararacahi eta nímiturapiana, náunacahi yátupi te nasamureana. Tájinavare náichiravainahíni eta náehisiranuhi. Ichape eta nacaematanearisirahi ema Viya. Vahi nayacujimahi.

*Ema Jesús máimicutiarachava eta lámpara eta máimituresira  
(Mr 4.21-25)*

#### <sup>16</sup> Ánivare macahe:

—Súnsuanahi nácani tiyustacanahi eta lámpara namicahu-yarehi, tásihasera, naijihapacapucaini, nanacavarepuccaini te tápecu eta náetsatsame náimasirare. Vahi tamicauchaimahi. Tacamuñuhi nanacayarehi te anuquehe. Jéhesare ticaecherasareyarepa tamutu apaesa nácani tisiapanapahi, tímairiricanayarepahi.

<sup>17</sup> Tayanapanepuca ticayumuruquianahi, tamutuya-rehisera ticaechera jácani tayumururevanahi. Tájina tépacuchaimahi jácani najajairairuvanahi. Tamutuyarehi téchacareya.

<sup>18</sup> Eta tacahe, ecaquiñaicha yátupina eta juca. Taicha mácani máitururuequenrehahí yátupi, tiápajucavayarehi eta máitupajijiasiravayarehi. Mácanisera apaesarichuhi eta máitucaquene, te váipa mapanerequenrehahini, máemitisicayarehi eta máitucaquenénihi.

*Suítcapauchapa esu maena ema Jesús énapa ena maparape-naveana*  
*(Mt 12.46-50; Mr 3.31-35)*

<sup>19</sup> Tacache, esu maena ema Jesús énapa ena maparape-naveana títecapanapa te peti te máimituresihahi ema Jesús. Váhisera náitujicavahini nasiapahini taicha tiyututucavanahi ena achaneana.

<sup>20</sup> Nametacapasera ena apamuriana achaneana ema Jesús:

—Esu pémunaruquenehi pena énapa ena piparapenaveana nararihi ani te aneca, navarahahi téchajicaviana —náichapa.

<sup>21</sup> Émasera majicapavacapa:

—Yátupi némunacavacahi esu meme énapa ena nuparape-naveana. Nararihisera ani te juca nuchacaya ena némunaruanahivare, nuparapenaveanahi. Taicha tisuapajirahianahi éna tayehé eta máechajiriruvana ema Viya, ticaematanecanahivare éma —máichavacapa.

*Ema Jesús macaesamirica eta táepacusirahi eta une étapa eta técaticava*

*(Mt 8.23-27; Mr 4.35-41)*

<sup>22</sup> Étana sache, ema Jesús tiávacuhapa eta te pacure. Tásiha, máichavacapa ena mayeheana apóstoleana:

—Viyana, viánueca te apachara —máichavacapa.

Tacache, tiyananapa tiánuecanayarehi.

<sup>23</sup> Eta napaisirapahi, ema Jesús tívecapa tímacapaipahi. Tacache, járajapainapa eta muraca técaticava. Tépacucapa muraca eta cáquiure. Tasiapauchapaipa eta une te pacure. Tipicanapa ena máimitureana, taicha tímaticavapaneta náecharisiravyarehi.

<sup>24</sup> Tacache nacajamicapa ema Jesús, náichapa:

—¡Maestro! ¡Maestro! ¡Péjamica! ¡Pímaha vécharicavainapa taicha eta tépacuca!

Enevanepa téchepucapa ema Jesús. Macamatinacapa eta técaticava étapa eta táepacusirahi eta une. Tésamiriecavapa tamutu.

<sup>25</sup> Tacache, máichavacapa ena máimitureana:

—¿Tájaha tacayema vahi ácasiñavahini eta nutiarihirapahi eta eyehe? —máichavacapa.

Énasera tiáramecanapa. Tésenijiricacanapa, tásiha nacahépa:

—¡Téavicavapa eta máitupajijasirava! ¡Jéhesare, yátupiquene eta émairahi machichahi ema Viya! Taicha eta mavanairipi, tamutu tasuapahi eta técaticava étapa eta une —nacahepa.

*Ema achane návaháruanahi ena ichapemuriqueneana éreanana*

*(Mt 8.28-34; Mr 5.1-20)*

<sup>26</sup> Tacahe, títecapanapa te apachara tayehehi apaquehe eta provincia Gadara. Te apachara tacanaraipahi eta provincia Galilea.

<sup>27-29</sup> Te tiúcupaicapa ema Jesús, énapa ena máimitureanahi, máuchujiuchavacapa ema émana achane. Ema maca achane mávasaichuhi tayehe eta juca avasare Gadara. Tájinapasera máimatiyahini mayanahini te peti taicha namarishichaipahi ena camuriqueneana éreanana tiávahácanahi. Ánaquiaripa eta návahásirahi. Nametapanéni ena achaneana nacarataca. Nátiaca te ichapepi carena étapa te enure, te náimahavarepa tacananesica naicha ena tiávahácanahi. Émasera, téavicavaipahi eta matumevahi. Mavechuquimurivare eta carena máitihanahi. Tijunavare, tiyanavarehi te mávapahiana naicha ena éreanana. Macapenajuechavacahi eta ecariana. Mamuriarehi eta máitaresirahi.

Tacahe, te máimahapa eta matiarihirahi ema Jesús, mapauchapapa. Tépuyucapa te mamirahu. Ema Jesús mavanevacacapa ena éreanana náinajiaca ema achane. Ema achane tipiararecapa. Ánipa macahe:

—¿Tájaha picha píteca pipauchanu, piti Jesús, Machichaquenevihi ema Viya? ¡Pájapanunu vuíchaha picuvanecanu ánaqui te nucaicuñaiayare! —máichapa.

<sup>30</sup> Tacahe, ema Jesús mayaserecapa:

—¿Tájaha píjare píti?

Ema achane majicapapa:

—Núti nucaijare “Nacapenaharu ena ichapemuriqueneana éreanana”.

Éma, tacahehi eta majicapirahi ema Jesús taicha camurianahi ena tiávahácanahi.

<sup>31</sup> Tacahe, ena éreanana nayaseacapa ema Jesús vahi macuaquijicavaca te táupenaquene pusu náicuchihi návhayare éna.

<sup>32</sup> Tatiarihivare eta camuriqueneana cúciana. Tinihicahabi te táemiripaisine eta masihi. Ena éreanana nayaseacapa ema Jesús másapahini nasiapahacavaca eta cúciana.

<sup>33</sup> Tacahe, ema Jesús macuchuchujicavacapa te máquehe ema achane, másapahivare nasiapahacavaca eta cúciana. Te tasamapa eta cúciana eta nasiapahasiravacahi ena éreanana, tijunaparacanapa témiririjicanapa te tachausi eta cáquiure. Téririjicanapa tamutu.

<sup>34</sup> Natarihivare ena tijaneacanainihi eta cúciana. Te náimahapa, tiáramecanarinehi. Tiyananapa tijunapanapaipa timetajiricanapaipa nácani nácapajiruvanapahi, étapa te avasare namutuvare nametaca.

<sup>35</sup> Tiáramicaréinehi nayehe ena achaneana. Tiyananapa náimahapana tájahapuca eta táichavaquenevahi eta cúchiana. Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema Jesús. Tájinaripahi máichiravainahini. Ticamuirihaiipahivare. Tásihasera, tipicanarinehi ena achaneana.

<sup>36</sup> Tavetijipa te náitametacapa ena tímahanahi eta macuchuchujisirahi ena éreanana te máquehe ema achane.

<sup>37</sup> Tacahe, te nasamairiripa, namutu ena achaneana ticavasanahi te Gadara, vaipa napatsicavahini máitecapau-chavacahini ema Jesús taicha náeñamaipahi tácahémahivaréni eta apamuriana náitáiqueneana. Nayaseacapa ema Jesús machavahini te másinehi. Tacahe, tiávacuhavarepa éma, tichavavarepa.

<sup>38</sup> Tacahe, ema achane mayaseacainipa ema Jesús másapahini máehica. Émasera máevatacaichucha machava te mapena. Ánipa maicha:

<sup>39</sup> —Piyanachucha pichava te pipena. Pimetajiricaya eta majapanuiravihi ema Viya eta macanarasiravihi —máichapa.

Tacahe, tiyanapa tichavahi ema achane. Mametacavacapaipa namutu eta macanarasirahi ema Jesús.

*Ema Jesús macanaraca esu machicha ema Jairo, ésupa esu apana esena sucajumaquenehivare*

*(Mt 9.18-26; Mr 5.21-43)*

<sup>40</sup> Te títecavarepa ema Jesús te apachara, enevanepa nácapahi ena ichapemuriqueneana achaneana taicha nacuchaparairicaipahicha. Tiúrisamureanarinehi eta náimairahi éma.

<sup>41</sup> Títecavarepa ema émana achane ticaijare Jairo. Ema maca achane, tuparairucahi tayeha eta náurujisirareva tayeha eta jena avasare. Tacahe, ema maca achane tépuyucapa te mamirahu ema Jesús. Mayaseacapa macatajicahini mayanahini te mapena, macanarasinapanahini esu machicha.

<sup>42</sup> Taicha ésunaracavahi esu machichahi. Doce áñoripahi eta suhañorahi. Téñamajiricavaipahi ésu, taicha eta sujuma. Tacahe, tiyanapa ema Jesús, máehicapa te mapena. Náehicavarepa ena camuriqueneana achaneana. Váipanecha nárata-vapahini eta napaisirapahi.

<sup>43</sup> Sutiarihipavare esu apana esena, sucajumaquenehivare. Doce áñoripahi tayerevahi eta suhitiarevahi. Ichapemuripa eta sutanusirahi ena médicoana, váhisera sucanaracahini ésu.

<sup>44</sup> Tépiyayacavapa témeñahava te maquecu ema Jesús. Suémamajiacapa te tacheyarapi eta mamuiriha. Enevanelinehi tinaraca ésu. Tíchecapa eta suítine.

<sup>45</sup> Émasera ema Jesús masamarichucha eta suémamajasirohi. Macahepa:

—¿Nájaha témamajiacanuanahi? —macahepa.

Nájina tísapavaina.

Émasera ema Pedro énapa ena machamuriana náichapa:

—Maestro, pímaharichuhi eta nasimutuvahi ena achaneana. Tiyututucavanahi te pichacaya. Váiparinehi tímaticarémahi nájahapuca nácani témamajiacavianahi —náichapa.

<sup>46</sup> Émasera ema Jesús macahevarepa:

—Nacañárihi témamajiacanuanahi taicha nusamavahi núti eta nucanarasirahi eta jumare táichavenehi eta nítupajijiasi-ravahi —macahepa.

<sup>47</sup> Ésusera esu esena, tímaticavapa eta máimatirahi ema Jesús eta suémamajiasirahi, tiyanapa supauchahi. Tépuyucapa te máivapechacaya. Tiyayacareripa eta supisirahi. Sutupiruvapasera timetaurecavahi eta ésuirahi témamajiacahi. Ánipa sucahehi:

—Tata, nútira némamajiacavihi, nuvarairahi nunaraca tayehe eta nujumahi. Nusamavaipasera eta nunarasirahi —suíchapa.

<sup>48</sup> Tacahe, ema Jesús, máichapa esu esena:

—Tiuri, nuchicha, pinaracapa puiti táichavenehi eta picasiñairanuhi. Vaipa picueñamava eta pichaviraya te pipena —máichapa.

<sup>49</sup> Téchajiricavaichahahi ema Jesús eta suyehe esu esena, títecapanechá ema émana achane tiásihahi te mapena ema Jairo. Mametacapa:

—Esu pichicha tépenasamipahi. Vaipa picucamesa ema Maestro —máichapa.

<sup>50</sup> Émasera ema Jesús, te masamapa, máichapa:

—Vahi picuarameca, váhivare picueñamava. Pácasiñava eta nuyehe. Tinarcayareichu esu pichicha —máichapa.

<sup>51</sup> Tacahe, tiyanavanepa ema Jesús. Te títecapanapa, vaipa másapahini ema Jesús nasiapahini ena achaneana. Nacarichu tisiapanahi ema Pedro, ema Jacobo, ema Juan, émapa ema suya esu amaperu, ésupa esu suena.

<sup>52</sup> Natarihihisera ena achaneana te tajuhe. Tíyahanaripa éna. Te máimahavacapa ema Jesús, máichavacapa:

—Vahi ecuiyaha. Váhira suépenahini esu suca amaperu. Tímacarichucha —máichavacapa.

<sup>53</sup> Técavanarichuchasera eta mayehe éma, taicha náimahahi eta suépeniraipahi.

<sup>54</sup> Tacuhe, ema Jesús macaratacapa eta suvahuana. Tásicha, máichapa:

—Nuchicha, nuvanecavi: Péjamica, péchepuca —máichapa.

<sup>55</sup> Tacuhe, esu amaperu tichavapa titareca. Tásicha, téchepucavanepa. Ema Jesús mavanecavacapa ena ticachichana náijaraca eta sunica.

<sup>56</sup> Ichaperinehi eta náramirahi ena ticachichana. Émasera ema Jesús matuparacavacapa vahi nacuechajisiha eta náimahaquenehi.

## 9

*Ema Jesús mavanecavacapa ena dócequeneana apóstoleana, napaicayare tamutu avasareana*

(Mt 10.5-15; Mr 6.7-13)

<sup>1</sup> Ema Jesús macurujimurihana ena dócequeneana mayeheana apóstoleana. Tacuhe, máijaracavacapa eta náitupajijiasiravanayare naratahairayare náquijica ena éreanana, naratahairayareva nacanaraca nácani nacajumaqueneanahí.

<sup>2</sup> Tásicha, ticavanahianapa ticametarairuanayare eta tacamunucarevayarehi náeneuchiravayarehi ena achaneana, náinajisiraina eta napecaturana, náehica ema Cristo. Ticanararecanayarepahivare nácani nacajumaqueneanahí.

<sup>3</sup> Eta mavanesirayacahi, máichavacapa:

—Tájina iámaimahi eta eyereruva. Váhivare ecucayupairiquipahi. Tacuijavare ecanirurucuhaina te alforja. Étaripa eta plata, tacuijavare iama. Étanainarichu eta emuiriha iámayare.

<sup>4</sup> Enasinumayarepahisera te jácani peti nayehe ena tiúrihi eta najacapiraheya. Tiámainucava te táitecapa eta eyaniryareva.

<sup>5</sup> Téhesera nacuijapuca nacuvaraha najacapahe tayehé te jácani avasare, váhivarepuca nacuvaraha nasama eta emetarairuya, iúchucavanepa. Étatapevachavanumayaresera eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehini —máichavacapa.

<sup>6</sup> Tacuhe, tiyananapa ena apóstoleana. Tamutu napaica eta avasarechichana. Ticametarairuanapaipahi eta máechajiriuva ema Viya, eta viúchucuiraya majacapirahaviyare éma. Ticanararecanapaipavare ena nacajumaqueneana nácani náetupiaruanapahi.

*Ema Herodes masamairiricavare tamutu eta juca máichaqueneanapahi ema Jesús  
(Mt 14.1-12; Mr 6.14-29)*

<sup>7</sup> Tacahe, ema aquenucahi Herodes masamairiricavare tamutu eta tiáramicareana máichaqueneanahi ema Jesús. Váipasera máitucacarehini. Taicha masamairiricahi náimijachahiji é mahi ema Juan téchepucahi te máecari.

<sup>8</sup> Ena apamuriana náimijachahivare téchepuca ema antivuini profeta. Ena apamuriana náimijachahivare ema Elías.

<sup>9</sup> Émasera ema Herodes macahepa:

—Nútjacaruvahisera nucavanairipi náechatinuca ema Juan, eta máepenirahi. Puiti, ¿nájahapuca ema maca nusamairiri-ruasaparacahi eta máichira eta tiáramicareana? Nuvarahasa nímatini ema mácará —macahepa.

*Ema Jesús máitaparaha máenicavaca ena camuriqueneana achaneana*

*(Mt 14.13-21; Mr 6.30-44; Jn 6.1-14)*

<sup>10</sup> Tacahe, tichavanapa ena apóstoleana eta napaisirahi. Nametacapa ema Jesús tamutu eta náichaqueneanapahi. Tásicha, éma mámamurihavacapa te mávapahi, tinapaicahi eta avasare Betsaida.

<sup>11</sup> Téhesera náechavarepa ena achaneana eta macaijuhehi ema Jesús, tiyananavarepa nacapayacahi. Émasera majacapavacaichucha, máimitumuriharipavare tayehe eta náitaresira ena machaneranahi ema Viya. Macanaracavare ena nacaju-maqueaneanahi.

<sup>12</sup> Te náimahapa ena apóstoleana cáperehiyareipahi, témeñahavanapa eta mayehe ema Jesús. Tásicha, náichapa:

—Táuricapa pivanecavaca ena achaneana nayanapa natanuca eta nanisiha étapa eta náimasihaya te avasarechichana tachacayarahanhahi eta juca viávhahi, taicha ani, tajina náiyavaimahi eta te juca —náichapa.

<sup>13</sup> Tásicha, ema Jesús majicapapa:

—Étina, íjaraca eta nanica.

Énasera náichavarepa:

—Tájina viviyaimahi eta nanicahini ena nani achaneana. Jucárihinéni cinco eta pan, apiquipa jima jitaruca. Váiparnehisera nárataimahi. Tayanapane tatiarinhinapucaini eta vivacharesihahini eta tinicacare, váiparnehivaresera nárataimahi ena nani camuriqueneana achaneana —náichapa.

<sup>14</sup> Ena achaneana, cinco mil eta náichapemurivahi ena ajairana, énarichahavare ena esenana, énapa ena amaperuana.

Tásicha, ema Jesús máichavacapa:

—Evaneca náejahapaicavaca ena achaneana. Cincuentava-cainapahi eta náiputsitsisiravaina —máichavacapa.

<sup>15</sup> Énepasera tacahehi naicha ena apóstoleana. Tásicha, ticaeja-recanapa namutu.

<sup>16</sup> Tacahe, ema Jesús mavehapa eta cíncocuene pan étapa eta apiqui jima. Máesenicapa te anuma. Mahasulupa-yachaipa ema Maiya eta máenisiravacayarehi ena camuri-queneana achaneana. Mayuvetutuhecavacapa, máijaracapa ena apóstoleana. Náijaracapasera namutu ena achaneana.

<sup>17</sup> Namutupa tinicana, tisatuhevacapa. Váhicaruvare náitahini eta tinicacare. Dócehi saye ichapehiana tínicahi eta náemacharájiana.

*Ema Pedro máimereucha ema Jesús eta émairahi Cristo*

(Mt 16.13-19; Mr 8.27-29)

<sup>18</sup> Étana sache, ema Jesús énapa ena máimitureana tiápechavare típutsiacavana, tiyananapa tayehe eta nayujarasihayarehi. Te titavanapa eta nayujarasirahi, éma mayaserecavacapa:

—¿Tájaha nacayema ena achaneana eta nuyehe? ¿Nájahapuca náimijachanuhi éna? —macahepa.

<sup>19</sup> Éna najicapapa, ánipa naicha:

—Ena apamuriana náimijachavihiji téchepuca ema Juan Tícachasiricarahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema mácani apana profetaini antivuini, téchepucahi —náichapa.

<sup>20</sup> Ema Jesús mápechavare mayaserecavaca éna:

—Étiyapa, ¿nájaha ímijachanuhi núti?

Ema Pedro majicapapa:

—Pítira yátupiquenevi Cristo, piásihaquenehi me Viya —macahepa.

*Ema Jesús tímereuchava eta máepenirayarehi*

(Mt 16.20-28; Mr 8.30-9.1)

<sup>21</sup> Tásicha, matuparacavacapasera ema Jesús nacuija nacumetaca eta émairahi ema Cristo.

<sup>22</sup> Tásicha, máichavarepa:

—Tacamunuichaha eta ichapemuriyare eta nucatajivairaya, nuti Manerejirunuhi ema Viya. Tépurunuanayare ena tuparairucana énapa ena aquenucarahaná énapa ena escribánoana. Éna, tímicacanuanayareva. Mapanayareichuhisera sache eta nucaheyare eta népenirayare. Tásicha, nuchavayarehi néchepuca —máichavacapa.

23 Tásicha, máimitucavacahi namutu ena achaneana, ánipa máichavaca:

—Nácani navaraha náehicanu, tacamunu náinajica tamutu eta tihapapiricana eta náehisiránuhi. Nacaravahuyareva eta nímiturapiana. Náijaracavavare eta táimicapasiraina eta náehisiránuhi.

24 Nácanisera téñamanahi eta náitaresira, tiávamirahuanaya eta náehisiránuya, énajivayare ticamitiequenehavanaya eta náitaresira. Énasera nácani yátupihi tíjaracavana téhicanuana, tayanapane táimicpacacavacapuca eta náehisiránuhi, éna titujicavanayare tiúchucuhanayare eta náitaresiranaya.

25 Énerichuvare nácani tacáeñamararuuanahi eta nacaimahaquenéirayare te juca apaquehe, tájina náimaequenehaimahi, taicha eta tacaeñamarasiravacahi tahapapiricavacahi tayehe eta náuchucuirayare.

26 Énaripa nácani titsirihanapuca téhicanuana, náimitsiri-hapuca eta nímiturapiana, nútì apanava nutsirihayarevare nayehe ena nani. Nucaerajicainapa ena nani, nútì Manerejirunuhi ema Viya, te táitecapapa eta sácheyare nuchavirayare aquenucanuinapaipa. Te jena sácheyare, námainapaipa nútì eta nujaraiva, étaripa eta majaraiva ema Tata. Nucachané-napaipa ena sántoqueneana ángeleana.

27 Nutupiruva numetacahe: Puítiripa te etaracu éti, etiarihi éti vahi épenavanéimahi, ímahanumayare eta nucatuparahraina aquenucanuya nuti Manerejirunuhi ema Viya — tacahepa eta máimituresirahi ema Jesús.

*Ema Jesús, tihapamaichava eta máimahi  
(Mt 17.1-8; Mr 9.2-8)*

28 Tiuri, te tábiquenepa eta óchoquenehi sache, tiyanapa ema Jesús, tiápanahi te anuquehe mari. Tiyujaracayarehi. Mapananarichusera ena mámaqueneanahi: ema Pedro, ema Jacobo, émapa ema Juan.

29 Tacahe, eta mayujarasirahi ema Jesús énapa ena mámaqueneanahi, tíjhúchavapa títsivachavahi eta máimahi ema Jesús. Apaimahipa eta mamira étapa eta mamuiriha. Tétavicavapa eta tajapuvahi tajararasirahi tamutu eta máquehe.

30 Tásicha, tiáramicareanavarepa tímerecavana ena apinana ajairana. Téchajiricavanaripa mayehe ema Jesús. Ema émana, émahí ema víyarahaini Moisés. Ema apana, ema víyarahaini profeta Elías.

31 Tétavicavaipahivare tajararasirahi eta te natupihaiyahi. Náechajisihaipahi eta macatajivairayarehi máepenirayarehi ema Jesús tayehe eta avasare Jerusalén.

<sup>32</sup> Tavarahaipaichanéni tímaca ema Pedro énapa ena apinana machamurianahi. Téhesera te náimahapa eta tijararacahi te nachacaya, témitiacarinehi eta náechapuneana. Náimaranacaripahi eta majaraivahi ema Jesús, énapa ena apinana ajairana tiúcupauchanahi.

<sup>33</sup> Tacahe, te máimahapa ema Pedro eta nachavirayarepa ena nani apinana, témeñahavapa. Tásicha, macahepa:

—Tata Maestro, tétavicavapa táuricacareva eta viávihairahi eta ani. Tiúripanahipucaini vépiyacahini eta epenahuinapachuhini. Pipenahuinarichuhini píti, mapenainarichuhi-varéni ema Moisés, émapaini ema Elías —máichapa.

Váhinéni máimatiéquenehahini ema Pedro tájahahipuca eta mavarahaqueneхи macayema.

<sup>34</sup> Tacahe, eta máechajirisiravaichahahi, tíjahúchavapa tiúcupaicaхи eta úcaji, tamuichavacapa ema Jesús énapa ena apinana ajairana.

<sup>35</sup> Tásicha, nasamarinehi eta mahu ema Viya, tayehe eta úcaji. Ánipa macahe:

—Ema maca ema yátupiquenehi nuchicha némunaru-quenehi. Éma esuapayare —macahepa.

<sup>36</sup> Te tímatinapa eta mahu ema Viya nasamaquenehi, náimahapa ema Jesús, macarineipahi. Nájinaripa ena tiúcupau-chanahi.

Tacahe, ena mapanana apóstoleana, tiyerehi eta namametasirahi ena apamuriana nachamuriana eta náimahaquenehi.

*Ema Jesús macanaraca ema amaperu mávaháruhi ema éreana (Mt 17.14-21; Mr 9.14-29)*

<sup>37</sup> Te apanaquenepa sache, tiúcupaicanavarepa tayehe eta anuquehe mari návinezhi. Natiarihipavare ena camuri-queneana achaneana. Te náimahapa ema Jesús, tiyananapa nácapahi.

<sup>38</sup> Matiarihihi ema émana achane te namuri ena camuri-queneana achaneana. Tipiaracapa muraca éma, ánipa macahe:

—Tata maestro, picatajicanupaini pípuchinanuini ema maca nuchicha. Émanaracavahi te numirahu.

<sup>39</sup> Mávaháruhi ema éreana. Macapiararerecahi técharipacavavare ticarisasajacavare. Ichapemuri eta macatajivaira máicha. Vahi mávaraha máinajiacá.

<sup>40</sup> Néchajiacaripahinéni ena pímitureana. Váhisera nárata-hahini nacuchuca ema éreana tiávahácahi ema nuchichasami —máichapa ema achane.

<sup>41</sup> Tásicha ema Jesús majicapapa:

—¡Tétavicava emasuapajiraivavaca eti achaneana! ¡Cúvera-recaichapucaini eta nucamichirahenahini! Piama ani ema pichicha.

<sup>42</sup> Témeñahavainipa ema amaperu, tápechavarepa tacaña-macahi tiáquipaicavapa, téchariripaicavaipavare. Émasera ema Jesús, máquijicapa ema éreana, muracapavare eta macajachirahi. Tásicha, máijaracapa ema maiya, tinaracaipahi.

<sup>43</sup> Náramirinehi ena achaneana taicha eta tamutuirahi marataha ema Viya, máitupajijiasiravahi.

*Tiápechavavare ema Jesús tímereuchava mápenirayarehi*

(Mt 17.22-23; Mr 9.30-32)

Nanasirichahahi napanerequenehahi ena achaneana eta juca náimahaquenehahi. Ema Jesús mápechavare mametacavaca ena máimitureana. Ánipa macahehi:

<sup>44</sup> —Ecaquiña yátupina eta juca numetaruheya. Váhivare ecuemitisica. Núti Manerejirunuhi ema Viya, járajapainapa eta sácheyare tíjararecanuyare mácani achane nayehe ena tictatianacanuanahí. Ticaratacanuanayareva —máichavacapa.

<sup>45</sup> Énasera ena máimitureana váhiquene nácaicutiarahini eta macayemaqueneanahí. Taicha émarichuhí ema Viya tíjaracahi eta vuíchaha nácaicutiaraimahi. Váhivare napatsicavahini nayaserecahini tájahapuca tacayemahi eta máichiravacahi.

*¿Nájahapuca ema apóstole ticapicahupana?*

(Mt 18.1-5; Mr 9.33-37)

<sup>46</sup> Te taequenepa eta juca, ena apóstoleana ticapinarujiricanapa nájahahipuca ema ticapicahupanahí.

<sup>47</sup> Émasera ema Jesús máimatiacavacapa eta náechajiriruvanahí. Máichuhapa ema émana amaperuchicha, macatupihapa te namirahu.

<sup>48</sup> Tásicha, máichavacapa ena apóstoleana:

—Nácani tijacapanayare ena amaperuana níchavenéinahi núti, ena nani yátupi náimerecayare eta náemunasiranuhi núti taicha tímicutijiricavahi nútinhini najacapa. Taicha nácani tijacapanuanahí núti, énerichuvare tacahehi eta najacapirahí ema Ticachichanu, ema tivanecanuhi. Nácani náechapajiricayare namutu ena nachamuriana, náemunasiravacahivare, énahi ena ticapicahupananayare te etaracu —macahepa.

*Nácani vahi tictatianacahaviana, éna tímicatakahaviana*

(Mr 9.38-40)

<sup>49</sup> Tacahe ema Juan mametacapa, máichapa:

—Tata Maestro, vímahahi ema émana achane máquijicavacahi ena éreanana te pijare ticutirinehi pítinahini pijaracahini eta máitupajijiasiravahi. Tásihasera, vicavacahi éma, taicha vahi viúmurivainahini —máichapa.

50 Émasera ema Jesús máichapa:

—Vahi ecucavaca éma. Taicha nácani vahi ticatianacahavianahi, éna tímicatacrahaviana —macahepa.

*Ema Jesús macajachavaca ema Jacobo émapa ema Juan*

51 Te jena sácheinahí tiánenehipaipa títecapa eta mayanirayarehi ema Jesús te anuma. Tásicha, tíjaracavaichaha eta mayaniranumayare te Jerusalén.

52 Macavanairipipa tiyanana ena tínapumirauchanayarepahi. Titanucanayarehi eta máitecapihayare tayehe eta jácani avasare.

53 Énasera ena samaritánoana vahi návarahahini najacapa taicha náimahahi éna eta matupiruirapahi te Jerusalén.

54 Tacahe, ena apinana apóstoleana, ema Jacobo émapa ema Juan, tisemamajuheanapa eta namajacapirahi ema Jesús. Tacahe, náichapa éma:

—Tata Viáquenu, ¿pivarahapuca viyasesereca táemirica eta yucu tiásicha te anuma? Étaina títapaimuriha ena náenatajiana, tacutei eta máichaquenehi ema profetaini Elías —náichapa.

55 Tacahe, ema Jesús máimraracapa éna. Tásicha, macajachavacapa, máichapa:

—¿Tájaha tacayema vahi tétopicava eta epanereruana? Ticutipa vahi mávaháruhénahi ema Espíritu Santo.

56 Vahi étaina tímitecanu nícuñacavacayare ena achaneana, nuti Manerejirunuhi ema Viya. Tímitecanuhi nucuchucuvacayare éna —máichavacapa.

Tásicha, tiánucuhanapa te apachacaya te apanahivare avasare.

*Vínajicayare tamutu, te vivaraha véhica ema Jesús*

(Mt 8.19-22)

57 Eta napaisirapahi te achene ema Jesús énapa ena máimitureana, nacainunapa ema émana achane, mavarahapa máehica. Ánipa macahehi:

—Tata, núti apanavare nuvaraha néhicavi te jácani pivarahaqueneyare piámianu.

58 Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cágureana tamacajipachuvare. Nútisera núti Manerejirunuhi ema Viya, tájina nuyiña nusiapihahini —máichapa.

59 Te apanavarepa sache, máichuhapa ema Jesús ema apana máimiture apóstoleyare. Tásicha, ema majicapapa:

—Tata, nuyaseacavi písapanuhipucaini nuchava te nupena. Nucuchapanumayarehini eta máepeniraya ema ticachichanu,

nécaranumaya. Tásicha, nucapayacavipa néhicaviya — macahepa.

<sup>60</sup>Ema Jesús majicapapa:

—Pésamirica náecaracacaichaha ena máecharaireana. Tájina táijaracavimahi eta juca tihasamurerecavihi. Yare, péhicanu. Níjaracavyare eta pémataneyare. Picametarairuyare eta máechajiruvana ema Viya — máichapa.

<sup>61</sup>Matiarihivare ema apava énerichuvare macahehi:

—Tata náquenu, nútì nuvaraha néhicavi. Písapanusera nucametavapananumaya te nupena —macahepa.

<sup>62</sup>Ema Jesús majicapavare:

—Mácani achane tipaicapahi téyarecapahi vahi tichavaequenehavaimahi mámarairicahini eta mámaquene. Ene picaheyare piti, vahi pichavaequenehavaimahi tayehe eta tájiparacana. Taicha vahi nuvaraha mácani tínajicavahi eta macametarairuira eta máechajiruvana ema Viya — máichapa.

## 10

*Ema Jesús mavanecavaca ena setentaqueneana, tímiturecanayare*

<sup>1</sup>Te taequenepa eta júcana, ema Viáquenu Jesucristo manerejicavarepa ena setentaqueneana apamuriana máimitureanahivare. Tiyananapa ticametarairuanayarehi te avasareana mapaisineanapahi éma. Apinanavacapahi eta napaisirayare éna.

<sup>2</sup>Máichapa eta matuparasiravacahi:

—Tétavicavapa eta vicamunuirava ena tímicatacavahianaya tayehe eta juca vématanerepihi. Eyaseacayaresera ema Tata Vicaiyaquene máijaracahavi ena náimicatacavahavi. Eta juca tímicutijircavahi mácani achane eta macamunuiravahi ena tímicatacana eta máechatijisiraya eta maharusura.

<sup>3</sup>Puiti, névatacaheyare eyana epaica. Nararihisera ena achaneana váinarajiqueneanahi étupiaruanayare. Éna nacutihí eta sárare táñehiqueneanahi. Étisera ecutiyarehi eta uvesachichcha eta tamansuvahi.

<sup>4</sup>Eta epaisirayare, tájina iámaimahi eta tarera, váhivare iámaimahi eta billetera. Váhivare iámaimahi eta eparupeva. Eyaiyauchavayarepahisera eta epaisirayarepahi te achene.

<sup>5</sup>Te jácani peti ítecapihayarepahi, ani tacaheyare eta échajisirayare ena achaneana: “Ema Viya, tiúrichaheyare éti te juca peti”.

<sup>6</sup>Nararihiyare ena achaneana navarahaya eta náurivaya mayehe ema Viya. Eta échajisiravacayare, tatupiruvaya

me Viya máijaraca eta náurivaya. Téhesera vahi nacuvaraha najacapahe, vahi ecucaeñamacava nayehe, taicha énapa téchinavana.

<sup>7-8</sup> Te jácani avasare, jácani peti eta najacapiahepuca, enasi-panayare tayehe eta peti ítecapihahi. Vahi ecuepuru jácani tinicacareana náeniruheanayare. Étaripa jácani náesiruhe-nayare. Éti, táitsivayare eta ecaematañeasiranuyarepahi. Váhivare ecupamirahapahi ímacacuhapahi eta pétiana.

<sup>9</sup> Ecanaracayarepahi ena nacajumaqueneana natarihiqueneanahi. Tásicha, emetacavacapaipa námutu ena achaneana eta núcupaisiraripa nuti Cristo, nútirichuhi ema nacuchapaquenehi. Nucuchucuhavacayare namutu ena téneuchavana, ticasíñavanavare eta nuyehe nuti Mavanerunuhi ema Viya.

<sup>10</sup> Téhesera nacuija nacujachapahe te jácani avasare ítecapi-hayarepahi, iúchucavanepa te calle.

<sup>11</sup> Ánipa ácahe: “Vétatapevachavahi eta juca tavaparu támamaquenehi eta vívape. Eta juca táicutiarahi eta máicuñasiraheyare ema Viya taicha eta emavarairahi ejacapahavihini. Vivarahasera vimetacahe eta máucupaisiraripa ema Cristo, émarichuhi ema vicuchapaquenehi, ema Mavaneruhi ema Viya. Macuchucuhahéhini éti, te éneuchavahini, ácasíñavahini mayehe” íchavacayare éna.

<sup>12</sup> Jéhesare, te táitecapapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te avasaréni Sodoma –máichavacapa ema Jesús.

*Eta táicuñayare eta návasana ena achaneana masuapajiraira-hana*

(Mt 11.20-24)

<sup>13</sup> Tacache, ema Jesús máechajicahi ena apamuriana achaneana, tímicutijiricavahi natarihinahini te mamirahu. Ánipa macahe:

—¡Páurehesami eti nujaneanana ecavasanahi te avasare Corazín étipa eti ecavasanahi te avasare Betsaida! Ichape eta ícuñayare taicha eti ímaharipa tamutu eta tiáramicareana níchaqueneanahi te emirahu, váhisera ávarahahini éneuchavahini. Ena nani achaneana ticavasanahi te Siria, apavasanánahinéni, téavicavahinéni eta namaurivahi, németeacasera núti téneuchavanavanehini eta náimairahi eta níchaqueneanapahi. Enévanénahíni náimerecavahíni yátupi etá náeneuchiravainahíni.

<sup>14</sup> Tásicha puiti, muracapanayare eta ícuñayare éti, taicha eta emavarairahi éneuchava. Tacachuricayare eta nacaicuñairaya ena achaneana apavasanana ticavasanahi te Siria.

<sup>15</sup> Étiripa eti ecavasanahi te avasare Capernaúm, tamapuruji eta nímitusirahehi étapa eta ímairahi eta tiáramicareana níchaqueneanapahi. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épjuquichavayare eta te yucu taicha vahi éneuchavaimahi éti—macahepa.

<sup>16</sup> Tacahe, tiápechavavare máimitucavaca ema Jesús ena máimitureana, ánipa macahe:

—Nácani tisuapaheanayare, ticaecheranahi eta nasuapiranuyareva nútì. Énasera nácani tépuruheanayarepahi, ticaecheranayareva eta náepuruiranuhi nútì. Ene tacahehi eta náepuruiravare ema Tata tivanecanuhi —máichavacapa ena máimitureanahi eta napaisirayare.

*Tichavanapa ena setentaqueneana vanairucanahi*

<sup>17</sup> Tacahe, tichavanapa ena setentaqueneana. Tiúrisamure-reacavanapaipa eta náitecapirahi. Ánipa nacahe:

—Tata Viáquenu. Vítouchaipa eta pivanairipi. Viratahahivare viáquijicavaca ena éreanana taicha eta vipiarasirahi eta pjare—nacahepa.

<sup>18</sup> Ema Jesús majicapavacapa:

—Tájinarinehi matumevaimahini ema Satanás eta viáquijisirapahi ena majupahana. Taicha ema Espíritu Santo tímechanuhi eta nunecapirahi eta máquipaisiravahi ema Satanás, tacutihu eta térameca eta tájahúchiravahi eta macaquiijirahi te anuma.

<sup>19</sup> Táitaurevaquene nútì, ichape eta nujaneasirahéhi. Tayanapanepuca iácatayaca eta quichare, alacránpuca, tájinaserá táicharacahémahi. Eta juca ítupajijiasiravaya níjararuhehi, tacachuriaca eta máitupajijiasiravahi ema Váinaraíjí Satanás, énapa ena majupahanahí.

<sup>20</sup> Váhisera ecucasiñavavaica eta eratahairahi iáquijica ena éreanana. Iúrisamureacavasera eta taejasiraipa te anuma eta elistana.

*Ema Jesús tiúrisamuréinehi mayehe ema Maiya*

*(Mt 11.25-27; 13.16-17)*

<sup>21</sup> Tacahe, enévanehinehi táitecapauchahí ema Jesús eta máurisamurevahí maicha ema Espíritu Santo. Tásiha, macahepa:

—Tata Nuaiyaquene, téavicava eta nucunachiravi. Jéhevare píti táquenuvihí eta anuma étapa te juca apaquehe. Títouchavaipa eta pipanereruhí. Vahi písapahini náitucahíni eta júcana ena achaneana tímijachavanahí téchemarahiana. Énapasera pjáracahi ena nani téhicanuanahí, tájinahinéni náechemaraivainahíni. Puiti nasapiharipahi nacachuricahi

ena títupajijiacavanahi. Tétávicavahi eta táurivahi eta pipanereruhi, piti Tata Nucaiyaquene.

<sup>22</sup> Tacahe, ema Jesús máichavacapa ena achaneana:

—Ema Tata Nucaiyaquene, ema tíjaracanuhi eta nútiraya néchaya tamutu. Nájina nártahaimahi énajivainahini náimatihini ema Tata. Nucarichu nuti néchinavahi ena nímimatiruanayare éma. Taicha nútí yátupihi eta nímatirahi ema Tata Nucaiyaquene; tacutiquenehi eta yátupirahivare eta máimatiranuhi éma —macahepa.

<sup>23</sup> Tacahe, mañajichamuripa ena máimitureana, máichavacapa:

—Tétavicavahi eta iúricacareva éti taicha tíjaracahehi ema Viya eta juca ímairahi puiti eta níchaqueneanahi.

<sup>24</sup> Jéhesare, numetacahe: Acane ichapemuriana ena víyaranaini profetana énapa ena réyezanaini, tétavicavahi eta navarairahi tímatinuana, navarairahivare náimaha eta juca níchaqueneanahi ímahaqueneanahi. Navarahahivare nasama eta nímituresirahi. Váipasera nacapayacahini —máichavacapa.

*Ema Jesús máimicuticha, máechajishahi ema achane máuriquenehi, samaritárohi. Tíjapanurahi mayehe ema émana achane macajaraquenehi, tayanapane vahí émainahini majaneanainahini.*

<sup>25</sup> Matiarihihi ema achane, maestro tayehe eta mavanai-ripiana ema víyarahaini Moisés. Tiyanapa matanucahi ema Jesús, téchajiricavayarehi eta mayehe. Mavarahahi macaicu-tiarayare. Máichapa:

—Tata maestro, ¿tájahapucaini nícharacavaini eta níturusirayare eta núchucuirayare te apuna vítaresira? —macahepa.

<sup>26</sup> Ema Jesús majicapa:

—¿Tájahasica tacayemahi eta táchajiriruvahi eta Sagrada Escritura? ¿Tájaha tacayemahi eta pisamirahi eta péchajicuirahi? —macahepa.

<sup>27</sup> Tásicha, ema maestro majicapapa:

—Ani tacahehi eta néchejicuirahi: “Macarichu ema Viya pémunacayare te pisamure. Macarichuvare éma piáchaneva-queneya. Píjaracayare tamutu eta pitumeva eta picaemata-neasirayare. Éma pipanerechayare tamutu sácheana. Pémunacayareva ema piparaepiyahi tácuti eta pémunasiravahi píti”.

<sup>28</sup> Ema Jesús majicapapa:

—Tétupicava eta juca pijicapiranuhi. Te pítaucha eta juca, piúchucuhayare.

<sup>29</sup> Émasera ema maestro vahí mavarahahini apaquehere-ruinahini. Máichapa:

—¿Nájahasica ema nuparaepiyahi? —macahepa.

<sup>30</sup> Ema Jesús máichavarepa:

—Nímicutichinaviyare eta juca. Matiarihi ema émana achane. Tipaicahi te achene, másiha te Jerusalén. Tiyanyarehi te Jericó. Eta mapaisirapahi te achene, náuchujiuchapa ena tiámerahiana. Náepuchiricanumapa. Tiánehi nacapacayaréni. Námeyechapa eta mámaqueneanapahi étapa eta ma-muiriba.

<sup>31</sup> Tásicha, macahepaipa ema émana tiyujaracarahi. Máiimahapa ema achane te apauehe te achenechacaya. Váhisera májapanuhini máichejiuchahini. Máetávicaichucha.

<sup>32</sup> Tásicha, macahepaipavare ema apana achane. Éma, téchapajiricahi eta Templo. Énerichuvare te máimahapa, máetávicaichuchavare.

<sup>33</sup> Tacahe, macahepaipavare ema apana achane. Éma, indigenahi samaritano. Éma, te máimahapa ema macajaraquenehi, majapanurinehi.

<sup>34</sup> Tíchecanumapa éma, témeñahavapa. Máipuchapa te aceite étapa eta alcohol eta majarana. Máepacuchavacapa te amaratataji. Tásicha, manaracuhapa manacaquechapa eta te maperapahi cavayu. Mámapa eta te máitecapíhayarehi. Máipupuara-caipahi.

<sup>35</sup> Te apanapa sache, tiyanayarepa ema samaritano. Tivecuacavapa apipe eta maplatane. Mavachachapa ema ticapenahi eta peti. Tásicha, máichapa: “Picatajicanu. Péchapajirisinánu ema maca achane. Te tatiarihinapuca eta macamunuirava, píjarasinánuya. Nímahavirine nuvachachavi te nuchava” máichapa.

<sup>36</sup> Tiuri puiti, nuyaserecavyare píti. ¿Nájahapuca ena nani mapanaqueneana ema témunacahi ema maparaepiya najaruquenehi ena tiámerahiana? —máichapa ema Jesús.

<sup>37</sup> Ema maestro majicapapa:

—Ema témunacahi ema maparaepiya, ema tijapanuhi —macahepa.

Ema Jesús máichapa:

—Pímaipaipajira, ene picahayare piti apanava. Pijapanurahiyare —máichapa.

*Ema Jesús máejirapanavaca te napena esu Marta ésupa esu María*

<sup>38-39</sup> Tímiyanavavarepa eta mapaisirahi ema Jesús. Máitecapauchapa eta avasarechicha suávasa esu ésuna esena ticaijaruhi Marta, ésupa esu suparape ticaijaruhi María. Mayanauchapa te supena esu Marta. Tétavicavahisera eta táurivahi eta najacapirahi éna. Tacahe, esu María téjacapa te máivapechacaya ema Jesús. Susamararacaripa eta máimiturapiana éma.

<sup>40</sup> Ésusera esu Marta tahapapiricaichucha eta sucaparu-jirahi, taicha eta suénisirayare ema Jesús. Tacahe, esu Marta tisemamajuheripa eta suímairahi esu suparape suéjarasirahi. Tacahe, suíchapa ema Jesús:

—Tata Náquenu, picatajicanupa. Pivanésinanu esu suca nuparape súimicatacanuichu apaesaina tayehe eta ematanecana —suíchapa.

<sup>41</sup> Tásicha, ema Jesús majicapapa:

—Páurevisami piti Marta, téavicavapa tahapapirisiravi eta pématanerepiana.

<sup>42</sup> Tituparacavi pínajica eta tihapapiricavihi. Picaravahu eta máechajiriruva ema Viya. Esu suca piparape María téupicavahi eta supanereru. Suvarahahi suítucayare. Eta tac-ahé, tisamararacanuhi. Nájina tiverejicaimahi eta suvaraha-quenehi suítuca —máichapa.

## 11

*Ema Jesús tímitucahavi eta viyujarasiraya*

*(Mt 6.9-15; 7.7-11)*

<sup>1</sup> Tacahe, te jácani apanapa sache, ema Jesús mávihahi eta te mayujarasirarehi. Te titayujarápa, témeñahavapa ema émana máimiture, máichapa:

—Tata Viáquenu, pímitucahavi eta viyujarasirayare víti apanavare, tacuti eta máimitusiravacahi ema Juan ena máimitureanahi —macahepa.

<sup>2</sup> Tásicha, ema Jesús máimitucavacapa:

—Ani tacaheyare eta eyujarauchiravaina: Tata Vicaiyaquene, piti piávihahi te anuma, vipicauchahi yátupi eta píjare. Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapirovihi ena ángeleana te anuma.

<sup>3</sup> Pájapanuhavi píjaracahavi puiti juca sache eta vicamunu-queneana vinicaquenerepiana.

<sup>4</sup> Pájapanuhavivare piperdonachahavi eta viviurevana piyehe. Víti apanava viperdonachavacaripa namutu ena ticaviurevanahi viyehe. Vahi picuisapahavi vicha eta tamauriquene. Picatiuchahavi mayehe ema Váinaraji. Tacaheya eta eyujarauchiravaina.

<sup>5</sup> Máichavare ema Jesús:

—Tiuri, nímicutichinaheya puiti. Matiarihi ema émana achane. Tacahe, máitecapauchahi ema apana achane máitunacasarehi te enumuhu yati. Viajéropahi éma. Émasera ema avasarecuruhahi, tájina maviya eta máenicahini. Tásicha, mayana mayehe ema apana máitunacasarehivare.

Máichainapapuca: “Picatajicanu, nucapucavi mapanaina pan.

<sup>6</sup> Taicha títecapauchanuhi ema nítunacasare viajéropahi. Tájimasera nuviya nucumpirachahini”.

<sup>7</sup> Tacahe, ema macaijuhequenehi váhipuca macujapanuhi, macahénapapuca: “Vahi picujarareca eta néchapune. Pésamirisinanuvare eta tapaja tacaerataquenehi. Tímacanahivare ena nuchichanaveana. Vahi nítujicava néchepuca níjaracavihini eta pivarahaquenehi” macahenapapuca.

<sup>8</sup> Máiutunacasarequenénihipuca éma, váhisera máipurajihini maechepecuhini máijaracahini eta mayasesereruhi. Téhesera te tímiyanavapuca mapiararaca ema ticamunuvhahi, németeaca tipamicavayarehi téchepuca, máijaracayarehi eta macamunuquenepahi.

<sup>9-10</sup> Eta tacahe, numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tijaracaheyareva. Vahi ecuyacuji eta eyaseasiraina. Téhevare tatarihinapapuca eta jácani íchiraya ichapehi eta tacajeravaya, eyaseacayare máijaracaheshini eta ítupajijiasiravaya. Éma, tijaracaheyare. Te jararihipuca eta táchejimiráuchahe, éma macaevuisihainaheyare.

<sup>11</sup> Eta juca tímicutijiricavahi te natarihipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi íjaracahini éti eta márijahi, tímicutijiricavaipa ecavijaruhini ena echichanaveana. Étaripa te tiyaseacaheanapuca eta jima, váhivare táuricaimahi íjaracahini eta quichare.

<sup>12</sup> Étaripa te tiyaseacaheanapuca eta varayuha, váhivare táuricaimahi íjaracahini eta sáse.

<sup>13</sup> Étiarihi éti vahi ecajirahihini nayehe ena achaneana. Iúrihisera nayehe ena echichanaveana. Ítucahi íjaracavaca jácani nayasearuheanahi táuriqueneana. Mavetiji ema Tata Ecaiyaque tiávihahi te anuma. Éma, vahi ticavijaruhimahi eta te eyaseserepiana. Tíjaracaheyarehi tamutu eta eyasearuana, émaripa ema Espíritu Santo tiávahácaheyarehi — macahepa ema Jesús.

*Ena achaneana téjecapavanahi eta náimijachirahi ema Jesús mávaháruhi ema Váinaraíjí Satanás*

(Mt 12.22-30; Mr 3.19-27)

<sup>14</sup> Te apanaquenepa sache, ema Jesús macanaracahi ema achane, úpainerihi eta máitaresira taicha eta mávahásirahi ema éreana. Tacahe, eta máuchusirapa ema éreana te máquehe ema úpainerihi, tiúripa téchajica. Ichaperinehi nárami ena achaneana.

<sup>15</sup> Natarihihisera ena apamuriana achaneana, ánipa nacahehi:

—Ema maca Jesús, vémeteaca majupahahi ema Satanás, ema náquenumurihi ena éreanana. Máijararuhi jácani eta máitupají-jiasiravahi eta macuchusiravacahi éna —nacahepa.

<sup>16</sup> Nararihihivare ena apamuriana achaneana váhivare nasuapapajicahini ema Jesús. Eta tacahe, navarahapa nacaicutiarayarehi, nayaseacapa macuchucahini eta tiáramicare, máimereuchayare eta émairahi Cristo mavaneruhi ema Viya. Váhisera nasuapayarehini.

<sup>17</sup> Émasera máimatihi eta napanereruana eta namasua-pirahi. Máichavacapa:

—Nímicutichinahe puiti ena machanerana ema gobierno. Éna, vahi típutsimurihacacanaimahi apinainahipucaini partido. Te típutsimuriacacanapa, énajicacaipapucaini tiáquipaicacacana. Émaripa mácani achane te camurianahi ena machichanaveana, váiparnehivare típutsimuriavanaimahi náehajiricacahini, énajicacahini náquipaicacacahini.

<sup>18</sup> Ene macahehi ema Váinaraji Satanás, váiparnehí másapahini típutscacana ena machamuriana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi. Éti ímijachaipa nútirichuhi machamuri ema Satanás, táchavenehi eta nuratahairahi nucuchucavaca ena éreanana.

<sup>19</sup> Tájina vahi étupicavahini éti eta juca epanereruana. Te émahipuca tímicatacanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma.

<sup>20</sup> Émaquenehisera ema Viya, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare necha tamutu. Nútiripara nuti ecuchapaquenehi.

<sup>21</sup> Tacutiquene mácani achane tume. Te macaratacahi eta mataquiriqui eta majaneasirahi jácani macayehequeneana, nájina tiámeyechaimahi.

<sup>22</sup> Téhesera macahepaipa mácani achane túmepanahi mayehe, maverejicayare eta mataquiriquini macasi-ñaqueñenehi. Máiitiacavane. Tásiha, émapa técha tamutu eta majanearuinihi ema achane. Ene nucahehi núti, túmepanuhi mayehe ema maca Satanás.

<sup>23</sup> Te vahi ecuehicanu, ecucaematanéacanu, éta tímereuchaheya machamurihehi éti ema tictianacanuhi. Masapiha ímicatacahi éma eta macaetemajirisiranuhi.

*Ema Jesús máimicutichinahi ena masuapajirairahanahi mayehe*

(Mt 12.43-45)

<sup>24</sup> Tímiyanava eta máechajirisiravahi ema Jesús, ánipa mache:

—Énerichuvare éti ecuti mácani achane máinajiruhi ema émana éreana. Ema éreana tiyanainapa matanucainapa eta jácani masiapihayarehi. Eta mamaichimavira eta mavara-haquene, mapanerechayarehi tichava. Macahénapapuca: “Nuyanayare nuchava, nusiapahacayareva ema návahá-ruinihi”.

<sup>25</sup> Te títecapapa ema éreana mayehe ema achane mávahá-ruinihi, máimahapa ema achane máinajicaripa tamutu eta mapecaturana, vuíchahasera máehicahini ema Viya.

<sup>26</sup> Tásicha, tiúrisamurepa ema éreana. Tásicha, tíchuarecpa ena siétequeneana machamuriana. Váinarajipanána éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane —máichavacapa ema Jesús.

*Viúriyare te visuapa eta máechajiriruva ema Viya*

<sup>27</sup> Mapaenumavahi titapirica ema Jesús eta juca máechajiriruvanahi, tipiaracapa esu ésuna esena te namuri ena achaneana. Ánipa sucahehi:

—¡Tétavicavapa eta sucunachacarevahi esu pena, táichavenehi eta suínasiravihi, suájisiravihi eta sucajurusiravihi! —sugahepa.

<sup>28</sup> Ema Jesús majicapapa:

—¡Tiápajucavayaresera eta nacunachacarevayarehi namutu ena tisamanayare eta máechajiriruvanahi ema Viya, yátupiyarehi eta nasuapirayareva! —máichapa.

*Ema Jesús macajachavaca eta namasuapajiraivahi ena achaneana*

(Mt 12.38-42; Mr 8.12)

<sup>29</sup> Tacache, títecaparacanapaichucha te machacaya ema Jesús ena camuriqueneana achaneana. Tásicha, eta máimitusiravacahi, máichavacapa:

—Nararihi ena achaneana puiti juca náetaviuchahi eta navainarajivana taicha vahi návarahahini nasuapa eta yátupirahi mavanerunuhi ema Viya. Tiyaseacanuanahi nímechayarehi eta tiáramicare táicutiarahi eta mavanesiranuhi ema Viya. Váhisera nímechaimahi. Tacarichu náimahayare eta níchararacavaya tacuti eta máichararacavahi ema profetaini Jonás.

<sup>30</sup> Ema profetaini Jonás yátupihi ecutiararehi éma eta mavanesirahi ema Viya nayehe ena achaneana ticavasanahi

te avasare Nínive. Ene nucahehi nuti Manerejirunuhi ema Viya, ecutiararenui puiti eyehe eti achaneana.

<sup>31</sup> Tacutiquene, esu reina Seba eta acane, te susamairi-ricapa eta máitupajijiasiravahi yátupi ema Salomón. Ésu, tayerehiquenehineni eta suávasa, tiyanahisera sucapayaca ema Salomón taicha suvarahahi susamayarehi éma. Tac-ahé, te táitecapapa eta sácheyare téchepucanaya namutu, suyaseacainapa ésu eta nacaicuñahini ena nani máetupicushianahi puiti. Sucáhénapapuca: “Táuricapa nacaicuñahini ena nani máetupicushiana, tájinapa náetseraruina nasamaripa ema Cristo, ema titupajijiápanavahi mayehe ema Salomón, tásicha vuíchahacaruya nasuapa” sucahénapa jácani.

<sup>32</sup> Tacutiquene ena achaneana ticavasanahi acane te Nínive. Tisipecaturarahiana éna. Natupiruvahisera nasuapa eta mametarairu ema Jonás. Téneuchavavaneanahi. Tásicha, nacahénapapuca te jena sácheyare: “Táuricapa nacaicuñaini ena nani maparajuruana ema Cristo, taviuchahi eta namasuapiroahí éma. Taicha éma máuriquenepanahi mayehe ema Jonás” nacahénapa. Eta máimiturapiana ema Jesús, tamicahu eta vítaresira

(Mt 5.15; 6.22-23)

<sup>33</sup> Tímiyanava eta máechajirisirava ema Jesús, ánipa macahe: —Súnsuanahi nácani tiyustacanahi eta lámpara namicahu-yarehi, tásihasera nanacapapucaini te jácani tayumururevahí cuarto, najihapaicapucaini te cajune. Tacamunuhi nanacayarehi te anuquehe. Jéhesare, tamicauchasarepa tamutu apaesa tímairiricanapaipa nácani tisiapanapahi.

<sup>34</sup> Ene ecahehi éti, eta esuapiroahí eta nímiturapiana, téavicavahi eta tamicauchiraya eta iáchanevana. Tímijunijicayare eta emaurivahi. Téhesera vahi esuapahini, téavicavahi eta tamapicuvahi eta iáchanevana. Tanasípa tamutu eta tamaurivahi.

<sup>35</sup> Eta tacahe, machu ecainajiruva tayehe eta juca esamaqueneanahi ímahaqueneanahivare, machu tayanariana te timapicu eta iáchanevana.

<sup>36</sup> Téhesera yátupina esuapa eta nímiturapiana, téavicavaya eta tamicauchiraheya tayehe eta ítaresiranahi. Tásicha, vahi eyaseacanuimahi nímechahe eta tiáramicareana —macahepa.

*Ema Jesús máimereuchavaca eta náejecipiravana ena fariséoana énapa ena escribánoana*

(Mt 23.1-36; Mr 12.38-40; Lc 20.45-47)

<sup>37</sup> Tacahe, te titapiricapa ema Jesús eta máechajisirahi, témeñahavapa ema émana fariseo. Macumpirachapa tinipanayarehi te mapena. Masuapahisera ema Jesús. Tiyanapa

te mapena ema fariseo. Te tiúripa eta tinicacare, téjacapa ema Jesús te mesa.

<sup>38</sup> (Tiuri, ena fariséoana, jucarihi eta nayeherepi te tinicanayare, tayanapanehipuca tipachivahuanahi, ticasipavahumanayarehisera. Eta juca nasipavaurusiravahi, namavarairahi náechipejicahini eta náchanevana.) Émasera Jesús, vahi masipavaurucavanumahini. Tacahe, máraminehi ichape ema maca fariséo eta mamaitauchirahi eta nayeherepianahi éna.

<sup>39</sup> Émasera ema Viáquenu Jesús máichapa:

—Eti fariséoana, eta eyeherepiana, ecaeñamaracavahi esipacanuma eta enisirareana étapa eta érirareana, emavarairahi táetseraruinahini tasiapahini eta pecatu te iáquehe. Étisera iápajupanavahi eta tachipejivahi eta iáchanevana táchavene eta evainarajivana, étapa eta tavayuasirahehi eta ejamurachirahi tamutu.

<sup>40</sup> ¡Tétavicavasamihi eta tamuracavahi eta esamureana! Ema Viya vahi tácarichu máimaha eta te iáquehe eta tiávihahi te ínahu. Énerichuvare máimahahi eta tiávihanahi te amahe esamureana. Éma yátupihi eta máimatirahéhi.

<sup>41</sup> Tatuparacahi ejapanurahiya nayehe ena ticamunuvanahi. Tátupiruva te esamureana te échajiricava apaesa tacuijasarepa tachipejivaina eta iáchanevana.

<sup>42</sup> ¡Páurehesami eti fariséoana! ¡Tétavicavahi eta tamuracavaya eta ícuñayare! Éti ímijachavahi yátupiquenéhi eta religiósohérahi eta epamisirava eta ecamavahuirahi me Viya eta diésmuri tayehe tamutu eta évaraqui. Ecunachacarehi taicha éta. Váhisera ecatiuchavacahini ena achaneana páureana macatiuchavarahana. Váhivare émunacahini ema Viya. Yátupi tituparacahehi eta ecamavahu eta diésmuri iámvahuana. Énerichuvare tituparacahehi eta ejapanuraivaya, yátupinavare eta émunasiraina ema Viya.

<sup>43</sup> ¡Jucarihivare eta apaza tiviuchahehi eti fariséoana! ¡Tétavicava eta esiñavavaisirahi! Emetapa evaraha tipicauchaheana, ticaejacaheana te táurinaquene siya eta te iúrujisirarevana. Evarahavare tipicauchaheanayarehi eta náechajisiraheana te cálleana.

<sup>44</sup> ¡Jucarihivare eta apaza tiviuchahehi eti escribánoana, étipa eti fariséoana, táchavenehi eta apimirairahehi! Ímijachavahi epicauchacarehiji. Étisera eta eyeherepiana, émejecapavacha ena achaneana eta náehisirahi ema Viya. Páureanasami éna. Váhi náimatiequenéhahini eta náejecapiravahi táchavene eta evayuasirahi eta ecaetemairavacahi —máichavacapa ema Jesús.

**45** Matiarihivare ema émana maestro eta mavanairipiana ema Moisés. Máichavarepa:

—Tata maestro Jesús, eta piyunasiravaca ena fariséoana, téavicavapa tayunasirahavihi víti apanavare víti máestroana. ¿Pivarahapuca vicaviurevahivarení víti? —máichapa.

**46** Tacahe, ema Jesús majicapapa:

—¡Eti apanavare eti máestroana, téavicavahivare eta eviurevahí! ¿Tájaha tacayema epamicavacahi ena apamuriana achaneana eta júcana eyeherepiana tacajeraqueneana? Nájinapa tiratahaimahi títaucha. Apanasica éti váhivare ítauchahini.

**47-48** ¡Jucarihivare eta apana tiviuchahehi eta tamuracavaya eta ícuñayare! Éti ecaijare apimirana, taicha ímijachavahi machanerahe ema Viya eta eyehehearirasirahi eta náecariana ena profetanaini nacaparuuanahi ena iáchucanaveanaini. Puiti étarichuhi tacahehi eta epanereruanahi eta evarairahi ecapacahavi víti mavanaranahi ema Viya taicha eta épuruirahi eta vímiturapihanahi táriqueneanahi.

**49** Ema Viya, acane tímatihehi eta ecutirayarehi eta napanereru ena iáchucanaveanaini ticapacanahi ena profetanaini. Eta tacahehi eta máechajiriruvanahi: “Nuvanecayare ena profetana; tásicha, nuvanecayareva ena apóstoleana. Váhiquenesera nasuapaimahi ena tisamanayarehi eta náimiturapihanaya ena nuvanarana. Napanajircavacayarechucha ena nuvanaranahi. Natarihiyareva ena nacapacayarepahi” macahehi ema Viya.

**50-51** Eta tacahe, numetacahe núti: Eti nujaneanana israelítana etiarihiqueneanahi puiti, ecaicuñayare, taicha timuriacahehi eta naviurevahí ena iáchucanaveanaini taicha eta nacapapajisiravacahi ena profetanaini. Acane te tépanavainapa eta apaquehe, ema Abel máinapuiruhi nacaparuhi. Máequeneruhi nacaparuhi ema maca Zacarías, ema nacaparuhi te tamirahu eta Templo. Camurianahisera ena náumurivanaini. Puiti étipa tamuriacahi eta ícuñayare naicha ena iáchucanaveanaini.

**52** ¡Páurehesamichapucaini eti máestroana! ¡Camuriquenehi eta eviurevanahi! Tamapurujipa eta ímatiequenehairainihi eta yátupiqueneana titucacáreana, taicha vahi esuapaimahi, váhivare éhicaimahi. Éti tásihahi íchejimiráurucavacahi ena tivarahanahi tisuapanaya, náehicaya ema Viya —máichavacapa ema Jesús.

**53-54** Tacahe, eta nasamirahi ema Jesús ena fariséoana énapa ena máestroana, tisemanarinehi eta mayehe. Tépanavanavarepa náitsamarareca eta nayaseresirapahi,

navarairahi nasama te máejecapavahipucaini eta macayemaqueneanapahi, navarairahi eta tiviuchayarehi éma.

## 12

*Ema Jesús vahi mávaraha apimirahávina  
(Mt 10.26-31)*

<sup>1</sup> Tacahe, te jena sácheanahi, títecaparacanapaichucha ena camuriqueneana achaneana. Tiyututucavanapa. Énasera ena máimitureana ema Jesús návhahí te machacaya. Tásicha, máichavacapa namutu:

—Tímaticarehi eyehe eta levadura eta tasisijisirahi eta masa. Tacutirichu eta tapareasirahi eta apimirairanahi ena fariséoana. Échapavaicha éti, machu napareacahe éna.

<sup>2-3</sup> Ema Viya tímararacahehi tamutu eta íchaqueneanahi, tayanapanenénipuca eyumurucavaquenénapuca te timapicu. Tisamahehivare tamutu eta échajiriruvanahi. Tímatihehivare tamutu eta epanereruana. Te jácani sácheyare ticaecherayare tamutu, téavicavaya eta etsirihairaya taicha eta emaurivanahi —macahepa.

<sup>4</sup> Étiripa eti némunacasareana, numetacahe: Vahi ecupica nácani nacapacapuca eta iáquehe, tacarichusera náiturueque-nehayare.

<sup>5</sup> Numetacaheva, macarichu ema Viya epicayare, taicha macarichu éma téchahi eta ítaresirana. Jéhevare, éma maratahahi macamitiequeneha eta iáchanevana tayehe eta táñehiquene yucu infierno, te ecainajiruva táichavenehi eta episirapuca eta nacapasiráhena. Jéhevare, éma epicayare.

<sup>6</sup> Nímicutichinahe eta cágurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta tátaresiranahi.

<sup>7</sup> Evetijipa éti, éñamacarepanahi me Viya. Éma téchahéhivare tamutu eta ítaresirana. Váiparinehi témitisicahémahi. Eta tacahe, vahi ecueñamava éti tayehe eta ítaresirana, taicha téavicavahi eta emunavahi éti mayehe. Éma, máimatihi eta tatupa eta echutimacana. Vímereuchavayarehi eta véhisira ema Jesús

*(Mt 10.32-33; 12.32; 10.19-20)*

<sup>8</sup> Numetacahe puiti, nuti Manerejirunuhi ema Viya: Namutu ena tímereuchavanahi eta náehisiranuhi te namirahu ena achaneana, núti apanavare nímereuchaya eta nuchaneraravacahi éna te namirahu ena ángeleana mayeheanahi ema Tata.

<sup>9</sup> Nácanisera vahi návarahahini náimereuchavahini eta náehisiranuhi, núti apanava nímereuchaya eta vahi

nuchaneranainahini éna te namirahu ena ángeleana mayeheanahi ema Viya.

<sup>10</sup> Namutu nácani ticaecahinuanahipuca nuti Manerejirunuhi ema Viya, tiperdonachacareana. Nácanisera nacaecahipuca ema Espíritu Santo, vahi tiperdonachacareanaimahi éna.

<sup>11</sup> Jararihiyare eta sácheinayare tiámaheanaya te namirahu ena nacapitarana eta te nárujisirarevana, énapapuca ena tuparairucana, énapapuca ena juéseana te jácani avasareana eta nayaseseresiraya. Váhisera ecueñamava tayehe eta jácani ecatiuchiravayare.

<sup>12</sup> Ema Espíritu Santo tímitucaheyare eta táurivayare eta ecayemayare te jena sache ecayaseserehinapa –macahepa.

*Vahi taurica tahapasamurechahavi eta vímahaqueneanayare*

<sup>13</sup> Matiarihi ema achane te namuri ena camuriqueneana achaneana. Máechajicapa ema Jesús. Máichapa:

—Tata maestro, pímicatacanu, pimetaca ema nuparape máijaracanu eta nuyehe parte eta nímaequeneruyare eta máimahaquenéni ema ticachichchanuini –macahepa.

<sup>14</sup> Ema Jesús majicapapa:

—Nuchicha, ¿tájaha tacayema pivaraha pinacanu juésnuyare eta eyehe? Vahi nútina néchaheyare tayehe eta máimahaquenaini ema ticachichahéni –máichapa.

<sup>15</sup> Énerichu máichavacavare ena apamuriana achaneana:

—Échapavavare éti apanavare, machu émunahiricava, ejamurarahi tayehe eta tímahacareana. Taicha eta tímahacareana te juca apaquehe, vahi étaina ticaitarecaheyare. Vahi taeñamacarehini.

<sup>16</sup> Tacahe, máimicutiarachinavare:

—Matiarihi ema achane ricu. Ichape eta mäesane. Tiúrina eta mäevaru.

<sup>17</sup> Tacahe, ema ricu mapanerechapa, ánipa tacahe eta mapanereru: “Ániquehepa eta juca névaru, tájinapa núnasiha. ¿Tájahapuca nícharacaya?

<sup>18</sup> Tiúripanapuca nuvetataha eta núnavarahi nujanejuecha. Ichapepanainapa nicha eta táitsivaya. Tiúripanainapa, apaesa tárijica tamutu eta néchatijiru étapa eta apamuriana nucalehequeneana.

<sup>19</sup> Tásicha, nucahénapa: Jéhevare puiti tétavícavapa eta nürivayare. Tájinapa níchiravaimahi. Ichapemurihi eta núnaru. Taratahaquene juca áñoanayare. Nucanaracavaya nuti. Tamutu sache tiúriya eta nunisira, néraya. Ichape eta nürisamurevaya” macahepa ema ricu.

20 Tásihasera ema Viya máichapa ema achane: “Tétavicava eta pisunsuva, piti achane. Puiti jena yati pépenaya. Tájina vahi pítapanaimahi eta juca piúnaruhi”.

21 Ene nacahe ena achaneana ticurujiricana eta náimaha-queneana nayehechiravarichu. Vahi nápanerechahini naicha eta táuriqueneana tacunachacarehini me Viya taicha tétavicavahi tahapasamurechirahi eta nacaimahaquenéraya.

*Ema Jesús tímitucahavi eta majaneasirahavihi ema Viya  
(Mt 6.25-34)*

22-24 Te apahequenepa, ema Jesús máichavacapa ena máimitureana:

—Étisera, nuvaraha ácasiñava yátupina mayehe ema Viya. Vahi ecucaeñamaracavavaicha tayehe eta enicaquenerepi étapa eta emuiriharapi puiti juca ítaresiraichaha. Eta enicaquenerepi étapa eta emuiriharapi, tájina taeñamavacarevaina. Ímararacarichuhi eta cágureana. Vahi tacaeñamaracavahini tayehe eta tanicaquenerepi. Vahi táevacahini, váhivare taechati-jiricahini, táunacahipucaini eta tanicaqueneyare. Émasera ema Viya máechapajiricahi máijarasirahi tamutu eta tanicaquenerepiana. Evetijipa éti, iápajupanavahi eta éñamacarévahi me Viya tayehe eta cágureana.

25 Vahi táuricahini eta ecaeñamaracavahini eta júcana. Eyehe éti, nájina naratahahini étijivainahini ecajurucavahini, tayanapane te tihapasamurechahehipuca.

26 Vahi étijivaimahi íturucava ecajurucavahini, váhivare táuricahini ecaeñamaracavahini tayehe eta júcana.

27 Ímararacarichuhi eta tajurusirahi eta flúreana, vahi tacaeñamaracavahini tacaematanehini, táijururecahipucaini. Táitsivahisera, te tépunehapa, tétavicavahi táurinavahi eta taflurene. Nájina nácuti eta nacamuirihaira eta táurinava, émaripa ema víyarahaini rey Salomón eta tajanunusira eta macamuirihairahinihi.

28 Apanasica ema Viya máijaracahi eta táurinavahi, ánipiри-chuhinéni eta táitaresirahi. Evetijipa éti eta máechapajirisi-rahehi, máijarasiraheyarehi eta emuiriharapi eti achaneana. ¿Tájaha tacayema vahi ácasiñavahíni eta mayehe?

29 Eta tacache, vahi ecucaeñamaracavaicha tayehe eta enicaquenerepiana étaripa te échuririacapuca eta une érayare.

30 Ena apamuriana achaneana te juca apaquehe, ichape-murihi eta tacaeñamarasiravacahi eta júcana. Vahi nácasíñavahini mayehe ema Viya, nacuchapahipucaini eta máijararu-yarehi éma. Étisera, ecasiñavayarehi eta matiarihirahi ema Ecaiyaque. Máiimatihí éma tamutu eta ecamunuiravanahi.

<sup>31</sup> Eta tacahe, tativayare íjaracava ecaemataneacaya ema Viya, ecasamureraya eta ítauchirayare tamutu eta mavaraha-queneanahi. Máimaharinepa éma. Tíjaracaheyare tamutu eta écamunuqueneana.

*Te vicajirica eta vímahaqueneana, vijacapayare eta táitsivayare ánaqui te anuma*

(Mt 6.19-21)

<sup>32</sup> Vahi ecupica, eti nuchichanaveana. Tayanapanem vahi camurihénahini, eti máichuhaqueuneanahi ema Ecaiyaqueñehi. Éma téchahehi. Eta tacahe, tétavicavahi eta mavapinairavahi eta majacapirohehi, machaneraheya.

<sup>33</sup> Tacahe, te ecaimahaquenepuca, íjararecayare eta ímahaqueneana. Íjaracayare nácani ticamunuwanahi. Tásicha, ema Viya máimahainepe, éma tíjaracaheyare eta táitsivayare ánaqui te anuma. Maitavacacainapa eta ecaimahaquenéraya. Tájinavarepa tévajaicavaimahi. Váhivare taeñamavacare ánaqui taicha nájinapa tiámeyechahemahi, váipavare cachusirimahi eta ímahaqueneanayare.

<sup>34</sup> Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehi-chapuca eta ícuchiana te anuma, ánaqui evarahayare eyanavaneyare.

### *Yátupina eta vicuneuchiravaina*

<sup>35</sup> Éti, yátupina eta ecuchapiranuya eta nuchaviraya. Etse-cavaya tamutu sácheana.

<sup>36</sup> Ácutihi nácani achaneana músuana titsecavanahi te tapaja navejiequenéraya ema náquenu eta machaviraipahi másihairahi mayehe ema arayenahi. Te máehahamecapa eta tapaja, enevaneyarepa éna navejiequenehayare.

<sup>37-38</sup> Tayanapanem enumuhupuca yati, tijararahipuca eta machavirayarehi ema náquenu. Tétavicavasera eta náuricacarevahi ena músuana eta machimapirahi ema náquenu eta nacuchapirahi, te vahi náimacaequene-hahini. Nutupiruva numetacahe: Yátupinasarepa eta máurisamurevayare ema náquenu, macaejacavacainapa te mamesara, máenicavacainapa. Émajacaruvinapa máechapajiricavacayare.

<sup>39</sup> Nuvaraha ácaicutiaraquenéna. Machu ácutiriana mácani achane námeyeruhi ena tiámerahiana. Tájina máechapiavahini tájahapuca hórayarehi eta náitecapauchiraya te mapena. Te máechahipucaini, ticuneuchavaipahini éma, váipasare nacuameyechahini.

<sup>40</sup> Eta tacahe, éti écaunechavayare tamutu sácheana, taicha vahi échaimahi tájamuhuyarepuca eta nuchavirayare nuti Manerejirunuhi ema Viya, machu iárameca —macahepa.

*Nararihi ena mísuana tiúriana. Nararihivare ena mísuana máurirahana*  
(Mt 24.45-51)

<sup>41</sup> Tacahe, ema Pedro mayaserecapa. Ánipa maicha:

—Tata Náquenu, eta juca pímicutiarachaquenehavihi, ¿viyeheyarechuchapuca viti dócequeneana, téhesera vimutupuca viti véhicavianahi? —macahepa.

<sup>42</sup> Tacahe, ema Viáquenu majicapapa:

—Nímicutichinahepa eta apuna. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apuna avasare. Táitusiava matuparacahi ema empleado eta máijarasiraya eta tinicacare ena apamuriana machamusuvanahi.

<sup>43</sup> Tétavicava eta máuricacarevaya ema maca ticatuparahahi, te tamutuhi máitaucha jácani machimapirana ema máquenu.

<sup>44</sup> Németeaca, eta tamutuirahi tiuri eta machimapirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tiúrihi eta máitauraiva.

<sup>45</sup> Téhesera, váhipuca tiuri eta mapanereruana ema mácani empleado, máimijachaichucha tiyereyarehi eta máitecapirayarehi ema máquenu. Tásiha, macaetemajiricavacapapuca ena machamusuvanahi, énapa ena vanaracanahi. Máichapapuca eta fiesta, téñiricapa térapa, ticavahapa.

<sup>46</sup> Tásiha, vaipa manecapauchavahini te titécapapa ema máquenu. Tásiha, machimaracapa ema empleado eta mamapachichijisiraipa eta máimahaqueneana. Eta tacahe, ema máquenu macavanairipinapa náestacayare muraca, taicha eta mamasuapajiraivahi.

<sup>47</sup> Tacutiquene mácani musu, te máechahi eta mavarahaqueñeanahi ema máquenu, tásiha vahi máitauchahi eta mavanahianahi éma, muracayarehi eta macaicuñairayare. Ticaestayarehi éma.

<sup>48</sup> Mácanisera musu, te vahi máechahi eta tacaye-maqueneana, tásiha téjecapavapa, éma apaesayaréchu eta máicuñayare. Étipa eti ecaimitucasianahi eta yátupiqueneanahi, tatuparacahi ímitucavacayare ena apamuriana achaneana. Núti, ánaquiaparipa eta nímitusiráhehi; tásiha puiti, étipa táehanacahi eta juca ímituresirayare.

*Ena achaneana nacatianacainapa ena téhicanaya ema Jesús  
(Mt 10.34-36)*

49-50 Núti, eta nítesirahi te juca apaquehe, tímitecanuhi eta népeniraya. Yátupiyare eta nucatajivairayare, naicha ena ticatianacanuana. Éti apanava, ticatianacaheanayare táichaveneyarehi eta éhisiranuhi núti. Tímicutijiricavayarehi te tipaica eta yucu, eta tamuruira eta muji. Eta juca, nuvara-haquenehi táitauchavavanehini.

51 Éti ímijachaipapuca eta nítesirahi te juca apaquehe, tájina tacayemacarémahi, ímijachaipavarepuca tiúricavacareyarehi nícha. Váhisera ene tacahe. Táichaveneya eta éhisiranuhi, ena achaneana tépuruheanaya térajicavanaya eyehe.

52 Taicha puiti juca vicaijuheyare, te natarihinapapuca te étanahi peti mácani achane, esu mayena, esu machicha, ema machicha, ésupa esu chínенaca. Te mapananahipuca ena téhicanuanahi, tásiba apinanahipuca ena ticatianacanuanahi. Téhesera apinanahipuca ena téhicanuanahi, mapananahiva-repuca ena ticatianacanuanahi.

53 Mácani achane, súcani esena, te natarihi ena nachichanaveana, nacatichayarehi ena ticachichanahi táichaveneyarehi eta náehisiranuhi éna. Mácani apana achane masuapajirairahahi, súcani esena, nacatichayarehi ena nachichanaveana táichavenehi eta náehisiranuhi, énapa ena nachinena-naveana.

*Ena achaneana timasuapanahí eta máimeruana ema Viya  
(Mt 16.1-4; Mr 8.11-13; Mt 5.25-26)*

54 Tacahe, ema Jesús máechajicapa ena achaneana:  
—Te ímaha timapicurume, émeteacaripa tiquivayare. Ene tacahehi.

55 Técaticavapuca te vana, émeteacaripa váipavare tiquivamahi\*. Énevare tacahehi.

56 ¡Eti masuapajirairahana! ¡Yátupihinéni ímatiequenehahi te tiquivayare, váhisera ávarahahini ímatiequeneha eta máimeruhehi ema Viya, te juca sácheana nucachanerahehi!

57 ¿Tájaha tacayema vahi ávarahahini éhica eta juca yátupi-queneana?

58-59 Járajapainapa eta sache ticaicuñanainapa namutu ena achaneana. Tacamunurichu etanucayare puiti ema Viya, ecasiñayare ecuchucuiyavaina. Eta juca tímicutijiricavahí mácani achane te ticametauchacasiya. Tatuparacahi tati-vaya máetupiricanumaya eta mayaseasirayare perdón ema timetauchahí, mapurare vuíchaha masiapahini te cárcel. Taicha te masiapapa, ticajeraequenénapa eta máuchucuiraina.

\* 12:55 Te jena avasare Judea, te táerisine eta sache eta tásirareasa eta tiquiva. Étasera eta táuchusíha eta técaticava te vana, tájijicahi tamutu, taicha tijuruhimuhuhivare.

Numetacahehi puiti: Te jácani esiapa eta yucu infierno, váhiquene iúchucaimahi éti —máichavacapa ema Jesús.

## 13

*Tavaraha náeneuchava ena achaneana*

<sup>1</sup> Étarichu te jena sache, títecapanavarepa ena apamuriana achaneana. Nametacaipa ema Jesús eta táñehiquene máichaquenehi ema Pilato, étaripa eta máimicapasiravacahi ena tiyujaracanahi te jena Templo te Jerusalén. Ánivare nacahé:

—Ena nani, galiléoanahi éna. Tépenanapa te tachacayanahi eta sárareana nacaparuuanahi námavahuásanahi. ¿Étapuca eta nasipecaturaivahipuca tímicapacavacahi? —nacahepa.

<sup>2</sup> Tacahe, ema Jesús máichavacapa:

—Éti ímijachaipa táimicaparuhi eta nasipecaturaivanahi ena nani nayehe ena apamuriana najaneananahi te Galilea.

<sup>3</sup> Nútisera numetacahe: Váhira étainahi táimicapacahini eta nasipecaturaivanahi. Vahi étaparacaina. Tacamunusera éneuchavavane éti, machu táijahúchava eta épenira, machu ácuti éna.

<sup>4</sup> Némechahe ena nani diéciochoqueneana tacaparuuanahi eta táevajaisiravahi eta torre tayuchamarainihi te calle Siloé. Ímijchapapuca táimicapacavacahi eta táchapevahí eta naviureva, navetijipapuca nayehe ena apamuriana ticavasanahi te Jerusalén.

<sup>5</sup> Nútisera numetacahe: Váhira ichapena eta naviureva ena apamuriana. Étipa, te vahi ecueneuchava, énerichuvare tíjahúchavaya eta épenira —macahepa.

*Ema Jesús máimicuticha eta yucuqui máhiriquire*

<sup>6</sup> Eta máechajirisirahi ema Jesús, máimicutijirichinapa. Ánipa macahehi:

—Matiarihihi ema achane. Tatarihihi eta masucure higo. Máhiriquirehisera.

<sup>7</sup> Tacahe, máichapa ema manusura: “Mapanapa año vahi ticahi eta juca nusucure. Péchupaicayare puiti taicha tiápita-váiricaipa eta te juca isaniti” macahepa.

<sup>8</sup> Émasera ema musu majicapapa: “Tiúripanapucaini, tata, vicuchapaichahaini étanainavaréni año. Nuvaraha némurina-hechayare eta máteji apaesa tacahipapucaini.

<sup>9</sup> Téhesera váhiquenénaichapuca tacucahi, néchupaicasarepa” macahepa ema musu.

*Ema Jesús macanaraca esu esena tépiñumaiquehe*

<sup>10</sup> Te apanapa sávaru, ema Jesús tímiturecavarepa tayehé eta náurujisirareva.

<sup>11</sup> Sutiarihihi esu esena mávaháruhi ema éreana, tépiñu-maiquehehi eta suítaresira. Vahi táurihini sutupinahahini. Diéciocho áñoripa eta sucajumairahi.

<sup>12</sup> Te máimahapa ema Jesús, máichuhapa. Tacahe, su-pauchapa. Máichapa ésu:

—Páurevi piti esena, picajumahi. Puítisera pinaracainapa —máichapa.

<sup>13</sup> Tacahe, ema Jesús manacapa eta mavahuana te suápusi. Enevanepa titupinahahi ésu, tinaracapa eta sujumainihi. Ichaperinehi eta sucunachirahi ema Viya.

<sup>14</sup> Matiarihihivare ema táquenuruuhahi eta náurujisirareva. Eta máimarahi eta juca, tisemarinehi taicha eta macanara-sirahi ema Jesús esu sucajumaquene te jena sache sávaru tacapicahuquenehi. Tásicha, máichavacapa ena achaneana:

—Saisi sache tatuparaha eta vicaemataneraya, énerichuvare eta nacaipuirayareva ena nacajumaqueneana. Puítisera juca sache, vahi táuricahini nacaipuhini taicha tacapicahuquenehi —macahepa.

<sup>15</sup> Tásicha, ema Viáquenu Jesús, majicapapa:

—¡Tétavicavahi eta tamuracava eta esamureana! Te ticaitiquihi eta epera te jácani sache sávaru, evejapuacayarehi eta ésichirayare eta une, tayanapane tacapicahuquenehinéni eta sache.

<sup>16</sup> Suvetijicha esu suca esena vicutiquenehi achane, mámariequenehi ema viáchucaini Abraham, ticatajicacarehi eta nucanarasirayarehi tayehe eta máitiarapi ema Satanás. Taicha dieciocho áñoripahi eta máecájumachirahi ésu. ¡Táuricahi nucanaracayarehi puiti juca sache tacapicahuquenehi! —máichapa ema Jesús.

<sup>17</sup> Eta nasamirahi ema Jesús, namutu ena ticatianacanahi titsirihanarinehi. Énasera ena apamuriana achaneana tiúrisamureanarinehi, taicha eta náimairahi eta táuricacarequeneana máichaqueneanahi ema Jesús.

*Ema Jesús máimicuticha eta taqui eta mostaza*

(Mt 13.31-32; Mr 4.30-32)

<sup>18</sup> Ánivare macahe ema Jesús:

—Puiti nuvaraha nímicutichinahe eta nímiturapiana nuti Manerejirunuhi ema Viya.

<sup>19</sup> Tacutihi eta ánichichaquene taqui eta mostaza. Te máevacapa ema achane te máesane, tiúnarahiyarehi eta tajurusira. Tásicha, járajapainapa eta cágureana, ticamacajiyarehi te tatavana eta sucureca.

*Ema Jesús máimicutichavare eta lévadura*

(Mt 13.33)

<sup>20</sup> Ánivare macahe ema Jesús:

—Nímicutichinaheyareva eta apana.

<sup>21</sup> Eta nímiturapiana tacutihivare eta lévadura. Esu súcani esena tiúrihi eta tasisijisira eta suyehe lévadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tiápucayarehi tiuri —macahepa.

*Vicamesavayare visiapa te tapaja ánicurichu*

*(Mt 7.13-14, 21-23)*

<sup>22</sup> Ema Jesús tiyanavare tipaica. Máimitucavacahi ena achaneana te jácani avasare máitecapihapahi. Macaijuhehi eta Jerusalén, váhisera máitecapavanehini.

<sup>23</sup> Matiarihihi ema tiyaseserecahi éma, ánipa maicha:

—Tata Viáquenu, ¿váhipuca camurihavianainaya viti viúchucuhanaya? —máichapa.

Tásicha, éma majicapapa:

<sup>24</sup> —Vahi táechacare te ánimuriheanayareichupuca eti esiapanaya eta mávasa ema Viya. Étisera tacamunu epamicava esiapaya puiti. Vahi ecuyacuji. Taicha camurianayare ena apaesachicharichu eta navarairahi tisiapanaya, váhisera titujicavananaimahi.

<sup>25</sup> Taicha járajapainapa eta sácheyare, nératacainapa eta tapaja. Tásicha, ítecapapapuca éti, éhahamecapa eta tapaja, epiaracanupa: “Tátagachicha, pivejieuquenehahavi”. Tásicha, nujicaphénapa nútia: “¿Nájahahesica éti? Vahi nímatihe. Váhivare nuchanerahénahí éti”.

<sup>26</sup> Tásicha, ejicapanuinapapuca: “Vítirichu picachaneque-neanahí te mesa eta vinisirahi. Pímitucavahivare te plaza te jena viávasa”.

<sup>27</sup> Tásicha, nujicaphénavarepa: “Esamanuripa, vahi nuchanerahéna éti. Évuisiha eta te juca, emutu eti ícharahianahí eta tamauriqueneana” níchahénapa.

<sup>28</sup> Járajapainapa eta sache ímahainapa te tajuhe eta mávasa ema Viya te návihahi ena viáchucanaveanainihi: émaripa ema Abraham, ema Isaac, ema Jacobo, énapa namutu ena profetana. Étisera enasinapa te aneca. Tétavicavaya eta íyauchiravaya, ecapitiquiahechiravaya taicha eta ecatisamuréravaya étapa eta etsiriraya eta emasiapirahi.

<sup>29</sup> Nasapiha tisiapanaya ena camuriqueneana achaneana tiásahanayare te tamutu avasareana te juca apaquehe. Tétavicavainapa eta náurisamurevaya.

<sup>30</sup> Tásicha, te jena sácheyare, nácani téquenehanahí puiti, nasapihainapa tisiapanayare. Étisera eti ínapureanahí puiti, étinavarepa vahi ítujicavaimahi esiapa —máichapa ema Jesús.

*Ema Jesús ticatisamureva náichavene ena achaneana ticavasanahi te Jerusalén  
(Mt 23.37-39)*

31 Tacahe, te jena sáche, títecapanapa ena fariséoana te mávihahi ema Jesús. Náichapa:

—Piyaná. Pitátajiva piúchuca eta te juca. Taicha ema Herodes mavaraha ticapacaviyare —nacahepa.

32-33 Émasera ema Jesús majicapapa:

—Eyana emetaca ema mácará ticaetemarahiquene. Vahi típicararecanuimahi nútí eta juca mametarapihi. Nunasi-yarechaha puiti, nucanararecanumayare ena nacajuma-queneana énapa ena návaháruanahi ena éreanana. Nútí jucarihi eta nématanerepipahi eta tímipaicanupahi puiti juca sácheana, nítauchanumayare tamutu. Vahi émainayare técha eta népeniraya. Yátupisera eta Jerusalén návasahi ena ticipahianahi ena profetanaini.

34 Tétavicavahi eta táimicatisamurechiranu eta viáyasa Jerusalén. Namapuruji ena tachichanaveanasami. Éna, ticipapajicanahi ena profetanaini mavanaranahi ema Tata. Puiti navarahainapa nútípavaya ticipacanuana. Ichapemurinehi eta níchuiravacahi éna, nárujujacanuhini tacutihini eta varayu te tacurujimuriha eta tachichanaveana te tapava. Váhiquenesera návarahahíni.

35 Náimahainapaserá etá náichararacavayare. Ticaquipacasiyare tamutu eta napenana. Táimijunavacainapa éna eta napisiraya. Numetacahevane puiti: Eta nínajasiravacainapa, vaipa tímahanuanaimahi. Tiámainucavainapa te náitsivacha eta napanerueruana, navarahainapa tijacapanuana. Nacahénapa: “Ichape eta vicunachiravi pítí vanairucaquenévihi me Viya” nacahénapa.

## 14

*Ema Jesús macanaraca ema achane tiámaquiape*

1 Tacahe, te jena sache sávaruhi, ema Jesús ticaichuhacasihi tinipanaya te mapena ema émana náiyamuri ena fariséoana. Ticaichuhacasianahivare ena apamuriana fariséoana, énapa ena máestroana tayehe máimiturapiana ema Moiséni. Navarahahi nacaicutiarayarehi ema Jesús.

2 Tíjahúchavapa tímerecava te nataracu ema émana achane macajumaquene. Tiámaquiapevacahi éma.

3 Ema Jesús, eta máimairahi ema macajumaquene, mayase-recavacapa ena natiliarihiqueneanahi:

—¿Táuricapuca vicanaracavaca ena nacajumaqueneana puiti juca sávarumuhuirahi tacapicahuquenehi? —máichapa.

<sup>4</sup> Énasera vahi najicaphahini, timatinanarichucha. Tásiha, ema Jesús macaratavauchapa ema macajumaquene. Eta macaratavauchirahi, enévanepa tinaraca. Tacache, máevatacapa mayana te mapena.

<sup>5</sup> Tásiha, máichavacapa ema Jesús:

—Nímicutichinahe puiti. Éti, németeaca májina émanaina achane vahi macujapanuhini eta mapera burro, mavuiyerapuca, te tiáquipaicavahi te pusu te jena sache tacapica-huquenehi. Eta máeñamirahi, tipatsicavayarehi macaeche-pupana eta paure sárare, tayanapanehinéni eta sache tacapi-cahuquenehi —máichavacapa.

<sup>6</sup> Énasera vahi napatsicavahini najicaphahini. Timatinana-richucha.

*Eta maconsejarapianahi ema Jesús*

<sup>7</sup> Eta máimarasiravacahi ema Jesús ena macumpira-chaqueanahí ema fariseo, énajivahi tinerejiuchavana eta náejasihayarehi tiúrinapanana. Tacache, ema Jesús maconse-jachavacapa, ánipa máichavacahi:

<sup>8</sup> —Te natarihinapuca nacumpirachahe, vahi ecainapupuicavaimahi ecaejacava tayehe eta téjasihacareana taicha tijuricati eta máejasihayarehi mácani ticapicahupanahi eyehe éti.

<sup>9</sup> Taicha ema ténericahi, éma ticaejarecayarehi, tijuricati macaechepucavi te péjasihahi macaejasihayarehi mácani apuna. Titsirihacarepahi eta macaejacavihini te náequenemuri.

<sup>10</sup> Te ecaichuhacasipuca, ecaejacavaya te náequenemuri, apaesa ema téchahi tíchuhahénapa ticaejacaheyare te návihahi ena tipicauchacareanapanahí. Tásiha, ecunachacaréna-sarepa nayehe ena natarihiqueneana.

<sup>11</sup> Taicha nácani ticasínavavaicanahí tímijachavanahí ticapicahuana, ema Viya máimicatsiriacavacayarehi. Nácanisera mánsuanahí eta náitaresira, ichapeyare eta nacunachacarevayare me Viya.

<sup>12</sup> Ema Jesús maconsejachavare ema fariseo, ema ticumpi-rarecahi:

—Pítí apanavare, te péniricayare, vahi nacucarichu píchuhavaca ena pémunacasareanahicha, ena piparapenaveanapuca énaripa ena rícoana, táichavenénahí eta pivarairainahí títsirijicavanaya eta piyehe.

<sup>13</sup> Píchuhavacayareva ena páureana, nácani nacahemahianahí: túpúpavaquiana, masariana, púchuquiana.

<sup>14</sup> Taicha ena nani, vahi títsirijicavananaimahi eta piyehe. Táitsivasera tétaavicavayare eta piúricacarevayare pítí eta pijacapirayare eta píuchihi te jena sácheyare

picachanevacayare ena náuriqueneanahi macaechepureana ema Viya —macahepa.

*Ema Jesús máimicutichinavare ema achane tíchuhavacahi ena achaneana, máeniruanayare*

<sup>15</sup> Tacahe, eta nasamirahi ema Jesús ena natarihiqüeneanahi te mesa, téchajicapa ema émana. Ánipa macahehi eta mayehe ema Jesús:

—Tétávicavayare eta viúricacarevaya te visiapapuca eta mávasa ema Viya, vinicayare te mamesara —macahepa.

<sup>16</sup> Tásicha, ema Jesús majicapapa, máichapa:

—¡Jéhesare, te esiapapapucaya! Nímicutichinahe puiti. Matiarihihi ema émana achane téniricahi eta ichapemuriquene tinicacare. Camuriana ena máichuhauqueneanahi.

<sup>17</sup> Te máimahapa tiúripa eta tinicacare, mavanecapa ema mamusura mamecacavaca náitecapa ena nacaichuhacasique-neanahi taicha tiúriripahi eta tinicacare.

<sup>18</sup> Namutusera natanucapa eta náetseraruyarehi. Ema apana ánipa macahehi: “Vuíchaha nítujicavaimahi níteca. Nuyananumayare nímahapanayare eta nuvachareruhi apauehe”.

<sup>19</sup> Ema apana énerichuvare, álivare macahe: “Picatajicanuchaha. Vuíchaha nítujicavaimahi níteca, taicha nuyananumayare nímahapanayare eta cinco yúntaquene vuiye nuvachareruanahi”.

<sup>20</sup> Ema apana álivare macahe: “Nupaenumava nítauchavahi eta nuvehacacairahi. Eta tacahe, vahí nítujicavaimahi níteca”.

<sup>21</sup> Te tichavapa ema musu vanairucahi, mamecapa ema máquenu eta namaitujisiravavacahi títecaná ena máichuhauqueneanahi. Tásicha, tisemapa ema máquenu. Máichavarepa ema musu: “Tiuri, piyana puítirichu te plaza étapa te cálleana. Píchuhavaca ena páureana, ena masariana, ena púchuquiana, nácani pétupiaruanayare nacahemahiqueneanahi”.

<sup>22</sup> Tacahe, te tichavavarepa ema musu, mamecapa ema máquenu, máichapa: “Tata, nítaucharipa eta juca pivanairipihi. Jucarihichahasera eta juca téjasihacareana”.

<sup>23</sup> Tacahe, ema máquenu máichavarepa: “Piyanavare puítirichu te isanitiana. Píchuhavaca ena achaneana, nácanipa piácapajiruanayarepahi te achene. Picamesavaca náiteca, apaesa nayuriticava eta juca téjasihacareana mávacuanaichahahi.

<sup>24</sup> Nusemacarupa puiti. Nájinava néniruimahi ena náinapureanahi níchuhauqueneanahi” macahepa ema téniricahi —máichapa ema Jesús.

*Vahi májejeraréna eta véhisiraya ema Cristo*

25 Te jena sácheana, camuriana ena achaneana téhicanahi ema Jesús. Tásihasera, éma máesenimurihapa. Máichavacapa:

26 —Te etiarihipuca éti evarahanayare éhicanu, tacamunu epamicavaya yátupina eta éhisiranuya. Nútinapa émunacapanayare, németavicainapa eta émunasiravacaini ena ticachichaheana. Mácani achane németavicayareva eta máemunasiraini esu mayena, machichanaveanapuca, maparapenaveanapuca. Váipavare éñamaimahi eta ítaresira. Téhesera apaesarichupuca eta émunasiranuyare, vahi táuricaimahi éhicanuhini.

27 Ecatajivayare taicha eta éhisiranuyare. Te epicahipuca ijáracava muraca, táimicapacahepuca eta éhisiranuhi, tiúripanaichu vahi ecuehicanu.

28 Tacutiquene te epanerechahipuca éti épiyarecayare eta anuquehe peti apinapuca piso, vahi táuricahini émunanasica-vahini enahahajisiravainarichuini ecaematane, epanerecha-numayarehi áyanayarehipuca egastaruya ítauchirainahi eta evarahaquenehi épiyaca.

29 Vahi ácaemuñavaimahi épiyareca eta tiúrina peti, te vahi áratahaimahi ítaucha.

30 Tásiba, nacahénapapuca ena ticaecahiheanayare: “Ímahapa, váhira máratahahini máitauchahini eta jena peti, táurinaqueneyarehíji. Tíjaracavasamipa. Ichape eta mamelaya” nacahenapapuca.

31 Émaripa mácani rey, te tisemahipuca, mavarairahi máichayare eta guerra, macanayarehi mácani apana rey camuripananahi ena machanerana, mapanerechanumayarehi te maratahayarepuca macanara taicha éma vahi camurianainahini ena machanerana.

32 Eta máimairahi vahi máratahayarehi, váhivare tíjaracavaimahi máehacacahini. Tásiba, máimivanerecainapa mayehe ema mánarayarehini táitavapa eta semanerehi, vaipa nacupanerechahini.

33 Ene ecahehi éti. Eta evarairahi éhicanu, epanerechanumayarehi eta ínajisirayare tamutu, eratahairayarepa yátupi eta éhisiranuyare. Taicha te vahi eratahayare, vahi ecuacemuñava éhicanuhini.

34 Eta icheve, téavicavahi eta táurivahi taicha eta tacamunu-carevahi. Étasera eta tajachira eta icheve, tépurucarepahi.

35 Tájinapa tacamunucarevainahini. Ticaquijiyarepa. Ene nacahehi ena tínajicavana eta náehisiranuhi. Nacutihi eta tajachira eta icheve. Te evarahapuca ecaicutiara, tavaraha eta epanerechinavaya —macahepa.

*Ema Jesús máimicutichinahi te témitiaca étana uvesa  
(Mt 18.10-14)*

<sup>1</sup> Tiuri, te jácani sácheana, títecparacanavarepa ena achaneana te mávihahi ema Jesús. Camurianapahi éna. Natiarihipahi ena cóbrarécarahiana eta impuestoana. Namutu éna, ichape eta náepurucarevahí nayehe ena fariséoana. Émasera ema Jesús, vahi máepuruvacahini. Tásicha, témeñahavanapa éna te machacaya, taicha navarahapa nasamararacayarehi éma.

<sup>2</sup> Natiarihipahivare ena fariséoana énapa ena máestroana. Ena nani, vahi náuricahini eta macachaneiravacahi ema Jesús ena nani achaneana. Ánipa nacahe:

—¡Vahi tiuri eta máichaquenehi ema maca! ¡Namutuchucha majacapavaca ena nacahequenetátajiana tica jachahaca-reanahí! ¡Nasapihapa macachanevacahi eta nanisirahi ena nánitatajiana! —nacahepa.

<sup>3</sup> Tacahe, te masamapa ema Jesús eta juca, máimicutichinavacapa eta máimitusiravacahi. Ánipa máichavaca:

<sup>4</sup> —Esamanuchaha. Nímicutichinaheya puiti. Matiarihi ema émana achane. Ticayehehi eta cien uvesa. Te témitiyechapuca eta étana, ema achane tiyanayarehi matanuca eta táemitiaruhi. Eta maeñamiravahí, majunijicayarehi eta apamuri noventa y nueve uvesa te majaneasihahi.

<sup>5</sup> Jéhesare, te máichimavapa eta táemitiaruhi, tichavapa tiúrisamurepaipa. Mámapaipa te machepa.

<sup>6</sup> Te títecrapapa te mapena, máichuhapa ena machacaya-penana májiriareana. Tacahe, máichapa éna: “Yare, éti apana iúrisamurevare nuyehe nútì. Taicha níchimavaipahi eta uvesa táemitiaruhi” máichapa ena májiriareana.

<sup>7</sup> Tiuri, nútì numetacahe eta juca: Énerichu ema Viya te anuma tiúrisamurevare nayehe ena achaneana tiúrita-resiranahí, taicha tájina náejecapiravainahini. Tétavivainehisera eta máurisamurevahí ema Viya nayehe nácani achaneana tímataranahí eta nacapecaturairahi, tásicha téneuchavanapa, náinajicapa eta napecaturanaini —macahepa ema Jesús.

*Ema Jesús máimicutichinahi eta táemitiaru étana reale*

<sup>8</sup> Tímiyanava eta máechajirisirava ema Jesús, ánipa macahe:

—Nímicutichinaheya eta apuna. Sutiarihi esu ésuna esena. Ticayehehi eta dies reale eta tijapu plata. Te témitiyechapuca eta étape, tinanesiyarehi sutanucayarehi eta táemitiaruhi. Eta sutanusirayare, suyustacainapa eta sumicahu. Supihicainapa tamutu eta te tajuhe eta supena.

<sup>9</sup> Te suúchimavapa, tiúrisamurénapa. Suíchuhavacainapa ena suchacayapenana suájiriareana. Tacahe, suíchavacainapa éna: “Yare, éti apána iúrisamurevare nuyehe nútí, taicha níchimavaipa eta reale nucamitiaruhi” suíchavacainapa esu esena ena suájiriareana.

<sup>10</sup> Tiuri puiti, nútí numetacahe eta juca: Ene macahehi ema Viya. Tétavicavainehi eta máurisamurevaya te namuri ena ángeleana eta máeneuchiravapa mácani achane cápecatuarahini, máinajisiraipahi eta mapecaturanaini —macahepa ema Jesús.

*Ema Jesús máimicutichinahi ema émana achane amaperu tacamitiriaru eta matuhusiva*

<sup>11</sup> Tímiyanava eta máechajirisirava ema Jesús, ánipa macahe: —Matiarihihi ema émana achane. Apinanahi ena machichanaveana. Ajairana.

<sup>12</sup> Étana sache, máichapa ema maiya ema émana machicha amuyapaná: “Tata, picatajicanupa, píjaracanu puiti eta nuyeheyare tatucachaquenenuyare eta picayehequeneana” máichapa. Tacahe, tísapavapa ema naiya. Máijaracavacapa eta máimahaqueneana ena apinana machichanaveana.

<sup>13</sup> Tacahe, étarichuhi te jena sácheinahi, tétupiricavapa ema amaperu, tiyanavanepa. Mámapa tamutu eta mayehechiravaripahi máijararuhi ema maiya. Tiyanapa te apána avasare tayerehiquene. Eta ánaqui, máitaiyahi tamutu eta máimahaqueneanaini. Tamutupa mamapachichijica.

<sup>14</sup> Tacahe, eta jena sácheiná, táitecapauchapa eta ecuha etá avasare mávhahi ema amaperu. Tacahe, namutu ena achaneana tayehe eta te avasare téchurihanapa eta tincacare. Tivayuchavapa eta ecuha. Ema amaperu titara-haipahi eta máimahaqueneanaini. Tásicha, tájinapa maviyahini eta manica.

<sup>15</sup> Tásicha, ticaquenurecapa mayehe ema émana achane. Tacahe, ema máquenuhi mavanecapa ema amaperu eta majane-sinaya eta cúciana eta te máesane.

<sup>16</sup> Ichapesera eta máecuavahi. Majamurachainehi manicahini eta taniru eta cúciana, taicha nájina náitátihi éma.

<sup>17</sup> Tacahe, téquecavapa eta mapanereruanahi. Tipanereque-nehavapa émajiva. Ánipa tacahehi eta mapanereruhi: “Namutu ena mavanarana ema tata, tiúrihi eta nanisira. Nútisera ani ticapacanuinapa eta nécuava.

<sup>18</sup> Níjaracava, nuyana nuchava eta me tata ticachichanu. Tásicha, níchayare éma: Tátachicha, nucapecaturaipa mayehe ema Viya étapa eta piyehe piti tata.

19 Tayanarinepuca táimicutijiricavaineepuca vahi pichichanuina. Picatajicanusera. Pijacapanu, nímiáque-nuchavarine piyehe piti tata. Nácutirine ena pivanaranana. Níchayare ema tata". Tacahepa eta mapanereruhi ema amaperu achane.

20 Tásicha, tiyanapa tichava eta me maiya. Te tiánehipa títecapa ema amaperu, máimahapa ema maiya. Enurujipa máimativane. Ichaperinehi eta majapanuirahi. Enurujipa tiyana tijunapa mácpa. Majupahacapa ema machicha. Máietera'recaba eta máurisamurevahi.

21 Émasera ema amaperu, téchajicapa. Ánipa maicha: "Tátachicha, nucapecaturapa mayehe ema Viya étapa eta piyehe piti tata. Tásihasera, tayanarinepuca táimicutijiricavaineepuca vahi pichichanuinaya" máichapa.

22 Émasera ema maiya, mavaraha máimerecaya eta yátupirahi eta majacapirahi ema machicha. Vahi máicuñacahini. Tásicha, mavanecapa ena mavanaranana. Máichapa: "Etátájirica, iama eta muíriare tiúrinapana. Emuiriacha ema maca nuchicha. Iama eta tiúrinapana surtija; masurutijaina. Iámavare eta tiúrinapana eparupeva, máeparupevaina.

23 Énerichuvare épana eta jena mamona tiújepana. Ecapaca, vinica. ¡Víchayare eta fiesta! Viúrisamurevaina eta máitecapirahi ema maca nuchicha.

24 Taicha éma, tímicutijiricavahi eta máepenaquenénahini ema maca, puítisera tiúchujicapa tichavapa ani nuyehe. Máemitiaruhí te numirahu, puítisera nímahapa éma" macahepa ema maiya. Tacahe, ichape eta náurisamurevahi namutu.

25 Tiuri, ema émana machicha máechavihi tiyanahi te isaniti. Te tichavapa, te tiánehipa eta napena, masamapa eta fiesta te tajuhe.

26 Tásicha, máichuhapa ema émana nacajurure. Mayase-recapa: "¿Tájaha tacayema eta juca fiesta?" macahepa.

27 Tacahe, máichapa ema macajurure: "Ema piparape títecapahi. Tásicha, ema piya máimicapacapa eta étana mamona tiújepana. Ichape eta fiesta, taicha eta máurisamurevahi ema piya eta máitecapirahi ema piparape" máichapa ema macajurure.

28 Tacahe, tisemarinehi ema maparape. Vaipa mávara-hahini masiapahini. Tacahe, te máechapa ema naiya, tiúchucapa. Macamesapa macasiapa.

29 Majicapapasera ema machicha, ánipa maicha: "Pímaha, tata. Ánaquiapapa eta nítatíravihi núti. Tájina nímatiyahini nácapaemachavihini te pivanairipiana. Tásihasera, tájina pijaracanuhini eta étanainahini chívachichainapucaini eta

nunicahini nucapiestarahipucaini nútí, nácachanehini ena nájiriareana némunacasareana.

<sup>30</sup> Tásicha, puiti pímicapacainehi eta mamona tiújepana, taicha eta máitecapirahi ema émana pichichatataji. Ema mácatataji titahacavahi eta píjararuinihi picayehequeneanainihi náichavenehi ena esenana túhusiana” máichapa ema machicha.

<sup>31</sup> Tacuhe, ema maiya máichapa: “Pímaha, nuchichachicha, pítí ánaquiaparipa eta péjahasiranuhi. Tásicha, tamutu eta nucayehequeneanahí, piyeheanahivare pítí.

<sup>32</sup> Puítisera, táuricaichucha vicha eta piesta eta viúrisamu-revainahi, taicha tímicutijiricavahi eta máepenaquenénahini ema maca piparape, puítisera tiúchujicaipa, tichavapa éma. Ema máemitiaruhi te vimirahu, puítisera viápechavavarepa vímaha éma” máichapa.

Tacahehi eta máechajiriruvananahi ema Jesús nayehe ena achaneana.

## 16

*Eta máimituresirahi ema Jesús, máimicutichina ema capataz timapachichijicahi eta máimahaquene ema máquenu*

<sup>1</sup> Ema Jesús ánivare macahehi eta máimitusiravacahi ena máimitureana:

—Nímicutichinahe eta apuna. Ema achane rico, matiarihihi ema mayehe capataz, téchahi tamutu eta máimahaqueneana ema máquenu. Tásicha, masamairiricapa ema máquenu eta mamapachichijisiraipahi eta máimahaqueneana.

<sup>2</sup> Tacuhe, ema máquenu máichuhapa. Mayaserecapa: “¿Tájaha tacayema eta juca? Nusamauchavihi eta pimapachichijisirahi eta nímaqueneana”. Émasera ema capataz tájina maviyavahini macatiuchiavahini taicha yátupihi eta máejecapiravahi. Tacuhe, ema máquenu máichapa: “Tiuri, vitupaequenehayare tamutu taicha vaipa nuvaraha pímyanava eta nuyehe”.

<sup>3</sup> Tacuhe, ema capataz ichaperinehi eta mapanereresirahi taicha eta máuchusiraya. Tásicha, macahepa te mapanerreuana: “¿Tájahainapapuca nícharacavayare puiti? Ema náquenu ticuchucanuinapa tayehi eta juca nématanerepihi. Ichape eta nutsirihacarevayare taicha vahi núrihahini nucaematanehini eta isaniti, váhivare nuratahaimahi eta tamuracava eta emataneca. Titsirihacarehivare nuyaseserecahini eta nunicaqueña.

<sup>4</sup> Tiuri, áni nucaheyare. Némeñahavayare nayehe ena ticanteveanahi mayehe ema náquenu, tiámmainucava te nítucavapapucaini eta nítatijiayavayare” macahepa te mapanerreuana.

<sup>5</sup> Tacahe, máichuhavacapa namutu émanapahi ena ticanteveanahi mayehe ema máquenu. Tacahe, mayaserecapa ema máinapuiruhi: “¿Péchapuca áyana eta pintevehi mayehe ema náquenu?”

<sup>6</sup> Tacahe, ema ticantevehi majicapapa: “200 lata eta aceite comer eta nuntevehi mayehe”. Tacahe, ema capataz máichapa: “Júcahi eta piyehe vale pifirmaruhi. Puítinarchu vítsivachaya eta apana vale. Vaipa pivachachaimahi tamutu. Cien latainarine eta pinteveyare” macahepa.

<sup>7</sup> Tacahe, mayaserecavare ema apana: “¿Pítiyapa péchapuca áyana eta pintevehi?” Ema ticantevehi majicapapa: “Séiscientohi tarera eta trigo eta nuntevehi mayehe”. Tacahe, ema capataz máichavarepa: “Júcahi eta piyehe vale pifirmaruhi. Vítsivachaya eta piyehe vale. Vaipa pivachachaimahi tamutu. Quinientorine tarera eta pinteveyare”. Ene tacahehi eta máichirahi nayehe ena apamuriana ticanteveanahi, máitsivachirapaipahi eta nayeheana váleana.

<sup>8</sup> Tacahe, te máechapa ema máquenuini eta máichaque-neanahi ema mayheni capataz eta macatiuchiravahi, ánipa macahe: “Tétavicavapa eta máitusirahi masámápuha ema maena nuyeheni capataz” macahepa ema máquenuini. Ene nacahehi ena achaneana máimatinahanahi ema Viya. Éna tiápajupanavanahivare eta náitusirahi eta tayanirava. Nacachuricahi ena téhicanahi ema Viya, taicha tavayuacavacahi eta tájiparacana.

<sup>9</sup> Puiti numetacaheyare eti nímitureanahi: Eta ítaresirahi te juca apaquehe tamauriquenehi, te ecaimahaquenehipuca, ecajiyare te napauchahepuca ema ticamunuwanahi. Tacahe, te ítecrapapa te mávasa ema Viya, tiúriyare eta ítecapiraya, ánaqui ejacapainapa eta táitsivayare.

<sup>10</sup> Taicha nácani tiúrihi eta náechapajirisirahi jácani ánichi-chaquenehi, ene tacaheyarehi eta táurivayare eta náechapajirisirayare eta camuriquenehi. Nácanisera vahi tiúrihi eta náechapajirisirahi jácani ánichichaquenehi, éneyareichuhivare vahi tiúrimahi eta náechapajirisirayare eta camuriquenehi.

<sup>11</sup> Taicha te vahi tiúrihi eta ítauchirahi eta ecatuparahairahi échapajircaya eta tímahacareanahi eta te juca apaquehe, ema Viya vahi tituparacahémahi eta tímahacareana yátupi-queneana te anuma.

<sup>12</sup> Eta tacahe, ítaurahiyare tayehé jácani apayeheana apaesa máijaracahe ema Viya eta ícuchihi, taicha eta máimairahi éma eta ítauraivahi éti.

<sup>13</sup> Éti, eta ítaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapa-

carepanayarehvare. Tásiha, ema apana, apaesarineya eta émunasiraina, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurerecahehini eta plata, machu tahapapiricaheriana eta émunasirahi ema Viya, étapa eta ecaemataneasirahi éma —máichavacapa ema Jesús ena máimitureana.

*Ema Jesús maconsejachapa ena fariséoana  
(Mt 19.1-12; Mr 10.1-12)*

<sup>14</sup> Natarihihivaresera ena fariséoana. Nasamararacahi eta juca máimiturapihanahi ema Jesús. Tásiha, nacaecahirichuchasera eta nasamirahi éma. Taicha téavicavahi eta tavayuasiravacahi éna eta tímahacareana.

<sup>15</sup> Tacahe, ema Jesús máichavacapa:

—Éti épiyacavahi iuri eta ímairavahi nayehe ena achaneana. Émasera ema Viya máimatihi eta esamureana. Macatianacahi ichape éma eta apimirahérahi.

<sup>16</sup> Numetacahevare eta apana: Ema víyahaini Moisés, énapa ena víyarahanaini profetana tínapucanahi eta náechajisihahi tayehe eta nítesirayarehi nuti Cristo ecuchapaquenehi. Puiti ichape eta navapinairavahi ena camuriqueneana téhicanuanapaipa. Éti apana, tituparacahe éhicanuyareva.

<sup>17</sup> Numetacahe puiti: Váhiqene titavaimahi eta tasuapacrevahi eta máechajiriruvana ema Tata. Máihecuaraquire éta, tayanapanehipuca táitava eta anuma étapa eta juca apaquehe.

<sup>18</sup> Éti, eta ímiturapi, ísapahi mácani achane máquijica esu mayena, tásiha, ísapahivare maveha esu apana esena. Nútisera numetacahe: Mácani achane, te máinajicapuca esu mayena, tásiha maveha esu apana esena, éma ticapecaturaipahi me Viya. Tacutiquene mácani apanavare achane mavehana esu esena máinajiruhi ema suima, énerichuvare ticapecatura-hivare me Viya taicha ésu, matiarihichahi ema suímaquenehi —máichavacapa.

*Eta macatajivairahi ema rico étapa eta máuricacarevahi ema paure ticaijare Lázaro*

<sup>19</sup> Tacahe, ema Jesús máimitucavacavare ena achaneana. Ánipa macahe:

—Nímicutichinahe eta apana. Matiarihihí ema émana achane. Mavayuchahi eta marricuva. Tétavicavahi táurinavahi eta macamuirihaira. Tijanunuhanacanecha. Tamutuhi sácheana máicha eta táurinaquene piesta.

20 Tásicha, matiarihihivare ema apana achane paure ticaijare Lázaro. Ticajumahi. Amairihahi carachachaha eta majuma. Téjahapairicahi éma tamutu sácheana te mapajacura ema rico.

21 Ema maca paure tiyaseserecahi manicayare eta máemacharajiana ema rico. Tájinaserá náijaracaimahi. Tavetijipa, vahi túmenahini ema paure. Vaipa maratahahini macatiuchavahini eta táeverasirahi eta tamucuana eta macarachana.

22 Étana sache títecapapa eta máepenirahi ema paure. Nárajapapa ena ángeleana; náepanapa eta máchaneva ema Lázaro, námapa tayehe eta paraíso mávihahi ema viáchucaini Abraham. Tacahe, te táequenepa, tépenavarepa ema rico. Tiúrinavare eta náecarirahi.

23 Eta máepenirahi éma, tiyanapa tayehe eta macatajivaiyayarehi. Tásicha, te téjamiháuquichapa, máimahapa eta mávihahi ema Abraham, émapa ema Lázaro te machacaya. Mayerehivacahisera eta máimairahi.

24 Tacahe, tipiaracapa ema rícoini: “Tata Abraham, pájapanunu. Picatajicanu, pivanesinanuini ema Lázaro máechipaicaini apaesachichaini eta mavauqui te une. Máecasarechapanaini eta nunene. Taicha tétavicavahi eta numaunevahí eta te juca nucatajivaiyahi tayehe eta juca návhahí tájurequene yucu” máichapa.

25 Émasera ema Abraham majicapapa: “Vahi nuvane-caimahi. Péchavachucha, nuchicha, te achanevichaha, tétavicavahi eta piúricacarevahí. Tájina pácamunuhini eta pítaresirahi. Ánipasera picatajivaiyahi. Émasera ema maca Lázaro, ichapemurihi eta macatajivairahi te achancerichaha. Puítisera vaipa macatajivahini. Puiti éma, majacaparipahi eta máurica-carevahí.

26 Tacutiquene máitijihi eta mánucuirainahini eta ára piyehe. Pítiripa váhivare pítujicavaimahi pítécapauchahavi ani te juca viávhahí víti, taicha jucarihi eta tíchejimirauchahavihi eta viánucuirainahini tacutihi eta tiúchausí cajacure. Máiijihi eta mayanahini” macahepa ema Abraham.

27 Tacahe, ema rícoini máichavarepa: “Tiuri, te váhipuca titújicacarehi, picatajicanusera. Pivanesinanuini mayana ema Lázaro te nupena.

28 Mametapaninanuini ena cincoqueneana nuparape-naveana. Maconsejachapanavacaini eta náeneuchiravainaini éna, apaesa váhini nacuitekahini tayehe eta juca návhahí nútí nucatajivaiyahi”.

29 Émasera ema Abraham máichavarepa: “Éna, narataha téchajicurecana, ticaravahuanayare eta Sagrada Escritura. Te nasuapahivarepuca eta tavanaiprianahi, vahi tisiapa-

naimahi eta te jara ecuñaraqui piávhahi píti”.

<sup>30</sup> Ema rícoini majicapavarepa: “Táitaurevaquene ene tacaheli, tata Abraham. Tiúripanahiserahipucaini mayanahini ema émana máepenaquenehi eta nayehe ena nuparape-naveana, mamepanavacahini. Németeaca téneuchavava-neanapaini”.

<sup>31</sup> Ema Abraham máichavarepa: “Te váhipuca nacusuapahini eta Sagrada Escritura, tacaheyarehi eta namasuapiroayare mácani máechepurehi máepenaquenehi” macahepa ema Abraham.

## 17

*Ichape eta máicuñayare mácani tímiaquipaica te pecatu ena amaperuana*

(Mt 18.6-7; Mr 9.42)

<sup>1</sup> Te táequenepa, ema Jesús mamepanahavarepa ena máimitureana. Ánipa macahe:

—Yátupi eta vahi téjiacavaimahi eta tímiaquipaicayare tayehe eta pecatu ena achaneana. Ichapesera eta náicuñayare nácani táemesiavanayare náimiaquipaisiraya nácani apamuriana tayehe eta pecatuana.

<sup>2</sup> Mácani tímiaquipaicaya ema émana amaperu, tiúripanahipucaini máepenahini mativainahini éma. Váhirichupucaini macucaicuñahini; taicha vahi macuimiaquipaicahini ema amaperu tayehe eta pecatu.

<sup>3</sup> Eta tacahe, échapavaya éti machu ímiaquipaica ena amaperuana.

*Tatuparaca viperdonacha ena téjecapavana viyehé*

(Mt 18.21-22)

Numetacahe eta apana: Te máejecapavapuca ema piparape eta piyehe, piconsejachaya. Téhesera máeneuchava eta piyehe, piperdonachaya éma.

<sup>4</sup> Tayanapané siétehénapuca máejecapava te étana sache, máeneuchavasera eta piyehe, tituparacavi piperdonachayare —macahepa ema Jesús.

*Tamutuyare virataha te yátupihi visuapa ema Viya*

<sup>5</sup> Tiuri, ena apóstoleana nayaserecapa ema Jesús:

—Tata Viáquenu, picatajicahavi. Pímitucahavi apaesa tajurucapaipaini eta vicasíñairavahi mayehe ema Viya. Vivaraha ichapenaini eta vicasíñairavaya eta mayehe —nacahepa.

<sup>6</sup> Tacahe, ema Jesús majicapavacapa:

—Vahi táchamesa ichapenahini eta ecañairavahi mayehe ema Viya. Tayanapanepuca ánichichainarichu eta ecañairavahi, táchupuca eta táchichicha eta mostaza, tamutuyare

erataha. Étaripa eta jácani yucuqui, te evarahapuca ecayejeca, eratahayarehi. Te íchapuca: “Piyejecava eta te juca, piyana pisucuchava te cáquiure”; tásicha, eta yucuqui tisuapaheyarehi. Tiyejecavainapa tayehe eta cáquiure.

*Tatuparaca vítauchayare eta vicaemataneasirayare ema Viya*

7 Étaripa ema mácani achane te ticamusurahi, te másihapapapuca ema musu te vámahi eta majaneasirahi eta vaca, te tísahahipuca, te títecacapapa te peti, ema máquenu Váiparinehi matátáuchaimahi máepiyaca eta tinicayare eta máenisiraya ema musu.

8 Matátáuchayarechucha mavaneca ema musu émaina máepiyaca eta tinicacare, máenicayare ema máquenu. Tásicha, máichainapuca: “Tiuri, nítanesipa. Pítipavapa pinica”.

9 Váiparinehivare mahasulupayachaimahi ema manusura eta máitauchirahi eta mavanahianahi.

10 Ene ecahehi éti, ecuti ema musu. Te ítauchapa tamutu eta evanahiana me Viya, ecahenapa: “Viti múusanahi vahi vicunachacaré mahi. Tacarichuhi vicha eta vivanahianahi” ecahenapa —máichavacapa ema Jesús.

*Ema Jesús macanaracahi ena diésqueneana leprosoana*

11 Tímiyanavavare tipaica ema Jesús, macaijuhepa eta Jerusalén. Máetavicavacapaipa eta avasareana te provincia Galilea étapa eta Samaria.

12 Te máitecapauchapa eta apana avasarechicha, tiúchuji-canapa ena diésqueneana ajairana ticajumana eta lepra. Nacapayacapa éma. Váhisera náemeñahavahini éna, nayere-hichucha.

13 Tacahe, napiaracapa ema Jesús:

—Tata Jesús Nazareno, pájapanuhavi. Picatajicahavi, picanaracahavi eta vijuma —náichapa.

14 Tacahe, ema Jesús máesenicavacapa. Tásicha, máichavacapa:

—Eyana, ímerecava te namirahu ena tuparairucana apaesa náimamaracahe. Énainapa nametajirica eta iúrivaipa, enarasi-raipahi eta ejumanainihi —máichavacapa.

Nasuapavanehi éna. Tásicha, eta nayanirahi, tinaracanapaipa.

15 Tacahe, ema émana, eta máimairavahi eta manarasi-raipahi, tichavapa te mávihahi ema Jesús. Tipiaracapaipahi muraca eta macunachirahi ema Viya.

16 Matupirupa tépuyucahi te mamirahu ema Jesús. Tétipaicapa macaitecapa eta mamira te apaquehe, mamaverarasiravahi eta mahasulupayachirahi ema Jesús. Ema maca achane, indigenahi samaritano.

17 Tacahe, ema Jesús máichapa:

—Ticutimahi diésnabi ena nucanararuuanahi. ¿Tájahapuca tacayemahi vahi nachavahini ena apamuriana nuéqueneana?

<sup>18</sup> Macarichuhi tichava ema maca apavasaquenesamihi, macunachapaipa ema Viya.

<sup>19</sup> Tacahe, ema Jesús máichapa ema achane:

—Péchepuca, piyana pichava. Pinaracaipasera táichavenehi eta picasiñairanuhi —macahepa.

*Eta ecutiarareanaya eta máitesiraya ema Cristo*

*(Mt 24.23-28, 36-41)*

<sup>20</sup> Tiuri, ena fariséoana nayaserecavare ema Jesús tájamuhuyarepuca eta máitecapiraya ema Cristo nacuchapaquenehi. Éma, majicapavacapa:

—Eta máitecapiraya ema ecuchapaquenehi, tájina metárapimahi eta máimeresiravaya éma. Vahi tacajerahini eta ímairaya.

<sup>21</sup> Nájinavare timetajiricaimahi eta máitecapiraya taicha matiarihiripahi éma puiti ani. Nútiripa —máichavacapa.

<sup>22</sup> Tacahe, máichavacapa ena máimitureana:

—Tatiarihiyare eta sáchevayare ichapeyare eta ecaimairu-nuiraya. Tétavicavaya eta evarairaya íjhúchavayare ímahanu nuti Manerejirunuhi ema Viya eta nuchaviraya.

<sup>23</sup> Te navayuaracahepuca nacahenapuca: “Émaripa ema vímahaquenehi ánaqui”. Ena apamuriana nacahénavarepuca: “Émaripa ema maca vímahaquenehi puiti eta ani”. Váhisera ecusuapavaca éna. Váhivare ecuehicavaca.

<sup>24</sup> Taicha te táitauchavapa eta nítēcapiraya nuti, nucutiyare eta táijahúchirava títecpa eta térameca. Namutuyare ena achaneana te juca apaquehe tinecapuanuanayare. Tacaheyare eta nuchavirayare nuti Manerejirunuhi ema Viya. Ticaecherayaresera, tájina vahi máchasimahi.

<sup>25</sup> Tativayaresera nucatajivanumayare ichape. Tépurunuanayare ena achaneana natiahiqueneanahi puiti.

<sup>26-27</sup> Tacutiyare eta acane ena achaneana machamurianaini ema Noé. Ena nani tinicairihianarinecha, náematanerinecha, térama, tímarrerecanahi ena nachichanaveana. Vahi téñamavanaimahi eta náimairahi ema Noé eta masiapirohi tayehe eta ichape pacure. Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sácheyare. Vahi titsecavanaimahi tayehe eta nuchaviraya.

<sup>28</sup> Tacutiquene ene nacahehivare acane ena achaneana ena machamuriana ema Lot. Tinicairihianahivare éna,

téraracavanahivare. Étanecha napanerechahi náijarareca eta náevavareruana. Ena apamuriana natanujiricarinecha eta nacamunuqueneanahi. Tépiyarerecanarichucha pétiana. Vahi naéñamavahini tayehe jácani ecuñaraquiya.

<sup>29</sup> Téhesera te majunijicapa ema víyarahaini Lot eta avasare Sodoma, tíjhúchavapa tiquivapa eta yucu ticasiriqui azufre tiásihahi te anuma. Tacapapajicavacapa.

<sup>30</sup> Ene tacaheyare eta nusacherayare nuti Manerejirunuhi ema Viya eta nuchaviraya.

<sup>31</sup> Te jena sácheyare, nácani tachimaruuanayare te aneca, vahi táuricaimahi nasiapahini te napena navehanumahini jácani náeñamaqueneanahi náimahaqueneana. Énaripa ena napaiririruanahi te vámahi, váhivare tichavaequenehavanimahi náepanahini eta náeñamaqueneanahi.

<sup>32</sup> Écharichuhi eta acane eta suíchararacavahi esu mayenaini ema Lot. Ésu, téavicavahi eta suéñamaequenehairahi eta suímaqueneana sujuniruanahi. Táichavenehi eta suvarairahi tichava, ésujivapa ticamitiequenehava\*.

<sup>33</sup> Nácani téñamanahi eta náitaresira, tahapapiricarinecha eta tájiparacana te juca apauehe, éna témitiequenehanaya eta náitaresira. Énasera nácani tahapapiriruanahi eta náehisiranuhi, tayanapanepuca táimicapacavaca, éna titujicavanayare tiúchucuhanayare eta náitaresiranaya.

<sup>34</sup> Numetacahevanecha: Te jena yátiyare, te apinanahipuca nácani natiaririqueneanahi te tajuhe peti, émanayare ema níchuhaqueneyare, ema apana manasiyare.

<sup>35</sup> Tacutiquene, apinanahipuca ena esenana tiyuvarcanahipuca. Énerichuvare ésuna esu níchuhaqueneyare. Esu apana sunasiyare.

<sup>36</sup> Te apinanahipuca ena ajairana te vámahi, éneyareichuvare émana ema níchuhaqueneyare. Ema apana manasiyareva —máichapa ema Jesús.

<sup>37</sup> Eta nasamirahi ena máimitureana, nayaserecapa:

—Tata Viáquenu, ¿távihapuca táitauchiavayare eta juca pimetarapianahi? —nacahepa.

Majicapapa éma:

—Vahi ecueñamava eta távihapuca nítecapihayare. Núti nítecapauchaheya te jácani iávihahi éti† —máichavacapa.

\* **17:32** Ema Viya mavanecahi ena apinana ángeleana, nametapana ema Lot eta máicuñasirayarehi eta avasare Sodoma. Ésusera esu mayena ema Lot, ticometacasihineni eta sujunairayare sucachaneyarehi ema suima, sucatequeneharichucha eta suímaqueneanainihi. Étapa tiviuchahi sunasipa te achene, tépiyavapa icheve máripuhi. † **17:37** Te máechajiriruvahi ema Jesús, ani macahehi: “Te jácani mávihahi ema máepenaquene, éta távihayare eta sipuquiana”. Eta juca mayehehi proverbio, tatarihi eta tacayemaquenehi tayumurevahi.

## 18

*Ema Jesús máimicutichinavare ema juez ésupa esu tépenaima*

<sup>1</sup> Ema Jesús máimitucavacavare ena máimitureana vahi nacucainajiruva eta nayujarasirana. Tímiyanavanaya, tayanapane vuíchaha najacapavanehini eta nayasearuanahi.

<sup>2</sup> Eta máimicutichinahi, ánipa máichavacahi:

—Matiarihi ema achane. Juézhi tayehe eta avasare. Éma, tájina vahi mapicauchahini ema Viya. Nájinavare mapicauréna ena achaneana.

<sup>3</sup> Sutiarihivare tayehe eta avasare esu ésuna esena suépenaimaquenehi. Suchavauruiricahi ema juez taicha eta sumetauchirahi ema sucatianaruhi.

<sup>4</sup> Émasera ema juez vahi masuapahini eta sumetauresirahi esu. Váhisera sucaina jiruvahini. Tásicha, mapanerequenehapa macahepa: “Núti néchinava. Nájina nárataha napamicanuhini. Váhivare tipamicanuimahi ema Viya.

<sup>5</sup> Ésusera esu suca esena, nuyacujipa eta suchavauruirisiranuhi. Nícharinepuca eta suvarahaquenehi, apaesa vaipa sucuápechava suíteca” macahepa ema juez.

<sup>6</sup> Puiti, nuvaraha ecaicutiaraquenehaicha eta juca nímiturapihi mayehe ema juez mapicauruiraha eta macatiuchirahi esu suca esena táichavenehi eta suchavauruirisirahi éma.

<sup>7-8</sup> Ene macahehi ema Viya. Vahi máyererejimahi eta macatiuchirahevanya eti manerejiruanahi, esamacareyarehi taicha eta emacaina jiruvairahi eta eyujarasirainahi tamutu sácheana, yátiana. Étaripa te táitecapa eta nuchavirayare nuti Manerejirunuhi ema Viya, németeacahi natarihiyyareichaha nuchimapaqueñeanaya ena vahi ticaina jiruvanahi eta nayujarasira, nacutihi esu suépenaimaquene eta sumacaina jiruvairahi —máichavacapa ema Jesús.

*Ema Jesús tímitucahavi vahi vicasiñavavaicaimahi, váhivare vepurrahimahi*

<sup>9</sup> Ema Jesús apanavare eta máimicutichinahi eta máimituressirahi, nayehe ena tímijachavanahi tiúriana, tájina náichiravainahi; náepuruvacahisera ena apamuriana achaneana. Tacahe, máichavacapa:

<sup>10</sup> —Nímicutichinahe eta apana: Natarihi ena apinana ajairana te Templo. Téneuchavanahi. Ema émana achane, fariséohi éma. Ema apana, tisipecaturarahi éma.

<sup>11</sup> Ema fariseo, eta macasiñavavaisirahi, témeñahavapa tayehe eta cuarto tacapicahuquenehi te Templo. Ánipa macahehi eta mayujarasirahi: “Nuhasulupayachaví, Tata Dios, eta núrivahi te pimirahu. Vahi nácutihini ena apamuriana

achaneana tiámerahianahi, tisipecaturanahi, esenamareana-hivare. Váhivare nácutihini ema mácatataji te juca nuchacaya.

<sup>12</sup> Píti pímatinuhi eta apiheirahi áyunanu te semanana. Níjara-cavivare eta plata nuganareruasa. Te nuganachahipuca eta dies peso, étanahi peso eta níjaracaviparaca. Téhesera cien pésohipuca eta nuganareruhi, dies pésohivare eta níjaracavi. Vahi nuyavanahini eta námavahuásana eta piyehe” maca-hepa.

<sup>13</sup> Émasera ema apana achane vahi máemeñahavahini. Tiyerehichucha eta máeneuchiravahi. Váhivare mapatsica-vahini máesenicahini te anuma. Téhatupachavahisera eta máeneuchiravahi. Ánipa macahehi: “Tata Dios, nucatis-mureva ichape eta nucapecaturairahi piyehe. Pájapanu-nusera piperdonachanu eta nupecaturana” macahepa ena achane.

<sup>14</sup> Tiuri, nutupiru numetacahe: Ema maca achane, eta machaviraipahi te mapena, tijacapacaréinehi me Viya taicha yátupihi eta máeneuchiravahi. Émasera ema fariseo vahi majacapacarehini. Taicha nácani ticasíñavavaicanahi, tímija-chavanahí ticunachacarehi, éna tépurucareanayarehi me Viya. Nácanisera ena tiyaseacanahí ema Viya eta májapanuirvacaina, yátupihi tijacapacareanayarehi mayehe –macahepa ema Jesús.

*Ema Jesús mayujaraucha ena amuyana*

*(Mt 19.13-15; Mr 10.13-16)*

<sup>15</sup> Tacache, ena achaneana námavacapaipahi ena amuyana eta mayehe ema Jesús, navarairahi máemamahacavacayarehi éma. Énasera ena máimitureana vahi náisapahini, nacaichepaipa ena tiámanapahi ena amuyana.

<sup>16</sup> Émasera ema Jesús máichuhavacaichucha ena amuyana. Tásicha, ena máimitureana máichavacapa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna.

<sup>17</sup> Nutupiruva numetacahe: Nácani vahi nácutihi ena amuyana eta nasuapajiraiva, vahi nuchaneranaimahi éna –macahepa ema Jesús.

*Ema achane rico téchajiricava mayehe ema Jesús*

*(Mt 19.16-30; Mr 10.17-31)*

<sup>18</sup> Matiarihi ema achane. Náiyacararipahi ena achaneana. Témeñahavapa mayehe ema Jesús, mayaserecapa:

—Tata maestro, piti piúriquene. ¿Tájahapucaini eta níchara-cavaini eta nítujisiravaina me Viya máichecuaraquirénahini eta nítaresira? —máichapa.

**19 Ema Jesús majicapapa:**

—¿Tájaha tacayema pímijarechanu “Piti piúriquene”? Mararihi ema Viya. Jéhevare éma, téavicavahi eta máurivahi.

**20** Téhesera te pivarahapuca pecha eta apana vítaresira, pisuapayarehi eta mavanairipiana ema Viya. Píti pímatipa eta júcana: “Vahi picuveha esu esena apayena. Vahi picucapareca. Vahi picuamereca. Nacuija pépiyaequeneruina. Pémunacaya ena ticachichavianahi” —máichapa.

**21 Tacahe, ema achane majicapapa:**

—Tamutu nusuapahi eta juca vanairipiana eta námaperuvahi, puíticha juca ajairanuirapa —macahepa.

**22 Tásicha, ema Jesús máichavarepa:**

—Jucarihichahasera eta pítauchaqueneyare. Píjararecaya tamutu eta pímaqueneana. Tásicha, píjaracavacaya ena páureana. Jéhevare éta, pijacapayare eta pímaqueneyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

**23** Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta marricovahi. Macatieuqueneharinehi tamutu. Tiyanapa tipanererecapaipa.

**24** Eta máimairahi ema Jesús eta mapanereresirahi, máichavarepa:

—Yátupiquenehi máitijihi eta náijarasiravainahini eta náehisiranuinahini ena rícoana eta nasiapirainahini te anuma.

**25** Esamanuchaha. Eta juca tímicutijiricavahi eta vipera camello, máitijihi tánucuhahini te támiciejehe eta parirapa. Ene nacahehi ena rícoana —macahepa.

**26 Tacahe, ena tisamararacanahi, ánipa tacahehi eta nayaresirahi:**

—¡Téavicavahi eta tamáitujicacarevahi! ¡Nájina titujicavaimahi náuchucuhahini!

**27 Ema Jesús majicapavacapa:**

—Nájina émanaina achane émajivaimahi ticuchucuhava. Macarichu ema Viya marataha ticuchucuhaha —macahepa.

**28 Émaripa ema Pedro máichavarepa:**

—Vítisera, Tata, vinaquicahi tamutu eta vicayehequeneana, vivarairahi véhicavihi.

**29 Ema Jesús majicapavarepa:**

—Nutupiru numetacahe: Namutu nácani nanaquicahi eta napena, najunijicahivare ena ticachichana, ena naparape naveana, nayenanapuca, nachichanaveanapuca, táichavene yarehi eta náehisiranuyare;

<sup>30</sup> jararihiyare eta táitsivayare te juca apaquehe eta náimahaqueneyare. Nararihiyarevare ena achaneana téchapajiricanayareva. Tásicha, tavetijinapa te náitecapapa te apaza náitaresiraya, máichecuaraquirenapa eta náuricacarevaya — macahepa ema Jesús.

*Ema Jesús tiápechavavare máechajisiha eta máepenirayare  
(Mt 20.17-19; Mr 10.32-34)*

<sup>31</sup> Ema Jesús máiputsiamurihana mámamurihana ena dócequeneana máimitureana. Tásicha, máichavacapa:

—Ímaha puiti, viyanainapa vicaijuhénapaipa te Jerusalén. Ánaqui táitauchiavayare tamutu eta nájucunachaqueneanahi ena profetanaini eta níchararacavayarehi núti Manerejirunuhi ema Viya.

<sup>32</sup> Ánaqui nucaijararecasiyare núti nayehe ena apavasqueneana romanoana. Énainapa ticaecahijiricanuanayare, ticaetemajiricanuanaya, tiátutuquichananayareva.

<sup>33</sup> Téstacanuanayareva. Tásicha, ticapacanuanainapa. Tásihasera te mapanaquenénapa sache, néchepucainapa te nécari —máichavacapa.

<sup>34</sup> Énasera ena máimitureana vahi nacaicutiarahini eta juca mamestrasiravacahi. Váhivare náimatiéquenehahini tájahapuca eta máechajisihahi taicha vahi náemeteacahini énemahinahíni náichahini ema Jesús.

*Ema Jesús macaimairirica ema achane púchuqui ticavasa te Jericó*

*(Mt 20.29-34; Mr 10.46-52)*

<sup>35</sup> Tacalhe, te tiánehipa títecapa ema Jesús tayehe eta avasare Jericó. Matiarihi ema achane púchuqui, téjacahi te achenechacaya tasiaparacuhi eta avasare. Tiyaseserecahi eta limosna.

<sup>36</sup> Te masamavacapa ena camuriqueneana achaneana tiánucuhanaipa, macayasesererupa ema púchuqui tájahahipuca eta téchacarehi.

<sup>37</sup> Nametacapasera eta émairahi tiánucuhayarehi ema Jesús Nazareno.

<sup>38</sup> Tacalhe, tipiaracapa ema achane púchuqui:

—¡Tátachicha Jesús! ¡Pítiqueneripa yátupiquenévihi Cristo!  
¡Picatajicanupaini! ¡Pájapanunu! —macahepa.

<sup>39</sup> Ena achaneana tínapumiráuchanapahi ema Jesús navarahaipa nacamatinaçayarehini. Émasera tipiararecaichucha:

—¡Tátachicha Jesús! ¡Pítiqueneripa yátupiquenévihi Cristo!  
¡Picatajicanupaini! ¡Pájapanunuini! —macahepa.

<sup>40</sup> Tacahe, ema Jesús te macanarapa, tíchecanumapa. Macavanairipipa náepana ema púchuqui. Te nacaitecapa, mayaserecapa:

<sup>41</sup> —¿Tájaha picamunu nuyehe?

Ema púchuqui majicapavarepa:

—Tátachicha, nuvaraha picaimairiricanupaini —macahepa.

<sup>42</sup> Ema Jesús máichapa:

—Tiuri, nuchicha. Táichavenehi eta picasiñairanuhi, pinara-capapa puiti —máichapa.

<sup>43</sup> Jéhesareinehi, tíjahúchavapa timairirica ema púchuqui. Tásicha, tiyanapa máehica ema Jesús tiúrisamurepaipa. Macunachapaipavare ema Viya. Énapa ena achaneana tímararacanahi eta manarasirahi, ichaperinehi eta nacunachirahi ema Viya.

## 19

*Ema Zaqueo mavarahahi máimati ema Jesús*

<sup>1-2</sup> Tacahe, eta máitecapiraipa ema Jesús te tajuhe eta avasare Jericó, matiarihi ema achane rico, ticaijare Zaqueo. Nacapitarahi ena cóbrarecarahiana eta impuesto.

<sup>3</sup> Te masamairiricapa eta émairahi ema Jesús títecapapahi, mavarahapa máimatiyarehi. Étasera eta máichipichuvahi éma, vahi måratahahini máimahahini ema Jesús te namuri ena camuriqueneana achaneana.

<sup>4</sup> Tásicha, tijunapapa eta te mayanihayarepahi ema Jesús. Tiápanapa te yucuqui, máimamaracasaréipahi ema mavarahaqueñehi máimati.

<sup>5</sup> Tacahe, te macapecupa ema Jesús eta yucuqui mávihahi ema Zaqueo, maesenicapa ema Jesús te anuquehe. Tásicha, máichapa:

—Zaqueo. Yare, piúcupaica, taicha puiti nuvarahahi nunasínumayare te pipena —máichapa.

<sup>6</sup> Tacahe, ema Zaqueo titátájipa tiúcupaicapa. Tiúrisamuréinehi eta majacapirahi ema Jesús.

<sup>7</sup> Eta náimairahi ena achaneana eta juca, téchajicanapa mayehe ema Jesús. Náichapa:

—Émamesapa máitecapauchayarehi ema maca ticapecatura-hítatáji —nacahepa.

<sup>8</sup> Te téjacanapa te tajuhe, témeñahavapa ema Zaqueo te mamirahu ema Jesús. Tásicha, macahepa:

—Pímaha, Tata Náquenu. Núti néneuchavapa me Viya. Puiti níjaracayare ena páureana ticutimuriacaca eta nímahaqueñana. Nímichavayareva te natarihipuca ena nucaete-maqueneanahi, cuátrohénapasera eta táitsivayare eta nímicha-vaueneya —máichapa.

**9-10 Tásicha, ema Jesús majicapa:**

—Nímahapa puiti eta yátupirahi eta péneuchiravahi eta pipecaturana, taicha pivarahahi pímichavayare eta plata picaetemareruanahi. Tásicha puiti, pijacapacarepa me Viya. Vaipa pémitiequenéimahi. Taicha píti picutipa ema viáchucaini Abraham eta macasiñavairahi mayehe ema Viya. Píti nuchaneravipa, picutipa ena apamuriana nucurujiruanahi. Taicha éta tímitecanuhi nuti Manerejirunuhi ema Viya —macahepa ema Jesús.

*Ema Jesús máimicutichinava ema príncipe eta máijarasirahi ena machanerana eta maplatane, apaesa nacajurucayarehi*

**11 Tacahe,** ena achaneana, eta náimairahi eta mánehiraripa eta Jerusalén, náimijachaipahi étapa tímianayare éma, eta máimeresiravayare eta marreyvayarehi. Tacahe, ema Jesús máimatiacaripa eta napanereruanahi. Tásicha, máimituvacapa eta apamuri máimicutichinapa apaesa nácautriara eta tayerevaichaha eta marreyvayarehi.

**12 Máichavacapa:**

—Matiarihihi ema achane. Ichape eta mapicacarevahi. Tiyanayarehi te apana avasare tayerehiqene. Eta tímianayarehi ánaqui máepanihayarehi eta mávacureyarehi eta marreyvayarehi tayehe eta mávasa. Eta machavirayarepa, téjacayarepa éma.

**13** Te tiyanayarépa éma, máichuhanumapa ena diésqueneana machanerana. Máijaracavacapa étapevaca eta maplatane tasivachaqueñehi. Tásicha, máichavacapa: “Ecajurucayare eta juca nuplatane. Te nuchava, táimecavaipa eta tachichanayare”.

**14 Tacahe,** tiyanapa ema rey-yarehi tayehe eta macaijuheyarehi. Te máequenepasera, tisemamurianapa ena m Janeanana. Ánipa nacahe: “Vahi vávaraha émaina viyehéna rey ema maca” nacahepa. Náimivanerecapa eta comisión, nayaseserecayare vahi nacuijaraca eta mávacuréna.

**15** Ticamesavauchuchasera majacapaichucha eta mávacurehi. Te tichavapa te mávasa, téjacapa émapa reyhi. Tásicha, máichuhavacapa ena machanerana máijararuuanahi eta maplatane. Mayaserecapa te tímecavaipahipuca eta tachichanahi.

**16** Tiyanapa ema émana tímerecavapa. Máichapa: “Tata náquenu, eta piplatane píjararunuhi tímecavaipa eta tachichanahi. Diésripa eta tajurusirahi”.

**17** Ema rey majicapapa: “Tiuri, nuchicha. Tájina táichava. Tétavicava eta piúriva. Puiti vahi támapurujimahi eta piúrivahi

tayehe eta juca ánichichaquenehi níjararuvih. Puiti níjarcavyare pituparahaya nujupahaviya. Píti táquenuya eta diésquene avasareana”.

<sup>18</sup> Tímerecavavarepa ema apana mamusura. Máichapa: “Tata náquenu, eta piúrarunuhi piplatane, tímecevaipahi cinco eta tajurusirahi”.

<sup>19</sup> Majicapavarepa: “Tiuri, nuchicha. Tájina táichava. Tétavicava eta piúriva. Puiti nunacavyare aquenucaviya tayehe eta cíncocoqueneana avasareana”.

<sup>20</sup> Tímerecavavare ema apana mamusura. Máichapa: “Tata náquenu, júcahi eta piplatane. Vahi nucajurucahini. Núnacaichucha, nítipuichahi te pañuelo.

<sup>21</sup> Taicha nupicahi nácaetehahini, machu pícuñacanu. Pétáviuchahi píti eta pivainarajiva, taicha píti pivehahi eta nématanevachayaréni”.

<sup>22</sup> Tacahe, ema rey máichapa ema machanera: “Eta juca péchajiruvah, éta tímicaecherachavihi eta pépiyahiraivah. Piplujuvah eti táchavihi.

<sup>23</sup> Te pímatinuhipuca eta nuvainarajivah, eta nuvehairaya eta pématanevacha, étapa eta nícuñasiraviyare te picamitiacapuca, váhiyapa pinacapaini te banco eta nuplatane. Étainahini tajurusihahini apaesainahini nímaequenéhahini puiti”.

<sup>24</sup> Tásicha, máichavacapa ena apamuriana: “Everejica ema maca eta nuplatane. Íjaraca ema ticajurucahi eta diéspequene”.

<sup>25</sup> Éna nacahevarepa: “Tata viáquenu, tímecevaipahinéni diéspepahi eta tajurusirahi”.

<sup>26</sup> Ema rey majicapavarepa: “Tiuri numetacaheya: Nácani ticajurucanahi camuri, nujanechinayare eta apana. Nácanisera tájinaquenehi nacajururénahini, nuverejicayare eta náijaracasinihi.

<sup>27</sup> Énasera ena tictorianacanuanahi éna vahi najacapanuhini eta nurreyvah, iáminanuyare ani te numirahu. Ecapapajicavaca éna”.

<sup>28</sup> Tacahe, te tamutupa eta juca máimituresirahi, ema Jesús tímiyanavavarepa tipaica. Macaijuhepa eta te Jerusalén. Tínapucapa ena máimitureana.

*Títecapapa ema Jesús eta te Jerusalén  
(Mt 21.1-11; Mr 11.1-11; Jn 12.12-19)*

<sup>29</sup> Te apanapa semana, tiyananavarepa. Te tiánehipa eta avasarechichana Bettfagé étapa eta Betania, tacanarai-pahivare eta masihi ticajare Olivoquiji, tícheceanumanapa. Mavanecapa ema Jesús ena apinana máimitureana.

<sup>30</sup> Máichavacapa:

—Eyanayare eta te jena avasarechicha Betfagé. Te íteca-payarepa, ímahayare eta burrico ticaitihahi. Eta jena sárare mávuéquehchéhaha, nájinaichaha ticaperainahí. Evejapuacayare, iáminanuyare eta ani.

<sup>31</sup> Te natarihinapuca náeñama, emetacayare eta nucamunuirahi nútí —máichapa.

<sup>32</sup> Tacache, tiyananapa ena vanairucanahí. Jéhesaréinehi étapaichuhí eta mametarapihi éma.

<sup>33</sup> Te navejapuacaripa eta burrico, ena ticayeheana nayase-recapa:

—¿Táviha iámihayare eta viyehe burrico?

<sup>34</sup> Éna najicapapa:

—Ema maena Viáquenu macamunuhi —nacahepa.

<sup>35</sup> Tacache, násapapa eta námiraya eta burrico. Te náitecapauchapa ema Jesús, náepacamaequechapa eta náepacuhana. Tásiha, ticaperapa ema Jesús.

<sup>36</sup> Te náimahapa ena achaneana tiúchujicapaipahi ema Jesús, náimativanepa. Tiyananapa nácapahi éma. Tépacapairicana-paipa te mamirahu eta náepacuhana te mayanihayarepahi.

<sup>37</sup> Eta napaisirahi, témiricanapaipa te tachausi eta cerro ticaijare Olivoquiji. Namutu ena máimitureana téhicanahí ema Jesús tipiaracanapaipa eta náurisamurevahí taicha eta náimahaqueneanahí tiáramicareana máichaqueneanahí éma. Ichape eta nacunachirahi ema Viya.

<sup>38</sup> Ánipa nacahehi eta napiarasirapahi:

—Yare, Tata, ¡Piti réyquene, vanairucaquenévihi me Viya! ¡Asulupayal! ¡Puiti, te anuma vicuticacahi eta viúrisamurevahí víti te eta juca apaquehe! Tétávicava eta vicunachira ema Viya eta macatajisirahavihi —nacahepa.

<sup>39</sup> Tacache, eta nasamirapahi ena fariséoana natarihiqueneanahí eta napiarasirapahi ena achaneana, náechajicapa ema Jesús:

—Tata maestro, picamatinacavacaichu ena nani pímitureana —náichapa.

<sup>40</sup> Ema Jesús majicapavacapa:

—Tiuri, numetacache puiti. Te namatinapuca ena nani, táitsivasera étainapa tipiaracaya eta máriana —macahepa.

<sup>41</sup> Tacache, títecapanapa te tápusi eta cerro Olivoquiji. Ticaecherapa eta Jerusalén. Eta máimairahi ema Jesús eta avasare, týahapa táicha.

<sup>42</sup> Macahepa eta máiyairahi:

—Páurevisami piti návasasami Jerusalén. Te nácaicutiaraini apaesachichainaini ena pichichanaveanahí eta nuvarairahi nucuchucuhavaca nútí. Puiti juca sache nutiarihiraripa ani piyehe, náurihainehi nácamapuravahini eta náuricacarevahini.

<sup>43</sup> Taicha járajapayare eta sácheyare táetaviuchavaya eta nacatajivairaya ena pichichanaveana náicha ena piánaranaya tichayacavianayare. Téhavianainapa, tájinapa piviyavaimahi picatiuchiavaimahi.

<sup>44</sup> Témestapaicavianainapa te apaquehe. Nacapapajicavacainapa ena pichichanaveana. Tájina nacaemachaquenémahi eta peti. Tamutuyare náquipapaica. Eta piviurevaya, eta juca pimajacapiranuhi eta néjirairavihi nuti mavanerunuhi ema Viya —macahepa.

*Ema Jesús macuchuchujicavaca ena tíjararecanahi eta sárareana, cágureana te tajuhe eta Templo*

(Mt 21.12-17; Mr 11.15-19; Jn 2.13-22)

<sup>45-46</sup> Tacache, te apanapa sache, tiyanapa ema Jesús. Tisia-pahi te Templo. Máimaharinehi ena achaneana tíjararecanahi eta sárareana, cágureana. Tásicha, tisemapa. Eta macuchuchujisiravacahi, máichavacapa:

—Ema Tata Nuaiyaquene, ani macahehi eta máechajiri-ruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étisera eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichavacapa.

<sup>47</sup> Eta manasiquenerahi ema Jesús, tamutuhi sácheana tímitureca tayehe eta Templo. Énasera ena tuparairucana énapa ena escribánoana, napanerechaipahi eta navarairahi nacapaca ema Jesús.

<sup>48</sup> Váhisera napatsicavahini taicha natarihi ena camuri-queneana achaneana tisamararacanahi eta máimiturapiana éma. Váhivare náisapaimahi náichahini ena ticatianacanahi.

## 20

*Nayasereca ema Jesús te vanairucahipuca me Viya*

(Mt 21.23-27; Mr 11.27-33)

<sup>1</sup> Étana sache tímiturecaicha ema Jesús tayehe eta Templo eta máechajiri-ruva ema Viya. Títecaparacanapa ena tuparairucana, énapa ena aquenucarahana, énapa ena escribánoana.

<sup>2</sup> Nayaserecapa ema Jesús:

—Píti, vahi vitupararuvinahini víti eta píchirahi eta júcana. ¿Nájahasica tivanecavihi? ¿Nájaha tituparacavihi picha eta juca píchaqueneana? —náichapa.

<sup>3</sup> Ema Jesús majicapavacapa:

—Núti apanavare nuvaraha nuyaserecahe. Ejicapanuya-resera.

<sup>4</sup> ¿Nájahapuca tivanecahi ema Juan eta máitesirahi eta máicachasirisirahi? ¿Émapuca ema Viya tivanecahi, émajivahipuca eta máitesirahi? —máichavacapa.

<sup>5</sup> Váhisera náituruquenehahini eta najicapiroayarehi. Tiácapaemajiricacanapa. Ánipa nacahe eta náechajiruvanahí:

—¿Tájahasica vicayemayare eta vijicapiroayare ema maca? Te vémunahacava vicha: “Mavaneruhi ema Viya”, éma macahénapapuca: “Tásicha, ¿váhiyapa esuapahini éma?”

<sup>6</sup> Téhesera vácahepuca: “Émajivaichucha eta máitesirahi”, ticauyayacareipa nacapacahavi ena achaneana te márijahiana, taicha náechahi éna émairahi ema Viya tivanecahi ema Juan —náechajiricacapa.

<sup>7</sup> Tacalhe, ánipa nacahehi eta najicapiroayare ema Jesús:

—Vahi vecha víti —nacahepa.

<sup>8</sup> Ema Jesús máichavarepa:

—Énerichuvare núti, vahi numetacahémahi nájahapuca ema tituparacanuhí —máichapa.

*Ema Jesús máimicutichina ena párteráioana máurirahana*

*(Mt 21.33-44; Mr 12.1-11)*

<sup>9</sup> Tacalhe, ema Jesús tépanavavarepa máimitucavaca ena achaneana. Ánipa tacalhehi eta máimiturapiana:

—Nuvaraha nímicutichinaheya, tatarihi eta isaniti amairiha úvaquiji, masucurehi ema émana achane. Tiyanayaresera ema ticayehe, tipairiricayarehi te apana avasare. Tacalhe, matuparacavacapa ena tírehanayarehi te áñoana eta mayehe uva. Partidoyarepa eta majunijisirayarehi.

<sup>10</sup> Tacalhe, te títecicapapa eta caje tayairahi eta uva, máimivane-recapa ema mamusura mayaseapanavacayarehi ena párteráioanahí eta tatucachaqueneyarehi éma. Énasera ena párteráioanahí, tájina náijaracahini. Tisemauchavanarichucha, náehapa ema vanairucainihi.

<sup>11</sup> Tásicha, ema ticayehe máevatacavarepa ema apanavare mamusura, mayaseapanavacayarehi éna. Énerichuvaresera náumehavarepa ema vanairucainihi, náehavarepa. Tájina náijaracahini.

<sup>12</sup> Tásicha, ema ticayehe vahi macainajiruvahini. Máevatacavarepa ema apanavare mamusura. Énerichuvare náehavarepa ema vanairucainihi. Najarachapa, náquijicapa.

<sup>13</sup> Tacalhe, ema ticayehe tipanererecaripa: “¿Tájahasica nícharacavayare?” macahepa. “Nuvanecapuca mayana émajacaruvaina ema nuchicha némunaruquenéhi. Tatarihi te émainapapuca napicaucha te náimahapa”.

<sup>14</sup> Tacahe, te náimahapa ema machicha, navetijichucha eta nasemirahi. Tímitujiricacanaripa. Ánipa nacahe: “Émainapuca ticayeheyare ema maca. Yare, vicapaca, apaesa tánasipa tamutu vítinapa vicayeho”.

<sup>15</sup> Tacahe, nacaratacapa éma, nacuchucapa eta tayehe eta isaniti, nacapacapa.

Puiti nuyaserecaheyare: ¿Tájahapuca máicharacavayare ema achane ticayehe eta úvaquiji? Jéhesare, vaipa macayeholini paciencia.

<sup>16</sup> Títecavanénapa macapapanavacayarepa ena pártilrárioanahi máurirahanahi. Tásicha, máijaracainavarepa eta úvaquiji ena apamuriana pártilrárioanayareva — macahepa ema Jesús.

Tacahe, ena tisamararacanahi, ánipa nacahehi:

—Viti vicatajicacare, vahi vácutihini ena nani máurirahana — nacahepa.

<sup>17</sup> Ema Jesús máesenimurihavacapa. Tásicha, máichavacapa:

—Jéhepuca, németeacasera vuíchaha ácaicutiarahini eta tacayemaquenehi eta Sagrada Escritura. Éta, áni tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapapa eta táicuchihi eta tatuparahahi. Tacapicahuquenehi puiti” tacahehi eta Sagrada Escritura.

<sup>18</sup> Puiti, núti nucutihi eta ichape mari náepuruquenehi. Eti epurunuuanahi, iáquipaicavayare évetutujicayare. Tichimara-caheyare eta muraca ecuñaraqui taicha eta emavarahairahi éhicanu —máichavacapa.

<sup>19</sup> Ena tuparairucana navarahapa náijahúchayarehini nacarataca ema Jesús, taicha tímaticavananapa éna eta énairahi tayunacavaca eta máechajiruvana ema Jesús. Váhisera napatsicavahini taicha návamirahuhi ena camuriqueneana achaneana.

*Navarahahi náemejecapavacha ema Jesús tayehe eta impuesto (Mt 21.45-46; 22.15-22; Mr 12.12-17)*

<sup>20</sup> Tacahe, náimivanerecapa ena apamuriana ajairana tépiyacavanayarepahi tiúriana te mamirahu, navarairahi natanucayare eta tímicaviuchayarehi. Énayarepa timetauchanavarehi mayehe ema aquenucahi prefecto Poncio Pilato.

<sup>21</sup> Tacahe, nayaserecapa éma, ánipa nacahe:

—Tata maestro, vímatihi eta tatupiruvairahi tiuri eta juca pímiturapianahi. Nájinavare pinerejiruinhini ena achaneana, taicha pivarrahahi náehicahini namutu eta táurinaquene achene ticaijuhe me Viya.

<sup>22</sup> Vivarahahisera viyaserecaviyare: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

<sup>23</sup> Ema Jesús máimatiacavacapa eta tamaurivapahi eta napanereruana. Tacahe, máichavacapa:

—¿Tájaha tacayema evaraha ímiquipaicanu?

<sup>24</sup> Nímahaseji, iáminanu étapena eta reale.

Éna náijaracapa. Tásiba, ema máichavacapa:

—¿Nájaha ticajare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador.

<sup>25</sup> Tacahe, éma máichavacapa:

—Tiuri. Táuricahi íjaraca ema Presidente Emperador eta juca mayeherichuhi éma. Tásiba, íjaracavare ema Viya eta mayeherichuhivare éma —máichavacapa.

<sup>26</sup> Váhquenesera náratahahini náimiaquipaicanihini eta nayaseresirahi te namirahu ena achaneana. Táitsivahi ichape eta náramirahi eta táurivahi eta majicapiravacahi. Timatinanapa tésamiricavanapa.

*Nayasereca ema Jesús náicharacavayarepuca ena náepenaqueneana eta náechepusirayare*

(Mt 22.23-33; Mr 12.18-27)

<sup>27</sup> Nacahepaipavare ena apamuriana achaneana. Saducéoana. Ena nani saducéoana, apana eta náimiturapiana; váhi nasuapa eta náechepusirayare ena náepenaqueneana. Éna natanucahi eta tátseraruvayahi. Tacahe, nayaserecapa ema Jesús:

<sup>28</sup> —Tata maestro, ema víyarahaini Moisés manaquicahi eta ajureca máechajiriruvahi eta viyehe: “Te máepenaequenehahipuca ema achane esu mayena, tásiba, nájinahipuca manaquequeneruvainahini machichainahini; te matiarihihipuca mácani maparapehi, mavehayare esu machinenaequene, apaesa émainapuca macachicha eta suyehe, máitsivainahi ema maparapeni”.

<sup>29</sup> Tacutiquene te natarihipuca ena siétequeneana ticaparapejiricacana, te títauchavapa ema náechavimuri, máepenaequenahapasera esu mayena. Nájinahi machichainahini.

<sup>30</sup> Tacahe, ema maparape máitauchavare esu machinenaequenehahipuca ema náepenaequenehavare, nájinavare machichainahini.

<sup>31</sup> Ema émana maparape máitauchavare ésu. Énerichuvare máepenaequenehavare. Namutu ena siétequeneana navehahi

ésu, tásihasera náepenaequenehapahi, nájina émanainahini mágachichahini eta suyehe.

<sup>32</sup> Te táequenepa, tépenapa esu esenaini.

<sup>33</sup> Tacahe puiti, te jéhesarepuca tichavanayare titarecana te táequenénapa eta náepenirahi ena nani, ¿nájahapuca ena siétequeneana éma yátupiquenehi suímaquenehi esu esena? Taicha ena siétequeneana namutuhi suímanarihi —náichapa.

<sup>34</sup> Tacahe, ema Jesús majicapavacapa:

—Ena ajairana te juca apaquehe natuparacasivaichuhi titauchavanayare suyehe esu esena.

<sup>35</sup> Ánaquisera te apana náitaresira, nácani ticatuparahanayare eta nasiapirayare te anuma te náechepucapa, vaipa nácamunuimahi esu esena. Énaripa ena esenana, vaipa nácamunuimahi ema ajaira.

<sup>36</sup> Taicha vaipa tiápechavaimahi tépenana. Nacutinapa ena ángeleana eta namaepenacacairahi. Yátupinapa machichanaveanainapa ema Viya, taicha éma ticaechepecavacahi.

<sup>37</sup> Émaripa ema víyarahaini Moisés timetacahavi eta májurehi eta yátupirahi eta vahi tánasi tépena eta náchanevana ena náepenaequeneana. Te máimahapa ema Moisés eta yucuqui timurujiji, eta macametacasiyahí mayehe ema Viya eta émarichuhi ema macasiñaquenehi ema Abraham, ema Isaac, émapa ema Jacobo.

<sup>38</sup> Taicha ema Viya, ema téchahi eta náitaresirana ena téhicanahi, tayanapane tépenanaripa. Namutu ena, tímiyanavarichucha titareca eta náchanevana te mamirahu éma —macahepa ema Jesús.

<sup>39</sup> Tacahe, ena escribánoana, ena natarihiqueneanahi náichapa ema Jesús:

—Tétupicava eta juca péchajiriruva, tata maestro —macahepa.

<sup>40</sup> Váipasera nacaemuñavahini nápechavahini nayasereca.

*Ema Cristo, yátupiquenehi Viya. Mámariéquenenihisera ema rey David*

(Mt 22.41-46; Mr 12.35-37)

<sup>41</sup> Ema Jesús máichavacavarepa:

—Éti ecahehi eta échajiriruvahi: “Tiúchucayare ema Cristo, mámariequeneyare ema víyarahaini rey David” ecahehi.

<sup>42</sup> Yátupihi ema Cristo achanequenehi eta máimahi taicha mámariequenenihí ema víyarahaini David. Nuvarahasera epanerechaya eta juca máechajiriruvahi ema David te májurehi Salmo, ani macahehi:

<sup>43</sup> “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaeupuyusiraya te pimirahu ena tictorianacavianahi” macahepa.

<sup>44</sup> Ema David, eta máimijarechirahi ema Cristo: “Tata Náquenu”, ¿tájahapuca eta macayemaquenehi? Nutupiruva numetacahe: ema Cristo yátupiquenehi Viya éma. ¿Tájaha íchahi éti? —máichavacapa.

*Ema Jesús máimereuchavaca eta náejecapiravana ena escribánoana*  
*(Mt 23.1-36; Mr 12.38-40; Lc 11.37-54)*

<sup>45</sup> Namutu ena achaneana nasamararacahi ema Jesús eta máechajisiravacahi ena máimitureana.

<sup>46</sup> Ánipa macahehi eta nayehe:

—Échapavayare éti, machu éhica eta nayeherepiana ena escribánoana. Navarahavare ticapicahuanayarehi eta náechajisiraya ena achaneana te jácani nácapajisihapahi éna. Tacutiquene tinerejiurucavana eta táurinaqueneana téjasihacareana te tiyanana te viúrujisirarevana. Étaripa te nanisirana, ticaejacavanavare te jácani távihahi eta tiúrinisipana tinicacare.

<sup>47</sup> Tacutiquene naverejicavare eta nacayehequeneana ena tépenaimana, nájina najapanuquenéna. Tásicha, tépiyacavanapa religíosoanahi, tiúpiemana eta nayujarasira, namavarairahi tácaecherahini eta náichira eta tamauriqueneana. Énasera tiápajucavanahí etá nacaicuñairaya muraca.

## 21

*Eta sunaquiruva esu máimaru tacachuricahi eta nanaquiruvana ena rícoana*  
*(Mr 12.41-44)*

<sup>1</sup> Ema Jesús máimararacahi ena rícoana eta nanaquisirava eta plata tayehé eta chapama nanaquisirareva eta námavahuana mayehe ema Viya.

<sup>2</sup> Énerichuvare máimahavare tinaquicava esu ésuna esena suépenaimaquene. Páurequenehi ésu. Sunaquitahisera eta apipechichahí eta suplatane.

<sup>3</sup> Tacahe, ema Jesús macahepa:

—Ímaha esu suca esena páurechicha. Ácuneucha eta suémunasirahí ema Viya. Jéhesare ésu, tímepanávahi eta sunaquiruva, sucachuricavacahi namutu ena apamuriana achaneana.

<sup>4</sup> Taicha namutu éna tacarichu nanaquicahi eta náemacharajiana naplataneana. Ésusera esu suca páurehinéni, sunaquitahisera tamutu eta sucayehequenehi. Suítahi eta sunicavachayarehini —macahepa.

*Ema Jesús máimereucharipa eta táquipaisiravaya eta Templo*  
*(Mt 24.1-2; Mr 13.1-2)*

<sup>5</sup> Natiarihihi ena téchajisihanahi eta Templo. Náechajisihahivare eta táurinaqueneana tayereruvana nanaquiruanahi ena achaneana, étapa eta táurinavavacahi eta máriana tayeheanahi. Ichapemurihi eta taejeravahi te nacaematanénapa. Tacahe, ema Jesús máichavacapa:

<sup>6</sup> —Járajapayare eta sáchevayare ticaquipaicasinapa tamutu eta juca Témplosami. Téjanerepaicainapa tamutu eta juca táurinaqueneanahi ímahaqueneana puiti —macahepa.

*Tatiarihiyare eta ecutiarareanaya te tanehipaicha eta táchecuiraya*

(Mt 24.3-8; Mr 13.3-8)

<sup>7</sup> Tacahe, nayaserecapa ema Jesús. Náichapa:

—Tata Maestro, ¿tájamuhuyarehipuca eta náimiaquipaisirayare eta Témplosami? ¿Jararihiyarepuca eta ecutiarareyare eta apava péchajisihaqueaneana? —náichapa.

<sup>8</sup> Ema Jesús máichavacapa:

—Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanaya-repahi nuyehe. “Nútipa Cristo” nacahénapa. Ena apamuriana nacahénapa: “Táitecapaquetepa puiti eti sache”. Váhisera ecusuapavaca, váhivare ecuehicavaca.

<sup>9</sup> Étaripa te esamairiricapuca eta guerra, revoluciónpuca, váhivare ecuarameca. Taicha eta tainapuaraquianayarehi eta júcana ecutiarareanayare, vuíchahasera étaimahi eta táchecuiraya.

<sup>10</sup> Ánívare macahe:

—Téhacacayareva eta ichapequeneana avasareana. Ticanarajiricacanainapa eta apamuriana.

<sup>11</sup> Tatiarihiyareva eta ichapeyare tayamurisirana eta apaquehe. Te avasareana tatiarihiyare eta ecuhamuhuyareva, jumaremuhuyareva. Te anuma tímerecavainavarepa eta ichape ecutiarareya, tiámayare eta ecuñaraquiyare.

*Ena achaneana napanajiricainapa ena téhicanahi ema Viáquenu*

(Mt 24.9-28; Mr 13.9-23)

<sup>12</sup> Tativanumayaresera tipanajiricaheanayare éti, táchavenénahi eta éhisiranuhi nuti. Ticaratacaheanayare, tiámaheanayare te náurujisirarevana, ecayaserehinapa nayehe ena juéseana. Ecaevatainapa te cárcel. Tásiba, etiarihiyare eti tiámaheanaya te namirahu ena aquenucana, téhevare te namirahu ena Presidenteana gobiernoanahi, ecaviurevayare táchavenehi eta éhisiranuhi.

13-14 Étumechavasera. Te námahepa te ecayaserehiyaya, ecamapuravainapa échajisianuyare. Váhi ecueñamava eta ecayemayare ecatiuchiravaya.

15 Nímahahéinepa núti, níjaracaheyare eta ítusirayare ecatiuchava. Nájina ácutimahi eta ítupajijiasiravaya. Ichape ecachuriacayare ena iánaranaya.

16 Etiarihiyare éti énajacaruvainapa ena ticachichaheana tíjararecaheanaya énaripa nácani eparapeanapuca, énajacaruvayareva tíjararecaheana, énayarepaichupuca ena ejaneanana, ítunacasareana. Enerejicavainapa eti nacaparuuanaya.

17 Namutu ena acha neana ticatianacaheanayare táichavenénahi eta éhisiranuhi.

18 Tayanapanesera nacapacahepuca, nímahahéinepasera núti. Vahi émitiequenémahi. Étaripa eta echutimacana, tájinavare témitiequenémahi.

19 Téhesera ecamichahi tamutu, ímiyanavahi eta éhisiranuhi, núti níjaracaheyare eta ítaresiraya.

20 Te ímahapa ena suntruana nachayacapa eta Jerusalén, étanaqueneyarehi ejercito eta náichapemurivaya, étainapa ícutiaraya eta táitavirayare eta avasare.

21 Tásiba, te ímahapa eta juca, táuricapa etátájinapa ejuna, eti etiarihiqueneanahi te Judea. Ecaijuheyare eta te céroana, étaina eyumurusiavaya. Nácani tiávihanahi te tajuhe eta avasare Jerusalén, tavarahaipahi náuchucavane tayehe. Nácani tiávihanahi te vámahiana, vaipa távarahahini nachavahini tayehe eta avasare.

22 Taicha táitecapauchainapa eta tasacherayarehi eta tacaicuñairaya, títauchavainapa eta tametarapi eta Sagrada Escritura.

23 ¡Páureanasami nácani esenana tachimaruaruanayare, nácani ticajarianahipuca, nácani esenana ticachichanahi eta amuya tiájicachaha! Támailrijicainapa eta nacatajivairayare namutu ena achaneana tiávihanahi te Jerusalén taicha eta náicuñayare.

24 Natarihi ena tépenanaya te guerra, ena apamuriana nacaratatajicainapa prisioneroanainapa. Námacacainapa te apanaqueneana avasareana. Ema Viya másapainapa tisiapan te Jerusalén ena apavasaqueneana. Énapa téchanayare eta Jerusalén. Tiámainucava te máicutichapa ema Viya, macuchucavacainavarepa.

*Eta máitesiraya ema Manerejiruhi ema Viya  
(Mt 24.29-35, 42-44; Mr 13.24-37)*

25 Tacache, tímerecavanainapa eta ecutiarareyare te sache, te caje, étapa te jarairiquiana. Tipicanainapa ena achaneana

te juca apaquehe. Tiáramecanainavarepa taicha eta nasamirayare eta muracaquene táepacuruha eta ichapequene une.

<sup>26</sup> Ena achaneana tiáquipaicavananainapa eta napisiraya, taicha eta náimairayare eta ecutiarareanayare, váhisera náimatierequenehaimahi tájahapuca eta náichararacavayarehi. Énerichuvare tiyejecavavacainapa eta tiávihanahi te anuquehe anuma.

<sup>27</sup> Nupaenumava nítecainapa nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Níñehinapaipa eta táetaviuchi-rayare eta nujaraivayarepahi.

<sup>28</sup> Te ímahapa tanacuchavapa eta juca ecutiarareanayare, evapinavainapa éti taicha tiánehiripa eta nítecapiraya nucatiuchiráheyare.

<sup>29</sup> Máimicutirachinavare eta máimituresirahi. Ánipa mache:

—Ecauneyare eta jácani yucuqui.

<sup>30</sup> Te ímahapa títsivachavavacapa eta tapacajiana, tiánehiripa eta únemuhuyareipa.

<sup>31</sup> Ene tacahehi, te ímahayarepa, ímatiacainapa eta tanehiraripa eta nítesirayare.

<sup>32</sup> Numetacahevanecha: Vuíchaha titavanaimahi ena achaneana náitareruanaichaha te táitecapapa eta juca ecutiarareanaya.

<sup>33</sup> Títavayarepa eta anuma étapa eta apaquehe. Tativayareresa títauchava tamutu eta numetaruhehi.

<sup>34</sup> Échapavaicha, machu tachimaracahe eta jena sache, vahi ecucuti ena tavayuaruana eta téracare, machu muracachutihéna táicha. Vahi ecueñamava eta ítaresira, machu tahapapicahe eta éhisiranuhi.

<sup>35</sup> Eta táitecapauchirayare eta sache nuchavirayare tímicutijircavahi eta táijahúchirava eta táeratasirava eta trampa. Ene nacaheyare ena achaneana te tamutu avasareana eta namanecapauchiravaya.

<sup>36</sup> Eta tacahe, etsecavaicha yátupina. Eyujarauchavahi tamutu sácheana, apaesa túmehénapa eta ecamichiraina tamutu eta juca táichararacavayare, apaesa tacuija ecuichiravaina eta ítecapauchiranuya te numirahu nuti Manerejirunuhi ema Viya —macahépa ema Jesús.

<sup>37</sup> Tiuri, tamutu sácheana tiyana eta te Templo ema Jesús. Tímiturecahi. Te yátivare tiyanavare te avasarechicha Betania te taequenehi eta cerro Olivoquiji.

<sup>38</sup> Ena achaneana, tamutu yáticarahiana, tiyanana te Templo, titsecavanaripa eta nasamararasirayare éma.

## 22

*Napanerechapa eta nacaratasiraya ema Jesús  
(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Tamirahupaipaicha eta piesta ticaijare Pascua, eta náepanavaira eta semana eta nanisirahi étachucha pan mayehere levadura.

<sup>2</sup> Tacahe, ena tuparairucana énapa ena escribánoana, navarahaichaha náimicapaca ema Jesús. Tásiba, natanucahi eta náicharacayare eta nacaratasirayare. Návamirahuhisera ena achaneana.

<sup>3</sup> Tacahe, ema Satanás mávahácapa ema émana máimiture ticaijare Júlasi. Émarichuhi nachamurihi ena dócequeneana apóstoleana.

<sup>4</sup> Tacahe, ema maca Júlasi tiyanapa matanupanavacahi ena tuparairucana, énapa ena nacápitárana ena suntaruana tayehe eta Templo. Téchajiripanavayarehi nayehe, mametacavacaipa eta táicharacavayarehi eta máijararesirayarehi ema Jesús eta nayehe.

<sup>5</sup> Tiúrisamureanarinehi eta mametasiravacahi éma. Nametacapa eta náijarasirayarehi eta plata.

<sup>6</sup> Tacahe, éma majacapavacapa eta naplatane. Tásiba, máichavacapa:

—Tiuri, núti népanaheyare te nímahapa nacuijapa ena achaneana te machacaya. Námahénapa tayehe eta mávhahi éma —máichavacapa.

*Ema Jesús mavanecahi ena apinana máimitureana, natsecayare eta naniruyare tayehe eta Pascua*

*(Mt 26.17-25; Mr 14.12-21; Jn 13.21-30)*

<sup>7</sup> Títecapapa eta sache táepaniravahi eta semana tapiestara eta nanisiraya eta pan mayehere levadura. Étarichuvare eta jena sache ticaijare Pascua, nacapasiraya eta uvesa ticaijare cordero pascual, nanisirayare te jena yati.

<sup>8</sup> Ema Jesús mavanecavacapa ena apinana máimitureana, ema Pedro émapa ema Juan. Máichavacapa:

—Eyanayare étupiripanaya eta viniruyare tayehe eta Pascua.

<sup>9</sup> Éna nayaserecapa:

—¿Táviha pivaraha vétupirisihaya?

<sup>10</sup> Ema Jesús majicapavarepa:

—Eyanayare tayehe eta avasare. Te ítecapayarepa tayehe, iácapajicayare ema émana achane tiámapahi eta une te yupi. Éhicayare éma te peti masiapihayare. Éti apana esiapayareva.

<sup>11</sup> Emetacayare ema ticayehe eta peti. Ani íchayare: “Ema viyehe Maestro tivanecahavihi viyaserepanavi pímechahavi

eta cuarto vinisihayare eta uvesachicha eta viyeherepi, vicachaneyare éma” íchayare.

<sup>12</sup> Éma, tímechahénapa eta ichape cuarto te anuquehe piso. Táuriquenéipahi eta jácara téjasihacareana. Tásicha, étupiricapa eta viniruyare –máichavacapa ema Jesús.

<sup>13</sup> Tiyananapa ena vanairucanahi. Jéhesaréinehi, náimahapa étapaichuhi eta macayemaqueneanahi ema Jesús. Tacache, náetupiricapa eta naniruyare tayeheyarehi eta Pascua.

*Ema Jesús máenimurihapa ena máimitureana*

*(Mt 26.26-29; Mr 14.22-25; 1 Co 11.23-26)*

<sup>14</sup> Tacache, te hórapa eta nanisirayarehi, téjacanapa te mesa ema Jesús énapa ena apóstoleana.

<sup>15</sup> Eta máenisiravacapa, máichavacahi éna:

—Ichapemuri eta nuvarairahi nucachanehe eta nunisirayarehi eta juca téqueneha nénisirahehi puiti eta juca yati páscuairahi, mapurare vuíchaha táitecapahini eta népenirayare.

<sup>16</sup> Tásicha, numetacahevanya puiti, vaipa nápechavaimahi nunica eta Pascua, tiámainucava te táitauchavapa eta nusípiraya eta nucavacureraya, nucajupahairaya ema Tata —macahepa.

<sup>17</sup> Tacache, mavehapa eta vasu náerirare, mahasulupayachapa ema Viya. Tásicha, macahepa:

—Era eta juca. Ecajijiricaca.

<sup>18</sup> Puiti numetacahevane: Vaipa nápechavaimahi nera eta juca tachi eta uva, tiámainucava te táitauchavapa eta nusípiraya eta nucavacureraya, nucajupahairaya ema Tata —macahepa.

<sup>19</sup> Tacache, mavehavarepa eta pan, mahasulupayachavarepa ema Viya. Mayuvetuhecápa, máijaracavacapa ena máimitureana. Tásicha, máichavacapa:

—Eta juca neche. Enica. Étivenehi níjararecavahi eta népenirayare. Eta juca apajarahiyare te apaquehe, te étipava énicaca, éta témechaheyare nuyehe —máichavacapa.

<sup>20</sup> Énerichuvare, te titanesianapa, mavehavarepa eta náerirare vasu. Máichavacapa:

—Eta juca vino, táicutiarahi eta nítine táepusairuvaya íchavene éti, nufirmachirayare eta arairu matratune ema Vicaiyaquene, nucaejasirayareva eta matratune apaesa ejacapacareya mayehe.

<sup>21</sup> Puítisera, ani te etaracu, mararihi ema tíjararecanuyare.

<sup>22</sup> Yátupiquenéhi eta nacapasiranuyarehi, taicha tacachehi eta mapanereruhi ema Tata eta nuyehe nuti Manerejirunuhi éma. Páuresamisera ema tíjararecanuya —macahepa.

<sup>23</sup> Tacahe, ena máimitureana tiyaserejircacanapa:  
—¿Nájahapuca mácani te vitaracu ema tíjararecaya ema Viáquenu? —nacahepa.

*Ema Jesús máimitucavaca eta nacapicahuirayare ena téchapajiricanahi ena nachamuriana*

<sup>24</sup> Te taequenepa, tiácapaemajiricanapa ena máimitureana tayehe eta nájahayarepuca ema ichapequenepanaya aque-nuca te nataracu te náejasiraya te návacureanayare.

<sup>25</sup> Te máechapa ema Jesús, ánipa máichavaca:

—Ena réyeana énapa ena aquenucana te ichapequeneana avasareana nacaetemajiricavacahi ena achaneana, navarairahi ticapicahuanayarehi.

<sup>26</sup> Étisera vahi táuricaimahi ene ácahehini. Téhesera evarahipuca ecapicahu, vahi ecasiñavaimahi. Ecutiyare ema amaperu eta mamansuvahi. Tacutiquene nácani tivane-canahi, tatuparacavacahi téñamavanayare eta náechapajirisi-ravacayare ena nachamuriana.

<sup>27</sup> Eta nayeherepi ena achaneana, ichape eta napicau-chirahi ema ténicahi eta tinicacare. Énasera ena vanairucana téchapajiricanahi eta mesa, vahi nacapicahuhini. Puítisera, nímitucaheyare eta juca arairu nuvanairipi. Puiti ímahanuipa eta nítatirahehi. Nuvaraha ecutinuya. Ítaticacayare éti.

<sup>28</sup> Éti, ímararacanuhi eta náichiranuhi ena tictorianacanuanahi. Váhisera ejunijicanuhini.

<sup>29</sup> Eta tacahe, níjaracaheyare núti eta etuparahanayare ecutinuyare núti eta nucatuparahairaya mayehe ema Tata.

<sup>30</sup> Ejacainapa tayehe eta ecatuparahairaya. Étinapa evanerrecaya nayehe ena dócemuriqueneana ena vijaneanana israelitana. Eeachanenuinavarepa te mesa eta enisiraya ánaqui te nucatuparahairayare —máichapa.

*Ema Jesús máimereucha ema Pedro eta máepiyasiraya vahi máimati ema Jesús*

(Mt 26.31-35; Mr 14.27-31; Jn 13.36-38)

<sup>31</sup> Ema Viáquenu máichapa ema Pedro:

—Nuchicha Simón, péchapavayare. Ema Satanás, ichape eta mavarairahi ticaicutiarahayare tiáquipaicaheyare emutu éti.

<sup>32</sup> Nútisera nuyaseuchahéhi me Tata, pítiripa, apaesa vahi tacuemitiaca eta péhisiranuhi. Piáquipaicavasamiyaresera. Tichavayaresera eta picasiñairanuya, tásiha péturechavacainavarepa ena apamuriana pichamuriana —máichapa.

<sup>33</sup> Ema Pedro majicapapa, máichapa:

—Tata Náquenu, tájina vahi nujunijicavímahi. Níjaracava néhicavi tayehe eta cárcel. Te nacapacavipuca, núti apanavare níjaracavavare nacapacanu apaesa nácachanevi —macahepa.

**34 Ema Jesús majicapapa:**

—Numetacavivaneya, Pedro. Puiti jena yati, te tamirahuinarichaha eta táechajisiraya eta varayu, piti mapahayare pépiyacavayare vahi pímatinu, eta picatiuchiravayare pítijiva —máichapa.

*Puiti etserereacavainapa*

**35 Tacahe, ema Jesús mayaserecavacavarepa ena máimitureana. Máichavacapa:**

—Te nuvanecahénapa epaica, nutuparacahehi vahi ecuama eta tarera, eta billetera, eta eparuvevana, ¿yátupihi, masi, vahi ecamunuuvapahini?

**Ena najicapapa:**

—Tájina vácamunuipahini.

**36 Tásicha, máichavacavarepa:**

—Puítisera mácani ticatarerahi, tiúripanahi mámayare eta matarera, étapa eta mayehe billetera. Émaripa mácani tájinahi mayehénahi espada, tiúripanahi máijarareca eta masacu, mavacharesihaya eta mayeheyare espada.

**37 Tacahe numetacahévanécha.** Ena achaneana nacatianacahaviya muraca. Títauchavainapa eta táechajiriruvanahí eta Sagrada Escritura eta níchararacavayarehi: “Timicutijiricavahi námerahihini náicha”. Tamutu títauchavayarehi eta tacayemaqueneanahí eta Sagrada Escritura eta nuyehe —macahepa.

**38 Tacahe, ena máimitureana náichapa:**

—Tata Viáquenu, jucarihi apinahi eta espada.

**Éma majicapavacapa:**

—Tiuri, tarataquene.

*Ema Jesús tiyujaraca te Getsemaní*

*(Mt 26.36-46; Mr 14.32-42)*

**39 Tacahe, tiúchucapa ema Jesús, énapa ena máimitureana, tiyananapa tayehe eta huerta Getsemaní tiávihahi te táemiri-paisinehi eta cerro ticaijarehi Olivoquiji, eta mayujarasi-rarehi éma.**

**40 Te títecapanapa tayehe eta Getsemaní, máichavacapa:**

—Eyujarauchava. Eyaseaca ema Viya eta étumevaina apaesa vahi macuiturucahe ema Satanás —máichapa.

**41 Térajipanavapa apaesa ema Jesús eta nayehe. Cincuenta metro eta mayerehinévacahi. Tépuyucapa.**

**42 Eta mayujarauchiravahi, ánipa macahe:**

—Tátachicha Nuaiyaquene, picatajicanupaini. Nuyaseacavi vahi tacuitauchavaini eta níchavaqueneyavare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti eta nuyehe —macahepa.

<sup>43</sup> Tacache, tiáramicarepa máucupaucha ema émana ángele tiásihahi te anuma. Máetumechapanayarehi.

<sup>44</sup> Ichape eta máeñamiravahi eta mayujarasirahi. Témiricapa eta máepatsure tacasiriquiamapahi eta máitine. Cuájujumapaipa eta táemirisirahi te apaquehe.

<sup>45</sup> Te titapiricapa eta mayujarasirahi, téchepucapa. Tiyanapa te návihahi ena máimitureana. Máimahainehi éna, tímacanariipahi táichavenehi eta nacatisamurevairahi.

<sup>46</sup> Tásicha, máichavacapa:

—¿Tájaha tacayema ímacaichucha éti? Échepuca. Eyuja-rauchava apaesaina. Eyaseaca ema Viya eta étumevaina apaesa vahi macuiturucahe ema Satanás —máichavacapa.

### *Nacaratacapa ema Jesús*

(Mt 26.47-56; Mr 14.43-50; Jn 18.2-11)

<sup>47</sup> Tacache, téchejiricavainirichaha ema Jesús, títecapananecha ena camuriqueneana suntaruana. Máinapumirauchavacapaipahi ema Júlasi. Témeñahavapa eta mayehe ema Jesús. Mátserarecapa.

<sup>48</sup> Tásicha, ema Jesús máichapa:

—Júlasi, ¿tájaha tacayema pétserarecanu eta píjararesiranuhi nuti Manerejirunuhi ema Viya? —máichapa.

<sup>49</sup> Tacache, ena máimitureana natiarihiqueneanahi, eta náimairahi ena camuriqueneana suntaruana, nayaserecapa ema Jesús. Ánipa nacahe:

—Tata Viáquenu, ¿viciatiuchava te espada?

<sup>50</sup> Tásicha, ema émana mavehapa eta mayehe espada. Mayuchatipaisinapa eta machaca tinapa te vaure ema mamusura ema aquenuca Caifás.

<sup>51</sup> Ema Jesús máicha nuti Manerejirunuhi ema vacapa:

—Ésamiricavachucha —macahepa.

Tásicha, ema Jesús mavehapa eta machacaini ema achane, máimichavapa máipistaca, tinaracavanepa.

<sup>52</sup> Tásicha, máichavacapa ema Jesús ena tuparairucana natiarihiqueneanapahi eta nacaratasirahi éma, énapa ena aquenucarahana, énapa ena oficiáleana tayehe eta Templo. Macajachavacapa:

—¿Tájaha tacayema ecasiña eta espada, ecaepuchiriquipahivare eta etanusiranupahi, tímicutijiricavapa námerahihini nútí?

<sup>53</sup> Étayapasica cape juca tamutuhi sácheana nucachanehehi tayehe eta Templo. Váhivare epatsicavahini ecaratacanuhini. Étisera iúricapuca eta tamapicuvahi eta yátimuhuhi eta íchirahi eta tamauriqueneanahi taicha mávaháruhehi ema Satanás.

Máisapaquenéhevarepa ema Tata eta ecaratasiranuyarehi – máichavacapa.

*Ema Pedro tépiyacavapa vahi máimati ema Jesús*

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> Tacache, nacaratacapa ema Jesús. Námapa te mapena ema corregidor Caifás. Émasera ema Pedro máehiequenehava-capipa.

<sup>55</sup> Ánaqui te tajuhe te canchón, ticamururecanapa eta yucu násasiavayarehi. Téjamurihanapa te tachacaya eta yucu. Téjacavarepa ema Pedro te namuri.

<sup>56</sup> Sucahepaipahi esu sirvienta, suímahapa ema Pedro eta maejasirahi te tachacaya eta yucu. Suímararacaripahi. Tásiha, suíchapa:

—Eñi ñica achane éñirichu ñichamuri eñi Jesús.

<sup>57</sup> Émasera ema Pedro tépiyacavapa vahi máimati. Máichapa:

—Pímhaha, esena, vahi nímati nútì ema píchaquenehi.

<sup>58</sup> Te tiyererehachichavare, máimamarácaripavare ema apana. Máichapa:

—Piti pítirichu machamurivi ema maca.

Ema Pedro majicapavarepa:

—Vahi, tata. Vahi machamurinuina –máichapa.

<sup>59</sup> Te hórapapuca eta táetavisiravahi, máimahavarepa ema apana, máimatipa eta maechajirisirava ema Pedro. Máichapa:

—Yátupiquene pítirichu machamuri ema maena Jesús, taicha eti ecavasana te Galilea, tímaticarehi eta échajisira –máichapa.

<sup>60</sup> Ema Pedro majicapapa:

—Vahi nímati, tata, nájahapuca ema maena píchaquenehi –macahepa.

Tacache, téchajiricavainirichaha ema Pedro, énevanepa téchajicanecha eta varayu.

<sup>61</sup> Ema Viáquenu maeßenicapa ema Pedro. Enévanerinehi téchava ema Pedro eta mame tarapianahi ema Viáquenu eta máichirahi: “Te tamirahuinarichaha eta táechajisirayare eta varayu, píti mapahheyare pépiyacavayare vahi pímatinu”.

<sup>62</sup> Tásiha, tiúchucavanepa ema Pedro. Tíyahapa taicha máimativanepa eta táichapevahi eta maejecapiravahi.

*Nacaecahijiricapa ema Jesús*

(Mt 26.67-68; Mr 14.65)

<sup>63</sup> Ena suntaruana tijaneacanahi ema Jesús, nacaecahiji-ricapa éma. Náehararacapa.

<sup>64</sup> Náitiuquichavare. Náehamirahavare. Tásiha, náichapa:

—Vímahasejicacha, te pijarauquipuca, pímatihaviyare nájahapuca ema téhamirahavíhi –nacahepa.

<sup>65</sup> Ichapemurivare eta napanararachirahi éma.

*Nacatupihapa ema Jesús te namirahu ena aquenucana  
(Mt 26.59-66; Mr 14.55-64; Jn 18.19-24)*

<sup>66</sup> Te tijarahipa, ticurujicacanapa ena tuparairucana, énapa ena aquenucarahana, énapa ena escribánoana. Námapa ema Jesús, nacatupihapa te namirahu. Nayaserecapa:

<sup>67</sup> —Viyaserecaviyare. ¿Pítisaréji Cristo, ema vicuchapa-quenehi? —náichapa.

Majicapapa ema Jesús:

—Tiuri, te numetacahe eta nútirahi, éti vahi esuapanuimahi.

<sup>68</sup> Téhevare nímechahepuca eta ícutiaraina eta nútirahi, éti váhivare esuapanuimahi. Énerichuvare váhivare ecaitica-nuimahi.

<sup>69</sup> Étainapasera nucaijuheyare te anuma nuti Manerejirunuhi ema Viya eta néjasirainapa te mavaire ema Tata, máitupajijihaquenehi éma —máichapa éma Jesús.

<sup>70</sup> Nayaserecavare namutu, náichapa:

—Tacahe piti, ¿pímijachavapuca machichavi ema Viya?

Ema majicapavacapa:

—Yátupi machichanu —máichapa.

<sup>71</sup> Tacahe, éna nacahepa:

—Vaipa tacamesa vicayasesereruhini ena testígoana. Émaquenepa visamahi puiti eta juca máechajiriruvahi, étapa ticaviureya —nacahepa.

## 23

*Námapa ema Jesús te mamirahu ema Pilato*

*(Mt 27.1-2, 11-14; Mr 15.1-5; Jn 18.28-38)*

<sup>1</sup> Tacahe, téchepumurihanapa namutu. Námapa ema Jesús te mamirahu ema Pilato.

<sup>2</sup> Te nacaitecapa, náepiyaequenehapa éma. Ánipa nacahe:

—Viámapahi ema maca achane ani te pimirahu. Mavarahahi mahapapisinahaviyare ena vichaneranahi. Énerichuvare macahehi váhiji táurica vivachachahini eta impuesto mayehe ema viyehe Presidente Emperador. Énerichuvare, macahehivare eta émairahiji Cristo, ema réy-yarehiji —náichapa.

<sup>3</sup> Tásicha, ema Pilato mayaserecapa ema Jesús:

—¿Yátupisareji réyvihi píti nayehe ena pijaneanana israelitana? —máichapa.

Ema Jesús majicapapa:

—Pitupiruvahi eta juca piyaseresiranuhi. Yátupihi eta nurreyvahi —máichapa ema Jesús.

<sup>4</sup> Tacahe, ema Pilato máichavacapa ena tuparairucana énapa ena achaneana natarihiqueneanahi:

—Tájina maviurevaina eta nímairahi ema maca achane —máichavacapa.

<sup>5</sup> Énasera nayurucapa muraca ema Pilato. Ánipa naicha:

—Ema maca, ichape eta mahapapisirahi eta napane-reruana namutu ena achaneana vijaneanana israelítana, énaripa ena ticavasanahi te Galilea étapa ani te juca Jerusalén —náichapa.

### *Ema Jesús námavare te mamirahu ema Herodes*

<sup>6</sup> Eta masamiravacahi ema Pilato, macayasesererupa te étahipuca te Galilea macavasahi ema Jesús.

<sup>7</sup> Te nametacapa eta étairahi macavasa ema Jesús, macava-nairipipa ema Pilato nama mayehe ema Herodes, aquenuc-ahi tayehe eta Galilea, taicha ema Herodes matiarihihi tayehe eta Jerusalén eta jena sácheana páscuairahi.

<sup>8</sup> Tacalhe, tiúrisamuréinehi ema Herodes eta máimairahi ema Jesús. Ichapemurihi eta mavarairahi máimati taicha masamairiricahi tamutu eta tiáramicareana máichaqueneanapahi ema Jesús. Mavarahainehi tíjahúchava máimahahini eta jácani tiáramicare.

<sup>9</sup> Ichapemurihi eta mayaseseresirahi. Émasera ema Jesús, tájina vahi majicapahini.

<sup>10</sup> Natarihipahivare ena tuparairucana. Tétavicavahi eta nasemanevahi eta náepiyaequenehairapahi.

<sup>11</sup> Tásiha, ema Herodes énapa ena masuntarurana, ichape-rinehi eta náepuruirahi. Tacalhe, ema Herodes mavehapa eta mamuirihaini manaquiriaruvaipahi, táepahamequene-ripahi eta tajanunumesirainihi. Mamuriachapa ema Jesús. Táicutiarahi eta nacaecahirahi éma. Tásiha, macavanairipi-varepa ema Herodes náimichava te mamirahu ema Pilato.

<sup>12</sup> Ema Herodes émapa ema Pilato tictalianacacanainihi eta náitaresirahi. Étasera te jena sáchequenehi tichavapa eta náemunasiracacahi.

### *Ema Pilato macavanairipipa eta náetatasiraya ema Jesús*

*(Mt 27.15-26; Mr 15.6-15; Jn 18.39-19.16)*

<sup>13</sup> Tacalhe, ema Pilato eta máimairahi náimichavirahi eta mayehe, macurujimurihapa ena tuparairucanahi énapa ena achaneana.

<sup>14</sup> Tacalhe, máichavacapa:

—Eta iámirapahi ema maca achane te numirahu, ímijachahi mahapapicavaca ena achaneana. Nútisera nímahahi tájina maviurevainahi eta nuyaseseresirahi te emirahu eta ímija-chauquenehi eta máejecapiravanahi.

<sup>15</sup> Émaripa ema Herodes máimichavavare eta ani nuyehe taicha tájinavare máimahahini eta máejecapiravainahini. Étainahipucaini taviuchahini táimicapacahini.

<sup>16</sup> Tiúriserapuca nímivanereca macaemecharahi, tásicha, nucaiticapa —máichavacapa.

<sup>17</sup> Eta mayeherepi ema Pilato te Pásquamuahuana te áñoana macaiticayarehi ema émana preso te jena sáchequenehi.

<sup>18</sup> Tacahe, ena achaneana vahi návarahahini máuchucuhahini ema Jesús. Tipiaracanapa muraca. Ánipa nacahe:

—Vahi vávaraha máuchucuha ema maca. Émaina máuchucuha ema Barrabás —nacahepa.

<sup>19</sup> Ema Barrabás te cárcel mávihahi. Táimicuñaruhi eta máichirahi eta revolución étapa eta macapahivahi.

<sup>20</sup> Émasera ema Pilato mavarahaichucha macaiticayarehi ema Jesús. Mayaseremurihavarepa.

<sup>21</sup> Énasera muracapanapaichucha eta napiarasirahi:

—¡Pémetatareca te crusu! ¡Pémetatareca te crusu! —nacahepa.

<sup>22</sup> Mapahequenepa eta mayaseresiravacahi éma:

—¿Tájasica eta maviurevahi ema maca? Núti tájina nímaha maviurevainahi táimicapacahini. Tiúriserapuca nímivanereca macaemecharahi, tásicha, nucaiticapa —máichavacapa.

<sup>23</sup> Énasera tímitujircacanapa eta napiarasiraina nayaseasiraina eta macaetatairaya te crusu.

<sup>24</sup> Jéhesaréinehi, ema Pilato masuapavacapa eta nayasearapihi ena tuparairucana.

<sup>25</sup> Émapa tiúchucuhahi ema Barrabás ema nayasesereruhi, táimicuñaruhi eta máichirahi eta revolución étapa eta macapahivahi. Macavanairipipa táitauchava eta navarahaquenehi éna, eta nacapasiraya ema Jesús te crusu.

### *Náetatacapa ema Jesús te crusu*

(Mt 27.32-44; Mr 15.21-32; Jn 19.17-27)

<sup>26</sup> Tacahe, námapa ema Jesús tayehe eta macaetataiyayarehi. Eta napaisirapahi te calle, nácapajicapa ema achane ticaijare Simón ticavasahi te Cirene. Éma, másihapahi te máesane. Napamicapa máevachacaya manaracuhayarehi eta macurusura ema Jesús, máehicapaipahi te máequene ema Jesús.

<sup>27</sup> Ichapemuriana ena achaneana téhicanapahi. Énaripa ena esenana, tipiararecanapaipa eta náiyairapahi taicha eta nacatisamurevahi, náimarasirahi eta máejapanuravapahi éma.

<sup>28</sup> Máesenimurihapa éma. Máichavacapa:

—Vahi ecuiyauchanu, eti esenana tachichanaveanahi eta Jerusalén. Étina íyauchava, náichavenénahi ena echichanaveana.

<sup>29</sup> Taicha tatiarihiyare eta sáchevayare nacapacayarevare ena. Ichape eta nacajapanuravairaya eta nacapasiraya. Tásicha ecahénapa: “Tétavicavapa náuriva ena esenana macheruana. Nájina náimipanererecahini”.

<sup>30</sup> Tásicha, ena achaneana, eta napisirayare, tijunananinapa te cérroana, tásicha, nacahénapa: “Tiúripanapucaini viyumurucavahini eta te juca cerro.” Ena apamuriana nacahenavare-papuca: “Étapucaini te juca simena viyumurusiavahini”.

<sup>31</sup> Apanasica núti ichapemuri eta nucatajivairahi, tájinhinéni taviuchanuhini. Navetijiyarecha éta nátajivayare ena echichanaveana\* —máichavacapa.

<sup>32</sup> Énerichuvare natarihipahivare ena apinana tiámerahiana macutiqueneanayarehi ema Jesús eta macaetatairayare.

<sup>33</sup> Tacache, nacaitecapapa tayehe eta masihi nacaetatairare ticaijarehi Calavera. Náetatacapa te crusu ema Jesús, énapa ena apinana tiámerahiana. Ema émana nanacapa te mavaure, ema apana te sapa.

<sup>34</sup> Te náetatacapa ema Jesús, macahepa eta máechajiriruvahi:

—Tata, piperdonachavaca ena nani, taicha vahi nácaicutiarahini eta juca náichiranuhi —macahepa.

Tacache, ena suntaruana nasuertehachapa eta mamuirihaini eta náijarajirisiracacahi.

<sup>35</sup> Natarihihi ena achaneana tímararacanahi tamutu. Énaripa ena tuparairucana natarihihivare. Nacaehajijicaripa éma. Ánipa nacahe:

—Ema mácacacha, macahehi eta máechajiriruvahi eta maratahairahíji macuchucuhavaca ena apamuriana achaneana. Tásicha puiti, vivaraha vímaha máimereuchava eta máitupajijiasiravahíji, te yátupihipuca Cristo éma, Manerejiruhíji ema Viya —nacahepa.

<sup>36</sup> Énerichuvare ena suntaruana nacaehajijicahivare éma. Navarahapa náesichayarehi eta tasisiru vino.

<sup>37</sup> Náichapa éma:

—Te yátupinapuca piti reyvihi nayehe ena israelita, pítijivaina picuchucuhava —náichapa.

---

\* **23:31** Eta juca mayeherepi proverbio ema Jesús te máechajiriruva, ani tacache: “Te náichahí eta juca eta náimairahi eta yucuqui vérepacavacaichahahi, téavicavahi eta navarairahi náquipaica te tájiquipa”. Tatarihi eta tacayemaquenehi tayumurevahi.

<sup>38</sup> Tatarihihivare eta ajureca nanacaquenehi te tachutisi eta macurusura. Eta juca ajureca tacajuquenehi te náechajirruva te griego, te latín, téhapa hebreo. Ani tacahehi eta táchajirruvahí: “Ema maca ema Rey nayehe ena israelítana”.

<sup>39</sup> Ema émana tiámerahi macaetataquenehi te machacaya, énerichuvare éma macaerahihí. Ani macahehi:

—Te yátpinapuca pítiquenehi Cristo, picuchucuhava pítijivaina. Tásicha, picuchucuhavivare víti apaña —máichapa.

<sup>40</sup> Émasera ema apaña macaetataquenehi macahepa:

—Váhipuca pipicahini píti ema Viya. Váhipuca péchahi étarichuhi viávacuha víti eta juca vícuñahi.

<sup>41</sup> Víti, vivachachahi eta juca vitapiravahí taicha ichapequenehi eta végecapiravanahí. Émasera ema maca Jesús, ticatajivahí tájinahinéni taviuchahini.

<sup>42</sup> Tacahe, máichapa:

—Tata Jesús, péchanupaini te péjacapa tayehe eta piávacureya —máichapa.

<sup>43</sup> Ema Jesús majicapapa:

—Numetacavivane, puiti píti nucachaneviyare te paraíso —máichapa.

*Eta máepenirahi ema Jesús*

*(Mt 27.45-56; Mr 15.33-41; Jn 19.28-30)*

<sup>44-45</sup> Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahí. Étarichuhi eta jena máepenirahí éma, tijahúchavapa tétsayumeca eta tayehe cortina eta Templo. Ticutimecaca eta taetsayumesirahí.

<sup>46</sup> Ema Jesús tipiaracapa:

—Tata, pijacapinanu eta náchaneva —macahepa.

Te titapiricapa, tépenapa.

<sup>47</sup> Tacahe, ema nacapitara ena suntaruana romanoana, tipicarinehi eta máimairahí eta júca. Étapa macaicutiarapa, macunachapa ema Jesús, ánipa macahe:

—Yátupiquenéichuyapa ema maca achane matapiravarehi —macahepa.

<sup>48</sup> Namutu ena achaneana natarihiqueneanahí, eta náimairahí eta júcana, ichaperinehi eta napisirahí. Téhatupachávanapáipa eta nacatisamurévairahí.

<sup>49</sup> Énasera ena téhicanapahi ema Jesús te másihainapa te Galilea, énapa ena esenana, namutuhi nanecapararecahi eta juca táichavaquenevanahí. Nayererehihisera eta náimarara-sirahí.

*Nacucupaicapa te crusu ema Jesús, náecarapa*

*(Mt 27.57-61; Mr 15.42-47; Jn 19.38-42)*

50-51 Matiarihihivare ema achane ticaijare José. Ticavasahi te Arimatea te Judea. Tipicaurahihi éma. Tétavicavahivare eta máuriva. Masuapahi ema Jesús, eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarahanah, váhisera mapauchavacahini ena machamurianah tayehe eta juca náichaqueneanah tamauriqueneanah.

52 Te cáperrehichichapa, eta máimairahi máepeniraipahi ema Jesús, tiyanapa mayehe ema Pilato, mayaseapanahí eta máquehe ema Jesús, mavarairahi máecarayare.

53 Te tichavapa, macucupaicapa eta máquehe tayehe eta crusu. Mýuruacapa eta te savana tijapu. Náiyaracuhapa tayehe eta máecari eta te mari nasecajueruhi. Nájinaichaha nacaerasihini tayehe.

54 Titatajanapa taicha cáperrehichichaipahi. Taicha vahi táisapacarehini náecararecahini te yati, váhivare te tijarahia-caimahi taicha sávarumuhyarepa.

55 Ena esenana téhicanapahi ema Jesús te másihainapa te Galilea, tiyananapa tayehe eta máecari, náimatiyarehi eta mávihahi.

56 Te náimatipa, tichavanapa te napena. Natsecapa eta perfume mayajihayarehi. Tinaraçanapasera te jena sáchequenehi, napicauchahi eta tapicauchacarevahi.

## 24

*Eta máechepusirahi ema Jesús te máecari*

*(Mt 28.1-10; Mr 16.1-8; Jn 20.1-10)*

1 Te apanapa sache, te tijararahichichapa eta lumíncuquenehi, tiyananapa ena esenana tayehe eta máecari. Námapaipa eta perfumeana náicurevanahí, nacachanevacapaipa ena apamuriana esenana.

2 Te títecapanapa tayehe eta ecari, náimaharinehi eta tiche-yarame mari tajihainihi eta ecari, téquehepuichavaipa.

3 Tisiapanapa éna, náejiacainehi eta máquehe ema Viáquenu Jesús. Májinarihpahi.

4 Tiáramecanarinehi eta náejiasirahi. Váipa náimatiqeñehahini tájahahipuca eta máichararacavahi. Tásiba, tiáramicarepa náimahahí ena apinana ajairana titupihanahí te nachacaya. Tijanunucavacahi eta namuirihana.

5 Eta náramesirahi éna, tétipaimurihanapa. Énasera ena ajairana náimahaqueneanahí náichapa:

6-7 —Éti ímijachaipapuca manasihi tépenahi ema Jesucristo, Manerejiruhi ema Viya. Májinarihpahi, tichavaripahi titareca.

Échavarichuhipuca eta macayemaqueneanahi te achane-richaha te manasiquenerichaha te Galilea. Macahehi eta máechajiriruvahí eta nacaratasirayarehi ena tictatianacanahí éma, náetatasirayarehiva te crusu. Téchepucayarehisera te mapanaquenénapa sache –nacahepa ena ajairana.

<sup>8</sup> Tacuhe éna, enurujirinehi náechavane eta máechajiriruvanahí ema Jesús.

<sup>9-10</sup> Te tichavanapa te napena, nametacapa ena óncequeneana apóstoleana, énapa ena apamuriana nachamurianahí. Te nataracu ena esenana tímahanahí ena ángeleana, sutiarihipahi esu María Magdalena, esu Juana, ésupa esu apanavare María, máenahí ema Jacobo.

<sup>11</sup> Énasera ena apóstoleana vahi nasuapahini, náimijachaichucha náepiyahiraivahi namaurishivahi ena esenana.

<sup>12</sup> Tiyanavanepasera ema Pedro tayehe eta ecari. Tijunapapaipahi. Te títecápapa, máimahapa tacarinehi eta sávana. Mapanerequenehainehi eta juca táichararacavahi. Tacuhe, tichavavarepa.

*Tímerecavapa ema Jesús nayehe ena apinana máimitureana te táchahu ticaijuhe eta avasarechicha Emaús*

(Mr 16.12-13)

<sup>13</sup> Étarichu te jena sáchequenehi, tipaicanapahi te achene ena apinana máimitureana ema Jesús. Násihahi éna te Jerusalén nacaijuheyarehi eta avasarechicha Emaús. Once kilometro eta tayerehivahi.

<sup>14</sup> Eta napaisirapahi nacasamurepaipahi eta nasamairirruhi. Téchajiricavanapaipa.

<sup>15</sup> Eta náechajisihairapahi eta juca táichararacavanahí, tiáramicarepa macapayamurihapa ema Jesús, macachanevacapaipa.

<sup>16</sup> Énasera vahi náimatihini, taicha éma vahi másapahini náimati.

<sup>17</sup> Tacuhe, ema Jesús mayaserecavacapa:

—¿Tájahasica eta juca échajisihapahi eta epaisirapahi? ¿Tájaha eta tímipanererecahepahi? —máichavacapa.

<sup>18</sup> Ema émana ticaijarehi Cleofas majicapapa:

—Namutu ena achaneana náechahi eta juca táichararacavahi te Jerusalén puiti juca sácheinahí. ¿Picarichuhipuca píti vahi péchahini eta juca, eta piávihairahi te Jerusalén?

<sup>19</sup> Éma máichavarepa:

—¿Tájahasica eta téchacarehi?

Éna náichapa:

—Émara véchajisihapahi eta máichavaquenévahi ema Jesús Nazareno, ema profeta máuriquenehini nayehe

ena achaneana. Tamutuinihi tiuri eta máimiturapiana, tétávicavahivare eta máitupajijiasiravahi taicha ema Viya, éma tíjaracahi tamutu.

<sup>20</sup> Énasera ena tuparairucana te viávasa, éna tíjararecanahi nayehe ena apavasanana taicha navarahahi náimicapaca. Tásicha, náetatacapa te crusu.

<sup>21</sup> Víti ichapemuri eta vicasiñavairainihi eta mayehe. Vicuchapavainihi eta macatiuchirahaviyarehi vimutu viti israelítana. Tamapurujipasera puiti, taicha tépenapa éma. Puiti mapanaripa sache eta táetávisiravahi eta juca.

<sup>22</sup> Icháquenesera te yáticarahichichapa, ticaramecaha-vianapa ena esenana vichamurianahi eta nayatiruirahi tiyanana tayehe eta máecari.

<sup>23</sup> Vaipa nachimapahini eta máquehe. Májinaipahi. Te tichavanapa, timetacahavianaipa eta náimairahi ena apinana ángeleana. Nametacavacapaji eta machaviraipahi titareca ema Jesús.

<sup>24</sup> Tásicha, tiyanavaneanapa ena apamuriana vichamuriana tayehe eta ecari. Jéhesaréinehi májinaipa ema Jesús, étarichuhi eta nacayemaqueneanapahi ena esenana —náichapa.

<sup>25-26</sup> Ema Jesús máichavacapa:

—Tétávicavapa tájinaira ácaicutiaraquenéna eti páureana. Váhivarepuca ácaicutiarahini eta náechajiriruvanahi ena profetanaini tayehe eta tacaheyarehi eta macatajivairayarehi ema Cristo eta máepeniranumaya, tásicha tichavayarehi titareca. Váhivarepuca ácaicutiarahini eta tacaheyarehi eta mápanirayarehi tichava éma te mávasa anuma —máichavacapa.

<sup>27</sup> Tásicha, mametacavacapasera tamutu eta táchajiriruvanahi eta Sagrada Escritura, eta táchajisihairahi éma. Tépanavapa tayehe eta májureanahi ema víyarahaini Moisés; étapa eta apamuriana nájureanahi ena profetanaini.

<sup>28</sup> Títecapananecha tayehe eta avasarechicha nacaijuhe-quenepahi. Mavarahapa ema Jesús majunijicavacayarehini.

<sup>29</sup> Énasera nacumpirachapa máehicavacahini te napena. Náichapa:

—Pácaherine eta ani viyehe, taicha yátinapa eta jena —náichapa.

Tásicha, ema Jesús manasipa tisiapapa eta nayehe.

<sup>30</sup> Te tiúripa eta tinicacare, mavehapa eta pan, mahasulupa-yachapa ema Viya, mayuvetucapa, máijaracavacapa éna.

<sup>31</sup> Enévanerinehi náimatívanepa éma. Émasera tijahúchavapa témitiacahi te namirahu.

<sup>32</sup> Tésenijiricacanapa éna. Tásicha, nacahepa:

—¿Tájaha tacayema eta vahi vímativanehini ichaque te achene te ticapayacahavipa éma? Étapa eta vicachanerapahi, váhivare vímatiacavanehini, véjapusamurechapaipahinéni eta visamiravahi eta máimitusirahavipahi tayehe eta Sagrada Escritura —nacahepa.

<sup>33</sup> Tacahe, enévanepa téquequecavanahi tichavana te Jerusalén. Te títecapanapa, tisiapanapa tayehe eta návihahi ena óncequeneana apóstoleana énapa ena apamuriana nachamuriana.

<sup>34</sup> Ánaqui ticametacasianaripavare éna. Nacahevarepa ena apóstoleana:

—Yátupi eta máechehusiraipa ema Viáquenu. Máimaharipa ema Pedro —nacahepa.

<sup>35</sup> Ena apinana najicapavarepa:

—Énerichuvare víti vímahaipavare éma, te achene eta vipaisirapahi. Váhisera vímativanehini. Tapaenumava te mayuvetucapa eta pan, vímatipa éma —náichapa.

*Tíápechavavare tímerecava ema Jesús nayehe ena máimitureana (Mt 28.16-20; Mr 16.14-18; Jn 20.19-23)*

<sup>36</sup> Tacahe, téchajiricavanarichaha éna, tíjahúchavavarepa tímerecava ema Jesús te namuri. Máechajicavacapa, ánipa macahe:

—Íchararacava, nuchichanaveana.

<sup>37</sup> Énasera tipicanarichucha, náimijachaichucha cunarehi éma.

<sup>38</sup> Émasera ema Jesús máichavacapa:

—Vahi ecupicanu. Étumecha eta esamureana.

<sup>39</sup> Ímaha eta juca nuvahuana étapa eta nívapeana. Émamahacanu apaesa écha eta nútiquenérahi. Eta cunare, tájina táchena, tájinavare táperaina. Vahi táchutihini eta nucaqueherahi nútí —máichavacapa.

<sup>40</sup> Tacahe, eta máichiravacahi, ticajaruvauchavaipa eta mavahuana, étapa eta máivapeana.

<sup>41</sup> Vuíchahasera nasuapahini éna, tiúrisamureanaripahinéni eta náimairahi, tacachanehisera eta napisirahi. Eta tacahe, máichavarepa:

—¿Jararihi nunica?

<sup>42</sup> Éna náijaracapa eta nájimaru jima, étasipa vasu eta mápama.

<sup>43</sup> Majacapavacapa éma, tinicapa te namirahu éna.

<sup>44</sup> Tásicha, máechajiricavacapa:

—Eta juca níchavaquenenvahi, étara eta numetaruhehi cape juca nucachanejiricahéichahahi. Eta tacaheyarehi eta táitauchiravayarehi eta májuchaqueneanahi ema

víyarahaini Moisés núti táechajisihaquenehi. Étapa eta nájuchaqueneanahivare ena profetanaini, etapa eta Salmo.

<sup>45</sup> Máemechavacaipahi eta táechajiriruvana eta Sagrada Escritura.

<sup>46</sup> Tásiha, máichavarepa:

—Étara eta juca tacajuqueneanahi eta népenirayarehi nuti Cristo. Néchepucayarehisera tayehe eta nécari te mapanaquenepa sache.

<sup>47</sup> Étayaréichuhivare iámapicayare eta níjare eta ímituresiraya ena achaneana ticavasanahi te tamutu avasareana. Étaripa te juca Jerusalén, emetacavacayare ena achaneana eta náeneuchiravaina apaesa macaepaha ema Viya eta napecaturana.

<sup>48</sup> Eti, nutupararuheya eta ímituresiraya eta júcana.

<sup>49</sup> Enasiyarechahasera ani te juca Jerusalén. Tiámainucava te máitecapauchahevacapa ema Espíritu Santo nuvaneruyare, máijararunuyarehi ema Tata. Éma, tíjaracaheyare eta ítupajijiasiravanayare —máichapa.

*Eta mayapirahi ema Jesús te anuma*

(Mr 16.19-20)

<sup>50</sup> Te titapiricapa eta máimitusiravacahi, mámamurihana te tachachacu eta avasare Jerusalén, te tachacayahi eta avasarechicha Betania. Macanuquechapa eta mavahuana, mayujarauchavacapa éna.

<sup>51</sup> Te titapiricapa eta mayujarauchiravacahi, timutserahavapaipa ticanuquechavapaipa eta mayapirahi te anuma.

<sup>52</sup> Eta náimairahi éna eta macanuquechiravapaipahi, tépuymurihanapa eta nanecapararesirahi eta mayanirahi. Tásiha, tichavanapa tayehe eta Jerusalén. Tiúrisamureanapaipa.

<sup>53</sup> Tájina vahi náejiacavahini tayehe eta Templo. Tiyujarau-chavanaparacahi eta nacunachirahi ema Viya.

Tamutupa eta juca numetasiravihi puiti.

**Ema Apóstole Juan májuequenehahi eta  
máichararacavahi ema Jesucristo, ticaijare  
puiti eta**

**EVANGELIO SEGÚN SAN JUAN**

<sup>1</sup> Eta acane, te táepaniravahi tamutu, matiarihiquenéipahi ema Jesucristo, ema Tímimatirahi me Viya\*. Éma, macachanehi ema Maiya eta máitaresirahi, Víyahivare éma apanavare.

<sup>2</sup> Ena apinana, nacuticacahi eta napanereruana.

<sup>3</sup> Eta táepaniravahi eta acane, émarihi ema Cristo ticaemata-neacahi tamutu eta tatarihiqueneanahí puiti, máitauchirahi eta mapanereruanahí ema Maiya. Tájina maejequeruinahini, nájinavare apanainahini náepiyacahini eta tatarihiqueneana.

<sup>4</sup> Émarichuhivare ticaitarecahavihi viti achaneana. Émarichuvare tinacapa te viáchanevana eta tamicahu eta vítare-sirahi.

<sup>5</sup> Éma tímiyanava tímicauchahavi taicha mavaraha máimijunijisinahavyare eta tamapicu te viáchanevana. Nararihisera ena vahi náuricahini eta mamicauchinavaca. Navaraha nacaemaha eta mamicauchiravacahi.

<sup>6</sup> Tacahe, te máimahapa tiuri, ema Jesucristo tiúcupaicapa te juca apaquehe. Tiáchanechavapa. Yátupiquenehi achane, macaechehi eta veche viti achaneana. Ticasiriquihavihi te jena añoanahi majurusirahi. Matiarihivare ema apana achane ticaijarehi Juan Tícachasircarahi. Tacahe, ema Viya, te máimahapa tiuri, ticavanahipa ema Juan.

<sup>7</sup> Máinapumirauchayarehi eta macametarairuyare eta máimeresiravaya ema Cristo, ema namicahuyare nácani ticasíñavanayare mayehe. Ehanechavapa. Yátupiquenehi achane, macaechehi eta veche viti achaneana. Ticama Juan mamecayarehi ena achaneana natsecava eta najacapiraya ema Cristo.

<sup>8</sup> Ema Juan, vahi émainahini timícauchamurimahi ena achaneana. Émahisera ticametarairurahiyarehi eta máucupaisirapa ema tiámahavihi eta yátupiqueneana mapanereruanahí ema Viya.

---

\* **1:1** Ema Apóstole Juan, te májuchapa eta juca libro, manacahi amairiha te letra griega λόγος (eta táechajicuirava: “logos”). Eta tacayemaquene te véchajirirupa: “Tímimatirahi me Viya”. Étarichueche viti achaneana. Ticavare tacahe eta táechajisihaquene eta apamuriana libroana te castellanorupi, ani tacahehi: “la Palabra” étapa “el Verbo”.

<sup>9</sup> Ema maca máechajisihaquene ema Juan, éma yátupiquenehi eta mamicauchirahaviyarehi vimutu viti achaneana, taicha tímieche viti achaneana. Ticatucahavi eta mapaneruruana ema Viya.

<sup>10-11</sup> Ema Jesucristo, émahi acane tépiyacahi tamutu eta apaquehe, énapa ena viáchucanaveanaini. Puíticha éma téchahavi vimutu. Téhesera te tiúcupaicapa éma, namaimati-quenehi ena achaneana Viáquenuirahi éma, váhivare navara-hahini najacapahini éma.

<sup>12</sup> Natiarihisera ena tinerejicavanahi tijacapanahi, téhicanahi éma. Ena nani, ichaperinehi eta macunachiravacahi táichavene eta nacasiñairavahi mayehe. Éna, yátupiqueneripa machichanaveanahi ema Viya.

<sup>13</sup> Eta macachichairahavihi ema Viya víti, émahi ema Viya tinerejicahavi táichavene eta vicasiñairavahi mayehe. Vahi étaparacainahipucaini eta náehisirainahipucaini ena ticachichahaviana. Váhivare étaparacainahipucaini vivarahahipucaini ichape víti. Váhivare étaparacainahipucaini ichapenahipucaini eta mavarairahini mácani apana achane.

<sup>14-17</sup> Viti véhicanahi ema Jesús eta matiarihirahi te juca apaquehe, yátupi eta vímatirahi éma. Vímahahi te viúquihana. Vímativarepa eta másihairahi te anuma, eta émairahi ema macarichuquenehi Machicha ema Viya. Yátupihivare eta víyairahi éma, macutihi ema Maiya. Éma, tímimatiirahi me Viya, taicha éma máimerecahi eta máetaviuchirahi eta máemunasirahavihi, máimechirahavihivare eta yátupiqueneana mapaneruruana ema Maiya. Ema víyarahaini Moisés ticatuparahahi me Viya eta máimitusirahavihi viti achaneana eta vanairipiana. Émasera ema Jesucristo ticatuparahahi me Maiya eta máimitusirahavihi eta máemunasirahavihi, etapa eta máechajiruvana yátupiqueneana ema Viya. Ema Cristo, téavicavahi eta máuriva eta viyehe vimutu. Eta majaneasirahavipahi, tijaracahavihi eta vitumevahi te tamutu sácheana. Émaripa ema Juan, ani macahehi eta máechajisihairehi ema Jesús: “Émara ema maca ema néchajisihaquenehi eta eyehe cape juca. Yátupi núti nínapucahi eta núchusirahi, émasera matiarihiqueneipahi eta acane, májinanuichahahi núti. Eta tacache, tipicauchacarepanahi eta nuyehe” macahepa.

<sup>18</sup> Yátupiquene nájina náimatihini eta máimahi ema Viya. Émasera ema macarichuquene Machicha, tímimaticahavahi eta máuriva ema Maiya taicha étaquenehi másiha te masamure ema Maiya.

*Ema Juan Tícachasiricarahi timetacavacahi ena achaneana*

*tayehe eta máimeresiravayarehi ema Jesucristo**(Mt 3.11-12; Mr 1.7-8; Lc 3.15-17)*

<sup>19</sup> Tacuhe, te jena sácheana, ena tuparairucanahi ticavasanahi te Jerusalén navanecapa ena náevanachana<sup>†</sup>, nayanaucha ema Juan Tícachasiricarahi. Éna, nayaserecapa, ánipa nacahe:

—Tamatu arairuhi eta pímiturapiana. ¿Pítinaripa ema Cristo vicuchapaquenehi? —nacahepa.

<sup>20</sup> Matupiruvapa eta majicapiravacahi. Ánipa macahe:

—Núti mavanerunuhi ema Viya. Váhisera nútina ema ecuchapaquenehi ema ticaijare Cristo —macahepa.

<sup>21</sup> Tacuhe, nápechavarepa nayasereca:

—¿Nájahavisica píti? ¿Pítipuca picaijare Profeta Elías? ¿Pichavahi eta te juca apaquehe? —náichapa.

Émasera majicapavarepa:

—Vahi nútina.

Tásiha, nápechavarepa nayasereca:

—¿Nájahavisica píti? ¿Pítipapuca ema apesa profeta vicuchapaquenehi? —náichapa.

Émasera majicapavarepa:

—Vahi nútina.

<sup>22</sup> Tacuhe, náichavarepa:

—¿Nájahavíquenesica píti? Pimetacahavichucha te nájahavipuca píti. Vivaraha véchayare, apesa vimetacavaca ena tivanecahavianahi —náichapa.

<sup>23</sup> Tacuhe, ema Juan majicapavarepa:

—Nútichucha máechajisihaquenehi te ajureca ema víyarahaini profeta Isaías. Núti nucametarairuhi nayehe ena achaneana vámahicurúhana. Níchuhavacahi éna apesa natsecava eta jácani máitecapiraya ema Viáquenu —macahepa.

<sup>24</sup> Natiarihihivare ena navaneruanahi ena fariséoana.

<sup>25</sup> Nayaserecavarepa éna apanava:

—¿Tájahasica tacayemahi eta pícachasirisirahi ena vijaneanana, te váhipuca pítinahíni ema Cristo, váhivare pítinahíni ema profeta Elías, váhivare pítinahíni ema apesa profeta vicuchapaquenehi? Ena vijaneanana vahi tácamunuhini nacaicachasihini. Énasera ena apavasanana, jéhesare tacamunu eta nácaicachasivaca —nacahepa.

<sup>26</sup> Tacuhe, éma majicapavacapa:

—Tiuri, núti yátupi nícacahasicavacahi te une ena achaneana, apesa natsecava eta jácani máitecapiraya ema vicuchapaquenehi. Matiarihipasera puiti te vitaracu. Étisera vahi ímatihini éma.

<sup>†</sup> **1:19** Ena nani vanairucana, nararihihi ena tiyujararahiana te Templo, énapa ena téchapajirahiana eta tayereruvana eta Templo te Jerusalén.

<sup>27</sup> Tímerecavavanénapa. Ticunachacarepanayaresera eta nuyehe. Váiparinehi nácutisamimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami —máichavacapa éna ema Juan.

<sup>28</sup> Eta mávihahi ema Juan máicachasirisinehi ticaijare Betábara, te apachara eta cajacure ticaijare Jordán, tinapaicahi te táuchusine eta sache. Eta nayaseresinepanahí ena vanairucanahi.

*Ema Juan máimicaecheracha ema Jesús eta émairahi ema Cordero, vanairucahi me Viya*

<sup>29</sup> Te apanapa sache, máimahapa ema Juan eta mapauchirapapihí ema Jesús. Tacahe, máichavacapa ena achaneana:

—Ímaha, márajapa ema Cordero, matapiravarequene éma, vanairucahi me Viya. Éma, táimicaparuyare eta macaepahai-rayare eta vipecaturana viti achaneana te juca apauehe.

<sup>30</sup> Émara ema maca ema néchajisihaquenehi eta eyehe cape juca. Núti nínapucahi mayehe éma, émasera matiarihiquenéipahi eta acane, májinanuichahahi núti. Eta tacahe, tipicau-chacarepanahí eta nuyehe.

<sup>31</sup> Nútiripa néchajisihahi éma, vuíchahasera nímatihini. Numetacahehisera eti nujaneanana israelítana eta ecaicachasiraina apaesa etsecavahi eta ejacapiraina éma te jácani máimerecavapa.

<sup>32</sup> Tacahe, cape sache, títecapauchanupa ema Jesús, mavarairahi nícacasicayare éma. Tásicha, te viúcupaicapa te une, nímahapa ema Espíritu Santo eta máucupaisirahi te anuma, ticutiparine eta paloma. Masiapahacapa ema Jesús.

<sup>33</sup> Tacahe, te nímahapa, nupaenumavapa nímati éma eta émairahi ema vicuchapaquenehi Cristo, taicha ema Viya tímítukanupa eta máicutiarayare. Ani macahehi: “Te píma ema Espíritu Santo máucupaucha te mápusi mácani achane, pímatiya eta émairahi ema Nuchicha nuvaneruhi. Éma, tíjaracahevacayare ema Espíritu Santo, tisiapahacahevacainapa éti achaneana. Nuchaneraheinapa éti” máichanupa ema Viya.

<sup>34</sup> Tásicha puiti, nímatipa éma. Táitusiava numetacahe puiti eta émairahi ema Cristo, Machicha ema Viya —máichavacapa ema Juan.

*Ena náinapuiruana máichuhaqueaneana ema Jesús ena máimitureanaya*

<sup>35</sup> Tacahe, te apanavarepa sache, ema Juan matiarihihi tayehe eta mávirareasahi, vítipa viti apinahavi máimitureanahí.

<sup>36</sup> Tásicha, máimahapa ema Jesús tiánucuhapaipahi. Tacahe, ema Juan máichahavipa:

—Ímaha. Ema maena Jesús, émahi ema Cordero matapirava-requene, vanairucahi me Viya —macahepa.

<sup>37</sup> Tacahe, eta vímairahi viti apinahavi máimitureana ema Juan, viyanapa véhicahi ema Jesús.

<sup>38</sup> Tásiha, ema Jesús téseniequenehavapa. Máimahapa eta véhisirapahi. Tiyaserecahavipa:

—¿Tájaha ecamunu nuyehe? —máichahavipa.

Víti vijicapapa:

—Tata maestro, ¿távihapuca eta pítecapiolare?

<sup>39</sup> Ema Jesús tijicapahavipa:

—Yare, ímaha apaesa ímativa.

Tacahe, viyaninapa vímatipa eta mávirarehi. Vítaiapahi eta jena sache eta viávihairahi eta mayehe, taicha las cuátroripahi sache te vítecapapa ánaqui.

<sup>40-41</sup> Andrés máijare éma nuchamuri téhicapahi ema Jesús. Tacahe, eta máurisamurevahi ema Andrés, tiyanavanepa matanucahi ema maparape Simón Pedro. Te máichimavapa, máichapa:

—Vímaharipa ema vicuchapaquene Mesías ema Cristo —macahepa.

<sup>42</sup> Tacahe, ema Andrés tichavapa mámapa ema maparape Simón eta te mávihahi ema Jesús. Te náitecapauchapa, ema Jesús maeisenicapa ema Simón. Tásiha, máichapa:

—Piti Simón, machichavihi ema Jonás. Nútisera nítsivachaya eta píjare. Núti njarechaviya Pedro, táichavenehi eta pétagui-chirayare eta pitumeva —máichapa ema Jesús.

*Ema Jesús máichuhapa ema Felipe émapa ema Natanael*

<sup>43</sup> Te apanapa sache, ema Jesús mavarahapa tiyanayarehi te tinapaica eta Galilea. Tásiha, macainunapa ema Felipe. Tásiha, máichapa:

—Yare, péhicanu.

<sup>44</sup> Eta mávasahi ema Felipe eta te avasare ticaijare Betsaida, étarichuvare mávasahi ema Andrés émapa ema Pedro.

<sup>45</sup> Tacahe, ema Felipe tiyanavarepa, matanucahi ema Natanael. Te máetupiacapa, máichapa:

—Vímaharipa ema achane máechajisihaquenehi te libro májuchaquenehi ema víyarahaini Moisés, émarichuvare éma táchajisihaquenehi eta libro nájureanahi ena profetanaini. Ema ticaijarehi Jesús, machicha ema José. Ticavasahi te Nazaret —macahepa.

<sup>46</sup> Tásiha, ema Natanael majicapapa:

—Váiparinehi étainahini máuchusinehini ema achane tiuri tayehe eta avasare Nazaret —macahepa.

Tásiha, ema Felipe máichavarepa:

—Viyana, apaesa pímati —máichapa.

<sup>47</sup> Tacahe, te náitecapauchapa, ema Jesús máimaranaracaripa ema Natanael. Tásicha, macahepa:

—Nímativi eta pipanereru. Píti yátupiquenevi israelíta. Tétavicavahi táurivahí eta pítaresirahi. Vahí pítuca pivayuareca —máichapa.

<sup>48</sup> Tásicha, ema Natanael majicapapa:

—¿Táviha pímatinenuhi?

Ema Jesús máichapa:

—Núti nímativipahi te vuíchaha máetupiacavihini ema Felipe eta máichuiraviyarehi, te piáviharipa te tápecu eta yucuqui higo.

<sup>49</sup> Tacahe, ema Natanael masuapavanepa ema Jesús. Máichapa:

—Tata Maestro, pítiripa piti yátupiquene Machicha ema Viya. Píti yátupiquené vivare Reyvihi viyehe viti israelítana. Núti níjaracavapa néhicaviya —máichapa.

<sup>50</sup> Ema Jesús majicapapa:

—Étachucha eta juca níchiravihi eta nímairavihi te tápecu eta yucuqui, pipatsicavapa píjaracava péhicanuya. Vahi tácarichu eta juca. Pímahayareva eta apana tiáramicareanapana tayehe eta juca.

<sup>51</sup> Tásicha, ema Jesús máichahavipa vimutu:

—Éti ímahayare eta anuma téjiacayare, énapa ena ángeleana tiúcupauchuanuanayare núti Manerejirunuhi ema Viya —máichahavipa.

## 2

*Natiarihi ena araimanayarehi eta te avasare Caná*

<sup>1</sup> Te mapanaquenepa sache eta táetavisiravahi, natarihi ena araimanahi eta te avasare Caná te tinapaica eta Galilea.

<sup>2</sup> Tásicha, esu maena ema Jesús, ánaqui suávinehi taicha sucaichuhasiquenehi ésu. Énerichuvare ticaichuhasihibare ema Jesús, vítipa viti máimitureana.

<sup>3</sup> Tacahe, ema arayenahi tacaimamarapa téchuriacapa eta máeresahi vino. Esu maena ema Jesús suíchapa ema suchicha:

—Téchuriacanapa eta náeresahi.

<sup>4</sup> Tásicha, ema Jesús majicapapa:

—Picatajicanu, mémechicha. Vuíchaha picucamesanu. Nímahaine núti te táuripa. Nútipa néchinava —máichapa.

<sup>5</sup> Tásicha, suíchavacapa ena téśiricanahi:

—Tiuri, ñímaháinepa éñi. Esuapayare éti eta ñivanairipiana —suíchapa.

<sup>6</sup> Tacahe, tatarihihi eta sáisihi ichapehiana tinajana, márihiana. Nayupisareana ena israelítana tayehe eta

nayeherepiana. Eta táichapehivavacahi eta tinajana, cíncohi lata eta tacavacu.

<sup>7</sup> Tacahe, ema Jesús mavanecavacapa ena tésiricanahi:

—Eyana eyereca eta une. Ínicachayare eta juca tinajana —máichapa.

Tacahe, náinicacajicavacapa éna eta tinajana.

<sup>8</sup> Tásicha, ema Jesús mavanecavacapa:

—Tiuri puiti, eveha ániamaína, eyana íjaraca ema téchapa-jirica eta juca piesta —máichavacapa.

Tacahe, tiyananapa éna, náijarapanahi.

<sup>9</sup> Mavehapa masamaecapa eta une, vínoripahi éta. Váhisera máechahini éma távihahipuca tásihahi éta. Nacarichu ena tésiricanahi náechahi eta únerahi.

<sup>10</sup> Tacahe, ema téchapajiricahi eta piesta máichuhapa ema arayenahi. Máichapa:

—Namutu ena achaneana te térama, tativa naera eta tiúriamapana vino. Tapaenumava te ticavahahasianapa, náerapa eta vino váhipanaichu táurihamahini. Pítisera, apana eta pipanereruhi. Tiúrihi eta vino píjararuuhavihi tativa. Puítisera eta juca vino, téavicavahi eta táuriamavahi. Tacachuricarinehi tamutu —máichapa.

<sup>11</sup> Eta juca tainapuiruhi tiáramicare máimerecahi ema Jesús, tayehe eta avasare Caná. Ichaperinehi eta viáramirahi viti vinecapanahi eta juca máimeresirahi eta máitupajijiasiravahi. Tacahe, ichaperinehi eta visuapirohi viti máimitureanahi.

<sup>12</sup> Te taequenepa eta juca, viyanavarepa te apana avasare ticaijare Capernaum. Vimutupaipa, esu maena, ena maparenaveana, vítipa viti máimitureana. Vinasipa jácani sácheana eta ánaqui. Vipaenumava viyanaya te Jerusalén.

*Ema Jesús macuchuchujicavacapa ena tíjararecanahi eta sárareana, cágureana te tajuhe eta Templo*

(Mt 21.12-13; Mr 11.15-18; Lc 19.45-46)

<sup>13</sup> Tacahe, eta jena sácheinahi, tiánehiripa eta Pascua, vipes-tarahi viti israelítana. Ema Jesús tiyanapa tayehe eta avasare Jerusalén, vítipa viti máimitureana.

<sup>14</sup> Te vítecápapa, viyanapa visiapahi tayehe eta Templo. Máimahainehi ema Jesús ena títsiriperecarahiana eta plata, énapa ena tíjararecanahi eta vuíyeana, eta uvesana, étapa eta palómana.

<sup>15</sup> Eta máimairahi éna, máepiyacapa eta machicute. Máquijimuríhapa eta naplataneana te apaquehe. Máequhepuichavacapa eta namesarana. Macuchuchujicavacapa namutu, étapa eta sárareana náijarareruanahi.

<sup>16</sup> Tásicha, máichavacapa ena tíjararecanahi eta paloma:

—¡Ecuchuca eta júcana eta te juca mapenahi ema Tata! ¡Vahi étaina ícuchina éti íjararecana eta tájiparacana! —máichavacapa.

<sup>17</sup> Tacahe, viti máimitureana, eta vímairahi eta juca, enevanerine véchava eta táchajiruva eta Salmo tayehe eta tamuracavahi eta máichararacavahi ema víyarahaini David táichavenehi eta máetaviuchirahi eta máimipicauchirahi eta, mapena ema Viya.

<sup>18</sup> Jéhesare, enurujipa títecapanapa ena tuparairucana. Nayaserecapa éma:

—¿Tájaha tacayema eta picuchusiravaca ena vichamuri-aná? Pímijachavahipuca vanairucavi me Viya. ¡Pímechahavi eta tiáramicar te yátupihipuca pivanahi eta juca! —náichapa.

<sup>19</sup> Ema Jesús majicapavacapa:

—Te iáquipaicayarepuca éti eta juca templo, nútisera nu-caechepepuca te mapanaquená sache —máichapa.

<sup>20</sup> Ena tuparairucana najicapavarepa:

—Cuarenta y seis año eta tayerevahi eta náepiyaresirahi eta Templo. ¡Tétavicavahi eta pisiñavavaisirahi picaemu-navayarehi picaechepecayare te mapanaquená sache! —nacahepa.

<sup>21</sup> Eta máichiravacahi ema Jesús, máechajisihahi éma eta táchepusirayare eta máquehe.

<sup>22</sup> Eta tacahe, te tiyerehi, te táchiquenepa eta máechepeusirapa ema Jesús te máecari, véchavahi viti máimitureana eta juca mame tarapihi tayehe eta máechepeusirayarehi. Eta tacahe, visuaparinehi eta táchajisihairahi eta Sagrada Escritura eta mayehe.

### *Ema Jesús máimati eta napanereruana ena achaneana*

<sup>23</sup> Eta manasiraichahahi ema Jesús te Jerusalén, te Pás cuamu hu, camurihi eta tiáramicareana máicha que nean ahí. Camurianahivare ena achaneana tímahanahí. Tásicha, nasuapahí eta émairahi ema Cristo nacucha paquenahí.

<sup>24</sup> Émasera vahi macasiñavahini eta nayehe taicha máimati-vacahi éna, vuíchaha yátupinahini eta náehisirahi éna.

<sup>25</sup> Taicha éma, tétavicavahi eta máitupajijiasiravahi, máimati rahi tamutu eta napanereruana ena achaneana te amahe eta nasamureana.

## 3

### *Ema Nicodemo máejirapana ema Jesús*

<sup>1</sup> Matiarihi ema achane téhicarairicahi ena fariséo ana. Ticaijare Nicodemo. Ema maca achane, tétavicavahi eta macunachacarevahi taicha máestro hi éma.

<sup>2</sup> Tacahe, eta jena yátiquenehi, ema Nicodemo tiyanapa mapapiuchapanapahi ema Jesús. Tacahe, eta náechajirisaravahi, macahepa ema Nicodemo:

—Tata maestro, véchahi eta vanairucavihi me Viya eta juca pítesirahi pímitusirahavipanahi. Taicha nájina apanaina achane tituruequenehaimahi eta juca tiáramicareana píchaqueneanahi piti —macahepa.

<sup>3</sup> Ema Jesús majicapapa:

—Puiti numetacavi eta juca yátupiqueneana: Nácani navarahaya titújicavana tisiapana tayehe eta mávasa ema Viya, tacamuñuhi náitsivachayare eta náitaresira. Te vahi yátupina eta náijarasiravaina eta máitsivachiravaca ema Espíritu Santo, vahi titújicavananaimahi tisiapana eta te mávasa ema Viya. Tímicutijiricavayarehi tiápechavanayarehi tiúchucana —máichapa.

<sup>4</sup> Tacahe, ema Nicodemo vahi mácaicutiarahini eta máichirahi ema Jesús. Váhisera macuchapaimahi eta máitametasirahi ema Jesús. Ánipa macahe:

—Váiparinehi vichavaimahi eta amúyahavinahíni viti ichasiana, vichavahivarepuccaini visiapahini te sujuhe esu ticachichahavi —macahepa.

<sup>5-6</sup> Majicapavare ema Jesús:

—Pisamanuchaha. Te tiúchuca eta amuya te sujuhe esu taena, tímaticarehi eta machichairahi ema suima. Tacutiquenehi, nácani mávaháruana ema Espíritu Santo, tiápechavanayare tépanava eta náitaresiranayare, taicha machicharipahi. Nutupiruva numetacavi: Nacarichu ena machichanaveana ema Espíritu Santo tisiapana eta mávasa ema Viya. Te tacuija eta machichairahéna éti, tájina vahi titújicavaimahi esiapa.

<sup>7</sup> Vahi picuarami eta juca níchiravihi: Táitaurevaquene ticachichaheyarehi ema Espíritu Santo.

<sup>8</sup> Eta juca tímicutijiricavahi eta técaticava, tacarichu visama eta tacaemaira. Váhisera tácaecherahini. Ene nacahéhi ena mávaháruanaipa ema Espíritu Santo. Nanásirichu eta náimahi. Ticaitsivaipasera eta náitaresira —máichapa ema Jesús.

<sup>9</sup> Tásiha, ema Nicodemo mápechavarepa mayasereca:

—¿Tájahasica tacayema eta juca?

<sup>10</sup> Ema Jesús máichavarepa:

—Tétavicavahi eta picunachacareva píti, taicha tiúrihi eta pímitusiravacahi ena vijaneanana. Tasapihasera vahi pímatiequenehahini eta júcana.

<sup>11</sup> Pisamanuchaha. Yátupiquene eta numétasirávihi. Tatupiruvahi eta néchajisihihi eta táichararacavanahi te anuma

taicha nímahaipa. Étisera vahi esuapanuimahi eta numetasirahehi eta nímahaqueneanahi.

<sup>12</sup> Te cape juca sácheana, nímicutichinahehi eta táichararacavanahi te juca apaquehe tayehe eta táichararacavanahi te anuma. Étisera vahi esuapanuhini. Tavetijipa eta emasuapiranuya te nutupiruvahi numetacahe eta táichararacavanahi te anuma.

<sup>13</sup> Nuti Manerejirunuhi ema Viya, nucavasahi núti te anuma. Tásicha, núcupaicahi eta numetasiraheya. Nájina apanainahini mácani mameatachehini eta táichararacavanahi te anuquehe, taicha nájina nayanahini nápanahini te anuma, eta jácani náimatihini.

<sup>14</sup> Acane, eta napaisira ena viáchucanaveanaini eta te mávapahi apaquehe, táchucapahi eta quichareana ena masuapajirairahanapahi mayehe ema Viya. Tacahe, ema víyarahaini Moisés máepiyacahi eta metal eta támahi eta quichare. Manacahi te anuquehe eta te yucuqui. Tásicha, ena achaneana táchureana eta quichare, te náesenica eta quichare máepiyaru ema Moisés, tinaracanapahi, vahi náepenapahíni.

<sup>15</sup> Ene nucaheyare núti apana, tinacanuanayareva te anuquehe. Eta níchararacavayare apaesa nucuchucuhapahi namutu ena nácani ticasíñanuanayarepahi. Tásicha, máichecuaraquierenapa eta náitaresirayare. Tájina ticamitiequenehavacaimahi.

### *Ema Viya, téavicavahi eta máemunasirahavihi*

<sup>16</sup> Taicha ema Viya, téavicavahi eta máemunasirahavi viti achaneana te juca apaquehe. Eta máemunasirahavi, máijaracahi ema macarichuquenehi Machicha eta máucupaisirahí eti ani viyehe. Mavarahapa tíjaracahaviya máichecuarquirénapa eta vítaresiraya vimutu viti vicasíñanahi éma. Tájina ticamitiequenehahavimahi.

<sup>17</sup> Taicha ema Viya, vahi táchahíni eta mapanereruhi eta máucupaisirahí ema Machicha máicuñacahavihini viti achaneana. Étasera eta tímitecahi éma, ticuchucuhahaviyare vimutu.

<sup>18-19</sup> Taicha nácani ticasíñanayare ema Machicha ema Viya, vahi ticaicuñanaimahi. Nácanisera vahi nácasíñahini éma támicoñacavacayarehi eta naviurevanahi éna. Taicha vahi náuricahini eta tamicauchiravacahi eta majaraiva ema Cristo táucupairuhi te juca apaquehe. Étachucha náurica eta timapicu taicha yahi návarahahini táchaecherahini eta náichirahí eta tamauriqueneana.

<sup>20</sup> Taicha nácani táchahíni eta tamauriqueneana, nacaticha eta majaraiva ema Viya. Váiparinehi napauchaimahi,

namavarairahi tacaecherahini eta náichirahi eta tamauriqueneana.

<sup>21</sup> Énasera ena tisuapanahi yátupi eta máechajiriruva ema Viya, náuricayarehi napaucha eta majaraiva. Jéhesare ticaecheranasarepa eta machaneranaripahi ema Viya.

*Ema Juan Tícachasiricarahi tiápechavavare máechajisihahi ema Jesús*

<sup>22</sup> Te táequenepa eta juca, tiyanavarepa ema Jesús, tayehe eta avasarechichana te táunava eta provincia Judea. Véhicahi viti máimitureana. Vinasipa jácani sácheana eta ánaqui. Viti máimitureana vícachasiricaripa ena achaneana tivarahanahi náehicaya ema Jesús.

<sup>23</sup> Tásicha, ema Juan tícachasiricahivare te jena Enón tachacayahi eta Salim, taicha ánaqui tatiarihihi eta une. Ena achaneana napauchahai éma. Jéhesare máicachasicavaca-paipahi ena tivarahanahi náinajicayare eta napecaturana.

<sup>24</sup> (Eta juca máichahi ema Juan tamirahupaichaha eta jena sache eta náeratasirayarehi éma.)

<sup>25</sup> Tacahe, te jena sácheana, ena religíosoana tiyananapa náimiyusemacavacapa ena máimitureana ema Juan, nametacahi eta vicachurisiravacahi viti máimitureana ema Jesús taicha tiápajumuriavanapanahi ena vícachasiruanahí.

<sup>26</sup> Tacahe, eta nasemirahi ena máimitureana ema Juan, tiyananapa nametapanahi éma. Náichapa éma:

—Tata maestro, pímahaini ema maena péchajiriruhi cape te tachausi eta juca cajacure Jordán. Ema Jesús pímijarecha Cristo, tícachasiricahi puiti éma. Jéhesare, namutuyarehini náehica éma —náichapa.

<sup>27</sup> Tásicha, ema Juan majicapavacapa:

—Vahi ecueñamava. Ema Viya, éma téchahi eta máijarasirahi eta maitucaquenehi nácani manerejiruana. Németeaca tíjaracahi ema Viya eta maitupajijiasirava ema maca Jesús.

<sup>28</sup> Éti échavahi eta numetasirahéhi eta vahi nútinhini ema Cristo. Yátupisera nucavanahini eta nínapumirauchiraya-repahi éma, numetacavaca ena achaneana natsecavahi.

<sup>29</sup> Núti nímicutijirisinahe: Te natarihi ena araimanahi, namutu ena nacaichuhasiqueneana tiúrisamureanahi eta náimairahi ena araimana. Nacunachahi ema arayena. Ene nucaherihi núti eta núrisamurevahi eta nímairahi puiti eta nacunachirahi ema Jesús.

<sup>30</sup> Éma, te jácani mapaisihayarepahi, tiápajucavayarepaipa eta macunachacarevaya. Éma, mapaenumavapa tépanava eta macaemataneasira ema Viya. Núti núrisamurehi tayehe

éta. Núti, tiánehipa eta nítouchirainapa eta nématane. Tásicha, váhirichu nucunachacare núti –macahepa ema Juan.

### *Ema Jesús másihaguenehi te anuma*

<sup>31</sup> Ema Jesús, máimatininehi tamutu eta táichararacavanahi te anuma taicha másihaguenehi éma te anuma. Víti achaneana viávihahi vicavasanahi te juca apaquehe, vímatihi étachucha eta táichararacavanahi te juca apaquehe. Émasera ema Jesús, eta másihairahi te anuma, tímatihi tamutu, tiápajupanavahi eta maitupajijasiravahi. Ticachuricahavihi.

<sup>32</sup> Éma, tímitecahi eta mame tasirahavi tamutu eta máimahagueneanahi étapa eta masamaqueneana te anuma. Nájinayarénisera nasuapahini eta macayemaqueneanahi.

<sup>33</sup> Vítisera viti visuapanahí eta mame tarapiana, vímatihi eta yátupihi eta máechajiruvana ema Viya mámaqueneanahi ema maca Jesús.

<sup>34</sup> Taicha éma, vanairucahi me Viya, máechajisihayarehi eta máechajiruvana ema Viya. Énerichuvare tétavicavahi eta máimicatasirahí ema Espíritu Santo taicha mávaháahi éma.

<sup>35</sup> Ema Vicaiyuquene máemunacahi ema Machicha. Eta tacache, matuparacahi eta émairayarehi téchayare tamutu.

<sup>36</sup> Eta tacache, nácani ticasinánayare ema Machicha, máichecuarraigireyare eta náitaresiraya. Namutusera ena macasiñaranahanahi ema Machicha ema Viya, vahi titarecanaimahi, taicha tanasihi eta naviurevana táichavenehi eta napecaturanahi. Ticaicuñanayarehi maitavacac ayare.

## 4

### *Ema Jesús tiánucuha eta provincia Samaria. Ánaqui máechajicahi esu ésuna esena.*

<sup>1-3</sup> Tacache, camurianahi ena tivarahanahi tíjaracavanaya náehicaya ema Viáquenu. Tásicha, viti máimitureana vícacachasicavacahi éna. Émasera ema Jesús vahi máicachasiricahini. Camuripanana ena vícacachasiruana nayehe ena máicachasiruana ema Juan. Tacache, ena fariséoana nasamairiricapa. Náramipa. Navanecapa ena tiyaserecanaya. Tacache, te tisamauchavapa ema Jesús eta napanereuchirahí, majuni-jicapa eta Judea. Tiyanapa tichavahi tayehe eta Galilea, vítipa viti.

<sup>4</sup> Eta vipaisirapahi te achene, viánucuhapaipa eta te provincia Samaria.

<sup>5-6</sup> Te la dócepa te sache eta vítecapirahí te távihahi eta nória máepiyaruhi ema víyarahaini Jacob. Máijaracasicharipahi ema machicha José eta juca mayeheni apaquehe. Eta nória, tachacayahi eta avasarechicha ticaijare Sicar. Tacache, eta

mavitairapaipahi ema Jesús, tíchecanumapa te tachausi eta nória.

<sup>7-8</sup> Eta víchesirahi, viyanapa viti máimitureana vivacharepanayarehi eta tinicacare te avasare. Macarichuipahi ema Jesús. Sucahepainecha esu ésuna esena indigenahi samartana tícapanayarehi. Tacahe, máechajicapa ema Jesús:

—Nuchicha, picatajicanu picajinu une —máichapa.

<sup>9</sup> Tásiha, esu esena sujicapapa:

—Píti israelítavihi. ¿Tájaha tacayema piyaseacanu eta une, nuti samaritánanuhi, vahi pijaneananuinahini? —suíchapa. (Ani tacahehi eta suéchajirisirahi, taicha ena israelítana énapa ena samaritánoana vahi náurianacacahini.)

<sup>10</sup> Tásiha, ema Jesús majicapapa:

—Te pímatihini eta mavarahaqueneanahi tíjaracavi ema Viya, téhevare pímatinuhivaréni núti nuyaseacavihi eta une, németeaca piyaseacanuipahíni eta une ticaitarecarahi. Tásiha, núti níjaracavihíni —máichapa.

<sup>11</sup> Tásiha, esu esena suíchapa:

—Tata, tiúpenahi eta juca nória. Píti, tájina enurena piviyahini eta une. ¿Távihasica tásihayare eta une ticaitarecarahi eta pivarahaquenehi píjaracanu?

<sup>12</sup> Eñi viáchucaquenéni Jacob, vímaequenéhahi eta juca nória ñépiyaruhi. Nérirarénihi eñi énapa ena ñichichanaveana. Énerichuhi táerihahi eta ñiyeheana sárareana. ¿Piti pímijachavapuca picuchucalahini eta tiúriamapana une? —suíchapa.

<sup>13</sup> Ema Jesús majicapavarepa:

—Namutu nácani téranayare eta juca une tiápechavanayarehi timauneanaya.

<sup>14</sup> Nácanisera téranayare eta une níjararuyarehi núti, vaipa tiápechavanaimahi timauneana. Taicha tacajurucayarehi eta náuricacareva. Tiúrinainavarepa eta náitaresira. Ticaitarecavayare máepenacacayare —máichapa.

<sup>15</sup> Tacahe, esu esena, eta susamirahi eta máechajiriruvanahi, suíchapa:

—Tata, píjaracanupaini eta une ticaitarecarahi, apaesa vaipa nucuapechavaini numaune. Váipavare nucuitecahini eta te juca nória népanahini une —suíchapa.

<sup>16</sup> Ema Jesús majicapavarepa:

—Piyana, píchuhapano ema pima. Piáma eta ani.

<sup>17</sup> Ésusera sujicapapa:

—Nájina nímaina.

Tásiha, ema Jesús máichapa:

—Pitupiruva eta juca pimetasiranuhi eta nájinairahi pímainahini.

<sup>18</sup> Cíncoganapaipahi ena pímanaveanainihi. Tásicha puiti, ema picachanequenehi váhivare pímainahini. Pitupiruvahí eta péchajiriruvahí —máichapa.

<sup>19</sup> Tacahe, tiáramecarinehi esu esena eta susamirahi éma eta máichirahi. Tásicha, suíchapa:

—Tátachicha, németeacavihi eta pítiquenéravihi profeta. Nuvaraha pimetacanuya puiti, ¿távihapuca eta yátupiquene viyujarasirareyarehi?

<sup>20</sup> Taicha ena viáchucanaveanaini samaritánoanaini eta nayujarasiraréni eta te juca táinahu eta cerro. Puíticha tanasirichuhi eta viyujarasirarehi. Étisera eti israelítana, eta emetarapi eta viyujarasirareyare ñe Viya téhenapa te Jerusalén —suíchapa.

<sup>21</sup> Ema Jesús mametacapa:

—Nutupiruva numetacavi, nuchicha, ánipa táenasihayare puiti váipa tácamesaimahi íteca eyujaraca me Tata te juca táinahu eta cerro étaripa eyanahipucaini te Jerusalén. Tamutuinapa eta táurivayare eta eyujarasihayare.

<sup>22</sup> Eti samaritánoana, apaesachicharichu eta ímatirahi ema Tata eyujaraurehi. Vítisera vímatihi ema viyujaraurehi, taicha viti israelítana víti vicatuparahahi viámayare eta máechajiriruvana ema Tata eta macuchucuirayare namutu ena achaneana ticasíñavanahí mayehe.

<sup>23-24</sup> Numetacaviya eta apana: Ema Tata, tiávihahi te anuma, jéhevare éma, yátupiquenehi Viya. Vahi mátejinhini eta maeche macutihini viti achaneana. Eta tacahe, nácani tiyujaracana mayehe, tatupiruvayarehi eta nasamure, tisuapajirahianahivare tayehe eta máechajirruana. Vahi tácamesaimahi ticasíñarajiana. Eta juca tacaheyarehi eta mavarahaqueneanahí ema Tata eta eyujarasirayarehi —máichapa.

<sup>25</sup> Tásicha, esu esena suíchapa ema Jesús:

—Téchacarehi eta ñítecapi-rayare te juca apaquehe eñi Cristo, ñivaneruya eñi Viya. Téchacarehivare eta ñimetasirahaviyare tamutu eta yátupiqueneanahí. ¿Píti, péchapuca tájamuhuya-repuca eta ñítecapi-rayare?

<sup>26</sup> Ema Jesús majicapapa:

—Nútira nuti mavanerunuhi ema Viya. Nútira ecuchapa-quenenuhi —máichapa.

<sup>27</sup> Tásicha, vítecapanechá viti máimitureana. Tacahe, viáraminehi eta máechajirisiravahí eta suyehe esu esena indigenahí. Vivarahahí viyasereca esu esena tájahapuca suvaraha eta mayehe. Vivarahahivare viyasereca ema Jesús tájaha tacayema eta máechajisirahi esu esena. Váhisera vipatsicava viyaserecahini.

28 Tásicha, esu esena sunaquinacapa eta suyupi. Tijunapapa tiyaná te avasare, sumetapanavacapa ena achaneana. Te títecacapa, suíchavacapa:

29 —Yare, ímahaya eñi achane profeta. Ñímatihí tamutu eta níchaqueneanahi néjecapiravanahí. Tamutuhí ñicuchuchujisínánuhi. Núti németeaca éñiripa eñi Ñivaneruhí eñi Viya, éñiripavare eñi vicuchapaquenehi ticaijare Cristo —suíchapa.

30 Ena achaneana sumetaruuanahi tiyananapa náehica esu eta te mávihahi ema Jesús, náimahapanayarehi.

31 Eta nayerevapaichaha ena achaneana suíchuhaque-neanahi esu esena, viti máimitureana víchuhapa ema Jesús tinicanumayarehi. Víchapa:

—Tata maestro, yare pinicanuma, apaesaina piávamina.

32 Tásicha, éma tijicapahavipa:

—Núti, jucarihi eta tinicacare tanicasarehi etá náchaneva emáimatiéquenérushi éti —máichahavipa.

33 Tásicha, véjecapavasamurepa víti. Víchacacapa:

—¿Náenicaipapuca jácani?

34 Ema Jesús máimatihi eta vianerueruanahi. Máichahavipa:

—Eta ticaitarecanuhi núti, eta nítouchirahi eta mavanairipiana ema Nucaiyaque, taicha nuvaraha nítouchaya tamutu eta nucaematanearisa éma.

35 Eta viyeherepi te véchajiruva: “Puiti vítapa eta vévasirapa eta trigo, cuátryare caje eta vicuchapira eta vicurujisiraya” vicahehi. Puítisera numetacahe núti: Vaipa táyeremahi eta vicurujisirainapa. ¡Ésenica puiti te achene! Nárajapa ena achaneana ena névaraquiánahí.

36 Ema Tata tíjaracaheya eta ícuchiyare te ímicatacanuyare eta vicurujisira ena nani achaneana apaesa náuchucuhayare, máichecuaraquireyare eta náitaresira. Tásicha, tétevícavaya eta viúrisamureva vimutu: éti, nútipa.

37 Ena achaneana, ticatisamurevanahi eta náechajirisira: “Vítira vévacahi eta vésane; apanapasera ema ticurujica” nacachehi.

38 Vítisera te juca vivapinavayare. Núti níchuhahéhi eta ecurujisiraya eta névaruhi. Énerichuvare nararihihi ena tínapucanahí viyehe eta nacae matanerahí eta juca. Puiti vivapinavaya eta vícuchiyare taicha vicuticacahi eta vicaematanearisa ema Viya —máichahavipa ema Jesús.

39 Ena ticavasanahí te jena avasare, camuriqueneanahí ena tisuapanahí eta émairahi Mavaneruhí ema Viya táchavenehi eta suíchirahi eta macuchuchujisinaquenehi tamutu eta suíchaqueneanahí.

40 Tásicha, tiyananapa tiácapahaviana. Te títecapanapa, émaquenepa nasamahi. Tásicha, náechajicapa mánasipanahini

nayehe. Masuapahisera ema Jesús. Apina sache eta mayerevahi, vítipa.

<sup>41</sup> Tacahe, eta manasipanairahi tayehe eta avasare, namutupa nasamahi eta máimiturapiana. Tacahe, camurianainehi ena tisuapanahí, téhicanahivare éma.

<sup>42</sup> Tásiha, náichavarepa esu esena:

—Puiti émaquenepa visamahi. Vaipa tácarichuhini visuapahini eta pimetarapihi. Véchapa viti apanava eta émaquenérahi ema Cristo, ema vicuchapaquenehi, ema ticuchucuhahaviyare vimutu viti achaneana —náichapa.

*Ema Jesús macanaraca ema machicha ema aquenuca majupahahi ema rey*

<sup>43</sup> Te táequenepa eta apinaquenehi sache, tiyanavarepa ema Jesús; macaijuhe eta te provincia Galilea. Véhicapaichuhivare viti apanava.

<sup>44</sup> Eta mayanirayarehi eta Galilea, vahi mácasiñavahichaini eta masuapacarevainahini nayehe ena achaneana. Émarichuhi, ani macahehi eta máechajiruvahi: “Mácani profeta, vahi tivapinavanahí eta najacapirahi ena achaneana te mávasa”.

<sup>45</sup> Téhesera te máitecapauchapaipa ema Jesús eta avasarechichana tinapaicanahí te Galilea, namutu najacapahi. Taicha náimatipa éma taicha náimahapa eta tiáramicareana máichaqueneana te mávihaipa te Jerusalén te jena piéstairahi eta Pascua.

<sup>46</sup> Tásiha, tiápechavavarepa mayanaucha ema Jesús eta avasare Caná, te máepiyasinehi vino eta une. Te apanahivare avasare ticaijare Capernaúm, matiarihihi ema majupaha ema rey. Macajumaquenehi ema machicha.

<sup>47</sup> Te masamairiricapa ema achane eta máitecapiraipahi ema Jesús te Caná, tiyanapa matanupanahí. Eta máichimavapa, mayaseacapa eta macatajicahini máehicavanehini te mapena, macanarapanahini ema machicha taicha ema macajumaquene tiánehiripa tépenayarehini.

<sup>48</sup> Émasera ema Jesús máimatipa eta masamure ema achane, tásiha, máichapa:

—Éti vahi esuapanuimahi, te vahi nímechahehi eta tiáramicareana —máichapa.

<sup>49</sup> Émasera ema achane máichapa:

—Picatajicanuchucha, tátachicha. Péhicanu, machu máepenacaru ema nuchichasami —máichapa.

<sup>50</sup> Ema Jesús majicapapa:

—Tiuri, piyana. Vahi picueñamava, ema pichicha vahi tépenaimahi. Máenahi tinaracaipahi nícha —macahepa.

Tacahe, ema achane masuapapa eta máichirahi ema Jesús. Tiyanapa tichavahi te mapena.

<sup>51</sup> Te tiánehipaipahi títecapa te mapena, nácapapa ena macajurureana. Náichapa:

—Tata, ema pichicha tinaracaipahi.

<sup>52</sup> Tacahe, ema mayaserecavacapa:

—¿Tájaha hora te tinaracapa ema nuchicha?

Éna náichapa:

—Cape te la una te cáperehi, táetaviacapa eta fiebre — nacahepa.

<sup>53</sup> Tásicha, ema achane máechapa étairaichuhi eta hora eta mametasirahi ema Jesús eta manarasiraipa ema machicha. Tacahe, ichaperinehi eta masuapirohi éma, énapa éna machichanaveanahi te peti, eta émairahi ema Cristo, Mavaneruhi ema Viya.

<sup>54</sup> Eta juca eta tápinanehi eta tiáramicarehi máichaquenehi te Galilea, te taequenepa eta machavirahi eta te Judea.

## 5

*Ema Jesús macanaraca ema achane macajumaquene eta muracaquihā, ema tiávihahi te tachacaya eta noque ticaijare Betesda*

<sup>1</sup> Te taequenepa eta juca, tatiarihihi eta apana piesta eta viúrujisirávana te Jerusalén. Tiyanavarepa ema Jesús.

<sup>2</sup> Te jena viávasa, tatiarihihi eta ichape tapaja náimisia-pirare eta uvesana nacaparuasana. Tatiarihihivare eta ichape noque vímijarechahi Betesda. Ticayehehi cinco eta culerureana.

<sup>3-4</sup> Eta návhahi ena nacajumaqueneana púchuquiana, masariana, énapa ena muracaquihana. Namutu éna, ticuchapanahí eta macayamurisira eta une ema ángel. Tásicha, namutu tiyanana téchipapaicavana te une, taicha tímijachavana mácani tínapuca téchipaicava, tacanaracayarehi eta jácani majuma.

<sup>5</sup> Tacahe, matiarihi ema achane macajumaquene. Tréintayochó áñoripahi eta macatajivairahi.

<sup>6</sup> Tacahe, te tisiapapaipahi ema Jesús, máimahapa ema achane macajumaquene tívecahi. Máimativare eta tayer-vaipahi eta macajumairahi. Mayaserecaba:

—¿Pivaraha pinaraca, nuchicha? —máichapa.

<sup>7</sup> Tásicha, ema achane majicapapa:

—Nuvaraha, tata. Nájinaserá ticasianpanuimahi tayehé eta noque, te tiyamurieca eta une. Ticachuricanuanaparaca ena apamuriana nucutiqueneana nacajumaqueneana — máichapa.

<sup>8</sup> Tacahe, ema Jesús máichapa:

—Péchepuca, piveha eta pímacaraji. Piyana pipaica —máichapa.

<sup>9</sup> Tásicha, eta máichirahi ema Jesús, enevanerinehi tinaraca ema achane. Mavehapa eta máimacaraji. Tiyanapa tipaica.

<sup>10</sup> Eta sache manarasirahi ema achane, sávarumuuhuhi. Ticapicahuhi eta jena sache nayehe ena israelitana. Tacahépa, te náimahapa ena tuparairucana, nacajachapa éma. Ánipa ná icha:

—¿Tájaha tacayema vahi pipicaucha puiti juca sache tacapicahuquenehi? Vahi vísapa piámahini eta pímacaraji puiti juca —náichapa.

<sup>11</sup> Ema achane majicapavacapa:

—Vahi nútina tásicha. Ema maca achane ticanaracanuhi, tivanecanuhi. Máichanuhi: “Piveha eta pímacaraji. Piyana pipaica” —máichavacapa.

<sup>12</sup> Tásicha, éna nayaserecapa:

—¿Nájahasica ema tivanecavihi pipaica eta piámirapahi eta pímacaraji? —náichapa.

<sup>13</sup> Émasera ema achane vaipa máimatihini eta máijare ema ticanaracahi. Váipavare náetupiacacarehini ema Jesús te namuri ena camuriqueneana achaneana taicha tiyanaripahi.

<sup>14</sup> Téhesera te táequenepa, tiyanapa ema achane eta te Templo. Ánaqui títecavarepa ema Jesús. Te náimahapa ema Jesús ema achane macanararuhi, máichapa:

—Píma, vaipa picuapechava picucapecatura, machutachavauchavi eta pijuma, máchuvare pávetiji —máichapa ema Jesús.

<sup>15</sup> Tacahe, eta máimatirapa, ema achane tiyanapa mametapanavaca ena tuparairucana eta émairahi ema Jesús ema ticanaracahi.

<sup>16-18</sup> Eta tacahe, ena tuparairucana tisemanapa. Ichaperinehi eta nacatianasirahi ema Jesús táichavenehi eta macanarasirahi te jena sache sávarumuuhuhi tacapicahuquenehi. Tásicha, títecapanapa, éna ticaratacanayarehini ema Jesús. Émasera máimatihí eta napanereruana. Tacahe, máichavacapa:

—Ema Tata tamutuchucha sache ticaematané. Ene nucaheyarehi nuti apana. Nítauchayare eta mavanairipiana —macahepa.

Eta nasamirahi ena tuparairucana eta máichiravacahi, navetijipaicha eta nasemirahi. Navarahapa nacapacavaneyarehi éma. Eta tiviuchahi eta macanararesirahi te sávarumuuhana, náimijachirahi máepuruhi eta nayeherépi. Taveti-jipaicha eta máimicaecherachiravahi Machichirahi ema Viya, Víyairahi ema apana.

*Ema Jesús macatuparahaquenehi me Maiya*

19 Énerichuvare ema Jesús máichavacapa:

—Nutupiruva numetacahe: Nuti Machicha ema Viya, eta nutuparahanahi mayehe, váiparinehi nútijiricavaimahi nícha jácani nuvarahaqueneanahi. Núti nímatiequenehahi tamutu eta máematanerepihi ema Ticachichanu. Étayareichuhi níchayarehi nútí.

20 Taicha yátupihi eta máemunasiranuhi ema Ticachichanu. Eta tacahe, tímechanuhi tamutu eta máematanerepiana. Énerichuvare tíjaracanuyareva eta nímechiraheya eta apamuri tiáramicareana. Tiápajucavayare eta táramicarevayare, apaesa iáramirineyare, epicayareva.

21 Ema Tata marataha macaechepuca ena náepenaqueneana, máimichavayarehi macaitarecavacaya. Énerichuva nuti Machicha, nuratahavare nucaitareca nácani nuvarahaqueneanaya, níjaraca eta náitaresiraya.

22 Nucatuparahahivare mayehe ema Tata eta nímairaya eta nacaicuñairayare namutu ena náejecapavaqueneanahi. Vaipa émainahi tícuñareca éma.

23 Taicha mavarahahi epicauchanu nuti Machicha, tacutirichu eta epicauchirahi ema Tata. Nácanisera vahi tipicauchuanuanahi nútí, váhivare napicauchaimahi ema Tata.

24 Yátupiquenevare numetacahe eta juca apava. Nácani ticaquiñanayare tisuapanayare eta néchajiriruvana, nasuapavare eta nucavanahirahí mayehe ema Tata, éna titarecanayare, vaipa ticaicuñanaimahi. Taicha éna, tiúchuchuhanaripa tayehe eta náicuñayaréni te yucu. Náicuchihi eta náitaresiraya.

25 Tacutiquene nutupiruva numetacahe nuti Machicha ema Viya. Táitecapaquetenepa puiti juca sácheana, tisamanuayare ena achaneana, tayanapane tépenahi eta náchanevana. Te nasuapajirahipuca, nucaitarecavacayare eta náchanevana.

26 Taicha ema Tata namutuhi marataha macaitareca. Ene tacahe eta máijarasiranuhi nútí Machicha eta namutuyareva nurataha nucaitarecavaca.

27 Énerichuvare tituparacanuhi eta nícuñasiravacayarehivare taicha yátupiquenenuhi manerejirunuhi.

28 Vahi ecuarami eta juca numetasirahehi. Járajapa eta sácheyare eta nasamirayare namutu ena náepenaqueneana eta nahu nútí.

29 Téchepucanainapa namutu te náecariana. Nácani tíchanahi eta táuriqueneana, titarecanainapa. Énasera ena tíchanahi eta tamauriqueneana, ticaicuñanainapa.

*Ema Jesús máimereca eta macavanahirahí me Viya*

<sup>30</sup> Núti vahi nútijiricaváimahi nícuñareca. Nucuchapayarehi eta mavanairipi ema Tata, ema tivanecanuhi. Tacahe, te nícuñareca, vahi numapachichijicaimahi, tatupiruvayarehi nícha. Taicha tacahéhi eta mavarahaquenehi ema Tata.

<sup>31</sup> Te nácarichu núti nútijiruvainachuchaini eta nímere-ruanahi, vahi tácamesahini esuapanuhini.

<sup>32</sup> Váhisera nucarichuimahi, taicha matiarihihi ema apana titametasinanuhi, émaripa ema Juan Tícacahasiricarahi. Nímatihí núti eta matupiruvahí eta máichaqueneanahí eta tímereuchanuhi.

<sup>33</sup> Éti ecavanairipipa nayasereca ema Juan te nájahanu-hipuca núti. Matupiruvahisera éma eta majicapiravacahi eta nútiqueneipahi éma ecuchapaquenehi.

<sup>34</sup> Váhisera etáparacaimahi eta juca eta matiarihirahi ema tímereuchanuhi. Eta ticamunucarepanahí eta esuapiranuina apaesa iúchucuhaiya éti nicha núti.

<sup>35</sup> Ema Juan tímicutijiricavahí timícauchahehi tayehe eta mame tarapihi eta eyehe, te jena sácheinahí esamararasirahí éma. Iúrisamureinehi ichape, taicha eta tamicauchirahehi eta máechajiruva.

<sup>36</sup> Váhisera mácarichu eta máimicae cherachiranuhi ema Juan. Jararihi eta apana támimicae cherachiranuhi, tiápajupanavahí eta táramicareva. Taicha núti nicha eta nématane-repiana máijararunuhi ema Tata.

<sup>37</sup> Émaripa ema Tata tivanecanuhi. Éma, vahi macutihémahi éti achaneana. Vahi esamahini eta mahu, váhivare ímahaimahi eta máquehe. Téhesera te jena Sagrada Escritura, timetacahéhi eta nítcapiraya.

<sup>38</sup> Éti vahi evarahahini esuapanuhini nuti mavaneruhi éma. Éta tímereuchahehi eta váhivare iúncalahini eta máechajiruvana te esamureana.

<sup>39</sup> Éti, tamapuriji eta ecaravahirahí eta Sagrada Escritura. Ímijacharipapuca eta ticaitarecaheyarehi. Váhisera ímatiequenahini, váhivare ácaicutiarahini eta nútirahí taechajisihahi núti nucaitarecayarehi.

<sup>40</sup> Tacutiquene vahi ávarahahini epauchanuhini éti, níjara-cahehini eta ítaresiraya máitavacacainahini.

<sup>41</sup> Núti vahi nácamea nacunachanuhini ena achaneana.

<sup>42</sup> Títecapa, nímatihevacahi emutu éti eta emaemunasirahí ema Viya.

<sup>43</sup> Núti nuvanecasivarichuhi me Tata eta nítresirahi. Étisera vahi esuapanuhini, váhivare ejacapanuhini. Téhesera te máitecahini mácani apana achane, tímijachavapuca Cristo ema ecuchapaquenehi, masapihapucaini ema tisuapacarehini eta eyehe.

<sup>44</sup> Éti, vahi esuapanuhini taicha eta evarairahi ecunacha-careva ena achaneana. Esapihachucha éti vahi ávarahahini ecunachacare me Viya.

<sup>45</sup> Váhisera nútinayare numetauchahe eta me Tata. Máimahaherinepa ema Moisés. Éma timetauchaheyare. Éti ímijachavahi ticuchucuhahheyare eta evarairahi ítaucha eta mavanairipiana éma. Tamapurujihisamisera.

<sup>46</sup> Te yátupinahini esuapahini eta mamarapiana ema Moiséini, esuapanuhivarepucaíni nútí taechajisihaquenehi eta májureanahi ema Moiséini.

<sup>47</sup> Váhisera esuapahini eta májuchaqueneanahi éma. Tavetijipa eta emasuapiranuhi eta juca numetarapiana eyehe — macahepa ema Jesús.

## 6

*Ema Jesús máitaparahahi máenicavaca ena camuriqueneana achaneana*

(Mt 14.13-21; Mr 6.30-44; Lc 9.10-17)

<sup>1-4</sup> Te taequenepa, te jena sácheana tiánehipa eta Pascua, vipiestarasahi viti israelítana. Émasera ema Jesús, tiyanavarepa tiámahavivare eta viánuecahi eta cáquiure Galilea (ticaijarehvare Tiberias). Camurianasera ena achaneana tipaicanapahi téhicanapahi éma, taicha eta náimairahi eta tiáramicareana máichaqueneanahi eta macanarasiravacahi ena nacajumaqueneana. Te vítecapapa te apachara, viyanapa te jácani anuquerehi mávapahi. Taache, véjacapa vinaracayarehi.

<sup>5</sup> Téhesera te máimahapa ema Jesús ena camuriana achaneana eta náitecapauchirahi, máichapa ema vichamuri Felipe:

—¿Távihapucaini vivacharesihaini eta tinicacare vénishahini namutu ena nani achaneana? —máichapa.

<sup>6</sup> Eta juca mayaseresirahi étachuchanéni eta mavarairahi éma macaicutiarayarehi te tájahapuca macayemayarehi ema Felipe. Taicha ema Jesús máechahi eta máichaqueneyarehi.

<sup>7</sup> Tásiha ema Felipe majicapapa:

—Tacamunuhi vácayehéhini eta camuri plata apaesa namutupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —macahepa.

<sup>8</sup> Tásiha, téchajicapa ema nuchamuri Andrés, maparapehi ema Pedro. Máichapa:

<sup>9</sup> —Mararihi ani ema émana amaperu tiámapahi eta cincochichapahi eta pan, apinapa eta jima. ¡Váiparinehisera nárataimahi ena nani camuriqueneana achaneana! —macahepa.

**10** Émasera ema Jesús máichahavipa:

—Evaneca náejahapaica námutu ena achaneana —macahepa.

Taicha tiúrinapahichíchahi eta apaquehe, muíjipahihivare. Cinco mil eta náichapemurivahi ena ajairana. Vahi náimutupachahini ena esenana énapa ena amaperuana.

**11** Tacahe, ema Jesús mavehapa eta páneana. Te tamutupa eta mahasulupayachirahi ema Viya, tíjaracahavipa. Véniricapa víti, víjaracavacapaipa eta pan étapa eta jima. Tisimurivacapaipahi eta víjaraca.

**12** Tinicanapa namutu. Tisatuheanapa, nacaemacharichahavare. Tásicha, ema Jesús máichahavivarepa:

—Ecurujica eta náemacharajianahi, machu támapuruji —macahepa.

**13** Tásicha, víti vicurujicapa eta pan náemacharajianahi. Táinicachaichahavare eta dócehiquene ichapehiana saye.

**14** Tacahe, eta náimairahi ena achaneana eta juca máichaque-neanahi ema Jesús, ichaperinehi nárami. Tásicha, nacahepa:

—Émaripa ema maca profeta ema vicuchapaquenehi máiteruyarehi te juca apaquehe —nacahepa.

**15** Eta tacahe, navarahapa námayarehini nayeheyarepa rey. Émasera máimatipa eta napanereruhi. Tacahe, térajicavavarepa eta nayehe. Tiyanapa macarichuhi te tápusi eta cerro.

*Ema Jesús mapainaeca eta une*

*(Mt 14.22-27; Mr 6.45-52)*

**16** Tacahe, te jena cáperehichichapa, viyanapa viti máimitureana tayehe eta cáquiure.

**17** Te vítecapapa, viávacuhapa te pacure. Viánuecayarehi te apachara. Vicaijuheyarehi eta avasare Capernaum. Tivehahavipa eta yati eta viánuesirahi. Ema Jesús májinahi macachanahavipahini.

**18** Eta vipaisirapahi, tachimaracapa eta muraca técaticava. Tépacucapa muraca eta cáquiure.

**19** Cinco kilómetroipahi eta viyerehivahi, vétupiecapaipahi, te vímahapa ema Jesús. Mapaicaecapaipahi eta une, tipauchahavipaipa. Víti vipicapa eta vímairahi.

**20** Émasera máichahavipa:

—Vahi ecupicanu. Nútichucha.

**21** Tacahe, vímatipa éma. Viúrisamuréinehi eta vijacapirahi eta mávacuirapa eta te vipacure. Tásicha, vítecapanecha eta te vicaijuheyarehi.

*Ena achaneana natanujiricaipahi ema Jesús*

**22** Te apanapa sache, ena achaneana manaquiruanahi ema Jesús, natanujiricaipahi éma. Náimatiacapa eta vicarichuirahi viánueca viti máimitureana. Tájinahivare apanainahini pacure.

<sup>23</sup> Tásicha, tacahepainecha eta apana pacureana, nayehehi ena tiásihanahi te avasare Tiberias. Títecapanapa te tachacaya eta nanisinehi eta pan ena camuriqueneana achaneana.

<sup>24</sup> Tacahe, ena achaneana eta namaimairahi ema Jesús vítipa viti máimitureana, tiávacuhanapa te pacureana. Tiyananapa ticapayacahavianayarehi te Capernaum, natanusirapahi ema Jesús.

*Ema Jesús ticaitarecarahi*

<sup>25</sup> Te títecapanapa ena achaneana te apachara, náetupiacapa ema Jesús. Tásicha, nayaserecapa:

—Tata maestro, ¿tájamuhu pítecaphi eta ani? —náichapa.

<sup>26</sup> Ema Jesús majicapavacapa:

—Nutupiruva numetacahe: Eti etanucanupahi táichavenehi eta nénisirahehi nésatuhechirahehi. Váhisera ácaicutiarahini eta nímechirahehi eta tiáramicareana.

<sup>27</sup> Eti tamapurujipa eta ecañamarasiravahi etanuca eta enicaquenerepi taicha titavayarehi. Tatuparacahisera etanucayare eta tinicacare ticaitarecaheyarehi, máitavacacahi éta. Éтарa eta juca níjararuheyarehi nuti Manerejirunuhi ema Viya. Éta tímereuchanuhi eta yátupirahi nuvanecasivahi eta mayehe ema Tata —máichavacapa.

<sup>28</sup> Tacahe, éna nayaserecapa:

—¿Tájahapucaini eta mavarahaqueneanahi ema Viya eta vicaematanasirahi éma? —nacahepa.

<sup>29</sup> Ema Jesús majicapavacapa:

—Eta mavarahaqueneanahi ema Viya íchaqueneyare, esuapanuyare nuti mavanerunuhi —macahepa.

<sup>30</sup> Tásicha, ena nayaserecavarepa:

—¿Tájahasica eta tiáramicare pímechahaviyare apaesa visualpavipa? Vivaraha vímaha.

<sup>31</sup> Eta acane ema víyarahaini Moisés tíjaracavacahi ena viáchucaequeñeanaini tinicanahi eta ticaijare maná, ánaqui te apaquehe mávapahi. Taicha tacahehi eta taechajiriruvahi eta Sagrada Escritura ani tacahehi: “Máenicavacahi eta tinicacare tiásicha te anuma”. Piti, ¿pímijachavapa pirataha picachurica ema víyarahaini Moisés? —nacahepa.

<sup>32</sup> Ema Jesús majicapavacapa:

—Nutupiruvavare numetacahe. Éti, ichape eta ejecapirava. Ema víyarahaini Moisés, vahi émainahini macucupaicahini eta maná. Ema Tata, é mahi ticucupaicahi eta maná.

<sup>33</sup> Jararihi eta apana numetarapi eyehe: Puiti ema Tata mavaraha máijaracaheya eta yátupiquenehi tinicacarehi. Étaripa tinicacarehi tiásihahi te anuma ticaitarecavacayarehi

namutu nácani tijacapanaya. Étara eta tímitecanuhi — macahepa.

<sup>34</sup> Tásicha, najicapapa éna:

—Tata maestro, piyaseasinahavi ema Viya máijaracaha-vipaini máejehainahini eta tinicacare péchajisihaquenehi — náichapa.

<sup>35</sup> Tásicha, éma máichavarepa:

—Nútira eta yátupiquene tinicacare nucaitarecaheyarehi. Eta tacahe, nácani tisuapanuanayare, vaipa tiápechava-naimahi técuhana. Váipavare timauneanaimahi.

<sup>36</sup> Étasera eta níchaquene, ímahanuipaneni éti, váhisera esuapanuhini.

<sup>37</sup> Nuvaraha ácaicutiaraquenéna yátupina. Namutu nácani tipauchanuanayare, núti vahi névatajicavacáimahi taicha tásihaquenéichuhi me Tata eta máijarasiranuhi éna.

<sup>38</sup> Taicha núti, eta núcupsirahi te anuma, tímitecanuhi nítouchayarehi eta mavanairipiana ema Tata. Vahi nútijiruvainahini eta nítresirahi níchayarehi eta nuvarahaquenenahini núti.

<sup>39-40</sup> Eta mavarahaquenehi ema Tata eta mavanesiranuhi, nucaitarecayarehi nácani máijararunuanayarehi éma. Nácani tésenicanuanayare nuti Machicha, tisuapanuanayarevare, máichecuaraqureyare eta náitaresiraya te nucaechepecapacá éna te náecariana te jena sache táitecapapa eta népaníravacayare. Váiquene nucamitiacaimahi ema émanaimahi — máichavacapa.

<sup>41</sup> Tásicha, nararihi ena ticaecahirahiana eta máichiravacahi ema Jesús eta émairahi eta yátupiquene tinicacare, máucupairuhi te anuma, ticaitarecarahiyare.

<sup>42</sup> Ánipa náichacacahi:

—Tépiyahirahipa ema maca. Víti, vímathi ema maiya, ticai-jare José. Énerichuvare vímatihivare esu máena. ¿Tájaha tacayema eta macahechajiruvahi eta másihairahi te anuma? —nacahepa.

<sup>43</sup> Ema Jesús máichavacapa:

—Ámatina. ¿Tájaha tacayema épururahi?

<sup>44</sup> Nacarichu témunahiricavanaya tipauchanuana nácani máichuhuqueneanahi ema Tata. Eta tacahe, ena máichuhuqueneanayarehi éma, nucaechepecavacayare núti te táitecapapa eta sache népaníravacayare núti.

<sup>45</sup> Taicha tacahehi eta májurehi ema profeta víyarahaini Isaías, ani tacahehi: “Náimitucasivayareichuhi me Viya namutu ena achaneana”. Tacahe, namutu ena máimitureana ema Tata, énara tipauchanuanayare puiti.

46 Tayanapane váhihinéni náimahaimahi eta mamira ema Tata. Nucarichu núti nímahapa éma taicha étaquenehi eta násinehi eta mayehe.

47 Nutupiruvahi numetacahe: Nácani tisuapanuanayare, njáracayare eta náitaresirayare máitavacacayare.

48 Núti, yátupiquenehi eta nucaitaresiravacahi ena ticasíñavanahí eta nuyehe tacuti eta tinicacare tacaitarecahi eta viáqueheana.

49 Éti, ena iáchucanaveanaini tinicanahí eta maná te mávapahi apaquehe. Váhisera náitarecahini. Namutuhi tépenaracánahí.

50-51 Nácanisera tinicanahí eta néche, vahi tépenanaimahi. Taicha núti núcupaicaripa te anuma. Eta neche, yátupiquenehi tinicacarehi ticaitarecarahi. Nácani tinicanayare eta neche, máichecuaraqureyare eta náitaresiraya. Núti njáracayare eta neche taicha nuvaraha tacaitarecavacahini namutu ena achaneana –máichavacapa.

52 Tásicha, ena natarihiqueneana tiácapaemajircácanapa. Ena apamuriana, ánipa nacahe:

–¿Tájahapuca macayemahi eta máijarasirahavi eta maeche viniruyarehi?

Ena apamuriana, ánipa nacahe:

–Vaipa tétupicava eta juca mapanereruhi. Mavaraha vinicayarecacha eta máechenaváji –nacahepa.

53 Émasera ema Jesús máichavarepa:

–Nutupiruva numetacahe: Te épuruhipuca enica eta neche, nuti Manerejirunuhi ema Viya, te épuruhibarepuca éra eta nítine, vahi ítarecaimahi.

54 Taicha nácani tinicanayare eta neche, téranayareva eta nítine, éna máichecuaraqureyare eta náitaresira. Tásicha, núti nucaehepucavacayare te náecariana te jena sache népanírvacayare.

55 Taicha eta neche yátupiquenehi tinicacare tacaitarecarahi. Énerichuhi eta nítine, yátupiquenehivare téracare ticaitarecarahi.

56 Esamanuchaha. Nácani tinicanayare eta neche, téranayareva eta nítine, éna tiávhácanuanayarehi núti. Tásicha, núti návhácvacayareva éna.

57 Taicha ene nucahehi núti, tiávhácanuhi ema Tata. Tásicha, núti návhácahivare éma. Máitavacacahi eta máitaresira. Éma ticaitarecahuhi. Tivanecanuhivare nucaitarecaheyarehi. Tásicha, nácani tinicanayare eta neche, máitavacacayare eta náitaresira nícha.

<sup>58</sup> Núti núcupaicahi te anuma eta níjarasiraheyarehi eta juca yátupiquenehi tinicacare. Vahi táchutihí eta maná nanicaquenehi ena iáchucanaveanaini éti. Tépenaracanarichuchaséra. Énasera ena tinicanayare eta neche, máichecuaraquireyare eta náitaresiraya —máichavacapa.

<sup>59</sup> Tamutu eta juca máimiturapiana ema Jesús te mávihaipahi te náurujisirareva ticaijare sínagoga tayehe eta jena avasare Capernaum.

*Tacarichu eta máimiturapiana ema Jesús ticaitarerahi te visuapa*

<sup>60</sup> Tacache, ena téhicanahi ema Jesús, eta nasamirahi eta juca máimiturapianahi, camuriana ena vaipa návarahahini náehica. Ánipa nacahe:

—Ticajerapicha eta vicaicutiarirainahini eta juca máimiturapiana. Nájinavare tisuapanaimahi —nacahepa.

<sup>61</sup> Émasera ema Jesús máimatihi eta napanereruanahi eta namavarairaripa náimiyanavahini náehicahini. Tacache, máichavacapa:

—Páurehehi éti eta evaraha ínjica eta éhisiranu taicha eta emacaicutiarairahi eta nímiturapianahi.

<sup>62</sup> Németeaca ímiyanavaichucha eta emasuapajiraivahi, tayanapanepuca ímahanupuca eta nárairaya nuchavirayarehi te anuma, te návinehi acane, taicha nútí Manerejirunuhi ema Viya.

<sup>63</sup> Ácaicutiara eta nucayemaquenehi. Vahi étaparacaini eta néchaquene. Eta juca nímiturapiana, te esuapapa, étara ticaitarecaheya taicha yátupiquenerihi.

<sup>64</sup> ¡Páurehehi eti váhiquenehi evarahahini esuapanu! —máichavacapa.

Eta juca macayemaqueneanahi ema Jesús, matupiruvahi eta máichiravacahi taicha máimatipahi eta napanereruana ena tijunijiacanayarehi, émapa ema tíjararecayarehi.

<sup>65</sup> Tacache, máichavacapa:

—Puiti, evaraha ínajicanu. Eta tacachehehi eta níchirahéhi: “Nacarichu témunahiricavanaya tipauchanuana nácani máichuhauqueneanahi ema Tata” —máichavacapa.

<sup>66</sup> Eta nasamirahi eta nacayemaqueneanahi, tínajicavanapa ena camuriqueneanainihi. Vaipa náimiyanavahini náehicahini ema Jesús.

<sup>67</sup> Tacache, tiyaserecahavipa viti dócequeneana máimitureanahi. Máichahavipa:

—¿Evarahainapapuca ejunijicanuyare éti apanavare?

<sup>68</sup> Tacache, ema Simón Pedro majicapapa:

—Tata maestro, vahi vijunijicavimahi, taicha nájina pácuti eta péchajiruvana. Tétavicavahi eta tacaitarecaraivahi.

<sup>69</sup>Víti vitupiruvahí eta visuapiravihi. Véchahivare eta yátupi- quenéravíhi Cristo, Machichaquenévihi ema yátupiquenéhi Viya —máichapa.

<sup>70</sup>Ema Jesús majicapapa:

—Dócehehinéni eti nunerejiruanahi. Mararihisera ema émana te etaracu, ema mávaháruhi ema Váinaraji —máichahavipa.

<sup>71</sup>Ema Jesús, máechajisihahi ema Júlasi. Taicha ema Jesús máimatihi eta émairayarehi tíjarareca, tayanapane éma videocenénihi viti apóstoleana.

## 7

*Ena maparapenaveana ema Jesús váhivare nasuapa*

<sup>1</sup>Tacahe, ema Jesús tímiyanapaipahi tipaicapaipahi eta avasareana te tinapaica eta Galilea. Vahi mavarahahini machavahini tayehe eta avasareana tinapaica eta Judea, taicha ena tuparairucanahi te Jerusalén napanerechaipahi nacapacayarehi éma.

<sup>2</sup>Tacahe, te jena sácheinahí, tiánehipa eta vipestara viti israelítana eta vicapenahuiyavacahi eta viyusujiana. Étahi eta vítecapihavacahi te Jerusalén, vihasulupayacha me Viya eta macajurusinahavihi eta visucureana te vésaneana.

<sup>3</sup>Tiuri puiti, natarihihi ena maparapenaveana ema Jesús. Tacahe, náichapa éma:

—Te pímijachava pítira máestrovi, vahi pánasi eta te ani. Piyana te Judea, apaesa ena pímitureana tiávihanahi ánaqui náimaha eta píchaqueneanayare.

<sup>4</sup>Taicha te pivarahahipuca náimativi ena achaneana, taca- munuhi pímerecava yátupina te namirahu namutu. Vahi picuyumuruca eta pítucaqueneana —náichapa.

<sup>5</sup>Taicha ena maparapenaveana váhiquenevare nasuapahini éma.

<sup>6</sup>Tacahe, ema Jesús máichavacapa:

—Vuíchaha táitecapauchanuhini eta nuyanirayare te Jerusalén. Étisera tamutuchucha tiuri eta eyaniraina.

<sup>7</sup>Nútisera ticatichuanahí ena achaneana táichavenehi eta nímereuchiravacahi eta náichaqueneana tamauriqueneana. Étisera vahi ticatichaheanaimahi taicha tájina taviuchahehini.

<sup>8</sup>Te evarahapuca, eyana éti te piesta. Nútisera vuíchaha nuyanaimahi taicha vuíchaha táitecapauchanuhini eta nuyanirayare —máichavacapa.

<sup>9</sup>Máevatacahi ema Jesús ena maparapenaveana, émasera ticaequenehavapa. Manasipanaichaha te Galilea.

*Ema Jesús tiyanarichuchanéni tayehe eta piesta*

<sup>10</sup> Te tiyananapa te piesta ena maparapenaveana ema Jesús, énerichuvaréni éma tiyanavarepa. Váhisera máimereca-vahichaini.

<sup>11</sup> Énasera ena tuparairucana natanucaipa éma, te jena piéstaqueñehi. Tásicha, nacahepa:

—¿Macánárihipucacacha ema mácani achane? —nacahepa.

<sup>12</sup> Énerichuvare ena achaneana natarihiqueneanahi te piesta, náechajisihahi éma. Ánipa nacahehi: “Vahi tiuri ema maena achane. Macaetemavaca ena achaneana”. Ena apamuriana ánívare nacahe: “Tiúrihi ema maca. Vémeteaca téavicava eta máurivahi”.

<sup>13</sup> Váhisera nacuchujipicahini eta nacayemaqueneanahi taicha tipicacaracavanarichucha nayehe ena tuparairucana.

<sup>14</sup> Te enumuhuquenepa eta piesta, mapaenumavapa tímerecava ema Jesús. Tiyanapa tisiapahi tayehe eta Templo. Tinahacavapa tímiturecahi.

<sup>15</sup> Ichape eta náramirahi ena tuparairucana, eta náimairahi eta máitusirahi yátupi. Tásicha, ánipa nacahehi:

—Ema maca vahi vímiturenahini. ¿Táviha maviyahi eta máitucaquenehi ema maca? Vahi mávamirahuini eta máimitusiravacahi ena achaneana —nacahepa.

<sup>16</sup> Émasera ema Jesús máimatihi eta napanereruanahi. Tac-ahé, máichavacapa:

—Vahi nútijiriruvaina nuvehahini te nuchuti eta juca nímiturapihanahi. Ema Tata tivanecanuhi, émahi tituparacanuhi eta nímitusiraya eta máimiturapihana.

<sup>17</sup> Te etiarihinapuca eti evarahahi ítaucha eta mavanairipiana ema Viya, ímatiacavaneyare eta juca nímiturapihanahi étairahi tiásihahi eta me Viya. Vahi nútijiricávainahini eta nímitusirahi.

<sup>18</sup> Mácani achane émajiricavahi téchajisihava, mavarairahi ticunachacareyarehi. Nútisera, eta nuvarairahi ecunachayare ema Tata tivanecanuhi, vahi népiyahirahimahi. Nutupiruvahi néchajisiha eta yátupiqueneana tisuapacareana.

<sup>19</sup> Échavarichu éti eta máijarasirahehi ema víyarahaini Moisés eta mavanairipiana éhiruyarehi. Váhisera ítauchahini éti émanainahini. ¿Tájahasica eta nuviureva eta evarairahi ecapacanuya? —máichavacapa ena tuparairucana.

<sup>20</sup> Ena achaneana najicapapa:

—¡Péjecapava píti eta pipanereru! ¡Máurishivipapuca píti! ¿Nájaha ticahehi eta vivarairahi vicapacavi? —náichapa.

<sup>21</sup> Ema Jesús tímianava téchajiricava nayehe ena tuparairucana, ánipa máicha:

—Táichavenehi eta nípuresirahi te jena sache tacapicahuquenehi sávarumuquenehi, éta tiviuchanuhi ichape eta eyehe.

<sup>22</sup> Étiyapa epamicavahi eta emarcachiraya mácani amuya ajaira te óchopa eta masacherahi, tayanapané sávarumuhipuca. Taicha ichape evaraha ítauchayare eta mayeherepini ema víyarahaini Moisés. (Váhisera émainahini máinapucahini manacuchahini eta juca eyeherepi. Ema viáchucaini Abraham énapa ena machichanaveana tínapucanahi nanacucha eta viyeherepiyarehi.)

<sup>23</sup> Te tiúrihi ímaha eta emarcachirahi mácani amuya alauchu te sávarumuhipuca, ítauchirapaipahi eta mavanairipi ema Moisés, tatuparacahe vahi ecusemahini eta nuyehe táichavenehi eta nucanarasirahi ema maca achane te sávarumuhipuca.

<sup>24</sup> Vahi ecuémunanásicava eta epanereruana. Epanerechinava tayehe eta táuriqueneana. Ácaicutiara eta táurivahi eta vicanarasirahi ena achaneana, tayanapané sávarumuhipuca —máichavacapa.

### *Ema Jesús máechajisihapa eta másinehi*

<sup>25</sup> Tacache, natarihi ena tinerejicavana ena ticavasanahi te Jerusalén, nacahepa éna:

—Ema maca, émara ema natanujiruasa ena tuparairucana, ema navarahaquenehi nacapaca táichavenehi eta máimijachirava ema Cristo mavaneruhi ema Viya.

<sup>26</sup> Ímahasera éma, vahi mapicacaracavahini eta macametarairuirahi te juca Templo. Nájinavare ena tuparairucana náijaracavahini nacaratacrahini. Nájinavare nacamatinaçahini. ¿Nasuaparipapuca puiti éna, eta émairahi ema Cristo?

<sup>27</sup> Vémeteacasera vuíchaha émaina ema Cristo, taicha vímatihi ema maca, étapa eta máuchusinehi. Te máitecapa ema yátupiquene Cristo, nájina téchaimahi távihapuca eta máuchusihayare —nacahepa.

<sup>28</sup> Émasera ema Jesús máimatihi eta napanereruana. Tásiha, muracapanapa eta máechajisirahi eta te Templo máimituresirahi. Ánipa macahe:

—¡Éti ímijachava ímatinuhi, étapa eta núchusinehi! ¡Váhisera ímati eta tímitecanuhi! ¡Váhivare ímati ema Eternoquenehi, ema tivanecanuhi! Núti, vahi nútijiriruvainahini eta nítresirahi.

<sup>29</sup> Nútisera nímatihi éma taicha étaquenehi násinehi eta mayehe eta nítecapauchirahehi —máichavacapa.

<sup>30</sup> Eta nasamirahi éna tuparairucana, tiápajupanavahi eta nasemanevahi. Navarahapa nacaratacayarehini, náeratacayarepaini, vuíchahasera másapahini ema Viya eta nacaratasira éma.

<sup>31</sup> Natiarihisera camuriana ena tisuapanahi. Tásicha, nacahepa:

—¡Víti vémeteaca émaripa ema Cristo ema maca! ¡Taicha nájina mácuti eta máichirahi eta tiáramicareana máichaque-neanahi ema maca! —nacahepa.

*Ena tuparairucana náevatacapa ena suntaruana nacaratapanayarehi ema Jesús*

<sup>32</sup> Ena fariséoana nasamaemachapa ena achaneana eta nacunachirahi ema Jesús. Tásicha, napanereuchavanepa ticurujicacanapa ena tuparairucana. Náevatacapa ena suntaruana nacaratapanayarehi ema Jesús te Templo te mávihahi.

<sup>33</sup> Tacahe, ema Jesús máichavacapa ena suntaruana:

—Vuíchaha tituparacahe eta ecaratacanuhini. Yátupisera ánipirine eta nucaheyare eta eyehe. Tásicha, nuchavainapa mayehe ema tivanecanuhi.

<sup>34</sup> Éti, etanucanuinapa, vahisera íchimavantuimahi. Taicha vahi ítujicavaimahi ecapayacanu te návhayare núti — máichavacapa.

<sup>35</sup> Tacahe, ena tictianacanahi tiyaserejiricacanapa. Ánipa nacahe:

—¿Távihapapuca macaijuhénapa eta vaipa viratahaimahi vicapayacaimahi víti? ¿Mavarahapuca tiyanayare te tayererehiquene avasare, macapayacaya ena vijaneananana israelítana tiávihanahi te tayererehiquene? ¿Mavarahapuca máimitucayare ena apavasanana?

<sup>36</sup> ¿Tájahapucáji tacayemahi eta juca máechajiriruvahi eta vaipa viratahaimahi vicapayaca te jácani macaijuheyare? —nacahepa.

*Tétavicavayare eta viúricacarevana maicha ema Jesús, tacutiya eta ichape cajacure táuchurehi eta máriana. Ticaitarecahaviya éma.*

<sup>37</sup> Te jena téqueneha sache eta piéstairahi, tímahacarepana eta jena sache. Tiyanavarepa ema Jesús te namuri ena achaneana. Titupihapa, téchajicapa muraca. Ánipa macahe:

—Te natarihinapuca nácani timauneanahi, náitecapauchanu. Núti níjaracayare eta náerayare nácani tisuapanuanayare —macahepa.

<sup>38</sup> Taicha ani tacahehi eta Sagrada Escritura: “Ema Maveneruhi ema Viya, tétavicavaya eta viúricacarevana máicha,

tacutiya eta ichape cajacure táuchurehi eta te máriana. Ticaita-recahaviya éma” tacahepa.

<sup>39</sup> Eta juca macayemaqueneanahi ema Jesús, máimicae-cherachahi eta masiaphasiravacayarehi ema Espíritu Santo te nasamureana nácani tisuapanayarehi éma. Vuíchahasera táitauchavahini, taicha vuíchaha machavahini mápanahini te mávasa te anuma ema Jesús.

*Apanapanepa eta napanereruanahi ena achaneana mayehe ema Jesús*

<sup>40-43</sup> Tacahe, ena achaneana apanapanepa eta napane-reruana mayehe ema Jesús. Ena apamuriana achaneana, nacunachapa éma. Ánipa nacahe:

—Yátupiquene ema maca achane, émaripa ema profeta ema vicuchapaquenehi máiteruyarehi.

Ena apamuriana, ánivare nacahe:

—Émaripa ema maca ema Cristo.

Énasera ena apamuriana, téjecapavanarichucha. Ánipa nac-ahe:

—Galileo ema maca Jesús. Váiparinehiséra étainahi máuchusihha ema Cristo tayehe eta avasare Galilea. Taicha eta Sagrada Escritura táchajisihahi ema Cristo émayarehi mámariequeneyarehi ema víyarahaini Rey David. Téhesera te avasare Belén eta máuchusihayare, étaichuhi te mávasahi ema víyarahaini Rey David —nacahepa.

<sup>44</sup> Natiarilihivare ena apamuriana navarahaichucha náemeratacayarehi, váhisera napatsicavahini nacarata-cahini.

*Ena tuparairucana vahi náurica eta nasuapirohi ema Jesús ena achaneana*

<sup>45</sup> Tacahe, ena suntaruana vanairucanahi tichavanapa nayehe ena tivanecanahi tuparairucanahi. Vahi náijaracava-hini nacaratacahini éma. Tacahe, náichapa ena tuparai-rucana:

—¿Tájaha tacayema vahi iámapahini éma?

46 Ena suntaruana najicapapa:

—Vítí vahi vipatsicavahini vicaratacahini éma, taicha téavicava eta máitupajijiásirava ema maca. Émahipuca ema Cristo vicuchapaquenehi. Nájina mácuti eta máechajisira ema maca achane —nacahepa.

47 Tacahe, ena fariséoana náichapa:

—¡Éti apanavare ísapavaipahi tivayuaracáhe ema mácar!

<sup>48</sup> Nájina émanaina ema tuparairuca viyehe viti nasuapahini ema máenatataji. Váhivare émanariipa vichamuri fariséo, vahi masuapahini.

<sup>49</sup> Énasera ena nani achanetatajiana máimatirahanahi eta viyehe ley, náehicávanetatajipa. Táurica nacaicuñahini táicha –nacahepa.

<sup>50</sup> Matiarihihivare ema Nicodemo, ema tipaipiuchahi ema Jesús te jena yátiquenehi. Fariséohivare éma. Máichavacapa:

<sup>51</sup> —Váiparinehi vétavicaimahi eta viyehe ley vítijiricavahini vicapacahini ema achane. Tacamunuhi véchanumayarehi eta maviurevahi –macahepa.

<sup>52</sup> Éna najicapapa:

—Vémeteaca píti apanavare pijaneanahipuca éma, pítiri-chupuca galiléovihi. Vivancavi péchajicuha eta Sagrada Escritura apaesa pecha vahi étaimahi te Galilea máuchusihayare ema profeta Cristo vicuchapaquene –nacahepa.

<sup>53</sup> Tacal, te titapiricanapa eta náechajisihairahi ema Jesús, téjanerecanapa. Tiyanaracanapa te napenana.

## 8

### *Esu esena ticayepehi*

<sup>1</sup> Ema Jesús májinari pahi. Tiyanaripa te tachachacu eta avasare, te cerro ticaijarehi Olivoquiji. Tatiarihihi eta avasarechicha ticaijarehi Betania, eta máitecapihahi éma.

<sup>2</sup> Te apanavarepa sache, te tijararahichichapa, tiyanavarepa éma tayehé eta Templo. Téjacapa éma, tímiturecapa. Namutu ena achaneana tiyananahi napaucha, nasamararacayarehi éma.

<sup>3</sup> Tacal, sutiarihihi esu esena ticayepehipuca, esu suvehahi ema apana achane. Ena escribánoana énapa ena fariséona, eta náimereuchirahi ésu, námapa te mamirahu ema Jesús te namurihi ena achaneana.

<sup>4</sup> Tacal, náichapa ema Jesús:

—Tata maestro, esu suca esena nachimaracahi ticayepehi, suvehahi ema apana achane.

<sup>5</sup> Eta viyehe ley máijararu havi ema víyarahaini Moisés, tímitucavahihi vicapacayarehi eta vitupisisirayare te márijahiana nácani ticapecaturanahi. ¿Tájahapuca picayema piti? —nacahepa.

<sup>6</sup> Éna nayaseserecahi ema Jesús, taicha natanucahi eta tiviuchayarehi éma. Émasera ema Jesús tétipaicapa tiájupairicapa te apaquehe te mavauqui.

<sup>7</sup> Énasera tímiyanavanarichucha nayaserecahi. Tacal, mae senimuri hapa. Máichavacapa:

—Te etiarihipuca éti mapecaturareanahi, enerejicava ínapuca eyuca esu suca esena —máichavacapa.

<sup>8</sup> Tacal, tétipaicavarepa tiájupairicavarepa éma.

9 Eta nasamirahi eta juca, téchavanarichuhinéni eta napecaturana. Titsirihacavanapa. Tásiha, timutserahavanapa tiúchuchujicana. Nativapa tiúchucanahi ena ichavicanana.

10 Te maeśenicavarepa ema Jesús, nájinari pahí éna. Sucarineipahi esu esena. Tásiha, máichapa esu esena:

—Nuchicha, tiyananapa namutu ena timetauchavianahi. ¿Nájinapa apanainahini ena navaraha ticapacaviana?

11 Tásiha, ésu suichapa:

—Nájina, tata.

Éma máichavarepa:

—Núti apanavare, váhivare nímicapacavimahi. Piyana pichava. Váipasera picuapechava picuquicha eta pecatu —máichapa.

### *Ema Jesús, ema namicahu ena achaneana*

12 Te táequenepa eta juca, tépanavavarepa tímitureca ema Jesús. Máichavacapa ena achaneana:

—Nútira numicauchahehi eti achaneana te juca apaquehe. Eta tacache, nácani téhicanuanayare, vahi téjecapavanaimahi. Taicha eta nímiturapiana, étapa timícauchavacahi. Tásiha, nacatichainapa eta timapicu, vaipa napauchaimahi —máichavacapa.

13 Tásiha, ena fariséoana natarihipahivare. Tacache, náichapa:

—Pítijiváichucha péchajisiavahi. Tájina pisuapacarevaina.

14 Ema Jesús majicapavarepa:

—Tisuapacare eta juca néchajiruvana, tayanapane nútijivahi néchajisiava. Taicha nímatihi nutuparahaichuhi eta nímeresiravayare. Nímatihivare eta nucajuheyare. Étisera vahi ímatihini távihapuca eta násinehi, váhivare ímati eta nucajuheyare.

15 Éti étachucha éhicahi eta nayeherepiana nanacaqueneana ena iáchucanaveanaini. Étasera tíchahehi eta épuruiranuhi. Nútisera vahi népuruhéimahi éti.

16 Jéhevareséra, te jácani sácheyare, népuruhepapuca táchavenehi eta emasuapirahi, tatupiruvayarehi eta népuruiraheya taicha vahi nácarichuimahi népuruhe núti. Matiarihi ema Tata tivanecanuhi. Ema apana máimahahi eta emasuapajiraivahi. Tépuruheyarehivare éma.

17 Te eyeherepi éti, te natarihipuca apinana ena titametacarohana, te ticuticacanahi eta náechajiriruva, tisuapacarea-nayarehi éna.

18 Ene nucahehi núti. Yátupihi eta numetarapiana. Émapa ema Ticachichanuhi, éma titametacahehi eta yátupirahi eta numetarapiana —máichavacapa.

**19 Énasera nayaserecavarepa:**

—¿Távihasica mávihahi ema ticachichavihi?

Ema Jesús majicapavarepa:

—Éti vahi ímatinu. Váhivare ímatimahi ema Ticachichananu. Te ímatinuhini, ímatipahivareini ema Ticachichananu — máichavacapa.

**20 Eta juca eta máechajiriruvanahi ema Jesús eta máimitu-resirahi tayehe eta Templo.** Eta máejasinehi te tachacaya eta nanasirareana eta námavahuana. Nájinasera napatsicavahini nacaratacrahini taicha vuíchaha másapavacaimahi ema Viya eta nacaratasirainahini éma.

*Ema Jesús tímereuchavapa eta émairahi Cristo*

**21 Ema Jesús tiápechavavare mamecacavaca:**

—Puiti tiánehipa eta nuyanirayare. Éti etanucanuinapa. Váhisera íchimavanuimahi. Émepenainapa eta epecaturana. Tímicuñacaheyare te infierno taicha vahi ecamapuravahini eta nutiarihirahi, esuapanuhini. Taicha vahi ítujicavaimahi ítecapa te návhaya núti —macahepa.

**22 Tásicha, ena ticatianacanahi náichacacapa:**

—Mavarahainapuca ticapacavayare. Táitusiava macahehi eta máechajiriruvahi eta váhiji viratahaimahi véhica éma. ¿Távihapuca eta macaijuheya? —nacahepa.

**23 Ema Jesús máichavarepa:**

—Éti tayehehi eta apaquehe. Nútisera tayehenuhi te anuquehe. Eta iávasahi éti te apaquehe iávihahi. Núti návasaichuhi te anuquehe.

**24 Eta tacache, numetacahenumahi eta tanasinapa eta epecaturana te épenapa.** Taicha te vahi esuapanuhini eta nútiquenérahi ema ecuchapakuenehi, tanasiyare eta epecaturana te épena —máichavacapa.

**25 Tacache, nayaserecampa éna:**

—Piti pímjachava mavaneruhi ema Viya. ¿Nájahavisica pítinavaji?

Ema máichavarepa:

—¿Áyahapapuca numetacache?

**26 ¡Tétavicavahi eta tamuracavahi eta esamureana!** Tavaraha muraca eta nucajachiraheya. Vuíchahasera nicha. Émasera ema tivanecanuhi, tatupiruvahi eta máechajiriruvana. Eta tacache, eta néchajiriruvana núti eyehe eti achaneana, étarichuhi eta nusamaqueneanahi mayehe —macahepa.

**27 Énasera váhiquene nácaicutiarahini eta mametasiravacahi eta mayehe ema Maiya.**

**28 Tásicha, máichavarepa:**

—Jéhevaresera te ecatupihanupa te anuquehe, tapaenumavainapa ímatinuyare eta nútiquenerahi ema Cristo ecuchapaguenehi. Ecaicutiarayareva yátupihi nímitucahe eta máimiturapiana ema Tata. Vahi étaina nuviyahini te nuchuti nútijiruvainahini.

<sup>29</sup> Puíticha, ema Tata ticachanenuhi, vahi majunijiaca-nuhini, váhivare nácarichuhini taicha nítuchaipahisera núti eta mavarahaqueneanahi éma —máichavacapa éna.

<sup>30</sup> Eta nasamirahi ena achaneana eta mame tarapianahi, ichaperinehi eta nasuapirahi ema Jesús ena camuri-queneana achaneana.

*Tímaticareana ena mavanarana ema Viya énapa ena tavanarana eta pecatu*

<sup>31</sup> Tacahe, ema Jesús máichavacapa ena tisuapanaripahi. Máichavacapa:

—Te ímiyanava ecaratacava eta esuapirahi eta nímiturapiana, éti yátupiquenehe nímiturehehi.

<sup>32</sup> Tásicha, ímatinapa eta yátupiqueneana táuriqueneana. Vaipa vanaracahémahi éti —máichavacapa.

<sup>33</sup> Nararihihisera ena ticanarajiricanahi éma. Náichapa:

—Viti mámariequenehávini ema viáchucaini Abraham. Tájina vímatiyahini eta vítaresirahi nacavanarahavihini. ¿Tájaha tacayema eta picachehi vaipa vanaracahavimahi? —nacahepa.

<sup>34</sup> Ema Jesús máichavarepa:

—Nutupiruva numetacahe: Namutu nácani tíchanahi eta pecatu, tavayuaruanahi éna. Nacutihi ena vanaracana taicha téavicava eta tavayuasiravacahi.

<sup>35-36</sup> Ímijachavaipahi machichahehi ema Viya. Váhisera tacahehini, taicha tavayuaruhehi eta pecatu. Nútisera nuti Machicha ema Viya nuratahahi nucuchucuhahe. Vaipa vanaracahémahi. Vaipa tivayuacahémahi eta pecatu. Jéhesare, yátupina eta machichaheraya, máichecuaraquireyare éta.

<sup>37</sup> Néchahivare núti eta mámariequenehérahi ema viáchucaini Abraham. Epanerechaichuchasera ecapacanu, taicha ecatichahi eta nímiturapianahi.

<sup>38</sup> Núti néchajisihahi eta máimechaquenénuanahi ema Tata. Étisera étachucha íchahi eta mavanairipianarichuhi ema ticachichahe —macahepa.

<sup>39</sup> Éna najicapapa:

—Viti machichaequeneánaichaha ema viáchucaini Abraham —nacahepa.

Ema Jesús máichavarepa:

—Te yátupinahini machichaequenehénahini ema Abraham, ecutihini éma eta yátupirahi eta macaemataneasirahi ema Viya.

<sup>40</sup> Esapihahi éti, epanerechaichucha ecapacanu. Ema Abraham, vahi tácahehini eta mapanereruhi éma. Núti numetacahehi eta yátupiqueneana mapanereruana ema Viya. Váhisera esuapanuimahisami.

<sup>41</sup> Éti ícharichucha eta máichaqueneasahi ema ticachichaha —máichavacapa.

Ena najicapavarepa:

—Víti vahi apáchichahávina. Émanaichu ema ticachichahavi, ema Viya —nacahepa.

<sup>42</sup> Ema Jesús majicapavarepa:

—Te yátupinahini machichahenahini ema Viya, etupiruvai-pahini émunacanu. Taicha nútí étaquenehi násicha me Viya. Vahi nútijiruvainahini eta nítésirahi puiti. Nuvanecasivahi mayehe.

<sup>43</sup> ¿Tájaha tacayema vahi árataha ecaicutiara eta nímiturapiana? Étaserapuca eta emavarairahi esama.

<sup>44</sup> Nútisera nímicaecherachinaheyare ema ticachichaha. Émara ema Váinaraji. Ema téchahehi, taicha evarahahi íchayare eta máichaqueneana éma. Taicha éma, ticapahi eta máitaresirahi te tépanavainapa. Váhiquene mávarahahini máehicahini eta yátupiqueneana. Étachucha máurica tivayuarereca. Tépiyahirahipaipa. Máurihayapara eta máimahi. Éma, náiyahi ena tépiyahirahiana.

<sup>45</sup> Eta echichairahi ema maca tépiyahirahi, váhiquenehíni esuapa eta juca nímiturapiana yátupiqueneana.

<sup>46</sup> Éti, ímijachanupuca jararihi eta néjecapiravahi. Nutupiruvahinenisera eta numetasirahehi eta yátupiqueneana. ¿Tájaha tacayema vahi esuapanu?

<sup>47</sup> Taicha nácani mayeheanahi ema Viya, náuricayarehi nasamararaca eta máechajiruvana ema Viya. Étisera vahi machichahénahini ema Viya. Eta tacahe, vahi iúricahini esamararacahini eta máechajiruvana numetaruheanahi —máich avacapa.

*Te májinaichahahi ema Abraham, manasiqueneripahi ema Cristo*

<sup>48</sup> Tacahe, ena tictianacanahi náichavarepa:

—Piti achane picachequenetatajichucha. Yátupiquenehi mávaháruvihi ema Váinaraji. Táitusiava, máurishivihi máicha —nacahepa.

<sup>49</sup> Ema Jesús majicapavarepa:

—Vahi máurishinuinahini. Eta juca nucaemataneasirahi ema Tata, nuvarairahi ecunachayare éma. Étisera épuru-nichucha.

<sup>50</sup>Núti vahí nucunachavaimahi. Matiarihisera ema ticunachanuhi. Éma téchahavihi, te núticipuca néticipavahí eyehe, téhesera étihipuca.

<sup>51</sup>Nutupiruva numetacahe: Nácani tisuapanayare eta numetarapiana, máepenacacanayare éna —máichavacapa.

<sup>52</sup>Najicapavarepa ena tictatianacanahi:

—Jéhevare puiti, vímatiacavipa eta pimáurishivaquenehi. Apanasicáji ena profetana tépenanahi, émapa ema Abraham. Tásiha puiti, picachechajiruvavare eta nácani tisuapanayare eta pimetarapiana máepenacacanayarehi.

<sup>53</sup>Pivarahapapuca picachuricayare ema viáchucaiñi Abraham, apanasica ema tépenahi, énapa ena profetanaini. ¿Nájahavisica piti pivayuyuacavapa? —nacahepa.

<sup>54</sup>Ema Jesús majicapavarepa:

—Tájina nucunachacarémahi, te nútijircavaríchuchapuca nucunachavahi. Mararihisera ema Tata ticunachanuhi, ema ímijachaquenehi ema ecasiña éti.

<sup>55</sup>Éti ímijachavahi ímati éma. Váhinéni ímatihini. Jéhevare nútí nimatihi éma. Téhesera numetacahehini eta numaimatirahi, népiyahirahiripapucaini nácutiherípahíni éti. Étasera yátupiquenehi eta nímatirahi éma, nusuapahivare eta mavanairipiana.

<sup>56</sup>Ema víyarahaini Abraham ema iáchucaiñi, téavicavahi eta máurisamurevahí eta máimatiranuhi nútí —máichavacapa.

<sup>57</sup>Tacahe, ena tictatianacanahi náichapa:

—¡Vuíchaha pácyehé cincuenta áñoina! ¡Picaemuñavapa pímati ema víyarahaini Abraham!

<sup>58</sup>Ema Jesús majicapavare:

—Nutupiruva numetacahe: Májinaichahahi ema Abraham, nunasiqueneripahi nútí —máichavacapa.

<sup>59</sup>Tacahe, tiápajucavapa eta nasemanevahi. Navehana eta márijahiana, nayucayarepaini éma. Tiúchucapasera éma eta te Templo. Tiyanapa tiyumurucavapa.

## 9

*Ema Jesús macanaraca ema achane máimiuchurehi eta mapuchuquiva*

<sup>1</sup>Tacahe, eta mapaisirahi ema Jesús te tajuhe eta avasare, máetupiacapa ema achane máimiuchurehi eta mapuchuquivahi.

<sup>2</sup>Eta véhisirapahi ema Jesús viti máimitureana, viyaserecapa éma:

—Tata maestro, ¿tájahapuca tiviuchahi ema maca eta mapuchuquivahi te tiúchucainapa? ¿Énapuca tiviuchanahi ena ticachichana, téhesera mapecaturaichuhipuca éma? —vicahepa.

<sup>3</sup> Tacahe, tijicapahavipa:

—Váhinéni étaina taviuchahini eta mapecatura éma. Énaripa ena ticachichana, váhivare énaparacaina. Matuparahaichuhi me Viya, mavarairahi nímerecayarehi puiti eta máitupajijiasi-rayahi ema Tata.

<sup>4</sup> Núti apanava nucamapurayare eta sache níchirayare eta máematanerepiana ema Tata eta mavanesiranuhi taicha járajapavare eta yati nájina ticaematanena.

<sup>5</sup> Ticamapuravacarerichaha eta nutiarihirahi te juca apaquehe nuti namicahuhi ena achaneana —macahepa.

<sup>6</sup> Tásiha, tiátutuicapa te apaquehe ema Jesús. Máepiyacapa eta tiúrajichicha te matuture. Mayajihauquichapa ema púchuqui.

<sup>7</sup> Tásiha, máichapa:

—Piyaná picasipauquipana tayehe eta noque ticaijare Siloé —máichapa. (Te véchajiriruva, eta Siloé ticaijare Vanairuca.)

Tacahe, ema púchuqui tiyanapa ticasipauquipanahi. Tíjahúchava tímairirica. Tichavapa te mapena.

<sup>8</sup> Náraminehi ichape ena machacayapenananahi énapa ena tímavianahi eta mapuchuquivainihi. Tásiha, nacahepa:

—Vímatihi ema émana limosnerohi púchuquihi. Émasera ema maca achane tímairiricahi. ¿Apanapuca éma? —nacahepa.

<sup>9</sup> Najicapapa ena tímavianahi yátupi:

—Émara ema maca.

Ema apana, macahevare:

—Vahi émaina. Mavasichucha.

Émasera ema achane púchuquiníhi máichavacapa:

—Nútira núti púchuquinuinihi —macahepa.

<sup>10</sup> Tásiha, nayaserecapa ema achane:

—¿Tájaha pícharacavahi eta pímaírisirahi? —náichapa.

<sup>11</sup> Éma majicapapa:

—Ema maena achane ticaijare Jesús máepiyacahi eta tiúrajichicha. Tásiha, tiyajihauquichanupa. Tivanecanupa nucasipauquipana te noque Siloé. Te nuyanapa nucasipauquipanahi, nímaíricarínehi —máichavacapa.

<sup>12</sup> Éna náichapa:

—¿Táviha ema mácará achane?

Éma majicapapa:

—Jéhepuca, vahi nécha.

*Ena tuparairucana navaraha náecha eta manarasirahi ema púchuquiníhi*

<sup>13-14</sup> Tacahe, nasamairiricapa ena fariséoana eta manara-sirahi ema púchuquinihi. Tásiha, nacavanairipipa náepana ema púchuquinihi, taicha natanucahi éna eta tiviuchayarehi ema Jesús. Ichaperinehi eta nacatianasirahi éma táichavenehi eta máipuresirahi te jena sache sávarumuahuquenehi.

<sup>15</sup> Te títecrapa ema púchuquinihi, nacatupihapa éma te namirahu. Nayaserecapa tájahahipuca tácharacavahi eta máimairirisiraipahi. Éma, máichavacapa:

—Ema achane típuchanuhi tiyajihauquichanuhi eta mátuture. Tásiha, nucasipauquipa. Nímairicapa —macahepa.

<sup>16</sup> Nararihi ena nacahepa:

—¡Ema mácará achane vahi machaneraina ema Viya, taicha vahi mapicauchahini eta sávarumuahuana tacapicahuquene!

Ena apamuriana, ánivare nacahe:

—Váiparinezisera maituruequenehaimahi maicha eta tiáramicareana te yátupinahini macapecaturarahihíni —nacahepa.

Tacahe, apanapanenejiana eta napanereruana.

<sup>17</sup> Tásiha, nápechavare nayasereca ema achane:

—¿Tájaha picayema píti mayehe ema achane ticaimairiri-cavihi?

Éma, máichavacapa:

—Núti németeaca émahi ema profeta.

<sup>18</sup> Énasera ena tuparairucana váhiquene nasuapahini eta émairahi ema púchuquini. Tásiha, náimichuhapa ena ticachichanahi.

<sup>19</sup> Nayaserecapa:

—Vivaraha viyaserecahe: ¿Yátupihi eta máimiuchurehi eta mapuchuquiva ema pichicha? ¿Tájaha táchararacavahi eta máimairirisirahi puiti?

<sup>20</sup> Ena ticachichanahi najicapapa:

—Yátupi ema maca ema vichicha. Máimiuchurehivare eta mapuchuquivainihi.

<sup>21</sup> Váhisera véchahini tájahapuca tácharacavahi eta máimairirisirahi. Váhivare vecha nájahapuca ticaimairiricahi. Émaina eyasereca. Ajairaripa éma. Émapa téchinavahi eta mametasiraheyare —náichapa.

<sup>22</sup> Tacahehi eta najicapirahi taicha tipicanahi éna nacaicu-nahini, nacaquijihivaréni te náurujisirarevana taicha ena taticianacanahi ema Jesús nacuchucapa eta vantu, nacavana-ripirapa nacuija nasuapa ema Jesús émairahi ema Cristo.

<sup>23</sup> Eta tacahehi eta náichirahi: “Émaina eyasereca. Émapa téchinavahi”.

<sup>24</sup> Tacahe, ena tuparairucana nápechavare náicha ema achane púchuquini. Ánipa nacahepa:

—Pátupiruva pimetacahavi te máijarepuca ema Viya eta pinarasirahi. Vítisera vímatihí ema maena achane tisipecaturarahi —nacahepa.

<sup>25</sup> Éma majicapavarepa:

—Jéhepuca, vahi necha nútí te tisipecaturarahihipuca éma. Tacarichu néchahi eta nupuchuquivainihi nuti, puítisera nímairicaripa máicha —macahepa.

<sup>26</sup> Nápechavare nayasereca éna:

—¿Tájaha máicharacavihi eta macaimairirisiravihi?

<sup>27</sup> Majicapavarepa éma:

—Cápachi numetacaheripa. Vuíchahacaru esuapanu. ¿Evarahipucaserá éhicayare éma éti apanavare? —máichavacapa.

<sup>28</sup> Tacahe, nacajachapa éma:

—¡Pítisera péhicaipahi éma! Vítisera véhicahi ema víyarahaini Moisés.

<sup>29</sup> Taicha véchahi eta máechajisihahi ema Viya ema Moisés. Émasera ema máenatataji, vahi vecha távihapuca másiha —nacahepa.

<sup>30</sup> Ema achane majicapavarepa:

—¡Tájina échaquenéna éti páureanasami! Vahi ímatiequeneha távihapuca másihahi ema ticaimairiranuhi.

<sup>31</sup> Váhipuca echa váiparinehi tisamacaremahi mayehe ema Viya mácani achane ticapecaturarahi. Nacarichu tisuapacareanahi nácani títauchanahi eta mavanairipianahi ema Viya.

<sup>32</sup> Váhivare visamairirica nácani nacaimairiricahini ema mácani máimiuchurehi eta napuchuquiva.

<sup>33</sup> Nútí németeaca te tacuijahini eta vanairucairahi me Viya ema maena achane, váhiva macuratahahini maicha eta tiáramicareana máichaqueneanahi —máichavacapa.

<sup>34</sup> Tacahe, tisemanapa éna eta máichiravacahi. Nacahepa:

—¡Píti pétaviurequenehi eta picapecaturaivahi! ¡Éta tivichavíhi! ¡Puiti pisapihapa pivarahaya pímitucahavi víti! —náichapa.

Tásicha, nacuchucapa éma.

*Ena tépiyacavanahi púchuquiana taicha eta namasuapajiraiyahi*

<sup>35</sup> Ema Jesús masamairiricapa eta náqujisirahi ema máipuchaquenehi. Tásicha, te macainunavarepa, máichapa:

—¿Pisuapapuca píti ema Machicha ema Viya?

<sup>36</sup> Ema achane majicapapa:

—Pimetacanupaini, tata. ¿Nájahapuca ema Machicha ema Viya, apaesa nusuapahini? —macahepa.

<sup>37</sup> Ema Jesús majicapapa:

—Nútiripara nuti pímháquenehi, nuti péchajirunuhi.

<sup>38</sup> Tacahe, ema achane tépuyucapa te mamirahu ema Jesús. Tásiha, máichapa:

—Nusuapavi, Tata —macahepa.

<sup>39</sup> Ema Jesús máichavarepa:

—Núti tímitecanuhi te juca apaquehe, nímmatichayare ena máimatiarahanahi eta yátupiqueneana máechajiruvanahí ema Viya, apaesa náimatiinqueneha. Eta juca tímicutijiricavahi nucaimairicayarehi nácani púchuquianahi tayehe eta máechajiruvanahí ema Viya. Nácanisera tímijachavanahí téchemarahiana, nímahaya te najacapapuca eta nímiturapi, tísapavanayarepuca eta nucaimairirisiravacayare. Téhesera vahi nacuisapava, tiápajupanavainapa eta napuchuquivayare. Étapa naviurevayarehi —macahepa.

<sup>40</sup> Tacahe, ena fariséoana natarihiqueneanahí te machacaya, eta nasamirahi, nayaserecapa:

—Pítí pímijachahaviripapuca púchuquihavihi. ¡Váhira púchuquihavinahini! —nacahepa.

<sup>41</sup> Ema Jesús majicapavacapa:

—¡Éti épiyacavahi púchuquihe! Taicha vahi evaraha esuapanuhini. Tásiha, tanasipa eta eviurevahí táichavenehí eta epecaturana. Te yátupinahipucaini esuapanuhini, tacuijahini taviuchahehini —máichavacapa.

## 10

*Ema Jesús tímicaecherachava eta majaneasirayare ena téhicanahí éma*

<sup>1-2</sup> Tacahe, ema Jesús máechajisihahi eta tajaneacasiva eta uvesa, máimicutichirahi eta macatiuchirahi ena téhicanahí éma. Ánipa macahe:

—Nutupiruva numetacahe: Mácani tijanearecahi eta uvesa, tétabicavahi eta máechapajirisirayarehi. Te yátiana, máimisia-payarehi te tapena, tásiha, máeratacapa eta tapajacura eta majaneasirahi, apaesa tájina tacuquichiravaina. Taicha nararihi ena tiámerahiana, ticaetemarahianavare. Navarahi ticayumuruquianayarehi eta nasiapirayarehi te tapena eta uvesa, námechayarehi.

<sup>3</sup> Émasera ema pástulero, te yáticarahi mavejiéquenehahi eta tapaja, máichuhahi eta táijareana eta uvesana. Eta máichuirahi, tiúchuchujicanapaipa táehicapaipa, taicha táimatiyahuchahí ema pástulero.

<sup>4</sup> Éma, máinapumirauchapaipa eta mayeheana uvesa. Táehimurihanaipa tamutu eta uvesana, taicha táimatihi eta mahu.

<sup>5</sup> Váiparinehiséra táehicaimahi mácani apanaqueña achane. Tavarahayarehi tijunaracana taicha vahi táimatiyahuchahini ema apanaqueña —máichapa ema Jesús.

<sup>6</sup> Ema Jesús máimicutichinahi eta juca. Váhisera nácaicutiarahini éna eta máimitusiravacahi.

*Ema Jesús ema yátupiquenehi tijaneacahavihi taicha máuriquenehi éma*

<sup>7</sup> Ema Jesús mápechavaca máimitucavaca. Ánipa macahe:

—Nutupiruva numetacahe: Núti nímicutijiricavahi tapajacurahi eta tapena eta uvesa te tanarasirarehi éta.

<sup>8</sup> Tínapumirauchuanahí ena tépiyacavana máestroana, váhisera máimitureanainahini ema Viya. Tiámerahianachucha éna, ticaetemarahiana. Váhisera táehicaimahi eta uvesana taicha vahi táimatiyahuchahini éna.

<sup>9</sup> Núti nujaneacavacahi ena nuchanerana, nucutihi eta tapena eta uvesa. Nácani ticasíñavana eta nuyehe, nucatiuchayarehi núti. Tájina náichavaimahi, tájinavare náechuriacaimahi. Néchavacahi núti.

<sup>10</sup> Ema tiámerahi, tímitecahi éma tiámerecayare, ticaparecayare. Macaejanerepaicayareva. Nútisera tímitecanuhi níjaracayare eta náitaresiraya. Máitavacacayare eta náuricacrevayare nícha.

<sup>11</sup> Énerichuvare núti yátupiquenehi eta nujaneasiravacahi ena nuchanerana, tacutihi eta majaneasiravacahi mácani achane eta mayeheana uvesa. Núti níjarareca eta nítaresira eta nucatiuchiravacahi.

<sup>12</sup> Mácanisera tuparairucachucha, vahi macatiuchaimahi eta uvesa. Te máimahapa eta tinicarahi sárare, tijunayarehi. Vahi tipatsicavaimahi macatiucha eta uvesa, taicha vahi mayehenahini. Tacahe, eta tinicarahi ticamapuravainapa tacapacayare eta uvesa. Eta tacaitiruana, téjanerepaicanapa.

<sup>13</sup> Ema maca achane tijunaya taicha vahi téñamavaimahi tayehe eta uvesa. Éma tímijachavahi majaneacavaca, étachuchasera macunehi eta mavacha.

<sup>14-15</sup> Núti yátupiquenénu pastulérunu taicha tiúrihi eta nujaneasiravaca ena nuchanerana. Tímatinuhivare ema Tata, tacutihi eta nímatirahi núti éma. Énerichuvare tacahehi eta nímatiravacahi ena nuchanerana. Éna tímatinuanahivare. Eta néñamairavacahi, núti nímiñararecavahi eta nítaresira náichavenehi éna.

<sup>16</sup> Nararihivare ena apamuriana nuchanerana. Váhisera ánina nacavasa. Nucurujicavacayaresera, népanayareva. Tisuapanuanayareva namutu. Étanayaréichupa eta náumuriva. Nucarinénapa núti néchavaca.

<sup>17</sup> Ema Tata, yátupihi eta máemunasiranu taicha nímijara-recahi eta nítaresira náichavenehi ena nuchanerana. Nuchavyaresera nítareca.

<sup>18</sup> Nájinanéni napamicanuhini eta nísapiravaya ticapacanuana. Níjararuvahi núti eta nacapasiranuya. Taicha nutuparahaichuhi me Tata núti néchinavayarehi. Níjararuvayare. Tásiba, nuchavayareva nítareca —máichavacapa.

<sup>19</sup> Eta nasamirahi ena achaneana eta juca máechajiruvanahi ema Jesús, típutsimuriavavacavarepa.

<sup>20</sup> Natarihihi ena tictorianacanahi. Nacahepa:

—¿Tájaha tacayema esuapa ema mara? Márishi éma, mávahárupuca ema Váinaraji —nacahepa.

<sup>21</sup> Énasera ena apamuriana, ánivare nacahe:

—Te yátupinahini mávaháruinahini ema Váinaraji, vahi macuratahahini macaimairirica ema púchuqui. Nájinavare mácuti eta máechajisira —nacahepa.

*Ena tuparairucana vahi návarahahini najacapa ema Jesús*

<sup>22</sup> Te jena sácheinahí diciembrequenehi eta ticasarahimuhuana te Jerusalén, ena achaneana napiestachahi eta año táepaniravahi náetupirica eta Templo.

<sup>23</sup> Ema Jesús matarihihi te tajuhe eta te Templo te tayehe eta alar máepiyaruhi ema Reyni Salomón.

<sup>24</sup> Te náimahapa ena tictorianacana, nachayacapa ema Jesús. Tásiba, náichapa:

—¿Tájaha tacayema pímpianererechahavihi? Pátupiruvapa pimetacahavi te yátupivihipuca pítiquenehi Cristo —náichapa.

<sup>25</sup> Ema Jesús majicapavacapa:

—Cápachi numetacaheripahi. Vuíchahacaru esuapanu. Eta juca níchaqueneanahí ímahaqueneanahí tásibaqueneanahí me Tata, étaripara tímereuchanuhi.

<sup>26</sup> Étisera váhiquene esuapanu. Taicha vahi étinahíni nuyehe-henahini uvesa.

<sup>27</sup> Eta nuyeheana uvesa tímatiahuchuanahí éta. Núti apanavare nímativacahivare. Eta tacahe, téhicanuanahí.

<sup>28</sup> Níjaracavacayaresera núti eta náitaresirayare máichecuaraquireyare. Váhiquene náimahahini eta náicuñayaréni. Nájinavare tiverejicanuanaimahi ena nujanearuanahí.

<sup>29</sup> Taicha máijararunuanahí ema Tata. Éma, nájina ticachu-riacainahini. Nájinavare tiratahaimahi tiverejicaimahi ena majanearuanahí.

<sup>30</sup> Taicha núti émapa ema Tata vicuticacahi eta vítpajijiasi-ravavacahi —máichavacapa.

<sup>31</sup> Tacahe, ena tictatianacana natanucapa eta márijahiana. Navarahapa natupisicayarehini ema Jesús.

<sup>32</sup> Máichavacapaserá éna:

—Ichapemurihi eta níchirahi eta táuriqueneana ímahaqueneanahi, máijararuuanahi ema Tata. ¿Étaserapuca tiviuchanuhi eta evarairahi etupisicanu te márijahi?

<sup>33</sup> Tacahe, najicapavarepa:

—Vahi étaparacaina eta píchirapuca jácani táuriqueneanahi. Eta tiviuchavihi pímijachiravahi machichavi ema Viya. Pítirichuhi vicutiquenehi achane. ¡Pítisera pímijachavaipahi Víyavi! —nacahepa.

<sup>34</sup> Ema Jesús majicapavarepa:

—Eta ajureca te Salmo, vahi ímatiequenehahini eta taechajisiahherahi eta macayemaquenehi ema Viya: “Víyahehi nícha eti nunerejiruheanahi”.

<sup>35</sup> Véchahi eta tacayemaquenehi eta ajureca, vahi tépiyahirahimahi. Taicha tamutu eta taechajiriruvana eta Sagrada Escritura taechajisihirahi eta juca máechajiriruvanahi ema Viya. Nácani nacatuparalahi me Viya, éma tímijarechavacahi “Víyanahi”.

<sup>36</sup> Nútipa puiti, nuvetijipa nímijarechacare “Viya” taicha émarichu ema Viya tinerejicanuhi, tivanecanuhi eta núcupaisiraya te juca apaquehe.

<sup>37-38</sup> Núti nítaucharahi eta mavanairipiana ema Tata tivane-canuhi. Tásicha, tatuparacahé esuapanuvaneyarehi. Tayanapane vahi tisuapacarehi eta nímiturapiana eta eyehe, étapasraini esuapahini eta tiáramicareana níchaqueneanahi. Étaratímereuchanuhi eta mávahásiranuhi ema Tata, návahásirahivare nútiapanava éma —máichavacapa.

<sup>39</sup> Tacahe, tiápechavanavarepa navaraha nacaratacaya-rehini ema Jesús, napresuchayarehini. Émasera tiúchucavanepa.

<sup>40</sup> Tásicha, tiyanavarepa ema Jesús te tinapaica te apachara eta cajacure Jordán. Manasipanapa eta te avasarechicha Betábara te máicachasirisinehini ema Juan.

<sup>41</sup> Camuriana ena achaneana tiyanaracanahi eta mayehe. Tásicha, nacahepa éna:

—Ema víyarahaini Juan, tayanapanehi tájina máimerecahini eta tiáramicareana, yátupihisera eta profetairahi éma, taicha tamutupa eta mame tarapiana mayehe ema maca Jesús, vímaharipa puiti eta yátupiqueneanahi —nacahepa.

<sup>42</sup> Tacahe, ánaqui camurianahi ena achaneana tisuapanahi ema Jesús, téhicanahivare.

**11**

*Eta máepenira ema Lázaro*

<sup>1</sup> Matiarihi ema achane ticaijare Lázaro. Éma, máemunacasarehi ema Jesús. Ticavasahi tayehe eta avasarechicha ticaijare Betania, návasahivare ena maparapenaveana, esu María ésupa esu Marta. Te jena sácheana, ticajumahi muraca ema achane.

<sup>2</sup> (Esu suca María, ésuhi esu tisipapevachahi ema Jesús tayehe eta tájiyequenehi perfumeama. Suájapevachahivare te suchutimaca.)

<sup>3</sup> Tacahe, ena náni apinana esenana ticaparapecacana náimivanerecapa, nametapanayarehi ema Jesús eta macajumairahi muraca ema Lázaro.

<sup>4</sup> Te máechapa ema Jesús, macahepa:

—Eta juca jumare, vahi titaimahi ema Lázaro. Matuparahai-chusera me Viya, mavarairahi nímereca eta máitupajijiasirava éma, nímeresirayareva eta nítupajijiasiravahi nuti Machicha, apaesa nacunachahavi ena achaneana —macahepa.

<sup>5</sup> Jéhesare, ema Jesús yátupihi eta máemunasirahi ema Lázaro, énapa ena esenana maparapenaveana.

<sup>6</sup> Váhisera mayanavanehini máimahapanahíni ema máemunacasare. Manasirichaha apinahi sache.

<sup>7</sup> Tásiba, te apanapa sache, ema Jesús máichahavipa viti máimitureana:

—Viyana vichava te Judea.

<sup>8</sup> Víti vijicapa:

—Tata maestro, cáperichaha ena ticatianacavianahi navarahabi ticapacaviana. Tásiba, puiti pivarahaichaha piyanayare ánaqui nayehe —víchapa.

<sup>9</sup> Ema Jesús máechajisihihi eta mavanecasivahi. Máichahavipa:

—Vahi taeñamavácarehini. Yátupi eta sache ticayehe doce hora. Te vipaica te sáchemuhu, vahi vicáyutetuímahi taicha vímairiricahi tayehe eta tijarahi.

<sup>10</sup> Nácanisera tipaicanahi te yátimuhu, ticayuteterejiana-yarehi taicha vahi náimairiricahini. Ema Tata tijaneacanuhi núti taicha nítouchahai tamutu eta mavarahaqueneana. Vahi másapahini jácani náichanuhini; tapaenumava máimaha tiuri —macahepa.

<sup>11</sup> Tacahe, te taequenepa, macahevarepa:

—Ema vémunacasare Lázaro máenahi tímacahi. Nuyanaya-resera nucajamipanayare.

<sup>12</sup> Víti víchapa:

—Tata, te tímacahipuca éma, étapa táchutarahi eta mativareraya —víchapa ema.

13-14 Víti vímijachaichaucha yátupihi tímaca. Tásicha, ema Jesús matupirupa timetacahavihi:

—Tépenaipa ema Lázaro.

15 Núrisamuresera eta májinanuirahi eta ánaqui. Tiúripanaya eta eyehe taicha ímahaya eta níchaqueneyare apaesa esuapanu. Puiti viyanaya vímahapanayare —macahepa.

16 Tacache, ema vichamuri Tomás máichahavipa viti machamuriana:

—Viyana víti apanavare. Te nacapacapuca éma, nacapacahavirineva víti apanava —máichahavipa ema Tomás. (Tatiarihivare eta máchucarapi Chame.)

*Ema Jesús, ema téchahi eta macaechepusirayare ena náepenaqueneana, máimichavayare macaitareca*

17-18 Tiuri, viyanapa vicaijuhe eta avasarechicha Betania. (Eta Betania tachacayahi eta Jerusalén, apina kilómetro y medio eta tayerehivahi.) Tásicha, te viánehipaipa, timetacahavianapa cuátroripa sache eta náecarairahi ema Lázaroini.

19 Camurianahichahasera ena achaneana te napena ena maparapenaveana, esu Marta ésupa esu María. Nacamitisiripanahi apaesa vahi nacuiyaharacavaicha ena apinana.

20 Tacache, te suéchapa esu Marta eta máitecapirayarehi ema Jesús, tiyanapa suácapahi. Ésusera esu María sunasirichuhi te tajuhe eta peti.

21 Te suéchajicapa esu Marta ema Jesús, sumetacapa eta máepenirahi ema suparapeini. Tásicha, suíchapa:

—Tátagachicha, te pitiarihinahini eta ani, vahi ñicuepenahini eñi nuparapeini.

22 Váhisera néñamava. Nucasiñavihi eta piyeho. Pímahainepa píti eta pícharacaya eta piyaseasirayare eñi Viya —suíchapa.

23 Ema Jesús majicapapa:

—Tiuri eta péñamirahi ema piparape. Váhisera picupica. Tichavayare titareca te pimirahu —máichapa.

24 Esu Marta suíchavarepa:

—Yátupi, Tata, néchahi eta ñichavirayare titareca te táitecapapa eta sácheyare náechepusiraya ena náepenaqueneana —sucuhepa.

25 Ema Jesús máichavarepa:

—Jéhevare nútì, nucaitarerahi nácani nucaeche pureanaya. Táitusiava numetacavi: Nácani tisuapanuanayare, tayanapanepuca náepena, nucaitarecayaresera nútì.

26 Ene ecaheyare éti éhicanuanahi, tayanapanepuca épenayare, nútisera nucaitarecaheyare. Tásicha, tájinapa tímiapchaimahi épenahini. ¿Pisuapanupuca eta níchiravíhi? —máichapa.

27 Ésu sujicapapa:

—Nusuapavi, Tata. Pítira yátupiquenévihi Cristo, Ñichichavi eñi Viya. Pítiripa piti vicuchapaquenévihi píteruyarehi te juca apaquehe —suíchapa.

*Ema Jesús tíyaha te tachacaya eta máecari ema Lázaro*

<sup>28</sup> Te titapiricapa eta suéchajisirahi esu Marta mayehe ema Jesús, tiyanapa suíchuhapanahi esu suparape María. Sujajicapa, ani tacahehi eta suíchirahi:

—Eñi Maestro ñirarihi eta ani. Ñicavanairipi piyanayaréji —suíchapa.

<sup>29</sup> Te susamapa esu María eta matiarihirahi ema Jesús, téchepurucavanepa. Tiyanavarepa suácapahi.

<sup>30</sup> Taicha ema Jesús vuíchaha máitecapahini te napena. Manasirichuhi eta te suácapinehi esu Marta.

<sup>31</sup> Eta náimairahi ena suchimaraná eta suéchepusirahi súchusirahi esu María, tiyananapa náehiequenehahi. Náimijachahi éna tiyanayarehi ésu te máecari ema suparapeini, tíyahapanayarehi.

<sup>32</sup> Tacahe, te suítecapauchapa ema Jesús, esu María sutupirupa tépuycuahi te máivapechacaya. Tásicha, suíchapa:

—Tátagachicha, te pitiarinhinahini eta ani vahi ñicuepenahini eñi nuparapeini —suíchapa.

<sup>33-35</sup> Tásicha, tíyahapa esu María, énapa ena téhicanapahi ésu. Eta máimairahi ema Jesús eta náiyairahi, ticatisamurevavarepa éma apanavare. Tíyahavarepa. Tásicha, mayaserecapa:

—¿Táviha écarihahi? —máichapa.

Ena najicapapa:

—Yare, Tata, píma.

<sup>36</sup> Tacahe, ena natiahiqueneana eta náimairahi eta máiyairahi ema Jesús, téchajicacanapa:

—Piáha. Tíyahavaréra éma apanava. Tétavicavahipucáji eta máemunasirahi —nacahepa.

<sup>37</sup> Ena apamuriana, ánívare nacahe:

—Ema maca ticaimairiricahi ema púchuqui. ¿Tájahapuca vahi macanaracahini ema Lázaroinisami, apaesa vahi macuepenahini? —nacahepa.

*Eta máechepeusira ema Lázaro te máecari*

<sup>38</sup> Tacahe, ichape eta macatisamurevairahi ema Jesús. Mapauchapa eta ecari nasecajueruhi te mari. Tatiarihvare eta mágime tajihajacahi eta tapajacura eta ecari.

—Tacahe, ema Jesús mavanecavacapa:

—Ecaerajica eta jara tachujihi eta máecari.

Ésusera esu Marta suíchapa:

—Tata, németeaca tijecheripa jácani taicha cuátrorípahi sache eta ñépenirahi —sugahepa.

**40** Ema Jesús máichavarepa:

—Cápachi numetacavipa, te pisuapanu yátupina, pímahayare eta macunachacarevahí ema Viya taicha nímerecaya eta tamutirahi marataha —máichapa.

**41** Tacache, nacaerajicapa eta márime. Tásiba, ema Jesús maeisenicapa te anuma, tiyujaracanumapa:

—Tata, nuhasulupayachavi eta pisamiranuhi.

**42** Váhiqene péñauchanu eta jácani nuyasearuviana. Puiti nuyaseacavi eta pítupajijiásirava, apaesa náimaha ena nani achaneana natarihiáquenaneahí, apaesa nacunachavi. Náechavare eta pítirahi pivancanu —macahepa éma.

**43** Te titapiricapa eta mayujarasirahi, máimararacapa eta ecari. Tipiaracapa muraca, ánipa macahe:

—Lázaro, péchepuca eta te jara piávihahi. Yare, piúchuca —máichapa.

**44** Tacache, ema máepenaquenénihi tiúchucapa. Mámapaichuhi eta móyuruhanahí étapa eta máepacamirahi. Tásiba, ema Jesús mavancavacapa naveruruaca eta móyuruhanahí, apaesa tiyanayarepa te peti.

*Ena tuparairucana napanerechapa nacaratacayarehi ema Jesús*

(Mt 26.1-5; Mr 14.1-2; Lc 22.1-2)

**45** Tacache, ena suchimaranahí esu María, eta náimairahi eta juca máichaqueñehi ema Jesús, camurianarinehi ena tisupanahí éma.

**46** Natarihisera ena apamuriana tiyananapa nayehe ena fariséoana ticatianacahahí ema Jesús. Eta namaurisirahi eta juca, tiyanana nametapanavaca ena tuparairucana.

**47** Tacache, ena tuparairucana náimichuhapa namutu ena juéseana, ticutujicacanapa. Tásiba, nacahepa:

—¿Tájaha vícharacavayare, tátanaveana? Ema maena achane Jesús, téavicavahi eta maitupajijiásiravahí máichahi eta tiáramiccareana.

**48** Vahi táuricahini vísapahini máimiyanavahini máitarecahini, machu námuturiana náehica ena achaneana, masapihaina-papuca nasuapayare éma. Machu ena aquenucana romanoana náimijachinapapuca tatiarihiyare eta tíñepiyare. Tisemanainapapuca. Nárajapainapapuca eta ani. Náquipaisinahavinapapuca eta viávasa. Nasapihainapapuca tiverejicahavianayare eta viávacureanahí —nacahepa.

**49** Matiarihihi ema achane ticaijarehi Caifás. Émahi ema ichapequenéhi tiyujaracarahi te jena áñohi. Tacache, máichavacapa éna:

—Éti vahi ímatiequeneha eta víchararacavayare.

50 Németeaca nútì tiúripana máepena ema émanaina achane mavachareca eta náitaresiraina namutu ena apamuriana achaneana –máichavacapa.

51 Eta juca máechajiruvahi ema Caifás, váhinéni étainahini táichahini eta máechemaraivahíni éma. Étahi eta émairahi ema ichapequenehi tiyujaracarahi te jena áñohi. Manacasamure-ruichuhi ema Viya eta máechajisihahi eta máepenirayare ema Jesús náichavene ena israelítana.

52 Étasera juca máepenirayarehi ema Jesús, mavacharecainapa eta naviurevahi namutu nácani machaneranayarehi ema Viya te apanapanenequeneana avasareana. Vahi táchacaya eti naviurevana ena israelítana. Taicha te taequenénapa, mavarahahí macurujiyahayarehi, étamuria-nayarehi namutu éna.

53 Tacahe, tacutipa eta napanereruhi ena tuparairucana eta nacapasirayare ema Jesús.

54 Eta tacahe, ema Jesús vaipa máimerecavahini eta te Jerusalén. Majunijicapa eta Judea. Tiyanapa eta te mávapahi apaquehe tachacaya eta avasare ticajare Efraín. Manasipanapa ánaqui, vítipa viti máimitureana.

55 Tacahe, semanayare eta Pascua, vipestara viti israelítana. Namutu ena achaneana tiávhana te apanana avasareana tiyanaracanapa tayehe eta Jerusalén. Tisiphacavanayarehi taicha náimijachahi ani tacahehi tacuija nacuquichiravaina eta náimeresiravayare me Viya.

56 Tacahe, ena achaneana nacunepaipahi te Jerusalén ema Jesús. Eta návhairahi te Templo, téchajiricacanaripa. Ánipa nacahe:

—¿Tájaha ecayema? ¿Títecayarepucáji ema Jesús puiti juca piéstaya? —nacahepa.

57 Énaripa ena tuparairucana tivanerecanapa ena ticuneanayare ema Jesús. Te matiarihinapuca, nametapanayarepa ena tuparairucana. Tásiha, éna náimicaratacayarepa.

## 12

*Esu María susipapevacha ema Jesús te perfumeama  
(Mt 26.6-13; Mr 14.3-9)*

1 Séisirinehi sache eta piéstayarehi eta Pascua. Tichavarepa ema Jesús tayehe eta avasarechicha Betania, mávasahi ema Lázaro, ema macaechepurehi te máecari. Tacahe, ena máemunacasareana tiúrisamureanarinehi eta náimairahi eta máitecapirahi ema Jesús eta nayehe.

2 Ticacherujianapa náenicayarehi. Ema Lázaro macachanehi te mesa eta nanisirahi. Esu Marta téchapajiricavacahi.

<sup>3</sup> Tacahe, esu María suámapaipa eta táijiyequene perfumeama te bótechicha. (Te navírare eta juca perfumeama te nasucure ticaijare nardo.) Tétavicavahi eta tasivachavahi. Ticutiamacacahi te botella eta tasiamavahi. Tacahe, suépusapevachapa ema Jesús, suájapecvachapa te suchutimaca. Enevanerine táinicajuecha eta peti eta táijiyevhah.

<sup>4</sup> Matiarihihhi ema vichamuri Júlasi. Ema maca émarichu tíjararecayarehi ema Jesús. Témechajicavapa éma:

<sup>5</sup> —¿Tájaha tacayema váhivaréyapa tacaijararecasihini eta juca tasivachaquenehi perfumeama? Vivehahini eta camuriquene plata, tásicha, vímicatasihahini ena páureana —macahepa.

<sup>6</sup> Ema maca Júlasi, vahi étainahini eta majapanuirainahini ena páureana. Étachuchanéni mavarairahi mayumuruca eta plata, taicha ema tiámerahihi. Títecapa émarichuhivare tiúnarecarahi eta plata.

<sup>7</sup> Tacahe, ema Jesús máichapa:

—Pésamirica esu suca esena. Suíchachaha ésu eta suvarahaquene taicha nícumunuichuhi eta juca tayeheyarehi eta nécarí.

<sup>8</sup> Ena páureana, tamutuchucha sácheana eta ecatchaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi eta eyehe —macahepa.

### *Ema Lázaro, navarahavare nacapaca*

<sup>9</sup> Tacahe, camuriana ena tisamairiricanahi eta matiarihirahi ema Jesús te Betania. Tiyananapa náimahapanayarehi. Énerichuvare náimahapanayarehiva ema Lázaro, ema maechepurehi te máecari.

<sup>10</sup> Tacahe, ena tuparairucana napanerechavarepa nacapacayarehi ema Lázaro.

<sup>11</sup> Taicha émavenehi táchahi eta nasuapiraipahi ema Jesús ena camuriqueneana achaneana. Vaipa nasuapahini eta navanairipiana ena tuparairucana.

### *Títecrapapa ema Jesús te Jerusalén*

*(Mt 21.1-11; Mr 11.1-11; Lc 19.28-40)*

<sup>12</sup> Te apanapa sache, ena nani achaneana táimiyanaque-neanahi eta piéstayarehi eta Pascua, nasamairiricapa eta máitecapirayarehi ema Jesús tayehe eta avasare.

<sup>13</sup> Tiúrisamureanarinehi. Eta náurisamurevahi, navehapa eta tajuru eta cáchipaca. Tiyananapa nácapahi éma. Eta napiarasirapahi, ánipa nacahe:

—¡Yare, Tata! ¡Piti yátupiquenévihi rey viyehe viti israelítana! ¡Asulupaya! ¡Piti vanáirucaquenévihi me Viya! ¡Ichape eta vicunachiravi pití! ¡Viva ema Viáquenu! ¡Viva! —nacahepa.

<sup>14</sup> Ema Jesús ticaperapahi eta burricu eta masiapirohi, taicha ene tacahehi eta táechajiruvahi eta Sagrada Escritura:

<sup>15</sup> “Eti ecavasanahi te Jerusalén, vaipa ecupica, taicha márajapa ema eyeheyare Rey. Tímaticareyarehi éma, ticaperayare eta burricuchicha. Mámapahi eta iúritaresirayare” tacahehi eta Sagrada Escritura.

<sup>16</sup> Eta juca ajureca eta vimacaicutiaraqueñehi viti máimitureana. Tapaenumava te máechepecupa ema Jesús, vicaicutiarahi eta tacayemahi eta Sagrada Escritura, táechajisihairahi éma, étapa eta tamutu eta apamuriana máichararacavanahi.

<sup>17</sup> Tiuri puiti, ena apamuriana achaneana tímararacanaripa ema Jesús eta macaechepusirahi ema Lázaro te máecari, náechajisihaipahi éna eta náimahaquenehi.

<sup>18</sup> Eta tacahe, camuriqueneanahi ena achaneana tiyananahi nácapahi éma, taicha navarahahi náimati ema táchahi eta tiáramicare.

<sup>19</sup> Tásicha, eta náimairahi ena fariséoana eta camurianairahi ena tiácapanahi, náichacacapa:

—¡Váhichara víturucaimahi taicha téavicavahi eta nasimutuvahi ena téhicanahi éma!

*Ena apavasaqueneana navarahavare náimati ema Jesús*

<sup>20</sup> Natarihivare ena apamuriana achaneana apajuecruhana tayehe eta Jerusalén. Énerichuhi éna tímitecanahi tiyujaranapanahí te jena piéstairahi.

<sup>21</sup> Tiyananapa napauchahi ema vichamuri Felipe. Ánipa tacahe eta nayaseasirahi:

—Tata, víti apanava vivaraha vímati ema Jesús —nacahepa.

<sup>22</sup> Tacahe, ema Felipe tiyanapa mametacahi ema Andrés. Tásicha, ena apinana tiyananapa nametapanahi ema Jesús.

<sup>23</sup> Tásicha, ema Jesús máichavacapa:

—Jéhevare puiti, tiánehipa eta népeniraya nuti Manerejirunuhi ema Viya. Nápechavayaresera nítareca, apaesa nucunachacareyare eyehe.

<sup>24</sup> Nutupiruva numetacahé: Te vahi vicuevaca eta evaraqui te apauehe, vahi téjapacaimahi. Tanasiyareichuhi eta tasimutuva eta evaraqui. Téhesera vévacahi, téavicavaya eta táejapasiraya.

<sup>25</sup> Nácani téñamavanahi eta náitaresira, tiávamirahuana eta náehisiranu, énajivayare ticamitiequenehavanayare eta náitaresira. Nácani tíjaracavanayare eta náehisiranuyare, tájinavare vahi náeñamavahini eta náitaresira te juca apauehe, tiúchucuhanayare éna. Máihecuaraquireyare eta náitaresirayare.

<sup>26</sup> Énerichuvare nácani tivarahanayare ticaemata-neacanuana, tacamunu tímerecavanayare yátupi eta náehisiranuhi. Tásicha, núti nucaejacavacayare éna te néjasihayare núti. Ena nani, tétavicavayare eta macunachirayare ema Tata.

*Ema Jesús tímereuchava eta máepeniraya*

<sup>27</sup> Ema Jesús táimipanererecahi eta máepenirayare. Ánipa macahehi eta máechajiriruvahi:

—Tiánehinapa eta népeniraya. ¡Ichape eta nupisirahi! ¿Tiúripa nuyaseaca ema Tata macatiuchanuini apaesa vahi nucucatajivaini? ¡Váhiqene nuyaseacaimahi, taicha núti tímitecanuhi te juca apauehe eta népeninavacaya ena achaneana!

<sup>28</sup> Tacahe, macahevarepa:

—Tata, pímereca eta pítupajijiásirava apaesa nacunachavi ena achaneana —macahepa.

Tásicha, tíjahúchavapa nasamahi eta mahu ema Viya te anuma. Ánipa macahe:

—Nímercariipa eta nítupajijiásiravahi. Jéhesare, nápechavayareva nímercayare —macahepa.

<sup>29</sup> Tacahe, ena achaneana natiarihiqueneanahi nasamahi eta máechajisirahi ema Viya. Váhisera nácaicutiarahini, náimijachaichucha tirureca. Tásicha, ena apamuriana, ángelepuca éma téchajicahi nacahevare.

<sup>30</sup> Ema Jesús máichavacapa:

—Vahi nútivenéna eta juca esamaquenehi. Ema Tata tímismahehi, mavarairahi esuapayare.

<sup>31</sup> Achichu juca sácheanayare, ticapacanuanainapa ena achaneana téhicanahi ema Váinaraji. Eta nacapasiranuya, tacaviureyare namutu ena achaneana te juca apauehe eta náicuñayare. Eta népenirayare nuvachachainapa eta nurata-hairaya nucuchucuhavaca nácani ticasíñavanahi nuyehe. Téquecavanainapa eta nuyehe ena machaneranainihi ema Váinaraji.

<sup>32</sup> Eta tacahe, te nacatupihanupa te anuquehe te crusu, te nacaicutiarapa ena achaneana apanapanenejiana eta nasamairirisiraya, énajivainapa tipauchanuanaya téhicanuanainapa —máichavacapa.

<sup>33</sup> Eta juca máichiravacahi ema Jesús, mavarahahi nacaicutiarayarehi eta táichararacavayarehi eta máepenira.

<sup>34</sup> Tacahe, ena achaneana tisamararacanahi najicapapa éma:

—¿Tájahasica tacayema eta péchajisihahi eta pépeniraya te crusu? Viti vímijachaipahi pítiripa ema Cristo, piti Manerejiruvihi ema Viya. Víti visamahi eta Sagrada Escritura te

náechajicuha máichecuaraquiereyarehi eta máitaresiraya ema Cristo. Vahi vicaicutiarahini –náichapa.

<sup>35</sup> Ema Jesús máichavacapa:

—Ecamapurava esamararacanu mapurare nutiarihichaha eta eyehe. Numicauchahechaha taicha ániperine eta juca ímairanuyare apaesa vahi ecucayutete tayehe eta timapicu. Taicha nácani tájinahi náechaquenénahí, ticayutetuanayare.

<sup>36</sup> Esuapanu eta juca numicauchaherichaha apaesa ímiturecaya éti apanava, iámayare eta juca tajarahiquene –máichapa.

Te titapiricapa ema Jesús eta máichiravacahi, tiyanapa majunijumurihapa. Vaipa máimerecavahini eta nayehe.

*Tétavicava eta namuracasamurevanahi ena ticavasanahi te Jerusalén*

<sup>37</sup> Ichapemurihi eta náimairahi ena ticavasanahi te Jerusalén eta tiáramicareana máichaqueneanahí ema Jesús, váhiquenesera nasuapahini éna.

<sup>38-39</sup> Étahisera tacahehi títauchavayarehi eta májuchaqueneanahí te ajureca ema profetaini Isaías tayehe eta tamuracavahi eta namasuapirayare. Ani tacahehi eta táchajiriruvahi: “Tata Viáquenu, nájina ticaicutiaranaina eta péchajiriruvanahí vímiturapihanahí víti. Píti pímerecaripahi eta pítupajijiasiravahí, váhiquenesera nasuapavihini”.

Énerichuvare ani tacahehi eta májuchaqueneanahí ema Isaías:

<sup>40</sup> “Ema Viya, eta máimairahi eta namuracasamurevanahi, másapahi tiápajucava eta namasuapajirairavahí, tímicutijiricavahi púchuquiana éna. Váhiquene tétupirisamurechavanaimahi. Váhivare navarahaimahi nacasiñavahini me Viya, apaesa macanaracavacahini” tacahehi eta májuchaquenehí ema víyarahaini Isaías.

<sup>41</sup> (Ema profetaini Isaías, tiáramecahi eta máimairahi te mavapure eta táetavisiraya eta majaraiva ema Cristo, étapa eta masantuvali eta te máejasihahi.)

<sup>42</sup> Nararihihisera ena aquenucarohana tinerejicavaranipahi ena tisuapanahí. Váhisera návarahahini náimerecavahini eta náehisirahi, napisirahi nacaquijihini eta te návacureana.

<sup>43</sup> Taicha étachucha náuricahi eta nacunachacarevahí nayehe ena nachamuriana, ena fariséona. Tasapihaichucha náepuruhi eta nacunachacarevayarehini me Viya.

*Tímicuñarahi te vahi visuapa eta máechajiriruvana ema Jesús*

<sup>44</sup> Ema Jesús tijaranupa eta máechajisiravacahi ena achaneana. Máichavacapa:

—Nácani navarahahi tisuapanuana, tímaticareanaripa eta nasuapirahivare ema Tata, ema tivanecanuhi.

<sup>45</sup> Tacutiquene nácani tímatinuanahi eta nímiturapiana, náimatiyahivare eta mapanereruana ema Tata.

<sup>46</sup> Taicha núti yátupiquenénuhi eta numicauchiravacahi ena téhicanuanahi te juca apauehe. Váipasera tavehaimahi eta timapicu.

<sup>47-48</sup> Tacutiquene núti, vahi étaina táimitecanuhini te juca apauehe eta nícuñacahehini eti achaneana. Eta tímitecanuhini, nucuchucuhahayarehi. Nácanisera nasamairiricaripahinénipuca eta néchajiriruvana, váhisera nasuapanuhini, nasapiha tépurunuanahi, muracayarehi eta náicuñayare. Eta náepuruirahi eta néchajiriruvana, étaripa tiviuchavacainapa te jena sácheyare nacayaseserehipa te mamirahu ema Viya.

<sup>49</sup> Taicha vahi nútijiriruvainahini eta nímituresirahi. Ema Tata tivanecanuhi, éma tíjaracanuhi eta nímiturapianayarehi.

<sup>50</sup> Eta tacahe, numetacahehi puiti tamutu eta numetacsivanahí. Vahi nuhapapicaimahi, taicha nímatihi tacitarecayarehi nácani tisuapanahí eta máimiturapiana ema Tata —macahepa.

## 13

*Ema Jesús, masipapevachavacapa ena máimitureana*

<sup>1</sup> Tiuri, te jena sácheinahí tamirahupaipahi eta Pascua, ema Jesús máecharipa táitecapauchayarepa eta majunijisirayarehi eta juca apauehe. Tiyayanayarepa mayehe ema Maiya. Tétavicayahi eta máemunasirahavihi viti máimitureana.

<sup>2-4</sup> Jéhesare ema Júlasi, máimipanerecharipa ema Váinaraji eta máijararesirayarehi ema Jesús. Émasera ema Jesús, máecharipa eta machavirayarepa mayehe ema Maiya taicha eta másinehi. Émarichuhi ema Maiya tíjaracahi eta tamutuirayarehi máituruequeneha. Tacahe, te jena yati, eta máenisirahavihi viti máimitureana, téchepucapa ema Jesús. Tivejamuhiacavapa eta mamuiriha. Tiáyuruñequetchavapa te mayehe paño.

<sup>5</sup> Tásicha, majucuhapa eta une te bañadora. Tépanavapa tisipapevachahavihi eta vívapeana viti máimitureana. Mavehavarepa eta paño, tiájapevachahavipa.

<sup>6</sup> Tásicha, te macapayacapa ema Pedro, éma vahi másapavahini eta masipapevachira eta máivape. Máichapa:

—Tata maestro, vahi táurica eta pisipapevachiranuhini núti —macahepa.

<sup>7</sup> Tásicha, ema Jesús majicapapa:

—Páuresamivihi píti. Vuíchaha picaicutiarahini eta tacayemaqueneanahi eta juca. Achichuinapasera picaicutiarainapa.

<sup>8</sup> Ema Pedro máichavarepa:

—Nútisera, vahi pisipapevachanuimahi.

Ema Jesús máichavarepa:

—Te vahi nucusipapevachavi, vaipa pítiparacaimahi eta nuyehe.

<sup>9</sup> Tacahe, ema Pedro máichapa:

—Tata, vahi tácarichuimahi pisipaca eta nívapeana. Énerichuvare eta nuvahuana étapa juca nuchuti.

<sup>10</sup> Tásicha, máichavarepa ema Jesús:

—Nácani nacaviravahi vahi tágamesaimahi tiápechavana ticasipana. Tacarichu ticasipayarehi eta náivapeana. Éti, epachihavacaripa; váhisera ámutuhini epachihahini —máichapa.

<sup>11</sup> Ema Jesús máichahavihi eta juca vahi vámutuhini vipachihahini taicha máimatihi ema tíjararecayarehi.

<sup>12</sup> Te titavapa eta masipapevachirahavihi, ticamuirihavarepa eta mamuriha. Tásicha, téjacapa te mesa. Máichahavipa:

—¿Ímatiequenehapuca éti eta juca níchirahehi?

<sup>13</sup> Eti ímijarechanu “Tata Maestro”. Étupicahisera, taicha yátupiquenénuhi eta numaestruvahi.

<sup>14</sup> Eta níchirahehi nútì emaestro nusipapevachirahehi, ene ecaheyare éti eta ítaresiraya. Esipapevachacacayare eta ívapeana.

<sup>15</sup> Éhicayare eta juca níchaquenehi. Étayareichu eta nímiturisrahehi.

<sup>16</sup> Nutupiruva numetacahe: Ema musu vahi macachuricaimahi ema máquenu. Émaripa ema vanairucahi váhivare macachuricaimahi ema tivanecahi.

<sup>17</sup> Te yátupina ecaravahuinapa eta juca nímiturapiana, tájina íchiravaimahi. Ecunachacareyareva eta ítauchiraya tamutu.

<sup>18</sup> Néchahinéni nútì vahi ámutuhini esuapanu. Nímatihevare eti yátupiqueneana nunerejiruanahi. Títouchavaya-rehisera eta táchajiruvahi eta Sagrada Escritura, ani tacahéhi: “Ema néniruasahi, masapihahi tictalianacanuhi”.

<sup>19</sup> Puiti nucainapucava numetacahe apaesa te títouchavapa eta juca numetarapi, ímatinuinapa nuti yátupiquenénuhi Cristo.

<sup>20</sup> Nutupiruva numetacahe: Nácani tijacapaheanayare éti nuvaneruana, ticaecheranahi eta najacapiranuhi nútì apana. Énerichuvare, najacapahivare ema Tata Nuaiya quene.

*Ema Jesús máechajisiha eta máijararesirayare ema Júlasi  
(Mt 26.20-25; Mr 14.17-21; Lc 22.21-23)*

<sup>21</sup> Te titapiricapa eta máichirahavihi ema Jesús, téñamavaipa te masamure eta máijararesirayarehi ema émana vichamurihi. Tacahe, matupiruvapa máichahavihi:

—Nutupiruva numetacahe: Mararihi ani te etaracu ema tíjararecanuyare —macahepa.

<sup>22</sup> Tacahe, viáramecarinehi eta máichirahavihi. Véseniuquijiricacapa. Vahi vímatihini nájahahipuca ema máichaquenehi.

<sup>23</sup> Nutiarihisera nuti nachamuri máemunaranupananuhi ema Jesús. Nucachacayahi éma eta véjasirahi te mesa.

<sup>24</sup> Tacahe, ema Pedro tiúmatsiuquichanupa nuyaserecahini nájahahipuca ema máichaquenehi ema Jesús.

<sup>25</sup> Tásicha, núti nujajaicapa ema Jesús:

—Tata, ¿nájahasica ema píchahi?

<sup>26</sup> Tásicha, tijicapanupa:

—Nuyuvetumecaya eta pan, néchipaejicaya. Ema njaráruyare, émara ema tíjararecanuyare —macahepa.

Tacahe, máechipaejicapa eta pan, máijaracapa ema Júlasi.

<sup>27</sup> Jéhesaréinehi, ema Váinaraji enevanepa mávahácahi éma. Tásicha, ema Jesús máichavanepa:

—Júlasi, eta juca pipanereruhi, táitauchavavanepa puítinaichu —máichapa.

<sup>28</sup> Váhisera vácaicutiarahini eta juca máichirahi ema Jesús ema Júlasi.

<sup>29</sup> Vímijachahichucha eta mavacharesirayarehivare eta tinicacare tayeheyare eta piesta, mácajihivarepuccaini ena páureana, taicha émahi técha eta tarera máunasirarehi eta plata eta matesorerovalhi.

<sup>30</sup> Te titanesipa ema Júlasi eta manisirahi eta pan, tiyanapa tiúchucahi. Tijunijicahavipa te jena yátiquenehi.

### *Ema Jesús macavanairipipa eta vémunasiracacayare*

<sup>31</sup> Eta máuchusiraipa ema Júlasi eta viyehe, ema Jesús máichahavipa:

—Títecapapa puiti eta táitauchiravayare ímahainapa éti eta máitupajijiasirava ema Viya étapa eta nítupajijiasiravayare núti Manerejirunuhi éma. Éti ecunachahavinapa.

<sup>32</sup> Nímercainapa eta máitupajijiasiravahi ema Tata, ema apana máimerecayareva eta nítupajijiasiravahi nuti Machicha. Puiti juca sácheinayare títauchavainapa.

<sup>33</sup> Nuchichanaveana, ánipirine eta juca ecachaneranuyare. Tásicha, nuyanainapa. Éti, etanucanuinapa; vuíchahasera ítujicavaimahi ecapayacanu. Étarichuhi eta numetarapihi nayehe ena tictalianacanuana eta níchiravacahi vahi titujicavaimahi ticapayacanuana.

<sup>34</sup> Puiti nunaquicayare eta juca arairu nuvanairipi eta eyehe. Émunacacayarehi ena echamuriana. Ecuitinuyarehi eta némunasiráhehi núti. Ene caheyare éti apanavare.

<sup>35</sup> Te yátupina émunacaca, eta tímaticaheanayare ena achaneana étirahi eti nímitureanahi —máichahavipa.

*Ema Jesús máimereucha ema Pedro eta máepiyasiravaya vahi máimati ema Jesús*

(Mt 26.31-35; Mr 14.27-31; Lc 22.31-34)

<sup>36</sup> Tásicha, ema Pedro mayaserecapa:

—Tata Maestro, ¿távihainapa picaijuheya?

Ema Jesús majicapavarepa:

—Eta nucaijuheya puiti, éti vuíchaha ítujcavaimahi éhicanu. Ecapayacanuyaresera. Váhivare ánasimahi éti. Vuíchahasera tíjahúchavaimahi —máichapa.

<sup>37</sup> Ema Pedro majicapavarepa:

—¿Tájaha tacuichavaini vahi nucuratahahini néhicavi, Tata? Núti níjaracava népena píchavenénahi píti —máichapa.

<sup>38</sup> Tacahe, ema Jesús máichapa:

—Píti, pímjachavapuca píjaracava pépena eta picatiuchiranuya. Numetacavisera: Puiti juca yati, te tamirahuinrichaha eta táechajisiraya eta varayu te tijararahi, píti mapahayare pépiyacavayare vahi pímatinu, eta picatiuchiravarehi píti —máichapa.

## 14

*Ema Jesús, jéhevare éma téhicacare eta vítecapiraya me Viya*

<sup>1</sup> Vahi ecueñamava éti. Ácasiñava eta me Viya; ácasiñavavare eta nuyehe.

<sup>2</sup> Taicha ánaqui te mávasa ema Tata, camuri eta tiáviravacare iávihayare éti, taicha ícuchihi éti. Tacahe, tatuparacahi nuyanayare nétipiricayare eta iávihayare.

<sup>3</sup> Te táuripa eta iávihayare, nútijapainavarepa nuchavainapa népanahénapa apaesa ácachanenu éti tayehe eta návihayare núti.

<sup>4</sup> Eti ímatiripa eta nucaijuheya. Ímatipahivare eta achene nuyanihayare.

<sup>5</sup> Tásicha, ema Tomás majicapapa:

—Tata, váhira vímati távihapuca eta picaijuheyare; váhivare vímati eta achene piyanihayare —macahepa.

<sup>6</sup> Ema Jesús majicapavarepa:

—Nútira néhicacare. Nútirichuva nuti yátupiquenénuhi. Nútivare nucaitarerahi, nájina apanaina ácasiñaimahi eta ítecapirayare me Tata.

<sup>7</sup> Eta ímatiranuipa núti, ímatiripahivare ema Tata, taicha ímahanuripa puiti eta juca nucachanérahehi —macahepa.

**8 Ema Felipe máichapa:**

—Tata, pímechahavipaini ema Viya apaesa viúrisamurepainen eta vímatirainahini.

**9 Ema Jesús majicapavarepa:**

—Ánaquiasparipa eta picachaneranuhi, piti Felipe, vuíchahacaruvare pímatinu. Eti ímahanuripahi, ímatinuipavare yátupihi. Tímicutijiricavaipahi émainahini ímararacahini ema Tata. ¿Tájaha tacayema pivarahaichahavare nímechavi ema Tata?

**10** ¿Váhipuca pisuapanuhi eta mávahásiranuhi ema Tata, tásicha, étapa eta návahásirahivare núti apanava? Eta juca nucayemaqueneanahi, vahi nuvehaqueneanaina te nuchuti. Étara eta mávahásiranuhi ema Tata, títauchavahi eta mavarahaqueneanahi.

**11** Esuapanu eta návahásirahí núti ema Tata, étapa eta mávahásiranuhivare éma. Te vuíchahapuca esuapanuhini eta numetarapi, étavanerécainaséra esuapa eta tiáramicareanahi níchaqueneanahi.

**12** Nutupiruva numetacahe: Nuyanainapa eta me Tata. Eta tacáhe, éti yátupi eta esuapiranuhi, nítisivahe éti. Níjaracahe eta eratahairaya ecuchuca eta tiáramicareana, ecutinuyare. Níjaracahevare eta eratahairaya ímitupirucha eta náchanevana ena achaneana. Jéhesare, eta juca tiápajupanavayare eta tacunachacareva tayehe eta tiáramicareana íchaqueneanayare.

**13-14** Núti níjaracaheyareva tamutu jácani eyasearunuanayare te níjare, taicha nuvaraha ichape eta ecunachirayare ema Tata.

*Ema Jesús macametarapi eta máucupaisiraya ema Espíritu Santo*

**15** Eta esuapiranuhi tímereuchaheya eta yátupirahi eta émunasiranuhi.

**16** Tásicha, núti nuyaseacainapa ema Tata máevataca ema Espíritu Santo. Éma, tímicatachaheyare, ticurisamurechaheyareva. Yátupiquenevare eta mávahásiraheyare eta ítaresirayare. Vahi tímajiacahémahi.

**17** Éma, tímítucaheyare, máitametacayare tamutu eta yátupiqueneanahi tásichaqueneana eta me Tata. Énasera ena achaneana, vahi ticaijaracasianaimahi, taicha vahi návarahahini najacapahini éma. Eta namaratahairahi náimaha éma, náimijachahi vahi máimaticarehíni éma. Étisera ímatiyare éma, taicha máitavacacayare eta mávahásiraheyare.

**18** Núti, váhivare nujunijiacadahémahi. Nuchavayare eyehe, ecachanenuyareva.

<sup>19</sup> Puiti juca sácheinayare, ena achaneana vaipa tímahanuanaimahi. Étisera ímahanuparacaya, taicha nuchavayarehi nítareca. Éti apanavare ítarecayareva nícha núti.

<sup>20</sup> Te nuchavapa nítareca, échavainapa éti eta mávahásiranuhi ema Tata, échavainavarepa eta návahásirahevare núti, éti apana iávahácanuhivare.

<sup>21</sup> Nácani náimatiyare eta nuvanairipiana, náitauchayareva, éta tímicaecherachayare eta yátupihi eta náemunasiranuhi. Tásiha, ichapeyare eta namunavayare me Tata táichavenénahi eta náemunasiranuhi. Núti apanavare ichapeyareva eta némunasiravacayare. Tásiha, nímerecavayareva nayehe —macahepa.

<sup>22</sup> Ema Tadeo máichapa:

—¿Táicharacavayare, Tata, eta vicarichuirayare pímerecava eta viyehe; tásiha, ena apamuriana achaneana, vaipa tímahavianaimahi? —macahepa.

<sup>23</sup> Tacahe, ema Jesús majicapapa:

—Nácani témunacanuanayare, nasuapayare eta nuvanairipianahi. Tásiha, ema Tata, tétavicavayarehi eta máemunasiravacaya. Tásiha, vítijapainapa viávahácavacayare éna.

<sup>24</sup> Nácanisera vahi témunacanuanaimahi, váhivare nasuapaimahi eta nuvanairipiana. Eta juca esamaqueneanahi puiti, vahi tásihaquenenahini te nuchuti. Tásihaquenehi me Tata, ema tivanecanuhi.

<sup>25</sup> Nucamapurava numetacahe puiti taicha ánipirine eta juca nucaheyare eta eyehe.

<sup>26</sup> Émasera ema Espíritu Santo mavaneruyare ema Tata níchavenénahi núti, ema tímicatacaheyare, ticurisamurechaheyareva. Énerichu tímitucaheyare, témechaheyare tamutu eta juca numetarapiana eyehe.

<sup>27</sup> Puiti nucametavaya eta eyehe. Nuvarahasera tacuijahini íchiravainahini, ecanarasiraina eta epanereruana. Núti vahi nácutinuhini ena apamuriana achaneana eta nujuniji-siraheya. Vahi ecuvayuchava eta éñamavairaina. Váhivare ecupica.

<sup>28</sup> Puiti numetacaheripa eta nuyanirayare; tásiha, étapa eta nuchavirayare eta eyehe. Eta tacahe, te yátupina émunacanu, evapinavayarehi nuyehe núti eta nuchavirainapa mayehe ema Tata, nápechavaya nucachane éma tayehe eta máetaviuchirahi eta majaraivahi étapa eta máitupajijiasirava.

<sup>29</sup> Nucametarapivane eta juca, apaesa te ímaha títitauchavapa, esuapainapa yátupi.

<sup>30</sup> Ánipirine puiti eta juca néchajirisiravahi eta eyehe taicha ávanepaipa títecapa ema Váinaraíji eta mavarairahi tiáquipaicanuyare. Éma, yátupihi táquenuhi eta juca apaquehe. Váhiquenesera titahacanuimahi núti.

<sup>31</sup> Nuvarahasera náimatiya ena achaneana eta némunasirahi yátupi ema Tata; tásicha, nítouchaparacahi tamutu eta mavanairipiana. Échepuca. Viyana viyjecava eta te juca – máichahahavipa.

## 15

*Eta táenaqui eta uva étapa eta tasimutuquene eta tatavavajiana*

<sup>1</sup> Núti nucutihi eta sucureca uva. Étiripa éti ecuti eta tatavana. Ema ticachichanu tímicutijiricavahi ema tijaneacahi eta sucureca.

<sup>2</sup> Éma máechuca eta máhiriquerehi tatava. Máepachiacavare eta apana tatava eta ticahirisi apaesa tacahipana.

<sup>3</sup> Eti epachihavacaipahi taicha eta nímiturapiana emetacsivanahi.

<sup>4</sup> Eta tacache, ímiyanavayare eta iúrujiasiranuyare taicha eta návahásirahehi núti, apaesa ácuti eta tatava ticahiriqui. Taicha te viyuvetuca eta tatava eta uva, vaipa ticahimahi. Ene ecahehi éti, te vahi ecuimianava iúrujiacanu, tájina vaipa ecaemataneacanuimahi.

<sup>5</sup> Nápechava nímicutichinahe puiti. Núti nucutihi eta táenaquihi. Éti tímicutijiricavahi nutavahehi. Te ímiyanava iúrujiacanu, ichapemuriyarehi eta ecaemataneasiranuya. Téhesera ácarichu éti, tájina eratahaquenémahi ícha.

<sup>6</sup> Nácani tijunijiacyanuanayare, ticutianayare te ticaechu eta tatava. Tiájiquiyarehi. Tásicha, nacurujicainapa, nájuchainapa te yucu.

<sup>7</sup> Ímiyanava yátupina eta iúrujiasiranu. Yátupinavare eta ítauchiraina eta nímiturapiana. Tásicha, te eyaseacanupuca jácani evarahaqueneanahi, núti níjaracaheya.

<sup>8</sup> Nuvaraha ímerecavaya eta táurivayare eta ecaemataneasiranu, apaesa téavicavainapa eta macunachacarevaya ema Tata. Tásicha, ecaecheraipahi eta yátupirahi nímiturehe.

<sup>9</sup> Ímiyanava eta iávhásiranu taicha téavicavahi eta némunasiraheli tacuti eta máemunasiranuhi ema Tata.

<sup>10</sup> Eta ímiyanirava ítauchapaipa eta nuvanairipiana, tijurucapaipa eta ímatirahi eta némunasiraheli. Tacuti eta nítouchirahi núti eta mavanairipiana ema Tata, nímatipaipa eta máemunasiranuhi éma.

<sup>11</sup> Eta juca nímicutiarachirahi, nuvarahahi iápajaca eta iúrisamurevahi tásihaquenehi eta iávahásiranuhi nútì. Ecutiveya eta núrisamurevahi.

<sup>12</sup> Nápechahe numetacahe eta juca nuvanairipi eta eyehe: Yátupina eta émunasiracacaina. Ácutinu eta némunasirahehi nútì.

<sup>13</sup> Ena achaneana, te navarahahi náimerecaya eta náemunasirahi nácani náemunaruuanahi, natanucayarehi náijaracasicha. Nácani tíjararecavanapuca eta nápenirahi énavenehi ena náemunacasareana, éna yátupihi náimereca eta náemunasirahi. Ene nucahehi nútì, níjararecavayare eta népeniraya íchavene eti némunacasareanahi.

<sup>14</sup> Jéhevare, éti yátupiquenehi némunacasareanahi, eta ítauchirahi eta nuvanairipianahi.

<sup>15</sup> Vahi vánaracahéna nuyehe, taicha ena vanaracanahi vahi náimativahini eta mapanererueruanahi ema náquenu. Étisera némunacasareanahi. Eta tacahe, numetacahe tamutu eta mapanereruana ema Tata.

<sup>16</sup> Vahi étinahini enerejicanuhini eta éhisiranuhi. Nútì nunerejicahehi. Puiti nutuparacahe, nuvaraha táuri eta ecaemetaneasiranu eta epaisiraya eta ecامتarauirayare. Nuvaraha ecajimuyacahini ena achaneana náehicanuhini. Yátupina eta ímitusiraina apaesa náimiyanava eta náehisiranuhi. Tásiba, ema Tata tíjaracaheyare tamutu eta eyasearuanyare te níjare.

<sup>17</sup> Nuvaraha ítaucha eta juca nuvanairipiana. Yátupina émunacaca.

*Ena achaneana ticatianacaheanayare tacutiyare eta nacatianasiranuhi nútì*

<sup>18</sup> Puiti numetacahevare, te nacatianacahe ena achaneana, échavayare éti vahi étinahini nacatianaca. Nútì nacatianacahi.

<sup>19</sup> Taicha, te étainaichahini iávacuhahini eta tayeherepiana eta apaquehe, ena achaneana témunacaheanaripahini, tacutihini eta náemunajirisiracacahi éna. Étasera eta nunerejisirahehi te nataracu ena achaneana, étapa tiviuchahehi eta nacatianasirahehi taicha ínajicaipa eta máeperajiquene tayehe eta apaquehe.

<sup>20</sup> Échavavare eta juca numetaruuhehi: “Vahi másapihaimahi ticaemunacasi ema musu mayehe ema máquenuhi”. Nútì ticatianacanuanahi; ene ecaheyarehi éti, eta nacatianasiraheyareva. Vahi nasuapahini eta nímiturapiana. Váhivare nasuapaimahi eta ímiturapiana éti apanava.

<sup>21</sup> Eta éhisiranuhi nútì, étaripa tiviuchaheyare tamutu eta juca nacatianasiraheinapa táichavenehi vahi náimatihini ema Tata tivanecanuhi.

<sup>22</sup> Tacuijarchuhipucaini naviurevainahini éna, te vahi nucuitecrahini eta nímitusiravacahíni. Tépurunuuanahiséra, náepuruuhivare eta nímiturapiana; tásicha, tétavicavahi eta naviurevanahi.

<sup>23</sup> Taicha nácani ticatichuanahí nútí, nacatianacahivare ema Tata.

<sup>24</sup> Énerichuvare tacuijahini taviuchavacahini te vahi nucuimerecahini eta tiáramicareana níchaqueneanahí. Mamaratahaquenehi máichahini mácani apana achane tacutihini eta níchaqueneanahí nútí. Étasera náimaharipahi, váhiquenesera nasuapahini. Nasapiha ticatianacanuana-richucha, nacatianacahivare ema Tata.

<sup>25</sup> Étasera tacaheyarehi eta táitauchiravayarehi eta táchajiriruvana eta Sagrada Escritura te Salmo, ani tacahehi: “Tájina taviuchanuhini eta nacatianasiranuhi”.

<sup>26</sup> Étisera, mararihiyare ema tímicatacaheyare, ticurisamu-rechaheyareva. Te nítecerauchayarepa ema Tata, nuyaseacaya mavaneca ema Espíritu Santo. Éma, te máitecapapa, tímereuchaheyare eta yátupiqueneana. Tímereuchanuyareva nútí eta eyehe.

<sup>27</sup> Éti apanavare ímerekhanuyareva taicha tiyereripahi eta ecachaneranuhi, tépanavapa te nunérejicahénapa.

## 16

<sup>1</sup> Núti numetacahe eta juca apaesa vahi ecuarami eta nacatianasirahe, váhivare ecuinajicava eta éhisiranuhi.

<sup>2</sup> Taicha tiáquijicaheanayare tayehe eta viúrujisirarevana. Énerichuvare navarahayare ticapacaheana. Éna, náimijachayarehi tiúriyarehi eta náichirayare te mamirahu ema Viya.

<sup>3</sup> Éna, náichayare eta juca táichavene eta namáimatirahi ema Tata, váhivare náimatinuhini nútí.

<sup>4</sup> Numetacahe eta juca apaesa te táitecapapa eta íchavaquenveya, vaipa ecuarameca. Échainapa eta numetasirahehi.

### *Ema Espíritu Santo tímicatacahavihi*

<sup>5</sup> Puiti tiánehinapa eta nuyaniraya nuchava eta me Tata. Eta nucachaneirahehi, ticatianacanuanahí nútí ena achaneana. Puítisera eta májinairanuyare, ticatianacaheanainapa éti. Eta juca tacahehi, nupaenumava numetacahehi puiti. Étisera németeaca vuíchaha ecaicutiara eta numetarapi, taicha váhivare eyaserecanuhini eta nítametasirayare, étahinéni eta nucaijuheyare.

<sup>6</sup> Esapiha éti ecatisamurevahi taicha eta juca numetasirahehi eta nuyaniraya.

<sup>7</sup> Tayanapane vahi eyaserecanuhini, nutupiruvasera numetacahe: Tatuparacahi eta nuyaniraya nuchava mayehe

ema Tata, taicha te vahi nucuyana, vahi títecaimahi ema nuvaneruya. Éma tiúrichaheyare, tímicatacaheyare, ticurisamurechaheyareva.

<sup>8</sup> Énerichuvare ena achaneana te juca apaquehe, manacasamurechaya eta nacatuparahaírahi náichayarehi eta táuriqueñeana, náehicanuvare nútì. Manacasamurechavacayareva éna eta náimatiraina eta nasicaturaraivahi. Taicha te vahi nacuvaraha náinajica eta tamauriqueñeana, téhevare vahi nacuvaraha náehicanu nútì, ticaicuñanainapa te yucu.

<sup>9-10</sup> Ema Espíritu Santo manacasamurechavacayare ena achaneana eta najacapacarevaya me Tata nácani ticasíñavanapuca eta nuyehe, taicha nuyanaya eta me Tata, néchajiu-chavacayare éna. (Vaipa ímahanuimahi éti.) Nácanisera vahi nasuapanuhini nútì, tanasiquenehi eta napecaturanahi.

<sup>11</sup> Manacasamurechavacayareva ema Espíritu Santo eta yátupina táiturevayare éna eta máicuñayare ema Váinaraji náehiruhi te juca apaquehe. Éna apanava náepujuquichainapa tayehe eta yucu infierno.

<sup>12</sup> Maverachahaneni eta juca nuvarahaqueneanahi numetacahe. Váhisera eratahaimahi ecaicutiara puiti.

<sup>13</sup> Téhesera máitecapapa ema Espíritu Santo, éma tiámayeraphi eta yátupiqueneana numaimitureheanarichaha, émainapa tímítucaheyare. Taicha mametacasivahi eta máechajisiraheyare, énerichuvare timetacaheyareva eta íchavaquenévanayare.

<sup>14</sup> Ichapenapa eta nucunachacarevayare máicha. Émainapa timetacaheyareva eta nuvanairipianayarehi eyehe.

<sup>15</sup> Taicha ema Tata tituparacanuhi eta nútirayarehi nécha tamutu. Eta tacahe, eta juca mametarapianayare ema Espíritu Santo tásiqueneanayare nuyehe.

*Vahi tánasimahi ecatisamureva. Tichavayare eta iúrisamurevaya*

<sup>16</sup> Ánipiyareichusera eta emaimairanuyare. Téhesera taequenénapa, iápechavainavarepa ímahanuyare. Taicha nuyanayarepa te mávihahi ema Tata.

<sup>17-18</sup> Tacahe ena apamuriana nuchamuriana tiyasereca-nuanapa:

—¿Tájahapuca tacayema eta juca mametarapihi, eta macahehi ánipirine eta vimaimairayare, tásicha, te taequenénapa viápechavainavarepa vímaha? ¿Tichavavanepuca eta mayanirayare eta me Maiya? ¿Váipuca mánasimahi eta machaviraya? Váipavare vácaicutiara eta ánipirine eta macaheyare eta viyehe —nacahepa.

<sup>19</sup> Ema Jesús macaicutiaravacahi eta navarairahi nayasereca. Máichavacapa:

—Núti numetacahehi eta ániperine eta emaimairanuyare. Tásiha, te táequenénapa eta emaimairanuyare, iápechavainavarepa ímahanuya. Eta juca emacaicutiaraquenehi.

<sup>20</sup> Tásiha puiti, nutupiruva numetacahe eta íyahairaina-samipa éti, ejapanuvairayareva. Énasera ena apamuriana achaneana, tiúrisamureanainapa éna. Tásihasera te táequenénapa, vaipa íyahaimahi. Tétavicavasera eta iúrisamurevainapa eta táitsivaya.

<sup>21</sup> Eta juca tímicutijircavahi te tínacayare esu esena. Ánipichuhi eta sucatiruhavahi taicha eta suínasirayarehi. Téhesera te tamutupa eta suínasirahí, suémítisicainapa eta sucatiruhavainihi. Tiúrisamuréinapa eta suímairahi eta suchicha, tajurusirayarehi te juca apaquehe.

<sup>22</sup> Ene ecaheya éti, ecatisamurehi puiti, ániperichusera. Téhesera te viápechava vímahacacaya, tétavicava eta iúrisamurevaya. Nájinainavarepa tihapapicahémahi eta iúrisamureva.

<sup>23</sup> Te jena sácheyare, vahi nútimali eyaserecanu. Émasera ema Tata eyaserecayarehi. Éma, tíjaracaheyarehi tamutu jácani eyasearuanayare te njare.

<sup>24</sup> Puíticha tájinaichaha eyasearapinahini me Tata te njare. Ticamunucarehi eyaseacayare. Éma tíjaracahénapa. Étainapa ticurisamurerecaheyare ichape.

### *Numetacahe eta nu capaque chiravacayare ena nánaranayare*

<sup>25</sup> Núti nímicutichinahehi eta juca numetasirahehi. Téhesera te táequenénapa, nutupiruvainapa numetacaheyare eta yátupiqueneana mapanereruerahí ema Tata.

<sup>26</sup> Te jena sache, eyaseacainapa ema Tata te njare. Váipayare tacamunuimahi nuyaseuchahé eta mayehe.

<sup>27</sup> Taicha émaripa ema Tata témunacahehi éti, táichavénehi eta émunasiranuhivare núti. Éti esuaparipa eta yátupirahí eta mavanesiranuhi ema Tata. Tíjaracahénavanepa eta eyasearuanayare.

<sup>28</sup> Núti, eta násihahi mayehe eta nítésirahí te juca apaquehe. Puítisera nujunijicainavarepa eta apaquehe, nuchavainavarepa mayehe ema Tata —máichahavipa.

<sup>29</sup> Tacahe, viti máimitureana víchapa:

—Jéhevaré puiti pitupiruropa eta péchajisihahi. Vaipa pímitciarachinahávhíni.

<sup>30</sup> Vímativarepa eta yátupirahí pímatiequeneha tamutu. Jéhesare, pímatiequeneha tamutu eta vipanereruana, étaripa

eta juca vivarairahi viyaserecavyare. Visuaparipa puiti eta yátupiquenéravihi Machichavi ema Viya –víchapa.

<sup>31</sup> Tacahe, ema Jesús máichahavipa:

–Jéhepuca eta esuapiranu puiti.

<sup>32</sup> Puítisera juca yati, títecapainapa eta éjanerepáisirayare éti. Ejunijicanuinapa, nucarichuinapa nútí. Matiarihiyaresera ema Tata. Éma, ticachanenuyare.

<sup>33</sup> Numetacahevare tamutu eta juca apaesa vahi ecuarameca. Ácasíñava yátupina nuyehe apaesa tacuija ecuichiravaina, tayanapane ecatajivayare muraca te juca apaquehe. Ácasíñavahisera eta nuyehe, taicha nútí máijararunuhi ema Tata eta nucapaquemurihairayare namutu ena nánaranahi –máichahavipa.

## 17

*Eta mayujarasirahi ema Jesús, mayaseuchavacahi me Maiya eta náurivaina ena máimitureana*

<sup>1</sup> Te titapiricapa ema Jesús eta máechajisirahavihi viti máimitureana, tépanavapa tiyujaracahi. Máesenicapa te anuma. Ánipa macahe:

—Tata Nuaiyaquene, títecapauchanupa puiti eta táitauchiravayare eta pipanerueruana. Nuvarahasera nucunachacaréni eta piyehe, tacuteini eta nucunachiravihi píti.

<sup>2</sup> Yátupihi eta pijarasiranuhi eta aquenuairanuyare, te namirahu namutu ena achaneana. Nucaitaresirayarehivare namutu ena píchuhaqueneanahi pijararunuanahi.

<sup>3</sup> Níjaracayare eta náitaresirayare máichecuaraqureyare ena pijararunuanayare apaesa náimativi, piti Tata yátupiquenévihi Viya, nútipa nútí Jesucristo, nútí pivanerunuhi te juca apaquehe.

<sup>4</sup> Nútí nímerecahi ne achaneana eta picunachacarevahi. Nítachaipahi tamutu eta pivanairipianahi pivarahaquenehi níchayarehi.

<sup>5</sup> Puítisera nuchavainavarepa eta piyehe. Píjaracanuyare eta nuchavirayare te pijaraivahi. Néjacainavarepa te pivaure tayehe eta návinehi acane te tépanavainapa eta apaquehe.

<sup>6</sup> Nítamuturucaripahi eta nímitusiravacahi ena píchuhaqueneanahi pijararunuanahi píti. Nímimatichavacahivare eta piúrivahi píti. Yátupihisera eta pichichanaveanahi éna, taicha nasuapahi eta nímiturapiana pijararunuanahi nútí.

<sup>7</sup> Náecharipahi tamutu eta juca nímiturapiana tásishaqueneanahi piyehe.

<sup>8</sup> Náecharipahivare eta yátupiquenérahi eta pivanesiranuhi. Eta tacahe, natupiruvahi najacapa eta nímitusiravacahi eta péchajiriruvana.

<sup>9</sup> Eta tacahe, puiti nuyaseacavi, Tata, eta pijaneasirvacaina ena píjararunuanahi téhicanuanahi, taicha pichaneranahi éna. Vahi énaina nuyaseuchavaca ena masuapajirairahanahi te juca apaquehe.

<sup>10</sup> Núti néchahi eta piyehleravacahi éna. Eta tacahe, néñamavahi eta nayehe, nuyeheanaipahi éna. Yátupihi eta náimatiranuhi eta pivanerunuhi, tásiha ticunachanuanahi ichape.

<sup>11</sup> Puiti núti nujunijicavacainapa ena píjararunuana. Énasera nanasiyarechaha te juca apaquehe. Nútisera nútijapainapa eta piyehe. Tata Nucaiyaque, piti yátupiquenévihi eta pisantuvahi. Nuyaseacavi pijaneasinanuvacachucha éna, apaesa náimiyanavahi eta náurujiasiracacaina, návahásiracacayare nácutihini eta viáyahásiracacahi víti.

<sup>12</sup> Núti nímimatichavihi pítí eta nayehe, étapa eta píjare, apaesa yátupina eta náehisiravina. Ichapemurihi eta nujaneasiravacahi éna eta nucachaneravacaichaha. Eta tacahehi, vahi náinajicavahini eta náehisrahavihi. Émanarichu ema téjecapavahi, ema tijararecanuyare. Étasera tacaheyarehi eta táitauchiravayarehi eta Sagrada Escritura.

<sup>13</sup> Puiti nútijapainapa, Tata, tayehe eta jara piávihahi. Eta nucachaneravacaichaha éna, numetacavacahi eta pipaneruruana, taicha nuvaraha vácuticacahini eta viúrisamurevaina.

<sup>14</sup> Taicha ena achaneana te juca apaquehe, ichapemurihi eta nacatianasiravacahi táichavenehi eta najacapirahi eta péchajiriruvana nímitusiravacahi. Éna, vaipa náehicahini eta tayeheana eta juca apaquehe, ticutinuanaripahi núti eta numaehisirahi eta tayeheana eta te juca apaquehe.

<sup>15</sup> Vahi nuyaseacavi eta piviravacainahini te juca apaquehe. Nuyaseacavi núti eta picatiuchiravacainahini mayehe ema Váinaraji.

<sup>16</sup> Taicha yátupihi éna vaipa tayeheanainahini eta juca apaquehe, ticutinuanaripa núti vahi tayehenuinahini eta juca apaquehe.

<sup>17</sup> Píjaracavacahini eta náurivainahini eta piyeho, náitusirainahini cápachi eta péchajiriruvana yátupiqueneana.

<sup>18</sup> Pítí pivanecanuhi nímiturecayarehi eta péchajiriruvana nayehe ena achaneana te juca apaquehe. Tásiha, núti nuvanevacayareva ena nímitureana, náimituca ena apamuriana achaneana.

<sup>19</sup> Puiti, eta némunasiravacahi éna, níjararecava núti, nítouchayare eta pivarahaquenehi. Nuvaraha ene nácahehini éna, yátupinahini náijaracavahini eta nacaematanesiraviyarehi. Yátupinahivaréni nasuapa eta péchajiruvana yátupiqueneana.

<sup>20</sup> Váhivaresera nacarichuhi éna nuyaseuchavacahi eta piyeho. Énerichu nuyaseuchavaca ena tisuapanayare eta táunavayare eta áñoana, ena tijacapanayare eta péchajiruvana.

<sup>21</sup> Nuyaseacavivare váhini tacuitavahini eta náurujiasiracayare éna. Píjaracahivaréni, Tata, te nasamureana eta návahásirahavinahini tacutihini eta viávahásiracacahi víti. Náurujiasirahavinavare víti, apaesa ena achaneana te juca apauehe náimatihini yátupina eta pivanésiranuhi.

<sup>22</sup> Núti níjaracavacaipahi éna eta náitupajijiasiravacayarehi tamutuirayarehi narataha. Vicutihi víti eta tamutuira virataha. Návahácacahini éna, vácuthini víti eta viávahásiracacahi.

<sup>23</sup> Píti piávahácanuhi núti. Tásicha, núti návahácavacahi éna apaesa yátupinahini éna étanainarichuyare eta napanereruana, apaesa ena apamuriana achaneana te juca apauehe étainahini náimatiarainahini eta pivanésiranuhi, étapa eta pémunasiravacahi ena nímitureana tacutihi eta pémunasiranuhi núti.

<sup>24</sup> Tata Nucaiyaquene, píti píjaracanuhi ena nani píchuhaqueneanahi. Nuyaseacavi puiti eta nucachaneravacainahini tayehe eta návihayare núti. Náimahahini eta nujaraiva píjararunuhi taicha eta pémunasiranuhi te tépanavainapa eta tacaepiyairahi eta apauehe.

<sup>25</sup> Tata Nucaiyaquene, píti yátupiquenévihi eta pisantuvali. Ena achaneana te juca apauehe vahi náimativihini. Nútisera nímativihi.

<sup>26</sup> Ena nani píjararunuuanahi nímimatichaviripahi. Tétavicavahi eta pémunasiranuhi. Tásicha, nuvaraha yátupina nasamava eta táetaviuchirahi eta pémunasiravacahi taicha éna tiávahácanuanahi núti.

## 18

*Títicapanapa ena ticaratacanaya ema Jesús  
(Mt 26.47-56; Mr 14.43-50; Lc 22.47-53)*

<sup>1</sup> Te titapiricapa ema Jesús eta mayujarasirahi, tiyanapa tiámamuriyahavipa te apachara eta tatavarapi ticaijare Cédron. Ánaqui tatiarihi eta huerta ticaijare Getsemaní. Visiappa tayehe.

<sup>2</sup> Tacahe, ema Júlasi máimatihi eta juca viávirarehi taicha ichapemurihi eta vicachanerahi ema Jesús tayehe eta huerta.

<sup>3</sup> Tacahe, te jena yátiquenehi, títecapapa ema Júlasi. Mámamurihapaipahi ena officialeana énapa ena camuriqueneanahi suntaruana romanoana, vanairucanahi éna nayehe ena tuparairucana, taicha napamicavacahi ena fariséoana. Ticamicahuanapaipahi. Ticaepuchiriquianapaipa, étapa eta nayehe espada.

<sup>4</sup> Émasera ema Jesús máecharipa eta nacaratasirayarehi. Tacahe, mácapavacapa éna. Máichavacapa:

—¿Nájaha etánuca?

<sup>5</sup> Ena najicapapa:

—Ema Jesús Nazareno vitanucapahi.

Éma máichavarepa:

—Nútira etánurepahi.

Ema Júlasi mapauchapa, máetserarecpa. Tásicha, titipi-hachaha te machacaya.

<sup>6</sup> Eta majicapirohi ema Jesús, máichirahi: “Nútira etánurepahi”, tiáquipaimuriavanapa ena suntaruana te apaquehe.

<sup>7</sup> Tásicha, mayaserecavarepa ema Jesús:

—¿Nájaha ema etánucapahi?

—Ema Jesús Nazareno —najicapavarepa.

<sup>8</sup> Éma, máichavarepa:

—Cápachi numetacaheripahi nútihira etánurepahi. Te nútichucha etánucanupahi, ísapayare nayana ena nani —máichavacapa.

<sup>9</sup> Étapaichuhi eta máechajiruvahi ema Jesús te tiyujaracaipa nájina émanainahini náemitiacahini te namuri ena máijara-ruanahi ema Maiya.

<sup>10</sup> Tacahe, ema Pedro, tatiarihihi eta mayehe espada te mañahe. Mavehapa, máechuchacachapa eta machaca te vaure ema achane ticaijare Malco, mavanarahi ema aquenuca Caifás.

<sup>11</sup> Émasera ema Jesús macahepa:

—Pinaca te tatumaramuhi eta piyehe espada. Vahi pihapapicaimahi eta táitauchiravaya eta mavarahaquenehi ema Tata, taicha nutuparahaichuhi mayehe eta juca nucatajivairaya —macahepa.

*Nacaratacapa ema Jesús, námapa te mamirahu ema corregidor*

(Mt 26.57-58; Mr 14.53-54; Lc 22.54)

<sup>12</sup> Tacahe, ena suntaruana émapa ema comandante nacaratacapa ema Jesús, náitijivauchapa.

<sup>13</sup> Tiyananapa námapa te mapena ema Anás. Étarichu mapena ema Caifás, taicha ema maca Anás máimachucahi

ema Caifás, émapasera tuparairucahi te jena áñohi máitsivae-quenehi ema máimachuca.

<sup>14</sup> Ema maca Caifás, émarichuvare ticaechajiriruvahi eta máepenirainahini ema émana achane tivachachayarehi eta náitaresirana namutu ena achaneana.

*Ema Pedro tépiyacavapa vahi máimati ema Jesús*

(Mt 26.69-70; Mr 14.66-68; Lc 22.55-57)

<sup>15</sup> Ema Pedro, nútipa nuti Juan viyanapa véhiequenehapaipa ema Jesús. Nusiapapa núti te tajuhe eta canchón mapenahí ema aquenuca Anás, taicha náimaticasarenuhí ena mavanaraná.

<sup>16</sup> Émasera ema Pedro manasipa te aneca te tapajachacaya. Tásicha, néchajiacapa esu vanaracahi téchahi eta tapaja, sucasiapahini ema Pedro.

<sup>17</sup> Tásicha, esu suyaserecapa ema Pedro, ánipa suicha:

—¿Pítirihu jácani apanava ñímiture eñi ñica Jesús?

Ema Pedro majicapapa:

—Vahi nútina.

<sup>18</sup> Tásicha, eta jena yátiquenehi táetaviuchahi eta tacasaraivahi. Ena mavanaranahí ema Anás, énapa ena suntaruana ticamururecanapa eta yucu, násasiavayarehi. Eta náurujiásiraipahi eta yucu, titupihaipavare ema Pedro te nachacaya, másasia-vahivare.

*Ticayaseserehipa ema Jesús te mamirahu ema Anás*

(Mt 26.59-66; Mr 14.55-64; Lc 22.66-71)

<sup>19</sup> Tacahe, ema Anás mayaserecapa ema Jesús áyananapuca ena téhicanahí éma, tájahahivarepuca eta máimiturapihi eta nayehe.

<sup>20</sup> Ema Jesús majicapapa, ánipa macahe:

—Núti vahi nuyumurucavahini eta nímituresirahi. Nímerecavahi te namuri namutu ena achaneana te viúrujisirarevana, étapa te Templo. Éta nímituresirareanahí.

<sup>21</sup> ¿Tájaha tacayema piyaserecanu núti? Piyaserecapaini ena tisamararacanuanahí. Énaina nametacavi eta nímiturapianahí núti —macahepa.

<sup>22</sup> Matiarihihi ema émana suntaru te machacaya. Eta masamirahi eta máechajiriruvahi ema Jesús, máehamirahapa éma. Tásicha, máichapa:

—¿Tájaha tacayema tíñemahi eta pijicapirahi ema aquenuca macapicahuquenehi? —máichapa.

<sup>23</sup> Tacahe, ema Jesús majicapapa:

—Váhira táíñemahihini eta nujicapirahi ema aquenuca eta taviuchanuhini. ¿Tájaha tacayema péhanu? —macahepa.

<sup>24</sup> Tacahe, ema Anás máevatacapa mayehe ema Caifás, émarichuhi corregidor. Ticaitihapaipahi eta námirapahi éma.

*Ema Pedro tiápechavavare tépiyacava vahi máimati ema Jesús  
(Mt 26.71-75; Mr 14.69-72; Lc 22.58-62)*

<sup>25</sup> Tacahe, ema Pedro manasirichuhi titupihahi te tachacaya eta yucu, tiásacavahi éma. Nayaserecavarepa nápechahi:  
—¿Pítirichu jácani máimiture ema maca achane? —náichapa.

Ema Pedro majicapapa:

—Vahi nútina —macahepa.

<sup>26</sup> Tásicha, matiarihihivare titupihahi ema mavanarahi ema aquenuca, macheji ema máechatichacaruhi ema Pedro. Tacahe, éma téchajicapa, máichapa:

—Núti németeaca nímahavihi picachanehi éma tayehe eta huerta te vicaratasinehi ema maca —máichapa.

<sup>27</sup> Émasera ema Pedro macahevarepa:

—Váhiquene nímati éma —macahepa.

Tásicha, enurujipa téchajicanecha eta varayu.

*Ema Jesús námapa te mamirahu ema Pilato*

*(Mt 27.1-2, 11-14; Mr 15.1-5; Lc 23.1-5)*

<sup>28</sup> Te jena yáticarahi, te tijararahipa, nacuchucapa ema Jesús te mapena ema Caifás. Námapa tayehe eta palacio mávihahi ema Pilato. Váipasera nasiapahini ena tuparairucana. Náimichuhahi ema Pilato. Nanasipa te aneca, namavarairahi náechipejicavahini eta nanisirayarehi eta cordero pascual te jena sache.

<sup>29</sup> Tacahe, ema Pilato tiúchucapa, máechajimurihapa éna. Máichavacapa:

—¿Tájaha eta maviurevahí ema maca achane iámaquenepahí eta ani nuyehe? —macahepa ema Pilato.

<sup>30</sup> Éna najicapapa:

—Jucarihi eta maviurevahí. Eta tacahe, viámapahi eta piyehe.

<sup>31</sup> Tásicha, ema Pilato, máichavacapa:

—Eyana iama. Étina ícuñaca ema maca, taicha jararihi eta eyeherepichuhi eti israelítana —máichapa.

Éna najicapapa:

—Étasera víti, vaipa ísapahavihini vítaucha eta viyeherepi vínicapaca mácani ticaviurevahí, vitupisica te márijahi. Émasera ema maca vivaraha máepena. Vivaraha pémetatacaini te crusu —nacahepa.

<sup>32</sup> Tacahehi eta táitauchiravapaipa tamutu eta máechajiriruvanapahi ema Jesús eta máepenirayarehi te crusu.

<sup>33</sup> Tisiapavarepa ema Pilato te tajuhe. Máichuhapa ema Jesús. Tacahe, mayaserecapa:

—¿Yátupisareji réyvihi píti nayehe ena pijaneanana israelítana? —macahepa.

**34** Ema Jesús máichapa:

—¿Pitupiruvahipuca eta juca píchiranuhi, pivarairahi pechate yátupihipuca eta nurreyvahi? ¿Pitanucahipucasera eta nuviurevayare, picutihipuca eta napanereruhi ena nujaneanana israelítana? —máichapa ema Jesús.

**35** Ema Pilato majicapavarepa:

—Vahi nímati eta epanereruana eti israelítana. Énarichuhi ena pijaneanana ena tuparairucana, éna tiámanianapahi eta ani nuyehe. ¿Tájaha eta pivuirevahí eta nayehe? —máichapa.

**36** Tásiha, ema Jesús majicapavarepa:

—Jéhesare, jararihi eta návacurehi; vahisera étaina te juca apauehe. Te étainahini te juca apauehe eta návacurehi, téhacacauchanuanaripahini ena nímitureanahi, vahivare nacucarataganuhini ena ticatianacanuanahí. Taicha yátupiquenehi eta návacurehi, vahi étaina te juca apauehe —macahepa.

**37** Tacahe, ema Pilato mápechavarepa mayasereca:

—Tacahe, ¿yátupihi eta pirreyvahi? —máichapa.

Ema Jesús majicapapa:

—Yátupi réynuhi nútí. Eta núcupaisirahi, núchucahi te juca apauehe, nímiturecayarehi eta yátupiqueneana. Nácani tisuapajirahianayare, nasamararacayare eta yátupiqueneana —macahepa.

**38** Tacahe, ema Pilato macahevarepa:

—¿Píti pímijachava pímati eta yátupiqueneana? Nútí, németeaca nájina narataha náimativahí eta yátupiqueneana —macahepa.

*Ema Pilato macavanairipipa náetataca ema Jesús te crusu  
(Mt 27.15-31; Mr 15.6-20; Lc 23.13-25)*

**39** Te tamutupa eta mayaseresirahi, tiúchucavarepa ema Pilato. Máechajimurihapa ena ticatianacanahí ema Jesús:

—Tájina maviurevaina ema maca achane eta nímairahi nútí. Étisera jucarihi eta eyeherepi te Pásquamuahuana eta nucaitisirayare ema émana presu. ¿Evarahapuca nucaitica ema eyehe Rey, iáquenumuri eti israelítana? —máichavacapa éna.

**40** Énasera tipiararecanapa eta najicapirohi:

—¡Vahi vivaraha picaitica ema maca! ¡Émaina picaitica ema Barrabás! —nacahepa.

Ema Barrabás táemerataruhi eta máetaviuchirahi eta mámeraivahi.

## 19

**1** Tacahe, ema Pilato macavanairipipa náestaca ema Jesús.

<sup>2</sup> Tásicha, ena suntaruana navehana eta épire itapepi, náitsamemacapa. Nanacapa te machuti ema Jesús, majarapi-yarehiji náicha. Namuiriachavarepa eta muíriare mularume.

<sup>3</sup> Tásicha, nachayacapa éma, nacavayuemarajipa nacaecahijiricapa. Ánipa nacahe:

—Tata, ¡pítitataji nayehevihi Rey ena israelítana! —nacahepa.

Náehamirahavare te mamira.

<sup>4</sup> Ema Pilato tiápechavarepa tiúchucahi. Tásicha, máichavacapa ena achaneana:

—Nímereca te emirahu ema maça achane. Nuvarahasera ácaicutiaraini eta tamajinairahi maviurevainahini eta nímairahi núti —máichavacapa.

<sup>5</sup> Tacahe, nacuchucapa ema Jesús, mámapaipa eta itapepi te machuti, majarapihi náepiyaruhi éna, étapa eta namuriaruhi mularume. Tásicha, máichavacapa ema Pilato:

—Mácaripa ema maca achane. Ticaemecharáhiripa, ticaestaripavare. Maratapa —macahepa.

<sup>6</sup> Te náimahapa ena tuparairucana énapa ena nasuntaruana, tipiaracanapa:

—¡Pémetatareca te crusu! ¡Pémetatareca te crusu! —nacahepa.

Ema Pilato máichavacavare:

—Núti tájina maviurevainahini eta nímairahi. Étina écha eta iámairaya éma. Étina émetatareca te crusu —máichavacapa.

<sup>7</sup> Éna najicapavarepa:

—Ichape eta maviurevahí ema maca eta viyehe, taicha tímijachavahí Machicha ema Viya. Vivaraha máepena, taicha vahiquene vísapahini eta juca —nacahepa.

<sup>8</sup> Eta masamirahí ema Pilato eta machichairahipuca ema Viya ema Jesús, ichaperinehi eta mapisirahí.

<sup>9</sup> Tisiapavarepa tayehe eta mayehe palacio. Máichuhavarepa ema Jesús. Mayaserecavarepa:

—¿Nájahavisica píti? ¿Távihasica eta piásinehi? —macahepa.

Émasera ema Jesús, tájina vahi majicapahini.

<sup>10</sup> Tásicha, ema Pilato máichavarepa:

—¡Vahi pivaraха pijicapanu! Péchapuca píti eta nuratahairahí nucuchucuhavi, énerichuvare nuratahavare nucavanairipi náetatacavi te crusu —macahepa.

<sup>11</sup> Ema Jesús mapaenumavapa majicapa:

—Vahiquene piratahaimahi pítijiva pémetatarecanuhini te crusu. Émasera ema Tata tituparacavihi, mavarairahi títauchava eta mavarahaqueneanahi. Eta tacahe, ichape eta napecaturana ena tíjararecanuanahi eta piyeho. Píti

váhipanaichuhinéni eta pipecaturahi eta píchiranuhi — macahepa.

12 Tacahe, ema Pilato mavarahainipa macuchucuhaya-rehini ema Jesús. Énasera ena tuparairucana tipiaracana-varepa:

—¡Te picaitica ema maca, vépiyaequenehaviyare mayehe ema ichapequene aquenuca Emperador! ¡Ema maca achane macatianaruhi ema Emperador taicha tímijachavahi rey! — nacahepa.

13-14 Tacahe, te masamapa ema Pilato eta náechajiriruvahi éna, tiyanapa te anuquehe, téjacapa tayehe eta máejasirare apaesa namutuyarepa náimaha. (Eta mávacurehi, amairiha máripahi. Eta jena sache, viérnesi tábiquenereruhi eta Pascua.) Tacahe, tiánehiripa las dóceyarehi eta sache macavanairipipa nama ema Jesús. Tásicha, máichavacapa ena achaneana:

—¡Mácaripa ema eyehe Rey! —macahepa.

15 Énasera tipiaracanavarepa:

—¡Pémetatarecavane! ¡Máepenavanepa! ¡Váhiquene vi-varaha ema maca! —nacahepa.

Tásicha, ema Pilato máichavarepa:

—¡Vahi németatarecaimahi ema eyehe Rey! —macahepa.

Énasera ena tuparairucana najicapavarepa:

—¡Nájina apanaina viyehena Rey! ¡Macarichu ema Emperador! —nacahepa.

16 Tacahe, ema Pilato másapapa. Máijaracavacapa ena masuntarurana eta náetatasirayare ema Jesús. Jéhesaréinehi námapa éma.

### *Náetatacapa te crusu ema Jesús*

(Mt 27.32-44; Mr 15.21-32; Lc 23.26-43)

17 Tacalhe, náijaracapa ema Jesús eta macurusuraya. Tiúchucapa éma, mámapaipahi te majihu. Námapa eta te Calvario (te hebreo ticaijare Gólgota).

18-19 Tásicha, ema Pilato máepiyacapa eta ajureca eta táchajiriruvahi, ánipa tacahehi: “Ema Jesús Nazareno, Rey nayehe ema israelítana”. Te tápusi eta macurusura nanacapa eta juca ajureca. Natiarihivare ena apinana ticaetatanahivare te machacaya. Émasera ema Jesús, te enumuhu mávihahi.

20 Camuriana ena achaneana téchajicuhanahi eta ajureca, taicha eta macaetataiyahi ema Jesús tacachacayaichuhi eta avasare. Eta ajureca, te hebreo, te griego, téhepa latín. Mapana eta táchajiriruvanahi.

21 Eta tacahe, ena tuparairucana tiyananapa mayehe ema Pilato nayaseapanahi máitsivachahini eta ajureca. Éna

navarahahi áni tacaheyarehi eta ajureca: “Ema maca tímija-chavahi Rey nayehe ena israelítana”.

<sup>22</sup> Émasera ema Pilato máichavacapa:

—Eta ajureca nunacaquenehi, nájina tihapapicaimahi —macahepa.

<sup>23</sup> Te náitauchapa ena suntaruana eta náetatasirahi ema Jesús, nasuertehachapa eta mamuiriha nayehe ena cuátroqueneana. Navehavarepa eta apana mamuiriha. Étasera tájina taparinahini, amairijuheichucha eta itsameruca.

<sup>24</sup> Vaipa návarahahini navetsayucahini. Tásicha, nasuertehachavarepa, náimairayarehi nájahayarehipuca mácani tivecu-hayarehi.

Tacahehi eta táitauchiravahi eta Sagrada Escritura eta táchajiriruvahi: “Ticajijiricacanapa eta numuirihaini. Nasuertehachavare eta apana numuiriha”. Jéhesare, tacahehi naicha ena suntaruana.

<sup>25</sup> Te tápecu eta macurusura ema Jesús, sutarihihi esu maena, ésupa esu mápenaru, ésupa esu apana María mayena ema Cleofas, ésupa esu María Magdalena.

<sup>26</sup> Tacahe, te máimahapa esu maena eta sutarihirahi te machacaya, nútipa nuti máimiturehi máemunaruquenehi, ánipa máicha ésu:

—Mémechicha, márahi ema nítsivayare ema pichichayare. Éma titatíviyare.

<sup>27</sup> Tásicha, énerichuvare tituparacanuvarepa núti:

—Némunacasare, nutuparacavi esu meme. Esu pénayare. Pímainanu —máichanupa.

Jéhesaresera, nútì Juan ichaperinehi eta nujacapirahi ema maena. Námapa te nupena.

### *Eta máepenirahi ema Jesús*

(Mt 27.45-56; Mr 15.33-41; Lc 23.44-49)

<sup>28</sup> Tacahe, eta máimairahi ema Jesús eta táitauchiravaripa tamutu eta táchajiriruvanahi eta Sagrada Escritura, ánivare macahehi:

—Tétavicava eta numauneva —macahepa.

<sup>29</sup> Tatarihihi eta tisisica vino te tinaja. Náechipaijicapa eta machuchujiruyarehi. Náimicapayacapa tayehe eta majaca te tiúqui curina.

<sup>30</sup> Tacahe, machuchujicapa ema Jesús eta tisisica vino. Tásicha, macahepa:

—Jéhevare puiti, títauchavapa tamutu —macahepa.

Tásicha, téyusicapa. Tépenapa.

*Ema émana suntaru mayuvaracapa te machene ema Jesús tayehe eta lanza*

<sup>31</sup> Tacahe, ena tuparairucana vahi návarahahini nánasihini ena ticaetatanahi te crusu te jena sache sávaru páschuairahi. Tacahe, tiyananapa mayehe ema Pilato, nayaseapanahi macavanairipihini eta nacavetupaiquechavacayarehi apaesa náepenavanehini. Navarahahi náecarávane, taicha téavicavahi eta tacapicahuirahi nayehe éna eta jena sácheana páschuairahi.

<sup>32</sup> Jéhesaréinehi, tiyananapa ena suntaruana, nacavetupaiquechavacapa ena apinana tiámerahiana nacaetataquenehi te crusu te machacaya ema Jesús.

<sup>33</sup> Tásicha, éneyareichuhivaréni ema Jesus. Téhesera te náitecapauchapa, náimahapa eta máepeniraipahi. Tacahe, vaipa nacavetupaiquechahini éma.

<sup>34</sup> Táitsivahisera ema émana suntaru mayuvaracapa te machene tayehe eta lanza. Enevanepa tiúchucahi eta iti étapa eta une.

<sup>35</sup> Núti Juan nájuequenehahi tamutu eta juca, nímahaqueneanahi. Nuvaraha nítametacahe tamutu. Yátupihivare eta numetasirahehi, taicha nuvaraha esuapahini éti apanavare.

<sup>36</sup> Títauchavahai eta juca táechajiriruvahai eta Sagrada Escritura: “Tájina vahi nacavetuaimahi eta máperana”.

<sup>37</sup> Jararihivare eta apana Escritura, ánivare tacahe: “Náimahayare ema najarachaquenehi”.

*Nacucupaicapa te crusu ema Jesús, náecaráyarepa  
(Mt 27.57-61; Mr 15.42-47; Lc 23.50-56)*

<sup>38</sup> Te tamutupa eta juca, matiarihihi ema achane José, ticavasahi te Arimatea. Émarichuhi tisuapajirahihi mayehe ema Jesús. Váhisera máimerecavahini, mapisiravacahi ena machamuriana aquenucarahaná. Tiyanapa éma mayaseapanahi ema Pilato eta máquehe ema Jesús. Tacahesera ema Pilato másapapa. Tiyanapa ema José, macucupaipanapa eta máquehe ema Jesús.

<sup>39</sup> Émapa ema Nicodemo macachanehi, ema téjirapanahi ema Jesús te jena yátimuhuquénehi. Mámapahi éma eta treinta kilo eta perfume mayajihayarehi.

<sup>40</sup> Tacahe, ema José émapa ema Nicodemo navehana etá máquehe ema Jesús, náyuruacapa eta te sávana tijapu táurinaquenehi. Nayajihacavarepa tayehe eta táijiyequene perfume. Tacahehi eta viyeherepi te vécarayare ena náepenaqueneana.

<sup>41-42</sup> Tacahe, te tachacaya eta máepeninehi ema Jesús, tatiarihihi eta huerta te távihahi eta mari natsecajueruhi ecariyare tacutihhi eta covacha. Nájinaichaha nacaecarasihini tayehe. Étapa náecarihahi eta máquehe. Tiputuvahuanapa taicha cáperehichicharipahi. Vahi taísapacarehini náecarahini te yati,

váhivare táisapacarehini te apanapa sache taicha sávarumu-huipahi.

## 20

*Eta máecheprusira ema Jesús te máecari  
(Mt 28.1-10; Mr 16.1-8; Lc 24.1-12)*

<sup>1</sup> Tacahe, te jena sache lumincuquenehi, te tijararahi-chichapa, tiyanapa esu María Magdalena tayehe eta máecari. Timapicuichaha te suítecapauchapa eta ecari, suímahapa tájinaripahi eta márime tajihainihi eta tapajacurahi eta ecari.

<sup>2</sup> Te suímahapa, tichavavanepa tijunapapaipahi. Suíchuapanayarehi ema Pedro nútipa nuti Juan. Timetacahavipa ésu:

—Námechapa jácani eta ñáquehéní eñi Viáquenu. Vaipa vecha távihahipuca nanasihahi —sugahepa.

<sup>3-4</sup> Tacahe, núti émapa ema Pedro viúchucapa viyanapa vijunapapaipahi. Nucachuricapa ema Pedro. Nítcapavanepa nútì tayehe eta máecari ema Viáquenu.

<sup>5</sup> Nétipaicapa. Nujiñañajuechapa. Tacarinehi nímaha eta móyuruhanainihi. Váhisera nusiapahini.

<sup>6-7</sup> Te títecápapa ema Pedro, tisiapapa éma tayehe eta ecari. Máimahapa eta móyuruhanainihi. Tanasirinecha enurujuhehi, étapa eta mamuhisiequene ema Jesús.

<sup>8</sup> Tacahe, nusiapavarepa nútì tayehe eta ecari. Nímahapa eta táichararacavahi. Tásicha, ichaperinehi eta nusuapirahi.

<sup>9</sup> Vipaenumavapa vicaicutiarahi eta taechajiriruvahi eta Sagrada Escritura, eta máecheprusirayarehi ema Viáquenu te máecari.

<sup>10</sup> Te tamutupa eta vímairahi, vichavapa te vipena.

*Ema Jesús tímerecavapa suyehe esu María Magdalena  
(Mr 16.9-11)*

<sup>11</sup> Esu María Magdalena, énerichuvare tiápechavaripa tichava eta te máecari. Sunasipa, tíyahaipa. Tásicha, tétipaicapa sujiñañacahi te tajuhe.

<sup>12</sup> Tiáramicarepa suímaha ena apinana ángeleana, tijapumuirhavacahi. Téjacanahi éna te tajuhe eta máecarini. Ema émana te tanapainihi eta machuti, ema apana te máivape.

<sup>13</sup> Tásicha, ena ángeleana nayaserecapa ésu:

—¿Tájaha ticaiyacavi, nuchicha? —náichapa.

—Ticaiyacanuhi eta námechirahi eta ñaquehe eñi Viáquenu. Vahi nécha távihapapuca nanasihahi —sugahepa.

<sup>14</sup> Te titapiricapa eta suíchiravacahi, téviurucavapa, suímaharinehi ema Jesús.

<sup>15</sup> Tásicha, éma apanava mayaserecapa:

—¿Tájaha ticaiyacavihi, nuchicha? ¿Nájaha pitanucahi? —máichapa.

Ésusera suímijachaicha ema tijanearecarahi eta huerta. Tásiba, suíchapa:

—Tata, te pítihipuca piámahi eta ñáquehe eñi Viáquenu, picatijicanu pimetacanu távihapuca pinasihahi. Nuvaraha námayare núti —suíchapa.

<sup>16</sup> —¡María! —máichapa.

Suésenicainehi ésu. Supaenumavapa suímatihi éma. Tásiba, suíchapa:

—¡Pítiquenehi, Tata Náquenu!

<sup>17</sup> Tásiba, ema Jesús máichapa:

—Vahi picuemamahacanu, taicha vuíchaha nápanahini te mávihahi ema Tata. Piyana pimetacavaca ena apamuriana nímitureana eta nápanirayare mayehe ema Tata, Ecaiyaqueñehivare éti apanava —máichapa.

<sup>18</sup> Tacache, esu María Magdalena tiyanapa sumetapanavacahi ena suchamuriana eta suímairahi ema Jesús, étapa eta mametarapianahi.

*Tímercava ema Jesús nayehe ena máimitureana*

*(Mt 28.16-20; Mr 16.14-18; Lc 24.36-49)*

<sup>19</sup> Étarichu te jena sáchequenehi lumincuquene, yátiripahi, viúrujicavahi viti máimitureana ema Jesús te tajuhe eta peti. Vérataequenerecavahi taicha eta vipisirahi ena tuparairucana. Tiáramicarepa titupihahi ema Jesús te vimuri. Téchajicahavipa:

—¿Ícharacava, nuchichanaveana? —máichahavipa.

<sup>20</sup> Tásiba, tímechahavipa eta majarana te mavahuana étapa te machene. Tacache, víti ichaperinehi eta viúrisamurevahi eta vímairahi éma.

<sup>21</sup> Tásiba, máichahavipa:

—Vahi ecueñamava. Núti, mavanerunuhi ema Tata núcupacayare te juca apaquehe, nímitucaheyarehi éti. Puiti nuvane-caheyare núti ímitucavacayarehi ena achaneana, apaesa náehicanuhini éna apanava —macahepa.

<sup>22</sup> Tásiba, tiáchajuacahavipa víti. Tásiba, máichahavivarepa:

—Táuri eta ejacapiraina ema Espíritu Santo eta máitecapau-chiraheya, mávahásiraheya.

<sup>23</sup> Éma, tímitucaheya eta ítamasiravacaya ena achaneana eta naperdonachacarevahi me Viya ena téneuchavanahi. Te vahi nacuvaraha téneuchavana, tanasiyare eta naviurevana taicha eta napecaturana —macahepa.

*Ema Tomás vahi masuapa eta máechepusiraipahi ema Jesús*

<sup>24</sup> Te jena sache eta máimeresiravahi ema Jesús eta viyehe, májinahi ema vichamuri Tomás.

<sup>25</sup> Tásihasera, ena apamuriana vichamuriana nametacapa éma eta vímairaipahi ema Jesús. Émasera macahepa:

—Vahi nusuapa. Téhesera te nímaha eta majara te mavahu taicha eta clavo, nímisiapavare eta nuvauqui tayehe eta majara te machene, tapaenumava nusuapayare eta máechepusiraipahi —macahepa.

<sup>26</sup> Te óchopa sache eta táetavisiravahi, viúrujicavaipavare te viúrujisirareva. Matiarihipahi ema Tomás te vimuri. Tásiha, tiáramicarevarepa tímerecavahi ema Jesús. Titupihahi te vimuri. Téchajicahavivarepa.

—Ícharacava, nuchichanaveana —macahepa.

<sup>27</sup> Tásiha, máichuhapa ema Tomás:

—Yare, nuchicha —máichapa—. Pímaha eta nujarana te nihuana. Pímisiapa eta pivauqui eta te juca nuchene, apaesa pisuapanu.

<sup>28</sup> Tacache, ema Tomás majicapapa:

—Tátachicha, piti yátupiquenévi Viya. Tétavicavahi eta nucasiñairavihi —máichapa.

<sup>29</sup> Ema Jesús majicapapa:

—Nuchichasami Tomás, pipaenumava pisuapanu eta pímairanuipahi. Tétavicavasera náuricacareva nácani tisuapajirahianahi vahi tacamesahini náimahanuhini —macahepa.

*Nuvaraha esuapa eta juca libro nájurehi*

<sup>30</sup> Jucarihichahavare eta apamuriana tiáramicareana máichaqueneanahi ema Jesús, eta vímahaqueneanahi viti máimitureana. Váipasera tamutuhini tacajuhini te juca libro.

<sup>31</sup> Nuvarahasera ácaicutiara eta nájureanahi apaesa esuapahini ema Jesús eta émairaquenehi Cristo, Machichaquenehi ema Viya. Taicha te esuapapuca éma, máitavacacayare eta ítaresirayare.

## 21

*Tiápechavavare tímerecava ema Jesús nayehe ena siétequeneana máimitureana*

<sup>1-4</sup> Tiuri, te táequenepa eta juca, viyanapa víti te Galilea, vicuchapayarehi ema Jesús. Ánaqui matiarihihi ema Pedro, ema Tomás, ema Natanael, ema nuparape Jacobo, nútipa nuti Juan. Natarihivare ena apinanahи vichamuriana. Tacache, ema Pedro máichahavipa:

—Nuyanayare nénipanayare te cáquiure —macahepa.

Tásiha, víti vijicapapa éma:

—Véhicaviyare víti apanava —víchapa.

Tacahe, te vítecapapa, viávacuhapa tayehe eta pacure. Vénicaipahi te jena yátiquenehi. Tájinaserá vítucavahini. Te tijáraharahichichayaréipa, vímahapa ema Jesús. Titupihaipahi te tachausi. Váhisera vímativanehini.

<sup>5</sup> Tásicha, téchajicahavipa:

—¿Ícharacava, nuchichanaveana? ¿Tájina ítucava eta jima? —macahepa.

Vijicapapa víti:

—Tájina vítucava —víchapa.

<sup>6</sup> Tásicha, éma tivanecahavipa viáquijieca eta viyehe tarrafa te apachacaya eta pacure tinapaicahi te vaure.

—Eta ítusiyavayare eta jima —máichahavipa.

Visuapahisera víti. Tásicha, te vichuruecapa eta viyehe tarrafa, vaipa víchinahini taicha táetaviuchahi eta camurirahi eta jima. Tijitacarenecha.

<sup>7</sup> Tásicha, nútí níchapa ema Pedro:

—¡Émara ema Viáquenu! —níchapa.

Masaminenurichuhi ema Pedro eta níchirahi, ticamuirihavanepa taicha tivejamuhiacavahi éma eta mamuiriha. Tépuhecavapa, mavairahi macapayacavaneyarehi ema Viáquenu.

<sup>8</sup> Víti apamuriana vipauchapa eta tachausi. Vichuruecapaipahi eta viyehe tarrafa; tínicapaipahi eta camuriquene jima. Cien métrorichuhiserapuca eta viyerehirahi eta tachausi.

<sup>9</sup> Te viúcupaicapa te tachausi, vímaharinehi tatiarihihi eta yucu, étapa eta jima jitaruca, étapa eta pan.

<sup>10</sup> Tásicha, ema Jesús máichahavipa:

—Iáma eta íturevahí jima —máichahavipa.

<sup>11</sup> Ema Pedro machurupaicapa eta tarrafa. Vímaharinehi eta ichapemuriquene jima. Ciento cincuenta y tres eta tasimurivahi. Váhisera táetsayucahini eta viyehe tarrafa.

<sup>12</sup> Tásicha, tíchuhahavipa ema Jesús:

—Yare, enica —macahepa.

Tásicha, viyanapa víti, vinicayarehi. Váhisera vipatsicavahini viyaserecahini te nájahahipuca éma taicha tétavicavahi eta viáramesirahi. Vímatiacahisera eta émairahi ema Viáquenu.

<sup>13</sup> Tásicha, ema Jesús témeñahavapa. Mavehapa eta pan. Tíjaracahavipa. Étapa eta jima táimaquiquenepa, tíjaracahavivarepa.

<sup>14</sup> Eta juca eta mapahequenepa eta máimeresiravahi ema Jesús eta viyehe eta máecheprusirahi te máecari.

*Ema Jesús mavaraha macaicutiara te yátupipuca máemunaca ema Pedro*

<sup>15</sup> Te vítanesipa eta vinisirahi, ema Jesús mayaserecapa ema Pedro. Ánipa máicha:

—Piti Pedro, nuvaraha nuyaserecavi: ¿Picachuricapuca píti ena nani apamuriana eta pémunasiranuhi? —máichapa.

Éma majicapapa:

—Némunacavi, Tata. Pécharichuhi píti jácani némunasiravihi —macahepa.

Ema Jesús máichavarepa:

—Tiuri, te yátupihipuca pémunacanu, nuvaraha pijaneasina-nuvaca ena téhicanuanayare, taicha vahi náitucahini nacatiuchavahini. Téñamacareanahi —macahepa.

<sup>16</sup> Te taequenepa, mápechavare mayasereca:

—Pedro, nuvaraha nuyaserecavi: ¿Yátupi eta pémunasiranuhi? —máichapa.

—Némunacavi, Tata. Pécharichuhi píti eta némunasiravihi —máichapa ema Pedro.

Ema Jesús máichavarepa:

—Tiuri, te yátupipuca pémunacanu, pijaneasinanuvaca ena téhicanuanahi —macahepa.

<sup>17</sup> Te taequenevarepa, mapahequene mayasereca:

—Pedro, ¿yátupi eta pémunasiranu? —máichapa.

Émasera ema Pedro titsirihapa taicha mapaheripa eta mayaseresirahi. Majicapavarepa:

—Pécharichuhi, Tata, eta némunasiravihi —macahepa.

Tásicha, máichavarepa ema Jesús:

—Tiuri, te yátupihipuca pémunacanu, pijaneasinanuvacayare ena téhicanuanahi.

<sup>18</sup> Nutupiruva numetacavi: Eta piámaperuvahi, píti péchinavahi eta pítaresirahi. Picamuirihahi, piyanahivare te jácani pivarahaqueneanahi picaijuhe. Jácanisera áñoanayare eta pichávicavaipa, apanainapa eta pítaresirayare. Apananainapa ena timuriachavianayare, taicha titijivauchavianayare, tásicha tiámavianainapa te jácani pimavarahaquenénihi picaijuhe —máichapa.

<sup>19</sup> Eta juca máichirahi ema Jesús, mavarairahi máimine-capaequenehayarehi eta máichararacavayarehi eta máepenirayare ema Pedro. Tétavicavainapa eta macunachacareva ema Viya maicha ema Pedro, taicha vahi téquecavaimahi eta máimairahi eta macatajivairaya. Tásicha, máichavare ema Jesús:

—Piti Pedro, tacuija tahapapiricahini eta pítouchira tamutu eta nutuparasiravianahi —máichapa.

*Eta táichecuine eta májurehi ema Juan, máemunaruquenehi ema Jesús*

<sup>20</sup> Tásicha, téseeniequenehavapa ema Pedro, tímahanupa eta néhiequenehairapahi nuti máemunaruhi ema Jesús. (Nútirichu núti tuyaserecahi te mesa te nájahahipuca ema tíjararecayarehi.)

<sup>21</sup> Eta máimairanuhi ema Pedro, mayaserecapa ema Jesús tájahapuca eta níchararacavayarehi núti apana. Ánipa macahe ema Pedro:

—Tata, ¿tájahapuca máicharacavayare ema apanava ema maca?

<sup>22</sup> Ema Jesús majicapapa:

—Núti nécha. Te nuvarahapuca máitareca máimahayare eta nápechiravayare nuchavirayare, vahi tacuimipanerecavi. Pítisamisera, pítaucha tamutu eta nutuparasiraviana. Tacuija tahapapiricahini eta péhisiranuhi.

<sup>23</sup> Tacahe, ena nuchamuriana, ichaperinehi eta napane-requenehairahí eta numaepenirayarehi. Váhisera mametacahini eta numaepenirayarehi. Tacarichu macahehi: “Te nuvarahapuca núti máitareca máimahayare eta nápechiravayare nuchavirayare, vahi tacuimipanererecavi” macahepa.

<sup>24</sup> Nuparapenaveana, núti yátupiquenenuhi eta máimiture-nuirahí ema Jesús. Nutupiruvahi néchajisiha te juca nájurehi eta yátupiqueneana nímahaqueneanahi.

<sup>25</sup> Jucarihichaha eta apamuriana máichaqueneanahi ema Jesús. Váipasera támuhuhini nájuequenéhahini, taicha téavicavahi eta táichapemurivahi. Te vítametacapucaini tamutu eta máichaqueneanahi, váipapuca vicuratahahini vítuca, namutuhinéni ena achaneana te juca apaquehe tiájuequenerahiana.

Tamutupa eta juca nájurehi.

## **Ema San Lucas májuequenehahi eta náichararacavahi ena Apóstoleana eta náehisirahi ema Jesucristo, ticaijare LOS HECHOS**

<sup>1</sup> Piti Teófilo, títecapáuchaviripa eta táinapure nájure tayehe eta máichavaquenévahí ema Jesucristo te títecapapa te juca apauehe. Nájuchahí tamutu eta máichaqueneanahí, étapa eta máimiturapianahi.

<sup>2</sup> Nararihihi ena manerejiruana apóstoleana. Émaripa ema Espíritu Santo máimicatacahi eta matúparasíravacahi éna. Nájuchavarepa eta mayapirahi te anuma. Puiti nímiamarecavare eta piyehé eta juca nájure, apaesa pímati tamutu eta téchacareana tayehe eta máichavaquenévahí ema Jesús.

<sup>3</sup> Te taequenepa eta máepenirahi, téchepucapa te máecari, tiápechavavare titareca. Tásicha, cuarentaquenehi sache eta macáchanéravacaríchaha ena máimitureana. Máimerecahi ichape eta machavirahi titareca. Máimitucavacahí éna, eta táichararacavayare eta náehisirayare ema Viya ena achaneana te tamutu avasareana.

*Ema Jesucristo mametaca eta máucupaisirayare ema Espíritu Santo*

<sup>4</sup> Te jena sache, macáchanevacaríchaha ena apóstoleana, mametacavacapa. Ánipa maicha:

—Vahi ecújúnijica eta juca viávasa Jerusalén. Ecuchapayare eta táitauchiravayare eta máijararuvahi ema Vicaiyaquene. Étaripa eta juca numetarapianahi.

<sup>5</sup> Échavarichu ema Juan, máicachasicavacahi te une ena achaneana. Étisera, puiti juca sácheinayare, tiúcupaicayare ema Espíritu Santo. Ema tícachasicaheyare, tiávhácahénapa —macahepa ema Jesús.

*Eta mayapira ema Jesús te anuma*

<sup>6</sup> Tacahe, nayaserecapa ena tiúrujiácanahí ema Jesús. Ánipa naicha:

—Tata Viáquenu, ¿puítinaríchu píjaracahavi viti israelítana eta vítináini vígovernachacáca te juca viávasa? —nacahepa.

<sup>7</sup> Ema Jesús majicapapa, ánipa maicha:

—Vuíchaha taechacare. Vahi tatuparaca étinahíni echa tájahapuca sácheinayare, tájahapuca cájeyavare títauchavaya. Taicha tayumururevahí eta juca maicha ema Tata Vicaiyaquene. Macarichu éma máituruéqueneha eta juca.

<sup>8</sup> Jucarihisera eta ítucaqueneyare. Ema Tata tíjaracaheyare ema Espíritu Santo, tiávahácaheyare tímicatacaheyare. Tacahé, échajisianuínapa nútì. Tamutuyare avasareana eta epaisiha, te Jerusalén, te Judea, te Samaria, étapa te jácani tayerehiqueneana avasareana tayehe te juca apaquehe — máichapa ema Jesús.

<sup>9</sup> Tacahé, te titavapa eta máechajirísiravahi, tiyanapa tiyapa te anuma. Tacahé, ena máimitureana náimrararaequenehaipa eta mayanirahi. Táepacuchirahi eta úcaji. Vaipa macaecherahini te anuquehe.

<sup>10</sup> Eta mayanirahi ema Jesús te anuma, náimraracáichaha ena máimitureana. Tacahé, tiáramicareanapa tímerecavana ena apinana ángeleana. Tijapumuirihavaca.

<sup>11</sup> Tacahé, náichapa ena ángeleana:

—¿Tájaha íchahi ímararacahi eta anuma, eti máimitureana ema Jesús? Puiti enecapararecahi ema Jesús eta majuniji-siraheripa, mayanirapa te anuma. Vimetacahe: Te jácani sácheyare, ema Jesús tichavayare te juca apaquehe. Tiúcupaicayare tacutiyareichu eta mayanirahi —náichavacapa ena ángeleana.

*Nanerejicapa ema Matías, máitsivayarehi ema Júlasi*

<sup>12</sup> Tiuri, eta návihairahi te anuquehe masihi ticaijare Olivo-quiji. Tachacayahi eta Jerusalén, apina kilómetro eta tayerehivahi. Tiyananapa tichavana tayehe eta avasare.

<sup>13</sup> Te títecapanapa te avasare, tisiapanapa te peti apina piso, eta náitecapihahi. Tiápananapa te téqueneha piso. Natarihihi ema Pedro, ema Jacobo, ema Juan, ema Andrés, ema Felipe, ema Tomás, ema Bartolomé\*, ema Mateo, ema apana Jacobo, ema Simón, émapa ema Judas.

<sup>14</sup> Natarihivre ena maparapenaveana ema Jesús, ésupa esu maena María, énapa ena apamuriana esenana. Tamutu sácheana, ena nani tiúrujicavanahi eta nayujarasirahi.

<sup>15</sup> Tacahé, te jena sácheana, ena náurujuruvanahi náetavicahi ciento veinte eta nasimutuva ena máimitureana ema Jesús. Tacahé, téchepucapa ema Pedro te namuri, titupihapa. Máichapa:

---

\* **1:13** Ema Bartolomé ticaijarehivre Natanael. Ema apana Jacobo, machichahi ema Alfeo (váipasera véchapirica eta máitaresira ema Alfeo). Ema Simón, nachamurinihi ena revolucionario ticaijareana “cananístana”. Ena nani cananística nacanarajiricahi ena apavasanana romanoana, navarairahi náquijica, nacuchucayare te návasa Judea. Ema maca Judas, matiarihi ema maparape ticaijarehivre Jacobo, váhisera nachamurinahini ena apóstoleana. Ema maca Judas, mapanahi eta máijare: eti Tadeo étapa eti Labeo, étapa eti Judas. (Te pivara ha pecha, pitanuca te libro Marcos 3.18 étapa te Mateo 10.3.)

16 —Nuparapenaveana, ema víyarahaini David macaimitucasiquenehi mayehe ema Espíritu Santo, ánaquiríchaha eta áñoana eta matiarihiraya ema Júlasi, ema tínapumiráuchaya ena suntaruana nacaratacaya ema Jesús. Títauchavapa eta mame tarapihi ema Espíritu Santo.

17 Taicha ema Júlasi, émainichuhi vichamurini tayehe eta juca vématanerepihi —macahepa ema Pedro.

18 (Émasera ema Júlasi ticapacavahi tichumucavapa. Tiáquipaicavahiséra eta máquehe. Tiúchumuriapa eta maturupiana. Te taequenepa, navehapa eta mavachainihi eta máijararesirahi ema Jesús. Navacharecapa eta apa quehe.

19 Te náechapa ena ticavasana te Jerusalén, nanacapa eta táijarehi Aceldama. Eta ticaijarehi puiti “Apa quehe máitinevacha ema Jesús”.)

20 Tímiyanava eta máechajisirahi ema Pedro, ánipa maicha:

—Ema víyarahaini David májucunachahi eta mame tarapiana ema Espíritu Santo eta te Salmo. Áni macahehi: “Machu nacuija nacusiapa eta mapena majunijiruipa nácani macutipanereruana eta mavainarajiva”. Ánivarepa macahe: “Tatuparacahi masiapaya ema apana achane máitsivaya te mávacurénihi” macahepaji ema Espíritu Santo.

21-22 Tacahe, tituparacahavi vinerejicayare ema apana, máitsivaina ema Júlasi, apesa vahi macuejiacava te vimuri viti dócequeneana. Máimicatacavahi eta véchajisiha eta máechepusirahi ema Jesús. Nararihi ani te vitaracu ena vichamurianahi te juca áfioana te matiarihichaha ema Jesús te vimuri. Ena ticachane havianahi te ticaicachasinapa ema Jesús me Juan. Vahi najunijicahavihini. Natarihi quenehi te tiyapapa ema Jesús te anuma —macahepa ema Pedro.

23 Tacahe, ticanerejianapa ena apinana: ema ticaijare Matías, émapa ema apana ticaijare José Barsabás (énerichuvare náimijarechahi Justo).

24-25 Tacahe, tiyujaracanapa, ánipa nacahe:

—Tata Viáquenu, piti pímati eta visamureana vimutu. Pímechahavi nájahapuca ema tiuri nayehe ena nani apinava vinerejiruanahi máitsivayare ema máemitiaruhi apóstoleni Júlasi, táimicuñaruhi eta mapecatura —nacahepa.

26 Tacahe, nasuertehachapa ena apinana. Tatocachapa ema Matías. Tásiha, natuparacapa eta mávacureyare nachamurirayarehi ena apamuriana apóstoleana.

<sup>1</sup> Tiuri, títecapapa eta sache napiestara ena israelítana ticajarehi Pentecostés. Tiúrujicavanahi ena apóstoleana énapa ena apamuriana nasimutuvaqueneana máimitureana ema Jesús.

<sup>2</sup> Tacahe, tiáramicarepa eta ticaema te anuquehe tiásahi te anuma ticutipahi eta muraca técaticava. Ticaemapa muraca te táinahu eta peti návihahi éna.

<sup>3</sup> Tacahe, tiáramicarepa tímerecava eta tacuti eta tanene eta yucu. Tijarahivacapa te nápusiana namutu ena náurujiruvanahi.

<sup>4</sup> Tacahe, ena mávahácavacaripa ema Espíritu Santo. Tiáramicaneanapa apáechajiríruvavacapa taicha eta mávahásiravacáipahi ema Espíritu Santo.

<sup>5</sup> Te jena sache, natarihivare ena camuriqueneana israelítana te Jerusalén tiásihana te tamútuyareíni avasareana. Tipicaurahianahi tayehe eta nayehe religión.

<sup>6</sup> Te nasamapa eta tacaemairahi te anuquehe, ticurujicacanapa ena achaneana. Náraminehi ichape táchavenehi eta nasamirahi ena apáechajiríruvavacarípahi.

<sup>7</sup> Ichaperinehi nárami. Tacahe, náichcacacapa:

—¿Tájaha tacayema eta juca? Ena nani, váchira vichamurianaina tayehe eta avasare viávihahi. Ticavasana te Galilea ena nani.

<sup>8</sup> Tásihasera, náitucuhivare eta véchajiriruvapachu vímiuchurehi víti. ¿Tájahapapuca tacayema eta juca?

<sup>9</sup> Camuriana eta véchajiriruvana taicha viti viásihahajíruanahi te apanapanejiana avasareana. Nararihi ena tiásihana te Partia, te Media, te Elam, te Mesopotamia, te Judea, te Capadocia, te Ponto, te Asia, te Frigia, te Panfilia, te Egipto.

<sup>10</sup> Nararihivare ena tiásihana te Cirene te Libia. Nararihivare ena tiásihana te Roma, ena yátupiqueneana israelítana énapa ena tépiyacavanaripa israelítana.

<sup>11</sup> Nararihivare ena tiásihana te Creta étapa te Arabia. Vimutusera visama eta véchajiriruvapachu. ¿Tájahapuca tacayema? Ena nani téchajicanahi timetacahavianahi eta táuricacarequeneana tásihaqueneanayare me Viya. Vicaicutiariahi tamutu taicha téchajicanahi te véchajiriruvapachu —nacahepa.

<sup>12</sup> Namutu napanerequenehahi. Vaipa náimatihini tájahapuca tacayema. Tiyaserejiricacanavarepa:

—¿Tájahapuca tacayema eta juca? —nacahepa.

<sup>13</sup> Natarihisera ena apamuriana nacaecahirichucha, ánipa nacahe:

—Nacavahaqueneana ena nani —nacahepa.

*Ema Pedro máechajicapa ena achaneana*

<sup>14</sup> Tacahe, titupihapa ema Pedro te namirahu ena achaneana. Natiarihihivare ena óncequeneana apóstoleana. Téchajicapa muraca ema Pedro eta máechajisirahi, ánipa macahe:

—Tátanaveana nujaneanana, emutu eti ecavasana te juca Jerusalén, ecatajicanu esamanuchaha. Ácaicutiaraquenéna eta juca nucayemayare.

<sup>15</sup> Eti ímijachahi vicavahaqueneana. Vahi vicavahaquenéna. Tapaenumava las nuéverava yáticarahi. Écharichuhi éti vahi vítuca vera viti israelítana te yáticarahi.

<sup>16</sup> Eta juca ímahaquenehi iáramiquenehi puiti, eta tacaheyarehi taicha mame tarapihi ema Viya mayehe ema víyarahaini profeta Joel. Tásiha, ema Joel májucunachapa eta mame tarapihi ema Viya, ánipa tacahe:

<sup>17</sup> “Jararihiya eta sácheinaya níjaracayare ema Espíritu Santo nayehe namutu ena achaneana. Tásiha, ena echichanaveana, ajairana énapa ena esenana, nacametarairuinapa eta néchajiriruva. Ena amaperuana, níjaracayare eta náechirayare eta táicharacavayare. Ena ichavicachichana ticametacasiayare te navapure.

<sup>18</sup> Taicha nuvanecayare ema Espíritu Santo, níjaracayare mávahácavaca namutu ena nuchanerana. Tásiha, nacametarairuinapa eta néchajiriruva tásihaquenehi nuyehe.

<sup>19</sup> Te juca anuma nímerecayare eta tiáramicareana. Te juca apa quehe nucuchucayare eta ecutiarareanaya, apaesa ímatinu nuti nucarichu nurataha nicha tamutu. Nucamericaya eta ecuñaraqui. Tépusaicavayare eta náitine ena achaneana váinajaríqueneanahi. Nucamericayare te avasarena eta yucu étapa eta ichape quijare.

<sup>20</sup> Eta sache, nucaemahayare eta tajaraiva. Énerichuvare nítsivachayare eta táimahi eta caje. Ítimeyare nícha. Tásiha, títec capainapa eta nusacherayare nuchaviraya nuti Iáquenu. Te jena sácheyare, ichape eta napisirainapa ena achaneana taicha nícuñacavacainapa namutu ena ticapecaturarahia-naichaha.

<sup>21</sup> Étisera eti ecasiñanuhi échajicanuhi eta te níjare nuti Iáquenu, nucuchucuhahayare” macahepa ema Viya.

<sup>22</sup> Tiuri puiti, nuparapenaveana nujaneanana, esamavare eta juca apana numetaruheyare. Ímatihi ema Jesús Nazareno. Ema maca ajaira, mavaneruhi ema Viya. Écharichuhi éti eta tiáramicareanahi máichaque neanahi ema Jesús. Ema Viya máijaracahi eta máitupajijiásiravayare, mavarairahi máimerecayarehi te emirahu eta émairahi mavaneru ema Viya.

<sup>23</sup> Tiyerehichahahi eta juca, ema Viya mapanerechripahi eta máicharacavayarehi ema Machicha. Eta tacahe,

máisapahi eta íjararesirahi ema Machicha nayehe ena váinara-jiqueneana achaneana. Éma, émetataruhi te crusu. Éma, ímicaparuhi.

<sup>24</sup> Émasera ema Viya macaechepucahi ema Machicha. Macaitarecahi tayehe eta máepenirahi, taicha vahi mávara-hahini mánasihini máepenahini.

<sup>25</sup> Ema víyarahaini rey David timetacahavihi eta te Salmo eta máechajiruva ema Jesús. Ánipa macahe: “Tata, piti pímararacanuhi eta picáchanérantuhi. Piti pijaneacanuhi te nuchacaya. Pétumechanuhi tamutu sácheana.

<sup>26-27</sup> Tacahe, núrisamure ichape. Nuvarahavare nujirauchaviare néchajisihaviyare. Núti, te népenapa, tájina néñama-vaimahi, taicha nucasiñavahi piyehe eta pímichavirayarehi piáchanechanu. Vahi písapaimahi témitiequeneha eta náquehe nuti pichicha pémunaruquenehi.

<sup>28</sup> Piti píjaracanuhi eta picaechepusiranuyarehi te nécari, nápechiravayarehi nítareca. Tásicha, nuvapinavayare eta nutiarihirayare te pimirahu” tacahepa eta Salmo.

<sup>29</sup> Nuparapenaveana, véchahi vimutu eta máepenirahi macaecarasirahi ema viáchucaini David, taicha vímaharichaha puiti eta máecari.

<sup>30</sup> Ema víyarahaini David, yátupiquenehi profeta. Macuchapahi eta táitauchiravayare eta mametacasivahi me Viya, eta matiarihirayarehi ema émana mámariéqueneyarehi ema ticaijareyarehi Cristo ema téjacayarehi te trono. Máitsivayarehi ema máchucaini.

<sup>31</sup> Ema Viya máimechahi ema David eta máicharacavayarehi ema Cristo máechepusirayarehi te máecari. Tacahe, ema David májucunacharipa eta vahi tánasimahi tépena eta máchaneva ema Cristo; váhivare témitiequenehaimahi eta máquehe.

<sup>32</sup> Puíticha, ema Viya macaechepucahi ema maca Jesús. Tásicha, viti véchajisihahi eta juca taicha vímahaquenehi eta mápechiravahi titareca.

<sup>33</sup> Tacahe, ema Maiya macayapapa te anuma ema Machicha, macaejacaripa te mavaure. Tacahe, máijaracaripa ema Espíritu Santo ema máitsivayarehi taicha ema matuparahanichuhi. Tacahe, ema Jesús máevatacapa ema Espíritu Santo eta viyehe. Étara eta juca ímahaquenehi puiti, esamaquenehi eta máucupaisirahi ema Espíritu Santo.

<sup>34-35</sup> Vahi ecuimijachahini émainahini ema David mápanahini te anuma. Émahisera téchajisihahi eta matiarihirayarehi ema apuna tiápanayarehi te anuma. Ánipa macahehi: “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaeppuyusiraya te pimirahu ena

ticatianacavianahi, máichapaji ema Viya". Étara eta juca macayemaquenehi ema víyarahaini David.

<sup>36</sup> Tiuri puiti, emutu eti nujaneanana israelítana, nuvaraha ímatiyare ema Jesús émetataruhi, émara ema Viáquenu, émairahivare ema Cristo, maicha ema Viya —macahepa ema Pedro eta máechajiruvahi.

<sup>37</sup> Tacahe, eta nasamirahi eta juca ena achaneana, ichaperinehi eta náeñamiravahi te nasamureana. Tásicha, nayase-recapa ema Pedro énapa ena apamuriana apóstoleana, ánipa nacahe:

—Viparapenaveana, ¿tájahapuca vícharacavaini víti? —nacahepa.

<sup>38</sup> Tacahe, ema Pedro majicapapa:

—Ítsivacha eta juca ítaresiraina te mamirahu ema Viya. Eta ijarasiravaya mayehe ema Jesucristo, ecaicachasiya emutu éti. Tásicha, ema Viya macaepahainapa eta epecaturana. Tíjaracahénavarepa ema Espíritu Santo.

<sup>39</sup> Taicha ema Viya mavarahahi tíjaracaheyare ema Espíritu Santo emutu éti énapa ena echichanaveana énapa ena apavasanana, namutupa nácani manerejiruanahi máichuhaque-neanahi ema Viya, tayanapanne ticavasanahi te tiyerehiqueneana avasareana —macahepa ema Pedro.

<sup>40</sup> Tacahehi eta juca máechajiruvanahi ema Pedro. Ichape eta maconsejachiravacahi, ánivarepa máichahi:

—Ácajuhe ema Jesús. Ínajica eta eváinajarajivana. Érajicava nayehe ena táchana eta tamauriqueñeana —macahepa.

<sup>41</sup> Tacahe, natarihi ena tisuapanahi eta máechajiruvahi. Enevanepe ticaicachasiana éna. Mapanaqueneana mil ena tisuapajirahianahivare.

*Eta náitaresirahi ena náinapureana téhicanahi ema Cristo*

<sup>42</sup> Ena achaneana, eta nasamararasirahi eta náimurapiana ena apóstoleana, ichaperinehi nasuapa. Tásicha, tiúririnehi eta náitaresirana. Náemunacaine ena nachamuriana. Tamutu sácheana ticurujicacanahi eta nayujarasirayarehi étapa eta nanisirayarehi eta pan táicutiarahi eta máepenirahi ema Viáquenu.

<sup>43</sup> Ichape eta náramirahi ena achaneana, taicha náimaharipa eta tiáramicareana náichaqueneana ena apóstoleana, máimicatasiravacahi ema Viya.

<sup>44</sup> Namutu ena tisuapajirahiana tiúrujicavanaparácahi ticajicacanahi eta náimahaqueneana.

<sup>45</sup> Te náimaha ema mácani nachamuri ticamunuvhahi, náijarareca eta náimahaqueneana. Tásicha, náijaracapa eta plata ema ticamunuvhahi, náimicatasihayare.

<sup>46</sup> Tamutu sácheana tiúrujicavanahi eta te Templo. Tásicha, te napenana tíchuhacacanahí ténicacanahí. Ticachanecacanahivare eta nanisirahi eta pan táicutiarahi eta máepenirahi ema Viáquenu. Náurisamureváhi, táurivaipahi te nasamureana.

<sup>47</sup> Najiraucha nacunachahi ema Viya. Tacahe, namutu ena apamuriana achaneana napicauchahi éna. Tásicha, tamutu sácheana ema Viya máichuhavacahi ena apamuriana tisuapanavare.

### 3

#### *Eta manarasirahi ema achane masarini*

<sup>1</sup> Tiuri, étana sache, te las trespa cáperehi, ema Pedro émapa ema Juan tiyananapa tisiapanayarehi eta te Templo. Te jena hora, las trésquenepa sache, hora eta nayujarasira ena israelítana.

<sup>2</sup> Matiarihi ema achane masari. Máimiuchurehi eta mamásariva. Tamutu sácheana nanapana eta te Templo. Nanaquica eta te ichapepana tapaja ticaijare Tiúrinapana, mayaseseresihayarehi eta limosna nayehe nácani achaneana tisiapanapahi.

<sup>3</sup> Tacahe, ema masari, te máimahavacapa tisiapanayarehi ema Pedro ema Juan, mayaseacavacapa eta limosna.

<sup>4</sup> Tacahe éna, náesenicapa ema masari. Tasiha, máichapa ema Pedro:

—Pímararacahavi.

<sup>5</sup> Tacahe, máimararacaripahi. Máimijachaipa náijaracayarehi eta plata.

<sup>6</sup> Tásicha, ema Pedro máichapa:

—Tájina nuviya eta plata níjaracavihini. Jucarihisera eta juca nucatajicavyare. Nucanaracaviyare. Táichavene eta maitupajijiásirava ema Jesucristo ema Nazareno, nuanecavi: Péchepuca, pipaica —máichapa.

<sup>7</sup> Tacahe, ema Pedro machuruvauchavanepa te mavahu vaure, macaechepucapa. Énevanerínehi túmevaca eta mapaiqueana eta mayucarana.

<sup>8</sup> Tacahe, ema masarini tíjahúchavapa titupiha, tipaicapa. Tacahe, tisiapanapa te Templo máehicavacapaipa éna. Máeteresinapaipa eta mapaisirapahi. Macunachapaipa ema Viya, mahasulupayachavare eta macanarasirahi.

<sup>9</sup> Namutu ena achaneana náimararacahi eta mapaisirapahi, macunacharinehi ema Viya.

<sup>10</sup> Te náimatipa ena achaneana ema masarini, ichaperinehi eta náramirahi. Ánipa nacahehi:

—Ánaquiaparipa eta mayaseseresirahi eta limosna ema maca, máejasiraparaca te tapaja ticaijare Tiúrinapana taicha

eta mamasarivahi. Puítisera tipaicapa, téterecavarepa. ¿Tájahapuca máicharacavahi eta manarasirahi? —nacahepa.

*Ticametarairu ema Pedro te Templo*

<sup>11</sup> Tacahe, ema masarini vaipa máinajiacavacahini ema Pedro ema Juan. Tacahe, nárujiacapa namutu ena achaneana te návihahi ena apóstoleana te tajuhe eta Templo, te tayehe eta alar máepiyaruhi ema reyni Salomón.

<sup>12</sup> Tacahe, eta máimairahi ema Pedro ena achaneana náramirahi eta juca, máichavacapa:

—Tátanaveana, nujaneanana israelítana. Iáramihi éti eta juca víchirahi víti. Ímijachapa vítijivahi vicanaraca ema maca achane masarini. Ímijachapapuca viti vítupajijiacavahi táichavene eta víjarasiravahi mayehe ema Viya. Eta juca ánira tacahehi, vahi vítina vicanaracahini ema maca. Ema ticanaracahi, émaquenehi ema Jesús Nazareno,

<sup>13</sup> taicha ema Viya\* tíjaracahi eta tamutuirayare marataha ema Machicha Jesús. Émara ema maca Jesús ema épuru-quenehi éti, íjarareruhi mayehe ema aquenuca apavasajuecu Pilato.

<sup>14</sup> Éma, mavarahahineni macaitica ema Jesús, étisera vahi ávarahahini máuchucuhahini ema máuriquenénihi yátupiquenehi santo. Masapihana eyaseserecahi máuchucuha ema ticapahi.

<sup>15</sup> Tásicha, émapa ímicapacahi ema Ticaitarecahavihi. Émasera ema Viya macaechepucahi te máecari. Véchajisihahi víti éma taicha vímahaquenehi eta mápechiravahi titareca.

<sup>16</sup> Puiti, ímararacahi eta manarasirahi ema maca masarini. Eta juca eta tímicaecherachahi eta machavirahi titareca ema Jesús. Taicha émahi ema tíjaracahavihi eta vítupajijiasiravahi eta vicanarasirahi ema maca achane, táichavenehi eta vicasíñairahi éma.

<sup>17</sup> Tiuri puiti, nuparapenaveana, éti ímicapacahi ema Jesús taicha vahi ímatihini eta émairahi ema Cristo ema vicuchapauquenehi. Énaripa ena tuparairucana eyehe, váhivare náimatihini éma.

<sup>18</sup> Étasera tacaheyarehi eta juca taicha máechajiriruvaichuhi ema Viya nametasivahi ena profetana eta macatajivairyarehi ema Cristo.

<sup>19</sup> Tásicha puiti, éneuchavainapa ecájuhénapa ema Viya, apaesa macaepaha éma tamutu eta epecaturana. Énerichuvare ema Viya técasarechaheyarepa éti.

---

\* **3:13** Ema Pedro téchajicahi te náechajiriruva ena israelítana, máimijarechirahi ema Viya: “ema nacasiñaquehehi ena viáchucanaveanaini ema Abraham, ema Isaac, ema Jacob, énapa ena apamurianaini viáchucanaveanaini”.

<sup>20</sup> Ene ecahehi etsecava ejacapayare ema Jesucristo te machavapa. Éma, iáquenuyare taicha manerejiruhi ema Viya te tépanavainapa tamutu.

<sup>21</sup> Ema maca Jesucristo puiti téjacahi te anuma. Jararihiyaresera eta sache eta machavirayare, máetupiricayareva tamutu. Ánaquiaparipa, eta juca mametarapihi ema Viya nayehe ena mayeheana santo profetanaini eta náimitusirayare ena achaneana.

<sup>22</sup> Ema émana víyarahaini profeta ema Moisés, mametacahi ena viáchucanaveanaini, ani macahehi: “Ema Viya Dios tivanecanuhi nútí numetacaheyare eta máechajiriruva. Títecayare ema apanayare profeta mavaneruyareva ema Viya, tacutiyare eta mavanesiranuhi nútí. Éma, tiúchucayare te namuri ena viámariequeneana. Tatuparaca nasuapayare tamutu eta mavanairipianayare.

<sup>23</sup> Taicha ema Viya máimicpacayare namutu ena masuápa-jirárahánayare mayehe ema profeta máiteruyarehi, taicha mamavarahahi nacasiapahini ena machanerana” macahepa ema Moisés.

<sup>24</sup> Namutu ena apamuriana profetana, émaripa ema Samuél énapa ena náequenereruana profetana, náechajisihahi eta juca vímahaqueneanahi puiti juca sácheana.

<sup>25</sup> Ánaquiaparichaha, te vuíchaha máuchucuhini ema víyarahaini Moisés, ema Viya mametacaipa ema viáchucaini Abraham, ánipa macahe: “Nunerejicayare ema émana piámariéquene tiúchucayare. Éma, tíjaracaya eta táurivaya eta náitaresiraya namutu ena achaneana apánapanenéjiqueneána te juca apaquehe” macahepa ema Viya. Tiápechava mametacaipa étarichuhi máechajiruvana mayehe ema machichaini Isaac, énapa ena mámarinaveánaini. Puiti títauchavaripa eta juca máechajiruvacha ema Viya. Tásicha puiti, éti tituparacahehi ínapucayare ejacapa eta máijararuheya ema Cristo, taicha étirichuhi israelítahéhi. Ímatihivare eta apamuriana máechajiruvana ema Viya, nájuchaqueneana ena víyarahahanaini profetana.

<sup>26</sup> Tásicha, eta macaechepusirahi ema Viya ema Machicha Jesús, tivanecahavipa vimetacahe éti. Te ecasiñavapuca eta mayehe, máquijisinaheyare eta evainarajivana. Tíjaracahenapa eta iúricacarevayare –macahepa ema Pedro.

## 4

*Ema Pedro émapa ema Juan námaqueneanahi te namirahu ena tuparairucana*

<sup>1</sup> Téchajicanarichaha ema Pedro ema Juan te namirahu ena achaneana, títecapanapa ena tuparairucana, énapa ena tímiturecarahiana ticaijareana saducéoana. Námapahivare ema náquenuruha ena tasuntarurana eta Templo.

<sup>2</sup> Tisemanapa taicha vahi náuricahini eta nasamairirisirahi ena apinana apóstoleana náimitusirahi ena achaneana. Vahi náuricahini eta nametasirahi eta yátupiquenerahi eta máechepusirahi ema Jesús te máecari, mápechiravahi titareca.

<sup>3</sup> Tacahe, nacaratacavacapa, náimisiapavacapa te cárcel. Váipasera nacayaseserehihini, taicha cáperehichícharínéhi. Tiámainucavapa te apanapa sache, nacuchucavacaya ticayaserehianayarehi.

<sup>4</sup> Camurianasera ena tisuapanahi táichavenéhi eta nasamarasirahi eta náechajiruvahi ena apóstoleana. Eta natupahi ena téhicanaripa ema Viáquenu Jesucristo cinco mil ena achaneana ajairana. Camurianavare ena esenana énapa ena amaperuana.

<sup>5-6</sup> Te apanaque nepa sache, ema corregidor Caifás ticurujicapa ena apamuriana aquenucarahana tayehe eta ichapequene cabildo te Jerusalén. Natiarihihivare ena escribánoana. Matiarihihivare ema Anás ema pasado corregidorhi, énapa ena machichanaveana: ema ticaijarehivare Juan émapa Alejandro. Natiarihihivare ena apamuriana machichanaveana.

<sup>7</sup> Tacahe, náemepanapa ema Pedro ema Juan te cárcel. Nacatupiacapa te namirahu, nayaseserecapa. Ánipa naicha:

—Éti, vahi vituparacahehini eta ímitusirahi eta juca. ¿Nájaha tivanecahehi icha eta juca? ¿Nájaha ema tíjaracahehi eta ítupajijiásiravahi? —nacahepa.

<sup>8</sup> Tacahe, ema Espíritu Santo máimicatacahi ema Pedro eta majicapirohi ena tiyaserecanahi, ánipa macahe:

—Tátanaveana juéseana, tátanaveana víyacárana te juca viávasa.

<sup>9</sup> Evaraha echa eta juca táuriqueneana tácharacavahi eta vicanarasirahi ema maca achane macajumaquenenihí.

<sup>10</sup> Vimetacaheyare puiti. Vivaraha vémechaheyare, eti énapa namutu ena achaneana te juca viávasa Israel. Ema maca achane, ímahaquenehi eta manarasirahi. Vivaraha vímimatichahe eta máitupajijiasirava ema Jesucristo ema Nazareno tacanaracahi eta vipiarasirahi te máijare. Éma, émetatáruhi te crusu, ecaparuhi. Émasera ema Viya macaechepucahi te máecari.

<sup>11</sup> Éti, épuruhi ema Jesús, ema manerejiruquenehi ema Viya. Puiti, ecutipa ena máitucarahana tépiyarecana peti, te náepurupuca eta tatumequene esuiqui táesuirayarehini eta peti.

<sup>12</sup> Macarichu ema Jesucristo eta marataha eta macatiuchirahaviya macuchucuirahaviyarehi. Taicha ema Viya manerejiruhichuhi ema Jesús eta macuchucuirahaviyare. Nájina apanaina manerejiruinahi te vimuri viti achaneana eta te juca apaquehe —macahepa ema Pedro.

<sup>13</sup> Tacahe, ena tuparairucana náraminehi eta náitusirahi téchajicana ema Pedro ema Juan. Náichacacapa:

—¡Tájina vahi napicacaracavahini eta viyehe! Ena nani tájina náitucaquenéna eta letra. Máiturerereanahi. Tájina náimatiyahini eta viyehe escuela. ¿Máijaracavacahipuca ema Jesús eta náitupajijiasiravahi te macachanevacaichaha ema? —náichacacapa.

<sup>14</sup> Tájina naviyahini nacayema taicha matiarihi ema achane masarini, titupihahi te namirahu. Taicha náimahahi eta yátupirahi eta manarasirahi.

<sup>15</sup> Tacahe, navanecapa eta nacuchusiraya ena apóstoleana eta te náurujisiavahi. Nanasipa ena aquenucana téchajiricanaripa.

<sup>16</sup> Ánipa nacahe:

—¿Tájaha vícharacavayare nayehe ena nani? Taicha namutu ena achaneana ticavasanahi te juca Jerusalén náechahi eta náichirahi ena nani eta tiáramicare. Tásiba, vahi visuapacaremahi te vépiyaequenehavacapuca.

<sup>17</sup> Váhisera távaraha vísapa náimiyanova náimitureca nayehe ena achaneana. Vípicararecavacaya apaesa vahi nacuimiyanova náechajisiha eta máechepusirahipuca ema mácanínavaji Jesús —nacahepa.

<sup>18</sup> Tacahe, nacasiapavarepa ema Pedro ema Juan. Navanecapa éna, ánipa naicha:

—Vahi vivaraha ímiyanava échajisiha eta juca, váhivare ecuimitureca nayehe ena achaneana eta máechepusirahipuca ema Jesús —náichapa.

<sup>19</sup> Najicapapasera ema Pedro ema Juan, ánipa naicha:

—Esamahavichaha. Ema Viya timetacahavi eta véchajisi-háirayare. Étisera ecatichapa véchajisiha éma. Émaquenehisera tisuapacarepanahi eyehe éti. Epanerecha yátupina.

<sup>20</sup> Víti, vahi vimatinaimahi eta véchajisiháiraya tamutu eta juca vímahaqueneanahi visamaqueneanahivare mayehe ema Jesucristo —nacahepa.

<sup>21</sup> Tacahe, ena tuparairucana eta nasamirahi eta namasua-pirahi, tisemanapa. Tacahe, náipicararecpa. Tájinapasera náicharacahini. Nacaiticapa taicha tájina naviurevainahini jácani táimicuñacahini. Taicha namutuhi ena achaneana ncunachahi ema Viya táichavenehi eta náimahaquenehi.

<sup>22</sup> Cuarenta áñoripa eta mahañora ema maca achane masarini. Tétavicavahi eta tiáramicarevahi eta manarasirahi maicha ema Vi ya.

*Ena téhicana ema Jesús tiyaseserecana eta natumesamurevaina*

<sup>23</sup> Eta náuchucuiraripa ema Pedro émapa ema Juan, tiyananapa eta te návhahí ena nachamuriana. Nametacapa tamutu eta nacatianasirahi ena tuparairucana.

<sup>24</sup> Te náechapa, ena nachamuriana tiyujaracanapa namutu. Ánipa nacahe eta nayujarasirahi:

—Tata Viáquenu, píti pépiyacahi eta anuma, eta apaquehe étapa eta ichapequene une mar. Pétupiricahi tamutu eta juca vímahaqueneanahi puiti.

<sup>25</sup> Píti pimetacahi ema víyarahaini David pivanarainihi eta májucunachiraya eta te Salmo. Ani tacahehi eta májurehi: “Tatiarihiya eta avasareana, ena achaneana navarahaya nacanara ema Viya. Énaparichu ena nujaneanana, énerichuvare napanerechaya nacanara ema Viya. Máetupicushiana éna.

<sup>26</sup> Ena réyeana te juca apaquehe titsecavanayare eta nacanarraiyare. Énaripa ena aquenucarohana nacpanereruya nacanaraya ema Viya, nacanarayareva ema Cristo manerejiruhi éma” tacahehi eta májurehi ema David.

<sup>27</sup> Étaripa te juca viávasa, ticuticacahi eta napanerechirahi ema Herodes Antipas, ema Poncio Pilato, ena apavasanana, énapa ena vijaneanana israelítana, navarairahi nacapaca ema sántoquene pichicha Jesús, ema pinerejiruquenehi.

<sup>28</sup> Títauchavahi naicha eta juca pipanerueruna étairayarehi tacaheyarehi eta péchajiriruvana.

<sup>29</sup> Pítisera, Tata Viáquenu, pímararacahavihi puiti eta náichirahavihi viti pivanaranahi. Píjaracahavisera vitumesamurevaina eta véchajisihairaya eta péchajiriruva.

<sup>30</sup> Píjaracahavi eta vítupajijiásiravaina viratahairaina vicanaraca ena nacajumaqueneana, vímeresiraina eta tiáramicareana táichavenehi eta vicasiñairahi ema sántoquenehi pichicha Jesús —nacahepa.

<sup>31</sup> Te titapiricanapa eta nayujarasirahi, tíjahúchavapa tiyayacare eta apaquehe návhahí éna. Tacahehi eta mávahásiravácahivre namutu ema Espíritu Santo. Váipasare napicacaracavahini eta náechajisirahi eta máechajiriruva ema Viya.

*Ticajicacanahi tamutu eta náimahaqueneana*

<sup>32</sup> Namutu ena nasimutuvaqueneana tisuapajirahianahi, ticuticacahi eta napanerueruna eta nacajicacairahi. Namutu nácani téchanahi eta náimahaqueneana nacayehequeneanahi,

vahi nayavanihacacahini. Tatupiruvahi te nasamureana eta nacajirahi.

<sup>33</sup> Tacache, tímiyanavanahi ena apóstoleana eta náechajisi-hairahi eta máechepusirahi ema Viáquenu Jesucristo. Tisuapacarepaicha eta náimiturapianahi. Máimicatacavacahivare ema Viya ena téhicanapahi ema Jesús. Namutu éna, tipicau-chacareanahivare ne achaneana.

<sup>34</sup> Nájina émanáinahíni te nataracu máemepaurechavahíni. Taicha ena ticayeheana apaquehe, pétipuca, náijararecapaipa.

<sup>35</sup> Tásicha, náijaracavare eta plata ena apóstoleana. Tásicha, ena apóstoleana náijaracavacavare nácani páurepananahi.

<sup>36</sup> Matiarihivare ema achane ticaijare José. (Éma máuchurehi eta te tiúrupuhi te mar ticaijare Chipre.) Ema maca José náumurivaichaha ena levítana. Ena apóstoleana nanacapa eta máijarehi Bernabé (te véchajiriruva ticaijare Ticaurisamurerahí).

<sup>37</sup> Ema maca máijararecpa eta mapenapahini. Tásicha, máijaracapa eta plata ena apóstoleana.

## 5

*Eta mapecaturahi ema Ananías ésupa esu mayena Safira*

<sup>1</sup> Matiarihihivare ema achane ticaijarehi Ananías ésupa esu mayena ticaijaru Safira. Énerichuvare náijararecpa éna eta nayehe apaquehe napenapahini.

<sup>2</sup> Ema maca achane macaerajicapa ticutimurihacaca eta plata tavachahi eta mayehe apaquehe. Esu mayena suéchahi eta mayumurusirahi eta ticutimurihacaca eta plata.

Tacache, te títecápapa ema achane nayehe ena apóstoleana, máichapa:

—Níjararecahi eta nuyehe apaquehe. Júcahi tamutu eta plata tavachahi —macahepa.

<sup>3</sup> Tásicha, ema Pedro máichapa:

—Píti, Ananías, ¿tájaha tacayema písapavahi ticaetemavi ema Satanás? Pipanerechaipa pivayuaracayare ema Espíritu Santo eta piyumurusirahi ticutimurihacaca eta tavachahi eta piyehe apaquehe.

<sup>4</sup> Pímaha, Ananías. Piyeherichuhi eta apaquehe píjarareruhi. Nájina tipamicavinahi eta pinaquisiravaya. Puiti eta juca píjarasiravahi pinaquicava, pépiyahirahipaipa pímijachahi tamutu eta juca plata tavachahi eta piyehe apaquehe. Pátupiruvapaini eta pivaraquenehi pinaquica. Émasera ema Viya máimararacahi eta juca pépiyahiraivahi. Vahi vítinahini pivayuaracahini —máichapa ema Pedro.

<sup>5</sup> Te masamapa ema Ananías eta juca, tiáquipaicavapa, matupiru tépena. Te nasamairiricapa ena achaneana, namuturinehi tipicana ichape.

<sup>6</sup> Tacahe, nararihi ena natuparaháichuhi técararecana. Navehapa eta máquehe ema Ananías. Náyuruacapa. Námapa te ecari, náecarapanapa.

<sup>7</sup> Te taequenepa eta mapanaquene hora, títecápapa esu Safira, mayena ema Ananías. Vuíchaha suéchahini eta máicharacavahi ema suima eta máopeniraipahi.

<sup>8</sup> Tacahe, ema Pedro mayaserecapa, ánipa maicha:

—Pimetacanu. Eta juca plata mámaquenepahi ema pima, ¿étahipuca tamutu eta tavachahi eta eyehe apaquehe? —máichapa ema Pedro.

Tásicha, sujicapapa:

—Eta tavachahi tamutu —suíchapa.

<sup>9</sup> Tacahe, ema Pedro máichapa:

—¿Tájaha tacayema ecuticacahi eta juca épiyahiraivahi evayuarasirahi ema Espíritu Santo? Ávane tichavana ena técarapananahi ema pímaini. Tásicha, puiti pítipavayare tiámvianayare —máichapa.

<sup>10</sup> Tacahe, eta máichirahi ema Pedro, enevanepa tiáquipacavahi ésu te máivapechacaya ema Pedro. Tépenavarepa. Te tichavanapa ena técarapananahi ema suímaini, náimaharinehi ésu tépenaipavare. Navehavarepa esu, námvarepa náecarapaná te machacaya ema suímaini.

<sup>11</sup> Te nasamairiricapa namutu ena achaneana, ichaperinehi eta napisira ema Viya, navetijipa eta napisirahi ena téhicanahi ema Cristo.

*Máijaracahi ema Viya ena apóstoleana eta náimeresiraya eta tiáramicareana*

<sup>12</sup> Tacahe, ena apóstoleana, ichape eta máijarasiravacahi ema Viya eta náimeresirayare eta tiáramicareana te namirahu ena apamuriana achaneana. Ticurujicacánahivare tamutu sácheana ena tisuapajirahiana te náurujisirareva te tajuhe eta Templo, te tayehe eta alar máepiyaruhi ema reyni Salomón.

<sup>13</sup> Namutu ena apamuriana achaneana máehicarahanaríchaha ema Jesucristo, vahi napatsicavahini nacanara taicha namutu napicauchahi.

<sup>14</sup> Camurianapaipasera ena ajairana énapa ena esenana ena téhicanapaipahi ema Jesús.

<sup>15</sup> Camurianaipa ena nacanararuanapáipahi ena apóstoleana. Tacahe, námvacapahi ena apamuriana nacaju-maqueneana, nanaquicapaipa te calle mayanihayarehi ema Pedro. Eta máetavisirayarehi éma, távichayare eta macuna, tacanaracayarehi eta najumana.

**16** Énerichuvare, títecapanapa te Jerusalén ena achaneana tiásihana te avasareana nachacayarahahanahi. Námapahi ena nacajumaqueñeana énapa ena návaháruana ena éreanana. Namutu ena nani tinaracanapahi tayehe eta náichavaquenévanahi.

*Naémeratacapa ema Pedro émapa ema Juan*

**17** Váipasera máuricahini eta juca ema corregidor, énapa ena machamuriana. (Saducéoanahi éna.) Tisemanarinehi táchavenehi eta náehisirahi ena camuriqueneana achaneana eta náimiturapihi ena apóstoleana.

**18** Tacuhe, nacavanairipipa nacaratatajica ena apóstoleana. Náimisiapapa te cárcel, ticaeratanapa.

**19** Émasera ema Viya majaneacavacahi éna. Te jena yati, mavanecapa ema mayehe ángele. Mavejiapaná etá cárcel návhahí éna. Mavanecapa náuchuca, ánipa maicha:

**20** —Eyana ímerekava te jena Templo. Emetaca ena achaneana etá mavarairahi ema Viya máitsivachaya arairuya etá náitaresirayare ena téhicanaya ema Jesucristo —máichavacapa ema ángele.

**21** Náuchusihapa ena apóstoleana te cárcel, timapicucuhichaha te tiyananapa tayehe eta te Templo. Tinahacavanavarepa tímiturecana.

Tacuhe, te jena yáticarahi ema corregidor mavanecapa ena comisarioana máimichuhapa namutu ena apamuriana tuparairucana énapa ena náiyacarana israelítana. Te tiúrjavancapa namutu, nacavanairipipa náepana ena apóstoleana etá te cárcel.

**22** Te títecapanapa te cárcel ena suntaruana, navejiacapa etá tapaja. Nájinarihpahisera. Tacuhe, tichavanapa nayehe ena náquenuruhana. Nametacapa etá nájinarihpahi ena apóstoleana.

**23** Tacuhe, náichapa:

—Te vítecapauchapa etá cárcel, vímahapa tanasihi ticaeratahi etá tapaja. Natarihivare ena séntinélana tijaneacanahi etá tapaja. Tacuhe, te vivejiacapa etá tapaja, nájina émanainahini vichimapahini te tajuhe —nacahepa ena vanairucana.

**24** Te máechapa ema corregidor, énapa ena machamuriana tuparairucana, émapa ema náquenumuri ena tasuntarurana etá Templo, náramirinehi ichape. Tacuhe, náichacacapa:

—¿Tájaha tacayema etá juca? Vaipa vímatiequeneha. ¿Tájahapuca vícharacavaya? —náichacacapa.

**25** Téchajiricavanarichaha éna, títecapanecha ema émana achane. Mametacavacapa éna. Ánipa macahe:

—Ena naena ajairana érataruanahi te cárcel, náenahi ánaqui etá Templo tímiturecanahi nayehe ena achaneana —máichapa.

26 Tacahe, ema náquenuruha ena suntaruana, émajacaruvapa tiyana. Mámamurihapaipahi ena suntaruana, náepanayarehi ena apóstoleana. Jéhesare, námamurihapa, tájinaserá náicharacapahini eta námirapahi taicha napicahi ena apamuriana achaneana natupisicavacahini te márijahiana.

27 Te nacaitecapapa, nacatupihapa te namuri ena tuparairucana. Tásicha, ema corregidor ánipa maicha:

28 —Víti vivanecahehi muraca eta vaipa ecuapechava ecuimitureca eta máechepusirahipuca ema Jesús, tasiha, éti ímianavarichucha ímitureca. Namutupa ena achaneana tayehe eta juca viávasa Jerusalén náitucapa eta ímiturapiana éti. Visapihapa evaraha vítiyare táecatiha eta máepenirahi ema achane Jesús. ¿Tájaha tacayema vahi esuapahavihini? —macahepa.

29 Tacahe, ema Pedro énapa ena apamuriana apóstoleana najicapapa, ánipa naicha:

—Tatúparáca mativayare visuapa ema Viya. Éma tisuapacarepana eyehe éti.

30 Víti, véhicahi ema Viya, émarichuhi nacasiñaquenehi ena viáchucanaveanaini. Émahí ema ticaechepecuahí ema Jesús, ema ímicaparuhi eta émetatasirahi te crusu.

31 Tásicha puiti, ema Viya máunacahi te anuquehe anuma. Macaejacahi te mavaure tayehe eta trono. Máijaracaripa eta matuparahayarehi Aquenucayarehi Ticatiurahiyareva. Taicha mavarahahí ema Viya vimutuyare viti israelítana véneuchavaya mayehe, apaesa éma tiperdonachahaviyare tamutu eta vipecaturana.

32 Víti véchajisihahi eta juca taicha vímahaquenehi eta mápechiravahi titareca. Víti véchajisihahi maicha ema Espíritu Santo máijararuuhavihi ema Viya viyehe viti visuapaná éma —náichapa ena apóstoleana.

33 Te nasamapa eta juca ena aquenucana, tisemanapa. Navarahapa nacapacavacayarehini.

34 Matiarihihisera te nataracu ema achane ticaijare Gamaliel. Ema tuparairucahi doctrinero fariseo. Ema maca achane ticapicahuhi nayehe namutu ena achaneana. Tacahe, titupihapa te namirahu. Macavanairipipa náuchucachaha ánipina ena apóstoleana.

35 Tacahe, máichavacapa ena machamuriana aquenucarohana:

—Tátanaveana, nujaneanana israelítana. Échapava eta evara-haqueñehi íchaya nayehe ena nani achaneana.

36 Échapuca éti cape juca táitaresirahi, téchepucahi ema émana achane ticaijare Teudas. Éma macahehi eta máitupajijiásiravahi. Tásicha, camuriana ena

achaneana téhicanahi. Cuátrocientoanahi ena ajairana ena machaneranahi. Tásihasera, nacapacahi ena mánarana. Tásicha, namutu ena téhicanainihi téjanerepaicanahi. Títavapa tamutu.

<sup>37</sup> Tásicha, te táequenevarepa, te jena sache eta nacatupairahi ena achaneana, téchepucavarepa ema apava ema ticaijare Judas, ema ticavasa te Galilea. Camurianavare ena téhicanahi. Énerichuhivareséra nacapacahi ena mánarana. Namutuhivare téjanerepaicana ena téhicanainihi.

<sup>38</sup> Tiuri puiti, esamanu eta juca numetaruheya. Ésamericachucha ena nani achaneana. Vahi ecuimicasiapava nayehe. Taicha eta juca náichaquenehi te nayehechuchapuca éna, titavayarehi.

<sup>39</sup> Téheserapuca mayehehi ema Viya, vahi eratahaimahi ecamitiaca. Échapavachucha. Machu ecucaemuñava ecanara ema Viya —máichavacapa.

<sup>40</sup> Tacahe, tésamiricavanapa namutu. Náimisiapavarepa ena apóstoleana. Náestacavacapa. Tásicha, navanecavarepa eta vaipa nacuapechava nacuechajisihai etá máechepusirahi ema Jesús. Tásicha, nacaiticavacapa.

<sup>41</sup> Tacahe, tiúchucanapa ena apóstoleana te náurujisiavahi ena tuparairucana. Tiúrisamureanapáichucha eta nacaestairahi. Ánipa nacahe:

—Ema Viya máimaranaracahi eta vicamichirahi tamutu eta náimicatsiriasirahavihi táichavene eta véhisirahi ema Jesús —nacahepa.

<sup>42</sup> Váhiquene nacatsimavahini. Tímiturecanáichucha tamutu sácheana, náechajisihahi ema Jesucristo. Tímiturecanahi te Templo étapa te pétiana.

## 6

### *Ticatuparacasiana ena siéteana ajairana*

<sup>1</sup> Te jena sácheana, eta nasimutuvaipa ena téhicanahi ema Jesús tisiapanapaipa ticajanemurianapaichucha. Natiarihivre ena israelítana, apáechajiríruvanarípa éna. Natiarihihi ena páurepanana te nataracu énapa ena máimaruana. Ena nani najacapahi eta nayehe ración tamutu sácheana. Étana sache, ena nani apáechajiríruvanarípa vaipa náurismurehini taicha vaipa nácuticacahini náechapajirícahini ena máimaruana. Ánipa nacahe:

—Váipa nácuticacahini eta najacapirahi eta tinicacare ena vijaneanananrichuhi máimaruana —nacahepa.

<sup>2</sup> Tacahe, ena dócequeneana apóstoleana nacurujicapa namutu ena téhicanahi ema Jesús. Tásicha, náichapa:

—Vahi táuricahini víchepaicahini eta vicametarairuira eta máechajiruva ema Viya. Ticaichepairicahavipa eta víjara-sirahi eta tinicacare ena vichamuriana.

<sup>3</sup> Tiuri puiti, nuparapenaveana, tacamunu vinacayare siéteanaina ena ajairana te emuri éti, nácani ímatiqueneana tiúriana achane, téchemarahiana náimatiéqueneha tamutu, mávaháruanahivare ema Espíritu Santo. Énaina vituparaca naicha eta juca.

<sup>4</sup> Taicha víti vímiyanavayare viyujaraca vímiturecayare eta máechajiruva ema Viya —náichapa ena apóstoleana.

<sup>5</sup> Tacahe, namutu navaraha eta náechajiruvahí. Tacahe, ticanerejianapa ena ticatuparahanayare. Navehapa ema Esteban, achane tiuri, tisuapajirahiquene mayehehi ema Viya, mávaháruhivare ema Espíritu Santo. Navehavarepa ema Felipe, ema Prócoro, ema Nicanor, ema Timón, ema Parmenas, émapa ema Nicolás\*.

<sup>6</sup> Tacahe, náichuhapa te namirahu ena apóstoleana. Tásiha, nanacapa eta navahuana te nachutiana, nayujarauchapa, náijarasihapa eta náematanerepiyarehi.

<sup>7</sup> Tiuri, eta nasamirahi eta máechajiruva ema Viya, camurianapaipaicha ena téhicanahi tayehe eta avasare Jerusalén. Tisimutuanavare ena tiyujaracarähiana israelítana náunacaipa te nasamureana eta náehisiraipa ema Jesucristo.

### *Eta nacaratasirahi ema Esteban*

<sup>8</sup> Tiuri, ema Viya máimicatacahi ema maca Esteban. Máijaracahivarehi eta ichape eta máichirahi eta tiáramicareana te namirahu ena achaneana.

<sup>9</sup> Tatarihivare te Jerusalén eta apana náurujisirareva. Tiúrujicavanahi ena israelítana prisionéroanaini náuchucureanapasera. Éna tiásihanahi te apanana avasareana, te Cirene, te Alejandría, te Cilicia, étapa te Asia. Nácapaemajircapa ema Esteban te yátupihipuca ema Jesús émaquenehi Cristo. Vahi nasuapahini taicha téavicavahi eta namasuapajiraivahi.

<sup>10</sup> Ema Espíritu Santo máijaracahi ichape ema Esteban eta máitusiraya téchajica. Eta tacahe, vahi náratahahini nacachuraca éma. Tisemanapa eta máitahasiravacahi.

<sup>11</sup> Tacahe, náimitucapa ena apinana ajairana navachacha-queneanahi eta náepiyequenehairaya ema Esteban. Ánipa naicha eta náimitusirahi:

---

\* **6:5** Ema maca Nicolás, ticavasainihi eta te avasare Antioquía eta máuchusinehi. Éma, apavasanahi, máehicahiniihivare eta nayeherepiana ena israelítana. Tásiha puiti, máehicaipa ema Jesucristo.

—Visamahi ema maca macaecaahihi ema víyarahaini Moisés, macaecaahivare ema Viya —náichapa.

<sup>12</sup> Tacahehi, eta nacaechepusirahi eta semanere nayehe ena achaneana, énapa ena aquenucarahaná, énapa ena escribánoana. Náimiyusemacavacapa. Tásicha, nacaratacapa ema Esteban. Námapa ticayaserehiya te namirahu ena tuparai-rucana.

<sup>13</sup> Tásicha, náichuhavare ena apamuriana tépiyaequenehanaya. Ánipa nacahehi eta náepiyahiraivahi:

—Ema maca achane yahi máituca timatina macaecaahi eta viyehe Santo Templo. Máepuruvare eta viyeherepiana.

<sup>14</sup> Énerichuvare macahehi ema Jesús Nazareno máquipaicayareji eta Templo, máitsivachayarehiji eta viyeherepiana máijararuuhavihi ema víyarahaini Moisés —náichapa ena tépiyahirahianahi.

<sup>15</sup> Tacahe, namutu ena natiarihiqueneanahi náejaruuanahi náimrararacaripa ema Esteban. Eta mamira macavasirahi ema ángele.

## 7

### *Eta maconsejarapi ema Esteban*

<sup>1</sup> Tacahe, ema corregidor mayaserecapa ema Esteban, ánipa maicha:

—¿Yátupihi ene picuhehi eta juca nametarapianahi ena nani? —máichapa.

<sup>2</sup> Tacahe, majicapapa ema Esteban, ánipa maicha:

—Tátanaveana, nuprapenaveana. Esamanuchaha. Eta acane, ema Viya tiúcupaicahi másihahi te mávasa anuma. Tímerecavapa mayehe ema viáchucaini Abraham. Ema Abraham, mávihaichaha te tinapaica te apaquehe ticaijare Mesopotamia, ticaijarevare Caldea. Vuíchaha mayanahini macavasahini te Harán.

<sup>3</sup> Máechajicahi ema Viya ema Abraham, ánipa maicha: “Pijunijica eta juca piávasa, énapa namutu ena pijaneanana. Piyana eta te apana apaquehe. Núti níjaracaviya eta arairu piávasaya” máichapa ema Viya.

<sup>4</sup> Tacahe, ema Abraham masuapapa; tiúchucapa eta te tinapaica te Caldea. Tiyanapa eta te avasare Harán. Te táequenepa eta máepenirahi ema máiyaini, mavanecapa ema Viya ema Abraham máiteca eta te juca apaquehe viávihahi puiti víti. (Te jena áñoana ticaijarehi Canaán.)

<sup>5</sup> Tájinaserá máijaracahini mayehenahini apaquehe, ánicuchicháinahipucáini. Mametacahisera eta máijarasirayarehi eta mayeheyarehi apaquehe. Taicha eta apaquehe máijaracayarehi nayeheyarehi ena machichanavequeneana

te maépenapa ema Abraham. Nájinarichahasera machichanaveanainahini te jena áñoanahi.

<sup>6</sup> Énerichuvare mamecacahi ema Viya, ánipa maicha: “Ena pichichanavequeneanayare ticavasarecanaya nayehe ena apavasajuecuana. Ticatajivanayaresera naicha ena napau-reanaya. Nacajireyare. Cuatrociento áñoyare eta náichirayare.

<sup>7</sup> Nútisera, níjaracayare eta náicuñayare ena achaneana te jena avasare nácani ticajireanayare ena pichichanave-queneanayare. Tásicha, te taequenenapa, nucuchucuhava-cinapa. Tásicha, títecanainapa ani te juca najirauchiha-nuyare” máichapa ema Viya.

<sup>8</sup> Ema Viya mafirmachapa eta matratune eta máitauchi-rayarehi eta juca máechajiriruvahi mayehe ema Abraham. Énerichuvare mavanecapa ema Abraham timarcachavayare, máicutiarayarehi eta macasiñavairahi me Viya. Namarca-chayareva namutu ena machichanaveana ajairana, énapa ena mámariequeneana ajairana. Eta tacahehi, te óchoquenepa sache eta máuchusirahi ema Isaac machicha ema Abraham, mamarcachapa. Énerichuvare, máichahi ema Isaac te macachichapa ema Jacob. Ema Jacob, énerichuhivare máichavacapahi ena dócequeneana machichanaveana, ena víyanaveanaini víti.

<sup>9</sup> Ema José, nacapinaruhi ena maparapenaveana taicha máemunacapanahi ema naiya. Eta tacahe, náijararecapa ena maparapenaveana nayehe ena apavasanana. Tásicha, éna náequecapa náijararecapa mayehe ema ticavasa te apuna avasare Egipto. Émasera ema Viya majaneacahi ema amaperu José.

<sup>10</sup> Macatiuchahivare tayehe eta macatajivairana. Máijara-cahivre eta máitucaqueneyare. Ema rey aquenucahi tayehe eta Egipto máemunacahi ema José. Máimatiacahi eta máitusirahi. Eta tacahe, ema rey macajupahahi eta majaneasirahi tamutu eta máimahaqueneana. Aquenucahi máicha, nayehe namutu ena ticavasana te Egipto.

<sup>11</sup> Tásicha, te jena áñoanahi, táitecapauchapa eta ecuha te tamutu eta avasareana tayehe eta táunavahi eta Egipto étapa eta Canaán. Tétavicavahi eta nacatajivairahi ena achaneana. Tásicha, ena viáchucanaveanaini, tájina naviyahini eta nani-caquene.

<sup>12</sup> Émasera ema Jacob te masamairircapa eta tatarihirahai eta tinicacare te Egipto máunaruhi ema rey, máevatacapa ena machichanaveana eta navacharepana eta tinicacare. Te téchuriacanavare eta tinicacare, mápechavarepa máevataca ena machichanaveana.

<sup>13</sup> Te apihequenepa eta nachavirahi, ema José tímimati-chavapa nayehe ena maparapenaveana. Tacahe, ema rey mapaenumavapa máimati énairahi maparapenaveana ema José.

<sup>14</sup> Tacahe, ema José máimichuhapa ema maiya Jacob énapa ena natarihiqueneanahi te mapena. Setenta y cincoqueneana eta nasimutuya éna.

<sup>15</sup> Tacahehi eta mayanirahi ema Jacob macavasairahi tayehe eta te Egipto. Étapa máepenihahi. Te taequenepa, étarichuvare náepenihahi ena machichanaveanaini viáchucanaveánaini.

<sup>16</sup> Váhisera nacaecarasihini eta náperanaini te Egipto. Nacayejecapa eta nacaecarasirahi eta te ecari te tachachacu eta avasare Siquem te tinapaica eta Canaán. Étarichuhi eta máecari ema Abraham\*.

<sup>17</sup> Tiuri, tiánehipa eta máitauchirayarehi eta máechajiri-ruvahi ema Viya matratunehi mayehe ema Abraham, ánaquiaparíchaha eta añoana eta máijarasirayarehi eta apaquehe nayeheyarehi ena machichanavequeneana. Ena nachichanaveana ena viáchucanaveanaini, ánaquipa náejapasihahi te Egipto.

<sup>18</sup> Tayerevahí eta año, titupihapa ema apana rey te Egipto. Éma arairuhi rey, vaipa macapayacahini máimatihini ema José. Váipavare mávarahahini maecha eta manaquiruanainihi máemataneanainihi ema José.

<sup>19</sup> Masapihapa macatianacavacahi ena viáchucanaveanaini taicha eta náejapasirahi éna. Macaetemajiricavacapa. Macavanairipipa eta vahi nacueperajica ena amuyana ajairachichana náuchusiravanahi. Najunijica apaesa vahi nacuitareca.

<sup>20</sup> Tacahe, te jena sácheanahi, tiúchucapa ema amuya alauchu Moisés. Ema Viya máemunacahi ichape ema maca amuya. Mapana caje eta nacajurusirahi ena ticachichana te napena.

<sup>21</sup> Te náimahapa téchemarahipaipa ema amuya, vaipa mayumurucacarehini. Tacahe, nayumurucapa ema amuya te pacurechicha te curichepiraquiana távihahi te cajacure. Ésusera esu machicha ema rey suíchimavapa, suvehapa. Ésupa ticajurucahi suchichayarehi.

---

\* **7:16** Ánaquiaparipa tatiarihi eta avasareni Siquem, návasa ena mámariequeneana ema achane ticaijare Hamor. Te tachacaya eta jena avasareni, tatiarihihi eta mari enurujuhe. Tacahe, ánaquiaparipa ema Abraham mavacharecpa eta apaquehe táimivehapa eta mari enurujuhe, mavarairahi sucaecarasiyayarehi esu mayena Sara, énapa namutu ena machichanaveana. Émaripa étarichuyareva macaecarasiyahi. Ena machichanaveana ichapemurihi añoana eta náechapajirisirahi eta ecari, taicha étarichuyarehi nacaecarasiyayarehi éna, énapa ena apamuriana mámariequeneana ema Abraham.

<sup>22</sup> Tacahe, ema amaperu Moisés ticaimitucasipa tamutu eta náitupajijiásiravanahi ena ticavasanahi te Egipto. Tacahe, ichape eta máitupajijiásiravahi eta máechajisirapahi étapa eta máematanerepihanhi.

<sup>23</sup> Te ticayeheda cuarenta año ema Moisés, mavarahapa tiyana máejirapanavaca ena majaneanana israelítana.

<sup>24</sup> Te títecápapa ema Moisés, máimahapa ema émana achane ticavasa te Egipto téhararecahi, máehahi ema majaneanana ema Moisés. Tacahe, macatiuchapa ema majaneanana. Émapa títsiri-jiequenehahi. Macapacapa ema ticavasa te Egipto.

<sup>25</sup> Eta mapanereruhi ema Moisés, mavarahahi nacaicutiarayare ena majaneanana eta mavaneruirahi me Viya eta macuchucuiravacayarehi eta te nacatajivairahi. Váhisera nácaicutiarahini éna.

<sup>26</sup> Tacahe, te apanaquenepa sache, ema Moisés máimahapa téhacacanahí ena apinana majaneanana. Mavarahapa macaichepaica. Máichapa: “¿Tájaha tacayema éhacaca éti? Ímaha eparapecacahi” máichapa.

<sup>27</sup> Tacahe, ema túmepanahi mayehe ema apana, máevata-jicapa ema Moisés, máichapa: “¿Tájaha tacayema pímisiapava píti eta viyehe? ¿Nájahapuca tivanecavíhi juéseviyarehi eta viyehe, viáquenumuriviyarepuca víti?

<sup>28</sup> ¿Pivarahapapuca picapacanuyareva núti, tacutiyarepuca eta picapasirahi cape ema egipcio?” máichapa.

<sup>29</sup> Te masamapa ema Moisés eta náechirahi ena achaneana émairahi ticapaca, tiyanapa tijunahí eta te apauehe ticajare Madián. Ánaquipa eta máerajisiavahi máitatijiyavahi. Mave-hapa esu mayena, ticaparapepa. Apinana ena machichanaveanahí ajairana suyehe esu mayena.

<sup>30</sup> Te cuarenta áñopa eta mávihirahi ánaqui, te étana sache, tipairiricahi te mávapahiana apauehe tachacaya eta cerro ticajare Sinaí, majanearesirahi eta uvesana. Tac-ahé, tiúcupaicapa ema Viya eta te távhahi eta chéyaraji yu-cuqui. Timurujirinehi eta yucuqui maicha ema Viya. Váhisera táijuchahini táitahini eta tapacajiana.

<sup>31</sup> Eta máimarasirahi eta juca ema Moisés, máramirinehi. Tiyanapa mapaucha, máimatiyarehi. Te macachacayapa, masamapa eta mahu ema Viya. Ánipa máichahi:

<sup>32</sup> “Nútichucha Viya nacasiñaquenéhi ena piáchucanaveanaini. Nútirichu macasiñaquenéni ema Abraham, ema Isaac, émapa ema Jacob” máichapa ema Viya. Tacahe, ema Moisés tiyayacareinehi eta mapisirahi. Vaipa mapatsicavahini máimararacahini.

<sup>33</sup> Tásiha, ema Viya máichavarepa: “Pivejuchupevachava eta

péparupeva taicha santo eta juca apaquehe piávhahi piácata-yapairuhi.

<sup>34-35</sup> Pisamanuya puiti, jucarihi numetacaviyare. Núti nímararacahi eta nacatajivairahi ena nuchanerana tiávianahí te Egipto. Nusamahi eta náiyairahi. Nuvaraha nucatiuchavacayare. Eta tacahe, núcupaicahi numetapanaviya. Nuvanecaviyare puítirichu piyana tayehe eta Egipto, picuchucuhavacayarehi” máichapa ema Viya.

Tacahehi eta matuparasirahi ema Moisés mayehe ema Viya, mavaneruhi náquenumuriyarehi ena majaneanana, macuchucuhaya éna eta te nacatajivaiyahi. Étasera te tínapucainapa vahi náesachahini éma.

<sup>36</sup> Tásicha, émarichuhi ema maca Moisés macuchucuhavacapa namutu ena majaneanana tiásihanahí te Egipto. Eta macuchucuiravacahi, máimerecahi eta tiáramicareana te jena avasare Egipto, étapa eta te mar ticaijare Títsiama Une, étapa te mávapahiana vámahi. Cuarenta año macahehi ema Moisés eta máichirahi eta juca.

<sup>37</sup> Émarichuva ema Moisés ticaechajiruvahí nayehe ena majaneanana israelítana eta máuchusirayarehi ema profeta-yare. Máichapa: “Ema Viya Dios tivanecanuhi núti numetacaheyare eta máechajiruvá. Títécayare ema apanayare profeta mavaneruyare ema Viya, tacutiyare eta mavañesiranuhi núti. Éma, tiúchucayare te namuri ena viámariequeneanayarehi. Tatuparaca nasuapayare tamutu eta mavanairipanayare” macahehi ema Moisés.

<sup>38</sup> Émarichuvare ema Moisés, ema máichuhaguenehi ema ángele tiápanaya eta te jena cerro Sinaí, nacuchapirahi ena achaneana machamuriana te vámahi. Tasiha, máechajicahi ema Viya ema Moisés. Te titapiricapa ema Viya, ema Moisés tiúcupaicapa, mametacavacapa ena achaneana tamutu eta mametacasivanahí me Viya. Énerichuvare ema Moisés májuchapahí te libro eta mavanairipiana ema Viya, tisuapacareanahí viyehe viti israelítana védicanaya.

<sup>39</sup> Eta mávhairahi ema Moisés te cerro, vaipa náimahahini ena viáchucanaveanaini. Tásicha, vaipa návarahahíni náehicahíni éma. Navarahapa tichavanayarehi te Egipto.

<sup>40</sup> Tacáhénapa, te náichapa ema Aarón: “Vivaraha pépiyasnáhavi eta visiñarajina táinapumirauchahaviya, taicha vaipa vecha tájahapuca máicharacavahi ema Moisés, ema ticuchucuhahavihi tayehe eta viávinéhi te Egipto” náichapa.

<sup>41</sup> Tacahe, náepiyacapa eta nasiñarajiyarehi, amairiha oro, tavasimahi eta torillo. Napiestachayarepa eta náepiyaruhi nasiñaraji. Tacahe, ticaparecanavare eta vaca; náijaraca-

sichahi eta nasiñaraji eta námañavahuhi, náimicutichaipa ema Viya. Ténicacanapa. Tiúrisamureanapa eta náimairahi táurinavahi eta nasiñaraji náepiyaruhi.

42 Émasera ema Viya, eta máimairahi eta juca, vaipa máuricahini. Tásicha, vaipa majaneacavacahini éna. Váhisera máicuñacavanehini. Másapapa ticasíñarajiana, téneuchavanapa te tamirahu eta nasiñarajiana. Tásicha, tamutupa nacasiñaraji eta jarairiquiana. Taicha ánipa tacahehi eta Sagrada Escritura nájurehi ena profetana. Ánipa maicha ema Viya: “Émitisicanuhi núti, eti israelítana. Vaipa nútinhini ácasiña eta jena cuarentaquenehi año te mávapahi vámahi.

43 Étapa ecasiñahi épuyumirauchahi eta esiñarajiana ticaijare Moloc. Énerichuvare ecasiñahi eta jarairiqui ticaijare Renfán. Eta ecaparuhi, vahi nútinhini íjaraca. Étapa íjaracahi eta esiñarajiana. Éti, éperajiricapa eta esiñarajiana te tayeheana trono tapenahuana épiyuanahí. Eta tacahe, nucajanerepaicaheya te apachacaya apaquehe ticaijare Babilonia” máichapa ema Viya.

44 Te jena mávapahi vámahi ema Moisés mavanecapa ena viáchucanaveanaini náepiyaca eta mapenayarehi máucupaisirareyarehi ema Viya. Mavecunaruhi eta tiáviha te anuma máimechaquenehi ema Viya. Étarichu náunasirare eta ajureca tiáma eta mavanairipiana ema Viya.

45 Te tépenapa ema Moisés, máevachacapa ema Josué émapa máitsivahi téchapajiricayarehi ena achaneana. Tacahe, tiyananapa mámamurihana ema Josué. Ena achaneana námapahi éna eta mapena máucupaisirare ema Viya. Nacaijuhepa eta apaquehe natuparahahi. Natarihisera ena achaneana ticavasana tayehe. Váhisera tácajerahichaini eta náitahasiravacahi ena nánaranahi taicha ema Viya máimicatacavacahi. Tacahe, tayerevahí eta áñoana ena náeperajicahi eta mapena ema Viya. Te tijurucapa ema rey David, ticatuparahapa, machimapapa eta tatarihirichaha. Émapavavare máechapajirica.

46 Taicha ema maca rey David máemunaruhi ema Viya. Tacahe, ema David mavarahapa tépiyarecaya eta mapenaya ema Viya amairihayarepa mari.

47 Váhisera táitauchahini eta mapanereruhi ema David, taicha ema Viya vahi másapahini. Émapa títauchahi ema machicha ticaijare Salomón. Émapa tépiyacahi eta Templo.

48 Tiuri puiti, numetacahevare, ema Viya ticavasahi te anuquehequene anuma. Vahi títecaimahi macapena te

témploana vépiyaruuanasami viti páureanasami achaneana. Taicha ema Viya máichapa eta máechajiriruva:

49 “Te anuma táviha eta nuyehe trono néjasihahi. Ánaqui tásaha eta nuvanairipiana tayehe te juca apaquehe. Núti vahi nácamunu eta peti te juca apaquehe. Núti vahi nácamunu eta nunarasirarena.

50 ¿Váhipuca échava eta nútirahi népiyaca tamutu eta juca ímahaqueneanahi te juca apaquehe?” macahepa ema Viya eta máechajiruvahi.

51 Puítiripa eti esamararacanuanahi, ¿tájaha tacayema éhicahi eta namuracasamurevanaini ena iáchucanaveanaini? Váhivare ávarahahini esama puiti eta máechajiruvahi ema Viya táichavenehi eta evainarajisamurevavacahi étapa eta emasuapiroha ema Espíritu Santo. Éti, eta epanereruana tacuti eta napanereruana ena iáchucanaveanaini eta navainarajivana.

52 Éna, náemecatajivachahi namutu ena profetanaini. Nacapacavacahi nácani téchajisihanahi eta máitesirayarehi ema Cristo. Tásaha puiti, eta máitesiraipa ani, épururipa éma, masapihapá íjararecahi ínicapacahí éma taicha tétavicavahi eta máurivahi.

53 Étaripa eta mavanairipiana ema Viya, ángeleana ena tíjara-pananahi ema Moisés. Échajicuhaipahinéni éti, esamaripa-hinéni; váhiqueneséra esuapahini —máichapa ema Esteban eta maconsejachiravacahi.

### *Eta máepenira ema Esteban*

54 Te nasamapa ema Esteban eta máichirahi, tisemana-rinehi. Tinicavanarinehi eta nasemaneva.

55 Émasera ema Esteban vahi mapicaracavacahini éna taicha mávaháruhi ema Espíritu Santo. Máesenicapa te anuma. Maimaharine eta majaraiva ema Viya, émapa ema Jesús titupihahi te vaure tinapaicahi eta majaraiva ema Viya.

56 Tacahe, ema Esteban máichavacapa ena achaneana natiarihiqueneanahi:

—Ésenica te anuquehe. Núti nímahahi eta anuma téjiacahi. Émapa ema Jesucristo, máenahi titupihahi te mavaure ema Maiya —máichavacapa ema Esteban.

57 Énasera eta nasemanevahi, tichujiquiñahavanapa. Tijaja-murihanapa náetereuchapa namutu.

58 Nacaratacapa, námapa te tachachacu eta avasare. Ánaqui eta natupisisihayarehi nacapasihayarehi te márijahiana. Ena téhanahi nanaquicapa eta náepacuhána, natuparacapa ema nayehehi comisario ticaijarehi Saulo.

<sup>59</sup> Tacahe, nanahacaripa natupisicahi ema Esteban. Tiánehiripa nacapaca. Émasera tiyujarauchavaichaha. Ánipa macahehi:

—Tata Náquenu Jesús, pijacapinanu eta náchaneva.

<sup>60</sup> Eta máquipaisiravahi, tépuyucapa tipiaracapa muraca. Ánipa macahe:

—Tata, piperdonachavaca ena nani eta juca náichiranuhi napecaturahi —macahepa.

Te titapiricapa eta mayujarasirahi, tépenapa.

## 8

*Ema Saulo mapanerecha mapanajiricavaca eta macatichi-ravacahi ena téhicanahi ema Jesús*

(Hch 22.6-16; 26.12-18)

<sup>1-2</sup> Ema maca Saulo, eta mapanereruhi tacutihi eta napane-reruana ena ticapacanahi ema Esteban. Tiúrisamurepa éma. Natarihivaresera ena apamuriana ajairana tiúripane-reruanahi. Navehana eta máquehe ema Esteban, náecara-panapa. Tíyahanapa ichape eta nacatiequenerahi. Étarichu te jena sache tépanavanapa napanajiricavaca muraca ena téhicanahi ema Jesús tayehe eta avasare Jerusalén. Téjanere-canapa náicha, ena camuriqueneana. Tiyananapa te apana avasareana tinapaica te Judea étapa te Samaria. Énasera ena apóstoleana nanasirichuhi te Jerusalén.

<sup>3</sup> Tacahe, ema Saulo, ema náinapuaraquipahi ena tipana-jiricanahi ena téhicanahi ema Jesús. Tisiapanapaipa te napenana. Nacaratacavacapaipa ena nachimapaqueneana-pahi ajairana, esenana. Nachururupaicavacapaipa eta námirapahi te cárcel.

*Ema Felipe ticametarairu te avasare Samaria*

<sup>4</sup> Te jácani avasareana náitecapihapahi ena najuna-queneanaahi, tímiyanavanarichucha ticametarairuana eta máimiturapiana ema Jesucristo.

<sup>5</sup> Ema maca Felipe majunaquenehivre. Títecápapa eta te avasare ticaijare Samaria. Tacahe, ticametarairupa nayehe ena achaneana eta náehisiraya ema Jesús, émairahi Cristo ema nacuchapaquenehi. Tiúrujicavanapa ena achaneana.

<sup>6</sup> Namutu nasamararacahi eta macametarairuirahi ema Felipe.

<sup>7</sup> Taicha náimahapa eta macanarasiravacahi ena nacajumaqueneana camuriqueneana: ena muracaquihana, ena tiyayacareana, énapa ena masariana. Camuriana ena éreanana máimijunaqueneanaahi te náquehe ena achaneana návaháruanahi. Tipíarárecanapáipa eta náuchusirapahi.

<sup>8</sup> Eta tacahe, ichaperinehi eta náurisamurevahi ena achaneana tayehe eta jena avasare.

<sup>9</sup> Te jena avasare Samaria, matiarihihi ema émana achane ticaijare Simón. Iápemarehi éma. Ánaquiasiparipa eta macaete-majirisiravacahi ena achaneana. Títupajijiácavahi tépiyacava éma.

<sup>10</sup> Namutuhi ena nasimutuvaqueneana achaneana énapa ena ticaimahaqueneana nasamararacahi nasuapahi eta macayemaqueneanahi. Nacunacharinehi, ánipa nacahe eta náechajiriruvahi:

—Ema maca achane titupajijiácavahi ichape maicha ema Viya —nacahepa.

<sup>11</sup> Ánaquiasiparipa eta mavayuarasiravacahi éna, tayehe eta mahíapemarevahi. Eta tacahe, napicauchahi éma.

<sup>12</sup> Téhesera nasamapa ema Felipe, nasuapapa eta nasamirahi eta máechajiriruva ema Viya. Náehicapa eta mametarrahuhi mayehe ema Jesús eta émairahi Cristo, ema nacuchapauquenehi. Tacahe, camuriana ena ajairana énapa ena esenana ena ticaicachasianahi taicha eta nasuapirohi ema Jesús.

<sup>13</sup> Émaripa ema iápemaréni Simón, masuapavare éma. Ticaicachasivarepa. Máehicapa macachanepaipa ema Felipe. Ichape máramipahi eta ichapequeneana tiáramicareana máichauqueneánapahi ema Felipe.

<sup>14</sup> Tiuri, te Jerusalén, nasamairiricapa ena apóstoleana eta náehisiraipahi ema Jesús ena achaneana ticavasanahi te avasare Samaria. Tásiha, ticaevatavaneanapa ema Pedro ema Juan.

<sup>15-16</sup> Tiuri, ena téhicanaripa ema Jesús, vuíchaha máucupau-chahini ema Espíritu Santo, mávahácavacahíni éna. Tacari-chuichaha eta nacaicachasirahi eta navarairahi náehica ema Viáquenu Jesús. Tásiha, te títecapanapa ema Pedro ema Juan, tiyujaracanapa nayaseacapa ema Viya máijarasiraina ema Espíritu Santo eta mávahásiravacaina ena téhicanaripahi.

<sup>17</sup> Tacahe, ema Pedro émapa ema Juan nanacapa eta navahuana te nápusiana éna. Tacahe, ema Espíritu Santo mávahácavacaripa eta náemamachutíchiravacahi éna.

<sup>18</sup> Tacahe, ema Simón eta manecapirahi eta mávahásiravacahi ema Espíritu Santo te náemamachutíchiravacahi éna, mavarahapa éma mavachachavaca ena apóstoleana.

<sup>19</sup> Ánipa máichavaca:

—Íjaracanu nuti apana eta nítusiraina eta ítuquenehi, apaesa te nunaca eta nuvahuana te nápusiana ena nácani achaneana, máucupaicapaini ema Espíritu Santo, mávahácaini éna —máichavacapa.

<sup>20</sup> Tacahe, ema Pedro máichapa:

—Pémítiequenehaya píti étapa eta piplatane. Taicha píti vahi tiuri eta pipanereru. Pímijachahipuca vicavacharapiyare eta máijararuuhaviana ema Viya.

<sup>21</sup> Vahi pítiparacaina píti, taicha eta pipanerueruana vahi tátupiruvahini mayehe ema Viya.

<sup>22</sup> Pínajica eta pivainarajivana. Piyaseaca ema Viya, tijuricati tiperdonachavi eta tamaurivahi eta pipanerueruhi píti.

<sup>23</sup> Taicha nímatiacavihi eta pétáviuchirahi eta picapinaruraivahi. Eta juca picahehi taicha vahi tínajiacavimahi eta pivainarajiva —máichapa ema Pedro.

<sup>24</sup> Tacahe, tipicapa ema Simón. Ánipa maicha:

—Ímicatacanu éti, eyujarauchanu me Viya apaesa vahi tacuitauchava eta juca ecayemaqueneanahi —máichapa.

<sup>25</sup> Tacahe, ema Pedro ema Juan tinahacavanapa tímiturerecana eta máimiturapiana ema Viáquenu Jesucristo. Te tamutupa eta náimituresirahi, tiyananapa tichavanayarepa te Jerusalén. Tétávajicanapa te avasarechichana tayehe eta Samaria. Ticametarairuanapa nayehe ena achaneana.

*Ema Felipe máimituca ema achane ticavasa te Etiopía*

<sup>26</sup> Tiuri, te jena sácheana, tiúcupaicapa ema émana ángele mavaneruhi ema Viya. Máechajicapa ema Felipe. Ánipa maicha:

—Felipe, pétupiricava, piyana te tinapaica te vana. Pivenacuhayare eta achene tiásicha te Jerusalén, tiyana te avasare Gaza. Pétavicayare eta mávapahiana vámahi —máichapa.

<sup>27</sup> Tacahe, tétupiricavapa ema Felipe, tiyanapa. Te achene ticainunacacanapa ema achane ticavasa te avasare ticaijare Etiopía. Ema maca achane\*, sujupaha esu Candace, reina tayehe eta apaquehe ticaijare Etiopía. Ema maca achane ema tijaneaca eta suímahaqueneana esu reina. Éma, másinehi te Jerusalén, máejirapanahi ema Viya.

<sup>28</sup> Ema maca achane machavaquenepaipahi te mávasa. Eta mapaisirahi, téjacapahi te mayehe carro. Téchajicurecapahi eta Sagrada Escritura májure ema profetaini Isaías.

<sup>29</sup> Tacahe, ema Espíritu Santo mametacapa ema Felipe, ánipa maicha:

—Pémeñahava te tachacaya eta jena carro —máichapa ema Espíritu Santo.

<sup>30</sup> Tacahe, te témeñahavapa ema Felipe, te macachacayapa eta carro, masamapa ema achane téchajicurecapahi. Tásicha, mayaserecapa. Máichapa:

—¿Picaicutiara eta jara péchajicurepahi?

<sup>31</sup> Ema achane majicapapa:

---

\* **8:27** Eunucohi ema maca achane.

—Váiparinehi nucaicutiaraimahi taicha nájina nametacanupahini eta tacayemapahi. Te pítucapuca píti pimetacanu, picatajicanu. Yare, piávacuha péjaca te juca nuchacaya —máichapa ema achane.

<sup>32</sup> Tiuri, eta máechajicurepahi ema achane, ani tacahehi: “Eta uvesa, te nacarataca nacapacayarepuca, vahi ticatiuchavaimahi. Te nachucamecapuca, váhivare tipiararecaimahi. Ene macahehi ema maca achane, vahi mácapauchavahini, váhivare máechajiuchavahini te námapa tayehe eta nacapasihayarehi.

<sup>33</sup> Tétavicavahi eta nacatsirirairahi éma, tayanapanetájinanéni maviurevainahini. Nájinavare nacatiuchahini. Ena mámariequeneanaini, nájina náechajisihahini éna”.

<sup>34</sup> Tacahe, ema maca achane mayaserecapa ema Felipe. Máichapa:

—Picatajicanu pimetacanu. ¿Nájaha ema táechajisihahí etajuca libro májurehi ema profeta? ¿Ema táechajisihahí emamacaprofeta, vahi apanapuca? —macahepa.

<sup>35</sup> Tacahe, ema Felipe tépanavapa mametaca ematáechajisihaquenehi eta libro. Mametacapa eta émairahi táechajisihá ema Jesús, ema Cristo ema nacuchapaquenehi.

<sup>36</sup> Tacahe, te máechapa ema achane, mapanerequenehainehi eta napaisirapahi. Tacahe, te nacapayacapa eta únecure, macahepa ema achane:

—Te juca jararihi une. Nuvaraha pícachasicanu —macahepa.

<sup>37</sup> Tacahe, ema Felipe majicapapa:

—Tiuri, te yátupihipuca eta pisuapirohi te pisamure eta picasiñairaya ema Jesús, nícachasicavi —máichapa.

Majicapapa éma:

—Yátupi nusuapa ema Jesucristo eta émairahi machicha ema Viya —macahepa.

<sup>38</sup> Tacahe, macavanairipipa nacaicheca eta carro. Tiúcupaicana ema, tiyananapa te únecure. Tacahe, ema Felipe máicachasicapa ema achane.

<sup>39</sup> Te tichavanapa tayehe eta únecure, tíjahúchavapa témitiaca ema Felipe, taicha ema Espíritu Santo manaracuhapa. Váipa macaecherahihini. Váipavare máimahahini ema achane. Tímiyanavapasera tipaica ema achane. Tiúrisamurepaipahi.

<sup>40</sup> Eta máucupaisinehi ema Felipe eta te avasare ticajare Azoto. Tacahe, tétavajicapaipa eta te avasareana. Ticametarrirupaipahi eta máitecapirapahi eta te apana avasare ticajare Cesarea.

**9**

*Ema Saulo masuapa eta máichuirahi ema Jesucristo  
(Hch 22.6-16; 26.12-18)*

<sup>1</sup> Tímiyanavarichucha ema Saulo eta mapánajirisiraváahi ena téhicanahi ema Jesús, mavarairahi máimicpacavacaya. Tiyanapa tiyasesereca eta órdene mayehe ema corregidor tayehe eta Jerusalén.

<sup>2</sup> Máichapa ema Saulo:

—Nuvaraha nuyanaya te jena avasare Damasco. Nuvara-havare píjaracanu eta órdene, eta nucaratasisiravacaina ena téhicanahicacha ema Jesús, namutu nácani nétupiaruana-yarepahi ajairana, esenanapuca. Nutanucavacayare te náurujisirarevana ena vijaneanana. Présolanayarepahi eta námirayare eta te juca Jerusalén —máichapa.

<sup>3</sup> Tacahe, tiyanapa ema Saulo. Eta mapaisirapahi éma te achene, tiánehipa títecapa te avasare Damasco, tiáramicarepa eta majaraiva ema Viya tiásicha te anuma. Tamicauchapa éma.

<sup>4</sup> Tásicha, tiáquipaicavapa eta mapisirahi. Tásicha, masamapa eta muhu ema Jesús. Máichapa:

—Saulo, Saulo, ¿tájaha tacayema picatianacanu pipánájiricanu? —máichapa.

<sup>5</sup> Majicapapa ema Saulo, mayaserecapa:

—¿Nájahavi piti Tata?

Majicapapa:

—Nuti Jesús. Núti picatianaruhi, eta pipanajirisiravaca ena téhicanuanahi. Pésamiricavachucha, taicha pítijivaichucha píchavahi. Vahi piúrimahi te pímyanava picatianacanu. Péhicanusera pítí —máichapa ema Jesús.

<sup>6</sup> Tacahe, ema Saulo tiyayacarenecha eta mapisirahi eta máechajisirahi ema Jesús. Macahepa:

—¿Tájahapuca eta pivarahaquene nítauchaquenéna piyehe, Tata? —máichapa.

Tacahe, ema Jesús máichapa:

—Péchepuca. Piyana pítecapa te jena avasare. Ánaqui mararihi ema timetacavyare eta pítauchaqueneyare nuyehe —máichapa ema Jesús.

<sup>7</sup> Ena apamuriana ajairana macachanequeneanapahi ema Saulo, ichape eta tiáramecana. Taicha nasamahi ema téchajicahi, váhisera náimahahini.

<sup>8</sup> Tacahe, ema Saulo téchepucapa eta te máquipaisinevahi. Vaipa máimairiricahini. Tacahe, nachurucapaipahi eta nacaitecapiraya tayehe eta avasare Damasco.

<sup>9</sup> Mapana sache eta mapuchuquivahi. Váhivare tinica. Tájinavare máerahini.

<sup>10</sup> Tiuri, eta te jena avasare Damasco, matiarihihi ema apana téhicahivare ema Jesús, ema ticaijare Ananías. Émari-chuvare máechajiruhi ema Viáquenu Jesús. Ánipa tacahe eta máechajisirahi:

—¡Ananías!

Éma majicapapa:

—Nutiarahi, Tata —macahepa.

<sup>11</sup> Tacahe, ema Viáquenu Jesús máichapa:

—Piyana pitupiruya te jena calle ticaijare Titupina. Te jena mapena ema Judas, picayasesereruyare ema achane ticaijare Saulo, ema tiásihahi te avasare Tarso. Puiti máenahi tiyujaracahi.

<sup>12</sup> Núti néchajicahi éma. Numetacahi éma eta pítecapiraya mayehe. Nuvanecavi pinacaya eta pivahu te mápusi apaesa tachava eta máimairirisira —máichapa ema Jesús.

<sup>13</sup> Te masamapa ema Ananías, macahepa:

—Tata, namutu timetacanuana eta máichararacavanahi ema achane eta mavainarajivahi nayehe ena téhicaviana ticavasana te Jerusalén.

<sup>14</sup> Éma, tímitecahi puiti eta ani, mámapahi eta órdene náijararuhi ena tuparairucana eta te Jerusalén eta máepanirahaviya mapresuchirahaviya vimutu viti véhicaviana —macahepa ema Ananías.

<sup>15</sup> Émasera ema Jesús máichapa:

—Piyanachucha, taicha ema maca, nunerejiruhichuhi núti. Nuvanarayarehi éma. Nuvanecayare mayana macame-tarairu eta njare nayehe ena achaneana te apanana avasare-na étapa eta nayehe ena vijaneanana israelítana. Nuvane-cayareva máechajisiha eta njare nayehe ena ichapequeneana aquenucana réyeana.

<sup>16</sup> Núti nímechayare eta macatajivairayare ichape táichavenahi eta máehisiranuyare —máichapa ema Jesús.

<sup>17</sup> Tacahe, masuapahi ema Ananías. Tiyanapa tayeha eta peti mávhahi ema Saulo. Tisiapapa. Máechajicapa. Manacapa eta mavahu te mápusi. Tásiha, máichapa:

—Nuparape Saulo, ema Viáquenu Jesús tímerecavahi eta piyeho te achene te pítecainapa. Éma, tivanecanuhi níteca eta piyeho. Mavarahahi tichavayare eta pímairirisira. Mavarahavare tiávahácaviya ema Espíritu Santo —máichapa.

<sup>18</sup> Tacahe, enevanepa témitiaca eta tépacuchainihi eta máuquiha, téjamihauquicha. Tichavapa eta máimairirisira. Tásiha, ema Saulo téchepucapa, matupirupa ticaicachasi.

<sup>19</sup> Te tamutupa, tinicapa. Tichavapa eta matumeva. Manasipanapa jena sácheana nayehe ena machamuriana-rípahi téhicanahi ema Jesús tayehe eta avasare Damasco.

*Tépanavapa ticametarairu ema Saulo*

<sup>20</sup> Tacahe, tépanavapa ticametarairu ema Saulo te náurujisirareva ena israelítana. Máechajisiha ema Jesús émairahi Machicha ema Viya.

<sup>21</sup> Namutu ena tisamararacanahi, ichaperinehi nárami. Tásicha, nacahepa:

—¿Tájaha tacayema? Émara ema maca ema tipánajirívacahi ena téhicanahi ema Jesús, ena ticavasana te Jerusalén. Tímitecahi te juca eta mapresuchirapanavacayarehi ena apamuriana, mámamurihayarehi nayehe ena tuparairucana eta te Jerusalén. ¡Tásicha puiti, émarinechavare ticametarairuhi mayehe ema Jesús! —nacahepa.

<sup>22</sup> Émasera ema Saulo tiápajucavapanapa eta máitusira ticametarairu. Máimerecahi eta yátupiquenerahi ema Jesús émairahi ema Cristo, ema nacuchapaquenehi. Te tamutu eta náurujisirarevana ena israelítana eta te Damasco, macapaquechamuripa nácani ticatianacanahi eta véhiruhi.

*Ema Saulo nacaratacayarepaini ena israelítana. Émasera tiyanapa tijuna.*

<sup>23</sup> Tayerevahí eta áñoana,\* ena israelítana napanerechapa nacapacaya ema Saulo.

<sup>24</sup> Émasera masamairiricapa eta náemaukirahí. Tamutu sácheana, yátiana nacunehi eta te acheneana máuchujisihayarehi, taicha ichape eta navarairahí nacapaca éna.

<sup>25</sup> Énasera ena machamuriana náitucahi eta nayumurusirahí náiyaracuhapa eta te ichape saye. Náitiacapa te tiipi enure. Tacahe, nacajuchuchucapa eta te apachacaya eta yúchama. Tacahehi eta máitujsiravahí tijuna.

*Ema Saulo títecaparipa te Jerusalén*

<sup>26</sup> Te títecapapa ema Saulo te Jerusalén, mavarahapa masiapamuriha ena náinapureanahi téhicanahi ema Jesús. Énasera napicarichucha éma, taicha vuíchaha nasuapahini eta máehisiraipa ema Jesús.

<sup>27</sup> Matiarihisera ema achane Bernabé. Émapa tiámahi ema Saulo tímimaticahí nayehe ena apóstoleana. Mametamurihapa eta máichararacavahí ema Saulo eta máimairahi ema Viáquenu Jesús eta te achene, étapa eta máechajisirahí, máichuirahivare ema Saulo. Mametacavare eta yátupirahí

---

\* **9:23** Te pivaraha pecha, pitanuca te libro Gálatas 1.18.

máituca ticametarairu ema Saulo mayehe ema Jesús eta te avasare Damasco.

<sup>28</sup> Tacahe, ema Saulo manasipa te Jerusalén. Masiapa-murihana éna, énapa macachanejiricavacahi. Vahi mapícarácavahíni eta macametarairuirahi mayehe ema Viáquenu Jesús.

<sup>29</sup> Máechajiricavacapahi ena israelítana<sup>†</sup> te jácani mácapajisihavacapahi. Macanaraemachavacahi éna. Vahi náuricahini eta máimiturapianahi. Tisemanapa mayehe. Tásicha, navarahapa nacapacaya éma.

<sup>30</sup> Nasamairircapasera ena machamuriana. Tacahe, náevatacapa mayana tayehe eta te móvase Tarso. Náehicapa ena apamuriana tinapananayarehi tayehe eta avasare Cesarea, étapa nachavinehi. Tiánucuhapa éma, tiyanapa macarichupa.

<sup>31</sup> Tacahe, tiúricavanapa ena náumurivana ena téhicanahi ema Jesús tiávihana te apanana avasareana tayehe te Judea, te Galilea, étapa te Samaria. Tásicha, tétumechacacanahi eta náimiyaniravaya napicauchiraya ema Viáquenu. Máimicatamurihahivare ema Espíritu Santo. Eta tacahe, camurianapai-pavare ena téhicanahi.

### *Eta manarasirahi ema achane ticaijare Eneas*

<sup>32</sup> Tiuri, ema Pedro tiyanapa máejiravacapaipa ena machamuriana eta te avasareana. Títecapapa nayehe ena apamuriana machamuriana ticavasanahi eta te avasare ticaijare Lida.

<sup>33</sup> Matiarihi ema émana achane ticaijarehi Eneas. Macajumaquenehi éma. Ocho áñoripahi eta macajumairahi. Vaipa táurihini tiyamuriaca, váhivare máechepeucuhini te macamane. Tacahe, máitecapauchapa ema Pedro.

<sup>34</sup> Máichapa:

—Pésenicanu, Eneas. Ema Viáquenu Jesucristo ticanarcaviya. Puiti tájinapa eta pijumaini. ¡Péchepeca! —máichapa.

Tacahe, ema Eneas enevanepa téchepeca. Tájinapa máichiravainahini.

<sup>35</sup> Tacahe, náimahapa eta manarasirahi namutu ena ticavasanahi tayehe eta te avasare Lida énapa ena ticavasanahi te tachacaya ticaijare Sarón. Eta náimairahi, náinajicapa eta nayehererepiainaini. Tásicha, náehicapa ema Viáquenu Jesús.

### *Eta suápechirava titareca esu Tabita*

<sup>36</sup> Te jena sácheinahí, sutiarahi esu esena ticaijaru Tabita, eta suátserepihi Dorcas. Ésu, ticavasahi eta te avasare ticaijare

---

<sup>†</sup> 9:29 Ena nani, yátupiqueneanahi israelítanahi, náuchureanahisera te jácaniana apanana avasareana. Táitusiava, apaechajiruvanaripa eta ticaijare griego. Puiti tichavanaripa eta te Jerusalén, návasahi ena ticachichanaini.

Jope. Ésurichuhivare téhicahi ema Jesús. Eta suítaresirahi esu suca esena, sucajivaca ena páureana eta suímaqueneana. Tímicatarahi nayehe nácani ticaijuheanapahi.

<sup>37</sup> Te jena sácheanahi, esu Dorcas ticajumapa. Suvayuhapa, tépenapa. Tacahe, navehapa, náicachapa eta suáquehe. Nacasiapapa te tajuhe te anuquehe téqueneha piso.

<sup>38</sup> Eta juca avasare Jope tachacayaichuhi eta apana avasare Lida, eta mávihahi ema Pedro. Náecharipahi eta matiarihirahi ema Pedro te Lida. Tacahe, navanecapa ena apinana ajairana, náichuhapanayare éma. Te náitecapauchapa, náichapa:

—Vivaraha viámavi puítirichu ánaqui te Jope. Pímahapanaini esu vémunaruquenéhi vichamuri Tabita. Tépenaipahi —náichapa.

<sup>39</sup> Tacahe, tiyanapa ema Pedro, máehicavacapa éna. Te titecapanapa, náimisiapapa eta te tajuhe suávihahi esu Dorcas. Namutu ena esenana máimaranahí, te náimahapa ema Pedro, náurujiacapa. Tíyahanapa, náimechapa ema Pedro eta namuirihana supariruanahí ésu te achancerichaha.

<sup>40</sup> Tacahe, ema Pedro macavanairipipa náuchuca namutu. Tacahe, tépuyucapa éma, tiyujaracapa. Tacahe, máimaranacaripa esu esena suépenaque. Tásiha, máichapa:

—Tabita, péchepuca.

Tacahe, ésu téjamihauquichapa. Suímahapa ema Pedro. Téjahapaicapa.

<sup>41</sup> Tacahe, macaratacapa eta suvahu, macaechepecapá. Énevanepa máichuhavaca ena máimaruana énapa ena apamuriana machamuriana. Máimechapa eta suchaviraipa titareca.

<sup>42</sup> Tacahe, náechapa namutu ena ticavasanahí eta te avasare Jope. Camurianarine ena tisuapanahí ema Viáquenu Jesús.

<sup>43</sup> Ema Pedro manasipanapa jena sácheana tayehe eta avasare te mapena ema machamurihivare ticaijare Simón, náimijarechavare Suélareru.

## 10

*Ema Viya mavaneca ema Pedro máimitupanayare ema Cornelio*

<sup>1</sup> Te jena avasare ticaijare Cesarea matiarihi ema émana achane romano ticaijare Cornelio. Militar ema achane. Eta mávacure ema capitán, comandante te étana compañía tayehe eta batallón ticaijare Italiano.

<sup>2</sup> Ema maca achane mapicauchahi ema Viya. Tamutuhi sácheana tiyujarauchavahi. Máimitucavacahivare namutu

ena machichanaveana énapa ena tiávihanahi te mapena. Énerichuvare máimicatacavacahi ena israelítana páurequeneana, máijaracahi eta camuri plata.

<sup>3</sup> Te jena sache, las trésquenepa cáperehi, ema Cornelio tiyujaracahi. Tíjahúchavapa máimaha máucupauchahi ema émana ángele mavaneruhi ema Viya. Máechajicapa ema ángele, máichapa:

—¿Pícharacava? Cornelio —máichapa.

<sup>4</sup> Tásiha, ema Cornelio tipicarinehi eta máimarasirahi ema ángele. Majicapapa:

—¿Tájaha pivaraha eta nuyehe, tata?

Tásiha, máichapa ema ángele:

—Tímitecanuhi numetacavi. Eta piyeheana oración piyuarauchiravana étapa eta pímicatasiravacahi ena ticamunuvana páureana, táitecapauchahi tamutu ema Viya.

<sup>5</sup> Píminanereca puiti náepana ema achane ticaijare Simón, eta máchucarapihivare Pedro. Ema tiávhahí puiti te jena avasare ticaijare Jope.

<sup>6-7</sup> Eta peti máitecapihahi mapena ema apanavare Simón ema náimijarechaqueneva Suélareru. Eta táviha eta peti mape-nahi te tachausi eta mar. Ema maca Pedro ema timetacaviyare eta pítauchaqueneánayare —máichapa ema ángele.

Te tamutupa eta máechajisirahi ema ángele, tiyanapa tichava. Tacahe, máichuhapa ema Cornelio ena apinana mamusurana. Máichuhavare ema émana masuntarura. Énerichuvare tipicaurahi mayehe ema Viya, titaurahivare mayehe ema máquenuhi.

<sup>8</sup> Tacahe, mametacavacapa eta mametarapi ema ángele. Tacahe, máevatacapa tayehe eta avasare Jope.

<sup>9</sup> Te apanapa sache, tiánehianapáipa ena vanairucana tayehe eta avasare. Te jena las dócequenepa sache, ema Pedro tiápanapa eta te téqueneha piso. Tiyujaracayarehi.

<sup>10</sup> Técuháipaicha éma, taicha tájinarichaha manicahini. Vuíchaha náimaquerecahini eta tinicacare. Tacahe, eta mayujarasirahi máimahapa téjiacahi eta anuma.

<sup>11</sup> Máimahavare eta tiúcupaicaphi eta te mávihahi éma, tacutiyaréni eta ichape sávana. Ticaitiapusivacaphi te esquinana.

<sup>12</sup> Camuri eta sárareana, quichareana, cayureana, támaque-neanapahi eta sávana, tamutu eta apánapanenéjiqueneána sárareana.

—Tásiha, masamapa ema téchajicahi te anuquehe. Máichapa:

—Péchepuca, Pedro. Picapaca étanaina sárare. Pinica.

<sup>14</sup> Émasera ema Pedro, majicapapa:

—Vahi, Tata. Tituparacahavi vahi vicunicahini vinica viti israelítana eta juca sárareana vicajachaqueneana, vinicahini. Tájina nímatiya nunicahini eta juca —macahepa.

<sup>15</sup> Tiápechavavare máechajica ema Viya, máichapa:

—Vahi picuimijarecha ticajachacareana eta níjararu-vianahi tinicacareana —máichapa ema Viya.

<sup>16</sup> Mapahe eta máechajisirahi ema Viya ema Pedro. Tacahe, tichavapa eta sávana tiápana te anuma.

<sup>17</sup> Ema Pedro manasirichaha macájarasamúrehi eta mapanerechirahi tájahapuca tacayemahi eta máimaha-quenehi. Títecapananecha te tapaja ena vanairucana mayehe ema Cornelio. Nacayasesererupaipa eta mapena ema Simón Suélareru.

<sup>18</sup> Eta náitecapirahi, nacayasesererupa te étahipuca mávihahi ema Simón Pedro.

<sup>19</sup> Émasera ema Pedro manasirichaha tipanererecarichaha taicha eta máimahaquenehi. Tásicha, ema Espíritu Santo máichapa:

—Nararihi te juca ena mapanana ajairana titanucavia-napahi.

<sup>20</sup> Piyana pímahavaca éna. Vahi picueñamava eta péhisirvacayare, taicha nútì nuvanecavacahi éna —máichapa ema Espíritu Santo.

<sup>21</sup> Tacahe, masuapapa ema Pedro. Tiúchucapa tiyanapa nayehe ena titanucanapahi. Te máitecapauchavacapa, máichapa:

—Nútira etanurepahi éti. ¿Tájaha tímitecahehi?

<sup>22</sup> Tásicha, najicapapa éna:

—Tivanecahavíhi ema capitán Cornelio. Ema achane tipicaurahi mayehe ema Viya. Títaurahivare nayehe ena achaneana. Namutu ena israelítana napicaucha náemunacavare éma. Puiti víti, vítecapauchavipa, taicha cape juca, ema ángele mavaneruhi ema Viya mamepanahí ema Cornelio máimichuhavi píteca te mapena, apaesa masama eta pimetarapianaya —nacahepa éna.

<sup>23</sup> Tacahe, ema Pedro macasiapavacapa te tajuhe. Nanasipa jena yati mayehe ema Pedro. Te apanapa sache, tiyananapa. Náehicapa ema Pedro ena apamuriana machamuriana ticavasanahi te Jope.

<sup>24</sup> Te apanaqueñepa sache, napaenumavapa títecapaná te avasare Cesarea. Ema Cornelio macuchapaipahi te mapena. Tiúrujicavanaripa ena majaneanana énapa ena máemunaca-sáreana máichuhaqueneánahi.

<sup>25</sup> Te títecapaná ema Pedro te mapena ema Cornelio, mácapapa máepuyumirauchapa matsiucayarepa.

**26** Émasera ema Pedro máichapa:

—Péchepucachucha pitupiha. Vahi táuricahini pitsiucanu, taicha nútirichuhi picutiquenehi achane —máichapa.

**27** Te tamutupa eta náechajisirahi, tisiapanapa te tajuhe. Máimaharine camurianahi ena náurujiruvanahi.

**28** Tacahe, ema Pedro máichavacapa:

—Écharichu éti eta viyeherepiana viti israelítana. Vahi tituparacahavi visiapanurihae eti apavasanana. Émasera ema Viya tivanecanuhi eta vahi nucupica eta nusiapanurihairahheyare. Nájinavare nunerejiruimahi nácani ticajacha-careana.

**29** Eta tacahehi, nítecavanepa. Tájina nácyayemahini. Tiuri puiti, nuvaraha néchaya. ¿Tájahapuca eta tímichuhuanuhi? —macahepa.

**30** Tacahe, ema Cornelio majicapapa:

—Cuátropa sache eta táetavisiravahi eta juca nímaquenehi. Te jena cáperehi sache hora las tres, núti nunasiquenehi te juca nupena. Ayunanuhi nuyujaracahivare. Tíjahúchavapa tímerecava ema ángele. Tijanunuca eta mamuiriha.

**31** Máichanupa: “Cornelio, ema Viya masamahi eta piyehéana oración piyujarasirana. Táitecapáuchahívare eta pímicatasiravacahi ena ticamunuvana páureana.

**32** Pímidanerecaya puiti náepana ema achane ticaijare Simón, eta máchucarapi naicha Pedro. Ema tiávihahi puiti te jena avasare ticaijare Jope. Eta peti máitecapihahi ema apanavare Simón ema náimijarechaqueneva Suélareru. Eta távihahi eta peti mapenahi te tachusi eta jena mar. Te máitecapapa ema Pedro, éma tímitucaviyare” máichanupa ema ángele.

**33** Tacahe, enevanepa nímicuhavihi. Tájinaserá táichiravainahini eta pítesirahi. Tímararacahávihi ema Viya eta juca viúrujisiravahi puiti. Vivaraha visamaviya tamutu eta pímetacasivanahi mayehe ema Viya —máichapa ema Cornelio.

*Ticametarairupa ema Pedro te mapena ema Cornelio*

**34** Tacahe, tépanavapa ticametarairu ema Pedro. Ánipa macahe:

—Nucaicutiarapa puiti vahi vácarichu viti israelítana vijacapacare mayehe ema Viya.

**35** Namutuchucha majacapavaca nácani tipicauchanahi éma, tíchanahivare eta táuriqueneana.

**36** Taicha cape juca ema Viya macaitecapahi eta máechajiriruva viyehe viti israelítana. Tivanecahavihi vimetacavacayare eta najacapacarevahi me Viya nácani ticasíñavanahi

mayehe ema Jesucristo, maperdonachiraripa ema Viya eta napecaturana. Émara Viáquenu vituparaha téchapajirica-haviya vimutu viti achaneana: viti israelítana, étipa eti apavasanana.

<sup>37-38</sup> Écharichupuca éti eta táichararacavahi te viávasa Judea cape juca táitaresirahi. Te ticaicachasipa ema Jesús Nazareno mayehe ema Juan, máucupauchapa ema Espíritu Santo máijararuhi ema Viya. Mávahácpa éma, máijaracaripa eta máitupajijiásiravaya. Tacahe, tépanavapa ticametarairu nayehe ena achaneana ticavasana te Galilea. Te jácani mapaisihapahi, máichapahi eta táuriqueneana. Macanara-cavacapahi ena nacatajivaqueneana mávaháruuanahi ema Váinaraji. Maratahahi éma máichahi eta juca, taicha ema Viya máimicatacapahi.

<sup>39</sup> Tiuri, víti véchajisiha eta juca, taicha vímahaquenehi tamutu eta máichaqueneanapahi ema Jesús tayehe eta mapaisineanapahi avasareana te Judea, étapa te Jerusalén. Énasera ena tuparairucana nacatichahi éma; náemetatarecapa te crusu eta náimicapasirahi.

<sup>40</sup> Émasera ema Viya macaechepecuahi te máecari te mapana-quenepa sache. Tásiha, máimerecavare te vimuri eta machavirahi titareca.

<sup>41</sup> Vaipa námutuhini ena achaneana náimahahini. Vítinecha vímahaparacahi viti manerejiruanahi ema Viya. Vinecapae-quenehahi tamutu eta vicachanerahi ema Jesús te vinisirana. Tásiha puiti, vimetacahiva ena achaneana eta vímahaqueneanahi.

<sup>42</sup> Taicha tivanecahavipa vicametarairuya. Vimetacayare eta émairahi ema Jesús viyeheyarehi Juez viti achaneana énapa ena náepenaqueneana. Taicha ema Viya ema tituparacahi eta mávacureyare juésyarehi.

<sup>43</sup> Étaripa eta acane namutu ena profetanaini náechajisihahi ema Cristo. Ánipa nacahehi: “Namutu ena tisuapanaya ticasíñanaya ema Cristo, maperdonachavacayare ema Viya tamutu eta napecaturana táichavene eta nacasiñairaya ema Cristo”.

*Eta mávahásiravacahi ema Espíritu Santo ena apavasanana*

<sup>44</sup> Tímiyanavarichaha eta máechajisirahi ema Pedro, tiúcupaicapa ema Espíritu Santo. Mávahácpa namutu ena tisamararacanahi eta mametarairuhi ema Pedro.

<sup>45-46</sup> Tíjahúchavapa ena mávaháruuanahi apáechajiríruvanapa. Nacunacharipa ema Viya. Nasamapa ena machamurianapahi ema Pedro tiásihanahi te Jope. Náraminehi éna eta mávahásiravacahi ema Espíritu Santo ena apavasananahi, taicha ena israelítana náimijachahi nacarichu ena mávaháruuanahi ema Espíritu Santo.

<sup>47</sup> Tacahé, ema Pedro máichavacapa:

—Tájina náechajisiacarevaimahi éta nacaicachasiraya enanani, cápachi mávahácaripa ema Espíritu Santo vicutiripa víti eta mávahásirahavihi —máichapa.

<sup>48</sup> Tacahé, macavánairípi nacaicachasi namutu te máijare ema Viáquenu Jesucristo. Te tamutupa, nayaseacapa ema Pedro vahi macuyanavanehini. Tacahé, manasipanapa te jena sácheana eta nayehe.

11

*Eta mame tarapiana ema Pedro nayehe ena machamuriana te Jerusalén*

<sup>1</sup> Tacahé, téchacarevanepa te Jerusalén eta nasuapirohi ena apavasanana eta máechajiriruva ema Viya. Tásiha, napanerequenehapa ena apamuriana apóstoleana énapa ena náumurivana.

<sup>2</sup> Tásiha, te títecapapa ema Pedro te Jerusalén, nacajachapa ena apamuriana máinajicarahanainaichaha eta nayeherepiana ena israelítana.

### <sup>3</sup> Ánipa naicha:

—¿Tájaha tacayema péjirapanavacahi ena apavasanana?  
¡Písapavavare pinica te namesara! —náichapa.

<sup>4</sup>Tacahe, ema Pedro majicapapa mame tacapa eta máichara-racayahi eta mapaisirahi. Ánipa maicha:

<sup>5</sup>—Esamanuchaha. Te návihipa te avasare Jope, nuyujara-caipahi. Nímahapa téjiacahi eta anuma. Nímahavare eta tiúcupai-capahi tiásicha te anuma tacutiyareni eta ichape sávana. Ticaitiapusivacapahi te esquinana. Títetcapapa te návihahi nútí.

<sup>6</sup> Nímahapa eta apánapanenéjiqueneána sárareana támame-neanapahi eta savana. Tátarihi eta táñehiqueneana sárareana, quichareana, cágureana.

<sup>7</sup> Tacache, nusamapa eta mahu ema Viya, máichanupa: “Péchepuca, Pedro. Picapaca étanaina sárare. Pinica”.

<sup>8</sup> Nútisera nujicapapa: "Vahi, Tata. Tituparacahavi viti israelítana vahi vicunicahini eta juca sárareana vicajacha-queneana. Tájina nímatiya nunicahini eta juca".

<sup>19</sup> Tacache, tiápechanuvare téchajicanu ema Viya, máichanupa: “Vahi picuimijarecha ticajachacareana eta níjararuvianahí tinicacareana” máichanupa.

<sup>10</sup> Mapahe eta juca máechajisiranuhi ema Viya. Te tamutupa, tichavapa tiyapa te anuma tamutu.

<sup>11</sup> Étarichu jena hora, títecapanapa ena mapanana ajairana titanucuanapanahi eta te peti nítecapihahi nútì. Mavane-ruanahi ema émana achane ticavasahi te Cesarea.

<sup>12</sup> Tacahe, ema Espíritu Santo tivanecanupa néhicavaca éna, taicha tájina taeñamavacarehini. Énerichuvare téhicanuanapa ena nani sáisiqueneana vichamuriana. Vimutuhi visiapa eta mapena ema achane.

<sup>13</sup> Timetacahavipa éma eta máimairahi ema ángele tiúcupauchahi eta te mapena. Titupihahi te mamirahu. Tacahe máichapa: “Pímivanereca puiti náepana ema achane ticaijare Simón, eta máchucarapi naicha Pedro.

<sup>14</sup> Ema maca Pedro, ema timetacaviyare eta piúchucuiraya, píti, esu piyena, énapa ena pichichanaveanahi” máichapa ema ángele.

<sup>15</sup> Tacahe, népanavapa nímitucavaca ena náurujiruvanahi. Te néchajicaipa, tíjahúchavapa tiúcupaica ema Espíritu Santo nayehe éna. Mávahácavacapa tacutihi eta mávahásirahavihi víti te tépanavainapa.

<sup>16</sup> Tacahe, enevanepa néchavahi eta mame taruhavihi ema Viáquenu Jesú. Áni macahehi: “Échavarichu ema Juan máicachasicahi te une ena achaneana. Étisera tiúcupauchaheyare ema Espíritu Santo. Éma, tícachasicahayare tiávahácahénapa” tacahehi eta máechajiriruvahí.

<sup>17</sup> Tiuri, ema Viya máijaracavacahi ena apavasanana ema Espíritu Santo táichavenehi eta náehisirahi ema Viáquenu Jesucristo, tacutihi eta máijarasirahavihi víti. Tásiha, váiparinehi nácapaemachaimahi núti eta mavarahaquenahí ema Viya — máichavacapa ema Pedro.

<sup>18</sup> Tacahe, ena ticajachanahí ema Pedro, te náechapa, timatinanapa. Nacunachainehi ema Viya, nacahepa:

—Yátupirichuhi eta majacapiravaca ema Viya ena apavasanana eta náeneuchiravaina. Nácutihavihini víti eta visiapi rayare te anuma, máichecuaraquirénapa eta vítaresiraya maicha ema Viya —nacahepa.

### *Náehicavare ema Jesú ena achaneana ticavasana te avasare Antioquía*

<sup>19</sup> Te jena sácheana, te nacapacapa ema Esteban, napana jicavare ena apamuriana téhicanahi ema Jesú. Eta tacahe, tijunanapa. Téjanerepáicanapa tiyananapa te Siria, ena apamuriana tiyananapa te tiúrupuhi te mar ticaijare Chipre, ena apamuriana te avasare Antioquía. Te jácani náitecapíhapahi, ticametarairuanapahi mayehe ema Jesucristo nayehe ena najaneanana israelítana. Vuíchaha nametacahini ena apavasanana.

<sup>20</sup> Tásiha, títecapanapa ena apamuriana\* eta te avasare

---

\* **11:20** Ena nani téhicanahi ema Jesú, yátupihi israelítanahi éna. Náuchusinehisera éna te apanana avasareana: te jena avasare Cirene, étapa eta avasareana táunavanahí eta tiúrupuhi ticaijare Chipre.

Antioquía. Énasera ticametarairuanapa nayehe ena apavasanana. Nametacavacapa, ánipa naicha:

—Te esuapa éhica ema Viáquenu Jesucristo, éma ticuchucuhaheyare eta ícuñayaréni taicha eta epecaturana —náichapa.

<sup>21</sup> Ichape eta tasuapacarevahí eta nametarairuana taicha ema Viya máimicatacavacahi. Eta tacahehi, nasuapahi ena camuriqueneana achaneana. Náinajicapaipa eta nayeherepiníhi tamauriqueneana, náehicapa ema Jesús.

<sup>22</sup> Te nasamairiricapa ena nachamuriana ticavasananahi te Jerusalén eta juca téchacareanahi te avasare Antioquía, ticaevatapa ema Bernabé, mayana macaicutiarapana te yátuplehipuca.

<sup>23</sup> Tacahe, te títecápapa éma te Antioquía, máimahapa eta máimicatasiravacahi ema Viya. Tiúrisamureinehi. Maconsejachavacapa namutu éna eta náetumechiracacaina eta náehisirahi ema Viáquenu. Vahi nacucainajiruva te tatiarihinapuca jácani náichavaqueneyava.

<sup>24</sup> Taicha ema Bernabé, tétavicavahí eta máuriva. Mávaháruhivare ema Espíritu Santo. Tisuapajirahi éma. Tacahe, camurianahi ena tisuapanahí téhicanahi ema Viáquenu maicha ema Bernabé.

<sup>25</sup> Te táequenepa eta juca, ema Bernabé tiyanapa te avasare Tarso. Matanupanapa ema Saulo.

<sup>26</sup> Te máetupiacapa, mámapa te avasare Antioquía. Tacahe, nanasipa ánaqui. Étana año nacahe eta nacachaneravacahi ena nachamurianahi. Camuriana ena náimitureanahi. Te jena avasare Antioquía, taepeaninevahí eta nacaijarerahi cristianoana namutu ena téhicanahi ema Jesús.

<sup>27</sup> Te jena sácheana, natarihihi te Jerusalén ena profetana máijararuuanahi ema Viya eta máechajiriruvana. Tacahe, tiyananapa nacaijuhe te Antioquía.

<sup>28</sup> Te títecapanapa, ema émana ticaijare Agabo titupihapa te namuri ena machamuriana. Macaimitucasiguenehi éma mayehe ema Espíritu Santo. Mametacavacapa eta tatiarihiyare eta ecuha te tamutu avasareana. (Eta juca táichavaqueneyahí eta ecuha te avasareana te jena añoanahi matupihirahi ema aquenucaini Emperador Claudio.)

<sup>29</sup> Tacahe, ena téhicanahi ema Jesús ticavasana te Antioquía napanerechainapa náimiamarecaya eta nanaquiruana, náimicatasiraya ena nachamuriana ticamunuwanahi, énaripa ena ticavasanahi te Judea.

<sup>30</sup> Tacahe, tinaquiquicavanapaipa eta naratahaqueneya nanaquica. Tacahe, náimiamarecpa mayehe ema Bernabé émapa ema Saulo. Náijaracayarehi ena náiyarahana pastoreana. Énapa tíjaracanayarehi ena ticamunuwanahi.

## 12

*Nacapacapa ema Jacobo. Náeratacapa ema Pedro.*

<sup>1</sup> Te jena sácheana, matiarihi ema rey ticaijare Herodes Agripa. Ema macavanairipipa nacaratacavaca ena tachutirihapahi ena téhicanapahi ema Jesús, náemecharecavacapa.

<sup>2</sup> Énerichuvare, máimicacavare ema apóstole Jacobo maparapeni ema Juan. Nayuchatipiquenuhapa eta nacapasirahi.

<sup>3</sup> Tacahe, ema rey, eta máimairahi náurisirahi ena ticatianacanahi ema Jesús, máimicaeratacavare ema Pedro. Te jena semanahi, napiestarahi ena israelítana eta nanisiraya eta pan mayehere levadura.

<sup>4</sup> Eta nacaeratasirahi ema Pedro, náimisiapapa te cárcel. Navanecapa ena dies y seis suntaruana tijaneacanaya te machacaya. Cuátmurianahi ena patrullanahi. Ema Herodes Agripa, mapanerechahi macapacayareva ema Pedro te nimirahu ena achaneana te táequeneraya eta napiestara.

<sup>5</sup> Tacahe, ema Pedro, muracahi eta najaneasirahi te cárcel. Énasera ena machamuriana tiyujaracanahi me Viya. Nayaseacahi ichape eta nasamacarevaina máuchucuiraina ema Pedro.

*Ema Viya macuchucuha ema Pedro tayehe eta cárcel*

<sup>6</sup> Tacahe, ema Herodes Agripa máijarechapa eta sache eta máemepaniraya te cárcel ema Pedro eta nacapasiraya te nimirahu ena achaneana. Te jena yati tamirahupa jena sache, ema Pedro tímacahi te nachacaya ena apinana suntaruana. Ticaitiahí te apipi cadenana. Ena apinanavare suntaruana najaneacahivare eta tapaja.

<sup>7</sup> Tíjahúchavapa tímercava ema ángele mavaneruhi ema Viya. Tijarahijuheinehi eta cárcel. Tacahe, ema ángele macayamuricapa ema Pedro. Macajamicapa. Ánipa maicha:

—Pedro, péjamica. Péchepuca —máichapa ema ángele.

Tíjahúchavapa téjapumuriha eta cadenana máitihanahi te mavahu ema Pedro.

<sup>8</sup> Máichavare ema ángele:

—Picapitijuechava eta pítijuhe. Pinaca eta péparupevana.

Tacahe, ema Pedro masuapahi. Tacahe, ema ángele máichavarepa:

—Pinaca eta pépacuhasa. Yare, péhicanu —máichapa.

<sup>9</sup> Tacahe, ema Pedro máehicavanepa ema ángele. Ema Pedro váhi máimatihini eta máicharacavapahi, máimijacharichucha mavapure.

<sup>10</sup> Tacahe, náetavicapa ena tínapucana sentinélana, náetavicavare ena apamuriana. Títecapanapa eta te tapajacura eta

cárcel. Eta tapajacura amairihahi fierro tijitacarehi. Témunahiricavapa téjiaca. Tiúchucanapa te aneca te calle. Te tiyerehianapa eta napaisirahi, majunijicapa ema ángele.

<sup>11</sup>Tacahe, ema Pedro mapaenumavapa macaicutiara. Macahepa:

—Nímahapa puiti eta yátupirahi tijaneacanuhi ema Viya. Mavanecahi ema ángele ticuchucuhapananuhi eta macapasiranuyarehini ema Herodes énapa ena nujaneanana —macahepa.

<sup>12</sup> Tipanererecapaipa eta mapaisirapahi. Matupirupa te supena esu María, maena ema Juan ticaijarehi puiti Marcos. Éta, nárujisihavahi nayujarasihahi ena camuriqueneana machamurianahi.

<sup>13</sup> Títecapapa ema Pedro te tapajacura eta nayehe canchón. Máehahamecapa eta tapaja. Tacahe, esu esena amaperu ticaijaro Rode, tiyanapa suímahapana nájahapuca ema téhahamecahi eta tapaja.

<sup>14</sup> Suímatiahuchavanepa ema Pedro, váhisera suvéjiáequenahini eta súrisamurevahi. Tiyanapa tijunapa te tajuhe, sumetapanavacapa eta matiarihirahi ema Pedro te aneca te tapaja.

<sup>15</sup> Énasera vahi nasuapahini. Tacahe, náichapa:

—Máurishivipapuca píti.

Éusera sumetacarichucha eta yátupirahi. Énasera náichavarepa:

—¡Váhipuca émaina! Émapuca ema mayehe ángele ema tijaneacahi —nacahepa.

<sup>16</sup> Émasera ema Pedro tímiyanavarichucha máehahamecahi eta tapaja. Tacahe, tiyananapa navéjiáequeneha. Náimaharine émasarehi. Tiáramecanarinehi éna.

<sup>17</sup> Émasera máimicutiarachapa te mavahuana eta namatina. Tacahe, mametacavacapa eta macuchucuirahi ema Viáquenu tayehe eta cárcel. Te tamutupa eta mametasiravacahi, máichapa:

—Emetapaná ema Santiago\* énapa ena apamuriana vichamuriana —máichapa.

Tacahe, tiúchucapa tiyanapa te apana avasare.

<sup>18</sup> Te tijarahipa, ena suntaruana tinanesicarajianaipa taicha vahi náechahini tájahapuca eta máicharacavahi ema Pedro.

<sup>19</sup>Tacahe, ema Herodes Agripa máimivanerecapa natanuca ema Pedro. Májinaserá náetupiacahini. Eta namaetupiasirahi,

---

\* **12:17** Ema maca achane, maparapehi ema Jesucristo. Te náechajiriruva ena israelítana, ticaijare Jacobo. Te véchajiriruva ticaijarehi Santiago. Émarichuhi ema tiájucharahí eta carta ticaijarehi Santiago.

ticayaserehanapa ena suntaruana tijaneacanahi. Nájinaserá émanainahini nanecapahini eta máuchusirahi ema Pedro. Tacahe, macavanairipipa ema Herodes nacapacavaca ena suntaruana. Te tamutupa eta juca, tiyanapa ema Herodes te apava avasare Cesarea; étapa mávihahi.

*Eta máepenirahi ema Herodes Agripa*

<sup>20</sup> Te táequenepa, ema Herodes Agripa tisemapa nayehe ena achaneana ticavasana te Tiro étapa te Sidón. Énasera náimivanerecapa mayehe ema Herodes. Tiyaseserécanapa eta náurivaina mayehe éma. Taicha eta návasanahi táitecapauchahi eta tinicacare tiásihahi eta te mávasa ema rey. Tacahe, nacasiñapa ema Blasto, ema majupaha ema rey, máechajichavacaya eta náurivaina.

<sup>21</sup> Tacahe, ema Herodes máijarechapa eta sache, máimichuhairaya ena achaneana eta jena sáchequenehi. Ticamuirihapa ema rey eta mamuiriha tiúrina. Téjacapa ema Herodes te máejasirare. Téchajicapa.

<sup>22</sup> Tacahe, ena achaneana eta nasamirahi éma, tipiarcana. Nacahepa:

—¡Ema maca téchajicahi váhiya achanena! ¡Viya ema maca!  
—nacahepa eta nacunachirahi éma.

<sup>23</sup> Tacahe, tíjahúchavapa ema émana ángele mavaneruhi ema Viya máijaracapa eta majumahi ema Herodes Agripa. Taicha ema Herodes tímijachavahi Viya, máuricaipahi eta náejirairahi natsiusirahi ena achaneana. Eta tacahe, tanicapa eta vusanuana te majuhe. Tacapacapa.

<sup>24</sup> Tacahe, tavetijipaipaicha camurianapaipa ena achaneana tisuapaná etá máechajiriruvana ema Viya.

<sup>25</sup> Te titavanapa eta natuparahahi ema Bernabé ema Saulo, tichavanavarepa te avasare Antioquía. Námapa ema Marcos.

## 13

*Ema Bernabé émapa ema Saulo tépanavanapa tipaicana ticametarairuanayare*

<sup>1</sup> Ena téhicana ema Jesús ticavasanahi te avasare Antioquía, natiarihi te namuri ena ticametarairurahiana eta máechajiriruva ema Viya. Tímiturahianahi éna. Natarihihichaha ema Bernabé émapa ema Saulo. Natarihihivare ema Simón (ema náimijarechavare Negro), émapa ema Lucio (eta máuchusinehi te avasare Cirene), émapa ema Manaén (ema machajuruhi ema Herodes Antipas, machicha ema Aluresini).

<sup>2</sup> Étana sache, ticurujicanapa eta nayujarasirahi me Viáquenu. Náichahivare eta ayuna. Tacahe, máechajicavacapa ema Espíritu Santo. Máichapa:

—Ema maca Bernabé émapa ema Saulo, natupara haichuhi ticametara iruanaya taicha nunerejiruanahi éna. Évatasinanuya puiti ena nani apinana —máichapa.

<sup>3</sup> Tacahe, titsecavanapa ena apinana eta napaisiraya. Te tamutupa, tiápechavanapa nahayunacha namutu. Eta nayujara uchirahi, nanacapa eta navahuana te nápusiana ena tipaicanayare. Nayaseacapa ema Viya eta táurivainapahi eta napaisiraya. Tacahe, ticametavanapa. Tiyananapa.

*Ema Bernabé émapa ema Saulo tépanavanapa ticametara iruanaya te tiúrupuhi Chipre*

<sup>4-5</sup> Tacahe, ena nani ema Bernabé ema Saulo, mavane-ruanahi ema Espíritu Santo, tiyananapa te puerto ticaijare Seleucia. Máehicaphahivare ema Juan Marcos. Tímicatarcapahi nayehe. Tacahe, tiánuecanainapa nacaijuheya eta tiúrupuhi ticaijare Chipre. Te títecapanapa te puerto ticaijare Salamina, tiyananapa eta te náurujisirárevana ena israelítana (taicha tamutu avasareana tatiarihipahi eta nayehe sinagoga). Ticametara iruanapa eta máechajiriruva ema Viya.

<sup>6</sup> Tamutu napaica eta táichapevahi eta tiúrupuhi. Títecapanapa te avasare ticaijare Pafos. Ánaqui matiarihihi ema émana israelíta ticaijare Elimas Barjesús. Iápemare ema maca. Tépiyahirahivare tímijachavahi máimati ema Viya.

<sup>7</sup> Ema maca iápemare macachanejiricahi ema Prefecto Sergio Paulo. Ema maca Prefecto, téchemarahi. Tásicha, máimivanerecapa náichuhapana ema Bernabé émapa ema Saulo, taicha mavarahahi masamaya eta máechajiriruva ema Viya.

<sup>8</sup> Émasera ema maca iápemare macatianacavacapa éna. Mayurucapa ema Prefecto eta vahi macusuapa eta máechajiriruva ema Viya.

<sup>9</sup> Tacahe, ema Saulo (éma ticaijarehi puiti Pablo), mávaháruquenehi ema Espíritu Santo, máimamaracapa ema iápemare.

<sup>10</sup> Tacahe, máichapa:

—¡Tivayuarahitataji matsiri araira! ¡Piti machicha ema Váinaraji! ¡Piti picatianaca tamutu eta táuri queneana! Piti píchejimiráuchavacahi ena tivarahana téhicana ema Viáquenu. ¡Pínajica eta juca pivainarajivahi!

<sup>11</sup> Puiti ema Viya tícuñacaviyare. Púchuquiviyare máicha. Tiyereyare eta vahi pímahaimahi eta tajaraiva eta sache —máichapa ema Pablo.

Jéhesaréinehi, tíjhúchavapa témaha eta máimairisira, púchuquipa ema iápemare. Tacahe, matanucapa ena tichurucanaya te mavahu.

<sup>12</sup> Te máimahapa ema Prefecto eta juca, tipicarinehi. Tásiha, masuapapa eta masamirahi eta náimiturapiana ena apóstoleana mayehe ema Viáquenu Jesús.

*Ema Pablo émapa ema Bernabé tiyananapa tayehe eta avasare ticaijarevare Antioquía Ichipichu*

<sup>13</sup> Tacahe, ema Pablo énapa ena macompañeroana tiávacuhanapa. Najunijicapa eta Pafos. Tiyananapa tayehe eta avasare Perge táunavahi eta provincia Panfilia. Te títecapanapa te Perge, eta jena sácheinahí, ema Juan Marcos majunijicavacapa éna. Tichavapa te Jerusalén.

<sup>14</sup> Éna, tiánucuhananapa nacaijuhepa eta avasare Antioquía Ichipichu te tinapaica eta Pisidia. Te títecapanapa, te apanapa sache sávaru, tisiapanapa eta te nárujisirareva ena israelítana eta nayujarauchirahi. Téjacanapa.

<sup>15</sup> Tacahe, tisiapanavarepa ena tuparairucana tayehe eta nárujisirareva. Náechajicuhapa ánipi eta Sagrada Escritura májurehi ema Moisés etapa eta nájurehi ena profetana. Te tamutupa eta náechajicuirahi, nayaserecapa ena araitecapianahi. Náichapa:

—Viparapenaveana, te tatiarihipuca eta échajishayare consejo viyehe víti, táuricapa econsejachahavipa —náichapa.

<sup>16</sup> Tacahe, ema Pablo titupihapa. Macanuquechapa eta mavahuana eta máechajisirayarehi, mavarahahi tauri eta nasamiraina (taicha tacahehi eta nayeherepi). Ánipa macahe:

—Esamanuchaha, nuparapenaveana israelítana. Étipa eti epicaurahianahi mayehe ema Viya.

<sup>17</sup> Ema Viya vicasiñaquenehi viti israelítana manerejicavacahi ena viáchucanaveánaini. Te návihaichaha te apanaqueñe avasare ticaijare Egipto, macaejapacavacahi ena nachichanaveana. Énerichuvare, te máiputsicavacapa te jena avasare návinénihi, máimerecapahi eta máitupajijiasi-ravahi máimicatasiravacapahi éna.

<sup>18</sup> Tásihasera, cuarenta año eta macamichirahi ema Viya eta náejecapirávana tayehe eta návihirahi te mávapahi vámahi.

<sup>19</sup> Te taequenepa, macamitiequenehavare eta siétequene avasareana ena apánapanéjiqueneána ticavasanainihi te Canaán. Tásiha, máijaracapa ena viáchucanaveanaini eta jena apaquehe natuparahaquenehi maicha ema Viya.

<sup>20</sup> Tacahe, 450 año eta majaneasiravacahi, mavanecapa ena juéseanaya téchapajirícanayarehi. Tacahe, tiámainucavapa te tijurucapa ema profeta ticaijare Samuel, máequeneréruhi nayehehi juez.

<sup>21</sup> Tacahe, éna nayaseacapa ema Viya ema nayeheyarehi rey. Tásiha, máijarasihapa ema Viya ema nayeheyarehi

rey ticaijare Saúl, machicha ema Cis, mámariéquenéni ema viáchucaequeñeni Benjamín. Cuarenta año eta macatupara-hairahi.

<sup>22</sup> Te tääequenepa, ema Viya máitsivachapa ema Saúl. Ticaijarapa ema David, émapavapa reyhi. Taicha macahepa ema Viya: “Nímararacahi ema David, machicha ema Isaí, núcrica eta máurivahi. Taicha máitauchayare tamutu eta nuvanairipianaya” macahepa ema Viya.

<sup>23</sup> Tiuri, eta máechajiriruvahi ema Viya, matiarihiyare ema émana mámariequeneyare ema maca Davíd tiúchucayarehi ema Ticatiurahiyare viyehe viti israelítana. Puiti vimetacahe eta máimeresiravaipa ema Jesús ema Ticatiurahiquene viyehe.

<sup>24</sup> Te tamirahupaichaha eta máimeresiravayarehi ema Jesús, ticametarairuripa ema Juan nayehe ena achaneana vijaneanana israelítana. Mavanecapahi eta náneuchiravaina náinajisiraina eta napecaturana, étapa eta nacaicachasiraina. Títecapapa eta sache máitauchiraipa ema Juan tamutu eta mavanahianahi me Viya. Ticametarairurichaha ema, máichavacapa ena achaneana:

<sup>25</sup> “Ímijachaipapuca nútihí ema Cristo, ema vicuchapaqueñehi. Váhira nútina. Títecapainapasera éma, téhicanupahi te néquene. Malayarinehi núti nácutinasihini eta máitupajijiasiravahi éma. Váiparinehi nácaemuñavaimahi macamusuranuhini nuti páuresami” máichavacapa ema Juan.

<sup>26</sup> Esamanuchaha, emutu eti nujaneanana, eti nucutiqueñeanahi eta mámariequenerahavihi ema viáchucaini Abraham, étipa eti apamuriana epicaurahianahi mayehe ema Viya. Ema Viáquenu tivanecahavi vimetacaheyare yátupina eta iúchucuirayare éti apanava, te ecasiñava me Jesús.

<sup>27-29</sup> Máchusera ácutihini ena tuparairucana te Jerusalén, énapa ena ticavasanahi te jena avasare. Tamutu eta sávaruana eta nárujisiravana, náechajicuhaparacahi eta libro nájuchaquenehi ena profetanaini. Váhisera nácaicutiarahini. Eta tacahéhi, vahi náimatihini ema Jesús eta émairahi Cristo. Váhivare najacapahini. Éma, tájinahnéni matapiravainahini taviuchahini eta táimicpacahini. Énasera nayaseacapa ema Pilato eta máimicapasiraya. Tacahépa masuapapa éma eti nayasearapihi. Tásiba, te titauchavapa eti nacpasirahi, ena máimitureana nacucupaicapa te macurusura, nácarapa. Tacahéhi eti taitauchiravahi tamutu eti nametarapiana ena profetanaini eti máicharacavayarehi ema Cristo eti máepenirahi, taicha tacajuquenehi éta te Sagrada Escritura.

<sup>30</sup> Émasera ema Viya macaechepucahi te máecari.

31 Tacahe, camuri eta sácheana máimeresiravahi ema Jesús nayehe ena máimitureana, ena nani macachanevacapahi te másihapa te Galilea, téhepa te tiyanapa te Jerusalén. Ena nani tímahanahi, énara ena téchajisihanahi puiti eta máechepusirahi.

32-33 Acane, ema Viya macametarapihi nayehe ena viáchucanaveanaini eta macucupaisirayarehi ema Cristo. Títauchavaipahisera puiti eta máechajiriruvahi taicha vímatiripa ema Cristo viti nachíchanavéqueneana. ¡Tímerecavaipa ema Jesús, émairahi yátupiquenéhi Cristo manerejiruhi ema Viya! Máimerecapa ema Viya ema Jesús eta émairahi yátupiquenéhi Cristo, taicha macaechepecuahi te máecari. Étara tímitecahavi vimetapanaha eta juca táuriqene téchacareana. Étara tacayemaquenéhi eta máechajiriruva ema Viya eta te Salmo 2, ánipa macahehi: “Pítira nuchichavi. Puiti jena sache, nímimatichaviyare nayehe ena achaneana eta nuchichairavihi eta nucaechepusiravihi te pécarí” máichapa.

34 Eta máechepusirahi ema Jesús te máecari, vaipa tiápechavaimahi tépena. Taicha máechajicahi ema Viya ena israelítana, ánipa máichahi: “Níjaracaheyare ema máuriquene Iáquenuyare. Éma ticatiuchaheyare tamutu sácheana. Máihecuaraqureyare eta ítaresiraya máicha, eta ecachanerayare éma. Taicha níjararuvahi eta juca néchajiriruvahi mayehe ema David” máichapa ema Viya.

35 Énerichuvare, acane ema Cristo macahehi eta máechajiriruvahi te apana Salmo: “Vahi písapaimahi témitiequeneha eta náquehe nuti pichicha pémunaruquenéhi” máichapa.

36 Tiuri, ema David, yátupihi eta máechapajirisiravacahi ena machanerana. Te títecápapa eta matuparahahi mayehe ema Viya, tépenapa ema David. Tacahe, náecarapanapa éma. Tépachaicavahi eta máeche te máecari.

37 Émasera ema Jesús vahi táepachaicavahini eta máeche te máecari taicha macaechepecuahi ema Viya.

38 Nuparapenaveana, nuvaraha numetacahe puiti apaesa ímatiéqueneha. Ema Viya mavaraha tiperdonachahe eta epecaturana te ácasíña ema machicha Jesús.

39 Viti israelítana, ichape eta véjecapiravahi me Viya taicha vimaitauchirahi eta viyeherepiana máijararuuhavihi ema Moisés. Téhesera véhica puiti ema Jesucristo, viperdonachacareya víti mayehe ema Viya.

40 Tásicha puiti, ecaunevayare éti, machu ácutiriana ena achaneanaini máechajiruanahi ema Viya eta acane. Ani máichahi:

41 “Ímahayare, eti épurunuanahi nútì. Núti níchayare eta tiáramicaré te emirahu te juca sácheana. Te nímimetacahepa

eta juca, váhiquene esuapahini éti. Tásiha, tapaenumavainapa te ímahapa eta níchaqueneya, iáraminapa. Nímatihesera eta emásuapajiráivanahi. Épenainapa táicha” máichapa ema Viya.

<sup>42-43</sup> Te tamutupa eta máechajisirahi ema Pablo, nayaseacapa ena achaneana, ánipa naicha:

—Picatajicahavi. Piápechahavini pímitucahavi eta juca te apanainavare sávaru —náichapa.

Te tiúchucanapa eta te náurujisirareva, tiyananapa ena apinana apóstoleana eta te náitecapihahi. Náehicapa ena camuriana israelítana, énapa ena apavasanana tépiyacavanaripa israelítana taicha napicauchaipa ema Viya. Ticaimituca-sianapa táurivaina eta najicapiraya eta máurivahi ema Viya, nacasiñairava me Machicha Jesús.

<sup>44</sup> Te apanavarepa sávaru, namutuyareni ena achaneana ticavasanahi te avasare tiúrujicavana nasamararacayarehi eta máechajiriruva ema Viya mametarapiyarehi ema Pablo.

<sup>45</sup> Énasera ena israelítana masuapajirairahanahi, te náimahapa eta natiarahirahi ena apavasanana, tisemanapa eta mametasiravacahi ema Pablo eta najacapacarevahí me Viya éna apanava. Eta tacache, nácapaemachapa ema Pablo, nacajachacha.

<sup>46</sup> Te nasamapa ema Pablo émapa ema Bernabé eta náichirahi ena tictorianacanahi, tájina vahi nayútutuémahini. Náichavacapa:

—Tatuparacahi étivayarehi eti vijaneanana vímitucahe eta juca máechajiriruva ema Viya. Étisera vahi iúricahini eta esamirahi, váhivare ésachahini ésenica eta mávasa ema Viya. Tacache puiti, énainarinepuca vímitucavacaya ena apavasanana.

<sup>47</sup> Taicha víti vivanecasivahi me Viya. Vítouchayare eta juca mavanairipi, ani macahehi: “Nutuparacavyare píti pipaicayare tamutu avasareana te juca apaquehe. Picametarairuyare eta néchajiriruvana nayehe ena achaneana eta nucuchucuiraya nácani tisuapanuanaya” —macahepa ema Pablo.

<sup>48</sup> Te nasamapa eta juca ena apavasanana, tiúrisamu-reanapa. Tásiha, nacahepa:

—Tétavicavapa táurinava eta juca máechajiriruva ema Viya —nacahepa.

Énerichuvare, nasuapapa ena máichuhaqueñeanahi ema Viya eta náitaresiraya máguecuaraquireya te taequenenapa eta náepeniraya.

<sup>49</sup> Tacache, ena tisuapanaripa nacometarairuvare eta máechajiriruva ema Viya nayehe ena achaneana ticavasanahi te tachacayarahana eta avasare Antioquía Ichipichu.

<sup>50</sup> Nararihihisera ena tictorianacanahi ema Pablo émapa ema Bernabé. Israelítanahi éna. Tacahe, náimitucapa ena tuparairucana te avasare, énapa ena ésenana ticapicahucreanahi, téhicanahi eta nayeherepiana ena israelítana. Énerichuvare napamicapa ena achaneana, navarairahi náquijicaya tayehe eta avasare ena apóstoleana. Jéhesareinehi, ticuticacanapa eta nacatichiravacahi, nacuchucavacapa ena apinana.

<sup>51</sup> Tacahe, eta nayanirayarepa ena apóstoleana, náetatapevachavaca eta náeparupevana te namirahu ena tictorianacanahi. Táicutiarahi eta namáimitucacárevahí éna, tájinavarepa tímiapechaimahi náimitucavacahini. Tacahe, tiyananapa nacaijuhepa eta te avasare Iconio.

<sup>52</sup> Énasera ena apamuriana téhicanaripa tímiyanavanapa eta nasuapirohi ema Viya. Tiúrisamureanahivare éna taicha eta mávahásirahi ema Espíritu Santo.

## 14

### *Ema Pablo émapa ema Bernabé títecapanapa eta te Iconio*

<sup>1</sup> Tacahe, títecapanapa ema Pablo émapa ema Bernabé eta te avasare ticaijare Iconio. Tiyananavare natupiru eta te nárujisirareva ena israelítana. Ticámetaráruanavarepa. Tacahe, camurianavare ena achaneana tisuapanahi eta nametarairuhi: ena israelítana énapa ena apavasanana.

<sup>2</sup> Váhisera téjiacavana ena apamuriana israelítana masuapajirairahanahi. Nayurucavacapa ena apamuriana achaneana apavasanahi. Navarahapa náimiyusemacavaca. Navarahahivare ticuticacanayare nacatichavaca ena téhicanaripa ema Viya.

<sup>3</sup> Eta tacahe, nanasipanapa ena apóstoleana. Vahi nayanavanhini. Tiyerehi eta náimituresirahi, taicha navarahahi náetumechavacaya eta nacasiñairahi ema Viya. Tacahe, ema Viya máimicatacavacahi. Máijaracahi eta náichiraya eta tiáramiccareana. Eta juca, máicutiarahi eta mavanesiravacahi eta nacametarairuirayarehi eta majacapiravacahi nácani achaneana ticasifavana mayehe.

<sup>4</sup> Tásicha, típutsimurihavanapa ena achaneana ticavasanahi tayehe. Ena apamuriana náehicapa ena israelítana masuapajirairahana. Ena apamuriana náehicapa ena apóstoleana.

<sup>5</sup> Tacahe, ticuticacanapa eta napanereruana ena apavasanana énapa ena israelítana énapa ena náquenuruuhana, eta nacajachiraya ena apóstoleana. Navarahapa nacapacaya natupisicaya te márijahiana.

6-7 Énasera, ema Pablo émapa ema Bernabé, te nasamairicapa, tijunanapa nacaijuhepa eta te provincia ticaijare Licaonia. Ánaqui ticametarairuanapa tayehe eta avasare Listra, tásicha, tiyananavarepa te avasare Derbe, étapa te avasareana tachacayarahahanahi.

*Ema Pablo macanaracahi ema masari ticavasahi te avasare Listra*

8 Te jena avasare ticaijare Listra, matiarihihi ema émana achane masarihi eta máitaresirahi. Vahi táurihini tipaica, taicha máimiuchurehi eta mamasarivahi.

9 Macaheripa ticasamarahihi éma eta mame tarairuhi ema Pablo. Tacahe, ema Pablo máesenicapa, máimatiacapa eta macasiñavairahi ema masari mayehe ema Viya macanarasirayarehi.

10 Tacahe, ema Pablo mapiaracapa:

—Péchepuca píti. Pétumecha eta jara piápeana. Pitupiha —máichapa.

Eta masamairahi eta juca ema masarini, enevanepa téchepuruca. Titupihapa. Tipaicapa.

11 Eta náimairahi ena achaneana eta macanarasirahi ema Pablo ema masarini, náraminehi ichape. Tipiaracanapa te náechajiriruvaichu, ánipa nacahehi:

—Víyana ena nani. Achanemahianahiséra eta náimahi eta náucupauchirahávihi.

12 Ema maca ticaijare Bernabé, émara Viya Júpiter. Ema maca apava ticaijare Pablo, émara Viya Mercurio taicha ema ticametarairurahi —nacahepa.

13 Tiúri, tatiahihi eta peti te tasiaparacu eta avasare, mayujarasirarehi ema achane tavanarahi eta nasiñaraji ticaijare Júpiter. Tatiahihivare eta apina turu mamansurehi. Tacahe, ema maca achane máepanapa eta turu. Mayeheheacapa eta flure taicha mavaraha macapacayarehi eta turu. Máijara casichayarehi ema Pablo émapa ema Bernabé. Énerichuvare ena achaneana navarahahi náejirayarehi ena nani apinana apóstoleana taicha náimijachaipa énaripa ena nasiñarajianahi.

14 Étasera te nasamairicapa ena apóstoleana eta náichirayarehi, ichape eta náeñamirava. Tiúchucanapa, nasiapamu riropa ena achaneana. Tipiaracanapa, ánipa nacahe:

15 —¡Tátanaveana, mémenaveana! ¡Váhirine táurihini eta juca íchirayare! Vítirichu ecutiqueneana achaneana. Tímitecahavihi vimetapanaha ínajica eta juca eyeherepianahi. Taicha vahi tiuri, tamapurijihi eta eyeheheasiraparacahi eta esíñarajiana. Ínajicaya eta juca. Éhicayaresera ema Viya, ema yátupiquenuehi tisamahavi. Éma tépiyacahi eta anuma, eta

apaquehe, eta ichapequene mar. Tétupiricahi tamutu eta vímahaqueneanahi puiti.

<sup>16</sup> Ánaquiaripa eta macamichirahi ema Viya eta náichirahi eta navarahaqueneana ena achaneana.

<sup>17</sup> Máimerecahinénisera eta émairahi tépiyaca eta juca táuriqueneana. Tíjaracahavihi eta tiquiva. Tiúrinachayare eta sucurecana vinicaqueneana máicha. Máijarasirahavihi tamutu eta vicamunuqueneana. Ticurisamurechahavivare. Eta tacahe, ímatiquenéha yátupina eta émairahi Viya esiñarajiya –náichapa ena apóstoleana.

<sup>18</sup> Eta tacahehi, nametacaripahinéni eta tamaurivahi eta juca navarahaquenehi naicha. Énasera ticamesavanrichucha eta navarairahi ticaparecana eta túruana. Váhiqueséra náisapahíni ena apóstoleana náichahini eta juca.

### *Natupisicapa te márijahiana ema Pablo*

<sup>19</sup> Tayerevahi eta sácheana, títecapanapa ena israelítana tiásihanahi te Antioquía Ichipichu étapa te Iconio. Éna ticati-nacanahi ena apóstoleana. Nayurucavacapa ena achaneana, náimiyusemacavacapa. Eta nachimapirahi ema Pablo te calle, natupisisihapa te márijahiana. Náquipaicapa. Eta náimairahi máquipaisiravahi, náimijachaipapuca tépenahi. Nachururupaicapa náquijicayarehi te tachachacu eta avasare.

<sup>20</sup> Tacahe, tiyananapa ena machamuriana ema Pablo, náimahapanayarehi. Te náitecapauchapa, nárujiacaripa. Émasera téchararahaipa téchepucapa. Máehicavacapa tiyanapa eta te máitecapihahi. Te apanapa sache, tiyananapa ema Pablo émapa ema Bernabé te avasare Derbe.

<sup>21</sup> Te títecapanapa tayehe eta avasare Derbe, nanasipanapa tayehe. Ticametarairuanahi eta máechajiriruva ema Viya. Camuriana ena tisuapanahi téhicanahi ema Jesús. Te tamutupa eta náimitusiravacahi, tiyananavarepa tichavanapaipa eta te avasareana náimituresinepahi eta te Listra, te Iconio, étapa te Antioquía Ichipichu.

<sup>22</sup> Eta te juca avasareana, náimitucavarepa ena téhicanaripa ema Jesús. Náetumechavacapa eta táurivaina eta náehisiraya ema Viya. Náichavarepa:

—Vahi ecuarameca eta nacatianasiráhe ena achaneana táchavene eta éhisira ema Viáquenu. Ecamichachucha tamutu. Échava eta esiapiraya eta mávasa ema Viya –náichapa.

<sup>23</sup> Énerichuvare, natanucapa ena nayeheanapachu pastor nácani náijamuripachu. Téchanayarehi eta nayujara-sirana. Tacahe, natuparacapa eta návacureanaya. Te tamutupa eta natuparasiravacahi, tiyujaracanapa nahayunacha-

varepa, nayaseacapa ema Viya eta majaneasiraina táurivaina eta náehisiraya namutu ena ticasíñanaripa ema Viya.

*Ema Pablo, ema Bernabé tichavanavare tayehe eta avasare Antioquía*

<sup>24</sup> Tacahe, tiyananapa ema Pablo émapa ema Bernabé, tétavajicanapa eta te avasarechichana tayehe eta Pisidia. Náitecapirapa tayehe eta avasare Perge táunavahi eta provincia Pamfilia.

<sup>25</sup> Ticametarairuanapa eta máechajiriruva ema Viya nayehe ena achaneana ticavasana tayehe eta avasare. Te tamutupa eta nacametarairuirahi, tiyananavarepa nacaijuhepa eta Atalia.

<sup>26</sup> Étapa návacuinehi eta nánuesiraya eta mar, nacaijuhepa eta avasare Antioquía. Tichavanapa tayehe eta juca avasare náuchusinehi te ticavanahianapa mayehe ema Espíritu Santo. Étarichuvare nayujarauchinehi ena nachamuriana eta majaneasirayare ema Viya ena apóstoleana eta napaisirayare. Puiti eta juca náitauchaquenéipa eta náematanehi.

<sup>27</sup> Eta náitecapiraipa, nacurujicapa ena nachamuriana. Nametacapa tamutu eta máimicatasiravacahi ema Viya tayehe eta napaisirapahi. Étapa eta majacapiravacahi ema Viya ena apavasanana eta nasuapiravacahi nacasiñairahi éma.

<sup>28</sup> Tacahe, ema Pablo émapa ema Bernabé, tiyerehi eta nanasirahi nacachaneravacahi ena nachamuriana.

## 15

*Ticurujicacanapa te Jerusalén. Ticaechacasinapa eta panererucanahi.*

<sup>1</sup> Te jena sácheana, títecapana te Antioquía ena apamuriana israelítana, tiásihanahi te Jerusalén. Navarahapa nahapapiricavaca ena apavasanana téhicanaripa ema Jesús. Ánipa naicha eta náimituresirahi:

—Te evaraha iúchucuha eta ícuñayaréni, tacamunu ítauchayare eta mavanairipihi ema Moisés eta vicamarcairaya\* —nacahepa.

<sup>2-3</sup> Émasera ema Pablo, émapa ema Bernabé nacapaemachavacapa muraca ena tipamicanahi ena apavasanana eta nacamarcairahi. Ichape eta nacapaemachiracacahi. Tacahe, ena nachamuriana navarahahi náetupirica eta juca. Tásahi,

---

\* **15:1** Eta mavanairipini ema víyarahaini Moisés ticamarcanayarehi namutu ena amuyana ajairana israelítana. Éta tímereuchayarehi eta yátupiquenerahi israelítana. Te juca, ena napaipiruanahi tiásihanahi te Judea, navarahapa nacamesaequeneha nacamarcavaya ena ajairana ichanaruhanaripa, apavasanahanhivare.

natuparacapa ema Pablo émapa ema Bernabé, nayanahini eta te Jerusalén. Eta ánaqui, ticaechacasiyarehi nayehe ena apóstoleana énapa ena náiyarahahanahi. Náevatacavare ena apamuriana téhicanarepahi ena apinana.

Tacahe, eta napaisirapahi te achene, tétavajicanapaipahi tayehe eta avasarechichana táunavanahi eta Siria, étapa te Samaria, návihahi ena apamuriana nachamurianahi. Nametacapaipa eta náinajisirahi ena apavasanana eta nayeherepianaini tamauriqueneana, taicha eta náehisiraipa ema Jesús. Tacahe, ena nachamuriana, eta nasamairirisirahi eta juca, tiúrisamureanarinehi éna.

<sup>4</sup> Tacahe, eta náitecapirahi eta te Jerusalén ema Pablo émapa ema Bernabé, ena apóstoleana énapa ena náiyarahahanahi pastoreanahi nacurujicapa ena nachamuriana eta najacapiraya ena araitecapianahi. Tacahe, ena apinana nametacapa eta máimicatasiravacapahi ema Viya eta napaisirapahi éna.

<sup>5</sup> Natiarihivare ena religíosoana téhicanarípahi ema Jesús. Titupihanapa éna. Téchajicanapa, ánipa nacahe:

—Táitaurevaquene tacamunurichu nacamarca ena apavasanana téhicanaripa ema Viáquenu Jesús. Tacamunuhibare nacaravahu náehica eta juca mavanairipianahi ema Moisés —nacahepa.

<sup>6</sup> Tacahe, te apanapa sache, tiúrujicavanapa ena apóstoleana énapa ena náiyarahana. Navarahapa náetupirica eta juca.

<sup>7</sup> Nacaematanearcaripa eta juca náechajisihahi. Tacahe, titupihapa ema Pedro. Máichavacapa:

—Nuparapenaveana, écharichuhi éti ánaquiaparipa eta manerejisiranuhi ema Viya eta nucametarairuya eta nayehe ena apavasanana eta náuchucuirayarehi táichavenénahi eta nasuapiroare ena apana.

<sup>8</sup> Ema Viya máimatihi eta nasumureana ena apavasanana eta nasuapirohi. Tásiba, máimerecahi eta majacapiravacahi eta mávahásiravacahi ema Espíritu Santo tacutihi eta mávahásirahavihi víti.

<sup>9</sup> Ema Viya, nájina manerejiruina eta máemunasirahavi. Témunacahavihi vimutu: viti israelítana, énapa ena apavasanana. Eta tacahehi, masípasinavacarípa eta nasumureana éna táichavénehi eta nasuapirohi.

<sup>10</sup> Étisera evarahapa épuruyare eta máichaqueneanahi ema Viya. Ticajeraequenepa eta véhisirainahini eta nayeherepiana ena viáchucanaveanaini. Énaripa vahi náitauchapahini tamutu eta nayeherepianapahi. Vítiripa váhivare váratahahini vítauchahini. Tacahe, váipa táuricahini vécatihavacahini ena vichamuriana apavasanana náichahini eta juca.

11 Vécharipahisera yátupi eta viúchucuiraya táichavénehi eta macatajisirahavihi ema Viáquenu Jesucristo. Viti israelítana, vahi étaparacaina eta vicamarcairahi. Ena apavasanana, váhivare étaparacaina eta tájinairahini namarcainahini — máichapa ema Pedro.

12 Tacahe, timatinanapa namutu. Nasamararacaripa ema Bernabé, émapa ema Pablo. Nametamurihana etá máimechirahi ema Viya eta mavanesiravacahi éna, taicha máijaracavacahi eta náichirahi eta tiáramiccareana te namirahu ena apavasanana.

13 Te titapiricanapa eta nametarapianahi, émapavapa ema Santiago téchajica. Macahepa:

—Nuparapenaveana, esamanuchaha.

14 Ema Simón Pedro timetacahaviripa te tépanavainapa majacapavacainapa ema Viya ena apavasanana machaneranayarehi.

15 Eta juca eta náechajisihaquenehi namutu ena víyarahaini profetana. Émaripa ema víyarahaini profeta Amos májuchahi eta juca máechajiriruvana ema Viya, ani macahehi:

16 “Te taequenénapa eta juca, nápechavaya núcupaicayare te juca apaquehe. Nétupiripanaya eta nupena táquipai-ruvahi. Tásiba, tiápechavanayare tiyujarauchuanuanayare ena achaneana, tacutiyare eta náejiriranuhi ena machaneranaini ema rey David. Tisuapanuanayareva.

17 Énerichuvare titanucanuanayare namutu ena apavasanana. Nuchaneranayareva éna, taicha námayare eta níjare”.

18 Étara eta juca macayemaquenehi ema Viya. Ánaquia-paripa eta mavairahи vicaicutiaraya eta juca.

19 Tímiyanava eta máechajiriruvana ema Santiago, ánipa macahe:

—Tiuri, eta juca eta nupanereruhi nútì: Tiúripa vésamicrivacachucha ena vichamuriana apavasanana náequeruvunaripa mayehe ema Viya.

20 Taratarichu vicajurevaca tametaca eta vaipa nacuapechava nacunica eta taeche eta sárare náijaracasiruana eta nasiñarajiana. Váhivare nacuveha súcani apana esena. Énaripa ena esenana, váhivare nacuveha ema apana achane. Váhivare nacunica eta taeche eta sárare namaechatinure. Étaripa eta táitine, váhivare nacunica.

21 Eta vimetacavacayare ena vichamuriana apavasanana eta juca, apaesa vahi nacusemaracavaca ena téhicanarichaha eta mavanairipiana ema Moiséini. Taicha ánaquiáparipa te avasareana eta náechajicuiraparacahi ena vijaneanana israelítana eta mavanairipiana ema Moiséini te náurujsiravana.

Puíticha nararihichaha ena náimicapicaucharichucha — macahepa ema Santiago.

<sup>22</sup> Tacahe, ena apóstoleana, énapa ena náiyarahana, énapa ena náumurivana, tiúrihi nasama eta mapanereruhi ema Santiago. Tacahe, ticavanahianapa ena apinana téchemarahanica ticapi-cahuanaahi, ema Judas Barsabás émapa ema Silas. Éna téhicanayarehi ema Pablo émapa ema Bernabé eta nachaviraya te Antioquía.

<sup>23</sup> Tiuri, eta juca táchajiruvahí eta carta. Ani tacahehi: "Vímiamareca eta juca véchajiruvu viti apóstoleana, énapa ena víyarahana, énapa ena vichamuriana te juca Jerusalén.

Vivaraha tativayare véchajicahe eti viparapenaveanahí te mavahuana ema Viáquenu: eti apavasanana tiávianahí te Antioquía, étipa eti tiávianahí te táunavanahí eta Siria étapa eta Cilicia.

<sup>24</sup> Visamairiricahi eta nayanirahí ena tiásihanahí ani te juca. Tiávajiriricaheanapa. Navarahahí nahapapicayare eta epanereruana. Ticamesaheanahí ítauchayare eta mavanai-ripiana ema Moisés eta ecamarcairaya. Váhisera vanairucanaina eta viyehe eta náimitusirahehi eta juca.

<sup>25-27</sup> Vévatacahi ema Judas émapa ema Silas, vanairucanahí viyehe. Éna, timetacaheanayare tamutu eta juca téchacareanahí viyehe. Ena nani téhicanapahi ema Bernabé ema Pablo, ena viparapenaveana vémunaruqueneana. Ema maca Bernabé émapa ema Pablo, tíjaracavanahí éna náepenacaya ema Viáquenu Jesucristo taicha eta nacometarairuirahí.

<sup>28</sup> Áni te juca víti, vicuticacahi eta vianerueruanahí, máimitusirahavihi ema Espíritu Santo. Vahi vávarahahini tacajeraequenehini eta éhisirayare ema Viáquenu.

<sup>29</sup> Tacarichu vimetacahe eta juca ticamunucarepana te mamirahu ema Viya:

1. Vahi ecunica eta taeche eta sárare nayujaraurehi ena achaneana te tamirahu eta nasiñarajiana.
2. Váhivare ecunica eta táitine eta sárareana.
3. Váhivare ecunica eta taeche eta sárare namaechatinure.
4. Váhivare ecuveha esu apána esena. Énerichuvare eti esenana, vahi ecuveha ema apána achane. Énerichuvare ímitucavaca ena echichanaveana tacuija eta natuhusivaina.

Te yátupina esuapa eta júcana, tájina íchiravaimahi te mamirahu ema Viya. Éma tímicatacaheyare tijaneacaheyareva tamutu sácheana. Tamutupa eta juca véchajiruvanahí eta eyehe".

<sup>30</sup> Tacahe, tiyananapa ena tiámana eta carta, nacaijuhepa eta Antioquía. Te titecapanapa ánaqui, nacurujicapa ena

nacaijuhequeneanahi nachamuriana. Náijaracapa eta námaquenepahi carta.

<sup>31</sup> Te najacapapa eta carta, navejiacapa. Náechajicuhapa te namirahu namutu ena nachamuriana. Tétavicavahi eta náurisamurevahí eta nasamirahi.

<sup>32-33</sup> Nanasipanapa jena cájeanahi ema Judas émapa ema Silas. Éna, énerichuvare eta titúcanahi eta máechajiriruva ema Viya. Tiúrihi eta náimitusiravacahi ena nachamuriana. Naconsejachavacahi, náetumesámurechavacáinehi náicha. Te tamutupa eta náimituresirahi, tichavanayarepa nayehe ena tivanecanahi. Tacahe, ena nachamurianahi náechejiemachavacapa. Nayaseacapa ema Viya táurivainapahi eta napaisiraina.

<sup>34</sup> Émasera ema Silas mavarahapa manasiyare.

<sup>35</sup> Énerichuvare, ema Pablo émapa ema Bernabé nanasivarepa tayehe eta avasare Antioquía. Tímiyanavanapa ena tímiturecana nayehe ena nachamuriana. Ticametarairuanavare nayehe ena apamuriana achaneana. Natiarihivare ena apamuriana tímicatacanahi.

*Tiápechavánavare tiyanana ena apóstoleana te avasareana*

<sup>36</sup> Te taequenepa eta juca semananahi, ema Pablo máichapa ema Bernabé:

—Viyanavare viápechava vipaica tayehe eta avasareana, végiravacapahi ena vichamuriana te vipaisineanapahi cape juca te tínapucainapa viyanahi. Vímaha tájahapuca náicharcavahi —máichapa.

<sup>37</sup> Tacahe, ema Bernabé tísapavahi tiyana. Mavarahapasera mama ema Marcos.

<sup>38</sup> Émasera ema Pablo vahi mávarahahini mayanahini ema Marcos. Taicha te tínapucainapa tipaicana manaquimurihahi ema Marcos te avasare Perge tayehe eta Panfilia. Vahi máimicatakahíni tayehe eta náemataneanapahi.

<sup>39</sup> Nacaemataneacaripa eta mamavarairahi mayanahini ema Marcos. Tacahe, tínajicacanapa. Ema Bernabé tiyanapa, macachanehi ema Marcos. Tiávacuhanapa, nacaijuheyarepa eta tiúrupuhi Chipre.

<sup>40</sup> Tacahe, ema Pablo mapanerechapa mámayare ema Silas. Te tétupiricavanapa, nayujarauchanumapa ena nachamuriana. Nayaseacapa ema Viya eta máimicatasirainapahi eta napaisiraya. Ticametavanapa tiyananapa.

<sup>41</sup> Eta napaisirapahi te achene tétavajicanapaipa tayehe eta avasarechichana Siria étapa te Cilicia. Náejiravacapaipa ena nachamuriana natarihiqueneanapahi. Náetumesámurechávacapáipahi.

# 16

*Ema Timoteo máehicavacapa ema Pablo, ema Silas*

<sup>1</sup> Tacahe, ema Pablo émapa ema Silas náejiravacapaipa ena nachamuriana ticavasanahi te Derbe. Tásicha, tiánucuhana-varepa te Listra. Ánaqui te Listra matiarihihi ema Timoteo, suchicha esu ésuna esena israelíta, téhicahivare ema Jesús. Émasera ema maiya, apavasanahi griego éma. Ema maca Timoteo émarichuvare téhicahi ema Jesús.

<sup>2</sup> Énerichuvare, nacunachahi eta máurivahi ena machamuriana ticavasanahi te Listra énapa ena ticavasanahi te Iconio.

<sup>3</sup> Tacahe, ema Pablo mavarahapa mámayare ema Timoteo eta napaisiraya. Tacahe, mavanecapa macamarca\* apaesa tacuija nacucayema ena israelítana ticavasanahi tayehe eta napaisihayare. Taicha náimatihi éma eta machichairahi ema apavasanahi.

<sup>4</sup> Tacahe, tiyananapa. Náejiravacapaipa ena nachamuriana te tamutu avasareana. Nametacapahi éna eta táechajiruvapahi eta carta náimiamareruhivare ena apóstoleana énapa ena náiyarahana tiávihanahi te Jerusalén.

<sup>5</sup> Ena nachamuriana, eta nasamirapahi eta mame tarairu ema Pablo, tétumechacacanapaipa eta nasuapajiraivapahi. Tamutu sácheana ticajanemuriánapáichucha ena téhicanapahi.

*Ema Viya máe chajicahi ema Pablo mayana eta te Macedonia*

<sup>6</sup> Tiuri, ema Espíritu Santo mame ta cahi vahi nacuyana eta te tinapaicahi eta avasareana te Asia. Tásicha, náetavicapa eta avasarechichana táunavanahi eta Frigia (ticaijarehivare Galacia).

<sup>7-8</sup> Nacaijuheyarehi eta provincia ticaijare Bitinia. Téhesera te tiánehianapa, ema Espíritu Santo mavanecavarepa vahi nacuyana tayehe. Tacahe, náetaviequenehapa. Tiánucuhana pa tayehe eta táunavahi eta Mísia. Náitecapirapa te puerto ticaijare Troas.

<sup>9</sup> Te jena yati, máimahapa ema Pablo te mavapure ema émana achane ticavasahi te tinapaica te Macedonia. Titupihahiji éma. Máichapaji eta máe chajisirahi:

—Picatajicahavi, piáneua te juca viávihahi Macedonia. Pímicatapanahavi —máichapaji.

\* **16:3** Eta juca nayeherepi eta nacamarcairahi ena israelítana, te tiúchuca ema amuya ajairachicha, te óchopa sache eta máuchusirahi, namarcachayarepa. Éma-ripa ema Timoteo ichanaruipahinéni. Émasera ema Pablo macavanairipipa macamarcahivaréni éma apanavare, apaesa tacuija nayunacahi ena israelítana.

<sup>10</sup> Eta máimairahi ema Pablo te mavapure eta juca, enevanepa vétupiricavapa eta viyaniraya tayehe eta Macedonia, taicha vémeteacahi eta mavarairahi ema Viya eta viyaniraya eta ánaqui, vicametarairuirayare.

*Títecapanapa te avasare ticaijare Filipos*

<sup>11</sup> Tacahe, viávacuhapa eta te puerto Troas. Viyanapa tayehe eta tiúrupuhi ticaijare Samotracia. Te apanapa sache, vítecapapa te Neápolis.

<sup>12</sup> Viúcupaicapa viyanapa te avasare Filipos. Eta juca avasare nayehe colonia ena romanoana. Eta ichapepanahivare tayehe eta avasarechichana tinapaicahi eta te tacunahu táuchusine eta sache eta Macedonia. Vinasipanapa tayehe te jena sácheana.

<sup>13</sup> Te jena sache sávaru, viyanapa eta te nayujarasirarehi te tachachacu eta avasare te tachaui eti cajacure. Véjacapa tayehe. Vicametarairupa nayehe ena esenana náurujiruvanahi tayehe.

<sup>14</sup> Sutiarihi esu ésuna esena ticaijaruhi Lidia. Ésu, tiásihai eta avasare eta suchusinehi. Esu suca tíjararecarahi eta yérerucava sédana mularumeana. Ésurichu, tipicaurahi me Viya. Susamararacaripa eta mametarairuhi ema Pablo. Ema Viya mavejiasinaipa eta susamure sujacapirayarepahi eta mametarairu ema Pablo.

<sup>15</sup> Enevanehi ticaicachasihi esu esena énapa namutu ena tiávihanahi te supena. Tacahe, suvarahapa tiámahavi eta te supena. Sucahepa:

—Te esuapapuca eta yátupirahi eta néhisirahi nútì eñi Viáquenu Jesú, ítecapauchanupaini te nupena —sugahepa.

Tásicha, ticamesahavipa tiámahavi te supena. Tacahe, vísapavapa vélida.

<sup>16</sup> Te apava sache, te viápechavavarepa viyana tayehe eta nayujarasirare, vicainunapa esu ésuna amaperu mávaháruhi ema éreana. Tijaraauquihi ésu máicha. Esu suca amaperu vanaracahi. Ichapemurihi eta plata suvachanahi, suíjaracapahisera ena suáquenuanu.

<sup>17</sup> Te tímahahavivare viánucuha, téhicahavivare esu suca amaperu. Tipiaracapahi te véquene. Ánipa sucahe:

—Ena nani ajairana ñivanaranana eñi Viya Viáquenu vimutu viti achaneana. Náechajisiavare eta eyehe eta achene ticaijuhe ñe Viya nayanihayare ena náuchucureanayare —sugahepa.

<sup>18</sup> Ichapemuri eta sácheana eta suéhicairirisrahavihi. Mapuñacapa ema Pablo. Téquerucavapa. Tásicha, máichapa ema éreana ema tiávahácahi ésu:

—Te máijare ema Náquenu Jesucristo, nuvanecavi piúchuca te suáquehe esu suca amaperu —máichapa.

Enevanepa tiúchuca ema éreana. Majunijiaca papa ésu.

<sup>19</sup> Te náechapa ena suáquenuanahi, tisemanapa taicha tájinapa suviyahini eta suplatanechihavacahini. Tacahe, nacaratacapa ema Pablo émapa ema Silas. Námapa te plaza te namirahu ena tuparairucanahi.

<sup>20-21</sup> Tacahe, nametauchavacapa nayehe ena tuparairucanahi. Ánipa nacahe:

—Ena nani ajairana israelítanacacha. Nacaechepuca eta tamauriqueneana. Navarahapa tíminajicahaviana eta viyeherepiana. Navarahavare véhica eta vimaimatиеque-neruhi viti romanoana. Váhivare táisapacarehini vítauchahini eta nayeherepianahi énatatajiana —náichapa.

<sup>22</sup> Tacahe, ena achaneana tisemanapa nayehe ema Pablo émapa ema Silas. Tacahe, ena tuparairucana juéseanahi nacavanairipipa navejamuhiacavaca, náestacavacapa te yucuquipiana.

<sup>23</sup> Te tamutupa eta náestasiravacahi, námapa te cárcel. Navanecapa ema nacapitara ena carceleroana máechapajirica muraca eta tapaja.

<sup>24</sup> Te masamapa ema nacapitara eta navanairipihi, máimisiapavacapa tayehé eta téqueneha cuarto. Máeratapaiquechavacapa te cepo. Manacapa cantavu eta tapaja.

<sup>25</sup> Tacahe, eta jena enumuhuquenepa yati, eta nacaera-tairahi ema Pablo émapa ema Silas, tijiranaichucha tiyujara-canahivare me Viya. Ena apamuriana présoanahi nasamara-racaripa eta jirasare.

<sup>26</sup> Tíjahúchavapa tiyamurica muraca eta apauehe. Tiyamuricapa eta yúchamana. Tíjahúchavapa téjiacavaca eta tapajacurana eta cárcel. Téjapucapa eta cadenana náitihanahi ena présuana.

<sup>27</sup> Téjamiuchavapa ema nacapitara ena carceleroana. Mái maharine eta tapajana téjiacavacaripahi. Mái mójachapa nájinaripahi ena présoanahi. Tásicha, mavehapa eta mayehe espada. Mavarahapa ticapacavayarehini táichavenehi eta mapisirahi.

<sup>28</sup> Émasera ema Pablo mapiaracapa:

—Vahi picucapacava. Vitiarihirichuhi vimutu. Nájina émanaina téjiacavaina —máichapa.

<sup>29</sup> Tacahe, ema nacapitara tiyaseserecapa eta namica-huyare. Tisiapapa máimamurihayarehi éna. Tiyayacare-painecha eta mapisiraphi. Tépuyucapa te namirahu ema Pablo émapa ema Silas.

<sup>30</sup> Máichuhavacapa éna, mámapa te mapena. Mayasereca-vacapa:

—Tátanaveana, ¿tájahapucaini nícharacavaini eta núchucuirare nútí apana?

<sup>31</sup> Éna najicapapa:

—Pácasíña pisuapa ema Viáquenu Jesucristo. Tásicha, éma ticuchucuhaviyare píti, énapa ena pichichanaveana —náichapa.

<sup>32</sup> Tacahe, náimitucapa éma eta máechajiriruva ema Viya, énapa namutu ena tiávihanahi te mapena.

<sup>33</sup> Étarichu jena yati ema nacapitara masipasinavacapa eta najarana ema Pablo émapa ema Silas. Tacahe, ticaicachasipa éma, esu mayena, ena machichanaveana, énapa ena apamuriana tiávihanahi te mapena.

<sup>34</sup> Te táequenepa eta juca, mámamurihavarepa te mapena. Máenicavacapa. Tiúrisamureripa éma, énapa namutu ena tiávihanahi te mapena, eta macuchucuiravacayare ema Viya eta nasuapiroaipa.

<sup>35</sup> Te las nuévepa sache, ena juéseanahí navanecapa ena nasuntarurana nacuchupanavacayarehi ena náerataruanahí.

<sup>36</sup> Tacahe, ema nacapitara ena cárceleroana máichapa ema Pablo:

—Jucarihi eta órdene nayehe ena juéseana eta nacaitisiraheya. Tiúripa eyana iúchuca. Vaipa taeñamavacare —máichapa.

<sup>37</sup> Émasera ema Pablo máechajicavacapa ena suntaruana. Máichapa:

—Vítí tavanarahavi eta Estado te Roma. Viávacuhahi eta ley. Vahi tauricahini náichahavihini ena juéseana ticaratacavianapa téstacahavianapa te namirahu ena achaneana. Vahi nayaserecahavinumahini te tatiarihipuca eta viviurevahi. Tásicha puiti, navarahapa nayumurucayare eta nacuchusirahaviyare. ¡Vahi ene tacahe! Emetaca énaina náiteca nacuchupanahavi —máichapa ema Pablo.

<sup>38</sup> Tacahe, tichavanapa ena vanairucana. Nametacapa ena juéseana eta máechajiriruva ema Pablo. Ichaperine tipicana ena juéseana eta nasamirahí tavanaranairahi eta Roma.

<sup>39</sup> Tacahe, tiyananapa ena juéseana nacuchupana. Tiperdonachavanapa nayehe. Náichapa:

—Ájapanuhavi. Eperdonachahavi eta juca víchirahéhi. Ecatajicahavi, vahi ecumetauchahavi. Ájapanuhavichucha, tiúripanahipucáini iúchucaíni eta te juca avasare viávihahi, apaesa náesamiricahepa ena iánaranahí —náichapa.

<sup>40</sup> Tacahe, te tiúchucanapa te cárcel ema Pablo émapa ema Silas, tiyananapa tichavana te supena esu Lidia, viávihahi víti. Vicurujicapa ena vichamuriana. Tásicha, náetumechavacapa,

náimitusiranumapa eta náimiyananavachucha eta nasuapajiraivaina mayehe ema Viya. Tásicha, tiyananapa.

## 17

*Nacaechepuca eta semanere ena israelítana te avasare Tesalónica*

<sup>1</sup> Eta nayanirahi ema Pablo émapa ema Silas, tiánucuhanapa tayehe eta avasareana Anfípolis étapa te Apolonia. Títecapanapa tayehe eta apanavare avasare Tesalónica. Tatarihihi ánaqui eta náurujisirareva ena israelítana.

<sup>2</sup> Eta mayeherepihi ema Pablo, matupiru te náurujisirareva. Mapana sávaru eta macametarairuirahi nayehe ena achaneana.

<sup>3</sup> Manerejicapahi eta te Sagrada Escritura eta máechajicurepahi. Máimitucavacahi eta máitesiraipahi ema Cristo. Ánipa máichavacahi:

—Tiyerehi eta vicuchapirahi eta máimeresiravayare ema Cristo eta viyehe viti israelítana. Tímitucahavihi eta Sagrada Escritura eta macatajivairayarehi, nacapacayarehi. Émasera téchepucayarehi te máecari. Puiti numetacahe: Nímatipa ema Jesús Nazareno, ema nacaparuhi. Téchepucaipahi éma. Eta juca tímicaecherachahi émahi ema Cristo —máichapa.

<sup>4</sup> Tacahe, tinerejicavanahi ena achaneana. Natarihi ena tisuapanahi, nárujiacahi ema Pablo émapa ema Silas. Camurianavare ena griégoana apavasanana tipicauchanahi ema Viya, téhicanahivare. Énerichuvare ena esenana nayenana ena táiyarahana eta avasare tinerejicavanahivare ena téhicanahi.

<sup>5</sup> Énasera ena apamuriana israelítana masuapajirairahanahi, ticapinaruanahi eta náimairahi ena camuriqueñeanahí achaneana téhicanahi ena apóstoleana. Tisemasamureanarichucha. Nacurujicapa ena ajairana váinajaripaneruana, máematanereanahi te cállleana. Tíchuhajiricacanapa eta nacaechepusiraya eta semanere. Natanucapa ema Pablo émapa ema Silas, navarairahi nacaetemajiricavaca te namira ena achaneana. Tiyananapa eta te mapena ema Jasón. Náquipaicapa eta tapaja. Tisiapanapa.

<sup>6</sup> Eta namaichimavirahi ema Pablo émapa ema Silas, nacaratacapa ema Jasón énapa ena apamuriana machamuriana. Nachururupaicavacapaipahi eta námirapahi te nimirahu ena tuparairucanahi. Tipiaracanapa eta nasemannevahi, nacahepa:

—Títecapauchahavianahi ena nani achanetatajiana náitecapaurehavianahi. Najararecapahi eta viyeherepiana, nahapapicahivare eta napanereruana ena vijaneanana.

<sup>7</sup> Éna majacapaqueneanahi ema Jasón te mapena. Namutu ena nani nacaecahihi ema aquenuca viyehe Emperador romano, náepuruvare eta mavanairipiana. Náimijachahiji mararihi ema apava rey ticaijarehipuca Jesús —nacahepa.

<sup>8</sup> Te nasamapa eta juca, ena tuparairucana énapa ena apamuriana achaneana, napanerequeneháinehi.

<sup>9</sup> Tájinaserá apanainahini náicharacahini, nayaseacapa nanaquica eta prenda eta náuchusirayare ema Jasón énapa ena machamuriana. Tiámainucava te náuchucapa te avasare ema Pablo ema Silas, náimichavayarepa eta prenda.

### *Ema Pablo, ema Silas títecapanapa te avasare Berea*

<sup>10</sup> Te jena yátiquenehi, ena vichamuriana námapa nayumurucapa eta nacuchusirahí ema Pablo émapa ema Silas tayehe eta avasare. Tiyananapa nacaijuhe eta avasare Berea. Te títecapanapa ánaqui, tiyananavare tayehe eta náurujisirareva ena israelítana.

<sup>11</sup> Ena nani israelítana ticavasanahi te Berea, tiúripanerueruanapana nayehe ena ticavasanahi te Tesalónica. Navapina éna, nasamararaca eta mame tarairuhi ema Pablo. Tamutu sácheana nacaravahuhi eta Sagrada Escritura. Navarahahi náechayare te yátupihipuca eta mame tarapihi ema Pablo.

<sup>12</sup> Jéhesareinehi, camuriana ena tisuapanahi. Camurianavare ena apavasanana tisuapanahi. Te namuri, natiarihivare ena esenana ticapicahuqueneanahi, énapa ena ajairana.

<sup>13</sup> Nasamairiricavarepasera ena israelítana ticavasanahi te Tesalónica eta macametarairuripahiva ema Pablo eta te Berea. Enevanepa tiyanana nacipayaca. Te títecapanapa, náimiyusemacavarepa ena achaneana.

<sup>14</sup> Énasera ena machamuriana ema Pablo enevanepa náevataca éma te tachaui eta mar. Nanasipasera te Berea ema Silas, ema Timoteo.

<sup>15</sup> Ena tiámanahi ema Pablo, te títecapanapa te puerto, tiávacuhanapa tiyananapa tayehe eta avasare Atenas. Te títecapanapa, éta pa nachavinehi ena tinapananahi ema Pablo. Tacahe, ema Pablo matuparacavacapa nametaca ema Silas, ema Timoteo nayanavane nacipayaca éma eta te mávihahi.

### *Tímiturecasa ema Pablo te avasare Atenas*

<sup>16</sup> Eta macuchapiravacahi náitecapiraya ema Silas, ema Timoteo, vaipa máitucacarehini ema Pablo eta máimaira-vacahi ena achaneana nayehehearacahi eta camuriquene nasiñarajiana.

<sup>17</sup> Tacahe, tamutu sávaruana, tiyana eta te náurujisirareva ena israelítana. Máechajisihahi eta tiúrina échájirirucava nayehe éna, énapa ena apavasanana griego tipicauchanahi ema Viya. Tamutuvare sache máechajisihahi éma te plaza nayehe ena achaneana natarihiqueneanahi.

<sup>18</sup> Natarihihi ena ajairana ena téhicanahi eta máimiturapi ema ticaijare Epicuro, énapa ena apamuriana ticaravahuana-hivare eta náimiturapiana ena estoicoana. Te jena sácheana, téchajiricavanapa mayehe ema Pablo. Váhisera nácautiarapahini eta macayemapahi. Nacahepa:

—¿Tájahasamipucara tacayemahicácha eta mapanereruhi ema maca?

Ena apamuriana ánívare nacahe:

—Ema maca ticametarairurahi tayehe jácani apanavare masiñarajanarichu —nacahepa.

Nacahehi éna eta juca, taicha ema Pablo mametacavacahi eta máepenirahi ema Jesús étapa eta máechepusirahi, mápechiravahi titareca.

<sup>19</sup> Tacahe, tiyananapa tayehe eta cabildo náurujisirareva ticaijarehi Areópago. Ánaqui nayaserecapa ema Pablo:

—Vivaraha vímati víti eta juca arairuhi pímiturapihi eta viyehe.

<sup>20</sup> Taicha tiáramicarehi eta juca vimaimatiquenehi. Vivaraha véchayare tájahapuca tacayemahi eta juca —náichapa.

<sup>21</sup> Taicha ene nacahehi namutu ena ticavasanahi te Atenas, énapa ena náiteruanapahi. Náuricarinehi náechajisiha tamutu sácheana eta náimahaqueneana nasamaqueneanapahi arairuqueneana.

<sup>22</sup> Tacahe, ema Pablo titupihapa te namirahu te nayehe cabildo. Máichavacapa:

—Tátanaveana, eti ecavasana te juca Atenas. Nímararacahehi eta yátupirahi religíosohe.

<sup>23</sup> Taicha te nítecápapa nútì eti ani eyehe, nupaicahi tamutu eta eyujarasirareana. Nímahapa eta eyehe altar tatiarihihi eta ajureca ani tacahehi: “Ema Viya vimaimatiquene”. Tiuri, ema maca Viya eyujaraureasa emáimatiquénehi éti, émara ema Viya néchajisihaquenehi nútì.

<sup>24</sup> Émara tépiyacahi eta apaquehe, étapa eta vímahaqueneanahi távapahianahi eta juca apaquehe. Émara téchahi ticavanairipihi te anuquehe étapa te juca apaquehe. Ema Viya vahi tácarichuimahi máucupaisihaya eta

te vépiyaruuanahi templo, taicha vahi mácamunu eta mapenainaichuhini eta te juca apauehe.

<sup>25</sup> Váhivare mácamunu víjaracasichahini eta viámavahu viti achaneana. Vítira vicamunuvahi eta mayehe. Éma, téchajiricahavihi vimutu. Tíjaracahavihi eta táurivahi eta vítaresira.

<sup>26</sup> Acane te tépanavainapa tamutu, ema Viya máepiyacapa ema máinapuiru achane ticaijare Adán. Vimutu viti achaneana, mámariequenehavi ema Adán. Apánapanenéjihavisera maicha ema Viya. Tamutu eta apauehe viávapaicahi máicha. Máimicutiarachapahisera eta táenasihayarepahi eta viávasanapachuyarehi. Énerichuvare, máimicutiarachahivare eta táichecuirayare eta vítaresirana.

<sup>27</sup> Vitiarihisera viti achaneana vémitisicaipa ema Viya. Émasera mavarahahi vitanucayare. Váhinéni máyerehiahivini. Titsecavahi éma te vichacaya. Mácani mavaraha matanuca, máichimavávaneyarehi.

<sup>28</sup> Taicha vítarecahi máicha, tímipaicahavihi, achanehavihi máicha. Émaripa éma ichapequene escribáno te emuri éti macahehi eta máechajiruvahi: “Viti achaneana cáitarecahavihi ema Viya”.

<sup>29</sup> Vítí vímatihi eta máchanechirahavihi ema Viya, macaitaresirahavihi. Viyamuricahi vipaicahi máicha. Tacache, véjecapiravahi víti te vímjachapuca virataha viáchanecha eta visiñaraji. Vímivasichahineni eta jácani, váhisera tasamarahihini, váhivare tapaicahini, váhivare tayamuricahipucaini. Tayanapanepuca táurina te vépiyaca eta óropuca, plátapuca, chínarpoca. Váhivare váratahaimahi nacasiñacarehini vícha.

<sup>30</sup> Te vicasiñarajihipuca eta vépiyaruana, vimáimatirachaha. Ánaquiaparípa eta macamichirahi ema Viya ena achaneana eta nacasiñairahi eta nasiñarajiana. Puítisera vaipa macamicha eta juca. Tivanecahavipa vimutu viti achaneana vínjica eta juca, tátupiruvapa eta véneuchiravaina eta mayehe.

<sup>31</sup> Taicha tatarihiyyarehi eta jena sácheyare máicuñacayare namutu ena tíchanahi eta juca. Tamutuinapa máetupiricayare. Mararihi ema achane manerejiruhi ema Viya, juéseyare eta viyehe. Éma, ticaijare Jesús. Ema Viya máimerecahi eta manerejisirahi ema Jesús juéseyarehi, taicha macaechepecuahi te máecari te táequenepa eta máepenirahi —macahepa ema Pablo.

<sup>32</sup> Te nasamapa eta máechajisihairahi eta máechepusirahi te máecari ema Jesús, natarihi ena nacaecahiríchucha. Énasera ena apamuriana napanerequenehapa. Tacache, náichapa:

—Téhenarinevare apahena péchajisihavare eta juca, apaesa visamavi —náichapa.

<sup>33</sup> Tacahe, tiúchucapa ema Pablo eta te náurujisirareva. Tiyanapa.

<sup>34</sup> Natiarihisera ena apamuriana nasuapahi náehicapa eta mametarapi ema Pablo. Matiarihihi ema Dionisio táiyarahá eta nayehe cabildo, ésupa esu ésuna esena ticaijaro Dámaris. Natiarihivare ena apamurianahi.

## 18

### *Ema Pablo tiyanapa te avasare Corinto*

<sup>1</sup> Te taequenepa eta juca, tiyanapa ema Pablo. Tiúchucapa eta avasare Atenas. Ticaijuhe eta apana avasare ticaijare Corinto.

<sup>2</sup> Ánaqui macainunapa ema émana israelita ticaijarehi Aquila, ésupa esu mayena ticaijaro Priscila. Ema maca Aquila máuchusinehi te tinapaica eta departamento Ponto. Tayerevahisera eta áñoana, tiyananapa tayehe eta avasare Roma. Macáemataneínehi ánipihi. Émasera ema aquenucaini Emperador Claudio macavanairipipa náuchuca namutu ena israelítana eta te Roma. Tacahe, tiyanapa ema Aquila tayehe eta avasare Corinto, étapa macainunainehi ema Pablo.

<sup>3</sup> Énapa mávayechavacahi ema Pablo. Ena nani ticuticacanahí eta náematanerepiana tálabarteroana. Tímicatacacanapa eta nacaematanerahi.

<sup>4</sup> Tiuri, tamutu sávaruana ema Pablo tiyanahi tayehe eta náurujisirareva. Maconsejachavacahi ena achaneana. Macajimuyacahi eta nasamureana ena israelítana énapa ena apavasanana.

<sup>5</sup> Tacahe, napaenumavapa nacapayaca ema Silas émapa ema Timoteo, tiásihanahi te Macedonia. Eta natarihirahí éna, tépanavapa ema Pablo ticametarairu tamutu sácheana eta máechajiriruva ema Viya. Mavarahapa macajimuyacavacaya ena israelítana ema Jesús émairahi Cristo ema nacuchapauquenehi.

<sup>6</sup> Natiarihisera ena apamuriana masuapajirahahanahi. Nacatianacapa ema Pablo, napanararachavare. Tásiha, téstatajiacavapa ema Pablo eta máepacuhasa, táicutiarahi eta namaimitucarevahi ena nani. Majunjicayarepa. Tásiha, máichavacapa:

—Étipa ecatapiravayare vaipa iúchucuhaimahi tayehe eta ecuñaraqui te apana vítaresira taicha eta emajacapirahi eta máechajiriruva ema Viya. Vaipa necha núti. Puiti juca nuyaninapa, nímiturecaya nayehe ena apavasanana —máichavacapa.

<sup>7</sup> Tacahe, tiúchucapa tayehe eta náurujisirarevahi. Tiyanapa te mapena ema apuna machamurihi ticaijare Justo. Ánaquipa eta máimituresihahi. Ema maca Justo, vahi israelítaina, mapicauchahisera ema Viya. Eta mapenahi te tachacaya eta náurujisirareva ena israelítana.

<sup>8</sup> Matiarihi ema apuna achane ticaijare Crispó, tuparai-rucahi tayehe eta náurujisirarevahi. Masuapahi éma, ésupa esu mayena, ena machichanaveana, énapa ena apamuriana tiávihanahi te mapena. Camurianavare ena tisuapanahicavasanahi tayehe eta avasare Corinto eta nasamirahi eta máechajiriruva ema Viya. Namutu ticaicachasianahi.

<sup>9</sup> Tacahe, étana yati, ema Viáquenu Jesús máechajicapa ema Pablo, ánipa maicha:

—Vahi picupica. Pímiyanavachucha picametarairu te juca avasare,

<sup>10</sup> taicha camuriana ena nuchaneranaya. Núti nutiarihiya te pichacaya. Tájina náicharacavimahi ena piánarana —macahepa ema Jesús.

<sup>11</sup> Tacahe, ema Pablo manasipa. Étana año y medio machehi tayehe eta avasare Corinto. Tímiturecahi nayehe ena achaneana eta máechajiriruva ema Viya.

<sup>12</sup> Étasera jena sácheana matupihairahi ema Prefecto ticaijare Galión. Aquenucahi éma tayehe eta avasare Corinto tayehehi capital eta departamento Acaya. Tiuri, ticuruji-cacanapa ena nacanarayarepa ema Pablo. Nacaratacapa námapa te mamirahu ema aquenuca, nametauchayarehi.

<sup>13</sup> Tacahe, náichapa ema aquenuca:

—Ema maca achane macontracha eta viyeherepi. Ema máimitucavaca ena vijaneanana, náitsivachayare eta véjirairaya ema Viya —náichapa.

<sup>14</sup> Téchajiu-chavayare-paini ema Pablo, émasera ema Galión macachuricapa. Máichapa ena israelítana:

—Tiuri, esamanuchaha éti. Te tíñehipuca eta máejecapi-ravahi ema maca, ticaparecahipuca, núti apuna nímisiapavahini juésenuinahini eta eyehe eta nusamirahénahini.

<sup>15</sup> Étasera echájirirucavánachucha te máijare ema mácani apuna, étapa eta eyeherepiana éti. Tájina táíñehicaréna eta juca. Vahi nímisiapavaimahi núti, juésenuinahini tayehe eta juca. Ímahainepe éti —máichapa.

<sup>16</sup> Tacahe, máevatacavacapa náuchuca te mamirahu.

<sup>17</sup> Tacahe, namutu ena apavasanana griégoana nacaratacapa ema Sóstenes, nacapitarahi ena israelítana. Náestacapa te mamirahu ema Prefecto Galión. Émasera váhiquene

máimisiapavahini. Váhivare macatiuchahini. Ema Pablo tichavapa tayehe eta Antioquía

<sup>18-19</sup> Tiyerehichaha eta jena sácheana manasirarichaha ema Pablo. Te ticaicutiaravapa, mavarahapa tiyanaya eta te Jerusalén, tétavajisirayarepahi eta te avasare Efeso, étapa te avasare Tiro, táunavahi eta Siria. Tásicha, ticametavapa nayehe ena machamuriana. Macachanevacapaipa ema Aquila ésupa esu mayena Priscila. Tiyanapa tipaicana eta te puerto ticaijare Cencrea. Te tiánuecanayarepa, ema Pablo ticachucasi-numapa titahisinumapa eta machuti, máitauchirayarehi eta mayehe promesa. Te títecapanapa te avasare Efeso, nanasi-hayarehi ema Aquila ésupa esu Priscila. Te jena sache sávaru, tiyanapa ema Pablo tayehe eta nárujisirareva ena israelítana. Téchajiricavaipa nayehe, máimitusiravacahi éna.

<sup>20</sup> Tacahe, éna navarahapa náiminasicha, émasera vahi másapavahini.

<sup>21</sup> Téhesera te ticametavapa nayehe, máichapa:

—Nuyanayare tayehe eta Jerusalén. Ánaqui nunarasihayare eta jena sácheana piéstairayare. Nuchavayaresera nímahapa-naheyare éti, te mavaraha ema Viya tacuijaichu níchava —máichavacapa.

Tacahe, tíavacuhavarepa. Majunijicapa eta Efeso.

<sup>22</sup> Te títecapanapa ema Pablo tayehe eta avasare Cesarea, tiánucuhapa tayehe eta Jerusalén. Máechajipánavacapa ena machamuriana. Te taequenepa, tiyanapa te avasare Antioquía.

<sup>23</sup> Tiyerehi eta cájeana manasiranumahi tayehe eta avasare Antioquía. Tacahe, tiápechavavare tipaica. Máejiravacapahi ena machamuriana te jácani návhavacapahi tayehe eta avasarechichana te Galacia étapa eta Frigia. Maconsejachavacapahi ena machamuriana. Matiarihi ema Apolo te Efeso

<sup>24</sup> Te jena sácheanahi, títecapanahi te avasare Efeso ema émana israelíta ticaijare Apolo. Éma máuchurehi te avasare Alejandría. Máiituca ticametarairu éma. Máimativare yátupi tamutu eta Sagrada Escritura ticaijare Antiguo Testamento.

<sup>25-26</sup> Mavapinahi éma tamutu, étaripa eta máechajisirana. Ema Apolo maitucahi eta máimiturapiana ema Juan Tícachasiricarahi eta máitecapirayare ema Cristo ema nacuchapauquenehi. Máechahi eta máicachasisírahi ema Juan ema Jesús, ema yátupiquenehi Cristo. Váhisera tamutuhini maecha eta máichavaquenevahí ema Jesús. Tamutu sávaruana, tiyanapa tayehe eta nárujisirareva ena israelítana. Ticametarairupa, vahi mapicacaracavahini. Ánipa macahe:

—¡Títecapaipa ema Cristo ema vicuchapaquenehi! Ema ticaijare puiti Jesús. Vétupiricavaya vimutu eta viyaniraya te Jerusalén. Ema véhicaya taicha ema viáquenuya —macahepa.

Étasera te nasamapa ema Aquila ésupa esu Priscila, námapa éma te napena. Tásicha, náimitucapa tamutu eta apamuriana téchacareana mayehe ema Jesús.

<sup>27</sup> Manasipanapa ema Apolo te jena cájeana. Tacahe, mavarahapa tiyanayare te tinapaica eta departamento Acaya. Tásicha, ena machamuriana náimicatacapa. Ticajureanapa eta carta nayehe ena nachamurianahi tayehe eta avasareana macaijuheyarehi apaesa táuri eta najacapiraina. Te títecapapa éma tayehe eta Acaya, ichape eta máimicatasiravaca ena machamuriana taicha ema Viya máijaracahí eta máitupajijiasiravahi.

28 Máimitucahivre ena israelítana eta te nárujisiravana. Máiminecapáequenehávacahi tayehe eta Sagrada Escritura ema Jesús émahi ema Cristo ema nacuchapaquenehi.

## 19

### Títecapapa ema Pablo te avasare Efeso

<sup>1</sup> Tiuri, manasipa ema Apolo eta te avasare Corinto. Te jena sácheana, ema Pablo tiúchucahi eta avasareana táunavanahí eta Frigia. Eta mayanihapahí te achene te márijuecuana. Tacahe, títecapapa tayehe eta avasare Efeso. Te jena avasare, natiarihihi ena apamuriana tisuapajirahianahi. Máimativacapaipa éna.

<sup>2</sup> Tacahe, mayaserecavacapa:

—¿Mávaháruhépa ema Espíritu Santo te ecáijuhéinapa ema Viya? —máichavacapa.

Tásicha, éna najicapapa:

—Váhira visamairirica eta matiarihirahí ema Espíritu Santo.

<sup>3</sup> Mápechavare ema Pablo mayaserecavaca:

—¿Tájahasica tacayemahi eta ecaicachasirahí éti? —máichavacapa.

Éna najicapapa:

—Eta vicaicachasirahí véhicahi eta máimiturapihanahi ema Juan Tícachasiricarahí —náichapa.

<sup>4</sup> Ema Pablo mamevacacapa:

—Tiuri, yátupi ema Juan máicachasicavacahi ena achaneana eta náitsivachiraya eta náitaresirana. Énerichuvare, mamevacacahi eta nasuapirorayare ema achane téhiequenehapahí éma. Puiti numetacahe: Ema maca téhiequenehapahí ema Juan ticaijare Jesús. Émaqueneripahí ema Cristo —máichavacapa.

5 Tacahe, te nasamapa eta juca, navarahapa ticaicasiana te máijare ema Viáquenu Jesucristo. Tacahe, ema Pablo máicachasicavacapa.

6 Tacahe, manacapa eta mavahu te nápusiana. Tásiba, tiúcupaicapa ema Espíritu Santo, mávahácvacapa. Témunahiricavanapa apáechajiríruvána. Ticametarairuanapa eta máechajiriuva ema Viya.

7 Eta nasimutuvahi ena nani, dóceanahi ena ajairana.

8 Tamutuhi sávaruana tiyana ema Pablo te náurujisirareva ena israelítana. Mapana caje ticametarairu nayehe ena achaneana. Vahi mapicacaracavahini eta macametarairuраhi. Macajimuyacavahini ena achaneana, náehisiráina ema Jesús, náimatiraina eta émairahi Cristo, ema nacuchapauquenehi.

9 Natarihisera ena apamuriana murácasamureána-ríchucha. Váhivare návarahahini náehicahini ema Jesús. Te jácani náurujisiravana, nacaecahirichucha eta arairu máimiturapihi ema Jesús. Tacahe, ema Pablo térajicavapa eta nayehe. Máiputsimurihapa ena tisuapajirahianahi, mámamurihapa tayehe eta colegio máimituresirarehi ema ticaijare Tirano. Tacahe, ema Pablo tímiyanavapa tímitureca tamutu sácheana nayehe ena machamuriana.

10 Apina año eta máimituresirahi. Tacahe, ena máimitureanahi tiyananapa tipaicana. Ticametarairuanapaipa eta máechajiriuva ema Viya nayehe ena achaneana ticavasanahi eta te avasarechichana táunavanahí eta avasare Efeso, tayehehi capital eta departamento Asia. Tásiba, nasamairírcapa namutu ena achaneana: ena israelítana énapa ena apavasanana.

11 Ema Viya máimicatacahi ichape ema Pablo eta máichirayare eta tiáramicareana.

12 Ichapemuriana ena achaneana macanararuanapahi tayehe eta páñoana, camisapuca macaratajiruanapahi. Máijaracavare nacaitecapaya nayehe ena nacajumaqueneana, tásiba tacanaracapaipa. Énerichuvare táquijicapahi ena éreanana.

13-14 Te jena avasare, natarihihi ena siéteana israelítana ticaparapejiricacana, machichanaveanahi ema ticaijarehi Esceva, náiyarahaini ena tiyujaracarahaní te Jerusalén. Tacahe, ena nani siétequeneana napaiririuhanahí. Náitucahi naveha eta itiriji. Éna, eta navehairahi eta itiriji, navarahapa éna apanava napiaracayare eta máijare ema Jesús. (Váhivare náehicahini eta máimiturapiana.) Matiarihihvare ema achane macajumaquenehi maicha ema éreana. Tacahe, te napauchapa ema macajumaquenehi, náichapa:

—Piti éreana, vivanecavi te máijare ema Jesús máechajishihaquenepahi ema Pablo. Piúchuca te máquehe ema maca macajumaquene —náichapa.

**15** Tásicha, ema éreana majicapapa:

—Nímati ema Jesús, émapa ema Pablo. Étisera vahi nímatihe. ¿Nájahahepuca? ¡Ásajipucaini nusuapahehini! —máichapa.

**16** Tacahe, ema achane mávaháruhi ema éreana majunau-chavacapa éna. Máehavacapa máquipapaicavacapa namutu ena siétequeneana. Tiyananapa tijunana, najunijicapa eta mapena ema macajumaquene. Mamuiriareanapaipa, ticajaranapaipa.

**17** Tásicha, téchacarehi eta juca nayehe namutu ena ticavasanahi tayehe eta avasare Efeso, énaripa ena israelítana. Te nasamairiricapa, tipicanarinehi. Tásicha, nacahepa:

—Tétavicavapa tamutuira tarataha eta máijare ema Jesús, náquenu ena nani —nacahepa.

**18** Tacahe, ena téhicanapaipa ema Jesús, te náurujisiravana te tiyujaracana, timetaurecavanapaipa tamutu eta náejecapiravana eta náitaresirahi.

**19** Natiarihi ena apamuriana ticaratacanahi eta iápemarecare. Námavacapaipa eta náitucaqueneanaini nasiñarajianainihi, nayehepuca libro. Náijuquechavacapaipa te namirahu ena nachamuriana. Vaipa nacatiequene-hapahini. Natupaequenehapasera eta tavachanahi te navacharecainapa tacapayacahi eta \$b250,000.

**20** Tacahe, ichape eta nasuapira ena achaneana eta máechajiriruva ema Viya. Camurianapaipa ena téhicanapahi.

**21** Te táequenepa eta juca, ema Pablo macahepa:

—Nuvarahapa néjirapanaya ena vichamuriana ticavasana te Macedonia énapa ena apamuriana ticavasana te Acaya. Tásicha, nánucuhayare te Jerusalén. Te tamutupa eta juca, nuyaninavarepa te Roma —macahepa.

**22** Tacahe, máevatacavacapa náinapuca ena apinana machamuriana ema Timoteo émapa ema Erasto. Tiyananapa tayehe eta Macedonia. Émasera manasipanarichaha tayehe eta Efeso.

*Tisemamurianapa ena achaneana te avasare Efeso*

**23** Tacahe, te jena sácheinahi, tisemamurianapa ena apamuriana achaneana taicha camurianapaipa ena téhicanapahi ema Viáquenu Jesús. Áni tacahehi eta nasemirahi.

**24** Matiarihihi ema achane ticaijare Demetrio. Ema maca achane, máepiyacahi eta suyehe trónochicha esu nasiñaraji ticaijaro Diana. Ticutihi eta pétichicha eta táimahi eta templo

suávhahi ésu. Amairihahi plata. Tiúrihi eta maganaresira éma, énapa ena apamuriana plateroana macutiqueneanahi.

25 Tacahe, macurujicapa ena apamuriana plateroana. Tásicha, máichavacapa:

—Tátanaveana, éti ímatihi eta juca vématanerepihi, tiúrihi eta viganaresira.

26 Ímahrichuhi puiti éti, esamahivare ema maca Pablo macahehi eta máechajiruvahi ena nani visiñarajiana vépiyaruana viti achaneana váljiji yátupinahini vénainahini. Ichapemurianaripa ena tisuapanahí, taicha nasamaripa eta máimiturapiana namutuyarení ena achaneana ticavasanahi te juca viávasa Efeso, énerichuhivare ena ticavasanahi eta te avasarechichana táunavana eta Asia.

27 Ticauyayacarehi eta juca. Táemitiequenehahini eta juca táurivahi eta viganaresira. Étaripa eta templo suávhahi esu súrinaquene visiñaraji Diana témitiequenénapapuca, nacuijapapuca nacuechahí. Náemitisicáinapapúca eta táurivainihi eta náejirairahi namutu ena achaneana te juca apauehe — máichavacapa.

28 Tacahe, eta nasamirahi ena apamuriana, tisemararinehi, tipiaracanapa. Ánipa nacahe:

—¡Viva esu Diana visiñaraji viti efesioana! —nacahepa.

29 Tacahe, tisemamurianapa ena apamuriana achaneana. Apanapa eta napanerecha. Tiuri, natarihihi ema Gayo émapa ema Aristarco, macompañeroana ema Pablo náuchureanahi eta te avasare Macedonia. Tacahe, ena achaneana nacaratacapa ena nani apinana. Námapa tayehe eta náurujisiráreva.

30 Émapa ema Pablo mavarahapa masiápamuriháyahrehíni máechajicavacayarehi, énasera ena machamuriana vahi náisapahini.

31 Natarihivare ena apamuriana, tuparairucanahi tayehe eta departamento Asia, mayeheanahi amigo ema Pablo. Nacometarapipa vahi macuímisiápava.

32 Tacahe, eta náurujisirávahi tijajamurihanahi. Ema émana tipiaracahi, apanahi eta macayema. Ema apana, énerichuvare tipiaracahivare apanahivare eta macayema. Namutuyarení ena achaneana apápipijivácachucha eta nacayemaqueneana. Vahi náimatiéquenehahíni tájahapuca tacayemahi eta naúrujisirávahi.

33 Tacahe, ena apamuriana israelítana náichuhapa ema Alejandro. Nametacapa eta táicharacávahi eta náurujisirávahi. Tacahe, navanecapa téchajica, maconsejachavacayarehi ena achaneana. Tásicha, ema titupihapa te namirahu. Máimicutiarachapa te mavahu namatinachaha.

<sup>34</sup> Tásicha, náimativanepa ema émarichuhi israelítahi. Tépanavarepa tipiaracana. Apina hora nacahe eta napiararesirahi:

—¡Viva esu Diana visiñaraji viti efesioana! —nacahepa.

<sup>35</sup> Tacahe, títecapanecha ema tayehehi alcalde eta avasare. Macamatinacavacapa. Tásicha, téchajicapa. Ánipa macahe:

—Tátanaveana, mémenaveana. Emutu eti tachichanaveana eta juca viávasa Efeso. Nájina émanáina achane vahi macuechahini eta véchapajirisira vimutu eta templo suávhahi esu súrinaquene visiñaraji Diana, esu sucapicahuquenehi taicha eta juca mari suáquehehi ánaquiaparipa eta táemirisirahi te anuma.

<sup>36</sup> Nájina tépuruina eta juca. Ésamiricavachucha. Vahi ecuijahuchava. Epanerechinava te tiúriyarepuca.

<sup>37</sup> Taicha ena nani ajairana iámaqueneanapahi, tájina natapiravainahini. Vahi nacaecahi esu visiñaraji, váhivare námeyecha ésu eta suyereruvana.

<sup>38</sup> Tiuri puiti, ema Demetrio, énapa ena machamuriana, te navarahapuca timetaurecana, nararihi ena juéseana. Nacaunehi nácani timetaurecanaya. Táuchusihayare eta natapiravana.

<sup>39</sup> Téheserapuca apana jácani evarahaquene, ticaechacasiyarehi te reunión tásichaqueneyarehi viyehe viti tuparairucana.

<sup>40</sup> Tíñehicare eta juca íchaquenehi. Náimijachaipa ena achaneana víchahi eta revolución puiti jena sache. Tijuricati natarihi tiyaserecahávianaya eta táicharacavahi eta juca. Tájina viviyavaimahi —macahepa ema alcalde.

<sup>41</sup> Te tamutupa eta máechajisirahi, mavanecapa téjanerecana ena achaneana. Títavapa eta náurujisirávahi. Tacahe, téjanerecanapa ena achaneana, tamutupa eta nasemirahi.

## 20

*Tiyanavare ema Pablo te departamento Macedonia étapa te Acaya*

<sup>1</sup> Tacahe, te taequenepa eta jácani sácheana, ema Pablo máichuhavacapa ena machamuriana, maconsejachavacapa. Tásicha, ticametavapa nayehe. Tiyanapa tiánueca macaijuhepa eta te departamento Macedonia.

<sup>2</sup> Máejiravacapaipa namutu ena machamuriana ticavasanapahi te avasarechichana. Máetumechavácapahi éna eta maconsejachiravacapahi, máitecapirapa tayehe eta avasare Corinto, táunavahi eta departamento Grecia (ticaijarehivare Acaya).

<sup>3</sup> Ánaqui manasipanapa tayehe, mapana caje eta mávihairahi. Tásiha, mapanerechaipa tiávacuhaya te pacure eta mánuesirayare macaijuheraya eta te Siria. Étasera te máechapa eta navarairahi nacapaca ena israelítana mánarana, téquecavapa eta mapanereru. Tiyanapa tipaica tichavapa tayehe eta Macedonia eta mávacuýayarehi.

<sup>4</sup>Eta machavirapa, náehicapa ena machamuriana ema ticajare Sopater ticavasahi te Berea, ema Aristarco émapa ema Segundo ticavasanahi te Tesalónica, ema Gayo ticavasahi te Derbe. Máehicavare ema Timoteo. Natiarihivare ema Tíquico émapa ema Trófimo ticavasanahi te tinapaica eta Asia.

<sup>5</sup> Tacuhe, títecapanapa te Filpos, návihahi nútì. Tacuhe, ena siétequeneana vichamuriana tínapucanapa tiyanana tiánuecanapa, nacaijuhepa eta apana puerto ticajare Troas. Ánaquipa nacuchapihahavihi.

<sup>6</sup> Tásiha víti, te táequenepa eta Pascua vinisirahi eta pan mayehere levadura, vípaenumavapa viúchuca tayehe eta Filpos. Viávacuhapa viyanapa. Cinco sache eta viánuesira. Vicápayamuríhapa te Troas. Vinasipanapa tayehe, siete sache vicahe.

*Máejirapa ema Pablo ena machamuriana ticavasanahi te Troas*

<sup>7</sup> Te jena tínapuca sáche tayehe eta semana, tiúrujicavanapa ena vichamuriana. Viyuvetucayare, vinicayare eta pan táicutiarahi eta máepenirahi ema Viáquenu Jesucristo. Tacuhe, ema Pablo maconsejachavacapa jena yati, taicha tiúchucayarehi te jena yáticarahi. Tiúnahi eta máechajisirávacahi. Te énumuhupa yati tímiyanavaríchaha téchajica.

<sup>8</sup> Eta viúrujisirávahí te anuquehe peti te mapanaquene piso. Tatiarihihi camuri eta namicahuana.

<sup>9</sup> Matiarihihi ema émana amaperu ticajare Eutico. Téjacahi éma eta te ventana. Tacuhe, eta táunavahi eta máechajisirahi ema Pablo, ema amaperu téyucaipahi. Eta máimasirahi, tiáquipaicavapa te anuquehe ventana. Tacuhe éna, tiúcupaicavaneánapa nacáeche pupánayarehi. Éma tépenaripahi.

<sup>10</sup> Tacuhe, ema Pablo tiúcupaicapa, mapauchapa ema amaperu. Mayuratanauchapa majupahacapa. Tacuhe, máichapa ena machamuriana:

—Vahi ecueñamava. Tichavayare titareca —máichapa.

Jéhesaréinehi, tichavapa titareca ema amaperu.

<sup>11</sup> Tacuhe, tichavanavare tiápanana te náurujisiávahí. Tacuhe, tinicanapa. Tásiha, ema Pablo tijárahiácaríchaha eta máechajirísiravacahi. Te titapiricapa, tiyanapa.

<sup>12</sup> Tacuhe, te téjanerecanapa, námapa ema amaperu máitareruhi. Ichape eta náurisamurevapahi.

*Tiúchucanapa tayehe eta Troas, nacaijuhepa te Mileto*

<sup>13</sup> Viti viávacuharipa, viyanapa vicainapucavahi tayehe eta apanavare puerto Asón eta mávacuiyayarehi ema Pablo, taicha ichape eta táepiñu. Émasera ema Pablo tipaicayarehi tímitupiruchavapa.

<sup>14</sup> Te vítecapapa te Asón, tiávacuhapa éma. Tacahe, viyanapa vicaijuhehi eta apanavare puerto Mitilene.

<sup>15</sup> Te apanapa sache viúchucavarepa tayehe, viánucuhapa te tachacaya eta tiúrupuhi ticaijarehi Quío. Te apanavarepa sache, vítecapapa te apanavare tiúrupuhi ticaijarehi Samos. Víchecapa tayehe, vinaracanumapa eta te puerto ticaijarehi Trogilio. Te apanapa sache viyanavarepa, vítecapapa te puerto ticaijarehi Mileto.

<sup>16</sup> Váipa vétavajicahini te Efeso, taicha ema Pablo vaipa mávarahahini váyereréjipahini eta vipaisirapahi te táunavahi te Asia. Taicha mavarahahi títecapavaneyare te Jerusalén, eta máimaiyayarehi eta napiestara ticaijare Pentecostés. Étapa tiámahaviyare te viratavayarepuca.

*Eta maconsejachira ema Pablo nayehe ena náiyarahana pastoreana ticavasana te Efeso*

<sup>17</sup> Etasera eta viávihairahi te Mileto, ema Pablo máimichuhavacapa ena náiyarahana pastoreana tayehe eta avasare te Efeso.

<sup>18</sup> Te títecapanapa éna, majacapavacapa. Tásiba, tépanavapa máechajiricavaca, máichavaca:

—Éti ímatinuhi táichararacavahi eta nítaresirahi eta jena sácheana te nítecapauchahénapa. Tájina níchahini núti eta nuyehesbiravana.

<sup>19</sup> Tájinavare vahi népiyacavahini aquenucanuinahini eta eyehe. Nucaematanecahi ema Viáquenu. Vahi nuse-maimahi tayehe tamutu eta níchavaquenévanahi naicha ena nujaneanana israelítana, navarairahi titaequenehanuana. Tasapiha ticaiyacanu naicha eta namásuapajirávana.

<sup>20</sup> Tamutu numetacahehi eta táuriqueneana tiúrichaheyare éti apanava. Nímitucahehi te jácani viúrujisirávana étapa te epenana.

<sup>21</sup> Nuconsejachahivare namutu ena achaneana, eta náeneuchiravaina me Viya, eta náitsivachiraina eta nítaresirana, étapa eta nasuapiraina nacasiñairaina ema Viáquenu Jesucristo.

<sup>22</sup> Puítisera nuyaninapa te Jerusalén. Taicha nuvanecasivahi mayehe ema Espíritu Santo. Vahi necha núti tájahapuca nícharacavaya eta ánaqui.

23 Tacarichu necha eta mametasiranuana ema Espíritu Santo. Tamutu eta avasareana nupaisihanapahi, timetacanupahi éma eta nucatajivairaya, napresuchiranuya te cárcel te Jerusalén.

24 Tájinaserá vahi nupicacava. Tayanapanéine népenapuca, vahi néñama eta nítaresira. Nuvaraha nímiyanavaya eta núrivahi mayehe ema Viya. Nuvapinavahi eta nítouchiraya eta nutuparacasivahi mayehe ema Viáquenu Jesucristo. Taicha éma tituparacanuhi nucametarairuya eta máemunasirahavihi ema Viya vimutu viti achaneana.

25 Numetacahe: Puiti juca nuyaniraya, vaipa iápechavaimahi ímahanu. Eti ínapureanahi nímitureanahi emutu éti te iávasanapachuhi. Nímítuchahehi tamutu eta véhisiraya ema Viáquenu Jesucristo.

26 Eta tacahe, numetacahe puiti: Vaipa nútiparacáina te natarihinapuca téjecapavanaya te etaracu éti.

27 Tamutuhi numetacahe eta mavarahaqueneana ema Viya. Tájina vahi nuyumurupicahini.

28 Tiuri puiti, ejaneacavayare éti, énerichuvare ejaneacayare ena iúmurivana taicha etuparahaipa mayehe ema Espíritu Santo eta ejaneasirayare ena manerejiruanahi ema Viáquenu, énavenehi tépenahi éma, máepusaicahi eta máitine.

29 Ecaunevaicha muraca, taicha puiti juca nujunjisi-raheya, tijuricati títecanaya ena navarahaya témejecapávachaheánaya. Navarahaya ticajanerecaheanaya tacutiyare eta chuye tinicarahi te tacajanereca eta varayuana.

30 Énaparichu ena vichamuriana te etaracu, natarihiyare ena tímiturecanaya nahapapicayare témejecapávachanaya ena nácani apamuriana vichamuriana, navarairainahi éhicayare eta napanereruana.

31 Tásiba, ecaunevaicha yátupina. Échavayare eta mapanaqueño año eta nutiarihirahi eyehe. Tamutuhi sácheana, yátiana nuconsejachahehi, émanapachuhi numetaca. Níyahsamurehi taicha eta nímairahehi.

32 Puítisera, nuparapenaveana, nuyanainapa. Nuyáseuchahéyareséra me Viya eta majaneasiraheya. Ecaravahuirainapa yátupina eta máechajiruvana ema Viya. Túmeheyarepaipa táicha. Ema Viya mavarahahi ímijuruchayare eta juca máechajiriruva; taicha mavaraha tíjaracaheya eta ícuchianahi te anuma eta iávhayare, ecachaneraya ena apamuriana masántuchaqueneánarípa.

33 Eta návihirahi eyehe, vahi nujamurachahini eta emuirihana étaripa eta plata íjaracanuhini.

34 Ímararacanuhi éti eta táichararacavahi eta nucaematanera. Nucaematanehi tiásghanahi te nuvahuana, nuviyahi

eta nucamunuqueneana, énapa ena tímicatacanuanahí.

<sup>35</sup> Tamutu nímitucahehi tacaheyare eta vicáematanéraya, vímicatasirayareva ena ticamunuvana, nacajumaqueneana. Véchavayare tativa eta máechajiriruvahi ema Viáquenu Jesucristo, ani macahehi: “Viúripanaya me Viya, te vicajirica eta vímahaqueneana nayehe ena apamuriana. Vahi vicuamuracha náijaracasichahavi” macahepa.

<sup>36</sup> Te tamutupa eta juca maconsejachiravacahi ema Pablo, tépuyucanapa namutu. Tiyujaracapa mayaseuchavacapa me Viya.

<sup>37</sup> Tásicha, tíyahanapa namutu, najupacapa náetserarecapa ema Pablo.

<sup>38</sup> Tipanererecanipa taicha eta mametasiravacahi váipa tiápechavanaimahi náimaha éma. Tásicha, tiyananapa nanopana eta te mávacuiyayarehi.

## 21

### *Eta viyanirapa eta te Jerusalén*

<sup>1</sup> Te vijunjicapa ena vichamuriana, viávacuhapa viyanapa vitupiruruchapaipa eta tiúrupuhi ticaijare Cos. Te apanapa sache vicaijuhepa eta tiúrupuhi ticaijare Rodas. Te apanavarepa sache viánucuhavarepa eta puerto ticaijare Pátara.

<sup>2</sup> Étapa vicainunainehi eta apana pacure tiyanayarehi tayehe eta apachara apanavare departamento Siria. Tacahe, viávacuhapa tayehe, viyanapa.

<sup>3</sup> Eta vipaisirapahi, viánucuhapa eta tiúrupuhi Chipre tanapaicaphi te sapa eta viyehe. Vímiyanavachucha vipaica vítecápira te puerto ticaijarehi Tiro tayehe eta Siria. Taicha eta pacure véhirupahi tanaquicayarehi eta carga támaquenepahi tayehe eta puerto.

<sup>4</sup> Étapa vicainunainehi ena apamuriana vichamuriana. Vinasipanapa nayehe, siete sache viahe. Te juca, ema Espíritu Santo mametacavacahi ena vichamuriana eta máichavayare ema Pablo te Jerusalén. Tacahe, nametacapa ema Pablo eta vahi macuitecasa te Jerusalén.

<sup>5</sup> Téhesera tiúchucayarepa eta pacure véhirupahi, viyanapa te puerto. Téhicahavianapa namutu ena vichamurianahi, énapa ena nayenana énapa ena nachichanaveana. Tinapanahavianapa te pacure. Te vítecápapa te playa, vépuyucapa vimutu, viyujaracapa.

<sup>6</sup> Te tamutupa, vémamavauchavacapa vicametavapa eta nayehe, viávacuhapa. Tásicha, tichavanapa éna te napenana.

<sup>7</sup> Eta viásihairahi te Tiro, vítecápapa te Tolemaida. Étapa táenasihahi eta vipaisirahi te une. Viyanapa véchajicavacahi ena vichamuriana. Vinasipa étana sache eta nayehe.

<sup>8</sup> Te apanaquenepa sache viyanapa vicaijuhepa eta avasare Cesarea. Te vítecapapa, viyanapa te mapena ema Felipe ema ticametarairurahi, ema nasietenehi ena nanerejiruanahi téchapajiricanahi eta nirureana nayeheana ena máimaruana. Vinasipa eta mayehe.

<sup>9</sup> Ema Felipe, natarihi ena cuátroana machichanaveana esenana, máimaruuanarichaha. Ena nani máijaracahi ema Viya eta náitusirahi ticametarairuana.

<sup>10</sup> Eta jena sácheana viávihairahi mayehe ema Felipe, títecapapa ema émana profeta ticajarehi Agabo. Éma tiásihahi te Judea.

<sup>11</sup> Títecapauchahavipa tímahapanahaviyarehi. Tacahe, mayaseacapa eta máitijuhe ema Pablo. Tásiha, titiapechavapa, étapa eta mavahuana. Tásiha, macahepa:

—Ema Espíritu Santo ani macahehi eta máechajiriruvahi: “Ena vijaneanana te Jerusalén nacaratacayare ema ticayehe eta juca itijuere. Náitiacaya, náijararecayareva nayehe ena apavasanana” —macahepa ema Agabo.

<sup>12</sup> Tacahe, vimutu viti, énapa ena ticavasanahi tayehe, viyaseacapa ema Pablo eta vahi macuyana te Jerusalén.

<sup>13</sup> Émasera ema Pablo máichahavipa:

—¿Tájaha tacayema ímipanererecanu eta juca íyáuchiranuhi? Vahi nupica te náitiakanupuca. Núti níjaracava népena te Jerusalén máichavenénahi ema Viáquenu Jesucristo —máichapa.

<sup>14</sup> Te vímahapa vahi váratahahini víchejica, vísapapa tiyana. Vicahepa:

—Énenarinepuca tácahe, máimahavirinepa ema Viya —vicahepa.

<sup>15</sup> Te tamutupa, vétupiricavapa. Viyanapa te Jerusalén.

<sup>16</sup> Téhicahavianapa ena vichamuriana ticavasanahi te Cesarea. Téhicahavipahivare ema vichamuri ticajare Nasón. Ánaquiripahi eta máehisirahi ema Jesús. Éma, máuchurehi eta te tiúrupuhi Chipre. Tatiarihisera eta mapena te Jerusalén, eta vítecapihayarehi.

### *Ema Pablo máejirapanapa ema Santiago*

<sup>17</sup> Te vítecapapa te Jerusalén, ena vichamuriana tiúrisamu-reanaríne eta najacapirahavihi.

<sup>18</sup> Te apanapa sache ema Pablo tiámahavipa, viúrujicavayarehi te mapena ema Santiago. Vichimapapa natarihihipa namutu ena víyarahana pastoreana.

<sup>19</sup> Tacahe, ema Pablo máechajicavacapa éna. Mametacavacapa tamutu eta máimicatasirapahi ema Viya eta

macametarairuirapahi nayehe ena apavasanana étapa eta máichirapahi eta tiáramicareana.

<sup>20</sup> Te nasamapa ena mame taruanahi, nacunacharinehi ema Viya. Tacahe, náichapa ema Pablo:

—Tétavicavapa táuriva eta juca pimetarapiana. Píma pasera natariáhihira ena camuriqueneana ena vijaneanana téhicanahi ema Jesús. Énasera, muracaqueneanahi religiosoanahi, téhicanahi eta mayeherepini ema Moisés.

<sup>21</sup> Puiti, jucarihi eta pépiyaequenehi eta pihápapicahíji eta pímitusiravacahi ena vijaneanana ticavasanahi te avasareana estranjeroana. Pímitucavacahiji eta váhiji nacusuapa eta mavanairipiana ema Moisés, váhivaréji nacumarcacha ena nachichanaveana ajairana, váhivaréji nacuehica eta viyeherapiana.

<sup>22</sup> ¿Tájahapuca táicharacava eta juca? Tijuricati ena achaneana tiúrujicavanainapa, te nasamairiricapa eta pitiahihira.

<sup>23</sup> Tiúripana eta juca píchayare. Nararihi te juca vitaracu ena cuátroana ajairana. Títáuchanapáipa eta nayehe promesa.

<sup>24</sup> Pisipahacavaya, piámamuriha éna eta pímeresiravaya tayehe eta Templo. Pivachachinaya eta uvesa navehaqueneana apaesa éna náisapava nacachucasi eta nachutimacana. Eta táicutiarayare eta vahi yátupinahi eta pépiyaequenehi, apaesa naímahavi eta pipicauchirahi eta mavanairipiana ema Moisés.

<sup>25</sup> Énasera ena vichamuriana apavasanana, vímiamarecaripa eta vicartane. Náecharipa eta vaipa étaparacáinahíni nayehe eta juca. Tacarichu vahi nacunica eta taeche eta sárare nayujaraurehi te tamirahu eta nasiñarajiana, váhivare nacunica eta táitine eta sárateana, váhivare nacunica eta taeche eta sárare namaechatinure. Énerichuvare vahi nacuveha esu súcaini apana esena. Énaripa ena amaperuana, tacuija eta natuhusivaina —náichapa ena pastoreana.

### *Nacaratacapa ema Pablo eta te Templo*

<sup>26</sup> Tacahe, ema Pablo tísapavapa. Te apanaque nepa sache, tisipahacavapa, énapa ena cuátroqueneana ajairana. Mámavacapa, tiyananapa te Templo. Nametapanayarehi ena téchapajicarahiana eta Templo, semanayareipahi eta nanaquisiravayare eta námavahuana.

<sup>27</sup> Tacahe, te náitauchapa eta siete sache eta nasipahasiravahi, tichavanapa te Templo. Te jena sache, natarihipavare ena apamuriana najaneanana tiásihanahi te tina paica eta Asia. Eta mávihairarichaha ema Pablo te Tem-

plo, náimahapa éma. Tacahe, náimiyusemacapa namutu ena achaneana. Nacaratacapa ema Pablo.

<sup>28</sup> Tipiaracanapa:

—¡Tátanaveana israelítana! ¡Yare, ímicatacahavi! Émara ema maca achane ema tipaicahi tamutu avasareana. Tímiturecapahi nayehe ena achaneana eta macontrachirahi eta viávasa. Énerichuvare macatianacahi eta mayeherepi ema Moisés, étapa eta juca viyehe Templo. Puiti macasiapavare te juca Templo ema apavasanatataji. Majararecapa eta juca tacapicahuquenehi —nacahepa.

<sup>29</sup> Ena nayunacahi eta juca, taicha náimahahi te calle ema Pablo macachanepahi ema Trófimo ticavasahi te Efeso. Náimijachahi mámahí ema Pablo te tajuhe eta Templo.

<sup>30</sup> Tacahe, tijúnapacarajánapáipa namutu ena achaneana te tajuhe eta avasare. Ena ticatianacanahi ema Pablo nacaratacapa éma, nachururupaicapaipa eta nacuchusirahi tayehe eta Templo. Tacahe, ena apamuriana náeratacavanepa eta tapajacura eta Templo.

<sup>31</sup> Navarahapa nacapacavaneyarehini. Masámairiricavá nepaséra ema comandante nayehe ena suntaruana, tatiarihírahi eta revolución te tajuhe eta avasare.

<sup>32</sup> Tacahe, ema comandante máichuhapa ena masuntarurana énapa ena officialeana. Tiyananapa tijunapanapaipa. Ena achaneana, te náimahapa eta máitecapauchirahi ema comandante, náinajicapa eta náehairahi ema Pablo.

<sup>33</sup> Tacahe, ema comandante mapauchapa ema Pablo, macavanairipipa nacarataca, náitiacapa te apipi cadena. Tásiba, mayaserecapa te nájahahipuca, tájahapuca maviurevahí.

<sup>34</sup> Énasera ena achaneana tipiaracanarichucha, apapipijipa eta nacayema. Vaipa mácaicutiarahini ema comandante tájahapuca eta nacayemahi taicha eta najajasirahi. Tásiba, macavanairipipa náma te cuartel.

<sup>35</sup> Ticajerahisera eta nápanirapaipa te tayehe grada eta cuartel. Nanaracuhapa ema Pablo, taicha ena achaneana navarahaichucha nacapacavane.

<sup>36</sup> Taicha namutu náehicapahi tipiaracanapaipa:

—Máepenávanetataji —nacahepa.

<sup>37</sup> Te tisiapanayarepa te tajuhe te cuartel, ema Pablo máichapa ema comandante:

—¿Písapanupuca néchajica?

Tacahe, ema comandante majicapapa:

—¡Jéhepuca, píti pítuca péchajica te véchajiriruva griego!

<sup>38</sup> Tacahe, ¿váhiyara pítina ema ticavasa te Egipto, ema tíchahi eta revolución ticaeteharecahi cape juca viásinequenehi, ema majunaquenehi tiámamurihahi te mávapahi ena cuatro mílqueneana ticapahiana? —máichapa.

<sup>39</sup> Tacahe, ema Pablo máichapa:

—Vahi nútina, tata. Nútirichu israelítanu. Eta núchusine te Tarso. Tavanaranu eta ichape avasare capital te Cilicia. Picatajicanusera písapanu néchajicaya nayehe ena achaneana —máichapa.

*Téchajicapa ema Pablo te namirahu ena achaneana*

<sup>40</sup> Tacahe, ema comandante másapapa téchajica. Titupihapa ema Pablo te tayeha grada eta cuartel. Tacahe, macanuquechapa eta mavahu, macamatinacapa ena achaneana. Te timatinanapa, tépanavapa téchajica eta náechajiruva ena m Janeanana, ánipa macahe:

## 22

<sup>1</sup> —Tátanaveana, nuparapenaveana. Esamanuchaha eta néchajisiraheya nucatiuchiravaya —macahepa.

<sup>2</sup> Tacahe, te nasamapa eta máechajisiravacahi te náechajiruva, tésamirimuriávanapa ticasamarahianapa. Tinahacavapa téchajica ema Pablo, máichavacapa:

<sup>3</sup> —Nútirichu ejaneana, israelítanu. Eta núchusine te avasare Tarso tayeha capital eta Cilicia. Ánipasera nujurusinehi te juca viávasa Jerusalén. Ema tímitucanuhi ema víyacara Gamaliel. Nujuruchahi eta nupicauchirahi yátupi eta viyeherepi náijararuhamihi ena viáchucanaveanaini. Eta nítaresirahi, nímicapicáuchahi ema Viya, tacutihi puiti eta ímicapicáuchirahi éti te juca sácheana.

<sup>4</sup> Eta nítaresirahi, nucatianacavacainihi ena téhicanahi ema Jesús. Nupresuchavacahi nucasiapavacahi te cárcel ena ajairana énapa ena esenana. Nímicapacavacahi éna.

<sup>5</sup> Tímatinuanarichuhi namutu ena aquenucarahana émapa ema corregidor. Taicha éna tíjaracanuanahi eta órdene nayeheya ena vijaneanana ticavasanahi te Damasco, náimicasasiranuyare eta nucaratasisraya ena téhicanahi ema Jesús. Tacahe, nuyanapa népanavacayarehini éna, ticaemecharahianayarehi.

*Ema Pablo mametacavacapa eta máehisirahiva éma apanava ema Jesús*

*(Hch 9.1-19; 26.12-18)*

<sup>6</sup> Tacahe, eta nupaisirapahi te achene, nánehiripa eta avasare Damasco. Te jena las dócequeneyárepa sache, tiáramicarepa eta tijarahi timícauchanuhi tiásicha te anuma.

<sup>7</sup> Náquipaicavapa te apaquehe. Nusamapa ema téchajicanuhi, máichanupa: “Saulo, Saulo, ¿tájaha tacayema picatianacanu pipánájiricanu?”

<sup>8</sup> Tacahe, nuyaserecapa: “¿Nájahavi piti tata?” níchapa. Tásicha, tijicapanupa: “Nuti Jesús Nazareno, nuti picatianaruhi, eta pipánájirisíravaca ena téhicanuanahí” máichanupa.

<sup>9</sup> Énerichuvare ena téhicanuanapahi náimahahi eta tijarahi timícauchanuhi. Tiáramecanarinehivare éna apanava. Váhisera nácaicutiarahini ema téchajicanuhi.

<sup>10</sup> Tacahe, nujicapapa nútì: “¿Tájahasica níchayare, Tata?” Tásicha, ema Viya máichanupa: “Péchepuca, piyana pítécapa te avasare Damasco. Ánaqui mararihi ema timetacaviyare tamutu eta pématanerepiyare pítauchaquenéyare nuyehe” máichanupa.

<sup>11</sup> Tásicha, púchuquinupa taicha eta tijarahi. Tacahe, ena nucompañeroanapahi tiámanuanapa tichurucanuanapaipa te nuvahu, nacaitecapiranupa te avasare Damasco.

<sup>12</sup> Eta ánaqui, matiarihihi ema émana vijaneana ticajare Ananías. Tíaurahi éma tayehe eta mavanairipiana ema Moisés. Namutuhi ena vijaneanana ticavasanahi te Damasco nacunachahi éma.

<sup>13</sup> Títecapa ema Ananías, tímahapananuhi. Te títecapanauchanupa, máichanupa: “Nuparape Saulo, tachava eta pímairi-risira”. Tacahe, tíjahúchavapa nímairirica. Nímahapa éma.

<sup>14</sup> Tacahe, máichanupa éma: “Ema Viya nacasiñaquenehi ena viáchucanaveánaini, píti manerejiruvihi taicha mavarahahi tímimatichaviya eta mapanereru. Énerichuvare mavarahapa tímimatichavi ema máuriquene Cristo, émaquenehi téchajicavíhi eta cape.

<sup>15</sup> Péchajisihayare éma eta picametarairuirayare nayehe namutu ena achaneana picainunaqueneanaya. Pimetacayare eta juca pímairahi étapa eta pisamirahi éma.

<sup>16</sup> Tiuri puiti, enevane picaicachasiya te máijare ema Viáquenu Jesucristo. Picasíñava mayehe eta tacasipairaya eta pipecaturana” máichanupa ema Ananías.

*Ema Pablo mamevacacapa eta macavanahirahi nayehe ena apavasanana*

<sup>17</sup> Tásicha, te nuchavapa ani te Jerusalén, nítecapa ani te juca Templo. Te nuyujaracaipa, tiápechanuvarepa téchajicanu ema Viya.

<sup>18</sup> Eta nímairahi éma, máichanupa: “Piyayauchavayare eta piúchusiraya te juca Jerusalén, taicha vahi tisuapavianaimahi eta péchajisiháiranuya”.

<sup>19</sup> Tacahe, nútí níchapa: “Tiuri, Tata. Énasera, tímatinuanahi eta néstarasiravacahi nupresuchiravacahi ena téhicavianahi. Tamutuhi te nárujisirarevana nutanusihavacapahi éna.

<sup>20</sup> Énerichuvare, te nacapacapa ema Esteban ema pivana-rainihi, nutiarihihivare. Nímicatacachivare ena ticapacanahi, nujaneasiravacahi eta namuirihana. Tijuricatipuca nasamararacanu eta numetasiravaca eta péchajisiranuhi” níchapa.

<sup>21</sup> Émasera ema Viáquenu tipamicanuichucha: “Piyanaya-resera. Núti nuvanecavi pipaicayare nayehe ena apava-sanana ticavasanahi te tayerehiqueneana” máichanupa.

<sup>22</sup> Tacahe, ena achaneana, eta nasamirahi eta juca, vaipa návarahahini nasamararaca. Tisemanapaicha. Tipiara-canapa:

—Tiúripana máepenachucha ema maca achanetataji. Vaipa táuricahini máitarecaríchahahíni —nacahepa ena mánarana ema Pablo.

*Ema comandante macasiapapa te tajuhe ema Pablo*

<sup>23</sup> Muracapanapa eta napiarasira. Tivejamuhiacavanapa eta nacamisana eta nasemaneva. Navehavare eta máteji. Náevajasica ema Pablo.

<sup>24</sup> Tacahe, ema comandante macavanairipipa nacasiapa ema Pablo te tajuhe eta cuartel. Macavanairipivare náestaca, mavarairahi máimicaecherachaya ema Pablo eta maviure-vahi, tájahapuca tacayemahi eta nasemirahi ena achaneana eta mayehe.

<sup>25</sup> Étasera te náitiacayarepa eta náestasirayarehi, téchajiu-chavanumapa ema Pablo eta mayehe ema nacapitara ena suntaruana. Máichapa:

—Núti tavanaranuhi eta viávasa Roma. Picunevachucha, machu péjecapava eta péstasiranu, vuíchaha táimaticarehini eta nutapiravapuca —máichapa.

<sup>26</sup> Te masamapa ema nacapitara eta juca, tiyanapa mametaca ema comandante. Máichapa:

—Péchapavachucha eta pivarairahi pé mestareca ema maena achane. Taicha tavanaráji eta Roma —macahepa ema nacapitara.

<sup>27</sup> Tacahe, ema comandante tiyanapa mapaukahai ema Pablo. Máichapa:

—¿Yátupisaréji tavanaravi eta Roma? —macahepa.

Ema Pablo majicapapa:

—Yátupi —máichapa.

<sup>28</sup> Tásicha, macahepa ema comandante:

—Núti, ichapemuri plata náquijica eta nusiapirayare eta tavanaranuirayare eta Roma. Píti, ¿tájahapuca eta pítujisi-ravahi eta pisiapirahi? —máichapa.

Ema Pablo máichavarepa:

—Núti tavanaranuhi eta Roma taicha étarichuvare náuchusinehi ena ticachichananu —máichapa.

<sup>29</sup> Tacahe, térajijicavanapa ena téstacanayarehini ema Pablo. Émaripa ema comandante, te máechapa eta tavanarairahi eta Roma, tipicarinehi eta máitiasirahi.

*Ema Pablo námapa te namirahu ena aquenucarahana*

<sup>30</sup> Te apanapa sache, ema comandante mavarahapa máechayare tájahapuca eta maviurevahí ema Pablo eta nayehe ena majaneanana. Mavejapuacapa eta cadenana máitihanahi. Macurujicapa ema corregidor énapa ena aquenucarahana. Tiyanapa mámahi ema Pablo, macatupihapa te namirahu.

## 23

<sup>1</sup> Tacahe, ema Pablo máesenimurihana ena aquenucarahana, máichavacapa:

—Nuparapenaveana. Núti eta nítaresirahi puíticha juca nucahehi, tájina níchiraváinahi eta nusamiravahí te mamirahu ema Viya —macahepa.

<sup>2</sup> Ema corregidor Ananías, tisemapa eta masamirahi eta máechajiruvana ema Pablo. Macavanairipipa ena titupihanahi te machacaya ema Pablo. Máichapa:

—¡Ésapajacacha ema mácatátaji!

<sup>3</sup> Émasera ema Pablo majicapapa:

—¡Pítira téhavyare ema Viya, táichavene eta apimirairavi! Te juésvihipuca píti eta péjasirahi eta te jara, tatuparacavi pímatinuma te tatarihipuca eta néjecapirava apaesa pémehanu. ¿Tájaha tacayema eta juca pivanairipihi? —máichapa.

<sup>4</sup> Ena apamuriana achaneana natiarihiqueneanahi náichapa ema Pablo:

—¿Tájaha tacayema piácapaemacha ema corregidor, macapicahuquenehi tiyujaracarahi mayehe ema Viya? —náichapa.

<sup>5</sup> Ema Pablo majicapapa:

—Tátanaveana, eperdonachanu. Vahi néchahini eta émairahipuca corregidor, macapicahuquenehi tiyujaracarahi. Tájina nímatiya nucajachareca ena tuparairucana, taicha nusuapa eta máechajiruva ema Viya. Ani tacahe: “Vahi picucajacha mácani tuparairuca tayehe eta piávasa”.

<sup>6</sup> Tacahe, ema Pablo máimativacapa ena aquenucarahana, natiarihirahi ena saducéoana, énapa ena apamuriana fariséoana. Tásicha, tijaranupa eta máechajisirahi:

—Nuparapenaveana. Nútirichuvare fariséonu. Énerichuvare ena ticachichananuana fariséoanahivare. Ecatupiacanühi te juca emirahu táichavenehi eta nucuchapirahi eta véchepusiraya te tääequenenapa eta vépenira —máichavacapa.

<sup>7</sup> Te nasamapa eta juca, ena fariséoana énapa ena saducéoana típutsimuriávanapa, napanerequenehapa.

<sup>8</sup> (Taicha ena saducéoana, vahi nasuapa eta náechepusiraya ena náepenaqueneana; váhivare nasuapa eta natarihirahi ena ángeleana; váhivare nasuapa eta tatarihirahi eta náchaneva ena náepenaqueneana. Énasera ena fariséoana nasuapa tamutu eta juca.)

<sup>9</sup> Tacahe, téchajicanapa muraca. Tacahe, te nataracu ena fariséoana, natarihihi ena escribánoana. Téchepucana. Nacahépa:

—Ema maca achane, tájina matapiravaina. Éneserapuca täächajicahi eta máchaneva ema Jesús, ángelepuca mácani. Vahi vicucanara ema Viya —nacahepa.

<sup>10</sup> Tacahe, ichape eta semanere. Tíñepipa náicha. Tacahe, ema comandante, eta máimairahi eta nasemavahi, tipicanecha tájahapuca náicharacahini ema Pablo. Tásiba, máimichuhavanepa ena suntaruana navehana ema Pablo, náimijunijicapa te namirahu ena mánaranahi. Náimichavavárepa ema Pablo te cuartel.

<sup>11</sup> Tásiba, te jena yátiquenehi máechajicapa ema Viya ema Pablo, máichapa:

—Túmevinachucha, Pablo. Taicha tiúrihi eta péchajisihairahi eta njare te juca Jerusalén. Puiti piyanayare eta te Roma, éneyareichu tacaheyare eta péchajisiraya —máichapa.

### *Napanerechapa eta nacapasiraya ema Pablo*

<sup>12</sup> Te apanaqueñepa sache, natarihihi ena apamuriana napanerechapa eta nacapasiraya ema Pablo. Nacahepa eta náechajiriruvahi:

—Tacamunurine máepenavane ema mácatátaji Pablo. Tásiba puiti, víti vinacaya eta juca vícutiaraya. Vuíchaha vinicaimahi, vuíchahavare vérainahi, machu vásapiha vicaicuña me Viya te vahi vicuitaucha eta juca vianereruhi. Tiámainucava te víturucapa vicapaca ema maca, vinicapa —nacahepa.

<sup>13</sup> Náetavicahipuca cuarentana ena ajairana, ena tíjaracavanahi ticaechajiriruvanahi eta juca.

<sup>14</sup> Tacahe, tiyananavarepa nayehe ena tuparairucana. Náichapa:

—Víti víjaracavapa eta vítaequenéháiraya ema mácatátaji Pablo. Vinacaripa eta juca vícutiaraya. Vuíchaha vinicaimahi,

vuíchahavare véraimahi, machu vásapiha vicaicuña me Viya te vuíchaha vicuitaucha eta juca vipanereruhi.

<sup>15</sup> Tacache, puiti eti tuparairucana eyaseacayare ema comandante máma achichu te emirahu, etanuca eta etserarina macayaserehi ema Pablo eta juca máichavaquenévahi. Tásiha, víti vitsecavayare eta vicapasirayare éma te vímahapa máuchuca —náichapa.

<sup>16</sup> Tiuri, matiarihi ema suchicha esu maparape ema Pablo. Masamairiricapa eta juca. Tiyanapa te cuartel mametapana ema Pablo.

<sup>17</sup> Tacache, ema Pablo máichuhapa ema nacapitara ena suntaruana, máichapa:

—Piáma ema maca amaperu te mamirahu ema comandante. Jucarihi eta juca mametacaya —máichapa.

<sup>18</sup> Tásiha, ema nacapitara mámapa ema amaperu mayehe ema comandante. Máichapa:

—Ema máena macaerataquene Pablo tiyaseacanuhi náma eta piyehe ema maca amaperu. Jucarihiji eta timetacaviya —máichapa.

<sup>19</sup> Tacache, ema comandante macaratavauchapa ema amaperu, mámapa máiputsiacapa. Tásiha, mayaserecapa, máichapa:

—¿Tájahasica eta pimetacanuya?

<sup>20</sup> Ema amaperu máichapa:

—Nararihi ena nujaneanana navarahahi nacapaca ema nécuca. Achichu tiyaseacavianayare piama éma te namirahu ena tuparairucana te cabildo. Nacaetseraruya ticayaseserehiyare eta juca máichavaquenévahi.

<sup>21</sup> Váhisera picusuapavaca taicha cuarentana ena ajairana ticuchapanahi te picuchucapa éma, nacapacayarepa. Taicha najurachahi eta nacapasiraya ema Pablo, tásiha napaenumavainapa te náitauchapa eta napanereruhi, tinipananainapa. Puiti éna, pítinecha nacuchapahi te pisuapayarepuca éna —máichapa ema amaperu.

<sup>22</sup> Tacache, ema comandante macahepa:

—Tiuri, piyana te pipena. Nacuijasera picumetaca eta juca pimetarunuhi —macahepa.

*Ema comandante máevatacapa ema Pablo mayehe ema Prefecto Félix*

<sup>23</sup> Tiuri, ema comandante máichuhapa ena apinana nacapitarana ena suntaruana. Máichapa:

—Etsecayare ena docientoana suntaruana tiámanaya eta espada, docientoanavare ena tiámanaya eta lanza, setentana ena ticaperanayarepahi. Enápanayare ema Pablo te Cesarea. Iúchuca puiti te las nueve yati.

<sup>24</sup> Énerichuva etsecayare étanaina cavayu maperainapahi ema Pablo. Táurisera eta iámirainapahi. Íjaracaya ema Prefecto Félix –máichavacapa.

<sup>25</sup> Tacahe, máimiamarecavarepa eta carta. Eta juca táechajiriruvapahi eta carta;

<sup>26</sup> “Nuti Claudio Lisias nímiamareca eta juca carta piyehé piti piúriquene excelentísmo aquenuca. Néchajicavinuma tatiya.

<sup>27</sup> Jucarihi eta juca téchacarehi. Ena israelítana nacaratacahi ema émana achane ticaijare Pablo. Navarahahi nacapacaya. Étasera te néchapa nútí tavanarairahi éma eta Roma, nuyanapa námahi ena nusuntarurana nucatiuchapanapa.

<sup>28</sup> Eta nuvarairahi necha eta maviureva, námapa te namirahu ena tuparairucana israelítana te juca.

<sup>29</sup> Nímahapa tájina matapiravainahini táimicacahini táemeratacaphipucáini te cárcel. Étachuchanénipuca tímicatichahi eta nayeherepiana.

<sup>30</sup> Tásiha, nusamairiricavarepa eta nacamesairayarehi nacapaca. Tacahé, nímiamarecapa puiti eta piyehe. Énerichuvare nuvanecahi ena timetauchanahi náiteca ara piyehe, étaina macayaserehiya.

Tamutupa eta juca néchajiriruvanahi piyehe".

<sup>31</sup> Tacahé, ena suntaruaña náitauchahi eta vanairipi. Námapa ema Pablo te jena yati. Títecapanapa te avasarechicha ticaijare Antípatris.

<sup>32</sup> Étapa nachavinehi te apanapa sache ena suntaruana ena tipaicanapahi. Énasera ena ticaperana tímiyanavánapa eta nanapaniraya ema Pablo.

<sup>33</sup> Tacahe, te títecapanapa te Cesarea, náijaracapa ema prefecto eta carta, émapa ema Pablo.

<sup>34</sup> Te tamutupa eta máechajicuirahi eta carta, ema prefecto mayaserecapa ema Pablo:

—¿Táviha eta piúchusine píti? —macahepa.

—Núti núchusine te Cilicia —máichapa ema Pablo.

<sup>35</sup> Tacahé, ema prefecto máichapa:

—Tiuri, véchayare te náitecapa ena piánarana —máichapa.

Tásiha, macavanairipi macajaneha te palacio máepiya-ruinihi ema ichavicaini Aluresi.

24

*Téchajiuchavapa ema Pablo te mamirahu ema Félix*

<sup>1</sup> Te taequenepa eta cincoquene sache, titecapanapa te Cesarea ena tuparairucana tiásihanahi te Jerusalén. Matiarihihi ema

Ananías corregidorhi, énapa ena apamuriana náiyacaranahi. Matiarihipahiva ema abogado ticaijare Tértulo. Tiyananapa mayehe ema prefecto, timetaurecanapa.

<sup>2</sup> Tacahe, náepanapa ema Pablo. Te títecapapa, tépanavapa téchajicapa ema Tértulo, ánipa macahe:

—Vihasulupayachavi, tátachicha Prefecto, eta viúrivahi pícha. Tájina víchiravainahini eta pítusirahi, pijaneacahavi eta juca aquenucairavihi eta viyehe.

<sup>3</sup> Vimutu viti achaneana te avasareana, tamutuvare sácheana vicunachavihi. Vihasulupayachavihi, tátachicha Félix, eta piúrивahi eta viyehe.

<sup>4</sup> Picatajicahavi, tata, pisamahavi. Vahi picuyacujihavi eta juca viyasearuvianaya.

<sup>5</sup> Puiti vímatipa ema maca achanetataji, tihapapirahi éma. Tamutu avasareana te jácani viávihapahi viti israelítana, mayurucavaca ena vijaneanana. Émarichuva tachutirihahi nayehe ena téhicana ema Jesús Nazareno.

<sup>6</sup> Énerichuvare mavarahapa máechipejicayare eta tacapica-huquene Templo. Eta tacahehi vicaratacapa. Vícuñacayarehi taicha tacahehi eta tavanesirahavihi eta viyehe ley.

<sup>7</sup> Émasera ema comandante macatiuchapa tiverejimirau-chahavipa taicha camuriana ena masuntarurana.

<sup>8</sup> Tásiba, máichahavipa: “Te evarahapuca emetaucha ema maca, eyana te mamirahu ema viáquenuruha Prefecto” máichahavipa. Tiuri, puiti vitupiruvahi viti eti vimetasiravi. Te pivara, picayasesereru éma eti yátupirahi eti máichavaquenevahi ema maca eti vimetauchirahi puiti — macahepa ema Tértulo.

<sup>9</sup> Tacahe, ena apamuriana natarihiqueneanahi, énerichuvare nacahehi:

—Yátupi eti juca máechajiruvanahi —nacahepa namutu.

<sup>10</sup> Tacahe, ema prefecto máimicutiarachapa máechajiuchava ema Pablo. Tépanavapa téchajica ema Pablo, ánipa macahe:

—Tájina táichava néchajiuchavaya te pimirahu taicha néchahi nuti ánaquíparipa eti juéseravihi tayehe eti viávasa.

<sup>11</sup> Tiúripana picayasesereru. Núti, dóceravahi sache eti nítecapirahi te jena viávasa Jerusalén eti néjirairayarehi ema Viya.

<sup>12</sup> Nájina nucájachaquenéna. Nájinavare nímiyusemaruina te tajuhe eti Templo, étaripa te nárujisirareva ena nujaneanana. Téhepucaini cálleana nucajacharecahini.

<sup>13</sup> Ena nani ticatianacanuana, tájina naviya náetserarui-nahini eti nametauchiranuhi. Vaipa tisuapacareana.

<sup>14</sup> Ena nani náimijachahi vahi nétupicava eti nímituresirahi. Nútisera nusuapa tacutihi eti nasuapirahi namutu ena

viáchucanaveanaini. Émarichuhi nucasiñahi ema Viya, ema nacasiñaquenehivare ena viáchucanaveanaini. Núti nusuapahi tamutu eta táchajiriruva eta Sagrada Escritura.

<sup>15</sup> Núti nucasiñavahi mayehe ema Viya, nucuchapavahi eta véchepusiraya te vécari vimutu viti matapiravareanahi, énapa ena ticatapiravana. Puiti, énaripa ena timetauchuananahi ticutinuanahi eta nasuapirohi eta macaechepusiraya ema Viya ena náepenaqueneana.

<sup>16</sup> Núti, eta nusuapirohi tamutu eta juca, vahi návarahahini néjecapavahini te mamirahu ema Viya. Váhivare návarahahini néjecapava te namirahu ena achaneana.

<sup>17</sup> Tiuri, camuripa áñoana nupaisirahi. Tacahe, nuchavapa te návasa Jerusalén. Náminapahivare eta nanicavachaya ena nujaneanana páureana. Énerichuvare nucamavahupahiva me Viya.

<sup>18</sup> Te tamutupa eta tacasipairahi eta náchaneva étapa eta nuvahuana, nuyanapa te Templo eta nunapanayarehi eta námavahuana me Viya. Eta návihirahi te Templo, tichimapuanapa ena nujaneanana tiásihanahi te departamento Asia. Nájinaserachaneanahini nachimapahini te nuchacaya. Váhivare náimahanuini nímiyusemacavacahini ena achaneana.

<sup>19</sup> Ena nani nujaneanana tiásihanahi te Asia, énara títecanayarehini timetaurecana, te tatiarihinahipucaini eta nuviureva.

<sup>20</sup> Piyasereca ena nani natarihiqueneanahi puiti, te námicaecherachapuca eta nubiurevahi te ticatupiacanuanapa te namirahu ena tuparairucana.

<sup>21</sup> Téheserapuca eta tímicaviuchanuhi eta numetasiravacahi éna: “Puiti juca sache ecatupihanuhi te juca emirahu táchavenehi eta nusuapirohi eta véchepusiraya te táchavenénapa eta vépenira” níchavacapa núti –máichapa ema Pablo.

<sup>22</sup> Émasera ema Prefecto Félix máecharipahi tamutu eta náehisirahi ena achaneana ema Jesús, étapa eta táurivahi eta nayeherepiana. Tásiha, te tamutupa eta náechajirisiravahi, máichavacapa:

—Tiuri, táchameine achichupaine vélcha eta juca, te máitecapa ema comandante Lisias. Nuyaserecaya éma eta juca íchavacuenevahi éti –máichavacapa.

<sup>23</sup> Tacahe, ema prefecto Félix mavanecapa ema mayehe capitán máimichava te palacio ema Pablo. Macavanairipivare vahi nacuerataca, táuri eta manarasiraina. Táuri eta náechajirisiraina ena vichamuriana, téjiranayarepahi.

<sup>24</sup> Te jena sácheana, tiyanapa ema Félix te apana avasare. Te tichavapa, mámapa esu mayena ticaijaro Drusila. Ésuri-chuhivare israelita. Náimichuhapa ema Pablo, téchajiricava-

nayare. Tacahe, ema Pablo mamevacapaceta táicharacavahi eta máehisirahi ema Jesucristo.

<sup>25</sup> Eta máechajirisiravahi ema Pablo, máichavacapa:

—Te ecasiñava me Jesucristo, éhicavare eta máimiturapiana, tiperdonachaheyare ema Viya. Matapiravarehena te mami-rahu. Énerichuvare, tiúrinapa eta ítaresiraya, eratahainapa ecaratacavayare. Puiti, táuricapa ecasiñavavane, taicha járajapa eta sácheyare nacayaserehirayare nácani ticatapiranah. Ticaicuñanainapa te yucu —máichavacapa ema Pablo.

Te masamapa eta juca ema Félix, tipicarinehi. Máichapa:

—Tiuri, taratapa puiti eta juca. Nuvarahasera nápechavaya nusamararacavi. Te apahenavare nímichuhaviyare —máichapa.

<sup>26</sup> Ema Félix ticuchapavahi te máijaracayarepuca eta plata ema Pablo eta máuchucuiraya. Eta tacahehi máimichuhaparacahi téchajiricavanayarehi.

<sup>27</sup> Váhisera máuchucuhahini ema Pablo, taicha ema Félix mavarahahi tiúriyarehi nayehe ena israelítana. Apina año eta tayerevah. Ticaitsivanacha ema Félix. Tisiapapa ema Porcio Festo, émapavapa prefectohi.

## 25

*Nacatupiacapa ema Pablo te mamirahu ema Festo*

<sup>1</sup> Te émapavapa aquenucahi ema Festo, te mapanaquenepa sache, tiyanapa te Jerusalén.

<sup>2</sup> Tacahe, ema corregidor énapa ena apamuriana tuparirucanah, ticurujicacanapa mayehe ema aquenuca Festo. Nametauchapa ema Pablo.

<sup>3</sup> Nayaseacapa ema Festo macátajicavacahini eta máevataca te Jerusalén ema Pablo. Taicha navarahahititsecavanayarehi te achene eta nacpasiraya.

<sup>4</sup> Émasera ema Festo majicapapa:

—Tiuri, ema Pablo ticaeratahi te Cesarea. Núti achichupaichu nuyanayare nuchavaya tayehe.

<sup>5</sup> Eta tacahe, te tatiarihipuca eta échaqueneanahi eti tuparirucana, tiúripana éhicanu te Cesarea apaesa vecha te ticaviurevhipuca ema maena achane —máichavacapa.

<sup>6</sup> Te tiánehipa eta diésquene sache eta mávihairahi ema Festo te Jerusalén, tichavapa te Cesarea. Te apanapa sache téjacapa tayehe eta mávacure. Máimichuhapa ema Pablo.

<sup>7</sup> Te títecapapa ema Pablo, tisiapapa te mamirahu ema Festo. Témeñahavanapa ena mánarana tiásihanahi te Jerusalén. Timetaurecanapa ema Pablo. Camuri eta máejecapiravahiji. Ichape eta maviurevahiji nayehe. Tájinaserahaviyahini eta náetserarúinahíni.

<sup>8</sup> Émasera ema Pablo máichavacapa eta macatiuchiravahi:

—Núti tájina nutapiravaina tayehe eta nayeherepiana ena nujaneanana, étainapucáini eta Templo, émainahivarepucáini nucaecahi ema ichapequene aquenuca Emperador —máichavacapa.

<sup>9</sup> Émasera ema Festo, énerichuhivare mavarahahi tiúriyare nayehe ena israelítana. Tacahe, mayaserecapa ema Pablo:

—¿Pivarahapuca piyana te Jerusalén, étaina tacaechacasiya te numirahu eta juca píchavaquenévahi?

<sup>10</sup> Tacahe, ema Pablo majicapapa:

—Étaripa návhahi puiti te pimirahu píti viyehe juez manacaquenevihi ema Emperador. Pítipa tituparacavi picuchucuhanuyarehi taicha pécharichuhi píti tájina nuviurevainahini nayehe ena nujaneanana.

<sup>11</sup> Téheserapuca nucaviurevahini, táimicapanuríne eta nuviureva. Vahi nucatiuchavaimahi. Tájinaserá nuviurevaina eta nametauchiranuhi ena nani. Váhivare tituparacavi pijararecanuhini eta nayehe ena nani. Téheserapuca te vahi picuaiticanu, nuyasesereca puiti nuyana te mamirahu ema Emperador. Étaina nucametauchacasiya mayehe —máichapa ema Pablo.

<sup>12</sup> Tacahe, ema Festo macayasesererupa nayehe ena mayeheana abogado. Tásiha, máichapa:

—Piti Pablo, piyaseserecahi piyana te mamirahu ema Emperador. Nísapavi piyana —máichapa.

### *Títecapapa ema rey Agripa, ésupa esu Berenice*

<sup>13</sup> Te jena sácheana, títecapapa te Cesarea ema rey Agripa, ésupa esu Berenice. Náechajipanayarehi ema Festo.

<sup>14</sup> Eta nanasiquenerahi te jena sácheana, ema Festo mametacapa ema rey eta máichavaquenévahi ema Pablo. Máichapa:

—Mararihi ani ema achane ticaeratahi ticajare Pablo. Manaquiruhi ema Félix.

<sup>15</sup> Te nuyanapa te Jerusalén, ena tuparairucana timetacuanapa eta máichavaquenévahi, tiyaseacanuanapa eta nímicasiraina.

<sup>16</sup> Tásiha, núti nujicapavacapa: “Viti aquenucarohana tayehe eta Roma, vahi tituparacahavi vímicapacahini mácani ticametauchacasihi te vuíchaha ticamirahucacanahi ema mánarahi” níchavacapa.

<sup>17</sup> Tacahe, te títecapanapa ani, vahi náyererejihini núti. Te apanaquetunepa sache néjacavanepa te návacure, nímichuhapa ema Pablo.

<sup>18</sup> Núti nímijachapa ichape eta maviureva. Étasera eta nametauchirahi, tájina vahi táñepihini.

<sup>19</sup> Étachuchanénipuca tímicaviuchahi eta nayeheana religión. Émapa ema náehiruhi ticaijarehipuca Jesús, ema mácani tépenahi. Puítisera ema Pablo máechajisihahi eta mápechiravahi titareca.

<sup>20</sup> Núti vahi nímatiequeneha eta táicharacavaya eta juca. Tacahe, níchapa ema Pablo: “¿Pivarahapuca piyana te Jerusalén, étaina tacaechacasiya eta juca píchavaquenévahi?”

<sup>21</sup> Émasera tiyaseuchavapa eta mayaniraya te mamirahu ema Emperador Augusto. Tacahe, nímvianerecapa macajaneha tiámainucava te nítujicava nímvianerecapa nanapaná mayehe ema Emperador –máichapa ema Festo.

<sup>22</sup> Tacahe, ema Agripa máichapa ema Festo:

—Núti apána nuvarahasa nusamaini ema mácará achane –máichapa.

Tacahe, ema Festo máichapa:

—Tiuri, achichu pisamaya éma.

<sup>23</sup> Tacahe, te apanapa sache tisiapanapa ema Agripa ésupa esu Berenice tayehe eta náejasirare ena aquenucana. Tiúrina eta náitecapira. Jánunuhacavaca eta namuirihana. Énapa ena aquenucana tachutirihana nayehe ena militáreana énapa ena tuparairucana tayehe eta avasare. Tacahe, ema Festo máimichuhapa ema Pablo.

<sup>24</sup> Tacahe, téchajicapa ema Festo, ánipa macahe:

—Tata Rey Agripa. Tátanaveana. Emutu eti etiarihiqueneanahi te juca viúrujisirávahi. Mácahi ema maca achane nametaurehi ena majaneanana eta nuyehe, ánaqui te Jerusalén, étapa ani te juca Cesarea. Nararihi camuriana navaraha náimicapaca ema maca.

<sup>25</sup> Nútisera tájina nímaha matapiravaina táimicpacahini. Émasera tiyaseuchavapa tiyanayare te mamirahu ema Emperador Augusto. Nísapahisera mayana eta mayehe.

<sup>26</sup> Vuíchahasera nucajurehini ema náquenu Emperador, taicha tájina nuviyahini eta matapiravainahini. Puítisera nucatupiha éma te pimirahu piti rey Agripa, étipa eti tátanaveana. Nuvaraha ímicatacanu eta táicharacavaya eta juca, apaesa nucajurepainti ema Emperador.

<sup>27</sup> Taicha vahi tiuri vévataca ema présuhi te tájina matapiravaina –macahepa ema Festo.

## 26

*Ema Pablo téchajichavapa te mamirahu ema rey Agripa. Mametacavacapa eta máitaresirahi te vuíchaha máehicahini ema Jesús.*

<sup>1</sup> Tacahe, ema Agripa máichapa ema Pablo:

—Tiuri, nímaha péchajica –máichapa.

Tacahe, ema Pablo macanuquechapa eta mavahu. Tépanavapa téchajica, ánipa macahe:

<sup>2</sup> —Tiúrisamurécare eta nítujisiravahi néchajica te pimirahu, piti rey Agripa, eta nucatiuchiravaya nuti apanava eta juca nametauchiranuhi ena nujaneanana israelítana.

<sup>3</sup> Núrisamure ichape taicha píti pímatihí tamutu eta juca viyeherepiana viti israelítana, étapa eta véchapajirisirahi. Eta tacahe, nuyaseacavi puiti pisamanu eta nucayemaya. Pácyeho paciencia nuyehe.

<sup>4-5</sup> Eta námaperuvahí nuti, fariséonuhi te návasa núchusinehi étapa te Jerusalén nujurusinehi. Néhicahi eta viyeherepiana viti israelítana eta nítaresirahi. Nucachanevacahi ena fariséoana ena tipícauchacareánapána. Namutu ena nuchajuruuanahi tímatinuanahi eta nítaresirahi. Ena titametacavianaya eta nítaresirahi.

<sup>6-7</sup> Puiti ticatupiacanuanahi te pimirahu, piti rey, táichavene eta vicuchapiravahi eta macaecheperusirahaviya ema Viya te vépena, taicha tacahehi eta máechajiriruvahí nayehe ena viáchucanaveánaini. Vimutu viti tachichanaveanahi eta viávapairu Israel, vimutu vicuchapavahí eta juca taitauchiravaya eta máijararuhaviya ema Viya. Eta tacahehi, tamutuhi sácheana, yátiana vítatihi ema Viya, viyujaracahi mayehe. Táichavenehi eta nucuchapiravahí nuti, timetauchanuanahi ena nujaneanana.

<sup>8</sup> Tiuri puiti éti, németeaca tisuapacarehi eyehe eta macaecheperusiraya ema Viya ena náepenaqueneana.

*Ema Pablo mame tacavacapa eta mapánajirisíravaca ena téhicanahi ema Jesús*

(Hch 8.1-3; 9.1-2)

<sup>9</sup> Nútiripa acane nímijachahi nétupicava eta me Viya eta níchaqueneánahi nucatianasiravacahi ena téhicanahi ema Jesús Nazareno.

<sup>10</sup> Eta juca níchirahi te Jerusalén. Tímicatacanuanahi ena tuparaírucana eta nucaratásiravacahi ena matapiravareanahi téhicanahi ema Jesús; nímisiapiravacahi te cárcel. Eta nímairahi eta nacapasirayarepahi, néhicahi eta napanereru éna.

<sup>11</sup> Ichapemurianahi ena nucarataruana. Némecharecavacapahi ena nétupiaruanapahi te nárujisirarevana. Nímajicavácapáipa eta náehisirahi ema Jesús. Nécatihavare eta náepuruiraya. Muraca eta nuvainarajichiravahí nayehe. Tamutuhi nutanusihavaca te apanaqueneana avasareana tayerehiqueneana.

*Ema Pablo mame tacava repa eta máehisiraipa éma apanava ema Jesús*

(Hch 9.1-19; 22.6-16)

<sup>12</sup> Étarichuvare tímiyananuhi te avasare Damasco. Tivane-canuanapa comisiónnuhi ena tuparairucana; tíjaracanuanahi eta Órdene.

<sup>13</sup> Tacache, tata rey, te nánehipa te avasare, te jena sache las dócequenepa, tíjahúchavapa timícauchanu eta majaraiva ema Viya, tiásiha te anuma. Tijarahipana tayehe eta sache. Timícauchanupa, énapa ena téhicanuanapahi.

<sup>14</sup> Tacache, viáquipáicavapa vimutu eta vipisirahi. Nusamapa ema Viya, téchajicanuhi te véchajiruva viti israelítana. Máichanupa: “Saulo, Saulo, ¿tájaha tacayema picatianacanuhi? Pésamiricavachucha, taicha pítijiváichucha píchavahi. Vahi piúrimahi te pímiyanava pipanajiricavaca ena téhicanuanahi” –máichanupa.

<sup>15</sup> Tacache, níchapa: “¿Nájahavi, piti Tata?” Tijicapanupa éma: “Núti Jesús. Núti picatianaruhi, eta pipanajirisiravaca ena téhicanuanahi.

<sup>16</sup> Péchepuca, pitupiha. Núti nímerecavahi eta piyehe, taicha nunerejiruvihi nuvanaraviya. Puiti numetacaviya eta juca pématanerepiyare eta nayehe. Péchajisihayare eta níjare nayehe ena achaneana eta juca pímairanuhi puiti, étapa eta apamuriana nímerereruanayare.

<sup>17</sup> Núti nucatiuchaviya te tájahapuca náicharacavi ena vi-janeanana israelítana énapa ena apavasanana. Puiti nuvane-cavihi péchajisihanuya eta nayehe ena apavasanana.

<sup>18</sup> Pímitucavacayare eta mavanairipiana ema Vicaiyaquene. Nacaijuhe éma, apesa náitujicava náimaha eta majaraiva. Náinajicapa eta náichaqueneasana te timapicu. Vaipa nacuehica ema Satanás. Ena tisuapanuanaya téhicanuanaya, nuperdonachavacaya eta napecaturana. Nasiapamurihaya ena náinapureanahi nunerejiruana” máichanupa ema Jesús.

*Ema Pablo mame tacava capa eta masuapirahi eta matu-paracasivanahi me Jesús*

<sup>19</sup> Tacache, tata rey Agripa, nusuapahi núti ema Jesús eta mavanesiranuhi.

<sup>20</sup> Nucametarairupa tativahi nayehe ena ticavasanahi te Damasco. Te nuchavapa, étapa te Jerusalén, étapa te avasare-chichana te Judea. Tásiha, núchucapa tayehe eta avasare-aná tayerehiqueneana nayehe ena apavasanana. Numeta-cavacapahi eta nácaijuheraina ema Viya, náeneuchiravaina náitsivachiraina eta náitaresiraina, táuripa eta náitaresiraina.

<sup>21</sup> Étara eta juca tiviuchanuhi nayehe ena nujaneanana eta nacaratasiranuhi te Templo, navarairahi ticapacanuana.

<sup>22</sup> Émasera ema Viya tímicatacanuhi. Puítirichucha tímicatacanuhi éma. Eta tacahe, nutiarihichucha puiti. Tásicha, vahi nuchávacuéjechavahíni nucametarairuyarechucha nayehe namutu ena achaneana, ena páureana énapa ena rícoana. Tájinaserá vahi nuhapapicahini eta táechajiriruvananáhi eta Sagrada Escritura eta táitauchiravayarehi eta macatajivairayarehi máepenirayarehi ema Cristo.

<sup>23</sup> Tásicha, émayarehi tínapuca téchepuca te máecari. Éta, táicutiarahi eta véchepusiraya víti apana te vécarí vimutu viti achaneana, viti israelítana énapa ena apavasanana. Tásicha, tivanecahavipa vimetacaya ena achaneana, apaesa nácasíñava mayehe éma.

*Ema Pablo mavarahapa macajimuyasamurechayare ema Agripa eta máehisiraya ema Jesús*

<sup>24</sup> Tímiyanavarichaha téchajica ema Pablo eta máechajiuchiravahí, témechajicavapa muraca ema Festo, macahepa:

—Máurishivipa piti Pablo, táichavene eta pivayuchiravapa picaravahu. Étapa timaurishichavihi.

<sup>25</sup> Émasera ema Pablo majicapapa, macahepa:

—Váhiya máurishinuina, tata aquenuca Festo. Nutupiruvahí eta juca nucayemaqueneanahí. Jéhevare eta yátupique-neanahí.

<sup>26</sup> Émaripa ema maca rey Agripa máimativare tamutu eta juca. Eta tacahehi vahi nupicacaracavahini eta néchajisirahi te mamirahu taicha nucasiñavahí núti eta máimatirahi ema. Namutuhivare ena achaneana náechahí, taicha tájina vahi tayumurucavahini.

<sup>27</sup> Pítiripa piti rey Agripa ¿pisuapahi jácani eta nacayemaqueneanahí ena profetanaini? Núti németeacahi pisuapahi piti.

<sup>28</sup> Ema rey Agripa majicapapa:

—Picájimuyacayaréni eta nusamure. Núti apanavare néhicayare jácani ema Jesús.

<sup>29</sup> Tacahe, ema Pablo máichavarepa:

—Tiúripana pisuapavane puítinrichu, yátupina te pisamure. Nuyaseacaya ema Viya eta pisuapiraina. Énerichuvare nuyaseacayare eta esuapiraina emutu eti apamuriana eti esamararacanuanahí. Éhicavanéni ema Jesús, tácutihini eta néhisirahi núti. Váhisera nacuératacrahéni, vahi ecucutinuhini núti eta nucaeratairahi táichavenehi eta néhisirahi ema Jesús — máichapa.

<sup>30</sup> Te nasamapa eta juca máechajiriruvahi ema Pablo, téchepucapa ema rey, ema prefecto, esu Berenice, énapa namutu ena natarihiqueneanahi náejaruuanahi.

<sup>31</sup> Tásicha, tiyananapa típutsiacavanapa, náechajisihayarehi eta juca. Náichacacapa:

—Ema maca achane, tájina maviurevaina táimicapacahini. Váhivare tauricahini macaeratahini te cárcel.

<sup>32</sup> Ema Agripa mamecapa ema Festo:

—Tiúrihini picaitica ema maca achane te vahi macúyase-serécahini eta mayaniraya te mamirahu ema Emperador —máichapa.

## 27

### *Ticaevatapa ema Pablo te Roma*

<sup>1</sup> Tiuri, matiarihihi ema capitán ticaijare Julio, nacapitarahi ena masuntarurana ema aquenucaini Augusto. Tacahé, te tiúripa eta napanereru eta náevatasirahaviya te Roma, natuparacapa ema Julio mámaya ema Pablo énapa ena apamuriana présoana.

<sup>2</sup> Viávacuhapa te ichape pacure tiásihahi tayehe eta puerto Adramitio. Tiyanayarehi te apanavare puértoana te Asia. Téhicahavipahi ema Aristarco ticavasahi te Tesalónica tayehehi capital eta departamento Macedonia.

<sup>3</sup> Te apanapa sache, vítecápapa te puerto Sidón. Tacahé, ema Julio majapanupahi ema Pablo, másapahi tiyana máejirapanavaca ena vichamuriana. Náechapajiricahi ema Pablo.

<sup>4</sup> Te viásihavarepa te Sidón, vétavicapa eta tiúrupuhi Chipre tinapaicaphi te sapa, váipasare viácapapahini eta técaticava.

<sup>5</sup> Tacahé, vijuchecherecapaipa eta mar te tachacayapahi eta Cilicia, étapa eta Pamfilia, vítecápirapa te avasare Mira tayehe eta Licia.

<sup>6</sup> Eta tayehe, viávacuhavarepa tayehe eta apanapa pacure máechajiaruhi ema capitán Julio. Eta juca pacure tiásihahi te avasare Alejandría. Puiti tacaijuheyarepa te Italia.

<sup>7</sup> Te jena sácheana vahi vijuricatipahicháini eta vipaisira. Muracarichucha eta técaticava eta viácapapahapi. Muraca eta nacaemataneasirapahi, vítecápirapa te tánara eta puerto Gnido. Tacahé, vétavicavarepa eta puerto Salmón te tasumuqui eta apanavare tiúrupuhi ticaijare Creta. Viávicchapáipa eta tiúrupuhi, étapa tiávichahávipahi tayehe eta técaticava.

<sup>8</sup> Ticajerapahi eta vipaisirapahi. Vijúchecherecapáichucha, vítecápiravarepa tayehe eta apanavare puerto Buen Puerto-hiji eta ticaijare te tachacaya eta avasarechicha Lasea.

<sup>9</sup> Ticachuricahavipa eta tiempo taicha eta viyérerejívapahi. Tíñehiripa eta tapaisirava te mar, taicha tinacuchavaipa eta muracana técaticava. Eta tacahehi ema Pablo maconsejacha-vacapa, macahepa:

<sup>10</sup> —Tiuri, tátanaveana. Váipara tiuri vímiyanavahini vipaica, taicha tíñehicarepa vécharicava. Machu vicamitiaca eta pacure, eta carga, vítipa machu vérica —macahepa.

<sup>11</sup> Émasera ema capitán Julio, ema comandante tayehe eta pacure, émapa ema piloto vahi návarahahini nánasihini. Vahi nasuapahini ema Pablo.

<sup>12</sup> Taicha vahi táurihini eta puerto, tájina távichahini tayehe eta muracana técaticava. Napanerechaichucha tiyananayare. Ánipa nacahehi:

—Vahi tiuri eta vánasi te juca. Viyanachucha tayehe eta apanavare puerto Fenice tayehe eta juca Creta. Tiúripana eta jena, távichahi tayehe eta muracana técaticava. Étaina vicuchapiha eta te táetupiricavapa eta sácheana —nacahepa.

### *Muraca técaticava te mar*

<sup>13</sup> Tacahe, tépanavapa eta técatiticavahi te vana. Tiápajuecavanapa éna. Náimijachapa tímiyanavanayarehi tiuri eta náehisirayarepahi eta técaticava\*. Vahi náemeteacahini táquecavahini te cajaha. Viánehipaipa vicachacaya eta tiúrupuhi Creta.

<sup>14</sup> Te ticaicutiaravapa, tíjahúchavapa téquecava, muracapa técaticava tiásiba te cajaha.

<sup>15</sup> Tavehapa eta vipacure. Tiámahavipa. Viyerehipa eta tachausi. Navarahainipa náimichava eta pacure te tachausipahi, váhisera náratahahini. Tásiha, náisapapa tiámahavi eta técaticava.

<sup>16-17</sup> Témetavicahavipa te apachacaya eta tiúrupuhichícha ticaijare Cláudia, étapa tiávichahavihi. Váiparichu muracainahini eta técaticava. Étapa víturusine vijataca eta étasi pacure vichururepahi. Vinacacuhapa te tajuhe eta ichapepana pacure. Ichapesera eta vicaemataneasirapahi. Tacahe, náinunuacapa eta pacure te enureana apaesa vahi tacuvejiajuecha eta táepacuruha. Nacamiricapa eta ichapepana tavanterame tévatajicapahi eta pacure taicha napicahi támahini eta técaticava, táejahapaicahini eta pacure tayehe eta playa ticaijare Náecharisirareva. Tacahe, táevatajicapaipa eta vipacure, vétaviequenehairapa eta playa.

---

\* **27:13** Acane eta ichapequeneana pacure, amairihaichaha te náurape eta nápaisihahi te une. Camurianahi ena achaneana tinaucanapahi. Nacatupihavare eta ichapemequeneana sábanana tímicatacayarepahi tévatajica eta técaticava.

18 Tíñehichucha eta táepacuruhana. Eta napisirahi éna, náepuhecavacapa te une eta támiquenepahi.

19 Te mapanaquenepa sache, vivehavarepa eta apamuri támiqueneanapahi tayereruvanapaichuhi eta pacure, véchipaicavarepa.

20 Jéhesare, ichapemurihi eta sácheana vahi tacaecherahini eta sache, étapa eta jarairiquiana. Eta vímairahi vahi tarasahini eta muraca tépacuca, vaipa vémeteacavahini viúchucuhahini.

21 Ichapemurihi eta sácheana tájina vinicahini. Tacalhe, ema Pablo titupiha te vimirahu, máichahavipa:

—Tátanaveana, tiúripanáichuhipucáini esuapanuhini te vuíchaha viúchucuhini tayehe eta Creta. Puiti vahi vicucatajivahini.

22 Puítisera, vahi ecupica, taicha nájina tépenaimahi. Técharicavayaresera eta pacure, témitiacaya.

23 Néchahi núti eta juca, taicha yati téchajicanuhi ema ángele mavaneluhi ema Viya, ema náquenuhi nucaematanearuhi.

24 Ani macahehi eta mame tasiranuhi ema ángele: “Vahi picupica, Pablo. Vahi pépenaimahi. Énaripa ena nani picachanequeneanapahi, váhivare tépenanáimahi táichavenehi eta pitiarihirapahi eta nayehe. Picamesavayare pítecupaucha ema Emperador pitupihamiraureya” máichanupa ema ángele.

25 Eta tacalhe, tátanaveana, túmehénachucha, taicha núti nucusiñavahi mayehe ema Viya. Nusuapahi eta mame rapiana ema ángele eta nuyehe.

26 Tiámahaviyaresera eta técaticava tayehe eta tiúrupuhi — máichavacapa ema Pablo.

27 Apinaquenepa semana eta támirahavipahi eta muraca técaticava te ichapequenehi mar. Te jena enumuhuquenepa yati, ena marinéroana náimijachaipa tiánehianaripa eta tiájipahi taicha nasamahi eta cachuela te tachausi.

28 Náicutiecapa eta táupenava eta une. Náimahapa treinta y seis metro eta táupenavahi. Te tiyererehavare, náicutiecapa, veinte y siete metro eta táupenava. Náemetecapa tiánehianaripa eta tachausi.

29 Tacalhe, nacajuchuchucapa eta cuatro áncalan te tahivu eta pacure, taicha napicahi támestaquehahini eta vipacure tayehe eta máriana. Navarahaipaicha táijahúchavahini tijarahi.

30 Eta napisiraipaicha, ena marinéroana navarahapa tijunayarehini, tijunijicahavianayarepa. Nacucupaicapa eta étasi pacure vicavacurehi. Nacaetserarupa nacajuchuchucayare eta apana ancla te tasumu eta pacure.

<sup>31</sup> Ema Pablo máimatiacavacapa eta navarairahi tijunana. Tacahe, mamecacapa ema capitán Julio énapa ena masuntarurana. Máichavacapa:

—Te vahi nacunasi te juca pacure ena nani, éricayare éti, vahi iúchucuhaimahi —máichavacapa.

<sup>32</sup> Tacahe, ena suntaruana náechupicavacapa eta enureana táitihapahí eta étasi pacure. Náinajicapa te une.

<sup>33-34</sup> Te tijarahipá, ema Pablo tivanecahavipa vimutu vinicanuma. Máichahavipa:

—Enicanumapa apaesaina, taicha apinapa semana eta juca iávamina, emaimasirahivare. Tatuparaca enicanuma apaesa táetumechahe eta iávaresirayare. Nájinaserá témitiacaímahí te vitaracu —máichavacapa.

<sup>35</sup> Tacahe, te tamutupa eta mavanesiravacahi, ema Pablo mavehapa eta pan; mabendiciónchapa te vimirahu. Mavejecaipa, tinicapa.

<sup>36</sup> Vétumechavapa vimutu, vinicapa víti apanava.

<sup>37</sup> Camurihavihi viti támaqueneanapahi eta pacure. 276 eta visimutuvapahi.

<sup>38</sup> Te vítanesipa eta vinisirahi, navehapa ena marinéroana eta apamuri trigo, náquijicapa te une, navarairahi téchacayare eta támaquene eta pacure.

### *Técharicavapa eta pacure*

<sup>39</sup> Te tijarahipá, ena marinéroana vahi náimativahini távihipuca eta viávhahí. Náimahapasera eta tachausí ticayehéhi playa. Navarahapa náimipauchapayare eta pacure, viúcupaisihayarehi te playa.

<sup>40</sup> Tacahe, náechuacavarepa eta enureana ticaratacanahí eta áncvana. Tanasivacapa te amahe une. Nacaesimucavarepa eta tayeheana leme eta pacure. Tacahe, nacanuquechapa eta étana tavanterame ticarataca eta técaticava tiávhahipahí te tasumu. Táimicatacapa eta napauchiraya eta playa.

<sup>41</sup> Tiámahavipasera tayehe eta remanso. Vaipa táupenahini. Tásiha, ticaratacavahipá eta playa. Tachuchucapa eta tavarparu. Vaipa tayamuricahini. Tacahe, eta tamuracavahí eta tépacuca, tacavaracapa eta tahivu eta pacure.

<sup>42</sup> Ena suntaruana navarahapa nacapacayarehi ena présoana, napisirahi náitujicavahini tijunana eta návaresiraya.

<sup>43</sup> Émasera ema capitán Julio vahi másapahini taicha mavarahahi macuchucuhayarehi ema Pablo. Macavanairipá ena náitucanahí tiávarecana napaucha eta tachausí.

<sup>44</sup> Ena apamuriana máitucaranahahi tiávarecana nayurata-mecavacapa eta tabla, nacuchucuiyavahi te tiájipahi. Taca-hehi eta viúchucuirahi vimutu.

## 28

### *Ema Pablo mávihaipa te tiúrupuhi Malta*

<sup>1-2</sup> Tacahe, te vimutupa viúchucuhahi, tiúchujichahavianapa ena ticavasanahi tayehe eta tiúrupuhi. Timetacahavianapa eta táijarehi Malta eta viúcupaisihahi. Nacamuruequechapa eta yucu, tíchuhahavianapa viásacavayarehi taicha vicasarechavacaipahi taicha eta une étapa eta tiquiva. Énapa titatihavianahi.

<sup>3</sup> Tacahe, ema Pablo tinerecapa eta yucuqui máijuquechapa. Tatiarihihipuca eta quichare te manereru. Tásiha, tiúchujicapa eta quichare, taimijunapa eta yucu. Táechucapa te mavahu ema Pablo.

<sup>4</sup> Te náimahapa ena ticavasanahi tayehe eta tiúrupuhi eta táechusirahi ema Pablo te mavahu, nacahepa:

—Ema maca achane ticaviurevapuca jácani, ticáparecahí-chupuca. Tiúchucuhahi te une, ánipasera tavyiyihahi te tiájipahi eta matuparahahi. Vaipa máuchucuhahíni —nacahepa.

<sup>5</sup> Émasera ema Pablo máquijipicapa te yucu eta quichare. Tájina máichavahini.

<sup>6</sup> Tacahe, ena tímararacanahi nacuchapaipa máepenahini, támahipucahini eta mavahu. Eta náimairahi tájina máichavahini, napanerequenehana.

—Víyachupuca ema maca —nacahepa.

<sup>7</sup> Te tachacaya eta vécharisinevahi, tatiarihihi eta barraca, maverahi eta pétiana napenanahi ena machaneranahi ema subprefecto, tuparairucahi tayehe eta tiúrupuhi. Ema ticai-jarehi Publio. Émapa tíchuhahavihi téchapajiricahavihi eta jena mapanaquenehi sache.

<sup>8</sup> Matiarihihivare ema maiya ema Publio. Ticajumahi éma, eta muraca fiebre. Tisacahivare iti. Tívecahi éma te matuleta. Tiyana napa ema Pablo, máejirapanahí. Tiyujaracapa, mayaseacapa ema Viya eta macanarasiraina ema macajumaquene. Tásiha, manacapa eta mavahu te máinahu. Jéhesare, tinara-capá ema achane.

<sup>9</sup> Eta náimairahi ena apamuriana achaneana eta macanara-sirahi ema macajumaquene, náepanavacapa ena apamuriana nacajumaqueneana. Macanaracavacapaipa ema Pablo.

<sup>10</sup> Mapana caje eta viávihirahi tayehe eta tiúrupuhi. Ichaperinehi eta náitátiprahavihi ena achaneana. Te viávacu-hayarepa, tíjaracasichahávianapa eta vicamunuqueneána-yarehi eta vipaisirayareva.

*Tímyianavanavarepa eta napaisirahi, nacaijuherahi eta Roma*

<sup>11</sup> Tasiha, viávacuhavarepa tayehe eta apanavare pacure tachimararuhivare eta muracana técaticava tayehe eta puerto viávihahi. Eta juca pacure ticaijarehi Castor-Polux, Chámeana. Tiásihahivare te Alejandría.

<sup>12</sup> Eta vipaisirahi, vítecapapa te apanavare puerto ticaijarehi Siracusa. Víchecapa tayehe mapana sache vicahe.

<sup>13</sup> Te viyanavarepa, vijuchecheapaipa vítecapirapa tayehe eta puerto Regio. Te apanapa sache tépanavavarepa eta técaticava te vana. Tímicatacavahipa eta vipaisirapahi. Te apanapa sache, vítecapapa tayehe eta puerto Puteoli.

<sup>14</sup> Te jena avasare, vicainunapa ena apamuriana vichamuriana, tíminasichahavianapa. Étana semana vicahe eta nayehe. Tásiha, vipaicapa te tiájipahi, vicaijuhepa eta te Roma.

<sup>15</sup> Ena apamuriana vichamuriana ticavasanahi te Roma tisamairiricahavianaipa eta vítecapirayarehi. Nárajapapa tiácapahavianahi te achene te apanahivare avasare ticaijarehi Foro de Apio. Énerichuvare ena apamuriana tiácapahavianahivare, ticuchapahavianaipa tayehe eta apanahivare avasarechicha ticaijare Tres Tabernas. Te máimahavacapa ema Pablo, tiúrisamuréinehi naicha eta nácapirahavihi ena vichamuriana. Tétumechavapa ema apana. Mahasulupyachapa ema Viya.

<sup>16</sup> Te vítecapapa te Roma, ema capitán Julio mahentre-gachapa ema comandante tayehe eta guardia ena présoana. Émasera ema Pablo náisapapa títecapapa te apana peti, matiari-hisera ema émana suntaru tijaneacahi.

*Ema Pablo máimitucavacapahi ena téjirapanana te máitecapihahi*

<sup>17</sup> Te mapanapa sache eta vítecapirahi te Roma, ema Pablo máimichuhavacapa ena náiyarahana ena israelítana ticavasanahi te jena avasare. Te tiúrujicavanapa, ema Pablo máichavacapa:

—Nuparapenaveana, tájinanéni nutapiravainahini. Tájinavare nícharacahini ena vijaneanana. Váhivare nucaecahi eta nayeherepianaini ena viáchucanaveanaini. Nucaeratahisera te Jerusalén, timetauchanuanahi te namirahu ena tuparairucana romanoana.

<sup>18</sup> Eta nayaseresiranuhi, navarahahineni ticaiticanuana taicha náimahahi éna tájina taviuchanuhini táimicapacanuhini.

<sup>19</sup> Énaser ena vijaneanana tuparairucanahí váhiquene návarahahini nacaiticanuhini. Eta tacahéhi nuyaseserecapa

núti étina nucametauchacasiya te mamirahu ema Emperador. Tájinaserá vahi numetauchaimahi ena nujaneanana ticaetemajiricanuanahí.

<sup>20</sup> Eta tacahe, nímichuhahéhi nuvarahahi nímatiheyare éti, numetacaheyareva eta juca níchavaquenevahí. Ticaviurenúhi eta néhisirahí ema Cristo, ema vicuchapaquenehi vimutu viti israelítana, eta tímitiacanuhi puíticha te juca cadena —máichavacapa.

<sup>21</sup> Tásicha, ena náichapa:

—Tájina váhiya visamairiricavi. Váhivare vijacapa eta carta tiásicha te Judea táechajisihavihini píti. Énapa ena vichamuriána israelítana tiásihanapahí eta ánaqui, váhivare náechajisihahíni eta pivirevahipuca píti.

<sup>22</sup> Vivarahasera visamaví puiti péchajisiha eta pipanereruanahí, taicha visamairiricahi eta nacatichirahí ena vijaneanana tiávihanapahí te avasareana eta juca arairuhi éhiruhi —náichapa.

<sup>23</sup> Tacahe, náijarechapa eta sache máechajisiraya. Te jena sache, títecapanapa ena camuriqueneana israelítana tayehe eta máitecapihahí ema Pablo. Tépanavapa te jena yáticarahi téchajicahi éma. Tiámainucava te cáperehichichapa titapiricapa eta macametarairuirahí eta máechajiriruva ema Viya. Máimivehapicapahí eta máechajicuirapahí eta Sagrada Escritura. Máimitucavacahi éna eta náimatiraya ema Jesús eta émairahí Cristo, ema nacuchapaquenehi. Macajimuyacavahí eta náehisiraina éma.

<sup>24</sup> Tásicha, típutsimurihavanapa ena tisamararacanahí. Natiarihihi ena apamuriana nasuapa eta macayemaqueñeanahí ema Pablo. Natiarihisera ena apamuriana vahi nasuapahini.

<sup>25</sup> Éna, vahi návarahapahini nasama, timutserahavannahapipa tiyanana. Tacahe, ema Pablo máichavacapa:

<sup>26-27</sup> —Machu ecucutihini ena viáchucanaveánaini acane. Matupiruvahí ema Espíritu Santo eta máechajisihavacahi éna te mamecapa ema víyarahaini profeta Isaías. Máichapa: “Piyanapa pimetaca ena naena achaneana. Ani píchayare: Nímatihe éti eta emasuapajiraivahi. Épiyacavahí religiosohehi; téavicavahisera eta tamuracavahí eta esamureana. Eta juca emasuapajiraivahi, tahapapiricahi eta ecaicutiarairahí eta numetarapiana étapa eta nímereuchaqueneana. Tájinapa táichahíni vicuchapahini eta éneuchiraváina, evarairapucaini ecasiñahini me Viya, apaesa macanaracahehini” máichapa ema Espíritu Santo.

<sup>28</sup> Ácaicutiaraquenéna éti, puiti juca vicaijuheya vimetacaya ena apavasanana eta mavarairahí macuchucuhaya éna

apaná ema Viya. Tásiba, éna nasapihayare nasamararacayare –máichavacapa ema Pablo.

<sup>29</sup> Te tamutupa eta máechajisirahi ema Pablo, tiyananapa ena majaneanana, tiúmehavanapaipahi.

<sup>30</sup> Apina año macahehi ema Pablo tayehe eta máitecapihahi. Tamutu sácheana majacapavacahi ena tipaipiuchanapahi.

<sup>31</sup> Máechajisihahi eta máechajiriruva ema Viya, máimituca-hivare eta náehisiraina ema Viáquenu Jesús, émairahi yátupi-quenehi Cristo. Nájina nacamatinacahini. Náisapahi ticame-tarairu.

Tamutupa eta néchajiriruvana eta piyehe.

# Eta macartane ema Apóstole Pablo nayehe ena machamuriana ticavasanahi te Roma, ticaijare **ROMANOS**

<sup>1</sup> Nuti Pablo, mavanaranuhi ema Viáquenu Jesucristo, manerejirunuhivare eta mayehenuyarehi apóstole. Tituparacanuhi eta nucametarairuirayare eta mapanerechirahi ema Viya eta mavarairahi macuchucuhaya namutu ena ticasínavanaya mayehe ema Machicha.

<sup>2</sup> Ema Viya, ánaquiaparipahi eta juca mametasiravacahi ena víyarahananaini santo profetana eta mapanerechirahi eta macuchucuiraya ena achaneana. Tásicha, nájuequeneharipahivare éna.

<sup>3</sup> Eta Sagrada Escritura táechajisihaipa ema Machicha ema Viya eta máucupaisirayarehi te juca apaquehe. Yátupiyarehi Crístohi éma. Achanequenehi eta máimahi.

<sup>4</sup> Natiarihihisera ena tictorianacanahi éma. Náimicpacahí ema. Émasera ema Espíritu Santo, tiáramiccarehi eta macaechepusirahi ema te máecari. Étapa tímereuchahi eta yátupiquenérahi Machicha ema Viya.

<sup>5</sup> Puiti ema Viáquenu Jesucristo tijapanunuhi eta matuparasiranuhi eta nuyaniraya nupaicaya te tamutu avasareana, nucametarairuyarehi eta najacapacarevayarehi me Viya namutu ena tisuapanayare, náehica éma.

<sup>6-7</sup> Te namuri ena nasimutuqueneana, etiarihivare éti apanava. Tíchuhahéhivare ema Viya, machanerayarehi ema Machicha Jesucristo, mavaraha tauri eta ecaemataneasiraya ema. Puiti nucajurehe eta juca nucartane emutu eti nuchamuriana ecavasanahi te avasare Roma, máemunaruqueneanahi ema Viya. Nuvaraha macatajicahehini ichape ema Tata Vicaiyaquene, émapa ema Viáquenu Jesucristo; náijaracahéhini táurivaina eta epanereruana.

## *Ema Pablo mapanerechaipa tiyanayare te Roma*

<sup>8</sup> Núti, téavicavahi eta nucunachirahi ema Viáquenu Jesucristo, nuhasulupayachahi ema Viya íchavenehi emutu éti. Namutu ena achaneana te avasareana téchajisiaheanahi eta yátupiraripahi éhica ema Viya.

<sup>9</sup> Núti nuvapinavahi eta nucaemataneasirahi ema Viya, eta nucametarairuirahí eta máimiturapiana ema Machicha Jesucristo. Ema Viya tímararacanuhi eta néñamiravahi eyehe éti. Núti, tamutu sácheana te nunarasirana, te néchepusirana,

nuyaseuchahehi me Viya, máijaracahehini eta iúriváinahíni éti.

<sup>10</sup> Nuyaseuchavahivare eta másapiranuinahíni nítujisiravainahini nupaipiuchahe.

<sup>11</sup> Ichape eta nuvarairahi nímahahe, nímicatacahehini eta tajurusiraya eta iáchanevana apaesa muracaquenénapaini eta éhisiraya ema Viya.

<sup>12</sup> Éti apanava ímicatacanuhini. Vétumejiricacahivaréni eta véhisirahi ema Viáquenu.

<sup>13</sup> Nuprapenaveana, nuvaraha numetacahe apaesa echa. Ichapemurihi eta nuvarairahi níteca nímahapanaha. Puíticha, vuíchahasera nítujicava. Tijuricati nétupicavahini eta nítesarinahini eyehe, natarihichuhipucaini nucajimuyacavacahini eta nanerejisiravainahini náehicahini ema Viáquenu, tácutihini te nupaicainapa te apana avasareana.

<sup>14</sup> Taicha ichape eta néñamiravahi núti eta nucatuparahairahi nucametarairuirayare nayehe namutu ena achaneana te ichapeana avasareana énapa ena tiávihana te vámahiana, ena tiávihana te isanitiana. Nájina nunerejiruimahi. Namutuyare numetacavaca: ena cráyanana rícoana énapa ena páureana.

<sup>15</sup> Tacahe, núti nutserereacavahi eta nupaipiuchiraheya te iávasa Roma, nuvarairahi nímitucae eta máechajiruva ema Viya tayehe eta véhiruhi.

*Vijacapacareipahi mayehe ema Viya táichavene eta vicasiñavairahi mayehe*

<sup>16</sup> Núti nuvapinavahi eta nímitusirahehi tayehe eta véhisirahi ema Cristo. Tájina vahi nutsirihahini, taicha téavicavahi eta macasiñacarevahi ema Viya máitauchayare tamutu eta macuchucuirahavi. Éma, téavicavahi eta mavarairahi nacasiñavahini ena israelítana eta mayehe, énapa namutu ena apamuriana achaneana. Téavicavahi eta mítupajijiasiravahi máitsivachinahi eta náitaresirana, tamutupa arairuhi máicha.

<sup>17</sup> Taicha ema Viya máimerecaripa eta vijacapacarevahi eta mayehe vimutu viti vicasiñavanahí mayehe. Tájinapa vácamu-nuhini. Tarataripa eta vicasiñavairahi mayehe. Tásicha, éma ticuchucuhahaviripa. Taicha eta Sagrada Escritura, ani tacahéhi eta táchajiruvahí: “Nácani ticasiñavanahí eta me Viya, tijacapacareanahí, máichecuaraqureyare eta náitaresiraya táicha”.

*Ticaviurevana namutu ena achaneana táichavene eta náejecapiravana*

<sup>18-19</sup> Acane ema Viya manacasamurechahi ena achaneana eta matiarihirahi éma. Manacasamurechahivare eta máicuñasiraya namutu ena téjecapavanahí, máurirahanahí. Yátupihi eta nacaicuñairayare táichavenehi eta namasuapirohi eta yátupiqueneana, váhivare návarahahini náinajicahini eta navainarajivana.

<sup>20</sup> Máimahasihinéni ema Viya Eterno eta viyehe, véchahisera eta matiarihiráhi, taicha tamutu vímaha eta máepiyaruuanahí, étaripa eta apaquehe étapa eta tatiarihiqueneanahí. Émarichuhi ema Viya téchapajiricahi tamutu eta táepaniravahi eta juca apaquehe, puíticha eta juca viávacurehi. Étara vímatiarahi eta matiarihirahi ema máitupajijiaruvaquenehi. Énasera ena achaneana, vai návarahahini nacasiñavahini eta mayehe. Étapa naviurevahi éna.

<sup>21</sup> Tamapurujihisera eta náimatirahi ema Viya, vahi návarahahini nasuapahini; váhivare napicauchahini. Váhivare nahasulupayachahini éma. Tétavicavahi eta táejecapiravahi eta napanereruana. Étachucha napanerechahi eta tájiparacana. Muracasamureanahivare.

<sup>22</sup> Ticasíñavavaicanahí taicha tímijachavanahí titupajijiacavanaugh. Tétavicavahisera eta namaiturerevanahí.

<sup>23</sup> Vaipa najirauchahini ema Viya máepenacacahi. Váipavare mapicauchacarehini nayehe. Tásicha, náemitisicaipa éma. Nasapihapa najirauchahí eta nasiñarajiana achaneana matumerairahanahí náipunechucha ena achaneana. Tamutuchucha nacasiñarajipahi cágurepuca, quicharepuca, sáraremirapuca.

<sup>24</sup> Tacache, eta máimairahi ema Viya eta náichirahi eta júcana, másapapa éma. Máiñajiacavacapa. Puíticha navarahichucha tímianavana naicha eta natuhusivana titsiriacareanahí. Tavayuacahivare eta najamuraraivana tamauriqueneana. Tétavicavahi eta namaeperajisiracacahi.

<sup>25</sup> Tétavicavahivare eta náepuruirahi ema Viya, émayarehi najiraureyarehini. Tasapihapa téjecapavanahí, eta náimijachirahi tiúripana eta najirauchira eta nasiñarajiana náepiyaruuanahí. Tásicha, náemitisicapa ema yátupiquenehi. Jéhevarequenehi máichecuaraqureyarehi eta majirauchacareva. Amén.

<sup>26</sup> Eta tacache, ema Viya macaerajicavacapa. Vaipa mávarahahini máemechavacahini. Másapapa náichahi eta navarahauqueneanahí. Tásicha, tétavicavahi eta náichaqueneanahí. Nararihi ena esenana, énajicacapa náichacacahi eta napecaturana. Vaipa nácameahini ema ajaira.

<sup>27</sup> Énaripa ena ajairana, nararihivare énajicacahi náichacacahi eta pecatuana. Vaipa nácameahini esu

esena. Navayuchaipa eta najamurachiracacahi. Váhiquene nátsirihahini. Táichavenehi eta náejecapiravahi, énajivapa tímitaequenehavana tayehe eta náicuñayare.

<sup>28</sup> Ena nani, ichape eta nacaerajisiravahi eta me Viya. Vaipa návarahahini náesenicahini éma. Váhivare návarahahini napanerechahini eta táuriqueneana. Tásicha, ema Viya máinajacavacapa, vaipa émainahini máechavacahini. Máisapapa tímiyanava etá náichirahi eta tájiparacana tamauriqueneana.

<sup>29</sup> Tétavicavahi eta náepiyaresirahi eta napecaturana tamauriqueneana: Navehahi esu esena apayena. Ena amaperuana náichahí eta natuhusivanahi. Téharahiana nayehe nácani matapiravareanahi. Tamutupa navaraha nacayehe, cátemarahiana, ticapinarurahiana, ticapahiana, tipiararecana te tisemana, tivayuarecana, sémarairihiana, téchejhiana.

<sup>30</sup> Tíñemahi eta náechejisirana nayehe ena apana achaneana. Nacatichavare ema Viya. Tiácapaemarahiana, cájamuravana, píncanillana, tisiñavavairicana. Tisipanerehiana eta náichirayare eta apana pecatu navarahaqueneana. Masuapajirairahanavare nayehe ena ticachichana.

<sup>31</sup> Tímijachavanahi tétupicavana eta náichirahi eta tamauriqueneana. Tivayuarahiana eta náechajirisiravana. Vahi témunarahiana. Váhivare tiperdonarahiana, nájina najapanuquenéna.

<sup>32</sup> Náechahinéni éna eta tamaurivahi eta júcana me Viya. Náechahivare éna, eta táimicapacasiravacayarehi, tímiyanavarichuchasera eta náichirahi. Náimiaquipaicaiki nácani apamuriana. Émasera ema Viya máitauchayarehi eta náicuñayare.

## 2

*Ema Viya titupiruvahi eta máitauchirayarehi eta náicuñayare*

<sup>1</sup> Étiarihisera éti ímijachahi tájina eviurevaimahi eta vahi ácutimahi ena apamuriana máimatirahanahi ema Viya. Ímijachavahi tájina epecaturaina. Éti ecaecahivacahi ena tíchanahi eta tamauriqueneanahi. Váhisera étupicavahini eta ecaecahirahi, taicha étirichuhi nacutiqueneanahi eta íchaqueneana. Énerichuhivare eti ecaviurevhivare.

<sup>2</sup> Vítí véchahi matupiruvahi ema Viya eta máicuñasiravacaya ena tíchanahi eta juca tamauriqueneana.

<sup>3</sup> Étipa, éjecapavahi eta ímijachirahi ticaiticaheyare etá ícuñayare, eti ícharahiana eta tavasiqueneana ecutirichuhinéni ena ecaecahiqueneana.

<sup>4</sup> Émasera ema Viya, tétavicavahi eta máurivahi eta eyehe. Vahi maícuñacahevanehini. Ticamichahehi, ticuchapahevare, mavarairahi éneuchavahini eta mayehe, ínajicahini eta íchira eta tamauriqueneana. Tásicha, vahi ecuemepurureca eta máurivahi eta eyehe.

<sup>5</sup> Taicha táíñehiqueneyare eta ícuñasamiyare éti, te vahi ecueneuchava, ínajicavare eta tamuracavahi eta esamureana. Taicha evayuchapaichucha eta ecurumutusirahi eta etapiravana.

<sup>6</sup> Taicha éma, matupiruvahi eta máijarasirayare eta táitsivayare eta víchaquenepachu.

<sup>7</sup> Vítiripa viti machanerana ema Viya, tíjaracahavinapa éma máichecuaraquireyare eta vítaresiraya, taicha vivaraha puiti vicurisamurechaya éma, vímiyanavaya eta vivapinairavayare vicha eta táuriqeneana. Vicuchapavaya eta visiapiroaya eta te majaraivahi, vicunachacareya mayehe, máichecuaraquireya eta viúricacarevaya.

<sup>8</sup> Muracainapasera eta máicuñasiravacaya namutu ena masuapajirairahanahi énaripa ena tictatianacanahi eta yátupiqueneana, tasapihahi náuricahi eta tamauriqueneanahi. Navayucharipa eta náimiyusemasirahi ema Viya.

<sup>9</sup> Ichape eta nacatajivairaya, tíyahahacavanayare namutu ena tíchanahi eta juca tamauriqueneana. Ticuticacanayare namutu eta náicuñayare, ena israelítana énapa ena apavasanana.

<sup>10</sup> Étisera eti íchanahi eta táuriqeneana, tíjaracahénapa ema Viya eta iávihaya te majaraivahi. Tétavicavaya eta ecunachacarevaya mayehe. Tinaracainavarepa eta epanereresiraninihi. Ecuticacaya emutu eta iúricacarevaya. Eti israelítana, vahi ecachuricaimahi ena apavasanana.

<sup>11</sup> Ema Viya vahi manerejicaimahi ena máicuñaruuanaya. Ticuticacanayarehi máicha.

<sup>12</sup> Nácani máimatirahanahi eta mavanairipiana ema víyarahaini Moisés, ticaicuñanayare. Énerihu nácani náimatihiñénipuca, tavetijinapa ticaicuñanayare taicha vahi nasuapahini.

<sup>13</sup> Taicha vahi tijacapacareanaimahi mayehe ema Viya nácani vahi náitauchahini eta nasamaqueneanahi. Tijacapacareanayaresera nácani títauchanahi tipicauchanahi eta vanairipiana.

<sup>14</sup> Nararihivare ena tinerejicavanhí ena apavasanana, váhinéni náimatihiñi eta vanairipiana, nasapihasera natupiruvahi te nasamureana eta náichirahi eta táuriqeneanahi, taicha yátupihi eta nasuapirahi eta manacasamurechaquenehi ema Viya.

<sup>15</sup> Éna, náimerecahi eta manacasamurechirahi ema Viya eta vanairipi te nasamureana. Énajivaya tisamavana te napane-reruana eta táurivahi eta náichaqueneana, éta ticatiuchavacahi. Te téjecapavanapuca, tisamavanahivare eta tamaurivahi eta náichaqueneana. Tásicha, napicahi eta náicuñayarehi táicha.

<sup>16</sup> Járajapa eta sácheyare, ticayaseserehianainapa namutu ena achaneana te mamirahu ema Viáquenu Jesucristo. Éma, máimatiya tamutu eta náichaqueneana tayumururevanahi. Étarichuhi eta numetarapihi te nucametarairupa.

*Ena israelítana, ena ticatuparahanainihi eta vanairipiana, váhisera náitauchahini*

<sup>17</sup> Étisera eti israelítana, ímijachavahí yátupihi ítaucha eta vanairipiana, ecunachavaipahi mayehe ema Viya.

<sup>18</sup> Ímijachahivare ítuca eta mavarahaqueneanahi ema Viya. Énerichuvare eta vanairipi éhiruhi tímitucahehi eta enerejisirayare icha eta táuriqueneana.

<sup>19-20</sup> Tétavicavaipahivare eta ecunachiravahí taicha ímijachavaripa ecatuparaha eta ímitusiraya ena apavasanana apaesa náesenicahini ema Viya, náimatiyareva eta máechajiruvana, náinajicayareva eta napecaturana, váipavare nanasimahi eta te timapicu. Ímijachahivare ímatiequeneha tamutu eta vanairipiana, ítamuturusirahi tamutu eta tayeheana yátupiqueneana.

<sup>21</sup> Éti evarahahipuca ímitureca. Tituparacahehisera étivaya ítaurahi. Éti, ímiturecahi vahi nacuamereca ena achaneana; étisera epanerechahi eta iámeresiraya.

<sup>22</sup> Tacutiquene váhivare iúrica nacaesenarahini ena eparajiravana; étisera epanerechahi eta ecaesenaraya. Ecatichavare eta nasiñarajiana; étisera matsiriarairahahéhi eta evehairahi eta táijaracasiana eta nasiñarajiana.

<sup>23</sup> Ecunachavahí eta ímijachiravahí ítuca eta mavanairipiana ema Viya; étisera tamutu sácheana iácatayayajicahí eta mavanairipiana. Tétavicavahí eta emapicauchirahi éma.

<sup>24</sup> Ani tacahe eta Sagrada Escritura: “Ena achaneana vahi napicauchahini ema Viya íchavenehi éti israelítana” tacahepa.

<sup>25</sup> Eti ecunachavaipahi eta israelítairahehi. Tacamunu-hisera eta ítauchirainahini eta vanairipiana. Taicha eta juca emaitauchirahi, tímicutijiricavaichucha vahi étinahini israelítanainahehini.

<sup>26</sup> Ticachuricaheanaripa nácani apavasanana, nasapihaipa náitauchahí eta vanairipianahi. Ema Viya máimahahi eta táurivahi eta náitauchirahi, váhenenii israelítanainahíni éna.

<sup>27</sup> Ena apavasanana titaurahianahi tayehe eta vanairipiana, éna tiyaseserecanainapa eta ícuñayare emutu eti

emaitauchanahi, émepururecavaipahi israelítairahehi, étapa eta ecaravahuirahi eta vanairipiana.

<sup>28</sup> Váhivare étaimahi ecunachacarevaya eta ecamarcairahi te iáquehe eti israelítana.

<sup>29</sup> Nácanisera yátupiquenehi eta nasuapajiraiva, jéhevare ena yátupiqueneanahi israelítana. Vahi tágomesaimahi ticamarcaña te náqueheana, taicha éna yátupiquenehi te nasamureana námahi eta nacamarcairahi eta machanerairavacahi ema Viya. Vahi étaparacainahini eta nacaravahuirahipuca eta vanairipiana, étainapapucaini nacunachacarevainahini nayehe ena achaneana. Eta ticamunucarehi eta náitauchirayare eta mavanairipiana ema Viya. Étapa nacunachacarevaya eta mayehe.

### 3

*Ena israelítana tímijachavanahi nacarichu ticunachacareana*

<sup>1</sup> Eti nujaneanana ímijachavaipa ecunachacarehi taicha eta israelítairahehi, ecamarcairahivare te iáquehe.

<sup>2</sup> Jéhesare, jararihi eta ecunachacarevahi, máicha ema Viya. Éma, matuparacavacahi ena viáchucanaveanaini eta námituresirahi eta yátupiqueneana máechajiriruana, vítipa viti námariequeneana.

<sup>3-4</sup> Tayanapané natiarihihi ena vijaneanana vahi náitauchahini eta natuparahahi, émasera ema Viya, váhiquene titavaimahi eta máitauchiraya tamutu eta máijararuwanahi eta nayehe. Taicha téavicavahi eta máitauraivahi éma. Tayanapanepuca natiarihi ena achaneana énaina náepiyahirahi, émasera ema Viya máitauchayare tamutu. Eta Sagrada Escritura, ani tacahe: “Tayanapané ena achaneana vahi navarahahini nasuapa eta pítauraivahi, piti Tátachicha, tamutu sácheana pímerecahi piti eta pítauraivahi. Tayanapané natiarihi náimijachahí vahi tátupiruvahini eta píchaqueneana, téavicavahisera eta pitupiruvahi te tamutu” tacahepa.

<sup>5-6</sup> Vimutu vímati téavicavahi eta majapanuraivahi ema Viya. Németeacaserá etiarihi eti ímijachahí tiápajucavayarehi eta macunachacareva taicha eta esipecaturairavacahi. Ímijachavavare vahi tátupiruvahini eta masemairahi eta escapecaturairahi. ¡Tétavicavahi eta éjecapiravahi! Ecuti ena achaneana mapanererureana. Ema Viya, tatuparacahi máicuñacavacayare namutu ena téjecapavanahi, taicha téavicavahi eta masantovahi.

<sup>7-8</sup> Ímijachavahi tísapacarehi eta épiyahiraiva, taicha ímijachavahi titametacahe eta yátupirahi eta tatupiruvahi eta máechajiruvana ema Viya. Ánipapuca tacahe eta epaneruana: “Ema Viya ticaijare tijapanurahi. Tacahe,

tiápajucavayare eta macunachacarevahí éma, taicha táetaviuchayare eta majapanuirahavi eta máimairainapa eta vivayuchiravahí eta vivainarajivana. Tásiha, vahi tátupiruvahini eta mavarairahi tícuñacahaví, taicha tiápajucava eta macunachacareva vícha, ¿masi?" ecahepuca eta epanereru. Natiarihivare ena tépiyaequenehahavi náimijachahiji tacahe eta vímiturapi viti apóstoleana. Muracayaresera eta náicuña namutu ena tacahehi eta napaneruana.

*Vimutu viti achaneana vicaviurevahí eta me Viya*

<sup>9</sup> Eti nujaneanana, vahi ecuimijachava viti israelítana viúripanahi nayehe ena apamuriana achaneana. Tájinaquene viúrvainahini te mamirahu ema Viya. Taicha vímatiequenahapa eta vimutuirahi vicaviureva me Viya viti achaneana, viti israelítana énapa ena apavasanana.

<sup>10</sup> Eta Sagrada Escritura, ani tacahe: "Nájina náurihini, émanainahipucáini máurihini, ésunainahipucáini esena súrihini.

<sup>11</sup> Nájinavare énjivainahini náimatihini ema Viya, váhivare navaraha náesenica ema Viya.

<sup>12</sup> Namutuhi téjecapavana, namutuhivare táquipaicahi eta tamauriqueneana. Nájina náichahini eta táuriqueneana, émanainahipucaini máichahini.

<sup>13-14</sup> Tíñemahipi eta náechejirisiravana. Tétavicavavare eta navayuaraivanahi. Éna nacuti eta quichare téchurahi, tétavicavahi eta nacaetemaraiva. Náematanechucha namaldicióncha nácani apamuriana.

<sup>15</sup> Apaesarichu nacamunu navarahaipavare ticaparecana.

<sup>16</sup> Sirujiana eta náitaresirana, ticaetemarerecana.

<sup>17</sup> Vahi natanucaimahi eta náurivainahini nayehe ena apamuriana.

<sup>18</sup> Tájina vahi napicauchaimahi ema Viya" tacahepa eta Sagrada Escritura.

<sup>19</sup> Nujaneanana, eti ímijachavaipapuca vahi étinahini táchajisiha eta Sagrada Escritura. Téchajisihahehisera, taicha eti iávacuhanahi eta vanairipiana. Emutuhi ecaviurevahí. Te jena sácheyare, vaipa ecatiuchavaimahi. Ematinainaripa emutu taicha eta eviurevanahi. Táurica eta ecaicuñairayare emutu.

<sup>20</sup> Natiarihipucasera nácani tímijachavanaripahi tijacapacareana taicha navarahainapa náitauchaya eta vanairipiana. Váhiquesesera tijacapacareanaimahi me Viya, taicha vahi étaparacaimahi eta náitauchirahi. Taicha eta vanairipiana, tímimaticahavichucha eta vicapecaturairahi.

*Vijacapacarehi mayehe ema Viya táichavenehi eta vicasiñavairahi mayehe ema Machicha Jesucristo*

<sup>21</sup> Puítisera, ema Viya tímimaticahaviripa eta vijacapacarevayarehi eta viúchucuiraya. Vahi étaparacaina eta vivarairahipuca vítaucha eta vanairipiana. Tanasiqueneripa eta Sagrada Escritura, táechajisihaipahi eta máitecapiraya ema ticiatiuchahaviya, vijacapacareya máicha.

<sup>22</sup> Eta tacahehi puiti, yátupihi eta vijacapacarevahí vimutu viti vicasiñavanahí mayehe ema Jesucristo. Ema Viya vahi manerejicaimahi nácarichuhini ena tiúriana. Váhivare máepuruimahi ena achaneana tispecaturanahí. Eta nacasiñairavahí eta mayehe, majacapavacahi namutu.

<sup>23</sup> Taicha yátupihi eta vicapeçaturairahí vimutu. Vimutu véchuriaca eta viúrivana, vijacapacaréni me Viya. Nájina émanáinahíni mátupiruhíni.

<sup>24</sup> Étasera eta máemunasirahavihi ema Viya, tijapanuhavihi. Tijacapahavihi táichavenehi eta vicasiñairahí ema Machicha Jesucristo. Émapa tivachachinahavihi eta vitapiravana táichavenehi eta vipecaturana.

<sup>25-26</sup> Ema Viya, téavicavahi eta matupiruvairahi. Vahi macamichaimahi ena téjecapavanahí te machacaya. Tásihasera, tijapanuhavihi. Máijararecahi ema Machicha eta mavachachirahi eta vipecaturana, vímicapacahi éma. Eta vicasiñaira ema Jesucristo, macaepahahi eta véjecapiravanahí vipecaturanahí. Tásiha, vijacapacarehi mayehe ema Viya.

<sup>27-28</sup> Tacahe, puiti visamaripahi eta majacapirahaviripa ema Viya, étachucha táchahi eta vicasiñairahí ema Jesucristo. Vahi vétupicavahini eta vicasiñavavairisirahí eta vítauchiraipa eta vanairipiana. Váhiquenevare étaparacaina.

<sup>29-30</sup> Vahi ácarichuimahi eti israelítana ejacapacarehi me Viya. Énerichuvare tijacapacareanahí namutu ena apavasanana ticasiñanahí. Tijacapahavihi ema Viya vimutu viti vicasiñavanahí eta mayehe.

<sup>31</sup> Váhivare ecuimijacha nútinahipucaini nímitucaehe vaipa tasuapacarehini viyehe eta mavanairipiana me Viya. Viti végicanahí ema Jesús, táitusiava vicarichuhi virataha vítaucha eta mavanairipiana ema Viya. Vahi vínjacaimahi.

## 4

*Vicutiyarehi ema víyarahaini Abraham eta macasiñavairahi mayehe ema Viya*

<sup>1-2</sup> Németeaca etiarihi eti evarahaipa échajisiha ema viáchucaíni Abraham. Evaraha ecunacha eta macaemataneasiranahí ema Viya, ímijachirahi éta táchahi

eta majacapacarevahi me Viya. Ímijachahivare táuriha eta macasiñavavaisiravapuca éma. Numetacahesera: Eta majacapacarevahi me Viya, vahi étainahini táichahini eta macaematanearisirahí ema Viya.

<sup>3</sup> Eta Sagrada Escritura, ani tacahe: “Ema Abraham, tétavicavahi eta macasiñavairahi me Viya. Eta tacahe, tijacapacaréinehi me Viya” tacahepa.

<sup>4-5</sup> Tiuri puiti, viti achaneana, te vicaematanerecahi, tatuparacahi ena vicaemataneyeruanahi eta navachachirahaviyarehi. Vahi tíjaracasichahavianaimahi eta najapanuirahavihini. Émasera ema Viya tijapanuhavihi, tijacapahavihi táchavenehi eta vicasiñavairahi eta mayehe. Vahi étaparacaimahi eta vicaematanearisirahí.

<sup>6</sup> Énerichuva ema víyarahaini David máechajisihahi eta náuricacarevahi ena ticapecaturarahiana eta majacapiravacahi ema Viya, tájina étaparacaina eta nacaematanearisirahí.

<sup>7-8</sup> Ánipa macahehi: “Tétavicavapa eta náuricacarevahi nácani mapardonachaqueneanahi ema Viya eta napecaturanaini, tijacapahavihi tímicutijiricavainehi tacuijahini véjecapiravainahini” macahepa.

<sup>9</sup> Tacahe, eta juca viúricacarevahi, vahi vácarichu viciatuparahahini viti israelítana. Énerichuhivare tatuparacahivare ena apavasanana. Vécharipahi eta majapanuirahi ema Viya ema Abraham. Tacarichuhi eta macasiñavairahi, majacapahi ema Viya.

<sup>10-12</sup> Ímijachaipapuca éti, eta majacapacarevahi ema Abraham tásihaquenehi eta macamarcairahi. Numetacahesera: Váhiqene étainahíi táichahini eta macamarcairahi éma, taicha te taequenepa eta majacapirahi ema Viya, mapauenavahí ticamarca ema Abraham. Étapa táicutiarayarehi eta majacapiraipa ema Viya táchavenehi eta macasiñavairahi. Émara ema achane máinapuiruhi ticasiñavahí me Viya. Puíticha ema Abraham, émapa vicaiyaquenehi vimutu viti vicasiñavanahí me Viya, vijacapacareipa víti apanava. Tacamunuipasera vácoticacahini vicasiñavahini mayehe, viti israelítana étipa eti apavasanana.

*Ema Viya máitauchayare eta máijarasirahaviya eta vícuchihi táchavene eta vicasiñavairahi eta mayehe*

<sup>13</sup> Ema Viya tíjaracavahi eta máijarasirayare ema Abraham énapa ena mámariéqueneana tamutu eta apauehe, návapai-ruyare. Máijaracayare táchavenehi eta macasiñavairahi ema Abraham. Vahi étaparacainahíi eta masuapirainahini eta vanairipiana.

<sup>14</sup> Taicha te tatiarihinahini eta náicuchihi ena títauchanahí eta vanairipiana, tamapurujipapucaini eta vicasiñavairahi, tamapurujipavarepuccaini eta máijarasiravahi ema Viya eta majacapirahaviyare.

<sup>15</sup> Taicha eta vanairipiana, étachucha támaparaucha eta náicuña ena téjecapavanahí. Tásicha, vimutu vicaicuchiya-rehini eta vícuña, taicha vimutu véjecapavahi\*.

<sup>16</sup> Ema Viya, téavicavahi eta majapanuraivahi. Tásicha, yátupi máitauchayare eta máijarasiravana nayehe namutu ena mámariéqueneana ema Abraham. Vahi nácarichuhini ena téhicanahí eta vanairipiana. Nayeheyareva namutu ena ticasiñavanahivare mayehe, ticutianahi ema Abraham eta macasiñavairahi. Eta tacahe puiti, eta vicaiyairahi vimutu víti ema Abraham te mavahuana ema Viya.

<sup>17</sup> Taicha ema Viya, ánipa maicha ema Abraham: “Puiti nunacaviyare píti nacaiyaqueneyare ena achaneana te camuriquene avasareana”. Tásicha, ema Abraham, ticasiñavahi muraca me Viya eta máitauchirayare eta máijarasirayare ema machichaya, tayanapane eta mácheruanahi éma, ésupa esu mayena. Taicha ema Viya, tamutuhi máituruequeneha. Ema Abraham ticasiñavahivare eta majacapirayare eta máicuchihi, tayanapane tájinaichaha máimahahini.

<sup>18</sup> Ema Viya mametacavarepa ema Abraham eta macachichairayare, camurianayare ena mámariéqueneanayare. Eta nasimutuvayare, tamutu nacavasayarepahi, camurianayarehi eta návasanaya. Ema Abraham, ticasiñavahi eta táitauchiravayarehi tamutu. Ticuchapavaipa eta máuchusirayare ema machichayarehi.

<sup>19-21</sup> Ema Abraham, ichavicaipa éma, cien año eta mahañora. Ésupa esu Sara, ichavicaipavare, macheruhivare. Vaipa náuriyahini eta nacachichairayarehi. Váhisera maeñamavahini ema Abraham. Ticasiñavahi muraca eta mayehe ema Viya eta tamutuirahi máituruequeneha eta máitauchirayarehi tamutu eta máijarasiravanahí. Váhivare mapicacaracavahini. Eta macasiñavairahi, téavicavahi eta macunachirahi ema Viya.

<sup>22</sup> Eta tacahe, ichape eta majacapacarevahi me Viya táichavenehi eta macasiñavairahi muraca.

<sup>23</sup> Tacahe, eta vicaravahuira eta Sagrada Escritura, vímatie-queneha vahi mácarichuhini ema Abraham majacapacarehini me Viya.

\* **4:15** Ema Pablo te mayeherepi eta máechajiruvana, ani macahe: “Te táchica táchina vanairipi, nájinavare ticaviurevahini eta náejecapira tayehe”. Étasera eta macayemaquenehi, ani tacahe: “Tatiarihi eta viviurevahí vimutu, taicha tatiarihi eta vanairipi te tamutu jácani vicaijuhepuca”.

24-25 Puiti, víti apanava vijacapacarehi me Viya eta vicasiñavairahi mayehe. Taicha ema Viáquenu Jesucristo táimicapacahi eta vipecaturana. Émasera ema Viya macaechepucahi ema Machicha te máecari apaesa vijacapacareyarehi mayehe vimutu viti vicasiñavanahí mayehe.

## 5

*Tétavicava eta viúricacarevahi táichavene eta majacapirahavihi ema Viya*

<sup>1</sup> Puítiripa vijacapacareipa me Viya táichavenehi eta vicasiñavairahi eta mayehe. Tásicha, tétavicavaipa viúrvivahí eta mayehe. Vaipa vipicacaracavahini tayehe eta vícuñayarehini, taicha ema vímicuñaruhi ema Viáquenu Jesucristo, macaepaharipa eta vícuñayarehini.

<sup>2</sup> Máichavenehi ema Cristo, tétavicavahí eta majapanuirahavihi ema Viya. Tásicha, tijacapahaviripa táichavenehi eta vicasiñavairahi eta mayehe. Tamutu sácheana viúrisamurehi eta vicuchapiraipa eta vijacapirayare eta vícuchihi visiapi-rayare te majaraivahí ema Viya.

<sup>3</sup> Te tatiarihina puca eta vicatajivairayare, vivapinavachucha eta vicamichirahi taicha téturechahaviya eta vímiyanirava véhica ema Viáquenu.

<sup>4</sup> Táichavenehi eta vímiyanirava véhica, vijacaparipavare eta vitumevayare viratahairayare vicamicha tamutu. Tásicha, eta vicamichirahi tamutu, vicuchapainapa eta táitsivayare vícuchihi.

<sup>5</sup> Tájina tímipererécahavimahi taicha yátupiyarehi eta vijacapirayare eta vícuchihi. Vicasiñavahí mayehe ema Viya taicha tímimaticahaviripa te visamureana eta máemunasirahavihi máichavenehi ema máijararuuhavihi Espíritu Santo.

<sup>6</sup> Víti, tájina viviyaimahi eta vicuchucuiraváinahíni. Émasera ema Cristo, te tiúrihi eta máimairahi, tijaracavahí tépena víchavenehi víti máuriranahí, eta macuchucuirahaviya.

<sup>7</sup> Váhisera tacuticacahini eta visamureana viti achaneana. Vimutuhi véñama eta vítaresira. Téhesera tatiarahinapucaini eta véñamirainahini mácani achane máetaviuchahi eta máuriva, víjaracavapapucaini vépena eta vicatiuchirainahini éma.

<sup>8</sup> Émasera ema Viya, tétavicavahí eta máemunasirahavihi, tayanapane eta vicapecaturarahirichahanéni. Máijararecahisera ema Machicha Jesucristo máepeninahavihi.

<sup>9-10</sup> Tásicha puiti, vijacapacareipa me Viya táichavenehi eta vicasiñairahi ema Jesucristo eta máepeninahavihi. Ichapehinéni eta véjecapiravahí, vimaesenisirahí ema Viya, mavarahahisera éma macaepahayarehini eta vícuñayarehini táichavenehi eta vipecaturana. Eta máepenirahí te crusu

ema Machicha, puiti ema Viya tíchuhahavihi vipauchayare éma. Tájina vipicahini eta viávahásiraipa éma. Tásiha puiti, eta vicasiñavairahi eta mayehe, vaipa véñamavahini tayehe eta viúchucuirayare taicha eta máechepusirahi te máecari, eta tímicaecherachahi eta máitupajijasiravahi eta macuchucuirahaviya.

<sup>11</sup> Puiti, tétavicavaipa eta viúrisamurevahi mayehe ema Viya máichavene ema Viáquenu Jesucristo. Tétavicavahi eta viúrivahi mayehe.

*Ema Adán tímiaquipaicahavi vimutu. Émasera ema Cristo émapa ticuchucuhahaviyare.*

<sup>12</sup> Tacuhe, ema Adán, ema máinapuiruhi achane tiávapaicahi eta juca apaquehe, éma tinacuchahi eta pecatu. Tásiha, táchavenehi eta pecatu, járajapapa eta vépenira, tavachaequenehi eta pecatu, taicha tímrijicahaviripa tayehe eta pecatu.

<sup>13</sup> Te tájinaichaha májuchahini ema Moisés eta vanairipiana, tatiarihipahi eta pecatu te juca apaquehe. Étasera tamajinairaichaha eta vanairipiana, vuíchaha nacaviurevahini ena achaneana.

<sup>14</sup> Namutusera ena mámariéqueneana ema Adán tépenanapaipahi taicha mámaparaucharipahi eta mapecatura éma, tayanapanepuca eta napecaturana vahi tácuthihini eta mamasuapajiraivahi, tayanapanehivre tájinaichaha eta vanairipi májurehi ema Moisés. Ema Adán, émapa ticaetehahavihi. Te taequenepa, márajapainapa ema apuna, émainapa tétupiripanahaviyare.

<sup>15-16</sup> Viti, tétavicavaipahi eta visimutuvahi viti vicaicuñanayarehini tayehe eta ecuñaraqui te yucu infierno, étanaichuhinéni eta máejecapiravahi ema viáchucaini Adán. Émasera ema Viya, ichaperinehi eta majapanuirahavihi vimutu, mavarairahi ticuchucuhahaviyare máichavenehi ema Machicha Jesucristo. Tamuturipahi macaepahahi eta tasimutuqueneana vipecaturana. Tájina tavachaequenénahini. Tájinavare jácani vicaematanearacaimahi.

<sup>17</sup> Étanarichuhinéni eta pecatu máejecapiravahi ema émana achane, émaripa ema viáchucaini Adán. Tiámairijicahaviripasera eta vépeniraya vimutu. Émasera ema Viya tiápajucavaipa eta majapanuirahavihi. Tijacapahaviripa máichavenehi ema émanaquenerichuvare achane, ema Jesucristo. Tíjaracahavinavarepa eta arairuyare vítaresirayare vimutu viti vicasiñavanahi eta mayehe.

<sup>18</sup> Eta mapecaturahi ema Adán, yátupi tiámaparáuchahaviripa vimutu eta vicaicuñairaya. Émasera ema Jesucristo,

tájina matapiravainahini eta máitaresirahi. Éma, tiámaparáuchahaviripa eta vítaresiraya víti, vijacapacareipa me Viya.

<sup>19</sup> Camurihavihi viti tacaerajiruanahi me Viya, táichavenehi eta mamasuapajiraivahi ema émana achane. Puitisera camurihaviripa viti vijacapacareanaripahi me Viya táichavenehi eta masuapajiraivahi ema apana achane Jesús, taicha tájina matapiravainahini eta máitaresirahi.

<sup>20</sup> Te táequenepa eta máejecapirahi ema Adán, ema Viya manaquicahi eta vanairipi. Éta tímitucahaviyarehi eta tavayuchiravahi eta vipecaturanahi. Puíticha tiápajucavapaipaicha eta pecatu, émasera ema Viya tiápajucavaichucha eta majapanuirahavi.

<sup>21</sup> Tacahe, eta pecatu, ichape eta támaparáuchirahavihi tayehe eta vépenira. Étasera eta majapanuirahavi ema Viya tiámaparáuchahaviripahivare eta vijacapacarevahi mayehe. Tásicha, píjaracahavinavarepa eta vítaresiraya máichecuaraqureyare máichavenehi ema Viáquenu Jesucristo.

## 6

*Puiti eta majacapirahavipa ema Viya, viciatuparahapa vitupiruvainapa eta vítaresiraya. Vínajicainapa eta pecatuana.*

<sup>1</sup> Tiuri puiti, németeaca etiarihi eti ímijachaipapuca tiúrihi vímiyanava vicha eta pecatu apaesapuca tácaeherapaipa eta táetaviuchirahi eta majapanuirahavi ema Viya.

<sup>2-3</sup> Váhiquenesera táuricahini vímiyanavahini vicha. Taicha tépaharipa eta tapamisirahavini eta pecatu. Nuvaraha vahi ecuemitisica eta ímitucasivanahi. Eta vicaicachasirahi eta víjarasiravahi véhicaya ema Viáquenu Jesucristo, viúrujiacaripa éma. Tásicha, tímicutijiricavaipa vácachanehini eta máepenirahi, vépenahivaréni víti. Vaipa tárataha tipamicahavi eta pecatu.

<sup>4</sup> Eta vicaicachasiraiipa te une, tímicutijiricavahi vicaecarasih, vicachanepa ema Cristo eta máepenirahi. Énerichuvare eta viúchusirahi te une, vicutipa éma eta máechepusirahi te máecari. Tanasiripa eta ichasini vítaresira. Tásicha puiti, arairupa eta vítaresirahi taicha máetaviuchirahi ema Viya eta macaemataneasirahavi tacuti eta ichape máitupajijiasiravahi te macaechepucapa ema Machicha. Vaipa táuricahini víchahini eta pecatu.

<sup>5</sup> Taicha eta viúrujiasiraiipa ema Cristo, vicutiripahi éma eta máepenirahi. Tásicha, étarichu vicaheyarehi víti apanava eta véchepusirayarehi, vicutiyarehi éma eta máitaresirahi, tájina matapiravainahini. Tásicha víti, arairuinapa eta vítaresira.

<sup>6</sup> Tacutiquene, eta tamaurivainihi eta ichasini vítaresira tacapecaturaraivainihi, tímicutijiricavahi te vicaquenureca. Tétavicavahi eta tacavanarairahavihi, tipamicahavihi eta

víchirayarehi eta tamauriqueneana. Puítisera táecarasipa eta ichasi vítaresira, tacutihi eta náecarairaipa ema Viáquenu Jesús. Vaipa tipamicahavimahi.

<sup>7</sup> Taicha mácani achane eta máopeniraipahi, tíchecaipahi eta macapecaturairahi.

<sup>8-9</sup> Puiti vécharipa eta máechepusirahi te máecari ema Viáquenu Jesucristo, tájinapa tímiapechaimahi máopenahivaréni taicha tájinapa tárataha támicapacahini. Ene vicahéhi víti eta viúrujiasirahi ema Cristo. Vécarapahi eta tamaurivahi eta ichasihi vítaresirahi. Puiti, tamutupa ticaitsivahi. Vicutinapa éma eta vítaresirainapa.

<sup>10</sup> Eta máopenirahi ema Cristo, éta tímicapacahi eta vipecaturana. Éma, vaipa tiápechavaimahi tépena. Tamuturipahi. Tásicha, eta máechepusiraipahi, máichecuaraquirénapa eta máitaresira te mavaure ema Maiya.

<sup>11</sup> Ene ecaheyare éti, écarainapa tamutu eta tapamisirahéni eta epecaturana. Puiti eta ítaresirainapa, macarichu ema Viya ecaematanearuya, táchavenehi eta iúrujiasirahi ema Viáquenu Jesucristo.

<sup>12-13</sup> Vaipa ecuisapa eta tapamisirahe eta pecatu. Váhivare ecusuapa jácani tajamurachaqueneanahi eta iáqueheana, taicha téavicavahi eta tamaurivahi eta tajamurachaqueneanahi. Tímicutijiricavainapa épenaquéne, vaipa échaimahi eta pecatu. Ítarecainapasera mayehe ema Viya, íjararecainapa eta iáqueheana mayehe. Ísapainapa ema Espíritu Santo tipamicuhe eta ecaemataneasiraya ema Viya, eta íchiraya eta tauriqueneana.

<sup>14</sup> Eta pecatu, vaipa ticavanarahémahi. Émainapasera puiti ema Viya, tímicatakahénapa eta íchirahi eta tauriqueneana. Énerichuvare vaipa tacamunuhini eta táipicararesirahe eta vanairipiana apaesa vahi ecuquicha eta tamauriqueneana.

*Ena ticapecaturarahiana tímicutijiricavahi ena ticaquenurecana eta tapamisirahi eta náichirahi eta pecatu*

<sup>15</sup> Puiti, németeaca etiarihi eti ímijachahi tísapacarechaha eta vicapécaturaira taicha vaipa táipicararecahavihini eta vanairipiana. Étisera, téavicavahi eta taejecapiravahi eta epanereruana. Ímipanapa eta majapanuraivahi ema Viya. Vaipa epicauchahini.

<sup>16</sup> Écharichuhi éti, te ímyanavayarechuchapuca eta tapamisirahehi eta pecatuana, ecutirichahapuca mácani ticaquenurecahi, tipamicavayarehi eta masuapirayarehi ema máquenu.

Ene ecahehi eta esuapiraichaha eta pecatu. Éta tiámaparáuchahehi eta esiapiraya te yucu infierno. Téheserapuca émainapa esuapaya ema Viya, tatupiruvainapa eta ítaresiraya.

17-18 Nuhasulupayachasera ema Viya eta ínajisiraipa eta tapamisirahénihi eta pecatuana. Puiti tatupiruvaipa te esamureana eta esuapirahi eta véhiruhi ímitucasivahi. Puiti íjaracavainapa ecaematananeaca ema Viya, iávácuharipa eta táuriva eta ítaresiraya.

19 (Nímicutichinahéhi eta juca, taicha vahi máejerarena eta ecaicutiarairaina éta. Nuvaraha yátupina ecaicutiaraya.) Cape eta ítaresirahi, étarichaha íjararecahi eta iáquehe tayehe eta tamauriqueneana, étaviuchahi eta evainarajivanainihi. Puiti íjararecaya eta iáquehe íchayare eta táuriqueneana, táurivaya eta ítaresira. Tacuija tahapapicahe eta ecaematanaeasiraya ema Viya.

20 Taicha cape juca ítaresirahi étarichaha tipamicahehi eta epecaturana. Vuíchaha étainahini ecaematananeaca eta táurivaya eta ítaresira.

21 Tájinavare ímaequenehahini eta íchirahi eta tamauriqueneana. Puítisera, téavicavahi puiti eta etsirihacarevahi tayehe, taicha ímatipa tiámaparáuchahehi eta esiapirayarehini te yucu infierno.

22 Puítí iúchurepa tayehe eta tapamisirahehi eta pecatu. Iávacuhaipa eta ecaematanaeasiraya ema Viya. Jéhevare eta iúritaresirayare me Viya, máichecuaraquirenapa eta ítaresiraya.

23 Eta víchirahi eta tamauriqueneana, tacarichu tiámaparáuchahavi eta visiapistayarehi te yucu infierno. Émasera ema Viya mavaraha tíjaracasichahaviya eta vítaresirayare máichecuaraquireya, te yátupina eta vicasiñairayare mayehe ema Viáquenu Jesucristo.

## 7

*Viti véhicanahi ema Jesucristo, titavaripa eta tapamisirahavíhi eta vanairipiana*

1 Nuparapenaveana, écharichu éti eta yátupirahi tisuapacarehi eta vanairipiana nayehe ena achaneana, étachu-chasera te titarecanarichaha.

2-3 Tímicutijircavahi súcani esena suaimaquene. Tatuparacahi ésu sucachaneyarehi macarichuhí ema suima, vahi sucucaeahi éma, te jácani achancerichaha éma. Te suvehapuca ema apuna achane, ticapecaturaipa ésu. Téhesera te tépenai-papuca ema suima, ésupa téchinava. Tísapacare suápechava suácaima mayehe mácani suvarahaqueneyare suímayare. Vahi pecatuina eta suápechiravayare ticaima.

<sup>4</sup> Ene ecahehi eti nuparapenaveana. Ema Cristo, máepeni-nahehi te crusu, macaepaharipa eta tapamisirahénihi eta vanairipiana. Puiti émapa téchahehi ema Cristo. Ecuitiripa esu esena suépenaimaquene te tiápechava ticaima, tásicha apanapa ema téchahi ésu. Puiti mavanaraheripa ema Cristo, ema máechepurequenehi te máecari. Mavarahahi ichapeyarehi eta ecaemataneasiraina eta mayehe ema Viya.

<sup>5</sup> Taicha cape juca ítaresiraichaha, esuapahi eta tavaraha-queneana eta iáqueheana. Te esamapa eta vanairipi tiápajucavahi eta evarairahi ícha eta tamauriqueneana. Tásicha éta, tiámaparáuchahehi eta ícuchihi eta esiapirayare te yucu infierno.

<sup>6</sup> Puítisera vaipa tapamicahavihini eta vanairipiana. Puiti viúchucurepa eta ichasi vítaresiraini. Émapa vicaemataneas-cayare ema Viya taicha tépanavaripa eta arairu vítaresira eta mávahásirahaviripa ema Espíritu Santo.

*Eta viáquehe tichurucahavihi eta tavarairahi vicha eta tamauriqueneana*

<sup>7</sup> Etiarihipuca eti ímijachahi tipamicahavehi eta vanairipiana eta ecapecaturairaya. Váhiquesera étina. Vítiripa vahi vímatiequenehavanehini eta tamaurivahi eta vicapecaturairahi, te vuíchaha vímatihini eta vanairipiana. Vuíchahavare vímatihini eta tamaurivahi eta vijamurachirana eta apayehe. Eta vanairipi, ani tacahéhi: “Vahi picujamuracha eta apayehe”.

<sup>8</sup> Téhesera te vímatipa eta juca vanairipi, viápajucavapa vijamuracha tamutu eta vímahaqueneana tájiparacana. Te tacuijahini eta juca vanairipiana, váhirichuhini vicujamurachahini eta apayeheana.

<sup>9</sup> Eta viámaperuvaichaha apaicape, vuíchaha vímatihini eta vanairipiana. Téhesera te vímatiequenehapa, visamavapa eta tatarihipa eta véjecapiravahi eta vimaitauchirahi eta vanairipiana. Tásicha, véchapa eta vépenirayare, tatarihirahi eta vícuchihi eta vícuñayarehi.

<sup>10</sup> Tacahé, víti vímijachaipa hi viúchucuhayare te vítaucha-papuca eta vanairipiana. Tájinachuchasera tájaracahavihini eta viúchucuirainahini. Étachucha tiámaparáuchahavi tayehe eta vépenirayarehi.

<sup>11</sup> Téhesera te amahe eta visamure, jararihi eta pecatu. Tavayuaracahavipaipa, tacamapurairavahi eta tatarihirahi eta vanairipiana, taicha tavaraha táimicapacahavi.

<sup>12</sup> Nuvaraha numetacahe: Tiúrihisera eta vanairipi, sántohivare, tatupiruvahivare.

<sup>13</sup> Németeacasera etiarihi eti ímijachapuca vahi tiuri eta vanairipi taicha támapiricahi eta vépenirayarehi. Vahi tacucahe eta epanereruana. Numetacahe: Váhiquene étainahini eta vanairipi támaparauchahavihini eta vépeniraya. Étarichu eta vicapecaturairahi, étapa tiámaparáuchahavihí eta vépenirayarehi. Étasera eta vanairipi tímereuchahavi eta vimaurivahi víti te visamureana, tétavicavahivare eta vimasuapajiraivahi.

<sup>14</sup> Eta vanairipiana tavarahahinéni tímitupiruchahavi. Étasera eta veche máteji, tavayuararuhi eta tavarairahi víchaya eta tamauriqueneana.

<sup>15</sup> Taicha víti váhiquene vímatiequeneha tájahapuca eta vícharacavaya. Vahi véhicahini eta vapanerechaquenehi vivarahaquenehi vicha. Tasapihachucha víchahi eta vicatiuchaquenehi vimavarahaquenehi vicha.

<sup>16</sup> Tatupiruvahi eta vanairipiana eta tametasirahavi eta vicaicuñairayare táichavenehi eta vipecaturana. Tásicha, te víchapapuca eta tamauriqueneana, visamava te visamure eta vimaurivahi eta víchirahi, vémechaemachirava eta tametasirahavihi eta vicaicuñairayare.

<sup>17</sup> Tatarihi te viáchaneva eta pecatu. Tásicha, vápanéni vítijiricavahini víchahini eta pecatu. Étasera eta távahásirahavihí te visamure eta pecatu, étapa tipamicahavihí eta víchirayarehi eta tamauriqueneana.

<sup>18</sup> Véchahivare víti eta vimavarahaquenehi vicha, vahí tátiresiraini eta viáquehe. Tétavicavahí eta tamasuapajiraivainihi. Tímicutijiricavaipa tichururerecahavihí. Vivarahahinéni vétupiricavahini, váhiquenesera tásapahavihini eta viáquehe vétupiricavahini.

<sup>19</sup> Te vivarahainipa vicha eta táuriqueneana, vahí váratahaimahi vicha. Étachucha víchahi eta tamauriqueneana vimavarahaquenehi vicha.

<sup>20</sup> Te víchahipuca jácani vimavarahaquenehi vicha, vaipa vitinahini tásihahini eta víchirahi, étapa eta pecatu tipamichahavihí, taicha tiávahácahavi víti.

<sup>21</sup> Te vivarahainipa vicha eta táuriqueneana, tasapihachucha eta pecatu tímia pitavairicavahí tíchejimirauchahavihí. Eta tacahehi eta víchavaquenevahí.

<sup>22</sup> Étasera eta viáchaneva, tétavicavahinéni eta tajamurachirahi víchahini eta mavarahaqueneanahi ema Viya.

<sup>23</sup> Jararihisera eta pecatu te amahe eta viáquehe. Ichape-murihi eta táchacacairahi tacanarahi eta paure viáchaneva. Tavaraha tíchejimirauchahavi apaesa vahí vicuitauchahini eta mavarahaqueneana ema Viya. Tétavicavahí eta tátiasirahavihí, tímicutijiricavaipa vicaerata.

<sup>24</sup> ¡Tétavicavapa eta véjapanuraivasamihí viti páureana! ¡Tacahehi eta víchararacavahi! Németeaca eta vипанеруанахи viti, ticutimahinepa nájinapa tiratahaimahi ticuchucuhahavi tayehe eta tavayuasirahi eta viáquehe eta pecatu, támirahaviyare tayehe eta vépenira.

<sup>25</sup> ¡Mararihisera ema Viáquenu Jesucristo! ¡Macarichu éma marataha ticuchucuhahavi tayehe eta juca tamauriqueneana! Puítiripa nútì, ichape eta nuhasulupayachirahi ema Viya. Tétavicavahi eta nuvapinairavahi eta níchirahi eta mavarahaqueneanahí. Étasera eta ichasiquenetataji náquehe, ticavanaranuichucha tayehe eta pecatu.

## 8

*Tiúriyarehi eta vítaresira taicha eta mávahásirahavihi ema Espíritu Santo*

<sup>1-4</sup> Puítisera témitiacaripa eta vícuñayarehíni viti viávahácanaipahi ema Cristo Jesús. Eta mávahásirahavihi ema Jesucristo, tiávahácahaviripavare ema Espíritu Santo. Émapa, ticaepahahi eta tapamisirahavihi eta pecatu, étapa eta támaparauchirahavihi eta visiapistaya te yucu infierno. Ema Viya, eta máimairahi eta vimaetumechiravahi, vimaratahairahi vítauchahini eta vanairipiana, mavanecapa tiúcupaicahi ema Machicha, macaqueheyarehi eta juca viáquehe viti achaneana. Eta máijarasiravahi, macamitiequenehaipa eta tapamisirahavihi eta viáquehe eta vicapecaturairana. Puiti émainapa téchahaviyare ema Espíritu Santo. Véhicainapa eta mavarahaquenehi. Tásiha vínjicainapa eta visuapirainihi eta tavarahaqueneanainihi eta viáquehe tacapecaturaraivaini. Émapa tétumechahavihi eta vítauchiraya eta mavarahaqueneana ema Viya.

<sup>5</sup> Nácanisera nasuapahi eta tavarahaqueneana eta náquehe, étachucha napanerechahi eta náichiraya eta tamauriqueneana. Vítisera viti visuapanahí eta mavarahaqueneana ema Espíritu Santo étainapa vипанеречая и вицурисамуречиря ema Viya.

<sup>6</sup> Nácani napanerechahi eta tavarahaqueneana eta náquehe, támaparaucharipa eta nasiapiraya te yucu. Vítisera viti vипанеречанахи и mavarahaqueneanahí ema Espíritu Santo, viti vítarecayare. Viúrinapa mayehe ema Viya.

<sup>7</sup> Nácani napanerechaichucha eta tavarahaqueneana eta náquehe, éna macatianaruuanahí ema Viya. Taicha váhiqene návarahaimahi nasuapa eta mavanairipi.

<sup>8</sup> Tacahe, éna étachucha nacurisamurerecahi eta náquehe, vahi náitucahini nacurisamurечахини ema Viya eta mavarahaquenehi.

9 Puítisera éti, eta mávahásiraheripahi ema Espíritu Santo, vaipa étaimahi epanerecha eta tavarahaqueneanahi eta iáquehe. Étapa epanerechaya eta mavarahaqueneanahi éma. Nácani vahi mávaháruanainahini ema Espíritu Santo, váhivare machaneranainahini ema Cristo.

10 Étisera, eta mávahásiraheripa ema Cristo, tayanapane táicuchirichuhi eta iáquehe eta tápeniraya táichavenehi eta pecatu, étasera eta iáchaneva titarecayarechucha, taicha ejacapacaréipahi me Viya.

11 Táichavene eta mávahásiraheripa puiti éti ema Espíritu Santo, ema Viya macaechepucayare eta iáqueheana, tayana-panepuca épenaquenénaripa. Tacutiyarehi eta macaechepusirahi ema Machicha Jesucristo te máecari. Éti iápechavayare ítareca maicha ema Espíritu Santo.

12 Tacahe, nuparapenaveana, vicatuparahapa eta visuapiraya ema Espíritu Santo. Vaipa étaimahi visuapa eta tavarahaquene eta viáquehe.

13 Taicha te étachuchapuca esuapa eta tamauriqueneana tavarahaqueneanahi eta iáquehe, tájinapa iúchucuiyaimahi, ecaicuchihi eta épeniraya. Téhesera éhicahi eta mavarahaquenehi ema Espíritu Santo, ínajicayareva eta íchira eta tavarahaqueneanahi eta iáquehe, ejacapainapa eta ícuchihi eta ítaresirainapa.

14 Taicha vimutuhi viti visuapanahi ema Espíritu Santo, machichahaviripa ema Viya.

15-16 Émaripa ema Espíritu Santo timetacahaviripa eta machichairahaviripa ema Viya. Visamavaipa te amahe eta visamure. Éma, vahi tipamicahémahi. Váhivare típicararecahémahi tayehe eta ícuñayarehini. Tímimaticahénapasera eta yátupirahi macachichairahéhi ema Viya. Tásiha, ecasiñavaipa eta mayehe ema Viya, émairaipahi ecaiyaqueñehi. “Tátagicha Nucaiyaqueñehi” ecaheyarehi.

17 Eta macachichahaviraipa ema Viya, vijacapainapa eta vícuchihi máijararuuhaviya. Vicutinapa ema Cristo eta máijarasirahi eta máicuchihi éma. Puiti, eta vicatajivairahi te juca vítaresirahi, vicutihi ema Cristo eta macatajivairahi, tásiha, vicachanénapa éma tayehe eta mávihahi eta majaraivahi.

18 Puiti németeacahi núti, tayanapane ichapepuca eta vicatajivairahi puiti juca sácheana, tájinachucha táichavahi taicha jararihiyare eta ichape táitsivayare, vijacapaya eta ichape viúricacarevaya te majaraiva ema Viya.

19 Jéhevare, téavicavahi eta tajamurachacarevahi te táitecapapa eta sácheyare eta vímairaya eta vicuchapaquenehi

eta tacaitisvairaya eta viáquehe vimutu viti machichanaveana ema Viya.

20-22 Tacutiquene te jena sácheyare vicuchapaquenehi, tamutuinapa témitiacayare eta témeccatajivachahavianainihi te juca apaquehe. Tamutuinapa arairuyare, tétavicavainapa eta táurivaya eta apaquehe. Vímaha puiti ticatajivanahi tamutu te juca apaquehe: Eta sárareana, ticajumanahi, táepenanahi; étapa eta sucurecana. Eta tacatajivairahi tacutuhi eta sucatajivaira esu súcani esena ticacatiruhahi eta suínasira. Étasera eta arairuyare apaquehe, ticaitsivainapa tamutu. Vaipa pecatupairemahi, tamicauchainevarepa eta majaraiva ema Viya eta viávhaya viti machichanaveanahi.

23 Ema Espíritu Santo máitsivacharipa eta viáchanevana. Vaipa táesachaimahi vicha eta pecatu. Váipavare víchaimahi eta tamauriqueneana. Tásicha, víti, ichaperipa eta vicuchapiraipaicha eta jena sácheyare eta tacaitisvairayare eta viáqueheana. Títauchavainapa eta macachichairahavinapa ema Viya. Yátupinapa mayehehavinapa.

24-25 Yátupihi puiti eta machichahavirahi ema Viya. Ichapevare eta vicasiñavahi eta mayehe eta vicuchapirahi eta viúchucuirayare te jena sácheyare. Vácamicha tamutu, vímiyanava eta vicasiñavairahi eta mayehe támputu sácheana. Tapaenumavainapa vímahainapa, tájinapa vicuchapaimahi.

26 Énerichuvare, ema Espíritu Santo tímicatakahavihi te tamutu eta vimaratahaqueneanahi. Tavetiji tímicatakahavihi eta vimaitusirahi eta viyaseuchiravayarehi te viyu rasirana. Éma, tiyaseuchahavi te viáchanevana. Viúmitichahi taicha muraca eta vivarairahi eta mayasearuana. Vaipa virataha véchajicahini.

27 Émasera ema Viya máimatihi eta visamureana jácani vivarahaqueneana viyaseaca, étaripa eta mayasearapi ema Espíritu Santo. Taicha ema Espíritu Santo máimatihi eta mavarahaqueneanahi ema Viya, tásicha tiyaseuchahavihi viti machaneranahi.

*Ema Viya mavaraha ticachanehaviyare víti te majaraivahi*

28 Vécharipahivare tétavicavahi eta majaneasirahavihi ema Viya vimutu viti vémunacanahi éma. Tayanapano vicatajivahipuca, éma tamutuhi tiuri máicha. Títauchavayare eta mapanereruana éma eta viúricacareyarehi eta máichuirahavihi.

29 Acaneripahi eta máimatirahavihi, tinerejicahavipa machichahaviyarehi. Mavarahahi éma vicutiyare ema Machicha Jesucristo eta máurivahi. Tímicutijiricavayarehi viparapeya éma, véchavimurihi eta macachichairahavihi ema Viya.

30 Tásicha, te máimahapa tiuri, tíchuhahavipa viti manerejiruanahi. Eta visuapiroha vipauchaipa éma, tijacapahavipa. Tásicha, tíjaracahavipa eta vícuchihi eta visiapiroha tayehe eta majaraiva.

*Tájinaquene ticaerajicahavimahi mayehe ema Viya taicha yátupihi eta máemunasirahavihi*

31 Tásicha puiti, nuvaraha yátupina eta ecaicutiarairaya eta juca: ¡Tétavicavahi eta macatiuchirahavihi ema Viya! Tájina táichava eta nacatianasirahavipuca nácani achaneana. ¡Váhisera nárataha ticapaquechahavianaaimahi!

32 Eta majapanuirahavihi ema Viya, vahi mavayuacahini máijararecapa ema Machicha eta nacapasirahi víchavenehi vimutu víti. Tásicha, mavetijinapa eta macatiuchirahaviyare puiti te tamutu eta jácani víchavaquenevana.

33 Puiti tájinapa viviurevaina támicuñacahavihini viti manerejiruanahi, taicha ema Viya tépachiacahaviripa eta majacapirahavihi.

34 Tájinaquenepa tímicoñacahavimahi taicha ema Cristo máepeninahaviripa, tichavaripavare titareca. Puíticha téjacahi te mavaure ema Viya, téchajiurucalahaviripa éma.

35 Ema Cristo, tájinaquene vahi máinajicaimahi eta máemunasirahavihi. Tásicha, yátupina eta vicasíñairaina éma. Tayanapanepuca vicatajivahi, váhivarepuca vicuitucahi vétupirica eta víchavaquenevanahi, vicamichahisera máicha. Te vécuhapuca, te vítajihapuca, vahi vicainajirucahini máicha. Te típicararecahavianapuca, te tipanajiricahavianapuca, te navarahapuca ticapacahaviana, váhiquenesera vicainajiruvahini máicha.

36 Te tamutu eta juca, vicuti ena machanerana ema Viya ena táchajisihaquenenahi acane eta Sagrada Escritura, ani tacahehi: “Tamutu sácheana ena tictorianacanahi ema Viya titanucahavianahifi viti machanerana, navaraha ticapacahaviyare. Tivapinavanahi eta nacapasirahavihi, ticuti ena ticaparecanahi eta vaca te náichayare eta ichape fiesta”.

37-39 Váhiquenesera vipicaimahi eta náipicararesirahavianahifi. Tétavicavahi eta máetumechirahavihi ema Jesucristo táichavenehi eta máemunasirahavihi. Tájinavare tihapapicahavimahi eta véhisirahi éma. Núti nucasíñava ema Viáquenu eta majaneasirahaviya. Tájinaquene ticaerajicahavimahi eta máemunasirahavihi. Vahi étainapucaini eta vicatajivapuca eta vítaresira, étainapucaini eta vépenira, étainapucaini náipicararesirahavipuca puiti juca vítaresiraichaha, étainahipucaini támipanererecahavihíni, jácani víchavaquenevaya eta vítaresiraya. Tájinaquene vahi vipicahini eta tipicacareanahi te juca apauehe,

énainapucaini ena ichapemuriqueneana mayeheana ángele ema Váinaraji, étainahipucaini eta náiñehivanahi. ¡Tájinaquene ticaerajicahavimahi mayehe ema Tata taicha yátupihi eta máemunasirahavihi taicha viávahácahi ema Viáquenu Jesucristo!

## 9

*Ena israelítana, éna manerejiruanahi ema Viya*

1-3 Nuparapenaveana, téavicavahi eta némunasirahi ena nujaneanana israelítana. Eta tacahe, ichape eta náimipanerechiranuhi nucatisamurehivare, táichavenehi eta namaehisirahi ema Viáquenu Jesucristo. Táetaviucha eta néñamiravahi eta nayehe, nuvarahainehi níjararecavahini nuyanahini núti te jena yucu, apaesa vahi nacuyanahini éna. Énainahini náurihini éna mayehe ema Cristo. (Núti nutupiruva puiti juca numetasirahehi. Ema Espíritu Santo, émaripa téchahi tamutu eta nupanereruanahi. Tímismanuhi eta nétupirisirahi eta numetasirahehi.)

4-5 Téavicavahi eta náuricacarevayarehini éna, taicha manerejiruanahi ema Viya, máichavenehi ema náchucaequeréni Israel, mavarairahi ema Viya machichanaveanayarehi. Ichapemurihi eta macachaneravacahi, máimechirahi eta majaraiva. Máijaracavaca eta matratune eta majaneasiravacayare. Máimimatichahivare eta mavanairipiana. Máimimatichahivare eta náechajisiraya émachuca te nayujarasirana. Mametacahivare eta máitesirayarehi ema ticatiurahiyare nayehe. Ena nani, téavicavahi eta táurivahi eta náicuchiyarehini taicha manerejicavacahi ema Viya éna máumurivanarichuhi ema Cristo, najaneanaranichuhi eta máucupaisirahi te juca apaquehe. Émasera, Víyahi éma. Puíticha émaripa téchahi tamutu. Maitavacacaipa eta vijirauchirahi. Amén.

6 Tayanapane eta macatajisiravacahi ichape ema Viya ena nujaneanana israelítana, tamapurujisera, éna namutuyaréni témeprurecavana. Vahi návarahahini náehica. Váhisera étainahini táichahini eta mamaitauchirahi eta matratune ema Viya. Nasapihana namapuruji namutuyaréni, vahi machichanaveanainahini ema Viya, táichavenehi eta namasuapajiraivanahi.

7-9 Nuvaraha némechahe eta manerejisirahi ema Viya ena apinana machichanaveana ema Abraham. Matiarihihi ema Ismael, émapa ema Isaac. Ema Viya vahi manerejicahini ema Ismael, máijarasiravacayarehi eta náicuchihi ena mámariéqueneana. Macarichu ema Isaac, manerejiruquenehi ema Viya. Eta mametacasivahi ema Abraham eta me Viya,

ani tacahehi: “Puiti juca cájeyare, níjaracavyare píti ésupa esu Sara ema echichayare, ticaijareyare Isaac. Núti níjaracayare eta máicuchiyarehi ema Isaac, énapa ena mámariéqueneana” macahepa. Puiti nuvaraha ecaicutiaraya eta juca: Ema Viya máimijarechahi “nuchichanaveana” nacarichuhi ena navaraha najacapayare eta náicuchihi, nasuapirohi eta máijarasiravahi nayehe.

<sup>10</sup> Numetacaheyareva eta táicharacavahi eta macachichairahi ema Isaac ésupa esu mayena Rebeca. Chámeanahi ena náinapureanahi nachichanaveana.

<sup>11-13</sup> Tacahe, vuíchaha náuchucahini ena nani amuyana, tájinaichahavare napecaturainahini, táimaticarepahipucaini eta táuriva eta náichaquene. Te tiánehipa eta suínasirayare, ema Viya mametacapa esu Rebeca, ánipa macahe: “Chámeanayarehi ena pichichanaveana. Émasera ema tínapucayare tiúchuca, éma, mósoyare mayehe ema máti”. Étapaichuhi eta macayemaquenehi ema Viya te Sagrada Escritura, ani macahehi: “Némunacahi ema Jacob, máequenereruhi tiúchuca. Émasera ema Esaú, máinapurehi tiúchuca, vahi núrianaca éma” macahepa. Tacahe puiti, vímatiequenehaipahi eta táicharacavahi eta manerejisiravacahi ema Viya, máichuiravacahivare nácani mavarahaqueneana. Vahi étaparacainahini jácani táurivainahini eta náichaqueneana.

<sup>14</sup> Puiti, vahi ecuimijachahini vahi tétopicava ema Viya eta manerejisiravacahi ena achaneana. Váhiquenesera énéna tacahe.

<sup>15</sup> Ema Viya mametacahivare ema Moisés, ani macahe: “Núti necha mácani nujapanuqueneyare” macahepa.

<sup>16</sup> Tacahe, vahi vámutu vácoticaca eta majapanuirahavi ema Viya máichuirahavyarehi. Éma téchahi eta manerejisiravacahi nácani majapanuqueneana máichuhuqueneanayare. Vahi étainahini eta náimijachiravahi tíchuhacareana taicha eta náurivahíji, napamisirahipuca naicha eta táuriqueneana.

<sup>17</sup> Ema Viya ánivare macahehi eta te Sagrada Escritura mayehe ema rey te avasare Egipto: “Núti nunacavihi eta piávacurehi pirreyvayarehi, taicha nímativi eta pimuracasmurevahi. Nuvarahasera núti nímimatichavyare eta tamutuirahi nurataha nítupajijiasirava, apaesa táimaticare eta níjare te tamutu eta juca apaquehe” macahepa ema Viya.

<sup>18</sup> Tacahe, ema Viya manerejicahi nácani mavarahaqueneanayare máichuha. Máisapahisera ena masuapajirairahana tajurucachuchaini eta namuracasamurevahi.

<sup>19</sup> Németeaca, áninapapuca ecaheyare éti: “Ene tacahe jácani, ¿tájahapuca tacayema eta vicaviurevahi eta mayehe? Taicha

vahi véchavahini eta víchirahi eta tamauriqueneana. Émarichuhinéni tíchahavihi” ecahénapapuca éti.

<sup>20</sup> Vahi tacucae eta epanereruana. ¿Vahi epicahini iácapae-machirahi ema Viya? Eta cachapare mátejisi vahi táuricaimahi tácapaemachahini súcani tépiyacahi: “¿Tájaha tacayema pímpinanajicanu eta pépiyasiranuhi, váhiyapa nucunachacarehini eta pépiyasiranuhi?” vahi táichaimahi.

<sup>21</sup> Esu típuarecarahi, ésu téchinavahi jácani táimahianayare eta suípune, suíchayarehi eta suícarahiyare, tásicha suépiyacavare eta suyehe vásenilla, tacahehi eta suvarahaquenehi.

<sup>22</sup> Tatuparacahi ema Viya máicuñacavaneya namutu ena achaneana váinarajiqueneana, máimitaequenehavacavane éna. Tatuparacahivare máimerecavane eta máitupajijiasirava étapa eta masemirahi tayehe eta namaurivahi. Tétavicavahisera eta macayehevahí paciencia.

<sup>23</sup> Víti apana, ene tacahehi eta táetaviuchirahi eta majapanuirahavihi, máimerecahi eta táichapeva eta macunachacareva. Acaneripahi eta manerejisirahavihi eta vicachaneraya éma tayehe eta majaraiva.

<sup>24</sup> Vahi vácarichuhini viti israelítana manerejiruhavihi; énerichuhi eti apavasanana manerejiruhevihare.

<sup>25-26</sup> Eta Sagrada Escritura májurehi ema víyarahaini Oseas, eta máechajiruva ema Viya, ema yátupiquenehi eta macasiñacarevahí, ani macahehi: “Núti nunerejicayare níchu-hvacayare ena ichapemuriqueneana ena achaneana apava-sanana. Tayanapane vahi náesenicanuhini cape eta náitaresirahi, tijacapacareanahisera nuyehe. Ichape eta némunasi-ravacayare taicha nuchichanaveanayarehi éna” macahepa.

<sup>27</sup> Énasera ena nujaneanana israelítana, ánimurianarichuhi ena tisuapanahí eta máichuarapi ema Viya. Nacuti éna ánimuri-queneana náechajisihahi ema víyarahaini profeta Isaías, ani macahehi: “Tétavicavahinéni visimutuva viti israelítana, ánimurihavirichuchasera viti viúchucuhanayare.

<sup>28</sup> Ema Viya, vaipa macamichaimahi eta náejecapiravanahí ena achaneana. Tíjahúchavayarepa eta máicuñasirayare eta apauehe. Máijahúchayarehi máitaequeneha tamutu”.

<sup>29</sup> Ánívare macahehi ema Isaías: “Muracarinehi eta náquipaisirahi eta viávasa. Te tacuijahini eta majapanuirahavihi ema Viya viti vinerejiruanahi véhica éma, vítaequenehini vimutu. Nájina nánasihini te viávasa. Vicutiyaréni ena ticava-sanahi te Sodoma, énapa te Gomorra, máitaequeneruanahi ema Viya, ema tétavicava eta máitupajijiasirava, máiturueque-nehahi tamutu” macahepa ema Isaías.

*Ena israelítana, vahi návaraha náehica ema Jesucristo*

30 Nuvaraha numetacahe eta juca, apaesa écha. Ena apasanana nasapihahi tijacapacareanahi me Viya, váhinéni náesenicahini éma cape eta náitaresirahi. Tacarichusera puiti, táichavenehi eta nacasiñavairahi eta mayehe, tijacapacareanripahi éna.

31 Énasera ena nujaneanana, tímijachavanahi tijacapacareanayarehi me Viya táichavenehi eta navarairahi náehica eta vanairipiana. Váhisera najacapacarehini.

32 Taicha éna, náemepurecahi eta najacapacarevaya-rehini me Viya. Vahi návarahahini nacasiñavahini mayehe ema Machicha Jesús. Éna tímijachavanahi étachucha nacunachiavahi tayehe eta náitauchirahi eta navanesiracacanahi. Eta tiviuchahi eta nacatianasirahi muracaquenehi ema Viáquenu Jesús, vahi návarahahini nacasiñavahini eta mayehe.

33 Ema Viya, eta máechajiruvana eta Sagrada Escritura, ani macahehi: “Puiti névatacaya ema Nuchicha Cristo nayehe ena israelítana. Nímahaya nájahapuca tictorianacanaya éma, énapa ena ticasíñavanayare eta mayehe. Nácani tictorianacanapuca, énajivayare ticamitiequenehavanayare, ticaicuñanayareva táicha. Nácanisera ticasíñavanayare eta mayehe ema nuvaneruyare, vahi máinajiacavacaimahi” macahepa ema Viya.

## 10

<sup>1</sup> Nuparapenaveana, téavicavahi eta néñamiravahi nayehe ena nujaneana israelítana. Eta nuyaseserepi me Viya te nuyujarasirana, nuvarahahini náuchucuhahini.

<sup>2-3</sup> Nucunachavacahi éna eta náetaviuchirahi eta napicau-chirahi ema Viya. Téjecapavanahisera éna eta táicharacavahi eta vijacapacareva me Viya. Éna, tímuriacavanhahítiúrianahi, tímijachavanahi tijacapacareanahi me Viya táichavenehi eta náitauchirahíji eta vanairipiana. Vuíchaha náimatihini eta táichararacavayarehi eta najacapacareva eta nacasiñaviraya me Viya. Váhivare návarahahini nasuapahini.

<sup>4</sup> Taicha ema Cristo macaepaharipa eta tasuapacarevahi eta viyehe eta mavanairipiana ema Moisés. Vaipa étaparacaina eta viúchucuiraya. Tacarichu eta vicasíñavairahi mayehe éma, vijacapacareyare me Viya.

<sup>5</sup> Émarichuhi ema Moisés, muracahi eta matuparasirahi ena achaneana, ánipa macahe: “Éti, tapamiruanahi eta ítauchirayarehi tamutu eta vanairipiana. Te yátupipuca ítauchahi tamutu sácheana, te tájinapuca eta éjecapiravainahí, tásicha ejacapacarenapa me Viya” macahepa. Nájinaserá náratahahini náitauchahini eta vanairipiana.

6-8 MÁEJERAREPANASERA eta vijacapacarevahi me Viya táichavenehi eta vicasiñavaira eta mayehe. Vahi tacamesahini vitanupanahini ema Cristo te anuma, taicha tiúcupauchahaviripa éma. Váhivare tacamesahini vitanupanahini te máecari vicaechepupanahini éma, taicha téchepucaripahi éma. Tacamunuhisera eta vicasiñavairaina mayehe ema Cristo te visamureana. Eta vipiarasiraina eta máijare eta víjarasirava eta véhisirayare éma.

TÁSIHA nútì, eta nucametarairuirahi, néchajisiha étachucha eta arairu véhiruhi eta majacapirahavihi ema Viya viti vicasiñavanahi eta mayehe.

9-10 Eta juca eta nímiturapi: Eta viúchucuiraya viti achaneana, tacamunuhi eta visuapiraina ema Viya eta macaechepusirahi ema Machicha te máecari. Éma, macaepahayare eta vipecaturana, te yátupina eta vicasiñavairahi te visamure ema Jesucristo. Tacamunuhivare yátupina eta víjarasiravahi véhica éma. Víchayarehi éma: “Nútì níjaracavahi néhicavi, Tata Jesús. Pítipa náquenuvihí, péchanupa píti” vicahenapa.

11 Eta Sagrada Escritura, ani tacahehi: “Nácani ticasiñavanayare mayehe ema nuvaneruyare, tájina náichiraváimahi. Tamutu tiúriyare eta náitaresira”.

12 Ema Viya, vahi máepuruimahi nácani ticasiñavanahi mayehe. Ticuticacayarehi eta majacapiravaca ena israelítana énapa ena apavasanana, taicha émaichuhi ema Viáquenuhi vimutu. Tétavicava eta majapanuirahavihi, ticuchucuhahaviya vimutu viti vicasiñavanahi mayehe.

13 Taicha ánivare tacahehi eta Sagrada Escritura: “Ema Viáquenu macuchucuhavacayare namutu nácani tipiaracanahi eta máijare táichavenehi eta nacasiñavairahi mayehe” tacahepa.

14 TÁSIHA, eta náuchucuhairayare, tacamunu napiaracaya eta máijare ema Viáquenu táichavenehi eta nacasiñavaira mayehe. Táurivaina eta nasamirahi eta náimitucasivana. Tacahe, tacamunuhivare eta viyana vipaicayare víti te tamutu avasareana eta vicametarairuiraya nayehe éna.

15 Émaripa ema Viáquenu, ichape eta máichuhairahavihi viti visuapajirahiana, mavaraha eta vicametarairuirayare. Títauchavayare eta tacayemaquene eta Sagrada Escritura, ani tacahehi: “Tétavicavahi eta náurisamurevana ena achaneana eta nasamirahi eta táuriquenehi máichuarapi ema Viya eta majacapiravacaya. TÁSIHA tiúriyare eta majacapirahavihi viti mavaneruana ema Viya” tacahepa.

16 Váhiserá námutuhini nasuapahini eta juca arairuhi véhiruhi vímitucaquenehi. Ema Isaías, ani macahehi te Sagrada Escritura: “Tata Náquenu, ánimirianarichu ena

tisuapanahí eta juca nímiturapiana nuvanahiana piyehe” macahepa.

<sup>17</sup> Téhesera te táurihini nasama ena achaneana eta vímiturapiana mayehe ema Cristo, titupiruvanayarehi ticasíñavana mayehe.

<sup>18-19</sup> Esamanuchaha. Ena nujaneanana israelítana, tájina naviyahini nayunaca eta namacasiñavairahini mayehe ema Cristo. Nasamapa eta máechajiriruvana ema Viya, taicha te tamutu avasareana tisamacarepaipa. Eta Sagrada Escritura, ani tacahehi: “Tamuturipahi te juca apaquehe ticasamahuhi. Eta máechajiriruva ema Viya tamuturipahivare tacaitatapahihi te juca taquiñacucujiana te apaquehe” tacahepa. Náimatipavare. Váhivare návarahahini nasuapa. Eta máechajiriruvanahi ema Viya májurehi ema Moisés, ani macahehi: “Ímaha, eti israelítana. Nasapihaya nujacapavacayare nuti ena apamuriana achaneana, énaripa ena máesenicanuranahani. Nuvaraha etsirihaini éti, éneuchavayare eta nuyehe” macahepa.

<sup>20</sup> Jararihivare eta apava máechajiriruvahi, májurehi ema víyarahaini Isaías, ani macahehi: “Núti nímerecavaipa nayehe ena nani váhiquenehi náesenicanuhini, váhivare nacayaseseruhini”.

<sup>21</sup> Ánivare macahe ema Viya: “Tamutuhi sácheana eta níchuiravacahi ena nani israelítana. Tétavicavahisera eta namasuapajiraivahi. Vahi návarahahini nachavahini eta nuyehe” macahepa.

## 11

*Ánimurianarichu ena israelítana ena tisuapajirahianahi, macuchucureanayare ema Viya*

<sup>1</sup> Esamanuchaha. Nuvaraha vahi ecuimijachaimahi macaerajicavacahipuca ema Viya ena machanerana israelítana. ¡Váhiquene énéna tácae! Éti ímatinuhi nútirichuhi israelítanuhi, mámariéquenenuhivare ema Abraham, émapa ema apanavare náchuca Benjamín.

<sup>2</sup> Eta acane, tétavicavahi eta máemunasirahavihi ema Viya viti israelítana. Puíticha vahi máinajiacahavihini. Échava éti eta tacayemahi eta Sagrada Escritura eta máichavaquenevahi ema víyarahaini profeta Elías. Ani tacahehi eta mametauresiravahi me Viya eta mayujarasirahi:

<sup>3</sup> “Tátachicha Nucaiyaquene, ena nani apamuriana nujaneanana israelítana nacapapajicavacahi namutu ena piyeheana profetana nuchamuriana. Puiti navarahahivare ticapacanuana. Navetataicaipavare eta pipena. Nucarinehi núti nítarecahi puiti” macahepa.

<sup>4</sup> Tásiha, ema Viya majicapapa, ánipa macahe: “Vahi picari-chuhini píti. Nararihi siete mil ena ajairana nujanearuhanahi, ticasíñanuanahí. Vahi náisapavahini éna náepuyumirauchahini ema nasiñaraji Baál ena masuapajirairahana-tatajihi” macahepa ema Viya.

<sup>5</sup> Ene vicachehi víti, vahi vámutuhini viti israelítana masuapa-jirairahanahi me Viya. Vitiarihichaha ánimurihavihi viti manerejiruanahi majapanuquenehavihi.

<sup>6</sup> Numetacahe: Ema Viya, eta majapanuirahavihi viti israelítana, váhiquene táchavenénahini jácani víchirainahipucaini eta táuriqueneana. Jéhesare, tijapanuhavihi táchavenehi eta táetaviuchirahi eta máemunasirahavihi. Tájina étaparacaina eta víchirapuca eta táuriqueneana.

<sup>7</sup> Tacahe, vímaha puiti ena nujaneanana, ánimurianarichuhi ena ticasíñavanahí me Cristo, manerejiruanahi majacapa-queneanahí. Énasamisera ena apamuriana, vahi nacasiñavahini mayehe, muracanaichucha te nasamureana. Étapa tiviuchahi vahi tijacapacareanaimahi me Viya, tayanapané nácani navarahahí.

<sup>8</sup> Títauchavapahi eta táchajiriruvahi eta Sagrada Escritura eta nayehe. Émarichuhi ema Viya ticamitisicavacahi apaesa vahi nacucaicutiara eta máimiturapiana ema Cristo. Puíticha ene nacahehi.

<sup>9</sup> Ema víyarahaini David, ánivare macahehi tayehe eta Sagrada Escritura: “Ena nani, ticasíñavavaicana eta tavayuchirahi eta náimahaqueneana. Ichapemurihi eta nacapiestarairana náenisiracacana. Ichapevaresera eta náichirahi eta tamauriqueneana. Puiti, Tátachicha, pítsivachayare eta náurisamurevahí. Járajapainapa eta pícuñasiravacayare.

<sup>10</sup> Nuvaraha púchuquianaina pícha. Vahi nacucaicutiara eta náitaresira. Tacaetipapaicainapa eta tajitacareva eta napisirahi. Tájinapa nanarasiraimahi” macahehi ema David.

### *Eta majacapirahi ema Viya ena apanapanenejiqueneana*

<sup>11</sup> Esamanuchaha. Nuvaraha vahi ecuímijacha tanasiyarehi eta náquipaisirahi ena nujaneanana. ¡Váhiquene énéna táchahí! Puitisera nasapiha ena apavasanana najacapacarehi me Viya, taicha mavaraha máimicatsiriacavaca ena israelítana, apaesa náeneuchavayare eta mayehe.

<sup>12</sup> Puiti tijacapacareanahí me Viya namuturipa ena apanapanenejiqueneana achaneana te juca apaquehe, taicha eta náquipaisiravaipa ena nujaneanana. Puiti eti apavasanana, téavicavahi eta iúricacarevaipa. Jéhesare tiápajucavapanaya-resera eta iúricacarevaya éti, étapa eta náuricacarevayare éna, te nachavapa náeneuchava.

<sup>13</sup> Németeaca ímatinuhi nútí eta nucatuparahaírapa eta nímítusiraheyare eti apavasanana. Táitusiava puiti tétabicavahi eta nucunachiravahi eta nucaematañesirahehi.

<sup>14</sup> Numetacavacahi ena nujaneanana eta yátupirahi eta ejacapacareirahi me Viya, apaesa nímahahini éna, te najamurachayarepuca eta najacapacarevahí éna apanava, ticutiheanayarepuca éti. Nuvaraha nanerejicavahini nácani náeneuchavahini, apaesa náuchucuhayare.

<sup>15</sup> Páureanasami éna eta náquipaisirahi. Esapihahi éti apanapanenejiqueneana te juca apaquehe, tétabicavahi táuriva eta ejacapacarevahí me Viya. Jéhesaresera, tétabicavapaini eta tajaraivainahini te visamure te nachavirainahini, náeneuchavapaini éna, náehicapaini ema Cristo. Tímicutijiricavapaini eta navayuchirahi eta náurisamureva ena achaneana te macaechepusiravacaya namutu ena náepenaqueneana tiúrianahi.

<sup>16</sup> Eta natarihirapa puiti ena nujaneanana tinerejicavanahi téhicana ema Cristo, németeaca namutuyare jácani náehicayare ena apamuriana.

Tacutiquene, viti machaneranahi ema Viya vicuti eta ichape yucuqui. Ema Abraham macutihi eta táquehequi. Viti israelítana mámariéqueneanaini vicutihi eta tatavavajiana. Ema viáchucaini majacapaqueneripa ema Viya. Tásicha, németeaca namutuyaréni ena nujaneanana, énerichuvare náeneuchavapapucaini nacasiñavahini me Viya te jácani sácheyare, apaesa najacapacarevapaini éna apanava.

<sup>17</sup> Puiti ena nujaneanana náquipairuvahi, vuíchaha nasiapahini eta náicuchihi te namuri ena machaneranahi ema Viya. Étipa eti apavasanana, esapihaipa machaneraheripa ema Viya. Tíjaracaheripa éma eta táuricacarequene iávihayarehini te majaraivahí eta náicuchinihi ena israelítana.

<sup>18</sup> Puiti étipavaipahi machanerahehi ema Viya. Nutuparacahesera, vahi ecucasiñavavaica eta ítujisiravahi esiapa tayehe eta náicuchihi ena nujaneanana israelítana. Taicha vahi ecachuriacavacaimahi éna eta iúrivahinéni eta ejacapacarevahí me Viya. Vahi ecuemitisica eta esiapirahi táichahi eta náquipaisiravahi ena masuapajirairahana. Éti máetumechaqueneana ema Viya; vahi étina étumechahini éma.

<sup>19</sup> Váhivaresera ecupanerecha te esamureana: "Yátupi éna máquijicavacahi ema Viya eta namasuapajiraivahi. Tásicha, tinerejicahavipa víti, taicha viúripanahi víti eta máimaira-havihi ema Viya" váhinéni tácahehini eta epanereru.

<sup>20</sup> Tacalhe, échapava éti apanava, machu ácutiriana ena nujaneanana. Éna, eta náquipaisiravahi tímicutijiricahi ticaechuanahi, táichavenehi eta namacasiñavairahi me Viya.

Puiti étipa náitsivahi éna eta ecasiñavairahi mayehe. Váhisera ecucasiñavavaica. Ecuneuchava éti apanava. Epicaucha ema Viya.

<sup>21</sup> Ena nujaneanana israelítana, éna tínapucanayarehíni nasiapamuriha ena machanerana ema Viya. Váhisera nacasiñavahini eta mayehe. Éti apanava, tacamunuhibare ecasiñava eta mayehe apaesa esiapahini.

<sup>22</sup> Tacahe, ticaecheravapa eta máurivahi ema Viya, étapa eta matupiruvahi. Tétavicavahi eta matupiruvairahi eta náerajisiravacahi ena masuapajirairahana. Tétavicavahivare eta máurivahi eta eyehe, eta ímiyaniravahi eta ecasiñavairahi eta máurivahi. Nácanisera vahi nacasiñaimahi, macaerajicavacayare.

<sup>23</sup> Tiuri puiti, te náeneuchavapuca me Viya ena nujaneanana, nacasiñavahivarepuca mayehe, éma majacapavacayarehi éna, machichanaveanavarepa. Taicha éma, tétavicavahi eta majapanuirahi.

<sup>24</sup> Taicha éti cape juca eta ítaresira, énerichuvare masuapajirairahehi éti, emaesenisirahi ema Viya, tásicha, tájinahinéni ejacapacarevainahini. Esapihasera éti esiapamuriharipa ena apamuriana machaneranahi ema Viya. Ene nacaheyarehi ena israelítana. Éna, te náesenicapa ema Viya, camuriqueneanayarehi ena ticasíñavanaya mayehe. Tisiapanayareva tayehe eta náicuchihi.

*Te namutupa ena apavasanana manerejiruanahi ema Viya, tapaenumavainapa náesenicayare ema Viya ena israelítana*

<sup>25</sup> Tiuri puiti, nuparapenaveana, vahi nuvaraha ecasiñavavaica eta ítupajijasirava. Tásicha, nuvaraha numetacahe eta juca tayumururevainihi, máimimatichaquenénuhisera ema Viya. Eta namuracasamurevavacahi ena nujaneanana, vahi tánasimahi. Téhesera námutupa nasiapa ena apavasanana manerejiruanahi ema Viya, napaenumavainapa ena nujaneanana náesenicayare ema Viya.

<sup>26</sup> Tacahe, eta nacasiñavaira me Viya, tiúchucuhanayare namutu éna. Títauchavayare eta máechajiriruvahi ema Viya te Sagrada Escritura, ani macahehi: “Nuvanecayare ema Ticatiurahiyare nayehe ena achaneana. Ticavacureyarehi te Jerusalén. Masipahacavacayare ena majaneanana israelítana eta navainarajivana, máitsivachirayareva eta náitaresirana.

<sup>27</sup> Núti nítouchayare eta nutratunehi nayehe eta népachiasi-ravacayare namutu eta napecaturana” macahepa.

<sup>28</sup> Tacahe, ena nujaneanana nacatianacapa puiti eta juca véhiruhi. Étasarepa ítujisiavayare éti. Émasera ema

Viya máemunacavacarichucha, taicha manerejiruanahi ena náchucanaveanaini.

<sup>29</sup> Taicha ema Viya, tamutu eta máijararuuanahi, vahi máemepururecaimahi. Máitauchayarehiva tamutu eta máichuarapiana.

<sup>30</sup> Éti acane eta ítaresirana, vahi ávarahahini esuapahini ema Viya. Puítisera eta namasuapajiraivahi ena israelítana, ichaperipahi eta majapanuirahahehi éma.

<sup>31</sup> Énerichuvare éna, te jena sácheyare, majapanuvacayarehi éna, tacuti eta majapanuirahahehi éti puiti.

<sup>32</sup> Taicha ema Viya máimatihi eta emutuirahi emasuapajiraivahi éti apavasanana, vítipa viti israelítana. Mavarahasera vicuticacayarehi eta majapanuirahavihi vimutu.

<sup>33</sup> Ema Viya, ¡tétavicavahi eta majapanuraivahi eta viyehe, tavayuchahi eta viúricacarevahi máicha! ¡Tétavicavahivare eta máitupajijiasiravahi! ¡Tétavicavahivare eta macachuriasirahavihi eta máimatiéquenehairahi tamutu! ¡Matupiruvahi éma tamutu eta manerejirisirahi! ¡Vahi víturuequenehaimahi vicaicutiara eta mapanereruana!

<sup>34</sup> Taicha nájina tímaticequenehaimahi eta mapanereruana. Nájinavare náimitucahini éma.

<sup>35</sup> Nájinavare nájaracasichahini tájaháinahipucáini, étanai-nahipucáini máitsirijicavacahipucaini eta máijarasirahi éma.

<sup>36</sup> Taicha tamutu eta tatiarihiqueneanahi, tacarichu tásihaqueneanahi mayehe, étaripa eta víjararuuanahi mayehe, mavaraha táitauchavapaini eta mapanereruana táriqueneanahi. ¡Máitavacacahi eta vicunachirahi éma! Amén.

## 12

*Vicatuparahahi yátupina víjaracava eta véhisira ema Viya*

<sup>1</sup> Tacahe, nuparapenaveana, nuvaraha ácaicutiara yátupina eta majapanuirahahehi ema Viya. Eta táetaviuchirahi eta majapanuirahahehi, ecatuparahahi íjaracava yátupina eta iáqueheana étapa eta iáchanevana eta éhisiraina émainachucha ema Jesucristo. Tacutihi eta iámvahuhi me Viya. Jéhesare, tétavicavaya eta ecurisamurechiraya éma tayehé tamutu eta ecaemataneasirana éma.

<sup>2</sup> Énerichuvare eta ítaresirana, vaipa ecuehica eta tayeherepi eta juca apaquehe. Ítsivachapasera eta epanereruana, apaesa támutupa apanainahi eta ítaresiraina. Tásiba, ímatisarepa eta mavarahaqueneanahi ema Viya, ítucayareva icha eta táriqueneana. Ecurisamurechayare éma eta íchira eta tatupiruvaqueneanahi.

<sup>3</sup> Núti mayehenuhi apóstole ema Viya. Tituparacanuhi numetacaheyare: Emutu éti, tátupiruva eta epanereruana tayehe eta ítucaqueneana máijararuheanahi ema Viya, apaesa tauri eta ecaemataneasiraina mayehe. Nacuija nacasiñavavaica.

<sup>4</sup> Tacutihí eta viáquehe viti achaneana. Camurianahi eta táunavanahi, táematanepachuhivare. Vahi étainarichuhini eta táitucaqueneanahi.

<sup>5</sup> Ene vicahehi víti. Camurihavihi, étanaichuhisera eta viáquehehi eta viúrujiasiracacahi eta véhisirahi ema Cristo, vímicatacacairahi eta vicaemataneasirahi éma.

<sup>6</sup> Ema Viya, apanapanenejihi eta vítucaqueneana eta máijarasirahavihi eta vématanepachuyarehi máicha. Tacamunuhisera vahi vicuemepururecava eta vítucaqueneanahi máijararuuhavianahi, apaesa táuri eta vicaemataneasiraya. Te tíjaracahavipuca éma eta vítusirayare vicametarairu, vijaneacavainapa, machu vihapapiricahini eta táimiturapiana eta véhiruhi.

<sup>7</sup> Te tíjaracahavipuca eta vítusirayare vímicataca ena vichamuriana, tatupiruvayarehi te visamure eta vímicatasiravacaya. Nácani náitucahi tímiturecana, vahi nayacujimahi eta náimituresiraya.

<sup>8</sup> Nácani náituruequenehahi eta náetumechiraya nácani apuna, vahivare nayacujimahi. Nácani tíjaracasírecanahi eta náimahaqueneana, tátupiruvayarehi te nasamure eta nacajirahi ena ticamunuwanahi. Nácani cátuparahanahi téchapajiricarahianayare, tivapinavanayare eta náitauchirahi eta natuparacasivahi. Nácani tímicatacanahi ena tijapanucareanahi, tiúrisamureanaya eta náimicataresir ahi.

*Eta viúrivahi nayehe ena achaneana ticaecherayare eta yátupirahi eta véhisirahi ema Viáquenu Jesucristo*

<sup>9</sup> Nuparapenaveana, yátupina eta émunasiracacaina ena echamuriana. Vahi apimirahemahi, ímijachava eta émunasiracaca. Evapinavaya eta íchira eta táuriqueneana. Épuruyare eta tamauriqueneana.

<sup>10</sup> Tiápajucavainapa eta émunajirisiracacaina ena echamuricacairahi. Ecunachainapa namutu ena echamuriana. Yátupina eta epicauchiracacahi.

<sup>11</sup> Étumechavaina ena ecaemataneasirahi ema Viáquenu. Tavapinava ena esamureana. Tacuija eplujuvavacaina.

<sup>12</sup> Iúrisamurereacavayare ena ejacapiraya ena ecuchapauquenehi. Ecayeheyare paciencia tayehe ena ecatajivairana. Vahi tacuechuquiha ena eyujarasirana.

<sup>13</sup> Ímicatajiricaca ena echamuriana, tayehe ena nacamunuiravanaugh. Tiúriyare ena ejacapiracaca te epaipiuchacaca.

<sup>14</sup> Te natarihinapuca nácani náehahe, napanajiricahepuca, ejapanuyare éna. Eyaseuchaya me Viya eta náuricacarevaina. Váhisera ecuyaseucha jácani náicuñavanéna.

<sup>15</sup> Te tatiarinapuca jácani tiúrisamurecare nayehe nácani, éti apanava iúrisamureyareva. Téhesera te tatiarinapuca eta ticatisamurecarehi nayehe nácani, ejapanuvacayare éna, iyahayareva éti apana.

<sup>16</sup> Ecurisamurechacacaya ena echamuriana. Vahi ecuasiñavavairica. Ácuticacahi nayehe ena mánsuanahi, váhivare ecucasiñava eta ítusirahi.

<sup>17</sup> Te tatiarinapuca náicharacahe eta nacatichirahe, vahi ecuitsicava. Íchayaresera eta jácani táuriqueneanahi nayehe namutu ena achaneana.

<sup>18</sup> Nacuija ecucaticha. Te natarihinapuca nacatianacahe eyanauchayare te napena émemunacavayare apaesa vaipa nacucatichahe.

<sup>19</sup> Némunaruqueneana, te tájahapuca náicharacahe, vahi ecuitsicava. Cápachi mararihi ema Viya, máimahainepa éma téchayare eta náicuñayare. Taicha ema Viáquenu, aní macahehi tayehe eta Sagrada Escritura: “Nímahainepa nútì eta táitsivayare. Nútì néchahi eta náicuñayare ena ticaviurevanahi eyehe” macahepa.

<sup>20</sup> Ánivare macahe éma: “Te píamaha máecuhapahi mácani tictatianacavihi, pénicayare. Te mamaunepahipuca, pésichayare. Eta máimairainahi eta pémunasirahi, ticatisamurevainapa titsirihainapa” macahepa.

<sup>21</sup> Vahi ecuisapava ítsicava eta náichiraheya te taimeniqueneana. Étumechavasera eta íchiraya eta táuriqueneana. Étapa ticaepahayare eta nasemaneva.

## 13

<sup>1</sup> Éti, emutu esuapajirahiyare nayehe ena tuparairucana, taicha éna manacaqueneanahi ema Viya eta návacureanahi. Nájina émanaina máemunasiricavahini.

<sup>2</sup> Eta tacache, nácani tiácapauchavanahi nayehe ena tuparairucana, tímicutijiricavahi nácapaemachahivare ema Viya. Jéhesare, ticaicuñanayarehi ena téjecapavanaripahi.

<sup>3</sup> Taicha ena tuparairucana, vahi étainera tímínacavacahi éna eta nápicararesiraya nácani tíchanahi eta táuriqueneana. Nácanisera ticaviurevanahi, táuricahi tipicanayarehi. Te evarahahipuca iúri nayehe, esuapajirahiya nayehe, tásicha, éna ticunachaheanainapa.

<sup>4</sup> Taicha ema Viya, émahi macaejacavaca te návacureanahi, náurichayarehi ena achaneana. Téhesera ecaviurevahi, epica-yarehi taicha éna vahi támapurujimahi eta nacatuparahaíri. Natuparacasivahi me Viya eta náicuñasirayare ena ticaviurevana.

<sup>5</sup> Eta tacahe, tavarahaichu esuapajirahiyare nayehe ena tuparairucana, apaesa vahi nacuicuñaacahe. Tavetijipa esuapajirahiyare taicha éti etuparacasivahi me Viya.

<sup>6</sup> Tacutiquene tatuparacahehi eta evachachirayare eta impuesto. Taicha ena tuparairucana, natuparacasivaichuhi mayehe ema Viya, náitauchiraya eta nacaemataneasira éma.

<sup>7</sup> Tásicha, ítaurahiyare te jácani nayaseasiraheana eta cuota étapa eta nayaseasiraheana eta impuesto. Epicauchavare nácani tipicauchacareanahi. Émunacavare nácani témunacacareanahi.

<sup>8</sup> Nacuija ecantevéya. Tituparacahe evachachavaneyare jácani entévehi nayehe. Tituparacahevare émunacacayare ena echamuriana. Nácani títauchanahi eta juca náemunasira, náitauchahíi eta mavanairipi ema Viya.

<sup>9-10</sup> Te pémunarahihi píti nayehe ena achaneana piparaepiyanhíi ticutiyarehi eta pémunasiravahi píti, vahi pipanerechaimahi picapinaru, váhivare picaparecaimahi, váhivare piámerecaimahi, váhivare pivehaimahi esu apána esena mayena ema apána achane, váhivare pépiyaequenerecaimahi. Taicha nácani témunarahianahi, vahi nacaetemaimahi ena naparaepiyana. Te yátupi eta émunaraivaya, máejerare eta ítauchirayare tamutu eta vanairipiana.

<sup>11</sup> Eta tacaheyare eta ítaresirayare. Vaipa véjearacha eta sácheana. Vahi vímacacaracavaimahi. Vitsecavayarehisera taicha viánehipaicha eta jena sácheyare eta máitecapiraya ema véhiruhi.

<sup>12</sup> Eta vicuchapiraipa eta machavirayare ema Viáquenu, tacutihi te vicuchapaipa te jena yati eta tijararahi. Puiti vímahapa eta tajarahiquene. Tásicha, ínajicapa eta íchaquenaini te timapicu. Puiti tiápajucavasera eta iúrivana, étapa eta íchaqueneanaina te tijarahi.

<sup>13</sup> Ímicapicauchavayare eta ítaresirana. Iúrisiyare tamutu sácheana. Vahi ecavahaimahi. Váhivare ímisiapavaimahi nayehe ena ticapiestaranahi. Váhivare túhusihémahi. Vahi tivayuacahémahi eta tájiparacana. Vaipa iúmeharerecaimahi, váhivare ecapinarurahimahi.

<sup>14</sup> Tásihasera, ímereca eta iúrivaina. Ácuti ema Viáquenu Jesucristo eta máurivahi éma. Vaipa ecusuapa eta tajamura-chauqueneanahi eta iáqueheana. Váhivare ecupanerecha eta

íchiraya éta.

## 14

### *Vahi ecucaecahi ena echamuriana*

<sup>1</sup> Te napauchahépuca nácani navarahahi tisiapamu-rihaheana, echamurianayare, vahi ecuepuruvaca. Ejapanuvacasera eta ejacapiraya. Te jácani apaesarichuhi eta nacasiñavairahi mayehe ema Viáquenu, napicauchaichaha eta nayeherepiana ichasiana, vahi ecuacapaemachahini éna.

<sup>2-3</sup> Nararihi ena titúca nanica tamutu eta tinicacareanahi. Nararihivare ena apanahi eta nayeherepi, náimijachahi vahi tiuri nanica eta vaca. Tásicha, máechejirechucha eta nanica. Éna, vuíchaha muracanainahichaini tayehe eta véhiruhi. Eti titúca enica tamutu, vahi ecuepuruvaca éna vahi tinicanahi eta vaca. Étipa eti máechejirehi eta enica, váhivare ecuepuruvaca ena tinicanahi tamutu. Taicha majacapaquenehevacaipahi ema Viya emutu.

<sup>4</sup> Vahi ecuimijachavaimahi étinahi échavaca eyaseserecarahi ena machaneranahi ema Viya. Éma, téchavacahi ena mavaranah. Máimararacahi eta táurivahi náicha, macunachavacahi éna. Te váhipuca, émainahi techá eta máemechiravacaya.

<sup>5</sup> Tacutiquene váhivare ecuepurucaca tayehe eta sache iúrujisiravana eyujarasirana. Nararihi náimijachahi tiúripana te sávarumuahuana. Nararihivare tiúripanahi nasama te lumincumuhuana. Nararihivare tamutuchucha sácheana tiúrihi eta náimairahi. Étipa échinava eta sache éhiruyare.

<sup>6</sup> Nácani tiyujarauchavanah te jena sache, ena navarahahi napicaucha ema Viáquenu. Ena apamuriana, vahi tacame-sahini nanerejicahini eta sache, éna apanava napicauchah ema Viáquenu. Ena nacahehi nácani tamutuchucha nanicahi, eta napicauchirahi ema Viáquenu, nahasulupayachahi éma. Nácanisera náepuruhi nanica eta jácani tinicacareana, táchavenehivare eta napicauchirahi ema Viya, nahasulupayachavare éma. Tamutuhi tiuri naicha.

<sup>7-8</sup> Taicha vahi vítijiriruváinahini eta vítaresira. Émaripa téchahavihi ema Viáquenu. Émachucha vicaematanearuhi, visuapiroayarehi éma te tamutu. Étaripa eta vépenirapuca, váhivare vítijiriruváinahíni véchinavahini. Émarichuhi téchahavivare te tamutu.

<sup>9</sup> Ema Jesucristo, tatuparacahi eta máepeninahaviyarehi, tiápechavayarehivare tichava titareca, apaesa émainapa Viáquenuya viti vítareruanaichaha, énapa ena náepenaque-neanaripa.

<sup>10</sup> Étisera, vahi étinahini tátuparacahehini échavaca eyasese-recarahi ena echamuriana. Váhivare étupicavahini eta épuru-jirisiracacahi. Échavarichu eta vimutuirayare vicayaseserehi te mamirahu ema Viáquenu Jesucristo.

<sup>11</sup> Ema Viáquenu, ani macahehi te Sagrada Escritura: “Núti acaneripahi eta nítaresirahi; puíticha máepenacacanuhivare eta nutiarihirayare. Tásicha, nútirichu nucatuparahahi nuyase-serecavacayare namutu ena achaneana. Namutu tépuymirauchuanuanayare te numirahu. Tímatinuanayare eta yátupirahi nútí tituparacanu júesnuhi nayehe, nuti Iáquenu” macahepa.

<sup>12</sup> Tacache, vimutu émanapachuhaviya vimetaurecava - mayehe ema Viya. Éma máimatiya tamutu. Tájina virataha viyumurucahini.

### *Vahi ecuimiaquipaica ena echamuriana*

<sup>13</sup> Tásicha éti, vaipa ímijachavaimahi étinahi échavaca, eyasese-recarahi ena echamuriana. Táurisera eta ecachanéracacaina. Tasapihasera, te tamutu jácani íchaqueneana, étaviuchaya eta iúrivahí nayehe. Tacuija jácani táimiaquipaicavaca éna ícha.

<sup>14</sup> Núti, eta mavanaranuirahi ema Jesucristo, numetacahe: Tájina eta tinicacareana tamaeperajicahavimahi eta vinisirahi. Nararihisera ena vichamuriana, tépuvana eta jácani tinicacareana, napisirahi eta tamaeperajisiravacayarehíji.

<sup>15</sup> Tásicha, nuconsejachahe: Vahi ecuimiyusemaca ena nani, váhivare ecuacapaemachahini tayehe eta jácani tinicacare, machu ímicainajiruchavaca ena echamuriana mavachare-ruanahi ema Cristo eta máepenirahi.

<sup>16</sup> Máchuvare émechajisiava tayehe eta ímatiquenehi tiúri.

<sup>17</sup> Taicha eta véhiruhi ema Viya, vahi étaparacaina jácani vinicaquenerepiana, véraqueneana. Étaripa eta ticunachacarehi mayehe, eta víchirapaipa eta táuriqueneana, navetijiva nayehe ena vichamuriana. Mavarahahivare vítucavahini tájina tahapapiricahini eta vicurujisiracacahi, apaesa táimiyanavaini eta viúrisamureva vimutu, maicha ema Espíritu Santo.

<sup>18</sup> Éti, te yátupina eta émunasiravacahi ena echamuriana tépuvanahí eta jácani tinicacare, tiúriyare eta ecaemataneasiraya ema Cristo. Tétavicavahi eta ecurisamurechirahi ema Viya, ecunachacarehivare nayehe ena achaneana.

<sup>19</sup> Tacache, vitanucayare eta viúrivaya nayehe ena vichamuriana, apaesa vétumechacaca tayehe eta véhiruhi.

<sup>20</sup> Vaipa iácapaemachacacaimahi tayehe eta jácani tinicacare. Váipavare ecuiputsicacaimahi, machu émitiaca eta echamuricacairahi etí majanearuhanahi ema Viya. Yátupiquene eta táurivahí tamutu eta tinicacare. Tájina

táimanéna. Énasera nácani tépuruanahi jácani tinicacare, te nanicapuca, ticauyayacare táimiaquipaica tayehe eta pecatu.

<sup>21</sup> Tiúripaichu vahi ecunica eta vaca, váhivare ecuera eta cátisama, machu étina táimiaquipaicapuca ena echamuriana tayehe eta pecatu, máchuvare nacainajiruva eta véhiruhi.

<sup>22</sup> Éti, yátupihi eta esuapirahi ema Viya tayehe eta tinicacareana. Ejaneacavasera te mamirahu éma. Tétavicava eta náuricacareva nácani náimatihi eta náurivahi te nasamure, vahi nacaecahirahihini énajivainahini.

<sup>23</sup> Nácanisera tísapavanahí tinicana, tiávamirahuanahi, énajivapa tímiaquipaicavanahí eta nanisirahi, taicha vahi tátupiruvahini eta nanisirahi. Tamutu jácani vahi tátupiruvahí eta visamure eta víchira, pecatuanahí éta.

## 15

*Ecurisamurechaya ena eparaepiyana. Vahi étijiricavaimahi ecaurisamurechava.*

<sup>1</sup> Tacahe, viti vímatianahí eta táurivahi eta vinisirahi eta jácani tinicacareana, tituparacahaviripa véchapajiricavacaya ena vichamuriana tímijachanahí vahi táurihini eta nanisirapuca. Vácyeho paciencia nayehe. Vaipa viganerechahini étachucha vicurisamurechirava vítijiricáva.

<sup>2</sup> Emutuchuchasera éti, ecurisamurechaya ena eparaepiyana. Éñamava éti eta náuricacarevayare, apaesa tápajucavapaipa eta nasuapiraina eta véhiruhi.

<sup>3</sup> Taicha ema Cristo, vahi mácarichuhini macurisamurechovahini. Éma, ticurisamurechahi ema Maiya te tamutu. Eta tacahe, nacatianacahi ena achaneana váinarajiqueneana. Tásicha, títauchavahi eta tametarapi eta Sagrada Escritura, ani tacahehi: “Núti nímiyanavahi eta nítachirahi eta pivanairipiana eta nuyehe, tayanapane eta náumehiranuanahí ena piánaranahí” tacahepa eta Sagrada Escritura.

<sup>4</sup> Ema Viya tivanecahi ena víyarahananini profetana nájuchahi eta máechajiruvana te Sagrada Escritura. Éta, ticamapuravacareyarehi eta táimitusirahaviyarehi, apaesa táetumechahavi eta véhisira, tacurisamurechahavinavare. Tímítucahavihivare yátupina eta vicasíñava me Viya eta máijarasiraparaca eta viúricacarevaya.

<sup>5</sup> Puiti nuvaraha máijaracahehini ema Viya eta evarairahi ecutiya ema Jesucristo eta mapaneruana, étaripa vahi mácarichuhini macurisamurechovahini. Ema Viya máetumechahehini emutu, macurisamurechahevaréni te jácani ícharacavanapuca, apaesa táuri eta ecachanecacaira.

<sup>6</sup> Nuvarahavare ácuticacahini eta epanereru. Tásicha, te iúrujisiravana, étanainarichuhini eta iáhuana eta ecunachirayare ema Viya, Macaiyaquene ema Viáquenu Jesucristo.

*Ema Pablo ticatuparalahi ticametarairuyare nayehe ena apavasanana*

<sup>7</sup> Tacuhe, nuprapenaveana, ejacapacacayare eti echamericacanahi, apaesa macunachacarehi ema Viya nayehe namutu ena achaneana. Ecutiyare ema Viáquenu Jesucristo eta majacapirahavihi víti.

<sup>8</sup> Écharichuhivare eta máucupaisirahi éma te juca. Tétavicavahi eta mamansuvahi eta máimitusiravacahi ena majaneanana israelítana. Mavarahahi máimimatichavaca éna eta máitauraivahi ema Viya tamutu eta máechajiruvana máijararuvananahi nayehe ena viáchucanaveanaini. Váhiquene tivayuarahi.

<sup>9</sup> Énerichuvare máimimatichahi ena apavasanana eta majapanuiravacahi ema Viya apaesa nacunachayarehi éna apanava éma. Títauchavayarehi eta máechajiruvahí ema Cristo eta Sagrada Escritura, ani macahehi: “Puiti núti, énapa ena nuchaneranahi apavasanana vicuticacahi eta vicunachiravihi, piti Tata, vijirauchiravihi eta vipicauchiravihi”.

<sup>10</sup> Te apana Escritura, ánivare tacuhe: “Eti apavasanana, étipa eti israelítana, étamurihéipa ecuticacainapa eta iúrisamurrevaya me Viya”.

<sup>11</sup> Te apanavare Escritura, ánivare tacuhe: “Étamurihénapa eta ecunachirahi ema Viya, eti apavasaqueneanahi. Váhivare ínajicahini eta ecunachiraya éma”.

<sup>12</sup> Eta májurehi ema víyarahaini Isaías te Sagrada Escritura, ánivare tacuhe: “Tíjahúchavainapa ema Cristo, te nájina nacuchapaimahi. Éma, aquenucayare nayehe ena apavasanana. Macarichuyare éma ticasíñavanayare mayehe, eta nacuneraya éma” tacahépa.

<sup>13</sup> Ema Viya, tétavicavahi eta macunecarevahi, ticasíñacarehivre. Tásicha puiti, tétavicavahi eta nuvarairahi máijaracahéni éti eta tavayuchiraina eta iúrisamurevaina, tavayuchirainavare eta ecasiñaira mayehe, apaesa tanaracaina tamutu eta epanereruana. Eta mávahásirahehi ema Espíritu Santo, máetumechahéni muraca apaesa táetaviuchiravaya eta ecasiñavairayare mayehe ema Viya eta máijarasiraparaca eta iúricacarevaya.

<sup>14</sup> Tiuri puiti, némunaruqueneana nuprapenaveana, nucasiñavahi núti eta eyehe, eta étaviuchiraipa eta iúriva étapa eta ímatiequenehairahi tamutu eta máimiturapiana ema Viáquenu. Yátupihivare ítucahi econsejachacaca.

15 Nucasiñahehivare eyehe puiti juca eta njárasirava nucajurehe eta juca nucartane étapa eta juca táechajisihaque-neanahi, apaesa vahi ecuemitisica, taicha nutuparahahi me Viya eta nujaneasiraheya eti apavasanana.

16 Éma, tituparacanuhi eta nuyanirayare nupaipica te tamutu avasareana, nucametarairuiraya nayehe namutu ena achaneana eta najacapacareipahi me Viya eta nacasiñavairahi eta mayehe. Tituparacanuhivare eta nujaneasiraheyare emutu eti esuapanahi éma. Tásicha, nuvaraha nútí nímerecaheya te mamirahu ema Viya te jena sache ticutiyarehi námavhahuhe. Éma tiúrisamurénapa eta majacapiraheya, taicha máepachiaruhéipahi ema Espíritu Santo.

17 Eta mavanaranuirahi ema Jesucristo, nucunachava eta nucaemataneasirahi ema Viya.

18 Váhisera nucasiñavaimahi, nucuneuchavaimahi tayehe eta jácani nacaemataneasiranahi ena apamuriana mavanarana. Nútisera nítouchahai eta nucatuparahairahi me Cristo eta nímimatichiravacahi ena apavasanana eta nasuapiro ema Viya, náehisirapaipahi eta nímiturapihi étapa eta núrivahi eta nayehe.

19 Nímechavacahi ichape eta tiáramicareana eta nítupajijiasirava maicha ema Espíritu Santo. Tacalhehi eta nítouchirahi tamutu eta nucametarairuirahi eta máimiturapiana ema Jesucristo. Tamutuhi nupaica, népanavahi te Jerusalén, níchecuhapa tayehe eta departamento Ilírico.

20 Taicha ichape eta nuvarairahi nítecapauchaya tamutu avasare, te jácani nájinaichaha nacametarairuhini. Nuvarahaya nucametarairuyare nayehe ena achaneana tájinahi nasamihahini eta máijare ema Cristo.

21 Nítouchahai eta táechajiruvahai eta Sagrada Escritura, ani tacalhehi: “Náechapa puiti eta máijare ema Cristo ena achaneana tájinaquenehi apaesainahini nasamairiricahini eta máijare. Náimatiéquenehapa eta máimiturapi, éna eta namaitucaquenehi namasamaquenehivare” tacalhepa.

### *Ema Pablo mapanerechapa tiyanayare te Roma*

22-23 Ichapemurihi eta áñoana nuvarairahi nupaipiuchahé eti, nucachaneheya apaesaina. Váhisera nítujicava, taicha eta nupaipiuchirapahi eta apana avasareana. Puítisera nítouchapa eta nupaisirahi tayehe eta avasareana.

24 Tásicha, puiti nupanerechahi nétavauchaheyare achichu juca, nuyaniraya te avasare España. Nuvaraha vicaurisamurechacacainapa. Te támputa eta nucachaneraheya eta nétavauchiraheyare, németeaca ímicatacanuyare jácani eta nuyanirayareva.

<sup>25</sup> Nuyananumayaresera te Jerusalén. Nunapanumayare eta nanaquiruvana ena vichamuriana nayeheyare ena apamuriana vichamurianahivare ticavasanahi ánaqui.

<sup>26</sup> Taicha ena vichamuriana te Macedonia, énapa ticavasanahi te juca Acaya, tinaquiquicavanahí eta náimicatasihaya ena apamuriana vichamuriana páureana ticavasanahi te Jerusalén.

<sup>27</sup> Tétavicavahí eta náurisamurevahí eta nanaquisiravahí, navarairahi títsirijicavanaya nayehe. Táurica eta juca náitsirijisiravaya, taicha ena nachamuriana israelítana tímimati-chanahí ena apavasanana eta máimiturapihana ema Viáquenu. Tásicha puiti, énapavaya ena vichamuriana apavasanana, nacajiyare ena nachamuriana israelítana.

<sup>28</sup> Tacáhe, te támputupa eta níjarasiravacayare ena vichamuriana páureana eta nanaquiruvana ena nuchamuriana te juca, nuyaninavarepa nucajuhe te España. Nétabajicainapasera eta ara eyehe.

<sup>29</sup> Németeaca eta nítecapauchiraheya, ichapeyare eta viúrisamurevaya eta vétumechiracacayare taicha eta véhisirahi ema Cristo.

<sup>30</sup> Nuparapenaveana, nuyaseacahe te máijare ema Viáquenu Jesucristo étapa eta vémunasiracacahi maicha ema Espíritu Santo. Nuyaseacahe ímicatacanuhíni eyaseuchanu me Viya te eyujarasirana.

<sup>31</sup> Eyaseacahini eta majaneasiranuhini eta nítecapauchiravacayare ena masuapajirairahanahi ticavasanahi te Judea. Étapa eta juca námaqueneyarepahi nanaquiruvanahí ena vichamuriana, táurihini eta najacapirayare ena vichamuriana ticavasanahi te Jerusalén.

<sup>32</sup> Eyaseacahivaréni ema Viya másapanuhini eta núrisamurevainahíni eta nítecapauchiraheya, ímicatasiranuhíni eta nítujisiravaina nucachanehe.

<sup>33</sup> Ema Tata Vicaiyaquene, tétavicava eta macanarasirahi tamutu eta vapanereruana. Nuvaraha puiti yátupina esamava eta macanarasirahehi éti. Amén.

## 16

*Ema Pablo máemechajirisíha te macartane namutu ena máimatiqueneana machamuriana*

<sup>1</sup> Nutuparacahe emutu échapajirisinanu eta suítecapauchiraheyare esu apava vichamuri Febe. Taicha ésu, tétavicavahí eta suítatiravacahí ena vichamuriana te avasare Cencrea.

<sup>2</sup> Tauri eta ejacapiraina esu, evapinavayare te máijare ema Viáquenu Jesucristo. Ímerecayare eta yátupirahi eparapehivare ésu eta echamurirahi tayehe eta véhiruhi. Ímicatacayare

te jácani sucamunuiravana. Taicha ésu, camurianahi ena suímicataruanahi. Nútiripa, tétavicavahivare eta suímicatasiranuhi.

<sup>3</sup> Échajisinanuyare ema Aquila ésupa esu mayena Priscila. Vahi némitisicavaca éna eta nucachamurirahi tayehe eta vicaemataneasirahi ema Jesucristo.

<sup>4</sup> Ena, vahi nacatiequenehahini eta náitaresirana eta nacatiuchiranuhi. Nuhasulupayachavaca éna. Énerichuvare nahasulupayachavare namutu ena apamuriana vichamuriana apavasanana.

<sup>5</sup> Échajisinanuvare ena apamuriana vichamuriana tiúrujicavaráhianahi te napena ema Aquila ésupa esu Priscila. Échajisinanuvare ema némunaruquenehi nítunacasare Epeneto. Éma tínapucahi majacapahi ema Cristo apaicape te nuyanapa te Acaya.

<sup>6</sup> Échajisinanuvare esu María. Nusamairiricahi eta ichape-murirahi eta suímicatasirahehi éti.

<sup>7</sup> Échajisinanuvare ena nujaneanana Andrónico émapa ema Junias. Éna, nuchamurianainihi eta vicaeratairahi te cárcel. Tétavicavahi vémunasirahi éna viti apóstoleana. Éna, tínapu-canahi nuyehe eta náehisirahi ema Cristo.

<sup>8</sup> Échajisinanuvare ema Amplias, émarichuvare némunaru-quenehi eta véhisirahi ema Viáquenu.

<sup>9</sup> Échajisinanuvare ema Urbano, ema vichamurihi tayehe eta vicaemataneasirahi ema Viáquenu Jesucristo. Échajisina-nuvare ema némunaruquene Estaquis.

<sup>10</sup> Échajisinanuvare ema Apeles. Yátupihi éma eta máimeresirahi tiúrihi eta máehisirahi ema Cristo. Échajisinanuvare ena machichanaveana ema víyarahaini Aristóbulo.

<sup>11</sup> Échajisinanuvare éma apanavare nujaneanana Heredión. Énapa ena machichanaveana ema víyarahaini Narciso, tétavicavahi eta nasuapajiraivahi éna me Viáquenu Jesucristo.

<sup>12</sup> Échajisinanuvare esu Trifena ésupa esu Trifosa. Énari-chuvare ticaemataneacanahi ema Viáquenu. Échajisina-nuvare esu vémunaruquene vichamuri Pérsida. Tétavicavahivare eta sucaemataneasirahi ema Viáquenu.

<sup>13</sup> Échajisinanuvare ema Rufo. Éma, tétavicavahivare eta masuapirahi ema Viáquenu. Échajisinanuvare esu maena. Ésu, tímicutijiricavahi mémehahini eta nuyehe ésu.

<sup>14</sup> Échajisinanu ema Asíncrito, ema Flegonte, ema Hermas, ema Patrobas, ema Hermes. Échajisinanu ena vichamuriana tiúrujicavarahiana te napena.

15 Échajisinanu ena Filólogo, ésupa esu Julia, ésupa esu Olimpas émapa ema Nereo, ésupa esu maparape. Échajisina-nuvare ena vichamuriana tiúrujicavarahiana te napena.

16 Puiti eta néchajisirahehi emutu eti nuchamuriana, nuvaraha nétserecahe emutu te máijare ema Cristo. Ani te juca, téchajicaheana namutu ena apamuriana vichamuriana te tamutu avasareana.

17 Nuparapenaveana, nuvaraha ecuneuchavare nayehe ena tipanerechanahi típutsimurihaheana taicha navarahahi tihapapicaheana eta te éhiruhi. Ena nani nacatianacahi eta juca vímiturapihi iárvahuhi.

18 Érajicavayare eta nayehe, taicha éna vahi émainahini nacaematacaneacahini ema Viáquenu Jesucristo. Énajivachucha navaraha tiúrichavana. Tétavicavahivare eta náitusirahi téchajiricavanaugh. Títivehi eta náechajirisirava. Étachuchasera navarahahi tivayuarecana te nasamureana ena achaneana tijimuyapanerueruana.

19 Namutuhi tímatiheana éti, náechahivare eta esuapajiraivahi. Eta tacahe, tétavicavahi eta núrisamurevahi ícha. Ecajurucaseraini eta ícharahi eta táuriqueneana. Vahi ecuquicha eta tamauriqueneana.

20 Nuti nucasiñavahi me Viya, máimicasirasiraheya íputsicavaneya ena machanerana ema Satanás. Tásiha, tiúriyare eta íchararacavahi maicha ema Viya. Nuyaseacaparacavare ema Viáquenu Jesucristo táetaviuchahíni eta iúricacarevaya máicha.

21 Téchajicahe ema Timoteo, ema nuchamurihi eta vicaemataneasirahi ema Viáquenu. Énapa ena nujaneanana: ema Lucio, ema Jasón, émapa ema Sosípater.

22 Núti apana nuti Tercio, núti nájuchahi eta juca carta, néchajicahe núti apana te máijare ema Viáquenu Jesucristo.

23 Téchajicahevare ema Gayo, ema nítecapaurehi te mapena. Étarichuhivare viúrujisirarevahi te viyujarasirana. Téchajicahevare ema Erasto, ema tayehehi secretario tésorerohi eta te alcaldía. Téchajicahevare ema viparape Cuarto.

24 Nuyaseuchaheparaca emutu éti me Viáquenu Jesucristo, táetaviuchahíni eta iúricacarevaya máicha. Amén.

### *Eta táichecuaraqui eta macartane ema Pablo*

25-26 Nuvarahahi vácuticacaini eta vijirauchira ema Viya. Éma, mavarahahi tétumechaheya tayehe eta éhisirahi ema Viáquenu Jesucristo. Eta tacahehi eta nucametarairuirahi, nímitucavacahi namutu ena achaneana eta majacapiravacahi ema Viya eta nacasiñavairahi me Machicha. Acane

eta táepaniravahi eta apaquehe, ema Viya Eterno mapane-rechapa eta majacapirayare namutu ena achaneana ticasí-navanaya eta mayehe. Ena israelítana énapa ena apanapa-nenejiqueneana achaneana, namutu tijacapacareanayarehi. Étaripa eta náechajisihaqueneanahi ena víyarahananaini profetana tayehe eta Sagrada Escritura. Nájinasera nácaicutiaraхini. Mapaenumavapa tímimatichanuhi núti ema Viya eta mapanereruhi.

<sup>27</sup> Ema Viya, ¡tétavicavahi eta máitupajijiasirava! ¡Macarichuhi tijirauchacarehi ticunachacarevare tayehe tamutu! ¡Máitavacacayarehi eta vihasulupayachirayare éma tivanecahavihi ema Jesucristo eta macuchucuirahavyarehi! Amén. Tamutupa.

# Eta macartane ema Apóstole Pablo nayehe ena machamuriana ticavasanahi te avasare Corinto, ticaijare **1 CORINTIOS**

<sup>1-2</sup> Nuti Pablo, mayehenuhi apóstole ema Jesucristo. Níchuarecasivaichuhi mayehe, manerejirunuichuhi ema Tata Vicaiyaquene, mavarairahi nímitucaya eta náechajiriruvana éna. Puiti nucajurehe nútì émapa ema vichamuri Sóstenes, eta juca carta eyehe eti vichamuriana ecavasanahi tayehe eta avasare Corinto. Puiti éti iávaháruripa ema Viya taicha etupiruvahi esuapa eta máichuirahéhi éti apanava, mavarairahi émayarepa ema Machicha Jesucristo ecaematanacayarehi. Ecuitiripa ena apamuriana vichamuriana ticavasanahi te tamutu avasareana, taicha ecasiñavahi eta eyujarasirana eta mayehe. Vimutu víti, émanarichuhi ema Viáquenu Jesucristo ema visuapaquenehi.

<sup>3</sup> Nuvaraha macatajicahehini ichape ema Tata Vicaiyaquene, émapa ema Viáquenu Jesucristo; náijaracahéhini táurivaina eta epanereruana.

## *Viúricacarepa ichape maicha ema Cristo*

<sup>4</sup> Núti nuhasulupayachaparaca ema Viya táichavene eta majapanuiraheripa. Eta iávahásirahi ema Jesucristo, ichaperinehi eta iúricacarevahi.

<sup>5</sup> Tíjaracaheripa eta ítupajijiasiravahi eta échajisirana, échemaharipihi tamutu.

<sup>6</sup> Écharipa eta numetacahequenehi eta máijarasiraheya ema Cristo eta iúrvaya. Puítipa tíjaracaheripahi.

<sup>7</sup> Tamuturipa tíjaracahehi ema Viya. Tájinapa iátajivainahini eta ítupajijiasiravaipahi. Étanecha ecuchapayare eta jena sácheyare machavirayare ema Viáquenu Jesucristo.

<sup>8</sup> Puiti ema Viya tétumechaheyare puiti juca vicaijuheyare eta ítaresiraya apaesa tacuija ecuavamirahu te jena sácheyare machaviraya ema Viáquenu Jesucristo.

<sup>9</sup> Ema Viya vahi mahapapicaimahi eta mapanereruanahi. Yátupi eta máitauchirayarehi eta máichuirahéhi, mavarahahi iúrujicavayare ecachanenapa ema Machicha Jesucristo ema Viáquenu.

## *Vahi táurica vicaerajicaca*

<sup>10-11</sup> Nuparapenaveana, ¿tájahapapuca ecayema éti vaipa tétopicava eta epanereruana? Núti nusamairiricahi eta íputsiásiravavacaripa. Taicha tacahéhi eta nametasiranuhi ena

suchichanaveana esu vichamuri vénaraha Cloé. Nuparape-naveana, nutuparacaheyare te máijare ema Viáquenu Jesucristo, tácoticáca eta epanereruana. Nuvaraha étanainarichu eta epanereruana. Vaipa ecuiputsiacaca.

<sup>12</sup> Taicha ani tacahehi eta nusamairirisirahehi. Ena apamuriana ánipaji nacahehi: "Víti viúripanahi viti véhicanahi ema Pablo". Ena apamuriana énerichuvare nacahehiji: "Vítira viúripanahi viti véhicanahi ema Apolo". Ena apamuriana énerichuvaréji nacahehi: "Jéhevaresera víti viúripanahi viti véhicanahi ema Pedro". Ena apamurianavare nacahepají: "Vítira viápajupanavahi viúripanahi viti véhicanahi ema Cristo".

<sup>13</sup> Váhira tiuri énenahini ácahehini, taicha ema Cristo vahi apapipijinahini eta máimiturapiana. Nuti Pablo, váhira nútinhahini népenahini te crusu íchavenénahíni éti. Eta ecaicaschasirahí, váhivare étainahini te njare.

<sup>14-15</sup> Tiúririchuhí vahi nútinhahini níccachasicahéhini éti. Nájina tiyunacaimahi eta nútinhahini níccachasicahéhini te njare, náepiyaequenehanuhipucaini. Yátupi níccachasicavacahi ema Crispo émapa ema Gayo. Téhesera te máijare ema Cristo eta níccachasisiravacahi.

<sup>16</sup> (Néchavapasera eta níccachasisirahivare ema Estéfanas, énapa ena machichanaveana. Váipasera néchava nájahapuca nácani níccachasiruanahi.)

<sup>17</sup> Ema Náquenu Jesucristo tituparacanuhi nucametarairuyare eta viúchucuirayare máicha. Váhira étainahini mavane-canuhini níccachasiricahini. Tacahe, tatupiruvahi eta nucametarairuirahí. Váhisera nuvayuyujicaimahi nútinapapucaini nápacavahini eta nusuapacareva, tásápihapapucaini vahi tacusuapacarehini eta máepenirahí ema Cristo te crusu.

*Ema Viya máijaracahi ema Machicha Jesús eta máitupajijiasiravahi*

<sup>18</sup> Natiarihihi ena achaneana náimijachahi súnsurupiana eta juca nucametarairuirahí eta viúchucuiraya taicha eta máepenihavihi te crusu ema Viáquenu Jesucristo. Ena nani masuapajirairahanahi énara táiturevanayare eta ecuñaraqui. Vítisera viti macuchucureanayare, tiúrihi visama eta yátupiqueneana tásihaqueñehi me Viya.

<sup>19</sup> Ema Viya ani macahehi eta máechajiriruva eta te Sagrada Escritura: "Tamapurujíhi eta náitucaqueneanaini ena titupajijihanainihi, énaripa máehicanurahanahi. Súnsurupihi nuyehe eta náechemaraivanahi" macahepa.

<sup>20</sup> Eta tacahe puiti, tájina tacunachacarevainasami me Viya eta máitucaquenehi ema achane titupajijiacavahi, mácani máestropuca, tayanapane macarichuhí nayehe ena apamuriana tímatiequenehanahivare eta tayeheana eta juca

apaquehe. Taicha tájina vahi étaparacaina mayehe ema Viya eta júcana taicha súnsurupianachucha eta mayehe éma.

<sup>21</sup> Tamutusera eta mapanerueruahí ema Viya, tétavicavahi eta tapachinavavacahi. Éma, tivanecahavihi viti vicametarairuanayare. Nararihi ena tisuapanapahi eta vimetarairuana. Énaripa tiúchucuhanayarepahi. Tayanapane ena apamuriana náimijachahi súnsurupianahí eta vimetarairuana. Ena nani achaneana, tamapuriji eta náechemarai-vanahí, taicha vahi táimimaticahavacahini me Viya.

<sup>22</sup> Ena nani nujaneanana israelítana náepiyarichuhi tiyase-serecana, navaraha náimaha eta tiáramicareana tiásihana me Viya. Ena griégoana eta nayeherepi natanucahi eta tápajusiravaya eta náechemaraivaya.

<sup>23</sup> Eta tacahe, vahi tasuapacarehini nayehe eta vimetasirahi eta viúchucuirayare táichavene eta máepenirahi te crusu ema Cristo. Ena nujaneanana titsirihanahí eta juca, tásicha náepuru náehica éma. Ena apamuriana apavasanana náimijachaichucha súnsurupiana eta juca.

<sup>24</sup> Natiarihisera ena tisuapanapahi eta máichuirahi ema Viya, ena israelítana énapa ena apavasanananahí. Náimatinipa ema Cristo, eta vanairucairahi mayehe ema Maiya taicha éma tíjaracahi ema Machicha eta máitupajijiasiravahi étapa eta matumeva.

<sup>25</sup> Tayanapaneinesera te súnsurupihipuca nasama ena achaneana eta vimetarairuana, étasera tiápajucavahi tiúripanahí tayehe eta náitucaqueneanahí éna. Tayanapanevare náimijachahi mamaratahairainahí ema Viya, émahisera túmepanahí nayehe namutu éna.

<sup>26</sup> Ímativaichuhi, eti nuparapenaveana, te tíchuhahépa ema Viya, vahi ámutuhini ímatihini eta táichararacavahi eta ítare-sirahi te juca apaquehe. Váhivarenéni ámutuhini tuparairu-cahevacainahini. Váhivarenéni ámutuhini ecaimahaquenevacahini.

<sup>27</sup> Tayanapane ena achaneana náimijachahepuca súnsuhéna éti, manerejiruhehisera ema Viya, taicha mavarahahi máimicatsiriacavacayarehi ena tímijachavanahí titupajijiacavana. Tinerejicaheripa éti váhirichu túmejicuhénahini, mavarairahi máimicatsiriacavacayarehi ena tímijachavanahí túmejicuana.

<sup>28</sup> Tayanapane eta épurucarehi, náimijachavare máiturerehe, manerejiruhehisera ema Viya. Eta tímicaecherachavacahi eta taejecapiravahi eta napanerueruana mayehe ema Viya, taicha vahi énaina matanuca ema Viya ena titupajijiacavana, aquenucarahaná, ticaimahaqueneanapuca.

<sup>29</sup> Eta juca mapanerueruhi ema Viya, mamavarairahi

nacuija nacucasiñavavaica te mamirahu éma, náimijachirapuca matuparaca éma nayehe éna.

<sup>30</sup> Puítisera éti, majacapaqueneanaripa ema Viya. Mávaháruhevarepa ema Jesucristo maicha ema Maiya. Tacahe, ichaperipa eta échemaraivahi máicha. Sántuheripa máicha, ecutipaipa eta masantuvahi éma. Iúchucurepaipahi tayehe eta ticaviurecarevana.

<sup>31</sup> Tavaraha vítaucha eta táechajiriruvanahi eta Sagrada Escritura, ani tacahe: “Vahi vítijivaimahi vicunachava taicha eta vítupajijasiravana. Éma vicunachayare ema Viáquenu taicha ema tiúrichahavihi”.

## 2

*Ema Pablo macametarairuhi eta máepenirahi ema Jesucristo te crusu*

<sup>1</sup> Nuparapenaveana, échavarichuhi te nítecapauchahénapa cape juca viásinequenehi. Eta nímitusirahehi eta máechajiriruva ema Viya, tiúrihi eta níminecapaequenehairahehi, tamutuhi ticaicutiaracare eta néchajirisirahehi. Vahi tácajerapihini eta néchajirisirahehi.

<sup>2</sup> Taicha nuvarahahi nímimatichaheyare ema Jesucristo, nuvarahahivare yátupinahini ácaicutiara eta masivachaquenehi macatajivairahi éma eta máepenirahi te crusu íchavenehi éti. Eta tacahe, nupamicavahi nútia etá nímitusirahehi.

<sup>3</sup> Núti, te nímitucahénapa, vahi nítupajijihahini eta nusamiravahi. Nupícacarácavahi támapurujihini eta nímitusirahehi. Ichape eta tayayacarevahi eta náquehe taicha eta néñamiravahi vahi tacusuapacarehini eta eyehe etá nímiturapiana.

<sup>4</sup> Núti, vahi nácutihini mácani achane mavayuyupica etá máechajirisirava. Étisera ecaicutiaravanehi etá nímitusirahehi maicha ema Espíritu Santo. Ecaicutiaravanehi étairahi etá yátupiqueneana tásihaquevaneana me Viya.

<sup>5</sup> Taicha nuvarahahi yátupina muracaina etá ecasiñavairahi mayehe ema Jesucristo taicha ímatihi te esamureana etá yátupirahi másihairahi me Maiya. Vaipa ecuehica etá nayeheropianaini ena viáchucanaveanaini.

*Ema Espíritu Santo tímimatichahavihi etá mapanereruana ema Viya*

<sup>6</sup> Étisera ánaquiaparipa etá éhisirahi. Ímatiequenehávacaripa. Tacahe, táuricapa puiti vímitucaca etá apamuri échajirirucava titucacareana ticajerarapianahi. Eta juca titucacareana tásuhanah me Viya. Vahi tásihaquevénahini mayehe mácani vicutiquene achane. Énainahipucaini tásihahini nayehe ena

ichapequeneana aquenucana, taicha vahi tánasimahi eta mapanereruana éna.

<sup>7</sup> Eta júcana titucacareana tásihaqueneanahi me Viya, mapanereruanahi te tépanavainapa acanevaca. Ánaquiparipasera eta macaerajisirahini. Tapaenumavapa puiti máimicaecherachinahavihi viti achaneana, mavarairahi visiapaya tayehe eta mávasa anuma.

<sup>8</sup> Ena aquenucanahi, vahi náimatihini eta mapanereruana ema Viya. Nájina émanainahini ema ichapequene aquenuca máimatihini. Taicha te náimatihini eta mapanereruana ema Viya, váhirichuhipucaini nacuémétatacrahini te crusu ema Viáquenu. Tájina náimatihini eta émairaquénehi Viya, tiáshahi te anuma.

<sup>9-10</sup> Vítisera víti, máimitureanahi ema Espíritu Santo. Vímatihi eta mapanereruana ema Viya. Émahi ema tímimaticahavihi taicha macarichu máimatihí eta tayumururevanahi te mapanereruana ema Viya. Taicha ani tacuhe eta Sagrada Escritura: “Tétavicavaya eta náuricacareva ena nani témunacanahi ema Viya. Taicha máijaracavacaya eta náicuchihi natuparahahi maicha éma. Máimahasirichaha eta tacutiquenehi eta náuricacarevaya. Váhivare tisamairicacarehini eta tacutiquenehi te jácani tiyerehi avasareana. Nájina naratahahini náimijachaimahi eta táetaviuchiravaya” tacalhepa eta Sagrada Escritura.

<sup>11</sup> Viti achaneana, vicarichu vecha eta vianereruanapachu tásihaqueneanahi te visamureana. Nájina apanaina náratahahini naecha. Ene macahehi ema Espíritu Santo. Macarichu éma téchahi tamutu eta mapanereruanahi ema Viya, taicha émarichuhi máchanevahi.

<sup>12</sup> Viti, tájina vahi vítijivainahini vímipanerechavahini mayehe ema Viya. Émasera ema Espíritu Santo tímitucayahavihi tamutu eta titucacareana tásihaqueneanahi me Viya, taicha mavarahahi véchayare.

<sup>13</sup> Eta tacuhe, eta juca vímiturapianahi tásihaqueneanahi mayehe ema Espíritu Santo. Vahi tásihaquenénahini te vianereruana. Táitusiava, ena vímitureanahi natupiruvahi najacapa taicha mávaháruanahi ema Espíritu Santo.

<sup>14</sup> Énasera nácani achaneana vahi mávaháruanaina ema Espíritu Santo, vahi najacapaimahi eta máimiturapiana, taicha náimijachahi súnsurupiana. Váhivare nárataha nacaicutiariyahini, taicha ticamunucarehi eta máimitusiravacainahini ema Espíritu Santo.

<sup>15</sup> Vítisera viti yátupiqueneanahi mávaháruana, vicaicutiariyahini tamutu eta máimiturapiana éma. Énasera ena máehicarahanahi, vahi nacaicutiariaimahi eta apanairaipahi eta

viyeherepianahi víti.

<sup>16</sup> Tacahehi eta táchajiriruvana eta Sagrada Escritura: “Nájina émanaina achane máemunahiricavahini máimatihini eta mapanereruana ema Viáquenu. Tavetijicha májina mácani máitucahini máimituca ema Viya eta mamaitucaqueneana-pucaini” tacahepa. Nájinavare nácutihavihíni víti vicarava-huquenehi eta máechajiriruanahi ema Cristo. Vímatiripa eta mapanereruana.

### 3

*Vimutu vicompañerocaca tayehe eta vicaemataneasirahi ema Viya*

<sup>1</sup> Nuparapenaveana, cape te nítecerauchahénapa, vahi tacajerapahini eta nímitusirahehi. Tacutihi te vicajuruca eta amuya, vépiyayasinahi eta vímitusira. Tativahi nímitucahe eta epaisirayare éhisirayarehi ema Jesucristo. Taicha éti vuíchaha támutuhini ínajicahini eta tajamurachaqueneana eta iáqueheana. Vuíchahavare éhicahini eta mavarahaquene ema Espíritu Santo.

<sup>2</sup> Vahi námainunujiyahéhini eta nímitusirahehi. Éti ecutihi ena nácani amuyana tiájicanarichaha. Vahi námainucavahini nanicahini eta cheruji. Ene ecahehi éti, vahi iámainuca-vaimahi ácaicutiarahini támutuhini. Puítirichucha vuíchahavare áratahaimahi ácaicutiarahini eta apamuriana titucacareanahi murácapanánahi.

<sup>3</sup> Taicha éti vuíchaha támutuhini ínajicahini eta tajamurachaqueneana eta iáqueheana. Taicha ecapinarujirica-caichaha, ecatianajiricacaichaha, íputsimuriajiricacaichaha. Eta epanereruana ecutirichaha eta napanereruanahi ena apamuriana achaneana masuapajirairahanarichaha.

<sup>4</sup> Éti épurujiricacahi nayehe ena echamurianahi, ánipa ecahe: “Víti viúripanahi viti véhicanahi ema Pablo”. Éti apamuri ecahepa: “Vítira viúripanahi viti véhicanahi ema Apolo”. Eta juca ecahehi, tacutirichaha eta napanereruana ena apamuriana achaneana masuapajirairahanarichaha.

<sup>5</sup> Váhira nútinayarehi éhica nuti Pablo. Váhivare émaimahi ema maca Apolo éhicayare. Vahi véhicacare víti, taicha mavanarahavichucha ema Viáquenu Jesús. Yátupi víti vímitucahehi. Tamutuhisera mayeheanahi ema Viya eta esamaque-neanahi. Ema Viáquenu tíjaracahavihi eta vituparahapachuyarehi.

<sup>6</sup> Yátupi núti nínnapucahi nímisamahehi eta máechajiriruva ema Viya. Te néquenepa, títecapauchahepa ema Apolo, émapa titametacahehi tamutu. Émasera ema Viya, ema ticajurusinahehi eta esuapajiraivanahi.

7 Táitaurevaquene nútihinéni névacahi te esamureana eta echajirirucavana, tájinaserá vahi nútina néchahe. Émaripa ema Apolo, ema titametacahehi, váhivare émaina téchahe. Émara ema Viya, ema téchahi tamutu eta juca. Éma ticunachacare.

8 Núti, émapa ema Apolo, vicuticacahi vínumahi eta vicaematane. Vituparahapachuhisera. Ema Viya tíjaracahaviya eta vícuchianapachu, te tiúrihi eta vicáematanérana.

9 Víti mamusurahavihi ema Viya. Éti ecutihi eta sucurecana eta macajurusirahehi ema Viya.

Eta éhisirahi ema Jesús tacutihi eta náepiyasirahi eta ichapequene peti.

10-12 Tativa, ema maestro tépiyarecarahi peti arquitecto, éma tinacucha eta labriyu eta tatumearaya eta yúchama. Tásicha, ena apamuriana máestroana, énapa tiúnachana eta yúchama étapa eta tamaiquehe. Tiúriyare eta nacaemataneraya. Nanerejicayare eta táuriqueneana tasivachaqueñeana, navarairahi tijanunucayarehi eta náematan. Váhiya nanacaimahi eta tíjuchacareana, yucuqui, muiji, cáchipaca; apaesa vahi tacuiju eta peti. Taicha títecayare máimahapanaya ema ticayeheyarehi eta peti. Tásicha, te máimahapa tiúrihi, mavachachainapa namutu ena ticaemataneanahi. Nuti manerejirunuhi ema Viya eta nímimatichirahehi ema Jesucristo, éhicapaipa éma. Puíticha eta ecaijuherapaipa te anuma, nájina apanaina naratahahini námahehini. Macarichuhi marataha éma. Puiti, ena apamuriana mamusurana ema Viya tímitucahehi apaesa tajuruca eta esuapirohi. Tacamunusera tiúriyarehi eta náimitusiraheya.

13-14 Taicha tatiarihiyare eta sácheyare máimahayare ema Viya eta vémataneanapachu, te tiúripuca. Te tiúrihi eta vémataneanahi, ema Viya tíjaracahaviya eta táitsivayare eta vématanerepihi. Téhesera vahi táurihini, eta mayucune táijuchayarehi eta vémataneanahi.

15 Tacamitiequenehayare tamutu jácani tájina tacunachacarevainahini. Tájina táimaequenénaimahi. Yátupi viúchucuhahi víti, tájinaserá vímaequenéhaimahi.

16-17 Écharichuhi éti eta mávahásirahehi ema Espíritu Santo. Éti ecutihi mayehehi templo ema Viya, étarichuhi eta máucupaisirarehi máemunaruquenehi. Éma, máicuñacayare muraca nácani tijararecanahi éta. Táitusiava, ejaneacava éti, machu ejarareca eta iúrujiasiracacahi, ímiyusemaca ema Viya.

18 Vahi ecuejecapava eta ímijachirahi ímatipa tamutu eta juca vítaresirahi. Étisera ecaravahuya eta me Viya. Éma,

tímitucae eta ítupajijiasiravanaya yátupiqueneana. Échema-raivaina máicha.

<sup>19</sup> Taicha eta náitucaqueneanahi ena achaneana te juca apauehe, súnsurupianachucha eta máimairahi ema Viya. Taicha eta Sagrada Escritura, ani tacahe: “Ena tímijachavanahi náimatiéqueneha, énajivachucha tímiaquipaicavanahi maicha ema Viya, taicha eta namáetupisirávanahi”.

<sup>20</sup> Ánivare tacahe eta Sagrada Escritura: “Ema Viya máimati etá napanereruana ena tímijachavanahi titupajijiacavana. Tájina eta tacunachacarevanahi eta mayehe”.

<sup>21</sup> Táitusiava, vahi tiuri ecasiñavavaicahini. Vahi étupicava etá éhisiravacahi ena enerejiruanahi éhica.

<sup>22</sup> Ecaravahuinasera tamutu eta vímiturapiana viti mavanaranahi ema Viya: ema Apolo, émpa ema Pedro, nútipa nuti Pablo. Ecamapurava eta ítaresiraichaha te juca apauehe. Jararihiyarehi eta iúricacareva puiti étapa etá sácheana vicaijuhequeneana. Vaipa ecupica etá épeniraya.

<sup>23</sup> Échava ema Viya ema téchahehi, taicha éti mayeheheripa ema Machicha Cristo.

## 4

### *Eta nucatuparahairahi ena apóstoleana*

<sup>1</sup> Nuvaraha némechahe eta vicatuparahairahi viti mayeheanahi apóstole ema Cristo. Mamusurahavihi viti. Tivanecahavihi etá vímitusiraheyare etá mapanereruana ema Viya, etá tayumururevanainihi.

<sup>2</sup> Puíticha, mácani ticatuparahayare tayehe etá ematanecana, tacamuñuhi yátupiyare etá máitauchiraina.

<sup>3</sup> Natarihipuca ena ticaunenuanahi te nítaurahihipuca. Étiripa, enevanehipuca ecaunenu. Núti, tájinavare tácayema te ticaunenuanahipuca. Németeaca nítauchapaipa tamutu etá nucatuparahairahi me Viáquenu.

<sup>4</sup> Váhisera nucasiñavavaicahini, taicha néchahi ema Viáquenu, máimahahi éma tamutu etá nucaematañeasirahi éma, te tiúrihipuca, váhipuca.

<sup>5</sup> Eta tacahe, vahi táuricahini tativainahini ecaunehini etá júcana, te vuíchaha ímatiequenehahi. Ecuchapaya etá mápechiravayare títeca ema Viáquenu. Éma tímicaecherachayare etá tayumururevahí te timapicu. Éma tímereuchahaviya etá vipanereruana te visamureanapachu. Tacahe, ema Viya ticunachahavinapa etá viúrivanahi.

<sup>6</sup> Nuparapenaveana, numetacahe etá juca etá tiúrichaheyare apaesa ácuti etá máuriva ema Apolo, ácutinuvare nútia etá núnivahi, taicha étanarichuhi etá vímiturapianahi

tayehe eta véhiruhi. Vahi táurica enerejicahini nácani émunaruhanaya. Vácuticacaserá eta émunasirahavina viti vímiturahianahi. Nacuijavare épuruquenéna nácani tímiturahianahi.

<sup>7</sup> ¿Tájaha tacayema ímijachavahi éti iúripana nayehe ena apamuriana? Tájina apanaina ecasiñavaiya, tacarichu ecasiñavaiyaya tayehe eta máijararuheanahi ema Viya. Váchuripa tíjaracaheripa éma eta iúrivanahi, vahi étijivainahíni iúrichavahini. Tásiba, ¿tájaha tacayema ecasiñavavaicarichucha éti?

<sup>8</sup> Éti, eta esamiravahi ecaemuñavaipa tímicutijircavipa ecayehehini tamutu, ecaimahaquenehini. Ímicutichavapavare aquenucahenahini eta esamiravahi. Ímijachavapa vaipa nucamunucarehi eyehe. Jéhechapucaini malayarine yátpinahini aquenucahenahini apaesa viti apanava vémeñahavapaini eta eyehe.

<sup>9</sup> Ímatirichu éti eta procesión náichaqueneasa ena tiverearecanapahi tayehe eta guerra. Nanacahi te náijiquimuri ena ticatuparanahanahi eta náepeniraya taniruanayare eta sárareana. Ichape eta náimahacarevahí nayehe ena achaneana. Viti apóstoleana ticutimahi tinacahavi ema Viya eta vicutihi ena nani páureanasamí. Ichape eta vímahacarevahí nayehe ena achaneana, énapa ena ángeleana.

<sup>10</sup> Viti apóstoleana, eta vicaemataneasirahi ema Cristo, tisunsuchahavianasamihiji ena achaneana. Étisera étaviucharijahiji eta ítupajijiasiravahi tayehe eta titucacareana mayehe ema Cristo. Tacutiquene náimijachahivare matumerairahahavisami. Éti, téavicavaipáji eta etumevavacahi. Tipicauchaheanaripáji ena achaneana. Vítisami tájinapa vipicauchacarevainahini nacahehi éna eta náechajiruvahí.

<sup>11</sup> Puítiripa vinasirichuhi eta vicatajivairahi eta vinicaquenerepi, eta vimauneva, étapa eta véchuriasirapa eta vimuiriharapi. Ena achaneana téhahaviana. Tájina viviyava vijunaiya.

<sup>12</sup> Vicávitacarávahí te vivahuana eta vicaematanera. Ena achaneana ticajachachajicahaviana. Vítisera tájina vácayemahini nayehe. Tiúrihi eta vijicapiravacahi éna. Tipanajiricahavianapa, vítisera vicamichahi tamutu.

<sup>13</sup> Tamutu sácheana téchajicanahi eta viyehe. Tíñemahi eta nacayemainahavi. Ichape eta vépurucarevahí nayehe. Vítisera vicayehéhi paciencia nayehe, viconsejachavacahi.

*Eta mahapasamureresiravahi ema Pablo nayehe ena machamuriana*

<sup>14</sup> Eta juca nucajureheirahi, vahi étaina nupanerecha nímicatsiriacahe. Nuvarahahisera nuconsejachahavevare. Téavicava eta némunasirahehi, tacutirichu eta nucachichairahéhi.

<sup>15</sup> Tayanapane camurianahi ena eyeheanahi máestroana tímitucaheanahi eta éhisiraina ema Cristo, diez mílnáinahipucaini; nútisera tímicutijiricavahi nácarichuhini éyanuinahini maestro taicha núti nímmatichahehi tayehe eta iúchucuirayare maicha ema Jesucristo.

<sup>16</sup> Eta tacahe, nécatiacahehi eta éhisiraina eta núrivahi núti.

<sup>17</sup> Eta tacahe, névatacayare eta ara eyehe ema némunaruquene nuchicha Timoteo. Éma, titaurahi eta macaemataneasirahi ema Viáquenu. Éma, tímitucaheyare, máemechiraheyareva eta tacayemaqueneana eta nímiturapiana eta véhisirahi ema Cristo. Táuriquenehi eta máimiturapiana taicha étarichuhi eta nímiturapihi nayehe ena vichamuriana te jácani nupaisineanapahi.

<sup>18</sup> Etiarihiripapuca eti ecasiñavaripa eta numaitujisiravaripa néjirapanahahehini. Ímijachaipapuca nupicahi.

<sup>19</sup> Nuvarahapaicha núti níjahuchavahini nítecapauchahehini. Nucuchapahi eta nítujisiravainahini maicha ema Viáquenu. Te nítecapauchahepa, nímahainapa ena nácarana tisiñavavaicanahi, te yátupihipuca eta nacaemataneasirapa. Vahi tisuapacareimahi eta nacunachiravana te vahi náimicaecherachahini eta táurivahi eta nacaemataneasirahi ema Viya.

<sup>20</sup> Taicha eta véhisirahi ema Cristo, tacamuñuhi vítauchayare vicaemataneacayare. Vahi tácarichuimahiya eta véchajiruvana.

<sup>21</sup> Tiuri puiti, te ímiyanava ene ecahehi, némecharecaheyarehi te nítecapauchahepa. Téhesera te étupiricava eta epanereruana, ichape eta núrisamurevayarepahi eta nímaireheyare, nétsrajicahénapa.

## 5

### *Ema Pablo mavaraha nacaerajica mácani téjecapavahi*

<sup>1</sup> Jucarihivre eta juca apana téchacarehi eta matiarihirahi ema émana echamuri téjecapavahi, tíñehicarehi eta juca máichaquenehi. Mavehahiji esu máenaharuva. ¡Váhicha tiuri eta juca máichaquenehi! Énaripa ena navayurevaqueneana ticapecaturarahiana vahi náuricaimahi eta juca.

<sup>2</sup> Esapihaichucha éti, ¡tétavicavahi eta tahapasamu-rechiraheli eta íputsimuricacairahi tásichaquenehi eta ecasiñavavaisirahi! ¡lúrihaipa etsirihapaini, táchavenehi eta máichaquenehi ema echamuri! ¡lúrihaipavare étupiricahini ema maca! Taicha ema Viáquenu Jesús tituparacahavi vicuchucayare te vimuri nácani téjecapavanahí te vahi návarahahini náetupiricava.

<sup>3-4</sup> Puiti, nuvaraha iúrujicavayare éti. Eyaseacayare ema Viáquenu Jesucristo máimicatacahe eta étupirisirayare eta juca. Núti apanavare, tayanapane eta nuyerehihehi, étasera eta náchaneva ticachaneheya.

<sup>5</sup> Íchayare: “Te máijare ema Viáquenu Jesucristo, víti émapa ema Pablo, vicuchucavi te vimuri. Vaipa tijaneacavimahi ema Viya. Máimahavinepa ema Satanás, émainapa téchavyiyare. Vivaraha pínajicaini eta juca pimaurivahi, apaesa táuchucuhaini eta piáchaneva te táitecapapa eta jena sácheyare machavirayare ema Viáquenu Jesús” íchayare.

<sup>6-7</sup> Éti, vahi táuricahini ecasiñavavaicahini. Tacamunu ecuchucavane ema mácará achane téjecapavahi apaesa vahi macupareacahe eti apamuriana, machu mámairijicahe. Taicha éma macutiripa eta levadura te nanaca te masa eta pan, tayanajicahi tamutu. Étisera, nuvaraha ecutiya eta pan mayehere levadura vinicasare te páscuamuhuana. Yátupiquenehi arairu taicha vahi tasisijicahini. Ene ecaheyare éti, vahi tépahaimahi eta iásinequenehi te arairuhepa tacuti eta épaniravahi te éhicainapa ema Jesucristo. Taicha éma, tamutuhi mavachacha eta vímicapasirahi, macutihi eta uvesa eta vímijararesirahi.

<sup>8</sup> Táitusiava puiti, vicutinapa ena nujaneanana israelítana eta nacaerajisira eta levadura te napenana te páscuamuhuana. Tamutusera sácheana vicauneuchavaya tayehé eta tamauri-queneana, vahi pecatumarehavimahi. Tamutu sácheana eta juca vítaresirahi matapiravarehavinahi, tájinasarerepa víchiravaimahi te mamirahu ema Viya.

<sup>9</sup> Cape eta nucartanehivre eyehe, nímimetacahehi eta tamaurivahi eta ecachanevacahini ena tíchanahi eta juca pecatuana tivehajiricacanahi: Súcani esena suvehahi ema apana achane, mácani achane mavehahivare esu apana esena.

<sup>10</sup> Tiuri, núti eta numetasirahéhi, váhisera énaina nicha ena nani máehicarahanarichaha ema Viya ena nani tivehanahi esu apana esena apayena, énapa ena tavayuaruana eta plata, énapa ena tiámerahiana, énapa ena ticasíñarajiana. Ena nani, náetaviuchahi eta nasimutuvavacahi, tamutuhi návihávaca. Tacamunuipapuca vérnjicavahíni eta te juca apauehe, apaesa vaipa nacuitecapauchahavihini. Váhira énaina níchaquenénahíni.

<sup>11</sup> Mácanisera tímijachavahi echamuri, vahi nuvaraha ecachanejirica ema tivehahi esu esena apayena, émapa ema tivehahi esu esena amaperu máimaruchaha, émapa ema tavayuaruhi eta plata, émapa ema ticasíñarajiji, émapa ema titupiarahi, émapa ema ticavaharasi, émapa ema tiámerahi.

Mácani echamuri, te ene macahehi, tájina vahi táuricahini ácachanevacahini te enisirana.

<sup>12-13</sup> Vahi nútina tatuparaca eta nacayaseserehiyayare te numirahu ena anecaqueneanahi eta viyehe. Téhesera te mamirahu ema Viya eta nacayaseserehiraya. Éma téchavacahi éna. Étisera éti, échahi ena echamurianahi. Éti eyaserejiricacayare étijicacaya. Eta tacache, ecaevuisihayare ema mácará téjecapavahi te emuri.

## 6

*Vahi táurica vimetauchacacahini te namirahu ena máehicarahanahi ema Viya*

<sup>1</sup> Énerichuvare nuvaraha numetacahe eta apana: Te natarihipuca ena echamurianahi navaraha timetauchacana, vahi távaraha nayanahini nayehe ena tuparairucana máehicarahanahi ema Viya. Étarichu nacamirahucacaiyayare te emirahu eti nachamuriana.

<sup>2</sup> Tativayare échava eta machaneraherahi ema Viya. Étijivayarehi étupiricaca eta íchavaquenevanahi. Vahi étinayare etanuca ena masuapajirairahanahi taicha járajapayare eta sácheyare ticayaseserehianaya te emirahu éti ena masuapajirairahanahi. Puítisera eta íchavaquenevanahi ánicchichaque-neanahi, éti tatuparaca étupiricaya.

<sup>3</sup> Écharichu éti tituparacahaviyareva ticayaseserehianayareva ena ángeleana te vimirahu. Tacumapurujichapucaini eta tayeheanahi te juca vítaresirahi, vahi vicuituruequenehahini.

<sup>4</sup> Puiti éti, te tatarihipuca eta íchavaquenevahí tayehe eta juca vítaresira puiti, váhiquenesera etanucaimahi ena emetauresihahini nácani vahi énaparacaimahi nayehe ena echamurianahi.

<sup>5-6</sup> Némechahe eta juca, nímaha te etsirihapuca. Váhiquene táuricahini mayanahini mácani vichamurihi matanucahini ena tuparairucana máehicarahanahi ema Viya. Tasapihahini étainahini mametauchihahini mácani machamurihi. Cúverarecpa nacuijahini te etaracu mácani émanainahini vahi macuituruequenehahini mayasesereca jácani téchacareanahi nayehe ena vichamuriana.

<sup>7</sup> Vahi táuricahini íchahini eta juca. Étijicacainahini eta echamuricacahi evarahapa ejararecaca. Tivarahacarepana eta eratahairaina ecamicha, tayanapanerine ecatajivahi naicha, tiámeyechaheanapuca.

<sup>8</sup> Étisera etivavaicapa íchahi eta juca émecatajivachacacapa. Vahi táuricahini eta juca; násapihahini énahini echamuriana ena etupiaruanahi.

9-10 Váhipuca échahi éti eta namaitujisiravaya tisiapana te mávasa ema Viya ena tíchanahi eta tamauriqueneana. Taicha yátupihi eta namaitujisiravayare tisiapana ena ajairana tivehanahi esu apana esena apayena énapa ena vahi nayenacacaquenena, énapa nácani tivehana esu esena amaperu máimaruchaha. Énerichuvare ena esenana, váhivare titújicavanimahi tisiapana te mávasa ema Viya, súcandi tivehahi ema achane vahi suímaquenenahí, ésupa súcandi amaperu esena namutuchucha suvehapahi. Váhivare titújicavanimahi tisiapana ena nani tivehacacana ajairacacana, énapa ena nani ticasifarájiana, ena nani tiámerahiana, ena nani ticapinarurahiana, ena nani ticavaharasiana, ena nani titupiarahiana, énapa ena nani nápicararecapahi eta námeresirayare.

11 Ene ecaheni éti eta iásinequenéni. Puítisera títsivachavaipahi eta ítaresira, sántuheripa maicha ema Espíritu Santo, ejacapacarepa mayehe ema Viya, máichavenehi ema Viáquenu Jesucristo.

*Tiávahácahaviripa ema Espíritu Santo eta te viáquehe viti machanerana ema Viya; tásiha, tituparacahavipa tacuija eta vituhusivaina*

12-13 Puiti jucarihivare eta numetacaheyare. Nararihipuca ena nacahehi: "Nuti néchinava eta nítaresirahi. Eta náquehe tajamurachahi eta tavarahaqueneanahí. Eta tincacare táicuchihi eta viami. Eta viami tatuparahaichuhi tajacapaya eta vinicaqueneyare. Ene tacuhe eta náquehe tavarahahi nuveha esu esena tacutihí eta viami tavarairahi tinica" nacahepa. Nútisera te nupanereru, vahi énéna tacahe. Yátupi víti véchinavahi. Váhisera tavarahacarehini támuthichaini víchahini eta tavarahaqueneanahí eta viáquehe, vivayuchahini víchahini eta tamauriqueneana. Yátupi tísapacarehi eta vinisiraya eta tinicacareana. Tatarihisera eta sácheyare, vaipa vácamunuimahi eta tinicacare, maicha ema Viya. Ema Viya máepiyacahi eta viáquehe, mavarairahi vicaematanacayare éma. Émapa téchahavihi puiti eta juca vítaresirahi. Vahi étainahini támepiyacahavihíni eta víchiraya eta pecatuana esenamarehavinahini.

14 Ema Viya macaechepecuahi ema Viáquenu Jesús te máecari. Ene vicaheyare víti eta macaechepusirahaviyare víti apanava, taicha téavicavahi eta máitupajijiasiravahi.

15 Écharichuhi emutu éti, eta iáqueheana mayeheripahi ema Cristo. Émaripahi téchahehi. Etarihipucaseria ímijachapuca tauricahini vímicachanechahini eta viáquehe tayehe eta suáquehe esu esena túhusi. Váiparinehi tauricaimahi.

<sup>16</sup> Nuvarahavare némechahe, te mavehahi ema achane súcani esena túhusi, tiánecacahi eta náqueheana eta nacamujichiracacahi. Acane, ema Viya máijaracapa esu Eva mayehe ema Adán. Tásicha, eta Sagrada Escritura, ani tacahe: “Te tivehacacapa, tímicutijiricavapa étanarinehi eta náqueheana”.

<sup>17</sup> Ene tacahehi eta vítaresira mayehe ema Viya, eta mávahásirahavi ema Viáquenu, eta viáchaneva tacachaneripa éma.

<sup>18</sup> Eta tacahe, ejaneacava yátupina, machu iáquipaicava tayehe eta túhusicare. Tamutu eta pecatuana náichaque-neanahi nácani achaneana, tajararecahi eta náchanevapachu. Tavetijipa, mácani achane tivehahi esu esena vahi mayenaquenenahini máimijararecahivare ichape eta máquehe. Ticajachacareinehi eyehe éti eta juca.

<sup>19</sup> Écharichuhivare éti eta mávahásiraheripa ema Espíritu Santo eta te iáqueheana, taicha mavaneruichuhi ema Viya eta mávahásiraheyarehi ema Espíritu Santo. Vaipa étinahini écha eta iáqueheana.

<sup>20</sup> Taicha mavachareruhehi ema Viya. Ichapemurihi eta macatajivairahi íchavenehi éti. Puiti, eta iáqueheana étapa eta iáchanevana mayeheripahi ema Viya. Tacahe, puiti, ejaneacavapa eta ítaresiranahi te namirahu ena achaneana, apaesa namutu nacunachaya ema Viya.

## 7

*Eta maconsejarapi ema Pablo nayehe ena máimaruana, énapa ena nacaimaqueneana*

<sup>1</sup> Tiuri puiti, nujicapaheyare eta juca eyaseresiranuhi te ecartane. Yátupi tiúrihinéni máyénarénahini mácani achane.

<sup>2</sup> Táichavenesera eta tavayuaraivahi eta pecatu, ticamunu-carehi ena ajairana nayenapachuina, énaripa ena esenana ticamunucarehivare náimapachuina.

<sup>3</sup> Mácani achane te sutiarihipapuca esu mayena, tacamuñuhi máitauchayare eta máitátilaya máemunasiraya esu mayena. Ésuripa esu esena te ticaimaripapuca, énerichuvare suítáuchayare eta suítátilaya suémunasiraya ema suima.

<sup>4</sup> Taicha esu esena vaipa ésuinahini téchinava eta suáquehe. Émapa téchahi ema suima. Ene macahehi ema achane, váipavare émainahini téchinava eta máquehe. Ésuripahi téchahi esu mayena.

<sup>5</sup> Éti ecaimaqueneanaripa, vahi ecuepurucaca tayehe eta iánesiracacairana. Téhesera tatíarihinapuca eta eyujarau-chiravayare me Viya, ecuticacahipuca eta epanereruhi, tísapacare Ínajica ánipinga eta iánesiracacana. Te tâequenénapa, táuricavare echávauchacacavare, apaesa ema Satanás vahi macuiturucahe eta máimijamurachirahe ena apanana.

6 Tiuri, eta juca numetasirahehi, vahi nútina nucavanairipi. Nísapasera eta énéna ácae.

7 Nuvarahahinéni ácutinuhini núti eta mayénarenuiraphi. Víjaracasipachusera me Viya eta vítaresiraya. Nararihi ena ajairana máyénareana eta náitaresira. Nararihivare ena esenana máimaruana eta náitaresira. Nararihivare ena apamuriana máijararuichu ema Viya ticaimana.

8 Énaripa ena nácara vichamuriana máyénareanachaha, énapa ena máimaruuanachaha, énapa ena tépenaimana, tiúripanahinéni nánasihini máimaruuanainahini; nácutinuhini núti.

9 Étasera te vahi náratahahi ticaratacavana, tacamuñichuhi ticaimanayare, apaesa vahi nacuepujuquichava tayehe eta pecatu.

10-11 Tásicha puiti, nutuparacavacayare ena nacaimaqueñeana-ripa. Ema ajaira vahi macuinajica esu mayena. Esu esena váhivare sucuinajica ema suima. Eta juca vanairipi tásicha-quenehi mayehe ema Viáquenu, vahi tásichaquenéna nuyehe núti. Téhesera natarihinapuca ena vichamuriana náinajicaca, vahi táuricahini nápechavahini nacaimahini, nacacachanehipucaini. Tacamuñihi tichavauchacacanayare tivehacacana.

12 Tiuri puiti, tájinachaha vanairipina tásichaquenéna me Viáquenu tayehe eta náinajisiracaca ena nacaimaqueñeana. Níjaracahesera eta juca nupanereru núti. Te matiarihipuca mácani vichamuri esu mayena vuíchaha vichamurinahi, te tiúrihipuca eta nacachaneracacahi, vahi táuricahini máinajicahini ésu.

13 Énerichuvare, te sutiarihipuca súcandi esena vichamuri ema suima vuíchahavare vichamurinahi, te tiúrihipuca eta nacachaneracacahi, váhivare táuricahini suínajicahini éma.

14 Taicha ema suima, ichape eta majapanucareva me Viya táichavenehi eta sucaimairahi esu mayena. Énerichuvare esu esena mayenahi ema vichamuri, ichape eta sujapanucareva me Viya táichavenehi eta mayenairahi ema achane vichamuri. Énaripa ena nachichanaveana majapanuhivare ema Viya náichavenehi ena ticachichana, vaipa náepuruca-rehini me Viya.

15 Téhesera mácani vuíchaha vichamurina suímahi esu vichamurihi mavarahapuca máinajica esu mayena, suísaparine máinajica. Ema Viya vahi macavanairipi eta suíchejiricahini éma, mayanarine. Taicha ema Viya mavarahahí viúriyare, tacujapa tahapapiricahavihi eta vipanereruana. Énerichuvare súcandi esena vuíchaha vichamurinahi mayenahi mácani vichamuri, te suvarahapuca suínajica ema suima, énerichuvare másaparinevare suyana.

<sup>16</sup> Taicha piti esena, vahi pecha te pimaitacayarepuca picajayayasamurecha ema pima eta máehisiraina ema Viya. Pítiripa piti achane, váhivare pecha te pimaitacayarepuca picajayayasamurecha esu piyena eta suéhisiraina ema Viya.

<sup>17</sup> Ema Viáquenu tíjaracahehi eta ématanerepianahi te tíchuhahenapa. Etuparahapachuhi eta ématanerepiya. Váhisera ínjicaimahi, ímiyanavare ítauchaya eta etuparanahahi. Étara eta juca nuvanairipi nayehe ena vichamuriana ticavasanahi te tamutu avasareana.

<sup>18</sup> Nácani ticamarcanaripa te máichuhavacapa ema Viya, vaipa táuricahini nacaepahavahini eta nacamarcairahi. Nácani mámárcareeanarichaha te máichuhavacapa ema Viya, vaipa táurica nacamarcahini.

<sup>19</sup> Tájina vahi étaparacaina te vicamarcahipuca, étasera tivarahacarehi vicaemataneacayare eta mavarahaqueneahni ema Viya.

<sup>20</sup> Namutu nácani máichuhaqueaneana ema Viya, vahi náitsivachaimahi eta náematanerepianahi náijaracahi te máichuhainapa ema Viya.

<sup>21</sup> Te ecaquenuhipuca éti te tíchuhahenapa ema Viya, vahi ecueñamava eta ecaquenuirahi. Téhesera ímaha eta iúchucuiraina, tájinachucha táichava.

<sup>22</sup> Taicha mácani achane músuhi eta máitaresira, tayanapanerine matiarihinahi ema máquenuinahi; téhesera te mamirahu ema Viya, tínunánaripahi mácani achane nájina máquenuinahini eta máitaresira. Puiti ena apinana mavanaranaripahi ema Viáquenu Jesucristo, taicha ticuticacanaripa eta nacaemataneasiraipa éma.

<sup>23</sup> Taicha mavachareruhehi ema Viya. Ichapemurihi eta macatajivairahi íchavenehi éti. Puiti machaneraheripa éma. Eta tacahe, te navarahapuca nayurucahe ena achaneana, vahi ecuisapava nahapapicahe eta ecaemataneasirayare ema Viya.

<sup>24</sup> Eta tacahe, nuparapenaveana, ímiyanavayare ecaematane mayehe ema Viya. Ítauchayare eta ématanerepipachu íjaracasihi me Viya.

<sup>25</sup> Tiuri puiti, tájina vanairipina tásihaqueñéna me Viáquenu nayehe ena amaperuana máyénareeanaríchaha énapa ena máimaruanchaha. Nútisera numetacaheya eta nupaneruhi. Nuvarahasera esuapanu taicha nútì nucaimitucasiquenehi mayehe ema Viáquenu, táchavenehi eta majapanuiranuhi.

<sup>26-27</sup> Puiti juca vítaresirahi, téavicavahi eta vicatajivairahi. Eta tacahe, németeaca nútì tiúririchu nánasi ena ajairana nayehe ena nayenana nácani nacayenaqueneanaripahi. Vahi

nacuinajicaca. Énaripa ena máyénareanarichaha, vahi nacutanuca ena nayenaina.

<sup>28</sup> Mácanisera sutiarihi esu mayena, tájinachucha pecatuina eta mavirahi esu esena. Ésuripa súcani amaperu esena, te tatupiruvahi eta sucaimaira, tájinachuchavare pecatuina eta sucaimairahi. Táitsivasera ichapeyare eta nacatajivairaya eta náitátiracacaya, tавetijipa te natarihinapa ena nachichanaveanaya. Eta tacahe, nuvaraha numetacahe apaesa vahi ecucatajivahini.

<sup>29</sup> Tiuri, nuprapenaveana, nuvaraha numetacahe ticutimahi ániperine eta juca vítaresiraya puiti juca vicaijuheyare. Eta tacahe, taurica eta íjarasiravahi yátupina eta ecaemataneasira ema Viáquenu. Étiripa, éti natarihi ena eyenana, vahi tacucarichu eta ecaeñamasirava nayehe ena eyenana, énerichuvare me Viya.

<sup>30</sup> Te jararihipapuca eta tacáiyasiráhe écatisamurepuca, vahi ecuisapa tahapapicahehini eta ecaemataneasira ema Viáquenu. Te jararihipapuca eta tacaurisamurechirahe, váhivare ecuisapava tahapapicahehini. Te ecaimahaquenehipuca, tísapacare eta ecamapura eta ímahaqueneana eta máijararuhehi ema Viya, váhivare ecuisapa tahapapicahehini eta ecaemataneasirahi ema Viáquenu.

<sup>31</sup> Nuvaraha táurihini eta ítaresirayare te juca. Váhisera ecuisapava ecuñaamaracava eta ecayeheirayare eta ímahaqueneana te juca apaquehe. Taicha tamutuyarehi témitiaca te táitecapapa eta táitaviraya eta juca apaquehe.

<sup>32</sup> Eta tacahe, vahi nuvaraha ecañaamaracava tayehe eta júcana, taicha mácani achane máyénarehi, tájina tahapapiricahini eta macaemataneasirahi ema Viáquenu, mavarahahi máicutichiravaya eta macurisamurechiraya ema Viáquenu.

<sup>33</sup> Mácanisera achane te sutiarihipa esu mayena, ticañaamaracavainapa taicha eta máitátirayare esu mayena, mavarairahi macurisamurechaya ésu.

<sup>34</sup> Ene nacahehi ena esenana. Vahi tacuteicaca eta napanneruana suyehe esu esena sucaimaquene ésupa esu esena máimaruchaha. Taicha súcani máimaruhi tahapasamurechahi eta suítatiraya ema Viáquenu, suvarairahi suítauchaya eta mavarahaqueneana. Suíjaracayarehi ema Viya eta suáchaneva étapa eta suáquehe. Ésusera esu esena sucaimaquenepa tahapasamurechapa eta suítatiraya ema suima, suvarairahi sururisamurechaya éma.

<sup>35</sup> Eta júcana nuconsejarapianahi eyehe, nuvaraha eta taurivaina eta ícharacavaya. Vahi nuvaraha nupamicache tayehe eta tacajeraqueneana. Nuvarahasera tacuijahini eta tihapapicahe eta ítátirayare ema Viáquenu.

<sup>36</sup> Tiuri puiti, eta juca nuconsejarapi mayehe mácani achane te sutiarihipuca esu machicha esena máimaruchaha. Te tahapapiricaipapuca eta sucaimairayare esu machicha, táichavenehi eta suítanahasiraipa; te tiúrihi eta máimairahi, másapayarehi ticaima esu machicha. Tatupiruvayaresera eta sucaparaperayare. Tájinachucha táimanena; váhivare peca-tuina.

<sup>37</sup> Mácanisera achane, te tájina máichiravainahini, nájinavare tipamicaimahi; te mavarahapapuca suánasi máimaruina esu machicha, tiúrihi maicha.

<sup>38</sup> Tacahe, tiuri máichayare mácani achane máimachayarehi, tatuparacahi ticaparapeyare esu machicha. Mácanisera vahi máimachahini esu machicha, éma tiúripana maicha.

<sup>39</sup> Esu esena ticaima tatuparacahi suítauchayare eta suíjara-siravahi ticaima, sunasirichuya eta mayehe ema suima eta náitaresirana. Tiámainucava te táitecapapa eta máitaviraya ema suima, tiúchucuhapa ésu. Ésupa téchinava eta suítaresirayare. Tísapacarepa eta suápechava suaima. Tacamunu-hisera mácani vicutiquenehi vichamurihi tisuapajirahi me Viya.

<sup>40</sup> Tiápajucavasera tiúripanaya te suánasipa máimaruina. Eta juca tásishaquenepa te nupanereru. Németeacahi núti té tupi-cavapahi eta nuconsejarapiana taicha mávahárunuhi ema Espíritu Santo.

## 8

*Ema Pablo mame tacavaca eta naya seresirahi te tiúrihipuca nanica eta tinicacareana tacayujarahuquene te tamirahu eta nasiñarajiana ena achaneana*

<sup>1</sup> Puiti numetacaheya eta táicharacavahi eta enisira eta tinicacareana nayujaraurehi te tamirahu eta nasiñarajiana ena achaneana. Yátupi vimutu vímatiequeneha tájinachucha táimanena eta juca. Váhisera vácasiñavaimahi eta vítusirahi. Tacamunuhisera tajurucaya eta vémunasiravaca ena vichamuriana, vímicasiracacaya eta véhisira ema Viáquenu.

<sup>2</sup> Taicha nararihi ena ticasíñavavaicanapa, tímijachavanapa náimaticequeneha tamutu. Eta juca náichahi táimerecahi vuíchaha náitucahini, vuíchaha nacapayayaracahini eta mapanereru mácani yátupipa máituca.

<sup>3</sup> Nácanisera yátupihi tímunacanahi ema Viya, éta tímicaeche-rachahi eta machichanaveanairahi éma.

<sup>4</sup> Tiuri puiti, numetacaheyare eta juca nuconsejarapi tayehe eta juca enisirana eta tinicacareana tacayujarahuquenehi te tamirahu eta nasiñarajiana ena achaneana.

Tájinachucha táichava, taicha eta nasiñarajiana vahi yátupinahini víyanainahini te juca apaquehe, taicha émanarichuhi ema yátupiquenehi Viya.

<sup>5</sup> Ena achaneana náimijachahi camurianahi ena víyana te anuma, étaripa te juca apaquehe. Namaveracapa ena náquenuanahí nayeheanahí viya, camurianapa naicha eta nasiñarajiana.

<sup>6</sup> Vítisera viti vímatiequenehanahí émanarichuhi ema Viya Vicaiyaquene te anuma. Ema Jesucristo, émanarichuhi ema Viáquenuhi. Ema Tata Vicaiyaquene mapanerechapa eta tatiarihiyare tamutu eta vímahaqueneanahí; vítipa vimutu achaneana, mavaraha vitiarihiya eta vicaemataneasiraya éma. Tásicha, ema Machicha tépiyacahi tamutu. Puiti émapa téchahavihi vimutu. Éma, tíjaracahavihi eta arairu vítaresira.

<sup>7</sup> Tisimutuanasera ena vahi náimaticequeneha eta juca. Énaripa ena vichamuriana, nararihi ena vuíchaha náemitiscahini eta navaraira napicaucha eta nasiñarajianaini. Éna, tisamavanahí vaipa náetupicavanahí eta nanisirahi eta tincacare tacayujarahuquenehi, vahi táuricahini eta nasamirahi.

<sup>8</sup> Numetacahesera puiti, vahi étaparacaina eta tinicacare, vijacapacareyare me Viya táicha. Váhivare étaimahi tiúrichahavihi mayehe ema Viya, te vahi vinicahi. Váhivare tijararecahavimahi mayehe te tiúrihipuca eta vinisira.

<sup>9</sup> Eta tacahe, ecauneuchava yátupina machu émejecapavacha ena apamuriana vichamuriana vuíchaha náimaticequenehahini eta júcana.

<sup>10</sup> Étisera éti ímatiequeneanaripa, te ísapavayarehipuca enica eta tinicacare nayujaraureanahí te tamirahu eta nasiñarajiana; tacahe, te máimahahepuca ema echamuri, énerichuvare tísapavayarehi tinica. Táitsivahisera tipicacaracavahi jácani te masamure.

<sup>11</sup> Eta tacahe, échapavaya éti tayehé eta ímatiequenehairaripa machu émejecapavacha ema echamuri mácani vuíchahapiravahi máimaticequenehahini eta júcana. Émarichuhi iúmurivahi eta mavacharesirahehi ema Cristo eta máopenirahi te crusu.

<sup>12</sup> Éti, te ehapapicapuca eta táurivahi eta napanerueruana ena echamuriana, éti ecapecaturaipa eta mayehe ema Cristo, taicha eta émejecapavachirahi ena echamuriana.

<sup>13</sup> Ácutinu eta juca nuyeherepihi: Te nútinahipucaini némejecapavachaini mácani nuchamuri táichavene eta nunisirainahini eta vaca, váhirine nunicaimahi, apaesa vaipa nucuemejecapavachahini éma. Éti apanava, ene ecaheyare. Váhivare ecuemejecapavacha ena echamuriana.

## 9

*Ema apóstole Pablo, tatuparacahi náitátiyare ena máimitureana*

<sup>1</sup> Núti, nájina náquenuinahini te juca apaquehe. Yátupi apóstolenuhi mayehenuhi ema Viáquenu Jesucristo. Nucutinavacahí eta návacurehi nayehe ena apamuriana apóstoleana taicha nímahaquenehi ema Viáquenu Jesús. Étiripa, etupiruvahi esuapanu eta nímitusirahehi. Éta tímereuchanuhi eta táurivahi eta nucaematanasirahí ema Viáquenu.

<sup>2</sup> Tayanapane nacañajivarinepuca nácani vahi tisuapapajicanuanahí eta apóstolenuirahi. Étisera esuapanuyarehi, taicha etiarihi eti nímitureanahí, étira ímereuchanuhi eta yátupirahí apóstolenuirahi mayehe ema Viáquenu.

<sup>3</sup> Étará nucatiuchiavahí eta juca nayehe ena tépurujiricanuanahí.

<sup>4</sup> Éti tituparacahehinéni ítatinuhini nútí tayehe eta nunicaquenerepi táichavenehi eta apóstolenuirahi.

<sup>5</sup> Énerichuvare tituparacahehi ítatihivaréni te sutarihnahini esu esena nuyenainahini, súcani nucutiquenehi tisuapajirahi. Tácutihini eta ítátiravacahí ena esenana nayenanahí ena apamuriana apóstoleana, émaripa ema Pedro, énapa ena maparapenaveanahí ema Viáquenu.

<sup>6</sup> Éti, ímijachaipapuca nútí émapa ema Bernabé, vicarichuhi vahi tatuparacahavahí eti ítátirahavinahini eta vicametarrauirahí.

<sup>7</sup> Puiti nuvaraha nímicutiarachinaheyare eta nacaitaticasira ena ticaematanerahiana. Ani tacahe: Namutu ena suntaruana ticaitäticasianayarehi nayehe ena comandanteana. Énerichuvare, ema tisucurecahi eta tinicacare, tatuparacahi masamapuhayarehi eta tahi eta masucureanahí. Émaripa ticayehehi vaca tatuparacahi máerayarehi eta tache-neama eta mayacane.

<sup>8</sup> Eta juca níchirahéhi, vahi nácarichu nútí nuapanereruhi eta júcana. Énerichuvare eta Sagrada Escritura májurehi ema Moiséini titametacahavihivare.

<sup>9</sup> Ánipa tacahehi eta táchajiriruvahí: “Vahi picuitisumucha eta pivuiyerana, te ticaematanepahi taicha técuhanapahi éta”. Táitaurevaquene ema Viya vahi táchirichuhini eta vuiye eta máechajisihahi.

<sup>10</sup> Énerichuvare víti mayunacahi te máechajiriruvahí. Mavarahahi vicaenicasiyare vimutu viti vicaematanerahiana. Tacutihi mácani achane ticaematanerahí. Macaematanacahi muraca eta máesane, mavarairahí máimaequenehayare eta tágavameanahí eta máesane.

<sup>11</sup> Ene vicaheli víti eta vévasirahi eta máechajiriruva ema Viya te esamureana. Éta tiúrichahehi. Tásicha, éti ecutinapa eta sucureca tímecavahi eta táhi. Tájina táichava eta ítátirahaviyarehi víti.

<sup>12</sup> Ena apamuriana ticasíñavanahí eta eyehe. Tásicha éti, tiúrihi eta ítátirahi. Vivetijipa víti vítaticarehi eta eyehe.

Váhisera vávarahahini vicasíñavahini víti eta eyehe, viyaseacahehini eta ítátirahavinahini. Vicamichahi tamutu, vimavarairahi tatiarihinahini jácani apanainahini tahapapiricahini eta esamirayarehi eta máechajiriruva ema Cristo.

<sup>13</sup> Écharichuhi éti eta mavanairipi ema Viya nayehe ena téchapajircana eta mayehe Templo, nanicayarehi eta tincacare námaqueneasana ena achaneana náijaracasiruanahí ema Viya. Cáijaracasianayareva éna eta vaca taeche eta námvahuanahí ena achaneana.

<sup>14</sup> Ene tacaheli eta mavanairipihi ema Viáquenu eta viyehe viti vicametarairuanahí eta tapachinaquene máechajiriruva, tituparacahavihi vijacapayarehi eta vinicaquene taicha eta vicametarairuirahi.

<sup>15</sup> Nútisera tájina nímatiyahini nuyaseacahehini eta ítátiranuinahini. Étaripa puiti te juca nucartane, váhivare nuyaseacahe íjaracanuhini. Nucamichahi tamutu. Tiúrinerhipucaini népenavanehini, machu tachimaracanucaru táitava eta juca nýrisamurevahí nútí tamajinairahi nuyaseacahehini.

<sup>16</sup> Núti vahi étaparacaina nucasíñavahí taicha eta nucametarairuirahi. Nutuparahaichuhi eta juca. ¡Páurechichanusami te némunahacava nínajica eta juca nucametarairuirahi!

<sup>17</sup> Taicha nútí, vahi nútijivainahini níjaracavahini mayehe ema Viáquenu eta nucametarairuiraya, étapapucaini nujacapihahini eta nuvachayarehi eta mayehe. Nuvanecasivahisera me Viya eta matuparasiranuhi eta juca némataneyarehi.

<sup>18</sup> Ichapesera eta nuvarairahi eta nucametarairuirahi, taicha tijarahi te nusamure eta nuratahairahi nucametarairu, tamajinairahivare nuyaseacahehini eyehe éti. Vahi nupamicahéhini eta ítátiranuinahini táichavenénahini eta nucatuparahairahi eta apóstolenuirahi.

<sup>19</sup> Nájinahinéni te juca apaquehe napamicanuhini eta nucaematanesirainahini táichavénehipucaini jácani náitátranuhini, énainahipucaini náechanuhini. Nútisera níjaracavahí nítouchayarehi tamutu eta nucamunucarevahí nayehe ena achaneana, apaesa étainahipucaini níturusihavacahini ena nasimutuvaqueneana, machaneranainahini ema Cristo.

<sup>20</sup> Étaripa te nítecapauchavacavare ena nujaneanana israelítana, ichaperinehivare eta nupicauchiravacahi éna,

apaesa najimuyasamurepapucaini eta náehisirainahini ema Cristo, étaínapapucaini níturusihavacahini éna. Ena nani, ichape eta nasuapirohi eta mayeherepiana ema Moiséini. Tásicha, te nucainunavaca éna, tájinavare vahi nucaecahihini eta nayeherepihi, nupicauchahivare éna apanava. Váhineni nútíparacainahini tayehe eta náehiruhi.

<sup>21</sup> Tatiahisera eta yátupiquenehi néhiruhi nuvanahihi mayehe ema Viya, máijararuhi ema Cristo. Énerichuvare te nucainunavaca nácani apavasanana máehicaráhanahi eta mayeherepianahi ema Moiséini, váhivare nucaecahivaca. Nupicauchahivare éna, nuvarairahi nucajimuyasamurechacahini éna apanava.

<sup>22</sup> Te nucainunahivarepuca ena vichamuriana nácani vuíchahahi náitamuturucahini náimatiéquenehahini eta véhisirahi ema Cristo, váhivare nucaecahivaca eta namaimatiéquenehairarichaha. Ichaperinehi eta nujapanuiravacahi. Nímicatacavacapa, nuvarairahi náimatiéquenehapaini yátupinahini eta véhiruhi. Namutu ena achaneana, nujapanuvacahi. Nutanucahi eta nucajimuyasihayare eta nasamureana apaesa nanerejicavapaini náehicahini ema Cristo, machaneranainahini éna.

<sup>23</sup> Núti nítouchahi tamutu eta júcana apaesa najacapa eta tapachinaquene máechajiriruva ema Viya, apaesa vácuticacapaini vámutuhini vijacapa eta viúrivayare maicha ema Viya.

<sup>24-25</sup> Écharichuhi éti, ena ticavijarurahiana pelota, tijaneacavanayarehi muraca, ichape eta ticaravahunumanayare apaesa túmeanainapa eta naratahairaya navereasihaya ena nánaranayarehi. Te vahi najaneacavahini, vahi tiverearecanaimahi. Ene ecaheyare éti, ichape eta étumechiravayare apaesa tauri eta ecaemataneasiraya ema Viáquenu, ejacapihainasarepa eta etuparahahi mayehe. Eta navereareruanahi ena ticavijarurahiana, vahi tánasimahi. Témítiequenehavanyarehi. Vahi táchitimahi eta vijacapaqueneyare me Viya. Éta, tájinapa ticamitiequenehaimahi.

<sup>26</sup> Nútipa eta nucaemataneasirahi ema Viáquenu, ichape eta nupamisiravahi, taicha eta nímatirahi eta mavarahaquene. Vahi némepururecavaimahi.

<sup>27</sup> Nucaratacavahi muraca. Vahi nusuapahini eta tajamurachaqueneanahi eta náquehe. Nupamicahi eta táemitisisirahnini eta tamauriqueneana, machu néjecapavapapucaini, tásicha váipapucaini nucujacapahini eta níuchihi. Ichape eta nutsirihacarevapapucaini, tavetijipa eta camurianairahi ena nímitureana tayehe eta véhisira ema Cristo.

*Ema Pablo maconsejachavaca vahi nacucuti ena ticasíñarajijana*

<sup>1</sup> Nuparapenaveana, nuvaraha némechaheyare eta náichararacavahi acane ena viáchucanaveanaini máumurivanaini ema Moiséni. Eta náehisirahi éma, tatarihi eta úcaji timícauchavacapahí namutu éna. Eta nánuesirahi eta mar ticaijarehi Títsiama Une, namutu náimahahi eta tájivahi eta nánuesiraya.

<sup>2</sup> Namutu ena nani tíjaracavanahi eta náitauchiraya eta náehisiraya ema Moisés, eta nánuesirahi eta ichape une mar, náehisirahi eta úcaji\*.

<sup>3</sup> Énerichuvare namutu ticuticacanahi eta nanisirahi eta tinicacare tásihaqueñenehi me Viya.

<sup>4</sup> Namutuhivare téraná etá une tásihaqueñenehi me Viya. Eta juca une náeresaparacahi éna, táchurehi tayehe eta mari, maicha ema Cristo. Émairahi ema tínapumirauchapahí éna, maitativacapahí eta napaisirapahí.

<sup>5</sup> Tamapurujihisera eta majaneasiravacahi ema Viya. Vahi émainahini éma náesenicahini. Tájinachucha vahi nacaurismurechahini éma. Eta tacahe, máicuñacavacapa ema Viya. Namutuyaréni tépenaracánahi tayehe eta mávapahí apaquehe. Tiúchucuhanahisera ena nachichanaveana.

<sup>6</sup> Ena viáchucanaveanaini, támicuñacahi eta najamurachirahi eta tamauriqueneana. Étara etá juca ticauyayacarehi eta viyehe, énémahihávinahini víti apanavare vácutihini éna etá najamurachirahi eta tamauriqueneana.

<sup>7</sup> Váhivare ecuicutipa éna etá nacasiñarajirana. Échava etá Sagrada Escritura ani tacahehi: “Ena achaneana náichapa etá napiestachirahi etá nasiñaraji. Ticaejacacanapa etá nanisiraya, téranapa. Téchepucanapa tírimaicanapa te tamirahu etá naciñarajiji” tacahepa etá Sagrada Escritura.

<sup>8</sup> Váhira énéna vicucahe víti. Váhivare vicuveha esu apana esena. Tacuija etá vituhusivaina. Machu vácutiriana éna etá nacaicuñairahi táichavenuehi etá náichirahi etá juca tamauriqueneana. Tépenaracanapa. 23,000 achane ena tépenanahi te jena étanaquenehi sache.

<sup>9</sup> Váhira vicuyururujica tayehe etá mapanerueruanahi ema Viáquenu. Ena nani tiyuruchavanahi, vaipa nasuapahini ema Viya. Tásicha, máicuñacavacapa éma, táchucavacapa etá quichare. Tépenaracanapa.

<sup>10</sup> Váhira tacucarasacava etá échajisirana mayehe ema Viya. Vahi ecucuti etá náejecapiravahi ena viáchucanaveanaini. Macapapajiruanahi ema ángele mavaneruhi ema Viya.

---

\* **10:2** Ema Pablo máimicuñacahi etá nánuesirahi etá ichapequene mar, tímicutijiricavahi etá nacaicachasihini te une, étapa te jara úcaji.

<sup>11</sup> Tacahehira eta juca náichavaquenevahi ena viáchucanaveanaini. Púticha tanasihi te ajureca téjacahi tamutu maicha ema Viya. Tamutu eta juca témechahavihi víti, ticatsimavacarehivre viyehe víti vinecapaequenehanahi eta juca tátavirainapa puiti juca sácheana vicaijuheyare.

<sup>12</sup> Eta tacahe, vahi ecuimijachahini tájina tiáquipaicaahena. Tatuparacahi ecauneuchavayare tayehe eta tamauriqueaneanahi.

<sup>13</sup> Puiti juca eta vítaresira, jararihi eta tavaraha témejecapavachahavi. Váhisera ecuaramihini, taicha eta tacahehi eta náichararacavahi namutu ena achaneana te juca apaquehe. Ecasiñavayaresera muraca mayehe ema Viya, taicha yátupi eta macasiñacarevahi. Éma, vaipa másapaimahi távayuchavahichaini eta tapamisirahe. Jéhesare éma, tíjaracahénapa eta etumevayare, ecamichirayare tamutu.

<sup>14</sup> Tásicha puiti, eti nuparapenaveana némunaruqueneana, érajicavayare nayehe ena ticasíñarajijiana.

<sup>15</sup> Éti ímatiequenehahi tamutu. Eta tacahe, numetacahe apaesa táuri eta epanerequenehairaya.

<sup>16</sup> Étaripa eta juca vérasahi vimutu viyujaraureasahi te vinicayare, étarichuhi táicutiarahi eta máitine máepusairuhi te crusu ema Viáquenu Jesucristo. Étaripa eta pan vinicqueneasa viyuvetuhejircacahi, étarichuhivare táicutiarahi eta maeche ema Viáquenu. Eta vérirahi étapa eta vinisirahi, táicutiarahi eta viúrujiasiracacahi te máijare, tásicha éma tiávahácahahivare vimutu viti viúrujiacanahi éma.

<sup>17</sup> Yátupi apanapanenejihavihi víti, visimutuvaqueneanahi. Émanarichuhisera ema viávaháruhi. Eta vinisirahi eta pan, étarichuhi te máijare eta viyujarauchirahi.

<sup>18</sup> Eta juca viúrujiasiracacahi, vicutivacaipa ena nujaneanana israelítana. Éna, tiúrujiacacanahi eta nanisiraya eta tacayujarahuquenehi me Viya eta tinicacare, navarairahi mávahácavacaini ema Viya táchavenehi eta nanisira.

<sup>19</sup> Tiuri puiti, vímatiequenehahi tájinachucha táimanéna eta vaca nayujaraurehi náijaracasiruhi eta nasiñaraji ena achaneana. Tacutirichu eta vaca mayujaraurehi. Taicha eta nasiñaraji, tájinachucha tasamacarevainahini.

<sup>20</sup> Nuvarahasera némechahe, eta nayeherepiana ena nani máimatirahanahi ema Viya, énachucha náijaracasichahi ena éreanana eta tinicacare. Vahi émainahini ema Viya náijaracasichahini. Eta tacahe, vahi nuvaraha ímicasiapava éti eta nayehe, machu náimivehahe nayehe ena éreanana.

<sup>21</sup> Vahi tauricahini apiquerehahavinahini: eta vélhisirahi ema Viáquenu, tásicha vélhicahivarepucaíni ena éreanana. Te enica-

yare eta tinicacare, te érayarepuca, tatupiruva eta ecurujisiracacaina mayehe ema Viya. Mácarichu émaina ecasiña.

<sup>22</sup> Machu ímyusemaca ema Viáquenu, taicha vahi árata-haimahi ecanara éma.

*Vímerecaya eta vémunaraivanaya nayehe ena vichamuriana*

<sup>23</sup> Yátupinéni víti véchinavahi, viyeherepipachuyarehi eta vinisiraya, váhisera tacuticacahini táetupicavahini mayehe ema Viya, váhivare tacuticacahini taimicatacavahihini eta vipauchiraya ema Viya.

<sup>24</sup> Tásiba, nuconsejachahe puiti: Vahi ácarichuimahi eti iúrichavayarehi; énerichuvare etanucayarehi eta táurichirvacayarehi ena apamuriana.

<sup>25</sup> Te enicayarepuca eta vaca tiásiba te mercado, vahi ecuavamirahu eta enisirayare, váhivare ecucamesa ecuecha te ticayujarahuhipuca eta vaca, apaesa tacuija tahapasamu-rechahe.

<sup>26</sup> Taicha ema Viáquenu, éma tépiyacahi eta apaquehe, étapa tamutu eta távapahianahi. Vituparahaichuhi eta vinisiraya máicha.

<sup>27</sup> Tíecapa te náichuhahepuca enica nácani vahi vichamurianainahini, te ísapavayarepuca tiámaheana, tiúrichucha enica eta náijararuheyare. Váhisera ecuyasereca te ticayujarahuhipuca eta tinicacare.

<sup>28-29</sup> Téhesera natiarihinapuca nácani tinecapaequenahanahi, te nametacahepuca eta nayujarauchirahi te tamirahu eta nasiñaraji, tiúripana vahi ecunica, apaesa tacuija tahapasamurecha eta mapanereru ema timetacahehi. Éti, émitisicapuca eta epicauchirahi eta nasiñarajiana. Émasera ema echamuri, vuíchaha máemitisicahini. Tásiba, nuvaraha tacuija tahapapicahini eta mapanereruana icha éti.

<sup>30</sup> Téhesera etiarihinapapuca ecahe: "Vahi núrica nucarinapapuca nútiti tituparacanuhi nujaneacavayare apaesapuca vaipa nucuemejecapavacha eta mapanereru ema apuna. Nútiti nuhasulupayachaparaca ema Viya eta nunisirayare" ecahepuca.

<sup>31</sup> Tiuri puiti, nuconsejachaheya: Tamutu eta enisirana étapa eta érirana, étapa eta ecaematanerana, tiúriyare tamutu eta íchirayare te mamirahu ema Viya énapa ena achaneana. Jéhesare, ena achaneana nacunachainapa ema Viya taicha eta náimairaheyarehi tiúrihi icha tamutu.

<sup>32</sup> Jéhesare, nájinapa émejecapavaruimahi, énaripa ena israelítana, énaripa ena apavasanana, navetijipa ena vichamurianahini, taicha vicuticacahi eta machichairahavihi ema Viya.

<sup>33</sup> Ácutinu nútiti eta nuyeherepihi. Ichapemurihi eta nuvarairahi nucurisamurechavaca namutu. Vahi nácarichuhini

núti nutanucahini eta nûrichiravayare. Énerichuva nutanucahivare eta nûrichiravacaya ena apamuriana, taicha nuvarahahi tauri eta náehisiraina ema Viya, náuchucuiraina éna apanavare.

## 11

<sup>1</sup> Núti puiti juca nítaresirahi, étapa nupanahi eta máitaresirahi ema Cristo. Nuvaraha éne ácahéni éti apanavare, epananuyare núti eta juca nítaresirahi.

*Esu esena témetserajicavaya nayehe ena suchamuriana te iúrujisiravana*

<sup>2</sup> Ichape eta nucunachahe eti nuparapenaveana, taicha eta emaemisisiranuhi. Ímiyanavahivare éhica eta ímitucasivanahi nuyehe.

<sup>3</sup> Nuvarahasera némechaheyare eta juca apanavare téchacarehi. Ema Tata Vicaiyaquene, éma machutirihahicha ema Cristo. Ema Cristo, émapa vichutirihahi vimutu viti ajairana. Ene nacahehi ena ajairana nacayenaqueneanapa, éna nachutirihanahivare ena esenana nayenana.

<sup>4</sup> Eta tacahe, viti ajairana vahi viúrihahini vicaepacashihi te viyujarauchavaya étaripa te vicametarairuyare. Taicha te vicaepacasihi, tímicutijiricavaipa vémepuruhi ema Cristo eta vichutirihairahi éma.

<sup>5</sup> Ésusera esu esena tatuparacahi ticaepacasiyarehi te tiyuja-rauchavayare, étaripa te ticametarairuyare. Taicha te vahi ticaepacasihi, tímicutijiricavaipa suémepuruhi ema suima eta suchutirihairahi éma. Te vahi ticaepacasihi ésu, tímicutijiri-cavaipa sucachucasiquenénahini ésu. Sucutihi ena túhusiana.

<sup>6</sup> Esu súcani esena vahi suávarahahini ticaepacasi, ésu tivaraha sucutiyare ema mácani ajaira. Tásicha, te suvarahapuca suácutihavi viti ajairana, tiúripanahi sucachucasipaini, suítahisivanepaini. Téhesera te tímitsiriacavayarehipuca eta suítahisiraya, tiúripanaichuhi sucaepacasihini, suácutihini ena supáraesenávana.

<sup>7-9</sup> Taicha te tépanavanainapa ena achaneana, ema máinapuiruhi ajaira vahi étainahini máuchusinenahini suyehe esu esena. Te mavahuana ema Viya máepiyasinehi ema ajaira. Ema Viya manacahi eta máimahi, mavasirichuhi eta máimahi ema Viya. Eta máurinavahi tásichaquenehi me Viya. Ésusera esu esena suínapuiruhi, súchurepa esu te máquehe ema ajaira, étaripa eta súrinavahi tásichaquenehi mayehe. Eta témeipyacahi esu esena, macompañerayare ema ajaira, mayenayarehi ésu. Vahi ésuina esu suémepiyacahini ema ajaira eta sucaimairaya. Eta tacahe, eta viyujarauchiravana,

viti ajairana tatuparacahavi vahi vicaepacasihini, taicha viti vicaquehehi ema Viya, vicuticacahi ema viáchucaíni Adán.

<sup>10</sup> Énasera ena esenana, tatuparacavacahi ticaepacasia-nayare eta nayujarauchiravana, nacutiyarehi ena ángeleana ticaepacamiranahi te natupihamirauchayare ema Viya, navarairahi náimereca eta napicauchirahi.

<sup>11</sup> Puítisera, eta juca vítaresirahi véhisirahi ema Viáquenu, ichapemurihi eta véjiasiraipa eta náitátiarahaviya ena esenana. Vítiripa ichapemurihivare eta náejiasirahavihi éna eta vitétiyahaviya viti ajairana.

<sup>12</sup> Esu esena, yátupihi eta súchusirahi ésu te maeche ema ajaira, puítisera viti ajairana étapa viúchusihahi te sujuhe esu esena ticachichahavi. Viásiquenehisera vimutu mayehe ema Viya.

<sup>13</sup> Nuvaraha epanerequenehaya yátupina eta juca. Németeaca nájina éti ímijachavahini tiúrihi esu súcani máepacasinávehi eta suyujarauchiravahi me Viya.

<sup>14</sup> Viti ajairana vechahi eta tatsirihacarévahí viújiji quihini eta vichutimaca.

<sup>15</sup> Suímiturevahisera esu súcani esena súrihahi tiújiji quiyarehi eta suchutimaca. Étarai tiúrinachahi ena esenana. Nájaraichuhi éna eta nacaepacasisraya taicha natuparahaichuhi éna.

<sup>16</sup> Te natarihinapuca nácani vahi navaraha nasama eta juca nímiturapihi, tacamuñuhi napanerechinavayare tativaina. Tájina vímatiyahini eta juca apayeherepi. Énaripa namutu ena vichamuriana, tájina apanaina nayeherepinahini.

*Ema Pablo macajachavaca eta namaetupisiravahi te tinicanayare eta tinicacare táicutiarahi eta máepeninahavihi ema Viáquenu*

<sup>17</sup> Tiuri puiti, numetacaheyare eta juca apana. Tájinapa ecunachacarevainahini nuyehe, taicha vaipa táetupicavahini eta iúrujisiravanahí eyujarauchiravana.

<sup>18</sup> Jucarihisera eta juca ticatihi nuyehe. Nusamairicahi te iúrujisiravana íchirana eta culto, vaipa tacuticacahini eta epanereruana, íputsimuriavavacapa. Németeaca núti cañarihihi eta íchavaquenévahí.

<sup>19</sup> Páurehesami eta íputsimuriavairacacahi. Étainapasera ecaecheraiyaya eti yátupiqueneanahi machaneranahí ema Viya, énapa ena vahi machaneranainahini.

<sup>20</sup> Eta juca táchahéhi vaipa táetupicavahini te ecurujicaca enisirayare eta tinicacare táicutiara eta máepeninahavihi ema Viáquenu te crusu. Váipasera émainahini tatupiruruchahini.

<sup>21</sup> Títecapa vaipa ecuchapacacahini. Nararihi ticainapupu-ricavanapa tinicana nayéhechirávavacapa. Tinahacavanapa téraná técahachávanapa. Nararihisera ena apamuriana tēcuhanariipaicha.

<sup>22</sup> Tájinapa táurivainahini eta juca íchaquenehi. Ticu- tipa tacuijaquenénahini epenainahini, étainapaini enisihahini érihahini. Tímicutijiricavaipa épuruvacahi ena apamuriana machaneranahi ema Viya. Ímicatsiriacavare nácani tájina- quenehi naviyavahini. Étupicavaipapuca eta juca ecahehi. Tájinaquenepasera ecunachacarevaina eta nuyehe.

*Eta táetupisiravahi eta vinisirahi eta tinicacare táemechahavihi eta máepeninahavihi ema Viáquenu te crusu*

(Mt 26.26-29; Mr 14.22-25; Lc 22.14-20)

<sup>23</sup> Núti tatupiruvahi eta nuaimitucasirahi mayehe ema Viáquenu. Tásicha, étarichuhivare eta nímiturapihi eyehe. Taicha ani tacahehi eta nímitusirahehi: Te jena yátiquenehi te ticaijararecasiyarepa ema Viáquenu Jesús, mavehapa te mavahuana eta pan.

<sup>24</sup> Te tamutupa eta mahasulupayachirahi ema Viya, mayuvetucapa eta pan. Tásicha, máichavacapa ena máimitureana: “Enica eta juca néche. Étivenehi nímijararecavahi eta népeniraya. Eta juca apajarahiyare te apaquehe, te étipava énicaca, éta témechaheyare nuyehe” macahepa.

<sup>25</sup> Te tamutupa eta nanisirahi, mavehavarepa te mavahuana eta máerirare, mahasulupayachavare ema Viya. Tásicha, máichavarepa ena máimitureana: “Era eta juca nítineama táepusairuvayare. Eta juca táchutarahí eta nucaejasirayare eta arairu matratune ema Tata Vicaiyaquene eta eyehe, majacapiraheyare eti ecasiñanuanayare, arairupa eta éhiruyare. Eta íchiraparacayare te énicaca, éta témechaheya eta nuyehe” macahepa ema Viáquenu.

<sup>26</sup> Puíticha tanasi eta juca. Apajarahiyarehi viyehe. Te vénicaca étapa eta vésichacaca, vémechacacahi ena vichamuriana eta máepeninahavihi ema Viáquenu. Tiámáinucava vicainajiruyare te mápechavavare máiteca.

*Tacamunu eta vipicauchirayarehi te vinicaya*

<sup>27</sup> Namutu nácani tinicanahi téranahi eta táchutarahí eta máepeninahavi ema Viáquenu, te vahi tétupicavahi eta napanereruanahi, vähivare napicauchahini, ticapecaturanaripa éna. Náemepururecaripa eta máitine étapa eta máepenirahi.

<sup>28</sup> Eta tacahe, nácani tinicanayare, tativanumayare tipane-reacavanayare te tájinahipuca náichiravainahini te mami-rahu ema Viya. Te tájinahini nasama, tísapavanayarehi eta nanisirayare, náerirayare.

<sup>29</sup> Taicha te vahi tipicauchacarehi eta náimairahi eta máeche ema Viáquenu eta nanisirayare, náerirayare, énjivaichucha tíchavanahí, tímicoñacavanaripahi eta nanisirahi.

<sup>30</sup> Étara tíchahehi eta juca táitusiava esimutupa eti ecaju-manahi, tájinapa tatumevainahini eta iáqueheana. Ena apamuriana tépenanapaipa táicha.

<sup>31</sup> Téhesera vítijivahi vétupirica eta vítaresirahi, ema Viáquenu vahi tícuñacahavimahi.

<sup>32</sup> Taicha mavarahahi vétupiricayarehi. Vaipa vicaicuñaimahi tayehe eta nacaicuñairayare ena apamuriana achaneana máimatirahanahí ema Viya.

<sup>33</sup> Eta tacahe, eti nuparapenaveana, te ecurujicacayare eta enisirayare, ecuchapacacayare apaesa ínuna eta enisirayare.

<sup>34</sup> Téhesera matiarihipuca mácani técuhasamureripaicha, tiúripana manicanuma te mapena, apaesa vaipa macuem-charecahe ema Viya taicha eta tamaetupisiravahi eta iúrujisiravahi. Étasera eta juca apamuriana téchacareanahí viyehe, nímaharinepa nútì. Nétupiricaya te níteca eta ara eyehe.

## 12

*Vimutu viti vítupajijiasiravapachuyare maicha ema Espíritu Santo*

<sup>1</sup> Nuparapenaveana, nuvaraha numetacaheyare eta apapa téchacareana, apaesa yátupina ácaicutiara. Jucarihi apanapanenejihí eta vítupajijiasiravanayare maicha ema Espíritu Santo.

<sup>2</sup> Écharichuhi éti, te vuíchaha émainahini éhica ema Viáquenu Jesucristo, ísapajiricavaichaha tipamicaheana éhica eta nasiñarajiana tájinaquenehi eta tajícaparaiváinahíni.

<sup>3</sup> Nuvaraha némechaheyare eta juca ímatirayare nayehe nácani vahi mávaháruanaimahi ema Espíritu Santo. Te naca-hepuca: “Másájitatajipucaini ema iáquenu éti”, te nacahepuca eta juca, ímativacaya éna. Taicha ena mávaháruanahí ema Espíritu Santo, nacarichu ena tatuparacahi náimatiyare eta aquenucairahi ema Jesús. Énasera ena vahi mávaháruanainahini ema Espíritu Santo vahi tatuparacahini nácahepucaíni: “Ema Jesús émara Viya Viáquenuhi”.

<sup>4</sup> Víti mávaháruanahí ema Espíritu Santo, apanapanenejihí eta vítupajijiasiravana máijararuuhavianahí. Émanarichuhisera éma.

<sup>5</sup> Énerichuvare apanapanenejihí eta vémataneana máijararuuanahí ema Viáquenu. Émanarichuhisera éma.

<sup>6</sup> Te tamutu eta vicaematacavaca ema Viya émarichuhi ema téchahavihi, tíjaracahavihi eta vitumevahi, viratahairaya vimutu.

<sup>7</sup> Énerichuvare ema Espíritu Santo, víjaracasipachuhi eta vítupajijiasiravayare máicha, vímitusihayarehi eta tasimutuqueneanahi namutu ena vichamuriana.

<sup>8</sup> Nararihi ena máimicatacavaca ema Espíritu Santo eta náitusiraya téchajicana, náimituresiraya. Ena apamuriana máijaracavacavare máejerareyare eta nacaicutiarairaya eta mapanereruana ema Viya. Émanarichuhisera ema Espíritu Santo tíjaracahi eta juca.

<sup>9</sup> Nararihivare ena máijararuanahi eta nacuchapirayare muraca eta nayasearuuanahi ema Viya táichavene eta nacasiñavairahi eta mayehe. Nararihivare ena máijararuanahi eta nacanarasirayare ena nacajumaqueneana.

<sup>10</sup> Nararihivare ena máijararuanahi eta nacuchusiraya eta tiáramicareana. Ena apamuriana náijaraichuvare eta ticametacasianaya mayehe ema Espíritu Santo eta máechajiriruvanahi ema Viya. Ena apamuriana máijaracavare eta náimatiasiravaneya ena achaneana nájahapuca nácani mávaháruuanahi ema Espíritu Santo, nájahavarepuca ena mávaháruuanahi ena éreanana. Ena apamuriana máijaracavare eta tiúririchuya eta náechajisiraya eta apaechajiriruvana. Ena apamuriana máijaracavare eta náitusirayare, nápepica náechajisiha eta apaechajiriruva, trépeteanayarehi.

<sup>11</sup> Tamutu eta juca máichaqueneanahi ema Espíritu Santo. Macarichuhi ema máitaparahahi máijaracavaca eta náitucaquenepachuyare namutu ena mavarahaqueneanahi máijaraca.

### *Émanarichuhi ema véhiruhi*

<sup>12</sup> Viti achaneana, apanapaneneji eta táijareana eta viáquehe. Tisimutuhi eta tátupajijiásiravana. Étanarichuhisera eta táuchusihahi te viáquehe. Ene tacuhehi eta véhisirahi ema Viáquenu Jesucristo. Vimutu viti véhicanahi éma, apanapanenejihavihi, visimutuhivare. Émanarichuhisera ema véhiruhi.

<sup>13</sup> Tacuhe, vahi étaparacaina te israelítahávipuca, te apava-sasajuecuhavihivarepuca, étaripa te máquenurehavhipuca. Téhesera te vicaicachasipa eta véhisirayare ema Viáquenu, étanarinepa eta vímahi maicha ema Espíritu Santo. Énerichuvare, eta mávahásirahaviripa, vicuticacaripa eta máecasar-chirahavihi eta viáchanevana.

<sup>14</sup> Yátupi eta viáquehe vahi étanainarichuhini eta táimahianahi, étapa eta tátupajijiasiravanahi.

15 Étaripa eta vívape, vahi távasihini eta vivahu, váhivare tacuticacahini eta títupajijiasiravanahi. Étarichuhisera táunavahi eta viáquehe.

16 Étaripa eta vichaca, vahi távasihini eta viúquiha. Étarichuhivaresera táunavahi eta viáquehe.

17 Váiparinehi táuricaimahi amairihainahini eta viáquehe tacauquihahini. Tásicha, tacuijapucaini viquiñainahini, tacuijapaini visamaquenénahini. Váhivare táuricaimahi amairihainahini eta viáquehe tacaquiñahini. Tásicha, tacuijapucaini visirinahini, tacuijapaini vijiurenahini.

18 Ema Viya manacahi eta táematanerepianayarepachuhi eta juca táunavanahi eta viáquehe. Taicha tacahehi eta mapanereruhi ema Viya te tépiyacahavinapa.

19 Vahi mávarahahini étanainarichuhini eta títupajijiasiravainahini eta viáquehe, amairiquihahavinahipucaini.

20 Yátupi tisimutuhi eta títupajijiasiravanahi eta viáquehe, étanarichuhisera eta távihahi.

21 Tamutu eta juca viáquehe ticamunu jiricacahi. Étaripa eta viúquiha tacamunuhi eta vivahuana. Étaripa eta vichuti tacamunu hivare eta vívapeana, vipaisihayare.

22 Étaripa eta tiávihanahi te amahe vijuhe, matumearaira haipahi eta vímairahi, étahisera tiápajucavahi ticamunucarepanahi.

23 Jucarihi eta viáquehe ticutimahi vahi múnainahí eta vímairahi. Étahisera tiápajucavapanahí vimuiriachahi. Jucarihivare eta viáquehe vaipa táuricahini vímerecahini. Tásicha, tiápajucavapanahí vepacucurehi, vicatiuchahivare.

24 Jucarihivare eta apána táunavahi eta viáquehe ticutimahi vaipa vicamunuhi vepacuchahini. Tímererecavahi nayehe ena achaneana. Tamutu eta juca máepiyaruhanahi ema Viya, máicuchahí eta támahianapachuhi, mavarahahi tacuticacahi eta vémunasiraya tamutu eta táunavanahi eta viáquehe.

25 Eta tacahe, te vicaematané, tamutu eta viáquehe tiyamericahi, tímicatajiricacahi. Ichapehi eta taejiasiracacahi. Vahi táiputsiacacahini.

26 Étaripa te tatiarihipuca eta táchavaquenevahí eta táunavahi eta viáquehe, támairiacahi ticati eta viáquehe. Téhesera tatiarihipuca eta táurisamurevahí taicha eta títupajijiasiravanahi, tamutuyarehi eta viáquehe tiúrisamure.

27 Ene ecahehi éti eta éhisirahi ema Viáquenu Jesucristo. Eta iúrujisiravahi mayehe, ecuticacahi eta táunavanahi eta máquehe.

28 Énerichuvare, ema Viya tituparacahavipachu eta viávacurepachuhi, mavairahi vijaneacaheyare eti

vichamuriana, machaneranahi. Tituparacahavihi viti apóstoleana vímahaheya, énapa ena profetana, énapa ena tímiturecarahianahi eta máechajiriruvana ema Viya, énapa ena tituruequenehanahi nacuchuca eta tiáramicareana, énapa ena ticanararecanahí ena nacajumaqueneana, énapa ena tímicatarahianahi nayehe ena nacamunuquenévana, énapa ena tiúrianahi eta nacavanairipirana, énapa ena tiúrichu eta náechajisiha eta apaechajiriruvana, énapa ena trépeteana titucanahi nápepica eta apaechajiriruvana.

<sup>29</sup> Vahi étanainarichuhini eta viávacureanahi. Vahi vámutuhini apóstolehavinahini, vahi vámutuhini profetahavinahini. Vahi vámutuhini vímiturecahini. Vahi vámutuhini vicuchuca eta tiáramicareana.

<sup>30</sup> Vahi vámutuhini vítupajijiacavahini vicanararecahini ena nacajumaqueneana. Vahi vámutuhini véchajicanahini te apaechajiriruvana. Váhivare vámutuhini trépetehavinahíni.

<sup>31</sup> Tiuri puiti, étipa tacamunu eyaseaca ema Viya máijaracahe eta ítupajijiásiravaina eta ticamunucarepana. Jéhesare, nuvaraha nímitucaheyare eta apana táurinaquenepana. Esamanuchaha.

## 13

### *Eta ticamunucarepanahi eta vémunaraivaya*

<sup>1</sup> Vítiripa, te tacuijahipucaini eta vémunaraivainahíni, vaipa tisuapacarémahi eta vimetarairuana. Vémunasiricavapa. Tayanapane vítucahipuca véchajica tamutu eta apaechajiriruvana, vácutipucaini eta náechajisira ena ángeleana.

<sup>2</sup> Te tacuijahipucaini eta vémunaraivainahíni, tájinapa vicunachacarémahi me Viya. Tayanapane vicametarairuhipucaini eta vimetasivanahi te anuma, támuthivarepuucaini vituruequeneháini, étaripa te máijahúchapucaini macayejecahini ema Viya eta ichapequene mari táichavenénahíni eti viyaseasirainahini eta vicasiñavairainahini eta mayehe.

<sup>3</sup> Tásiha, te tacuijahipucaini eta vémunaraivainahíni, tájina vijacapacarémahi me Viya táicha. Tayanapanevare vicajiricahipucaini tamutu eta vímahaqueneana te vipena, téhevare vísapapucaini nájuchaini eta viáquehe táichavenénahini eta namaurisirahi véhica ema Viáquenu.

<sup>4</sup> Téhesera yátupihi vémunarahi, vicayeheyarehi paciencia, vijapanurahiyare. Vahi vicapinarurecaimahi. Váhivare píncanillahavimahi. Váhivare vicasiñavavaicaimahi.

<sup>5</sup> Váhivare vicavapajaimahi jácani táfiñemahiqueneana. Váhivare viverejimirauchaimahi ena apamuriana

achaneana. Váhivare tijuricati visemaimahi. Váhivare viciatianarecaimahi.

<sup>6</sup> Váhivare tauricahini vicaecahirahihini te vímaha nácani ticaejeanahi. Viúrisamuresera te vímaha ena achaneana tiúrihi eta náitaresira.

<sup>7</sup> Te yátupihi vémunarahi, vicamichayare tamutu. Vahi énevanémahi visuapa eta echajirirucavana náepiyapiruanahi ena achaneana. Vicuchapayarehi eta táetupirisiravayare eta panererucana. Vahi víjahúchavaimahi vínjicava, vicuchapinávayare.

<sup>8</sup> Tájinapa titaimahi eta vémunaraivayare, vímiyanavainapa eta vítaresiraya. Eta jena sácheinayare, vímatiequeneha tamutu. Vaipa vicamunu eta vimetacasivana eta metarapianayare tásihaqueñeanayare me Viya. Tájinapa viátajivaimahi eta visamirayare eta apaechajiruvana. Váipavare tacajeraimahi eta visamirayare vímatiequenehavanénapa.

<sup>9</sup> Taicha puiti te juca vítaresirahi, apaesachicharichu eta vímatiequenehairahi, apaesachicharichu eta vítusirahi eta metarapiana tásihaqueñeanahí me Viya.

<sup>10</sup> Járabajapainapasera eta sácheinayare, vímatiequenehainapa yátupi eta mapanereruana ema Viya, eta vimáimatiequeneruanahi puiti. Vaipa vácamu ena tímitucahaviana.

<sup>11</sup> Nímicutichavahi nuti eti vía mape ruvahí. Vuíchaha vítucahini vipanerereca, vimapachichijiricavaichaha. Téhesera te ajairahavipa, te esenapuca, títsivachavapa eta vipanereruana. Vínjicapa eti vía mape ruvainihi.

<sup>12</sup> Ene vicahehi víti eti juca vítaresirahi. Puiti vuíchaha támputuhíni vímatiequenehahini. Ticutirichaha te vímaracaicha eti vicuna te jácani ichasi espejo, vahi tacaecherahini. Járabajapainapasera eta sácheinayare ticaecherainapa tamutu. Puiti, tacajera eti vicaicutiarairahi víti. Ema Viya vuíchaha tímitucahávihíni tamutu eti mapanereruana. Téhesera te apajarahinapa, tamutuya vicaicutiara máicha. Tacutirichu eti máimairahi puiti eti vipanereruana víti te amahé eti visamureana.

<sup>13</sup> Puiti, eti juca vicaijuheya, vímiyanava vámputu muracaina eti vicasinavairahi me Viya, vahivare vicuyacujihini eti vicuchapirapaipa eti viúrivainapaipa, tacuijavarení tahapapiricahini eti vémunaraivayare. Jéhesare, tiápajucavapanayarehi eti vémunaraiva. Étará ticunachacarepanahi me Viya.

## 14

*Tísapacare eti náechajisiraya eti apaechajiruvana*

<sup>1</sup> Tacahe, nuvaraha nuti yátupina eti émunaraivaina. Nuvarahahivare eyaseaca ema Espíritu Santo eti

ítupajijiasiravaina, étaripa eta ítusiraina ecametarairu eta máechajiriruva tásihaqueneanahi mayehe ema Viya.

<sup>2</sup> Tájina táichava, nácani téchajicana ema Viya eta apaechajiriruva. Éma masamahi. Vítipasera viti apamuri vaipa vácaicutiarahini eta náechajiriruvahi. Yátupihipuca máimitureanahi ema Espíritu Santo, váhisera náimereuchavahini eta máimiturapihi éma.

<sup>3</sup> Vahi táchuti nácani nacometarairuhi eta máechajiriruvana tásihaqueneanahi mayehe ema Viya, ticaicutiaracarehi tamutu eta nametarapianahi. Tatupiruvahi eta náimitusiravacahi ena apamuriana. Náetumechahi eta náchanevana eta nasuapiraina. Éta nacurisamurechihavacahi te jácani napanereresirana.

<sup>4</sup> Ema mácani téchajicahi ema Viya te apaechajiriruva, mayehechiravarichuhi te máchaneva eta macajurusiraya eta masuapajiraivaya. Émasera mácani ticametarairuhi eta máechajiriruvana tásihaqueneanahi mayehe ema Viya, macajurusinahi eta nasuapajiraivayarehi ena machamuriana.

<sup>5</sup> Nuvarahahinéni núti ámutuhini ítupajiji acavahini maicha ema Espíritu Santo, échajicahipucaini te apaechajiriruvana. Tiápajucavahisera eta nuvarairahi ecametarairuhini eta máechajiriruvana tásihaqueneanahi mayehe ema Viya, taicha étara tiúripanahi eta juca tayehe eta échajisirainahini te apaechajiriruvana. Tiúrihinéni échajicahini, tacamunu hisera natariihinahini nácani trépete, nametacavacasare paini ena apamuriana eta tacayemaqueneanahi apaesa tajurusihapaini eta nasuapajiraivainahini.

<sup>6</sup> Nútiripa, nuparapenaveana, nítecerauchahepuca iníjirapanahéhini, tásiha néchajicahipucaini te apaechajiriruva eta eyehe, éti vahi ácaicutiaraimahi, váipavare tímicatacrahémahi eta tajurusirainahini eta ecasiñavairahi me Viya. Tacamunuhi néchajicahini te échajiriruvaichu eta nímitusirahénahini, éti ecaicutiarasare paini tamutu eta numetacasivanahi me Viya, étapa eta máimerechaquenenuhi, étapapuca eta máimatiquenéhi, arairu eta viyehe.

<sup>7</sup> Eta juca tímicutijiricavahi te mapacharajihi eta masiviviri pi ema ticasivivihi. Vaipa tacaicutiaracarehini tájahapuca eta masiviviri pi. Émaripa ema violinista, váhivare ticaicutiaracarehini tájahapuca eta mapununerapi.

<sup>8</sup> Énerichu tacutihi mácani cùrnetér nayehe ena suntaruana, te váhivare ticaicutiaracarehini eta macachujairahi, váiparinehi tiúrjicavananaimahi ena suntaruana táichuhaqueneanahi, taicha vahi nácaicutiarahini.

9 Ene ecahehi éti, eta échajisirahi eta apaechajiruva, nájina nacaicutiarahini. Tímicutijiricavaipa nacuijahini nasamara-racahehini eta échajisirahi.

10 Yátupi tisimutuhi eta apaechajiruvanahi te juca apauehe. Nayehepachuhisera nácani ticaechajiruva-napahi.

11 Vítiripa te náechajicahavipuca ena extranjeroana te náechajiruva, váiparinehi vácaicutiaraimahi. Énaripa váhivare ticaicutiarahavianaimahi víti.

12 Tiuri puiti, vahi tacumapuruji eta evarairahi ejacapa eta ítupajijiasiravanaya máijararuheyarehi ema Espíritu Santo. Tiúripana eyasesereca eta ítusiraina ímitucavaca ena echamuriana apaesa tajurucapaipa eta nasuapajiraivaina éna apanava.

13 Tásicha, mácani téchajicahi te apaechajiruva, tacamuñuhi mayaseacahini ema Viya eta máitusirainahini mametacavaca eta tacayemaquenehi eta máechajiruvahí apaesa nacaicutiarasarepainti nácani tisamararacanahi.

14 Taicha eta viyujarasirahi víti te apaechajiruvana, te vítapiricapa eta viyujarasirahi, vahi tánasihini véchavahini eta vicayemaqueneanapahi, vémitisicavanehi tamutu.

15 Eta tacahe, tiúripanahi viyujaraca te véchajiruvaichu, tásichaqueneanahi te visamure. Te vijirayarepuca, tiúripanahivare te véchajiruvaichuvare, tásichaquenénahivare te visamure, vicaicutiarasarepaipa eta vicayemaqueneanapahi.

16 Téhesera apaechajiruvahí eta eyujarasirahi me Viya, yátupihi eta ecunachirahi éma. Énasera ena tisamararacaheanahi vahi náehicaimahi eta eyujarasirahi náimicatasirahéhini eta nayujarasirahi; taicha vahi nácaicutiarapahíni eta ecayemaqueneanapahi.

17 Tiúrihinéni eta eyujaracasahi eta ehasulupayachirahi ema Viya, énasera ena echamuriana vaipa táimicatacavahini eta eyujaracasahi.

18 Jéhevaresera núti, ichape eta nuhasulupayachirahi ema Viya taicha eta nítusirahi néchajica eta apaechajiruvana. Nucachuriacahehi emutu éti.

19 Étasera te nucametarairuyare te namuri ena vichamuriana, vahi nuvaraha nácuti ena tiúpiemana eta náechajisira te apaechajiruvana. Núti ániperichu te néchajica, tamutuhisera ticaicutiaracarehi nayehe ena nímitureanahi.

20 Nuprapenaveana, éti vaipa amaperuhénahini. Nuvaraha táuripaini eta epanereruana, eta íchirayare eta táuriqueneana. Nuvarahasera ácutihini ena amaperuana

vuíchaha náitucuhini naicha eta tamauriqueneana. Énenapaini ácahehini éti.

<sup>21</sup> Ema Viya, ani macahe eta te Sagrada Escritura: “Nutuparacayare ena apanaqueñeana achaneana apaechajiruana náimitureca eta nuvanairipiana eta nayehe ena achaneana távacuanahi eta avasare. Váhiquenesera nasuapaimahi” macahepa ema Viya.

<sup>22</sup> Tacahe, nácani tiyujaracanahi te apaechajiruvana, táchicuarahí eta máijarasiravacahi ema Viya náichavenehi ena máehicarahanarichaha ema Viáquenu. Jéhesare, tayuchusamurechavacayare eta nasamararasirahi. Énasera nácani ticametarairuanahi eta máechajiruvana ema Viya, tayuchusamurechavacayare ena téhicanahi ema Jesús, taicha ticaravahuanayare eta nasamararasirahi.

<sup>23</sup> Étasera te jácani iúrujisiravana, te eyujaracahipuca emutu te apaechajiruvana, tásicha, te natarihipuca nácani masuapajirairahanarichaha, ticaecahiheanayarehi éna, náimijachayarehi máurishihehi.

<sup>24</sup> Tiúripanayare eta ecametarairuiraya emutu eta máechajiruvana ema Viya, te échajiríruvaichu. Tásicha, te natarihipuca te iúrujisiravahi ena masuapajirairahanarichaha, ticatisamurevanayarehi taicha eta nasamararasiraya. Tipanerequenehavanainapa eta nacapecaturairahi.

<sup>25</sup> Tacahe, tímatiacavanainapa eta máimatirahi ema Viya tamutu eta napecaturana tayumururevanainihi. Tépuyucanainapa téneuchavavainapa mayehe ema Viya. Téchajisiaheanainapa: “Yátupiquenéyapa mávahácavacahi ema Viya ena nániana” nacahenapa.

### *Tacapicahu tamutu eta iúrujisiravana*

<sup>26</sup> Nuparapenaveana, áni tacahayare eta iúrujisiravanayare. Enerejicava eti íputsiacavayare eta ejirairaya. Énerichuvare tinerejicavayare mácani tíjaracavayare ema tímiturecayare. Énerichuvare te matiarihinapuca mácani mavarahahi ticametarairuyare eta mametacasivanahi me Viya, tájinachucha táichavahi. Tísapacarehivare eta échajisirayare te apaechajiruvana. Tacamunuhisera matiarihiyare ema trépeteyare. Tamutu eta júcana, étara ticajurucayare eta nasuapajiraivainapaipaicha ena echamuriana.

<sup>27</sup> Téhesera te natarihinapuca apinana, mapananapuca ena tivarahanahi téchajicana te apaechajiruva, tájinachucha táichava. Tísapacarechucha. Tévachajiricacanayarehisera te jácani náechajisirayare. Váhivare téjiacavaimahi ema nayeheyare trépete.

28 Téhesera nájinapuca naviyavahi ema nayeheyare trépete, tiúripanaichuhi vahi nacuechajica te apaechajiriruva te namuri ena echamuriana nárujiruvanahi. Tiúri, te navarahipuca náechajica ema Viya, tavarahahi nacarichuya-rechucha eta náechajisiraya.

29 Nácani ticametarairuanayare eta máechajiriruvana tásihaqueneanahi mayehe ema Viya, te apimanahipuca, mapananahipuca, tájinachucha táichavahi, tiúrichucha. Ticamunucarehisera ena nárujiruvanahi tisamararacanahi napaneréquenehayarehi tamutu eta nacayemaqueneanapahi ena ticametarairuanahi.

30 Téheserapuca matiarahihi mácani máejaruhi, ticametacasiquenehi me Viya; tásiha mavarahapuca macuchujipica eta mametacasivahi, tísapacarechucha eta máechajisiraina. Macuchapavayaresera máitapiricanuma mácani máinapuiruhi téchajica.

31 Emutu eti ecametacasiqueneanahi eta máechajiriruvana ema Viya, ítsivajircacayare. Émanainapachu mácani téchajicayare, apaesa ena ímitureanahi namutu nacaravahu, náetumechavahivare éna apanava.

32 Ena ticametarairurahiana tatuparacahi ticuchapavanayare. Vahi ticainapupuicavananaimahi.

33 Taicha ema Viya vahi mávaraha mapacharajinahini nácani ticametarairuanayare. Tásiha, éti ecaejarusinavayare apaesa ecurisamurecha ema Viya.

Táepiyarichuhi eta juca viyeherepi víti te viúrujisiravana.

34 Ena vichamuriana esenana timatinanayarehi. Vahi téchajicanaimahi. Nasamararasinavaichucha. Taicha suíjaraichuhi me Viya esu esena susamararasirayareichuhi.

35 Te tatiarihipuca eta suvarahaquenehi suecha esu esena, tiúripanahi te náitecapapa te napena suyaserecapa ema suima. Taicha vahi súrihahini esu esena sucayasesereruhini eta suvarahaquenehi suecha te namuri ena echamuriana.

36 ¿Tájaha tacayema eta ecasiñavavaisirahi? Vahi étinahini ínapucahini mametacahehini ema Viya eta máechajiriruva. Váhivare ácarichuhini éti tatuparacahini eta ejacapirahi.

37 Te natiahihipuca nácani tímijachavanaripa náimatiéqueneharipa tamutu eta máechajiriruva ema Viya, náimijachaipapuca mávahácavacaripa ema Espíritu Santo, tatuparacahi éna napánerechinávanumayare eta juca nájurehi eyehe, tásihaquenehi me Viáquenu, mavanairipichuhi éma.

38 Téhesera matiahihipuca mácani tépuruyare eta juca numetarapianahi, émaina máepurucare, vaipa tisamacaremahi eta eyehe.

<sup>39</sup> Tiuri, nuparapenaveana, epamicavachucha ecamenteairu eta máechajiriruva ema Viya. Tásiha, táuricachucha ísapa nácani téchajicanaparacahi te apaechajiriruva.

<sup>40</sup> Tacapicahuhisera tamutu eta iúrujisiravana. Ecaejarusinavapahi tamutu eta íchaqueneanayare te iúrujisiravanahí.

## 15

*Eta máechehusirahi ema Cristo te máecari*

<sup>1</sup> Nuparapenaveana, nuvaraha némechaheyare eta numetarairuhi eyehe eta máechajiriruvahí ema Viya tayehe eta viúchucuirayare. Étara táemesiavahí eta juca te esamainapa, etupiruvavanehi ejacapa. Puíticha tanasihi eta esuapirohi.

<sup>2</sup> Tásiha, puiti iúchucuhapaipa táichavenehi eta ímilyaniravahí esuapa eta numetarairuanahí eyehe. Németeaca yátupihi eta íjarasiravahí eta éhisiraya eta juca esamaquenehi.

<sup>3</sup> Écharichuhi eta nímiturapianahí eyehe, étarichuhivare tacahéhi eta nímitucasivahí. Eta júcana eta tisuapacarepanahí: Yátupirahí máepeninahaví ema Cristo táichavenehi eta vipecaturana, émairahí ema táchajisihaquenehi eta Sagrada Escritura.

<sup>4</sup> Eta náimairahí tépenapa éma, náecarapa. Téchepucahisera éma te mapanaquenepa sache, taicha tacahéhi eta tametarapihi eta Sagrada Escritura, timetacahavahí tamutu eta máichararacavayarehi éma.

<sup>5</sup> Tímerecavahí mayehe ema vichamuri Pedro, énerichuvare ena apamuriana apóstoleana.

<sup>6</sup> Tásiha pá tímerecavavarepa nayehe ena quinientoqueaneana eta nasimutuvanahí ena vichamuriana. Puíticha nararihichaha maverana ena tímahanahí. Nararihipasera ena tépenanapaipahi.

<sup>7</sup> Te táchajisihiruva, tímerecavavarepa mayehe ema Santiago. Tásiha, tiápechavavarepa tímerecava nayehe namutu ena apóstoleana.

<sup>8</sup> Tásiha, te táchajisihiruva eta júcana, tiápechavava tímerecava nuyehe, nútivapava nímahahi éma. Ichape eta táramicarevahí nuyehe eta máichuiranuhi núti néquenereruhi mayehenuyarehi apóstole, tacuti eta táchajisihiruva te tiújucayare esu esena.

<sup>9</sup> Ichapemurihinéni eta némpuruirávahí núti nayehe ena apamuriana apóstoleana. Váhivare táuricahini apóstolenuinahini eta nímairavahí, taicha ichapemurihi eta nupanajirisirávacahi ena náinapureanahí machaneranahí ema Viya.

10 Tíchuhuanuhisera ema Viya, taicha eta máemunasiranu-samihi. Apóstolenuhu puiti eta mayehe. Váhisera némeprurecavahini eta máemunasiranuhi. Jéhevare nútì, nucachuricahi ena apamuriana apóstoleana. Ichapemuripanahi eta nucaemataneasirahi éma. Váhisera níputsiaracavahini nútì. Eta máemunasiranuhi ema Viya, tímicatacanuhi eta nucaematanerahi. Tíjaracanuhivare eta nétumechiravahi.

11 Tájinaserá vahí étaparacaina eta juca nájahapuca nácani ena ticaematanepanahi. Étarichuhi eta vímiturapiana eyehe, eta esuapaquenehi puiti.

*Tayanapane vépenaipapuca, véchepucayarehisera*

12 Víti vímitucaheripa eta máechepeusirahi ema Cristo te máecari. Németeacasera etiarihichaha eti vuíchaha esuapahini taicha nusamairiricahi eta ecahehiji: “Vahi téchepucanaimahi ena náepenaqueneana”. ¿Tájahapuca tacayema vuíchahacaruhi tasuapacarehini eyehe?

13 Éti ejecapavahi eta epanereruana. Ímijachaipapuca vahí m áratahaimahi ema Viya mácaechepecavaca ena náepenaqueneana. Te vahí macuratahahini, váhivarepuucaini macucaechepecahini ema Cristo te máecari.

14 Tacahe, te vahí macuechepecahini ema Cristo, váipapucaini tacusuapacarehini eta vímiturapianahi eyehe, tamapurujipapucaini eta esuapirohi.

15 Te yátupinahini vahí tacusuapacarehini eyehe eta náechepeusirayare ena náepenaqueneana, váhivare tacusuapacarehini eta macaechepeusirahi ema Viya ema machicha Cristo. Tímicutijiricavaipahini vépiyahirahihini vivayuarerecaipapucaini víti te máijare ema Viya, taicha eta vímitusirahéhi eta macaechepeusirahi ema Viya ema Cristo.

16 Te yátupinapuca vahí tisuapacarehi eta náechepeusirayare ena náepenaqueneana, váipavarepuca tásuapacarehi eta máechepeusirahi ema Cristo.

17 Énerichuvare, te váhipuca tisuapacarehi eyehe eta máechepeusirahi ema Cristo, tásiha énerichuvare váipapuca tisuapacarehivare eta macaepahira ema Viáquenu eta epecaturana táichavenehi eta ecasiñairahi éma.

18 Te yátupinapuca vahí tisuapacarehi eta júcana, tímicutijiricavaipa témitiequeneanaripa ena náepenaqueneanahi téhicanahi ema Cristo te achaneanarichaha.

19 Te yátupinapuca vahí tisuapacarehi eyehe eta júcana, tamapurujiripa eta vijaneasiravahi eta vítaresirahi puiti juca táichavenehi eta vicuchapiravahi vivarairahi vicachane ema Cristo te apana vítaresira. Te vahí tacuitauchava eta juca, ichapeyare eta vicatisamurevairaya.

20 ¡Yátupiquenehisera eta máechepusirahi ema Cristo te máecari! Tacahe, éma ecutiararehi viyehe eta véchepusirayare víti apanavare te vépenaripapuca.

21 Taicha eta vépenira manaquipairuhi ema máinapuiruhi ajaira te juca apaquehe ticajare Adán. Ene macahehi ema Cristo, éma tinaquipaicahi eta máinapuisirahi tayehe eta véchepusiraya te vécari.

22 Táichavenehi eta mámariequenerahavihi ema Adán, émapa tiámahavihi tayehe eta vépenira. Puítisera táichavenehivare eta véhisirahi ema Cristo, émapa tiámahaviyare tayehe eta viápechiravayare vítareca.

23 Yátupiquenehi táejarurevahi eta juca. Tínapucahi ema Cristo téchepuca. Éma ecutiararehi viyehe. Tásicha, te mápechavavare máiteca te juca apaquehe, énainapa téchepucanayare ena náepenaqueneanaripa machaneranahi.

24-27 Tacahe, tiánehinapa eta táichecuaraquiyare eta tamauriqueneanahi te apaquehe. Taicha ema Cristo macamitiequenahainapa tamutu eta náitupajijiasiravanainihi ena táquenuruhanainihi eta tamauriqueneana. Ema Viya máijaracayarehi eta matumevayare macapaquechirayarehi namutu ena mánaranahi, étainapa mácatayanusihavacayare. Tacahe, macaepahainapa eta vépeniraini. Nájinainapa tépenaimahi. Taicha ema Cristo matuparahaichuhi mayehe ema Maiya eta aquenucairayarehi, émayarehi téchayarehi tamutu. Taicha ánipa macahehi ema Viya eta te Sagrada Escritura: “Éma nutuparacahi téchayarehi tamutu”.

28 Tájinasera vahi ticasíñavavaicaimahi ema Cristo eta émairaipa técha. Te máimahapa támutupa máetupirica, macuchapainapa eta vanairipianayarehi mayehe ema Maiya, taicha éma tijaracahi ema Machicha eta máitupajijiasirava. Tásicha, ema Cristo máimereuchainapa étairahi tásicha eta vanairipiana mayehe ema Maiya. Émarichuhi téchahi tamutu.

29 Tiuri puiti, nararihi ena apamuriana ticaicachasianahi náitsivahi ena náepenaqueneanaripa, namavarairahi náemitiequenehahini tayehe eta náechepusirayare. Ena nani, muracahi eta nasuapirohi eta yátupirahi eta náechepusirayare ena náepenaqueneanaini.

30 Nuvaraha ácutihavi víti eta vicasíñairavahi me Viya. Tayanapane ichape eta tacauyayacarevahi eta vépenirainihi puiti juca sácheana, vicamichahisera tamutu taicha vicuchapavahi eta macaechepusirahavi ema Cristo.

31 Nútiripa, nuparapenaveana, tamutuhi sácheana ticauyayacarehi eta népenirainahini. Ichape eta tapicacarevahi. Nucurisamurechavasera eta núrisamurevahi icha éti eta iúrivaipahi mayehe ema Viáquenu Jesucristo.

<sup>32</sup> Núti muracahi eta nusuapirahi eta véchepusiraya te vécariana. Te váhipuca nusuapahini, vahi nacucanaranuhini te juca avasare Efeso. (Náetaviuchahi eta navainarajivanahi, nacutihí éna eta sárareana táifiñehiqueneanahi.) Tájinachuchasera táimaequenénahini nuyehe eta nímiyanavayare eta nucatiuchira eta véhiruhi, te tacuija yátupinahini eta véchepusirayare te vépena. Nararihisera ena téjecapavanahi eta napanereruana. Tímijachavanahi vaipa téchepucanaimahi te náepenapa, taicha ani nacahehi: "Vicamapuravachucha puiti vera vinica, viúrisamureyare taicha achichupuca vépenacaru. Tásiba, titavainapa tamutu eta viyehe" nacahepa.

<sup>33</sup> Vahi tacucahe eta epanereruana éti. Taicha éna, vahi tétupicavahi eta nayeherepianahi. Ticauyayacarehi najarareca eta táurinavaipahi eta eyeherepiana.

<sup>34</sup> Tátupiruvapa táuri eta ítaresiraina éti. Váipavare ecuquicha eta pecatuana. Taicha nararihi ena vuíchaha náimatihini ema Viya te emuri. Titsiriacereripahi eta nacasiriquirahehi eti machaneraqueneanahi ema Viya.

### *Apanainapa eta vicaqueheyare eta véchepusirainapa*

<sup>35</sup> Németeaca núti nararihi vuíchaha nasuapahini. Navarahapuca tiyaserecanuanaya: "¿Tájahapuca náicharacavayare eta náechepusirayare ena náepenaqueneanaini? ¿Tájaimahinapuca eta nacaqueherayare?"

<sup>36</sup> Ena tiyaserecanuanaya, tájina náechaquenéna. Puiti, nuvaraha epanerequeneha. Nímicutiarachinaheyare tayehe eta evaraqui. Eta evaraqui váhira tímaruca te vahi vémuriachahini te apaquehe. Ene vicahe viti achaneana. Tínapuca eta vépenira étapa eta náecarairahavi. Tásiba, te taequenepa, vijacapaya eta viáqueheana arairuya.

<sup>37</sup> Te vévacapa eta jácani evaraqui, vémuriachapa te apaquehe. Te tinanapahi eta apaquehe, tímarucapa eta vévaraqui. Váhisera étainahíni tachavahini táuchucahini eta evaraquihi.

<sup>38</sup> Táquehepachuhi eta táimarusirahi eta evaraqui maicha ema Viya. Vahi apaimamajinahini eta táimaru.

<sup>39</sup> Étaripa eta veche viti achaneana, vahi távasimahihíni eta taeche eta sárare. Apanahi eta táimahi. Eta taeche eta cágure, apanahivare eta táimahi. Eta taeche eta jima, énerichuvare apanahivare eta táimahi.

<sup>40</sup> Énerichuvare, eta nacaquehera ena tiávihanahi te anuma, vahi távasihini eta vicaqueherahi viti viávihanahi te juca apaquehe. Apanahivare eta táurinavahi eta nacaqueherahi éna. Víti, apanahivare eta táurinavahi eta vicaqueherahi.

<sup>41</sup> Énerichuvare nuvaraha ácaicutiara eta tajaraivahi eta sache, apanahivare eta táimahi. Vahi távasihini eta tajaraivahi

eta caje. Étaripa eta tajaraiva eta jarairiquiana, apanahivare. Jararihivare eta tijarahipanavacahi tayehe eta apamuriana.

<sup>42</sup> Ene tacaheyare eta vicaquehera víti te véchepucapa. Apanayare eta táimahi. Te vépenapapuca, ticaecarasiyarehi eta viáquehe, timuyuyarepa eta véche, tépachaicavayarehi. Téchepucayarehisera eta apana viáqueheyare eta máepenac Cainapa.

<sup>43</sup> Ticaecarasiyarehi eta viáquehe, taicha ticajachacarepuhapa eta véche. Téchepucayarehisera eta tapachinaqueneyare viáqueheyare. Ticaecarasiyarehi eta viáquehe, matumerairahahi. Téchepucayarehisera eta viáquehe, tétavicainapa eta tatumevayare.

<sup>44</sup> Ticaecaracasiyarehi eta enaha viáquehe. Téchepucaya rehisera eta viáqueheyare apaimahinapa, tijarahinapa eta vicaqueheraya vicutinapa eta macaqueherahí ema Cristo eta máechepusiraipa. Tanasiyareichuhi eta táimahi eta viáquehe, espírituinapasera.

<sup>45-46</sup> Eta Sagrada Escritura, tacahehi eta táechajiriruvahi: "Ema Adán, máinapuiruhi ajairahi máchaneruhi ema Viya". Éma ticaejaparecahi eta vímarusirahi viti achaneana, vicutihi éma eta vijurusirahi eta vítaresirahi. Tásicha, te táequenénapa, ema apana ajaira ticaijare Cristo, émapa tíjaracahaviyare eta apanayare vítaresirayare, vicaquehenapa eta máquehe.

<sup>47</sup> Ema ajaira máinapuiruhi, te ticaepiyainapa, máteji eta máquehehi. Éma, távapahiyarehi eta apaquehe. Émasera ema apana ajaira, mávasarichuhi te anuma. Éma Viáquenuhi.

<sup>48-49</sup> Viti achaneana, énerichuhivare mátejihi eta viáquehe, taicha mámariequenehavihi ema máinapuiru ajaira. Eta vicaqueherahí tavasimahihi eta macaqueherahí éma. Tipachinayarehisera eta viáqueheyare, tacutiyare eta tapachinavahi eta macaqueherahí ema ticavasahi te anuma. Eta vicaqueherayare tavasimahiyare eta macaqueherahí ema ticavasahi te anuma, taicha machichahavihi víti.

<sup>50</sup> Nuvaraha níminecapáequenehahéyare, nuparape naveana, eta veche máteji vahi étaimahi tisiapayare te mávasa ema Viya. Tínapucayarehi ticaitsiva eta veche máteji, máepenacacayarehi éta.

<sup>51</sup> Énerichuvare nuvaraha níminecapáequenehahéyare eta juca tayumururevainihi: Vahi vámutuimahi vépenayare viti vitareruanáichaha. Ticaitsivayaresera eta viáquehe, víti énapa ena náepenaqueneanaripahi.

<sup>52</sup> Ticaema eta chujare, tíchuhahavinapa viti vélhicanahi ema Cristo. Tíjhúchavainapa eta táitsivachiravainapa eta viáquehe viti vitareruanáichaha, tacutiyarechucha

viúmatsisina. Tíjahúchavainavarepa téchepucanayare ena náepenaqueneana, máepenacacanainavarepa éna.

<sup>53</sup> Taicha tatuparalahi eta viáquehe ticaitsivayare, máepenacacainapa. Máihecuaracuirenapa eta vítaresiraya.

<sup>54</sup> Te tamutupa eta táitsivachiravayare eta viáquehe, titáuchavainavarepa eta tametarapianahi eta Sagrada Escritura: "Ema Viáquenu macaepahaipa eta vépeniraini".

<sup>55</sup> ¡Vaipa tápicacarehi viyehe eta vépenirapapuca, taicha vahi vánasimahi vépenal! ¡Yátupihi eta véchepusiraya te vécari!

<sup>56-57</sup> Eta tacahe, vihasulupayacha ema Viya, taicha éma ticatiuchahaviyare tayehe eta vépenira. Tájina vahi vémitiequenémahi, véchepucayarehisera máichavenehi ema Viáquenu Jesucristo. Tásicha, te jena sácheyare, vaipa vicapecaturaimahi. Váipavare vicaicuñaimahi táicha. Vaipa vépenaimahi.

<sup>58</sup> Táitusiava, eti némunaruqueneanahi nuparapenaveana, ímiyanavachucha eta étumechiravaina tayehe eta juca véhiruhi. Vahi tacuequequérecava eta epanereruana. Ecaemataneacaquenena yátupina ema Viáquenu, taicha écharichuhi éti vahi támapurujimahi eta ecaemataneasirahi éma.

## 16

### *Eta nanaquiruvanayare*

<sup>1</sup> Étasera eta juca enaquiquisiravayare eta nayeheyare ena vichamuriana ticavasanahi te Jerusalén, étarichu éhicayare eta nímitusiravacahi ena vichamuriana ticavasanahi te avasarena eta táchapevahi eta departamento eta Galacia.

<sup>2</sup> Puiti, nuvaraha nutuparacaheyare: Te lumincumuhuana, íputsisinavayarepahi, émanapachu eta manaquiruvanayare. Étisera échinavahi áyanahipuca jácani evachasanahi te semanamuuhuana. Iúnasinávapaipa apaesa tacuijapa étaparacaimahi te nítecapauchahepa.

<sup>3</sup> Te nítecapapa eta ara eyehe, évatacapa ena enerejiruanahi éti nayana te Jerusalén. Éna tiámanayare eta enaquiruvanahí éti. Níjaracayaresera eta nucartane eta náimeraquiyarepahi.

<sup>4</sup> Téheserapuca nútinapaichu návaraha nuyana apaesa nútinapaipa nácáchanenupahi ena vanairucanayare.

### *Ema Pablo mavarahapa tiyanaya máejirapanavacaya*

<sup>5</sup> Eta nítesirayare, nuvaraha nétavajicayarepahi te avasarena tayeheana provincia eta Macedonia, nítecapirainapa eta ara eyehe.

<sup>6</sup> Nuvaraha nunasipanayare eta eyehe. Tijuricati nucuchapa eta táetavisirahavina eta muracana técaticava. Tijuricati ímicatacanupahi éti apanava eta nímiyaniravayare nupaica.

<sup>7</sup> Taicha vahi návarahahini ánipinarichuhini eta néjirairaheyare. Nuvarahahi nunasipanayare. Émapasera téchanuyare ema Viáquenu.

<sup>8</sup> Nuvarahahivaresera nunasipananumayare ani te juca Efeso. Tiámainucava te táetavicavapa eta piesta ticaijare Pentecostés, nútijapainapa.

<sup>9</sup> Taicha nuvarahahí nucamapuravanumayare nucame tarairu taicha camurianahi ena tivarahanahi tisamararacanuana. Énerichuvaresera nararihivare camuriana ena viánaranahi.

<sup>10</sup> Nutuparacaheya, te máitecapauchahepa ema Timoteo, tauri eta ejacapiraina. Échapajirisinanuyare, taicha émarichuhi nucutiquenehi eta vicaematanearisrahi ema Viáquenu.

<sup>11</sup> Nutuparacahevare nacuija nacuepuru éma. Ímicatacasera eta mapaisirayare éma apaesa máitecapauchanúvane, émapaicha nucuchapahi nútí, énapa ena apamuriana nuchamuriana te juca.

<sup>12</sup> Nuvarahahivaréni mayanahini ema vichamuri Apolo eta ara eyehe, máehicavacahini ena tiámanahi eta nucartane. Váhisera másapavahini mayanahini puiti. Téhénarínevare apahenavare, mayanapa.

### *Táichecuaraqui eta macartane ema Pablo*

<sup>13</sup> Ecuneuchava yátupina. Túmehénahi tayehe eta juca véhiruhi. Yátupina eta éjairavavacáina. Vahi ecupica eta vicat jivairanahi.

<sup>14</sup> Eta émunaraivayare yátupina táuchurena te esamureana, étaina táemesiava tamutu jácani íchaqueneanayare.

<sup>15</sup> Puiti nuvaraha némechahe ena tínapucanahi téhicana ema Viáquenu te avasare Corinto, ema Estéfanos, esu mayena, énapa ena machichanaveana. Ichapemurihi eta náijarasiravahí eta náitátiarahí ena apamuriana vichamurianahi.

<sup>16</sup> Puiti nuvaraha epicauchavaca esuapavaca ena nani. Énerichuvare epicauchavare esuapa ena apamuriana tímica taca havianahi eta vicaematanearisrahi ema Viáquenu.

<sup>17</sup> Ichaperinehivare eta nûrisamurevahí puiti eta náitecapauchiranuhi ema Estéfanos, ema Fortunato, émapa ema Acaico. Tímicutijiricavainehi ámutuhini ítecapauchanuhini éti eta níma ravacahi ena nani mapanana tiásihanahi eta ara eyehe.

<sup>18</sup> Téchararahainehi eta nusamure, túmenuinevare eta nusamiravahi. Ene ecaheyare éti eta táetumechiravayare eta esamureana eta ímairainahi ena nani mapanaqueneana te nachavapa eta eyehe. Epicauchayare ena nani, émunasinavayare.

<sup>19-20</sup> Téchajicaheana namutu ena vichamuriana ticavasanahi tayehe eta avasareana te juca Asia. Téchajicahevare ema Aquila ésupa esu Priscila, énapa namutu ena tiúrujiricavanahite napena, taicha énarichuhí vicutiqueneanahivare eta véhisirahi ema Viáquenu. Te iúrujicavapa, ejupacacayare éti, táicutiarainahi eta émunajirisiracacahi.

<sup>21</sup> Nuti Pablo eta nímiamaresirahi eta néchajiriruva eta eyehe, nútijacaruvapa nájucha eta táchecuaraquihi eta nucartane.

<sup>22</sup> Nácanisera máesacharanahai ema Viáquenu náimainapainepa éna eta náicuñayare te machavapa. ¡Tata Viáquenu, pítecávanéni!

<sup>23</sup> Nuyaseuchaheparaca me Viáquenu Jesucristo táetaviuchahíni eta iúricacarevaya máicha.

<sup>24</sup> Nuvaraha ejacapaini ámutu eta némunasiráhevacahi máichavenehi ema Viáquenu Jesucristo. Tamutupa eta néchajiruvanahi eyehe.

## Eta macartane ema Apóstole Pablo nayehe ena machamuriana ticavasanahi te avasare Corinto, ticaijare **2 CORINTIOS**

<sup>1</sup> Nuti Pablo, mayehenuhi apóstole ema Jesucristo. Manerejirunuichuhi ema Tata Vicaiyaquene, mavarairahi nímitucaya ena achaneana eta máechajiriruvana éma. Puiti juca nucartane, nápechava nucajurehe núti, émapa ema viparape Timoteo. Véchajicahehi emutu eti machaneranahi ema Viya ecavasanahi tayehe eta avasare Corinto, énapa namutu ena vichamurianahi machaneranahivare ema Viya ticavasanahi te avasareana tayehe eta departamento Acaya.

<sup>2</sup> Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Náijaracahehini eta táurivaina eta epanereruana.

*Tétavicavahi eta macurisamurechirahavi ema Viya,  
macaepahairahi eta vicatajivairanahi*

<sup>3</sup> Núti nuvaraha nucunachaparaca ema Viya Macaiyaquene ema Viáquenu Jesucristo. Taicha éma, Vicaiyaquenehivare víti. Tétavicavahi eta majapanuirahavihi, tétavicavahivare eta macurisamurechirahavihi.

<sup>4</sup> Puiti éma, ticurisamurerecahavihi tayehe tamutu eta viátajivana, apaesa viratahahivaréni víti apanava vicurisamurechavacahivaréni nácani ticatajivanahivare, tacutihi eta macurisamurechirahavihi víti ema Viya.

<sup>5</sup> Tayanapanehipuca ichapepuca eta vicatajivairahi eta véhisirahi ema Cristo, táetaviuchaquenehivare eta táichapevahi eta macurisamurechirahavihi ema Espíritu Santo máijararu-havihi ema Cristo.

<sup>6</sup> Yátupiquene ichape eta vicatajivairahi táichavenehi eta vímitusirahehi eta máechajiriruvana ema Viya, vivarairahi vétumechaheyare apaesa iúchucuhayare. Émapasera ema Viya ticurisamurechahavipa tayehe eta vicamichirahi tamutu. Taicha éma, mavarahahi ímatiequenehayare eta macurisamurechirahe éti apanava te tamutu jácani ecatajivairana.

<sup>7</sup> Víti vicasiñavahi eyehe eta ecamichirayare taicha vicuticahí eta vicatajivairahi étapa eta macurisamurechirahavihi vimutu.

*Eta macatajivairana ema Pablo*

<sup>8</sup> Nuparapenaveana, nuvarahavare numetacahe eta víchararacavahi víti tayehe eta jena avasare departamento Asia. Ichapemurihi eta vicatajivairahi. Tiánehipa

véchurihayaréni eta vitumevanahi tayehe eta vicamichirana tamutu. Váipavare vémeteacahini viúchucuhahini tayehe eta vépenira.

<sup>9</sup> Vicutiripa nácani nacaparuasana te navahu ena aque-nucana. Ema Viya másapapa eta juca, mavaraírahi vaipa vitéjivaimahi vicasiñava. Mavarahapa yátupina eta vicasiñairayarehi eta mayehe, taicha éma, macarichu maratahahi máimichava ticaitarecahavi te vépenapapuca.

<sup>10</sup> Cape juca ticatiuchahaviripa tayehe eta vépeniraya-rehini. Puíticha ticatiuchahavirichaha. Tétavicavainequivare eta vicasiñavairahi eta mayehe, vahi tísapahavimahi vépená-vanehíni.

<sup>11</sup> Tacache, nuvaraha ímicatacrahavini eyujarauchahavini víti. Éti, németeaca camurihénapa éti eyujarauchahaviyare, camuriheyareva éti ehasulupayachainapa ema Viya eta máimiyánirava ticatiuchahavi.

*Ema Pablo vahi máitujicavavanehini mayanahini tayehe eta avasare Corinto*

<sup>12</sup> Visamavahisera víti eta vicunachiravahi eta tájinairahi víchiravainahini, váhivare apipiémahavinahini. Sánturuha-haviripa te nataracu namutu ena achaneana, evetijipa éti. Émahisera ema Viya tímicatacrahavihi táurihi eta vítaresirahi táchavenehi eta máemunasirahavihi. Vahi vitéjiriruvainahini eta vitéupajijiasiravanahí.

<sup>13</sup> Puiti, tacachehi eta nucartaneana. Vahi apipiemanui-nahini. Váhivare tácagerahini eta ímatiequenehairayare.

<sup>14</sup> Éti, ímatiequenehapaipa eta nímiturapiana. Puiti nu-varaha esamayareva eta nuconsejarapiana apaesa vácoticaca vivapinacaca vitéjicaca te jena sache te machavapa ema Viáquenu Jesucristo.

<sup>15-16</sup> Tacache puiti, eta táinapuiruhi nupanereruhi, nuvarahahi néjirapanahayarehini, nétavauchiraheyarehini te nuyanirayarehi tayehe eta departamento Macedonia. Tásicha, te nuchavayarepáini, nápechavavare néjirapanáhe, apiheyarehini eta nucurisamurechiraheyarehini. Tacache, te tamutuyarepa, ímicatacanupapucaíni éti eta nuyanirayarevare tayehe eta departamento Judea.

<sup>17</sup> Apanaripahisera eta nupanereruhi. Vuíchaha néjirapanahémahi. Váhivare nuvayuacahemahi eta nuvarairahi néjirapanahé. Nítouchayare núti. Vahi ímijachaimahi éti nucuti mácani achane te mapanerechahi, váhisera máitauchahini.

<sup>18</sup> Núti nucasiñavahi eta máimatiranuhi ema Viya. Vahi nuvayuacahemahi éti.

<sup>19</sup> Cape juca, te nímitucahepa núti, émapa ema Silvano, émapa ema Timoteo, vímimatichahehi ema Jesucristo,

Machichaquenehi ema Viya. Puiti ímatipa éma, tájinaquenehi mavayuaraivaina éma. Núti apanava, tájina nuvayuacahehini taicha manaranuhi nútì.

<sup>20</sup> Máichavenehi éma, títauchavahi tamutu eta mapanere-ruanahi ema Viya. Víti, te visamavaipa eta máijararuwanahí ema Viya, vijirauchahi éma. Vicahehi: ¡Amén! ¡Vicasíñava vímahainapa eta máitauchirainapa!

<sup>21-22</sup> Émaripa ema Viya témuracachahavihi eta viúrujiasirahi ema Cristo, víti étipa éti. Timarcachahaviripahivare éma, táicutiarahi eta machichairahavipa, taicha manerejiruhavihi. Tíjaracahaviripavare eta mávahásirahavihi ema Espíritu Santo te visamureana, máitametasirahaviparaca títauchavaya tamutu eta viúricacareyarehi.

<sup>23</sup> Núti, vuíchaha nítecaimahi eta ara eyehe, taicha némunacahehi, numavarairahi nucarameacahehini éti. Ema Viya tímatinuhi eta nutupiruvairahi.

<sup>24</sup> Vahi nuvaraha nupamicache eta esuapiranuinahini nápepejicahehini, taicha éti muracaheripahi eta esuapirohi eta juca véhiruhi. Nuvarahahisera nímicatacahe eta tápajusiravaina eta iúrisamurevayare éti.

## 2

<sup>1</sup> Eta tacache, vuíchaha nítecaimahi. Taicha vahi návara-hahini nápechavahini némecatajivachahahini te esamureana eta néjirairaheyare.

<sup>2</sup> Taicha te ecatisamureva nícha, tímaticaréipahi nájina ticuri-samurechanuimahi nútì. Ecarichuyarehi éti ecurisamure-chanuyarehi.

<sup>3</sup> Tacache, eta táitsivahi eta néjirapanairahe, nucajurehepa eta táinapuiru nucartane, nuvarairahi ésamiricavayare apaesa vaipa nucatisamurevaimahi icha éti. Nuvarahahisera núrisamurehini ícha. Tacache, németeaca étiripa iúrisamurehivaréni ámutu eta nuyehe.

<sup>4</sup> Jéhevare, te jena sache, te nucajurehepa eta nucartane, ichapemurihi eta nupanerereresirahi, nucatisamurevahivare. Niyahacavahi ichape. Váhisera étaparacainahini nuvaraha némecatajivachahahini te esamureana. Núti nuvarahahí ímatihini eta táichapevahi eta némunasirahehi.

*Ema Pablo máijaracahi eta maconsejarapi eta naperdonachirayarehi ema téjecapavahi*

<sup>5-6</sup> Tiuri puiti, ema maca téjecapavahi máichahi eta pecatu, tétavicavahi eta ecatisamurevahí máicha. Núti apanavare nucatisamurevahivare. Váhisera taurica vivayuchava eta vémecharesira éma. Puiti, tarataharipa eta ecuchusirahi te emuri éti.

<sup>7</sup> Puiti táuricapa eperdonachayare eta máichavaquenevahi. Ecurisamurechainapa éma apaesa vahi macuvayuchava eta macatisamurevahi, máinajicavapuca.

<sup>8</sup> Nuvaraha puiti iápechavahini ímereca eta émunasirasamihi éma. Ejacapavare te emuri.

<sup>9</sup> Eta tacahe, nucajurehi cape juca, nuvarairahivare nucaicutiarahe te esuapayarepuca eta nuvanairipianahi.

<sup>10</sup> Núti nuperdonacharipa ema maca achane te máijare ema Cristo. Táuricapa eperdonachayareva, ecutiranuyare eta nuperdonachirahi.

<sup>11</sup> Taicha te váhipuca viperdonachacacahi, tíñehicarehi macamapurava ema Satanás, taicha tímaticarehi eta mavarairahi tímiáquipaicaahaviyare.

### *Vaipa máitucacaralahahini ema Pablo*

<sup>12-13</sup> Núti, te nítecapapa eta te avasare Troas, nímijachahi nuchimapahini ema nuparape Tito. Tétavicava eta néñamiravahi, nuvarairahi néchayarehi tájahapuca eta íchararacavahi éti. Yátupihinéni natarihihi ena camuriqueneana ena tivarahanahi tisamana eta nímituresirahi eta máimiturapiana ema Jesucristo. Étasera eta néñamiravahi eta eyehe émapa ema Tito, nucametavavarepa nayehe ena vichamuriana. Nuyanavarepa tayehe eta juca departamento Macedonia, nutanusirayare éma.

### *Ema Viya, tétavicavahi eta majaneasiravacahi ena mavaranahí*

<sup>14</sup> Tásicha, tétavicavahi eta nûrisamurevahi eta nuchimapirahi ema Tito eta te juca. Puiti, ichape eta nuhasulupayachirahi ema Viya eta majaneasirahaviparaca, tíjaracahavihivare eta máitupajijiasirava eta viratahairahi vicanara tamutu, táichavenehi eta mávahásirahavíhi ema Jesucristo. Tituparacahavivare vicametarairuyarehi eta máimiturapiana, mavarairahi tiúriyarehi eta nasamiraya namutu ena achaneana tacuti eta najiusira jácani táijiyequeneana.

<sup>15-16</sup> Taicha eta vicametarairuirahi tímicutijiricavahi eta táijiyeva eta incienso, eta máijarasirahi ema Cristo te mamarahu ema Maiya. Tacapusisiacahi namutu ena tisamahaviana. Natarihi ena masuapajirairahana, náemitiaruanayare taicha namavarairahi nasuapahini. Tijechehi eta najiusira tacutihi eta máquehe mácani máepenaquenehi. Natarihivare ena tisuapanapahi náuchucureanayarehi; ticutirinehi najiucahini eta táijiyequene. ¡Tétavicavahi eta néñamiravahi eta vicatuparahairahi!

<sup>17</sup> Viratahasera vítaucha eta vituparahahi. Taicha víti, eta vicametarairuira, tájina vahi vicavacharapi eta máechajirruva ema Viya, vétupiripicapahipucaini, vivarairainahini tajamurachacarehini, tacuteihini eta náichira ena apamuriana tímijachavanahí yátupiqueneana mavaneruana ema Viya. Vítisera yátupiquenehavihi mavanarahavihi ema Viya; vitupiruvahi eta vicametarairuira eta máimiturapi ema Cristo.

### 3

*Viti vicametarairurahiana eta téqueneha matratune ema Viya*

<sup>1</sup> Vahi nuvaraha ímijachahavi eta vicunachiravainahini puiti. Váhivare vácutihini ena nácani apamuriana tímiturahianahíji, tipairiricana tiámanahi eta carta táchajisihahi eta nacunachacarevahi. Tájinavare vímatiyahini viyaseacahehini víti eta carta vímeraquianapahini táchajisihahini eta ecunachirahavinahini.

<sup>2-3</sup> Étisera, tájina véñamiravaimahi eyehe. Taicha tímaticarehi te avasareana eta táurivahi eta ítaresirana éti, táichavenehi eta vinacasamurechirahehi eta máechajirruva ema Viya. Eta juca tímereuchahavi víti eta yátupirahi mavanarahavianahí ema Viya. Éti, ecutihi eta carta vímeraquianapahí. Émaquene ema Cristo, ema iájuchahi, taicha tíjaracahehi ema Espíritu Santo máitsivachaheyarehi eta ítaresirana, táuriyarehi eta esamureana. Arairuripa eta ítaresirahi. Puiti juca eta ítaresirahi, tájinapa étaparacaina esuapahini eta vanairipiana tacajuquenehi acane te márime tabla.

<sup>4</sup> Eta tacahe, tájina vahi néñamavaimahi tayehe eta apóstolenuirahi. Nétumechava ichape, taicha nusiñavahi eta manerejirunuirahi ema Cristo, máijarasiranuhivare ema Viya eta maitupajijiasiravana.

<sup>5</sup> Taicha víti vahi vítijivainahini víjaracava eta vítupajijasirava. Émaquenehi ema Viya tíjaracahavihi eta vitumevanahí eta vicaematanerasirahi éma.

<sup>6</sup> Émaquenehi tituparacahavi vicametarairuyarehi eta arairu matratune. Vahi étainahini nupamicaheyare eta esuapirayarehi eta vanairipiana. Taicha eta juca arairu matratune ema Viya, tíjaracahehi emutu ema Espíritu Santo, máitsivachinaheyare eta ítaresirana, arairuinapa. Étasera eta vanairipi tacarichu taimivanerecahi eta náepeniraya ena téjecapavana.

<sup>7</sup> Acane, te jena sache te tiúcupaicapa ema Moisés te cerro, mámapahi eta vanairipiana tacajuquenehi te márime tabla. Eta mamira, tétavicavahi eta tarapepesirapahi táichavenehi

eta macachanerahi ema Viya. Ena achaneana, vaipa nárata-hahini náimaranaraca eta mamira. Ichapehinéni eta tapicaucha-carevahi eta vanairipiana taicha téavicavahi eta tarapepesirapahi eta mamira ema tiámapahi. Étasera eta mayerevapa, timutserahavapaipahi témitiaca eta tarapepesirahahi. Eta vanairipiana, tacarichuhi táimicacapacahi nácani téjecapavanahi.

<sup>8</sup> Étasera eta arairu matratune ema Viya, eta nucametarairuquenehi puiti, téavicavahi eta tápajusiravahi eta tasuapacarevahi taicha tiámahavihi eta mávahásirahavihi ema Espíritu Santo.

<sup>9</sup> Yátupihi eta tasuapacarevahi eta vanairipiana, tiápajucavahisera eta tasuapacarevapanahí etá máichuarapi ema Viya, vijacapacarehi mayehe táichavenehi etá.

<sup>10</sup> Yátupi tirapepecahi eta mamira ema tiámapahi eta vanairipiana, váhisera étaparacainahini táurichahavihini. Jéhevarequenehi puiti, téavicavahi eta viúrivahi maicha ema Espíritu Santo.

<sup>11</sup> Eta tarapepesirahahi eta mamira ema Moisés, timutserahavapaipahi témitiaca. Eta juca táicutiarahi eta ánipirichuhi eta tasuapacarevayarehi eta mavanairipiana. Étasera eta juca máichuhairahavi ema Viya, tiápajucavahi eta tasuapacarevahi taicha máichecuaraqureyarehi eta viúrivaya táicha.

<sup>12</sup> Étavenehi eta vicasiñavairahi vímahayare eta juca sache vicuchapaquenehi, viti matupararuana vétumechavahi eta vicametarairuirana.

<sup>13</sup> Váhi vácutihini ema víyarahaini Moisés, tépacamirahavahi te páñome, tiúriyarepa eta náimarasirayarehi ena machamuriana. Váipasare nanecapahini te timutserahavapa eta táemahairapahi eta tarapepesirahahi eta mamira, táicutiarahi eta táepahairaya eta tapamisirahavini eta vanairipiana eta vítauchirayarehi.

<sup>14-15</sup> Puíticha ena nujaneanana israelítana vahi nácaicutiarahini eta juca. Tacalhe, te náechejicuha eta ichasiquene matratune ema Viya tacajuquenehi eta te libro májurehi ema Moisés, vuíchaha nácaicutiarahini. Tímicutijiricaváichucha táepacuchahi eta máepacamirahahi ema Moisés. Ticajeraichucha eta nacaicutiarairayarehi.

<sup>16</sup> Mácanisera achane, esenapuca, tíjaracavapa eta máehisirayarehi ema Viáquenu, ichapenapa eta macaicutiarairayare. Tájinapa táepacaquiñahaimahi.

<sup>17</sup> Jéhesare, ema Viáquenu tíjaracahavisarepa ema Espíritu Santo. Tásicha, vaipa vipicacaracavahini eta vipauchiraya éma. Yátupina eta vivapinairavahi maicha ema Espíritu Santo.

<sup>18</sup> Tacalhe, vimutu viti véhicanahi ema Viáquenu vicutiripa eta espejo eta tarapepesirahahi eta tajaraivahi eta sache.

Víti, yátupihi vímerecahi eta máurivahi ema Viáquenu. Vaipa vicaepacamirahini. Eta tacahe, víti puiti tiápajucavainapaipa eta vicutirayare ema Viáquenu taicha tiápajucavahi eta majaraivahi te visamureana. Étavenehivare eta mávahásirahavihi ema Espíritu Santo máijararuhi ema Viáquenu.

## 4

<sup>1</sup> Eta tacahe, váhiqene viyacujiequenehavaimahi eta vicametarairuira, taicha ema Viya tímechahavihi eta máemunaraiva eta matuparasirahavihi eta juca vicaemataneasirayarehi éma.

<sup>2</sup> Víti, tájina vímatiyahini viyumurujiricahini eta víchaqueneana. Váhivare víchahini eta titsirihacareana. Váhivare viútserurupinahipucaini vihapapicahipucaini eta máimiturapiana ema Viya, taicha vivaraha vicurisamurechaya éma. Tamutuhi véchajisihahi eta yátupiqueneana. Jéhesare, vivaraha nacaicutiarahini ena achaneana eta vímiturapianahi tásihaqueneanahi me Viya.

<sup>3-4</sup> Nararihisamisera nácani vahi nacaicutiarahini eta vímiturapiana, taicha ema Váinaraji, tacaiyaquenehi eta juca apaquehe, éma tépacauquínahavacahi éna. Taicha vahi mávarahahini náimatiqusquenehahini eta máimiturapiana ema Jesucristo, téavicavahi eta tajarahiquenérahi taicha émaquenehi macunaquenehi ema Viya. Táitusiava éna, vaipa nácaicutiarahini eta vímiturapi. Náemitiaruanayarehi tayehe eta ecuñaraqui táicha.

<sup>5</sup> Te vicametarairu víti, vahi vítinahini vicunachavahini, vivarahahini éhicahavi. Vivarahahisera esuapahini ema Jesucristo, ecaquenuyarehivare éma. Víti vanairucovahichucha eta eyehe, taicha vicaemataneacahi ema Jesús.

<sup>6</sup> Ema Viya, te máepiyacainapa eta juca apaquehe, macavanairipipa tatiarihiyarehi eta tijarahi, témitiacayarepa eta timapicuquenénihi. Ene macahehi eta viyehe. Tímimaticahávihi eta majaraiva ema Machicha. Téavicavahi eta tajaraivahi te visamureana. Éma, tímimaticahavipaipahi eta máetaviuchaquenehi máurivahi ema Viya.

*Puiti eta vítaresirahi, vímerecavaya yátupihi eta vicasiñairahi eta macatiuchirahavipaipa ema Viya*

<sup>7</sup> Eta juca véhiruhi vímiturapianahi, téavicavahi eta tacunachacarevahí. Vahi vítinahini vicunachacarehini. Taicha viti páureanasami, vicutichucha eta muñeca náipune. Émasera ema Viya máimerecahi eta máitupajijiasiravahi, máijarasirapa eta tatumevarehi eta viáquehe. Váhisera vítijivainahini.

<sup>8</sup> Táichavenehi eta vicametarairuira, tatiarihihi jácani víchavaquenévahí; ticatiuchahavihisera ema Viya apaesa

viúchucuhaparaca. Ichapevare jácani eta táimipanereresirahavihi; vicasiñavahisera eta majaneasirahavihi ema Viya.

<sup>9</sup> Tipanajiricahavianahi ena viánarana, váhisera tijunijicacahavimahi ema Viya eta majaneasirahavihi. Tayanapane nachururupaicahavihini, émasera ema Viya vahi másapaimahi ticapacahaviana.

<sup>10-11</sup> Tamutu te jácani vicaijuheanapahi, natiarihi ena navaraha ticapacahaviana táichavenehi eta véhisirahi ema Jesús. Tamutu sácheana viámarairicapahi eta vépenira, vicutihi ema Jesús eta napanereuchirahi éma. Émarichuhisera ema Jesús máecheonpurequeneхи. Éma máimerecahi eta maitupajijiasirava eta macuchucuirahavipaipahi tayehe tamutu eta víchararacavaqueneanahi.

<sup>12</sup> Tayanapane víti viámarairicahi eta vépenira táichavenehi eta vímituresirahi, táitsivahisera ejacapahi éti eta tamaichecuaraqureyarehi eta ítaresira táichavenehi eta esuapirahavihi.

<sup>13</sup> Ema víyarahaini David, ani macahehi eta máechajirruvana eta te Salmo: “Núti nucasiñavahi mayehe ema Viya, tásicha vahi nupicacaracavahini eta néchajisirayare mayehe” macahepa. Énerichuhi vicuhehi víti puiti. Vicasiñavahi mayehe eta macatiuchirahaviyare. Táitusiava, vahi vipicacaracavaimahi eta vímituresiraya.

<sup>14</sup> Taicha véchahi eta macaechepeusirahaviyarehi ema Viya, vicutiyarehi eta macaechepeusirahi ema Machicha Jesús te máecari. Tásicha, étamurihavinapa, éti apanavare, eta vímiseravayare te mamirahu éma.

<sup>15</sup> Tamutu eta juca víchavaquenevanahi, támahi eta iúrvayarehi. Vicamichahi tamutu, taicha vivarahahi eti esimutuqueneanahi ejacapahini eta iúrvayare máijararuhehi ema Viya, apaesá ámutuhivaréni eti esimutuqueneanahi ehasulupayachahini éma, ecunachahivaréni.

<sup>16</sup> Eta tacahe, váiparinehi vicainajiruvaimahi. Tayanapaneputa tivitaji eta viáquehe, étasera eta viáchaneva tétabica-vaichucha eta tatumeva tamutu sácheana.

<sup>17</sup> Taicha eta viátajivanahi puiti juca vítaresiraichaha, vahi táunacacare. Técaticavánachucha, tiánucuhávanepa. Énerichuvare, jararihi eta táitsivahi, taicha vijacapahi eta táetaviuchiravaya eta viúricacarevayare. Puiti tájina tacutimahi eta viúricacarevaya, taicha máichecuarquirénapa éta.

<sup>18</sup> Eta tacahe, vahi vipicacaracavaimahi eta viátajivanahi, taicha vahi táunacacarehini. Vicasiñavahisera mayehe ema Viya eta máimisiapirahaviya eta te mávasa anuma. Tásicha, máichecuarquirénapa eta viúricacarevaya eta viávihairaya tayehe.

## 5

<sup>1</sup> Vimutuhi vímati te náquipaicapuca eta viáquehe, tépenayarehi éta. Taicha éta, vahi muracainahini. Tacutihi te viáquipaica eta peti. Máejerarehi vicha taicha vahi muracainahini. Jararihisera eta viáqueheyarehi te anuma vícuchihi mayehe ema Viya. Éta, nájinapa tiratahaimahi tiáquipaica taicha máepiyaruhi éma.

<sup>2</sup> Puiti, tétavicavahi eta tacatajivairahi eta viáquehe. Tamutuhi tasama. Eta tacahe, vivarahainehi táijahúchavahini tacaitsivahini eta viáqueheyare te anuma.

<sup>3</sup> Taicha vicamunurinehi eta arairu viáquehe, apaesa vahi vitsirihaimahi eta vicachanerayare ema Viáquenu taicha vicutiyare éma.

<sup>4</sup> Puiti eta juca vítaresiraichaha, tamutuhi tasama eta viáquehe. Ichapemurihi eta táimipanereresirahavihi. Váhisera étainahini eta vivarairainahini vépenávane, étasera vivarairahi tacaitsivahini eta viáquehe arairuinahini.

<sup>5</sup> Tacahe, ema Viya tamutuhi máicucha eta táichararacavayare te apuna vítaresira. Puiti tíjaracahavihivare ema Espíritu Santo. Émapa titametacahaviparaca eta vijacapirayare eta vícuchianahi.

<sup>6-7</sup> Tacahe, núti vahi nupicahini eta népenirayarepuca, taicha ichape eta nucasiñavairahi mayehe ema Viya. Tájina vahi néñamavaimahi mayehe eta máijarasiranuinapa eta arairu náquehe, tayanapane vuíchaha nímahahini. Eta táimiyaniravaya eta nítaresirahi, nuyerehi eta nícuhihi náqueheyare.

<sup>8</sup> Nuvarahainehisera táijahúchavahini tacaitsivahini eta juca náquehe, nuyanasarepaini nucachanehini ema Viáquenu.

<sup>9</sup> Eta tacahe, vivaraha ichapemurihi eta vicurisamurechirahi eta vicaemataneasira ema Viáquenu puiti juca vítaresiraichaha. Tásicha éma, tiúrisamureyare eta viyehe te vímerecavainapa te mamirahu.

<sup>10</sup> Taicha vimutu vímerecavayare te mamirahu ema Cristo te mávacureyare. Ánaqui tímaticareyare tamutu eta víchaqueneanapachuhi puiti juca vítaresiraichaha, te víchahipuca eta táuriqueneana, te étahipuca eta tamauriqueneana. Te víchahipuca eta táuriqueneana, vijacapainapa eta vícuchianapahi.

*Ema Viya mavaraha vipauchayarehi éma, macaepahairaya eta vipicacarasiravahi eta vícuñayare*

<sup>11</sup> Nútisera, ichape eta nupicauchirahi ema Viya. Eta tacahe, nímiyanava numetacavacahi ena achaneana eta mayehe, taicha nuvarahahi námutuhini napicauchahivaréni éma. Émasera, tétavicavahi eta máimatiranuhi táurivahi

eta nupanereruana eta nucaemataneasirahi éma. Puiti nuvaraha échahivaréni éti apanava eta taurivahi eta nupanereruana.

<sup>12</sup> Tacahe, eta juca néchajisihahi, vahi nútinahini nucunachavahini. Nuvarahahisera nucunachacarehini eta eyehe, apaesa áratahahini ecamatinaca ena tímijachavanahí náimatiéqueneha. Váhisera yátupinahini táuchurequenénahini te nasamureana.

<sup>13</sup> Éna, tépiyaequenehanuanahi, máurishinuhíji náicha, taicha ichape eta nuvapinairavahi eta nucaemataneasirahi ema Viya. Tiúrihisera eta nuchuti. Nuvarahaparaca ichapenaini eta iúricacarevaina éti.

<sup>14-15</sup> Núti nímatihi eta táetaviuchirahi eta máemunasirahavihi ema Cristo, taicha máepeninahavihi te crusu. Vimutu viti achaneana vituparahaichu vépenirapachu. Mavachachai-pasera tamutu ema Cristo. Eta tacahe, tatuparaca vítsirijicava vicaemataneaca éma. Tásicha puiti, viti machanerahavipa. Vaipa vítijiricavaimahi. Émapa téchahi eta vítaresira, taicha eta machavirahi titareca.

<sup>16</sup> Eta tacahe, viti véhicanaripa ema Cristo, étainapa vипанеречайаре ита вітсівачіраіпа ита вітаресира. Ваіпа віхіцаймахи ита апана панерерука таіхеанахи та juca апақеҳе. Этаріпа cape juca viásinequenehi vahirichu visuapapajicahini ema Cristo, vímijacharichucha éma vicutihi viti achaneanasami. Puítisera vaipa tacahehi eta vіpanereruana. Visuapahi émairahi Machichaquenehi ema Viya.

<sup>17</sup> Puítiripa viti viúrujiacanahi ema Cristo, apanahaviripa. Vínajicaipa eta viyeherepinihi tamauriqueneana. Tamutupa arairuhi puiti eta viyeherepiana.

<sup>18-19</sup> Ema Viya, téavicavahi eta máurivahi eta viyehé. Éma, mavarahahi vіpauchayarehi éma. Mavarahahivare macaepahayarehini eta vіpicacarasiravahi eta vícuñayare tаichavenehi eta vipecaturana. Tásicha, mavaneca ema Machicha Jesucristo apaesa macaepahayarehi eta vipecaturana vimutu viti vicasiñavana eta mayehe, vaipa mаécharairicaimahi. Tásicha, tájina eta vіpicacarasiravaimahi eta vícuñainahini. Tásicha puiti, ema Viya tituparacahavipa viti véhicanahi eta víchuhairavacayare namutu ena apamuriana achaneana, apaesa éna apanava nacasiñavavare eta mayehe, vаipavare tipicacaracavananaimahi eta mayehe.

<sup>20</sup> Tacahe, viti mavaneruhavihi ema Cristo víchuhavacayarehi namutu. Tímicutijiricavaipa émaquenénahini mаéchajicavacahini ema Viya. Puiti viyaseacavacahi namutu nacasiñava mayehe ema Jesucristo; vаipavare tipicacaracavayanarehini eta náicuñainahini náicuchiyyaréni.

<sup>21</sup> Ema Cristo, tájina mapecaturainahini. Étasera mavarairahi ema Viya viúchucuhayare víti, émapa ema Cristo tamuriacahi eta vipecaturana. Puiti, tájinasarépa víchiravaimahi, tájinavarépa viviurevaina te mamirahu ema Viya vimutu viti viúrujiaruuanahi ema Cristo.

## 6

<sup>1</sup> Tásicha, nútí mavanaranuhi ema Viya, nuyaseacaheyare ímianava tauri eta éhisirahi éma. Vahi ecuemepurureca eta máemunasirahehi, majacapirahehivare.

<sup>2</sup> (Taicha ani macahehi eta máechajiriruvahi tayehe eta Sagrada Escritura: “Nuchicha, téavicava eta pisamacarevayare eta nuyehe te pipiaracanu. Nucatiuchavivaneyare” macahepa. Jéhesare, puiti juca sache ticamapuracarehi eta epiarasirayarehi éma, ejacapacarechaha me Viya mapurare achanehechaha. Esamacarechaha puiti, taicha ema Viya mavaraha ticuchucuhahayare eta te ícuñayaréni taicha eta epecaturana.)

<sup>3</sup> Nútí nuvaraha nacuija nacaecahini eta vématanerepi viti apóstoleana. Eta tacahe, nupamicavahi nútí tiúriyare eta nuyeherepiana.

<sup>4</sup> Eta tacahe, ichape eta néchapiravahi te nímitureca. Nímerecavahi yátupi eta mavanarairanuhi ema Viya. Ichapemuri eta nucamichirahi eta nucatajivairana, eta néchuriasirana, étapa eta tacajeravana eta nítatijirísirava.

<sup>5</sup> Vahi nucainajiruvaimahi táichavene eta náestasiranuhi ena nánarana, náeratasiranuhivare, tájinanéni viviurevainahini. Te apana avasareana timurijiacanuanahi taicha eta nasemanevahi. Eta nítatijirisiravahi, ichape eta tamuracavahi eta nucaematanerahí. Camurihivare eta numacaimasiravahi. Camurihivare eta nécuava eta nupaisirana.

<sup>6</sup> Éti ímatinuhi yátupihi eta táurivahi eta nítaresira. Ímatinuhivare eta nucaimitucusihi mayehe ema Jesucristo. Táichavenehi eta mávahásiranuhi ema Espíritu Santo, nucayehéhi eta paciencia nayehe namutu, nujapanurahihivare. Yátupiquenéhi eta némunaraivahi.

<sup>7</sup> Nímiticahi eta yátupihi máimiturapiana ema Viáquenu. Énerichuvare ema Viya tímicatacanuhi tayehe eta máitupajijiasiravahi te tamutu eta nucametarairuirahi eta máechajiriruvahi, étapa eta nucatiuchirahi eta véhiruhi.

<sup>8</sup> Eta nupaisirapaipahi, natarihihi ena ticunachanuanahi, tiúriemanahi eta nuyehe. Natarihihivare ena tépurunuuanahi, tímehipivare eta nacayemaquene eta nuyehe. Natarihihivare ena tímijarechanuana tépiyahirahi. Nutupiruvahisera tamutu eta nítaresirahi.

<sup>9</sup> Natiarihivare ena vahi tisuapanuanaimahi, taicha tépuruanahi eta apóstolenuirahi. Natiarihisamivaresera ena tisuapanuana taicha tisamairiricanuanahí eta yátuplepirahí eta nímiturapiana. Tatiarihihivare te tiánehipa eta népenirayaréni. Núchucuhisera, maicha ema Viya. Natiarihihivare ena téhanacanuana muraca. Váhisera másapavaca ema Viya eta nacapasiranuinahini.

<sup>10</sup> Tatiarihihivare te nucatisamurevahi ichape. Nútisera nucurisamurereacavahi tamutu sácheana. Páurenui eta náimairanuhi ena achaneana. Ichapemurianahisera ena níjararuuanahi eta tacaimahaquenehi eta náchanevana. Ani, tájina nímahaquenéna. Téhesera apava nítaresira, tétavicavaya eta nucaimahaqueneraya.

<sup>11</sup> Nuparapenaveana némunaruqueneana, nutupiruvahi te nusamure eta juca nuconsejarapianahi eyehe.

<sup>12</sup> Vahi nuvaraha ecuimijachahini nínajiacahé etá némunasirahé. Németeacahisera éti ínajiacanuhi etá émunasiranuhi.

<sup>13</sup> Éti, ecuvihi nuchichanavehénahini etá némunasirahé. Nuvaraha tachavahini etá émunasiranuhi, esuapiranuhi-varéni.

### *Viti, tiávahácahavihi ema Viya taicha machanerahavihi*

<sup>14</sup> Nuparapenaveana, vahi ecuávahácavaca nácani máehicarahanahi ema Viáquenu. Étaripa te arayenaheyare, vahi ecuveha nácani máehicarahanahi. Taicha téjecacayarehi etá panererucana. Viti véhicanahi ema Viáquenu, tatupiruvahi etá vipanereru. Énasera ena máehicarahanahi, tavayuacahi etá tamauriqueneana. Víti viúricahi etá tijarahi; énasera náuricahi etá timapicu.

<sup>15</sup> Taicha víti, mávaháruhavihi ema Cristo. Váiparinehi vicachanémahi ema Váinaraji. Tásiha, te viávahácavaca ena masuapajirairahana, tiápitavairicanahi etá véhisirahí ema Viáquenu.

<sup>16</sup> Énerichuvare, tiávahácahavipa ema Viya, émaripa ema Vicaiyaquene. Taicha ani macahehi: “Núti návahávacaya ena téhicanuanahí. Néchavacayareva éna, taicha éna yátuplequeneanahí nuchaneranahí” macahepa. Eta tacahe, váhiquene táuricahini etá vicasiapiravahini etá nayehe ena vahi machaneranainahini ema Viya, taicha apanahí ema nasiñarajiji.

<sup>17</sup> Taicha acane macavanairipipa ema Viya, ani macahehi: “Érajicava etá te namuri ena vahi nuchaneranaina, machu napareacahe etá namaeperajivana éna. Tacahe, éti nujacapaheyarehi.

<sup>18</sup> Núti yátupiquenénuyarehi Ecayaqueñenuhi. Éti nuchichanaveanahi” macahepa ema Viya maitupajijihaquenehi.

## 7

<sup>1</sup> Tacache, némunaruqueneana nuparapenaveana, vahi tavarahahini vínjicavahini tayehe eta juca vicuchapaquenehi puiti. Tacache, vepachinachayarehi tamutu eta viáquehe étapa eta viáchaneva. Víjaracavayarehi tamutu te visamureana me Viya taicha eta vipicauchirahi éma.

*Eta máurisamurevahi ema Pablo táurivaipa eta náitaresira ena machamuriana*

<sup>2</sup> Nuparapenaveana, nuvaraha ímiyanavahini esuapanuhini. Taicha nájinahi te etaracu éti nacatajivahini náinajicavahini níchavenénahini nútì. Nájinavare nucaetemaquenénahini, nímpipanánájicavacahipucaini.

<sup>3</sup> Váhivare nuvaraha nucajachahe puiti. Nutupiruvahi eta numetasirahehi cape juca: “Tétavicavahi eta nucasamurerahehi. Tájina ticamitisicanuimahi, tayanapanepuca népene”.

<sup>4</sup> Ichape eta nucasiñavairahi eta eyehe, nucunachahehi eta ecurisamurechiranuhi. Tayanapanehinéni ichape eta nucatajivairahi, tétavicavahisera eta étumechiranuhi ecurisamurechiranuhi.

<sup>5</sup> Étaripa te nítcapapa tayehe eta Macedonia, tájina nunasirainahini. Ichape eta nucatajivairahi naicha ena ticatianacuanahai. Ichaperinehivare eta néñamiravahi eta eyehe.

<sup>6</sup> Émasera ema Viya tétavicavahi eta máetumeraivahi nayehe nácani téñamavasamureanahai. Nútiripa nétumechavainehi maicha éma, eta nímairapa máitecapauchiranuhi ema Tito.

<sup>7</sup> Tavetijipa eta mametasiranupa ema Tito eta ecurisamurechirarinehi éma. Timetacanuvare ichape eta éñamiravahi eta nuyehe; evarairaipaicha ímahanu; ichapevare eta evarairahi esuapanu eta étupirisirahi ema maca achane téjecapavahi. ¡Eta juca, tétavicavainehi eta ecurisamurechiranuhi!

<sup>8</sup> Ichapehinéni eta táimipanereresirahehi eta nucartane. Nútiripa, ichaperinehivare eta táimipanereresiranuhi nucatisamurevahi te nucajurepa. Némritisicapasera puiti, taicha ánipi eta táimipanereresirahehi.

<sup>9</sup> Puítisera, tétavicavainehi eta núrisamurevahi ícha, eta táetaviasiraheripahi eta ecatisamurevahi. Eta núrisamurevahi, vahi étainahini taicha eta ecatisamurevahi. Núti núrisamurevahi taicha títsivachavaipahi eta táurivaipahi eta epanereruana, evarairahi ecurisamurecha ema Viya. Eta tacache, víti tájinapa vácayemahini eta eyehe.

<sup>10</sup> Taicha tatiarihihi eta jácani máijararuhi ema Viya, táimipanereresirahehi, mavarairahi eta éneuchiravaya tayehe eta ejacapiravahi apaesa macuchucuhahahe. Eta ecatisamurevahí tiámahi eta iúricacarevaya. Énasera ena apamuriana achaneana tayehe eta juca apaquehe, yátupi ticatisamurevanahi, váhisera náeneuchavahini eta me Viya. Éta, tiáma eta nápenira.

<sup>11</sup> Étisera, jtétavicavahi eta iúrivahi tásihaguenehi eta ecatisamurevairahi! Enevanerinehi ínajicahi eta ejecapiravahi taicha evarahahi ímianava ecurisamurecha ema Viya. Ichaperinehi eta nucunachirahehi taicha epicauchainehi ema Viya tayehe eta juca íchavaquenévahi. Evarahainehi níjahúchavahini nítecahini eta eyehe nímicatacahehini. Étisera enevanepa ecurujicacahi taicha eta esemanevahi maicha ema téjecapavahi te etaracu. Enevanepa émecharecpa éma. Ímerecavahi eta tamajinairahi ejecapiravainahini éti.

<sup>12</sup> Núti, te nucajurehénapa eta tainapure nucartane, vahi émainahíni máimipanererecanuhini ema téjecapavahi, váhivare émainahíni máimipanererecanuhini ema maiya, émaripa ema majarareruhi. Íchavenehi éti eta ímipanereresiranuhi te nucajurehénapa, nuvarairahi ímereuchavayarehi eta yátupipapuca eta esuapiranuinahini te mavahuana ema Viya.

<sup>13</sup> Eta tacahe, tétavicavainehi eta étumechiranuhi nútia etasusamairisirahehi eta esuapiranuipa.

Tavetijipa eta núrisamurevapa eta táurivahi eta ejacapirahi ema Tito. Tétavicavahi eta máurisamurevapahi ícha éti etasamirisiravaipa.

<sup>14</sup> Váhirichu támapurujihini eta nucunachirahehi mayehe ema Tito eta núrisamurevahí ícha éti. Puítiripa, ímereuchavapa yátupihi eta ecunachacarevahí.

<sup>15</sup> Éma, tiápajucavapaipa eta máemunasirahehi éti. Máecharairicahi eta táurivahi eta ejacapirahi éma, esuaparinehivare, táichavenehi eta emansuiravahi étapa eta epicauchirahi ichape ema Viáquenu.

<sup>16</sup> Núti apanavare, tétavicavahivare eta núrisamurevahí ícha éti. Nucasiñavahi táimianava etasuapiranuina te tamutu.

## 8

*Tatupiruvayare te visamure te vivaraha vicajirica*

<sup>1</sup> Tiuri puiti, nuparapenaveana, vivaraha vimetacahe eta nanaquisiravahi ichape ena apamuriana vichamuriana ticavasanahi te avasareana tinapaica te juca Macedonia.

Éna, nasuapavanepa eta manacasamurechirahi ema Viya eta nacajirisirayarehi.

<sup>2</sup> Ichapemurihinéni eta náichirahi ena tictatianacanahi náemepaurechavacahi, váhisera náinajicavahini. Tivapinavanarichucha. Tatupiruvahi te nasamureana eta náijarasirahi eta nanaquiruvana. Páureanhinéni, tímecevahisera eta nanaquiruvana, ticutirine rícoanainahini.

<sup>3</sup> Núti néchajisihahi eta juca taicha nunecapaequenehahi eta tápajusiravahi eta nanaquiruvana. Vahi náeñamahini, náijaracahi jácani nacayehequene. Vahi vipamicavacahini víti.

<sup>4</sup> Énasera, ichapemurihivre eta nayaseasirahavihi vísapahini tinaquicavana éna apanava, navarairahi nacajiyare ena vichamuriana ticavasanahi te Jerusalén.

<sup>5</sup> Éna, náetaviuchahi eta navapinairavahi. Tínapucapa tinaquicavanahí eta nacaemataneasirahi ema Viya, navarairahi nacurisamurecha éma. Tásiba, étapa eta náicurehi ena vichamuriana.

<sup>6</sup> Eta nímairahi núti eta navapinavairahi eta nacajirisiraya, nupanerechahi nuvanecaya ema Tito machava máiteca eta ara eyehe apaesa táitauchavapaini eta enaquiruvanahi éti apanava. Cape juca épaniravainapa. Puiti ítauchavanepaini.

<sup>7</sup> Taicha éti, ichapemuri eta ecañavairahi me Viya. Tétavicahivare eta échemaraivahi. Camurihevare éti ímiturahiana. Evapinavahivare eta ecaemataneasirahi ema Viya. Tétavicahivare eta émunaraivahi eta viyehe. Eta tacahe, taurica tápajucavahivaréni eta enaquiruvana ecajirisiraya.

<sup>8</sup> Váhisera nupamicahe eta nuvanesirahénahini. Nuvarahisera ímatiequenehahi eta navapinaraivahi ena apamuriana vichamuriana apaesa ímerecahini éti apanava eta yátupiquenérahi émunaraivahi.

<sup>9</sup> Ímatirichuhi éti eta máemunasirahavihi ema Viáquenu Jesucristo. Éma, tamutu tiúricacarehi te mávihahi te anuma, tájinahinéni mácamunuhini. Étivenehisera tiúcupaicapa te juca apauehe. Páurehi éma eta máitäresirahi apaesa éti ejacapahini eta iúricacareva maicha éma.

<sup>10-11</sup> Németeaca taurica ítauchavanéni eta juca enaquisiravahi, váchupa épanavaqueneripahi cape año. Táimiyana va eta evapinairavayarehi eta ítauchiraya eta enaquiruvanayare tásibaquenehí eta jácani tatiarihiqueneanahí ecayeheque-neanahí.

<sup>12</sup> Etiarihi erataha enaquica apaesachicha. Etiarihivre erataha iápajucava eta enaquisiravahi. Etiarihi erataha enaquica camuri. Tacamunuchucha tátupiruva te esamureana, evapinavahi eta enaquiruvaya apaesa tijacapacareya mayehe ema Viya.

<sup>13</sup> Vahi nuyaseacahe échurihahini éti táichavénenahini eta ímicasirayare ena apamuriana.

<sup>14</sup> Nuvarahahisera ímerecavahini eta ímicasiravacayare ena vichamurianahi. Puiti ecaimahaquenevacahi, eratahahi ecajirica ena náechuriaruanahi. Tijuricati te apana año, étipavainapapuca échuriaca. Éna títsirijicavanainapa eta eyehe, énapavainapa tinaquicavanayare. Ene tacaheyare eta ítare-sirayare, ecuticacayare. Nacuija nacucatajiva tayehe eta ecamunuqueneana.

<sup>15</sup> Vítauchayare eta tacayemaquenehi eta Sagrada Escritura, ani tacahe: “Namutuhi ticaniruana. Nájina nácatajivahini, nájinavare náechuriacahini, váhivare náemepururerecahini” tacahepa.

*Ema Tito énapa ena apinana vanairucanahi mayehe ema Pablo*

<sup>16</sup> Núti nuhasulupayachahi ema Viya eta manacasamu-rechirahi ema Tito máeñamiravahi eta eyehe, tacutihi eta nusamure néñamiravahi eta eyehe.

<sup>17</sup> Éma, matupiruvahi tijicapanuhi eta nutuparasirahi téchapajiricaheyare. Ichape eta mavarairahi téjirapana-heyare, taicha tétavicavahi eta máemunasirahehi.

<sup>18</sup> Eta mayanirayare ema Tito eta ara eyehe, vévatacayare macachaneyarepahi ema apana vichamurihivare. Tímati-carehi éma eta macunachacarevahi te jácani máimituresi-rapahi nayehe ena vichamuriana tayehe eta véhiruhi.

<sup>19</sup> Ema maca nerejihí ne vichamuriana eta máimicasira-nuyare eta vipaisirayare, víjarasirayare ena vichamuriana eta enaquiruvanahi. Víchahi eta juca, vivarairahi vicurisamurechaya ema Viáquenu. Vímereuchaheyareva eta evapinairavahi éti ecajiraivahi.

<sup>20-21</sup> Taicha núti eta viámirayare eta ichapequene enaquiruvana, nuvaraha nímercayare eta táuriva eta víchira, apaesa vahi nacuechajisianu nácani achaneana. Ema Viya tímarara-canuhi eta táuriva eta nupanereruana. Nuvarahavare tiuri eta náimairahi ena vichamuriana.

<sup>22</sup> Énerichuvare vévatacayareva ema apanavare vichamuri. Éma, ichapemurihi tímereuchava eta mavapinairahi eta macaemataneasirahi ema Viáquenu. Puiti éma, tivapinavavarepa eta máitecapauchiraheya, taicha macasiñavahi eta máimatirainapa eta evapinavahi eta ecajiraivahi éti.

<sup>23</sup> Núti nuvarahahí náimatiyarehi namutu ema Tito, eta émairehí nujupaha tayehe eta juca vématanerepi. Vicuticacahi eta vicaemataneasirahé, véchapajirisirahé éti. Étaripa te nacayasesererupuca nayehe ena apinana vichamuriana

macachanequeneanayarehi ema Tito, énerichuvare emetacayare eta nerejianahi ena apamuriana vichamuriana, táichavenehi eta táurivahi eta nacaemataneasirahi ema Cristo.

<sup>24</sup> Nuvarahahi ímerekavayare eta nayehe ena nani apinana vichamuriana eta yátupirahi eta émunaraivahi, apaesa ecurisamurecha namutu ena vichamuriana te nasamairircapa, náimatinayare vahi támapuruji eta nucunachirahehi.

## 9

*Tiúripana vivapinavayarehi eta vinaquisiravana nayeheyare ena vichamuriana*

<sup>1</sup> Tiuri puiti, nútí nímatiheripahi eta evapinairava tayehe eta ecajirisira nayeheyarehi ena vichamuriana ticavasanahi te Jerusalén. Vaipa tacamunucarehini nápepejiricahehini.

<sup>2</sup> Ichapemurihi eta nucunachirahehi nayehe ena vichamuriana ticavasanahi te juca Macedonia. Numetacavacahi eta evapinairavahi eta épaniravahi ena quicava cápequenerípahi te apanahi año. Tacahe, eta nasamairirisirahi eta evapinairavahi éti, éna apanava tivapinavanavarepa ichape.

<sup>3</sup> Eta tacahe, névatacahi puiti ena nani mapanana vichamuriana, apaesa vahi ecuvayuaracanu. Vahi tacumapuriji eta nucunachirahehi eta enaquisirava. Nuvaraha tatsecavaipa támamu te níteca pauchahepa.

<sup>4</sup> Tijuricati náehicanupahi te níteca ena vichamuriana ticavasanahi te juca, tacuijarichaha tatsecavahi machu átsiri-hacare, machu támapurujipa eta nucunachirahehi. Váipasare ecuimicatsiriacanu nútí apanava.

<sup>5</sup> Tásiba, tacahehi eta nupanereruana eta névatasirahi puiti ena nani vichamuriana, náinapumirauchanu níteca pauchahe, náimicatacae eta ecurujisirayare eta enaquiruvana. Nuvaraha evapinavayarehi eta enaquisiravahi. Nájina vahi náimijachanu nútinachucha nupamicahe.

<sup>6</sup> Némechaheyare jucarihi eta échajirirucava, ani tacahehi: "Mácani achane ánicuchicharichu eta máesane máevaruhi, ánimurichicharichu eta mavehayare eta távame eta máesane. Mácanisera ichapepana eta máesane, ichapemurivare eta távame mavehaqueneyare" tacahepa.

<sup>7</sup> Namutu nácani tinaquicavanayare, tavarahahi tatupiruvayarehi te nasamureana eta nanaquisiravaya. Vahi nacatiequenehaimahi, taicha nájina tipamicaimahi. Taicha ema Viya, téavicava eta máemunasirahi mácani tatupiruvahi eta máijaracasiresirahi.

<sup>8</sup> Ecasiñavaya yátupina mayehe ema Viya, taicha éma, téavicavahi eta máitupajijiasiravahi. Mavarahahi tíjaracaheya tamutu eta ecamunuqueneana. Vaipa échurihaimahi maicha

éma. Ecayehenasarepa eta ímicasiravacaya nácani apamuriana ticamunuvanahi.

<sup>9</sup> Ecutiyarehi ema achane tiuri, ema táchajisihahi eta Sagrada Escritura, ani tacahehi: “Ema achane tiúrihi ticunachacarehi me Viya, tivapinavahi eta macajiraparacahi ena páureana. Tájina vahi téchuriacaimahi eta macajirisira te tamutu eta máitaresirahi” tacahepa.

<sup>10</sup> Ema Viya, émahi ema tinaquicahi eta evaraquiana. Éma, macaejapacahivare eta tinicacare, étapa viáchanechiavyarehi. Ene macaheya eyehe éti. Tíjaracahepa eta enaquisiravaya, tímicutijiricavahi eta taejapasira eta evaraqui. Éma, ticajurucayareva eta enaquiruhi apaesa camurianaina ena ecatajiruanayare.

<sup>11</sup> Tásicha, ema Viya tíjaracahenapa eta ímahaqueneanayare apaesa ímiyanavayarehi íjaracasireca. Puítiripa eta viámaqueneyare enaquiruvanahi nayehe ena vichamuriana, ichape eta nahasulupayachirayarehi ema Viya.

<sup>12</sup> Taicha eta ímicasiravacahi ena vichamuriana, ecuchucuhavacayarehi tayehe eta nacamunuiravahi. Tásicha éna, tiápajucavainapa te nasamureana eta nahasulupayachirayarehi ema Viya.

<sup>13</sup> Ichapeyarehivare eta najirauchirayarehi ema Viya, nacunachirayareva éma. Eta evapinairavahi eta ecajirisirahi eta ímeresiravahi eta esuapirahi yátupi eta véhiruhi, étaripa eta máimiturapihi ema Cristo. Tímereuchahehivare eta iáchanevahi nayehe nácani ticamunuanahi.

<sup>14</sup> Tásicha, tiyaseuchaheanainapa me Viya te nayujarsirana. Ichape eta náemunasiraheyarehi, navarairayareva náimahahevane táichavenehi eta ítsirijsiravahi eta máemunasirahehi ema Viya.

<sup>15</sup> ¡Tétavicavahi eta viúricacarehi maicha éma! ¡Tájinapa viviya apanaina vácayema eta vihasulupayachira ema Viya táichavenehi eta juca víjaracasi!

## 10

*Yátupi eta masuapacarevahi eta apóstolérahi ema Pablo*

<sup>1</sup> Nuti Pablo, yátupiquenénuhi eta apóstolenuira. Puiti nuyaseacahe eta ímatiranuína eta némunasirahehi. Nucutihi eta máemunaraivahi ema Cristo étapa eta majapanuraivahi. Etiarihipuca eti ímijachahi népiyacavahi núri te emirahu; tásicha, te nuyerehihevare, tétavicavahíji eta nuvainarajivahi mapicaurairahanuhíji.

<sup>2</sup> Puiti nutuparacahe: Étupirisamurechavaipahini te tamirahu eta nítecapauchiraheya, apaesa vahi tacuitauchava nucusemaracahehini. Ena nani náimijachahi nucutihi mácani

achanetataji, étachucha nutanuca eta nuvarahaquenehi. Nucamatinacavacayaresera te nítecapauchahépa.

<sup>3</sup> Yátupi ecutiquenenuhi achanenuhi. Váhisera nácutihini ena apamuriana ajairana náipicararecanuma eta náeharaivana, navarairahi tisuapacareanayarehi.

<sup>4</sup> Taicha núti vahi néhacacaimahi te nuvahuana, tájinavare nácasíñaimahi. Mararihisera ema Viya ema tíjaracanuhi eta nítupajijiasiravaya nucamatinasihayare éna. Ema Viya, nájina ticachuricaimahi.

<sup>5</sup> Eta tacahehi eta nucae pahairahi eta semanereana, ena ticasíñavavaicanahi, tímijachavanahivare ena téchinavanahí, vahi návarahahini máimicatacavacahini ema Viya. Váhivare návarahahini náesenicahini éma. Níturucayarehisera nácani muracapanereruanaahi eta nasuapiraina yátupi ema Cristo.

<sup>6</sup> Nucuchapahesera eta yátupina eta esuapajiraivaina. Tásiba, te nítecapa, nímiratahacava eta nítsivachirayare eta napanereruana ena masuapajirairahanahi. Te váhipuca náeneuchava, némechavacayare.

*Natiarihi ena tímijachavanahi apóstoleana, tímicutichavanahi ema Pablo*

<sup>7</sup> Éti ímijachaipapuca tájinaquenénuhi nítupajijiasiravainahini, eta ímairanuhi eta nímahisami. Németeacavare natiarihi ena ticunachavanahí machaneranahi ema Cristo. Nuvarahasera náimatinuhini eta machanerairanuhi núti apanava.

<sup>8</sup> Natiarihipapuca náimijachaipapuca vahi nétupicavahi nútì età nupamisirahehi eta esuapiranuhi. Váhisera nutsirihahini taicha yátupihi nutuparahaichuhi eta návacure apóstolenuhi. Taicha ema Cristo mavarahahi nétumechaheyare eta éhisirahi éma. Tájina vahi nucamitiequenehahémahi nútì.

<sup>9</sup> Numetacahehi eta juca, váhisera tácarichuimahi nípicarecahehini te juca nucartane. Tamutuyare títauchava te nítecapauchahepa.

<sup>10</sup> Ena nacahehi eta náechajiriruvahi: “Vahi ecusuapa eta macartane. Tayanapane muracapahi eta táechajiriruvana, émasera tájina mamuracavaina. Énerichuvare muracacaema età máechajisira” nacahepa.

<sup>11</sup> Éna náimijachahi tacarichuhi muraca eta táechajiriruvahi età nucartane. Tímanuanayaresera te váhipuca nusuapacarehi te nítecapauchahepa età ara eyehe.

<sup>12</sup> Núti vahi nímicutichaimahi nayehe ema tímijachavanahí ticunachacareanapanahi. Ena nani énajiricavaichucha ticunachavana, tímijachavanahí nájina ticachuricanaina éna. Súnsurupichucha età juca náichaquenehi.

<sup>13</sup> Nútisera vahi nútijivaimahi nucunachavahini. Émayarehi ema Viya ticunachanuyarehi, taicha éma tíjaracanuhi eta nusuapacarevahí eta eyehe, tásihaguenehi eta níjarasirahehi eta taurinaqueneana máechajiruvana ema Cristo.

<sup>14</sup> Váhivare nétaviviriacavahini eta nusuapacarevahí eta eyehe. Nútihiñéni nínapucahi te nítancahahénapa te nímitucahepa eta máechajiruvuva ema Cristo. Tacuhe, tituparacanuhi eta esuapiranuyarehi.

<sup>15</sup> Váhivare nucunachavaimahi tayehe eta apaematanehi násapihahipucaini. Nuvarahasera tápajucavaini eta esuapajiraivaina mayehe ema Cristo. Nuvarahavare nímitucaheyare eta apamuriana yátupiqueneana, nítachiraina eta nucatuparahairahi me Viya. Tájina vahi nétaviviriacavahini eta nusuapacarevahí eta eyehe.

<sup>16</sup> Núti, váhiquene nímicasiapavaimahi te jácani avasare nacometarairuquenéipa nácani apana, nucunachiravaya-repuca tayehe eta táitaurevapaipa apaemataneanahi.

<sup>17</sup> Numetacahe: Nácani tímijachavanahi ticunachacareana, yátupinahiseráini eta nacunachacarevaina mayehe ema Viya.

<sup>18</sup> Taicha mácani achane, te yátupihi eta macunachacarevahí, vahi émajivaimahi ticunachava. Émayarehi ema Viya ticunachayarehi.

## 11

*Ichape eta máeñamiravahi ema Pablo nayehe ena machamuriana*

<sup>1</sup> Tiuri puiti, nuvaraha ecamichaini eta juca nucayemaque-neanayare eta eyehe. Ticutiyare súnsurupiana. Nuvarahasera ítasamahini.

<sup>2</sup> Puiti, téavicavahi eta néñamiravahi ícha éti, tásihaguenehisera me Viya. Nucutiripa mácani achane suiya esu amaperu eta majaneasirahi ésu. Taicha nuvaraha táurihini eta majacapiraheyare ema Cristo te jena sácheyare. Ácutihini súcani esena amaperu te sutupiruvahi eta sucaimaira, tájinasarepa mácayemahini ema suima.

<sup>3</sup> Eta néñamiravahi eyehe, nuvarahahi ecuijahini iáquipaicava, ecucamitiequenehahini eta taurivahi eta éhisirahi ema Cristo. Vahi ecucuti eta suáquipaisiravahi esu vénarahaini Eva, maicha ema Váinaraji Satanás.

<sup>4</sup> Ímicatisamurechanuhi eta esuapiravanehi ena tépiyahirahiana, apapipahi eta nametarairu tayehe eta náuchucuiraya. Núti, émahi ema Jesucristo ema néchajisihasahi. Énasera, apanahi ema náechajisihahí. Émaripa ema Espíritu Santo, váhivare émainahini náechajisihahini éna. Apanachucha ema

nacasiñahi. Éti ejacaparipahi ema yátupiquenehi Espíritu Santo.

<sup>5</sup> Núti németeaca vahi ticachuricanuanaimahi eta nucametarairuira ena tímijachavanahí apóstolequeneana ticametarai-rurahianahíjí náichava.

<sup>6</sup> Tayanapanepuca táepurucarehi nayehe eta néchajisirasami, étasera eta nítupajijiasirava, tamutuhi nímatiequeneha. Ímatinuhi éti tayehe tamutu jácani nímitusiraheana níchaqueneanahí.

<sup>7</sup> Etiarihisrapuca éti ímijachahi néjecapava eta némpaure-chiravahi. Táitusiava népurucarehi eyehe, ichaperipahisera núrichaheripahi éti.

<sup>8</sup> Váhivare nuyaseacahehipucaini eta nunicaquenerepi eta nímitusirahehi. Yátupi tíjaracanuanahí ena apamuriana vichamuriana eta nénisiavayare.

<sup>9</sup> Tásiba, te nítahapa eta plata, váhivare nuyaseacahehini eta nunicaquene. Taicha ena vichamuriana ticavasanahí te provincia Macedonia náimiamarecahi eta nucamunuque-neanahí. Tacahe, nujaneacavahi, vahi nuyaseacahehini éti. Váhivare nuyaseacahémahi puiti.

<sup>10</sup> Jéhesare, nájina tiratahaimahi tihapapica eta nucunachacarevahí tayehe eta tájina nucobrachirahehini eta nímitusirahehi emutu eti ecavasanahí te Acaya, taicha yátupihi eta nímatiequenehairahí tamutu eta yátupiqueneanahí máimiturapiana ema Cristo.

<sup>11</sup> Eta juca nucayemaqueneana, vahi ímijachaimahi étaina-hipucaini táichanu eta numaemunasirahénahini. Ema Viya máimatihí eta yátupirahí némunacahe.

<sup>12</sup> Énesera nucaheyare nútí. Váhiquene nuyaseacahémahi. Nímiyanavaya eta nujaneasirava apaesa tacuija naviya eta taviuchanu nayehe ena tímijachavanahí tímiturahiana nácuti-nuhini eta apóstolenuirahí nútí. Taicha navarahahí ticunachacareanayarehi tímicutichavanayarehi eta nucunachacarevahí nútí.

<sup>13</sup> Éna, tépiyacavanahí apóstoleana. Tivayuarahianasera eta náitaresirahí. Váhiquenevare vanairucanaimahi me Viáquenu Jesucristo.

<sup>14</sup> Ena nani, vahi tiáramicareana éna eta navayuaraivahi, taicha ema Satanás, yátupiquenehi náquenu éna, tépiyacavahi macuti ema ángele vanairucahi me Viya, mavarairahi tivayuareca.

<sup>15</sup> Ene nacaheyarehi ena nani mavanaranahí ema Satanás, tépiyacavanapahi pastoreana náuriqueneana. Járabajarehisera eta sácheyare najacapirayare eta náicuñayare táichave-neyare eta juca náimiaquipaisirahehi.

*Ichapemuri eta macatajivairahi ema Apóstole Pablo taicha eta macametarairuirahi*

<sup>16</sup> Nuvaraha nápechava numetacahe: Vahi ecusuapa eta náimijachiranuhi máurishinu. Te etiarihipuca éti ímijachanu máurishi, ecayehe paciencia eta nuyehe. Ecamichanu eta juca nucunachiravasamipaini apaesachichainahini nácutipaini eta nacunachiravahi ena apamuriana.

<sup>17</sup> Tájina mavanairipina ema Viáquenu tayehe eta vicunachacarevahi. Tíchanuhisera nucunachava taicha éti ímijachanu máurishinuhi.

<sup>18</sup> Táichavenehisera eta nusamairirisirahi eta nacunachiravahi eyehe eta náitupajijiasiravahíji, énenapa nucaheyare núti eta nucunachirava.

<sup>19</sup> Éti, ímijachavahí ichape eta échemaraivavacahi. Evapinavahisera eta esuapiroha eti nayaseasirahehi ena máurishiana.

<sup>20</sup> Ecamichahivare tamutu eta napamisirahe ítaucha eta tivitacareana vanairipiana. Tiverejicaheanahí eti ecayehequeneana. Tiyurucaheana éhicavaca éna. Tasapihapa éti ecamichahí tamutu eta juca.

<sup>21</sup> Núti, tétavicavahi nutsirihahi énemahinuhinahini nácahehini. Te ímijachahipuca tiúrihi tamutu eta juca náichirahehi, erardonachanuhini vahi níchahini éta.

Ena nani ticunachavanahí eta náurivahi. Núti apanava núriha eta nucunachiravayarehi, tayanapané imijachanupuca máurishinuhi.

<sup>22</sup> Éna ticunachavanahí énairahi hebreo israelítana. Núti apana hebréonuvare, israelítanuvare. Énerichuvare núti mámariequenenu ema viáchuaini Abraham, nucutirichuvare éna.

<sup>23</sup> Éna, tímijachavahí mavanaraná ema Cristo. Nútisera, jéhevarequenenuhi mavanaranuhi ema Cristo. Nápajupanavahi núti eta nayehe. (Máurishinuhi eta nímaíravahi eta juca nucunachiravahi.) Jéhevare núti nápajupanavahi eta nucaemataneasirahi ema Viya, nucachuricavacahi namutu éna. Eta juca nucaemataneasirahi me Viya, témostacanuhi, témeratacanuhivare. Énerichuvare ichapemurihi eti táimicapasiranuyarehini. Ena nani nánarana, vahi náichahini, nájina nacatianacavacahini.

<sup>24</sup> Tacutiquene cincohevare nucaesta naicha ena nujaneanana israelítana te jácani nupaisiranapahi. Mapana arroba eti náestasiranuhi.

<sup>25</sup> Mapahevare tépuchiricanuanahí. Étahevare tiyucararacanuanahí te márijahiana. Mapahevare térica eti pacure tiámanupahi. Tásiba, étanavare sache étanapa yati nucahehi te tainahu eti une te ichapequene mar.

<sup>26</sup> Ichapemurihivare eta nupaisiranahi. Nímahavahivare eta táñehicarevahi eta tamuracava tajunapirahi eta une te ichape cajacure. Nupicacavahivare naicha ena tiámerahiana. Tipanereuchananapahi ticapacanuana ena nujaneanana, énapa ena apavasanana. Tamutuhi náemauchianupahi te jácani avasare, téhepa te mávapahi apauehe, étapa te jácani nupaisirana te une tayehe eta pacure. Énerichuvare témauchanuana ena tímijachavanahí nuchamuriana táchavenehi eta népiyaequeneanahi.

<sup>27</sup> Ichapemuri eta nucaematanerahi. Nucatajivahi muraca. Ichapemurihivare eta numacaimarasiravahi. Nucatajivahivare tayehe eta nécuava étapa eta numauneva. Ichapemurihivare eta nucamichira eta ayunanuiranuhi. Nucatajivahivare taicha eta ticasarahi. Néchurihavare eta numuiriharapi.

<sup>28</sup> Tayanapaneinesera eta nucatajivairahi ichape, nímiyanavahisera eta néñamiravahi ícha emutu eti nuchamuriana te tamutu avasareana, nuvarairahi tacuijahini tahapapiricahehini tayehe eta éhisirahi ema Cristo.

<sup>29</sup> Te etiarihipuca eti vahi túmehénahini eta éhisirahi ema Viáquenu, ichaperinehi eta néñamiravahi núti. Tacutiquene te etiarihipuca éti náimiaquipairuhéhi, téavicavahi eta nutsirrahivare, nusemasamurevarepa.

<sup>30</sup> Téhesera tatarihipuca eta nacunachiravahi, núti apanavare nucunachavavare. Étasera numaitupajijiasi-ravahi, étachucha ticunachacarehi eta nuyehe.

<sup>31</sup> Émasera ema Tata Vicaiyaquene, Maiya ema Viáquenu Jesucristo, máimatihi éma eti tatupiruvairahi eta nucayemaqueneanahi te juca nucartane. Éma, máitavacacahi eta majirauchacarevahi.

<sup>32</sup> Tacutiquene te návihaipahi te Damasco, ema tuparirucahi tayehe, majupahahi ema rey Aretas, máimivanerecahi ena séntinelana te tapajana tayehe eta avasare, mavarairahi ticaratacanuana.

<sup>33</sup> Énasera ena nuchamuriana tinacacuhanuanapa tayehe eta ichape saye túmehi, ticuchucanuanapa te ventana, ticajuchuchucanuanapa te tiipi enure te apachacaya eta yúchama tayehe eta avasare. Tacahehi eta núchucuirahi. Vaipa nacaratacanuhini.

## 12

*Ema Pablo mavapuchahi tímerecava ema Viya*

<sup>1</sup> Yátupi tájina nuvehaimahi eta nútijivairahi nucunachava. Numetacaheyaresera eti nímairahi te nuvapure máechajisiranuhi ema Viáquenu.

<sup>2-3</sup> Catorce áñopa eta táetavisiravahi eta nímairahi tiámanuanapa tímpairiricanuanahíji te anuma te mávasa ema Viya. Váhisera necha te étahipuca eta náquehe námapahi eta nuyanirahi, te étachuchapuca eta náchaneva. Émasera ema Viya, éma téchahi eta níchararacavapahi eta mámiranuhi te mávasa anuma.

<sup>4</sup> Ánaqui nusamapa eta mahu. Timetacanupa eta téchacareanahi tayumururevahi. Váhisera táisapacarehini numetajiricahini.

<sup>5</sup> Étapapucaini nucunachiravahini tayehe eta nímahaquenehi nusamaquenehivare, taicha tímimatichanuhi ema Viya. Váhisera nucunachavaimahi tayehe. Núti nucunachavahi tayehe eta numáitupajijiasiravahi. Étachucha nucasiñavaiyahi tayehe.

<sup>6</sup> Yátupihinéni eta nucunachacarevahi. Váhisera nucajamuravahini, taicha tájina nímatihini nutanuca eta nacunachiranuhini ena achaneana. Nuvarahasera nanecapaequenehahini eta táurivahi eta nítaresirahi.

<sup>7</sup> Tétavicavahi eta tiáramicare eta nímahaqueneana te anuma. Tásicha, ema Viya vahi mávarahaimahi nucasiñavavaicahini eta nímairahi. Máisapahi ema Váinarajiquene Satanás técajumachanuhi, cútirine tatarihinahini itape tayuvaraca te neche. Taicha ema Viya mavaraha vahi nucuvayuchava eta nucunachacarevaina.

<sup>8</sup> Mapahe eta nuyaseasirahi ema Viya eta macanarasirnuinahini eta nucatiruhavahi.

<sup>9</sup> Émasera ema Viya, ánipa máichanuhi: "Vuíchaha nucanaracavimahi. Nujapanuvisera. Níjaracavyare ichape eta pitumevaya, tayanapane eta pimaitupajijiasiravahi. Taicha nuvaraha náimatiyarehi ena achaneana eta nítupajijiasiravahi piyehe" máichanupa. Eta tacahe, núrisamuréichucha puiti eta tamajinairahi eta nítupajijiasiravainahini apaesa máimerecavahini ema Cristo eta máijarasiranuhi eta máitupajijiasiravahi.

<sup>10</sup> Tásicha, nuvapinavahi puiti eta napanajisiranuhi, nucatajivairahi náicha, náumehairanuhivare táichavenehi eta mavanarairanuhi ema Cristo. Nuvapinavahivare eta numaitupajijiasiravahi étapa eta néchuriasirana, taicha eta nímairavahi tamajinairahi nítupajijiasiravainahini, nútisera nusamavahi eta nutumevapaipaicha maicha ema Viáquenu.

*Ema Pablo tétavicava eta máeñamiravahi nayehe ena machamuriana*

<sup>11</sup> Yátupi puiti eta néchajisiavairahi nucatiuchiravahi, tímicutijirícavaipa máurishinuínahíni. Íchavenehisera éti, taicha éti tatuparacahi ecatiuchanuyarehini,

váipasare nucuechajisiavahini nútí, vahi nútijivainahini nucunachavahini. Navetijisera ena tímijachavanahí apóstoleanahíji ena éhiruanahí, jéhevare éna, tájinaquenepa naçunachacarevaina.

<sup>12</sup> Nímercavahisera eta eyehe eta yátupiquenénuirahi apóstolenu eta nucaematanearahehi. Tayanapane camuri eta nucatiruhavana, nucamichahisera tamutu. Nímechahe-ripahinéni eta tiáramicareana níchaqueneanahí, maicha ema Espíritu Santo. Éta tímicaecherachanuhi eta yátupiquenénuirahi apóstolenu.

<sup>13</sup> Ena apamuriana vichamuriana te apana avasareana ticajinuanahí éna eta nucamunuqueneanahí. Étisera, tájina vahi nuyaseacahehini étainahipucaini eta nunicaquene, nítecahipucaini íjaracanuini. ¡Váhisera ecusema eta juca numaitecapauchirahí!

<sup>14</sup> Puiti nutserereacavaipa eta mapaherayarepa níteca eta ara eyehe, nupaipiuchiraheya. Váhivaresera nácamunuimahi ítátinuhini. Váhivare étainera nutanucapahini eta ecayehe-queneana. Étiquenesera nucamunuhepahi eta esuapiranui-nahini. Taicha nuchichanavehehi éti. Vahi étinayare ítátinu. Núti nítatíheyare taicha nútí ecaiyaqueñenahuhi.

<sup>15</sup> Váhivare néñamiáhemahi eta nucayehequenehi eta nítatírahéyare. Váhivare nuyacujimahi eta nucaematanearaheyeare táurivayare eta iáchanevana. Tayanapane váhipuca ecuemunanajicanuhi, nútisera tétavicavahi eta némunasi-rahehi.

<sup>16</sup> Nararihivare ena téchajicanahí eta nuyehe. Ani tacahéhi eta náechajiriruvahi: "Yátupi te tipaipiuchahavi éma, váhine-nicacha tiyaseacahavi eta macamunuquene. Maitucasera eta mavereasirahaviya eta viplatane" nacahehi.

<sup>17</sup> Eti ímatihí vahi énavanerecainahipucaini ena névataruasanahí eyehe, énainahipucaini navereacahehini níchavené-nahini nútí.

<sup>18</sup> Te nuvanecapa ema Tito émapa ema macachaneque-nepahi, téjirapanaheanayarehi, ¡tájinavare mayaseacahehini éma! Taicha vicuticacahi víti eta viúrivahi eta eyehe, táchavenehí eta vémunasirahéhi ichape.

<sup>19</sup> Eti ímijachaipapuca nutanucahi nútí eta nucatiuchiravayarehi eta eyehe. Váhisera táchahéhi. Vahi táchamunuca-reimahi eta nucatiuchiravaya taicha nútí nutupiruvahi eta néchajisirahéhi te mamirahu ema Viya étapa te máijare ema Cristo, nuvarairahi tajurucahini eta táurivaina eta iáchanevana, eti némunaruqueneanahí nuchamurichichana.

<sup>20</sup> Núti, te níteca eta ara eyehe, nupicahi vahi núricaimahi ácahemahihíni eta nuchimapiraheya: éhajiricácahipucaini,

ecapinarujiricacahipucaini, esemajiricacahipucaini,  
íputsimuriácacahipucaini, épiyéquenerejiricacahipucaini,  
iúmehajiricacahipucaini, ecasiñavavairicahipucaini,  
váhipuca tacuaquejiricacahi eta epanereruana. Te  
ecahehipuca, vahi iúricaimahi némecharecahehini.

<sup>21</sup> Nupicahisera nátsirihacarehini nútí mayehe ema Viya  
íchavenénahini éti, vuíchaha étupiricavahini eta nuchimapira-  
heyare. Vahi nuvaraha ecaiyacanu éti enerejicavana ejecapa-  
vanahi, taicha eta ánaquiasiparihi eta émainajisiraichaha eta  
ecapecaturairana. Ímiyanavaichucha eta esenamarerahehi,  
étapa eta emapicaurahivaichucha.

## 13

*Eta máipicararesirahi ema Pablo eta táichecuaraqui eta macar-  
tane*

<sup>1-2</sup> Puiti mapahenapa eta néjirairaheya. Cape te nítesinehi,  
numetacahevanehi nútijacaruvahi, camuriripa eta nuconse-  
jachirahehi eti ejecapavanahi. Iúrihapaini ínajica eta emauri-  
vana. Puiti te nucartane, nápechavahi numetacahe emutu.  
Vaipa nucaiticaimahi nácani téjecapavanahi. Nútí nétupirica-  
vacaya.

<sup>3</sup> Etiarihihi eti épurunuhi eta mavanesiranuhi ema Cristo.  
Ímahayaresera ichape eta máimicatasiránuhi eta nétupirisira-  
heyare. Taicha éma, titupajijiacavahi eta máemecharesira-  
heyera. Tipicacare eta máicuñaraqui.

<sup>4</sup> Yátupi éma tísapavahi ticaetata, tímicutijiricavaipahi  
vahi macuratahahini ticatiuchava. Váhisera mánasihini  
máepenahini, tichavahi titareca puiti taicha eta  
máitupajijiasiravahi ema Viya. Ene nucahehi nútí  
nísapayarehi, tímicutijiricavahi vahi nucuratahairainahini.  
Ímahanuyaresera eta máijarasiranuhi eta máitupajijiasirava  
táichavenehi eta mávahásiranuhi eta nétupiricaheyarehi  
taicha nucatuparrahahi eta nujaneasiraheyarehi emutu éti.

<sup>5</sup> Nuvaraha esamavayare étijiva, te yátupihipuca tiúrihi eta  
éhisirahi ema Viáquenu Jesucristo, te yátupipuca eta mávahás-  
sirahehi éma. Taicha éma mávahácavacahi namutu ena  
machichanaveana yátupiqueneana. Machu émepururecava  
eta íjarasiravahi éhica éma.

<sup>6</sup> Nuvarahasera némechahe ímatinuhini yátupinahini eta  
mávahásiranuhi ema Cristo, jéhevare nútí yátupiquenenuhi  
machaneranuhi.

<sup>7</sup> Nútí, ichape eta nuyujarauchirahehi, nuyaseacahi ema  
Viya eta étupirisiravayarehi apaesa tacuija eviurevaina  
mayehe. Ichape eta nuvarairahi íchahini eta táuriqueneana.  
Tayanapanerinehipuca náepurunuhini, nuvarahasera  
ímiyanavayare éti íchayare eta táuriqueneana.

<sup>8</sup> Taicha nútí nutupiruvahi nicha eta táuriqueneana yátupi-queneana. Váhiquene nísapavaimahi nuhapapica eta yátupi-queneana. Eta tacahe, yátupina ésamiricava. Vaipa ecucamesa eta nápepejiricahe numetacahe.

<sup>9</sup> Ichape eta ecurisamurechiranuya te yátupinapa étupi-ricava. Étijivainapa eratahayare ecaratacava. Vaipa nútipa-racaimahi eyehe. Puiti eta nuyasearapi nútí me Viya, tamutu-yarepa tichavaya eta táurivahi eta ítaresira.

<sup>10</sup> Puiti nucajurehe eta juca carta, nucuchapavahi nútí eta néjirairaheyare, támuturipahini étupirica apaesa tacuijahini nucucayema. Váhivare nucusemaini eyehe. Nuvarahasera nétumechaya eta iáchanevana. Étahi eta nutuparacasivanahi me Viáquenu eta apóstolenuirahi mayehe.

<sup>11</sup> Tiuri puiti, nuparapenaveana, ítátijirícavahi. Etanucayare eta táuriqueneana eta ítaresirana. Ecurisamurechacaca. Tacuijahini eta semanerena eta eyehe. Tácuticaca eta epane-reruana. Máijaracahehini ema Viya eta tanarasiraina eta iáchanevana, taicha téavicavahi eta máemunaraivahi éma.

<sup>12</sup> Nútí néchajicahe emutu. Nuvaraha nétserarecahevacyare táicutiarahi eta táetavisiravahi eta némunasirahehi te mavahuana ema Viáquenu.

<sup>13</sup> Ani te juca téchajicaheana namutu ena vichamuriana.

<sup>14</sup> Nuyaseuchaheparaca emutu éti me Viáquenu Jesucristo táetaviuchahini eta iúricacarevaya máicha, evapinavaréni taicha eta máetaviuchirahi eta máemunasirahehi ema Viya. Macurisamurechaheparacaini tamutu sácheana ema Espíritu Santo. Tamutupa eta néchajiriruvanahi eyehe.

# Eta macartane ema Apóstole Pablo nayehe ena machamuriana ticavasanahi te Galacia, ticaijare

## GÁLATAS

<sup>1</sup> Nuti Pablo, yátupiquenenuhi mayehenu apóstole ema Jesucristo taicha manerejirunuhi. Ema Tata Vicaiyaquene ticutihi eta mapanereruhi ema Machicha eta máichuiranuhi. Puíticha émaquenehi ema Jesucristo tinacanuhi eta juca návacurehi apóstole, émarichuhi ema macáechepucusiquénehi te máecari. Vahi apanainahini achane ema tinacanuhi, énainahipucaini ena nucutiqueneanahi apóstoleana nanacanuhini eta juca návacurehi.

<sup>2</sup> Puiti nucajurehe eta juca carta eyehe eti nuchamuriana ecavasanahi tayehe eta avasareana tayeheana provincia eta Galacia. Téchajicaheana ena apamuriana vichamuriana te juca návihahi.

<sup>3</sup> Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Náijaracahehini eta táurivaina eta epanereruana.

<sup>4</sup> Ema Viáquenu tíjaracavahi tépena te crusu taicha mavarahahi ticuchucuhahaviyare tayehe eta vícuñayarehini táchavene eta vipecaturana, macámitiásinaháviripahivare eta vijamurachirainihi eta tamauriqueaneana tayehe eta juca apaquehe. Eta tacahéhi eta mapanereruhi ema Tata Vicaiyaquene.

<sup>5</sup> ¡Máichecuaraqureyarehi eta vijirauchiraya éma! Amén.

### *Étanarichu eta doctrina véhiruhi, tájina apanaina*

<sup>6</sup> Ichaperinehi eta ímipanereresiranuhi. Váhicha németeaca ene ácahehini eti éhicahini eta apanaqueñe doctrina. Tasapihana esuapahi eta juca, vaipa émainahini esuapa ema Viya. Ínajicavanepa eta esuapirainihi éma. Émepururecapa eta máichuirahéhi. Tasapiha émepururecapa eta máepeninahehi ema Jesucristo eta máemunasirahehi.

<sup>7</sup> Nutupiruva numetacahe, tájina apanaina doctrinaina tacuti eta juca véhiruhi víti. Néchahi eta juca íchararacavahi éti, nararihi ena témejecapavachaheanahi, navarahahi nahapapicayare eta vímiturapianahi tásiqueneanahi mayehe ema Cristo.

<sup>8-9</sup> Víti vímitucaheripahi eta juca yátupiqueneana, étarichuhi eta máechajiriruva ema Viya. Cape juca, te viávihaichaha eyehe, vimetakahévanehi eta macatichira ema Viya

eta apanapanequeneana doctrina nahapapiruanahi. Puiti nápechahevare numetacahe: Ticatichacareya me Viya nácani nahapapica eta vímitureheanaripa yátupiqueneanahi. Nútiripa, te nápechavahivaréni níteca eyehe, apánainapáipahivarepuccaini eta nímiturapiana, ticatichanuhini ema Viya taicha eta nuhapapisirainahini eta máechajiruvana. Téhevare máitecapucaini mácani émana máimicutichavapahini ema ángele másihaqueñenáhipucaini te anuma, te mavarahahivarepuca mahapapica eta vímitureheanaripa víti, énerichuvare macatichayarehi ema Viya.

<sup>10</sup> Nararihipuca ena témeteacanuanahi nuhapapicahi eta máechajiruvahi ema Viya, étainahipucaini níturusihahini ena achaneana, némemunasiravainahini nayehe. ¡Tájinaserá vahi nuhapapicahini núti! Nutupiruvahi eta nímituresirahi taicha nuvarahahi nucurisamurechaya ema Viya, nímerecavayarehi eta núriva eta mavanaranuirahi ema Jesucristo.

*Ema Pablo tímereuchava eta táichararacavahi eta masiapirahi apóstoleyare*

<sup>11</sup> Nuvaraha numetacahe eti nuparapenaveana eta juca nucametarairuirahi, vahi tásihaqueñenáhi te nupanereru núti.

<sup>12</sup> Váhivare nímitucasivainahi mayehe mácani apana achane nucutiquenehi apóstole. Émaquenehi tímítucanuhi ema Jesucristo.

<sup>13-14</sup> Éti esamairiricanuhi jácani eta níchararacavahi eta nítaresirahi cape juca násinequenehi, te étarichaha néhicahi eta nayehererepiana ena israelítana náchucanaveanainihi núti. Núti, eta nujurusirahi, nímahahi eta tacapicahuirahi eta viyeherepiana. Ichapehi eta némuracachiravahi, nucachuricavacahi ena nuparajuruanahi. Nímicapicauchahi muraca, numavarairahi táemitiequenehini eta viyeherepianahi nanaquipairuanahi ena náchucanaveanaini. Eta tacahehi, ichapemurihi eta nupanajirisiravacahi ena machaneranahi ema Viya, nuvarairahi nucámitiéquenehavacayarehíni eta náehisirahi ema Jesucristo.

<sup>15</sup> Námavaquenévahiséra eta manerejisiranuhi ema Viya, te vuíchaha núchucahini te sujuhe esu ticachichanu; tacahehi eta mapanereruhi eta máichuiranuyarehi, taicha eta máemunasi-ranuhi.

<sup>16</sup> Tásiba, tímimatichanuhi ema Machicha, taicha mavarahahi nucametarairuyare nayehe ena apavasanana eta macuchucuirayare namutu ena tisuapana ema Machicha. Váhisera nutanucahini nácani náimitucanuhini eta nucametarairuirayare. Nájinavare tuyasereruina.

<sup>17</sup> Váhivare nuyanahini te Jerusalén nutanupanahipucaini ena náinapureanahi apóstoleana. Téhechucha apauehe Arabia nucaijuhehi. Émasera ema Jesús, éma tímitucanuparacahi. Te váchupa, nuchavavarepa te avasare Damasco.

<sup>18</sup> Te mapanaquenepa año, nupaenumavapa nuyanahi te Jerusalén, étapa nímatinehi ema Pedro. Nunasipanapa quince sache nucahehi eta mayehe.

<sup>19</sup> Émapa ema Santiago, maparape ema Viáquenu, ema nímhahaquenehivare. Énasera ena apamuriana apóstoleana, nájina nímhahavacahini.

<sup>20</sup> (Puiti tímararacanuhi ema Viya, tájina vahi népiyahiraivaina eta juca nucáyemaqueneánapahi te juca nucartane. Nutupiruvahi eta numetasirahehi.)

<sup>21</sup> Tájinaserá vahi nucaimitucasihi nayehe taicha nuyanavanevarepa nucaijuhehi eta te Cilicia, nánucuhapa tayehe eta Siria.

<sup>22</sup> Tacáhe, ena vichamuriana ticavasanahi te Judea, váhivare náimatinuhini taicha vahi náyerehini tayehe.

<sup>23</sup> Tisamairiricanuanahisera eta néquesiravaripahi. Ánipaji tacáhehi eta nasamairirisiranuhi: “Ema maca Pablo tipanajiricahavihi cape juca viásinequenehi, ¡téquecavaripahi! Cape juca mavarahahi ticámitiéquenehaháviyarehíni eta juca véhiruhi. ¡Puiti émarinecha tétucaracavahi ticametarairuhi eta juca véhiruhi víti!” nacahepaji.

<sup>24</sup> Tacáhe, ichaperinehi eta nacunachirahi ema Viya níchavenehi núti eta néquesiravahi.

## 2

*Ema Pablo tímereuchava eta masiapamurihairapa ena apóstoleana, tásicha natupiruva najacapa éma*

<sup>1</sup> Catorce áñoripa eta táetavisiravahi, nupaenumavapa nápechavahi nuchava te Jerusalén. Émapasera ema Bernabé nucachanehi, émapa ema Tito.

<sup>2</sup> Taicha numetacasivahi me Viya te nuvapure eta nuyanirayarehi tayehe eta Jerusalén, véchajicacayare nayehe ena tachutirihanahi. Eta nítecapiro, viúrujicavapa, énachuchasera vicachanehi ena tachutirihanahi. Tásicha numetacavaca etá nímiturapihanahi eyehe eti apavasanana étapa etá esuapirahi. Taicha nuvarahahi ena vichamuriana israelítana najacapahehini eti apavasanana vichamurianari pahi.

<sup>3-4</sup> Te jena, natarihihi ena tépiyacavanahi vichamurianahi, tépiyahirahianapahi etá nasiapamurihairahavihi. Éna, navarahahi tipamicahavianayarehi etá vímitusirahe eti apavasanana éhica etá nayeherepiana ena israelítana. Taicha tacáhehi etá náechajiriruvahi éna, ítauchayarehiji

eta nayeherepiana éna, váhiji tacarichuimahi eta éhisirahi ema Jesucristo. Navarahahivare napamicayarehini eta macamarca ema Tito, eta apavasanairahi éma.

<sup>5</sup> Tájinaserá vahi vísapavahini nacachuriacahavihini, taicha víti vivarahahi tacuijahini tahapapicahehini eta éhisirahi eta yátupiqueneana téhicacareanahi.

<sup>6-9</sup> Tacalé, énaripa ema Santiago, ema Pedro, émapa ema Juan, énapa ena apamuriana náiyarahana ticutinuanahi eta nupanereruhi. Tájinavare vahi nametacanuhini eta apamuriana téchacareanahi nayehe. Étasera eta nasamiranuhi, náimativanepa eta émairahi ema Viya tituparacanuhi eta nucametarairuiraya nayehe ena apavasanana. Nucutihi eta macatuparalahairahi ema Pedro máimitusirayarehi ena israelítana. Ema Viya máijaracahi eta mávacurehi ema Pedro apóstolehi nayehe ena israelítana. Máijaracahivare eta móitupajijiasiravahi. Ene nucahehi núti tíjaracanuhi eta návacurehi apóstolenuhi nayehe ena apavasanana. Tíjaracanuhivare eta móitupajijiasiravahi. Eta tacalé, náimatipa eta émairahi ema Viya tíjaracasichanuhi eta juca nítuquenehi. Tacalé, tijupacahavianapa, núti émapa ema Bernabé. Eta juca náichirahavihi táicutiarahi eta náisapirahaviyarehi vímiyanava vímitucavacayare ena apavasanana. Éna, vímiyanavanayare tímiturecanahivare ena israelítana. (Tépurunuuarichuchapuca eta náimairanuhi. Tayanapanesera váhipuca nujacapacarehi nayehe eta apóstolenúirahi. Nútisera néchahi eta manerejisiranuhi ema Viya eta apóstolenúirayare.)

<sup>10</sup> Tacarichu tituparacahavianahi eta vímicatasirayarehi ena páureana. Eta tacalé puiti, nítouchahi núti eta nuvancasivahi nímicatasiravacaya ena páureana.

### *Ema Pablo tímereuchava eta macajachirahi ema Pedro*

<sup>11</sup> Te taequenepa, te jena áñoanahi, títecapanacha havipa ema Pedro te avasare Antioquía. Étasera eta mávhairahi viyehe, téjecapavainapa. Eta tacalé, nucajachapa éma.

<sup>12</sup> Eta máitecapirapa ema Pedro, tájinaipa máichiravainahini eta masamiravahi eta macachanejirisiravacahi ena apavasanana vichamurianahi, tinicahi eta nayehe. Tacalé, te jena sácheana, títecapanapa ena máemunacasareanahi ema Santiago, israelítana vichamurianahivare. Te máimahavacapa ema Pedro, titsirihapa éma eta macachaneravacahi ena apavasanana vichamurianahi. Vaipa mávarahahini macasiriquivacahini. Tipicahi eta nacaecahirahi ena tímicapicauchanahi eta nayeherepianahi ena israelítana.

13 Tacahe, ena apamuriana israelítana vichamurianahi, énerichuvare éna náehicapa eta máejecapiravahi ema Pedro. Térajicavanavare éna apanava. Émaripa ema Bernabé máehicavarepa eta náejecapiravahi éna.

14 Tacahe, te nímahapa núti eta náejecapiravahi, vahi táurihini eta náichaquenehi, nucajachapa ema Pedro te nami-ruhu ena vichamuriana taicha máejequihapa eta tavanairipihi eta yátupiqueneana máechajiruvana ema Jesús. Níchapa ema Pedro: “¿Tájaha tacayema eta pitsirihahi ena vijaneananana israelítana eta picachaneravacahi ena apamuriana vichamuriana apavasanana? Pémitisicavapapuca eta israelítavirahi capejuca pítaresirahi, táitusiava eta picachanejiricavacahi ena apavasanana vichamurianahi. Tásicha puiti, eta pímairapa náitecapirahi ena vijaneananarichu násihaqueneanahí te Jerusalén, péquecavavarepa nayehe. Váipa pávaraha picachanehini ena apavasananahi vichamurianahi ticutiripahi eta vahi vichamurianainahini éna. Pivarahapuca náepiyacava israelítanáina éna apanavare” níchapa ema Pedro.

*Namutuchucha tijacapacareanaya me Viya nácani navarahuaya téhicanayare ema Jesús*

15-16 Tacahe, numetacavacapa namutu eta juca yátupiquenehi: Véchahi víti eta vahi tácamesaimahi vítauchahini eta nayeherepianaini ena viáchucanaveanaini. Tarataripahi eta véhisirahi ema Jesucristo, vijacapacaréipa vimutu eta mayehe ema Viya. Énaripa ena apavasanana, tayanapanehi náetaviuchahi éna eta nasipecaturaraivahi viyehe viti israelítana, titujicavanayarehisera tijacapacareanaya me Viya taicha eta náehisirahi ema Jesucristo. Tayanapane vítamuturucahipuca eta mavanairipiana ema Moiséini, tájina vahi vajacapacarémahi víti eta me Viya táicha. Vimutu vijacapacare eta me Viya táichavenechucha eta véhisirahi ema Jesús.

17 Natarihipuca ena téjecapavanahí te napanereruana, ánipuca nacahehi eta náechajiriruvahi: “Yátupipucáji eta vijacapacarehi me Viya táichavenechucha eta véhisiraya ema Cristo, vivetijinapaserapuca tiápajucavainapapuca eta visipe-caturaivaya taicha vínjacainapa eta vanairipiana. Tacahe, émapapuca ema Cristo táemesiavaya eta vicapecaturaivaya” tacahenapapuca eta napanereruhi. Éna, timápachichijírvachucha te napanereruana. Ema Cristo váhiqene émaina tásicha eta pecatuana.

18-19 Eta néhisrainihi apaicape eta vanairipiana, tájinachucha vahi táimicatacanuhini eta nujacapacarevayarehi me Viya taicha váhiqene étaparacaina. Eta tacahe, nínajicahi eta néhisrainihi. Nímatiripasera eta

nujacapacarevarehi me Viya táichavene eta nucasiñairahi eta mayehe. Puíticha tiúripa eta nítaresirahi me Viya. Tásicha, ichapenapahini eta néjecapiravaya núti apana, te nuchavapuca néhica eta mavanairipiana ema Moiséini.

<sup>20</sup> Eta nusuapiroha eti máepenirahi ema Cristo te crusu, nujacapacarehi me Viya. Puiti, vaipa nútijivaina necha eta nítaresirahi. Émapa téchanuhi ema Cristo tamutu eta nítaresirahi. Émapa nucasiñahi taicha yátupihi eta macasiñacarevahí taicha yátupiquenehi Machichahi ema Viya. Eta máemunasiranuhi, tímijararecavahi níchavenehi núti.

<sup>21</sup> Vahi némepururecaimahi núti eti máemunasiranuhi ema Viya. Nararihisera ena tímijachavanahi tijacapacareana mayehe táichavenechucha eta navairirahi náitaucha eta vanairipiana. Ena nani, tímicutijiricavahi náemepururecahi eti mapanereru étapa eti máemunasiravacahi. Tímicutijiri- cavahi náemepururecahivare eti máepenirahi ema Jesucristo te crusu.

### 3

*Tacarichuchucha eta vicasiñairahi ema Jesús, vijacapacaréipa me Viya*

<sup>1</sup> ¡Páurehechapucaini, eti nuparapenaveana gálatana! Ímijachaipapuca étupicavahi eta juca ecahehi. Ínajicavanepa eta éhisirainihi eta yátupiqueneanahi. Vímimaticahaheripahi eta iúricacarevahí tásichaquenehi eta máepenirahi ema Viáquenu Jesucristo te crusu. ¿Tájaha tacayema émepururecahi eti juca iúricacarevayarehini?

<sup>2</sup> Esamanuchaha, puiti nuvaraha numetacaheyare. Eta máovahásirahehi ema Espíritu Santo, éta tíchahi eti éhisirahi ema Jesucristo. Vahi étainahini taicha eti ítauraivainahipucaini eti vanairipiana.

<sup>3</sup> ¡Tétavicavapa eti esunsuvavaca éti! Te épanavapa eti éhisirahi, tájinainiripahi íchiravainahíni máicha ema Espíritu Santo. Éma tétumechahehi. Puítisera éti evarahapa ínajicaya eti máovahásirahénihi, ímijachaipapuca eti ticuchucuhahayare eti éjairavanahi.

<sup>4</sup> Tamapurujinapapuca eti máimicatasirahehi ema Espíritu Santo. Németeacasera núti vuíchaha émepururecavaimahi.

<sup>5</sup> Ema Viya tíjaracaheripahi ema Espíritu Santo eti máovahásirahehi. Tímechahehivare eti tiáramicareana. Étaripa macatajisirahehi táichavenehi eti ecasiñavairahi tayehé eti máechajiruvana. Étasera eti ítauraivainahipucaini eti vanairipiana, tájinainapa támijaracahehini.

**6** Énerichuvare macahehi ema viáchucaini Abraham. Ticasinavahi éma tayehe eta máechajiruvana ema Viya. Tásicha, ema Viya, ichape eta majacapirahi éma. Máemitisicahi tamutu eta máejecapiravanahi.

**7** Puiti, yátupina ácaicutiara eta juca: Te yátupina vicasiñava me Viya, vijacapacareya mayehe, taicha vicutiyare ema viáchucaini Abraham eta macasiñavairahi me Viya.

**8** Ema Viya mamecacahi ema Abraham eta najacapacarevahí mayehe, nácani ticasinavanayare éma. Áni macahehi eta máichirahí: “Tétavicavayare eta náuricacarevayare ena achaneana te tamutu avasareana nácani ticutivianayare eta picasiñairanuhi nútí” máichapa ema Viya.

**9** Tásicha, viti vicasiñanahi puiti, tétavicavayarehi eta viúricacarevayare, taicha vicutinapa ema Abraham eta macasiñairahi ema Viya.

**10-12** Natiarihisera ena tímijachavanahi tijacapacareanayare me Viya táichavenehi eta navarairahi náitamuturuca eta vanairipiana. Téjecapavanapahisera. Taicha ani tacahe eta vanairipi: “Tamutu sácheana ítauchayare tamutu eta juca vanairipiana. Te éjequihá apaesachichaina, éta tímicuñacaheyare”. Váhiquenesera naratahahini náitaucha tamutu eta vanairipiana. Eta tacahe, náviraichu ticaicuñaya, vahi tijacapacareanaimahi. Ánivare tacahe eta vanairipi: “Te ítamuturuca eta vanairipiana, máichecuaraqureyare eta ítaresirayare táicha”. Tásicha, vímatiequeneha eta juca: Eta náitamuturusira ena achaneana, éta tavaraha eta vanairipiana. Tájina étaparacaina eta nacasiñairava me Viya. Ánisera tacahe eta Sagrada Escritura: “Nácani ticasinavanahí me Viya, tijacapacareanahí, máichecuaraqureyare eta náitaresiraya táicha”. Tásicha, nuvaraha ácaicutiara eta juca: Eta vijacapacarevahí tásihahi eta vicasiñavairahi me Viya. Eta vítauchirapuca eta vanairipiana, tájina étaparacainahíni tayehe eta vijacapacareva me Viya.

**13** Ánivare tacahe eta Sagrada Escritura: “Mácani achane ichape eta maviureva, ticaetatacasiyarehi te yucuqui. Eta táicutiarahi eta máicuñasirayare ema Viya eta máchaneva”. Viti achaneana, ichape eta vícuñayarehini taicha eta vimaitau-chirahi tamutu eta vanairipiana. Émasera ema Jesucristo, tépeninahavihi te crusu, tamuriasirahi tamutu eta vícuñayarehini víti.

**14** Éma máichahí eta juca, mavarairahi eta iúricacarevayare eti apavasanana táichavenehi eta ecutirahi ema Abraham eta macasiñairahi ema Viya. Puiti, tétavicavahí eta viúricacareva vimutu, taicha tiávahácahavihi ema Espíritu Santo máijararu-havihi ema Viya táichavenehi eta vicasiñairahi ema Jesucristo.

*Tájinachucha tíjaracahavi eta véhisirahi eta mavanairipiana ema Moiséini. Macarichu ema Viya tíjaracahaviya eta viúricacarevaya.*

<sup>15</sup> Nuparapenaveana, nuvaraha nímicutiarachináheyare eta juca. Te matiarihipuca ema achane, te tépiyarecahi tratu mayehe ema apana achane, nafirmachayarehi eta natratunehi. Tásicha, nafirmacharipa eta natratunehi, vaipa táuricaimahi nacaepaha eta tacajuquenehi. Nájinapavare tihapapicaimahi.

<sup>16</sup> Ene macahehi ema Viya eta matratunehi mayehe ema Abraham. Ani macahehi: “Níjaracavyare píti eta piúricacarevayare. Énerichuvare níjaracayare eta máuricacarevayare ema piámariéqueneyare” macahepa ema Viya. Tacache, émanarichuhi ema mámariequenehi ema táimijarechaquenehi eta matratune, vahi námutuhini ena nasimutuvaqueneanayarehi mámariéquenayarehi ema Abraham. É mahi ema ticajarehi Cristo.

<sup>17</sup> Tiuri puiti, nuvaraha nímicaecherachaya eta eyehe: Eta juca matratunehi ema Viya mayehe ema Abraham, mafirmachaquenehi eta máijarasirayare eta náuricacarevaya nácani ticasíñavana eta mayehe. Étasera eta táetavisiravahi eta 430 áñoripahi, te májuchapa ema Moiséini eta vanairipianahi, vahi macaepahahini ema Viya eta matratunehi, váhivare máitsivachahini eta máijarasirayarehi ema Jesús, mámariéquénehi ema Abraham.

<sup>18</sup> Ema Viya mametacahi ema Abraham eta máijarasirayare eta máuricacarevayare, taicha eta máemunasirahi éma. Ene vicahéhi víti. Ema Viya tíjaracahaviyare eta viúricacareva taicha témunacahavihi. Eta viúricacarevaya, vahi étainahini eta vítauchirainahipucaini eta vanairipiana.

<sup>19-20</sup> Etiarihipuca eti evaraha eyaserecanu, ánipapuca ecaheya: “Te yátupipuca vaipa étaparacaina eta vítauchiraina eta vanairipiana, ¿tajahaserapuca tacayemahi eta mavanesirahi ema Viya májucha ema Moiséini eta juca mavanairipiana?” Tiuri, puiti numetacaheya: Yátupi ema Viya máimivanerecahi ema Moiséini májucha eta vanairipiana, taicha mavarahahi máimimatichayare ena achaneana eta tamaurivahi eta pecatuan. Téhesera te títecápapa ema Cristo, vaipa táimiyanavahini tasuapacarehini eta mavanairipianahi ema Moiséini. Arairupa tamutu eta véhiruhi maicha ema Jesús. Yátupi ema Viya matupiruvahi eta máechajisirahi ema Abraham. Vahi máimivanerecahini ema Viya, émajacarúvahí éma, eta máechajisirahi. Émasera ema Moiséini macaimitucasiquenechucha nayehe ena ángeleana.

*Eta mavanairipiana ema Moiséini tivanecahavi vahi viciuquicha eta pecatuana taicha tíñehicarehi eta júcana mayehe ema Viya*

<sup>21</sup> Puiti németeaca etiarihichaha eti ímijachahipuca tacarichuhi téhicacarehi eta vanairipiana. Esamanuchaha. Váhiquene étaimahi vájacapacarehíni eta me Viya. Váhivare étainayare ticaitarecahaviyare.

<sup>22</sup> Esama eta juca máechajiruvahi ema Viya eta te Sagrada Escritura, ani tacahe: “Náicuchirichuhi eta náicuñayarehi namutu ena achaneana taicha eta napecaturanahi” tacahepa. Jararihisera eta viúchucuirayare taicha tíjaracavahi ema Viya ticuchucuhahaviyare vimutu viti vicasíñanaya ema Machicha Jesucristo.

<sup>23</sup> Ánaquiaparipa eta tacarataseravacahi eta mavanairipiana ema Moiséini nayehe ena israelítana náchucanaveanaini nútì. Vahi táisapahini tasimutuhichaini eta napecaturana. Tiámainucavapa te títecápapa ema Jesucristo, émapa tímitucahavihi eta arairuyarehi eta véhiruyare.

<sup>24</sup> Táitaurevaquene eta mavanairipiana ema Moiséini eta típicararécahávihi tayehe eta táíñehicarevahi eta vicapecaturairana. Éta, tétupiricahavihi tacutihi mácani profesor eta máetupirisiravacahi eta napanereruana ena máimitureana. Ene tacahehi eta táechapajirisrahavihi eta mavanairipiana ema Moiséini. Puítisera eta máitecapiraipahi ema Jesucristo, émapa véhicayare, vijacapacarénapa me Viya taicha eta vicasíñairahi ema Jesús.

<sup>25</sup> Puíticha, émainapa véhicayare éma, vaipa étaimahi véhica eta mavanairipiana ema Moiséini.

<sup>26</sup> Puiti, eta ecaicachasirahi te máijare ema Jesucristo, tiávhácaheripa éma, éti ecutinapa eta máurivahi.

<sup>27</sup> Puiti, eta ecaicachasirahi te máijare ema Jesucristo, tiávhácaheripa éma, éti ecutinapa eta máurivahi.

<sup>28</sup> Tayanapane apavasasajuecuhehi éti; tayanapanehivre ecasiriquiquíjhi eti ajairana, ena esenana; tayanapanehivre músuapanuca, líbreanapanuca. Téhesera te mamirahu ema Viya, étanarichuhi eta ví mahi.

<sup>29</sup> Puiti machichaheripa ema Cristo; tásicha, ecutiripa

mámariequenehénahini ema Abraham. Ímaequenehá-

richucha eta matratunehi ema Viya eta máijarasiraheyare

eta iúricacareyare táicha.

## 4

<sup>1-2</sup> Esamanuchaha. Nuvaraha nímicutiarachináheyare. Te matiarihipuca ema achane camurihi eta máimahaqueneana te mapena, te matiarihipuca

ema machicha, téhesera te amaperurichaha éma, natarihiyarehi ena téchapajiricanayare, énapa ena tímítucanayareva. Vahi náisapaimahi mamápachichijicaimahi eta máimahaqueneanahi ema maiya, tayanapané émahinéni ticayeheyare tamutu. Tiámainucavasera te máimahapa ema maiya eta máechemaraivahi ema machicha, másapainapa eta máemamacá eta máimahaqueneanahi.

<sup>3</sup> Ene vicahehi víti cape juca viásinequene te vuíchaha vímatihini ema Cristo, vicutinihi ena amaperuana. Tipamica-havianahi véhica eta nayeherepiana ena viáchucanaveanaini.

<sup>4</sup> Émasera ema Viya, te máimaha tiuri eta táitauchiravyarepa eta mapanereruhi, máevatacapa ema Machicha te juca apaquehe. Ema Jesús, tiáchanechavapa te sujuhe esu maena. Eta máuchusirahi, vivasimahi eta vicaqueherahi viti achaneana. Eta majurusirahi, ticaravahupa eta viyehe-repiana viti israelítana.

<sup>5</sup> Eta tímitecahi éma, mavarahahi ticuchucuhahaviyare viti achaneana. Mavarahahivare vimutu vijacapacareyarepa me Viya, machichahaviyarepa.

<sup>6</sup> Puiti, eta machichairaheripa ema Viya, tíjaracaheripa ema Espíritu Santo tiávahácaheripa te esamureana. Émapa témechahehi mayehe ema Viya, tímítucahepa eta eyujarauchi-ravaya: “Tátachicha Vicaiyaquene” ecahenapa.

<sup>7</sup> Tacahehira eta machichairaheripa, vaipa ísapaimahi nácani napamicahehini tayehe eta nayeherepiana. Tíjaracaheripa ema Cristo eta iúrvaya, iúchucuirayare máicha.

### *Ema Pablo, nahapasamurechahi ena machamuriana*

<sup>8</sup> Cape juca iásinequenehi éti, vuíchaha ímatihini ema Viya, váhivare epicauchahini éma. Énachucha epicauchavacahi ena esiñarajiana. Tájina eratahaimahi émitisica eta eyujarauchi-rahí tayehe. Éna, vahi yátupinahini víyanainahini, váhivare távahácavacaimahi eta máchaneva ema Viya.

<sup>9</sup> Puítisera, ímatipa ema yátupiquenehi Viya. Tásiha, énerichuvare éma tímatihevacapa, esamacarepa mayehe, taicha machichaheripa. Tásiha puiti, ¿tájaha tacayema evarahavarepa echavayare eta ecasiñayare eta esiñarajiana? Eta ecasiñasanahí, tájina vahi tisamaheanaimahi, váhivare tímica-tacaheanaimahi tayehe eta panererucana. ¿Tájaha tacayema ísapava napamicahe eta ítauchira eta nayeherepiana?

<sup>10</sup> ¿Tájaha tacayema enasirichuhi epicaucha eta piéstamuhaná, étapa eta aracherumuhaná caje?

<sup>11</sup> ¡Ichape eta néñamiravahi eyehe! ¡Tájuricati támápurujipahi eta juca nímitusirahehi!

<sup>12</sup> Esamanuchaha, nuparapenaveana. Nuvaraha vácuticacahini eta vipanereruana. Váhini vicuehicaini eta nayeherepiana ena achaneana. Németeaca esuapanu taicha vahi eyacujequenehanuhini.

<sup>13</sup> Éti etupiruvahi ejacapanu cape te nítecainapa eta ara eyehe. Écharichuhi eta nucajumairapahi te nítecapauchahepa. Etupiruvahisera esuapa eta numetarairuhi eta eyehe.

<sup>14</sup> Vahi ecaecahinuhini eta nucajumairapahi. Váhivare épurunuhini. Tiúrihi eta ejacapiranuhi tímicutijircavainehi ángelenuinahini, Crístonuinahipucaini.

<sup>15</sup> Ichape eta iúrisamurevahí te jena sácheana eta návhairahi eyehe. Nímatihi tétabicavahí eta émunasiranuhi. Te nucamu-nuvahí, evarahahi íjaracanu eta ecayehequeneana. Tájina éñamahini. Ichape eta nucunachirahehi. Tacáhe, máejeha néchajisihahí eta émunasiranuhi.

<sup>16</sup> Eti ímijachaipapuca nucatichirahehi eta numetasirahehi puiti eta juca yátupiqueneana.

<sup>17</sup> Ena nani téchapajiricaheanahí, váhisera tátupiruvahini eta náemunasirahehi, navarairachucha típicasicaheanayare apaesa vahi ecusuapanu nútí, eta vaipa ecuehicanuhi. Navarahahivare éhicayare eta nayeherepiana apaesa énainapa échapajiricayarehi.

<sup>18</sup> Tiuri, nútí vahi nucaticha eta ítatiraina ena apamuriana achaneana. Táurisera eta náemunasiráhena tácuti eta némunasirahehi nútí. Éti apanavare evapinavayare táchutirichu te nutiarihihi eyehe.

<sup>19</sup> Nuchichanavechichana, tétabicavapa tacativa nusama taicha eta ímipanereresiranuhi. Ticutirinehi súcani esena ticatiruhapa, taicha ticatihi susama eta amuya. Ene nucuhehi nútí eta nucatisamureravahí, néñamiravahí icha éti. Nuvaraha ácutini ema Cristo eta máurivahí. Tiámainucava te nímahehepa ecutinasipa éma eta máurivahí, núrisamurenapa icha.

<sup>20</sup> Eta tacáhe, nuvarahanecha níjahúchavahini nítecapauchahe. Nútijacaruvainapáini néchajiricavahini eta eyehe eta nímitusirahenahini. Ichapemurihi eta ímipanererésiranuhi.

*Ema Pablo máimicuicha ena apinana machichana ema Abraham*

<sup>21</sup> Éti evarahapa éhica eta mayeherepiainaini ema Moiséini, puiti nuvaraha níminecapaequenehaheya eta táchajiriruvahí eta Sagrada Escritura mayehe ema Abraham.

<sup>22</sup> Táchajisihahí éma, apinanairahi ena machichanaveana ajairana. Ema máinapurehi machicha ticaijarehi Ismael, esu

maena ticaijaru Agar. Ema máequenereruhi machicha ticaijarehi Isaac, esu maena ticaijaru Sara. Esu Sara, mayenaguenehi ema Abraham. Esu Agar, suvanarahi esu Sara.

<sup>23</sup> Esu Agar, araitanaichahahi ésu, te sucachichainapa ema Ismael. Ésusera esu Sara macheruhi eta suítaresirahi. Étasera eta mítupajijasiravahi ema Viya, máijaracapa ema suchichahhi Isaac. Taicha ema Viya máechajicahi ema Abraham, ánipa macahe: “Esu piyena Sara ticachichayare. Ajairyare ema suchicha”.

<sup>24-25</sup> Puiti, nuvaraha nímicutiarachinaheya nayehe ena nani apinana esenana. Esu Sara, tájina suímatiyahini eta vanaracacare, nájina nahapapiricahini ésu. Ene vicahehi víti eta véhisirahi ema Cristo, nájina tihapapiricahavimahi. Vahi suácutihini esu Agar, tapamicahi eta suématanerepi taicha sirvientahi ésu. Ene nacahehi ena israelítana náchucanaveanaini núti, napamicasivahi naicha tayehe eta nayehe-repianaini. Étarichuhi eta vanairipiana májuchaqueneanahi ema Moiséini te mávihaipahi eta te anuquehe mari ticaijarehi Sinaí, táupahiva eta provincia Arabia, návasahi ena suámarie-queneanaini esu Agar. Puíticha ena nujaneanana tachichanaveanahi eta Jerusalén nanasirichuhi eta tapamisiravacahi eta vanairipiana.

<sup>26</sup> Jararihisera eta apanahivare avasare ticaijare Jerusalén, tiávihahi te anuma. Víti tachichanaveanahi. Vaipa vítiparacainahini tapamicahavihini eta vanairipianaini.

<sup>27</sup> Ema Viya máechajisihahi eta te Sagrada Escritura eta juca arairu Jerusalén. Máimicutichinahi esu ésuna esena. Ánipa macahe: “Piti esena macheruvinihi eta pítaresirahi, tájina vahi pímatihini eta tacativa eta amuya. Puítisera tétabicavainapa eta piúrisamurevaya. Vaipa pánasimahi macheruvimahi taicha nárajapainapa ena pichichanaveanaya níjaruviyare núti. Picachuricainapa nácani esenana ticachicharohana” —macahepa ema Viya.

<sup>28</sup> Nuparapenaveana, viti véhicanahi ema Jesus, vítira tachichahavianahi eta arairu Jerusalén, taicha vitupara-hachuhi eta tachichairahaviyare tacuti eta sucatupara-hairahi esu Sara mayehe ema Viya, eta sucachichairayare ema Isaac.

<sup>29</sup> Tacahe, ema Ismael, suchicha esu Agar, macatianacapa ema amuya Isaac, ema suchicha esu Sara máijararuhi ema Espíritu Santo. Puíticha, tanasirichuhi eta nacatianasirahavihi ena téhicanahi eta vanairipiana vimutu viti mávaháruanahi ema Espíritu Santo.

<sup>30</sup> Ánívarepa tacahe eta Sagrada Escritura: “Pivaneca esu Agar émapa ema suchicha, nayana náuchuca eta piyeha.

Taicha vahi táuricahini mavehahini eta pímaqueneana te táitecapapa eta pépeniraina. Macarichuyare ema pichicha suyehe esu piyenaquene tivehayare tamutu” tacahepa.

<sup>31</sup> Nuparapenaveana, ene vicaheli víti. Vahi vácutihini ema suchicha esu sirvienta. Vicutihi víti ema Isaac eta tamajinairahi eta vipamicasivainahini eta vítauchiraya eta vanairipiana, maicha ema Jesús.

## 5

*Vímiyanavachucha vélhica ema Jesús. Vahi vicuehica eta manairipiana ema Moiséini.*

<sup>1</sup> Puiti nuvaraha yátupina ácaicutiara eta macatiuchirahehi ema Cristo, eta vaipa étaparacainayare ítaucha eta vanairipiana. Váipavare ecuisapava te náviraichupuca napamicahe, taicha ticajerayare eta ítauchiraina, machu ajirehéna táicha. Étipasera tacamunu étumechava te nayehe ena nani.

<sup>2</sup> Nuti Pablo nutupiruva numetacahe: Te ísapavapuca namarcachahe, tímicutijircavahi tépurucarehi eyehe ema Cristo. Tímicutijircahivare vahi márataha ticuchucuhahé éti.

<sup>3</sup> Énerichuvare numetacahe: Namutu nácani ajairana tísapavanayare ticamarca, tacamunuhi náitauchayare tamutu eta vanairipiana. Tájina ánichichaimahi nájequihaimahi éta.

<sup>4</sup> Eti enerejiruvana éhica eta vanairipiana, ímijachaipapuca ejacapacareipa mayehe ema Viya. Émepururecaripasera eta máemunasirahehi ema Viya. Émepururecahivare eta máimicasirahehi ema Cristo.

<sup>5</sup> Vítisera viti vicasiñanahi ema Jesucristo vicunevaripa eta majacapirohaviya ema Viya máichavenehi ema Espíritu Santo eta mávhásirahavihi.

<sup>6</sup> Eta mávhásirahavi ema Jesucristo, vahi étaparacaimahi eta vicamarcapucaini. Tacarichu ticamunucarehi eta vicasiñairayare yátupina éma, vémunarahinapa eta vítaresiraya.

<sup>7</sup> Éti, iúrinipahi eta éhisirahi ema Jesús. ¿Tájahaserapuca tacayemahi eta evarairahi ecainajiruva? Ísapavayarepa tiyurucaheana, tímajicaheanayarepaini eta yátupiqueñeanahi.

<sup>8</sup> Éti máichuhaqueñeanarichuhi ema Viya eta éhisiraya eta yátupiqueneñanahi. Váhiqene mávarahahini ísapavahini nácani nahapapicahehini.

<sup>9</sup> Échapavaicha nayehe ena tiyururahiana, machu napareacahé.

<sup>10</sup> Nútisera nucasíñavahi eta me Viáquenu eta mamaisapiraheyare ínajicava. Németeacahi vahi ínajicaimahi eta nímiturapianahi. Émasera ema Viya téchahi eta juca náicuñayare nácani tivarahanahi tihapapicaheana.

<sup>11</sup> Esamanurichuhi, eti nuparapenaveana. Natarihihipuca nácani tépiyaequenehanuanahi eta nupamisirahehi ecamarca eti nuchamurianahi apavasananahi. Étasera eta nímitusirahehi, tájina váhiquene nupamicahehini eta ecamarca rayare. Nasapihapa ena nujaneanana israelítana tipanjiricanuanahi taicha vahi nupamicahehini ecamarca. Étaratímiyusemacavacahi eta nasamirahi eta nucametarairuirahieita viúchucuiraya táichavenehi eta máepenirahi te crusu ema Jesús.

<sup>12</sup> Ena nani tipamicaheanahi ecamarca, ¡náechatitcavaichaha énajivaina! ¡Nuvarahasa yátupinapainináechatihicavaini!

<sup>13</sup> Taicha eti nuparapenaveana, vahi étina tímichuhahahehi mayehe ema Viya eta éhicayare eta mavanairipiana ema Moiséini. Váhivaresera étijiricavaimahi íchayarehi eta evarahaqueneanahi tamauriqueneana. Ema Viya tíchuhahahehi, mavarairahi étijivaya ítátijiricacayarehi taicha eta émunasiracacainahi.

<sup>14</sup> Ema ticavanairipi, ánipa macahe: “Pémunaca ema piparaepiya tacuti eta pémunasiravahi píti” macahepa. Te vítauchapuca yátupi eta juca mavanairipi, vahi táchajera eta vítauchiraina jácani apana vanairipi.

<sup>15</sup> Vahi táurica ecatichajiricacahini. Váhivare táurica ecatinajiricacahini, machu étijivaina ecamitiequenehacaca.

*Ema Espíritu Santo tímicatacavahavi eta vahi vicusuapa eta tajamurachaqueneanahi eta viáquehe*

<sup>16-17</sup> Esamanuchaha. Ema Espíritu Santo mavaraha tímicatacavahavi eta vahi vicusuapa eta tajamurachaqueneanahi eta viáqueheana. Étasera eta viáquehe vahi tásapa eta víchiraina eta táuriqueneana. Étachucha tavaraha vicha eta tajamurachaqueneanahi. Eta tacahe, ichapemurihi eta tacanarairahi ema Espíritu Santo. Tacahe, nécatiacahecha puiti eta esuapirainaicha eta mavarahaqueneanahi maicha ema Espíritu Santo eta eyehe.

<sup>18</sup> Eta tacahe, éti, te émainapuca ema Espíritu Santo tímítucae, maejeha eta íchiraina eta táuriqueneana. Vahi étaparacaimahi eta episira eta ícuñayarepuca, táichavenehi eta jácani ejecapiranapuca tayehe eta vanairipiana.

<sup>19</sup> Tímaticareanahi eta tamauriquenehi eta náichaqueneana ena tisuapanahi eta tavarahaquenehi eta náquehe: Navehana esu apana esena, ésupa esu esena suvehapa ema apana achane. Ena amaperuana náichahi eta natuhusivanahi. Nararihi ena tivehacacanahi ena nacutiqueneana ajairana. Tavayuasiravacahi eta najamuraraivanahi.

<sup>20</sup> Natanucahi eta nasiñarajiyare. Nacaravahuhi eta iápemarecáre. Ticatianarecanahi tisemacacanahi. Téteajiricacanahi. Apaesarichu nacamunu tisemanaripavare. Énachucha navaraha titucavana, nacachuriaracapa mácani achane. Típutsimuriávanapa nayehe nácani apamuriana. Vaipa navaraha tipauchcacacana.

<sup>21</sup> Ticapinarucacanapa. Ticapahianapa. Ticavaharasianavare. Piéstamareana. Tamutuchucha naicha eta tájiparacana. Puiti numetacahevare nápechava, tacutihí eta numetasirahehi cape juca viásinequenehi. Vahi titujicavanaimahi tisiapaná te mávasa ema Viya ena tíchanahi eta juca tamauriqueneanahi.

<sup>22</sup> Vítisera, tiávahácahavihi ema Espíritu Santo. Te vísapá éma, tíjaracahavihi eta vémunaraivaya. Viúrisamurerecavayare, tinaracainapa eta vianereruana máicha. Tíjaracahavi eta vicayeheraya paciencia. Vijapanurahiya máicha. Vicajiraivayareva máicha. Vítaurahiyare. Vétaviuchaya eta viúrivayare. Tímicatakahaviya eta vijaneasiravaya apaesa vahi vicuquicha eta tamauriqueneanahi.

<sup>23</sup> Te vítauchahi tamutu eta júcana, vicurisamurechahi ema Viya\*.

<sup>24</sup> Tacahe, viti vélhicanaripa ema Jesucristo, vaipa víchaimahi eta tamauriqueneanahi tajamurachaqueneanahi eta viáquehe.

<sup>25</sup> Tásapihapapuca, eta mávahásirahaviripa ema Espíritu Santo, vísapavaya vámputu eta mavarahaqueneana máichayare te viáquehe.

<sup>26</sup> Vaipa táuricahini ecasiñavavaicahini ecapinarujiricacahi-pucaini. Váhivare etanucaimahi eta semanere mayehe mácani echamuri.

## 6

### Vímicatajiricacayare

<sup>1</sup> Nuparapenaveana, te natarihipuca ímaha téjecapavanahi ena vichamuriana, econsejachayare éti ímatiequeneharipa maicha ema Espíritu Santo. Táurisera eta échajirisiraina. Ecauneuchava éti apanava, machu iáquipaicava tayehe eta máquipaisiavahi ema echamuri.

<sup>2</sup> Ímicatacaca eta ecatiuchiravaina eta jácani íchararacavanhí. Ene tacahehi eta ítauchirahi eta mavanairipi ema Viáquenu Jesucristo, étaripa eta vémunasiracacayarehi.

---

\* **5:23** Ema Pablo te mayeherepi eta máechajiriruvana, ani macahe: “Tájina jácani vanairipi tapamicahavihini vahi vícha eta juca táuriqueneana”. Étasera eta macayemaquenehi, ani tacahe: “Vicatuparaha víchayarehi tamutu eta juca táuriqueneana”.

3 Taicha nararihi ena tímijachavanahí vahi tiáquipaicavánimahi tayehe eta pecatuana. Vahi ecucahe éti. Vahi tacaemuñavacarehini, taicha eta juca vahi tánecapácáre.

4 Váhivare tácaemuñavacare vácahehipucaini: “Núti, vahirichu nusipecatura. Núripana nayehe ena apamurirana”. Te viúrihipuca, vimatinairayarechucha. Víti véchinavahi eta viúrivahi eta vítaresirahi.

5 Véchaquenepapáchupa víti eta vítaresiraya mayehe ema Viya.

6 Nutuparacahe eta apana. Ecajiyare eta ímahaqueneana mácani tímítucae eta máechajiriruva ema Viya, taicha eyeheyarehi eta máimiturapiana eta tiúrichaheyarehi.

7 Numetacahevare eta apana. Nuvaraha étupiricaya eta epanereruana. Machu ecatianaca ema Viya. Taicha te icha eta pecatuana, yátupiqueneyare eta ecamitiequenehavayare.

8 Te icha eta tájiparácana tavarahaqueneanahí eta iáqueheana, étarichuhi ticamitiequenehaheyare eta ítaresirana, tímicoñacaheyareva. Téhesera icha eta táuriqueneana mavarahaqueneanahí ema Espíritu Santo, yátupina táurina eta ítaresira. Ímahayareva eta iúchucuiraya, máichecuaraquirénapa eta iúricacarevaya.

9 Eta tacahe, vahi vicucainajiruva eta víchirahi eta táuriqueneana. Váhivare vicuyacujiequenehava eta vicuchapirahi eta vícuchihi mayehe ema Viya te táitecapapa eta jena sácheyare máijarasirahaviyare.

10 Táitusiava, te tatiarihinapuca eta vicamunucarevana nayehe ena achaneana, te vímahahipuca eta nacamunuiravahi, vítijivayare víchayare eta táuriqueneana nayehe. Tavetijipa te énahipuca tipauchahavianahí ena vichamurianahí tayehe eta juca véhiruhi, vicajiyarehi éna.

### *Eta táichecuaraqui eta máechajiriruva ema Pablo*

11 Ímaha ichapevacanecha eta juca nuletrana. Nuvahuru-pajipa nútì eta juca nucajureirahehi éti.

12 Ena nujaneanana israelítana, téavicavahi eta nasemanevahi viyehe viti vicametarairuhi eta viúchucuiraya táichavenehi eta máepenirahi ema Cristo te crusu. Tásicha, ena nani ticamesajiricaheanahí navaraha ecamarcaya, éna navaraha témemunacavanayare nayehe ena nujaneanana, apaesa vaipa nacupanajiricavaca. Navaraha nahapapicayarehi eta nasemaneva.

13 Navarahahivare ticunachavanayare eta nacamesai-rahehi ecamarca te iáquehe, náimiturehéna éti eta éhisiraina eta vanairipiana. Énayapasica vahi náitauchahini támputuhini eta vanairipiana.

<sup>14</sup> Nútisera, eta nítaresirahi, nuvapinavahi ichape maicha ema Jesucristo, máepeninanuhi te crusu níchavenehi núti. Tac-ahé, nútí apana nínajicaripa eta néhisirainahini eta tayehe-repiana eta apaquehe. Vaipa nútiparacaina tayehe, taicha eta máepenirahi níchavenehi núti.

<sup>15</sup> Eta mávahásirahavihi ema Jesucristo, tamuturipa arairuhi eta vítaresira. Apanapa eta viyeherepiyare. Vaipa étaparacaimahi eta viyeherepiana ichasiqueneanahí, váhivare eta vicamarcapucaini te viáquehe.

<sup>16</sup> Éti, te esuapa eta juca nímiturapianahi eyehe, nuvaraha májapanuhehini ema Viya, máijaracahehini táurivaina eta epanereruana taicha eti yátupiquenuehí machanerahehi ema Viya.

<sup>17</sup> Tiuri puiti, németeaca nútí tájina téamavacarehíni eta esuapajiraivahi eta nuyehe, váhivare ísapavahíni ena nácani ticamesajiricaheanahipuca éhica eta nayeherepiana. Núti, yátupiquenenuhi apóstolenuhi mayehe ema Viáquenu Jesús. Eta juca nujaranahi te náquehe, éta tímereuchanuhi eta yátupi-quenérahi eta nucaemataneasirahi éma.

<sup>18</sup> Nuparapenaveana, nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

# Eta macartane ema Apóstole Pablo nayehe ena machamuriana ticavasanahi te avasare Efeso, ticaijare **EFESIOS**

<sup>1</sup> Nuti Pablo, mayehenuhi apóstole ema Jesucristo, taicha manerejirunuichuhi ema Tata Vicaiyaquene, navarairahi nímitucaya ena achaneana eta máechajiriruvana. Tásiha puiti, nucajurehe eta juca carta eyehe eti nuchamuriana ecavasanahi tayehe eta avasare Efeso, taicha éti machaneraheripa ema Viya, táuriquenehi eta éhisirahi ema Jesucristo.

<sup>2</sup> Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Náijaracahehini eta táurivaina eta epanereruana.

*Tétavicavahi eta viúricacarevana táichavenehi eta viúrujasirahi ema Jesucristo*

<sup>3</sup> Núti nucunachaparaca ema Viya, ema Macaiyaquene ema Viáquenu Jesucristo taicha ichape eta máimicasirasirahihi táichavenehi eta viúrujasirahi ema Cristo. Puiti tachichahaviripa eta anuma. Ichape eta viúricacarevahi maicha ema Espíritu Santo.

<sup>4-5</sup> Acane, te tamirahu eta táepaniravapa eta apauehe, ema Viya tétavicavahi eta máemunasirahi namutu ena achaneana natarihiqueneanayarehi. Tásiha, émajivapa manacahi eta mapanereruhi eta mavarahauquenehi, étarichuhi eta majacapirayarehi namutu ena ticasíñavanayare mayehe ema Machicha Jesucristo. Eta viúrujasirayare ema Jesucristo, yátupiqueneyarehi machichahavi, matapiravarehaviyarehi te mamirahu, sántohaviyarevare.

<sup>6</sup> Taicha mavarahahi vijirauchayare éma, vítsirijicavyarehi eta táetaviuchirava eta máemunasirahavihi. Mavarahavire ichape eta viúricacarevana táichavenehi eta viúrujasiraya ema máemunaruquene Machicha.

<sup>7-9</sup> Tásiha ema Viya, tiúrihi eta máimaira, máimerecahi eta máemunasirahavihi ichape. Tíjaracahavivi ema Machicha tépeninahaviyarehi eta macaepahairayare eta vipecaturana, viúchucuhayarehi máicha. Énerichuvare tíjaracahavihivare eta véchemaraivaya vímatiequenehairaya ichape, taicha tímitucahavivi eta mapanereruana. Váhisera máimerecavanehini eta juca mapanereruanahi acane; tapaemunava te tiúcupaicapa ema Machicha. Tivapinavahi éma eta máitauchiraya eta mapanereruanahi ema Maiya.

<sup>10</sup> Tamutu eta juca mapanereruanahi títauchavayarepahi, jácani tatuparaquipahi. Te jena sácheyare manerejicaripa, ema Viya manacainapa ema Machicha Jesucristo aquenuccaqueneyarehi, téchayarehi tamutu eta táichararacavana. Nasuapayarehiva namutu ena tiávihanahi te anuma, énapa ena tiávihanahi te juca apaquehe.

<sup>11</sup> Eta acane te tépanavainapa, ema Viya máetupiricapa eta mapanereruhi. Vahi máejequihahini. Tásicha, manacapa eta mavarahaquenehi. Acane tinerejicahavihi machichahaviyarehi vimutu viti viúrujiacanayarehi ema Jesucristo, mavarairahi tíjaracahavi eta vícuchianahi.

<sup>12</sup> Viti vínapuicanahi véhica ema Cristo, mavarahahi tiúriyare eta vítaresiraya, apaesa nacunachayare ema Viya ena apamuriana achaneana eta máimicatasirahavi ichape.

<sup>13</sup> Tacutiquene éti, te tínapucaina ema Viya eti máechajiriuva ema Viya eta mavarairahi ticuchucuhahahe, enévanehi éhicahi ema Cristo. Tásicha, eta iúrujiasiraipa éma, tiávahácaheripavare ema Espíritu Santo. Émapa titametacahe eta machichairaheda ema Viya. Ema Espíritu Santo, ema vituparahahi vimutu viti vicasisíñanahi ema Cristo.

<sup>14</sup> Eta mávahásirahavihi éma, titametacahaviparaca eta vijacapiraya eta vícuchianahi mayehe ema Viya te táitecapapa eta viúchucuiraya viti machichanaveanahi. Tásicha, tétavivainapa eta vicunachirayare ema Viya taicha ichapequene eta máimicatasirahavihi.

*Te tiyujaraca ema Pablo, mayaseaca ema Viya eta náitupajijiasiravaina ena téhicanahi ema Jesús*

<sup>15-16</sup> Eta tacahe, nuti néchahehi éti tamutu te nuyujarasirana, taicha nusamairircapa eta yátupirahi éhica ema Viáquenu Jesucristo étapa eta émunajirisiracahai emutu eti machaneranahi ema Viya. Nuhasulupayachahi ema Viya eyehe.

<sup>17</sup> Éma, macaiyaquenehi ema Viáquenu Jesucristo. Máetaviurehi eta majaraiva te mávihahi te anuma. Nuyaseacahi máijaracahehini eta échemaraivainahini maicha ema Espíritu Santo, apaesa ímatiequenehahini yátupina eta emetacasivanaya eta mapanereruanahi ema Viya. Nuvaraha ímatipaipaichaini éma.

<sup>18</sup> Nuyaseacahivare éma yátupina eta ecaicutiarairaya, eti máichuhaqueñeanahi éma, eta táetaviuchirayarehi eta viúricacarevayare te jena sácheyare vicuchapaquenehi. Nuyaseacahivare ecaicutiaraya eta táetaviuchirayarehi eta táuricacarevayare eta viávihaya te anuma, vícuchihi viti machanerana ema Viya.

<sup>19</sup> Nuvaraha ecaicutiaravare eta táetaviuchirahi eta máitupajijiasiravahi ema Viya, váhiqene tivitaimahi. Éma, macaematacneacahi eta vítaresira, mavarairahi viúripanayare viti vicasiñavanahi mayehe.

<sup>20</sup> Ema Viya máimerecahi eta máitupajijiasirava ichape te macaecheputaca ema Cristo te máecari, macaejacapa éma te mavaure tayehe eta anuma mávihahi puiti.

<sup>21</sup> Ema Cristo, émaripa ichapequenehi aquenuca nayehe ena ángeleana. Tétavicavahi eta masuapacarevahi nayehe. Énerichuvare ena éreanana, mapamicavaca eta nasuapiroina. Éma, tétavicava eta macapicahuirahi. Nájina nácutihini éma. Nájinavare ticachuricaimahi. Apajarahiyarehi eta aquenucaira éma.

<sup>22</sup> Ema Viya macaejacahi éma téchahi tamutu eta tatarihi-queneana. Émaripa vicaiyaquenehi vimutu viti machanerána.

<sup>23</sup> Viti, eta viúrujiasirahi éma, tímicutijiricavaipahi máquehehavihi te juca apaquehe. Vicaematacneacahi eta táuriqueneana tímicutijiricavahi émainahini macaematanehini, taicha tamutu eta víchaqueneanahi, éma téchahavihi, tétumechahavivare.

## 2

*Eta máemunasirahavi, ema Viya ticuchucuhahavihi tayehe eta vícuñayarehíni*

<sup>1</sup> Ema Viya tíjaracaheripa arairupa eta ítaresira. Tichavapa titareca eta iáchanevana, tacuti eta machavirahi titareca ema Cristo te máecari. Taicha éti, cape juca ítaresirahi, tímicutijiricavaichaha épenaqueñenahíni táichavenehi eta evainarajivanaini étapa eta epecaturanaini.

<sup>2</sup> Cape juca ítaresirahi éti, éhicahivare eta tayeherepiana eta apaquehe, tamauriqueneanahi. Esuapahivare eta mavarahaqueneana ema Váinaraji, éma mapamicavacahi ena achaneana masuapajirairahanahi me Viya.

<sup>3</sup> Vimutu viti, tacahenihi eta vítaresirahi eta acane. Étachucha véhicahi eta tavarahaqueneana eta viáquehe. Vítijiricavaripahi víchahi eta tajamurachaqueneana eta viáquehe, étapa eta vipanereruana tamauriqueneanahi. Ichapemurihi eta vímiyusemasirahi ema Viya, vicutihi ena apamuriana masuapajirairahanahi mayehe.

<sup>4-5</sup> Tímicutijiricavaichaha vépenaqueñenahíni táichavenehi eta vipecaturanainihi. Tétavicavasera eta majapanuirahavihi ema Viya. Ichapevare eta máemunasirahavihi. Tíjaracahaviripa arairupa eta vítaresira táichavenehi eta

viúrujasisirahi ema Cristo. (Táichavenehi eta majapanuirahéhi, ticuchucuhahayarehi.)

<sup>6</sup> Puiti, eta viávahásirahi ema Cristo, yátupihi eta véchepusiraya, vicaicuchipa eta macaejasirahavinapa tayehe eta viávacureyare te anuma, vicachaneya ema Cristo.

<sup>7</sup> Eta juca émavenehi ema Viya, mavarahahi máimereca maverahí eta viúricacarevana máijararuuhaviyare eta viyehe te jena sácheyare, taicha téavicavahi eta máemunasirahavihi táichavenehi eta viúrujasisirahi ema Jesucristo.

<sup>8-9</sup> Taicha eta viúchucuirayare eta viápechiravaya vítareca, étavenehi eta majapanuirahavihi ema Viya. Vijacapacareraipa eta mayehe, táichavenehi eta vicasiñairahi ema Jesús. Vahi étaparacaina tacuchucuhahavihini eta víchaqueneanahi, taicha vahi vítijivainahini váratahahini vijacapacarehini. Tacahehi éta, apaesha nacuija nacucasiñavavaica eta nacuchucuiravapuca.

<sup>10</sup> Arairuinapa eta vítaresira maicha ema Viya. Émarichuvare ticajurucahavi eta vélhisirahi ema Jesucristo, mavarairahi víchayare eta táuriqueneana. Eta víchirahi, vítauchahí eta mapaneruana acane.

*Eta vélhisira ema Jesucristo, étamurihavinapa. Vaipa víputsimuriavavacaimahi.*

<sup>11</sup> Németeaca échavahi éti eta nacatianasiráhehi ena nujaneanana táichavenehi vahi éhicahini eta nayeherepiana.

<sup>12</sup> Éti, cape juca, tájina ímatiyahini eta máimiturapianahi ema Jesucristo. Vuíchahavare ímatihini eta iúricacarevayarehi táichavenehi eta matratune ema Viya viyehe viti israelítana, taicha ticaerajicaheanahi te vimuri. Vuíchahavare ímatihini eta ícuchianayare máijararuheanaya ema Viya. Eta tacahéhi, éti ímijachaipa vahi ejacapacare eta mayehe. Vuíchahavare ácasíñavahini eta mayehe.

<sup>13</sup> Puítipasera eta éhisirahi ema Jesucristo, iúrujiacaripahi éma. Tásicha, émeñahavaipahi mayehe ema Viya, taicha ecasiñavahí eta máepeninahehi ema Jesucristo.

<sup>14</sup> Énerichuvare, étavenehi eta viúrujasisirahi éma, tihétamurichahaviripahi vimutu: éti apavasanana, vítipa viti israelítana. Vaipa víputsimuriavavacahini. Tímicutijiricavaipahi étanainehi eta viúchusine. Macaepaharipahi eta vicatianajirísiracacáinihi.

<sup>15-16</sup> Eta máijararesirahi eta máquehe te crusu ema Jesucristo, macaepaharipavare eta tapamisirahavini vélhica eta vanairipiana étapa eta nayeherepiana tipicauchacareana. Puiti, vaipa étaparacainahini eta viúchucuiraya. Énerichuvare macaepaharipa tamutu eta vicátianajirísiracacáinihi

táichavenehi eta apavasanahavirahi. Puiti vimutu viti véhicanahi ema Jesucristo, étamurihaviripahi máicha. Tájina víchiravaimahi. Táitusiava tiúrichahaviripa vimutu mayehe ema Viya.

<sup>17</sup> Eta tímitecahi ema Jesucristo, timetapanahavihi eta táurinaquene echajirirucava eta najacapacarevaya namutu ena achaneana. Éma, tiúrichahaviyarehi mayehe ema Viya vimutu: viti vínapucanahi vímati eta máechajiruvana, étipa eti epaenumavahí ímati eta máechajiruvana.

<sup>18</sup> Puiti, eta viúrujiasirahi ema Jesucristo, tiávahácahavíhi ema Espíritu Santo. Tásicha, máichavenehi ema Espíritu Santo, vimutu vicuticacaipahi eta vipauchiraipa ema Tata Vicaiyaquene.

<sup>19</sup> Eta tacache, tájinapa tábéñamacarehini eta ejacapacareva eta viyehe viti machanerana ema Viya. Esiapamurihaviripahi víti. Tachichaheripa eta mávasa anuma.

<sup>20-22</sup> Eta esiapamurihavirahi te vimuri, nímicuticharipa te náepiyaca eta ichape peti. Ema Jesucristo, tétavicavahi eta máetumechirahavihi vimutu viti véhicanahi éma. Macuti eta tatumearaya eta yúchamana, eta manasirahi eta máimiturapiana. Tásicha, visiapa viti apóstoleana énapa ena profetana. Tacache éti, eta esuapirohí eti vímiturapiana, esiapari-pahivare. Ecuti eta labriyuana étapa eta yucuquiana. Ema Espíritu Santo, tétavicavahi eta máitupajijiásiravahi tihéta-murichahavihi. Vituparahapachuhi eta manasirahavihi. Máepiyacavacapaipa. Te máitauchapa tamutu, tétavicavainapa táurinavaya eta ichapequenehi templo, mapenayare ema Viáquenu, sántoquenehi.

### 3

*Ema Pablo, éma ticatuparahahi ticametarairuyare nayehe ena apavasanana*

<sup>1-2</sup> Németeaca nuti ímatiequeneharipa eta máetaviuchirahi eta máemunasirahehi ema Viya. Éma, tivanecanuhi níchuhaheya eti apavasanana, mavarairahi éhicayare ema Machicha Jesucristo. Eta juca nucametarairuirahi eta eyehe, étara tiviuchanuhi puiti juca nucaeratairahi. Nútisera nuyaseuchaheparaca éti te nuyujarasirana.

<sup>3-4</sup> Taicha ema Viya timetacanuripahi te nuvapure eta mapanereruhi tapaemunava téchacarehi. Puiti te juca nucartane, eta échajicuira eta nájurehi, németeaca ímatiequenehayare tamuturipa nímatiequenehahi eta mapanereruhi ema Viya tayehe eta macuchusirahavihi ema Jesucristo.

<sup>5</sup> Eta juca mapanereruhi ema Viya, nájina náimatiéquenehahini cape juca tásinequenehi. Puítisera, ema Espíritu Santo

tímechahaviripa viti mayeheana santo apóstoleana énapa ena profetana.

<sup>6</sup> Ani tacahehi eta juca tayumururevanainihi: Eti apava-sanana, éti apanavare ejacapacarehivare mayehe ema Viya maicha ema Jesucristo. Iúchucuhayare táichavenehi eta éhisirayare eta vimetarairuana. Esiapamurihahaviyare viti machanerana ema Viya. Étamurihaviripa. Vicuticacainapa etá víuchihi viti israelítana.

7 ¡Tétavicavahi eta majapanuiranuhi ema Viya! Nútisamipa máichuhaqueñehi eta nucametarairuyarehi eyehe. Tásihá éma, tétavicavahivare eta máetumechiranuhi te tamutu eta nucametarairuirahi.

<sup>8</sup> Vahi németeacavahini nútinasamihini manerejica, taicha nararihihi ena titupajijiapanavanahi eta nuyehe. Tijapanunuhisera ema Viya. Nútisamipa manerejiruhi, mavarairahi numetapanaha etá máichuirahéhi éti apana eti apavasanana, eta ejacapiraya etá táuricacarequene víuchi maicha ema Cristo. Tétavicavaya etá viúricacárevayare.

<sup>9</sup> Tacahéhi eta mapanereruhi ema Viya eta viyehe acante tépanavainapa máepiyacaya tamutu. Váhisera táijahúchavahini mametakahavihini. Tapaenumava timetacanuhi nútí, matuparasiranuhi eta numetasiraheyare tamutu.

<sup>10-11</sup> Taicha mavarahahi natiarihiyare camurianayare ena  
tisuapanayare yátupi. Eta táurivayare eta náehisira, tímereu-  
chayarehi eta máetaviuchirahi eta mítupajijasiravahí ema  
Viya. Náraminehi ena aquenucanahi tiávihanahi te anuma eta  
náimairahi eta juca. Eta tacahehi eta mámirapahi ema Viáquenu  
Jesucristo tamutu eta mapanereruana eta acane ema Maiya.

<sup>12</sup> Tásiha puiti, tájina taeñamavacaréimahi eta vipauchirae  
ema Viya. Vicasíñavahi eta mayehe, taicha ema Jesucristo  
é mahi ema vicasíñasarequenehi.

<sup>13</sup> Eta tacahe, nutuparacaheya: Vahi ecuinajicava eta juca éhiruhi, váhivare ecupica eta esamairirisirahi eta nucaera-tairahi táichavenehi eta nucametarairuirahieyehe. Evapinavasera eta nucamichirahi eta nátajivana, taicha nuvarahahinímereca eta táetaviuchirahi etanémunasirahehi.

## *Ema Pablo mayujaraucha ena machamuriana*

<sup>14</sup> Eta némechirana eta táetaviuchirahi eta máitupajijiasiravahi ema Viya eta juca mapanereruanahi, nútí nepuyumiraucha ema Macaiyaquene ema Viáquenu Jesucristo, nucunachirahi éma.

<sup>15</sup> Éma, Táiyaqueñehi tamutu te anuma. Émarichuvare téchahi tamutu te juca apaquehe.

<sup>16</sup> Nuyaseaca éma máijaracaheni éti, ichapenahini eta ítupajijasirava étapa eta etumevainahini te iáchanevana, maicha-

ema Espíritu Santo. Taicha ema Viya, tétavicava eta máitupajijasirava, váhivare mayavanaimahi.

<sup>17</sup> Nuyaseacavare yátupina eta ecasiñairaya ema Cristo, yátupinavare eta éhisiraina eta máimiturapiana. Túmeheyare eta émunaraivahi. Tájina tihapapicahéimahi eta éhisirahi.

<sup>18-19</sup> Nuyaseacavare ácutihini ena apamuriana echamuriana te tamutu avasareana, te yátupina ecaicutiara eta táichapevahi eta máemunasirahavi ema Cristo. Tájina titaina éta. Tayanapane vahi vicúcaicutiaraquenená. Nuyaseacahivare yátupina émainahini ecasamure ema Viya.

<sup>20</sup> Tétavicavahi eta nucunachirahi ema Viya, taicha máituruequenehahi tíjaracahavi tamutu, máemetavicahi eta viyasearuanahi, étapa eta vipanerechirana. Tétavicava eta máitupajijasirava ema Espíritu Santo eta máetupirisirahi eta visamureana.

<sup>21</sup> ¡Vicunachaparacahini ema Viya vámuto viti véhicanahi ema Jesucristo!    ¡Máichecuaraquirénapa eta vicunachira!    ¡Amén!

## 4

### *Viúrujiacacahi maicha ema Espíritu Santo*

<sup>1</sup> Yátupi nuti tipresuchanuhi puiti táichavenehi eta néhisirahi ema Viáquenu. Eta tacahe, nutuparacaheya: Tacuija íchiravaina eta ítaresira te mamirahu ema Viya; taicha éti máichuhaqueñéherichuhi éma, mavarairahi machaneraheyare.

<sup>2</sup> Yátupina eta emansuvaina, étapa eta iúrivaina. Ecayehe paciencia. Ecamichayare jácani te ticaviurevanapuca nácani echamuriana, táichavenénahi eta émunasiracacainahi.

<sup>3-4</sup> Émanarichuvare ema tiávahácahe, émaripa ema Espíritu Santo. Ísapava eta macurujisirahehi. Tacuija íchiravaina eta iúrujisiravahi. Étanainarichuhi eta epanereruana. Taicha ema Viya tíchuhahéhi. Puiti ecuchapahi eta iápechiravayare ítareca.

<sup>5</sup> Émanarichuhi ema Viáquenu. Tacarichuhi véhica eta máimiturapiana. Étanarichuhivare eta vicaicachasira eta viúrujiasira éma.

<sup>6</sup> Émanarichuhivare ema Viya, Vicaiyaquenehi vimutu. Éma téchahavihi vimutu. Ticaemataneacahavihi vimutu. Émavare tijaneacahavihi vimutu.

### *Vítucaquenepachuhi maicha ema Espíritu Santo*

<sup>7</sup> Énerichuvare ema Cristo, éma tíjaracahavihi eta vítucaqueneyarepachu, jácani mavarahaquenehi.

<sup>8</sup> Taicha eta Sagrada Escritura, ani tacahehi: “Te tiárapa éma te anuma, mámamurihana paipa ena macuchureanahi. Máijara-casichavacapa eta náitupujijiasiravaya ena machanerana” tacahepa.

<sup>9</sup> Epanerechaya puiti eta tacayemaquenehi eta márairahi. Eta juca tavaraha vicaicutiara eta máucupaisirahi tativa te juca apaquehe.

<sup>10</sup> Te títauchavapa eta tímiucupaicahi, tiárapa tichavapa te mávasa anuma. Tichavavarepa eta émairayare técha tamutu.

<sup>11</sup> Tásicha, ema Viáquenu tituparacahavi víti, tíjaracahavivare eta vítuqueneanayarepachu. Taicha tinacahavipa eta viávacurepachuya apóstolehaviya viti manerejiruqueneanahi. Ena apamuriana, manacahivare profetanahi náimati-equenehayarehi eta mapanereruanahi ema Viya apaesa náitametacavaca ena vichamuriana. Ena apamuriana, manacavare ticametarairurahianayare, náichuhayare ena achaneana náehica ema Viáquenu. Ena apamuriana, manacavacavare pastóreanayarehi, najaneacavacayare ena vichamuriana. Énapa ena apamuriana, manacavacavare máestroana, náimitucavacayare eta máimiturapiana ema Viáquenu.

<sup>12</sup> Taicha éma, mavarahahabi máetupiricayarehi tamutu te etaracu eti machanerana; mavarahahivare vitiarihiyare viti vítatijiricaheyare eti vichamuriana, vicajurusiraheyarehi eta éhisirahi éma.

<sup>13</sup> Apaesa yátupina vácuti vámutu eta máurivahi ema Machicha ema Viya; táitecapavanevaréni eta sache eta viúrujisiravaya, tájinapa tahapapicahavimahi eta véhisirahi; vítamuturucaripahini tamutu eta vítuqueneanahi tásichaqueneanahi me Cristo. Vácutipaini éma tamutu eta máitupajijiasiravahi.

<sup>14</sup> Mavarahahivare vimutuyare vímatiequeneha. Vaipa vácutimahi ena amuyana, témunanasiricavanarichaha éna. Tísapajiricavanarichaha navayuaca tayehe eti apana náimiturapiana ena tituruéquenehana tivayuarecana, napamisirvacahi namutu náehica eti tamauriqueneana.

<sup>15</sup> Eta tacahe, vétumechavayare eti véhisirahi eti máimiturapiana yátupiqueneana, yátupinavare eti vémunaraivahi, vicajurucacayarehivare eti viúriva, vicutiyare ema Viáquenu Jesucristo, taicha émahi ema téchahavihi.

<sup>16</sup> Nímicutichahehi eti viáquehe. Camurihi eti táunavahi eti viáquehe; étanaichuhisera. Camurihivare eti táitupajijiasiravanahi; tamutuhisera ticaematanéhi, víchirahi eti vivarahaquenehi. Tájina vahi táejiacavahini. Tamutu tijaneacacahi. Ene vicahehi viti machaneranahi ema Jesucristo. Éma,

tétumechahavihi vimutu víti. Eta viúrujiasirahi mayehe éma, étamurihavihi. Vimutu vítucaquenepachuhí máicha. Vémata-nerepipachuhi máicha. Vijaneacacahivare. Vicajurucaca-paipahi táichavenehi eta vémunasiracacahi.

*Apanainapa eta vítaresira taicha eta viávahásirahi ema Cristo*

<sup>17</sup> Eta juca numetarapiana eyehe, nutuparacahéicha taicha matupararunuhi ema Viáquenu. Nucavanairipipa puiti: Vaipa ecuapecha ecuquicha eta náichaqueñeanahí ena máimatiuhanahí ema Viya, náichahi éna eta náitaresirahi jácani tavarahaquenahí etá napanereruana súnsurupiana.

<sup>18</sup> Tamutu eta napanereruana tétavicavahi eta tamapicuvahi. Vahi apaesainahini tavehahini eta tijarahi. Máecharaireanahí éna, táichavenehi eta tamuracavahi eta nasamureana. Váhiqene navarahaimahi napaucha ema Viya apaesa macanaracavacahini éna.

<sup>19</sup> Tájinapa apaesainahini náimatihini eta titsirihacare. Tíjaracavanapa tayehe tamutu eta najamuraraivana. Tétavicavahi eta navapinairahi náichahi eta tamauriqueneana tájiparacana.

<sup>20</sup> Étisera vahi tacucahe eta ítaresiraya puiti eta éhisirahi ema Cristo.

<sup>21</sup> Taicha németeaca yátupihi esamararacahi eta vímitusirahehi. Ímatiripahi eta táuriqueneahí yátupiqueneahí tásichaquenahí mayehe ema Jesucristo.

<sup>22</sup> Tásiha puiti, vaipa ecuesacha echavaucha eta ítaresirainihi acane echipejiricavahi taicha tivayuacahe eta ejamurachirahi eta tamauriqueneana.

<sup>23</sup> Puiti éti, ísapaya ema Espíritu Santo mávahácahe, máitsivachirayare eta epanereruana étapa eta ejamurachirana te iáchanevana.

<sup>24</sup> Tásiha, apanainapa eta ítaresiraya. Yátupi eta ecaquehéraina ema Viya, ácutini éma eta máurivahi étapa eta masantuvahi.

*Étupiricayare tamutu eta ítaresirana*

<sup>25</sup> Tásiha puiti, vaipa épiyahirahimahi. Étupiruvayare tamutu eta échajirisiravaya nayehe ena echamuriana eparae-piyana, taicha étanarichuhí eta echamuriracacairahi, émanarichuhivare ema Viúrujiaruhi, ema Jesús.

<sup>26</sup> Te tatiarihipuca eta táimiyusemacahe, ejaneacavaicha machu ecapecatura. Te esemapuca, vahi tacunasi eyehe. Énevanéna eperdonachacaca.

<sup>27</sup> Ecaunevayare, machu máiturucahe ema Váinaraji, táichavenenahí eta esemanevahi.

28 Mácani tiámerahinihi, vaipa macuapechava macuamereca. Mácaematané apaesa macunachacare, apaesavare eta jácani máematanevachayare eta maviyihayare eta macajirayare ena ticamunuwanahí.

29 Váhivare ecunacajacachava eta tájiparácana echájirirucavana tamauriqueneana. Tátupiruva eta échajirisiraváina apaesa étaina eyuchusihá etá nasuapiraina nácani tisamahe-nayare, éta tétpirisamurechavacayare éna.

30 Vahi ecuisapava ícha jácani tamauriqueneana, machu ímipanerereca ema Espíritu Santo, émaripa ema sántoquenehi, tiávahácaheripa éma. Eta mávahásirahehi tímicutijiricavaipahi eta ecamarcahi, taicha ímaticaréipahi eta machanerahéirahi ema Viya; puíticha, étapa eta te títecápapa eta jena sácheyare viúchucuirayare.

31 Váipavare ecunaca eta semanereana. Váipavare ecatianarahimahi. Váipavare ecusemarairihi, váhivare ecuijajachava ecapiaracava. Vahi ecuichanareca. Ínajicaya éti tamutu eta júcana tamauriqueneana.

32 Táitsiva étaviuchayare eta iúrivayare nayehe nácani apamuriana, ejapanurahiyare. Te tatiarihipuca eta náejecapirava, eperdonachacacayare taicha ene macahehi ema Viya eta maperdonachirahehi máichavenehi ema Cristo.

## 5

*Tiúriyarehi eta náitaresirayare ena machichanaveanahi ema Viya*

1 Puiti éti machichaheripahi ema Viya, máemunaruqueneheripa, tásicha ácutipa éma etá máurivahi.

2 Émunajiricacayare eta ítaresiraya. Ecutiyare ema Cristo etá máemunasirahavihi. Éma, macurisamurecharipa ema Maiya etá máimijararesiravahi víchavenehi víti, macutihu etá sárarechicha uvesa nacaparuhi etá námavahuhi me Viya.

3 Eta machaneraheraripa ema Viya, vaipa táuricahini íchahini etá túhusicare. Tíñehi te mamirahu ema Viya. Váhivare ecupanerecha ícha jácani tiámanahi etá tamauriqueneana. Váhivare tacuvayyuacahe etá tájiparácana.

4 Vahi ecunacajacachava etá échajirirucavana titsirihacarepiana, súnsurupiana, tájiparácaqueneana, taicha tájina tacunachacarévaina éta. Tamutusera etá échajisiranaya, amairipi queñéna etá ehasulupayachiraya ema Viya. Jéhevare, éta iúrihaquenehi.

5 Németeaca ímatiequeneharipa éti etá vahi tiúchucuhanaimahi nácani ticaecahicacanayare, ema achane te mavehapuca esu esena apayena, esu esena te suvehapuca ema achane apaima; nácanivare ena amaperuana

tivehajiricacanahi; mácanivare achane mavehapuca ema maparajairava; nácanivare tijamurachana tamutu jácani náimahaqueneanahi. (Ena tavayuacavacahi eta najamurachirana, énarichuhi ticasíñarajiana.) Namutu ena nani tímereuchavanahai vahi machaneranainahini ema Cristo. Vahi tisiapanaimahi te mávasa ema Viya.

<sup>6</sup> Tásicha éti, vahi ecuisapava nácani navaraha navayuac-  
ahe te náechajiriruva súnsurupiana, napamisiraheya ícha eta  
júcana tamauriqueneana, taicha eta júcana, éta tiviuchava-  
cayare nácani masuapajirairahanahi me Viya, muracayare  
eta náicuñayare.

<sup>7</sup> Tásicha, ejaneacava, machu ácuti ena nani tíchanahi eta  
júcana tamauriqueneana.

<sup>8-9</sup> Échavaripa tacáhénihí eta ítaresirahi acane étarichu iámapi-  
ricainihi iávacuhahi te timapicu. Puítisera eta iúrujiasiraipa  
ema Viáquenu, tijarahiripa eta ítaresirahi. Tásicha, ímerecayare  
eta emicauchirayare ena apamuriana achaneana, ímeresi-  
rayare eta iúriva, étapa eta tipachinaqueneana eta ítaresira,  
étapa eta yátupirahi eta éhisirahi ema Viya.

<sup>10</sup> Tamutu sácheana ecaravahuinavarepa eta mavarahaque-  
neanahi máuriruanahi ema Viáquenu.

<sup>11-13</sup> Ejaneacava éti, machu iápechava ícha eta  
tamauriqueneana náichaqueneásahi ena achaneana te  
timapicu. Taicha téavicavahi eta tatsirihacarevahi  
eta náichaqueneanahi eta nayumurusiravahi. Étisera  
ímitucavacayare éna. Emicauchayare eta tamarivahi  
eta náichaqueneana, apaesa náimaha eta táïñehivahi eta  
náichaqueneanahi. Tásicha, natarihipuca ena tivarahanaya  
náinajicayare.

<sup>14</sup> Eta emicahuchiravaca éna, tacuti eta táchajiriruva eta  
jirasare, ani tacahe:

Pítisami pímicutijircava pépenaque taicha  
eta tavayuasiravihi eta pecatuana.

Péjamichavaichu eta pímacacarasiravahi  
te timapicu.

Písapava macaechepucavi ema Cristo,  
mavarahahi timícauchaviyare.

<sup>15</sup> Eta tacahe, yátupina eta ejaneasiravaina. Vahi ecucuti  
ena máecharaireana. Ímerecavaya eta ítupajijiasiravahi.

<sup>16</sup> Ecemapuravachaha tamutu sácheana eta ímitusiravacahi  
ena achaneana, taicha maverana ena tíchanahi eta tamauri-  
queneana.

<sup>17</sup> Tacuija eta esunsuvanaina. Epanerechayare apaesa  
ácaicutiara yátupi eta mavarahaquenehi ema Viáquenu.

<sup>18</sup> Vahi ecucavaha taicha éta ticauyayacarehi ticamitiacahe. Ísapavasera émaira máechahe ema Espíritu Santo tamutu eta ítaresira.

<sup>19</sup> Eta ímiturapiyare nayehe ena echamuriana, eta salmo étapa eta jirasareana majirahuana ema Viya. Eta ecunachirainahi ema Viáquenu, iúrisamureyarehi eta ejiraira.

<sup>20</sup> Ehasulupayachaparacaya ema Vicaiyaquenehi te máijare ema Viáquenu Jesucristo tayehe tamutu jácani íchararacavana taicha tásichaqueneanahi eta mayehe.

<sup>21</sup> Emutu éti, ímereca eta iúriva táichavenehi eta epicauchirahi ema Viya. Ísapava eta nacamunuiraheli ena echamuriana. Vahi étainachucha éhica eta evarahaqueneana.

*Ema achane ésupa esu mayena náimerecayarehi eta náuriva énajicacayarehi*

<sup>22</sup> Étiripa eti esenana ecaimaqueñeanaripahi, titupara-cahehi epicauchayarehi ena ímanaveana. Esuapajirahiyarehiva nayehe, tacutiyareichu eta esuapirohí ema Viáquenu.

<sup>23</sup> Taicha mácani achane, tatuparacahi éma, téchaya eta máitá tiraya esu mayena, tacutihi ema Jesucristo tatuparacahi éma téchahaviyarehi vimutu viti véhicanahi éma. Émarichuvare ema ticatiuchahaviya vimutu viti machaneranahi.

<sup>24</sup> Tásicha, yátupihi eta vipicauchirahi visuapahi ema Cristo. Ene nacaheyarehi ena esenana, nasuapayarehi napicauchayarehi ena náimanaveanahi te tamutu.

<sup>25</sup> Étiripa eti náimanaveanahi, tituparacahehi émunacavayare ena eyenana, tacutihi eta máemunasirahavihi ema Jesucristo viti machaneranahi. Éma, tímajararecavahi víchavenehi,

<sup>26</sup> taicha mavarahahi tisantuchahaviyarehi. Tásicha, masipahasinahavipa eta viáchanevana eta visuapirohí eta máimiturapiana. Eta masipahasirahavi tacuti eta sucavira te une esu araimayare te tétupiricavapa tayehe eta sucaimairayare.

<sup>27</sup> Taicha mavaraha tacuija víchiravaina viti machanerana te táitecapa eta sache vitupihamirauchirayare éma. Vétaviuchayarehi eta viúrinavaya. Tájina véchipejicaimahi, tájinavare tijararecahavimahi, apanaimahi víchava. Mavarahahivare tétavicavayarehi eta visantovaya. Yátupi matapiravarehaviya viti.

<sup>28</sup> Ene ecaheyarehi eti náimanaveanahi, ímerecayarehi eta émunasirahí ena eyenana, tacutihi eta émunasirahí eta iáqueheana. Mácani máemunacahi esu mayena, tímicutijiricavahi eta máemunasirahavi éma.

<sup>29</sup> Taicha viti achaneana, eta vítaresirahi, váhiquene vicatichaimahi eta vécheana. Tétavicavahi eta vijaneasirahi, véchapajiricahi, vénicahivare eta véche. Ene macahehi ema Cristo eta majaneasirahavihi, máechapajirisirahavihivare viti machanerana.

<sup>30</sup> Víti tímicutijiricava eta táunavanahi eta máquehe táchavenehi eta viávahásirahi éma. Vicutijiricavavare eta maeche, máperanavare.

<sup>31</sup> Échavaya eta táechajirisirahi eta Sagrada Escritura, ani tacahe: “Mácani amaperu achane ésupa esu mayenayare, te ticaimanapa, tatuparacavacahi típutscavanayarehi eta napenana ena ticachichana. Énajivainapa titáticacanayare. Eta navehacacairahi, tímicutijiricavaipa étanarinehi eta náqueheana” tacahepa.

<sup>32</sup> Te juca tametarapi, jararihi eta tacayemaquene tayumururevaquenehi. Puiti nímitucahe: Viti machanerana ema Cristo, eta viúrujiasirahi éma, étanamuriháviripa tacuti eta étanarinehi eta náqueheana ena ticaimanahi.

<sup>33</sup> Tásicha, nuvaraha yátupina ácaicutiara eta juca nucayemaquenehi. Tituparacahehi eti ajairana, yátupina eta émunasiraina ena eyenana tacuti eta émunasirahi eta iáquehe. Énerichuvare eti esenana, tituparacahehi epicauchayarehi ena ímanaveana.

## 6

*Ena amaperuana, náimerecayarehi eta náuriva nayehe ena ticachichhana*

<sup>1</sup> Étiripa eti amaperuana, yátupina eta esuapajiraivaina nayehe ena ticachichaheana, taicha tituparacahehi ene ecaheyarehi eta éhisirahi ema Viáquenu.

<sup>2-3</sup> Ema Viya tíjaracavapa tíjaracaheyare eta iúricacarevaya eti esuapajirahiana, taicha ani tacahe eta máechajiriruva: “Epicauchayare ena ticachichaheana. Te esuapajirahi éti, nucajuruchaheya te apaquehe. Tájina íchiravaimahi, iúritaresirainapa” macahepa. Tétavicavahi eta tasuapacarevahi eta juca mavanairipi ema Viya eta eyehe.

*Ena náiyana, náenana, táurini eta náimitusiravacaina ena nachichanaveana*

<sup>4</sup> Énerichuvare, eti náiyana, náenana, vahi ecuimiyusemaca ena echichanaveana tayehe eta evanesirana. Tauri eta ecavairipira, apaesa napicaurahi eta najurusiraina, énajivayare ticaratacavana. Ímitucavaca tamutu eta máimiturapiana ema Viáquenu, apaesa nasuapajirahi.

*Ena ticaquenurecana, táurini eta nacaemataneasiraina*

<sup>5</sup> Énerichuvare eti ecaquenurecana, tituparacahehi esuapa-jirahiyare nayehe ena iáquenuanahi. Epicauchavacayareva, émunacayareva. Táurivainahini eta ecaematanearasirahi, tacutirichu eta táurivahi eta ecaematanearasirahi ema Cristo.

<sup>6-7</sup> Evapinavayarehi te esamureana eta ecaematanera, vahi tacucarichu te natarihi ena iáquenuanahi te emirahu. Vahi ecuyacujiririha. Evapinavayaresera eta ecaematanearasirahi éna, taicha émarichuvare ema Viáquenu ema ecaematanearuhi. Ímerecavayare eta yátuplepirahi mavanarahehi éma. Tacaheyarehi eta ítauchirayare eta mavarahaqueneana ema Viya.

<sup>8</sup> Taicha écharipahi émutu éti, vijacapayare eta vícuchihi mayehe ema Viáquenu te vítauchahi tamutu eta táriqueneana. Vahi manerejicaimahi nácani líbreanahí énapa ena ticaquenurecanahi; vínumayarehi tayehe eta vícuchihi.

*Énapa ena náquenuana, tituparacavaca eta náurivaina nayehe ena nachanerana*

<sup>9</sup> Énerichuvare eti náquenuana, tituparacahehi iúriyareva nayehe ena echanerana, ejapanuyare éna tayehe eta evanesirana. Vahi ípicararerecaimahi te evanesirana. Ínunayarehi échava eta matiarihirahi ema Iáquenuhivare éti apanava, ema tiávihahi te anuma. Taicha éma, nájina máepuruquenéna ena acha neana.

*Yátuplepina eta vicasiñavairahi me Viya; vétumechavavare eta véhisirahi*

<sup>10</sup> Puiti nutuparacahevare, nuparapenaveana, ecasiñava yátuplepina mayehe ema Viáquenu apaesa máijaracahe éma eta matumeva étapa eta maitupajijiasirava.

<sup>11-13</sup> Nuvaraha numetacahe eta juca: Ema Váinaraji ticanarahavihi víti machaneranahavihi ema Viya. Tétavicavahi eta mavarairahi tiáquipacahavi. Tásicha, tituparacahavi eta vechapajirisiravaya eta vicatiuchiravaya mayehe éma. Natiarihivare ena camuriqueneana majupahana, énapa ena masuntarurana. Váhisera achaneanainahini, váhivare viparaepiyanainahini. Éreananahí éna, váinarajiqueneanahí. Tétavicavahi eta nasimutuvahi éna. Tétavicavahivare eta naitupajijiasiravahi étapa eta natumeva eta nacaematanera tayehe eta juca apaquehe, tamapicuquenehi náicha. Eta tacahe, échapajiricavayare eta ecatiuchiravayare tayehe eta mavayuaraquiana ema Váinaraji. Étumechava eta éhisira. Ecuti ema suntaru ticasiñavahi tayehe eta mamuiriha vahi tasiapahacaimahi eta espada. Tásicha, eratahayare ecamicha

tamutu eta ecatajivairana. Vahi ecainajiruvaimahi. Iáquipaicayareva namutu ena machamuriana ema Váinara.

<sup>14</sup> Yátupinahisera esuapa eta vímiturapiana yátupiqueneana. Vahi ecuchavacuéjechava. Átupiruvahini eta ítaresirahi. Ecutiyare ema suntaru, manacahi eta máitijuhe, étapa eta fiérromehi tiávichayarehi eta matupa, tájinasarepa nácharaca ena mánarana.

<sup>15</sup> Vahi tacuechuquiha eta ecametarairuirayare eta majacapiraya ema Viya namutu ena achaneana. Etanucayareva eta eparupezvaya apaesa erataha eta epaisirayare te acheneana eta ítecapirayare tayehe eta tayereliqueneana avasareana.

<sup>16</sup> Tacutiquene eta ticamunucarehicha, yátupinahi eta ecasiñavairaina mayehe ema Viya. Eta ecasiñavairayare támicutijircavahi iávihuinahini eta ticaemahaequenehayarehi eta tamuruirapahi eta mayucaraqui ema Váinara.

<sup>17</sup> Tacutiquene, ecasiñavahi yátupina eta iúchucuirayare, tacuti eta macasiñavaira ema suntaru eta mayehe casco te machuti. Iúnacahi eta máechajiruva ema Viya, máimiturehequenehi ema Espíritu Santo. Eta juca tímicutijircavahi eyehenahini espada eta ecatiuchiravahi.

<sup>18</sup> Te eyujaraca, eyaseacaya ema Viya máijaracahe eta etumevaina. Eta eyujarasirana, tacuija tahapapiricahe eta máimitusirahehi ema Espíritu Santo. Vahi ecuyacuji eta eyaseuchiravaca namutu ena vichamuriana, majaneacavacahini ema Viya, táurivaina eta náehisirahi.

<sup>19</sup> Énerichuvare, te eyujarasirana, eyaseuchanuhini me Viya, apaesa máijaracanuhini éma eta nuvapinairava, tacuijavare tahapapiricanu eta néchajisirayare ena achaneana. Nuvaraha tasuapacarehini nayehe eta najacapacarevahi mayehe ema Viya.

<sup>20</sup> Ema Viáquenu tinacanuhi nútí námayarehi eta máechajiruva, nucutiyarehi mácani achane embajador mayehe ema aquenuca Emperador. Éta tíchanuhi ticaviurenúhi eta napresuchiranuhi puiti. Eta tacahehi, nutuparacahe eyujarauchanu, eyaseuchanu me Viya, máijaracanuhini eta nutumevaina eta nucametarairuirayarehi nayehe namutu ena achaneana te avasareana, váhivare nucuyacujihini eta nucametarairuirayarehi.

### *Eta táichecuaraqui eta macartane ema Pablo*

<sup>21</sup> Tiuri puiti, máimahaherinesera ema vémunaruquenehi vichamuri Tíquico. Éma, titametacaheyare tamutu eta níchararacávahi nútí. Tétavicavahi eta máimicatasiranuhi eta vicaemataneasirahi ema Viáquenu.

22 Eta tacahe, névatacahi éma eta ara eyehe. Títame-tacaheyare eta víchararacavahi, tétumechaheyareva éti eta éhisiraya ema Viáquenu.

23 Puiti nuyaseacahi ema Vicaiyaquenehi émapa ema Viáquenu Jesucristo, náijaracahehini eti nuchamuriana eta enarasirahi te esamureana tamutu eta epanereruana, tajurucahivaréni eta ecasiñavairahi eta nayehe, étapa eta émunasiracacahi.

24 Nuyaseuchahевare táetaviuchahini eta iúricacárevaya emutu eti yátupihi éta émunasirahi ema Viáquenu Jesucristo.

Tamutupa eta néchajiriruvanahi eyehe.

# Eta macartane ema Apóstole Pablo nayehe ena machamuriana ticavasanahi te avasare Filipos, ticaijare **FILIPENSES**

<sup>1</sup> Nuti Pablo émapa ema Timoteo, mavanarahavihi ema Viáquenu Jesucristo, vímiamareca puiti eta juca vicartane eyehe emutu eti vichamurianahi ecavasanahi te Filipos, énaripa ena pastoreana énapa ena najupahana. Taicha eti machaneranahi ema Viya eta iúrujasiravahi ema Jesucristo.

<sup>2</sup> Nuvaraha máetaviuchahini eta macatajisirahe ema Tata Vicaiyaquene, émapa ema Viáquenu Jesucristo; náijaraca-hehini táurivaina eta epanereruana.

*Ema Pablo mayaseuchavaca te mayujarasirana ena machamuriana*

<sup>3</sup> Tatiarihi eta te néchahe, nuhasulupayachahi ema Viya ichavenehi éti.

<sup>4</sup> Te tamutu eta nuyujarasirana, téavicavahi núrisamureva eta nuyaseuchirahéhi emutu éti.

<sup>5</sup> Taicha te jena tínapucainapa sache eta nucametarairuраhi eta eyehe, ichapequene eta ímicatasiranuhi. Puíticha enasirichuhi.

<sup>6</sup> Ema Viya, téavicava eta máurichirahé eti ítaresira cape juca. Núti, téavicavahi eta nucasiñavairahi mayehe eta máimiyániravaina eta máurichirahéyare, mavairahí iuri eti machimapiraheya ema Jesucristo te jena sache machavirayare.

<sup>7</sup> Énerichuvare nucasiñavahi eyehe eta ejacapiraya eta máurichirahéhi éma, taicha némunacahehi ichape emutu éti. Nucasiñavahivare vicuticacaipahi eta vijacapirahi eta máimicatasirahavihi ema Viya, tayanapane viyerehicacahipuca, étaripa te juca návhahi cárcel. Étaripa te nutupihamirauchavaca ena tuparairucana eta nucatiuchirayarehi eta yátupira eta viúchucuiraya maicha ema Jesucristo, apaesa te nasuapapuca éna apanava.

<sup>8</sup> Tímararacanuhi ema Viya eta néminasirahéhi emutu éti, nucutihi ema Jesucristo eta máemunasirahéhi éma.

<sup>9</sup> Nuyaseacahivare ema Viya eta iápajusiravainahini eta émunaraivaya. Ítupajijiacavahini, támutuhini ímatiequeneha, apaesa ímatiparacahini eta enerejisiraya eta táuriqunehi.

<sup>10</sup> Taicha nuvaraha tápajupanávainahini eta iúrvaina eta ítaresirana, tájina téchípejicahémahi. Matapiravarehéyare,

tiúriyarepa eta machimapiraheyare te machava ema Jesucristo.

<sup>11</sup> Nuvarahavare iápajusiravainahini eta íchaqueneana táríqueneana eta ecaemataneasirahi ema Viáquenu Jesucristo. Tásicha, téavicavayarehi eta nacunachirayarehi ema Viya ena achaneana eta náimairahehi éti.

*Eta vítaresirahi, puiti émapa ema Cristo téchahavihi*

<sup>12</sup> Nuparapenaveana, nuvaraha numetacahe tájinaichucha táichavahini eta nucaeratairahi. Eta návihairahi nútì te juca cárcel, camuriana ena numetaruuanahi eta máemunaraivahi ema Viya eta nayehe.

<sup>13</sup> Énaripa ena tasuntarurana eta palacio énapa ena apamuriana achaneana náecharipahi eta táemeratasiranuhi eta néhisirahi ema Cristo.

<sup>14</sup> Tacutiquene, eta náimairanuhi eta nupresuvahi, ena camuríqueneana nuchamuriana táetumechavacainehi eta nacametarairuira eta máechajiriruva ema Viya. Vaipa napicahini taicha ichape eta nacasiñavairahi mayehe ema Viáquenu.

<sup>15-17</sup> Nararihi éna, tiúrihi eta napanereruana eta náimituresirahi te máijare ema Cristo. Tatupiruvahi eta náichirahi, tásichaquenehi eta náemunasiranuhi, taicha náechahi éna eta návihairahi ani, nucatiuchirayarehi eta yátupira eta viúchucuiraya maicha ema Jesucristo. Nararihisamisera ena tímiturecanahi te máijare ema Cristo, váhisera tátupiruvaquenénahini eta napanereruana. Nacapinaruraivarichucha, navarairahi ticachuricanuana. Napanerechaichuchavare tiápajucavayarehi eta néñamiravana, tavetijipa eta návihairahi nuti te juca cárcel.

<sup>18</sup> Tájinachuchasera táichavahi. Nútì vahi nucapinaruva-caimahi ena nani páureanasami. Ticurisamurechanuana-richucha nútì eta náechajisihairahi ema Cristo namutu.

Énerichu ichapemuriyarechucha eta nûrisamurevaya,

<sup>19</sup> taicha németeaca tiúriyare tamutu eta níchavaquene-vayare. Taicha tisamacarehi me Viya eta eyaseuchiranuhi. Émaripa ema Espíritu Santo, ichape eta máimicatasiranuhi.

<sup>20</sup> Nútì, ichape eta nuvarairahi vähini nucutsirihaini. Nuvaraha nuvapinava eta nímiyanirava nucasiñavaya mayehe ema Cristo eta majaneasiranuhi apaesa náimatihini ena achaneana eta yátupirahi eta macasiñacarevahi ema Cristo. Tájina vahi nupicacavahini eta náimicatichiranuhipuca, támicapacanupuca.

<sup>21</sup> Taicha, eta nítaresirahi puiti, ema téchahi ema Cristo. Te népenapuca, tiápajucavainapa eta nûricacarevaya.

<sup>22</sup> Téhesera te nítarecarichahapuca, nucamapuravayarehi nucaematacayare ema Viáquenu. Eta juca, vaipa nímatiequeneha tájahapuca tiúripanayarehi nuyehe.

<sup>23</sup> Nuvarahaipanéni níjahúchavahini népenahini apaesa nunaracapaini te machacaya ema Cristo. Eta juca tiúripanahi eta nímairahi. Váhisera nímatiequeneha tájahapuca eta néhiruyare.

<sup>24</sup> Néchahevaresera éti, néñamahevare nujunijicahe. Tiúripanaichupuca vuíchaha nucuepena.

<sup>25-26</sup> Tásicha, németeaca vuíchaha mavaraha népenahini ema Viáquenu. Nucuchapa nápechavahivaréni níteca eta ara eyehe, nucachaneheyaréchaha éti. Nímicatacahlenumayare apaesa tápajucavahini eta iúrisamurevana eta ecasiñavairahi me Viáquenu Jesucristo. Tacache, tétavicavapaini eta viúrisamurevainahini eta viúrujiacacairaya.

<sup>27</sup> Eta ítaresiraya, ímereca yátupina eta éhisiraina eta máimiturapiana ema Cristo. Tayanapané vahipuca nucuiteca eta eyehe, ímiyanavasera eta étumechiravaina eta iúrujiasiracacahi. Nusamairiricahehini táurihini eta ímiyaniravahi éhica emutu, étanainarichuhi eta epanereru, evapinavahi eta ecametarairuira eta véhiruhi tayehe eta viúchucuiraya.

<sup>28</sup> Vahi ecuarameca naicha nácani iánaranahi. Eta nacatianasirahehi, tímicaecherachahi eta nacaicuchirahi eta nácuñayare. Táimicaecherachahi eta iúchucuirayarehi éti maicha ema Viya.

<sup>29</sup> Éti, iúricacarehi maicha ema Viya eta ejacapacarevahi mayehe, táichavenehi eta ecasiñavairahi me Cristo. Tacamu-nuhisera eta ecatajivairayare táichavenehi eta éhisirahi éma, ecaicuchirahi éta.

<sup>30</sup> Ecuthinuripahi eta vicanarajirisiravacahi ena viánaranahi. Éti ímahanurichuhi cape juca eta nucanarairavacahi, puíticha esamairiricanuipahivare eta nunasirichuhi nucanaravacahi.

## 2

*Tétavicavahi eta masuapajiraivahi ema Cristo. Tásicha puiti, tétavicavayarevare eta masuapacarevayare.*

<sup>1</sup> Tacache puiti, németeaca esamavahi eta máetumechirahéhi ema Cristo, iúrisamurerahivare táichavenehi eta máemunasi-rahehi; evapinavahivare eta mávahásirahehi ema Espíritu Santo, máimitusirahehi eta ecajirahi ejapanurahihivare.

<sup>2</sup> Tacache puiti, nuvaraha étanainarichuvare eta epanereru, ácuticacaini eta ecaematacayare ema Viya; táchuticacahivaréni eta émunasiracacahi. Tásicha, tétavicavayare eta nýrisamurevaya ícha.

<sup>3-4</sup> Éti eta ítaresiraina, tacuija eta ecasiñavavaisiraina, váhivare ecuimijuquiha eta evarahaqueneana. Nuvara-hasera ímerecahini eta emansuvaina nayehe ena echamuriana; énahi émunaruqueneanahi. Nativaina ímicatacavaca éna, táetaviuchiravainahini eta náuricacareva ícha. Vahi ecuitá-tijiva.

<sup>5</sup> Emutu éti iámanahini eta táurivahi eta juca mapanereru ema Jesucristo, tisuapajirahi éma.

<sup>6</sup> Éma, tacahehi eta mapanereruanahi: Vahi macasiñavahini eta víyairahi éma. Tétavicavahisera eta mamansuvahi, étapa eta máurivahi. Tísapajiricavahi.

<sup>7-8</sup> Tacahe, manaquejahi eta mávacuréni. Eta máucupauchi-ravahivi, macutipaipa mácani achane macahequenechucha eta máuchusirahi. Tamutusera eta máitaresirahi, tétavicavahi eta masuapajiraivahi, macutihi mácani moso. Eta masuapa-jiraivahi, étapa tiámaparauchahi eta máepenirahi te crusu. Titsirihacavahineni, máitauchahisera.

<sup>9</sup> Eta tacahe, ema Viya máijaracapa eta máejasihayarehi tayehe eta anuquehepana mávacureyarehi, étapa eta tacapi-cahuirahi ichape eta máijare,

<sup>10</sup> apaesa námutu nácani tisamanahi eta máijare Jesús, tépuyucanayarehi: ena tiávihanahi te anuma, énapa ena tiávihanahi te apaquehe, énapa ena nacaerataquenehi puiti te amahe apaquehe.

<sup>11</sup> Namutu náichayare: “Yátupi Aquenucaquene éma”. Tac-ahé, tétavicavahi eta vicunachirayarehi ema Tata Vicaiya-quenehi.

*Tétavicava eta najaraiva ena téhicana ema Jesús, nacuti eta jarairiqui*

<sup>12-13</sup> Núti nucunachahehi, eti nuparapenaveana némunaruqueneanahi, taicha tétavicavahi eta esuapiranuhi te nutiarihirichaha te echacaya. Puítisera nuvaraha tápajucavaini eta esuapiranuyare, puiti eta nuyerehirahéhi. Ema Viya, émarichuhi ema tinacahi te esamureana eta evarairayare ecurisamurechayare éma; tiávahácahevare eta ítauchirayare tamutu. Tásicha, muracaina eta ejaneasirava tayehe eta tájiparacana, epicavarení eta ímicatisamurechira ema Viya. Tacuija táemitiequenehahini eta tapachinavahi eta iáchanevana.

<sup>14</sup> Te tatiarihinapuca jácani íchaqueneanayare, vahi ecueva-taemachavaca, váhivare ecuacapauchava,

<sup>15</sup> apaesa tacuija échajisiacarevaina emutu. Tacujavare etapiravainahini eta náimairaheyare ena achaneana. Ímere-cavayarehi eta machichahérahi ema Viya, tájina táechipejica-hehini nayehe ena achaneana váinarajipaneréruana. Nímicu-

tichinahe eta táurinavahi eta jarairiquiana vímahaqueneana te anuma te jácani yati timapicuquenehi.

16 Ímitucavacahini eta máechajiruva ema Viya, eta íchuhairavacavare náehicavare, apaesa náuchucuhahini tayehe eta apava náitaresira. Tacahe, te máiteca machava ema Viáquenu Jesucristo, eta máimairaheyarehi eta juca táuriqueneana íchaqueneanahi, tétavicavainapa eta nucunachiravaya núti íchavenehi éti eta táurivahi eta nímitusirahehi. Vahi támapurujihini eta nucaemataasirahéhi.

17-18 Nímicutichahe eta esuapajiraivahi tayehe eta ecaemataasirahéhi ema Viya. Ticutihi eta iámavahuhi mayehe. Núti, tijuricati táimicapacanupuca eta nucametarairuirahéhi eta eyehe. Eta népenirainapucaini tacutiyareva eta námavahuhi mayehe ema Viya, tacachane eta iámavahuhi éti. Núti nuvapinavahi eta níjarasiravahi népna, núrisamurehivare eta nucamavahuirahéhi me Viya. Nuvaraha iúrisamureyareva éti apanava. Vahi ecucatiedoquenehanu. Ácutinu eta núrisamurevahéhi núti.

*Ema Timoteo émapa ema Epafroditó, vanairucanayare me Pablo*

19 Nupanerechahi névatacayaréni ema Timoteo eta araeyehe, máimahapanahé apaesa núrisamurepaini eta nusamairirisiraheya te machavapa. (Máimahahavirinesera ema Viáquenu Jesús eta vítujisiravaya.)

20 Taicha ema Timoteo, yátupihi macutinuhi eta nuhapasamurechirava eta iúricacarevainahini éti. Nájina apanainahini nácutihini éma.

21 Nararihinéni ena apamuriana, énachuchasera tiyayauruiricavanahé. Vahi tiapasamurechavanimahi eta iúricacarevaina eti machaneranahé ema Jesucristo.

22 Ímatiripahi éti eta máurivahé ema Timoteo eta máimicasasiranuhi tayehe eta vicametarairuirahé, tacutihu mácani machicha ema achane, eta táurivahé eta máimicasasirahé ema máiya.

23 Vuíchahasera névatacaimahi éma. Néchanumayare eta juca níchararacavayare te juca.

24 Nucasiñavahinénisera mayehe ema Viáquenu Jesucristo eta nútijacarúvainahini nímhapanahé.

25 Tásihasera, nupanerechahi névatacahirvaréni puítirichu ema apava viparape Epafroditó, ema évataruhi tímicatacanuyarehi, tiámapahivare eta enaquiruvana. Puiti éma, tétavicavahé eta máimicasasiranuhi tayehe eta juca vématanerepihi, vicanarairahé eta tamauriqueneana.

<sup>26</sup> Mavarahaipaichavare tímahahe éma apanava. Téñama-vaipahi eta eyehe emutu éti taicha máechahi eta esamairiri-sirahi eta macajumairahi.

<sup>27</sup> Yátupihi eta macajumairahi, tiánehiyarehini tépena. Majapanuhisera ema Viya; tinaracahi. Tijapanunuhibare nútí apana apaesa vahi nucueñamavahichaini, vahi tacuapiquihuanuhini eta néñamiravahi puiti.

<sup>28</sup> Eta tacahe, nuyayaucha puiti névataca éma, apaesa eta ímairainahini éti, iúrisamurevarepaini. Te néchapa eta iúrisamurevahí, étapa tacaepaha eta néñamavahí eyehe.

<sup>29</sup> Táurisera eta ejacapiraina éma te esamureana, taicha yátupihi echamurihi éma eta éhisirahi ema Viáquenu.

<sup>30</sup> Taicha éma, yátupihi tiánehipa eta máepenira, táichavenehi eta táetaviuchirahi eta mavaraira macaemataneca ema Cristo. Váhiquene tiyavanavahini eta máitaresirahi, taicha muraca eta mavairahí máitaucha eta etuparasiranahí mayehe. Taicha éma ítsivahí éti, eta vahi ítujicavahini ítecahini étijacarúvainahini ítatinuhini.

### 3

#### *Tiúripana véhica eta juca yátupiqueneana*

<sup>1</sup> Nuparapenaveana, evapinava eta macachaneraheripa ema Viáquenu. Núti, vahi nuyacuji eta nápechirayare numetacahe te juca néchajiriruvahí te nájure taicha eta tiúrichaheyare éti.

<sup>2</sup> Échapavayare nayehe nácani achaneana tipamicaheana éhica eta mavanairipiana ema Moiséini, navarairahivare ecamarcayare, náimijachahi machaneraheya ema Viya taicha eta ecamarcairahi. Ena nani, tétavicavahí eta náiñehivahí eta náemejecapirachira ena vichamuriana. Éna, nacutihí eta jácani tamucu tétavicavahí eta tanicaraivahí.

<sup>3</sup> Jéhesaresera vítiquenehi machaneranahí ema Viya yátupiquenehavihi. Vicamarcaqueneanahí víti te visamureana maicha ema Espíritu Santo. Vítiquenehi yátupiquenehavihivare viti véneuchavahí me Viya. Vivapinavahivare táichavenehi eta vicasiñairahi eta machanerahavirahi ema Jesucristo. Véchahi vahi étaparacainahini vítauchahini eta vanairipiana, étainapucaini visamacarehini táicha.

<sup>4</sup> Jéhevare nútí, táuricahinéni nucasiñavahini nútí nusamacarehini, taicha nítouchahí tamutu eta viyeherepiana viti israelítana. Nucachuricahi ena nujaneanana.

<sup>5</sup> Nútí yátupiquenenuhi israelítanuhi taicha nucamacaripahi te óchopa sache eta núchusirahi, náitauchahí éna eta viyeherepi. Mámariéquenenuíni ema Benjamín.

Yátupiquenenuhi hebreo. Yátupiqueneanahivare hebreoana ena ticachichananuana, énapa ena náchucanaveanaini. Núti náchamurinuínihivare ena fariséoana. Nítucahi nímicapicaucha eta náitauchiraina yátupi eta viápajusiravahi religiósohavihi nayehe ena apamuriana nujaneanana israelítana.

<sup>6</sup> Eta nímicapicauchira, ichape eta nupanajirisiravacahi ena náinapureana creyénteana. Nucasiñavahi núti eta nítauchirahi yátupi eta viyeherepiana. Tájina néchajisiacarevahini nayehe ena achaneana.

<sup>7</sup> Puítisera eta néhisira ema Cristo, vaipa tacunachacarehini eta nusamiravahi tamutu eta juca níchaqueneanahi nusiñavairainihi.

<sup>8</sup> Tacahe, eta nímairahi, váhinéni étaparacainahini tayehe eta viúchucuiraya. Puiti nína jicapa tamutu eta júcana, taicha tihapapicanuhi eta néhisirayarehi ema Cristo; táichavare vahi táchutihini eta táetaviuchiravahi eta táurivahi eta néhisirahi ema Náquenu Jesucristo. Puiticha tamutupa némitisica. Émachucha nucaematanecahi.

<sup>9</sup> Puiti eta návahásirahi éma, vahi étainahini eta táurivahi eta néhisirahi eta viyeherepiana. Ema Viya tijacapanupa táichavenehi eta nucasiñavairahi me Cristo. Taicha namutu ena ticasíñavanahí éma, tijacapacareanaya me Viya.

<sup>10</sup> Nuvarahahi núti tajurucachucha eta nímatirayarehi ema Cristo. Nuvarahavare tacuija tahapapica eta macaematanasiranuhi, máimeresirahi eta táetaviuchiravahi eta máitupajijiasiravahi, tacutipa eta máechepusiraipa éma te mäecari. Nuvarahavare nucapayayarácahivaréni eta macatajivairahi. Étapa eta népenira, nuvarahavare táurichavacayare ena nuchamuriana, táchutihini eta táurichirahavihi eta máepenirahi ema Jesús.

<sup>11</sup> Taicha núti nucaunevahi eta néchepusiraya núti apanava te nécari.

*Yátupiya eta vicaratasiravaya te vivaraha vítu jicava viveha eta vícuchihi*

<sup>12</sup> Núti vahi nímijachavaimahi tamutuhini nítaucha eta nítujsiravaya. Vuíchaha nítamuturuca. Nímiyanavaichuchasera eta nupamisiravahi, nuvarairahi nucurisamurechayare ema Cristo te tamutu, taicha eta tacahehi eta máichuiranuhi néhisirayare.

<sup>13</sup> Nuparapenaveana, yátupiquenuehi vuíchaha tamutu nucapayayaracahini. Nuvarahaipasera némitisicayare tamutu eta nunaquiruana. Tásiha, nétumechavainapa eta nítauchiraya tamutu eta mavarahaqueneanahi níchaqueneanayarehi.

<sup>14</sup> Nupamicavahi taicha ichape eta nuvarairahi nucurisamurechahini ema Viya, nuvehahini eta nícuhihi mayehe. Taicha eta tacahehi eta máichuirahavihi, mavarairahi tíjara-cahavi eta viúrujiasirahi ema Jesucristo.

<sup>15</sup> Tacaheyarehi eta epanerechirayare éti. Ecutinuyarehi emutu eti échemachanaripahi eta juca véhiruhi. Te vuíchaha ecaicutiarahini eta juca, németeaca tímíticaheyare ema Viya.

<sup>16</sup> Jéhesare, yátupina vímyanava véhica tamutu eta vímitucasi-vanahi.

<sup>17</sup> Nuparapenaveana, nuvaraha yátupina ácutinu nútì eta núrivahi eta nítaresira, éhicavaréni eta náurivahi ena apamuriana téchemachanaripa.

<sup>18</sup> Ichapemurihi eta nutuparasirahehi tayehe eta juca. Puiti eta nápechirahehi numetacahehi, níyahasamurehi taicha nararihichaha ena vuíchaha náimatiqeuneha eta tacayemaquenehi eta máepenirahi ema Cristo te crusu. Eta nacatichirahi, vahi navaraha nasamararaca te véchajisiha.

<sup>19</sup> Ena nánisami témitiequeneanayare taicha tétavicava eta tavayuasiravacahi eta najamurachaqueneana. Nacasamurechucha eta tájiparacana te juca apaquehe. Tisiñavavacanahi, tivapinavanahi eta náichirahi eta tamauriqueneana titsirihacareana.

<sup>20</sup> Vítisera tachanerahavihi eta anuma. Eta tacahe, vicunevaipa eta vicuchapirahi ema Viáquenu Jesucristo ticatiurahique, másihairaya te anuma.

<sup>21</sup> Máitsivachainapa éma eta juca viáquehesami. Apanainapa eta táimahiyare. Tacutinapa eta macáquehéra éma, tapachinaquenehi. Tétavicavainapa eta tatumevayare taicha ichapequene eta maitupajijiasiravahi éma. Maratahahi macapaquecha tamutu.

## 4

### *Iúrisamurereacavayare me Viáquenu*

<sup>1</sup> Nuparapenaveana némunaruqueneanahi, tétavicavahi eta nuvarairahi nímahe, taicha nucajamurahehi éti, tétavicavahi eta núrisamurevahi ícha. Puiti nuvaraha ímyanava túmehéna tayehe eta éhisirahi ema Viáquenu, eti némunaruqueneanahi.

<sup>2</sup> Nuvarahavare nutuparacavaca ena vichamuriana esu Evodia ésupa esu Síntique: Tachavaini eta náemunasiracaca. Vahi tacunasi eta nacatichiracacahi, taicha naparapejiricacahi te mavahuana ema Viáquenu.

<sup>3</sup> Nutuparacavivare, piti némunaruquenehi nucompañeruvihí: Pímicatacavacahini ena nani apinana esenana viparapenaveanahi, taicha éna ichapemurihi eta náimicatasiranuhi tayehe vicametarairuirahi.

Náimicatacahi ema Clemente, énapa ena apamuriana ena nucompañeruanahi. Eta náijareana ena nani ticajuanaripa tayehe eta libro tiama eta víjareana viti vítareruanayare.

<sup>4</sup> Támutuhini sácheana iúrisamurereacavahini me Viáquenu. Nuvaraha nápechahe numetacahe: Iúrisamurereacavahini mayehe.

<sup>5</sup> Námutuhini ena achaneana náimatihehini éti eta táetaviuchirahi eta iúriva. Taicha ema Viáquenu, tiánehipa eta máitesiraya.

<sup>6</sup> Vahi ecueñamava, te tatiarihina papuca eta íchava. Ecasínavasera eta eyaseasira ema Viya te eyujarasirana. Ehasulupayachavare tayehe jácani máijararuheanahí.

<sup>7</sup> Jéhesare, ema Viya macaepahayare eta jácani ecatisamurevana eta juca máijarasiraheyarehi táurivayare eta esamuriana étapa eta epanereruana, táichavene eta iúrujisirahi ema Jesucristo. Eta macurisamurechirahavihi ema Viya, tétabavahí eti tacachuriasirahi eta nacurisamurechira nácani achaneana.

### *Epanerechayare eta táuriqueneana*

<sup>8</sup> Títecapa, nuparapenaveana, epanerechinavayare tayehe tamutu eta yátupiqueneana, tayehe tamutu eta tipicauchacareana, tayehe tamutu eta ítauraivaya tacuija taviuchahe, tayehe tamutu eta ticatajicaheyare eta íchirahi eta táuriqueneana. Epanerechayareva tayehe tamutu eta ecurisamurechirahi ema Viya, tayehevare tamutu eta ticunachacareana. Ecasamure tamutu jácani táuriqueneana apaesa ticunachacareyare tamutu eta íchaqueneanaya.

<sup>9</sup> Ímiyanava éhica eta nímiturapiana. Ítauchayare eta numetrapianahi esamarararuhanahi. Ácutinu eta níchaqueneanahi ímahaqueneanahi. Ítauchaya eta juca, tásicha ema Viya, tamutuinapa tíjaracaheyare eta táurivaya eta epanereruana éti.

### *Tinaquiquicavanapa ena machamuriana ema Pablo, náimicatasiraya éma*

<sup>10</sup> Tétabavahí eti núrisamurevahí eta mayehe ema Viáquenu eta máijarasirahehi éma eta epanerechiranuhi tayehe eta iápechavahí ímiámareca eta nuyehe. Németeaca váhiquene émitisicanuhini. Étachucha eta emaitujisiravavanehi ímiámareca eta ímicatarapi eta nuyehe, tapaenumavahí.

<sup>11</sup> Vahi táichavenénahíni jácani nuvayuchiravainahini eti nucamunuirava. Núrisamuréichucha, nítucasamihi nútia eti nítatiravahí tayehe jácani tatiarihiquenehi.

<sup>12</sup> Nítucahi eti nítaresirahi puiti eti nupauréravahí. Nítucavahire te nucaimahaquenéichaha. Nítucahi eti nucamichirahí

eta nátajivanahi, te nunicapuca, váhipuca; te nucaimahaque-nehipuca, te tájinahivarepuca nímaquenénahini.

<sup>13</sup> Núti nuratahahi nucamicha tamutu, taicha ema Cristo éma téturnechanuhi.

<sup>14</sup> Tájinaserá táichavahini eta ímicatasiranuhi tayehe eta ímiámareruhi, evarairahi ímerecanu eta émunasiranuhi, ítati-ranuhi eta numaitujisiravahi nutanuchavahini.

<sup>15-16</sup> Eti nuchamuriana, nucunachahe eta némechirahehi eta ímicatasiranuhi eta nupaisirahi eta nucametarairuirahi te apanana avasareana. Tayanapane epaenumavahinéni épanava éhica ema Viáquenu, camurianahi eta ímiámaresinanuhi eta enaquiruvana te náviharipe te Tesalónica. Énerichuvare, te núchucapa te provincia Macedonia, éti iápechavahi ímiámareca eta enaquiruvana. Jéhevare nájina apamurianainahini nacutihehini eta ímicatasiranuhi.

<sup>17</sup> Váhisera étainahini jácani nuvarairahini iápechavahini ímiámareca eta nuyehe eta enaquiruvana. Nuvarahahi níminecapaequenehahe: Eta ímicataraivahi te juca apaquehe, puiti te anuma ánaqui taurujisiavahi eta enaquiruvana te mamirahu ema Viya.

<sup>18</sup> Nuti ichapemuripa eta nujacapirahi eta enaquiruvana, eta mámaquenepahi ema Epafrodito. ¡Téavicavahi eta ecrajiraivahi! Eta ímiámareruana, tacutirinehi eta inciensoinahini, eta táijiyevali te mamirahu ema Viya. Tivapinava ema Viáquenu eta majacapirahi. Tacutihivare eta nanaquisira eta námavahuana te Templo.

<sup>19</sup> Máimahahéine ema Viya. Éma, máitsivachayare tamutu eta enaquiruvanahí. Tíjaracaheyare te jácani ecamunuiravana. Émarihi téchayarehi ema Viáquenu Jesucristo. Éma, téavicavahi eta tamutuira marataha.

<sup>20</sup> ¡Máichecuaraquireyare eta vicunachiraya ema Tata Vicaiyaquenéhi, tijarahi eta vijirauchira éma! Amén.

### *Eta táichecuaraqui eta macartane ema Pablo*

<sup>21</sup> Eta iúrujasiracacahi mayehe ema Viáquenu Jesucristo, nuvaraha échajisinanuini namutu ena machaneranahi ema Viya, vichamurianahi eta véhisirahi ema Viáquenu Jesucristo. Téchajicaheanahi éti ena nucompañeruana, ena nucachane-queneanahi ani te juca.

<sup>22</sup> Téchajicaheanahivare namutu ena vichamuriana machanerana ema Viya, ena ticavasanahi ani te juca. Nararihivare ena tiávihanahi te mayehe palacio ema Emperador, énarichuvare vichamuriana. Téchajicaheanahivare éna apana.

<sup>23</sup> Nuyaseuchaheparaca emutu éti me Viáquenu Jesucristo táetavicavahini eta iúricacarevaya máicha.

Tamutupa eta néchajiriruvanahi eyehe.

# Eta macartane ema Apóstole Pablo nayehe ena machamuriana ticavasanahi te avasare Colosas, ticaijare **COLOSENSES**

1-2 Nuti Pablo, mayehenuhi apóstole ema Jesucristo, taicha manerejirunuichuhi ema Tata Vicaiyaguene, navarairahi nímitucaya eta náechajiriruva. Puiti nucajurehe eta juca carta eyehe eti nuchamuriana ecavasanahi tayehe eta avasare Colosas, taicha éti machaneraheripa ema Viya, tiúrihi eta éhisirahi ema Jesucristo. Téchajicahe ema vichamuri Timoteo.

Nuvaraha macatajicahehini ichape ema Tata Vicaiyaguene, máijaracahehini eta táurivaina eta epanereruana.

*Ema Pablo masamairirica eta náehisirahi ema Jesús ena ticavasanahi te avasare Colosas*

3-8 Puiti títecapauchahaviripa ema vémunaruquene Epafras, ema vichamurihi eta vicametarairuirahi. Éma, ichape eta macunachacarevahí. Tiúrihi eta máitauchirahi tamutu eta macavanarairahi ema Cristo, máimitusirahehi yátupi eta máimiturapiana ema Viáquenu. Ema Epafras titametacahavihi eta íchararacavahí, eta éhisiraipa ema Jesucristo, étapa eta émunasiracacairahi emutu éti, émunasirahivare ena iúmuri-vanahi te apana avasareana, machaneranahivare ema Viya, taicha ecuchapavainapa eta esiapiraya tayehe eta mávasa anuma. Viúrisamurevahí eta visamairisirahi eyehe, vihasulupayachaparacahi ema Viya Macaiyaguene ema Viáquenu Jesucristo. Tamutu sácheana te viyujarasirana, viyaseuchahehi me Viya. Ichape eta viúrisamurevahí eta táurivahí esama eta macametarairuirahi ema Epafras eta yátupiquene máechajiriruva ema Viya, etupiruvahí esuapa eta ímitucavahí, te esemainapa eta máemunasirahehi éti apanava ema Viya. Étarichuhi eta juca vímiturapihi nayehe ena apamuriana achaneana ticavasanahi te apanana avasareana. Natiarihipahi ena tisuapanapahi eta vímiturapiana.

*Ema Pablo mayaseuchavaca te mayujarasirana ena machamuriana*

9 Eta tacahe, te visamairiricahepa, viyaseuchaheparaca me Viya tamutu te viyujarasirana. Viyaseuchahehi máijaracahéni eta ítusiraina, ímatiraina yatupina eta mapanereruhi ema Viya. Máijaracahehivaréni eta échemaraivainahini, ecaicutiarayare eta máechajiruvana, máichavenénahini ema Espíritu Santo.

<sup>10</sup> Víti viyaseacahi ema Viya tacuijahini etapiravaina te mamirahu taicha eti machanerahehi éma, ítauchahini tamutu eta ecaurisamurechirayare éma. Táurihini eta ecaemataneasirahi, támputuhini ítapharaha eta táuriqueneana. Iápajucavapáipa-hivaréni eta ímatirayare éma.

<sup>11</sup> Énerichuvare viyaseacahi ema Viya máijaracahéni eta ichapequene máitupajijiásirava apaesa ecamichahini tamutu eta ecatajivairana, ácayehehini paciencia muraca, iúrisamu-rereacavachuchaini.

<sup>12</sup> Ehasulupayachahini ema Tata Vicaiyaquene eta máichuirahéhi éti apanava, mavarairahi tíjaracahaviyare vimutu eta tajarahiquene vícuchianahi viti machaneranahi éma.

### *Ema Viya mavaraha ticuchucuhahaviyare*

<sup>13</sup> Ema Viya ticatiuchahaviripa mayehe ema Váinaraji ticaratacrahavinihi. Téquekahaviripasera véhicayarehi ema Machicha Jesucristo máemunaruquenéhi. Vaipa véhicaimahi eta nayeherepiana ena timapicumareana. Émapa téchahavihi puiti. Viávacuhaipa eta mavanairipiana.

<sup>14</sup> Taicha ema Viáquenu Jesucristo tépenahi te crusu eta macaepahairaya eta vipecaturana, viúchucuhaipahi máicha.

### *Ema Jesucristo, ema tinacuchahi tamutu. Émarichuvare téchahi puiti.*

<sup>15</sup> Yátupi máimahasihi ema Tata Vicaiyaquene. Émasera ema Jesucristo téavicavahi eta macavasirahi ema Maiya, émapa tímimaticahavihi eta máurivahi ema Maiya. Éma, ichapequenepanahi Aquenuca. Éma, téchahi tamutu.

<sup>16</sup> Éma, mavanahihi me Maiya eta máepiyasirahi tamutu eta vímahaqueneanahi puiti: te anuma, étapa te juca apaquehe, étapa tamutu eta vimaratahaqueneanapa vímaha. Ticavacureanahivare máicha ena ángeleana. Nararihi ena majupahaqueneanahi te machacaya, énapa ena túparirucanahi, énapa ena apamuriana tijacapanahi eta vanairipi nayehe ena majupahanahi, énapa ena apamuriana ángeleana masuntaruranahi. Máepiyacahi tamutu, máitauchiraripa tamutu eta mapanereruanahi.

<sup>17</sup> Ema Cristo manasiqueneripa acane te tamirahuichaha eta táepanirávayarehi tamutu. Puíticha éma téchahi tamutu.

<sup>18</sup> Énerichuvare ema téchahavihi vimutu viti véhicanahi éma, taicha machichaquenehaviripa. Éma, vínapuaraquihi viti véhicanahi, taicha éma tinacuchahi eta juca arairuhi véhiruhi. Énerichuhivare maratahahi ticaechepecava te máecari, éne tacahayare eta macaechepeusirahaviyare víti

apanavare. Puíticha, éma téjacahi tayehe eta mávacurehi aquenucairahi. Ichapequeneya eta vipicauchira vimutu.

<sup>19</sup> Taicha ema Viya máijaracapa ema Machicha macutiyarehi eta masantuvahi, étapa eta máurivahi, étapa eta máitupajijasiravahi.

<sup>20</sup> Eta mapanereruhi ema Viya eta mavanesirahi ema Machicha te juca apauehe, tépenayare te crusu taicha máetupiricayarehi tamutu eta juca apauehe pecatupaire, étapa tamutu eta anuma. Macaepahayarehiva eta majarareruquenehi ema Satanás émapa ema Adán. Tichavayarehi tiuri tamutu.

*Eta máepenirahi ema Jesucristo, mavacharecahi eta mámirahavyare mayehe ema Maiya*

<sup>21</sup> Étiripa eti, cape juca iásinequenehi ecatianacainihi ema Viya. Vahi táurihini eta epanereruana, taicha eta íchirahi eta tamauriqueneanahi. Iávamirahuinihi epauchahini ema Viya. Epicainihi éma. Émasera mavarahahi macamitiasinaheyare eta ecatianasirainihi.

<sup>22</sup> Eta tacahéhi eta máimitesirahi ema Jesucristo te juca apauehe. Tépenahi te crusu táichavenehi eta macaepahairayare eta etapiravanainihi, masantochiraheyareva, apaesa tacuijapa ecuavamirahu te jena sácheyare eta mámiraheyare te mamirahu ema Viya.

<sup>23</sup> Tacahé, nuvaraha étumechavayarechucha, ímiyanava táuri eta éhisirahi. Vahi ecúyacujiéquenehava eta ecuchapirahi eta iúchucuiraya. Vahi ecuemepurureca eta esuapiroapihá eti máechajiriruva ema Viya. Tétavicavahi tasuapacarevahí nayehe namutu ena achaneana te juca apauehe, nájina tanerejiruina. Nútiripa nuti Pablo vanairucaquenenuhi, étarichuhivare tacahéhi eta nucametarairuirahi.

*Ema Pablo matuparahaichuhi máechapajiricayare ena máumurivana*

<sup>24</sup> Puiti nútí, vahi nucatieuquenehavahini eti nucatajivairahi táichavenehi eti nucatuparahairahi nucametarairu eyehe eti apavasanana. Ema Viáquenu Jesucristo, ichape eti macatajivairahi te crusu víchavenehi víti. Tatarihichahasera eti macatajivairayarehi. Eta juca nucatajivairahi, tacutihini eti macatajivairahi éma. Nucatajivanumapaipahi íchavenehi eti machichanaveana, eti vichamurianahi.

<sup>25</sup> Taicha tituparacanuhi ema Viya eti néchapajiricaheyarehi emutu éti. Nuvanecasivahi mayehe eti nímitusirahayare tamutu eti máechajiriruvana.

<sup>26</sup> Nímimatichaheyare tamutu eti juca mapanereruanahi ema Viya, tayumururevainihi eti táitaressirahi acane, énaripa ena viáchucanaveanaini vahi támutuhini náimatihini. Puítisera

ema Viya tímimaticahaviripa viti machaneranahi tamutu eta júcana.

<sup>27</sup> Tétavicavahi táramicarevahi maicha ema Viya eta máimimatichirahavihi eta juca tayumururevainihi ímitucasivahi puiti eti apavasananahi. Eta juca tayumururevainihi, émahi ema Jesucristo títecapauchaheripahi tiávhácaheripa. Puiti, ejacapacarépahi me Viya. Ecunevainapa maicha ema Jesucristo eta esiadiraya te mávasa anuma.

<sup>28</sup> Eta tacahe, émaquenehi ema Cristo véchajisihahi víti te vicametarairu. Étaripa te viconsejareca, te vímiturecapahi nayehe namutu nácani achaneana vicaimunaqueneanapahi, émarichuhi véchejisihahi, apaesa nácaicutiaraini tamutu eta mapanereruanahí ema Viya, náechemarahivacahini táicha. Vivaraha ítamuturucaripahini te táitecapapa eta sache vímersiraheyare te mamirahu ema Cristo.

<sup>29</sup> Eta tacahe, nupamicavahi nútí eti nucaemataneasirahi ema Viáquenu. Émaquenehi tétumechanuhi eta nuratahairahi tamutu eta nímitusirahehi emutu eti nuchamurianahi.

## 2

*Ema Pablo tímereuchava eta máemunasiravacahi ena machamuriana*

<sup>1</sup> Nútí ichapemurihi eta néñamiravahi eyehe eti numaimatiqeneanarichaha, énapa ema apamuriana vichamurianahivare ticavasanahí te Laodicea.

<sup>2</sup> Nuvarahahi ámutuhini étumechavahini te esamureana. Evapinavahini te iúrujisiravana taicha eta émunasiracacahi. Nuvaraha yátupina ímati ema Cristo, émahi araenumahi vanairucahi me Viya. Nuvarahahivare ímatiequenehayare eta mapanereruanahí ema Viya apaesa ichapenahini eta ecasiñairavainahini eta mayehe.

<sup>3</sup> Nájina mácuti ema Cristo, ema tíjaracahavihi tamutu eta vítupajijiasiravanahí, véchemarahivacahi máicha.

<sup>4</sup> Eta tacahe, nutuparacahecha: Vahi ecuisapava nahapapicahe ema tiyururahiana.

<sup>5</sup> Tayanapane viyerehicacahi, vahi vímahacacahini, núrisamurehisera ticutirinehi étainahini návihahini eta ara eyehe, néchirahi eta tamajinairahi íchiravainahini, yátupihi esuapa eta éhisirahi ema Cristo.

*Vímiyanava tauri eta véhisirahi ema Jesucristo*

<sup>6</sup> Tásiba puiti, tauri eta iávahásiraina ema Viáquenu Jesucristo. Ímyanava eta ítauchira eta íjarasiravahi éhica éma.

<sup>7</sup> Etupihayare muraca mayehe ema Cristo, apaesa tápajucavapaipa eta ítupajijiasiravaina, ímatirainapáipaicha éma. Émuracachavayare eta éhisirahi éma, yátupina esuapa taicha

tacahehi eta ímitucasivanahi. Vahi ecucainajiruva eta ehasulupayachiraya ema Viya.

<sup>8</sup> Échapavayaresera, taicha nararihi ena navarahayare tiyurucaheana, navarairaya éhica eta napanereruana. Vahi ecuisapava náemejecapavachahe éna. Machu náimitucahe eta nayeherepiana, náehiruhi ena náinapureanaini ticayeherepianahi tásihaquechucha te napanereruana éna. Eta júcana, tájina tavehapica apaesainahini eta máimiturapiana ema Cristo. Vahi ecusuapa ena nani.

<sup>9</sup> Ema Viáquenu Jesucristo, jéhevare éma, yátupiquenuehi santo. Taicha ticuticacanahi ema Tata Vicaiyaquene eta nasantuvanahi éna. Ticuticacanahivare eta náurivahi, étapa eta náitupajijiasiravahi.

<sup>10</sup> Éti apanavare, puiti eta iávahásiraripa ema Cristo, tisantuchahevacaripahi éma. Tájinapa ácamunuhini puiti eta iúchucuirapa. Taicha ema Viáquenu, téchavacahi ena ángeleana. Éma, túmepanahi nayehe ena éreanana.

<sup>11</sup> Ema Cristo, timarcachaheripa eta iáchanevana puiti eta iávahásiraipa éma. Ticamitisicaheripahi eta tajamura-chaqueneanainihi eta iáquehe tavarahaqueneanainihi icha eta tamauriqueneanahí. Jéhevarequene, eta emarcahi éti, ecachuricahi eta nacamarcairahi ena israelítana náechatisirahi eta náquehe.

<sup>12-13</sup> Éti, cape juca iásinequenuehi, vahi ímatihini ema Cristo. Vuichaha ecamarcahini mayehe. Tímicutijiricavahi táepenaquenénahini eta iáchanevana taicha eta epecaturanahi. Tímicutijiricavahi épenaquenénahini, ecaecarasihini tacutihi eta macaecarasirahi ema Cristo te máecari. Puítisera, eta ecasiñairaripa ema Jesucristo, ema Viya macaitaresinaheripa eta iáchanevana. Puiti ticutiripa échepurénaripahini éti, tacutiripahi eta maechepusirahi ema Cristo, maicha ema Maiya. Eta ecaicachasiraripa eta mayehe ema Cristo, táicutiarahi eta juca macaechepusiraripa eta iáchanevana.

<sup>14</sup> Taicha ema Viya, eta máimairahi eta macatajivairahi ema Machicha máepenirahí te crusu, tiperdonachahaviripa eta vipecaturana. Énerichuvare macaepaharipa eta vitapiravana tímicoñacahaviyarehini. Puiti matapiravarehaviripa eta máimairahavihi éma.

<sup>15</sup> Eta máepenirahí ema Jesús tayehe eta crusu, máitahacavacaripa ema Váinaraji énapa ena machanerana éreanana. Tájinarinehi natumevainahini eta mayehe. Puiti táquijicavacahi éna, te vipiaraca te máijare ema Jesús. Vaipa tipauchahavi anaimahi.

*Ema Pablo mavanecavaca vahi nacusuapa ena tiyururahiana*

<sup>16</sup> Puiti nutuparacahe: Vahi ecusuapavaca ena navarahahi éhica eta nayeherepiana, apanapanenejiqueneana, nácani vahi tísapaheanaimahi enica eta apamuriana tinicacareana. Váhivare ecusuapavaca te ticamesajiricaheanahipuca epicaucha eta napiestarana. Étaripa eta ecaematanerana te aracheruana caje, navarahaya epicaucha. Étaripa eta sache sávarumuahuana, navarahayareva epicaucha.

<sup>17</sup> Tamutu eta júcana, vaipa tásuapacare taicha náchucarapia-nachucha éna. Étasera eta juca máechajiriruvananahi ema Cristo, jéhevare eta yátupiqueneanahi. Tisuapacareanahi.

<sup>18</sup> Eta tacahe, vahi ecusuapa ena nácani navaraha típica-rarecaheana, te náichahepuca: “Vahi tiuri eta juca éhiruhi”. Váhivare ecusuapavaca, te ticamesajiricaheanahipuca éstacava, étapa eta ejirauchirainaji ecasiñairainaji ena ángeleana. Éna náimijachahi tacarichu eta ejacapacareya me Viya taicha eta juca. Ena nani, ticasíñavavaicanahi taicha tímijachavanaripahi máechajicavacahiji ema Viya. Vaipa navaraha nacainajiru eta navayuacasivanahi. Tamutu eta juca tímereuchavacahi éna, máehicarahanahi ema Cristo.

<sup>19</sup> Vítisera vimutu viti apanapanenejiquenehavianahi véhicanahi ema Jesucristo. Eta viúrujiasiraipahi éma, vaipa apaimamajihavinahini máicha. Tímicutijiricavaipahi mácani achane máitucahi eta macajurusirahi ena machichanaveana. Náurujiacahi namutu nácani machinanaveana, machinenana, mámarinaveanapuca. Émanarichuhisera ema téchahi. Ene vicahehi viti véhicanahi ema Cristo. Macarichu ema téchahavihi. Vímicatajiricacahi vicatiujiricacahivare vimutu maicha ema Viya.

<sup>20-22</sup> Puiti, eta éhisiraipa ema Cristo tímajicaheripa eta éhisirainihi eta nayeherepiana ena achaneana tamauriqueneana. Tacahe, vaipa ecusuapa ena ticamesajiricaheanahi te navanecahepuca: “Éhicahavi eta viyeherepiana tayehe eta vinisiraya, apaesa ejapanucare eta me Viya”. Machu navayuacahenani, taicha tamutu eta juca nayeherepianahi, tájina vahi étaparacaina tayehe eta viyapiraina te anuma. Eta juca nayeherepianahi, tásihaqueneanachucha te nachuti ena náchucanaveanaini.

<sup>23</sup> Eta juca nayeherepiana cútirinehi yátupiquenénahini tásihaquenénahini eta me Viya. Tásihasera vahi táimanaca. Ichape tayerehi eta máechajiriruvana. Ena nani, tímijachavanahi nacurisamurechahi ema Viya. Tépiyacavanaripahi mánsuanahi eta náichirahi eta muraca penitencia. Téstacavanapa náijararecaripa eta naeche tayehe eta tacatiquene.

Tamapurujihisera eta náichirahi, náviraichuhi náichahi eta tajamuraraivahi eta náqueheana.

### 3

*Tihapasamurerecahaviyare eta vivarairayare vélhica eta máurivahi ema Cristo*

<sup>1-2</sup> Puítisera arairupa eta ítaresira maicha ema Cristo. Étainapa tihapasamurerecaheyare eta máurivahi éma étapa eta ítecapauchira éma tayehe eta anuma máejasihahi te mavaire ema Maiya. Vaipa étaimahi tihapasamurerecaheyare eta eyeherepianainihi tamauriqueneanaini.

<sup>3</sup> Taicha íjararuvaipa eta ínajisirayare eta júcana. Puiti ticaitarecaheripa éma táichavenehi eta iávahásiraipa ema Jesucristo. Iúricahi puiti. Vuíchahasera ímahahini tamutu eta táetaviuchiraya eta iúricacarevaya.

<sup>4</sup> Téhesera te machava ema Viáquenu Jesucristo, máitsivachinapa eta iáqueheanayare, tajarahiqueneanayare. Tásiha, echanenapaipa éma. Tétavicavaya eta viúricacarevaya vimutu máicha.

*Vínajicayare eta viyeherepini eta viásinequene*

<sup>5</sup> Tásiha puiti, ínajicainapa eta eyeherepianaini tamauriqueneanahi. Nacuijapa nacuveha esu apuna esena. Vaipa ecupanerecha eta panererucana tamauriqueneana. Vaipa ecujamuracha icha eta tamauriqueneanahi. Vaipa tihapapiricahemahi eta ecaimahaquenéraina, taicha ena titanucanahi eta juca, nacutihu nácani ticasíñarajiana.

<sup>6</sup> Ena masuapajirairhana, náichahi tamutu eta juca tamauriqueneana. Étapa tímicoñacayarehi éna, taicha táimiuyusemacaichucha ema Viya.

<sup>7</sup> Éti apanavare étainichuhivare iávacuhainihi cape juca iásinequenehi.

<sup>8</sup> Puitisera ínajica tamutu eta júcana: esemarajivana, ecatianaraivana, evainarajivana, iúmeharaivana, étapa eta táíñemahiqueneana eta échajiriruvana.

<sup>9</sup> Vahi ecuépiyaequenehacáca. Ímereuchava yátupina eta ínajisirahi tamutu eta eyeherepianaini cape juca ítaresirainihi.

<sup>10</sup> Puíticha, amairiharipahi arairupa eta juca ítaresirahi, machichaheripa ema Viya. Tajurucapaipaini eta ecutirayare éma eta masantuvahi étapa eta máurivahi éma.

<sup>11</sup> Tayanapane apavasanananajihavihi viti vélhicanahi ema Viáquenu, émasera tihetamurichahaviripa viti israelítana, étipa eti apavasanana, énapa ena máicachasianana. Te mamirahu ema Cristo, vaipa apavasanananajihavinahini, étanarinepa eta vímahi maicha éma. Tayanapane tájina emarcainahini te

iáqueheana. Váhisera ticachuriacaheanaimahi ena ticamarcanahi. Tayanapanevare ecaquenuhipuca. Váhivaresera vicachuriacahemahi viti líbreanahi. Ema Cristo tiávahácahavíhi vimutu.

*Vicaravahuinapa tiúriyare eta vítaresira*

<sup>12</sup> Ema Viya tétavicavahi eta máemunasirahehi. Eta tacahe, tinerejicahéhi eti machaneranayarehi éma, ecutipaipa éma, eta masantuvahi. Eta tacahe, puiti étijiváinapa ecaravahuyare eta táurivayare eta ítaresirayare. Étaviuchayare eta ejapnuraivaya, émunarahiyareva. Ímerecaya eta emansuvayare. Ecamicha tamutu.

<sup>13</sup> Te tatarihinapuca eta náejecapiravaina ena echamuriana eta eyehe, vahi ecucaticha, ácayehevare paciencia. Eperdonachacacayare, ecutiyare ema Cristo eta maperdonachirahehi éti.

<sup>14</sup> Tamutu eta juca numetaruheanahi, ítauchayare. Énerichuvare tiápajucavayare eta émunaraivayare. Taicha te vémunajiricacahi, tétavicavayarehi eta viúricacarevaya eta viúrujiásiracacahi.

<sup>15</sup> Vahi ecuemepurureca eta iúrivahi maicha ema Cristo. Ísapavavare mayehe ema Cristo macanaracahe tamutu eta epanereruana. Taicha tacahehi eta máichuirahéhi, mavarahi étanayaréichuhi eta epanereruana eta iúrujisiracacahi. Ehasulupayachahivaréni tamutu sácheana.

<sup>16</sup> Étaviuchahini eta iúnasiráina te esamureana eta máechajiruvana ema Cristo. Étumechacacahini eta ímitusiracacaya eta échemaráivayare. Evapinavahini te esamureana eta ejiraira te iúrujisiravana. Ejirayare eta majirahuana ema Viya, eta ehasulupayachirayarehi éma.

<sup>17</sup> Tamutu jácani ecaematanerana, échajirisiravana, ímerekuchava eta machaneraheirahi ema Viáquenu Jesucristo, iámirapaipa eta máijare. Te tamutu eta jácani íchararacavana, ehasulupayachayarehi ema Tata Vicaiyaquene.

*Vímerecayare eta viúriva nayehe ena vichamuriana*

<sup>18</sup> Étiripa eti esenana ecaimaqueneanaripahi, epicauchayarehi ena ímanaveana. Esuapajirahiyare eta nayehe, taicha etuparahahi eta éhisirahi ema Viáquenu.

<sup>19</sup> Éti apanavare eti náimanaveanahi, émunacayare ena eyenana. Vahi ecuímipananajica éna.

<sup>20</sup> Éti apanava eti amaperuana, esuapayare ena ticachichaheana, esamararasinavaya te jácani náechajisiraheana. Te itaucha eta juca, ecurisamurechayare ema Viya.

<sup>21</sup> Énerichuva eti náiyana, vahi ecuímiyusémaraca ena echichanaveana apaesa vahi nacuipuñacava eta eyehe.

<sup>22</sup> Étiripa eti ecaquenurecanahi, esuapajirahiyare nayehe ena iáquenuanahi. Ítauchayare eta navanairipianahi. Tátupiruva te esamureana eta ecaematanerana. Vahi tácarichuimahi ítaurahiyare te natarihi te echacaya ena iáquenuanahi. Te nájinahipuca, tacutiyarerichu eta ecaematanerayare. Taicha ema Viya tímararacahehi. Éma epicauchayarehi.

<sup>23</sup> Evapinavayare icha eta evanecasivanahi nayehe ena iáquenuanana, taimicutijiricavahi émainahini ecaematananeaca ema Viáquenu.

<sup>24</sup> Taicha eti manusurahehivare ema Cristo, ema tiápajucavahi iáquenupanahi. Écharichuhi éti eta tatarihirahí eta ícuchihi íjaracasiyarehi eta mayehe.

<sup>25</sup> Énasera ena téjecapavanapuca, máimararacahi ema Viya eta náejecapiravanahí. Étánapa tímicoñacayarehi. Nájina mamunanequeneanaimahi.

## 4

<sup>1</sup> Éti apanavare eti náquenuanahi ena músuana, tiúriyareva eta ecavanairipiraya, vahi ecuimipanajanajicavaca. Ítauchayare íjaraca eta nacamunuqueneanahí. Échavayare éti apanavare eta máimararasirahehi ema Viya, émahi Iáquenuenehí.

*Eta téqueneha matuparasirahavihi ema Pablo viti vélhicanahi ema Viáquenu*

<sup>2</sup> Puiti emutu éti, étumechavachucha eta eyujarasirahi eta me Viya. Vahi ecuyacujihini. Énerichuvare ehasulupayachaparacayare tamutu me Viya.

<sup>3</sup> Énerichuvare ímicatacavahí eyujarauchahavi, apaesa vítujicavapaini viúchucuha, vímiyanavapaini vímimaticahahini ena achaneana eta juca tayumururevainihi mayehe ema Cristo. Étavenehi puiti présunuhi táicha.

<sup>4</sup> Nécatiacahecha ímicatacanu eyujarauchanu apaesa nítujicava nucametarairu, taicha nutuparahaichuhi me Viya.

<sup>5-6</sup> Táuri eta ítaresiraina nayehe ena máehicarahanarichaha ema Jesús. Tátupiruva tauri eta échajirisiravana, tapicauchacarehi. Táurivare eta ejicapiraina te natarihinapuca nácani tiyaserecaheanayare. Ecamapuravachaha puiti juca sácheana eta ímitusiravacahi.

*Eta táichecuaraqui eta máechajiriruva ema Pablo*

<sup>7</sup> Máimahaherinesera ema vémunaruquenehi vichamuri Tíquico. Éma, titametacaheyare tamutu eta níchararacavahi nútí taicha éma nucachanehi eta te juca návihahi. Tétavicavahi eta máimicatasiranuhi eta vicaematanearisrahi me Viáquenu.

<sup>8</sup> Eta tacahe, névatacahi máiteca eta ara eyehe. Éma timetacaheyare eta víchararacavahi. Énerichuhivare tétumechaheyare éti apanava.

<sup>9</sup> Énerichuhivare névatacahi ema Onésimo némunaruquenahivare. Éma, tiásihahi eta ara eyehe. Puiti émarichuhi vichamurihi eta te juca. Tétavicavahi eta máitauraivahi eta macaemataneasirahi ema Viáquenu. Ena nani apinana, éna titametacaheanayare eta víchararacavahi víti te juca viávhahi.

<sup>10</sup> Téchajicahe ema Aristarco, ema nucutiquenehi eta nucaeratairahi. Téchajicahevare ema Marcos, ema macheji ema Bernabé. Éti écharipa eta máitesirayare eta ara eyehe ema Marcos. Te máitecapauchahepa, tiúriyare eta ejacapirayare éma.

<sup>11</sup> Énerichuhivare téchajicahe ema Jesús Justo. Nacarichuhi ena nani mapanana nujaneananahi israelítana tímicatacanuanahi. Nacachuricahi ena apamuriana nujaneanana vichamurianahi. Ichape eta náimicatasiranuhi eta vicametarairuirahi eta máechajiriruvana ema Viya. Ichape eta nacurisamurechiranuhi éna.

<sup>12</sup> Téchajicahevare ema Epafras, ema eyehe pastor. Ema maca, yátupiquenehi mavanara ema Jesucristo. Tétavicavahi eta máecharairisirahehi éti te mayujarasirana, mavarairahi ímivanahini étumechava yátupinahini ítauchahini eta mavaraqueneana ema Viya.

<sup>13</sup> Ichapemurihi eta nímararasirahi nútì ema Epafras eta máecharairisiráhehi éti, énapa ena ticavasanahi te avasareana Laodicea étapa Hierápolis.

<sup>14</sup> Énerichuhivare téchajicahe ema médico Lucas, ema vémunaruquenahivare. Téchajicahevare ema Demas.

<sup>15-16</sup> Tacahe, te támutupa eta échajicuirayare eta juca nucartane, ímiamarecaya nayehe ena apamuriana vichamurianahi ticavasanahi te avasare Laodicea. Nuvarahavare échajisinanuini éna. Échajisinanuvare ema Nífas, énapa namutu ena tiúrujicavarahianahi te mapena. Nímiamarécahivareséra eta nucartane nayeheyare namutu éna. Te táitecapauchahe, échajicuhayarevare éti apanava.

<sup>17</sup> Piti apanavare piti Arquipo, nutuparacaviyare: Pítouchayare tamutu eta juca pématanerepianahi, taicha eta pituparahahi me Viáquenu.

<sup>18</sup> Nuti Pablo nútiquenepa nájucha eta juca táchecuaraquihi eta nucartane tayehe eta némechajirisirahehi. Nutuparacahe vahi ecuemitisicanu te eyujarasirana. Eyaseasinanu eta núchucuirávanéna.

Nuyaseuchaheparaca me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi e yehe.

# Eta macartane ema Apóstole Pablo nayehe ena machamuriana ticavasanahi te avasare Tesalónica, ticaijare **1 TESALONISENSES**

<sup>1</sup> Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas\*, émapa ema Timoteo. Vímiamarecahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo. Nuvaraha macatajicahehini ema Tata Vicaiyaquene, émapa ema Viáquenu Jesucristo; náijaracahehini eta táurivaina eta epanereruana.

*Ema Pablo tiúrisamure eta máechirahi náimiyaniravahi náehisirahi ema Cristo*

<sup>2</sup> Viti vihasulupayachaparaca ema Viya eyehe emutu eti. Tamutu sácheana, te viyujarasirana, viyaseuchahe me Viya.

<sup>3</sup> Taicha tamutu sácheana vécharairicaheparaca eta ímeresirahi eta esuapirohi éhisirahi ema Viáquenu Jesucristo, étapa eta epamisiravahi ecaematanecahi yátupi táichavene eta émunasirahi éma, étapa eta ecamichirahi tamutu táichavene eta ecuchapiravahi eta machaviraya. Ema Tata Vicaiyaquene máimaha tamutu eta íchararacavana.

<sup>4</sup> Nuparapenaveana, éti, máemunaruuanaripa ema Viya. Véchahi eta manerejisirahehi éma.

<sup>5</sup> Taicha te vímitucahepa eta máechajiriruva ema Viya tayehe eta viúchucuiraya, éti etupiruvahi ejacapa eta vimetaraijuana taicha ímatihí yátupiquenérahi mayehe ema Viya. Ema Espíritu Santo tinacasamurechahehi eta táurivahi esama eta vímitusirahehi. Ímatihavihi eta mavanesirahavihi ema Viya. Ímahahivare eta viúrivahi eyehe.

<sup>6</sup> Jéhesare puiti, étijivapa eta épaniravahi éhicahavi eta viúrivahi víti, vicutiyare eta máuriva ema Viáquenu. Ecátagivanúmahí ichape taicha eta ejacapirahi eta vimetarapiana. Iúrisamurehiséra maicha ema Espíritu Santo.

<sup>7</sup> Tacahe, ena apamuriana vichamuriana ticavasanahi te tinapaica eta Macedonia étapa te Acaya, eta náimairahi eta yátupirohi eta esuapirohi, étarichuhi náehicahi éna.

<sup>8</sup> Éti ímisamahi eta máechajiriruva ema Viya namutu ena achaneana ticavasanahi te Macedonia étapa te Acaya. Téchacarehivare te tamutu avasareana te jácani vítecapihapahi eta juca yátupirohi esuapa ema Viya. Vaipa

---

\* **1:1** Ema Silas, eta máijarequene Silvano te náechajiriruva ena romanoana.

tácameahini vimetataracavacahini éna eta esuapajiraivahi éti.

<sup>9</sup> Timetacahavianapahivare eta etupiruvairahi ejacapa eta vimetarapiana, étapa eta ínajisiraipa eta esifarájianaíni, équesiravarípa eta ecaijuherapa yátupi ema Viya. Puíticha tépanavaripa eta ecaematañesirahi éma. Éma, yátupiquenehi Viya. Yátupiquenehivare eta masamaraiva.

<sup>10</sup> Énerichuvare timetacahaviana eta ecuchapirahi eta machaviraya ema Machicha ema Viya másihairaya te anuma, ema maca Jesús émarichu ema macaechepecasiquenehi te máecari maicha ema Maiya. Émara ticatiuchahaviyare tayehe eta ecuñaraqui náicuchihi ena masuapajirairahana.

## 2

*Eta máematanerepihi ema Pablo nayehe ena ticavasanahi te Tesalónica*

<sup>1-2</sup> Écharichuhi eti nuparapenaveana, tamutu eta náichirahavihi ena achaneana, tímicuñacahavianahi ánaqui te avasare Filipos. Váhisera vácatsimavahini te vítecapauchahepa ani, vímiyanavaríchucha vicametairaru taicha tétumechahávirichucha ema Viya eta vímitusirahehi eta máechajiriruva, camurianahineni ena ticatianacahavianapahi. Váhisera támapurujihíni eta véjirairahehi. Éti etupiruvahi ejacapa eta vimetarairuanahi.

<sup>3</sup> Taicha vahi véjecapavahini eta vímitusirahehi. Váhivre étainahini vipanerechapahini eta tájiparacana tamauriqueneana, váhivre vivayuaraquina eta véchajisirapahi.

<sup>4</sup> Víti manerejiruhavihi ema Viya taicha máechahi eta vítauchirayarehi eta vituparacasivayarehi mayehe. Eta tacahé, tituparacahavihi muraca viámayare eta máechajiriruva nayehe ena achaneana eta náuchucuiraina. Étapaichuhi eta juca véchajiriruvanapahi. Vahi étaina vivaraha támemunacahávihini nayehe ena achaneana. Vítauchahi eta mavarahaqueneana ema Viya eta vicurisamurechihahi éma, taicha éma, máimraracahi eta visamureana.

<sup>5</sup> Écharichuhi éti eta vicayemaqueneanapahi, vahi vémetse-rajiricavapahini eyehe. Váhivre étaina vétseraruinapahini vivereacahehini eta eplatane. Vitupiruvapahi eta vicayemaquenehi te mamirahu ema Viya.

<sup>6</sup> Vahi vápanerechahini náetserajicahavihini ena achaneana, étipa, viratahahineni vímereca eta vituparahaquenehi mayehe ema Viáquenu Jesucristo. Váhisera vávarahahini vímerecava vácutihini mácani achane ticamusura.

<sup>7</sup> Véchapajirícahehiséra tacutihi eta suéchapajirisira suémunasira súcani esena ena suchichanaveana.

<sup>8</sup> Ichape eta vémunasirahehi. Vímitucahehi eta máechajiriruva ema Viya eta iúchucuiraya. Víjaracavahi ichape te visamureana, vivarairahi esuapa éti apanava, taicha vémunacahehi.

<sup>9</sup> Nuparapenaveana, te vinasiqueneripa eta eyehe, eta vicametarairuirahi eta máechajiriruva ema Viya, ímararacahavirichuhi éti eta vicaematanerahi muraca eta vítatijirisiravahi. Tamutuhi sácheana, yátiana vicaematanehi, taicha vahi vávarahahini vétsepanáracahahehíni eta vinicaquenerepi.

<sup>10</sup> Éti enecapaequenehahi tamutu eta víchararacavahi. Tímararacahávihivare ema Viya. Vitupiruvahi yátupi eta viúrivahi eta eyehe eti vichamurianahi. Tájina naviyahini nayunaca ena apamuriana achaneana.

<sup>11</sup> Énerichuvare échahi eta vétumechirahéhi, émanapachuhi viconsejacha vicutihi mácani achane tiuri eta maconsejachira ema machicha.

<sup>12</sup> Vécaticacahehi ichape eta iúrvaina éti, ímerecaya eta macáchichairaherípa ema Viya, taicha íchuarecasivaipa mayehe eta ecachaneraya éma tayehe eta mávasa te anuma, te távihahi eta majaraiva.

<sup>13</sup> Eta tacahe, vihasulupayachaparaca ema Viya eta táurivahi esama eta máechajiriruva vimetarapianahi. Éti, etupiruvahi ejacapa eta vimetasirahehi taicha eta esamirahi yátupiquenehí, tásichaquenehí ema Viya. Ímativanehi vahi vipanereruinchuchaini víti, émainapucaini mácani apana achane. Eta juca eta tiúrichahehi eti esuapanahi.

<sup>14</sup> Énerichuvare tiúrihi eta ecamichirahí eta ecatajivairahi nacatianasirahehi ena ejaneanana, ecutihi ena apamuriana vichamuriana ticavasanahi te Judea. Nuparapenaveana, ene nacahehi eta nacatajivairahi naicha ena najaneanananarichu israelítana, táichavene eta náehisirahi ema Viáquenu Jesucristo.

<sup>15</sup> Ena nani nujaneanana nacapacahi ema Viáquenu Jesucristo nacutihi ena náchucanaveánaini eta nacapasiravacahi apaicape ena profetanaini. Tipanajiricahavianavare víti. Ena nani náimiyusemacahi ema Viya. Váhivare návaraha nasamahini ena apamuriana achaneana eta máechajiriruva ema Viya.

<sup>16</sup> Taicha te vivarahainipa vímitucavaca ena apavasanana apesa náuchucuhahini éna apanava, nacatichavare ena nujaneanana eta vímitucavaca éna. Tíchejimiráuchahavianapa. Eta tiviuchahi, tivayuchavapaichucha eta natapiravana. Ema Viya vaipa macamichahini eta náejecapirávana. Puítisera táitecapáuchainapa eta náicuñaya máicha.

*Ema Pablo mavaraha tiápechava máejiravaca ena machamuriana*

<sup>17</sup> Nuparapenaveana, tayanapane viyerehicacahi puiti juca cájeana, vahi vímahacacahini, tanasihisera vicaimai-ruhehi te viúquihana. Vivarahaine víjahúchavahabini víteca-pauchahe vímahahehini.

<sup>18</sup> Nútiripa nuti Pablo, ichapemurihineni nuvaraha níteca eta ara eyehe, énapa ena apinana nucompañeroana. Émasera ema Satanás tíchejimiráurucarávichuchapúca jácani.

<sup>19-20</sup> Véñamavahi víti eta eyehe taicha vivarahahi tánasihíni eta iúriva eta machimapiraheya eta machaviraya ema Viáquenu Jesucristo. Tásicha, viti vicuchapavainapa eta vijacapirayare eta vícuchihi mayehe éma. Viúrisamurénapa víti te jena sache, íchavenehi étí.

### 3

<sup>1-2</sup> Eta tayerevaipahi eta vimaimanasirahehi, téavicavahi eta véñamiravahi eta eyehe. Vaipa viúrisamurehini. Vivara-haipaicha vecha tájahapuca eta ícharacavahi. Tásicha, vipane-rechapa vévataca ema vichamuri Timoteo, máiteca máimaha-panahe. Vinasipa víti vicarichu te Atena. Taicha ema maca Timoteo, émarichuhi mavanara ema Viya, émarichuvare vicutiquenehi eta vicaematanerahi tayehe eta máechajiriruva ema Viáquenu Jesucristo. Nuvanecahi tímicatapanáheyare témuracacháheyare eta esuapajiraivaina,

<sup>3</sup> apaesa nacuija nacuchavacuejechava tayehe eta ecata-jivairana naicha ena ticticianarahiana. Écharichuhi étí eta vicatajivairaya táichavene eta véhisirahi ema Jesucristo.

<sup>4</sup> Váhisera táramicare eta juca, taicha vimetacahévanehi te vinasiquenerichaha eta eyehe, eta vicatajivairayarehi. Jéhesaréinehi títauchavahi puítiripa, ímaharipahi étí.

<sup>5</sup> Eta tacape, téavicavahi eta néñamiravahi nútí eta eyehe. Vaipa núrisamurehini íchavenehi étí. Tacape, nuvanecapa ema Timoteo máimahapanáhe te enasirichuhipuca eta éhisirahi ema Jesús. Taicha nímicauyayahehi máquipaicahehíni ema Satanás, támapurujihini eta vicaematanearisráipa ema Viya.

<sup>6</sup> Puítisera eta machaviraipa ema Timoteo, másihairahi eta ara eyehe, timetacahavipa tájinairahi íchiravainahini eta éhisirahi ema Viáquenu Jesucristo, étapa eta émunasira-cacahi. Timetacahavivare eta écharairisirahávihi émunasira-havihi víti, evarairahi íjahúchavahabini ímahahavi. Vicuticacahi eta vivarairahi vímahahe víti.

<sup>7-8</sup> Eta tacape, nuparapenaveana, véchararaháinehi eta visamairirisirahehi eta táurivahi eta éhisirahi ema Viáquenu. Tacamitiacarine eta véñamiravahi. Étumechahavirinehi eta vicatajivairana. Tichavarinehi eta viúrisamureva.

<sup>9</sup> ¡Ichape eta vihasulupayachirahi ema Viya táichavenehi eta iúrivahi! ¡Tájinarine tacutihini eta viúrisamurevahí mayehe ema Viya, íchavenehi éti!

<sup>10</sup> Tamutu sácheana, yátiana, viyujaracahi mayehe ema Viya, viyaseacahi vítujisirávainahíni viápechava vímaháhe. Vímítucahehini eta apamuriana titucacareana tayehe eta juca véhisirahi ema Jesús. Támutuhini ítuca.

<sup>11</sup> Eta tacahe, viyaseacahi ema Tata Vicaiyaquene émapa ema Viáquenu Jesucristo náijaracahavihini eta vítujisiraváina víteca véjirapanáhe.

<sup>12</sup> Énerichuvare macajurucahini ichape ema Viya eta émunaraivaina nayehe ena echamuriana, énapa ena apamuriana achaneana, tacutihini eta vémunasirahehi víti.

<sup>13</sup> Máijaracahéni táurivaina eta esamureana tacuija etapiravaina, máepachinachahini eta iáchanevana apaesa ecurisamurecha ema Tata Vicaiyaquene te jena sácheyare machaviraya ema Viáquenu Jesucristo, másihairaya te anuma, mámirayarepahi ena apamuriana manerejiruanahi.

## 4

### *Mavaraha ema Viya táuri eta vítaresiraina*

<sup>1</sup> Tiuri puiti, nuparapenaveana, vituparacahecha muraca te máijare ema Viáquenu Jesucristo. Táuri eta ítaresiraina puiti juca epaisirayare. Te tauri eta ítaresiraina, ecurisamuréchayare ema Viya. Puiti iápajupanaváinapáipa eta iúrivaya.

<sup>2</sup> Ítucaripahi eta juca ímitucasivanahi viyehe. Étarichuhi vivanecasivanahi mayehe ema Viáquenu Jesucristo.

<sup>3</sup> Taicha eta juca mavarahaquenehi ema Viya, tiápajuvayare eta iávahásirahi éma. Vaipa ecuquicha eta pecatuana. Nacuijapa nacuveha súcani apana esena. Ésuripa esu esena, vahi sucuveha ema apana achane. Énaripa ena echichanaveana, tacuija eta natuhusivaina.

<sup>4</sup> Nacuchapa eta náitauchiraváina yátupina te mamirahu ema Viya. Emutu éti, yátupina eta émunasiraina ena eyenaveana. Tauri eta ítaresiraina te epenana.

<sup>5</sup> Vahi ecucutipa ena ajairana esenamareana. (Éna náichahi eta juca taicha eta namaimatirahi ema Viya.)

<sup>6</sup> Nacuija nacuveha esu mayena ema mácani echamuri. Taicha ema Viya, yátupi eta máicuñasirayare nácani ena tíchanahi eta juca. Étarichuhi eta vímiturapianahi eyehe cape juca te vítecainapa eta ara eyehe.

<sup>7</sup> Taicha víti máichuhaqueneánaripa ema Viya, mavaraha tiúrinayare eta vítaresiraya, vaipa víchaimahi eta juca tamauriqueneana.

<sup>8</sup> Tacahe, ema mácani tépuruhi eta juca vímiturapianahi, máepuruhibare ema Viya; taicha mavanairipianahi eta juca, vimetacasivahi víti mayehe ema Espíritu Santo, eta mávahásirahavihi.

<sup>9</sup> Puiti numetacahe nútì: Tájinapa vaipa néñamava eta eyehe eta émunasiracacahi, taicha ema Viya tíjaracaheripa eta émunasiracacahi.

<sup>10</sup> Vaipa néñamavahini taicha nusamairiricaheipa eta émunaraivahi nayehe ena echamuriana títecapauchaheanahi tiásahanahi tayeha eta táunavanahi eta iávasa Macedonia. Nuparapenaveana, puiti vituparacahecha iápajucavayare éti eta émunaraivaya.

<sup>11</sup> Énerichuva viápechava vituparacahe tauri eta ítaresiraina. Échapajirica eta émataneana. Ecaemataneacava yátupina, eviyihayare eta ecamunuqueneana tásihaqueneánayare te evahuana,

<sup>12</sup> apaesa tacuija ecucamunu te epenana. Te ítaucha eta juca, tipicauchaheanayare ena apamuriana achaneana.

*Vahi téñamavacareana ena vichamurianaini náepenaqueneana taicha tiápechavanayare titarecanayare*

<sup>13</sup> Nuparapenaveana, énerichuvare vivaraha vimetacahe eta náichararacavayare ena vichamuriana náepenaqueneanaripa. Vahi ecucatisamureva nayehe. Ena apamuriana achaneana ticatisamurevanapa te náecarapana ena náepenaqueneana, taicha vahi nácasíñavahini me Viya, nacunevahini eta nápechiravaya téchepucana te náecari. Vahi ecucahe éti.

<sup>14</sup> Víti visuapahi eta máecheperusirahi ema Jesús te taequenepa eta máepenirahi. Tásiha, visuapahivare eta macaecheperusirahaviya ema Viya te vépenapa, vicáchanénapa ema Jesús viti véhicanahi éma.

<sup>15</sup> Eta tacahe, vimetacahe eta juca vímitucasívanahi mayehe ema Viya. Te machavapa ema Viáquenu Jesús, te vuíchahapuca vicuepenahi víti, vahi vicainapucavaimahi nayehe ena náepenaqueneana.

<sup>16</sup> Taicha émarichu ema Viáquenu tiúcupaicaya tichavayare, tiásihaya te anuma. Tipiaracaya muraca tíchuarecaya. Ema Arcángelé énerichuvare tipiaracayareva. Ticaemayareva eta machuja ema Viya. Tacahe, téchepucanainapa tínapucanaya ena náepenaqueneana ena tisuapajirahianahi mayehe ema Cristo.

<sup>17</sup> Tacahe, viti vítareruanaichaha viyanainapa. Vimutu vicáchanénapa ena náepenaqueneánaini. Viácapajicáinapa ema Viáquenu te anuquehe te távhahi eta úcaji. Tásiha, máichecuaraquiereyare eta vicachaneraya ema Viáquenu.

<sup>18</sup> Eta tacahe, emetajiricacayare nayehe ena echamuriana tamutu eta juca vímiturapianahi, apaesa nacurisamurechavaya éna apanava.

## 5

### *Tiáramicareyarechucha eta machaviraya ema Viáquenu*

<sup>1-2</sup> Nuparapenaveana, vahi ecuemitisicava. Ecunevaicha yátupina, taicha téchacareipa eta táramicarevaya eta máitesirayare ema Viáquenu. Tacutiyare mácani tiámereca te yati, nájina tinecapaina. Ene tacaheyare eta máitesirayare ema Viáquenu. Váhisera vécha tájamuhuyarepuca.

<sup>3</sup> Énaripa ena achaneana vuíchaha náemeteacaimahi eta tánehiraripa eta máitecapiraya. "Viúririchucha puiti. Tájina víchiravaimahi" nacaheyare éna. Vahi tinecapauchavanimahí eta táitecapauchiraya eta náicuñayare tacutiyare esu súcani esena ticajari, tíjahúchavapa ticati eta sujuhe eta suínasiraya. Ene nacaheyare éna. Tájina najunaiyaimahi.

<sup>4</sup> Étisera, nuparapenaveana, écharipa eta juca. Vaipa iáramecaimahi te jena sache máitecapiraya ema Viáquenu, taicha tamutu sácheana ecuchapahi eta máitecapiraya.

<sup>5</sup> Taicha víti viávhahi te majaraivahi ema Viya, víti vipaichi te sáchemuhu. Vahi táiñehavina eta yati, taicha vínjicaipa eta tamapicuquene.

<sup>6</sup> Eta tacahe, tavaraha vicuneuchava tamutu sácheana, vijaneasiravainahini muraca. Váhini vicucutihini ena tivayuchavanahí tímamacarácavana, tájina náechaquenena éna. Vítisera vijaneacavaya tamutu sácheana, yátiana. Tájina víchiravaimahi.

<sup>7</sup> Ena achaneana, tímamacarácavanahí te yátiana, ena apamuriana ticávahaháracavánahi te yátiana. Vahi najaneacavahini éna.

<sup>8</sup> Vítisera tamutu sácheana vicuneyare. Tiúriyarehi eta vipaisira, tájina víchiravaimahi. Yátupina eta véhisira ema Jesús. Vímiyanovahini eta vémunasiracacaina. Vácasíñavahini eta macuchucuirahaviya éma. Tájina vahi vicuyacujiequenehava eta vicuchapiraya eta jena sache.

<sup>9</sup> Taicha ema Viya manerejiruhavihi eta macuchucuirahaviya máichavenehi ema Viáquenu Jesucristo. Vaipa vicacuñaímahí.

<sup>10</sup> Ema Jesucristo tépenahi te crusu vitivenehi, mavarairahi vitarecayare vicachaneyare éma. Te máitecapa éma, macaeche-pucainapa ena náepenaqueneana vichamurianaini. Tásiba, viti vitareruanaichaha tihetamurichahavinapa, taicha mavarahahi vicachaneyare éma.

<sup>11</sup> Eta tacahe, étumechacaca, ecatiacacavare. Núti nucasiñavahi eta eyehe eta íchirapaipa puiti eta juca.

*Ema Pablo tímiyanava eta maconsejachiravaca ena machamuriana*

<sup>12</sup> Nuparapenaveana, énerichuvare vituparacahe eta epicauchiraina ena víyarahana pastoreana taicha ena ticonsejachaheanahi, tímitucaheanahi eta juca éhisirahi ema Viya.

<sup>13</sup> Échapajiricavacaya éna. Émunasinávaicha, taicha éna tiúrihi eta náimicatasirahehi. Tacuija ecuichiravaina éti eta nayehe.

<sup>14</sup> Énerichuvare vituparacahe, nuparapenaveana, epamicayare muraca nacaematanane ena plújuana, vahi náesachahi ticaematananeana. Énerichuvare étumechavaca ena tiyacujirihana. Ena nani tinanájiricavanahí, muracaina eta ímitusiraina. Ecayeheyaresera paciencia nayehe namutu.

<sup>15</sup> Échapavayare. Tijuricati natiarihína navaraha titupiacaheana, vahi ecujicapa. Váhivare ecuitsicava. Ímerecayaresera eta iúrivaya nayehe ena echamuriana, énapa namutu ena apamuriana achaneana.

<sup>16</sup> Iúrisamurerecaya tamutu sácheana.

<sup>17</sup> Vahi ecucajinajiruva eta eyujarasirana mayehe ema Viya.

<sup>18</sup> Tamutu jácani íchararacavanahí, ehasulupayacha ema Viya, taicha eta mavarahahi ema Viya ecaheyare eti éhicanahi ema Viáquenu Jesucristo.

<sup>19</sup> Váhivare ecuemepurureca eta mavarahaqueneanahi maicha ema Espíritu Santo eta eyehe.

<sup>20</sup> Te esama nácani téchajisihanahi ema Viya, vahi ecuepuru.

<sup>21</sup> Vahi ecuemunanasicava. Epanerechinavayare te tájahapuca jácani esamaqueneanahi, ímahaqueneanahi. Éhicaya eta táuriqueneana.

<sup>22</sup> Téhesera vahi tiúrihi, vahi ecuisapava, taicha eta tamauriqueneanahi.

<sup>23</sup> Tiuri puiti, máijaracahéni ema Viya táurivaina eta epanereruana. Yátupinahini tacuijahini ecuichiravaina eta iávahásirahi éma. Majaneasinahehini eta iáchanevana, eta iáqueheana. Tacuija eta etapiravainahini te machavapa ema Viáquenu Jesucristo.

<sup>24</sup> Taicha éti máichuhaqueñeanahi éma. Yátupi eta macasiñacarevahi. Máitauchayareva tamutu eta juca.

*Eta téqueneha matuparaha ema Pablo*

<sup>25</sup> Nuparapenaveana, ímicatacavahi eyujarauchahavi me Viya.

26 Échajisinahavi namutu ena vichamuriana.

27 Nutuparacahe te máijare ema Viáquenu échajicuha eta juca vicartane te namuri ena vichamuriana apaesa námuntu nasama.

28 Nuyaseachaheparaca me Viáquenu Jesucristo táetaviuchahíni eta iúricacarevaya máicha.

## Eta macartane ema Apóstole Pablo nayehe ena machamuriana ticavasanahi te avasare Tesalónica, ticaijare **2 TESALONICENSES**

<sup>1</sup> Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas\*, émapa ema Timoteo. Vímimarecahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo.

<sup>2</sup> Nuvaraha macatajicahehini ema Tata Vicaiyaquene, émapa ema Viáquenu Jesucristo; náijaracahehini eta táurivaina eta epanereruana.

*Ema Viya máicuñacayare ena ticapecaturarahiana te táitecapapa eta machaviraya ema Cristo*

<sup>3</sup> Nuparapenaveana, tatuparaca vihasulupayachaparaca ema Viya, taicha visamairicahi eta tápajusiravapaipaicha eta esuapirohi ema Viya. Tajurusirapaipahi eta émunasiraca-cairahi. Eta tacahe, vihasulupayachaparacahi ema Viya.

<sup>4</sup> Tájinarine tacuti eta vicajamurairahehi nayehe ena vichamuriana te viúrujisirávana te jácani vítecapihapahi. Vimetacavacapahi eta táimiyanirávahí eta éhisirahí, ecamichirahivare tamutu eta nacatianasirahéhi ena achaneana étapa eta ecatajivairana, táichavene eta éhisirahí ema Viya.

<sup>5</sup> Tímararacahehisera ema Viya eta ecamichirahí eta ecatajivairahí. Máimerecahi éma eta máuriva, máitauchirahí tamutu. Éma tijacapaheyare eta esiapirayare tayehe eta mávasa.

<sup>6</sup> Máimaháinapaséra ema Viya eta máicuñasiravacayare ena tictatianacaheanahi éti, taicha macarichu éma ticatuparrahahi juésyarehi téchayarehi.

<sup>7</sup> Étisera, ticanaracaheyare ema Viya eta ecatajivairana, vicuticacainapa eta vinarasirayare te mamirahu ema Viya. Vinaracainapa vimutu, te máitecapapa ema Viáquenu Jesús, mápechiravaya títeca, másiháiraya te anuma. Te jena sácheyare, mámayarepahi ena mayeheana ángeleana, tíñehianainapáipa máicha. Tacutinapaipa eta ichapequene yucu eta máucupaisirayare.

<sup>8</sup> Eta tímitecayare éma, máicuñacayare ena váhiqene návarahahini námati ema Viya, váhivare návarahahini nasuapa eta máechajiriruva.

---

\* **1:1** Ema Silas, eta máijarequene Silvano te náechajiriruva ena romanoana.

<sup>9</sup> Ena nani máehicarahanahi ema Viáquenu Jesucristo, ticaquijianainapa eta te infierno. Váhivare nacamichahini náimamaraca eta mamira taicha táetaviuchahi eta máiñehivahi. Tájina náuchucuiraimahi.

<sup>10</sup> Te jena sácheyare te máitecapapa ema Viáquenu, viárami-mícainapa ichape eta mayehe vimutu viti manerejiruanahi. Tétavicavaya eta vicunachirainapa éma. (Éti apanava etiarihi-yarehi, taicha esuapahi eta vímiturapianahi.)

<sup>11</sup> Eta tacahe, tamutu sácheana te viyujarasirana, viyaseuchahehi me Viya eta ímryaniravaina eta iúriva, taicha éti íchuarecasivahi eta mayehe. Énerichuvare viyaseuchahe me Viya eta máijarasirahéna eta ítupajijiásiraváina tayehe eta juca ématanerepihi táichavenénahi eta esuapajiraivahi. Eta juca, ichape tacurisamurecha ema Viya.

<sup>12</sup> Tásaha, ena apamuriana achaneana nacunachayare ema Viáquenu Jesucristo táichavenehi eta náimairahi eta íchirahi éti eta táuriqueneana. Énerichuvare, éti ecunachacarénapa me Viya, taicha tétavicavahi eta máemunasirahehi, émapa ema Viáquenu Jesucristo.

## 2

### *Ema Achane Váinajarajquene*

<sup>1-4</sup> Puítiripa, nuparapenaveana, naririhi ena tépiyaequenehanaripa ema Jesús, náimijacharipa matiarihiripa, tichavaripa puiti. Vituparacahecha vahi ecusuapa nácani tépiyahirahianapahi. Tayanapane nácahepuca: “Eta juca vimetacasivahi me Espíritu Santo”. Nácahepuca: “Ema Pablo tímítucayahavihi eta juca”. Te náepiyaequenehahavipuca náimechahepuca eta carta, náimijachayarehi tásihaquene viyehe, váhiquenesera ecusuapavane. Váhi tacuimipanererecahe eta juca. Váhivare ecuarameca. Taicha te máitecapa yátupina ema Jesús, ticurujicahávinumayare viti manerejiruanahi.

Nuvaraha numetacahe eta apana. Te tánehipaicha eta máitesiraya ema Jesús, ena achaneana vaipa napicauchaimahi ema Viya. Náepuruinapa eta máechajiriruva. Tásaha, tímerecaváinapa ema Achane Váinajarajquene. Ema maca achane, macatichainapa masama eta máijare ema Viya. Étaripa eta nasiñarajiana ena achaneana, váipavare máuricaimahi. Macavanairipinapa ena achaneana te tamutu avasareana náepuyumirauchayare éma. “Nuti Víyanu. Núti ecasiñayare” macahénapa. Masapihainapa, ticaejacavainapa tayehe eta Templo. Téhesera támutupa, yátupiquenenapa eta máicuñayare muraca.

5 Échavarichuhi éti eta nímitusiraheparacahi cape juca te návihaichahahi eyehe. Numetacahehi eta táichararacavayarehi.

6-7 Puiti ena achaneana, nararihipa tivainarajichavana-paipahi. Vuíchahasera másapahini ema Viya navayuchavahini. Mararihi ema mavaneruhi tíchejimiráuchavacaríchaha. Eta tacahe, vuíchaha máuchujicahíni máimerecavahíni ema Achane Váinajarajiquene. (Éti ímatichuhi ema tíchejimiráurucahi.) Tacahe, ema Viya másapainapa térajicava ema tíchejimiráurucahi.

8-10 Tásicha, mapaenumavainapa tímerecavayare ema Achane Váinajarajiquene. Tuparairucayare mayehe ema Satanás. Éma, tijaracayarehi eta máitupajijiásiravayarehi. Tamutuyare máimereca eta tiáramicareana tacutiyare yátupiquenénahíni mayehénahíni ema Viya. Ema maca, máetaviuchainapa eta mavayuaraiva nayehe ena achaneana. Éna, tísapavanainapaipa náehica eta táiñehiqueneana mavayuaraquianapahi. Váhisera máyerémahi. Tiúcupaicavanénapa ema Viáquenu Jesú. Tiáramicarénapa eta majaraivayarepahi. Te máchajurapa, máquipaicainapa macapacainavarepa ema Achane Váinajarajiquenéni. Tacahe, ena nani achaneana máiturevanahí témitequenehanainapa. Ticaicuñanainapa taicha vahi návarahahini náehica eta yátupiqueneana tiúriana echájirirucavana. Te nasuapahini, tiúchucuhanahini tayehé eta ecuñaraqui.

11 Taicha eta namasuapirohi ema Viya, másapayarehi ena nani achaneana nasuapa eta mavayuaraquiana ema Achane Váinajarajiquene.

12 Tacahe, namutuyare ticaicuñanayare éna, taicha vahi návarahahini nasuapa eta yátupiqueneana vímiturapiana. Navapinaichucha eta náichiraya eta tamauriqueneana.

*Tiúchucuhanayare ena téhicanahi ema Viya taicha manerejiru-anahi*

13-14 Étisera, nuprapenaveana, máemunaruuanahi ema Viya. Víti tatuparaca vihásulupayachaparácayare ema Viya íchavenehi éti, taicha manerejiruhehi ema Viya te tépanavainapa. Táitusiava, te esamapa eta vimetarairuhi, etupiruvapa ejacapahi; taicha esamapa eta máichuirahéhi éma. Éma ticuchucuhahheyare taicha ímiyanavahi esuapa eta yátupiqueneana máimiturapiana ema Cristo. Émapa ema Espíritu Santo máimiyana ema mávahásirahehi, máijaracahe eta esantuvainapaipaicha puiti juca ecaijuheyare. Tásicha,

ítujicavainapa esiapa tayehe eta mávihahi ema Viáquenu Jesucristo, ímahainapa eta majaraiva.

<sup>15</sup> Tiuri puiti, nuparapenaveana, ímiyanava eta éhisiraina ema Jesucristo. Vahi ecuemitisica eta vímiturapianahi, te vimuturichaha eta eyehe, étapa eta juca véchajiriruvanahí te carta, vémevaruanahí eyehe.

<sup>16</sup> Nuparapenaveana, téavicavahi eta máemunasirahavihi ema Viáquenu Jesucristo, émapa ema Tata Vicaiyaquene. Tayanapane vahi viúrihíni, énasera navarahahi ticurisamurechahavianaya. Tásiha, vicunevainapa eta viúricacarevaya, máichecuarquirénapa náicha.

<sup>17</sup> Puiti nuvaraha esamavaini éti eta nacurisamurechirahe te esamureana. Náetumechavaréni eta ímiyaniravaya icha eta táuriqueneana, táurihivaréni eta échajirisiravana.

### 3

*Ema Pablo mayaseacavaca eta nayujarauchiraina me Viya*

<sup>1</sup> Títecapa, vivaraha vituparacahe puiti, eti nuparapenaveana: Eyaseuchahavi te eyujarasirana mayehe ema Viya. Tasuápacareváinahíni muraca nayehe ena achaneana eta vimetarairuana máechajiriruvana ema Viya, tácuthini eta esuapirávanehi éti. Táitecapauchavanehíni ena ticavasanahi te tayerehiqueneana te juca apaquehe.

<sup>2</sup> Énerichuvare, eyaseuchahavi macátiuchirahávinahíni ema Viya nayehe ena achaneana váinarajiqueneána tituparihiana. Taicha camuriana ena masuapajirairahanahi me Viya.

<sup>3</sup> Váhisera taeñamavacarehini eta máurivahi ema Viya eta viyehe, yátupihi eta máitauchirahi tamutu. Tétumechaheyare éma eta ímiyanavairaya. Tijaneacaheyareva mayehe ema Váinaraji.

<sup>4</sup> Víti vicasifíavahi eyehe eta esuapirahaviya tamutu eta vitupararuheanahi taicha éti éhicahi ema Viáquenu, táicha esuaparipa eta tainapureanahi vitupararuheanahi cape juca.

<sup>5</sup> Maimicatacahehini ema Viya eta ímatiraina eta máemunasirahehi. Máijaracahevaréni eta ecayeheraya paciencia, ácutihini ema Cristo.

*Tatuparaca vicaemataneyare*

<sup>6</sup> Nuparapenaveana, te natiarihinapuca ena echamurianahi plújuana, váhipuca náesachahi ticaemataneana, te váhipuca návarahahini náetumechavahini, nasuapahini eta vímiturapianahi, vivanecahe éti te máijare ema Viáquenu Jesucristo: Vahi ecuemeñahava nayehe.

<sup>7</sup> Écharichuhi éti eta etuparahahi ítusiraina ítátijírcava, éhisirayarehi eta viyeherepianahi víti te viávihaichaha eta ara eyehe. Vahi plújuhávimahi.

<sup>8</sup> Váhivare vinicairihihini te epenana. Víti vicaematanehi muraca eta vítatijirísiravahi. Tamutu sácheana, yátiana, vicaematanehi, taicha vahi vávarahahini vétsepanáracahéhini eta vinicaquenerepi.

<sup>9</sup> Tatuparacahinéni viyaseacahehini eta énisirahavinahíni, vivarahahisera vímechaheyarehi eta vicaemataneraivana, apaesa étainarichuhíni éhica éti.

<sup>10</sup> Étaripa te vinasiqueneichaha eta eyehe, vivanecahehi: Vahi ecuenica mácani vahi mavarahahi ticaematanane.

<sup>11</sup> Puítiripasera visamairiricahi eta natarihirahíni ena echamuriana tinerejicavanahí plújuana. Vahi náesachahini ticaematananeana, tinicairihianahi. Tímiapitavairicavana-paipahi te pétiana.

<sup>12</sup> Étihi íchanahi eta juca, vivanecahe te máijare ema Viáquenu Jesucristo: Yátupina táuri eta ecáematanérainá, eviyayare eta ecamunuqueneana.

<sup>13</sup> Éti apamuriana nuparapenaveana, vahi ecuinajica eta táurivahi eta ecaematanerana.

<sup>14</sup> Te natarihinapuca nácani vahi nacusuapa eta vivanairipianahi te juca carta, ecauneyare éna. Tásicha, emetacapa ena echamuriana vaipa nacucachane éna, apaesa nátsirihaichu ena nani eta namasuapajiraivahi.

<sup>15</sup> Váhisera ecucatichavaca, econsejachavacachucha taicha echamurianahi éna.

### *Ema Pablo mayujarauchahi ena machamuriana*

<sup>16</sup> Tiuri puiti, nuyaseacahi ema Viáquenu ema tiúrichahavirahi, máimiyanaavahíni máijaracahéni eta iúrivaya te epaneruana, tijuricati tájahapuca ícharacava te sácheana, taicha mavarahahi eta iúrivaya. Ámutuhíni mávahácahehíni ema Viya.

<sup>17</sup> Nuti Pablo, nútjacaruvapa nájucha eta juca táchecuaraquihi eta nucartane, apaesa ímati eta táimahihi eta nuyehe letra nuvahurupajíhi.

<sup>18</sup> Nuyaseuchaheparacahi emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

# Eta macartane ema Apóstole Pablo mayehe ema machamuri Timoteo, ticaijare **1 TIMOTEO**

<sup>1</sup> Nuti Pablo mayehenu apóstole ema Jesucristo. Nuvanecasivahi mayehe ema Viya Macatiurahiquenéhi viyehe, émapa ema Viáquenu Jesucristo, ema vicunequenéhi eta mápechiravayare tichava.

<sup>2</sup> Nímiamareca eta juca nucartane piyehe piti nuparape Timoteo. Némunacavihi tímicutijiricavahi nuchichavinahíni táichavénehi eta péhisiranuhi eta nusuapajiraivahi mayehe ema Cristo. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Nájarcavini eta táurivaina eta pipanereruana.

*Ema Pablo mameetaca ema Timoteo eta macunerayare ena tihapapirahiana*

<sup>3</sup> Pécharipahi eta juca numetaruvihi, te nuyanayarepa tayehe te tinapaica eta Macedonia, eta nutuparasiravihi pinasiyaréhi tayehe eta avasare Efeso. Vuíchaha pijuniji-caimahi taicha pímatirípahi píti ena nani navarahahí tihapapicana eta vímiturapiana. Vahi picuisapavaca.

<sup>4</sup> Pécatiacaicha ena vichamurianahi, vahi nacusuapa eta echájirirucavana náepiyapiruanahi ena achaneana, taicha eta juca tacutirichucha eta náchucarapiana. Ena nani achaneana, súnsurupiana eta náechajiriruvana te náechajisiha ena viáchucanaveanaini. Eta juca náechajiriruvanahi, ticauyayacarehi táemejecapavachavaca ena vichamuriana, machu nachavacuejechava táicha. Étavanerecáinahipucáini náimicatakahávihipucáini eta vítauchiráinahini eta véhisirahi ema Viya.

<sup>5</sup> Nutuparacavihi taicha nuvarahahí náimerecaya ena vichamuriana yátupina eta náemunasiracacaina táuchurenavare te nasamureana, tapachinavarení eta napanereruana. Tacuija nacúquichiraváinahíni eta nasamiravahi te mamirahu ema Viya. Tauri eta náehisiraina ema Viáquenu. Yátupina nasuapa.

<sup>6</sup> Taicha nararihi ena téjecapavanapaipa, nasuaparichucha eta tájiparacana súnsurupiana. Eta juca táiminajicavacapaipa tayehe eta vímiturapiana.

<sup>7</sup> Tásiha, tépiyacavanapa náimatihí tamutu eta Sagrada Escritura. Navarahavare tímiturecana, váhisera nácaicutiarahíni

eta tacayemaqueña etá táchajisihaqueneanahí. Ena nac-ahehi: "Víti véchahi tamutu", tájinanéni náechihahíni.

<sup>8</sup> Tájina táchava eta tatarihirahi etá mavanairipianahí ema víyarahaini Moisés. Véchahi etá tauriva etá mavanairipiana, taicha éta, táimitucavacahi ena achaneana etá vahi nacueje-capava.

<sup>9</sup> Taicha véchahi etá tacaemataneasirahi etá vanairipiana etá táimitupiruchiravacaya ena ticapecaturarahiana. Nácani achaneana tiúriana, vahi énaina tatuparaca etá vanairipianahí. Tatuparacahisera ena nácani mapicauruirahana masuapajirairahana; énapa nácani váinarajipanerérhuana ticapecaturarahiana; énapa nácani mapicaucharahana ema Viya, ena ticatichana etá máechajiruvána; énapa nácani téhana ena náiyana, ena náenana; énapa nácani ticapahiana;

<sup>10</sup> énapa ena túhusiana énapa nácani ticaecahiana ena nayenana, navehapa esu apana esena; énapa nácani tivehana ena nacutiqueneanahí ajaira; énapa nácani tiámerecana achane, amaperupuca, esenapuca; énapa ena tépiyahirahiana; énapa ena tépiyaequenerahiána. Énerichuvare etá vanairipi tatuparaca ena ticatichana etá tauriqueneana vímiturapiana.

<sup>11</sup> Taicha nútì nutuparacasicvahí me Viya etá nímituresiraya etá taurinaqueneanahí máechajiruvana, etá tímicaijuhechahaviya tayehe etá taurinaquene mávasa ema Viya. Tétavicavahí etá macunachacarevahí éma.

*Ema Pablo mahasulupayacha ema Jesucristo taicha etá máichuirahí*

<sup>12</sup> Nútì nuhasulupayacha ema Viáquenu Jesucristo, taicha etá máichuiranuhi mavanaranuyarehi. Tétumechanuhi yátupi taicha máimahahi etá nítachirayarehi etá nutuparacasicvarehi mayehe.

<sup>13</sup> Éma, tituparacanuhi etá juca, ichapemurihinéni etá néjecapiravahí mayehe, tíñemahihi etá néchajiruvanahí mayehe. Nupanajiricavacahi ena náinapureanahí téhicanahí éma. Tijapanunuhisera éma, vuíchahahinéni nusuapahini néhicahini éma. Taicha vahi néchahini émahinénipuca nucatianacahi, etá níchirahí ena machanerana éma.

<sup>14</sup> Tásihasera tétavicavahí etá máemunasiranuhi ema Viáquenu Jesucristo. Ichaperinehi etá máijarasiranuhi etá nusuapirahi yátupi éma, étapa etá máijarasiranuhi etá némunaraivahí.

<sup>15</sup> Nuvaraha námutuhini ena achaneana nasuapa etá véhiruhi taicha yátupihi etá juca vímiturapiana:

Ema Viáquenu Jesucristo tímitecahi te juca apaquehe macuchucuhavacayarehi ena ticapecaturarahiana.

Nútiripahi nuváyuchapanaváinihi eta nucapecaturarai-váinihi.

<sup>16</sup> Émasera ema Viáquenu Jesucristo tijapanunuhi, táitusiava tíchuhahuhi núti. Taicha mavarahahi máimerecayare ichape eta mayehe pacienza eta nuyehe, nuvayurevaquenénihi eta nucapecaturaráivainihi. Eta tacahe, nucaicutiarapa eta majacapirayareva namutu ena tisuapanayare, máichecuara-quirénapa eta náitaresiraya máicha.

<sup>17</sup> Eta tacahe, macarichu vicunachayare vijirauchayare tamutu sácheana ema Viya, taicha macarichuhi éma tamutu máiteturuequeneha. Éma, máimahasiquenehi, máepenacacahivare. Jéhevarequene éma, viyehehi Rey acanequene te tépanavainapa, étapa puiti juca vicaijuheyare. Amén.

### *Ema Pablo matuparacahi ema Timoteo*

<sup>18</sup> Nuchicha Timoteo, nutuparacavicha muraca eta pirata-hairaina picanara eta tamauriqueneana. Tiúriyare eta péhisiraya ema Viya. Tájina píchiravaimahi te mamirahu ema Viya. Péchavahi eta náechajisiavirahi eta piúrivahí ena vichamuriana mameetruanahí ema Espíritu Santo. Vahi picuemepurureca.

<sup>19</sup> Taicha nararihi ena ticainajiruvanapaipa, náechahinéni eta táiñehivahí eta náichaqueñeanahí, váhisera návarahahini nácajinajiruvahini eta tamauriqueneanahí. Tínajicavana-richucha eta náehisirainihi ema Viya.

<sup>20</sup> Émaripa ema Himeneo émapa ema Alejandro, tacahehi eta náinajisiravahí eta náehisirainihi ema Viya. Puítisera, ena nani níjararupa ema Satanás, taicha nuvaraha nachava, náinajicayare eta nacaecahirahí ema Viya.

## 2

### *Ema Pablo máimituca eta nayujarauchiravaya*

<sup>1</sup> Tativayaresera nutuparacahe, vahi tacuechuquiha eta eyujarasiraina. Eyaseuchava. Tamutu ehasulupayachayare ema Viya. Eyaseuchayareva namutu ena achaneana.

<sup>2</sup> Énerichuvare eyaseuchayare ena aquenucana énapa ena apamuriana tuparairucana, apaesa táuri eta náechapajiri-siraina eta avasareana, váhini vicuimahaini eta táiñehi-queneana. Víti vímiyanavahini viúrihini te mamirahu ema Viya, vicapicahuhini nayehe ena achaneana.

<sup>3</sup> Taicha ema Viya Macatiurahique máuricahi eta víchirahí víti eta júcana.

<sup>4</sup> Taicha mavarahahi éma máimimatichayare namutu ena achaneana eta yátupiqueneana máechajiriruvana apaesa náuchucuha éna apanava.

<sup>5</sup> Taicha májina apanainahini ticatiuchavacaina éna, macarichu ema Tata Vicaiyaquene. Émapa ema Machicha ema achane Cristo Jesús, macarichuhi ema téchajurahi viyehe viti achaneana te mamirahu ema Tata Vicaiyaquene. Nájina apanaina téchajiúrahínahi viyehe.

<sup>6</sup> Ema Viáquenu Jesucristo tíjaracavahi tépena taicha eta macuchucuirahaviya vimutu viti achaneana. Puítisera mavaraha máimimatichayare namutu eta juca arairuhi vímiturapiana.

<sup>7</sup> Eta tacahehi, manerejirunuichuhi mayehenuhi apóstole, nucametarairuyare tamutu avasareana, nímitucayarehi ena apavasanana eta nasuapiraina éna eta yátupiqueneana máechajiriruvana ema Viya. Nutupiruvahi nútì eta juca néchajisirahi, vahi népiyahiraivainahí.

*Ema Pablo máimitucavaca eta náicharacavaya te nárujisiravana*

<sup>8</sup> Tiuri, nutuparacahevare pímitucavacavare ena vichamuriana eta juca apana: Tauri eta nárujisiravaina te nayujarasirana. Ena ajairana, vahi nacueñamavahini me Viya eta máitauchirayare eta nayasearuhi. Tátupiruvahini te nasamureana. Vahi nacúsemamajuhehíni eta nayujarasirayarehi nacajapavaquichavapuca.

<sup>9</sup> Énaripa ena esenana, táurihini eta nacamuirihairana. Vahi nacúyehéheácaicha eta nacamuirihaira. Náetupiricavahiséraini. Váhivare nacuvayuchaini eta nacatatasirana. Váhivare nacuvayuchaini nacuyehehecavahini eta oro, eta perla, eta tasivachaqueneana múiriareana.

<sup>10</sup> Étaripa náurinavahi yátupiquenehi, eta náimeresiravaina eta yátupina náehisirahi ema Viya, náichirainavare eta táuriqueneanapa.

<sup>11</sup> Énerichuvare, tiúriyare eta nasamararasira eta náimitucasívana. Vahi nacuácapaemarahi nácani tímítucanahi.

<sup>12</sup> Énerichuvare ena esenana, vahi tatuparaca náimitucahíni ena víyarahanapa te viúrujisiravana, taicha vahi tatuparacahini náimiturecahíni éna. Nasamararacayarechucha eta náimitucasívana.

<sup>13</sup> Taicha te máepiyacainapa ema Viya ena viáchucanaveánaini, tínapuca máepiyacahi ema Adan, téquenehapa esu Eva.

<sup>14</sup> Váhivare émainahini ema Adan máinapucahini máquipaicavahíni. Ésuhi esu esena, tísapavahi mavayuaca ema Satanás. Eta suísapiravahi, tiáquipaicavanapa tayehe eta pecatu.

15 Tásicha, ticatajivainapa eta suínasirana. Puíticha tanasihi nayehe ena esenana. Tiúchucuhanayaresera, te náimiyana náehica ema Jesús, étapa eta náemunasiraina ena vichamuriana. Tacuijavare natapiravaina te mamirahu ema Viya, táurihini eta napanereruana.

### 3

*Tiúrianayarehi eta náitaresira nácani tatupararuayanayare eta avacurecacare pastorecare*

1 Étaripa eta juca evacutecrea pastorecare, puiti nutupiruva numetacahe. Te natiarihinapuca nácani ajairana návaraha ticavacureana eta pastorecare, tájina táichiravaina, taicha eta juca evacutecrea pastorecare, éta tiúriana evacutecrea ticaijuhecare.

2 Tacamunuhisera mácani ticavacureya eta pastorecare, tájina matapiravainaya eta máitaresirahi, tacuija nacuyunaca ena achaneana. Mácani ésunarichuhi esu mayena. Mácani ticipicahuhi. Mácani tijaneacavahi eta máitaresira, máitucuhi tipanerereca. Mácani achanesamure tijacaparahi nayehe nácani tichimarachanaya. Mácani máituca tímitureca.

3 Mácani vahi tavayuaruina eta téracare. Váhivare macueharahi. Vahi macujamurarahi. Váhivare macutupiarahi. Váhivare tacuvayuaca eta plata. Tatuparacayare mácani tijapanurahi.

4 Ticaiyacareyare te mapena. Máitucayare eta macajurusirayare ena machichanaveana, tisuapajirahianayare tipicaurahianayare máicha.

5 Vahi tisiapaimahi mácani achane vahi máitucuhi ticavanairipi te mapena. Taicha nararihi ena vahi náituca ticavanairipiana. Tavetijipapuca eta juca evacutecrea, vaipa náituaimahi eta náechajirisiraina najaneasirayarehi ena vichamuriana.

6 Vahi tisiapaimahi eta pastorecare mácani mapaemunavahi máehica ema Viáquenu, machu macasiñavavaica eta masiapirahi eta matuparahahi. Eta tacahe eta máquipaisiravahi ema Váinaraji.

7 Énerichuvare tacamunuhi mácani pastoreyare ticipicahu nayehe ena apamuriana achaneana, apaesa vahi nacuecha jica eta mayehe. Machu máituruca ema Váinaraji.

*Tiúrianayarehi eta náitaresira nácani tatupararuayanayare eta avacurecacare ticaijare diácono*

8 Énerichuvare, nácani ticavacureya eta diáconocare, tacamunuhi ticipicahuanayare eta náitaresirahi. Vahi apipemanaimahi eta náechajirisiravana. Váhivare ticavaharasia naimahi. Váhivare tijamurarahianaimahi.

9 Tacamunuhibare náimatiyare yátupi eta tisuapacareanahi mayehe ema Jesús, náitauchiraripa tamutu, tájinapa náichiravaimahi te mamirahu ema Viya.

10 Nacasamairunumaya te yátupihipuca tiuri, tájinapuca náichiravaimahi. Téhesera tiúrianahi, énara tuparairucanya-rehi eta evacuteca diáconocare.

11 Énerichuvare, ena esenana, tacamunuhi ticapicahuana. Vahi nacuechajiji. Súcani tijaneacavahi eta suítaresira. Tájina náichiravaimahi, titaurahíánayare.

12 Ema tuparairucayare, tacamunuhi mácani ésunarichuvare esu mayena. Maitucayare eta máimitusirayare ena machichanaveana. Ticaiyacareyare te mapena.

13 Taicha te náitauchahi tamutu eta natuparahana ena tuparairucana, ticunachacareanahi tipícauchacareánahivare. Tásiha, énerichuvare téumesamúrechaváinapa eta nacametarairuirahi eta máimiturapiana ema Jesucristo.

### *Jéhevare eta juca téhicacare*

14-15 Puiti nucunevaipa eta nítecapiravaneya eta ara piyehe, téhesera vuíchahapuca nucuitujicava níteca. Nucajurevihisera eta juca carta, apaesa pítuca eta táurivaina eta pítaresiraya, taicha machichavihi píti ema Viya. Viti manerejiruanahi ema yátupiquenehi Viya. Viúnacahi vímiturecahi yátupi eta máechajiriruvana.

16 Taicha eta juca véhiruhi vimutu, téavicavahi eta táuriva: Vimutuhi visuapahi eta máucupaisirahi te juca apauehe ema Jesucristo, macaqueherahi eta juca viáquehehi viti achaneana.

Émaripa ema Espíritu Santo macametarapihivare eta yátupirahi Machicha ema Viya.

Náimahahivare ena ángeleana eta máechepusirahi te máecari.

Te tamutupa, tichavapa éma te mávasa anuma.

Tásiha, viti mavanarana véchajisihahi tamutu avasareana eta macuchucuirahavyare vimutu viti achaneana.

Ichapemuriana ena ticasíñavanahi mayehe, téhicanahi éma.

## 4

### *Natiarihiyare ena tínajicavanaya eta náehisira ema Jesús*

1 Eta mamerapí ema Espíritu Santo, puiti juca vicaijuyeyare, natiarihinapa ena timútserahávanayarepahi tínajicavana eta náehisirahi ema Jesús. Nasuapainapaipa ena tiyururahiana. Náehicainapa eta náimiturapiana ena éreanana.

2 Nasapihainapa tisamacareanayare ena apipiemana tépiyahirahiana. Ena nani, máimaticavarárahánahi eta náepiyahiraivana taicha náitunaipahi eta nacahirana.

<sup>3</sup> Ena nani achaneana nayuruucainapaipa ena vichamuriana. Ánipa nacaheyare: "Vahi táurica vitanucahini esu esena viyenainahini. Jucarihivare eta tinicacare, énerichuvare vahi táurica vinicahini" nacaheyare. Tamutusera eta juca tinica-careana máepiyaruana ema Viya vinicayarehi viti vímatieque-nehanahi eta máechajiriruvana. Vihasulupayachayarehi te vinicayare eta máijararuuhavianahi ema Viya.

<sup>4-5</sup> Taicha tamutuhi tiuri eta máepiyaruana ema Viya. Vahi táuricahíni vépuruhíni. Vijacapayarehi tamutu, vihasulupaya-chayarehi te vinicaya; taicha víjaracasihí mayehe ema Viya, timetacahavihi eta táurivahi. Tacaurisamurechahi ema Viya eta viyujarasirana. Puíticha tanasihi viyehe víti. Te vinica, vihasulupayachayarehi ema Viya.

### *Ema yátupiquene mavanara ema Jesucristo*

<sup>6</sup> Te pímitucavaca eta juca ena vichamuriana, pímerecahi eta yátupirahi mavanaravi ema Jesucristo. Eta juca táurina-quenehi echájirirucava, étarichuhi eta vímiturapihanahi eta piyehe, éta tétumechaviyare eta pímiyaniravahi pisuapa eta juca véhiruhi.

<sup>7</sup> Váhisera picusuapavaca ena nani tíchanahi eta juca echájirirucavana tamauriqueneana. Súnsurupianachucha éta. Pímiyanavasera picaravahu eta piúritaresirána mayehe ema Viya.

<sup>8-10</sup> Tacuti eta náimicaravahuchirava ena ticavijarurahiana eta pelota, navaraha náetumecha eta náqueheana. Tacamunu-hisera nápejiricava te sácheana. Píti, vahi tacuechuquiha eta picaravahuirahi. Te yátupihi vicaravahu viúritaresíraya mayehe ema Viya, tétavicavaya eta viúrivaya eta visamiravaya puiti juca vicahéhi, énerichuvare véchapajiricavainapa eta vicaijuheraya eta mávasa ema Viya, vicachaneraya éma. Eta tacahe, vétumechavachucha apaesa viúritaresira eta mayehe. Vímiyanavachucha vímitucavaca ena achaneana apaesa náuritaresira éna apanava mayehe ema Viya. Taicha yátupiquene eta echájirirucava ani tacahe:

Ema vicasíñaquenehi, éma yátupiquenehi Viya.

Éma, téchahavi vimutu viti achaneana.

Vivetiji viti véhicanaripa éma,

tétavicavahi eta macatiuchirahavipahi.

<sup>11</sup> Ena pímitureanaya, pituparacavacaicha muraca eta júcana.

<sup>12</sup> Picuneuchava yátupina apaesa vahi nacuepuruvi eta pímituresirahi, taicha eta piámaperuváichaha. Pímerecayare eta piúriva apaesa étaina náehicavi ena vichamuriana. Tauri eta péchajisirána. Tauri eta pítaresiraina, tájina pitapiravaimahi. Pémunarahi nayehe ena vichamuriana, énapa ena

apamuriana achaneana. Yátupina eta péhisirahi, étapa eta picasiñavairahi mayehe ema Viáquenu.

<sup>13</sup> Te vuíchahapuca nucuitecapa, pímyanava eta pímitusirayare ena vichamuriana. Pímyanavavare eta pétumechiravacaina. Péchajicuinayare eta Sagrada Escritura apaesa nasama namutu.

<sup>14</sup> Pémechavayare eta nametarapianahi ena víyarahana mametaruuanahi ema Espíritu Santo eta picavacureraya. Péchavare eta nanasirahi éna eta navahuana te piápusi. Puiti, vahi picuemepureca eta péchemaraivahi maicha ema Viya.

<sup>15</sup> Pipanerecha yátupina eta juca pimetacasivanahi. Pímereca eta táurivahi eta péhisirahi, apaesa náimaha namutu eta piúriváinapaicha.

<sup>16</sup> Péchapavaicha yátupina eta pímituresirahi eta juca véhiruhi. Pítijiva pipamicava pítauchayare tamutu. Te pítaucha eta juca, picuchucuhavayare píti, énapa ena pímitureanahi.

## 5

*Vímerecayare eta viúrvayare nayehe ena vichamuriana*

<sup>1</sup> Te natariihinapuca náejecapava ena víyarahana ichavicalpananahi piyehe, vahi picucajachavaca éna. Piconsejachavacaséra tauri, tácuti te péchajica ema ticachichavi. Énerichuvare ena amaperuquijiana ajairana, tauri eta piconsejachiravacáina tácuti eta péchajisira ena pichuquiqueneana.

<sup>2</sup> Énerichuvare ena vénarahana ichavicalpananahi piyehe, te náejecapavapuca, piconsejachavaca tauri táchuti eta péchajisira esu ticachichavi. Énapa ena amaperuana esenana, piconsejachavaca tauri táchuti eta péchajisira ena pichuquiqueneana. Tátupiruva eta péchajirisiravacaina éna.

<sup>3</sup> Pímicatacavacaya ena tépenaimanahi, nácani tájinahi naviyavahini, yátupihi eta nacamunuiravana.

<sup>4</sup> Téheserapuca natariihiji ena suchichanaveana esu tépenaimahi, suámarianapuca, énapa titáitianayarehi. Ticaravuhanainapa eta náitátitjirísiravaya. Títsirijicavánainapa eta nacajurusiravacahi ena náenana, nátseanapuca. Eta juca, máurica ema Viya. Taicha tatuparacahi ena echichanaveana eta náitsirjisiraváina eta nacajurusira ena ticachichana.

<sup>5</sup> Pímicatacayaresera súcani tépenaimahi sucarichuhipuca, nájina suchichainahi, nájinavare suviyavahi. Sucuchapainapa eta tásihaqueñeyá mayehe ema Viya, taicha suíjararuvaipa yátupi eta mayehe. Tiyujaracainapa tamutu sácheana, tamutu yátiana.

<sup>6</sup> Ésusera súcani suícutichiravahi suicha eta suvarahaqueñeanahi, ésu tímicutijiricavaipa suáquijiruvahi eta mayehe ema Viya.

7 Pímitucavacayare ena tépenaimanahi, apaesa táuri eta nacaemataneasiraina ema Viya, tacuija natapiravaina.

8 Taicha ena vichamuriana, tatuparacavacahi náeñama-vayarehi tayehe eta náitátira ena náenana, ena nátseana. Nácani vahi nacuquicha eta juca, tímicutijiricavaipa vahi náitauchahini eta náehisirahi ema Viya. Tiápajucavapanapa éma eta nayehe ena masuápajirairahánahi.

9 Nacarichu pinacayare te nalista ena tépenaimana ena ticayeheanaripa sesenta año eta nañañora. Súcani émanarichuhi ema suímaini eta suítaresirahi.

10 Ésupa súcani tímaticarehi eta táurivanahi eta suématane-repiana. Súcani tiúrihi eta sucajurusirahi ena suchichanaveana. Súcani tijacaparahi te supena nayehe nácani tichimarachanapahi. Súcani tiuri eta suéchapajirísira ena vichamuriana. Súcani téchapajirahi nayehe nácani ticata-jivanahi ticajumanahi, ticatiruhanahi. Súcani tamutuhi suítaparaha suicha eta táuriqueneana.

11 Énasera ena tépenaimanahi amaperuanarichaha, vahi picunaca te lista. Tijuricati tiáquipaicavana taicha tavayuacavacarichaha eta tájiparacana, natanucarichaha ema ajaira, navarahaichaha tiápechavanayarehi ticaimana. Tijuricati ticainajiruana eta náehisirahi ema Cristo.

12 Tacamitisicavacapáipa, énapa tímajicanapahi eta náehisirahi ema Cristo.

13 Énerichuvare ticauyayacarehi nayehe ena amaperuanarichaha, te pinaca eta te nalista, tijuricati tépiyacavanapa plíjuana. Náematanepa tipaipiricana te pétiana, námapaipa eta cuéntoana. Tímisiáparacavánapáipa. Nacaemataneaca náechajisihapáipa jácani náimahaqueneanapahi te pétiana. Vahi tácatuparaha náichahíni eta juca.

14 Eta tacahe, ena tépenaimanahi amaperuanarichaha, nuvaraha nápechava nacaimavare, nacachicha, nacaenacarehi te peti, apaesa tacuija nacucayema ena ticunerahiana.

15 Taicha nararihi ena tépenaimanahi tínajicavanapaipa eta náehisirahi ema Jesús, náehicapa ema Satanás.

16 Te sutiarihihipuca tépenaimahi esu vichamurihi, te natiarihivarepuca ena sujaneanahí vichamurianahivare, ena titátianayarehi ena sujaneanananarichu; apaesa vahi sucuapitavairicahi nayehe ena máimaruahí titájiríruanahí, táchavenehisera jácani tamajinairahi naviyahini éna.

*Tatuparacavacahi ena vichamuriana náimicatacayare ena pastoreana eta náitátiravahi*

17 Ena pastoreana, te tiúrihipuca eta náechapajirisiravaca ena vichamuriana, ichapeyare eta náemunacacarevayarehi. Tatuparacavacahi ena vichamuriana náimicatacayare tayehe

eta nanicaquenerepi ena pastoreana, taicha éna, eta náemata-nerepihi tímiturecanahi ticametarairuanahi.

<sup>18</sup> Taicha ani tacahehi eta Sagrada Escritura: “Vahi picuiti-sumucha eta pivuiyera te ticaematanepahi taicha técuhapahi”. Ánivare tacahe: “Ema achane ticaematanehi, tatuparacahi ticavachayarehi mayehe ema macaematanearuhi”.

<sup>19</sup> Vahi picusuapavane te tatiarihinapuca eta máepiyae-quenena mácani náiyacarahi ena vichamuriana. Téhesera natarihinapuca ena apinana, mapananapuca tinecapaeque-nehanahi eta máejecapiravahi, jéhesare tisuapacare éta.

<sup>20</sup> Téhesera yátupiquenehipuca eta máejecapiravahi, picajachayare muraca te namirahu ena machamurianahi náiyacarana, apaesa nátsirih napica ena apamuriana, vaipa nacuquicha eta juca.

<sup>21</sup> Nutuparacavicha muraca, pítauchayare yátupina eta juca numetarapianahi piyehe. Vahi picunerejicavaca, nácuticaca eta píjarasiraina eta piyehe justicia. Vahi pépacuchaimahi eta máichavaquenevahí mácani téjecapavahi, taicha máimara-racahi ema Tata Vicaiyaquene, émapa ema Viáquenu Jesucristo, énapa ena mayeheana ángeleana manerejiruanahi.

<sup>22</sup> Te matarihinapuca mácani navaraha nacasiapa pastor, picasamairunumaya te tiúrihipuca éma. Vahi picuijahúcha picunacavane éma. Tijuricati tatiarihinapahi eta máejecapiravahi. Machu pítina tamuriaca taicha eta pímisiapiraina éma. Pijaneacavaicha tayehe eta juca.

<sup>23</sup> (Puiti néchavahí eta picajumamajipa eta pítaresirahi te píami. Tásicha, nuconsejachavi: Pímisiriquicha apaesainarichu eta vino eta pérésarama une, pípurujinahi.)

<sup>24</sup> Tacamunuhisera eta picasamairunumaya nácani tisiapanayare eta pastorecare, taicha nararihi ena máchasihi eta napecaturana. Vahi táimaticarevane, tapaenumavaya picasamairunuma éna. Nararihisera ena ticaecheravane eta napecaturana. Tímaticareanavane.

<sup>25</sup> Ene tacahehi, nararihi ena tímaticareanavanehi eta náichirahi eta táuriqueneanahi. Nararihivare ena tacamunuhi eta picasamairunuma, apaesa ticaecheravanehi eta táuriqueneana náichaqueneanahi.

## 6

<sup>1</sup> Ena vichamuriana músuñahipuca, tatuparacavacahi napicauchayare ichape ena náquenuanahi. Vahi tijicapañiriah-naimahi apaesa vahi nacuyunaca ena achaneana eta máijare ema Viya, vahivare nacucaeñahi eta vímiturapiana.

<sup>2</sup> Étaripa te nacaquenuhipuca mácani vichamurihi, tiápajucavayare eta napicauchirayare. Vahi tímipanavanáimahi eta

nachamurirahi éma. Náimerecayare yátupi eta táurivaya eta náemataneana, taicha ema nacaemataneyeruhi, nachamurihi máemunaruvaré ema Viya.

*Ticurisamurechahavihi eta véhisira ema Jesús*

Piti nuchicha Timoteo, pímitucayare tamutu eta juca nayehe ena vichamuriana. Pémechavacayare eta vímiturapiana.

<sup>3</sup> Natarihinapuca ena nácani navaraha tímiturecana eta apana doctrina. Nahapapicainapa eta vímiturapiana, tájinaserá vahi tavehapicaimahi eta juca yátupiqueneanahí tásihaqueñeanahí mayehe ema Viáquenu Jesucristo.

<sup>4</sup> Ena nani, ticasíñavaváicanahí, tájinahineni náitucaquenáhíni. Ena nani, náurica téchajicana. Navayurevanapahi nácapaemachapahi tayehe eta tacayemaqueneana eta véchajiriruvana te vímiturecahi. Ticapinarurahiana éna, tiúmeharahiana, tíchanarahiana, tipícacarácavanapa.

<sup>5</sup> Tamutu sácheana ticatianarerecana taicha máuripanererurahána ena, máimatirahanahí eta yátupiqueneana. Navaraha nacavacharapiyare eta nayehe religión. Piti vahi picupau-chavaca ena nani.

<sup>6</sup> Jéhesareva, téavicava eta viúricacareva máicha ema Viya, eta véhisirahí éma. Tavetiji te vicurisamurechava tayehe eta vicayequeneanahí máijararuhavianahí éma.

<sup>7</sup> Taicha te viúchucapa suyehe esu ticachichahavi, tájina viámapahini vímahaquenenahíni. Ene tacaheyare eta vítavirayare, tájinavare viámaimahi eta vímahaqueneanahí.

<sup>8</sup> Etatacahe, te tatiarihipuca eta vinícaquenéna te vipenana, vicamuirihahipuca, tarataripa visuapayarehi.

<sup>9</sup> Énasera nácani tipanerechanahí tirricuchavana, apanapanepa eta najamurachaqueneana. Tacananesircipa eta naplatanechiavaya. Énajivapa tímicoñacavana taicha eta najamuraraivana súnsurupianahí. Eta juca ticauyayacarehi étaina táimicuñaca eta náchanevana.

<sup>10</sup> Táitsivahisera ena achaneana, náetaviuchahi eta tavayuasirahí náichapa tamutu eta tájiparacana, táichavenehi eta najamurachira eta plata. Namapurujipaipa ena vichamurianaini. Natarihinapaipa timutserahavanapaipa eta tayurusiraina eta najamuraraivana. Tásapihapapuca táiminajícapahi eta náehisirainihi ema Jesús. Énajivapa titanucavanahí eta naviurevahi, timutserahavanapaipa eta nacatajivairanahí eta náitaresiranahí.

*Yátupina eta véhisiraina ema Jesucristo*

<sup>11</sup> Pítisera vahi picupanerecha eta juca mamavaraqueneana ema Viya. Pérajicava tayehe, taicha

mavanaraviripa éma. Tátupiruvahi eta pisamure mayehe éma. Táimiyanava eta juca táurivahi eta pítaresira. Tauri eta péhisiraina. Pémunaca yátupina. Picamichayare tamutu. Yátupina eta pimansuvaina te pisamure.

<sup>12</sup> Pétumechavachucha eta picaemataneasirahi ema Viáquenu. Muracaina eta picasiñavaira mayehe. Vahi picuyacujiéquenehava eta picuchapirahi eta pítaresiraya máichecuaraquireyare, taicha máichuhaquenevirichuhi ema Viya. Vahi picuemepurureca eta péchajiriruvanahi te namuri ena vichamuriana, te píjaracavainapa eta péhisirayare ema Viya.

<sup>13</sup> Puiti, tímararacavihi ema Viya eta nutuparasiraviya. Éma, ticaitarecahi tamutu eta vímahaqueneanahí eta te juca apaquehe. Tímararacavihivare ema Viáquenu Jesucristo. Pécharichuhivare eta matupiruvairahi eta máimereuchirayahí éma te mamirahu ema Poncio Pilato.

<sup>14</sup> Pítachayare píti tamutu eta juca nuvanairipianahí taicha tásichaqueneanahí me Viáquenu. Vahi pihapapicaimahi, apaesa tacuija táimicajachavi mayehe. Tauri eta machimapiravina ema Viáquenu Jesucristo te máitecapa te táitauchavapa te jena sácheyare máicutiarahi ema Tata Vicaiyaquene.

<sup>15</sup> Ichapenapa vicunachainapa ema Tata Vicaiyaquene taicha macarichuhi éma yátupiquenehi tamutu marataha. Émahi Réyquenehi, Viáquenuquenehi. Tivanecahi namutu ena réyeana énapa ena aquenucana.

<sup>16</sup> Macarichu éma, yátupiquenehi máepenacaca. Máetaviuchahi eta maváyháuquiráivahi. Nájina tiratahaina ticachacayaina eta majaraiva tayehe eta mávihahi. Éma, nájina tímahaina, taicha máimahasiquenehi éma. Éma, vipicauchaquenehi vivapinaquenehi ichape. Mái tavacacainapa eta vicunachirayare éma. Jéhevare éma, tamutu marataha. Amén.

<sup>17</sup> Énerichuvare ena vichamurianahí ticaimahaqueneanahí rícuñahí, pímitucavacayare eta vahi nacucajamurava. Váhivare nacucasiñava eta nacaimahaquenérahi, taicha tijuricati titava eta náimahaqueneanahí, témitiequenehapa tamutu. Nácasíñavasera mayehe ema Viya, jéhevarequene ema ticasíñacare. Éma tíjaracahavihi tamutu eta vicamunuqueneana, viúrisamurerecahi máicha.

<sup>18</sup> Tacahe, ena vichamuriana rícuñahí, pímitucavacai-chavare eta náurivainaicha. Náimicatarahi ichape tayehe eta ematanecana. Nájapanuráhi nacajirahi nayehe ena ticamunuwanapahi. Tátupiruva te nasamure eta náijarasiraina ena ticamunuwanahí.

<sup>19</sup> Te yátupina náitaucha eta juca, tatiarihi eta sácheyare najacapiraya eta apanayare náimahaqueneanayare te anuma. Éna, ticaijaranainapa eta nápechiravaya titarecana, taicha éna yátupihi eta náimicataráivahi eta náitaresirahi te apaquehe. Máihecuaquirénapa eta náuricacarevaya.

*Eta téqueneha matuparaha ema Timoteo*

<sup>20</sup> Tiuri puiti, Timoteo, péperajica yátupina eta juca vímitucasivahi mayehe ema Jesucristo taicha tacapicahuquenehi ichape. Vahi picujicapavaca ena nácani téchajisihana eta tájiparacana, técaticavánachucha. Váhivare picujicapa ena nácani navaraha ticanaraemachaviana. Ena nani tímijachavanahí náimatihíji eta táuriqueneana, tásihasera ichape nayerehi eta náehisirainahíni ema Viya.

<sup>21</sup> Nararhipaipa ena vichamurianaini tínajicavanapa eta náehisirahi ema Jesús, taicha nasuapahi ena nani tépiyahirahiana.

Nuyaseuchaviparaca me Viáquenu Jesucristo táetaviuchahini eta piúricacarevaya máicha.

Tamutupa eta néchajiriruvahi piyehe.

## Eta macartane ema Apóstole Pablo mayehe ema machamuri Timoteo, ticaijare **2 TIMOTEO**

<sup>1</sup> Nuti Pablo mayehenu apóstole ema Jesucristo. Ema Viya tivanecanuhi eta nucametarairuirayare eta máechajiriruva, taicha macaechajiriruvahi eta máijarasirahaviya víti eta vítaresiraya táichavenehi eta mávahásirahavihi ema Machicha Jesucristo. Máichecuaraquirénapa eta vítaresira máicha.

<sup>2</sup> Puiti nápechavavare nucajurevi eta juca apana nucartane piyehe piti nuchicha Timoteo némunaruquene. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Náijaracavini eta táurivaina eta pipanereruana.

### *Ema Pablo máetumechahi ema Timoteo*

<sup>3</sup> Núti nécharairicavihi te sácheana yátiana te nuyujara-sirana, nuyaseuchavihi me Viya. Nuhasulupayachahi éma eta piúrivahi máicha. Éma nucasiñahi núti, tacutihi eta nacasiñairahi ena viáchucanaveanaini. Tájina níchiravainahi eta nusamiravahi te mamirahu.

<sup>4</sup> Tétavicavahi eta nuvarairahi nápechavahini nímahavi. Vahi némitisicavahini eta píyairahi te nujunijicavinapa. Nuvarahahi píjahúchavahini pítecapauchanuhíni, núrisamurepáini eta nímairavinahíni.

<sup>5</sup> Taicha némechavahi yátupihi eta pímiyaniravahi pisuapa ema Viáquenu. Picápayayarácavacáinehi eta susuapirohi yátupi esu piátse Loida ésupa esu pena Eunice. Ichaperinehi pémechanuhi eta nayehe éna. Eta tacahe puiti, vahi néñamavahini eta piyehe.

<sup>6</sup> Puiti nutuparacavicha muraca vahi picucaemaha eta péchemaraivahi maicha ema Viya. Pímiyanavachucha. Vahi tacumapuriji eta nunasirahi eta nuvahuana te piápusi.

<sup>7</sup> Taicha ema Viya vahi mavaraha vipícacarácavahini. Éma tíjaracahavihi eta vitumesamurevana eta vicatuparahairahi. Éma tímitucahavihi eta vémunaraivaya. Tíjaracahavivare eta vicaratasiravayare yátupi eta vítaresira.

<sup>8</sup> Eta tacahe, vahi picutsiriha eta picametarairuiraya eta máechajiriruvana ema Viáquenu. Váhivare picutsiriha eta táemeratasiránuhi eta nucametarairuiranahi núti apana. Yátupina picamicha eta picatajivairaya. Taicha ema Viya, éma tíjaracaviya eta pitumevaya eta pímiyaniravaya picametarairu.

<sup>9</sup> Ema Viya tiámvahí eta máemunasirahavíhi acane te tépanavainapa tamutu. Tijapanuhavíhi máichavenehi ema Machicha Jesucristo. Eta tacáhehi te mapanerechainapa eta máichuirahaviyare vimutu viti véhicanayare ema Machicha, mavarairahi ticuchucuhahaviyare, váhinéni viámvahini viúrihini eta vítaresirahi. Puítisera ema Viya mavaraha mapecaturarehaviya te mamirahu.

<sup>10</sup> Puíticha, eta majapanuirahavíhi ema Viya, máevatasinahavíhi ema Machicha Jesucristo ticatiuchahaviyarehi. Éma, máechepurehi te máecari. Puiti manaquicahi eta máechajiruvahí eta macaitaresirahaviya víti apana. Te jena sácheyare máitsivachainapa eta viáquehe, máepenacacahávinapa.

<sup>11</sup> Ema Viya tituparacanuhi nucametarairuyare eta juca. Éma tinacanuhi apóstolenuhi, nímitucayarehi ena apavasanana.

<sup>12</sup> Eta tímicaviuchanuhi eta juca, puíticha nucatajivahi ichape, taicha eta nítauchirahi eta nutuparacasisivahi. Váhisera nutsiriha eta néhisirahi, taicha nímatihi nútì eta yátupirahi eta macasiñacarévahí ema nucasiñaquenéhi. Néchahivare eta majacapirahi tamutu eta nématanerepiana. Nucuneainapa eta jena sácheyare eta máijarasiranuyare eta nícuhihi mayehe.

<sup>13</sup> Píti apana, eta péhicayare eta juca yátupiqueneana nímiturapihanahi piyehe, tájina vahi pihapapicaimahi. Yátupina pisuapa, yátupina eta pémunaraivaina taicha tiávahácaviripa ema Jesucristo.

<sup>14</sup> Piúnacaicha yátupina eta juca máechajiruvana ema Viáquenu. Te natarihipuca návaraha nahapapica eta vímiturapihana, vahi picuisapava. Máimahavinesera ema Espíritu Santo, ema tiávahácahavíhi. Éma tímicatacaviyare.

<sup>15</sup> Títecapa, pécharichuhi píti eta namáimicasiránuhi ena náiyaranahanahi ena vichamuriana ticavasanahi te Asia. Émavanénahíni máitecahini ema Figelo, émainahipucaini ema Hermógenes.

<sup>16-18</sup> Macarichu títecapauchanuhi ema Onesíforo. Te títecapapa éma te Roma, matupiruhi titanucanu, téupiacanupa te juca cárcel nucaerataiyahi. Éma, tájina mapicaimahi ena ticticianacanuana. Ticajinuhi eta nucamunuqueneanahi. Pímaharichuhi píti apana eta máimicatasirahavíhi te viávihaichaha te Efeso. Eta tacáhe, nuyaseacahi ema Viya macatajicahini máimicatacrahini éma, énapa ena machichanaveana. Majapanuhini te jena sácheyare vítecapauchiraya ema Viya.

## 2

*Yátupina eta véhisiraya ema Jesucristo*

<sup>1</sup> Pítisera némunaruquene nuchicha Timoteo, nuvaraha yátupina máetumechavini ema Viáquenu Jesucristo.

<sup>2</sup> Píti pímatirichuhi tamutu eta nímiturapiana, taicha pisamahi eta nímitusiravacahi ena vichamuriana te avasareana. Puiti pitanucaya ena apamuriana vichamuriana nácani pímitureana títaurahianahi. Pituparacaya éna tauri eta náimitusiraina ena apamuriana vichamurianayareva, tacutirichu eta nímitusiravihi nútì.

<sup>3</sup> Nutuparacavi: Picamichayare piti tamutu eta picatajivairana. Yátupina eta masuntaruravina ema Jesucristo.

<sup>4</sup> Picutiyare eta máuriva ema suntaru, tacarichu máechapajiricahi eta mavanairipiana ema mayehe comandante. Vahi máemitisicaimahi eta mavanahiana, tahapapicahipucáini jácani tájiparacana. Ene picaheyare piti eta pítauchirayare eta mavanairipiana ema Viáquenu.

<sup>5</sup> Eta juca tacutihi ena ticavijarurahiana eta pelota. Te vahi náitauchahi tamutu eta tavanaiprianahí, vahi tivéreecanáimahi.

<sup>6</sup> Píti pipamicavaya muraca eta pítauchiraya eta pituparahana. Picutiya eta mapamisirava mácani isanitireru eta macaematanera te máesane, mavarairahi tiúchucuhayare eta máematané.

<sup>7</sup> Pipanerecha yátupina eta juca numetaruvianahi. Németeaca tímicatacavyare ema Viáquenu eta picacutiarairayare tamutu.

<sup>8</sup> Vahi picuemitisica eta juca nímiturapianahi mayehe ema Jesús, eta émairahi yátupiquene Cristo, mámariéquenenihi ema rey David. Éma, máepenaquenénihi. Macaechepepucahisera ema Viya.

<sup>9</sup> Eta tímicaviuchanuhi eta juca, puíticha nucatajivahi ichape taicha eta nucametarairuirahi. Étara témeratacanuhi puiti, ticutirinehi nucaviurevahini. Váhisera vicainajiruvaimahi eta vicametarairuiraya eta máechajiriruva ema Viya, cápachi etiarihipa éti. Étinapa nítsivaheyare.

<sup>10</sup> Nucamichahisera tamutu eta náichiranuhi, nuvarairahi nasuapahini nácani máichuhaqueñeanayarepahi ema Viáquenu Jesucristo, apaesa náuchucuhahini éna apanava, náitujicavahíni nasiapa tayehe eta táuricacarequene mávasa. Máihecuaraquirequene eta vicachaneraya éma.

<sup>11-13</sup> Jéhesare, yátupiquenehi eta juca véhiruhi vimutu:  
Te vépenaca mayehehavihi ema Viaquenu,  
éma ticaitarecahavyare vicachanenapa  
éma tayehe eta mávasa.  
Te vicamicha eta vicatajivairanahi  
máichavenénahi éma, vítujicavayare vicajupahayare

éma eta macavacureraya.

Téhesera vicaerajicavahi eta véhisirahi éma,  
éma apanavare ticaerajicahaviyareva te mamirahu.  
Te vínjicavahipuca eta véhisirahi éma,  
émasera vahi máinajicahavihíni.

Manasirichucha ticuchapahavihi te  
viápechavayarepuca vichavayare mayehe.

Taicha éma, vahi apánapanéna eta mapanereruana.

<sup>14</sup> Nutuparacavi: Pémechavaca ena pímitureana tamutu eta júcana. Pécatiacaicha muraca te máijare ema Viáquenu. Vahi nacuevataemajiricáca te jácani náechajirisiravána. Taicha tájina táijaracaimahi, machu étaina tahapapica eta napanere-ruanahi ena vichamuriana eta nasámararásirainahi.

*Yátupiyare eta náurivaya ena mavanarana ema Viya*

<sup>15</sup> Píti, yátupina tauri picha eta picaematanerahí ema Viya, picurisamurechirayare éma. Tájinasarépa piávamirahuimahi taicha tamutuhi tiuri eta pémataneana. Tatupiruvayarehi eta pímituresirahi eta yátupiqueneanahi máechajiriruva ema Viya.

<sup>16</sup> Téhesera natarihihipuca ena téchajisihanahi eta tájiparacana técaticavana, vahi picujicapajírcavaca éna. Pérajicava nayehe, taicha ena nani navetijiyarepáichucha eta náichira eta tamauriqueneana.

<sup>17</sup> Tíñehiqueneanahi eta náechajirisiravana taicha eta tavayuurasiravahi, ticauyayacarehi nahapapica ena vichamuriana. Ene tacahehi eta náejecapiravanahí ema Himeneo, émapa ema Fileto.

<sup>18</sup> Péchapavayare nayehe ena nani apinana, taicha nacaera-jiruvaipahi tayehe eta yátupiqueneana vímiturapiana. Taicha ena nani tépiyaequenehanahi eta táetavisiravarípahiji eta náechepusiraipahiji ena náepenaqueneana. Jéhesare, natarihipahi ena náemejecapavaruanapáipahi.

<sup>19</sup> Vitiarihichahasera viti vímiyanavahí véhicahi ema Viya. Taicha muraca eta vicasiñavairahi eta majaneasirahavihi, taicha éma tímatihavihi eta machanerairahavihi. Yátupivare visuapa eta juca máechajiriruva, ani macahe: “Náinajicayarehi eta tamauriqueneana namutu ena tiámanahi eta máijare ema Nuchicha Jesucristo” macahepa.

<sup>20-21</sup> Eta tacahe, víti, ichape eta vijaneasiravayare tayehe eta tamauriqueneana. Yátupiyarehi eta vicamunucarevaina mayehe ema Viya, vítauchirayarehi eta vicaematanearisa éma. Jéhesare, ichapenapa eta vimunavayarehi mayehe. Véperajicavayarehiséra mayehe tacutiyare eta náeperajisira ena rícoana eta nayereruvana tauriqueneanahi nayeheana jarra oro, nacurujana plata. Vahi náimipananaajicáimahi.

Vahi náimicutichaimahi eta apamuriana nayereruvana yucuquisiana: eta raveta, eta yuvaraqui, étapa eta nacasuelana mátejisiana.

<sup>22</sup> Eta tacahe, vahi picuehica eta natuhusivana ena amape ruquijiana. Tamutuhi najamuracha éna, nacaravahuhi jácani tamauriqueneanahi. Pítisera pímiyanava eta táurivahi eta pítaresirahi. Táuri eta picasiñairahi ema Viáquenu. Yátupinavare eta pémunaraivaina. Pétpiricayareva eta náichava queneva ena achaneana. Énaina pitanuca pácacahanevaca nácani pichamurianarichu tiúripanereruanahi, taicha éna nacasamurehi ema Viáquenu tamutu sácheana.

<sup>23</sup> Énerichuvare vahi picujicapajiricavaca nácani navarahi tiyaserecaviana eta súnsurupiana. Taicha pímatipahi ena nani eta nacahirana, étachucha natanuca eta semanereana.

<sup>24</sup> Viti mavanarana ema Viáquenu, vahi viúriha vímisiapracavahíni tayehe eta semanereana. Táitsivasera vétaviuchayarehi eta viúriva eta nayehe namutu. Vicayehheyareva paciencia eta nayehe namutu ena achaneana. Vímiturahiyareva eta táuriqueneana.

<sup>25</sup> Énaripa ena viánaranahi, tiúriyare eta véchajirisirayare. Vicuchchapayare eta táetupirisiravaina eta napanereruana, máijaracahini ema Viya nasuapiraina eta máechajiriruvana,

<sup>26</sup> apaesa nacuchucuhavahini eta náchanevana eta tacaera tairahi maicha ema Váinaraji. Taicha eta máiturusiravacahi éma, mavarahahi náitauchaya eta mavarahaqueneanahi éma.

### 3

#### *Ena achaneana téváinajarichavanáinapáipa*

<sup>1</sup> Eta apana eta juca nuvaraha péchayare. Puiti juca vicaijuheyare tavetijinapaipa eta taejeravayare nasamira ena achaneana eta náehisiraina ema Jesús.

<sup>2</sup> Taicha tivayuchavainapa eta náichirayare eta najamuraraivana. Tavayuacainapa eta plata. Ticasíñavanainapa, navayuchayare eta náechajirisiravana. Tipanararahiana. Énerichuvare, masuápajirárahánainapa nayehe ena ticachichana. Tájinainapa eta náitsirijirápina. Váipavare napicauchaimahi ema Viya, nasapihayarechucha nacaecahiyare éma.

<sup>3</sup> Nájinapa náemunaruimahi. Nájinavarepa najapanuquenémahi. Téchajihianainapa. Vaipa téchajicacareanáimahi. Titupiarahianainapa. Nacatichainapa eta táuriqueneana.

<sup>4</sup> Cátemarahiana. Mapicauruirahanainapa. Ticasíñaváicanainapa. Náuricainapa náicha eta piesta, tasapihainapa napauchayare, vaipa émaimahi napauchaimahi ema Viya.

<sup>5</sup> Nararihipuca ena tímijachavanainapa yátupinahini nácajuhe ema Viya. Váhisera náunacaimahi eta máechajiriruvana, váhivare tísapavanaimahi máemetupirucha ema Espíritu Santo eta napanereruana.

Puítiripa nararihipa ena achaneana, étapa návacuha eta juca. Pérajicava eta nayehe ena nani. Vahi picuimisiapava nayehe.

<sup>6</sup> Taicha nararihi ena achaneana tiyururahiana tépiyacavapanapaipa tipaipicana te pétiana, nayurucavacapaipa nácani esenana máecharaireana. Ena nani esenana tisipecaturanahi, tavayuaruanahi eta tájiparacana.

<sup>7</sup> Nametainipa ticaravahuanahi, tájinaserá vahi nacaicutiaraimahi eta yátupiqueneana.

<sup>8</sup> Puíticha ena nani tiyururahianahi, éna ticaecahiana eta vímiturapiana yátupiqueneana taicha máuripanerérurahia éna. Tacutihi acane ena iápemareana ema Janes émapa ema Jambres tiácapaemachanahí ema víyarahaini Moiséini. Tímaticareanahisera eta namaimatirahi eta yátupiqueneana.

<sup>9</sup> Váhisera camurianaimahi ena náturevanaya, taicha ena achaneana náimatiacavaneyarehi eta náepiyahiraivana súnsurupianahi éta, tacutiyyarehi eta náimatisiravacahi acane ena achaneana ena nani apina iápemareana tiácapaemachanainihi ema Moiséini.

*Eta téqueneha matuparacasivahi ema Timoteo mayehe ema Pablo*

<sup>10</sup> Pítisera péhicahi yátupi eta nímiturapiana. Picutinuhí eta núrivahi nayehe namutu achaneana, étaripa eta nupamisiravahí eta néhisirahí ema Jesús, nucasiñavahí yátupi mayehe. Picutinuhivare eta nucayeherahí paciencia, étaripa eta némunaraivahí, étaripa eta nucamichirahí tamutu.

<sup>11</sup> Péchahivare eta náichiranuhí ena achaneana, eta nucatajivairahí náicha. Ichapemurihi eta napanajirisiranuhí eta te avasareana Antioquía Ichipichu, te Iconio, étapa te Listra. Émasera ema Viya ticatiuchanuhí tayehe eta juca náichiranuñahí.

<sup>12</sup> Énesera tacaheyarehi eta juca. Tímiyanavanayare tipanjiricahavianayarehi vimutu víti vivarahana véhica yátupi ema Jesucristo.

<sup>13</sup> Énerichuvare, ena achaneana váinajarajiqueneana tiápajucavainapa eta navainajarivanaya. Énerichuvare ena ticaete-marahiana, tiápajucavainapa eta nacaetemaraivaya. Énajicacainapa ticaetemacacanayare.

<sup>14</sup> Pítisera pímiyanavahí eta péhisirahí eta juca pímitucasivanahí. Yátupihi pímerecahi eta pisuapirohi. Píti pímatihavirichuhi viti vímitucavianahí, nútiripa.

<sup>15</sup> Piámavahi te amuyavichaha pímatihí eta Sagrada Escritura. Éta, tímitucavihi tayehe eta viúchucuiraya te apana vítaresira, táichavenehi eta visuapirohi yátupi ema Jesucristo.

<sup>16</sup> Taicha tamutu eta Sagrada Escritura tásihaqueñeanahí mayehe ema Viya. Jéhevarequene eta viviyihayare eta ticaravahucareana, eta vímitusihaya véchajisihayare ena achaneana eta viconsejachihayareva, vímitupiruchiha-vacaya tayehe eta táurivayare eta náitaresirana.

<sup>17</sup> Tacahe, ena vichamuriana mávaháruana ema Viya téchemarahanayarehi, yátupi náitucayarehi tamutu eta náichiraya eta táuriqüeneana.

## 4

<sup>1</sup> Puiti nutuparacaviyare muraca te máijare ema Viya, émapa ema Viáquenu Jesucristo. Taicha éma, títecavaneyare eta macavacureiraya te juca apaquehe. Viti vitareruanaichaha énapa ena náepenaquenearanaripa vicayaseserehinapa te mamirahu tájahahipuca eta vicaematañearanahí éma.

<sup>2</sup> Eta tacahe, pímiyanavachucha picametarairu eta máechajiriruva ema Viya te jácani pítujisiravana. Vahi picúyacujiéquenehava. Pécatiacavacaicha muraca ena téjecapavanahí eta náeneuchirávaina. Piconsejachavaca. Pétumechavaca ena tiúripanerueruanahí. Pácayehesera paciencia eta pímitusiravacaya namutu.

<sup>3</sup> Taicha tatiarihiyare eta sácheyare ena achaneana vaipa nasuapaimahi eta vímiturapiana táuriqüeneana, étainapa náichayare eta navarahaquenearanarichu. Natanucaínapa ena nácani tímitucanayare tayehe eta tájiparacana, nacarichuinapa tisamacareanayare nayehe.

<sup>4</sup> Tasapihainapa náepuruyare eta yátupiquenueana, nacaepaquequinapa. Étasera eta náepiyapiruana ena achaneana, tasapihayare eta tisuapacareyarehi nayehe.

<sup>5</sup> Pítisera pinasiyareichu tájina píchiravaimahi. Picamichayare tamutu eta picatajivairana. Pímiyanavachucha picametarairu eta máechajiriruva ema Viya. Pítauchayare eta pituparacasivahi.

<sup>6</sup> Puítisera, núti tiánehipa eta nítaviraya te apaquehe. Nucutiripa eta yúcipi te titavayarepa témahayarepa, éneripa nucuhehi nútì.

<sup>7</sup> Váhiqüene néñamavacare. Nítavavarerupa eta nucanaraírahi eta tamauriqüeneana. Vahi nuvitaequenehahini. Nítauchahi eta nutuparacasivahi mayehe ema Viáquenu. Núnacahi muraca eta nusuapirohi ema Jesús.

<sup>8</sup> Puiti núti étanecha nucuchapahi eta jena sácheyare eta máíjarasiranuyare eta níjaracasiya me Viáquenu, taicha eta

néhisirahi yátupi. Taicha éma, máitauchayarehi eta máijarasi-ránuyare eta nícuichihi mayehe. Váhivareséra nácarichuimahi núti nucaijaracasiyare. Énerichuva máijaracayareva namutu nácani ticuchapanahi eta machaviraya.

*Ema Pablo máimichuha ema Timoteo*

<sup>9</sup> Pítatijirícavaicha eta pítesirávaneyare ani nuyehe.

<sup>10</sup> Puiti tijunijicanuripa ema Demos, taicha téavicavahi majamurachirahi eta mavaraha ticaimahaqueneyare te juca apaquehe. Tiyanapa macaijuhehi tayehe eta Tesalónica. Émasera ema Crescente, névatacahi te departamento Galacia. Énerichuvare ema Tito, névatacahivre te departamento Dalmacia.

<sup>11</sup> Macarinehi nucachanehi ema Lucas. Pivenumapahi ema Marcos, máiteca ema apanavare. Téavicavahi eta nucamunuirahi éma.

<sup>12</sup> Ema Tíquico, nuvanecahi máiteca ara piyeho te avasare Efeso. Émainachaha pítsivaina.

<sup>13</sup> Te píteca, pétavajicayarepahi te Troas, pivenuminanuya eta nuyehe capa nunaquiruhi mayehe ema Carpo, étapa eta nuyeheana libro, étapa eta apamuri ajumerucana.

<sup>14</sup> Numetacavivare eta máejecapiravahi ema Alejandro eta nuyehe; téavicavahi eta macatichiranuhi ema maca herrero. Máimahainesera ema Viáquenu. Éma títsirijiequenehayare eta máichiranuhi.

<sup>15</sup> Eta tacache, picuneuchavaicha eta mayehe, taicha téavicavahi eta macatichirahi eta vicametarairuirahi.

<sup>16</sup> Étaripa, te tínapucainapa nucatiuchavahi te mamirahu ena tuparairucana juéseana, nájina námicatacanuhini. Namutuhi tijunijijicanuanahi. Tiuri, tacuijaseraini macuícharacáini ema Viya, maperdonachavacaini ena tijunijicanuanahi.

<sup>17</sup> Émasera ema Viáquenu tijaneacanuhi, tímicatacanuhi. Vahi másapanuhini nanacanuhini te tapena eta sárareana tinicarahiana. Nítujicavahi núchuca nuyana tayehe eta apanaqueneana avasareana, nucametarairuhi nayehe ena apavasaqueneana.

<sup>18</sup> Ene tacaheyare eta máimianiravayare tictiuchanu ema Viáquenu tayehe eta táïñehiqueneana. Tiámanuyarehi tayehe eta mávasa anuma. Máichecuaracuireyarehi eta vijirau-chiraya éma. Amén.

*Eta táichecuaraque etá maechajiriruva ema Pablo*

<sup>19</sup> Péchajisinanuvaca ema Aquila ésupa esu mayena Priscila, énapa ena machichanaveana ema Onesíforo.

20 Émasera ema Erasto, nunaquicahi te Corinto. Émapa ema Trófimo nunaquicahivare te Mileto taicha ticajumahi éma.

21 Pítecavanecha te tamirahuinarichaha eta muracana técaticava. Téchajicaviana ena vichamuriana ema Eubulo, ema Pudente, ema Lino, esu Claudia, énapa ena apamuriana vichamuriana.

22 Núti nuyaseuchaviparaca me Viáquenu Jesucristo majaneacavihini tamutu sácheana, táetaviuchavaréni eta iúricacarevaya emutu éti máicha.

Tamutupa eta néchajiriruvahi piyehe.

## Eta macartane ema Apóstole Pablo mayehe ema machamuri **TITO**

**1-4** Nuti Pablo, nucajurevi piti nuparape Tito. Némunacavihi tímicutijiricavahi nuchichavinahini táichavenehi eta péhisiranuhi eta nusuapajiraivahi mayehe ema Cristo. Nuvaraha macatajicavini ichape, májapanuvini ema Tata Viciayaquene, émapa ema Viáquenu Jesucristo, émaripahi ema Macatiurahiquene viyehe. Náijaracavini eta táurivaina eta pipanereruana.

Acane, eta táepaniravahi eta juca apaquehe, ema Viya macametarapihi eta máijarasirahaviya eta vítaresiraya máichecuaraquireyare. Ene tacahayare, taicha ema Viya tájina máepiyahiraivaina. Puiti, títecapauchahaviripa eta sache máicutiarahi ema Viya, eta máijarasirahaviripa viti apóstoleana eta máechajiriruvana, étaripa vémechaquenehi puiti ena achaneana. Tacahé, núti mavanaranuhi ema Viya. Manerejirunuhi ema Jesucristo, ema Macatiurahiquenehi viyehe. Tituparacanuhi nítouchayare núti eta námirayare eta máechajiriruva. Tivanecanuhi eta nímitusiraya ena apamuriana manerejiruana ema Viya eta nasuapajiraivanayare, mavairahi náimatiéqueneha tamutu eta tímítucacareana yátupiqueneana apaesa tauri eta náitaresiraina. Tacahé, nacunevaina eta jena sácheyare te máijaracahavipa eta vítaresiraya máichecuaraquirénapa.

### *Eta macatuparahaira ema Tito*

**5** Péchavarichuhi te nunaquicavinapa eta te tiúrupuhi te mar ticaijare Creta. Nutuparacavihi pítauchayare tamutu eta numaitaureeanahi. Eta nutupararuvihi pinerejicaya ena pinacaqueneanayare eta návacureanaya ena pastoreanaya téchapajiricanayare nácani náijamuripachu tisuapajirahiana.

**6** Nayehhepachuina pastor, tacamunusera mácani achane maoaporavare eta máitaresira. Mácani, ésunarichuhi esu mayena. Tisuapajirahianahivare ena machichanaveana. Tacuija natapiravaina. Tisamarahiana éna.

**7** Taicha tacamunu matapiravarena nácani pitupararuanayare; taicha éna, tuparairucanayarevare mayehe ema Viya. Mácani, tímítucacarehi. Mácani, vahi tisemarairihi. Váhivare tavayuaruina eta téracare. Váhivare macueharahi. Váhivare tijamurarahi.

**8** Mácanisera achanesamure tijacaparahi nácani tichimarrachana. Márurica macachane ena tiúripaneréruana. Mácani,

máituca tipanerereca. Mácani, títaurahi tamutu nayehe ena achaneana. Mácani, macaijuhe ema Viya, títaurahihivare mayehe. Mácani, táuriquene eta macaratasirava.

<sup>9</sup> Énerichuvare tacamunu ema mácani tisuápajiráhiquene tayehe eta vímiturapiana tisuapacareana, apaesa éma táurivare eta máimituresiraina. Taicha tacamunu eta máijarasirayare eta natumevaina ena tisuapajirahianahi. Tacamunuhivare eta macajimuyasiravacaina ena nácani tictatianacanarichaha eta máimiturapiana. Máijaracainavare eta nasuapajiraivaina.

<sup>10</sup> Taicha nararihi camuriana ena titupiarahiana. Náetaviucha eta náechajiricavarasivana, tivayuarahiana éna. Nararihi ena nujaneanana tiápajucavana eta natupiaraivana.

<sup>11</sup> Picamatinacayare ena nani. Vahi picuisapa eta náimitureca eta tamauriqueneana, machu náemejecapavacha ena vichamurianahi. Taicha vahi táuricacarehíni eta náimiturapiana. Ena nani náichahi eta juca taicha navarahahi navereacavaca eta naplataneana.

<sup>12</sup> Matiarihinihi ema nayehenihi profeta najaneanaichu ena cretenseana. Macahehi eta māéchajiruvahi nayehe: “Ena nujaneanana cretenseana, tépiyahirahiana éna. Tíñehi eta náichaquene nacuti eta sárare tíñehi. Cánisiuquiana. Plújuanavare éna” macahepa éma.

<sup>13</sup> Yátupi tacahehi eta náitaresirahi puiti ena cretenseana. Eta tacahe, pituparacaicha muraca ena vichamuriana cretenseana, apaesa vaipa nacuaquipaicava tayehe eta tájiparácana. Tauri eta náehisira eta véhiruhi.

<sup>14</sup> Vaipa nacusuapa eta náimiturapiana navayuarapiana ena nujaneanana israelítana. Machu nacusuapa eta náimiturapiana ena nácani navaraha tihapapiricavaca ena vichamuriana eta náehisira eta yátupiqueneana tímitucacareana.

<sup>15</sup> Ena tipachinanahi te napanereruana téhepa nasamuriana, énara ena nani nacaijuhe eta táuriqueneana taicha náurica eta nasamararasira tamutu eta táuriqueneanahi. Énasera ena masuapajirairahana váinajarípanereruana, éna vahi táurihini nasamira eta tiúriana echajirirucava yátupiqueneana. Taicha tachipejiquenehi tamutu eta napanereruana, muracasamuroreanapa táicha. Tájina nasamahini eta tamaurivahi eta náichirahi.

<sup>16</sup> Éna nacahehi: “Véhica ema Viya”. Tímaticareana-hisera eta namáehisirahi ema Viya, taicha náicharichucha eta tamauriqueneana tíñemahiana. Émasera ema Viya macaticha tamutu eta juca náichaqueneana táñemahiqueneana. Ena

nani, masuapajirairahanahi eta mayehe. Tájinaserá vahi náituruéquenehaimahi ena nani náichahini eta táuriqueneana.

## 2

### *Eta yátupiquene vímiturapiana*

<sup>1-2</sup> Pítisera pímiturecaya tamutu eta táuriqueneana. Ena víyarahana ichanaruana, pímitucayareva eta najaneasiravaina eta náitaresira, náitaurahivaina, náitusiraina tipanererecana, nasuápajiráhiquenéna tayehe eta mavanairipiana ema Jesucristo. Náemunarahi nayehe ena achaneana. Yátupina eta nacamichiraina tamutu.

<sup>3</sup> Énerichuvare ena vénarahana ichanaruana, pímitucayareva éna tauri eta náitaresiraina taicha éna, tuparairucanahivare mayehe ema Viya. Vaipa téchajihianaimahi. Váhivare tacuvayuaca eta téracare. Náimiturahisera eta táuriqueneana.

<sup>4</sup> Náimitucayareva ena amaperuana esenana apaesa náituca eta náemunasiraina ena náimanaveana énapa ena nachichanaveana.

<sup>5</sup> Náitusirayareva tipanererecana. Napicaucha ena náimanaveana. Nasuapajirahivare nayehe. Napicauchacare nacaenacare te napenana, náitusiraina náechapajirica eta nayereruvana. Náurivaina éna, apaesa tacuija náechajisiacareváina tayehe eta náehisirahi eta máechajiriruva ema Viya.

<sup>6</sup> Énerichuvare piconsejachayare ena amaperuana ajairana, yátupina eta náitusiraina tipanererecana.

<sup>7</sup> Tamutu eta juca, pinaquipairuyare píti eta piúrvaina, apaesa étaina náehica ena vichamuriana eta piúrvahi píti. Étanarichu eta pímiturapiya, vahi pihapapicaimahi eta pímitucasivahi. Váhivare picuitsivacha. Tapicauchacare eta pímituresiraya.

<sup>8</sup> Táuri eta pímivehapisirayare eta jácani péchajirisiravanaya, apaesa tacuija nacuviyava eta nacaecahiravina ena piánaranahi, titsirihavianayarechucha táicha.

<sup>9</sup> Piconsejachayare ena músuana eta nasuapajiraivaina nayehe ena náquenuana. Náitaucha tamutu jácani navarahaqueneana ena náquenuana. Vahi nacujicapairihi tayehe eta vanairipiana.

<sup>10</sup> Váhivare nacuavijaca eta nacayehequeneana ena náquenuana. Yátupina eta nacasiñacarevaina tayehe tamutu eta natuparahanahi. Náimereca yátupina eta náurivaina apaesa tajamurachacare eta véhiruhi, étarichuhi eta vímiturapiana mayehe ema Macatiurahiquenehi Viya.

<sup>11</sup> Ema Viya, acaneripa eta majapanuirahavihi vimutu viti achaneana. Eta tacahe, máimitesinahavihi puiti ema Machicha eta macuchucuirahaviya. Eta juca tímicaecherachahi víti eta majapanuirahavihi ema Viya.

<sup>12</sup> Puiti ema Viya mavaraha eta táuri eta vítaresiraina te juca apaquehe. Mavaraha yátupina eta vítusiraina vipanerereca, étapa eta vítauraivaina tamutu nayehe ena achaneana, étapa eta vítauraivaina mayehe ema Viya. Vaipa víchaimahi eta tájiparacana tamauriqueneanahi. Váipavare víchaimahi eta tajamurachaqueneana eta viáquehe.

<sup>13</sup> Tásicha, vicunevainapa eta machavirayare ema Viáquenu Jesucristo ema Macatiurahiquenehi viyehe. Eta máitesiraya mámayarepahi eta tapachinaquene majaraiva. Tétavicava eta viúrisamurevainapa te jena sácheyare.

<sup>14</sup> Éma, máepeninahavihi, mavarairahi macaichepaicaya tamutu eta víchirahi eta tamauriqueneanahi. Máepachinachayare tamutu eta tamaeperajivana eta viáchanevana. Taicha mavarahahi machaneraquenehaviyare. Tacahe, puiti vivapinavayarehi vicha eta táuri queneana.

<sup>15</sup> Tiuri, pímitucayare eta júcana nutupararuvianahi, tamutu piconsejachavacayareva ena achaneana. Tijuricati natarihi navaraha téjecapavana, picortachavaneyare. Péturechava eta pímitusirahi taicha eta pituparacasivahi. Piúriyare eta pítaresira apaesa námutu napicauchavi, váhivare nacuepuru eta pituparahahi.

### 3

*Eta vítaresira viti véhicana ema Cristo*

<sup>1</sup> Pémechayareva ena vichamuriana eta nasuapiraina ema ichapequenehi aquenuca, tásicha, énapa ena tuparairucana. Énerichu pémechavare ena vichamuriana énaina nápajucava eta návanacare tayehe jácani ematanecanaya.

<sup>2</sup> Vahi nacuechajica nayehe nácani achaneana. Váhivare nacumehareca. Váhivare nacutupiarahi. Mánsuanáinasera, najapanurahi nayehe ena achaneana.

<sup>3</sup> Víti, acane eta masuápajirárahahavirichaha, vimáimatiéquenehahinivare. Víchahi tamutu eta tájiparacana tavarahaqueneana eta viáquehe. Tétavicavahi eta viváinarajívainihi eta vítaresirahi. Vicapinarurahini. Vímicatichavainihi nayehe ena achaneana. Vicatianarahinivare nayehe éna.

<sup>4-5</sup> Puítisera, vaipa vácahehini, taicha máitsivacharipa eta vítaresira ema Macatiurahiquenehi Viya. Émasera, tétavicava eta máuriva eta viyehe. Témunacahaviripa. Váhinéni víchahini eta táuriqueneana, tijapanuhavisera éma. Masipacaipa eta visamureana, máquijicaipa eta tamauriqueneanahi eta

viyehe. Énerichuvare tíjaracahavipa ema Espíritu Santo. Ema Espíritu Santo máitsivachinahávipaipahi eta vítaresira, tímíticahavipa eta viúrivayare eta viyeherepiyare.

<sup>6</sup> Tétavicavahi eta viúricacarevanahi maicha ema Espíritu Santo máijararuhi ema Jesucristo Macatiurahiquenehi eta viyehe.

<sup>7</sup> Majacapahaviripa ema Viya, tiásihaqueñenehi eta máemunasirahavihi ichape. Énerichuvare timetacahavihi eta máijarasirahaviyare eta vítaresiraya máichecuaraquirénapa. Tásiha, vivapinavahi víti eta vicuneiravahi eta jena sácheyare.

<sup>8</sup> Yátupiquenehi tasuapacareva eta juca vímitucasivahi. Eta juca néchajisihaqueñeanahi puiti, nuvaraha pímitucayare tamutu sácheana apaesa náimiyanova naicha eta táuriqueneana ena vicutiqueneana tisuapajirahiana me Viya. Tétavicavahi táuriva eta vímiturapiana. Tájina táichiravaina, taicha eta juca tíjaracarahi eta náurivaya nayehe namutu ena achaneana.

<sup>9</sup> Puíticha nararihi ena tisuapanarichaha eta nahapapiruanahi nayeherepiana ena viáchucanaveánaini. Te návarahapuca náevataemachavi, vahi picujicapajiricavaca, taicha súnsurupianachucha eta nayasereruvianaya. Váhivare picuimicasiapava nayehe nácani tiyunacana eta mayeherepiana ema Moiséini. Te navarahapuca nácani ticajacchaviana, vahi picujicapa. Pihapapicayaresera eta tajuricatira eta nasemanaevanahi. Técaticavachucha éta.

<sup>10</sup> Te matiarihipuca ema mácani mavaraha mahapapica eta napanerueruana ena vichamuriana, pímicuhayare picórtachávaneya eta mapanereruhi. Te apihequenénapa eta pímicihuha, te máviraichu vahi macusuapavi, pévatacayare mayana máuchuca.

<sup>11</sup> Taicha tímaticarepahi ema achane eta mamaimitucacrevaya. Étavenérahi eta mapecaturana táimicuñacaya.

*Eta téqueneha matuparacasivahi ema Tito mayehe ema Pablo*

<sup>12</sup> Tiúri, névatacayare pítsivayare ema Artemas eta ara piyehe, téhesera émapuca névataca ema Tíquico. Te máitecapauchavipa ara piyehe, pítecávaneyare ani nuyehe te juca avasare Nicópolis, taicha nunasiyarechaha ani.

Nuvaraha táetavicavanúmachaha eta muracana técaticava, nupaenumavainapa nuyanaya.

<sup>13</sup> Énerichuva titecapauchaviya ema vichamuri abogado Zenas, émapa ema vichamurivare Apolos. Pímicatacavacayare éna eta nayanirayare. Péchapajiricayare éna, te náechuriapuca eta napaisiraya.

<sup>14</sup> Pímitucayare ena vichamuriana eta achanesamu-revacaina, maejeraréna eta nacajiraivaina nayehe ena achaneana. Yátupina náitaucha eta nacamunucarevanahi.

<sup>15</sup> Téchajicaviana namutu ena natarihiqueneanahi nuyehe. Tásicha, péchajisinanuya namutu ena némunaca-sáreana vicutiqueneana eta visuapajiraivanahi mayehe ema Viya.

Nuyaseuchaheparaca emutu éti me viáquenu Jesucristo, táetaviuchahini eta iúricacarevaya máicha.

Tamutupa eta néchajiriruvanahi piyehe.

## Eta macartane ema Apóstole Pablo mayehe ema machamuri **FILEMÓN**

<sup>1</sup> Nuti Pablo tapresuchaquenenuhi eta néhisirahi ema Jesucristo, puiti nucachane ema Timoteo eta vicajureravihi eta carta piti Filemón, vichamurivihi vémunaruviquenuehi tayehe eta vématanerepianahi.

<sup>2</sup> Vémechajisihavare namutu ena vichamurianahi tiúrujicavarahianahi te pipena. Péchajisinahavivare esu vichamuri Apia, émapa ema Arquipo, vicompañeroquenuehi muraca tayehe eta vématanerepianahi.

<sup>3</sup> Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Náijaracahehini táurivaina eta epanereruana.

### *Eta máurivahi ema Filemón*

<sup>4</sup> Néchaviparaca te nuyujarasirana, nuhasulupayachahi ema Viya.

<sup>5</sup> Taicha nusamairiricahi eta pímiyanirávahi pémunaca ema Viáquenu Jesús, péhicahi yátupi. Pémunacahivare namutu ena machanerana ema Viya.

<sup>6</sup> Nuyaseuchavacahi me Viya nayehe namutu ena téhicavianapaipahi táichavenehi eta náimairahi eta pisuapirohi yátupi. Nuvaraha nácaicutiaraquenénaini muraca tamutu eta táuriqueneana máijararuhavianahi ema Cristo Jesús.

<sup>7</sup> Ichaperinehi eta núrisamurevahí picha piti nuparape. Tijarahinehi picha te nusamure eta nusamairirisirahí eta pímiyaniravahí pémunacavaca yátupi ena vichamuriana, étapa eta picurisamurechiravacahi ichape éna.

### *Ema Pablo maechejiucha ema Onésimo mayehe ema Filemón*

<sup>8-10</sup> Tiuri puiti, nuvaraha néchajiucho ema Onésimo. Picatajicanu piperdonachinanu éma. Núti yátupiquenenuhi mayehenuhi apóstole ema Cristo. Tituparacanuhinéni nuvanecavihini. Étasera eta vémunasiracacahi, nuyaseacavi nuti paure ichavica, nucaerataquenuehi puiti máichavenehi ema Cristo. Puiti éma, nuchichahi némunaruquenuehi te juca cárcel taicha éma téhica haviripa eta visuapirohi ema Jesús.

<sup>11</sup> Ema maca Onésimo, cape juca másinequenuehi, vahi máitaurahini eta picamusurairahi. Tijunahivare. Púitisera éma, ichaperinehi eta máitátiranuhi. Eta máitátiranuhi núti tacutiyare eta máitátiraviyareva píti apana.

<sup>12</sup> Puiti névatacayare éma eta ara piyehe. Picatajicanu pijacapinanuyare táimicutijiricava nútinayarehi nítecapauchavi piyehe.

<sup>13</sup> Nuvarahahineni mánasihini eta ani nuyehe. Émainahini pítisvainahini eta pivarairahi píteca pítatinuya eta návhairahi te juca cárcel táichavenehi eta nucametarairuirahi eta máechajiriruvana ema Viya.

<sup>14</sup> Nuvarahahineni níminasicha éma, nucuchapahisera tájahapuca picayemayare píti. Váhisera nuvaraha nupamicavi eta juca picatajisiranuya, nucuchapayare eta pijicapiranuyare. Nuvaraha étachucha tásishaqueneyarehi eta táurivaina eta pipanereru.

<sup>15</sup> Táitaurevaquene tijunijicavihi áni ema Onésimo. Émarichuserapuca jácani ema Viya táshahi másapahi eta macaheyarehi ema Onésimo. Puítisera tétupiricavapa éma. Máraja-painapa tichavayare eta ara piyehe, apajarahinapa eta maitatiraviya.

<sup>16</sup> Váipa táchutimahi cape juca másinequenehi. Puiti pímahainapa eta máurivayare macamunucarevayare eta piyehe, taicha váchupa puiti vichamuripahi éma te mavahuana ema Viáquenu. Núti, ichape eta némunasirahi ema maca. Énénapa picaheyare píti apanava, tiápajucavainapaipa eta pémunasiraya ema maca.

<sup>17</sup> Te yátupina pémunacanu eta nuchamurivírahi, pijacapinanuyare éma táimicutijiricava nútinayarehi pijacapa.

<sup>18</sup> Te tatarihinapuca eta máejecapiravahi piyehe, ticantevehipuca, nútinarine picobracha.

<sup>19</sup> Nuvachachaviyare núti. Nuti Pablo, nútiquenehi nájuchahi eta nufirmachirahi puiti eta nuvachachiraviyare. Nuvarahahineni némechavi píti apana eta pintevehi nuyehe eta nucatiuchiravihi.

<sup>20</sup> Tiuri, nuparape, picatajicanuchaha eta juca nuyasearuvihí táichavenehi eta nucachamurivirahi mayehe ema Viáquenu. Picurisamuréchanuya.

<sup>21</sup> Németeaca vahi taeñamavacare eta juca pisuapiranuyare. Eta tacahe, nucajurevihi puiti. Taicha néchahivare eta vahi táchutimahi pítachaya eta juca nuyasearuvianahi. Tatarihiyare jácani apanayare píjararuvanayare píti tásishaqueneyare te pisamure.

<sup>22</sup> Énerichuvare nuvaraha pétupirisinanuya eta nítecapihaya. Étanecha nucuchapahi eta tasamacarevaina eta eyujaracasana me Viya eta nítujisiravaina nítecapauchahé.

*Eta táchecuaraqui eta máechajiriruva ema Pablo*

<sup>23</sup> Téchajicavi ema Epafras, ema nucompañerohi te juca cárcel, tapresuchaqueñehivare ema apana eta véhisirahi ema Jesucristo.

<sup>24</sup> Énerichuvare téchajicaheana ena apamuriana vicompañeroanahí tayehe eta vématanerepianahí: ema Marcos, ema Aristarco, ema Demas, émapa ema Lucas.

<sup>25</sup> Nuyaseuchaparaca ema Viáquenu Jesucristo táetaviuchahíni eta iúricacarevaya máicha.

Tamu tupa.

## **Eta apanavare carta nayehe ena israelítana téhicanahi ema JesúS, ticaijare HEBREOS**

*Ema JesúS titametacahavi eta máechajiruvana ema Tata Vicaiaquene*

<sup>1</sup> Acane eta náitaresirahi ena viáchucanaveanaini, natiar-ihíhi ena camuriqueneana santo profetana mavanaranahi ema Viya. Éna, náitametacahi ena achaneana eta máechajiruvana mapanereruanahi. Ichapemurivare eta náimere-sirahi eta máitupajijiasiravanahi ema Viya. Apanapanenéjivare eta náimituresira eta máechajiruvana.

<sup>2-3</sup> Puítisera viti vítareruanahi puiti juca áñoana, ema Viya mavanecahi ema Machicha eta viyehe, titametacahaviya eta taequenereruana mapanereruana. Ema maca Jesucristo, Víyahivare éma, taicha machichahi ema Viya. Acane émahi tépiyacahi eta apaquehe, eta anuma, étapa eta vímahaque-neanahi puiti, máitauchirahi tamutu eta mapanereruana ema Maiya. Émarichuvare ticatuparahahi me Maiya eta émairahi téchahi tamutu. Puíticha émahi téchahi tamutu, máetaviuchahi eta máitupajijiasiravahi. Ema Cristo ticayehéhi eta majaivahi máijararuhi ema Maiya. Eta máucupaisirahi eta viyehe, tímimaticahavipa eta máurivahi ema Maiya. Tásiba, te tamutupa eta macaepahairahi eta vipecaturana vimutu viti achaneana, tichavapa te anuma. Ánaqui ema Maiya macaejacapa te mayehe trono te mavaure.

*Ema Cristo, éma ticapicahupanahi nayehe ena ángeleana*

<sup>4</sup> Tacahe, ema Cristo, éma ticapicahupanahi nayehe namutu ena ángeleana, taicha ema Maiya máijaracahi eta ichapequene mávacurehi ticapicahuhi.

<sup>5</sup> Taicha eta máechajiruvahi ema Viya mayehe ema Cristo, ani macahehi: “Píti yátupiquenévihi nuchicha. Puiti nucaejacavihi te piávacure” macahepa. Tacahe, ena ángeleana, tájina vahi máichahini: “Píti nuchichaví”. Váhivare máichahini: “Núti picaiyaquenehi”. Ema Viya máechajisihahi ema Cristo, ani macahehi: “Ema maca, ema yátupiquenehi nuchicha, taicha nútiquenenuhivare máiyau” macahepa.

<sup>6</sup> Tacahe, te macucupaicapa ema macarichuquene Machicha te juca apaquehe, macavanairipipa eta natsiusirayare nacunachirayare namutu ena ángeleana.

<sup>7</sup> Énasera ena ángeleana, taechajisihahi eta Sagrada Escritura, ani tacahehi: “Ena ángeleana vanairucanachucha éna.

Nacutihu eta técaticava eta najuricativa te ticavanahiana. Nacutihivare eta yucu eta nasipasirayare jácani tamaeperajiqueneana” tacahepa eta Sagrada Escritura.

<sup>8</sup> Ánisera tacahehi eta táechajisihairahi ema Cristo: “Píti yátupiquenevihi Viya. Máitavacacayarehi eta aquenucavirayare. Tétavicava eta tatupiruvairayarehi eta pivanairipi.

<sup>9</sup> Píjaracayarehi eta táurivayare eta náitaresira ena achaneana tiúriana tisuapavianaya. Énerichu píjaracayare eta náicuñayare ena achaneana váinajarajiana masuapajirairahanahi eta piyehe. Eta tacahe, ema Tata Vicaiyaquene, ema Ticachichavihi, tíjaracavíhi tamutu eta picapicahuirayare nayehe ena pichamuriana téhicavianahi. Tétavicavahi eta náurisamureva pícha”.

<sup>10</sup> Ánivare tacahehi: “Píti yátupiquenévihi Viáquenu. Píti pítucahi eta taimahiyare eta tápaniravahi eta apaquehe etapa eta anuma, pépiyaruuanahi te pivahuana.

<sup>11-12</sup> Tayanapane titavayarehi tamutu eta juca vímahaque-neanahi, ichasipaipahi tacutipaipa eta táichasivapaipa eta vimuiriha. Pítisera pinasiyarehi. Te pímahapa táuricapa eta pítisvachiraya tamutu, máejerareyarehi pícha. Picañapupujicainapa tamutu. Taicha píti, máitavacacavyarehi eta pítaresirahi” tacahepa.

<sup>13</sup> Jararihi eta apana máechajiruvahí ema Viya, ani macahehi mayehe ema Cristo: “Yare, péjaca te nuvaure, eta picuchapihayare eta nucae puyusiraya te pimirahu ena taticianacavianahi” macahepa. Énasera ena ángeleana, tájina vahi máichahini: “Péjaca ani te nuvaure”.

<sup>14</sup> Taicha ena ángeleana, mavanaranahi ema Viya. Éna, espírituanahi. Vahi énajivainahini nacapicahuhini. Eta natuparahahi éna, tijaneacahavianaya víti macuchucurenayare ema Jesús.

## 2

*Tacamunuhi eta vipamisirava tayehe eta véhisirahi ema Jesús*

<sup>1</sup> Eta tacahe, tituparacahe yátupina eta ecaravahuiraya eta ímitucasiqueneanahi, machu émitisica, machu étaina taviuuchahe vahi iúchucuhahini.

<sup>2</sup> Eta acane, ena ángeleana, éna tímitucanahi ema víyarahaini Moisés eta vanairipiana. Tétavicavahi eta tasuapacarevahí. Ticaicuñavaneanahi ena téjecapavanahí, timasuapanahí eta nasamaquenehi.

<sup>3</sup> Puiti numetacahe: Tisuapacarepanahí eta véhiruhi. Tájina vahi ticaiticahémahi eta ícuñayare te váhipuca ecucamapuravahí eta iúchucuirayare. Taicha émarichuhi ema Viáquenu

tínapucahi máichuhavacahi ena achaneana eta náuchucuirayare. Tacahe, ena tisamanahi éma, tíchuhahavianapa víti.

<sup>4</sup> Énerichuvare, ema Viya máimerecapahi eta tiáramicareana, máicutiaranahi eta émairahi vanairuca, mavarairahi tisuapacareyarehi eta nametarapiana. Énerichuvare puiti ema Espíritu Santo, éma tíjaracahavihi eta vítucaquenepachuyare apaesa vítauchayarehi eta vématanerepipachuhi víjarihi máicha.

*Ema Jesucristo, achanehi eta máimahi eta máitesirahi te vitaracu*

<sup>5</sup> Ema Viya, váhivare énainahini matuparacavacahini ena ángeleana eta énairayare téchanaya eta arairuyare avasare eta vicuchapaquenehi, étaripa eta véchajisihaqueneyarehi.

<sup>6</sup> Eta Sagrada Escritura, ani tacahehi eta táechajiruva: “Piti Tata Viáquenu, téavicavahi eta pijapanuirahavihi viti achaneanasami. Víti, váhinéni túnahini eta vítaresirahi. Váhivare vénamacarehini. Pítisera péñamavahi eta viyehe, váhivare pémitisicahavihini viti pépiyaruuanahi.

<sup>7</sup> Te pépiyacapa ema viáchucaíni Adán, vahi mácutinasivacahini ena ángeleana. Ena, nacachuricahi éma eta náitupajijiasiravana. Váhisera tásimahi eta nacachuriasirahi. Taicha pijapanuhavihi viti mámariequenehana ema Adán. Píjaracahavihi eta viávacurehi tajarahiquenehivare, téavicavahivare eta vicapicahuirahi. Aquenucahavihi pícha. Véchahi tamutu eta pépiyaruuanahi.

<sup>8</sup> Visuapacarehi viti tamutu eta pituparasirahavihi” tacahepa eta Sagrada Escritura.

Tacahe, téchajisihahavihi eta Sagrada Escritura eta vécirahi tamutu eta máepiyaruuanahi ema Viya, tájina ticaejeraimahi, maicha ema Viya. Vuíchahasera vímahahini vicayamuricahini tamutu táichavenénahini eta visuapacarevahi.

<sup>9</sup> Mararihisera ema Jesús. Tiúcupaicahi ánipihi te juca apaquehe, nacachuriacaripa ena ángeleana eta náitupajijiasiravana. Eta máemunasirahavihi vimutu viti achaneana, ema Viya máimicacarichahavare te crusu vítivenehi. Téhesera te táequenepa, macaejacapa ema Jesús tayehe eta tajarahiquene mávacurehi tacapicahuquene, táitsivahi eta macatajivairahi eta mápenirahi.

<sup>10</sup> Ema Viya émarichuhi téchahi tamutu. Ema, téavicavahi eta máechemaraivahi eta manerejisirahi ema Machicha eta macuchucuirahaviyarehi, tiámahaviyarehi eta te mávasa, viti machichanayarehi. Émaripa ema Jesús, eta macamichirahi tamutu eta mátajvana, títauchavahi tamutu eta matuparahahi.

<sup>11</sup> Eta máepachinachiraripa eta viáchanevana, visiapamurihaipa ena machichanaveanahi ema Viya, vicutiripa ema Jesús eta machichairahi ema Maiya. Eta tacahe, ema Jesucristo, ichape eta máurisamurevahí eta viyehe eta majacapi-rahavihi maparapehaviyare.

<sup>12</sup> Eta te Sagrada Escritura, ani tacahehi eta máechajirruvahí ema Cristo: “Nuvapinava eta néchajisihairaviyare, Tata, nayehe ena nuparapenaveana. Nuvaraha nujirauchaviyareva, nacachanenuhivare éna”.

<sup>13</sup> Ánivare tacahehi: “Tétavicava eta nucasiñavairahi mayehe ema Tata Nucaiyaguene”. Eta apana, ánivare tacahehi: “Ani návhahí núti, énapa ena pichichanaveanahi, ena pinerejiruanahi pijararunuanahi piti Tata” macahepa.

<sup>14</sup> Viti achaneana, étanarichuhi eta vicaechora étapa eta vítine. Ene macahehi ema Jesucristo, macaechehi, macaitinehivare étarichuhi tacutihi eta vítine víti. Eta tacahe, eta máepeninahavíhi, macapaquechihayarehi ema Váinaraji, émarichuhi muracaquenénihi eta máitupajijiasiravahí eta macaparereresirahi.

<sup>15</sup> Viti achaneana, ichapequenénihi eta vipisirahi eta vépenirayarehi, taicha vipicahi eta vícuñayare. Eta vipisirahi tahapapiricahi eta vítaresira. Émasera ema Jesucristo macaepaharipa eta vícuñayarehini, vaipa tápicacarehini eta viyehe.

<sup>16</sup> Éma, eta máitesirahi, vahi étainahini táimitecahini eta máimicatasiravacayarehi ena ángeleana. Yátupihisera viti achaneana, víti máimicataruanayarehi, taicha eta vicasiñavairahi eta mayehe, vicutirahi ema víyahaini Abraham eta macasiñavairahi me Viya.

<sup>17</sup> Eta tacahe, eta máucupaisirahi ema Viáquenu, tatuparacahi macaqueheyarehi eta viáquehe eta máitaressirahi, ticutihaviyarehi viti maparapenaveana te tamutu eta vítaresirahi, yátupiyarehi eta máetaviuchiraya eta majapanuirahaviya, máetaviuchayareva eta macasiñacarevaya eta viyehe. Taicha macarichuhi ema tiyaseuchahaviparacahi te mamirahu ema Viya Macaiyuquene, macaepaháinahaviyarehi eta viviurevanahi táchavenehi eta vipecaturana viti achaneana.

<sup>18</sup> Ema Jesús, ichape eta macatajivairahi, macaitsamara-jiquenehi ema Váinaraji. Macamichahisera tamutu, vahi máisapavahini. Tásiba puiti, éma marataha tímicatacaviyare víti eta vicamichirayare eta viátajvana táchavenehi eta macaitsamarajirahavihi ema Váinaraji.

### 3

*Ema Cristo tiápajucavahi eta macunachacarevapanahi*

*mayehe ema víyarahaini Moisés*

<sup>1</sup> Nuvaraha numetacaheya eta apana, eti nuparape-naveana máepachiaruanahi ema Viya, máichuhaqueneanahivare eta esiapiraya eta mávasa. Nuvaraha epanerecha apaesa ácaicutiara eta táetaviuchirahi eta máitupajijasiravahi ema Jesús. Éma, yátupihi mavaneruhi ema Viya eta máimitusirahaviyarehi eta juca véhiruhi. Macarichuhi ema tiyaseuchahaviparacahi te mamirahu ema Viya.

<sup>2-6</sup> Ema Jesús, tétavicavahi eta máitauchirahi tamutu eta mavanahiana matuparacasivanahi me Viya. Énerichuvare ema víyarahaini Moisés, titaurahivare eta mavanahi eta maconsejaraivahi, máimitusirahivare ena achaneana tamutu eta mavanairipiana ema Viya. Énerichuvare máechajishahi tatarihiyare eta apana mapanereruana ema Viya vuíchahasera máimerecahini ema Viya. Émasera ema Jesucristo, ema tiápajucavapanahí eta macunachacareva, macachuricahi ema víyarahaini Moisés. Ticunachacarepanahi taicha machichahi ema Viya, ticatuparahahivare téchahavihi vimutu viti machanerana ema Viya. Émasera ema Moisés vanairucaichucha. Ema Moisés máichuhavacahi ena achaneana. Émasera ema Jesucristo, émahi tépachinachahi eta viáchanevana viti machanerana, tihetamurichahavivare. Viti yátupihi machanerahavihi, te vímiyanava eta juca véhisirahi éma, vicasiñavavare eta mayehe, viúrisamurevare eta vicuchapirahi eta viúchucuiraya te jena sácheyare.

*Ema Viya tícuchahavihi eta vinarasihayare viti machaneranahi*

<sup>7</sup> Eta tacahe, nuvaraha ejaneacava. Ema Espíritu Santo, ani macahehi eta máechajiriruvahi tayehe eta Sagrada Escritura: “Puiti jena sache, esamayare esuapayare éti eta numetrapiana nútì.

<sup>8</sup> Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apaquehe. Ichape eta namasuapajiraivahi eta nuyehe, náetaviuchirahi eta nacaitsamarajiranuhi nútì.

<sup>9</sup> Tétavicavahisera eta nucamichiravacahi eta namasuapa-jiraivahi. Cuarenta áñoripahinéni eta nímechiravacahi eta tiáramicareana níchaqueneanahi, váhisera nasuapanuhini.

<sup>10</sup> Eta tacahe, te taequenepa, nusemapa nayehe ena nani achaneana. Taicha éna, táetaviuchirahi eta taejecapiravahi eta nasamureana. Vahi návarahahini náimatihini eta taurinaquene achene, nuvarahaquenehi nímechavaca.

<sup>11</sup> Núti nétupiricaripahi eta náicuchihi nanarasihayarehini eta nuyehe. Tétavicavahisera eta náimiyusemasiranuhi. Tásicha, nuchahepa núti: Ena nánitátaji váhiquene nasiapaimahi tinaracanaimahi eta nuyehe” macahepa ema Espíritu Santo.

<sup>12</sup> Eta tacahe, nuparapenaveana, nuvaraha ejaneacavayare yátupina. Machu éhica eta napanereru ena masuapajirairahana, machu emutserahava íminajicava eta éhisirahi ema yátupiquenehi Viya Vicaiyaquene.

<sup>13</sup> Étumechacacayaresera nayehe ena apamuriana echamuriana támamuhi sácheana puiti juca vicaijuheyare, apaesa nacuija navayuaca ena tivayuarahiana tayehe eta pecatu, machu étaina táemuracacha eta esamureana.

<sup>14</sup> Taicha viti machamurihavianahi ema Cristo. Vijacapainasarepa eta vícuchihi mayehe éma, te vímiyanavahi eta vicasinairava mayehe, vétumechiravahivare eta véhisirahi.

<sup>15</sup> Eta tacahe, nápechavavare némechahe eta máechajiriruva ema Espíritu Santo: “Puiti jena sache, esamayare esuapayare éti eta numetarapiana núti. Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apaquehe. Ichape eta namasuapajiraivahi eta nuyehe, náetaviuchirahi eta nacaitsamarajiranuhi núti” macahepa.

<sup>16</sup> Puiti nuvaraha epanerechaya eta juca. Némechaheya ema víyarahaini Moisés eta macuchusiravacahi ena viáchucanaveanaini tayehe eta avasare Egipto. Tétavicavayaréni eta náuricacareva. Tamapurujisera eta nasamirahi eta muhu ema Viya, máijarasirahi eta mavanairipiana. Náimiyusemcapaipa éma eta namasuapirahi.

<sup>17</sup> Tamapurujivare eta cuarenta áñohi eta macamichirvacahí ema Viya. Taicha tavayuacahi eta napecaturana éna, étapa tiviuchahi eta náepenorarasirahi te mávapahi apaquehe.

<sup>18</sup> Eta namavarairavacahi nasuapahini, éma manacapa eta mayehe juramento eta namaitujisiravayare tisiapananaracahini eta mayehe.

<sup>19</sup> ¡Ácaicutiara éti! Táichavenehi eta namasuapajiraivahi, puiti vímahaipahi eta namaitujisiravahi tisiapanan tayehe eta mávasa ema Viya.

## 4

<sup>1</sup> Tacahe puiti, vicasinavayare me Viya apaesa vítujicava vinaraca mayehe. Ticamunucarehisera eta ejaneasiravayare muraca machu émepururecava éti, tijuricati vahi ecuitujicava esiapa.

<sup>2</sup> Taicha víti vicametacasihihare etá viúchucuirayare tacutíhi eta nacametacasirahi éna. Tamapurujihisera etá nacametacasirahi etá náuchucuirayarehíni, váhiquenesera nasuapahini.

<sup>3</sup> Yátupisera jararihi etá vinarasihayarehi, taicha ánipa macahe ema Viya: “Núti nétupiricaripahi etá náicuchihi nanarasihayarehini etá nuyehe. Tétavicavahisera etá náimiyusemasiranuhi. Tásaha, nucahepa nútì: Ena nánítatái váhiquene nasiapaimahi tinaracanaimahi etá nuyehe” macahepa ema Viya. Vítisera viti visuapajirahiana, vítujicavayare visiapa tayehe etá juca vinarasihayare etá mayehe ema Viya.

Émarichuhi ema Viya máetupiricaripahi etá vinarasihaya, taicha tinaracapa éma, te táequenepa etá máitauchirahi macaematanerasirahi tamutu etá juca apaquehe.

<sup>4</sup> Taicha etá Sagrada Escritura, ánipa tacahe: “Saisi sache etá macaematanerahi ema Viya. Téhesera te siétequenepa sache, tinaracapa éma, taicha máitaucharipahi tamutu” tacahepa.

<sup>5</sup> Tásaha, nápechavavare némechahe etá juca máechajiriruvana ema Viya: “Váhiquene nasiapaimahi tinaracanaimahi etá nuyehe” macahepa.

<sup>6</sup> Tacahe puiti, mávacuichahahi etá nanarasihayarehini ena tínapucanahi tisamanahi etá náuchucuirayare, táichavenehi etá namasuapajiraivahi. Étainapasera viávihayare viti véquenerruana visuapajirahianayare.

<sup>7</sup> Ánaquiaparipahi etá táetavisiravahi etá áñoanahi te táequenepa etá namasuapirahi ena nani, máichapa ema Viya etá te Salmo, ánipa macahe: “Puiti jena sache, esamayare esuapayare éti etá numetarapi nútì. Tacuija etá tamuracavaina etá esamureana”. Eta macaheirahi etá juca, ema Viya máimicutiarachahi etá apána sache ticamapuravacarehi etá visiapistirayare etá te vinarasihayare etá mayehe.

<sup>8</sup> Yátupihi ema víyarahaini Josué macaitecapavacahi ena nani achaneana tayehe etá apaquehe natuparahahí. Váhisera étainahini etá nanarasihayare mavarahaquenehi ema Viya. Eta tacahe, etá máechajisihapa etá apána sácheyare visiapistiraya viti.

<sup>9</sup> Tacahe, jararihichaha etá juca tacapicahuquenehi vinarasihayare, táicuchihi etá viáchaneva viyehe viti machaneranahi ema Viya.

<sup>10</sup> Eta visiapistirayare vinaracaya etá mayehe ema Viya, yátupi máitavacacayare etá vinarasiraya, vaipa vicaemata-némahi. Vicutiyare ema Viya etá manarasirahi tayehe etá máemataneanahi.

<sup>11</sup> Eta tacahe, tavarahahi vétumechavayarehi tayehe etá

visuapiraina éma, apaesa vítujicava visiapa tayehe eta vinarsihaya. Machu vémeprureca eta vícuchihi, machu vácuti ena masuapajirairahanahi.

<sup>12</sup> Taicha eta máechajiriruva ema Viya, téavicavahi eta tátipajijiasiravahi máicha, tamutuhi tarataha. Tacachuricahi eta tacasiriva eta espada. Tacapayacayarehi te amahe tayehe eta viáchanevana viti achaneana. Tímechahavi eta tamaurivahi eta visamureana. Tasiapavare eta vipanereruana. Tímitucahavivare eta vétupirisieca eta vítaresirana.

<sup>13</sup> Ema Viya máimamaracahi tamutu. Tájina vahi viratahaimahi viyumuruca eta víchaqueneanahi. Tamutuyarehi tiúchujica te mamirahu éma vepuyumiraureyarehi te máichuhahavipa eta vimetauresiravayare mayehe.

### *Ema Jesús macarichu éma tiyaseurahi eta viyehe*

<sup>14</sup> Ema Jesús, yátupiquenéhi Machicha ema Viya. Macarichuhivare ema tiyaseurahi eta viyehe taicha mávaháruhi puiti ema Maiya mávihahi te machacaya. Eta tacahe, vicaratacavayarehi muraca tayehe eta véhiruhi.

<sup>15</sup> Éma, yátupihi tiyaseurahiquenéhi eta viyehe, taicha tímatihavi eta vimatumevahi. Tijapanuhavisera, taicha éma énerichuvare ticatajivahi tamutuhi macaitsamaraji ema Váinaraji, tacuti eta macaitsamarajirahavihi viti. Váhisera macapecaturahini ema Jesús.

<sup>16</sup> Eta tacahe, vicasiñavayarehi te viyujarasirana, vémeñahairavahi me Viya témunarahiquene. Taicha téavicavahi eta majapanuraiva táichavenéhi eta máemunasirahavihi. Éma, yátupihi eta máimicatasirahavi tayehe tamutu eta vicamunuiravanaugh.

## 5

<sup>1</sup> Nuvaraha epanerechaya nayehe ena nácani catuparanayare tiyujaracarohana viyehe viti israelítana. Éna, nerejianahi te nataracu ena achaneana. Natuparacasiavaichuhi éna ticaitecapanayarehi me Viya eta námavahuanena achaneana, étapa eta nanaquiruvana táichavenéhi eta napecaturana, nayaseuchirayarehi ena achaneana mayehe ema Viya.

<sup>2</sup> Éna, tijapanurahianayarehi nayehe ena máiturereana énapa ena téjecapavana, taicha énarichuvare ticatajivanahi tayehe eta naeche mágteji.

<sup>3</sup> Étaripa eta nacatajivairana, ticamunuwanahi éna apanta camavahuanahi mayehe ema Viya táichavenéhi eta napecaturana.

<sup>4</sup> Tacahe, mácani ticatuparayahare tiyaseurahiyarehi, vahi émajiriruvaimahi máichuhacasivarichuhi. Émahi ema

Viya tíjaracahi eta matuparahahi mapicahuyarehi, tacutihu eta máijarasirahi ema víyarahaini Aarón eta matuparahahi macapicahuirahivare.

<sup>5</sup> Ene macahehi ema Cristo. Vahi émajiriruvainahini eta macatuparahairahi tiyaseurahiyarehi eta viyehe. Émarichuhi ema Viya tíjaracahi eta matuparahahi mapicahuyarehi, taicha ani macahehi ema Viya: “Píti yátupiquenévihi nuchicha. Puiti nucaejacavihi te piávacure” macahepa.

<sup>6</sup> Eta apana máechajiruva, ánivare tacahe: “Nunerejicavihi píti piyaseurahiyare. Nutuparacavíhi péchajurahiyare nayehe ena achaneana. Maitavacacayare eta juca pituparaha, picutiyare ema nuvanaraini Melquisedec” macahepa ema Viya.

<sup>7</sup> Tacahe, ema Cristo, te matiarihichaha ani te juca apauehe, tiyaseuchavahi te mayujarasirana eta me Maiya. Muraca eta máumitirahi, máiyahairahivare. Tiyaseuchavahi vahi máemitisicahini ema Maiya eta macaechepusirayarehi te máecari te táequenepa eta máepenirahi te crusu. Jéhesare, tisamacarehi te mayujarasirana, táchavenehi eta mavarairahi máitaucha tamutu eta mapaneruana ema Maiya.

<sup>8</sup> Taicha ema Cristo, machichahi yátupiquene ema Viya. Váhisera máeñamavahini. Váhivare majunijicahini eta macatajivairanahi. Macamichahi tamutu, macaravahuirahi eta masuapajiraivahi.

<sup>9</sup> Eta tamutuirapa eta máepenirahi, téchepucavarepa, tásicha maratahapa eta macuchucuhairahavyare vimuti viti visuapanahi éma. Maitavacacayarehi eta vítaresiraya máicha.

<sup>10</sup> Eta tacahe, ema Viya manacahi eta mávacure téchajurahi eta viyehe macutihi ema víyarahaini Melquisedec.

### *Ecunevahi machu ánasi ácuti ena amuyana*

<sup>11</sup> Ichapemuriyare eta taechajisihaquenehi eta juca numetaruuhehi. Ticajerahisera nítametacahehini taicha téavicavahi eta tamuracavahi eta echutiana.

<sup>12</sup> Ánaquiaparípahinéni eta ecaravahuirahi, iúrihaipahini puiti máestrohevacainaipahíni. Ecamunuichahahisera natiarihiyarehi nácani tiápechaheanaya titametacaheanayarehi jácani vahi tacajerahini eta vímitucasivanahi me Viya. Puiti éti épiyacavaripahi máiturerehe. Ecutiripa ena amuyana, tacamunuhi vésichayarehi eta leche eta ticaitarecayarehi, taicha vuíchaha táticahini tanicahini eta tinicacareana.

<sup>13</sup> Taicha ena amuyana tiájicanachaha, vuíchaha técharecana, vuíchahavare napanerequenehaimahi eta táurivayare eta náitaresira. Ene ecahehi éti, apaesarichuhi ecaratacavahi eta éhisira eta táuriqueneana.

<sup>14</sup> Énasera ena yátupihi eta nacaravahuirahi, ena nacutihí ena ichanaruuanahi. Téchavanaripa náitucaripa tinerejiuchavanaugh eta táuriqueneana, náepurupa eta tamauriqueneana.

## 6

<sup>1</sup> Núti, nuvaraha ímiyanavayare eta ecajurusiraya eta échemaraivahi tayehe eta juca véhiruhi. Ichananuhénahini tayehe, vaipa ecucutihini ena amuyana. Éhicapaini yátupi eta máimiturapi ema Cristo. Vaipa ecuápechavahíni épanaequenereca eta táinapureanahi iárvahuanahi. Éti, vaipa ecamunuhini viápechahehini vímitucahehini eta éneuchiravayarehi eta epecaturana tímicapacaheyaréni, váhivare viápechavahini vímitucahe eta ecamunuirahi yátupina eta ecasiñavairayarehi me Viya.

<sup>2</sup> Éti ímatipa eta táichararacavahi te ecaicachasinapa, étapa eta táichararacavahi te nanacapa eta navahu te echuti. Ímativarepa tamutu eta vímiturapiana tayehe eta náechepusirayare ena náepenaqueneana, étapa eta ecuñaraqui maitavacacayare.

<sup>3</sup> Tásicha puiti, nímitucaheyare eta apamuri, te máijaracanurichahapucaini ema Viya eta nítupajijiasiravaya, étapa eta ecaravahuiraya.

### *Ecunevahí, machu ínajicava eta véhiruhi*

<sup>4-6</sup> Páureanasamisera ena tínajicavanapuca eta véhiruhi, tichavanayarepuca. Taicha nácani natupiruvahi najacapa ema Jesús, tásicha énévanehi najirica te nasamure eta majacapiravacapa ema Viya, machichanaipa; mávahácaripa ema Espíritu Santo; tacurisamurechavacavarepa eta máechajiriruva ema Viya; náimatiéquenehavarepa eta náuricacarevaya tayehe eta arairuyare avasare, téhesera te nácani náinajicapuca eta náehisirahi, vaipa tátujicacareimahi tiápechavana náeneuchavahini. Taicha etá náinajisiravapa, náepuruipahi ema Machicha ema Viya. Tímicutijircavaripa nacaecahihini éma te namirahu ena achaneana, nápechavahini náetataca te crusu éma.

<sup>7</sup> Nímicutichayare. Eta macamirisirahi ema Viya eta tiquiva, táerapaisiravanehi tamutu eta apaquehe. Jararihi eta apaquehe, tiúrinasarepa eta tasucucureruvana, maicha ema Viya.

<sup>8</sup> Jararihivare eta apana apaquehe, tájina tasucucureruvaina. Itapepairechucha, ijarevare. Ema Viya máijaracayarehi eta táicuñayare, tíjuinapa te yucu táchuchihi.

### *Vahi vínajicavaimahi taicha tatarihi eta vicuchapaquenehi*

<sup>9</sup> Puiti, muracacaha apaesa eta numetasirahehi, nútisera nucasiñavahi eta eyehe eta vahi ínajicavaimahi, eti némunaruanaahi nuparapenaveanahi. Nucasiñavahi eta máijarasiraheya ema Viya eta iúricacarevayare te macuchucuhavipa.

<sup>10</sup> Ema Viya tétavicavahi eta máitauraivahi, váiparinehi máemitisicaimahi eta ecaemataneasiranahi. Étapa tímereuchahehi eta émunasiravacahi ímicatasiravacahivare ena echamurianahi tayehe eta juca véhiruhi. Máimahahi eta ímyianavairahi ecaemataneaca.

<sup>11</sup> Nuvarahavare ímyianavahini eta evapinavairavaca ámutu éti eta ecaemataneasirahi, yátupina ecasiñava mayehe ema Viáquenu, ecuchapaya eta machaviraya.

<sup>12</sup> Váhivare nuvaraha plújuhéna. Ímyianavahi éhica ácuti ena echamurianaini yátupiquenehi eta nacasiñavairahi me Viáquenu, nacamichahi tamutu. Jéhesare, ecuticacasarepa éna eta ejacapiraya eta ícuchihi mayehe ema Viya.

<sup>13-14</sup> Émechava eta acane eta máechajiruvana ema Viya eta máijarasiravahi eta máuricacarevayare ema Abraham. Ánipa máicha: "Yátupiyare eta níjarasiraviyare eta piúricacarevayare, tásicha, níjaracaviyareva eta náichapemurivaya ena piámarié-queneana. Nútijiva nupamicava eta nítauchirayare eta juca néchajiruvana níjararuviyare" máichapa. Ani tacahehi eta máechajiruvana, taicha nájina apanainahini tipamicaimahi éma. Tásicha, émajiva tipamicavayare.

<sup>15</sup> Ema víyarahaini Abraham, ichapemurihi eta macasiñavairahi me Viya, eta macuchapirahi eta máijaranuvanahi ema Viya. Tásicha, tétavicavahi eta máuricacarevahi. Máimahavire ema machicha Isaac énapa ena mámarinaveana.

<sup>16</sup> Tacutihi mácani achane, te maicha eta juramento, majurachahi te mamirahu ema Viya, mavaraha ema Viya mapamicayarehi eta máitauchiraina. Te mácani achane majurachapuca, tájina táeñamavacarehini eta máitauchirayare.

<sup>17-18</sup> Ene macahehi ema Viya, tíjaracavahi eta mapamisiravayarehi máitaucha eta máijarasirahaviyare eta viúricacarevayare. Tipamicavayare, taicha mavaraha vahi véñamavaimahi. Tímaticarehi eta máurivahi ema Viya. Tájina táeñamavacaréna eta vicasiñavairaya muraca eta mayehe, taicha éma vahi máitsivachaimahi eta mapanereruana, váiparinehivare tépiyahirahimahi. Tájina véñamavaimahi eta vicuchapirahi eta máijarasirahaviyare eta vícuchihi.

<sup>19</sup> Eta juca vicuchapaquenehi, étara tétumechahavihi muraca te viáchanevana. Tétavicavayarehi eta vicasiñavaira eta

vipauchirayare ema Viya, taicha mararihiyare ema tímisiapa-haviyare te mávihahi ema Maiya.

<sup>20</sup> Taicha ema Jesús, ema tínapumirauchayarepahi eta máetupirisirayare eta viyanirayarehi, taicha macarichuhi éma ticatuparahahi eta mayaseuchirahaviyare, macutihu ema víyarahaini Melquisedec.

## 7

*Ema Jesús, ema tiyaseurahi eta viyehe, macutihu ema víyarahaini Melquisedec*

<sup>1</sup> Ema maca Melquisedec, émahi maparajuruhi ema Abraham. Taicha acane, te jena año, ema viáchucai Abraham énapa ena masuntarurana téhacacanapa nacanarapa ena réyeana, navarairahi nacuchucuha ena námereruana, émaripa ema máneva Lot, énapa ena machichanaveana. Maitahaca-cavacahisera. Matiarihivare ema apana rey, táquenuhi eta avasare Salem. Émahi ema Melquisedec. Éma, mavanara-hivare ema Viya, tiyujaracarahi éma. Tacahe, te tichavapa te mapena ema Abraham, mácapapa ema Melquisedec, mavara-hapa mayujarauchaya ema Abraham.

<sup>2</sup> Tacahe, ema viáchucai Abraham títsirijicavapa. Máijaracapa ema Melquisedec eta diésmuri tayehe eta maganareruanahi nayehe ena mánarana. Étahi eta mámavahuhi me Viya. Ema Melquisedec, aquenucahi éma tayehe eta avasare ticaijare Salem. Eta máijare, te véchajiriruva ticaijare: “Ema Rey máuriquenehi, tájina táichava tamutu te mávasa”.

<sup>3</sup> Ema maca Melquisedec, eta majurusirahi, vahi táimati-carehini nájahahipuca ena ticachichanahi, nájinavare ma-janeanaina. Váhivare táchacare eta máuchusira étapa eta máepeñirahi. Énerichuvare, nájina ema máitsivainahini ema Melquisedec. Eta matuparahahi, ene macahehi puiti ema Machicha ema Viya, nájina máitsivainahini. Máihecuar-quirehi eta mávacure tiyaseurahi.

<sup>4</sup> Nuvaraha epanerequeneha. Ema maca Melquisedec ticapicahupanahi maicha ema Viya. Eta tacahe, ema viáchucai Abraham máijaracahi eta diésmuri eta magana-reruhi nayehe ena réyeana máitajaruhanahi.

<sup>5</sup> Acane, matiarihihi ema mámariequenéni ema Abraham, ticaijare Leví. Te táchuenepa, matiarihihi ema mámarie-quenéni ema Leví, ticaijare Aarón, maparapehi ema Moisés. Tásiba, ema Moisés manacapa eta vanairipi, tatuparacahi namutu ena mámariequeneana ema Aarón, tiyujaracarahi-nayare éna. Tavanecahi ticobrarecanayare eta diésmuri eta

navachayare ena najaneananarichuhi, mámariéqueneánaini ema Abraham. Nájina tacaitiruinhini.

<sup>6</sup> Émasera ema Melquisedec, vahi mámarinahini ema Leví. Majacapahisera eta diésmuri mayehe ema Abraham, te tamutupa eta mayujarauchirahi éma. Tayanapane tímijachavahipuca ticunachacarepanahi ema Abraham táichavenehi eta máijararuuanahi ema Viya eta mayehe ema Abraham.

<sup>7</sup> Eta tacahe, vimutu vecha víti, mácani tiyujarauchahí ema apana, éma ticunachacarepanahi mayehe mácani mayujarauchaquenehi.

<sup>8</sup> Tacahe, ena apamuriana tiyujaracarähiana tépenanapaipahi, tásihasera namutu ticaitsivanapahi. Émasera ema Melquisedec vahi macaitsivahini. Puiti eta Sagrada Escritura táchajisihahi éma, máichecuaraquire eta máitaresirahi.

<sup>9-10</sup> Émaripa ema Leví énapa namutu ena tiyujaracarähiana mámariéqueneanáinihi, natuparahaichuhi náicuchihi eta náuchusirayare mámariéqueneanayare ema Abraham. Tásiha, tímicutijiricavahi éna apanava navachachahí eta diésmuri ema Melquisedec te jena sache eta mavachachirahi ema Abraham. Énarichuyarehini najacapaya eta diésmuri.

<sup>11</sup> Ena tiyujaracarähiana mámariéqueneanáinihi ema víyarahaini Aarón, éna tímítucanahi ena achaneana eta vanairipiana májureanahi ema víyarahaini Moisés. Váhisera naratahaimahi napamicavaca ena achaneana náitaucha tamutu. Taicha te náitauchapucaini, váipapucaini tacucamunuini ema apana tiyujaracarahi macutiyarehi ema Melquisedec, vaipa mámariéquenénahini ema víyarahaini Aarón.

<sup>12</sup> Émasera ema Viya máechajisihahi ema apana tiyujaracarähiyare matupararuyarehi. Émapa tímehahaviyare eta máitsivachirayare eta viyanihayare mayehe.

<sup>13-14</sup> Jararihi puiti eta apana. Taicha ema Viáquenu Jesús, vahi mámariéquenénahini ema Aarón. Éma, máchucaini ema Judá. Te nataracu namutu ena majaneanaini, nájina émanainahini mayujaracarähihini. Ema Moisés vahi máechajisihahini matiarahiyare ema tiyujaracarähiyare, mámariéquenehi ema Judá. Émasera ema Jesús táchajisihaquenehi eta Sagrada Escritura eta émairayare tiyujaracarähiyare.

<sup>15</sup> Tacahe, vímatiequenehahi yátupi eta máitsivachirapa ema Viya eta viyanihayare eta mayehe, taicha ema arairuyare tiyujaracarahi, tacamuñuhi eta macutirayarehi ema Melquisedec.

<sup>16-17</sup> Taicha tacahehi eta máechajiriruvahí ema Viya, ani macahehi: “Nunerejicavihi píti, piyaseurahiyare. Nutupa-

racavihi péchajirahiyare nayehe ena achaneana. Maitavacayare eta juca pituparaha, picutiyare ema nuvanaraini Melquisedec" macahepa. Tásiha, vímatiequenehahi puiti ema ticatuparahahí ema Jesús táichavenehi eta máitaressirayare maitavacacahi. Vahi étaparacainahíni eta nájahahipuca ema máchucaíni.

18-19 Tacahe, tépahapa eta vanairipiana náehiruinihi ena náinapureana tiyujaracarahaní, étaripa eta vanairipiana manaquiruanahi ema Moisés. Taicha tájina táratahaini tacuchucuhahavihini táichavenehi eta vimáitauchirahini víti. Vahi tacaitecapahavihini me Viya. Puitisera ema arairuhi, tétavicavapa eta macasiñacarévahí éma. Émapa ticaitecapahavihí mayehe ema Viya.

20-22 Ena náinapureana tiyujaracarahaní, tájina eta júramentoínahíni eta nacatuparahairahi. Émasera ema Jesús, ticapi-cahupanahi eta mávacurehi taicha tíjaracavahi ema Viya eta juramento, te matuparacapa ema Machicha. Taicha eta Sagrada Escritura táchajisihahi, ani tacahe: "Ema Viya, váhiquene máitsivachaimahi eta máechajiriruvana. Majurachapa, ánipa macahe: Nunerejicavihi píti, piyaseurahiyare. Nutuparacavihi péchajirahiyare nayehe ena achaneana. Maitavacacayare eta juca pituparaha, picutiyare ema nuvanara Melquisedec" macahepa. Jéhesare ema Jesús, tétavicavahi eta macasiñacarevahí eta máitauchiraya tamutu eta máijararuvanahi ema Viya. Tiúripanahi eta arairu viyanihayare me Viya.

23 Tiuri, eta tayerevahí eta áñoanahi, camurianahi ena tiyujaracarahaní mámariéqueneánaini ema Aarón, taicha ticaitsivanapahi, arairuanapahi éna. Étasera tíchahi ena tépenanapaichucha, vahi náimiyanavahini náitarecahini.

24 Émasera ema maca Jesús, máepenacacahi éma. Nájina nasiapahini máitsivainahini tayehé eta mávacurehi.

25 Tásiha puiti, macarichu éma maratahahi ticatiuchahavihi viti vicasiñanahi éma. Éma, ticaitecapahavihivare me Viya. Maitavacacayarehi eta máechajiu-chirahavihi taicha váiparinehi tépenaequenehahavimahi.

26 Tacahehi puiti eta macatuparahairahi ema Jesús téchajiu-chahaviyare. Tétavicavahi eta vicamunuirahi éma, taicha yátupiquenehí santo, matapiravarehi éma. Tájinavare máimatiyahini macapecaturahini. Váhiquene mácutihini ena pecatumareana eta napaneruana. Puíticha éma mávihahi tayehé eta anuquehe anuma te machacaya ema Viya.

27 Éma, váhivare mácutihini ena apamuriana tiyujaracarahaní. Éna, nacamunuichaha tamutuyarehi sácheana nacapaca eta sárare náijuchaqueneyarehi, tásiha nativayarepa

tiyaseuchavana tayehe eta napecaturaichu. Te tamutupa, tapaenumavapa nayaseucha tayehe eta napecaturana ena achaneana. Émasera ema Jesús, étaheichuhi eta mavachachirahi eta vipecaturana vimutu, tíjaracavainapa eta máepenirahi te crusu.

<sup>28</sup> Ena nani ajairana ticatuparahana tiyujaracarahaniana-yarehi taicha eta vanairipiana, étasera vahi nánasihini te juca apaquehe, náepenaequenehapaichucha eta náematanerepianaini. Émasera ema Jesucristo tiyaseurahiquenehi yátupihi. Eta macatuparahairahi tacachuricahi eta nacatuparahairahi ena nani. Maitavacacahivare eta máechajiúchirahávihi. Taicha ema Viya máichahi eta juramento eta matuparasirahi ema Machicha.

## 8

*Ema Jesús ema vituparahahi téchajichahavíhi viti véhicahi eta arairu viyaníhayarehi*

<sup>1</sup> Tiuri puiti, nuvaraha yátupi ácaicutiara eta juca: Ticunachacarepanahi ema téchajurahi eta viyehe víti. Taicha matiarahi te anuma, téjacahi éma te mayehe trono te mavaure ema Viya.

<sup>2</sup> Ánaqui, eta máitauchihahi eta mávacure tayehe eta yátupi-quenehi Santuario tiávihahi te anuma, máepiyaruhi ema Viya. Vahi táchihini eta náepiyaruhi ena achaneana.

<sup>3</sup> Namutu ena tiyujaracarahaniana, tatuparacahi náimerecayare eta námavahuana étapa eta nanaquiruvana. Éne macahehi ema Jesucristo, tatuparacahi máimerecaya eta mámavahuyarehi, tiúripanahisera éta.

<sup>4</sup> Ena náinapureana tiyujaracarahaniana, nacarichuhi ena ticatuparahahanahi náimerecayarehi eta námavahuana tacamu-nuqueneanahi eta nayujarasirahi eta te Templo te jena Jerusalén. Émasera ema Jesucristo, tájina vahi mácamunuimahi ticamavahu tayehe eta Templo. Taicha éma, anuma eta mayujarasirarehi.

<sup>5</sup> Énasera ena tiyujaracarahaniana te juca apaquehe, eta náemamacasareana te nayujarasirana, étachucha eta tavasihi eta tiávihanahi te anuma. Véchahi eta tavasichucha, taicha ema Viya máemechahi ema víyarahaini Moisés eta yátupiquene Santuário tiávihahi te anuma. Ánipa maicha: “Pépiyacayare eta Santuário tavasiyare picha eta tiávihahi te anuma nímeruvihi te piávihaipa te cerro” macahepa.

<sup>6</sup> Émasera ema Jesús, tiúripanahi eta máematanerepi taicha te anuma eta máechajiúchirahávihi. Éma, téchajurahi tayehe eta arairu matratune ema Viya. Eta arairu matratune, tiúripanahi

eta táinapurehi, taicha tétabicavahí eta viúricacarevayarehi taicha máijaracahi eta máechajiruva ema Viya.

<sup>7</sup> Jéhesare, eta táinapuiru matratune, vahi náitauchaimahi ena achaneana. Taicha te náitauchahipucaini, vahi táchamunuhini máijaracahini eta apána arairu.

<sup>8</sup> Émasera ema Viya, eta máimairahi vahi náitauchahini, tiápechavavarepa eta máechajiriruvahí, ánipa macahe: "Tatiarihiyare eta sáchevayare tépanavayare arairu eta nutratune nayehe ena achaneana israelítana.

<sup>9</sup> Vaipa táchutimahi eta natratunehi nayehe ena náchucanaveanaini te jena sache te nuvecuhainapa te nuvahu, nucuchucavacapa tayehe eta avasare Egípto. Váhisera náitauchahini eta nutratunehi eta nuyehe. Eta tacahe, nujunijiacavacapa.

<sup>10</sup> Eta nutratuneyare nayehe ena nani israelítana te jena sácheyare, nunacachutichayare te nachutiana eta nuvanai-ripiana. Najiricainapa te nasamureana. Jéhevarénapa núti nacaiyaqueneyare. Tásiba, éna, jéhevarénapa nuchichanave-queneanainapa.

<sup>11</sup> Vaipa nácameaimahi ticaimitucasiana nayehe ena nachamuriana, énaripa ena naparapenaveana eta náimatiranuyare. Núti yátupiquenenuhi náquenunuhi. Namutuinapa tímatinuanayare: ena amaperuana, ena ichanaruana, énapa ena ichaviciana.

<sup>12</sup> Énerichuvare nuperdonachavacainapa núti eta napecaturana navainarajivana. Vaipa nécharairicaimahi eta natapiravánaini" macahepa ema Viya.

<sup>13</sup> Tacahe, ema Viya, te máechajisiha eta arairu matratune, tépaharipahi eta táinapurénihi. Éta táemitiaruripahi. Vaipa tasuapacarehini.

## 9

*Eta santuário tiávhaini te Jerusalén, tavasihi eta táimahi eta Santuário tiávhahi te anuma*

<sup>1</sup> Tacahe, eta táinapuiruhi matratune ema Viya nayehe ena nani náinapureana tiyujaracarahaniana, tatiarihihi eta nayehe-repichuhi te tiyujaracana me Viya. Jéhesare, te jena Jerusalén eta távhahi eta santuario nayujarasirare.

<sup>2</sup> Ani tacahehi eta táimahi te náepiyacainapa: Eta tínapuca cuarto ticaijarehi "Lugar Santo". Tacapicahuquenuehi éta. Éta távhahi eta candelero étapa eta mesa távirare eta pan sagrado.

<sup>3</sup> Eta apána cuarto, ticaijarehi "Lugar Santísimo". Éta tétabicavapanapa eta tacapicahuira. Tatiarihihi eta ichapequene cortina.

<sup>4</sup> Te tachacaya eta ichapequene cortina, tatiarihivare eta mesa náijuchirare eta incienso, amairiha oro. Te tajuhe, tatiarihi eta cajune, amairihavare oro, tacaunaiyahi eta márimeana ajureca eta diez mandamiento, étapa eta cajeta amairihavare oro tacaunaiyahi eta maná, étapa eta matsucurupa ema Aarón eta tímarutsicaipahi.

<sup>5</sup> Te táinahu eta cajune, natiarahihi ena apinana ángeleana, ticaijare “querubín”. Eta juca querubín támahi eta majaivaíhi ema Viya. Tásicha, eta napavana táepacuhicahi eta cajune, eta náepusaisirarehi eta iti tavachasarehi eta napecaturana namutu ena achaneana. Jararihivare eta apamuriana tayereruvanainihi eta santuario, váhisera nuvaraha nájuchahini te juca puiti.

<sup>6</sup> Eta tacahehi eta táimahi eta náemamacasareana eta te santuario. Tacahe, tamutu sácheana ena tiyujaracarohana tisiapaparacanahi tayehe eta tínapuca cuarto eta náitauchi-paracahi eta náematanerepiana.

<sup>7</sup> Étasera eta te apajuhe, táetaviuchahi eta tacapicahuahi. Macarichuhi tisiapa ema náquenumuri ena tiyujaracarohana. Étaherichuvare tisiapa te étana año, mámayarepahi eta táitine eta sárareana. Éta tivachachayarehi eta mapecatura ema tisiapahi, étapa eta napecaturana ena achaneana.

<sup>8</sup> Émasera ema Espíritu Santo mavaraha vímatiequenehaya eta juca. Eta cortina, éta tiávimirauchahi eta Lugar Santísimo, vahi táisapahini tisiapaná ena achaneana. Puítisera vísapacarehi víti eta vítecapauchaya ema Viya.

<sup>9</sup> Tamutu eta juca tacamuñuhi vímatiequenehayare. Eta jena náichasareanahi ena nani tiyujaracarohana eta nacamavuirahi, vahi tacanarasínávacahini eta napaneruana ena téneuchavanahi, apaesa tiúriyarepahini eta náitaresirana.

<sup>10</sup> Vahi étaparacainahini tayehe eta náchaneva, taicha eta námavahusana éna, tinicacareanachucha téracarechucha, étapa eta nacaspavahuira te tisiapaná tayehe eta Templo. Eta júcana nayeherepianahi, vahi tímíyanavaimahi. Taicha te tépenapa ema Cristo te crusu, máitsivachahi ema Viya eta vítecapauchirayarehi éma.

### *Tiúripanahi eta yátupiquenéhi Santuário tiávhahí te anuma*

<sup>11</sup> Puítisera, tímerecavapa ema Cristo. Jéhevare éma, yátupiquenéhi tiyujaracarahi eta viyehe. Tétavicavahi eta táuriva eta viáchanevana máicha. Eta Santuario te anuma távhahí eta mayujarasirare, vahi tayehena te juca apaquehe tamauriquenéhi. Te jena, tamutu tiúrihi, tipachinahivare. Tétavicavahi eta tacunachacareva. Tacachuricahi eta santuario nayujarasirare ena apamuriana tiyujaracarohana, náepiyaruchucha ena vicutiqueneana achaneana.

<sup>12</sup> Ema Cristo, jéhevare éma mávihahi tayehe eta yátupiquene Lugar Santísimo te anuma. Vaipa mámavahuhini eta táitine eta sárareana chiqueru, chívanahipucaini. Eta mámavahuhi éma, étaquenepa eta máitine. Étaherichuhi máicha éma. Vimutuhisera viti macuchucureanahi. Tásicha, máitavacacaipa eta vítaresiraya.

<sup>13</sup> Ena nani tiyujaracarahiana náepusasapaicarichaha te náinahu ena nachipejiqueneanahi. Eta náepusasapairuhi, eta táitineana eta toro étapuca eta chívachicha, étapa eta tsimapama tayehe eta esena chiqueru náijureasa. Eta júcana, tépachinachinavacahi eta náqueheana, apaesa táisapacarepa nasiapa tayehe eta Templo.

<sup>14</sup> Étasera eta máitine ema Cristo ema matapiravarequenehi, tétabicavahi eta taitupajijiasiravahi. Tacachuricahi eta náepusasapairuhi ena nani tiyujaracarahiana. Taicha taratahahi tacaepaha tamutu eta vipecaturana, viperdonachacarepa táicha. Tímicutijircavahi tisipacahavihi tamutu eta vianereruنانaini tamaeperajiquenehi, étaripa eta tímicapacahaviyaherehini. Puítisera eta vítaresiraya, émainapa vicaematanacainapa ema yátupiquenehi Viya. Ema Espíritu Santo máetumechahi muraca ema Jesús eta máijarasiravahi tímicapacava te crusu, taicha mavarahahi eta mámavahuyarehi me Viya.

### *Ema Jesucristo, éma yátupiquenehi abogado eta viyehe*

<sup>15</sup> Puíticha ema Cristo, éma yátupiquenehi viyehe abogado, téchajiurucavahihi tayehe eta taequenereruhi matratunehi ema Viya. Eta máepenirahi ema Cristo, mavachacharipahi tamutu eta vipecaturanaini viti máichuhauqueneanahi éma: viti, énapa ena náinapureanaini tijacapanahi eta tainapurénihi matratune ema Viya. Tásicha, yátupihi eta macuchucuirahaviya, máijaracahavi eta vítaresiraya máitavacacayarehi.

<sup>16</sup> Nuvaraha nímicutichinahe: Mácani achane te manaquicahi eta testamento, májuchapa eta mavarairahi máijaracachavacayarehi ena machichanaveana te máepenapapuca. Eta tasuapacarevayarehi, eta ley tacamesaequenehayarehi tacayasesereru te yátupipuca tépenaripa ema achane. Te yátupihi tépenaripahi, eta testamento tisuapacarehi.

<sup>17</sup> Vuíchahasera tasuapacarehini eta testamento, te vuíchahahi tépena ema maca tépiyacahi.

<sup>18</sup> Tacutiquenehi, eta taepriravahi eta tainapuiruhi matratune ema Viya, tacamunupa tépena eta sárareana, apaesa navehaya eta táitine.

<sup>19</sup> Ema víyarahaini Moisés macametarapipa tamutu eta vanairipiana nayehe namutu ena achaneana.

Tacahe, mavehana eta titsi lana máitiapusichapa eta yucuqui, máepusasapaishayarehi eta ítiama, tátineana eta chiquerauna, chívana. Tativa máepusasaca eta libro tiámahi eta vanairipiana. Máepusasacavare ena achaneana náurujiruvanahi.

<sup>20</sup> Tacahe, mametacavacapa éma: “Eta juca ítiama népusaruhehi, eta táicutiara eta íjarasiravahi ítauchayare tamutu eta matratune ema Viya eta eyehe éti” máichavacapa ema Moisés.

<sup>21</sup> Énerichuvare ema víyarahaini Moisés máepusasacavare eta ítiama te tapaja eta santuário étapa tamutu eta náemamacasareana te nayujarasirana.

<sup>22</sup> Taicha tacahehi eta vanairipi: Ticaepusasahayarehi te iti tamutuyaréni eta náemamacasareanahi eta nayujarasirayarehi, náepachiasihayarehi. Taicha te vahi tacuepusaicavahini eta iti, váhivare tacuepahahini eta pecatuana.

### *Eta máitine ema Cristo tacaepaha eta pecatuana*

<sup>23</sup> Tacahe, eta juca náemamacasareanahi ena nani, tacamuñuhi náepusasacayarehi eta nayujarasirayarehi apaesa tapachinavacahini. Eta santuário te Jerusalén náepiyaruhi ena achaneana étapa eta náemamacasareanahi, náicutipaqueneanahi eta tiávihanahi te anuma. Étasera eta Santuário tiávihahi te anuma, tacamuñuhi eta apana iti tasivachaquene, tacachuricayarehi eta iti náepusasaruhí tayehe eta santuário tiávihahi te juca apaquehe.

<sup>24</sup> Ema Jesucristo, tájina máimatiyahini mayujaracahini eta te jena santuário te juca apaquehe. Étaquenehisera masiapa eta mayujarasirayare eta te Santuário tiávihahi te anuma. Puíticha matupihamirauchahi ema Viya eta mayaseuchirahavihi víti.

<sup>25-26</sup> Ema maca tiyujaracarahi te juca apaquehe, áñopahi eta masiapiña tayehe eta téqueneha cuarto Santísimo. Ticamavahupahi eta tátine eta sárare, vahi máitinénarichuhíni éma. Émasera ema Cristo, étaherichuhi eta máepusaisirahi eta máitine. Vahi mápepejiricavahini te áñoana. Te mápepejiricavahini, énerichuhivaréni tiápepejicavahini eta máepenirahi puiti juca táepaniravahi eta apaquehe. Ema Viya mapanerequenehapa eta táchicaracavayarehi tamutu. Te máimahapa tiuri, mavanecapa ema Machicha te juca apaquehe. Tímitecahi eta macaepahairayarehi eta pecatu, máijarasiravaripa eta máepenirayarehi. Étaherichuhi máicha.

<sup>27</sup> Víti achaneana, eta víchararacavahi eta vítaresirahi, étaherichuhi eta vépeniraya vimutu. Te táchicenepa, járajapainapa eta viyaseserehiyare.

28 Énerichuvare, eta máitaresirahi ema Cristo, étaherichuhi eta máepenirahi te crusu eta macaepahairayare eta vipecaturana viyehe viti camuriqueneana achaneana. Yátupisera tiápechavaya tímerecava. Váipasera étaimahi tímiteca mavachachaya eta pecatuana. Eta tímitecayare éma, tépanahaviyarepa viti véhicanahi vicuchapanahi éma eta macuchucuirahaviyarehi.

## 10

*Eta máitine máepusairuhi ema Cristo, tacarichuhi tarataha tépachiacahaviyare*

<sup>1</sup> Eta mavanairipiana ema Moisés, étachucha táicutiarahi eta arairuyarehi viyanihayare me Viya, eta tiúrichahaviyarehi. Ticutihi eta tacuna eta yucuqui. Vahi tánasihini máitavacacainahini eta mavanairipiana, taicha vahi táurichahini ena achaneana nácani tivarahanahi ticaijuheana ema Viya, taicha váhivare nasamavahini eta náuchucuirahi, tayanapane nápepejircavahini te áñoana eta nacapasirahi eta sárareana.

<sup>2</sup> Te yátupinahini táurichavacahini eta náichirahi eta nayeherepi, vahi nacuapepejircavahini nacamavahuhini ena tiyujaracarahanahina, énerichuvare ena achaneana tisamavanaripahini eta náuchucuirahia.

<sup>3</sup> Taicha tacamuñuhi nápechava te áñoana eta nacapasirahi eta sárareana, taicha tiápechavana ticapecaturanahia. Étaripa eta taepeñiranahia eta sárareana támemecharairicavaca eta nacapecaiturairaripa.

<sup>4</sup> Taicha eta táitineana eta toro, étapa eta chivu, yátupiquenehi váhiquene táratahaimahi tacaepaha eta pecatuana.

<sup>5</sup> Étasera te tiúcupaicayareipahi te juca apaquehe ema Cristo, ánipa macahe mayehe ema Maiya: "Píti Tata, vahi pácamunu eta nucamavahuhini nunaquicavahipucaini eta piyehe, táitinehi eta sárareana. Píti píjaracanuhi eta juca náquehehi. Váhisera támepururecavaimahi eta píjarasiranuhi. Eta náquehe tisuapaviyare jácani pivanesiranuya.

<sup>6</sup> Váipavare pácamunu eta nacamavahira ena achaneana eta sárareana, náijuchahini te pimirahu, támicapacahini eta tacaepahairayarehi eta pecatuana.

<sup>7</sup> Núti, tímitecanuhi puiti nítauchayare tamutu eta pivara-haqueñeanayare eta nuyehe, piti Tata. Nusuapaviyare te tamutu eta pituparasiranuhi tacajuquenehi eta te Sagrada Escritura" macahepa.

<sup>8</sup> Tiuri puiti, nuvaraha ecaicutiarayare eta vaipa mácamuhnini ema Viya, váipavare máurica nácamavahuhini eta sárare náijuchahipucaini ena achaneana, navarairahi támepahayare

eta napecaturana, tayanapane nayeherepichucha eta náitauchirahi eta vanairipiana.

<sup>9</sup> Énerichuvare, nuvaraha epanerechavare eta juca máechajiruva ema Cristo: “Tímitecanuhi puiti nítauchayare tamutu eta pivarahaqueneanayare, piti Tata”. Eta tacahe, vímatiequenehahi vaipa tácamunuhini eta táinapure nayujarasirahi ena achaneana. Taicha ema Viya máitsivachahi eta apana, arairupa, taicha ema Cristo macarichuhi máitauchahi eta mavarahaqueneana ema Maiya.

<sup>10</sup> Jéhevare, ema Viya tépachiacahaviripa máichavenehi ema Cristo, eta masuapirohi máitauchirahi eta mavarahaqueneana ema Maiya, máijararecahi eta máquehe eta máepeninahavihi. Étaherichuhi máicha, vahi mápepejircavahini.

<sup>11</sup> Namutu ena nani tiyujaracarahania vahi nanaracahini. Tamutuhi sácheana ticamesavana nanacahi eta námavahuana. Vahi taechuquihahini eta náichirahi eta juca. Tájinaserá váhiquene tacaepahahini eta pecatuana.

<sup>12</sup> Émasera ema Jesucristo étaherichuhi eta máichirahi. Váhiquene mápepejircavahini. Tacahe, téjacaripahi te mavaure ema Viya.

<sup>13</sup> Énerichuvare puiti eta máejasiraipahi, macuchapavacaripa eta macaepuyusiraya ema Viya te mamirahu ena taticianacanahi éma.

<sup>14</sup> Taicha eta máepenirahi, eta mámavahuhi me Viya eta máquehe. Tétavicavainehi eta tajacapacarevahí me Viya eta máepachiasihahaviyarehi viti máichuhaqueneanahí. Váhiquene tacamunuhini mápepejircavahini.

<sup>15</sup> Ema Espíritu Santo, étarichuhivare tacutihi eta máechajiruvahí, titametacahavihi.

<sup>16</sup> Ani macahehi: “Eta nutratuneyare arairu nayehe ena nani te jena sácheyare, níjaracavayare nunacasamurechayare te nasamureana eta nuvanairipiana. Najiricainapa te napanereruana”.

<sup>17</sup> Ánivare macahe: “Yátupina eta nucaepahairayare eta napecaturana. Vaipa néchaimahi eta natapiravanaini étapa eta navainarajivanaini” macahepa.

<sup>18</sup> Tacahe, nuvaraha ecaicutiara eta juca: Te yátupihi táepahairahi eta pecatuana eta mámavahuhi, vaipa tácame-sahini tápepejircavahini nacamavahuhini ena apamuriana.

*Vicasíñavayare eta vicaijuheiraya ema Viya*

<sup>19</sup> Tacahe, nuparapenaveana, vácasiñava yátupi eta vítecapauchirayare ema Viya tayehe eta mávihahi Santísimo, táchavenehi eta máepachiasirahavihi te máitine ema Jesucristo.

20 Véhicayare eta juca arairu achene mavejiaruhi, yátupi eta tacaijuhérahi me Viya. Tájinapa táchemirauchahavihini taicha mavejiacahi tamutu ema Cristo, eta máepenirahi te crusu.

21 Tacahe éma, yátupiquene tiyujaracarahi eta viyehe taicha émaquenehi téchahi namutu ena machichanaveana ema Viya.

22 Eta tacahe, tatupiruvayarehi eta visamureana eta vicaijuhéraya ema Viya. Vácasíñavaini eta mayehe, vahi véñiamavaimahi taicha éma masipacaripahi eta visamureana apaesa tacuija vitapiravaina tayehe eta vipecaturana. Tájinapa eta táchemirauchahavihini eta vipecaturana, tímicutijircavahi vicavahini eta te tapachinaquene une.

23 Eta tacahe, vímiyanava vétumechava eta véhisirahi. Vahi viyacujimahi. Yátupina eta vicuchapira eta vícuchihi taicha ema Viya máitauchayare tamutu eta máijararuvahí eti viyehe.

24 Puiti vétumechavayare vímicatajiricacayare eta tápajusiravaina eta vémunaraivanaya. Vímitucacayareva eti víchirayare eti táuriqueneana.

25 Váhivare viyacujimahi eti viúrujisiravana. Vahi ecucutihini ena vichamuriana, tinerejicavanahi mayanarahahanahi te viúrujicava. Vétumejiricacayaresera, tavetijipa puiti eti vímairapa eti tánehirapa eti masacheraya ema Viáquenu eti machavirayare.

26 Taicha te ímyanavaichuchchapuca icha eti pecatuana, tayanapanehi ímatiripahi puiti eti yátupiqueneana, eti émepururecaripahi ema Cristo eti ímicasirahi táichavenehi eti epecaturana. Páurehesami, taicha nájina apanainahini ecasiñahini.

27 Ena nani náemepururecaripahi ema Cristo, téavicavahi eti tamuracavaya eti náicuñayare. Tisiapanayare eti táíñehiquene yucu táijurequene. Eta juca eti náicuchihi návhayahare ena ticatianacanahi ema Viya.

28 Tacutíhi acane eti macaicuñaira mácani téjecapavahi tayehe eti mavanairipiana ema Moisés. Te natarihihipuca apinanahí, mapananahipuca ena testigoanahí, tímahanahí eti máejecapiravahí, tatuparacahi nacapacavaneyarehi ena tuparairucana. Vahi tijapanucaremahi éma.

29 Tásiba, téavicava muraca eti náicuñayare ena témepururecanahi ema Machicha ema Viya, ¿masi? Taicha náemepururecahivare eti máitine máepusairuhi, nacaecahivare ema Espíritu Santo, náemepururecahivare eti máemunasiravacahi ema Viya. Váhivare návarahahi náimati eti máitine máepusairuhi, étara vivachahi eti majacapirahaviyarehi ema Viya.

30 Vimutuhi vecha eti máechajiriruvahí ema Viáquenu, ani macahehi: “Núti tituparacanu nícuñasiravacayare.

Nútichucha némecharecavacayare éna". Tásicha, ánivare macahehi: "Ticayaserehianayare ena achaneana te numirahu".

<sup>31</sup> Tipicacarequenéhi eta náicuñayare ena témpururecanahi te mamirahu ema Viya, tamutuquene máimaha!

<sup>32</sup> Németeacasera ímiyanavayare éti tauri eta éhisirahi. Écharichuhi eta ítaresirahi cape juca, te épanavainapa eta ejacapirahi eta juca tajarahiquene máechajiriruva ema Viya. Ichapemurihi eta ecatajivairahi naicha ena tictadianacaheanahi. Ecamichahisera éti.

<sup>33</sup> Etiarihihi éti ecaumehacasihí ecae hanahí te namirahu ena achaneana. Etiarihihivare éti ímicatacanahí tayehe eta náichavaquen evanahí ena ticaehananahí.

<sup>34</sup> Ejapanuhivare nácani ticaeratanahí te cárcel. Tacutiquene ecurisamurechavachucha eta naverejisiraheanahí eta ímahaqueneana, taicha échahi éti tatiarihihi eti ímahaqueneanayarehi te anuma. Tétavicavahi tiúripanahí tayehe, máitavacacahi éta.

<sup>35</sup> Tásicha puiti, vahi ecuyacujihini. Étumechavasera eta ímitusirahi eta máechajiriruva ema Viya. Éta tiúrichaheyare, ejacapayare eta mavachachiraheyare ichapequeneyá.

<sup>36</sup> Ecayeheschahavare paciencia. Ímiyanavavare ítaucha eta mavarahaquenéhi ema Viya, tásicha yátupina ejacapainapa eti ícuchi eta mayehe.

<sup>37</sup> Taicha eta Sagrada Escritura, ani tacahehi: "Vaipa máyeremahí márajapainapa ema Cristo ema vicuchapaquenéhi".

<sup>38</sup> "Nácani natupiruvahi eta nasamureana, ticasíñanuanya rehi eta náitaresirahi. Énasera nácani tichavacuejechavanahí, nucaerajicavacayare táicha" tacahepa.

<sup>39</sup> Vítisera vahi vácutimahi ena tichavacuejechavanahí, énajivaya tímitaequenehavanayare. Vítisera viti vímiyanavanahí eta vicasíñavaira me Viya, vicuchucuhayarehi eta viáchanevana táicha.

## 11

Tétavicavaya eta viúricacareva te vicasíñavahi mayehe ema Viya eta vítaresira

<sup>1</sup> Te yátupi visuapa eta máechajiriruva ema Viya, vicasíñayare éma, vicasíñavavare eta mayehe eta máitauchirayare tamutu eta máijararuvanahí, tayanapané vuíchaha vímahaimahí.

<sup>2</sup> Ena viáchucanaveanaini, tétavicavahi eta nasuapa jiraivahi. Macunachavacahi ema Viya taicha eta nasuapajiraivahi.

<sup>3</sup> Tacutiquene, te visuapa eta máechajiriruva ema Viya, vímatiequeneha eta máepiyasirahi acane eta juca apauehe, tájinarichahasera eta táimahacarehini. Visuapahi tamutuhi máitaucha eta mapanereruhi, máetupirisirahi tamutu eta vímahaqueneanahi puiti.

<sup>4</sup> Émaripa ema víyarahaini Abel, eta masuapajiraivahi mayehe ema Viya, tétavicavahi eta tajacapacarevahi eta mámavahuhi mayehe ema Viya, tacachuricahi eta mámavahuhi ema maparape Caín. Tásicha, ema Viya macametarapihi eta majacapacarevahi ema Abel. Puíticha, májinaripahinéni, ánaquiasparipahi eta máepenirahi, tanasihisera eta tacunachacareva eta masuapajiraivahi.

<sup>5</sup> Étapa eta masuapajiraivahivare ema víyarahaini Enoc, vahi máepenanumahini te juca apauehe eta mayaniraya te anuma. Tamutuhi eta máquehe mámahi tayehe eta apava vítaresira, eta mámirahi ema Viya. Eta Sagrada Escritura táchajisiyahahí etá macurisamurechirahi ema Viya. Táitusiava, mámapa éma.

<sup>6</sup> Tásihasera víti, te tájinahí etá visuapajiraivainahini me Viya, váiparinehi vicurisamurechaimahi éma. Eta vicaiju-heiraya éma, tativayarehi tacamunu yátupina etá vicasíñavaira mayehe, etá majacapirahaviya, viúricacareyare máicha.

<sup>7</sup> Émaripa ema víyarahaini Noé, ticasíñavahi me Viya. Tásicha, tijacapacarepa. Taicha masuapahi etá mavanecasivahi máepiyasirayarehi etá ichapequene pacure, etá macuchucuiyavayarehi éma, énapa ena machichanaveana tayehe etá ichapequene une. Tájinaichahanéni ecutiararenahini etá taquivairayarehi. Máichuhavacavarepa ena apamuri-aná achaneana nasiapavare. Ticaicuñanapaserá, taicha etá namasuapirahi.

<sup>8</sup> Émapa ema víyarahaini Abraham, masuapahivare etá máichuirahi ema Viya, máijarasirayare etá apava apauehe mávasayarehi. Tacahe, ema Abraham tiúchucapa te mávasaini, váhinéni máimatihini távihapuca etá macaijuheyarehi. Ticasíñavahisera me Viya etá mámirahi.

<sup>9</sup> Eta máitecapirahi, tímiyanava etá macasiñavairahi me Viya. Manasipa macavasahi etá apauehe máijararuhi ema Viya, tayanapane vuíchaha mayehenahí etá apauehe. Tájinavare mapenainahini. Cárpachucha etá mapenahi. (Ema machicha Isaac, ene macahehi etá máitaresirahi, émapa ema mámari Jacob. Taicha éna, énerichuvare natuparacahi etá juca apauehe návasayarehi.)

<sup>10</sup> Émasera ema Abraham, vahi máeñamavahini. Yátupihi etá macasiñavairahi, ticuchapavaichucha etá máijarasirayare

ema Viya eta mávasayare máepahacacayarehi eta tiásihaqueñeyarehi te mavahuana ema Viya, máetupiriruhi tamutu.

<sup>11</sup> Ésuripa, esu Sara ticasíñavahivare mayehe ema Viya, máitauchayarehi eta máijarasirava eta sucachichairaya, ichavicachicharipahinéni. Macheruhivare ésu. Máijaracahisera ema Viya eta suchicha taicha eta susuapirohi eta máitauchirayare ema Viya tamutu eta máijararuwanahi eta suyehe.

<sup>12</sup> Tacahe, ema Abraham ichavicachicharipahivare, mapaenumavapa ticachicha. Tásiha, tiúchucanapa ena camuriqueneana mámariéqueneana. ¡Tétavicavahi eta nasimutuvahi! ¡Vaipa natupachacarehini!

<sup>13-14</sup> Tacahe, namutu ena nani néchajisihaqueneana, tímiyanavaña etá nasuapirohi ema Viya tamutu etá náitaresiranahi. Tétavicavahi etá nacasiñavairahi etá máitauchiraya etá máijararuwanahi. Te navapureana, náimahapa etá návasaquene-yarehi. Tásiha, vahi náetupiricavahini etá nanasirayare te juca apaquehe. Navarahaipahi náitecapauchavaneyarehi etá arairu avasare natanujiriruhi.

<sup>15</sup> Éta tímicaecherachahi vahi nacatiequenehahini etá apaquehe návinénihi, taicha vahi náechajisihahini nachavahini.

<sup>16</sup> Natanucahisera etá arairu apaquehe tiúripanahi, etá tiávihahi te anuma. Eta tacahe, tétavicavahi etá máurisamurevahí ema Viya etá nayehe, táichavenehi etá nacasiñavairahi etá mayehe éma. Taicha máicuchavacahí etá arairu návasa-yarehi, émairahi nacaiyaquenehi éma.

<sup>17</sup> Apanavare etá máimerechirahi ema Abraham etá masuapajiraivahi, te ticavanahipa etá macapasirayarehi ema machicha Isaac, máijuchirayarehi etá macamavahuiraya me Viya. Vahi macatiequenehahini ema émanaracavahi machicha. Taicha yátupihi etá masuapirohi ema Viya etá máechajiriruva, ani macahehi:

<sup>18</sup> “Ema pichicha Isaac, níjaracayare ena camuriqueneana mámariéqueneanayare”.

<sup>19</sup> Taicha ema Abraham máimatihi etá tamutuirahi máituruequeneha ema Viya. Maratahahi macaecheputa ema Isaac te táequenepa etá máepenirahi. Téhesera te macapacayarepáini ema machicha, ema Viya téchajicapa. Vaipa másapahini etá macapasirayarehi, taicha máimahapa yátupihi etá masuapajirairavahi ema Abraham. Tásiha, tímicutijiricavahini máechepurénahini ema amaperu Isaac.

<sup>20</sup> Émapa ema Isaac, yátupihivare etá macasiñavairahi me Viya etá máitauchirayare etá máechajiriruvana. Te ichavica, mabendiciónchapa ema machicha Jacob émapa ema ma-

parape Esaú, mavarairahi najacapayare eta táurinaqueneana máijararuayanaya ema Viya.

<sup>21</sup> Émaripa ema Jacob, yátupihivare eta macasiñavairahi me Viya. Te tiánehipa eta máepenirayarehi, énerichuvare mabendiciónchapa ena apinana machichanaveana ema José, mavarairahi najacapayarehi eta náicuchiana. Te titapiricapa tamutu, téneuchavapa me Viya, ticayupaicaripa eta te mayupairiqui.

<sup>22</sup> Émapa ema José, te tiánehipa eta máepenirayarehi, macaechajiriruvapa eta náuchusirayare ena israelítana tayehe eta apaquehe Egipto, nayanirayare te apaquehe náicuchihi. Eta macasiñavairahi mayehe ema Viya, macavanairipipa eta náunasirayarehi eta máperana éma, tásicha, námayarehi te náuchucapa.

<sup>23</sup> Énerichu eta nasuapajiraivahi ena ticachichanahi ema Moisés, ticasíñavanahí mayehe ema Viya. Vahi napicahini eta mavanairipiana ema rey eta nacapapajisirayarehi ena amuyana ajairana. Eta náimairahi eta máurinavahi ema amuya, nayumurucapa éma. Mapana caje eta nayumurujirisirahi.

<sup>24</sup> Tásicha, náitucahi eta sucajurusirahi esu esena rícoquenehi, taicha ésu, machichahi ema rey.

Tacahe, ema Moisés, te ichanarupa énerichuvare tisuapajirahíhi. Vahi macatieuquenehahini eta majunijasirayarehi esu ticajurucahi.

<sup>25</sup> Váhivare mapicaracahini eta macatajivairayarehi eta macachanerayare ena majaneanana machaneranahi ema Viya. Vahi tavayuacahini jácani tájiparacana pecatuanahi te apaquehe.

<sup>26</sup> Ticasíñavaipahi éma eta tatiarihirayare eta máimahaquenayare táitsivanayare eta macatajivairaya táichavenehi eta macatiuchirahí ena machamuriana, tacutihi eta macatiuchirahavihi víti ema Cristo. Tájinahinéni mácamunuhini eta táimahaquenehi tayehe eta avasare Egipto.

<sup>27</sup> Táichavenehivare eta masuapajiraivahi ema Moisés, vahi mapicaracahini eta masemirayare ema rey tayehe eta Egipto eta macuchucuiravaca, mámavacahi ena machamuriana israelítana. Tétumechavarichucha taicha ticasíñavahi eta majaneasiravacaya ema Viya, tayanapane máimahasi ema Viya.

<sup>28</sup> Eta masuapajiraivahi ema Moisés, máitauchapa eta mavanairipi ema Viya. Mavanecavaca ena machamuriana nacapacayare eta uvesachicha, nátsiquiriacaya eta iti te tapaja eta napenana, apaesa vahi macuesirujicavaca ema

ángelo ema tiámayarehi eta náepenira ena náechavimuri te jácani peti.

<sup>29</sup> Énaripa ena machumariana ema Moisés, eta nasuapajiraivahi, naratahahi nánueca eta ichape Mar Titsi. Témunahiricavahi tiájiji te túpiricuha eta nayanihayarepahi. Tásicha, ena masuntarurana ema rey te Egipto, navarahavarepa tiánuecana. Tichavapasera eta une. Téricanapa namutu.

<sup>30</sup> Táichavenehivare eta nasuapajiraivahi ena israelítana, tiáquipaicavapa naicha eta tayuchamarana eta avasare Jericó, te jena siétequenepa sache eta návicuruarasirahi eta avasare.

<sup>31</sup> Ésuripa esu Rahab túhusini, eta susuapajiraivahi, vahi suépenahini te tépenaracanapa ena masuapajirairahanahi. Taicha ésu sucatiuchapa ena vanairucana me Josué.

<sup>32</sup> Nuvarahahineni numetacahe tamutu eta nasuapajiraivanahi ena apamuriana: ema víyarahaini Gedeón, ema víyarahaini Barac, ema víyarahaini Sansón, ema víyarahaini Jefté, ema víyarahaini David, ema víyarahaini Samuel, énapa ena víyarahaini profetanaini. Nararihivare ena apamuriana, tétavicavahivare eta nacasiñavairahi mayehe ema Viya. Váhisera nunaca támputu te juca eta náijareana.

<sup>33</sup> Eta nasuapajiraivahi éna, nararihihi ena titahacanapahi ena nánarana te avasareana. Nararihihi ena apamuriana aquenucanahí, tatupiruhi eta nagobernachirahi eta návasana. Ema Viya, eta majaneasiravaca ena apamuriana, máeratajacachavacahi eta tajacana eta táiñehiqueneana sárateana.

<sup>34</sup> Ena apamuriana, macaemahainehivare eta táijurequene yucu te jórnu. Ena apamuriana, macuchucuhavacahi te navaraha náechatinucavacayarehi ena nánarana. Nararihivare ena matumerahanahi, máetumechavacahisera eta nacaemataneasirahi éma. Ena apamuriana, tétavicavapa eta náitupajijiasiravapahi tayehe eta guerra, náitahavacapaipa eta ichapequeneana ejército ena nánaranahí.

<sup>35</sup> Natarihivare ena esenana, eta nasuapajiraivahi, mápechava máimichava ema Viya titarecana ena najaneananaini náepenaqueneanahí. Natarihivare ena apamuriana náemépenahi eta nacatajivirasamihi. Nacamichahisera tamutu taicha eta nasuapajiraivahi, namavarairahi náinajiacahini ema Viya, navarairahivare náimahayarehi eta táuricacarequene eta náitaresirayare te náechepucapa.

<sup>36</sup> Natarihivare ena apamuriana, ichapemurihi eta nacaecahirasamihi, ticaestanahivare, támmitiacavacahivare te cadena tayehe eta cárcel te nacaerataiyapahi.

<sup>37</sup> Ena apamuriana, natupisiruanapahi te márjahiana eta nacapasirapahi ena achaneana. Ena achaneana, eta návarairahi náiminajicayarehi eta náehisirahi ema Viya,

nayuchatihecavare. Ena apamuriana náechatinucavacapahi te espada. Napanajiricavaca ena apamuriana, náimijunava-cavarepa te napenana. Tiyananapa témostajiricavanapaipa. Tépacuchavanapa te taparumachichhana eta sárareana eta náechuriasirapa eta nacamuirihauquene. Tájinapa naviyavapahini taicha eta napaurevavacapaipa.

<sup>38</sup> Ena nani páureanasamí, ichape eta napicauchaca-revainihi. Vaipa náuriyahini eta najunanairisirahi te mávapahiana apaquehe eta tataracuana eta máriana, nacapenajuechapahi eta enurujuheana.

<sup>39</sup> Jéhesare, namutu ena nani néchajisihaqueneanahi, ticata-jivanahi eta náitaresirahi. Majacapavacaipahi ema Viya táichavenehi eta nasuapajiraivanahi. Vúíchahasera náijahúchavahini nacaijaracasihini eta náicuchianahi me Viya.

<sup>40</sup> Taicha mavarahahi éma tihetamurichahaviyarepa viti véquenehanahi visuapanahi ema Jesús énapa namutu éna. Vicuticacayarepa eta viúricacarevayare vimutu.

## 12

*Vicutiyare ema Jesús eta macamichirahi tamutu*

<sup>1</sup> Puíticha víti apanavare vicamichayare tamutu eta vicatajivairana, vácutivaca eta nacamichira ena nani náinapureanahi téhicanahi ema Viya. Taicha puiti éna tímararacahavianahi víti tájahapuca táicharacavahi eta vipaisirahi víti. Eta tacahe, tituparacahavi vínjacayarehi eta táitiasirahavihi eta tájiparacana, tiámaparaaurahiana tayehe eta pecatuana. Tacahe, vicamichayare tamutu, táurivaya eta vicaematanearahí ema Viya, apaesia vijacapa eta vícuchihi.

<sup>2</sup> Vicutiyareva ema Viáquenu Jesús. Éma, tímitucahavihi eta véhiruhi, éma tínapuisinahavihivare eta masuapajiraivahi. Tayanapane ichape eta matsirihahi te máimahapa eta macatajivairayare eta macaetatairayare te crusu, vahi machavacue-jechovahini. Tétumechavahisera taicha máechahí éma tatiar-ihíhi eta táitsivayarehi. Tétavicavahi eta máurisamureva eta máejasirahi te mayehe trono te mavaure ema Maiya.

<sup>3</sup> Puíticha éta, epanerequenehayare éhicayareva eta macamichirahi ema Jesús tamutu eta macatajivairahi naicha ena tictorianacanahi. Ene ecaheyare éti, vahi ecuyacujihini, étumechavayaresera eta éhisirahi éma.

<sup>4</sup> Táitaurevaquene éti, tájinaichaha ímahahini ecatajivahini táimicapacahehipucaini eta ínajiasiraipa eta tájiparacana te juca apaquehe pecatupaire.

<sup>5</sup> Vahi ecuemitisica eta máemunasirahehi ema Viya te jácani máemecharesiraheana táichavenehi eta machichaheirahi. Taicha ani tacahehi eta Sagrada Escritura: “Piti nuchicha,

vahi picueñamava jácani máemecharesiraviana ema Viya, mavarairahi máetupiricayare eta pipanereruana. Váhivare picuinajicava tayehe eta maconsejachiraviana.

<sup>6</sup> Taicha éma, máemecharecayarehi nácani máemunaruahanahi machichanaveanahi" tacahela.

<sup>7</sup> Tacahela, ecamichayare éti jácani máemecharesiraheyare ema Viya táichavenehi eta máemunasirahehi eti machichanaveana. Tácuti mácani achane, te matiarihi ema machicha, tímerecavahi eta tacaiyairahi eta mapena eta máemecharesirahavi ema machicha, mavarairahi máetupiricayare eta mapanereruana.

<sup>8</sup> Yátupihi eta máemecharesirahavi ema Viya vimutu viti machichanaveana. Téhesera te tacuija ímaha eta máemecharesiraheana éma, máimerecaripa éma vahi yátupinahini machíchahénahíni.

<sup>9</sup> Tacutihí eta vijurusirahí víti te amuyahavirichaha. Témecharecahavihi ena ticachichahaviana, visuapavacapa táicha. Tásiba, tаветijipa eta visuapirayarehi ema Tata Vicauyaquenehi apaesa éma tíjaracahaviyarehi eta táurivayarehi eta vítaresiraya.

<sup>10</sup> Ena ticachichahaviana, ánipirichu eta náimitusirahavihi jácani eta navarairahi éna viúriyarehi nayehe ena achaneana. Émasera ema Viya, tiúripanahi eta vímitucasivahi mayehe. Éta tiápajucava tiúrichahavyare. Tépachinachahavyarehivare éta. Mavarahahi vicutiyarehi eta masantuvahi éma.

<sup>11</sup> Jéhevare, te tatarihipuca eta vicaemecharahirana, vahi viúrisamurémahi táicha. Ticatihi visama. Téhesera te vétupiricava táicha, téavicavayarehi eta viúricacarevaya te visamureana taicha tatupiruhi eta vítaresira.

*Téavicava tavarahacareva te visama eta máechajiriruva ema Viya*

<sup>12</sup> Tacahela, nuprapenaveana, nutuparacahe étumechacaca nácani nayacujihipuca. Ímicatacaca eta etupihaira muraca eta éhisirahi.

<sup>13</sup> Énerichuvare eta ecaijuheira eta me Viya, etanucayare tatupiruina eta ecaijuheira eta me Viya, etanucayare etupiruina eta eyanirayare. Vahi ecuepiñuñuica, machu náevejuca ena matumerahana ena téhicaheanahi te équene. Táuri eta iámiracacaina, apaesa nacaravahuyare náetupirica eta napanereruana, náetumechavavare énajiva.

<sup>14</sup> Tacuijavare ecuichiravainahi nayehe namutu ena achaneana. Yátupina eta epachinavaina te esamureana étapa eta iúriva eta ítaresirana. Taicha te vahi tiúrihi eta ítaresirana, vahi eratahaimahi ítecapaucha ema Viáquenu.

<sup>15</sup> Ejaneacavaicha yátupina, machu etiarihipuca eyacujihi, tásiha émepurureca eta máimicatasirahe ema Viya. Tacuija eta ecuimipanajicava eta esemirana. Machu tapareacavaca ena echamuriana eta evainarajivana, tacuti jácani sucureca máurirahana, tapareacayare eta apuna sucureca táurinaquenehi, táimicapacapa.

<sup>16</sup> Nacuijavare te etaracu nacuveha esu apuna esena. Nacuija nacuepuru jácani tipicauchacareanahi. Vahi ecu-cutí ema achane ticaijare Esaú. Eta mavarairahi tíjahúchava tinica, máijararecpa eta máicuchinihi mayehenihi, taicha éma, máechavihi ema maparape.

<sup>17</sup> Écharichuhi éti, te taequenepa, te mavarahainipa majacapa eta mayehe bendición ema maiya, vaipa majacapacarehini, mametainipa tíyahahi. Vahi maratahahini ticajimuyacahini ema maiya.

<sup>18</sup> Éti, tájina étaparacaina eta napisirahi ichapequenehi ena achaneana israelítana, acane te náitecapauchapa eta cerro Sinaí. Eta jara cerro, tatiarihihi eta yucu timuruhi te tápusi. Énerichuvare te távihahi eta timapicuquenehi, távihahivare eta táñehiquene emarere.

<sup>19</sup> Muracaquene eta machuja ema ángele. Muracavare eta mahu ema Viya eta máechajisiravacahi éna. Ichapequenehi eta napisirahi ena tisamanahi. Eta tacahe, tiyaseserecanapa vaipa macuechajicavacahini.

<sup>20</sup> Eta napicacarasiravahi, navaraha tichavacuejechavana. Ichapequenehi eta tapicahucareva eta cerro, taicha tatiarihihi eta muraca vanairipi, ani tacahehi: “Ecapaca nácani achane, jácanivare sárare tiápanapuca te juca cerro. Ecapacavaneyarehi te mārijahi, te váhipuca ticayuvarayarehi te lanza” tacahepa.

<sup>21</sup> Tacahe, téavicavahi eta táñehiva, émaripa ema Moisés ani macahehi: “Nuyayacarenecha eta nupisirahi” macahepa. Nuparapenaveana, numetacahe: Tájina étaparacaina eyehe tamutu eta juca tipicacareanahi.

<sup>22</sup> Étisera tachichaheanapa puiti eta mávasa ema Viya Vicaiyaquene, ticaijare Arairu Jerusalén\*, eta távihahi eta cerro Sión te anuma, te náurujisihavahi ena camuriqueneana ángeleana eta najirauchirahi ema Viya.

<sup>23</sup> Éti esiapapa eta nasimutuva ena ecutiqueneanahi machichanaveanahi ema Viya. Ecajucunavare eta nalista. Natiarihipa ánaqui eta náchanevana ena machichanaveana nápenaqueneana. Natupiruhi eta

---

\* **12:22** Te pivaraha pecha eta apuna tayehe eta Arairu Jerusalén, pitanuca te libro Apocalipsis 21.2-27 etapa 22.1-5.

náitaresirahi. Tipachinavaqueneanaripahi puiti, sántohivare. Matiarihivare ema Viya, yátupiquenehi Juese viyehe vimutu víti.

<sup>24</sup> Matiarihivare ema Jesús ema tiyaseurahiquene eta viyehe. É mahi ema tiámahi eta arairu matratune ema Viya. É maripa máepusaicapa eta maitine tasipahacahaviyarehi, apaesa vijacapacareyarehi me Maiya. Eta maitine ticunacha-carepanahi tayehe eta maitine ema víyarahaini Abel.

<sup>25</sup> Eta tacahe, échapavaicha éti. Vahi ecuepuru eta máichuarapianahi ema Jesucristo. Machu ácuti ena tépuuanahi eta mavanairipiana ema Viya, máimiturapianahi ema Moisés. Étapa tímicoñacavacahi éna. Vivetijinapapuca víti eta vícuñayare, te vicaepaquecupuca eta máichuarapiana puiti ema Viáquenu, taicha éma tiásihahi te machacaya ema Viya te anuma.

<sup>26</sup> Taicha eta acane, eta mahu ema Viya, tétavicava eta tamuracava. Tiyayacarehi taicha eta apaquehe. Puítisera, ani macahehi éma: “Étaherineyare tiyayacare nicha eta apaquehe. Váhisera tácarichuimahi. Éneyareichuvare te anuma” macahepa.

<sup>27</sup> Eta juca máechajiriruvahi, tímaticareipahi eta tátavirayare tamutu jácani tiyamuricanahi máepiyaruuanahi ema Viya te juca apaquehe. Tacarichu tanasiyare jácani maitavacacaqueneana taicha mayamurianahi.

<sup>28</sup> Étaripa eta mávasa ema Viya, mavarahaquenehi máimiávhahavihi, maitavacacaquenehi éta. Eta tacahe, vihasulupayachaparaca éma. Vétaviuchainavare eta vipicauchiraya éma. Tásiha, vicurisamurechaina éma eta vivapinava ichape eta vijrauchirahi éma.

<sup>29</sup> Taicha ema Viáquenu macutihi eta yucu, maratahahi maitaequeneha mámainuca.

## 13

### Vicurisamurechayare ema Viya

<sup>1</sup> Tiuri, nuprapenaveana, vahi ecucainajiruva eta émunajirisiracacahi, táchavenehi eta echamuricacairahi te mavahuana ema Viya.

<sup>2</sup> Vahi ecuemitisicava eta táurirayare eta ejacapiraya ena echimarana te epenana. Taicha tajuricati ángeleanainapahi nácani tipaipiuchaheanahi, éta vahi ecuimatihi.

<sup>3</sup> Énerichuva échayareva nayehe ena ticaeratana. Ejapanuvaca éna, taimicutijiricavahini étinahini ecaeratahini ecachanevacahini. Énerichuvare ejapanuyare nácani

náemejapanuráruana taicha éna étarichuhi eta náqueheana tacutihu eta iáqueheana éti.

<sup>4</sup> Ámutu epicauchacaca éti ecaimaqueneanaripa: eti esenana, étipa eti ajairana. Taicha máimaha tiuri ema Viya eta evehacacairahi. Tacuijasera eta échipeacava eta evehacacairahi ena apanana. Ema Viya máicuñacayarehi nácani tivehacacanahi vahi nacuchapahini náitauchavahini, énapa ena ticayepecacanahi.

<sup>5</sup> Váhivare tacuvayuacahe eta plata. Taratarichu tacurisamurechahe jácani íturevahí ecayehequenehi. Ema Viya ani macahehi eta máechajiriruvali: “Vahi nujunijicavimahi, váhivare némitisicavimahi” macahepa.

<sup>6</sup> Tacahe, vicasiñavayare mayehe ema Viya te viyaseaca. Ani vicaheyare te visamure: “Ema Viáquenu ema tímicatacanuhi. Vahi nupicaimahi jácani náichiranuhi nácani achaneana” vicaheyare.

<sup>7</sup> Échavayare ena tímitucaheanapaini tímisamaheanahini eta máechajiriruva ema Viya. Natupiruhi eta náitaresiraini. Éti, epamicava ecutiyare éna eta nacasiñavairahi me Viya.

<sup>8</sup> Ema Viáquenu Jesucristo, vahi máitsivacha eta máurivahí eta viyehe. Manasihi puíticha, étapa eta apajarahiyare.

<sup>9</sup> Eta tacahe, vahi ecuisapava ecuehica eta jácani apanapenejiqueneana náimiturapiana. Tiúripana étumechayare eta esamureana, táichavenehi yátupiquene eta máemunasirahavihi ema Viya. Étapasera eta nayeherepiana tayehe eta tinicacareana, vahi étaparacaina taicha tájinachucha támicatacavacahini ena ticayeherepianahi.

<sup>10-11</sup> Eta nayeherepinihí ena tiyujaracarahaní tayehe eta santuario te Jerusalén, natuparahahi eta nanicasarehi eta námvahuana ena achaneana. Étahi eta navachachahi eta nacaemataneasirahi. Étasera eta sárareana námvahuanahi, navarahahi tacaepahayarehi eta napecaturana, éta, tituparacavaca vahi nacunicahini. Étachucha eta táitine mámahi ema náquenu ena tiyujaracarahaní tayehe eta téqueneha cuarto Lugar Santísimo. Étasera eta táqueheana, náijuchaqueneyarehi te tachachacu eta avasare. Vítisera, mararihi ema apana tiyujaracarahi eta viyehe, apanapavare eta mayujarauchirahavi. Vahi énaparacaimahi ena náinapureana tiyujaracarahaní.

<sup>12</sup> Ema Cristo, ticatajivahí eta máepenirahí te tachachacu eta avasare, mavairahí máepachiakahaviyarehi viti achaneana tayehe eta maitinerichu éma.

<sup>13</sup> Tacahe puiti, vínjicavayarehi eta nayeherepiana ena vijaneanana. Vahi étaparacaina viyehe. Yátupina véhicayare

ema Jesús. Tayanapane vicatajivayarepuca, vicutiyaresera éma eta macatajivairahi.

<sup>14</sup> Taicha te juca apaquehe, tájina vahi tayeremahi eta avasareana étapa eta tayeherepiana. Vítisera tachichahavipa eta avasareyare arairuyare. Apanainapa eta viyeherepiana víchaqueneanayare. Tétavicava eta vijamurachirahi viyápávane.

<sup>15</sup> Tásicha puiti, eta véhisirahi ema Jesús, tavaraha eta vijirau-chiraparacayarehi ema Viya tamutu sácheana, yátiana. Te jácani tájahapuca víchararacava, váhasulupayachavare éma. Eta juca eta viámavahuhi eta mayehe. Éma vicavapajayarehi.

<sup>16</sup> Énerichuvare, vahi ecuemitisica eta íchirahi eta táuriqueneana. Ecajiyareva ena echamuriana eta ecayehequeneana. Eta tímicutijiricavaipa eta iámavahuhi me Viya. Éta ecurisamurechirahi éma.

<sup>17</sup> Esuapayareva nácani tímitucaheanahi, evapinavayare nayehe eta esuapajiraivahi. Taicha éna, tijaneacaheanahi eta iáchanevanahi éti. Náechahi éna eta ticayaserehianayarehi te mamirahu ema Viya. Ecurisamurechavaca éna eta esuapajiraivahi, tavapinacarénapa eta nacaemataneasirahena éti. Vahi ecuimipanerechavaca eta eyacujiva, emasuapajiravapuca.

<sup>18</sup> Eyaseuchanuyare núti te eyujasarirana. Nucasiñavaipa-hinéni núti táurivaipahi eta nupanereru. Tájinapa níchiravainahini. Nuvaraha níchayare eta táuriqueneana nayehe namutu ena achaneana.

<sup>19</sup> Nuvarahasera eta eyaseuchinanu me Viya, másapanuhini éma níjahúchavahini nuchavahini eta eyehe.

*Ema Apóstole mayaseuchavacahi ena machamuriana me Viya*

<sup>20</sup> Ema Viya, tétavicavahi eta macanarasirahavihi eta vipanereruana. Éma tétavicavahivare eta máitupajijiasirava taicha macaechepecuahi ema Viáquenu Jesucristo te máecari, apaesa émayarehi yátupiquenehi Pastoryare, tijanearahi viyehe viti machichanaveana. Tisipahacahavipa eta te máitine apaesa máitavacacayarehi eta vicachanerayare éma.

<sup>21</sup> Núti nuyaseuchahe me Viya, máimicatacahehini ítauchayare tamutu eta mavarahaqueneana, íchirahi eta táuriqueneana apaesa ecurisamurechahini éma te tamutu eta ítaresira eta éhisirahi ema Machicha Jesucristo. ¡Máitavacacayare eta vicunachira ema Cristo! Amén.

*Eta táichecuaraqui eta natuparacasivahi*

<sup>22</sup> Nuparapenaveana, nuvaraha nuyaseacahe ácayehéni paciencia tayehe eta juca nuconsejarapihi eta eyehe.

Ánipichichahi nájurehi tayehe eta juca nucartane. Jararihisera camuriqueneana eta apana nuvarahahi numetaruheyarehini.

<sup>23</sup> Numetacahevare ema viparape Timoteo tiúchucuharipa te cárcel. Te máitecapavanepuca éma, nucachaneyarepahi te níteca eta ara eyehe. Nuvarahahi nímahapanahe.

<sup>24</sup> Néchajicahe emutu eti ejanearahiana ena vichamuriana. Échajisinanuvaca namutu ena vichamuriana vicutique- neanahí tisuapajirahianahí te jácani návihahi éna. Ani te juca, nucachanevacá ena vichamuriana náiteruana te Italia. Téchajicaheanavare éna.

<sup>25</sup> Nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha. Amén.

Tamutupa eta juca néchajiriruvahí eyehe.

## **Eta macartane ema Santiago nayehe ena majaneanana machamurianahivare, náejanerepairuanahi te avasareana, ticaijare SANTIAGO**

<sup>1</sup> Nuti Santiago, mavanaranuhi ema Viya, mavanaranuhivare ema Viáquenu Jesucristo. Nuvaraha nucaitecapa eta juca néchajiruva eyehe emutu eti nujaneanana israelítana éjanerepairuanahi te tamutu avasareana.

### *Eyaseacayare eta ítupajijiasiravaina*

<sup>2-4</sup> Nuparapenaveana, nuvaraha nuconsejachahe: Te tatiarihinañapuca eta ecatajivairana puiti juca ítaresirahi, vahi ecucainajiruva. Evapinavachucha, ácasiñava mayehe ema Viya. Taicha te yátupina ecasiñava mayehe, vahi tiáquipaicahémahi ema Váinaraji. Énerichuva ácamicha yátupina jácani apana táitecapaureheanaya. Ácuti nácani achaneana náitucahi ticaratacavana. Mavarahahi ema Viya tátupiruvahini eta ítaresirana. Eta tacahe, te tatiarihipuca eta ecatajivairana, ecaurisamurechavachucha. Evapinavaya, taicha iúripanayare eta iúchucuirayare.

<sup>5</sup> Tacahe, te tatiarihinañapuca eta téchacare, te váhipuca íturuequenehahini, eyaseacayare ema Viya eta ítupajijiasiravaina. Éma, tíjaracaheyare, taicha tájina mayavana éma. Váhivare ticañachahavimahi eta viyaseasirana jácani vicamu-nuqueneana.

<sup>6</sup> Yátupinahisera ácasiñava me Viya eta eyaseasiranayare eta ítupajijiasiravaya. Vahi ecueñamava mayehe. Taicha te éñamavapuca, tímicutijiricavaipahi ecutihi eta táepacuruha eta une téquequerecavahí.

<sup>7-8</sup> Taicha nararihi ena téquequerecavanachucha eta napanereruana. Vahi étanainarichuhini jácani navarahaqueneyare náicha. Nácani tacahehi eta napanereru, éna tájina máijaracaimahi ema Viya.

<sup>9</sup> Émaripa mácani vichamuri, te páurehipuca eta máitaresirahi, tivapinavayaresera taicha eta máimicasiraipa ema Viya taicha eta máemunasirahi.

<sup>10</sup> Émaripa mácani vichamuri rícoquenehi eta máitaresirahi, énerichuvare tivapinavayareva, tayanapane titahapuca eta máimahaqueneanahi. Taicha eta vímahaqueneanahi te juca apauehe, vahi taeñamacarehini, taicha titavayarehi tamutu.

<sup>11</sup> Ánipirichu eta táurinajiva eta flureana; taicha te járajapapa eta muracana sache, tacajiyujicapa. Tamutu titava eta táurinajivainihi. Témiricaipavare eta taflurena. Ene macahe mácani rico, vahi tánasimahi eta máimahaqueneana, tayanapané vahi macuvaraha táitava, máitucahipuca eta macaematanera.

<sup>12</sup> Tétavicava eta náurivayare nácani vichamuriana ticamichanahi tamutu eta nátajivanahi. Járajapayare eta sácheinayare eta najacapiraya eta táitsivayarehi maicha ema Viya, máijaracainapa eta táurivayare eta náitaresirayare, taicha ticunachacareanahi. Tacahehi eta mapanereruhi ema Viya nayehe ena témunacanahi éma.

*Máisapa ema Viya eta jácani víchavaquenevanaya, mavarairahi tétipiricahaviyare*

<sup>13</sup> Téhevare tatiarihinapuca eta ejecapiravaya jácani tamauriqueneanahi, vahi émaimahi émeteaca ema Viya. Taicha vahi tásihaqueñéna me Viya eta juca tájiparacana. Nájinavare mapamiruimahi náichahini eta júcana.

<sup>14-15</sup> Nácanisera náquipairuvana tayehe eta tamauriqueneana, táuchurepa te napanereru tamauriqueneana, tásihá navaraha náichayarehi eta pecatuana. Vaipa nanecapavahini eta náichiraipa. Téhesera te taequenénapa, étapa tiviuchayarehi. Tíñehicha eta taimicapasiravacaina.

<sup>16</sup> Némunaruqueneana nuparapenaveana, machu ejecapava tayehe eta juca numetaruheanahi.

<sup>17</sup> Ema Viya, etanarichuhi eta mapanereru. Vahi apapanenejinahi eta máuriva viyehe. Éma, tíjaracahavihi viti achaneana eta majaraiva, étapa tamicahuhi eta viáchanevana. Taicha tamutu eta juca táuriqueneanahi vijacapaquenehi puiti, tásihaqueñeanahi me Viya. Vahi apaesasajiruinai-chuhini eta táurivahi. Jéhevare eta yátupiqueneanahi.

<sup>18</sup> Taicha acane tacahehi eta mapanereruana, mavarairahi vijacapayarehi eta yátupiqueneanahi máechajiriruvana apaesa machichahaviyarehi. Eta máitsivachirahi eta viáchanevana, ticaecherahi máitsivachayarehi tamutu eta apamuriana máepiyaruana te juca apaquehe.

*Vímerecavaya yátupi eta visuapiroayare eta máechajiriruva ema Viya*

<sup>19</sup> Eta tacahe, eti némunaruqueneana nuparapenaveana, nutuparacahecha yátupina tauri eta esamiraina eta máechajiriruvana ema Viya. Vahi ecuijahahúchava esema. Epanerechinava eta échajisiraya.

<sup>20</sup> Taicha nácani tisemarairihiana, vahi étainahini náichahini eta mavarahaqueneana ema Viya.

<sup>21</sup> Puiti te juca vítaresirahi, jararihi eta tavarairahi vипанереchaya tayehe eta tájiparacana, tamaeperajisira eta viáchanevana. Tétavicavavare eta tapamisirahavihi vicha eta tamauriqueneana. Puítisera nutuparacahe: Ínajicapa tamutu eta júcana. Ecasamureyareva eta máechajiriruva ema Viya eta ímitucasivanahi. Yátupina esuapa. Jéhevare, éta ticuchucuhayare eta iáchanevana.

<sup>22</sup> Ítauchayare eta tametarapianahi eta máechajiriruvana ema Viya. Vahi tacuejecapava eta epanereruana, machu ímijachapuca taratarichuhi eta esamararasirahi.

<sup>23</sup> Vahi ecucuti nácani nasamarararuchucha, tásicha vahi náitauchahini eta tavanairipihi, tímicutijiricavaipa nácani tímacunachavanahi te espejo.

<sup>24</sup> Tásihasera, vahi nasipacahini eta náimahaquenehi nachipeuquivahi. Tásicha, tiyananavanepa, náemitisicavanepa.

<sup>25</sup> Étisera ecutiyare ena natupiruvanahi eta nasamirahi táuriva eta yátupiqueneana vímiturapiana tásiqueneanahí me Viáquenu. Vahi ecuemitisica. Tásicha, ítucayare enerejica eta táuriqueneana, esuapayareva eta ímitucasiqueneanahí. Tásicha, tétavicavaya eta iúrivaya táicha.

<sup>26</sup> Nararihipuca nácani tímijachavanahi religiosoana. Téhesera vahi náitucahini ticaratajacachavana, ena nani téjecapavanahi eta napanereruana. Tájinachucha vahi émainahini nasuapahini ema Viya.

<sup>27</sup> Vítisera, eta vítauchirahi eta yátupiquene téhicacare, te vivaraha tájina véchajisiacarevaina te mamirahu ema Tata Vicaiyaquene, tatuparacahi vijapanuyare vítatiyare ena amaperuana váchachichana énapa ena náepenaimaqueneana tayehe eta nacamunuiravanahi. Tituparacahavihivare vahi víchaimahi eta pecatuana te juca apaquehe.

## 2

### *Nácuticaca ejacapa ena achaneana*

<sup>1</sup> Nuparapenaveana, éti éhicanahi ema maitupajijihaquenehi Viáquenu Jesucristo, vahi táuricahini enerejicavaca ena echamuriana ejacapagueneanaya.

<sup>2</sup> Étaripa te natiarinhinapuca nácani nasiapauchahe te iúrujisirarevana íchirana eta culto, vahi macarichuimahi tiuri eta ejacapiraya mácani tiúrinahapahi eta macamuirihairahi, ticasurutijapahipuca eta oro. Énerichuvare ejacapayare mácani paure, tévichíjihapahípuca.

<sup>3-4</sup> Taicha téjecapavahi eta epanereruana, te macarichuhi mácani tiúrinamuirihapahi, échapajiricahi eta ecaejasirahi, mácanisera paure, te váipapuca ecuechajiricahi, váipapucaini

ecuijaracahi eta máejasihá, tasapiha evanecainapapuca téjahapaica. Éti, vaipa étupicavaimahi eta juca enerejisiravacaichucha nácani ejacapaqueneanaya.

<sup>5</sup> Némunaruqueneana nuparapeneveana, esamanuchaha. Ena páureanahi te juca apauehe, majacapavacahi ema Viya, táichavenehi eta nacasiñairahi ema Machicha. Éna, tiápajupanavanahí etá náurivaya taicha ena ticaicuchianahí etá mávasa ema Viya taicha machaneranahi. Nacachaneyarehi ena apamuriana témunacanahí éma.

<sup>6</sup> Étisera evarahapa ímitsirihavaca ena páureana, nasapihapa échapajiricahi ena rícoana. Ticutiripa vahi ímativacahini etá náemeratasiraheripa, te apaesachichapa éjecapava.

<sup>7</sup> Ticutiripavare vahi ímativacahini etá nacaecahirahi ema Cristo, nacaecahihivare etá iámirahi etá máijare tacapicahuquenehi.

<sup>8</sup> Puítisera éti, yátupiyare ítaucha etá ticunachacarepanaquenehi mavanairipi ema Viya tayehe etá Sagrada Escritura. Ani tacahehi: “Pémunacayare ema piparaepiya tácuti etá pémunasiravahi píti”.

<sup>9</sup> Téhesera enerejicaichucha nácani émunaruuanahi, ecapetaturaichucha etá emasuapirahi etá mavanairipi ema Viya, etá tiviuchaheya.

<sup>10</sup> Taicha te natarihipuca nácani náitaucha tamutuyaréni etá vanairipiana, téhesera apesarichu etá néjecapiravahi, étapa tiviuchahi etá náicuñayare, tímicutijiricavahi vahi náitauchahini.

<sup>11</sup> Taicha ema Viya, ani tacahehi etá mavanairipihi: “Vahi picuveha esu apána esena. Váhivare picucapareca”. Pití, te váhipuca pivehahini esu apána esena, picaparecahiseraپuca, piáviraichuhí picaviurevahi.

<sup>12</sup> Iúrihainehi ejacaparahihini nayehe namutu, táurihini etá échajirisiravana. Vahi ecuemitisica etá tatiarihiraya etá sache ecayaserehiraya tayehe etá juca vanairipiana. Étara tétupiricahavihi.

<sup>13</sup> Taicha nácani majapanurairahanahi nayehe nácani apamuriana, tájinavare najapanucarevaimahi te nacayaseserehipa. Nácanisera tijapanurahianahi, ichape etá najacapacrevanaya me Viya te jena sácheyare.

*Vímercaya etá visuapajiraivaya étapa etá vicaemataneasiraya ema Viya*

<sup>14</sup> Nuparapenaveana, nuvaraha níminecapaeque-nehaheyare. Te natarihinapapuca nácani nacahehi: “Núti nusuapa ema Viáquenu”, tásiha vahi náichahini etá táuriqueneanahi, vahi tisuapacare etá náechajiriruvahi. Németeaca vahi yátupinahini nasuapahini ema Viáquenu.

<sup>15</sup> Nuvaraha nímicutichinaheyare eta juca. Te mararihipuca mácani vichamuri ticamunuvhah etamamuirihiapiyare, manicaquenerepipuca te sácheana.

<sup>16</sup> Tásicha, mácani echamurihi tépiyacavahipuca tijapanurahihi. Máichahipuca: "Páurevisami piti, te picasarechahipuca, pépacuchava. Te pécuhapuca, pinica". Tásihasera, te vahimáijaracahini eta macamunuquenehi, tamapurujichucha eta máichirahi.

<sup>17</sup> Ene vicache viti véhicana ema Viáquenu. Te vahivíchahini eta táuriqueneana, tamapurujichucha eta véhisirahi, vaipa tásuapacarehini.

<sup>18</sup> Tiuri puiti, németeaca etiarihiyarepuca eti épuruyare eta juca numetaruheanahi. Áninapapuca ecaheyare: "Tarataripa eta vicasiñavairahi me Viya. Vaipa étaparacaina víchahini jácani apamuriana táuriqueneana" ecáhénapapuca. Nútisera numetacahe: Vahi tisuapacaremahi eta ecasiñavairahiji, te vahí íchahini eta táuriqueneana. Taicha eta íchirahi eta táuriqueneana, étapa tímereuchaheya eta yátupirahi eta ecasiñavairahi mayehe ema Viya.

<sup>19</sup> Éti ímijachaipapuca tarataripahi ticuchuchuhahaheyare eta esuapirahi eta matiarihirahi émanarichu ema Viya. Táitaurevaquene esuapahi eta matiarihirahi ema Viya. Apanasica ena éreanana nasuapahivare eta matiarihirahi ema Viya. Tayanapane eta nasuapirahi, váhiquene tiúchucuhanaaimahi éna. Énaripa, tiyayacareanahi éna te nasama eta máijare ema Viya.

<sup>20</sup> ¿Vuíchahacaru ácaicutiarahini? Tiuri puiti, níminecapaequenehaheyare, taicha nuvaraha ácaicutiara: Tacamunuhi íchayare eta táuriqueneana tacachaneyarehi eta ecasiñavairahi. Tamapurujicha eta ecasiñavairahi te vahí ecuquichahini eta táuriqueneana.

<sup>21</sup> Nuvaraha némechahe mayehe ema viáchucai Abraham. Eta acane, émaripa macaitsamarajih ema Viya, te yátupihipuca eta masuapajiraiva. Mavanecahi máechatinucayarehi ema machicha Isaac. Tacahe, ema Abraham, máechatinucayarepaini ema machicha, máimeresirayarehi eta masuapajiraivahi yátupi. Eta tacahe, ema Abraham, tétavicavahi eta majacapacarevahi mayehe ema Viya.

<sup>22</sup> Étara ícutiaraya eta juca masuapajiraivahi yátupi ema Abraham. Vahi máeñamahini ema machicha eta mavarairahi máimerecayare yátupihi eta masuapirahi.

<sup>23</sup> Taicha eta taechajiruvahi eta Sagrada Escritura, ani tacahehi: "Ema Abraham masuapahi ema Viya. Tásicha, tétavicavainehi eta majacapacarevahi ema Abraham. Éma, máemunacasarehi ema Viya".

24 Ácaicutiara yátupina eta juca. Viti achaneana vijacapacare me Viya táichavene eta vímeresira eta visuapirohi. Vahi tarataha eta vicaheira: “Núti nusuapa ema Viya”.

25 Níminecapaequenehahe eta acane tacahehivare eta súchucuirahi esu esena túhusiquenénihi ticaijaro Rahab. Ésu, ticatiuchavacahi ena vanairucanahi mayehe ema víyarahá Josué, suímicatacavacahivare eta náitujisiravayarehi tijunana nayehe ena ticaratacanayarehini. Eta máimairahi ema Viya eta juca suíchirahi, ichaperinehivare eta majacapirahi ésu.

26 Eta juca tacutihu eta viáquehe te tajunijica eta viáchaneva, enevanerinehi téSAMIRICAVA eta viáquehe, tépenavaneyarehi. Ene tacahehi eta visuapajiraiva. Títavavare te vaipa vímeracahi eta viúrvahí, víchirahi eta táuriqueneana.

## 3

### *Eta vijaca, tamutu tajarareca*

1-2 Nuparapenaveana, yátupi vimutu véjecapava tayehe eta véchajisirana. Nájina émanaina vahi macuejecapavaini eta máechajisira. Te matiarihinaini mácani achane vahi macuejecapavaini, ichapehini eta macunachacarevainahini, taicha éma, yátupihi eta máitupajijasiravahí, máitucahivare ticaratacava eta máquehe. Eta tacahe, nuvaraha nuconsejachahe: Tacamunu najaneacava muraca nácani náimereca eta navarairahi máestroanayarehi tayehe eta máimiturapiana ema Viáquenu. Échavayare eta vicayaseserehirayarehi muraca me Viya viti máestroanahi.

3 Nuvaraha nímicutichinahe. Eta juca tímicutijiricavahi te vicapera eta cavayu: vinacapa eta freno, vichurujacachapa, viámapa te jácani vivarahaquene viámiha.

4 Tacutiquene eta ichape lancha, tábavatajicaneni muraca eta técaticava, étapa eta tajunapira muraca eta une, taratahayarehisera táimitupirucha eta tayehe leme váhineni ichapenahini, ema piloto máimitupiruchayarehi te jácani mavarahaquene mámihayarepahi.

5-6 Ene tacahehi eta juca vijaca. Ánichicharichunéni tayehe eta viáquehe. Tasapihahisera táchajisihahi eta ichapequeneana. Tacutiquene eta yucu. Ánichicharichunéni eta táchapanirava táijucha, taratahayahisera táijucha eta ichapequene vámahi. Nácani achaneana te vahi náitucahini ticaratajachavana, amairijipa tamutu eta náitaresira. Tíñehicarehi nájarareca ena nácani camuriana achaneana taicha eta náechajiruvanahí. Ena nani téchajisihanahi eta tamauriqueneana, éna mávaháruanahi ema Váinaraji, téchahi eta infierno.

<sup>7</sup> Ena achaneana narataha namansucha eta cágureana étapa eta quichareana étapa eta táíñehiqueneana sárareana tiávihana te apaquehe étapa te une.

<sup>8</sup> Étasera eta jacare, nájina ticaratacaina, táchajisihayarehi eta tamauriqueneana. Tacutihi eta jumare te nájina tirata-haimahi típuchaina, tiámahivare eta tacapasiravacayare ena achaneana.

<sup>9-10</sup> Eta jacare, étarichuvare táuchusihá etá náechajiruvana ena ticunachanayarehi ema Tata Vicaiyaquene. Ticunacha-carehi eta juca. Váhisera ticunachacaremáhi te tiúchucahi eta jacare etá náumehairá ena nacutiqueneana achaneana naparaepíyanahi me Viya. Nuparapenaveana, tatuparacahi vahi ecaecahihini ena ecutiqueneana tiámanahí etá macaque-hera ema Viya.

<sup>11</sup> Tacutiquene eta une, te tipachinahí etá tajututurusirahi te apaquehe, vahi tíjahúchavaimahi titsiriecava, táchucu-pucaini tisucareamahini, ticheveamapucahini.

<sup>12</sup> Tacutiquene vahi tiúchucaimahi etá aceite tayehe etá tahi etá yana. Étaripa etá narasa, vahi tiúchucaimahi etá tahi siñávehinapahini. Ene tacahehi etá une, vahi tajututuru-cahini te apaquehe etá tipachina une tacachanepahipucaini etá ticheveama. Nuconsejachahe: Ecunachachucha. Vahi ecumehareca.

*Te yátupihi etá véchemaraivahi, tatuparacahi víchayarehi etá táuriqueneana*

<sup>13</sup> Te natarihinapuca te etaracu nácani náechemahahi tamutu, tatuparacahi náichayare etá táuriqueneana, yátupi-navare etá namansuvayare. Étapa tímicaecherachayarehi etá náitusirahi.

<sup>14</sup> Te etarihipuca eti ímijachavahi échemahahi tamutu, tásicha ecapinarurecarichuchasera te esamureana, evarahapa iápajupanavayarehi nayehe ena apamuriana etá ítupajijiasiravaya, vahi yátupinahini etá ítupajijiasiravainahini.

<sup>15</sup> Eta juca échemaraivavacahi, vahi étainahini tásicha quené-nahini me Viya. Tayehechucha te juca apaquehe tásicha que-nechucha etá ne achaneana, máevaequeneruhi ema Váinara-ji.

<sup>16</sup> Taicha ena ticapinarujircacanahí téhajiricacanapa. Vahi táchiticacahini etá napanereruana. Náicharichucha etá tájiparacana.

<sup>17</sup> Nararihisera ena yátupiquenehi etá náechemaraiva, tásicha quenéhi me Viya etá náitupajijiasiravanahí. Náimerecahi tativa tatupiruvahi etá napanereruhi. Táurivahivare etá náitaresira. Ticatiurahianahivare nayehe ena apamuriana. Tisamarahianavare. Tijapanurahianavare. Eta náichirahi etá

táuriqueneana, ticajirahianahi. Nájina nanerejiruina. Tatupiruvahí eta náechajirisiravana.

<sup>18</sup> Nácani ticatiurahianahi, náetupiricahi eta náitaresira ena apamuriana. Jéhesare, tájinasarepa náichiravainahí. Nanaquipaicahi eta táuriqueneana.

## 4

### *Ema Viya mavaraha vínjica eta tájiparacana*

<sup>1</sup> Puítiripa, ¿tájaha tacayema eta éhajiricácahi? Éti ecuticacahi ena apamuriana eta ejamuraraivanahí. Éta, timaurichahéhi eta tájiparacana, étijivaichucha íchavahí.

<sup>2</sup> Éti ejamurachahí ecaimahaquene. Étasera emaitusiravahí, evarahapa ecapaca ena ticaimahaqueneanahí. Éti ecapinarurecahi. Éta emaitusiravahí, téhacacapa eta échajirisiravana; tásicha, éhacacauchapa. Nuconsejachaheyare: Eyaseaca ema Viya eta ecamunuqueneanahí.

<sup>3</sup> Éti eyaseacahinéni éma, váhisera máijaracahehini, taicha vahí táetupicavahini eta eyasesearapiana, étachucha eta tajamurachaqueneanahí eta iáquehe.

<sup>4</sup> ¡Tétavicavapa eta emaetupisiravahí eti achaneana! Éjecapavahí ichape mayehe ema Viya! Evarahapa éhica eta nayeherepianahí ena achaneana masuapajirairahana. Tihapapicahepa eta tájiparacana te juca apaquehe. Masapihapa epuruyarehi ema Viya, ecatianacapa éma.

<sup>5</sup> Éti ímijachaipapuca táepiyevahí eta táchajiriruvahí eta Sagrada Escritura. Ani tacahehi: “Eta mávahásirahavihi ema Espíritu Santo, téñamahaviripa vahí vihapasamurechaimahi tayehe eta tamauriqueneana”.

<sup>6</sup> Étaripa eta máemunasirahavihi ema Viya, tétumechahavihi, mamavarairahi víchahini eta tamauriqueneanahí. Taicha ánivare tacahe eta Sagrada Escritura: “Ema Viya macatianacavaca ena tisiñavavairicana. Máemunacavacahisera máimicatacavacahivare ena mánsuana”.

<sup>7</sup> Eta tacahe, esuapa yátupina ema Viya. Ecanaraya ema Váinaraji, te mavaraha mavayuacahe. Jéhesare, tijunijicahénapa éma.

<sup>8</sup> Puiti, yátupina eta epauchirahi ema Viya. Tásicha, ema apanavare tipauchaheyare. Ínajicapa puiti eta íchira eta tamauriqueneana. Émitisicainapa eta ejamurachira eta tájiparacana te esamureana. Taicha éhicasareipa ema Viya. Vaipa ecupanerecha eta nayeherepiana ena achaneana masuapajirairahana te juca apaquehe.

<sup>9</sup> Puiti, éneuchava me Viya. Íyauchava táichavenehi eta ejecapiranahí. Vaipa ecuecarairicava, vaipa ecurisamure eta

íchira eta tamauriqueneana. Ácatisamurevasera táichavenehi eta tamutu eta tamauriqueneana íchaqueneanahi.

<sup>10</sup> Ecajapanuravayare eta éneuchiravayare te mamirahu ema Viáquenu. Tásicha, tétavicavayare eta ejacapacarevainapa mayehe ema Viya.

### *Vahi picucaecahi ema pichamuri*

<sup>11</sup> Nuparapenaveana, vahi ecuechajica mayehe mácani echamurihi. Taicha mácani téchajicahi mayehe mácani machamuri, macaecahipuca, mavaraha máicuñaca mácani machamuri. Émaripa máepururipahi eta mavanairipi ema Viya. Nuvaraha numetacahe: Te épuruhi éti eta mavanairipi ema Viya, eta tímicaecherachahehi eta emasuapirohi éma.

<sup>12</sup> Ema Viya, émahi ticavanairipihi. Macarichu éma tatuparacahi téchayarehi te tiúrihipuca eta náichaqueneana ena achaneana. Téchayarehivare eta máicuñasiravacahi ena téjecapavanah. Vahi étina tatuparacahehini ícuñacahini ena echamuriana.

### *Vahi vítina vecha eta vítaresira*

<sup>13</sup> Esamanuchaha. Vahi táuricahini ácahehini: “Puiti juca sácheana, achichupuca, nuyanaya te apava avasare. Níjararecaya eta nucayehequeneana. Tiámainucava nuchava te apava año. Ichapeyare eta nuganareruyare”.

<sup>14</sup> Éti, vahi échahini tájahapuca eta íchavaquenévaya achichu. Taicha vahi evachareruina eta ítaresira. Tacutichucha eta iyaru. Ánipirichu eta tacaecheraira. Tásicha, témitiacaripavare.

<sup>15</sup> Iúrihainehi ácahehini: “Ema Viya téchahavihi eta vítaresira. Te mavaraha éma, vítauchayarehi eta juca vipanereruhi” ácahehini.

<sup>16</sup> Étisera, tétavicavapa eta ecasiñavavaisirahi eta échajisirana. Ticutirinehi étinahini échinavahini eta ítaresirana. Vahi táurihini eta ecasiñavavaisirahi.

<sup>17</sup> Némechahe eta juca yátupiquenehi: Mácani máimatihi eta macatuparahairahi máichaya eta táuriqueneana, tásicha te vahi máitauchahini máichahini, ticapecaturaipahi te mamirahu ema Viya.

## 5

### *Eta náichavaquenévaya ena rícoana*

<sup>1</sup> Tiuri puiti, nuvaraha numetacahe eta náichararacavaya ena rícoqueneana. Éna, ichape eta nacatajivairayare. Náurihaipa náiyahasamureripahini taicha eta nacatajivairaya.

<sup>2</sup> Taicha titavainapa eta náimahaqueneana. Étaripa eta nacamuirihairana eta táurinaqueneana, tanicacamecainapa eta cachusiri.

<sup>3</sup> Tájinapa táichaquenemahi eta naplataneana étapa eta nayehe oro. Ichape eta nacatajivairaya, taicha eta náeñamirahi, tájina náimicatarapínahini. Étainapa tímicoñacavacayare te jena yucu te táitecapapa eta jena sácheyare.

<sup>4</sup> Nararihi ena nani rícoqueneana, ichape eta navayuasiravacahi eta navachachirahi ena ticaematanecanahi eta nayehe. Tatiarihiyaresera eta sácheyare táitecapauchayare eta náicuñayare, taicha ema Viya máimararacahi tamutu, masamahivare eta nayaseserepianahi ena páureanasami müssuana.

<sup>5</sup> Ena rícoana puiti te juca apaquehe, téavicavahi eta náuritaresirahi. Tamutuhi nanica eta táurinisiquneana, tisatuheherecanahi. Tésinanacavanahi nacuti eta cuchi te náesinacha. Éna, tijahúchavayare eta náepenirayare, nacuti-yare eta táijahúchirava nacapaca eta cuchi náesinaruhi.

<sup>6</sup> Tacutiquene náimicaviurehi náimicapacavare ena matapiravareanahi, náimipanapa eta namaitusirahi tiácapauchavana nacatiuchavahini.

*Vicamichayare tamutu, taicha táetumechahavi eta vicuchapirohi eta machavirayare ema Viáquenu*

<sup>7</sup> Étisera, nuparapeanaveana, ecamichayare tamutu, táichavenehi eta ecuchapirahi eta machavirayare ema Viáquenu. Ecuyare mácani achane ticaematanerahi. Macamichahi tamutu eta macatajivairana. Tiámainucava te tiúchucuhapa eta máevaru, mapaenumavapa majacapa eta macuchapauquenehi máevaraqui.

<sup>8</sup> Ene ecaheyare éti, yátupina ecamicha tamutu, váhivare ecuinajicava eta juca éhiruhi. Ecuchapavachucha, taicha tiánehipa eta máitesirayare ema Viáquenu.

<sup>9</sup> Nuparapenaveana, vahi ecuquicha eta tájiparacana nayehe ena echamuriana. Váhivare ecuemeteaca éna, apaesa tacuija eta táimicatsiriacahe te ecayaseserehipa te mamirahu ema Viya. Écharichuhi éti eta tánehirapa eta máuchujisirayare ema Juez, ecayaseserehinapa.

<sup>10</sup> Nuparapenavechichana, nuvaraha ácutini ena profetanaini eta nacamichirahi tamutu eta nacatajivairahi, táichavenehi eta nacometarairuirahi te máijare ema Viáquenu.

<sup>11</sup> Némechahe: Ichape eta nacunachacarevahí eta viyehe nácani ticamichanahi eta nátañivanahi. Écharichuhi eta macamichirahi ema víyarahaini Job. Échahivare eta táuriquenehi máijaracasihi me Viáquenu. Taicha téavicavahi eta majapanuraivahí ema Viáquenu.

<sup>12</sup> Tacutiquene nutuparacahecha éti nuparapenaveana: Te ecayaseserehipuca, vahi ecuquicha eta juramento te máijare

ema Viya, ema tépiyacahi eta anuma étapa eta juca apaquehe. Váhiqene ecuquicha eta juramento. Átupiruvachucha te ítauchayarepuca, “Nítauchayare” ácahepa. Téhesera váhipuca, étupiruvayare “Vahi nítauchaimahi” ácahepa. Apaesa tacuija taviuchahe mayehe ema Viya.

### *Tatuparaca eyujarauchacacayare*

<sup>13</sup> Te etiarihinapuca éti ecatajivahi, tatuparacahi éneuchavayare me Viya. Te etiarihinapuca eti iúrisamureanahi, tatuparacahi ejira eta alabanza.

<sup>14</sup> Téhevare etiarihinapuca eti ecajumanahi, ímichuhayare ena víyacarana vichamuriana apaesa nayajisicahe eta aceite, te máijare ema Viáquenu. Tásicha, tiyujarauchaheanayare.

<sup>15</sup> Jéhesare, tisamacareyarehi eta nayaseasirana, táichavenehi eta nacasiñairava me Viya. Tásicha, ema Viáquenu macanaracayarehi eti ecajumaqueñehi. Te étapuca tiviuchahehi eta epecaturana, macaepahayareva ema Viya eta epecaturana.

<sup>16</sup> Eta tacahe, te tatiarihipuca eta éjecapiravanahi mayehe ema echamuri, eyaseacayare maperdonachahe. Tásicha, eyaseuchacacayare te eyujaraca eta enarasiraina. Taicha téavicavahi eta tasamacarevahi eta nayujaracasa ena matapiravareana.

<sup>17</sup> Émaripa ema vicutiquenéni achane víyarahaini profetaini Eliás, te tiyujaracapa éma, tiyaseserecapa vahi tacuquiva. Tisamacarehi éma. Vaipa taquivahini. Mápana año, saisi caje eta tamajinairahi tiquiva.

<sup>18</sup> Tásicha, tiápechavavarepa tiyujaracahi. Tiyaseserecapa táemiricahini eta tiquiva. Tiquivavarepa. Tacahe, tiúrinainehi eta evaraqiana te apaquehe.

<sup>19-20</sup> Nuparapenavechichana, te natarihinapuca nácani vichamuriana téjecapavanahi tayehe eta yátupiqueneana, eti ecatusparaha iúrichavacayarehi éna, econsejachavacayare apaesa nachava éna, náinajicahini eta náejecapiravana. Tétavicavahi eta táurivahi eta íturusiraina eta nachavira, taicha táemesiava eta ecuchucuiravacayare tayehe eta náicuñaya-rehini, taicha eta táemesiavahi eta táepahairapa eta camuri-quenehi eta napecaturana.

Tamu tupa.

## Eta macartane ema Apóstole Pedro, ticaijare **1 PEDRO**

<sup>1</sup> Núti Pedro, mayehenu apóstole ema Viáquenu Jesucristo. Nucajurehe eta juca nucartane eti nuchamuriana éjanerepari-ruanahi ecaquijiqueneanahi tayehe eta apaza avasareana: eti iávihanahi te provincia Ponto, eti iávihanahi te Galacia, eti iávihanahi te Capadocia, eti iávihanahi te Asia, étipa eti iávihanahi te Bitinia.

<sup>2</sup> Emutu eti, yátupiquenehi eta manerejisirahehi ema Tata Vicaiyaquene taicha tacahéhi eta mapanereruhi acane eta táepaniravahi. Émaripa ema Espíritu Santo, tiávahácaheripa máepachiasirahehi eta epecaturana eta te máitine ema Jesucristo, máitsivachinahehivare eta ítaresirana, máimicatasirahehivare eta esuapajiraivahi me Viya. Puiti, nuvaraha tajurucaini eta ecaicutiaraira eta máemunasirahehi ema Viya; tájinavare tahapapiricahini eta táurivahi eta epanereruana.

*Vijacapayare eta vícuchihi te anuma te tauri eta vítaresiraina*

<sup>3-4</sup> Tétavicavahi eta vicunachirahi ema Viya, Macaiyaquene ema Viáquenu Jesucristo. Tétavicavahi eta majapanuirahavihi, vijacapacarehi mayehe eta macachichairahaviripa. Tásicha, viratahahi vicamichahi tamutu eta viátajivana te juca vítaresirana taicha vicuchapahi eta sácheyare visiapaya eta mávasa ema Viya. Máitavacacayare eta vítaresirayare, táichavenehi eta maechepusirahi ema Machicha Jesucristo te máecari. Ánaqui, tájinapa ticapacahemahi, váipavare íchaimahi eta tamauriqueneana. Máitavacacayare eta iúrisamurereasi-ravanayare.

<sup>5</sup> Puítisera, tétavicavahi eta máitupajijiasiravahi ema Viya eta majaneasirahehi, táichavenehi eta ecasiñavairahi mayehe. Taicha mavaraha ticuchucuhahheyare te jena sache táepaniravare eta viúritaresiraya.

<sup>6</sup> Puiti, apanapaneyarechaha eta ecatajivairayarechaha. Nucasiñavahisera eyehe éti, vahi ecainajiruvaimahi. Eta ecasiñavairahi me Viya, evapinavaichucha eta ecamichirahi tamutu, taicha ímatihí vaipa táunaimahi eta ecatajivairaya.

<sup>7</sup> Ema Viya másapahi eta juca ecatajivairana, mavarairahi ímerekuchavayare eta yátupiquenehi eta ecasiñavairahi eta mayehe. Ecuyare eta oro te nacaitsamaraji te yucu te yátupihipuca étaquenehi. Étisera étaviviriacahi eta tatumeva eta oro, taicha eta oro titavayarehi, témitiacayarehi. Te vahi ecainajiruva eta ecasiñavairahi mayehe ema Viáquenu,

tétavicavayare eta ecunachacarevayarehi mayehe éma eta machimapiraheyare te machava.

8-9 Éti, vuíchaha ímatihini eta mamira ema Viáquenu. Émunacahisera éma. Ichapehivare eta ecasiñavairahi eta mayehe. Tásicha, ichapeyarehiva eta iúrisamurevaya, tájina eviyaimahi ácayemahini eta ecunachiraya éma, te jena sache iúchuchainapa eta ítaresiraya máichecuaraquierenapa. Étasera eta táitsivahi eta ecasiñavairahi mayehe ema Viáquenu.

10-11 Eta juca viúchucuirayare, acaneripahi eta tacaecherairahi. Énaripa ena víyarahananaini profetanaini nájueque-nehariпа tayehe eta Sagrada Escritura eta máitesirayarehi ema ticuchucuhahaviyarehi. Émaripa ema Espíritu Santo maitametacavacahi éna eta macatajivairayarehi éma Cristo étapa eta machavirayare tayehe eta táurinaquenehi mávasa. Énasera ena profetana vahi náimatin mahi tamutu. Navarahahi náimatiyare ¿nájahapuca ema máiteruyarehi? ¿Tájahapuca eta máijareya? ¿Tájamuhuyarepuca eta máimeresiravaya?

12 Émasera ema Espíritu Santo (ema másihauquenehi te anuma), mame tacavacapa vahi náimahaimahi ema Cristo, taicha camuriyarehi eta áñoana eta máitecapiraya. Vítipasera puiti viti vitareruanaichaha, vítipa vímatihi éma. Te vicametarairupa mayehe ema Jesucristo, ema Espíritu Santo titametacahehi te esamureana. ¡Tétavicavayare eta viúricacarevayare víti, te viúchucuhapa! Énaripa ena ángeleana, ichape navarahahi náimatihini tájahapuca táichararacavayare eta viúricacarevayare.

*Ema Viya, eta máichuirahavihi, mavarahahi tépachinachahaviyare eta vítaresirayare*

13 Eta tacahe, ecaratamacava tayehe eta epanereruana, táurivainavare eta ítaresiraya. Ecasiñavayare eta ejacapirayare eta ícuchihi me Viya, máijararuheyare te machavapa ema Viáquenu Jesucristo.

14 Ímerecavayareva eta machichairahéhi, esuapajirahiyare. Vaipa ecuquicha eta íchaqueneanaini eyeherepianaini cape juca te vuíchaha ímatihini ema Viya.

15 Puítisera, sánturuhahénapa eta ítaresirayare. Taicha ema tíchuhahéhi, tétavicavahi eta masantuvali.

16 Taicha ema Viya, ani macahehi eta máechajiriruvahi tayehe eta Sagrada Escritura: “Nuvaraha sántuhéna eta ítaresiraina, taicha nútì, yátupiquenéhi eta nusantuva”.

17 Te eyujarasirana éti, ani ecahehi: “Tata Vicaiyaquene” ecahehi mayehe ema Viya. Ímatiyare yátupi éma eta nájinairahi manerejiruina, tacutiquene eta máemecharesirahi ena téjecapavana, máitsivachavacahivare nácani tíchanahi eta

táuriqueneana. Tacahe, yátupina eta epicauchiraina éma tamutu sácheana puiti juca ítaresiraichaha te juca apaquehe.

<sup>18</sup> Ema Viáquenu Jesucristo ticuchucuhaheripa tayeha eta tamaurivainihi eta ítaresirana, iámapiricaichaha eta nayeherepianaini ena iáchucanaveánaini. Écharichuhi éti eta mavacharesirahehi ema Cristo eta iúchucuirahi, váhisera te plátainahini, óroinahipucaini.

<sup>19</sup> Étasera eta máitine máepusairuhi éma eta mavacharesirahehi, étivenehi ímijararecahi éma, cútiripa te cájararecasí eta uvesa matapiravarequenehi.

<sup>20</sup> Acane te tépanavainapa eta apaquehe ema Viáquenu Jesucristo ticatuparahaipa tacaheyarehi eta máepeniraya. Váhisera táitauchavavanehini. Tapaenumavapa puiti, títauchavahí eta étavenepa eta iúchucuirayarehi éti.

<sup>21</sup> Énerichu táichavenehi eta éhisirahi ema Cristo, ímatipa puiti ema Viya, ema ticaechepecuahi ema Machicha te máecari. Puíticha téjacaripa éma tayéhe eta mávacure te anuma. Eta tacahe, téavicavainehi eta ecasiñavairahi mayehe éma, ecuchapavaipa eta mayehe.

<sup>22</sup> Puiti tipachinaripa eta iáchanevana táichavenehi eta esuapirahi eta yátupiquene máimiturapiana ema Jesucristo, máimitusiraheripa ema Espíritu Santo. Eta tacahe, ímercavainapa puiti yátupina eta émunasiracacahi nayehe ena echamuriana. Evapinavavare eta te esamureana eta émunasiracacairahi.

<sup>23</sup> Cape juca, eta ítaresirahi, tájina vahi íturuequenehahini eta iúchucuiraya. Puítipasera machichaheripahi ema Viya. Ítsivachaipahi eta ítaresirainihi eta esuapirahi eta máechajiriruva ema Viya. Éta ticaitarecaheyarehi; jéhevare eta máitavacacahi.

<sup>24</sup> Eta Sagrada Escritura, ani tacahehi eta táechajiriruva, májurehi ema víyarahaini profeta Isaías: “Eta vítaresirahi viti achaneanasami te juca apaquehe, vicutihi eta táimarusira eta muiji. Tijurucapa, tásicha tiájjipa. Eta vitumevainihi étapa eta vítupajijiasiravainihi, titavayare tacutihi eta flore: tépunehapa, tijiyupa, témiricapa. Étasera eta máechajiriruva ema Viya, jéhevare eta máitavacacahi” tacahepa.

<sup>25</sup> Eta juca máechajiriruva ema Viya, étaquenehi eta emetasivanahi apesa táuripa eta éhisirahi.

## 2

<sup>1</sup> Eta tacahe, támutupa ínajica eta evainararajivanainihi, tamutu eta ecaetemaraivainihi, eta apipiemairahénihí, eta ecapinaruraivainihi, étapa eta échajivanainihi.

<sup>2-3</sup> Puiti, eta ímatiraripahi yátupi eta máurivahi ema Viya, tijurucainapa puiti eta esuapirayare eta máechajiruvana. Ecutinapa eta najurusira ena amuyana. Ánipichichapachu técuhana, tiájicanaripavare te nacheneana ena náenana. Ene ecahehi éti, yátupina eta evarairaya ecaravahu eta máechajiruvu ema Viya, apaesa tiápajucavaya eta ímatiequenehairaina eta mapaneruana.

*Ema Cristo macutihí eta mari máepenacacahi*

<sup>4</sup> Yátupina eta ecasiñavaira me Viáquenu, taicha téavicavahi eta macasiñacarevahí, macuti eta mari máepenacacahi. Éma, náepuruquenehi ena achaneana. Manerejiruhisera ema Viya taicha téavicavahi eta macunachacarevahí mayehe.

<sup>5</sup> Éneripa ecahehi éti, ecutiripa eta márijahiana máepenacacahi. Tacahe puiti, táuripa eta ecachaneracacainapa. Macarichu ema Viya ema ecaematanecarya. Tivayuacaheya eta esuapajiraivaya eta máijarasiraheyarehi eta ématanepachuyare. Énerichuvare ecatuparahaipa sántuhénapa. Ecutiyare ena tiyujaracarähiana eta te Templo. Ecatuparahaipavare eyaseurahiya nayehe ena echamuriana. Étapa eta ecamavahuira me Viya, étaripa eta esuapajiraivahí, eta ehasulupayachirahí ema Viya, étapa eta ecunachirahí éma. Tamutu eta juca, ecurisamurechayare éma, taicha émarichuhi ema Jesucristo ticaitecapinaheyarehi me Viya.

<sup>6</sup> Eta Sagrada Escritura, ani tacahe eta máechajiruvahí ema Viya: “Núti névatacahi ema Nuchicha Cristo eta eyehe. Taicha nunerejiruhi éma eta macurjisirayarehi ena nuchanerana návaháruanaya. Téavicavahi eta macunachacarevahí eta nuyehe. Nácani ticasíñavanahí eta mayehe ema nuvane-ruyare, vahi máinajiacavacaimahi” macahepa ema Viya.

<sup>7</sup> Éti, téavicavahi eta macunachacarevahí ema Cristo eta eyehe, taicha yátupihi eta ecasiñairahí éma. Énasera nácani masuapajirairahanahí mayehe, náepuruhi éma, nacuti ena tépiyarecarähiana eta Templo, eta náepuruirahí eta mari ticunacharepanayare eta te peti.

<sup>8</sup> Nácani masuapajirairahanahí eta máechajiruvana ema Viya, tacutiqueneyarehi náepuruhi ema mavaneruhi ema Viya. Nacutíhi mácani achane máquipairuhi táichavenehi eta macayutetuirahí. Tisemahi, mavaraha térajicavayare eta tímicayutetuchahi.

*Ena machanerana ema Viya*

<sup>9</sup> Étisera manerejiruheripa ema Viya, machichaheripa. Tachichaheripavare eta mávasa. Sántuhepa máicha. Tituparacaheripavare éma eyaseuchinavacayare ena

achaneana eta mayehe. Majupahahehivare ema Rey. Puiti émapa macarichuhi téchahehi taicha mavecuhaque-neheripahi tayeha eta timapicu, tímisipaheripa tayeha eta táuricacarequene majaraiva éma, apaesa emetajiricaya eta táuricacarequeneana máematanerepi ema Viya.

<sup>10</sup> Cape juca ítaresirahi éti, vuíchaha ímatihini ema Viya. Eyerehichaha éma, vuíchaha échahini eta majapanuirahéhi éma. Puítisera evapinavahi eta ímatirahi yátupi eta majapanuirahéhi, taicha machaneraheripa.

*Yátupina eta ecaematanearayare ema Viya eta ítaresiraya*

<sup>11</sup> Némunaruqueneana nuparapenaveana, puiti éti, tímicutijiricavaichaha estranjerohehi taicha iáviharichaha te juca apaquehe. Váipasera áyeremahi eta eyanirayare eta iávasayare te anuma. Eta tacahe, nuconsejachahe: Vaipa táuricahini íchahini eta tajamurachaqueneana eta iáqueheana. Taicha téavicavahi eta tavarairahi tacamitiequeneha eta iáchanevana.

<sup>12</sup> Iúrihisera eta ecachanerarichaha ena achaneana te juca apaquehe máimatinahanahi ema Viya. Tayanapannerine ticatianacaheana, téchejicanahi eta eyehe ecutihi ena máuritaresirana náicha. Ímerecayaresera eta iúrivahi apaesa éna nacunachayare ema Viya, navarahainapa náehica ema Cristo taicha náimahahi eta táurivahi eta ítaresiranahi.

<sup>13-14</sup> Táichavenenahi eta éhisirahi ema Viáquenu, ímerecayareva eta esuapajiraiva mayehe ema Emperador Presidente, énapa ena prefectoana, énapa namutu ena apamuriana tuparairucana tanacaqueneanahi eta ley. Éna, ticatuparahanahi náicuñacavacayare ena achaneana váinarijiqueneana, téjecapavanahi. Énasera ena achaneana tiúriana titaurahianahi, ticaemunacasianayarehi.

<sup>15</sup> Taicha ema Viya, éta mavarahahi íchayare eta táuriqueneana apaesa ecamatinacaya ena máecharaireana nácani téchajicanahi eta eyehe.

<sup>16</sup> Yátupihi vaipa tapamiruhénahi éti eta esuapirahi eta mavanairipianaini ema Moisés eta iúchucuirayare. Váhisera ecuyunaca eta vahi tapamisirahenahini, táteterarua icha eta tamauriqueneana. Esapihasera ímerecavayare yátupihi eta mavanaraherahi ema Viya.

<sup>17</sup> Epicaurahiyare nayehe namutu ena achaneana. Émunajiricacayare nayehe ena vichamuriana. Ímerecapa eta epicau-chirahi ema Viya. Epicauchayarehivare ema Emperador Presidente.

*Vácuti ema Jesucristo eta macamichirahi eta mátajivana*

<sup>18</sup> Éti, te ecaematanerecapuca, esuapajirahiyare, epicau-chayareva nácani iáquenuanahi. Vahi nacucarichu esuapa

nácani tiúriana achaneana. Tácoticaca eta epicauchiraina nácani váinajarajianahi.

<sup>19</sup> Te ecatajiva náicha, tájinapa eta eviurevanainahini, tétavicavahi eta ecunachacarevaya me Viya te ecamichahi tamutu, taicha evarahahi ítaucha eta mavarahaquenehi ema Viya.

<sup>20</sup> Téhesera náicuñacahepuca táichavenénahi eta íchirahi eta tamauriqueneana, tájina ecunachacarevaimahi eta ecamichirahi, taicha tatupiruvahi eta ecaicuñairayare. Téhesera táimicuñacahepuca eta íchirahi eta táuriqueneana, ecamichirahi eta náichirahehi, tétavicava eta ecunachacarevaya te mamiráhu ema Viya.

<sup>21</sup> Taicha ema Viya, eta máichuirahéhi, mavarahahi ecutiyarehi ema Cristo eta macamichirahi tamutu eta mátajivana íchavenehi éti, mavarairahi ecaravahu eta máurivahi, ecutiyarehi éma eta macayehera paciencia.

<sup>22</sup> Éma, tájinahineni maviurevainahini, mapecaturainahipucaini. Nájinavare macaetemaquenénahíni.

<sup>23</sup> Te nacaetemajircapa, éma, vahi mácapaemachavacahíni, macatitiemahipucaini eta náemecatajivachirahi. Máechajicasera ema Maiya, máimahainehi éma. Taicha yátupihi eta máicuñasiravacaya ena témeccatajivachananahi.

<sup>24</sup> Yátupihi ema Cristo ticaicuñahi víchavenehi víti eta vícuñayaréni vícuchinihi táichavenehi eta vipecaturana. Tétavicavahi eta mátajivana te máquehe eta náemetatasirahi eta te crusu. Macamichahisera tamutu, mavarahahi vaipa tacuvayuacahavi eta pecatu, tatupiruvayarehi eta vítaresiraina. Eta majorana, éta ticanaracaheyare.

<sup>25</sup> Eta ítaresirainihi acane éti, ecuti eta uvesa táemitiaru. Puítisera iávahácaripa ema Cristo, émapa tijaneacahehi, ticatiuchahehivare eta iáchanevana.

### 3

#### *Tiúriyare eta náitaresirayare ena nacaimaqueneana*

<sup>1</sup> Tacutiquene eti esenana ecaimaqueneana, epicauchayareva ena ímanaveana, apaesa mácani vahi masuapahini eta máechajiruvana ema Viáquenu, ecajimuyasamurechavaca táichavenénahi eta iúrivahi nayehe.

<sup>2</sup> Vaipa tágomesaimahi échajirica taicha náimahayare eta esuapajiraivahi nayehe, epicauchirahivare.

<sup>3-4</sup> Ímerecayareva eta iúriva yátupiquenehi, tásihaquenehi te esamureana, tímicutijircavahi eta iúrina eta emira. Tayapanepuca ichanaruheripa, iúrinachavaya te esamureana. Evayuchahini eta étupisirava eta ésamirisirava. Eta juca, tétavicavahi eta ecunachacarehi mayehe ema Viya. Vahi

étaparacaina eta evayuyujisirahipuca eta ecamuirihira étapa eta ecatatasirana, váhivare étaina eta ecayehera oro.

<sup>5</sup> Taicha acane ena vénarahana esenana náinapureanahi téhicanahi ema Viya, tacahehi eta náurinachiravahi eta náitaresirana, taicha yátupihi eta nacasiñavairahi mayehe ema Viya. Tásiba, tétavicavahi eta nasuapajiraivahi nayehe ena náimanaveana.

<sup>6</sup> Ecuyare esu vénarahana Sara. Suímerecahi eta susuapajiraiva mayehe ema suima Abraham, taicha ani sucahehi mayehe: “Náquenu eñi”. Tásiba éti, vahi ecupica eta esuapirahi ena ímanaveana. Ímereca yátupina eta iúrivahi nayehe.

<sup>7</sup> Étipa ajairana ecayenaqueneana, ejapanuyare ena eyenana. Ejaneacavare, échahi éna eta vahi túmenahini. Yátupinahisera eta émunasirahi éna, taicha ecuticacayare eta ejacapirayare eta ícuchihi eta ítaresiraya mayehe ema Viya te jena sácheyare. Te iuri nayehe, esamacareya te eyujaraca.

*Tiúriyare eta ecamichirahi eta iátajivana táichavenénahi eta ichirahi eta táuriqueneana*

<sup>8</sup> Ámutu éti, ácuticacahi eta epanereruana. Ejapanucaca, émunacacavare nayehe namutu ena echamuriana. Ecajirahi. Mánsuhénahi.

<sup>9</sup> Tijuricati natupiacahepuca, náumehahe, váhisera ecujicapa. Eyaseacachucha ema Viya eta náuricacarevaina. Taicha mavaraha ema Viya vijapanurahiyarehi víti, vicutiyyare éma eta majapanuraivahi. Tatarihiyare táitsivare viyehe máicha.

<sup>10</sup> Taicha ani tacahehi eta Salmo: “Mácani mavaralahi tiúritaresira te apaquehe, támputuyare sácheana tiúriya, vahi téchajijicaimahi tivayuarecaimahi. Váhivare ticaetemarecaimahi tépiyahirahimahi.

<sup>11</sup> Váhivare máichaimahi eta tamauriqueneana. Máichahisera eta táuriqueneana. Macamitiacahi eta semanereana.

<sup>12</sup> Ema Viya majaneaca ena náuriqueneana; tisamacareanahi eta nayujarasirana. Énasera ena tíchanahi eta tamauriqueneana, macatianaruhanahi éma” tacahepa eta Salmo.

<sup>13</sup> Nájina tíjaracavaimahi titupiacaheana te náimahahi icha eta táuriqueneana.

<sup>14</sup> Tijuricati natiarihipuca ena tictorianacaheanahi táichavenehi eta táurivahi eta ítaresirahi, tásiba, tétavicavaya eta iúricacareva. Váhivare ecupica eta jácani náichirahepuca, váhivare iávamirahuimahi nayehe.

<sup>15</sup> Íjaracavasera yátupi eta éhisira ema Viáquenu. Te nayasecahepuca eta tacayema eta éhisirahi éma Jesucristo, tiúrihi

eta ejicapravacaya tayehe eta ecuchapaquene. Mánsuhéna éti, epicaurahivare.

<sup>16</sup> Tátupiruva tamutu eta íchaqueneana, táurivare eta náimairahena namutu ena achaneana, apaesa ecamatinaca nácani téchajisiaracaheanahi eta táurivahi eta éhisirahi ema Jesucristo, nátsirihapaini eta náechajijisira.

<sup>17</sup> Te másapahipuca ema Viya eta náemecatajivachirahe táichavenehi eta iúrivahi, tacunachacareyare mayehe eta ecamichira. Tájinaserá ecunachacarevaimahi te ecaviurevahi.

<sup>18</sup> Yátupi ema Cristo, étaherichuhi vímicapacahi táichavenehi eta vipecaturana. Éma, téavicaya eta máuriva, matapiravarehivare. Tíjaracavahisera ticatajivaya víchavenehi víti váinara-jiqueneana, mavarairahi tiámahavi me Viya. Tépenahi eta máquehe, étasera eta máchaneva tímiyanavaichucha titareca.

<sup>19-20</sup> Tiyanavarepa máejirapanavacahi eta náchanevana ena náepenaqueneanaini nacaerataqueneanahi te infierno. Ticametarairupa nayehe ena nani náepenaqueneana antivuanaini, machamurianaini ema víyarahaini Noé. Ichapehinenihi eta macamichiravacahi ema Viya eta macuchapiravacahi eta nasuapirainahini, vahi náeñamavahini eta náimairahi ema Noé máepiyasirahi eta ichape pacure. Tacahe, te témiricapa eta ichapequene tiquiva, macarichuhi ema Noé ésupa esu mayena, énapa ena machichanaveana énapa ena nayenana, óchoanaichuhi ena tiúchucuhanahi tayehe eta ichapequene une.

<sup>21</sup> Tiuri puiti, eta une ticaeririjicavacahi ena masuapajirairahana, nímicutichahehi eta vícachasi. Eta vicaicachasirahi te víjaracavapa véhica ema Jesucristo, vahi étaparacaina táepachiakahavimahini eta viáquehe. Étasera eta vicaicachasirahi, étapa tímereuchahavi eta maperdonachirahaviripa ema Viya tamutu eta vipecaturana. Máepachinachinahaviripavare eta viáchanevana, tájinapa taviuchahavihini, eta visamiravahi te mamirahu. Yátupina eta viúchucuirayare táichavenehi eta máechepusirahi te máecari ema Viáquenu Jesucristo.

<sup>22</sup> Puiti éma, tiyanaripahi te anuma; téjacaripa te mavaure ema Maiya. Tétavicavahi eta masuapacarevahi nayehe namutu ena mayeheana ángeleana. Énapa ena váinarajiana, nasuapahivare.

## 4

*Eti éhicanahi ema Viáquenu, tituparacahe ecaratacavayarehi apaesa vaipa íchaimahi eta tamauriqueneana*

<sup>1</sup> Ema Cristo, ichapemurihi eta macatajivairahi eta máepenirahi te crusu. Macamichahisera éma tamutu. Éti apanavare, ecutiyare éma. Vahi iávamirahuimahi eta ecatajivairaya. Nímicutichaheyare eta mácani achane tépenapa, máinajicaripa eta pecatu.

<sup>2</sup> Eta tacahe éti, táichavenehi eta iúrujasirahi ema Jesucristo, tímicutijiricavaipa épenaipahini, ínajicaripavare eta pecatu. Puiti eta tápechiravaripa táitarecahini eta iáchanevana, tatuparacahi ecaemataneacayare ema Viya. Vaipa tivayuacahé mahi eta tajamuraraiva eta iáquehe.

<sup>3</sup> Tamapurujipa eta táetavisiravaripa eta áñoana eta íchirahi eta tamauriqueneana, taicha emaimatirahi ema Viya. Tamutuhi icha eta tájiparacana, tivayuacahehi eta tajamuraraiva eta iáquehe. Evayuchavahi eta esenamaréranahi étapa eta ecavaharasiva. Ecasamurehi eta íchira eta fiesta. Íchahi eta tájiparacana tamauriqueneana eta ejaneasirahi eta esiñarajiana achanemirana.

<sup>4</sup> Puítisera éti, vaipa ecasiriquimurihini ena émunacasareana. Vaipa íchaimahi eta táñemahiquene eta náitaresirahi. Ichapemurinehi eta náejasirahehi. Tásiha, téchajicanapa eta eyehe.

<sup>5</sup> Járabajapainapasera eta sácheyare nacayaseserehirayare te mamirahu ema Viáquenu, taicha éma yátupiquenehi eta macatuparahairahi eta vicayaseserehiraya víti, vítareruanacha ha énapa ena náepenaqueneana.

<sup>6</sup> Eta tacahe, ema Jesucristo ticametarairuhi nayehe ena náepenaqueneana, mavarairahi macuchucuhayare eta náchanevana apaesa nápechavahini náitareca te mamirahu ema Viya, tayanapane eta náeche máteji táitavapapuca tayehe eta tacaecarasiyahi.

*Yátupina eta émunajirisiracacaya, ítátijíricacayareva*

<sup>7</sup> Esamanuchaha, tiánehipa eta táitavirayare tamutu eta juca. Eta tacahe, ecaratacava eta epanereruana apaesa táurivaina eta eyujarasiranaya.

<sup>8</sup> Tiápajucavayarehisera ichape eta émunajirisiracacayare éti. Te yátupihi eta émunajirisiracacahi, máejerareya eta eperdonachiracacaya eta jácani ejecapiravana.

<sup>9</sup> Evapinavaya eta ejecapiracacaya, te epaipiuchacaca te epenana.

<sup>10</sup> Ema Viya tíjaracahevacularipa eta ítucaquenepachuhi. Tacuhe, yátupina ítauchaya eta ecaemataneasiracacahi te mami- rahu.

<sup>11</sup> Eti máimitureana ema Viya eta échajisira, ecuneuchava échajica yátupi eta máechajiriruvana éma. Eti ímicatarahiana ítativaca ena echamuriana, vahi éñamaimahi eta etumeva

máijararuhehi ema Viya. Étavenehi éhisirahi ema Viáquenu Jesucristo, tamutu tauri eta jácani íchaqueneana apaesa nacunacha ema Viáquenu namutu ena tímahaheana. Éma, ¡tétavicavahi eta macunachacarevah! ¡Tétavicavahivare eta máitupajijasiravah! eta máechirahavihi tiuri! ¡Máitavacacahivare eta véhisiraya éma! Amén.

*Vahi ecuavamirahu eta ecatajivairaya táichavene eta éhisirahi ema Jesucristo*

<sup>12</sup> Némunaruqueneana nuparapenaveana, vahi ecuarami eta muracairaya eta iátajivanayare, tímicutijiricavayarehi táramicarehini eta eyehe.

<sup>13</sup> Evapinavachucha taicha ecapayayaracahi eta macatajivairahi ema Cristo apaesa evapinava te jena sácheyare eta enecapirayare éma eta máucupaisiraya mámirayarepahi eta majaraiva.

<sup>14</sup> Te náumehahepuca máichavenénahi ema Cristo, tétavicayare eta iúricacarevaya éti. Taicha tiávahácaheyare ema Espíritu Santo, másihaqueñehi te majaraiva ema Vicaiyaquene. Tayanapane náepurupuca éma, étisera ecunachahi éma.

<sup>15</sup> Te etiarihipuca eti ecatajivahi náicha, tacuijasera étaimahi tiviuchahémahi jácani ecapahivainahini, iámeraivainahipucáini, váhivare étaimahi tiviuchahémahi jácani ímisiapirasiravainahipucáini tayehe eta náichaqueneana nácani apanana achaneana.

<sup>16</sup> Étisera, te ecatajivapuca táichavenénahi eta éhisirahi ema Cristo, vahi ecutsiriha. Evapinavachucha, ehasulupayachavare ema Viya tayehe eta ecaijarerahi eta máijare ema Cristo.

<sup>17</sup> Puiti juca sácheana viávacurehi, táitecapaurehaviripa ichape eta vicatajivairayare, mavaráirahi ema Viya vímereuchava eta viúriva víti machichanaveana. Énasera ena masuapajirairahanahi eta náichuirahi ema Viya, páureanasami taicha tiápajucava eta nacatajivairaya, ichape eta náicuñaya.

<sup>18</sup> Ichape eta vicatajivairahi te juca apaquehe viti macuchucureanayarehi ema Viya. ¡Páureanasamisera ena achaneana masuapajirairahana, váinarajiqueneanahivare! ¡Ichapepanayare eta nacatajivairaya!

<sup>19</sup> Puiti viti véhicanahi ema Cristo, ichape eta vicatajivairahi. Váhisera vicainajiruvaimahi. Vímiyanavayarehi vicha eta táuriqueneana. Vácasíñava mayehe ema Vicaiyaquene eta majaneasirahavihivare, taicha éma, tétavicavahi eta máitauraivahi.

## 5

*Ema Pedro maconsejachavaca ena machamuriana*

<sup>1</sup> Tiuri puiti, nuparapenaveana, nuvaraha nuconsejachahe emutu eti pastoreana ejaneacanahi ena vichamuriana. Nútiripa pastornuhi. Énerichuvare testigonuhi eta nimararasirahi eta macatajivairahi máepenirahi eta te crusu ema Cristo. Esuapanuyare puiti eta nuconsejarapi taicha vicuticacayare tayehe eta vicatuparahairaya viávihayare te majaraiva ema Cristo te táitecapa eta machaviraya.

<sup>2</sup> Tauri eta ejaneasiravacaina namutu ena vichamuriana, taicha éna tímicutijiricavahi uvesanainahini mayehe ema Viya. Ítauchayare eta etuparacasivahi. Ema Viya mavarahahi evapinavahini eta ejaneasiravacahi. Vahi ecuyacujiequenahavaca. Váhivare ecupanerecha ecavacha. Evapinavaya-resera eta ecaemataneasiravacaya.

<sup>3</sup> Váhivare ímipananájicavacáimahi taicha vahi ecavanaravacahini. Ímerecayarehisera eta iúrvaya nayehe, apaesa éna náehica eta iúrvananahi.

<sup>4</sup> Apaesa te machavapa ema yátupiquene Pastor eta viyehe, tétabicavaya eta macunachiraheya. Tíjaracahenapa éma eta evachayare ícuchihi. Máitavacacainapa eta ecachaneraya éma te mávihahi eta te majaraivahi.

<sup>5</sup> Eti apanava eti amaperuana, nuconsejachahe: Esuapayare eta navanesiraheana ena víyarahana. Emutuyare esuapacaca. Mánshénahai. Taicha ema Viya vahi majapanuimahi ena ticasíñavavairicana. Tétabicavasera eta majapanuirvacaya ena mánsupanerueruanahi.

<sup>6</sup> Te ímereca eta emansuvavacahi tayehe eta ecasiñavairahi eta me Viya, éma, te máimahapa tiuri, ticatiuchahenapa te tamutu eta íchararacavaqueneana. Tásiba, tétabicavayare eta iúrisamurevaya.

<sup>7</sup> Te tatiarihipuca eta éñamiravana, emetaca tamutu ema Viya. Éma, ticanaracaheyare taicha tétabicavahi eta máeñamiravahi eta eyehe.

<sup>8</sup> Ecuneuchava yátupina. Ejaneacavahivare, taicha ema viánarahu Váinaraji, macuti eta táíñehiquene sárare tatanujiricahi eta tanicayarehi. Ene macahehi éma, matanucahi ena máquipairuanayare.

<sup>9</sup> Eta tacahe, túmehéna ecanarairayare éma, machu máquipaicahe. Ácasiñava muraca eta mayehe ema Viáquenu. Écharichuhu vahi ácarichuhini eta ecatajivairahi. Túmehénahai eta ecamichiraina, ecutiyare eta nacamichirahi ena vichamuriana ticavasanahi te tamutu avasareana.

<sup>10</sup> Ema Viya, tíchuhahavihi, mavarahahi visiapayare tayehe eta mávasa táichavenehi eta véhisirahi ema Jesucristo. Ánipirinesera eta ecatajivairaya puiti juca sácheana. Émasera ema Viya, téavicavahi eta majapanuraivahi. Éma, tímararacahehi eta ecamichirahi; tásicha éma, tíjaracahenapa eta evayuchiravainapaicha eta etumevaya. Tájina ticayayacahemahi máicha.

<sup>11</sup> Éma, ¡máitavacacahi eta macunachacarevah! ¡Macachuricahi eta máitupajijiásirava, máitavacacahivare éta! Amén.

*Eta táichecuaqui eta macartane ema Pedro*

<sup>12</sup> Ímati emutu ema vichamuri Silvano. Éma, téavicavahi eta máitauraivahi te tamutu. Puiti, é mahi ema tiáminanurihi eta juca nucartane. Núti, ánipichichahi nájurehi eta eyehe. Esamanusera eta nuconsejachirahehi. Eta numetasirahehi tamutu eta juca, nuvaraha nétumechahe eta véhiruhi, taicha yátupihi eta vicaijuheirahi me Viya táicha.

<sup>13</sup> Énaripa ena vichamuriana ticavasanahi te juca avasare Babilonia, téchajicaheana. Énerichuhivare éna, manerejiruanahi ema Viya ecutihi eti eta manerejisirahehi. Téchajicahehivare ema nuchicha Marcos.

<sup>14</sup> Núti, eta néchajirisirahehi éti nuchamuriana, nuvaraha nétserarecahe emutu, táicutiarahi eta tavayuchirahi eta némunasirahehi emutu éti.

Puiti nuyaseuchahehi me Viya, máijaracahehini tanaraca tamutu eta epanereruana emutu éti machaneranahi ema Viáquenu Jesucristo.

Tamutupa eta juca néchajiriruvahí eyehe.

## Eta macartane ema Apóstole Pedro, ticaijare **2 PEDRO**

<sup>1</sup> Nuti Simón Pedro, mavanaranuhi ema Jesucristo. Manerejirunuhivare mayehenuhi apóstole. Nucajurehe eta juca nucartane eti nuchamuriana taicha tétavicavahi eta evapinairavahi eta juca véhiruhi. Puiti éti apanava ejacapacarehivare me Viya, ecaicuchiripavare eta iúchucuiraya maicha ema Viáquenu Jesucristo.

<sup>2</sup> Puiti, nuvaraha tajurucaini eta ecaicutiaraira eta máemunasirahehi ema Viya, tásihaquenehi eta ímatiequenehairapaipahi eta mapanereruana éma, émapa ema Viáquenu Jesucristo. Tájinavare tahapapiricahini eta taurivahi eta epanereruana.

### *Eta náurivana ena téhicanahi ema Jesucristo*

<sup>3</sup> Táichavenehi eta vímatirahi ema Viya, tétavicavahi eta máitupajijiasiravahi eta macaemataneasirahavihi eta vítare-sirana, mavarairahi vétaviuchahini eta viúrivahi, vicutiyarehi éma eta masantuvali. Étahi eta mapanereruhi eta máichuirahavihi. Tásiha, visuapavanepa taicha vímahapa eta majaraivahi, vímahavarepa tétavicavahi eta máurivahi taicha camuriquenehi eta táuriqueneana máichaqueneanahi.

<sup>4</sup> Tíjaracavaripavare éma táetaviuchayare eta viúricacarevanayare maicha te jena sácheyare, tijamurachacareanahi tamutu. Muracahi eta vicasiñavairahi eta máitauchirayare tamutu eta júcana, taicha tétavicavahi eta máurivahi étapa eta majaraivahi. Táichavenehi eta ecasiñavairahi mayehe, tinacasamurechahehi eta ecasamurerayarehi étachucha eta táuriqueneana, ecutiyare éma eta macasamurerahi eta táuriqueneana. Vaipa tivayuacahemahi eta tajamurachaqueneanahi eta iáqueheana, taicha tétavicavahi eta tamaeperajichirahehi eta cape juca eta ítaresirana.

<sup>5</sup> Eta tacalhe, etuparahahi puiti, ímiyanavahini eta éhisirahi éma, epamicavavarehini iúriva nayehe namutu ena achaneana.

<sup>6</sup> Epamicavavaréni ecaravahu apaesa ímatiequeneha eta mapanereruana ema Viya, ecaravahuvarehini ecaratacava, étumechavavarehini eta ecamichira eta jácani iátajivana. Epamicavahivarení ácuti ema Viya eta masantuvali.

<sup>7</sup> Epamicavahivarení iápajucaya eta émunaraivahi nayehe ena echamuriana, ecajirayare. Epamicavahivarení eta

émunaraivahi nayehe ena apamuriana achaneana, tayana-  
pane vahi náehicahavihini.

<sup>8</sup> Eta tacaheyare eta ítaresirana éti, ítamuturusirahi tamutu  
eta júcana iúrivanahi, ecutipaipahi ema Viáquenu Jesucristo  
eta máurivahi éma. Énerichuvare te muracahi íjaracava ecara-  
vahupaipahi eta júcana, tiápajucavapaipahi eta ímatieque-  
nehairahi eta máimiturapiana, tiápajucavapaipahivare eta  
etumeva tayehe eta ecaemataneasirahi éma.

<sup>9</sup> Nácanisera vahi návarahahini nacaravahu, tímicutijiri-  
cavahi ena púchuquiana énainapa ticatajivanayare. Taicha  
náemitisicaipahi eta máepachinachiravacahi ema Viya tayehe  
eta táinapurénihi napecaturana náichaquenénihi cape eta  
náitaresirahi.

<sup>10</sup> Étisera, eti nuparapenaveana, nuvaraha échavahini eta  
máichuiraheli ema Viya, manerejisirahehi. Epamicavahini  
eta ímeresirahi yátupi eta machichaherahi. Eta ímiyaniravahi  
eta ecaravahuira eta juca néchajisihaqueneanahí, jéhesare,  
tájinapa tímíaquipacahémahi.

<sup>11</sup> Tásicha, tétavicavaya eta iúricacarevaya eta machimapi-  
raheya ema Viáquenu Jesucristo te macuchucuhahépa eta te  
juca apaquehe, mámiraheya eta te mávacureya. Maitavacacaya  
eta macachanerahaviya vimutu.

<sup>12</sup> Tacahe nútì, nupamicavahi puiti eta némechiraheya eta  
júcana, tayanapané nímatihehi eta ímatiraripahi, muracari-  
pavare eta éhisirahi eta yátupiqueneana ímitucasivanahí.

<sup>13</sup> Németeaca nétopicavahi eta juca nuconsejachirahehi  
puiti juca nítaresiraichaha te juca apaquehe.

<sup>14</sup> Taicha vaipa náyeremahicha eta nítaviraya. Ema Viáquenu  
Jesucristo tímimetacanuhi eta nunarasiravanenapa te macha-  
caya.

<sup>15</sup> Nuvarahahisera vahi ecuemitisica eta juca  
numetaruheanahí, tayanapanéinepuca népenaipa. Eta  
tacahe, nupamicavahi eta nímiájurecahe emutu, taicha  
nuvarahahi échayarehi tamutu sácheana.

### *Viti vímahahi eta majaraivahi ema Jesucristo*

<sup>16</sup> Viti vitupiruva eta vímitusirahehi tayehe eta táicharara-  
cavayare eta machaviraya ema Viáquenu Jesucristo, máimere-  
siraya eta maitupajijiasirava ichape. Vahi vépiyahirahimahi,  
váhivare vivehaquenéna te vichuti. Vímatipa yátupi, taicha  
vímahahi te viúquihana eta majaraivahi eta aquenucairahi.

<sup>17-18</sup> Taicha víti vitiarahihi te machacaya ema Viáquenu  
Jesús, vicachanehi éma tayehe eta cerro santo, te vineca-  
paequenehapa eta macaijareirahi éma eta Aquenucairaya.  
Visamahivare eta muhu ema Tata Vicaiyaquene eta macuna-  
chirahi ema Machicha. Ánipa macahehi: “Ema maca éma

yátupiquenehi Nuchicha némunaruquenehi. Tétavicavahi eta núrisamurevahi máicha” macahepa.

19 Víti vítametacahi eta nacayemaqueneanahi ena víyarahaini profetana tayehe eta Sagrada Escritura, eta náechajisihairahi eta aquenucairayarehi ema Viáquenu. Eta náimiturapiana tacutihi eta tajaraiva eta lámpara eta tamicauchirahavihi apaesa táuriyare eta vítaresirana te juca apaquehe tamaurivahi. Tacahe, étumechava tayehe eta ecuchapiravaya eta sácheyare te márabajapainapa ema yátupiquene eta majaiva, tétavicavayarepa eta mamicauchiraheyare tamutu eta esamureana. Tacahe, tituparacahehi esuapayare eta juca esamaqueneanahi vímitucasivanahi.

20-21 Nuvarahasera yátupina ímatiequeneha eta juca: Vahi táurica viveha te vichuti eta vímijachirahi eta tacayemaqueneanahi eta Sagrada Escritura. Vicatuparahahi vicaravahuyarehi eta yátupiquenehi. Ena víyarahaini profetana, váhivare navehaquenénahíni te nachutiana eta nájuequenehairahi eta máechajiruvana ema Viya. Ema Espíritu Santo, éma tímitucavacahi eta nájuequenehairaya éna tayehe eta Sagrada Escritura vímahaquenehi puiti.

## 2

*Natiarihiyare ena tépiyahirahianaya tímijachavanayare pastoreana*

1 Tiuri, acane natarihiwaresera ena tépiyahirahiana tímijachavanahi profetana te namuri ena náchucanaveanaini israelítana. Ene tacaheyare puiti, natarihiyareva ena tépiyahirahianaya, tépiyacavanaya pastoreana eyehe. Éna típicasicaheanayare. Témejecapavachaheanaya, apanaya eta náimiturapiana. Vahi émaimahi náechajisiha ema Viáquenu ema náimicaparuhivare. Énajivahi tíchavanahi natanucahi eta náicuñayare, táijahúchiravayarehi eta náemitiequenehairayare.

2 Camurianayare ena náemejecapavaruanayare, náehicainapa eta nayeherepi, táetaviuchirahi eta natuhusivahi. Náichavenehi éna, téchajicanainapa ena apamuriana achaneana, nacaecahinapa eta juca véhiruhi táurinaquenehi achene.

3 Ena nani, tímitucaheanaya eta náimiturapiana náepiyahiraivanahi, taicha navarahahi titucavana tivereacaheanainapa éti, taicha tétavicavahi eta najamurarasirahi eta plata. Tájinaserá náipuinayare, vahi táevejuacaimahi eta náicuñayare. Taicha acanevacapa eta tacaecherairahi eta náicuñayare.

4 Nacutiyare ena ángeleana téjecapavanahi. Tájina vahi mapardonachavacaimahi ema Viya. Máquijicavacapa tayehe

eta táíñehiquene infierno távhahi eta timapicuquene. Ticaitihanahi puiti te cadena. Te táitecapapa eta juicio, tiápajucavanainapa eta náicuñayare éna.

<sup>5</sup> Nuvaraha némechahe nayehe ena machamurianaini ema víyarahaini Noé eta acane, váhivare májapanuvacahini ema Viya táchavenehi eta namasuapajiraivahi. Macamiricapa eta ichape tiquiva náicuñahí. Téricanahi namutu ena nani achaneana, taicha náepuruhi eta máichuiravacahi ema Noé, táurivayarehini eta náitaresirana. Nacarichuhi tiúchuchanahí ema Noé, esu mayena, énapa ena sáisiqueneana machichanaveana.

<sup>6</sup> Nuvaraha némechahevare nayehe ena ticavasanainihi te avasare Sodoma, étapa te Gomorra, váhivare majapanuvacahini ema Viya. Macamiricahi eta yucu, náicuñahí éna. Táijahúchavacapa tacamitiequenehavaca namutu. Títavanapa, amairihanecha tsimapa eta náitavirahi. Ema Viya máimerecahi eta juca, nayehe ena nájurureanapa te juca apaquehe puiti, mavarairahi máemechavaca ena achaneana váninarajipanerueruanahi te napicayarepuca.

<sup>7-8</sup> Téhesera te nataracu, matiarihi ema víyarahaini ticaijare Lot. Éma, tamutuhi sácheana ticatisamurevahí taicha máimairavacahi ena achaneana náichirahi eta tamauriqueñeana, masamirahivare eta náechajisihairahí eta titsirihacareanahí. Téñamavahivare éma eta máimairavacahi ena achaneana, natuhusivavacahi eta náitaresiranahí. Tacáhe, macuchucuhahí ema Viya, taicha éma Lot, téavicavahí eta máurivahí, tisuapajirahíhi mayehe ema Viya.

<sup>9</sup> Eta tacáhe, ema Viya téavicavahí eta macatiuchirahavi puiti, ticuchucuhahavi viti véhicanahí éma, tayehe eta viátacajívana. Énerichuvare yátuipihi matsecaripa eta náicuñayare nácani achaneana masuapajirairahanahí.

<sup>10</sup> Ema Viya, yátuipihi máicuñacavacayarehi namutu ena tivayuchanahí eta náechipejisirahí eta náqueheana taicha téavicavahí eta tavayuasiravacahi eta natuhusivana, énapa ena tépuruanahí ema Viáquenu eta émairahí téchavacahi. Ena nani, máeyajanahí. Mapicaurairahana, nájina návamirahuquenéna eta náumeharaiva. Nasapiha nacaecahivare ena ángeleana tiámana eta majaraivahí ema Viya.

<sup>11</sup> Apanasica ena ángeleana tiávianahí te mamirahu ema Viáquenu, vahi náijaracavahini nacajacharecahini ena váninarajiana, téavicavahinéni eta natumeva.

<sup>12</sup> Énasera ena nani tépiyacavanahí pastoreana, nacaeca-hisera eta téhicacareana namaitururequeneruanahí. Éna, nacutihí eta táitaresira eta sárare, tájina nacaicutiaraquenéna. Nájurupairuchucha te apaquehe. Éna, táuriavasahi eta justicia,

máegehahi náerataca táimicamacavaneyare. Tépenanayarehi nacuti eta táepenira eta sárare.

<sup>13</sup> Éna, náimicatajivachahi nácani apamuriana achaneana. Páureanasamisera éna, tiápajucavanayare eta nacatajivirayare.

Ena nani, tétupicavanahí eta náimairavahí, tiúrisamurereácavanahí eta nacavahairahí tamutu sácheana. Táitaurevaquenehi tétavicavahí eta natsirihacarevayarehi eta namaetupicushivanahí, eta nacasiriquirahehi te jácani énisiracacana ena echamuriana. Ticamapuravanahí ticurisamurechavana, navarairahí náituruca jácani najamurachaqueneana.

<sup>14</sup> Namutuchucha najamuracha nácani esenana. Tájina náipuina eta náesenamarévana. Náechemaha eta náiturusiraya súcani esena máejerarehi. Náimitucavare ena ajairana tájina náituruéqueneha, nacutiyare éna eta náesenamarevanahí. Tájina tivechuquihamahi eta nacapecaturairahí. Ecuñaraquisera eta náicuchihi éna.

<sup>15</sup> Témunasiricavanahí éna, taicha namaimatirahí eta achene nacaijuheya eta táuriquenehi. Nacutipahi eta mayeherepini ema maca achane Balaám, machichaini ema Beor. Éma, tétavicavahí eta majamurachirahí eta plata, mavachayare eta máichirayare eta tamauriqueneana.

<sup>16</sup> Ema Viya máimahahi eta tamaurivahí eta mapanereruhi ema Balaam. Eta tacahé, eta burro macaperaquenehi ema Balaam téchajicapa, tacajachahí ema Balaam. Éma, macaicutiarahí eta táchajiriruvana eta mapera. Enevanepa témitiacahi eta mapanereruhi tamauriquenénihi.

<sup>17</sup> Ena nánitájí achaneana nacutihi eta tiájicu eque. Nacutivare eta úcaji tamarairiruhi eta técaticava. Éna, jararihipa eta náicuchi náicuñayare tayehé eta tátetaviure eta tamapicuva.

<sup>18</sup> Ena téchajisiavanapa ticunachavanapa eta náichaqueneana napecaturanahí náiturrevanahí. Náiminajicapaipa nácani náiturevanapahi eta táurivainiripahi eta náehisirahí eta táuriqueneana, tichavanapaipa tayehé eta tamaeperajivanahí eta náitaresira.

<sup>19</sup> Éna, ánipa tacahé eta náechajiriruvahí: “Víti, nájina vísapaimahi tipamicahavi. Tacutirichuhi te vicha eta tamauriqueneana étapuca eta táuriqueneana. Vítijiva véchinavahí eta vítaresiraya” nacahehi. Éna, tímijachavanahí líbreana. Énasera tiápajucavanahí ticaeratanahí taicha eta tavayuchiravahí eta napecaturana étapa eta namaeperajivana. Nácani tavayuaruanahí eta napecaturana, vaipa énainahini náechinavahini.

<sup>20</sup> Tacutiquene nácani tínajicavanahí eta náehisirahí ema Viáquenu Jesucristo, tichavanapa tayehé eta tamaeperajivahí

eta náitaresirana te juca apaquehe, éna, tiápajupanavanapa eta nacaicuñairayare, taicha eta naviurevahi.

<sup>21</sup> Tiúripanaichuhipucaini vahi nacuimatihini eta táurinaquene véhiruhi, váchupa náimatiripahi eta tiúrina achene, tásicha tínajicavanarichahavare tayehe eta táurinaquene vanairipi najacapaquenénihi.

<sup>22</sup> Jucarihi eta náechajiriruva náchucarapi, ani tacahéhi: "Te tiáhica eta tamucu, támichavayarehi tanica eta táhiruha. Étapa eta cuchi, tamapuruji vícacahahini éta, taicha técarajicavayarehi te tiúraji". Ene nacahehi ena tínajicavanahí tayehe eta véhiruhi, tíchavanapa tayehe eta tamaeperajiqueneanahí.

### 3

*Vaipa tányeremahi eta machavirayare ema Viáquenu Jesucristo*

<sup>1</sup> Némuraruqueneana nuparapenaveana, apihepa puiti nímiamaréca eta juca nucartane. Eta táchajiriruvahí eta apinaquene nucartane, nuvarahahi nuconsejachahe, apaesa tacuija tahapapicahe eta éhisirahi ema Viáquenu.

<sup>2</sup> Nuvarahavare yátupina eta esuapiraina eta Sagrada Escritura nájureanahí eta acane ena víyarahahanaini santo profetana, étapa eta máimiturapiana ema Viáquenu Macatiurahiquene. Étarichuhivare vímiturapihi puiti eta eyehe viti apóstoleana.

<sup>3</sup> Tínapucayare nuvaraha némechaheyare eta juca. Te jena sache tánhipa eta títavirayare, tímerecavainapa ena achaneana ticaecahirahiana tayehe eta juca yátupiqueneana vicuchapaqueneanahí viti. Eta náitaresirahí éna, apanachucha eta tihapapiricavacahi eta náichirahí eta tamauriqueneana najamurachaqueneanahí.

<sup>4</sup> Áninapa nacaheyarecacha: "Táicharacava eta juca ecuchapaquenehi. Vuíchahacaru machavahini ema Cristo, ímijachquenehi tichavavaneyarehi. Vaipa tasuapacare eta machaviraya. Taicha puiti tacutirichuhi eta náitaresirainihi ena viáchucanaveánaini. Tanasirichuhi eta táchapaniravahi acane eta apaquehe. Vahi táitsivachavahini" nacahepa.

<sup>5-6</sup> Ena nani, vahi návarahahini napanerequeneha eta táitsivachiravahi maicha ema Viya. Jéhesare éma, eta acane, máechajiriruchucha eta máepiyasirahí tamutu eta anuma étapa eta apaquehe. Máechajiriruchuchavare eta táimeresiravahi máicha, eta tiájipahi té tupiecahi te une. Énerichuvare, te táchiquenepe, únehi eta náicuñahí máicha, macamirisirahí eta ichapequene tiquiva. Téricanahí namutu ena masuapajirairahanahí.

7 Numetacahe puiti: Ema Viya tiápechavayare máicuñacayare eta juca apaquehe. Yúcuyarehisera eta tacamitiequenahayare tamutu eta anuma étapa eta juca apaquehe. Taicha éma, manacaripahi eta máechajiruva, máicutichahi eta tayerevaya étapa eta távapahianahi. Jéhesare, te jena sácheyare, titapaicavacayare namutu ena achaneana masuapajirairahanahi váinarajianahi.

8 Váhivare ecuemitisica, nuparapenaveana, eta matuparaquihi ema Viya, vahi tácuti eta vituparesira viti achaneana. Éma, étana sache matuparacahi, vítisami mil áñoripa eta vitupachirahi tayerevaipa.

9 Éma, manacahi eta juca tayerevahí, mavarairahi macuchapayare ena achaneana eta náeneuchiravayare mayehe. Vahi tácahequenénahini eta juca tátaresirahi maicha eta apaquehe. Ichapemuri eta macayeherahi paciencia eta viyehe, mamavarairahi vámutuhichaini vémitiequenéhíni. Nararihisera ena achaneana téjecapavanahí te napanereruana. Eta náimairahi eta mayerevahí ema Viya eta máicuñasiravacayarehi, náimijachahi vaipa maratahaimahi máicuñaca eta juca apaquehe.

10 Esamanuchaha. Te táitecapapa eta sácheyare táitavirayare tamutu maicha ema Viya, vahi vinecapauchavaimahi, taicha tacutiyare eta mayumurusirava eta máitesira mácani tiámerahí. Eta anuma, étapa tamutu eta távapahianahi, tamutuyare témitiaca. Ticaemayare muraca, tacutiyare eta tacae-maira eta ichapequene yucu te ichape curiche. Étapa eta tiávihanahi te apaquehe, tamutuyarehi titava, énapa ena távapahianahi. Tamutuyare tájuchayare eta yucu.

11-12 Tásicha éti, écharipahi eta juca táitavirayarehi eta anuma étapa eta apaquehe, tájuirayare tamutu te yucu. Puítipa tacamunuiipahi ámutuhini ésenicahini ema Viya, étaviuchahini eta iúrivahi eta ítaresirahi. Puiti, yátupi ávarahahini táitecapavanehini eta jena sácheyare. Eyaseaca ema Viya táitecapavane.

13 Taicha viti machaneranahi ema Viya, vicuchapainapa eta arairuyare anuma étapa eta arairuyare apaquehe, vícuchihi mayehe ema Viya. Tájinainapa eta pecatuana, vaipa tihapapicahavimahi. Tétavicavayarehi eta táuriva.

14 Eta tacahe, némunaruqueneana nuparapenaveana, puiti eta ecuchapirayare eta juca tacaitsivairaya tamutu, étume-chavayarechucha eta ecasiñairahi ema Viáquenu Jesucristo, apaesa tauri eta machimapiraheyare, tacuija etapiravainahi.

15 Échava yátupina eta macayeherahi paciencia eta viyehe ema Viáquenu taicha mavarahahi ticuchucuhahaviya. Étarí-

chuhívare tacahehi eta máimiturapihi ema apana viparape vémunaruquenehi Pablo, táichavenehi eta máitupajijiasiravahi máijararuhi ema Viya.

<sup>16</sup> Tamutu eta macartaneana máimiamareruanahi eta eyehe, étarichuhi táechajisihahi eta júcana. Jararihisera ticajerahi eta ecaicutiarairainahini. Nararihisera ena ticaravahuana apaesachicha, vuíchahavare túmevacaimahi eta náehisirahi. Náequepicasamichucha eta táimiturapi eta macartane. Nahapapicavare eta táimiturapihi eta apana Escritura. Táimicuñacavacayaresera eta nahapapisirahi.

<sup>17</sup> Eta tacahe, némunaruqueneana nuparapenaveana, vahi tacumapuriji eta ímatiequenehairahi eta juca, machu nahapapicahe eta epanereruana ena tivayuarahianatataji. Máchuvare náiminajicahe eta éhisirahi ema Viáquenu.

<sup>18</sup> Puiti, nuvaraha tajurucaparichuchaini eta ímatiraina ema Viáquenu Jesucristo. Tajurucaparichuchavaréni eta evapinairavahi eta máemunasirahehi ema Ticatiuchahavihi. ¡Tétavicavahini eta vijirauchira, vicunachahini éma, te vinarasirana, te véjamisirana! ¡Te visiapaínapa eta mávasa, vímiyanavayare! ¡Amén!

# Eta macartane ema Apóstole Juan, ticaijare **1 JUAN**

## *Eta viúrujiasira ema Jesucristo*

<sup>1</sup> Nuti Juan nímiamaureka eta juca nájure eta eyehe. Nuvaraha numetacahe éti, eta véchaquenehi mayehe ema Jesucristo, ema tijaracahavi eta echájirirucava ticaitarecarahi. Éma, matarihihi acane te tépanavapa tamutu. Tacahe, tiúcupaicahi, tímerecavahi eta viyehe. Visamapa eta máechajiruva. Camuri eta sácheana eta vímararasirahi éma te viúquiha. Vémamahaca te vivahu.

<sup>2-3</sup> Éma, matarihihi acane, manasiqueneripahi mayehe ema Maiya. Tiúcupaicapasereta viyehe. Víti vímatipa eta achánequenérahi éma. Tásicha, puiti vimetacahe eta juca vímahaquenehi étapa eta visamaquenehi. Vimetacahe taicha vivaraha iúrujicavahíni eta viyehe. Taicha víti viúrujicavahi mayehe ema Tata Vicaiyaquene émapa ema Machicha Jesucristo. Tásicha, éti apana iúrujicavahíni nayehe.

<sup>4</sup> Tásicha, nucajurehe eta juca taicha nuvaraha yátupina eta iúrisamurevaina.

## *Eta majaraivahi ema Viya*

<sup>5</sup> Vimetacahe eta máimitusirahavi ema Jesucristo. Eta juca eta macayemaquenehi: “Jararihi eta tijarahi mayehe ema Tata Vicaiyaquene. Tájina timapicuina mayehe, taicha mavayure eta máuriva”.

<sup>6</sup> Tiúri, te vinasirichupuca víti te timapicu, tásicha te vicahehipuca: “Viúrujicava mayehe ema Viya”, tásicha víti vépiyahirahiripa. Vahi viúrujicavahini mayehe, váhivare visuapahini eta mavanairipiana.

<sup>7</sup> Téhesera yátupina eta visuapira eta mavanairipiana, vinasirichuhi eta te majaraivahi ema Viya, tacutihi eta manasirarichuhi éma eta te majaraivahi. Tásicha, eta vinasirarichuhi eta te majaraivahi, viúritarecayarehi eta viúrujiusiracaca nayehe ena vichamuriana. Énerichuvare máepachinachayare tamutu eta vicapecaturairana, taicha te tépenapa ema Jesucristo Machicha ema Viya, máepusaicahi eta maitine eta máepachinachirahaviyarehi.

<sup>8</sup> Te vicahehipuca: “Tájina eta nupecaturaina”, tacahe, vahi vátupiemahini eta vipanereruhi. Vítijiva vivayuaracavahi víti.

<sup>9</sup> Téhesera vitupiruvahi eta vimetauresiravahi eta vicapetaturairana mayehe ema Viya, jararihiripa eta maperdonachirahavihi. Taicha tíjaracavahi éma eta maperdonachirahaviyare, vahi taeñamavacarehíni. Énerichuvare májahaya tépachinachahaviyare tamutu eta tamauriqueneana viyehe.

<sup>10</sup> Téhesera vicahehipuca: “Tájina nupecaturaina”, vépiaquenehahi ema Viya. Vímitijircapa ema máepiyahirahini. Vahi tátupiruvahíni eta vijachapirainahini eta máechajiriruva.

## 2

### *Ema Jesucristo, ema ticatajirahi*

<sup>1</sup> Nuchichanaveana, nucajurehehi eta júcana taicha nuvaraha vahi ecuapecaturaini. Téhesera íchapuca eta pecatu, mararihi ema ticatajirahi viyehe te mamirahu ema Tata Vicaiyaquene. Ticajare Jesucristo ema ticatajicahavirahi. Éma, matapiravare; tétavicava eta máuriva.

<sup>2</sup> Éma, tímicapacavahi táichavenehi eta macaepahairayarehi eta vipecaturana apaesa viúri mayehe ema Viya. Váhisera táchirihu eta vipecaturana víti. Táimicapacahi éma eta macaepahairayarehi eta napecaturana namutu ena achaneana te juca apaquehe.

<sup>3</sup> Tiúri puiti, vicasiñavahi eta vímatirahi ema Viya, taicha visuapahi eta mavanairipiana.

<sup>4</sup> Te nararihipuca ena nácani achaneana nacahehi: “Núti nímati ema Viya”, téhesera vahi nasuapahini eta mavanairipiana, tacache náepiyevahi éna. Vahi tásuapacarehini eta náechajiriruva.

<sup>5</sup> Étasera eta visuapirahi víti eta mavanairipiana tímechahavihi eta viávahásirahi ema Viya. Yátupihi eta vémunasirahi ema Viya.

<sup>6</sup> Víti vicahehi: “Viávaháca ema Viya”, tásicha, tacamuñuhi eta táurihini eta vítaresirainahini tacutehini eta táurivahi eta máitaressirahi ema Jesucristo.

### *Eta mavanairipi ema Viya eta vémunasiracacaina*

<sup>7</sup> Nuparapenaveana, nuvaraha némechahe te juca carta eta macavanairipirahavi ema Jesucristo eta vémunasiracacaya. Te tépanavainapa eta ecaijuherahi ema Jesucristo, vímitucheripa eta juca mavanairipi. Taicha tamutu eta juca vímiturapiana táuchurehi tayehe eta juca mavanairipi ema Jesucristo.

<sup>8</sup> Puítirichu nuvaraha tápajucava eta ecaicutiarairaya eta máemunasirahavihi éma. Manasirichuhi éma te majaraiva ema Maiya. Tásicha éti, te esuapa eta juca mavanairipi, te

émunacaca, epauchainapaipa eta majaraiva ema Viya. Téraji-cavainapa eyehe eta timapicu.

<sup>9</sup> Te nararihipuca ena nácani achaneana nacahehi: “Núti návihahi eta te majaraiva ema Viya”, téhesera nacatichahipuca ena nachamuriana, návirarichuhi te timapicu. Vahi na-pauchaimahi eta majaraiva ema Viya.

<sup>10</sup> Nácanisera náemunacahi ena nachamuriana, nanasirichuhi te majaraiva ema Viya. Tásicha, tiúrihi eta napaisirahi, apaesa vahi náejecapavahini.

<sup>11</sup> Énaserá ena nácani nacatichahi ena nachamuriana, nanasirichuhi éna te timapicu. Vahi náechahíni eta napaisirayare eta náitaresira, taicha eta timapicu vahi tásapahíni náimairiricahíni.

<sup>12-14</sup> Eti nuchichanaveana, nucajurehe taicha néchahi eta mapardonachiraheripahi ema Viya eta epecaturana émavenehi ema Jesucristo, táchavenehivare eta ímatirapa ema Tata Vicaiyaquene.

Eti ávinaveana, nucajurehe taicha éti ímatihi ema Jesucristo, ema matiarihiquenehi acane te tépanavapa tamutu.

Eti átinaveana, énerichuvare nímiajurecahehi taicha tanasirichu iúncalahi te esamureana eta máechajiruva ema Viya. Tásicha éta, tétumechahehi eta ecapaquechiraipahi ema Váinaraji.

<sup>15</sup> Emutu eti, vahi ecujamuracha eta tamauriqueneana te juca apaquehe. Váhivare ecujamuracha eta tatiarihi-queneana tayehe eta juca apaquehe. Te nararihipuca ena najamuracha eta tamauriqueneana te juca apaquehe, vaipa émainahini náemunaca ema Tata Vicaiyaquene.

<sup>16</sup> Taicha tamutu eta napanereruana ena achaneana te juca apaquehe, tájina táurivaina. Napanerechahi naicha eta tamauriqueneana. Najamurachaipa eta apayehe. Navarahipa nacayehe náimijachaipapuca tiúrihi eta náimairahi. Te ticaimahaqueneanapa, tisiñavanapa táicha. Eta juca napaneruana, vahi máijararuinahini ema Tata Vicaiyaquene.

<sup>17</sup> Numetacahe puiti: Títavainapaipa tamutu eta apaquehe. Énerichuvare titavainapaipa tamutu eta najamurachaqueneana ena achaneana. Vítisera, te visuapa eta mavarahaquene ema Viya, máichecuaraquirénapa eta vítaresira.

### *Ena ticatianacana ema Cristo*

<sup>18</sup> Nuchichanaveana, puiti tiánehinapa eta táichecuiraya, titavainapa tamutu. Vimetacaheripa eta máitesirayare ema maca achane ticaijare Ánticristo, ema ticatianacayare ema Viáquenu. Puítiripa nararihipa ena ticatianacanahi ema

Cristo, navarahaipa máitecavane ema Ánticristo. Tásicha, véchainapa eta tiánehinapa eta táichecuiraya tamutu.

<sup>19</sup> Ena tictorianacana ema Cristo náuchurehi eta viyehe. Váhisera viúmurivainahini éna. Taicha te viúmurivainahini, nanasirichuhini eta viyehe. Náerajruvaipahisera eta viyehe. Tásicha, vímatipa eta vahi viúmurivainahini.

<sup>20</sup> Ema Viáquenu Jesucristo tíjaracaheripa éti ema Espíritu Santo. Tásicha, emuturipahi ímati eta yátupiqueneana.

<sup>21</sup> Nucajurehehi táichavenehi eta ímatirahi. Nuvaraha ácaicutiaraquenénahini eta yátupiqueneana. Te esuapa eta yátupiqueneana, vahi ácutimahi ena tépiyahirahiana.

<sup>22</sup> Numetacahe eta juca taicha nararihipa puiti ena tépiyahirahiana, ena nácani nacahehi: “Ema Jesús vahira émaina Cristo Machicha ema Viya” nacahehi. Ena nácani achaneana, tictorianacanahi ema Cristo. Tacuti eta nácahehini: “Vahira émaina yátupiquene Tata Vicaiyaquene, vahivare émaina Maiya ema Jesús” nacahepainei.

<sup>23</sup> Numetacahe eta apaña: Nájina tiávahácanaimahi ema Tata Vicaiyaquene ena vahi nasuapahini ema Jesús eta machichairahi ema Tata Vicaiyaquene. Viávahácahisera víti ema Tata Vicaiyaquene vimutu viti visuapanahí ema Jesucristo eta machichairahi ema Viya.

### *Eta viávahásirahi ema Jesucristo*

<sup>24</sup> Tásicha, ecapanereruyaréchucha éti eta máechajiriruva, tamutu eta esamaqueneanaripahi eta te tépanavainapa eta ecasiñairahi ema Jesucristo. Eta ecapanereruira eta júcana, iávahácayare ema Tata Vicaiyaquene émapa ema Machicha.

<sup>25</sup> Taicha tíjaracavahi ema Jesucristo tíjaracahaviya eta vítaresira máichecuaraquirénapa.

<sup>26</sup> Puiti nararihi ena navarahayare tivayuaracaheana. Tásicha, nucajurehe apaesa ecuneuchava éti nayehe ena témejecapavarahiána.

<sup>27</sup> Éti, mávaháruheripa ema Espíritu Santo mavaneruhi ema Jesucristo. Tásicha, nájina apanaina ácamunuhini máimitucahehini, taicha tímítucahehi tamutu ema Espíritu Santo. Éma, yátupiquenehi eta máechajiriruva. Éma, vahi tépiyahirahi. Timetacahehi éma: “Ánasirichu iávahácahi ema Jesucristo”.

<sup>28</sup> Puítisera, nuchichanaveana, ímiyanava eta iávahásiraina éti ema Jesucristo apaesa túmesamurehéina éti, vahi ecutsirihia mayehe eta te machava.

<sup>29</sup> Éti échahi eta máetaviuchira eta máurivahi ema Jesucristo. Tásicha, ímatiyare ena apamuriana machichanaveana ema Viya, táichavene eta náichirahi eta táuriqueneana.

**3**

*Viti machichanaveana ema Viya*

<sup>1</sup> Nuchichanaveana, téavicava táramicareva eta máemunasingahavi ema Tata Vicaiyaguene. Yátupihi tímijarechahavihi "machichanaveana". Puítiripa yátupiquenéhi machichahaviripahi. Énasera ena apamuriana achaneana vuíchaha nácaicutiarahíni eta macachichairahavihi ema Viya, taicha vuíchaha náimatihihi eti máemunaraivahi éma.

<sup>2</sup> Némunacasareana, vécharipa eta macachichairahavipa ema Viya. Vuíchahasera tímechahavi éma eti viúrivayare. Vécharipavare eta vicutirayare ema Jesucristo eti te machava. Taicha vímahayare eta máimahiquene éma.

<sup>3</sup> Tásicha, vimutu víti vicuneyayare eti vicutiraya ema Jesucristo, puiti vácuticaca viúrihini tácuthihini eti máurivahi éma.

<sup>4</sup> Nuvaraha némechahe: Namutu ena tisipecaturana, nacaticha eti mavanairipiana ema Viya, étara eti juca napecaturahi.

<sup>5</sup> Ema Jesucristo, tájina matapiravaina éma. Vímatiripasera eti tímitecahi éma te juca apaquehe eti macaepahairayare eti vipecaturana.

<sup>6</sup> Víti, te viávahácahi ema Jesucristo, tituparacahavi vaipa vicuimisiapava tayehe eti pecatuana. Énasera ena ticapecaturarahiana vahi náimatihihi ema Cristo.

<sup>7</sup> Nuchichanaveana, vahi ecuisapava navayuacahe. Víti, te vímisiapavahi tayehe eti táuriqueneana, vímerecaya eti viúriva. Vicutinapa ema Jesucristo eti máetaviuchirahi eti máuriva.

<sup>8</sup> Te náimisiapava ena apamuriana tayehe eti tamauriqueneana, éta tímereuchavacahi eti machichairavacahi ema Váinaraji. Taicha ema Váinaraji, ema tinacuchahi táquenuhi eti pecatu. Numetacahe eti apana: Ema Machicha ema Viya tímitecahi eti macaepahairayare eti majarareruanahi ema Váinaraji.

<sup>9</sup> Víti machichahaviripa ema Viya. Váipa vímisiapavaimahi tayehe eti vicapecaturairana taicha vicutinapa éma eti tamajinairahi matapiravaina. Éma, tájina mapecaturaina. Eta macachichairahavihi ema Viya, vahi vicapecaturaimahi.

<sup>10</sup> Nácani vahi tíchanahi eti táuriqueneana, vahivare náemunacahíni ena nachamuriana, náimerecahi eti vahi machichavacainahini ema Viya. Tímerecavanahivare eti machichairavacahi ema Váinaraji. Vítisera, eti víchirahi eti táuriqueneana, étapa eti vémunasiracacahi, vímerecavahi eti macachichairahavihi ema Viya.

*Eta vémunasiracaca*

<sup>11</sup> Te tépanavainapa eti ecasiñairahi ema Viya, vimetacahehi eti mavarairahi eti vémunasiracacayare.

<sup>12</sup> Tásicha, vahi ecucuti éti ema Caín, mávaháruhi ema Váinaraji. Ema maca Caín macapacahi ema maparapéni Abel, táichavenehi eta máetaviuchirahi eta mavainarajivahi. Ema maca Abel, táimicapacahi eta masuapajiraivahi, máichirahi eta tauríqueneana.

<sup>13</sup> Nuparapenaveana, énerichuvare puiti nararihiya ena achaneana ticatichaheanayare éti apana. Váhisera ecuarami eta juca.

<sup>14</sup> Nuparapenaveana, véchahi víti eta viápechiravaya vítareca te táequenéraya eta vépeniraya. Vicaijuhenapa eta vítaresiraya máichecuaraquireya. Véchahi eta juca, táichavenehi eta vémunasirahi ena vichamuriana. Énasera ena yahi náemunacahini ena nachamuriana, nanasirichu. Vahi tiúchucuhananaimahi tayehe eta náepenira.

<sup>15</sup> Namutu ena ticatichanahi ena vichamuriana, nacutihi ena ticapahiana. Eta náichararacavayare ena ticapahiana, véchahi eta namauchucuirayare.

<sup>16</sup> Ema Jesucristo tímechahavihi eta máemunasirahavihi, taicha tíjaracavahi tépena vítivenehi. Tásicha víti, te jácani táichararacava, tituparacahavi víjaracavayare vépena énavene ena vichamuriana, vímechiraya eta vémunasiracacahi.

<sup>17</sup> Te mararihi ema mácani achane ticaimahaquenehi, te vahi achánesamurénahi mayehe ema machamuri eta macaijuherahi, ema maca váhivare máemunacahini ema Viya.

<sup>18</sup> Nuchichanaveana, vémunacacachucha vicajicaca eta vicayehequeneana. Vahi vicúyacujiriríha. Váhivare vicuepiyahirahi eta vémunasiracacairahi. Vahi tacucarichu eta véchajiriruva.

### *Vicasiñavaya te mamirahu ema Viya*

<sup>19-20</sup> Tásicha, eta te vémunacaca, véchahi eta yátupirahi machichahavi ema Viya. Téheserapuca tipicacararacavahi eta visamure, vicaesamiricayare eta visamure, taicha ema Viya tímahahavihi eta vicasiñairahi eta majapanuirahavihi. Taicha majapanurahiquenehi éma. Téchahi tamutu.

<sup>21</sup> Tiúripana, némunacasareana, te tájina eta tapicacararasi-ravaina eta visamure. Tásicha, vahi vipicaimahi eta viyasearpianaya mayehe ema Viya.

<sup>22</sup> Vicasiñavainapa eta máijarasirahaviyare tamutu eta viyasearuanaahi, taicha visuapahi eta mavanairipiana, vicurisamurechahi ema Viya.

<sup>23</sup> Eta juca mavanairipianahi: “Ecasiña ema Nuchicha Jesucristo, énerichuvare émunacaca”. Tacahéhi eta mavanairipi viyehe.

<sup>24</sup> Te visuapa eta mavanairipiana, viávahácahi éma, énerichuvare éma tiávahácahaviya. Véchahi eta matiarihirahi ema Viya eta viyehe, máicha ema Espíritu Santo mavaneruhi éma.

## 4

*Ena mávaháruana ema Espíritu Santo énapa ena mávaháruana ema Váinaraji*

<sup>1</sup> Némunacasareana, ecuneuchava nayehe ena tépiyacavana ticametarairuana. Taicha puiti nararihi éna. Vahi mavaneruanaina ema Viya, váhivare mávaháruanaina ema Espíritu Santo. Tásicha, te náitecapauchahepuca ena návaraha tímítucaheana, éti eyaseresinavaya te yátupipuca vanairucana me Viya. Esamayare te étarichupuca eta vímiturapianahi víti.

<sup>2</sup> Eta juca eta ímatiarayare ena mávaháruana ema Espíritu Santo te nacahehipuca: “Ema Jesucristo yátupiquenehi achane eta máuchusirahi”.

<sup>3</sup> Énasera ena apamuriana, te náñaukahipuca eta yátupirahi achane ema Jesucristo, vahi mavaneruanaina ema Viya. Éna, tictatianacanahi ema Cristo. Vimetacaheripa eta náitesirayare ena tictatianacana ema Cristo. Tiuri, puítirichu nararihipa ani viyehe.

<sup>4</sup> Nuchichanaveana, éti machichahe ema Viya. Néchahi núti eta emaisapiravahi tivayuacaheana taicha mávaháruhehi ema Espíritu Santo. Éma, túmepanahi mayehe ema Váinaraji, náehiruhi ena nani tivayuarahiana.

<sup>5</sup> Ena nani, tahapapiricavacahi eta tájiparacana tayeheana eta apaquehe tamauriqueneana. Tásicha, ena achaneana máehicarahanahi ema Viáquenu náuricaipa náitecapauchavaca.

<sup>6</sup> Vítisera machichahavihi ema Viya. Tisamararacahaviana ena tímaticana ema Viya. Énasera ena apamuriana máimati-rahana ema Viya, vahi tiúrimahi eta nasamirahavi. Tásicha, tímaticareanaya ena mávaháruana ema Espíritu Santo. Énerichuvare tímaticareanaya ena mávaháruana ema Váinaraji.

*Témunarahiquene ema Viya*

<sup>7</sup> Némunacasareana, tacamunu eta vémunacaca vámuntu. Taicha ema Viya tímítucahavihi eta vémunasiracacaya. Vimutu viti vémunacacanahi, étapa tímereuchahavihi eta macachichairahavihi ema Viya, yátupihi eta vímatirahi éma.

<sup>8</sup> Énasera ena nani vahi témunacacana, vahi náimatihini ema Viya. Taicha ema Viya, yátupiquenehi eta máemunaraiva.

<sup>9</sup> Éma, tímehahaviripa eta máemunasirahavihi, eta mavanesisrahi ema macarichuquene Machicha. Mavanecahi títeca te

juca apaquehe, tíjaracahaviyare eta vítaresirayare máichecuarraquirénapa.

<sup>10</sup> ¡Tétavicava eta máemunasirahavihi! Vítisera vahi vitívainahíni vémunaca ema Viya. Mativahi ema témunacahavíhi. Eta máemunasirahavi ema Viya, máijararecahi ema Machicha. Mavanecahi tépenayare te crusu étavene eta macaepahai-rayare eta vipecaturana.

<sup>11</sup> Némunacasareana, máetaviucha eta máemunasirahavi ema Viya; tásicha, vítipa tacamunu eta vémunasiracacáina.

<sup>12</sup> Nuvaraha ácaicutiara eta juca: Nájina tímahaina ema Tata Vicaiyaquene. Téhesera víti, te vémunacacapuca, tiávahácahaviya éma. Tásicha, vicutihi ema Viya eta máemunaraivahi éma.

<sup>13</sup> Puiti, viti viávahácahi ema Viya, énerichuvare tiávahácahavihi éma. Véchahi eta mávahásirahavihi ema Viya, máichavenehi ema Espíritu Santo mavaneruhi eta viyehe.

<sup>14</sup> Tásicha, viti vicachaneanaripa ema Jesús, vimetacavacapahi namutu ena vímanaruuanapahi eta máucupaisiraipa te anuma, taicha vivaraha náimatiyare namutu eta mavanesirahi ema Viya máiteca ema Machicha ticatiuchahaviyare vimutu viti achaneana te juca apaquehe.

<sup>15</sup> Tacahe, te nararihipuca ena nacahehi: “Ema Jesús machichara ema Viya”; tásicha, tímaticareeanahi éna, mávaháruanahi ema Viya, étapa eta návahásirahi éma.

<sup>16</sup> Víti véchahi eta yátupirahi máemunasirahavihi ema Viya. Eta tacahe, vicasiñavahi eta mayehe. Témunarahiquene éma. Tásicha, víti apana, te vémunarahipuca, viávahácaya ema Viya; éma apana, tiávahácahaviya.

<sup>17</sup> Vétaviuchaya eta vémunasiraya ena vichamuriana taicha eta viávahásirahi ema Viya. Tásicha, vahi vipicaimahi eta jena sácheyare te viyanapa te mamirahu ema Viya. Vahi vipicaimahi taicha machichahavíhi ema Viya, vicutihi ema Jesús eta macachichairahi ema Maiya, tayanapanepuca vítarecarichaha te juca apaquehe.

<sup>18</sup> Ena apamuriana achaneana tipicacaracavanahi taicha téchavanahi eta nacaicuñairaya. Vítisera vahi vipicaimahi taicha vicasiñavahi eta máemunasirahavihi ema Viya. Te yátupihipuca vicasiñahi, macaesamiricaya eta visamure eta vipisira. Tásicha, nácani tipicanahi, napicahi taicha vahi nácasinavahini eta máemunasiravacahi ema Viya.

<sup>19</sup> Víti vémunacahi ema Viya taicha ema mativahi témunacahavi.

<sup>20</sup> Te nararihipuca ena nacahehi: “Viti vémunaca ema Viya”; téheserapuca nacatichaichucha ena nachamuriana, éna tépiyahirahianahi. Taicha náimahanénipuca ena

nachamuriana, váhisera náemunacahini, ene tacahehi eta namaemunasirahi ema Viya máimahasiquenehi.

<sup>21</sup> Eta juca eta mavanairipihi viyehe ema Viya: “Émunacanu nuti yátupiquenehi Viya; émunacavare ena echamuriana”.

## 5

### *Virataha vínjica eta tamauriqueneana*

<sup>1-2</sup> Yátupihi eta macachichairahavipa ema Viya vimutu viti visuapanahi ema Jesús eta émairahi ema Cristo. Tásicha, vémunacaríne ema ticachichahavihi. Tásicha, te vémunaca ema Viya, téhepa visuapa eta mavanairipiana, tituparacahavi tacutiyareichu eta vémunasiraya namutu ena vichamuriana, taicha machichanaveanahivare éna, viparapenaveanahi te mavahuana ema Viya.

<sup>3</sup> Étavene eta vémunasirahi ema Viya, visuapaya eta mavanairipiana. Taicha vahi tágacujicaherehini eta visuapiraya eta mavanairipiana.

<sup>4</sup> Tásicha, viti machichanaveana ema Viya viratahaya vínjica eta tamauriqueneana eta vítaresiraya. Taicha tímicatacahaha-viripa ema Jesús táichavenehi eta vicasiñairahi eta mayehe.

<sup>5</sup> Viti visuapahi eta yátupirahi Machicha ema Viya ema Jesús. Tásicha, viti vélhicanahi éma, vicarichuhi viti virataha vínjica eta tamauriqueneanahí etá vítaresira.

### *Ema Jesucristo, Manerejiruhi ema Maiya*

<sup>6-8</sup> Te títecápa ema Jesucristo, tímerecavapa te juca apaquehe, une eta macaicachasiyahi. Énerichuvare eta máitine máepusairuhi eta máepenirahi te crusu. Tásicha, te vímatiequeneha eta macaicachasirahi te une, étapa eta máepusaisirahi eta máitine, témechahaviripa eta manerejiruichuhi ema Maiya. Eta une étapa eta máitine témechahavipa ema Jesús eta émairaquénehi Cristo. Ema Espíritu Santo, émapa titámetacahavi. Taicha ema Espíritu Santo yátupihi eta mametarapiana. Eta une, eta máitine, émapa ema Espíritu Santo, eta juca mapanaquene témechahaviripa. Ticuticacahi eta tacayemaqueneana.

<sup>9</sup> Tacutihi eta masuapacareva ema mácani achane tiuri. Tiápajucavasera tasuapacarevapana eta mametarapiana ema Viya mayehe ema Machicha. Ánipa macahe: “Émara nuchicha, némunaruquene ema maca”.

<sup>10</sup> Tásicha, te vicasiña ema Machicha ema Viya, visuapava vicasiñava te visamure eta yátupirahi eta mametasirahi ema Viya. Ena apamuriana vahi nasuapahini ema Viya, náimicu-tichapa máepiyahirahihíni ema Viya, taicha vahi nasuapahini eta mametarapianahí mayehe ema Machicha.

<sup>11</sup> Étarichuvare eta juca eta mamasirahi ema Viya, eta máijarasirahaviripa eta vítaresirayare máichecuarquirénapa. Ema Machicha ema Viya, éma téchahi eta vítaresira.

<sup>12</sup> Ena ticasíñanayare éma, titarecanayare. Énasera nácani vahi ticasíñanahi ema Machicha ema Viya, vahi titareca-naimahi.

*Eta vítaresirayare máichecuarqureyare*

<sup>13</sup> Tiuri, némunacasareana, nuvaraha échayare eta ítaresirayare máichecuarquirénapa, taicha ecasiñahi ema Machicha ema Viya. Eta tacahéhi eta nucajureirahehi.

<sup>14</sup> Tásicha, tájina taeñamavacarehini eta viyasearuanahi ema Viya, taicha véchahi víti eta masamirahavihi, taicha eta viyasearapiana tásihaqueneanahi eta vímatiequenehairahi eta mavarahaquenehi ema Viya.

<sup>15</sup> Tásicha, véchahi eta máijarasirahaviya tamutu eta viyasearuana, taicha véchahi eta tasamacarevahi eta viyasearapianahi eta mayehe.

<sup>16-17</sup> Tamutu eta tamauriqueneana náichahi ena achaneana, ema Viya máimijarechahi “pecatuana”. Jararihi eta pecatuana tíñehipana mayuchaticavaneña ema Viya eta vítaresira taicha. Jararihivare eta apaña pecatuana váhirichu tíñehicha. Te mararihipuca ema mácani vichamuri ticapecaturarahi, eta váhirichu tíñehicha eta máepeniraina; te ímahapuca eta macapecaturairahi, éti eyaseuchaya éma, mayehe ema Viya. Tásicha, ema Viya máijaracayare eta máitaresirayarechaha ema ticapecaturarahi. Téhesera mararihipuca ema mácani ticapecaturarahi eta tíñehipana mayuchaticavaneña ema Viya eta máitaresira, vahi nuvanecahe eta eyaseuchahini ema maca achane ticapecaturarahi.

<sup>18</sup> Vecha eta vahi vímisiapavaimahi tayehe eta vicapecurairana viti machichanaveanahi ema Viya. Taicha ema Machicha ema Viya tijaneacahavihi vimutu víti. Vahi márata-haimahi ticaetemahavi ema Váinaraji.

<sup>19</sup> Taicha véchahi eta macachichairahavihi ema Viya. Váhisera vámutu. Nararihihi ena apamuriana achaneana machaneranahi ema Váinaraji.

<sup>20</sup> Vítisera véchahi eta máitesirahi eta te juca apauehe ema Machicha ema Viya. Éma tímitupanahavihi. Émavenehi témesenica havihi mayehe ema Maiya ema yátupiquenehi Viya. Máichavene ema Machicha Jesucristo, viávahácaripa víti ema yátupiquenehi Viya. Émara ema macarichuquenehi yátupiquenehi Viya. Éma, tíjaracahaviya eta vítaresiraya máichecuarquirénapa.

21 Nuchichanaveana, vahi ecucasiñaraji; vahi ecucuti ena  
achaneana ticasifiarajiana eta achanemirana.  
Tamatupua eta juca néchajiriruvanahi eyehe.

## Eta macartane ema Apóstole Juan, ticaijare **2 JUAN**

### *Eta vémunaraivaya*

<sup>1</sup> Nuti Juan, víyarahanupa, nucajurevi eta juca nucartane piti ati. Néchajicavi piti manerejiruhi ema Viya. Énerichuvare némechajirisihavaca ena pichichanaveana. Eti némunaruhe-quenehi núti, tacuti eta náemunasiravaca namutu ena apamuriana titucana tisuapanata etá yátupiquene máechajiriruva ema Viya.

<sup>2</sup> Viti vémunacache taicha vicuticacahi eta visuapira eta yátupiquene máechajiriruva ema Viya. Máichecuaraquirénapa eta visuapiraya.

<sup>3</sup> Nuvaraha macatajicahehini ichape ema Tata Vicaiyaquene, émapa ema Jesucristo, Machicha ema Viya. Nájapanuhehini, náijaracahehini eta táurivaina eta epanereruana, taicha yátupiquenehi eta náemunasirahehi.

<sup>4</sup> Núrisamureinehi eta néchirahi eta nanerejisiravahi ena pichichanaveana, tiúrihi eta náehisirahi eta yátupiqueneanahi, tímiyanavanavare eta nasuapirohi eta mavanairipiana eta viyehe ema Tata Vicaiyaquene, taicha ene vicaheyarehi.

<sup>5-6</sup> Tiuri puiti, ati, nucajurevi, taicha nuvaraha némechavi eta juca mavanairipi ema Viya, étarichu eta vémunasiracacayare vimutu. Te vémunaca ema Viya, visuapaya tamutu eta mavanairipiana eta viyehe. Te tépanavainapa eta vicasiñairahi ema Viya, tivanecahaviripahi eta vémunasiracacayare. Tásicha puiti, eta ecaheyare eta émunasiracacairayare eta ítare-sirayare.

### *Ena tivayuarahiana*

<sup>7</sup> Nuvaraha némechavi eta juca, taicha nararihi te juca apauehe te viávihahi ena navarahahi ticaetemaheanaya. Ena nani, vahi návarahahini náimicaecheráchahíni eta máuchusirahi yátupiquenerahi achane ema Jesucristo. Ena nani, tivayuarahianahi, ticatianacanahivare ema Cristo. Vahi návarahahini véhica éma.

<sup>8</sup> Tásicha, ecaunevayare tayehe eta navayuarapiana. Échapavachucha éti, machu nacamitisicahe tayehe eta ícuchihi émata-nevachahi. Nuvaraha ejacapayare tamutu.

<sup>9</sup> Viti visuapahi eta máimiturapiana ema Cristo, viti viávahácahi ema Tata Vicaiyaquene émapa ema Machicha. Váhisera návahácaimahi ema Viya nácani vahi návarahahini

nasuapa eta máimiturapiana ema Cristo. Tasapihapa, náimitucahi eta nayehechiravarichu eta napanereruana.

<sup>10</sup> Tacache, te náitecapauchahepuca te iúrujisiavahi ena nácani, téhesera vahi nacuechajisiha eta máimiturapiana ema Cristo, tasiha, vahi ecujachapa te epenana. Váhivare ecuichuha: “Yare, ani, ítecapauchanu” vahi ecuquicha éna.

<sup>11</sup> Taicha te íchapuca eta juca, ticutinapapuca eta étirichuhi nachamuriana ena tivayuarahiana. Váhira ecuimisiapava nayehe, máchura étaina etapiravaina eta juca náichirahi éna eta tamauriqueneana.

*Eta táichecuaraquí eta macartane ema Juan*

<sup>12</sup> Tiuri, júcarihi apamuri eta numetaruheanaya. Vuíchahasera numetacahemahi puiti te juca carta. Taicha nucunevahi eta nítesiraya eyehe apaesa véchajiricavainapa eta vímanajirisiracacayare. Tásiha, viúrisamurénapa vimutu.

<sup>13</sup> Téchajicaviana ena suchichanaveana esu péchavi, ésurichuvare manerejiruhi ema Viya.

Tamutupa eta juca néchajiriruvahi eyehe.

# **Eta macartane ema Apóstole Juan mayehe ema Gayo, ticaijare 3 JUAN**

## *Ema Juan macunacha ema Gayo*

<sup>1</sup> Nuti Juan, víyarahanupa, nucajurevi piti némunaru-quenehi Gayo. Núti yátupihi eta némunasirávihi.

<sup>2</sup> Némunaruquene, nuyaseuchavihi me Viya táurivaina eta pémataneana. Énerichuvare nuyaseuchavivare táurivaina eta pítaresira, tácutini eta táurivaipa eta piáchaneva.

<sup>3</sup> Tétavicavahi eta núrisamurevahí, te títecapanapa ena vichamuriana, taicha timetacanuanapa eta pisuapirohi, péhisirahi eta yátupiqueneana echájirirucávana mayehe ema Cristo.

<sup>4</sup> Tájinarínehi tacutí eta núrisamurevahí taicha eta nusamairirisíraparacahi eta éhisirahi eti nuchichanaveana eta yátupiquene echájirirucava mayehe ema Cristo.

<sup>5</sup> Némunaruquene, tájina táichavahi eta pijacapirohi péchapajirisirahi ena vichamuriana, váhinéni pímatique-nevacáinahíni éna.

<sup>6</sup> Te títecapanapa ani te viúrujisiavahi, timetacahavia-nainapa. Tájina táichava eta piúriva, pímatasiravacahi eta nayanira ena vichamuriana. Eta picaheyare pímyianavaini eta piúriva nayehe, taicha eta juca víchirahi tacurisamure-chayare ema Viya.

<sup>7</sup> Taicha éna, táimpiaicahi eta nacometarairuirahi eta tiuri echájirirucava mayehe ema Jesucristo. Eta napaisirahi, tájina nayaseserecapahini éna nayehe ena achaneana masuápajirárahanaríchaha.

<sup>8</sup> Tásicha, tavarahaichu eta véchapajirícavaca ena nani, apaesa eta vímicatasihaya éna eta nacometarairuiraya eta yátupiquene tiuri echájirirucava.

## *Eta mamaurivahi ema Diótrefes*

<sup>9</sup> Nucajureripa ena pichamuriana te piávhahi. Marari-hisera ema Diótrefes. Éma máurica ticainapupuircava te namirahu ena achaneana. Éma, vahi masuapa eta vituparahana.

<sup>10</sup> Tásicha, te nutiarihinapa eta ara eyehe, núti nítameta-caheyare tamutu eta máichaqueaneana. Éma, téchajicahi eta viyehe. Cátichacarehi eta máechajiriruvana, váhisera másuapa-carehini. Váhivare tácarichu eta juca máichahi. Éma, vahi majacapaimahi ena vichamuriana tipaicanahi. Te natiarahi

ena navaraha najacapa, ema maca macavanairipi nacuija nacujacapa. Énerichuvare mavaraha macaerajica te emuri ena tivarahana najacapa.

<sup>11</sup> Némunaruquene, vahi picuicutipa ena tíchanahi eta tamauriqueneana. Picutiyaresera ena tíchanahi eta táuriqueneana. Taicha viti víchana eta táuriqueneana, viti machichanaveana ema Viya. Énasera ena tíchanahi eta tamauriqueneana, éna, vahi náimatihíni ema Viya.

*Ema Juan macunacha ema Demetrio*

<sup>12</sup> Nutuparacavi pijacapayare ema Demetrio. Namutu ncunacha éma, taicha yátupiquenehi táuriva eta mayeherepi. Núti apanavare énerichuvare nucunacha eta máuriva. Píti pímatinuhi, eta tatupiruvahi tamutu eta néchajiriruvana.

*Eta táichecuardaqui eta macartane ema Juan*

<sup>13</sup> Tiuri, jucarihi apamuri eta numetaruvianayare. Vuíchahasera numetacavimahi puiti te juca carta.

<sup>14</sup> Nútijapainapasera eta ara piyehe apaesa nímahavi. Tásicha, véchajiricavainapa eta vímanasirácacayare.

<sup>15</sup> Puiti, nuvaraha májaracavini ema Viya eta piúrivaina tayehe tamutu eta pipanereruana. Téchajicaviana ena piájiriareana. Tásicha, péchajisinanu émanapachuina ena nájiriareana núti.

Tamutupa eta juca néchajiriruvahi piyehe.

## Eta macartane ema San Judas, ticaijare JUDAS

<sup>1</sup> Nuti Judas néchajicahevacá emutu eti nuparapenaveana nuchamurianahi. Núti mavanerunuhi ema Viáquenu Jesucristo. Éti ímatihí ema nuparape Santiago. Núti nucajurehevacá eta juca nucartane taicha eti apanavare machanerahepa ema Tata Vicaiyaquene, taicha esuapahí eta máichuarapihi. Tétavicavahí eta majaneasirahehi táichavene eta iúrujasirahí ema Machicha Jesucristo.

<sup>2</sup> Puiti, nuvaraha tajurucaíni eta evapinairavavacahí eta máemunasirahehi ema Viya, étapa eta majapanuirahéhi; tájinavare tahapapiricahini eta táuriva eta epanereruana.

*Yátupiyare eta náicuñayare ena tivarahanahí náemejecapavacha ena vichamuriana*

<sup>3-4</sup> Tétavicavahí eta nuvarairahí nucajurehe emutu éti, nétumechaheyare eta éhisiraina ema Viáquenu Jesús. Puítisera nusamairiricapa eta náimisiapiravahí eta eyehe ena nácani tépiyahirahiana tímijachavanahí vichamurianahi. Tásicha, nuvaraha ecuneuchavaya nayehe. Étumechacaca, vahi ecusuapavaca ena nánitájiana, machu náemejecapavachahe. Táimiyanava tauri eta éhisiraina eta véhiruhi. Taicha ena víyarahana apóstoleana tímítucahavianahí eta máimiturapiana ema Viáquenu Jesucristo. Tásicha, vahi táuricahini vihapapiricahini. Énasera ena nani tépiyahirahiana, tétavicavahí eta namapicauraivahí eta me Viya. Éna tímijachavanapa eta vahi máicuñacavacáimahi eta náichira tamutu eta tájiparácana taicha tétavicavahí eta máemunasiravaca. Tavetijipa tíñemahipanapa jararihiva eta náimiturapi, ánipa nacahe: “Vahi tipicauchacare ema Jesús, váhivare táuricahini vácahehi émara Viáquenu. Te échajisihapuca éma, tatupiruvachucha ‘Jesús’ íchayare, taicha vahi émaina téchahavi víti” tacahehi eta navarahaquene éna. Maimahainepasera ema Viya eta náicuñayare éna, taicha acanevacaipa eta mametarapi ema Viya: “Muracaqueneya eta náicuñayare namutu ena ticaecahinuanahí eta némunasiravacahí”.

<sup>5</sup> Németeaca éti écharipa eta náichararacavahí ena viáchucanaveanaini israelítana eta náuchusirapa te avasare Egípto. Nuvarahasera némehahe émahi ema Viáquenu ticuchucuhabacahí namutu éna. Téhesera te taequenepa, tétavicavahí eta namasuapajiraivahí ena namutuyaráni. Tásicha, máitapaimuríhapa ena masuapajirairahanahí.

6 Énerichuvare némechahe eta náichararacavahi ena ángeleana masuapajirairahanahi. Ena nani aquenucarahanaini te anuma, sántuanainihi. Tímisiapavanapasera tayehe eta tamauriqueneanahi. Tásicha, ema Viya macavanairipipa eta náiyaracuha ena ángeleanaini téjecapavanahí eta te timapicu infierno, nacaerataiyahi. Puíticha váhiquene titurucavanaimahi tiúchucana. Te jena sácheyare mayaseseresihaya ema Viya, muracayare eta náicuñayare namutu éna.

7 Échahivare eta náichararacavahi ena achaneana ticavasanahi te apinaquene avasare Sodoma étapa eta Gomorra, étapa eta avasarechichana te tachacayanahi. Éna, tétavicavahi eta tavayuchiravacahi eta náesenamarevana. Navetijipa ena tivehacacana ajairacacana. Tacutiya eta táijahúchiravahí eta máemecharesiravacahi ema Viya ena ángeleanaini, macamericahi eta yucu, táijuchavacapa namutu ena nani achaneana váinarajiqueneana. Eta juca tavaraha yátupina vicaicutiarahi tayehe eta nacaicuñairavacayare eta te yucu infierno namutu ena tíchanahi eta tamauriqueneanahi. Maitavacacainapa eta nacatajivairaya.

8 Táitusiava, vahi náechavahini ena nani tímisiapavanahí eyehe. Navayucharichucha eta náechipejisirahi eta náquehe taicha tétavicavahi eta tavayuasiravacahi eta natuhusivana. Ena nani tépuruanahi ema Viáquenu eta émairahi téchavacahi. Nacaeahihivare ena ángeleana tiámana eta majaraivahi ema Viya.

9 Vahi táurihini eta juca. Nuvaraha némechahe eta jena sache máepenirahi ema víyarahaini Moisés, ema Váinaraji mavaraha mámayarehini eta máquehe. Ema Váinaraji macanarapa ema Arcángel Miguel, mavaraha máimiyusemaca. Váhisera masemahini ema Miguel. Váhivare macajacharecahini. Ánipa máicha: “Páurevisami píti. Pímahaya eta pícharacavayare maicha ema Náquenu” máichapa.

10 Énasera ena nánitátajiana achaneana, vahi napicaurahihini. Tíjaracavana nacaeahi jácani tájahánapuca váhinéni náimatieuqueneha. Éna nacutihí eta sárareana. Tinicanahi, téranahi, esenamareanahi. Nájina tatsirihaquenénahi. Étapa tímicoñacavacaya.

11 ¡Páureanasami ena nani! Muracayare eta náicuñayare te yucu, taicha nacutihí ema Caín eta mamasuapajiraivahi me Viya. Nacutivare ema Balaam ema témejecapavacachavacahi ena achaneana eta mavairahi eta plata. Nacutivare ema Coré ema tépuruhi ema mavaneruhi ema Viya. Étapa tivuchahi eta macapasirahi ema Viya.

<sup>12</sup> Tétavicavahi eta natsirihacarevahí eta náimisiapiravahí eyehe te iúrujisiravana eta énisirana ena echamuriana. Taicha éna, tájina napícauchaquenénahíni eta náurisamureravahí te nanisirana, náerirana. Éna, navarahahí epicauchavacayare éti, navarairahí ticaetemajiricaheana. Ena nánitátajiana nacutihí eta úcajiana te ichape sacherehi. Ticutimahi tiquivayarehi. Técaticavachuchasera eta támapahi. Tájina taquivahini. Nacutivare eta yucuquiana máhiriquireana te ticahipaipa eta apamuriana yucuquiana tachamuriana. Tamapurují eta vicuchapirahí eta náichirahí eta táuriqueneana taicha nacutivare eta yucuquiana tájiqueruana vinereruana, tépurihana. Váipaqueñe tímarucaimahi.

<sup>13</sup> Éna, nacutivare eta táepacuruha eta une te técaticavapa muraca eta ichape une, camurihi eta tarisasama. Tétavicavahi eta tatsirihacarevahí eta náichaquenehi eta tamauriqueneana. Nacutivare eta jarariquiana tiyejejerecavana. Jararihisera eta nacaicuñaiyayare eta ichapequene timapicu. Maitavacacayare eta nanasirayare.

<sup>14-16</sup> Ena nánitátajiana, tétavicavahi eta nacaecahirahí tamutu. Étachucha natanucahi eta najamuraraivana. Ticasíñavavaicana eta náechajirisiravana. Nacunachahi ena ticaimahaqueneanahí, navarairahí nacaetemajiricavaca éna. Ticaicuñayaresera, taicha ema víyarahaini profeta Enoc acane máimaha te mavapure eta náicuñayare éna. Ánipa macahe: “Nímahahi te nuvapure eta máitecapirayare ema Viáquenu te juca apaquehe. Mámayarepahi namutu ena mayeheana ángeleana. Tétavicavahi eta nasimutuvahi. Nacurujicavacayare namutu ena ticapecaturarahiana. Náimerecayareva tamutu eta naviurevana ena achaneana vainerajqueneana, taicha tétavicavahi eta náichirahí eta tamauriqueneana. Navetijinapa ena ticaecahirahiana me Viya, ichapepanainapa eta naviureva” macahepa. Tétavicavahi eta masuapacarevahí ema víyarahaini Enoc, taicha mámariequenení ema Adán, sántoquenehivare éma.

### *Ema Judas matuparacavaca ena machamuriana*

<sup>17</sup> Nuvarahavare némechahe, etí nuchamuriana némunaruqueneana, eta nametarapi ena víyarahana apóstoleana mayeheanahí ema Viáquenu Jesucristo.

<sup>18</sup> Ánipa nacahe: “Vahi táyerémahi eta náuchujisirayare ena ticaecahirahiana tayehe eta táuriqueneana máimiturapiana ema Viáquenu. Váhivare návarahahíni náinajica eta tamauriqueneana” nacahepa.

<sup>19</sup> Puiti numetacahe: Natarihipa puiti ena ticaecahirahiana. Tímaticareana éna, taicha navaraha náiputsicavaca

ena vichamuriana. Étachucha natanucahi eta najamura-raivana. Éna, vahi návarahahíni émainahíni máechavacahini ema Espíritu Santo.

<sup>20</sup> Étisera némunaruqueneana, étumechacacaya eta éhisirahi ema Viáquenu, taicha téavicavahi eta tasantuvali eta véhiruhi. Ísapavayareva tímitucae ema Espíritu Santo eta eyujarau-chirana.

<sup>21</sup> Tauri eta ítaresira, vahi ecuemitisicavahini eta táetaviu-chiravahi eta máemunasirahehi ema Viya. Váhivare ecuyacu-jihini eta ecuchapirahi eta jena sácheyare táepaniravaya eta vítaresira. Maitavacacayare eta vítaresiraya taicha eta majapa-nuirahavihi ema Viáquenu Jesucristo.

<sup>22</sup> Étumechayare ena echamuriana nácani tipanerecha-naripa náehica ena tivayuarahiana.

<sup>23</sup> Ena apamuriana, ena téhicanaripa eta náepiyahiraivana, epamicayare éna apaesa tachava eta náehisiraina yátupina ema Viáquenu. Ecuchucuhavacayare eta náejecapiravana, tacuti te vicuchucuhahi eta viyereruvana te tíjahúchavapuca tiju eta vipena. Ejapanuyare nácani muracaripahi eta náejecapira-vanahi. Ecuneuchavasera, machu napareacahe eta náejeca-piravana, taicha téavicavahi eta tamauriva. Epicayare éta.

### *Téavicava eta vicunachirahi ema Viya*

<sup>24-25</sup> Ema Viya, téavicava eta maitupajijiasiravahi. Macarichuhi éma marataha ticatiuchahavi tayehe eta vícuchinihi vícuñayarehini, taicha mavanecahi máepeninahaviya ema Machicha, ema Viáquenu Jesucristo. Puíticha téavicavahivare eta majaneasirahehi éti apaesa vahi ecuaquipaicavahini tayehe eta pecatu. Taicha mavarahahi máepachinachayare eta iáchanevana, tacuijahivaréni eviurevaina eta mámiraheyare te mamirahu te jena sácheyare. Téavicavainapa eta iúrisamurevaya te ímahapa eta majaraivaquenehi. Acane nacunachanahi ena ángeleana. Énerichuvare víti, téavicavayareva eta vicunachiraya éma vimutu víti, taicha téavicavahi eta máramicarevahi taicha ichapequenehi eta maitupajijiasirava. Vépuyumiraucha eta víjarasirava visuapayare. Maitavacacayare eta vitsiusirayare éma. Amén.

## **Eta mamecasivanahi ema Apóstole Juan te mavapure, ticaijare APOCALIPSIS**

<sup>1</sup> Ema Tata Vicaiyaquene mavarahahi tímimaticahaviyare eta táijahúchiravaya táichararacavayare eta apaquehe, apaesa vecha viti mavanaranahi. Ema máimechahi eta juca, ema machicha Jesucristo. Tásiba, ema Jesús mavanecapa ema ángele timetacanuyarehi nuti Juan mavanarahi. Eta tacahe, nájuchahi puiti eta juca apaesa écha éti apanavare eta táichararacavayare.

<sup>2</sup> Tacuti eta yátupihi eta nucametarairuirahi nuti eta máechajiriruvana ema Viya, étarichuhi eta máimiturapiana ema Jesucristo, puiti nutupiruva numetacahe eta juca numetacasivanahi eta máimerunuuanahi ema ángele.

<sup>3</sup> Tétavicava eta náuricacarevaya ena téchajicuhanaxa eta juca máechajiriruvanahi ema Viya, eta máimimatirunuhi. Énerichuvare tétavicava eta náuricacarevaya namutu ena tisamanaya tisuapanaya eta juca. Taicha tiánehinapa eta táitavirayare tamutu.

*Ema Juan macajure ena siétemuriqueneana machamuriana*

<sup>4</sup> Nuti Juan nucajurehe eti siétemuriana nuchamurianahi ejanereruanahi tayehe eta tinapaica te Asia. Nuvaraha macatajicahehini ichape ema Tata Vicaiyaquene, émapa ema Jesucristo. Táurihivaréni eta epanereruana. Ema Tata Vicaiyaquene matiarihiquenehi te tépanavainapa, puiti manasirichuhi eta viyehe, émarichuva manasiqueneyare te táitavapa tamutu. Te tamirahu eta máejasihahi trono, natarihi ena siétequeneana mayeheana arcángeleana. Navarahahivare eta iúricacarevainaini.

<sup>5</sup> Ema Viáquenu Jesucristo, ema yátupiquenehi tiámaparau-chahavihi eta juca vímitucasivanahi. Énerichuhivare ema máinapiruhi téchepuca te máecari, apanapa eta máquehe. Éma, yátupiquenehi Rey. Namutuhi macachuriacavacaya ena réyeana te juca apaquehe. Éma, yátupihi eta máemunasirahavihi, masipasinahavihi eta viáchanevana tayehe eta vipecaturana te máitine máepusairuhi.

<sup>6</sup> Énerichuvare, tinacahavihi te namuri ena manerejiruanahi tuparairucahaviyarehi eta mayehe, mavarairahi viyujaracaráhiyare mayehe ema Viya. ¡Támutuhini sácheana vicunacha eta máitupajijasiravahi! ¡Viáramiparacahini eta aquenucairahi! Amén!

<sup>7</sup> Ímaha, márajapainapa ema Cristo. Támayarepahi eta úcaji. Namutuyare nanecapa ena achaneana te juca apaquehe. Náimahainapa, tásicha, tipicanainapa. Tíyahahacavanainapa eta náimairayare, énaripa ena námariequeneana ena tijarachanahi, taicha téchavanahí éna eta náejecapiravahi ena náchucanaveanaini. ¡Ene tacaheyare! ¡Máitecapavane paini!

<sup>8</sup> “Nútira nunacuchahi eta táepaniravahi eta apaquehe. Nútirichuvare nécha eta táimiyaniravaya tiuri. Néchayareva eta táitavirayare tamutu” macahehi ema Viya, téavicava eta máitupajijasirava, máituruequenehahi tamutu. Éma, matiarihiquenehi te tépanavainapa, puiti manasirichuhi eta viyehe, émarichuva manasiyare te táitavapa tamutu.

*Eta máimeresirava ema Jesucristo mayehe ema Juan*

<sup>9</sup> Nuti Juan, nútirichu echamurinuhi. Nútirichuvare ecutiquenenuhi tayehe eta vicatajivairahi, vicamichahisera tamutu taicha téturechahavihi ema Jesús. Taicha vicunevaipahi eta visiapirorayare te mávasa, aquenucahaviya.

Núti, tiáquijicanuanahi tayehe eta tiúrupuhi ticaijare Patmos te etupiereca mar, táichavenehi eta nucametarairuirahí eta máechajiriruva ema Viya, néchajisihairahivare eta máijare ema Jesucristo.

<sup>10</sup> Te jena sáchequenehi lumincuquenehi, ema Espíritu Santo tímimahanuhi eta mavarahaqueneana tímechanu ema Jesucristo. Tacahehi eta táepaniravahi eta máimimahaquenenuhi. Tativapa nusamahi eta mahu ema émana te nuquecu. Muraca eta máechajisiranuhi. Tirurehucha eta nusamirahi.

<sup>11</sup> Ánipa macahehi:

—Piájuchaya tamutu eta juca pímháqueneanaya. Pímiama-recapa eta piájure nayehe ena siétemuriqueneana pichamuriana: ena tiávihanahi te Efeso, ena tiávihanahi te Esmirna, ena tiávihanahi te Pérgamo, ena tiávihanahi te Tiatira, ena tiávihanahi te Sardis, ena tiávihanahi te Filadelfia, énapa ena tiávihanahi te Laodicea\* —macahepa.

<sup>12</sup> Tacahe, néviurucavapa. Nuvarahapa nímahayarehi ema téchajicanuhi. Tásicha, nímahapa eta siete candelero tiúquiana, amairiha oro.

<sup>13</sup> Te enumuhumuri eta siétequene candelero, matiarihi ema achane vivasimahi. Tiúmají eta mamuiriha. Títécapa te máivapeana. Ichapeme eta máitijuhe, titécapa te matupa. Amairihavare oro. Eta máitijuhehi táicutiarahi eta aquenucirahi éma.

<sup>14</sup> Eta machutimaca amairiha tijapu, tirapepejicaquenehi. Eta máuquihana, téavicavahi eta tavayuhauquiaivahi.

\* **1:11** Tamutu eta jucana avasareana tiávihanahi te provincia Asia. Puíticha eta juca provincia ticaijare Turquía.

<sup>15</sup> Eta máivapeana tijanunupevachava, tacuti eta bronce eta tajanunusira. Eta mahu, téavicavahi eta tamuracavahi eta marurehuchirahi.

<sup>16</sup> Te mavahu vaure, macaratacahi eta siete jarairiquiana. Te majaca tiúchucahi tavasimahiyaréni eta espada. Táetaviuchahi eta tacasiriva, tínunapehivare. Eta mamira, téavicavahi eta táeramemesirahi tacuti eta sache.

<sup>17</sup> Nupicarinehi eta nímairahi. Náquipaicavapa te máivapeana. Tiánehi népenaini eta nupisirahi. Émasera manacapa eta mavahu vaure te nápusi. Máichanupa:

—Vahi picupicanu. Nútichucha nuti nunacuchahi eta táepaniravahi. Nútirichuvare néchahi eta táitavirayare tamutu.

<sup>18</sup> Núti yátupiquenénu nucaitarecarahi, taicha nuchavahi nítareca te taequenepa eta nacapasiranuhi. Puiti máichecuaraquirénapa eta nítaresira. Nútirichuvare necha ena tépenana. Nucaechepecayare eta náqueheana ena náepenaqueneana nácani níchuhaqueneanayare.

<sup>19</sup> Pití Juan, piájuchayare eta juca pímaqueneanahi puiti, étapa eta pisamaqueneanahi nutupararuvianahi nayehe ena pichamuriana, étapa eta táichararacavayare nímechaquenéviyare.

<sup>20</sup> Numetacaviya eta tacayemaquenehi eta siétequene jarairiqui nucarataruhi te vaure, étapa eta siétequiqueneana candeleroana óroquiana. Éta juca siete jarairiqui, énara ena ticametarairurahiana nayehe ena siétemuriqueneana pichamuriana. Eta siete candeleroana, énara ena siétemuriqueneana nuchanerana.

## 2

*Eta mame tarapi ema Jesús nayehe ena machaneranahi ticavasanahi te Efeso*

<sup>1</sup> “Picajureyare eta juca numetarapianahi ema ticametarairurahí nayehe ena pichamuriana ticavasanahi te avasare Efeso: Núti iáquenunuhi taicha núti nucaratacahi eta siétequene jarairiquiana te nuvahu vaure. Núti návihahi te tamuri eta siétequiqueneana candeleroana óroquiana, táicutiarahi eta néchirahehi emutu éti.

<sup>2</sup> Núti nímati tamutu eta íchaqueneanahi, étaripa eta tamuracavahi eta ecaemataneasiranuhi, ecamichirahi tamutu. Váhivare iúricahini ecasiriquihini ena achaneana váinarajiana. Váhivare ejacapahini ena tépiyacavanapahi apóstoleana, ímatiacavanehi éti ena tépiyahirahianapahi.

<sup>3</sup> Nímatihe eta ecamichirahi tamutu eta iátajivanahi táchavenehi eta ecaemataneasiranuhi núti. Vahi eyacujihini.

<sup>4</sup> Jucarihisera eta juca eviurevahi nuyehe. Puiti ecamitia-caripa eta émunaraivana. Vaipa tacuteihini eta émunaraivanahi te épanavainapa.

<sup>5</sup> Puiti nuvaraha étupiricayare eta juca, tachava eta émunaraivahi. Éneuchavaya tativaina apaesa íchavare eta táuriqueneana tacuti eta acane. Te vahi ecuetupiricava, nútijacaruvayare níteca, nítsivachayare eta candelero ícutiarahi eyehe.

<sup>6</sup> Éti, ecunachacarehi eta ecatichirahi eta tamaetupisiravahi eta nayeherepiana ena apamuriana téhicanahi ema Nicolás. Ene nuchahehi núti, nucatichahivare eta nayeherepiana.

<sup>7</sup> “Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucasiapaheyare núti tayehe eta paraíso ícumunahi me Tata. Nénicaheyareva eta tahi eta yucuqui tiama eta táuricacarevayare eta ítaresira.

*Eta mame tarapi ema Jesús nayehe ena machaneranahi ticavasanahi te Esmirna*

<sup>8</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Esmirna: Núti nunacuchahi eta tátepaniravahi. Nútirichuvare néchahi eta táitavirayare tamutu. Nuti nacaparuhi, nuchavahisera nítareca.

<sup>9</sup> Núti nímati tamutu eta íchaqueneanahí, eta ecatajivairahi, étapa eta epaureravanahi. Tétavicavahisera eta iúricacarevahí, tímicutijircavaipahi rícohénahíni. Nímativare vahi esemahini taicha eta épiyaequeneanahí nayehe ena tímijachavanahí machanerana ema Viya. Mávaháruanahí ema Váinaraji, machaneranahivare.

<sup>10</sup> Vahi ecupica eta ecatajivairaya. Numetacahe: Ema Váinaraji tímisiapaheya te cárcel eta máitsamaresiraheya te tímijacaheyarepuca. Ecamichachuchasera, taicha diésquenerichu sache eta ecatajivairayare. Nutuparacahecha: Ejicapaicayare tayanapanepuca nacapacahe. Núti níjaracaheyare eta táitsivayare. Tiúriyare eta ítaresiraya.

<sup>11</sup> “Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucuchucuhaheyare. Vahi ecatajivaimahi tayehe eta nacatajivirayare te yucu ena masuapajirairahanahi.

*Eta mame tarapi ema Jesús nayehe ena machaneranahi ticavasanahi te Pérgamo*

12 “Picajureyare eta juca numetarapianahi ema ticametarrairurahi nayehe ena pichamuriana ticavasanahi te avasare Pérgamo: Núti nítuca némecharecavaca nácani téjecapavana taicha nucayehe eta espada, táetavirequenehi eta tacasiriva.

13 Núti nímati tamutu eta íchaqueneanahi. Nímativare eta éñamiravahi taicha namutuyaréni ena echácayapenána téhicanahi eta máimiturapi ema Váinaraji Satanás. Váhisera Ínajicavahini, étumechavaichucha eta éhisiranuhi nútì. Étaripa te ímahapa eta nacapasirahi ema nuchaneraini Antipas, yátupiquenehi eta masuapiranuhi éma. Ena machaneranahi ema Váinaraji nacapacahi éma te jena iávihahi éti.

14 Jucarihisera eta juca eviurevahí nuyehe. Taicha ísapavaichucha natarihihi ena nanerejiruvana ena echamuriana vahi návarahahini náinajica nanica eta tinicacare nayujaraurehi te tamirahu eta nasiñarajiana. Tacutiquene esenamareanahi éna. Eta acane, ema máratátaji Balaam tímitucahi ema Balac eta máimiaquipaisiravacahi ena israelítana tayehe eta juca tamauriqueneanahi.

15 Énerichuvare nararihi ánaqui te emuri ena apamuriana váhivare navaraha náemitisica eta máimiturapiana ema Nicolás. Tétavicavahi eta nucatichirahi nútì eta máimiturapiana ema Nicolás taicha tétavicavahi eta tamaetupisiravahi.

16 Eta tacahe, éneuchavayare eti ejecapavanahi. Te vahi ecueneuchava, nútijapayare némecharepanaheyare tayehe eta tacasiriquene espada táuchurequenehi te nujaca.

17 “Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nénicaheyare eta ícuchihi me Viya eta ticaijare maná, tayumururevaquenerichaha. Énerichuvare níjaracahevacyare eta tijapu mari. Eta te mari tatiarihiyare eta ajureca arapiru. Nájinaseratímatiequenehaimahi. Macarichu ema ticayeheyare, éma tímatiyare eta máijare arapiru.

*Eta mame tarapi ema Jesús nayehe ena machaneranahi ticavasanahi te Tiatira*

18 “Picajureyare eta juca numetarapianahi ema ticametarrairurahi nayehe ena pichamuriana ticavasanahi te avasare Tiatira: Núti Machichanuhi ema Tata Vicaiyaquene. Núti nímatihi tamutu, taicha tijarahivaca eta núquihana, tétavicavahi eta tavayuhauquiaivahi. Eta nívapeana tijanunucavacava tacuti eta bronce eta tajanunusirahi.

19 Núti nímati eta íchaqueneana. Nímativare eta émunasiranuhi, eta esuapiranuhi yátupi, eta échapajirisirahi ena

achaneana, étapa eta ecamichirahi. Nímativare muracapanaipahi eta ecaemataneasiranuhi. Tiápajucavaipahi puiti tayehe te épanavainapa.

<sup>20</sup> Jucarihisera eta juca eviurevahи nuyehe. Ísapahi tisiapamurihahe esu esénatátaji. Ésu, vahi táetupicavahini eta suyeherepiana, sicutihi esu Jesabélnitataji eta acane. Tímijachavahi mavanara ema Tata, suémejecapavachahisera ena nuchanerana. Suímitucavacahi naicha eta piesta, tásicha nanicavare eta tinicacareana nayujaraureanahi te tamirahu eta nasiñarajiana. Suímitucavacavare eta natuhusivayare.

<sup>21</sup> Núti íchapemurihi eta nucuchapirahi ésu, eta suéneuchavahini, apaesa suínajicahini eta sutuhusiva. Váhiquenesera suvaraha suínajica eta suyeherepi.

<sup>22</sup> Puiti níjaracayare eta suícuñayare. Ticajumayare apaesa suíveca te sucamane. Ichape eta sucatajivairaya. Énerichuvare ena suíturevanahi, nícuñacavacayareva muraca, te vahi nacuínajica eta suíchaqueneasanahi ésu.

<sup>23</sup> Énerichuvare ena suchichanaveana níjaracayare eta najumayare, nímicapasiravacayare. Tásicha, échainapa eti nuchaneranahi eta nímatirahi tamutu eta epanereruana, eta te esamureana éti. Nímahaineapasera núti eta nícharacacayare ena téjecapavanahи, étapa tiámayare eta náichaqueneana.

<sup>24-25</sup> Tájina apanainahini eta eviurevahи nuyehe. Núrisamurehi eyehe eti matapiravareanahi, eti vahi éhicahini eta suímiturapiana esu esénatátaji. Váhivare ávarahahini íjaracava éhica eta suhiapemarevanahi, susiñavavairisirahi eta máimitusirahi ema Satanás. Tásicha puiti, nutuparacahe eti nuchanerana iávihanahi eta te avasare Tiatira: Ecaratacava muraca tayehe eta juca éhiruhi. Ecunenuyare eta nuchaviraya.

<sup>26</sup> “Emutu eti ecamichanahi, ímiyanavahivare eta éhisiranuhi, váhivare ínajicahini eta ecaemataneasiranuhi, núti níjaracahénapa eta tuparairucairahénapa tayehe eta avasarena.

<sup>27</sup> Ecuitinuyare núti eta máijarasiranuhi ema Tata Ticachichanu eta tamuracavahi aquenucairaranuhi. Ene ecaheyare éti. Muracayare eta aquenucairaheyare. Ecaratacayare eta etsucurupayare fiérroqui. Esuapacareyare muraca.

<sup>28</sup> Tétavicavayare eta ejaraivayare nicha núti, taicha nujupahaheyarehi éti.

<sup>29</sup> Ema Espíritu Santo tímitucaheyare eta juca numetrapiana. Emutu eti nuchaneranahi, etupiruvayarehi esuapa.

### 3

*Eta mame tarapi ema Jesús nayehe ena machaneranahi*

### *ticavasanahi te Sardis*

<sup>1</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Sardis: Núti néchavacahi ena siétequeneana arcángelleana, étipa eti ecametarairurahiana taicha nútia tavamiraurehi eta siétequeneana jarairiquiana. Núti nímati tamutu eta íchaqueneana. Ena achaneana tímijachanahi tiúrihi eta ecaemataneasiranuhi. Nútisera nímararacahi eta esamureana. Nímatihe tiánehi eta ínajisirainapa eta éhisiranuhi.

<sup>2</sup> Ecaunechavayare apaesa vahi ecuemitiaca eta éhisiranuhi. Taicha nímararacahi nútia vahi tátupiruvahini te esamureana eta ecaemataneasirahí ema Tata.

<sup>3</sup> Puítisera, éneuchavayare apaesa tacuijapa ecuichiravaina. Échavayare éti tamutu eta ímitucasivanahi. Yátupina eta éhisiraya. Te vahi ecuetupiricava eta epanereruana, nútijapayare tijahúchavayare eta nítecapirayare némecharepanaheya.

<sup>4</sup> Váhinéni ámutuhini éjecapavahini éti ecavasanahi te Sardis. Natiarihihi ena matapiravareanahi, váhivare náechipejicavahini. Ena nani, níjaracavacainapa eta namuirihayare tijapu. Ticachanenuanayareva taicha tatuparacahi eta návihirayare eta nuyehe.

<sup>5</sup> “Emutu eti ecamichanahi, ímyanavahivare eta éhisiranuhi, níjaracaheyare ecamuirihayare eta tijapu. Váhivare nucaepahaimahi eta íjareana tayehe eta libro tiama eta nalista ena náitareruanayare. Nímmatichaheyareva eta me Tata, énapa ena ángeleana.

<sup>6</sup> Ema Espíritu Santo tímitucaheyare eta juca numetarapiana. Emutu eti nuchaneranahi, etupiruvayare esuapa.

### *Eta mame tarapi ema Jesús nayehe ena machaneranahi ticavasanahi te Filadelfia*

<sup>7</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Filadelfia: Núti yátupiquenénuhi Viya, yátupiquenehivare eta nusantuva. Nucarichu nútia néchahi eta tapajacura eta arairuyare avasare Jerusalén, tacuti eta máechapajirisirahí ema náchuaini rey David eta táinapuiruinihi Jerusalén.

<sup>8</sup> Núti nímati eti íchaqueneanahi eta ecaemataneasiranuhi. Nímahahivare eta vahi camurihénahini. Nímatihivare eti ecatajivairahi, váhisera ecainajiruvahini eti éhisiranuhi. Ímyanavahivare esuapahi eti nímiturapiana. Tásiba, puiti níjaracaheyare eti apana ématanerépiya. Nájina nísapaimahi tihapapiricaheánaimahi eti ítauchiraya éta.

<sup>9</sup> Núti nítahacavacayare ena israelítana tépiyacavanahi machanerana ema Tata, machaneranahisera ema Váinaraji. Nucaepuyucavacayare te emirahu, apaesa náimati eta némunasirahehi.

<sup>10</sup> “Éti, ítauchahi eta nuvanairipi eta ecamichiraya tamutu. Eta tacahe, nujaneacaheya nútí apaesa vahi tacuimivehahe te táitecapapa eta nucaetemajirisiravacayare namutu ena achaneana távapahianahi te juca apaquehe.

<sup>11</sup> ¡Tiánehipa eta nuchaviraya! Étumechavaya eta éhisirahi, machu émepurureca ejacapirayare eta ícuchianayare.

<sup>12</sup> “Emutu eti ecamichanahi, ímiyanavahivare eta éhisiranuhi; nítsirijicavayare eyehe. Máichecuaraqureyare eta ecachaneraya ema Tata te mávasa. Iámayare eta máijare, étapa eta níjare arairu. Iámayarevare eta táijare eta arairu Jerusalén, taicha tachichahevacaya.

<sup>13</sup> Ema Espíritu Santo tímitucaheyare eta juca numetarapiana. Emutu eti nuchaneranahi, etupiruvayarehi esuapa.

*Eta mame tarapi ema Jesús nayehe ena machaneranahi ticavasanahi te Laodicea*

<sup>14</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Laodicea: Núti náichasa ‘Ema titaurahi’. Námapahi eta yátupi-queneana táuriqueneana echajirirucava. Núti tájinaquenéhi néjequiha. Núti nítouchahi tamutu eta mapanereruanahi ema Tata, te népiyacapa eta anuma étapa eta apaquehe.

<sup>15-16</sup> Eta juca numetarapi eyehe éti: Nímati eta íchaqueneanahi. Éti apáesasajíruichucha eta éhisiranuhi. Éti, vuíchaha ímereuchavahini eta ecatianasiranu; váhisera yátupinahini tatupiruvahini eta éhisiranuhi. Tacamunuinehi átupiruvahini, yátupinahini ímerecava eta éhisiranuhi. Machu étaina taviuchahe eta nucaerajisrahéna nuyehe.

<sup>17</sup> Taicha éti ímijachavahi rícohe, tájina íchiravainahini, tájinavare ácamunuhini. Vahi esamauchavahini ichapemurihi eta éjapanuravahi. Váhineni rícohennahini. Etihinéni ecaijare páureana, púchuquiana, mamui riareana.

<sup>18</sup> Nuvaraha nuconsejachahe: Te evarahapa yátupina eta erricovayare, íteca eta nuyehe. Jéhevare nútí núrichaheyare, ecutiyare ena ticayeheana eta yátupiquene oro. Jéhevare nútí níjaracaheyare eta emuirihayare tijapu apaesa vahi ecutsirinha te numirahu. Nétsarachaheyareva eta ipuruji apaesa ímairirica.

<sup>19</sup> Núti nétpiricaya eta napanereruana namutu ena némunaruana te náejecapava. Te vahi nacusuapanu, némecharecayarehi. Tásicha éti, tituparacahehi étupiricavane

eta epaneruana, étumechavavare tayehe eta éhisira. Éneuchavavare apaesa tacuija ecuichiravaina.

<sup>20</sup> Núti nujapanurahi. Nuvaraha tachava eta vicacheracacahi. Vaipa ecuévuisiha eta nuyehe. Íchuhanuvare. Viápechava vivapinava eta véchajirisiravaparacayare\*.

<sup>21</sup> “Emutu eti ecamichanahi, ímiyanavahivare eta éhisiranuhi, núti nucaejacahевacayare tayehe eta néjasihayare, tacutiyare eta néjasirahi te mavaire ema Tata, taicha eta nétumechiravahi nucamichirahi tamutu.

<sup>22</sup> Ema Espíritu Santo timitucaheyare eta juca numetrapiana. Emutu eti nuchaneranahi, etupiruvayare esuapa” tacahehi tamutu eta máechajiruvvana ema Viáquenu eta eyehe.

## 4

### *Ema Juan máimaha eta natsiuresira te anuma*

<sup>1</sup> Te táequenepa eta juca, nímahavarepa eta téjiacahi eta anuma. Nusamavarepa eta mahu ema émarichuhi ema tínapucahi téchajicanuhi. Tirurehucha eta mahu. Tíchuhanupa, ánipa macahe:

—Yare, piápana. Nuvaraha nímechaviyare eta táicharacavayare puiti juca vicaijuheyare —macahepa.

<sup>2</sup> Tacahe, eta nusamirahi eta íchuarapi, ema Espíritu Santo tíjaracanupa eta nucaicutiarairayare tamutu eta nímahaque-neanayarehi. Tíjahúchavapa nímaha ema Viya, téjacahi te trono te anuma.

<sup>3</sup> Tiáramicarehi eta máimahi. Tétavicavahi eta máurinavahi. Eta máimahi tacuti eta tajanunusira eta márijahi jaspe étapa eta cornalína. Te tachachacuana távhahi eta trono, tétavicava eta tajaraivahi tacutiyaréni eta taimahi eta ahe eta táurinava. Véresera eta taimahi.

<sup>4</sup> Távhahi eta ichape trono, tatiarihivare te tachachacu eta véinticuatro trono. Natarihivare ena véinticuatroanavare téjacanahi tayehe, víyarohana tuparairucana. Tijapu amairiha eta namuirihana. Namutu ticayeheana corona te nachutiana, amairiha oro.

<sup>5</sup> Tásicha, nímahahi eta térameca tásihaqueñehi tayehe eta trono. Nusamavare tirurehuchanahi. Ticaemapa. Tásicha, tatiarihihi te tamirahu eta trono eta siete tijarahivaca tacutiyaréni tanene eta yucu. Énali ena siétequeneana arcángelleana mayeheana ema Viya.

\* **3:20** Te juca, ema Viáquenu tímicutijircava eta máehahamesira te jácani tapajcura, mavarairahi masiapa, manica macachane ena ticavasanahi te tajuhe. Étasera eta máechajisihaqueñeanana, vahí étainahini eta tapajcura eta vipena. Te juca, ema Viáquenu máechajisihahi eta majapanuirahavi étapa eta mavaraira vichavaya vipacha éma, tachavahini vivapinava mayehe, viúriyareva te machacaya.

<sup>6</sup> Tijararacavare te tamirahu eta trono tacutipa eta tajarahivahi eta ichapequene une.

Natiarihivare ena cuátroqueneana tijanearecanahi te machacaya ema Viya. Éna, ecutiarareana eta máitupajijiasirava. Tacutimahi ticauquihavacahi te namirahu téhepa nachepe. Amairiha eta náuquihana.

<sup>7</sup> Eta tínapuca tavasimahiyaréni eta sárare táïñehiquene\*. Eta apuna tavasimahiyaréni eta torillo. Eta apuna tacutimahiyaréni achanemira. Eta apuna tacutimahiyaréni eta ichape mátihi tiárrarairicahi.

<sup>8-9</sup> Tacahe, ena nani cuátroqueneana ecutiarareana tiávihanahi tayehe eta trono, sáisivaca eta napavana. Ticauquihavacavare amairiha eta napavana. Ena nani, vahi taechuquihahini eta nacunachirahi ema Viya, ema acanevacaguene eta máitaresirahi. Tijiranahi tamutu sácheana, yátiana. Ánipa nacahe:

“Tétavicavahi eta pisantuva, piti Tata.

Tétavicavahivare eta pítupajijiasiravahi,  
píturuequeneha tamutu.

Piti pitiahiquenehi te tépanavainapa eta apaquehe.

Puiti pinasirichuvare eta viyehe.

Pítirichuvare pinasiyare te táitavapa tamutu.

Puiti vihasulupayachavihi eta pichanerahavihi”  
nacahepa ena ángleleana.

<sup>10</sup> Énavarepa ena véinticuatroqueneana víyarahana tuparirucana tépuyucanahi te mamirahu ema Viya, mávihahi te mayehe trono. Nacamavahupa eta nayeheana corona. Titsiurecanavare. Ánipa nacahe:

<sup>11</sup> “¡Tata Víyaquene, piti Viáquenuvih!

¡Tétavicavahi eta piúrvah!

Picarichuhi piti vicasiñaquenévi.

Ichapequenehi eta vicunachiravihi.

Tamutuhi pirataha píti.

Taicha píti pépiyacahi acane tamutu eta juca vímahaqueneanahi puiti.

Pítirichuvare péchahi puiti tamutu eta  
pépiyaruuanahi”.

## 5

*Ema Cordero macarataca eta ajureca tiama eta siete sello*

<sup>1</sup> Tacahe, te mavahu vaure ema máejaruhi tayehe eta trono, nímahapa macaratacahi eta ichapeme ajureca ticayuruquihi,

\* <sup>4:7</sup> Te jena avasare Asia (puíticha ticaijare Turquía), tatiarihihi eta tíñehiquenehi sárare náimijarechahi “león”. Te táiyahapa, eta tahu tacuti eta ichapequene toro, étapapuca eta ichi ajaira.

ticanaracacahi eta letra te tajuhe étapa te táquecume. Ticaipis-tahi tayehe eta siete sello, táipistaruvanahi.

<sup>2</sup> Nímahapa ema ángele tipiaracahi muraca. Tétavicava eta tamuracava eta mahu. Ánipa macahehi:

—¡Puiti táuricapa máimerecava mácani tatupararuhi tivepista-cayare eta tayeheana sello eta juca ajureca, maveruruasi-rayare! ¡Tatuparacapa máiteca puiti! —macahepa.

<sup>3</sup> Nájinasera náijaracavahini navejiapanahini eta ajureca: énaripa ena tiávihanahi te anuma, énavanerecainahipucaini ena tiávihanahi te apauehe, énaripa ena tiávihanahi te amahe apauehe. Nájinavare tipatsicavaina náimaranaracahini eta ajureca.

<sup>4</sup> Níyahahacavapa núti eta nímairahi namajinairahi náijaracavahini naveruruacahini eta ajureca, náechajicuhahipucaini, étavanerecainahipucaini náimaranaracahini.

<sup>5</sup> Tacache, téchajicanupa ema émana víyarahua tuparairucahi. Máichanupa:

—Vahi picuiyaha. Taicha matiarihi ema Cristo, ema yátupi-quenehi manerejiruhi ema Viya ema téchaya tamutu eta juca apauehe. Éma, tíjaracavahi eta máepenirahi víchavenehi víti. Tichavaripahisera titareca. Tásicha, macarichu ema tatuparacahi maveruruacayare eta ajureca, mavepistahayareva eta siétequene tayeheanahi sello táipistaruvanahi —máichanupa ema víyarahua.

<sup>6</sup> Tacache, nímahavarepa ema Jesús, ticaijarehivare Cordero. Titupihahi éma te tamirahu eta trono, nachayacahi ena cuátroqueneana ecutiarareana énapa ena víyarahana tuparairucana. Nímahahi eta majara, taicha taimicapacahi éma eta macaepahairahi eta vipecaturana viti achaneana. Siete eta majihuana. Eta juca táicutiarahi eta aquenucairahi. Siétevare eta máuquihana. Eta juca táicutiarahi eta tamutuirahi máimatiqueneha, taicha navanahihí ena siéteana arcángelleana mayehe ema Viya, etá náimarasiraya tamutu eta apauehe.

<sup>7</sup> Ema maca Cordero tiyanapa, majacapahi eta ajureca te mavahu vaure mayehe ema máejaruhi te trono.

<sup>8</sup> Te macaratacapa eta ajureca, ena nani cuátroquene ecutiarareana, énerichuvare ena véinticuatroqueneana víyarahana tuparairucana tépuycanapa te mamirahu ema Cordero. Ena nani véinticuatroqueneana, namutuyehehi te navahuana eta guitarra étapa eta escudilla, amairihasera oro. Tiama eta incienso, táicutiarahi eta táurivahi eta nayujarasiranahi ena machaneranahi ema Viya.

<sup>9</sup> Tijiranahi eta juca jirasare arapiru. Ánipa nacahe: “Picarichu píti tituparacavihi eta picaratasisirayare eta ajureca, pivepistasirayare eta tayeheana sello.

Tituparacavihi taicha píjáracavahi píti tímicapacavihi eta pivacharesirahaviyarehi tayehe eta pítine vimutu víti apaimamajiquenehavihi te juca apaquehe.

Taicha pívarahahi machanerahaviyarehi ema Tata Vicaiyaquene.

<sup>10</sup> Píjaracahavihivare viyujaracarahiyyare mayehe ema Viya. Píti píjaracahavihí eta aquenucairahaviya tayehe eta avasarena” nacahepa.

<sup>11</sup> Tásicha, nusamavarepa eta nahu ena camuriqueneana ángeleana nachayacahi eta trono, eta návihahi ena cuátroqueneana ecutiarareana, énapa ena tuparairucana. Tétavicava eta nasimutuvahi éna.

<sup>12</sup> Énerichuvare tijirana muraca. Ánipa nacahe:  
“Piti Cordero, piti nacaparuhi, picarichu tatuparacahi pijacapayare puiti eta piávacure mayehe ema Viya.

Tétavicava eta piúricacarevahi táicha.

Tétavicava eta pímatiequenehairahi tamutu.

Tétavicava eta pitumevahi.

Tétavicava eta pipicauchacarevahi.

Tétavicava eta picunachacarevahi.

Tijarahi visama te vijirauchavi” nacahepa.

<sup>13</sup> Nusamavare eta tahu tamutu eta máepiyaruhanahi ema Viya, eta tiávihanahi te anuma, étapa eta tiávihanahi te apaquehe, énerichuvare eta tiávihanahi te amahe eta apaquehe, étapa eta tiávihanahi te une. Ánipa tacahehi:

“Tétavicava eta pítupajijiasiravahi, piti Vicaiyaquene, pítipa piti Cordero.

Éti, tétavicava eta epicauchacarevahi.

Éti, tétavicava eta ecunachacarevahi.

Tijarahi visama eta vijirauchirahe.

Máitavacacayare eta vitsiusiraheyare” nacahepa.

<sup>14</sup> Énapa ena cuátroqueneana ecutiarareana najicapapaipa:  
—Amén, ene vicaheparacayare —nacahepa.

Tásicha, ena véinticuatroqueneana víyarahana tépuyumurihanapa, natsiucapa ena apinana.

## 6

*Eta táepistasira eta sélloana*

<sup>1</sup> Tacahe, nímahapa ema Cordero te mavepistacapa eta tínapuca sello. Tásicha, nusamapa ema émana ecutiararehi. Eta mahu tacutichucha tirurehucha. Ánipa macahe:

—Yare, piúchuca —macahepa.

<sup>2</sup> Tacahe, nímahapa eta cavayu tijapu. Ema ticaperahi, tatiarihi eta mataquiriqui. Tásihapa, ticaijarcasipa eta corona

éma. Eta juca táicutiarahi eta máquipairisiraparacaya ena mánarana, taicha guerrerohi éma.

<sup>3</sup> Nímahavarepa ema Cordero mavepistacavarepa eta tápinane sello. Nusamavarepa ema apana ecutiararehi:

—Yare, piúchuca —macahevare.

<sup>4</sup> Tacahe, tiúchujicapa eta apana cavayu. Titsi eta taimahi. Ema ticaperahi mámahi eta ichapequenehi espada. Ticavanahipa eta manacasamurechirayare ena achaneana eta náehacacairayare. Téchepucainapa eta guerra. Ticapajiricacanainapa ena achaneana camuriqueneana.

<sup>5</sup> Nímahavarepa ema Cordero mavepistacavarepa eta tamapanane sello. Nusamavarepa ema apana ecutiararehi, máichapa:

—Yare, piúchuca —macahevare.

Nímahapa eta cavayu tiquisa. Ema ticaperahi macaratacahi eta balanza te mavahu.

<sup>6</sup> Nusamavarepa eta mahu ema apana te namuri ena cuátroqueneana ecutiarareana. Ani macahehi eta máechajiruvahí:

—Ticatajivanayare ena ticaematanerahiana. Vaipa tisivachaimahi eta mavacha mácani achane. Diez páneana eta mavachayare te étana sache. Étaripa eta arusu\* mapanarine kilo eta navachayare te étana sache. Étasera eta aceite comer, vahi téjiacavaimahi, étaripa eta tachi eta uva —macahepa.

<sup>7</sup> Te mavepistacavarepa ema Cordero eta tacuatrone sello, nusamapa ema apana cuátroquene ecutiararehi, máichapa:

—Yare, piúchuca —macaheripavare.

<sup>8</sup> Nímahapa eta apana cavayu tiyacaca. Ema ticaperahi, éma ticaijarehi “Ticaparerecaya ena achaneana”. Matiarihivare ema téhicapahi, ema táquenu eta náchanevana ena náepenaqueneana. Tacahe, eta cuarta parte eta nasimutuva ena achaneana tépenanaya naicha ena apinana. Taicha ticapajiricacanainapa ena achaneana tayehe eta guerra. Ena apamuriana técuhanainapa. Apanapanenapa eta najumanayare. Énerichuvare tanicainapa eta sárareana táïñehiqueneana.

<sup>9</sup> Te mavepistacavarepa ema Cordero eta tacincón sello, nímahapa eta mesa tiámahi eta mayucuneasa ema Viya. Te tápecu, nímahavarepa eta náchanevana ena náepenaqueneana táimicaparuuanahi eta náehisirahi ema Viya. Vahi náinajicahini eta náehisirahi te náimahapa eta nacatajivairayare. Váhivare timatinanaimahi eta nametasirahi eta máechajiriruva ema Viya.

<sup>10</sup> Puiti éna, tipiaracanahi. Ani nacahe eta napiarasirahi:

---

\* <sup>6:6</sup> Ema ecutiarare máechajisihahi eta taqui ticaijare cebada. Eta juca tacuti eta arusu.

—Tátachicha, sántoquenevihi píti. Yátupiquenevihi eta picasiñacareva. Píti pirataha tamutu. ¡Puiti vivaraha pítauchayare eta pitsirijequenehairayare ena ticapacahavianahi te apaquehe! ¡Vivarahapa nacáemecharahipaini! —nacahepa.

<sup>11</sup> Tásicha, ticaijaracasianapa eta namuirihanayarehi eta tijapu. Ticametacasianapa nanarahasiranumayare apae-sainahi. Tiámainucavayarehi te tiyuriticavapa eta natupayare ena nachamuriana nacparuanayarechahavare ena téhicanahi ema Cristo.

<sup>12</sup> Te mavepistacavarepa ema Cordero eta tasaisine sello, nímahapa eta tamuracavahi tayamurisirahi eta apaquehe. Eta sache témahavarepa, tétavicavahi eta taquisava. Énerichuva eta caje amairihapa ítime.

<sup>13</sup> Eta jarairiquiana tiávihanahi te anuma, témiririjicapa te juca apaquehe, tacuti eta tahi eta mitu te muracaicha técaticava.

<sup>14</sup> Eta anuma témitiacavarepa tacutipa te téchuquimeca eta ajumeruca. Tásicha, eta ichapequeneana cerro tiyamuricavaca pa tyejecavavacapa. Étaripa eta tiúrupuhiana te mar énerichuvare tyejecavavacapa.

<sup>15</sup> Tacalhe, tijunanapa ena réyeana te avasareana, énapa ena presidenteana, énapa ena comandanteana, énapa ena aquenucarahana, énapa ena rícoqueneana, énaripa ena músuana, énapa ena libreana. Ticayumurúquianapa te tajuhe eta ichapequeneana máriana cerro.

<sup>16</sup> Ánipa nacahe:

—Vicavi eta ichapequeneana mari, apaesa vahi macuimahahavi ema Viya, apaesa viúchucuha tayehe eta táïñehiquene máicuñaraqui ema Cordero.

<sup>17</sup> Táitecapaurehavipa puiti eta ichapequene juicio. ¡Páurehavisami! ¡Nájina tacaemachaquenemahi! —nacahepa.

## 7

*Ena dócemuriqueneana israelítana nacamarcuqueneanayare*

<sup>1</sup> Tacalhe, nímahapa ena cuáetroqueneana ángeleana. Titupihanahi te táinahu eta juca apaquehe, náichejimiraurusirahi tamutu eta técaticavanaugh. Éna, náichejicahi eta técaticava apaesa tacuija eta técaticava te apaquehe étaripa te une, étavanere-cainahipucaini tacaecherahini te yucuquiana. Ticatuparahanasera éna nacamiriuchayarehi eta táicuñayare te apaquehe étapa te une mar.

<sup>2</sup> Énerichuvare nímahavarepa ema apala ángel te tiásihahi te táuchusinehi eta sache. Macaratacahi eta mamarca ema

yátupiquene Viya Vicaiyaquene. Ema maca ángele máechajicavaca muraca ena cuáetroqueneana ángeleana.

<sup>3</sup> Tacahe, ema ángele máichavacapa:

—Vuíchaha ecucamirica eta táicuñayare eta apaquehe eta une te mar étapa eta yucuquiana. Tapainumavaya te vimarcachavacapa te nanahuana ena mavanarana ema Viya —máichavacapa.

<sup>4</sup> Tásiha, te tamutupa eta nacamarcairavacahi, nusamapa eta natupa ena nacamarcaqueneanaripa. 144,000 eta nasimutuva. Násichaqueneanahí nayehe ena dócemuriqueneana israelítana.

<sup>5</sup> Doce mil ena ticamarcanahí machichanavéqueneana ema Judá. Doce mílvare ena ticamarcanahí machichanavéqueneana ema Rubén. Doce mílvare ena ticamarcanahí machichanavéqueneana ema Gad.

<sup>6</sup> Doce mílvare ena ticamarcanahí machichanavéqueneana ema Aser. Doce mílvare ena ticamarcanahí machichanavéqueneana ema Neftalí. Doce mílvare ena ticamarcanahí machichanavéqueneana ema Manasés.

<sup>7</sup> Doce mílvare ena ticamarcanahí machichanavéqueneana ema Simeón. Doce mílvare ena ticamarcanahí machichanavéqueneana ema Levi. Doce mílvare ena ticamarcanahí machichanavéqueneana ema Isacar.

<sup>8</sup> Doce mílvare ena ticamarcanahí machichanavéqueneana ema Zabulón. Doce mílvare ena ticamarcanahí machichanavéqueneana ema José. Doce mílvare ena ticamarcanahí machichanavéqueneana ema Benjamín.

*Camurianavare ena apavasajuecuana tijapumuiri havacahi*

<sup>9</sup> Tacahe, nímahavarepa ena camuriqueneana achaneana tiásihana te tamutu avasareana, apaechajiriruvaqueneana. Vaipa titupachacareana eta nasimutuvahi. Titupihanahí éna te tamirahu eta trono, mávihahi ema Cordero. Tijapumuiri havaca eta namuirihana. Tásiha eta náurisamurevahí nacaratacahi te navahuana eta cáchipaca.

<sup>10</sup> Namutu tipiaracanahí, ánipa nacahe:

—Vihasulupayachavi, piti Tata Vicaiyaquene, pítipa piti Cordero, taicha éti ecuchucuhahavihi —nacahepa.

<sup>11</sup> Tacahe, namutu ena ángeleana titupihanahí te tachacayahí eta trono, nachayacahivare ena cuáetroqueneana ecutiarareanahí, énapa ena víyarahana tuparairucana. Tásiha, tépuycanapa te tamirahu eta trono. Tétipaimurihanapa. Natsiucapa ema Viya.

<sup>12</sup> Ánipa nacahe:

“¡Eta vicaheyare!

Máitavacacayare eta vitsiusiraviyare.

Taicha tétavicavapa eta picunachacarevahi.

Tétavicavavare eta pímatiequenehairahi tamutu, étapa eta pipicauchacarevahi, étapa eta pitumeva.

Picarichu piti péchahavihi.

Ichape eta vihasulupayachiravihi.

Tijarahi te visamure te vijirauchavi. Amén”.

<sup>13</sup> Tacahe, ema émana víyarahá máichanupa:

—Te pivaraha pímati, nímimatichaviyare ena nani ticamuirihanahi eta tijapu, távhavarepuca násicha —máichanupa.

<sup>14</sup> Tacahe, níchapa núti:

—Picatajicanu, pimetacanu, tata.

Tásicha, máichanupa:

—Ena nani énara ena nacatajivaqueneanahi ichape taicha eta náehisirahi ema Jesús, tiúchucuhanipasera. Ticasipaipa puiti eta náchanevana tayehe eta máitine ema Cordero. Puiti ticamuirihanapa tijapu, taicutiarahi eta tájinairaripa naviurevainahini.

<sup>15</sup> Eta tacahe, titupihanahi puiti te tamirahu eta trono mávihahi ema Viya. Najirauchahi, natsiucahi éma tamutu sácheana yátiana te mayehehi templo. Éma majaneacavacahi.

<sup>16</sup> Ena nani tájinapa nácamunuimahi, vaipa técuhana, váipavare timauneana. Váipavare ticatajivanaimahi taicha eta tájireva eta sache.

<sup>17</sup> Taicha ema Cordero, ema tiávihahi te tamirahu eta trono, tétavicava eta majapanuraivahi, majaneacavacayarehi. Máesichayareva eta tiúriama une ticaitarerahi. Énerichuvare ema Viya macamitiasinayare eta náiyaira —máichanupa ema víyarahá.

## 8

*Éma Cordero mavepistacapa eta téqueneha sello*

<sup>1</sup> Tacahe, mavepistacapa ema Cordero eta téqueneha sello tayehe eta ajureca. Tamuturine timatina. Média-horapuca eta tamatinaira.

<sup>2</sup> Tásicha, nímahapa ena siéteana ángeleana, titupihanahi te mamirahu ema Viya. Ticaijaracasianapa eta siete chujarena nachujanayarehi.

<sup>3</sup> Tásicha, títecavarepa ema émana ángel. Mámapahi eta censario, amairiha oro. Tatarihi te mamirahu ema Viya eta mesa tiámahi eta mayucuneasa. Amairihavare oro. Ema ángel titupihapa te tamirahu eta mesa. Náijaracapa eta incienso tisimuri. Tacahe, macaratacapa eta censario te tápusi. Macapusisiacapa ema Viya, tacachanepaipa eta nayujara-sirana namutu ena machanerana ema Viya.

<sup>4</sup> Tásiha, eta taquijarera étapa eta mayujarasirana tiápanapa mayehe ema Viya, tásihaquenehi te mavahuana ema ángele.

<sup>5</sup> Tásiha, ema ángele mavehavarepa eta apamuri emaniqui eta te mayucuneasa. Máinicachapa eta censario. Tásiha, máepuraicapa te apaquehe. Tíjahúchavapa térameca, ticaema, tirurecapa. Tiyayacarepa eta apaquehe.

*Eta nacachujairayare ena siétequeneana ángeleana*

<sup>6</sup> Tacahe, nímahavarepa ena siétequeneana ángeleana titsecavanaripa eta nacachujairayare.

<sup>7</sup> Te ticachujapa ema tínapuca ángele, témiricapa te apaquehe eta uverequi étapa eta tiquiva ítiama. Témiricavare eta yucu. Táijuchapa eta tercera parte te apaquehe. Támairiacapa eta yucuquiana, eta muiji, étapa eta sucurecana.

<sup>8</sup> Te ticachujapa ema apana ángele, témiricavarepa eta ichape mari. Timurupahi eta táemirisira tayehe eta mar. Eta une, ítiampata táicha. Tercera pártehivare eta ítihamahi.

<sup>9</sup> Támairiacapa tacapapajicavaca eta sárateana tiávihana te une. Étapa eta pacureana tachimaranuanahi, técharicavanapa. Téririjicanapa tamutu.

<sup>10-11</sup> Te ticachujapa ema apana ángele, témiricapa eta ichape jarairiqui. Tétiraraicaparine eta táemirisirahi. Tajararecapa eta une tayehe eta tercera parte eta cajacureana étapa eta cáquiureana. Venenoamapa taicha eta jarairiqui. Ichapemurianavare ena achaneana tépenaracanahi taicha eta náerirahi eta une tisucareama. Eta tacahe, ena tacaitiruanahi tímijarechanahi eta ecuñaraqui: Eta Súcareama Venenoama.

<sup>12</sup> Te ticachujapa ema apana ángele, tiúchujicapa eta tépacuchahi eta sache, eta caje étapa eta jarairiquiana. Óchorine hora eta táetaviuchirahi eta tamapicuva. Tacahe, óchovare hora eta tacaecherairahi eta sache. Ocho hóravare eta tacaecherairahi eta caje étapa eta jarairiquiana.

<sup>13</sup> Tacahe, nésenicapa te anuquehe. Nímahavarepa ema émana ángele tiáraraicahi. Nusamapa tipiaracapahi muraca, ánipa macahe:

—Páureanasami ena tiávihanahi te apaquehe. Tétavicavaya eta nacatajivairayare, puiti te táitauchavapa eta nacachujiraya ena mapanaqueneana ángeleana, téquenehanaya ticachujana —macahepa.

## 9

<sup>1</sup> Te ticachujapa ema apana ángele, nímahapa ema ángeléni mavasihi eta jarairiqui. Máquipairuvahi te apaquehe. Másapa ema Viya eta mavejiasirayare eta pozo táupenaquene ticaijare Abismo.

<sup>2</sup> Tacahe, mavejiacapa eta táupenaquenehi pozo. Tiúchucapa eta ichape quijare tacutipa eta taquijarera te tiju eta evitarahi. Eta sache, timapicupa taicha eta quijare.

<sup>3</sup> Témunahiricavapa tiúchuca eta tavasiqueneana eta tsacarana, tayehe eta quijare. Amairipahipa tamutu eta apaquehe. Tajaráchapahi eta tayucaraivahi tacutipa eta tayucaraiva eta sáserahi.

<sup>4</sup> Ticatuparacasipa vahi tacunica eta tamuijira eta apaquehe étapa eta tapacajiana eta sucurecana étapa eta yucuquiana. Eta tatuparahahi eta tayucavacayarehi namutu ena achaneana. Nacarichu tacaitica ena ticamarcanahi te nanahuana tayehetamarcema Viya.

<sup>5</sup> Cíncoyarehi caje eta tayereva eta tayucararereresirayarehi. Váhisera tépenanáimahi ena achaneana tayucaqueneanayarehi. Tétavicavasera tacativayarehi nasama. Eta tayucaraqui tacutiyarehi eta sáserahi eta tacativayarehi nasama.

<sup>6</sup> Te jena sácheinayare ena achaneana navarahayare ticapacavana. Váhisera tépenanáimahi, tayanapane navarahayare tépenana.

<sup>7</sup> Eta juca tavasiqueneana tsacarana, nímicutíchapa eta cavayuana te titsecavanahi tayehetamarcemáguerra. Tásicha, te tachuti tacutimahiyaréni ticayehe corona oro. Eta tamira achánemirayaréni.

<sup>8</sup> Tiuji eta tachutimaca, tacutiyaréni eta suchutimaca esu esena. Tíñehivaca eta táheana.

<sup>9</sup> Eta taparuma tacutiyaréni eta fierro muracaquenehi. Vahi táchuchaimahi eta isavipe. Eta tárairahi, jtétavicavahi eta tamuracavahi!

<sup>10</sup> Ticaijiquivaca tacutiyaréni eta sáserahi. Eta juca tiyucarahi, cinco cájeyarehi eta tacaitemajirisiravacayare ena achaneana.

<sup>11</sup> Mararihivare ema táchueno ema téchahi éta, ema ángeléni tivejiacahi eta táupenaquene pozo. Ema maca ángeléni, eta máijare te náechajiriruva ena hebréoana “Apolión”. Te véchajiriruvana víti, ticaijare “Tijararerahí”.

<sup>12</sup> Títouchavapa eta tínapuca ecuñaraqui nímaquenehi. Jucarihichahavaresera apinachaha eta ecuñaraquiyare.

<sup>13</sup> Te ticachujapa ema apana ángele, nusamapa eta muhema apana te tápusi eta cuáetroquene esquina tayehetamarcemámesa oro eta tiámahi eta mayucuneasa ema Viya, tiávihahi te mami-rahu éma.

<sup>14</sup> Ticavanairipipa ema ángele ema ticachujahi, ánipa macahe:

—Picaiticapa ena cuáetroqueneana ángeleanaini váinarajiana, tiávihanahi te tachacaya eta cajacure Eufrates —macahepa.

<sup>15</sup> Taicha acne ema Viya manerejicaripa eta juca hora eta macaitisirainapa ena cuátroqueneana ángeleanaini, másapainapa eta nacapasirayarehi camuriqueneana achaneana, ena mapamuriqueneana eta náichapemuriva. Tacahe, téjapuacanapa éna.

<sup>16</sup> Tacahe, tiúchujicanapa ena suntaruana ticaperana. Nusamapa eta natupa. Dosciento millone eta náichapemuríva.

<sup>17</sup> Tacahe, eta nímairahi ena ticaperana, tatiarihi eta náicutiara te natupana. Eta táimahiana titsi, azul, tiyacaca. Táiñehiquenehi eta tachuti eta naperana. Tiúchucapaipa eta yucu, eta quijare te tajaca. Azufrepuha eta táepuha.

<sup>18</sup> Camurianahi ena achaneana, ena tacaparuuanapahi eta juca mapanaquene ecuñaraqui eta tacuchusirapahi te tajaca: eta yucu, eta quijare, étapa eta azufrepuha.

<sup>19</sup> Énerichuvare tatiarihi eta táijiqui ticutipainehi eta quichare. Tétavicavahi eta táíñehivapahi eta tacaparaqui táuchurepahi te tajaca étapa te táijiqui.

<sup>20-21</sup> Énasera ena apamuriana achaneana tacaitiruanahi eta ecuñaraqui, váhiquene navarahaimahi náinajica eta náichira eta tamauriqueneana. Váhiquene téneuchavanáimahi. Váhivare náinajicahini eta nacapahivana, eta nahiapemarevana, étapa eta náesenamarevana, étapa eta námeraivana. Váhivare náinajicaimahi eta najirauchira ena éreanana, eta natsiusirahi eta nasiñarajiana náepiyaruuanahi oro, plata, bronce, márijahi, yucuqui. Tamutu eta juca mayamuricacahivare, váhivare tapaicahini, váhivare tasamarahihini, váhivare táimairiricahini.

## 10

### *Ema ángele macaratacashi eta ajurecachicha*

<sup>1</sup> Tacahe, nímahapa ema apanavare ángele tiúcupaicahi te anuma. Tétavicava eta máiñehiva. Tamuichapahi eta úcaji. Te mápusi, tatiarihipa eta ahe. Eta mamira, tétavicava eta tajararasirahi tacuti eta táimahi eta sache. Eta mapaiqueana tijarahivaca ticutipahi timuruquiape.

<sup>2</sup> Téjiacahi eta ajurecachicha eta macaratasisrahi te mavahu. Tásicha, eta mapaique vaure mácatayaecahi eta une te mar. Eta étaquiape sapa tacatayacahi te tiájipahi.

<sup>3</sup> Tásicha, tipiaracapa muraca, tacuti eta tahu eta tíñehiquenehi sárare. Te titapiricapa, nusama eta nahu ena apamuriana tacutiyaréni eta tirurehuchahí. Siétequenehi eta najicapiroahi.

<sup>4</sup> Te timatinapa, nuvarahapa nájuequenehayarehini. Nusamapasera ema téchajicanuhi te anuma. Máichanupa:

—Vahi picuajucha eta juca pisamaquenehi. Piáñauchayare eta juca. Váhivare picumetajirica —máichanupa.

<sup>5</sup> Tásicha, ema maca ángele nímaquenehi eta mácataya-sirahi eta une étapa eta tiájipahi, masuvechapa te anuma eta mavahu vaure.

<sup>6</sup> Ánipa macahe:

—Tivanecanuhi ema Viya, ema acanevacuquenehi eta máitaresira, ema yátupiququenehi tépiyacahi eta anuma, eta apaquehe, eta mar, étapa tamutu eta tiávihaqueneanahi tayehe. Éma, tivanecanuhi numetaca eta juca máechajiri-ruvahi: “Tájinapa vaipa tiyeremahi eta táitaviraya”.

<sup>7</sup> Ánaquiaparipahi eta nacametacasivahi ena profetana eta mapanereruana ema Viya. Puítisera te macachujapa ema téqueneha ángele, titavainapa tamutu eta mapanereruanahi —tacahepa eta mametarapihi ema ángele.

<sup>8</sup> Tacahe, nusamavarepa eta mahu ema téchajicanuhi tásichaquenehi te anuma. Tivanecanuvarepa nupaucha ema ángele titupihahi tayehe eta une étapa te tiájipahi. Ánipa macahe:

—Piyana piyaseaca eta ajureca macarataruhi ema ángele —macahepa.

<sup>9</sup> Tacahe, nuyanapa mayehe ema ángele. Nuyaseacapa eta ajureca. Tásicha, éma máichanupa:

—Júcahi eta ajureca. Piveha, pinica. Títiveyare eta pisamira te pijaca tacutiyare eta rápama. Étasera te piami, tisucareyare pisama —macahepa.

<sup>10</sup> Tacahe, nuvehana eta ajurecachicha te mavahu ema ángele. Nunicapa. Jéhesaréinehi titivéinehi eta nusamira te nujaca tacutirinehi eta rápama. Téhesera nujiricapa, tisucarepa nusama te nami.

<sup>11</sup> Tásicha, nucametacasivarepa:

—Píti piápechavaya picametarapiya eta náichararacavayare namutu ena aquenucana te juca apaquehe, énapa ena achaneana ticavasanahi te tamutu avasareana.

## 11

*Ema Viya mavanecainapa ena apinana mavanaranayarehi profetanaya*

<sup>1</sup> Tacahe, te nuvapure, tíjaracanuanapa eta ecutiriqui. Tásicha, máichanupa ema Viya:

—Piyanayare tayehe eta Templo te Jerusalén. Pícutichaya tamutu eta peti étapa eta canchón. Pícutichavare eta náijuchi-rarehi eta sárareana námavahuququeneana. Tásicha, pitupachayareva áyananahipuca ena achaneana téneuchavarahianahi eta te canchón.

2 Váhisera picuicuticha te aneca tamirahuhi eta Templo. Taicha ena apajuecuruhana, nísapaqueneanapa eta návihairaya éna. Nísapainavarepa eta náitahasiraya eta tayereruvanaini eta avasare tacapicahuquenéhi Jerusalén. Ichape eta namapachichijisirayare. Cuarenta y dos caje eta náichirayare.

3 Nútisera nuvanecavacainapa ena apinana nuvaneruana profetana. Éna, tiquisamuirihanayarepahi eta namuirihana. Eta juca táicutiarayarehi eta náichuarésirayare náeneuchava ena achaneana. Mil doscientos sesenta sache eta nayerevayare –macahepa.

4-5 Tásicha, nímahapa te anuma te mamirahu ema Viya eta apina yucuqui olivo étapa eta apina candeleroana te mamirahu ema Viya, ema téchahi tamutu eta juca apaquehe. Eta juca táicutiara eta majaneasiravaca ena apinana mavanarana, taicha manerejiruanahi éna, nacometarairuyare eta náeneuchiravayare ena achaneana. Te natarihinapuca nácani tivarahanayare titupiacana, éna ticatiuchavanayare. Tiúchucayare eta yucu te najaca. Tájuchayare muraca, tacapacayareva ena nánaranayarehi.

6 Énerichuvare ena nani, naratahayarevare náichejica eta tiquiva te jena sácheana nacometarairuirayare. Étaripa eta une, náepiyacayare ítiamayare náicha. Nacuchucayareva eta táïñepahiyare nayehe ena achaneana, apanapanenejiyarehi náicha, te jácani navarahaqueneyare éna.

7 Téhesera te taitauchavapa eta nacometarairuirayare, macanaravacainapa ema Tíñehi Achane Váinarajiquene ticaijare Útsutsure. Émaripa ema majupaha ema Satanás. Tásicha, masapihainapa ticaparecayare macapacavacainapa ena apinana mavanarana ema Viya.

8-9 Tásicha, ema Tíñehi Achane Útsutsure vahi másapaimahi náecara eta náqueheana. Tanasiyarehi te aneca. Tacache, náimahayare namutu ena achaneana te juca apaquehe. Mapano sache y medio eta nacaheyare te calle eta te avasare. Eta juca avasare, étarichuhi eta macaetatainehi ema Viáquenu. Eta juca avasare, tétavicavahi eta tamauriva tacuti eta avasare Sodoma, étapa eta Egipio.

10 Ena achaneana, natarihiyare te tamutu avasareana ena tiúrisamureanaya eta náimairaya ena tépenanahi. Ticapiestaranainapa. Tíjaracasichacacanainapa eta námavahuana. Taicha titavanaripa ena nani profetanaini, énaripa ena tihapapiricanahi eta náichira eta tamauriqueneana.

11 Tásihasera, te taequenénapa eta mapanaquene sache y medio, macaechepucavacainapa ema Viya. Tichavanainapa

títarecanayare. Namutu ena achaneana náimahaya. Ichape eta napisirayare.

<sup>12</sup> Tacahe, ena nani apinana profetana nasamainapa eta mahu ema tíchuhavacahi te anuma. Muraca eta mahu eta máichuiravacahi:

—Yare, íteca, iápana —máichapa.

Tacahe, járajapapa eta úcaji táepanavacapa éna, támapa te anuma. Ena ticanaranahi náimararacaripa eta nayanirahi.

<sup>13</sup> Enevanepa tiyayacarepa eta apauehe. Muraca eta tayamurisirahi. Camuri eta pétiana tiáquipaicavavacahi. Siete mil eta náichapemuriva ena náepenaqueneanahi. Ena achaneana táemachanahi, téavicavainehi eta napisirahi. Náimatinumainehi ema Viya. Napiaracapa, nacunachapa eta maitupajijiasiravahi ema Viya tiávihahi te anuma.

<sup>14</sup> Títauchavapa eta juca apinaquene ecuñaraqui. ¡Váhisera tayerrequenehaimahi eta mapanaquene ecuñaraqui!

### *Ticachujapa ema téqueneha ángele*

<sup>15</sup> Tacahe, ticachujapa ema téqueneha ángele. Tásicha, ticaemapa muraca te anuma. Ánipa tacahehi eta nahu eta nusamirahi:

—Títauchavapa puiti eta émairayarepa ema Viya técha, ticavanairipiyare namutu ena achaneana te juca apauehe. Macaejacapa ema Machicha Cristo, máijaracainapa eta mávacureyare. Acanevacainapa eta émairayare techá tamutu —tacahepa eta nahu.

<sup>16</sup> Tacahe, tépuyucanapa ena véinticuatroqueneana víyarahana, ena téjacanahi tayehe eta trono te mamirahu ema Viya. Titsiucapairicanapa, nacunachapa ema Viya.

<sup>17</sup> Tijiranapa, ánipa nacahe:

“Vihasulupayachavi, Tata.

Téavicavahi eta pítupajijiasiravahi, píturuequeneha tamutu. Píti pitiahiquenehi te tépanavainapa eta apauehe. Pinasirichuhivare puiti eta viyehe.

Puiti péjacapa tayehe eta piávacure ichapequene, pítirayarepa pecha tamutu.

<sup>18</sup> Téavicavahi eta nasemanevahi ena achaneana eta piyeh. Muracapanainapasera eta pícuñasiravaca éna.

Puiti ticayaseserehianainapa te pimirahu ena náepenaqueneana.

Jéhesare, picamitiequenehainapa namutu ena ticamitiequenerahianaini te juca apauehe.

Puiti pítsirijicavainapa eta nacaemataneasiravihi ena pivarnara ticametarairurahiana eta péchajiriruva.

Puiti píjaracainapa eta náicuchihi ena yátupiqueneanahi pichichanaveanahi tiámanahi eta píjare:

nácani ichavicana, araitanana, énapa ena amaperuana" nacahepa.

<sup>19</sup> Tacahe, téjiacapa eta tapajacura eta Templo tiávihahi te anuma, mapena ema Viya. Ticaecherapa eta sagrario tacaunaiyahi eta echajirirucavana matratuneanahi ema Viya nayehe ena israelítana. Tásicha, enevanepa téramecahi, ticaemapa, tirurecapa. Témiricapa eta uvarequi timítutupahi. Tiymuricavarepa eta apaquehe.

## 12

*Máimahavare ema Juan esu esena tínacayarehi étapa eta táñehiquene sárare ticajare Serpiente*

<sup>1</sup> Nímahavarepa eta apana ecutiarare te anuma. Tiáramicarehi éta. Sutiarihi esu esena. Eta sumuiriha tacutiyaréni eta tajaraiva eta sache. Te tápecu eta suívapeana tacutiyaréni eta caje. Eta te suyehe corona te suchuti, jararihi tacutiyaréni eta dócequeneana jarairiqui.

<sup>2</sup> Esu suca esena ticajarihi. Tipiararecahi eta suínasirayarehi. Ichape eta sucatajivairahi.

<sup>3</sup> Tásicha, témunahiricavarepa tiúchujica eta táñehiquene sárare. Ichapequenehivare. Ticajare Serpiente. Máchaneva ema Satanás. Titsi eta táimahi. Siete eta tachuti. Diez eta tajihuana. Ticayehehi eta corona eta te tachutiana.

<sup>4</sup> Eta te tájiqui, táestacapa eta mapamuriana eta táichape-muriva eta jarairiquiana, tacamiricapa te juca apaquehe. Tásicha, titupihapa eta sárare te sumirahu esu esena esu tínacayarehi. Titsecavaipa eta tanisirayarehi eta suchicha.

<sup>5</sup> Tacahe, ajaira eta suchichahi esu esena. Námavanepasera mayehe ema Viya, te mávihahi te trono. Ema suchicha, aquenucayarehi tayehe tamutu eta avasareana. Macaratacayare eta matsucurupa fiérroqui. Váhiqueneyarehi tijapanucareanaimahi nácani náichahi eta tamauriqueneana. Muracayarehi eta náicuñanayare ena téjecapavana.

<sup>6</sup> Tásicha, esu esena tijunavanepa te mávapahi apaquehe eta suávhayarehi maicha ema Viya. Natarihiyarehisera ena ténicanayarehi ésu. Mil doscientos sesenta sácheana eta náitátrayarehi esu esena.

<sup>7</sup> Tacahe, tiúchujicapa ema Arcángel Miguel énapa ena ángeleana machamuriana. Téhacacanapa nacanarapa eta Serpiente. Énerichuvare natarihivare ena tayeheanahi ángeleanaini váinarajanahí.

<sup>8</sup> Apaquehererupasera eta ichapequenehi Serpiente, énapa ena tachamuriana. Tásicha, vaipa másapa ema Viya nanasi-hini te anuma.

<sup>9</sup> Tacahe, ticaquijianapa te juca apaquehe namutu ena ángeleanaini, émapa ema náquenumurihi Serpiente, ema ticaetemahi acane esu Eva. Émarichuhi ema Váinaraji ticaijarehivare Satanás. Puíticha ticaetemajiricavacahi ena achaneana te juca apaquehe.

<sup>10</sup> Nusamavarepa te anuma eta mahu muraca, ánipa macahe:

—Títauchavapa puiti eta náuchucuirapa ena téhicanahi ema Cristo. Máimererupa ema Viya eta tamutuirahi marataha. Máijaracapa ema machicha Cristo eta émairapa techá tamutu. Taicha ticaquijipa ema Satanás, ema timetauchaparacainihi me Viya eta náichavaquenévanahi ena vichamuriana, tamutu sácheana, yátiana.

<sup>11</sup> Ena vichamuriana naratahaipa ticatiuchavana mayehe ema Satanás. Vaipa macapaquechavacaimahi éna, taicha yátupi ticasifíavanahi tayehe eta máepenirahi ema Cordero. Énerichuvare náimimaticahí ena apamuriana achaneana eta máechajiruvana ema Viya. Éna, vahi napicacavavacahini tayehe eta náitaresira. Tíjaracavanahi te náepenirayarehi, vahi návarahahini náinajica eta náehisirahi ema Cordero.

<sup>12</sup> Tétavicavaya eta iúrisamurevaya puiti, emutu eti iávihanahi tayehe eta juca anuma. Páureanasamisera ena ticavasanahi te apaquehe étapa eta tiávihanahi te une te mar, taicha ema Váinaraji máucupaucha vacaipa. Tétavicava eta masemanevapahi taicha máechahi eta ániperinehi macaheyare —macahepa ema maca.

<sup>13</sup> Tacahe, eta Serpiente, eta táimairahi eta tacaquijirahi te anuma, táucupaisiraipa te juca apaquehe, tacamesapa táehicarriricá esu esena suínaruhi.

<sup>14</sup> Ésusera ticaijaracasipa eta apina ichapequeneana supavanayarehi tacuti eta tapava eta ichape mátihi. Sumaitasiavayarehi tiara tayehe eta mávapahi apaquehe suávihayarehi. Ánaqui natarihiyyareva ena téchapajiricanayarehi. Mapana año y medio eta náenisirayarehi. Eta Serpiente vahi táitecapaucha mahi ésu.

<sup>15</sup> Tásicha, eta Serpiente táhicapa eta une te tajaca, tavarairahi tíjahúchava tatiarihi eta cajacure apaesa suéricahini esu esena.

<sup>16</sup> Étasera eta apaquehe tacatiuchapa esu esena. Téjiacapa eta apaquehe, táerapaicavanepa eta une táhiruamahi eta Serpiente.

<sup>17-18</sup> Tacahe, eta táimairavahi eta Serpiente vahi táratahahini, tavetijipaicha eta tasemirahi suyehe esu esena. Tiyanapa nayehe ena suchamuriana, énapa apavequeneanahí. Tavarahapa tacapacayarehi ena sucutiqueneanahí tisuapanahi ema Viya, téhicanahivare eta máimiturapianahi ema Jesucristo.

# 13

*Máimahavare ema Juan eta útsutsure étapa eta sárare tíñehiquene*

1-2 Te táequenepa eta juca, te nuvapure, nutupihahi tayehe eta playa eta mar. Nímahapa eta útsutsure tiúcupaicapahi tásihahi te une. Siete eta tachuti. Dies eta tajihuana. Te tápusi eta tajihuana tatiarihi eta tayehe corona. Eta juca sárare tavasimahiyaréni eta ichini. Táiñehiquenehi eta tajaca. Eta táivapeana tacutiyaréni eta táivape eta aticure. Tásiha, te tachutiana tatiarihi eta ajureca tímijachavahi Víyainahíni. Macunahisera ema achane majupaha ema Satanás. Eta tacahe, eta Serpiente táijaracapa eta máitupajijiasiravayarehi ema Útsutsure eta macaetemaraivayarehi maratahairayarehi tamutu. Aquenucayare te tamutu avasareana maicha eta Serpiente.

3 Te étana machuti ema Útsutsure, tatiarihi eta majara eta ticapacahi. Tásihasera, tichavahi titareca, tinaracavarepa. Tacahé, eta náimairahi ena achaneana te tamutu avasareana, ichaperinehi eta nárami. Tásiha, náehicapa nasuapapa ema Útsutsure.

4 Natsiu cavarepa eta Serpiente, taicha eta náimairahi eta táijarasirahi eta máitupajijiasiravahivare ema Útsutsure. Tásiha, nacahepa mayehe:

—Tétavicavahi eta máitupajijiasiravahí ema maca. Nájinavare tiratahaimahi nacanara náquipaica éma — nacahepa.

5-7 Tacahé, ema Viya másapahi ema Útsutsure téjacahi te mávacure, ichape aquenuca, ticavanairipipa tayehe tamutu avasareana te juca apaquehe. Ema Viya vahi máicuñacavanehini eta masiñavavaisirahi, tímijachavahi Víyainahini. Tíñemahipivaca eta máechajisira, macaecaahirahi ema Viya étapa eta mapena. Macaecaahirare ena tiávihanahi te anuma. Énerichuvare mapanajiricavaca ena machanerana ema Viya. Máimicaratacavacapa, mavarairahi máimicapacavacaya. Cuarenta y dos caje eta macamichirahi ema Viya eta máimiyusemasirahi ema Útsutsure.

8 Eta acane te tépanavainapa eta apaquehe, tatiarihi eta libro tiama eta nalista ena titarecanaya te apana vítaresira. Macarataruhi ema nacaparuhi Cordero. Natarihisera ena apamuriana tájinahi eta nalista tayehe eta libro. Ena nani ena titsiucanahi ema Útsutsure.

9 Te evarahapuca ecaicutiara eta juca, tavaraha epane-rechaya ichape.

10 Mácani témeratacayare ema apana, énerichuvare éma te tacaicutiaravapa ticaeratayareva éma apanavare. Mácani

ticaparecahi, nacapacayareva éma. Eta tacahe, nácani machanerana ema Viya, tatuparaca nacamichayare tamutu, náimereca yátupina eta náehisirahi ema Viya.

<sup>11</sup> Tásicha, nímahavarepa eta apana sárare, táíñehiquenevare. Tiúchujica te amahe apaquehe. Eta juca sárare, macunahi ema achane ticaijare Falso Profeta\*. Eta juca, tatiarihihi eta apina eta tajihuana, tacuti eta tajihu eta uvesa. Étasera eta táechajisira tacutiahu eta tahu eta Serpiente Satanás.

<sup>12-14</sup> Énerichuvare ema Falso Profeta majupahahi ema Útsutsure. Muraca eta tasuapacareva eta mavanairipiana ema Útsutsure maicha ema Falso Profeta. Éma, maratahahi tímereca eta tiáramicareana. Maratahahivare macamirica eta yucu tiásihaya te anuma. Náimahahi namutu ena achaneana te juca apaquehe. Ichape eta náramirahi. Étavenehi eta juca táimeresirahi eta tiáramicareana, étainapa tivayuacaya ena achaneana, tisuapacarenapa titsiucacarenavarepa ema Útsutsure. Taicha náimahahi eta manarasirahi eta majara te tumare; tiápechava titarecahi. Tacahe, ema maca Falso Profeta macavanairipipa náepiyacaya eta máimahi ema Útsutsure, nasiñarajiya.

<sup>15</sup> Ema Viya macamichahi tamutu eta máichaqueñeana ema Falso Profeta. Vahi máicuñiacavánehíni eta máchanechirahi eta náepiyaruhi máimahi ema Útsutsure. Téchajicayare máicha. Eta juca nasiñaraji titupajijiacavainapa tivanereca, ánipa tacahe:

—Namutu tatuparacahi natsiucanu nútì. Nácani vahi návarahahini titsiucanuhini, ecapacavacayarehi —tacahepa.

<sup>16-17</sup> Tacahe, ema Falso Profeta macavanairipinapa nacamarca te navahu te vaure, te nanahupuca ena achaneana: ena amaperuana, énapa ena ichanaruana, énapa ena ichavicana. Tayanapane rícoanahipuca, páureanahipuca, libreanahipuca, mósoanahipuca. Námayarehi eta máijare ema Útsutsure étapa eta mayehe número. Énerichuvare macavanairipipa vahi nacuisapa nacujachapa eta navacharapiana ena marcareana. Ticatajivanainapa eta náiturusirayare eta nacamunuqueneana taicha vahi nacamarcahini.

<sup>18</sup> Tacamunuhi yátupina vipáneréquenehayare maicha ema Viya, apaesa vácaicutiara eta tacayemaquenehi tayumururevahi eta tuparaqui máijare ema Útsutsure eta 666. Éta, tacunahi eta máijare ema maca achane.

\* **13:11** Te pivarahapuca pecha eta apana, pitanuca eta capítulo 16.13.

# 14

*Eta najirasa ena 144,000 ena téhicanahi ema Cordero*

<sup>1-3</sup>Tacahe, nímahavarepa eta plaza ticaijarehi “Sántoquenehi Sión”, te mamirahu ema Viya, máejasirahi eta te trono, te návihahi ena cuátroana ecutiarareana énapa ena véinticuatroqueneana víyarahana tuparairucana. Nímahavarepa ema Cordero. Te machacaya natarihihi ena 144,000queneana téhicanahi éma. Éna, ticamarcavacahi te nanahuana eta máijare ema Cordero émapa ema Maiya. Nusamavarepa eta muraca ticaemahi te anuma tacutiyaréni eta muraca tirureca. Tásicha, títsivachavavarepa. Nusamapa ticapunueanahí eta camuriqueneana guitarrana. Tacahe, ena 144,000queneana tijiranahi te mamirahu ema Viya. Arapiruhi eta najirasahi. Nájina apanaina titucaina eta najirasahi. Nacarichu titucanahi ena 144,000queneana. Ena nani náuchucureanahí te namuri ena ticavasanahí eta juca apaquehe.

<sup>4</sup> Matapiravareanahí éna te mamirahu ema Cordero. Tájinavare váhiquene náechipejicavahíni, navirainahini esen túhusi. Náehicahi ema Cordero te jácani mapaisirana. Ena nani, ena náinapureanahí masantuchaqueneanahí ema Viya émapa ema Cordero.

<sup>5</sup> Tájina náimatiyahini eta náepiyahirahihini. Tájinaquene natapiravainahini te mamirahu ema Viya.

*Eta nametarapi ena mapanana ángeleana*

<sup>6-7</sup> Nímahavarepa ema émana ángele tiárarairicahi. Ticametarapihi eta téqueneha mame tarapi etá máichuaresirahi eta náeneuchiravaina ena achaneana tiávianahí te tamutu avasareana, apaechajiriruvaqueneana. Maitavacacainapa etá náitaresiraya nácani ena tisuapanahí. Muraca etá máichuaresirahi, ánipa macahe:

—Éneuchava etá epecaturana. Epicauchayare ema Viya, taicha éma tépiyacahi etá anuma, etá apa quehe, etá mar, étapa etá cáquiureana. Émaina ejiraucha, ecunachaya. Émaina etsiua. Taicha járajapainapa puiti etá máicuñasiraya ena achaneana máeneuchavarahana —macahepa.

<sup>8</sup> Tacahe, tiúchujicavarepa ema apana ángele. Émapavavare téchajica. Tiáramicare etá macayemaquene. Ánipa macahe:

—Tájinapa táipuina tacamitiaruinapa etá ichapequenehi avasare Babilonia, taicha téavicavahi etá tamutuirahi taicha etá tamauriqueneana. Tavyuacahi tamutu etá apana avasareana táichiraya etá tamauriqueneana, tacutihí súcani esena suétaviurequenehi etá sutuhusivahi, namutupahi svayuaca —máichapa.

<sup>9</sup> Te titapiricapa, émapavavarepa téchajica ema émana ángele, ema namápananehi. Muracavare eta máechajisirahi. Ánivare macahe:

—Tájinavarepa táipuina eta náicuñanayare ena tijirauchanahi ema Útsutsure étapa eta máimahi náepiyaruhi nasiñarajihí, énaripa ena tiámanahi eta mamarca te nanahuana étapa te navahuana.

<sup>10</sup> Muraca eta nacatajivairaya taicha ichape eta náimiyusemasirahi ema Viya. Ticaepujuquichacasianainapa eta te muracaquene yucu, táetiraráisina eta tamuruira. Muracaquenehi eta nasamira. Táitusiava, natsirihainapa eta máimara-rasira ema Cordero, énapa ena ángeleana.

<sup>11</sup> Máiichecuaraqureyare eta nacaicuñairayare. Tájina ticaemahaimahi eta yucu. Támutu sácheana, yátiana nacaheyare te yucu ena tijirauchanahi titsiucanahi ema Útsutsure, tiámanahivare eta mamarca, tacuna eta máijarehi ema nasiñaraji.

<sup>12</sup> Eta tacahe, ena machaneranahi ema Viya, ena tisuapanahi eta mavanairipiana, túmesamureanayare eta náehisiraya ema Jesús, puiti nacamichayarehi tamutu —máichapa ema ángele.

<sup>13</sup> Tacahe, nusamavarepa ema téchajicanuhi te anuma. Ánipa macahe:

—Piájuchayare eta juca numetaruvianayare: ¡Tétavicava eta náuricacarevaya ena táimicaparuanayare puiti juca vicaijuyeyare eta náehisirahi ema Viáquenu! —máichanupa.

Énerichuvare ema Espíritu Santo máichanupa:

—Jéhevare, najacapainapa eta náicuchihi taicha eta nacaemataneasirahi ema Viáquenu. Tájinapa nácamunuimahi, tinaracanainapa —macahepa.

### *Eta nacurujisiraya ena ángeleana ena achaneana*

<sup>14-16</sup> Te nésenicapa, nímahapa eta tijapu úcaji. Matiaríhihi ema támiquenepahi. Téjacahi éma te úcaji. Achanehi eta máimahi. Te machuti tatiarihihi eta mayehe corona oro. Németeaca titsecavaipa eta macurujisirayare eta trigo. Tásiba, tiúchucapa ema émana ángele te tajuhe eta Templo. Mapiaracapa muraca ema téjacahi tayehe eta úcaji. Máichapa:

—Puiti piyana. Picurujica namutu ena achaneana manerejiruanahi ema Viya, taicha tiyuriticavapa eta natuparaha. Piputuvahu\* —máichapa.

---

\* **14:14-16** Te pivarahapuca pecha eta apana, pitanuca Mateo 13.24-39, étapa te 24.30,31.

Tacahe, ema téjacahi te úcaji, tíjahúchavapa macurujicapa ena náequenereruanahi manerejiruanahi ema Viya. Macuchucavacapa eta te juca apaquehe.

<sup>17</sup> Tásiba, tiúchucavarepa ema apana ángele te tajuhe eta Templo te anuma. Németeaca matsecaripavare eta macurujisirayare, étapa eta uva<sup>†</sup>.

<sup>18</sup> Énerichuvare tiúchujicavarepa ema apana ángele eta te mesa tiámahi eta mayucuneasa ema Viya. Éma, téchahi eta yucu. Tacahe, mapiaracapa muraca ema matsecaripa eta macurujisirayare. Máichapa:

—Puiti piyana. Piputuvahu picurujica ena apamuriana achaneana te juca apaquehe. Tícuñacacareanapa ichape, taicha téavicavahi eta náichirahi eta tamauriqueneana. Vaipa ticuchapacarehini eta náeneuchiravaina<sup>‡</sup> —máichapa ema ángele.

<sup>19</sup> Tacahe, tiyanapa ema ángele. Macurujimurihapa ena achaneana tíchanahi eta tamauriqueneana. Tíñehiquenehi eta náepenirahi taicha títecápapa eta táñehiquene ecuñaraqui tiásihahi me Viya taicha eta náimiyusemasirahi éma. Tacajapapahecavacahi éna.

<sup>20</sup> Te tachachacu eta viávasa eta tacajapapahesihahi. Tiúchucapa eta náitine, tacuti eta cajacure. Étana metro eta táupenava. Trescientos kilómetro eta táunavayare.

## 15

*Ena siétequeneana ángeleana najacapapa eta siétequene ecuñaraquiana*

<sup>1</sup> Tacahe, te nésenicapa te anuma, nímahavarepa eta apana ecutiarare. Tétavicavapa eta táramicarevahi. Natarihihivre ena siétequeneana ángeleana. Ticatuparacasianapa éna eta nacamirisirayarehi eta siétequene ecuñaraquiana te apaquehe. Te táitavapa eta juca ecuñaraquiana, titavainavarepa eta masemanevahi ema Viya.

<sup>2</sup> Nímaha tativa eta ticutiyaréni táimahi eta une te ichapequene cáquiure. Tétavicavasera eta tajanunusira tacutihi eta espejo. Tásiba, tacutiyaréni eta yucu eta táimahi. Natarihihivre ena másapavarahanahi najirauchahini natsiucahipucaini ema Útsutsure étapa eta máimahi náepiyaruhi, váhivre náisapavahini nacamarcahini eta mamarca. Te tachacaya eta

<sup>†</sup> **14:17** Te juca, ema Juan máechajisihahi eta nacurujisirahi eta uva, tahi eta épire. Te jena avasare, eta nayeherepi ena achaneana, nácatayayajica eta uva te raveta, navarairahi nacuchuca eta tachi. <sup>‡</sup> **14:18** Ema ángele máimicutijiricahi eta tíñehiquene ecuñaraqui ticapacayare ena camuriqueneana achaneana étapa eta sáreana. Vuíchahasera étaína eta taequeneha ecuñaraqui.

une titupihanahi. Nacaratacahi eta nayeheana guitarrana máijararuana ema Viya.

<sup>3</sup> Tijiranahi eta jirasare majirasaini ema víyarahaini Moisés, mavanaraini ema Viya. Najirauchahi ema Cordero. Ani tacahehi eta jirasare:

“Píti ichapequenevihi aquenuca,

Tétavicava eta pítupajijiasirava.

Tamutuquenehi píturuequeneha.

Tétavicavapa eta táramicarevahi eta pépiyruanahí.

Tiúricacarehivare eta pinaquipairuanahí.

Vahi apanapanenejinahini eta péchajiriruvana.

Yátupihi eta piúriva.

Píti aquenucavihi, péchaya tamutu avasareana.

<sup>4</sup> Namutuhi tipicaviana, piti Tata.

Namutuvare ticunachaviana taicha piti yátupiquenévihi eta pisantuva, nájina nácutivihini.

Títecanayare nácani achaneana te tamutu avasareana.

Titsiucavianayare taicha náimahahi tatupiruvahi tamutu eta píchaqueneanahí”.

<sup>5-6</sup> Tásicha, nímahavarepa te anuma téjiacahi tamutu eta Templo. Nímahapa tiúchucanahi ena siétequeneana ángeleana te téqueneha cuarto te tajuhe, énaquenehi ena ticatuparahanahí eta siétequene ecuñaraquiana táequenereruyare tiúchujica. Eta namuirihana, amairiha eta lino tijapu tirapepeacavaca. Eta náitijuheana ichapemevaca, títecapavaca te natupana.

<sup>7</sup> Tásicha, nímahapa ema émana ecutiarareana nacuatronehi. Máijaracavacapa étasivaca eta escudilla oro ena siétequeneana ángeleana. Te tajuhe eta escudilla támaphi eta táñehiquene ecuñaraqui táicutiarahi eta masemaneva ema Viya. Éma, acanevacauquenehi eta máitaresira. Máimahapa tamutu eta tamauriqueneanahí náichaqueneanahí ena achaneana.

<sup>8</sup> Tacahe, nímahapa tijahúchavapa eta tajurusirahi eta majaraivahi ema Viya, ema acanevacaca eta máitaresirahi. Tétavicavahi eta mapicauchacarevahi taicha eta matumeva, maratahairahi tamutu. Tásicha, nájina tiratahaina tisiapaná te Templo, váhivare tímahacarehini eta tapajacura táichavenehi eta tavayuchiravahi eta majaraivahi. Tiámainucava te títitauchavapa eta siétequene ecuñaraqui táequenereruyarehi námaquenepahi ena siétequeneana ángeleana.

## 16

*Títitauchavapa eta ecuñaraquiana nacamiriruhi ena siétequeneana ángeleana*

<sup>1</sup> Nusamapa muraca eta mahu ema Viya tásihauquenehi eta téqueneha cuarto náuchusinehi ena siétequeneana ángeleana. Ticavanahianapa éna. Ánipa tacahe eta navanahi:

—Eyanapa ecamirica te apaquehe eta juca siétequene ecuñaraqui táíñehiqueneana tiávihanahi te escudilla taicha eta nusemanevahi —máichapa ema Viya.

<sup>2</sup> Tacahe, tiyanapa ema tínapuca ángele. Máepusaicapa te apaquehe eta ecuñaraqui tiávihahi te escudilla macarataruhi. Tacahe, ena achaneana tiámanahi eta mamarca ema Útsutsure, táichavenehi eta natsiusirahi eta máimahi nasiñarajih, témunahiricavapa táuchuacavaca éna eta caracha ticajachacarepa tijechevare, tacutiyareni eta espuntiu.

<sup>3</sup> Ema apava ángele máepusaicavarepa eta macarataruhi tayehe eta mar. Tacahe, eta une tíjahúchavapa ítiama, tijecheamapa. Tépenaracanapa tamutu eta sárarechichana ticavasanahi te mar.

<sup>4</sup> Ema apava ángele máepusaicavarepa eta macarataruhi tayehe eta cajacureana, te cáquiureana, étapa te tatavarapiana. Énerichuvare ítiamavarepa.

<sup>5</sup> Nusamavarepa ema máepusaicahi eta juca ecuñaraqui tayehe eta cajacureana. Macahepa éma:

—Tétavicavapa eta piúriva, piti Tata Vicaiyaquene, eta pícuñasiravacaipa puiti ena ticaviurevanahi. Yátupique-nevihi eta pisantuva. Píti pitiaríhiquenehi te tépanavainapa, puítiripa pinasirichuhi eta viyeho.

<sup>6</sup> Tícutichavanainapa puiti eta navarahauquenehi téraná eti ena tépusaicanahi eta náitine ena pichanerana táimica-paruana eta náehisiravihi píti, étapa eta nacametarairuirahi eta péchajiriruva. Puiti píjaracaipa eta náerirayare eta ítiama taicha naviurevanahi éna.

<sup>7</sup> Nusamavarepa eta mahu ema apava tayehe eta mesa tiámahi eta mayucuneasa ema Viya. Ánipa macahe:

—¡Tata Vicaiyaquene, téavicavapa eta vicunachiravi! Píti, téavicava eta pítupajijiasirava, píturuequeneha tamutu. Pitupiruvahi eta pícuñasiravacahi ena ticaviurevanahi. Vahi pémetavicháni —máichapa.

<sup>8</sup> Ema apava ángele máepusaicavarepa eta macarataruhi tayehe eta sache. Tacahe, eta sache tépanavainapa eta tavayuchiravayare tíjure, táijuchirapa eta apaquehe éná ema achaneana.

<sup>9</sup> Jéhesaréinehi, táetaviuchapa eta táijurevahi. Táijuchavacapa ena achaneana. Váhiquenesera náeneuchavahini, váhivare návarahahini náesenicahini ema Viya. Navayuchaichucha eta nusemanevahi. Nacajachapa ema Viya, ema ticavanairipipa eta ecuñaraquiana.

<sup>10</sup> Ema apana ángele máepusaicavarepa eta macarataruhi te tainahu eta mávasa capital ema Útsutsure, eta máejasihahi. Tacahe, ticutipa timapicupa te návihahi ena majupahana. Vaipa náimatiéquenehahíni tájahapuca eta náicharacavaya namutu ena machanerana. Ticapitiquiahechavanapa ena achaneana taicha eta tacativa nasama.

<sup>11</sup> Tacahe, tisemasamureanapa nacajachapa ema Viya taicha eta tacativahi nasama eta najarana nacarachana. Váhiquenesera téneuchavanáimahi mayehe ema Viya. Váhivare náinajicaimahi eta náichira eta tamauriqueuneana.

<sup>12</sup> Ema apana ángele máepusaicavarepa eta macarataruhi tayehe eta ichapequene cajacure ticaijare Eufrates. Tacahe, eta cajacure tiájicupa, apaesa máejerare eta nánucuiraya ena aquenucana tiásihanahi te tinapaica eta táuchusine sache, énapa ena suntaruana.

<sup>13</sup> Tásiha, nímahavacapa ena mapanaqueneana ticaetemarhianahi: ema Serpiente, ema Útsutsure, émapa ema Falso Profeta. Tiájajacanahi éna. Te najaca, tiúchucahi eta tavásiyaréni eta varutete. Éreananahi eta júcana, náchanevanahi ena mapanaqueneana.

<sup>14</sup> Éna, titupajijiacavanahi tíchanahi eta tiáramicareana tavayuaraquianahi nayehe ena aquenucana te tamutu avasareana. Navaraha nacurujicavacayare, énapa ena nayeheana ejército nasuntaruana apaesa namutu ticanaranaya ema Viya. Tíjahúchavasera muraca eta máquipapaisiravacainapa éma, taicha tétavicava eta maitupajijiasirava, máituruequeneha tamutu.

<sup>15</sup> (Nuti, tíjahúchavaya eta nítecapauchiraheyare éti. Váhisera tánecapacaremahi eta nítesira. Eta tacahe, tétavicava eta iúricacarevaya te ecunevahi, machu ímacariana eta nuchimapiraheyare, etsiriacaréipa.)

<sup>16</sup> Tacahe, ena mapanaqueneana éreanana nacurujicapa ena aquenucana énapa ena nasuntarurana tayehe eta vámahi ticaijare Armagedón te náechajiriruva ena israelítana.

<sup>17</sup> Ema téqueneha ángele nasiétenehi máepusaicapa eta mayehe escudilla te anuquehe. Tásiha, nusamapa muraca eta mahu ema Viya tiásihahi te trono tayehe eta Templo. Ánipa macahe:

—¡Títauchavapa puiti tamutu! —macahepa.

<sup>18</sup> Tacahe, tiúchucapa eta térameca. Ticaemapá. Tirurecapa. Tiyamuricapa eta apaquehe, muraca eta tayamurisira. Tájina tacuti eta tamuracava nasamasarehini eta acane eta táepaniravahi eta apaquehe.

<sup>19</sup> Te tamutu eta avasareana te juca apaquehe, tiáquipacavanapa eta pétiana. Tavetijipa eta ichapequene avasare

Babilonia. Tiáquipaicavapa tamutu eta pétiana. Mapana eta táejepahi eta apaquehe te tajuhe eta avasare. Taicha ema Viya máechavapa eta naviurevanahi ena tachichanaveana. Máimerecapa éma eta masemanevahi. ¡Tétavicavahi eta tamuracava eta táicuña!

<sup>20</sup> Énerichuvare, tamutu eta tiúrupuhiana téricapa. Eta cérroana témitiequenevarepa.

<sup>21</sup> Témiricavarepa eta ichapequene uvarequiana. Tájinavare tacuti eta táichapeva. Cuatro arroba eta tajitacarevavaca. Tásiha, ena achaneana tisemanaichucha, nacajachaichucha ema Viya, taicha tétavicava eta tamuracava eta ecuñaraqui, eta táemirisirahi eta ichape uvarequi.

## 17

*Esu esena túhusi téjacahi te tamaiquehe eta apanavare sárare tíñehi*

<sup>1</sup> Tásiha, tipauchanupa ema émana ángele nasietenehi ena ticaratacanahí eta escudillana. Máichanupa:

—Yare, nímechaviyare eta suícuñayare esu esena túhusi, tavayurevahi eta supecaturana. Ésu, tacunahi eta ichapequene avasare te tachausi eta mar.

<sup>2</sup> Ena aquenucana te juca apaquehe namutuhi suíturucavaca sucachanevaca éna. Suíchuhavare ena suvarahaqueaneanahí suíturucavaca tayehe tamutu eta tájiparacana tamaurqueneana —máichanupa.

<sup>3</sup> Tacahe, ema Espíritu Santo tímimahanuhi eta mavara-haqueaneana tímechanuya ema ángele. Ema ángele tiámanupa tayehe eta mávapahi apaquehe. Ánaqui nímahapa esu esena téjacahi te táinahu eta táñehiquene sárare, máchanevahi ema Útsutsure. Titsi eta táimahi. Te táquehe, amairiha eta ajureca táimijarechavahi, tímijachavahi Víyainahini. Siete eta tachutiana. Diez eta tajihuana\*.

<sup>4</sup> Esu suca esena, eta táimahi eta sumuiriha mularume étapa eta titsi. Tétavicavahi táurinavavacahi eta suyereruvana, amairiha oro étapa eta táurinaqueneana márijahichichana, étapa eta tiúrinana perla. Tásiha, te suvahu sucaratacahi eta ichape suéreresi oro. Tiámahi eta tájiparacana pecatana táñemahiqueneana suíchaqueneanahí eta suítaresirahi sutuhusivahi.

<sup>5</sup> Te suchuti, tatarihihi eta ajureca eta suíjaruhi, tayumururevachuchasera eta tacayemaquenehi: “Eta ichapequene avasare Babilonia, tacachichapa ena túhusiana. Táquenuyare eta tájiparacana táñemahiqueneana”.

---

\* **17:3** Te pivarahapuca pecha eta apana, pitanuca eta capítulo 13.1-8.

<sup>6</sup> Nucaicutiarapasera eta suícharacavahi esu esena ticavahahi ésu. Táecavahachahi taicha eta suérirahi eta náitineamaini ena machanerana ema Viya, ena suímicaparuanahi taicha eta náechajisihairahi ema Jesús. Eta nímairahi eta juca, ichaperinehi eta náramesirahi.

<sup>7</sup> Tacahe, máichanupa ema ángele:

—¿Tájaha tacayema piárameca? Numetacaviyare puiti eta tacayemaqueña etá juca pímaquenehi suyehe esu suca esena, étapa etá sárare superahi, eta siétequenehi tachuti, eta diésquenehi tajihuana.

<sup>8</sup> Eta juca sárare pímaquenehi, tanasiqueneripahineni acane, tájinaipahisera puiti. Tiúchujicayarevaresera tásihaya tayehe etá táupenaquene pusu. Ichape eta náramesirayare etá náimairayare ena achaneana, namutu ena tájinahi etá nalistahnini acane te tépanavainapa etá apaquehe, tayehe etá libro tiama etá nalistana ena náitareruanayare. Tatupiruvayaresera etá sárare tépenayare títaequenénapa.

<sup>9</sup> “Pismananuchaha. Puiti numetacaviyare etá tacayemaqueña etá pímaquenehi, te pivarahapuca picaicutiaraya. Esu esena tacunahi etá ichapequene avasare. Eta juca siétequene tachuti etá sárare tacunahi etá siétequene cerro távhahi etá avasare.

<sup>10</sup> Tacutiquene etá juca siétequene tachuti etá sárare náicutiaranahi ena siétequeneana aquenucana. Cíncanapapasera ena nájinaripa puiti. Matiarihisera ema émana aquenucaichaha puiti. Ema apuna vuíchaha títecaphi. Téhesera te máitecapapa ema téquenehayare, vaipa tiyeremahi.

<sup>11</sup> Étarichuvare etá sárare títareruinihi acane, tájinaripa hisera puiti. Éta, macunahi ema nahóchone ena siétequeneana aquenucana. Te máuchujicapa, majacapa etá návacureana ena siétequeneana aquenucana. Tíjahúchavasera etá máitaviraya.

<sup>12</sup> “Eta pímaquenehi diésquene tajihuana nacunahi ena apamuriana diésqueneana aquenucanayare. Vuíchahasera ticatuparacasiana. Najacapayaresera etá natuparahanaya ena aquenucanaya etá te návasana. Ánipirichusera nacaheyare etá nacachanerayare etá sárare.

<sup>13</sup> Ena nani diésqueneana aquenucana tínunana etá napareru. Náimicatacaya etá sárare etá aquenucairanahi te návasana.

<sup>14</sup> Tacahe, ena nani nacanarainapa ema Cordero. Váhisera nártahaimahi. Máitahacavacayarehi ema Cordero. Taicha éma, yátupiquenehi Rey, Aquenucahivare. Mavanecahi ena réyeana énapa ena aquenucana. Natarihiyareva - ena macachanequeneanayare éma. Nacanerejiquenehi etá máichuirahi ema Viya. Tásiha, yátupihi etá náehisirahi éma.”

**15-18** Tásiha, máichanuvarepa ema ángele:

—Esu esena túhusi pímaquenehi, tacunahi eta ichapequene avasare. Sucaetemaqueneanahi suítahacavacahi ena aquenucana te tamutu avasareana. Eta jena mar pímaquenehi te tachausi eta suéjasihahi esu túhusiquenehi, tacunahi eta náichapemuriva ena achaneana te tamutu avasareana. Eta diésquenehi tajihuana eta sárare pímaquenehi tacunahi ena diésqueneana aquenucana. Éna, nacatichayare esu túhusi. Téhesera te táequenepa eta juca, náitaracainapa ésu eta sucayehequeneanaini. Náepachiacainapa. Náquipaicayare tamutu eta supenana. Tásiha, eta náemachayare náijuchainapa te yucu. Eta nacutecacairaya, navaraha náimicataca ema Útsutsure, étapa eta nacamitiequenehaya esu túhusi, vahi tásihahini eta napanereruana éna. Émarichuhi ema Viya tíjarcavacahi eta napanereruanayarehi, náichirayare eta mavaraquenehi éma —macahepa ema ángele.

## 18

### *Eta táquipaisiravahi eta avasare Babilonia*

<sup>1</sup> Nímahavarepa ema apaña ángele tiúcupaicapahi másihahi te anuma. Muraca eta matuparahahi. Mamicauchaparinehi eta apaquehe eta majaraivapahi.

<sup>2</sup> Téchajicapa muraca, ánipa macahe:

—Tájinapa táipuina táquipairuvainapa eta ichapequene avasare Babilonia. Nájinapa nánasihini nacapenahini ánaqui. Énanecha ticapenanahi ena váinarajiana, étapa eta cágureana tacajachacarequeneana.

<sup>3</sup> Muracaqueneya eta táicuña taicha namutu ena achaneana te avasareana, téavicavahi eta tavayuasiravacahi eta túhusicare, étanecha nacasamurehi. Énaripa ena aquenucana, énerichuhivare nacahehi éna táemesiavahi. Énerichuvare, ena tíjararecarahiana eta téracare, téavicavaipahi eta náurisirahi tarricochavacaipahi eta tímitahacavacayare ena apamuriana —macahepa.

<sup>4</sup> Nusamavarepa te anuma eta mahu ema apaña ángele. Ánipa máichanu:

—Eti machaneranahi ema Viya, vahi ecuehica eta napecaturana ena achaneana te juca avasare. Iúchucavanesera, machu tavehahe eta táíñehiquene táicuñayare taicha eta napecaturana.

<sup>5</sup> Taicha téavicavapa eta táuruquechiravahi eta napecaturana. ¡Ániquehepa! ¡Ema Viya máimraracahi tamutu eta tamaeperajivanahi!

<sup>6</sup> ¡Puiti eti nuchamuriana ángeleana, ícuñacayare! ¡Íjarcayare muraca eta táitsivayare taicha tavayuaca náichahi eta tamauriqueneana ena tachichanaveana eta juca avasare! Cape juca náimicatajivachavacahi ena páureana. Puiti, ichapepanayareva eta íjarasiraya eta nátajivaya.

<sup>7</sup> ¡Émecharecayare muraca! Ichapena eta nacatajivaira taicha tétaficava eta náijarasiravahi eta nacaetemaraivahi eta napanereruhi: “Tájina níchiravainahini eta návihahi. Núti néchahi. Tájina nácamunuimahi. Vahi nucatajivahini” tacaheli eta napanereruanahi.

<sup>8</sup> Eta juca napanereruhi naviurevana eta táijahúchirainapa eta náicuñayare. Técuhanainapa ena tachichanaveanahi eta juca avasare. Ticatisamurevanainapa. Tíjuyare eta napenana, táimijuchavacainapa éna. Tépenaracanainapa namutu. Máijahúchahi máicuñacavaca ema Viya, máemereuchirahi eta tamutuirahi marataha —máichanupa ema ángele.

<sup>9</sup> Natarihivare ena aquenucana te avasareana, ena tavayuaruanahi eta túhusicare, táimiaquijiararuana eta tavayuasiravacahi. Éna, te náimahapa tipusisicapa eta yucu, tíyahanainapa ticatieuquenehavanainapa.

<sup>10</sup> Nayererequinainapa eta náimararasirayare táichavenénahí eta napisirayare eta yucu táicuñayare eta avasare. Tásiba, nacahenapa:

—Páurevisami, piti ichapequene avasare Babilonia. Tíchecuhapa puiti eta táijahúchiravapa eta pícuña —nacahepa.

<sup>11</sup> Énaripa ena comerciánteano tíjararecarahiana eta tájiparacana te avasareana, tíyahanayareva ticatisamurevanaya eta náimairayarehi eta táitavirapa eta avasare. Taicha nájinainapa tiviyechaimahi eta námaqueneasana:

<sup>12</sup> oro, plata, taurinaqueneana márijahichichana, perla, yerérucava taurinaqueneana, seda, apaimamajiqueneana mularumeana, títsimeana; énerichuvare eta náepiyaruana tijapu iápe ticaijare marfil, yucuqui taurinaquene, bronce, fierro, étapa eta mari ticaijare mármol.

<sup>13</sup> Étaripa eta canela, eta apana táijiyequeneana táhiana yucuqui nasucureana, eta tátuyucuqui inciensosare, tíjiyequeneana brillantina, perfumeana. Étaripa eta téracareana, eta acéiteana, eta harina te trigo. Étaripa eta sárareana ticavanacarevaca, eta vuiye, cavayu, burro, énerichuvare eta tinicacareana uvesa, vaca. Étaripa eta carro. Énaripa ena achaneana ticamusuracareana náijarareruanayarehi.

<sup>14</sup> Tiápechavavarepa téchajica ema ángele, ánipa maicha eta avasare:

—¡Jéhesare pítitátaji! Títavapa puiti eta picayeheraini eta táurinisiqueneana tinicacareana, tétavicavainehi eta tavayuasiravihi. Énerichuvare titavavarepa eta picayehhevaini eta tímahacareana táurinaqueneana pipincanillavainihi —máichapa.

<sup>15</sup> Énerichuvare ena nani tíjararecarahianaini eta juca tájiparacana ichapemuriqueneana tarricuchaqueneanahi eta avasare, nayererequinarieta etá náimarasirahi etá tacaicuñairayarehi etá avasare. Ticatisamurevanaripahi. Tíyahanaripahi.

<sup>16</sup> Tásicha, nacahepa:

—Páurevisami piti ichapequene avasare. Tétavicavainihi eta piúrinavainihi. Picutinihi esu esena etá táurinava etá sumuiriha lino, mularume, titsi etá tayehejaca etá sumuiriha. Eta piyereruva amairiha oro, táurinaqueneana márijahiana, perla.

<sup>17</sup> ¡Puiti, tétavicavapa etá táijahúchiravaipa témitiaca tamutu etá pímaqueneanainisamihi! —nacahepa.

Énerichuvare, namutu ena comandanteana táquenuanahi etá lancha, énapa ena pasajeroana, énapa ena marineroana, énapa ena ticaemataneanahi tayehe etá láñchana te mar, nanasipa namutu te tiyerehi.

<sup>18-19</sup> Eta náimairahi etá taquijarera etá yucu táijuirahi etá avasare, tipiararecanapa etá nacatiequenehairahi. Tíyahanapa. Nanacahivare etá máteji te nachuti. Tásicha, nacahepa:

—¡Páurevichapucaini! ¡Tamapuruji etá juca ichapequenení avasare! ¡Tájina apanaina avasarena tacutihini etá juca ichapequenénihi avasare! ¡Títavapa tamutu etá tarricovainehi virrichochiravainihi vimutu viti tímisiapanahi etá támahauqueneana viyereruasanahi te láñchana tayehe etá juca mar! ¡Puiti tétavicavapa etá táijahúchiravahi etá támemitiequenerahi tamutu! —nacahepa.

<sup>20</sup> Tiápechava téchajicapa ema ángele, ánipa macahe:

—¡Iúrisamurecarepa puiti eyehe eti iávihanahi te anuma, étipa eti apóstoleana, étipa eti profetana, emutu eti machaneranahi ema Viya! Taicha máitsirijiequeneharipa puiti ema Viya tamutu etá támecatajivasirahéhi —macahepa.

<sup>21</sup> Tacahe, tiúchujicapa ema émana ángele, máetaviure etá mamuracava. Manaracuhapa etá ichapequene mari ticheyarame. Máquijiecasa te une. Tásicha, macahepa:

—Tacaheyare etá tamuracavaya etá náquipaisiraya etá ichapequene avasare Babilonia. Tájinapa tímiapecháimahi náimahahini.

<sup>22-23</sup> Tamutu timatina etá te távinenihi. Tájinapa tímiapecháimahi tacasamahuhini etá irimaraquiana te cálleana etá

nacapununeraini eta guitarrana, sivivire, nacajane, étapa eta nachujana. Nájinavarepa ena ticachujarahianaini. Váipavare ticasamahuimahi eta piéstana ena araimarahiana. Nájinaina-varepa ena ticaematañeanaini eta tinicacareana. Títavainapa tamutu eta ematanecanaini. Étaripa eta tamicahuana, tamutupa témitiequenehena. Tamapurujipa eta náiturequene-hainihi ichape ena comercianteana, náijarareca eta tasimutu-queneana. Tamapurujivarepa eta tavayuasiravaca eta apamuriana avasareana téhicanahi éta, taicha puiti nájina ticataji-caimahi eta ichapeni avasare.

<sup>24</sup>Eta júcatataji avasare, ticaviurevahi eta nacapasiravacahi namutu ena machaneranaini ema Viya te juca apauehe, énaripa ena profetanaini –macahepa.

## 19

<sup>1</sup> Te táequenepa eta juca, nusamavarepa eta nahu ena camuriqueuneana achaneana tayehe eta anuma. Muraca eta najiraira. Ánipa nacahe:

“¡Aleluya pa puiti!

¡Tétavicavahi eta vicunachiravihi piti Tata!

Eta picatiuchirahavihi, pímerecahieta nacapasiravacahi nam etá pítupajijiasiravahi.

<sup>2</sup> Taicha títauchavapa eta náicuñahi ena ticaviurevana, vahi pémetaviacavacahini eta náemecharahiana ena túhusi-queneana tachichanaveanainihi eta avasare.

Ichape eta navayuareresirainihi ena achaneana te apanana avasareana eta túhusicare.

Puiti pítipa pítsirijiequenehahi eta nacapasirahavihi viti machaneranaini”.

<sup>3</sup> Tiápechavanavarepa tijirana:

“¡Aleluya pa puiti, taicha acanevacainapa eta tacaicuñairahi eta juca avasaretataji!” nacahepa.

<sup>4</sup> Tásicha, ena véinticuatroqueneana víyarahana tuparairucana énapa ena cuátroqueneana ecutiarareana tépuyumurihanapa te mamirahu ema Viya, ema téjacahi te trono. Natsiucapa eta nacunachirahi. Ánipa nacahe:

—¡Amén! ¡Aleluya!

<sup>5</sup> Tásicha, nusamavarepa eta mahu ema téchajicahi tayehe eta trono. Macahepa:

—Puiti etsiucayarepa ema Viya, emutu eti machanerana, étipa eti amaperuana epicaurahiana mayehe —máichapa.

*Eta táurinaquene mapiestara ema Cordero*

<sup>6</sup> Nusamavarepa eta nahu ena camuriqueuneana achaneana. Tijajacanahi. Tétavicavahi eta tamuracavahi eta najirairahi. Ánipa nacahehi:

“¡Aleluya pa puiti!

Taicha téjacaipa te mávacure ema Viáquenu, tinacuchavapa eta émairapa técha tamutu éma.

Taicha tétavicava eta máitupajijiasirava, tamutuquenehi máituruequeneha.

<sup>7</sup> ¡Vámutu vicunacha éma!

¡Tétavicava eta viúrisamurevapa puiti!

Taicha títauchavapa puiti eta macurujisirahavipa ema Cordero, tímicutijiricavahi te araimamuhu.

<sup>8</sup> Viti véhicanahi ema Cordero, tétavicavahi eta vipachinavaipahi máicha, tacutihí súcani araimayare ticaetupirihipa, sucamuirihahivare eta táurinaquene múiriare lino, tijapu tirapepemeca” nacahepa.

(Eta juca lino, táicutiarahi eta táurivahi eta víchaqueneana viti véhicanahi ema Viya.)

<sup>9</sup> Tacahe, máichanupa ema ángele:

—Piájuchayare eta juca: Tétavicavapa eta náuricacareva nácani nacaichuhasiqueneananahi tayehe eta táurinaquene mapiestara ema Cordero.

Tásicha, máichanuvarepa:

—Eta juca nímechaquenévana, yátupiqueneananahi máechajiruvanahi ema Viya —máichapa.

<sup>10</sup> Tacahe, népuyucapa te máivapechacaya ema ángele. Nuvarahapa nutsiucayarehini. Émasera máichanupa:

—Péchepucachucha. Vahi picutsiucanu. Taicha nútirichuhi picutiquenenuhi mavanaranuhi ema Viya, énapa ena pichamurianahi títachanahi eta mavanairipiana ema Jesús. Ema Viya, éma tatuparacavihi pitsiucayare. Taicha étirichuhi vicutiqueneana eta vicametarairuira eta máechajiriruva ema Jesús —máichanupa.

*Ema Jesús, macaperahi eta tijapu cavayu*

<sup>11-13</sup> Tacahe, nímahavarepa eta anuma téjiacahi. Tiúchucapa eta cavayu tijapu. Eta máijare “Tímimatirahi me Viya”\* ema ticaperapahi éta. Éma, yátupiquene tíaurahi; taicha éma, tatupiruva eta mahaquenucavahi. Éma, macatiuchavacahi ena náuriqueneananahi. Énasera ena tíchanahi eta tamauriqueneana, muraca eta máicuñasiravacahi. Étapa eta macanarairavacahi ena mánarana, vahi macapacavacaimahi ena tájina naviurevaina. Énasera ena nacaviurevanahi, máitaequenahavacayare. Eta tacahe, eta mamuiriha ticaepapamehi te iti. Eta máuquihana timuruhevaca tacutiyareni eta yucu.

\* **19:11-13** Te pivarahapuca pecha eta apana, pitanuca eta Juan 1.1-8.

Te machuti ticayehehi eta camuriquene coronana. Tatiarihivare eta ajureca tiámahi eta apana máijare. Macarichusera ema téchahi eta tacayemaquenehi eta ajureca.

<sup>14</sup> Náehicapahi ena mayeheana ejército, tiásihanahi te anuma. Namutu ticaperavaca eta cavayu tijapu. Eta namuirihana, amairiha eta táurinaquene lino tijapu.

<sup>15</sup> Te majaca ema tínapucapahi, tiúchucapa tavasimahiyaréni eta tacasiriquene espada eta macapasihayare ena mánarana. Macaratacahi eta matsucurupa fíerroqui eta macurujisirvacaya. Mácatayayajicavacayare ena mánarana tacutiyare eta nácatayayajisirahi eta uva eta nacuchusirahi eta tachi táitivequenehi. Éta tímereuchayarehi eta tamuracavayare eta náicuñaya, taicha téavicavahi eta náimiyusemasirahi ema Viya ema máitupajijihaquenehi, máituruequenehavare tamutu.

<sup>16</sup> Tatiarihivare eta ajureca te tacheyarapi eta mayehe capote tépacuchahi eta mapaheana. Eta taechajiriruva eta ajureca, ani tacahehi: “Éma yátupiquenéhi Rey, Aquenucavare. Mavanecahi ena réyeana énapa ena aquenucana”.

<sup>17</sup> Nímahavarepa ema ángele titupihahi te tamirahu eta sache. Mapiaracavacapa eta cágureana tiárarairicaráhiana te anuquehe. Ánipa macahe:

—¡Yare, emutu eti cágureana, iúrujicava! Enicayare eta táurini-siquene tinicacare máeniruheyare ema Viya.

<sup>18</sup> Enicayare eta náecheanaini ena aquenucanaini comandanteanaini, ena ajairanaini tímijachavana túmeana, énapa ena nayeheanaini ejército nasuntaruranainipahi, étapa eta taeche eta cavayu naperanaini. ¡Vénicaheyare namutu éna! —macahepa.

<sup>19-20</sup> Tacahe, nímahavarepa ema Útsutsure, énapa ena apamuriana majupahana aquenucana te avasareana, énapa ena nayeheana ejércitoana. Matiarihivarehi ema Falso Profeta, ema tímerecaparacainihi eta tiáramicareana, mavayuaraquianahi nayehe ena achaneana eta náispiravayarehi tica-marcana, natsiusirayarehiva eta máimahi ema Útsutsure. Tacahe, namutu ena náurujiruvanahi ticanaranahi ema ticaperahi eta cavayu tijapu énapa ena téhicanahi mayeheanapahi ejército. Tacahe, ena ángeleana nacaratacapa ema Útsutsure, émapa ema Falso Profeta. Tásiha, ena apinana náitareruichaha náepujuquichapa tayehe eta táijurequene yucu tae-tirara-isina eta tamuruira. Éta nacaicuñaiyahi.

<sup>21</sup> Tásiha, ema ticaperahi eta cavayu tijapu, máijahúchapa macapapajicavaca ena suntaruana mánaranahi. Eta macaparaqui eta tacasiriquene espada táuchurehi te majaca.

Tásiha, járajapapa eta camuriquene cágureana, tanicapa eta náecheanaini. Tisatuhevacapa.

## 20

*Eta táichavaqueneyava eta mil año*

<sup>1</sup> Nímahavarepa ema émana ángele másihapahi eta te anuma. Mámipahi eta ichapepi cadena, étapa eta llave, tacaerataiyayare eta táupenaquene pusu.

<sup>2</sup> Tacahe, ema ángele macaratacapa eta táíñehiquene Serpiente, eta ticaetemarerecahi acane, émarichuhi ema Váinaraji Satanás. Tacahe, ticaitihapa ema Satanás tayehe eta ichapepi cadena. Mil año yare eta macaitihairayare.

<sup>3</sup> Tacahe, ema ángele máiyaracuhapa éma eta te mávacu pusu táupenaquenehi. Manacapa eta llave, máerataequenehapa. Manacavarepa eta ajureca, ánipa tacahe: "Machu évejiaca eta juca tapaja". Tayerevayare eta mil año, vahi ticaetemarecaimahi nayehe ena achaneana. Te táequenepasera eta mil año, tiúchujicaina varepa eta ticaetemarecaina varepa, ánipinesera.

<sup>4-5</sup> Tacahe, nímahapa ena achaneana náechepureanahi nacaparuana inih. Éna, táimicaparuanahi eta náehisirahi ema Jesús, étaripa eta nacometarairuirahi eta maechajiriruva ema Viya. Ena nani, vahi náepuyumirauchahini ema Útsutsure, váhivare natsiucahini eta máimahi nasiñarajih ena apamuriana achaneana, váhivare návarahahini nacamarcahini eta te nanahu étapa te navahu. Ena nani, ena náinapurehi téchepucana te tamirahuichaha eta mil año. Nímahapa eta náejasiraipa te trono, catuparahana nápa éna, juéseanari pa. Mil año eta nacatuparahairayare. Énasera ena apamuriana náepenaqueneanapa masuapajirairahanainihi, vuíchaha téchepucanaimahi. Tiámainucava te táequenénapa eta mil año, napaenumavainapa téchepucanayare.

<sup>6</sup> ¡Tiúricacareanayare ena nani tiápechavanayare titarecana puiti juca! Masantuchainapa ema Viya. Vaipa tiápechavanimahi tépenana. Vaipa ticaicuñanaimahi eta te táijurequene yucu. Tiyujaracarahanaya mayehe ema Viya, étapa me Cristo. Aquenucarahanayare, taicha ema Cristo máijara-cainapa eta natuparahana nayare. Mil año eta nacatuparahairayare.

<sup>7</sup> Tásiha, te táequenénapa eta mil año, tiúchucaina varepa ema Satanás tayehe eta macaerataiyahi.

<sup>8</sup> Tépanavainavarepa ticaetemarerecayare nayehe ena achaneana te tamutu avasareana. Étaripa eta apinaquene avasare ticaijare Gog étapa eta Magog, macaetemaresihayare. Mayurucavacainapa eta

nacatianasiraya ema Viya. Tásiha, ticurujicacanainapa ena nayeheana ejércitoana. Tétavicavainapa eta nasimutuvayare. Vaipa titupachacareana eta nasimutuvahí.

<sup>9</sup> Tacahe, tiyananapa. Ichapequeanapaine eta nayanine, taicha eta nasimutuvahí. Nacapayacayarehi eta nachayasirayare eta avasare máemunaruinihi ema Viya, návihahi ena machanerana. Émasera ema Viya, enevanepa máitaequenehavacahi. Tiúcupaicapa eta yucu tiásicha te anuma, tájuchavacapa namutu. Nájina tacaemachaquenéna.

<sup>10</sup> Tásiha, ema Satanás ema tivayuarecainihi, nacaratacapa náepujuquichapa tayehe eta tájurequene yucu, táetiraraísina eta tamururia. Étaripa eta mávihahi ema Útsutsure, émapa ema Falso Profeta. Tájina nanarasiraimahi. Tamutu sácheana, yátiana eta nacatajivairaya, máichecuaraquireya.

*Étapa tiámahaviyare eta víchaqueneanahi vicaevatainapa tayehe etá viávihayare*

<sup>11</sup> Nímahavarepa eta ichapequene trono tijapu. Téjacahi ema Viya tayehe. Tétavicavahí eta máramicarevahí. Eta nímarasirahí éma, némitiacapa. Vaipa necha távihapuca návihahi téhepuca anuma, téhepuca apaquehe.

<sup>12-13</sup> Nímahavarepa namutu ena náepenaqueneanaini: ena amaperuana, énapa ena ichanaruana, énapa ena ichavicana. Taicha tichavanahí eta náchanevana namutu, téchepupujicanahí éna tayehe jácani náepenineanainipahi. Namutu titupihanahí te mamirahu ema Viya téjacahi te trono. Tásiha, tatiarihi eta libro tiama eta nalistana ena náitareruanaya. Tatiarihivare eta apamuriana libro tacajuiyahi eta náichavaquenevanahí ena achaneana. Ena ángeleana náechajicuhapahi. Nácani náichahí eta tamauriqueneana, étapa tivuchahi eta nacayaseserehirayarehi, nacaicuñairayare. Te tivayuchapuca eta napecaturana, muraca eta náicuñayare.

<sup>14-15</sup> Eta nacaicuñaiyahi eta tájurequene yucu, táetiraraísina eta tamururia. Namutu ena tájinahí eta náijarénahíni tayehe eta libro tiama eta nlista ena náitareruanayare, náepujuquichapa tayehe eta tájurequene yucu, tamutu eta náqueheana étapa eta náchanevana. Maitavacacainapa eta nacatajivairayare. Maitujianainapa tayehe.

## 21

*Ticasipainapa etá anuma étapa etá apaquehe*

<sup>1</sup> Nímahavarepa eta tacasipairaripahi, tamuturipahi arairu eta anuma étapa etá apaquehe. Tájinapa eta ichapequene une mar.

<sup>2</sup> Tásiha, nímahavarepa núti tiúcupaica etá tiúrina avasare. Ticaijarehi Arairu Jerusalén. Tétavicavahí etá tasantuva,

taicha tásihapahi te anuma te mávihahi ema Viya. Tiúrinapahi eta tacaetupirihirahi, tacutihi te ticaetupirihi esu araimayare.

<sup>3</sup> Nusamavarepa muraca eta mahu ema ángele, tiásihahi te anuma. Ánipa macahe:

—Puiti, ema Viya macucupaicapa eta mapena te juca apauehe. Áninapa macavasaya. Tiávahácahénapa eti achaneana. Yátupiquenénapa Ecaiyaqueñeyea éma.

<sup>4</sup> Tacahe, ema Viya macamitiasinaheyare eta íyairana. Váipavare épenaimahi. Váipavare ecatisamurevaimahi. Tájinapa ticaiyacahémahi. Váipavare ecatajivaimahi taicha tájinapa tiviuchahémahi —macahepa ema ángele.

<sup>5</sup> Tacahe, nusamavarepa eta mahu ema Viya ánipa macahe:

—Puiti tépanavapa arairu, tamutupa ticaitsiva nicha nútí —macahepa.

Tásicha, máichanuvarepa ema ángele:

—Piájuchayare puiti eta juca, taicha yátupiqueneyea eta táichararacavaya. Tamutuyare títauchava. Jéhevare eta tisuapacareana —máichanupa.

<sup>6</sup> Ánivarepa macahe ema Viya:

—Títauchavapa puiti tamutu eta nupanereruana. Nútira néchahi tamutu eta táepaniravahi eta apauehe. Nútiri-chuvare néchahi eta táimiyaniravahi tiuri. Puiti nútí nítachaupa tamutu. Eti emaunehi, nútí níjaracaheyare eta máitavacaca une ticaitarecarahi. Tájina vahi evacharecaimahi.

<sup>7</sup> Tacutiquene, eti ecamichanahi, ímiyanavahi eta éhisiranuhi, níjaracaheyare tamutu eta júcana ícuchianayarehi. Nútí ecaiyaqueñeyea, taicha nuchichaheyare éti. Nútí néchaheya éti.

<sup>8</sup> Ticaicuñanayaresera namutu ena tipiturijiana, ena masuapajirairahana, ena máeperajiana, ena ticapahiana, ena túhusiana, ena iápemareana, ena ticasíñarajiana eta achanemirana, énapa ena tépiyahirahiana. Ticaquijianayare namutu éna tayehe eta náicuchi táijurequene yucu máitavacaca eta tamuruira, tátetiraraísina eta tamuruira. Váhiqene tiúchucanaimahi tayehe —macahepa.

### *Eta arairu avasare Jerusalén*

<sup>9</sup> Tacahe, tipauchanupa ema émana ángele nasietenehi ena ticaratacanahi eta siétequene escudilla tiámapahi eta siétequene ecuñaraquiana táíñehiqueneana. Tásicha, máichanupa:

—Yare. Nímechaviyare eta avasare, návihahi ena machanerana ema Cordero. Tímicutijiricavahi esu araima sucaetupirihiquenehi eta suítauchiravayare —máichanupa.

<sup>10</sup> Tásicha, ema Espíritu Santo tímimahanuhi eta mavara-haquene tímechanuya ema ángele. Ema ángele tiámanupa eta te tápusi eta ichapequene cerro anuquehequene. Tímechanupa eta tácupaisirahi eta avasare Arairu Jerusalén. Tétavicavahi eta tasantuva taicha tásihahi te anuma te mamirahu ema Viya.

<sup>11</sup> Eta juca avasare, tétavicavahi eta tajaraivapahi taicha tiámahi eta majaraivahi ema Viya. Eta táimahi eta tajaraivahi tacutiyareni eta tajanunusira eta márijahi tijararacahi.

<sup>12</sup> Te tachachacuana eta avasare, tatiarihi eta tacuti yúchama tímítutuche. Anuquehe eta táichapeva. Tatiarihi eta dócequene tapajacurana, távhahi eta ajureca náijare ena dócequeneanaini náchucanaini ena israelítana. Natiarihivre ena ángeleana tayehe eta tapajacurana.

<sup>13</sup> Tatiarihi mapana tapajacura te tinapaica eta táuchusine eta sache. Mapanavare tapajacura te tinapaica eta cajaha. Mapanavare tapajacura te tinapaica eta vana. Tásicha, eta mapanaquenevare te tinapaica eta tasiapine eta sache.

<sup>14</sup> Te apaquehe eta yúchama, tatiarihi eta doce márimeana táejahameruanahi eta yúchama. Támahi eta dócequene náijareana ena apóstoleana mayeheanahi ema Cordero.

<sup>15</sup> Ema ángele ema téchajicanuhi macaratacahi eta máicutiriqui úruqui, máicutichihayare eta tapajacurana étapa eta yúchamana.

<sup>16</sup> Eta avasare falaru eta táimahi. Eta táunava ticuticacahi eta tajuhe. Dos mil doscientos kilómetro eta táichapeva eta avasare. Ticuticacahi eta táunava, eta tánueva, étapa eta tajuhe.

<sup>17</sup> Máicutichavare eta yúchama. Sesenta y cuatro metro eta tánueva.

<sup>18</sup> Eta yúchama amairiha mari jaspe timájumeana. Eta avasare amairiha eta yátupiquene oro. Tijanunucahi tacuti eta cristale eta tajarahivahi.

<sup>19</sup> Eta márimeana tachunusipévanahi eta yúchama, tatiarihihi eta taurinaqueneana mari. Eta tínapuca tacayehehi eta mari ticaijare jaspe. Eta apana tacayehehi eta ticaijare zafiro. Eta apana tacayehehi eta ticaijare ágata. Eta apana tacayehehi eta ticaijare esmeralda.

<sup>20</sup> Eta apana tacayehehi eta ticaijare ónica. Eta apana tacayehehi eta ticaijare cornalina. Eta apana tacayehehi eta ticaijare crisólito. Eta apana tacayehehi eta ticaijare berilo. Eta apana tacayehehi eta ticaijare topacio. Eta apana tacayehehi eta ticaijare crisoprasa. Eta apana tacayehehi eta ticaijare jacinto. Eta téqueneha tacayehehi eta ticaijare amatista.

<sup>21</sup> Eta dócequene tapajana tacayehehi eta doce perla. Tayehepachuhi eta tapaja eta étana perla. Eta tínapuca calle,

tacayehe eta yátupiquene oro, tijanunucahi tacuti eta cristale eta tajarahivahi.

<sup>22</sup> Te jena avasare, tájina nímahahini eta Templo nayujarasirarénahini. Tájina tacamunuhini eta nayujarasirareyare taicha matiarihihema Viya máitupajijihaquene máituruequenehavare tamutu, émapa ema Cordero. Návaháruhi namutu.

<sup>23</sup> Tacutiquene, vahi tacamunuhini eta sache étaripa eta caje eta tamicauchirainahini eta avasare. Taicha tamicauchahi eta majaraiva ema Viya, émapa ema Cordero.

<sup>24-26</sup> Tájina táimatiyaimahi ticaerata eta tapajana, taicha tájina timapicuina tayehé, tájinavare yátina. Tásicha, namutu ena achaneana te apanana avasareana macuchucureanahí ema Viya, ichape eta napicauchirayare eta Araíru Jerusalén, ichapevare eta nacunachirayare. Tisuapajirahianayarehi tayehé eta vanairipiana tásichaqueneanahí eta juca mávasa ema Viya. Énerichuvare ena aquenucana te avasareana, ichape eta námvahuanayare me Viya te jena avasare mávihahi éma.

<sup>27</sup> Tájina náimatiyaimahi tisiapaná ena nachipejiqueneana énaripa ena tícharahiana eta tamaeperajivaqueneana énaripa ena ticaetemarahiana. Nacarichu tatuparaca tisiapanayare ena tatiarihi eta náijareana tayehé eta libro macarataru ema Cordero, tiama eta nalista ena náitareruanayare.

## 22

<sup>1</sup> Tásicha, ema ángele tímechanuvarepa eta tapachinaquene cajacure. Tétavicavahi eta tacaitarecaraivahi eta tahanera. Tacutiyarení eta cristale eta tajararaesira. Eta táuchusihahi eta mayehe trono ema Viya, émapa ema Cordero.

<sup>2</sup> Tacahe, tatiarihihi eta yucuquiana, ticaitarecarahi eta tahi. Eta távihahi te enumuhuiyapahi eta tínapuca calle, te tachausipahivare eta cajacure. Tásicha, dócehe ticahi te étana año. Cájepachu eta tacahira. Ipurujivare eta tapacaji, tacanaraca ena achaneana te avasareana.

<sup>3</sup> Tájinapa tímiapchaimahi tiviuchaimahi ena achaneana ticavasana tayehé eta juca avasare, máejasihahi ema Viya, émapa ema Cordero. Vimutu viti mavanaranahí, máitavacayarehi eta vijirauchirayarehi, vitsiusirayare.

<sup>4</sup> Vímararacayare eta mamira tamutu sácheana. Vicamarcayare eta máijare te vinahu.

<sup>5</sup> Aquenucahaviyare. Máichecuaraquireya eta vicatuparahrainayare. Ánaqui tájinapa yátina, tájinainapa eta timapicu. Vaipa vicamunuimahi eta tajaraiva eta sache. Váhivare vicamunuimahi eta vimícahu. Taicha tamicauchayare eta majaraivahi ema Viya.

*Tiánehipa eta máitesirayare ema Jesucristo*

**6** Máichanuvarepa ema ángele:

—Eta juca nímeruvihi, yátupiqueneya eta táichararacavaya. Tamutuyare títauchava. Jéhevare eta tisuapacareana. Taicha émarichuhi ema Viya tivanecanuhi eta nímitusiravi píti. Acane ema Viáquenu máimitucavacahi ena profetana eta mapaneruana. Puiti mavaraha nímechaheyare eti mavaneranahi eta taequenereruhana mapaneruana, tayehe eta táijahúchirainapa eta táichavaquenevaya.

**7** Énerichuvare ema Viáquenu máichahéhi: “Níjahúchavanénapa nútijapa”.

¡Tétavicava eta náuricacarevaya ena tisuapanahi, napane-requenehairahi eta nímechaviqueneanahi, étaripa eta piájure-queneanahi te juca libro! —macahepa ema ángele.

**8** Tétavicava eta náramirahi nútí eti nímaírahi tamutu eta júcana, nusamirahi nuti Juan. Tásiba, te tamutupa, népuyucapa te máivapeana ema ángele ema tímechanuhi eta juca. Nuvara-hapa nutsiucayarehini.

**9** Émasera máichanupa:

—Péchepucachucha. Vahi picutsiucanu. Taicha nútirichuhi picutiquenenuhi mavanaranuhi ema Viya, énapa ena pichamurianahi ena ticametarairuana eta máechajiruvana ema Viya, énaripa ena tisuapanahi tamutu eta tacajuqueneanahi te juca libro. Éma tatuparacahi pitsiucayare ema Viya —máichanupa.

**10** Énerichuvare máichanuvarepa:

—Vahi picuañaucha. Pimetajirica eta juca pimetacasivanahi eta máechajiriruva ema Viya piájuchaqueneana eti te juca libro, taicha tiánehipa eta taitauchiravayare tamutu eta táicharacavayarehi.

**11** Énasera, nácani váinarajanahi, vahi picucamesavaca. Náimiyana vachaha naicha eti navainarajiva. Nácani tíchanahi eti tamauriqueneana, náimiyana vachaha naicha eti tamauriqueneanahi. Nácanisera tíchanahi eti tauriqueneana, tatuparacahi náimiyana vachucha naicha eti tauriqueneana. Nácani matapiravareanahi te mamirahu ema Viya, náimiyana vavare náuri eti mayehe —máichanupa.

**12** Ánivare macahe ema Viáquenu:

—Nútijapavanénapa. Námayarepahi eti náijaracasianayrajiva. Nácani tíchanahi eti tamauriqueneana, náare ena ticaemata neacanuanahi eti náitaresirahi te juca apaquehe. Énerichuvare námayarepahivare eti nayeheanayare ena masuapajirairahana.

<sup>13</sup> Nútira néchahi tamutu te tépanavainapa eta apaquehe. Nútirichuvare néchahi eta táimiyaniravahi tiuri. Puiti núti nítouchayare tamutu —macahepa.

<sup>14</sup> Tétavicava eta náuricacarevayare nácani tépachinachana eta náchanevana, tacuti te ticasipajihana eta namuirihana. Éna tatuparacahi nanicayarehi eta tahi eta yucuqui ticaitarecarahi. Tatuparacahivare nasiapayare eta Araíru Jerusalén.

<sup>15</sup> Énasera ena masuapajirairahanahi vahi titujicavanaimahi tisiapaná. Nanasiyare te aneca, énapa ena iápemareana, ena túhusiana, ena ticapahiana, ena ticasíñarajiana eta achanemirana, énerichuvare ena tiúricanahi tépiyahirahiana ticaetemarahiana.

<sup>16</sup> Macahevare ema Viáquenu:

—Nuti Jesús, nuvanecahi ema nuyehe ángele máimicaeche-rachayarehi tamutu eta juca numetarapiana puiti eyehe eti nuchanerana te avasareana. Núti, yátupinuhi Reyhi ecucha-paquénehi, mavanerunuhibare ema Tata. Tétavicavahi eta nujaraivahi taicha eta aquenucairanuhi ichape —macahepa.

<sup>17</sup> Ema Espíritu Santo énapa ena téhicanahi ema Cordero, tíchua recana éna:

—Yare, epauchahavi —náichapa.

Énapa nácani tisamanaya eta juca ichuárapi, énerichuvare éna náichua recavare:

—Yare, epauchahavi —náichapa.

Énapa nácani timauneanayare, náiteca apesa náera eta une ticaitarerahí. Tájina vahi navacharecaimahi.

<sup>18</sup> Emutu eti esamayare eta juca mame tarapiana ema Viya tacajuqueneanahi te juca libro, nuvaraha numetacahe nútí: Nácani navayuyupicayare eta táchajisihaqueneanahi eta juca libro, énerichuvare ema Viya mavayuchinayare eta nacatajivairayare tayehe eta juca ecuñaraquianayare táchajisihaqueneanahi.

<sup>19</sup> Énerichuvare ecaunechava eta iáñau chira eta táchajisihaqueneanahi te juca libro, machu máñauchahe ema Viya eta es-iapira eta juca mávasa sántoquenehi, machu vahi macuenicahe eta tahi eta yucuquiana ticaitarecarahiana, étaripa nímaha-queneanahi nájurequeneana te juca libro.

<sup>20</sup> Émarichu ema Viáquenu titametacahi tamutu eta júcana. Énerichuvare máicha hehi:

—Yátupi nútijapavaneyare —macahehi.

Jéheyavapuca, Tata Jesús! ¡Pítecavanepaini! Amén.

<sup>21</sup> Ani táchecuiya eta juca nájurehi. Nuyaseuchaheparaca emutu éti me Viáquenu Jesucristo, táchetaviuchahini eta iúricacrevaya máicha.